


Quiarinio pueyaso rupaa pa jiyaniijia

Jesucristojiniji pueyano rupaajinia



New Testament in Arabela (PE:arl:Arabela)

Quiarinio pueyaso rupaa pa jiyaniija Jesucristojiniji pueyano rupaajinia New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 11 Nov 2022 from source files dated 29 Jan 2022

90034700-94c6-5f48-ae9c-2383843fed68

Contents

| | |
|------------------------|-----|
| MATEO | 1 |
| MARCO | 111 |
| LUCAS | 178 |
| JUAN | 291 |
| MIISHANO | 372 |
| ROMA | 485 |
| 1 CORINTO | 536 |
| 2 CORINTO | 591 |
| GÁLATA | 625 |
| ÉFESO | 646 |
| FILIPO | 664 |
| COLOSA | 677 |
| 1 TESALÓNICA | 687 |
| 1 TESALÓNICA | 697 |
| 1 TIMOTEO | 702 |
| 2 TIMOTEO | 716 |
| TITO | 726 |
| FILEMÓN | 732 |
| HEBREO | 735 |
| SANTIAGO | 777 |
| 1 PEDRO | 789 |
| 2 PEDRO | 804 |
| 1 JUAN | 813 |
| 2 JUAN | 824 |
| 3 JUAN | 826 |
| JUDAS | 828 |
| NIQUISHANO | 832 |

MATEO NAAJIOTASANO JESUCRISTOJINIJI

*Jesucristo supuetanaajiniji pohuatasano
(Lc 3.23-38)*

¹ Jesucristoori supuetana Abraham jiuhuacuajinio supueno quiquiaari, supuetana David niquiohuacuajinionio. Nioori Jesucristo supuetanaa sesaca. Naa quiquiaaritij:

² Abrahamri Isaac que quiquiaari. Isaacri Jacobo que quiquiaari. Jacoboori Judá que quiquiaari, tapueyocuaca quejuhuaj. ³ Judaari Fares que quiquiaari, Zara quejuhuaj. Cuno pojori nucuaari quiquiaari Tamar, Judá niquiocua. Faresri Esrom que quiquiaari. Esromri Aram que quiquiaari. ⁴ Aramri Aminadab que quiquiaari. Aminadabri Naasón que quiquiaari. Naasónri Salmón que quiquiaari. ⁵ Salmónri Booz que quiquiaari. Booz nucuaari quiquiaari Rahab. Boozri Obed que quiquiaari. Obed nucuaari quiquiaari Rut. Obedri Isaí que quiquiaari. ⁶ Isaiiri David que quiquiaari. Davidri Israel pueya jiyaniijia quiquiaari. Davidri Salomón que quiquiaari. Salomón nucuaari coteenu quiquiaari Urías niquiocua.

⁷ Salomónri Roboam que quiquiaari. Roboamri Abías que quiquiaari. Abíasri Asa que quiquiaari. ⁸ Asaari Josafat que quiquiaari. Josafatri Joram que quiquiaari. Joramri Uzías que quiquiaari. ⁹ Uzíasri Jotam que quiquiaari. Jotamri Acáz que quiquiaari. Acázri Ezequías que quiquiaari. ¹⁰ Ezequíasri Manasés que quiquiaari. Manasésri Amón que quiquiaari. Amónri Josías que quiquiaari. ¹¹ Josíasri Jeconías que quiquiaari, tapueyocuaca quejuhuaj. Jiyacari-tij, Israel pueyapueeri quioosaaquiaari Babilonia jiyajiniara. ¹² Babilonia jiyajinia, Jeconíasri tii mueratequiaari Salatiel. Salatielri Zorobabel que quiquiaari. ¹³ Zorobabelri Abiud que quiquiaari. Abiudri Eliaquim que quiquiaari. Eliaquimri Azor que quiquiaari. ¹⁴ Azorri Sadoc que quiquiaari. Sadocri Aquim que quiquiaari. Aquimri Eliud que quiquiaari. ¹⁵ Eliudri Eleazar que quiquiaari. Eleazarri Matán que quiquiaari. Matánri Jacobo que quiquiaari. ¹⁶ Jacoboori José que quiquiaari. Joseeri María niyaca quiquiaari. Cuno Maríari Jesu nucua quiquiaari. Jesu sesa tarajanu- uri quiquiaari Cristo. Nioori pueyano rupaajinia sequeya “Pueyaso jiyarosano Jiyaniijiarano”.

¹⁷ Naacuajitij, Abrahamjiniji, catorce supuetanaari quiquiaari Davidta. David nuhuaji, socua catorce

supuetanaari quiquiaari. Jiyacaritij, Israel pueyapueeri quioosaaquiaari Babilonia jiyajiniara. Babilonia jiyajiniara nojori quioosaanu nuhuaji, socua catorce supuetanaari quiquiaari Cristo jaara rasaaquiaari.

Jesucristo rasacari pohuatasano

(Lc 2.1-7)

¹⁸ Naa quiquiaariti Jesucristo rasacari: na nucuarano Mariari tari Joseeta camiriquiano quiquiaari. José numuetuqueyaquishacarijia María, Mariari tariucua manajaraca quiriquiaa. Pueyaso Sohuanucuaajaari na manajetequiaari. ¹⁹ Neyacarano José jaara niishiquiaari necorano tariucua manajaraca quiya, nojuajaari jiyanojua niishiriojoriquiaa na cartenura jiyasohuaja. Nojuajaari jiyaniquiaari tamonu jiyoteeri na manajoree. Joseeri maninia pueyano quiquiaari. Majaari María na cararonu paniniu quiquiaari pueya niqiuara. ²⁰ Naa José niishiriojosacari na cartenura juucuatej, Pueyaso seruuri nocua muetaquiaari na maquenujinia. José sequereeri:

—Supuetana jiyaniijia David niqiuohuacuajinio supueno Joseenaa, María quia camiri naajaa. Maja quia puerenu. Pueyaso Sohuanucuaajaari na manajorucuaa. ²¹ Mariari neyanu ranutaniya. Quiocua na sesojore “Jesu”. Sesa na pueya miijiosano tujunutaniya nojori jiuujiajinijiri. Naaratej, na sesaari quiniutianiya “Jesu”.

²² Jesu rasaanuuri naa quiquiaaritij, tariucuaaanu pueyara Pueyaso sequesano caminiujiunia pohuatasano tohuateenura. Pueyasoori naa na pohuataniquiaari jiyanojua tarijiatej:

²³ “Nia tojiri. Niyacoori manajenutaniya. Neyanu ranutaniyari. Na sesojonutaniyari ‘Emanuel’ ”.

Nioori pueyano rupaajinia sequeya “Pueyaso pata quiyani”.

²⁴ José niucuasacari, nojuajaari naa miiquiaaritij taa Pueyaso seru sequequiaari nojuacuajani. María riquiaari-iri na tiajiniara necocuara. ²⁵ Nojoriiri maja na quiniu quiquiaari juhua setanujuaanaa camitioono, María jaara raquiaari neyanujuaatijia. Jaara na raquiaari, na sesojoreeri “Jesu”.

2

Niishijiaca tiuquijiosacari conaajaacua

¹ Jesuuri rasaaquiaari Belén tiacajinia, Judea jiyajinia. Cuno quishacari, Herodesri jiyaniijia quiquiaari Judea jiyajinia. Jesu rasaanu nuhuaji, niishijiacaari tiuquijioquiaari

Jerusalén tiacajinia. Nojoriiri Jesu niquniuria tiuquiiijio-
quiaari jiya pajamaji. ² Nojori tiuquiiijosacari, nojoriiri
pueya nequesoreetaquiaari:

—¿Tee Judiocuaca jiyaniijiarano rasaarucuaani?
Canaari niishiyani nojuajaari tari rasaarucuaa. Canaari
na rijia niquiquianu jiya pajamajini, canaa jiyajinia
canaa quishacarijia. Canaari nocua niyareeni canaa
shuquiritianura nojuaja, jiyaniijiarano na quiniucua.

³ Jiyaniijia Herodes tojishacari naa niishijiaca sequesano-
otej, jiyanhua tacaquiaariiri. Puetunu Jerusalén tiacajinia
quiniaajanaari tacaquiaarijiuhuj. ⁴ Nocujaj, Herodesri
Judiocuacaacuara secojonaa sequequiaari nocua nojori ni-
jionura, Moisés Rootasanojiniji niishitiojonaanio. Nojori
tiuquiiijosacari nocua, Herodesri naa nequesoreetaquiaari
nojori:

—¿Tee Cristo rasaanutaniyani, Judiocuaca jiyaniijiaran-
otej?

⁵ Nojoriiri na riucuaquiaari:

—Belén tiacajinia rasaanutaniyano, niya Judea jiyajiniani.
Naa naajiotasano quiyacuaajaari Pueyaso sequesano camini-
ujiunia sequesano. Cuno tariucuaaanu naajiotasanocua-
jaari naa sequeyatej:

⁶ “Belén tiacajinia quiniaanaa, nia tiacaari maja najuhuana
shiitianiyojua tiaca Judea jiyajinia. Cuno nia tiaca-
jiniani, Jiyaniijiajanaa cutaraari supuenutaniya. No-
juajaari socua cutara Jiyaniijiajanaa quiniutianiya
tamasaca jiyaniijiacajiniji Judea jiyajinijinio. Cunoori
maninia jitianutaniya cua pueya, Israel pueya”.

⁷ Naa pueya sequesano na tojiniu nuhuajitij, Herodesri
cuno jiya pajamaji nijiono niishijiaca nequesoreetaquiaari
jijasohujaja:

—¿Taacari rijia niquishaacanu seetanujuaanaani?

⁸ Nojori riucuanu nuhuajaj, Herodesri na sapojonuta nojori
sequequiaari:

—Nia quiaare Belén tiacajinia. Niocua jacaria nequesoree-
tasee cuno mueyajiniji. Niaa jaara na riuriatare, niocua cua
numootecuhujaja. Janiyacua nocua quiaarejaaniuhujaja
cua shuquiritianura nojuaja.

⁹ Niishijiaca tojiniu nuhuajaj naa jiyaniijia Herodes se-
quesanotej, nojoriiri quiojyareecuhujaja. Jiya pajamaji na
niqutiushano rijia niqutiuriiri nojori puetaano. Riji-
aari pootia tiuushii tia caco, tee mueya quiriquiaacuajani.
¹⁰ Nojori niquishacari rijia, niishijiacaari jiyanhua timi-
tiuquiaari. ¹¹ Tiaco tiuquitiaseeri. Conaja niqutiushii

na nucua Mariáataari. Conaajaacuara mojuquetacoquiaari-iri. Na shuquiritiatureeri. Na nuhuaji, niishijiacaari na patootasano casaa riataquequiaari, nareya na niquitiosocoriquiano conaaja. Nojoriiri na niquitioquiaari oro, shanohua jaanutaja catijasocoriquianojuhuaj, tamaatiuucua shanohua jaanutajanio. Na sesaari tahue rupaa-jinia “mirra”. ¹² Na nuhuaji, Pueyasoori cuno niishijiaca sequequiaari na maquenujina, maja Herodescua nojori tacatenuhuara Herodes nojori pohuatanuhuara conaaja-jiniji. Naacuajitij, niishijiacaari tamonu nucuacohua tacatequiaariuhua na jiyajiniohuara.

Egipto jiyajiniara Jesu mashitiasaanujiniji pohuatasano

¹³ Niishijiaca jaara quiaquiaariuhua, Pueyaso seruuri Joseecua muetaquiaari na maquenujina. José sequereeri:

—¡Quia sanere! ¡Conaaja quia mashitiare na nucuata Egipto jiyajiniara! Quiniqui nia quishii, janiya cuara sequerohua quiajanijaaatijia. Herodesri Belén tiacajinia na pueya pajetenutaniya conaaja, na motesocoriquiano.

¹⁴ Joseeri sanequiaari. Cuno niucuaja, conaaja mashitiaree na nucuatajaari Egipto jiyajiniara. ¹⁵ Nojori tiuquishacari Egipto jiyajinia, tii quishiiquiaariiri, Herodes cuara cu-soorajaatijia. Nojoriiri naa Egipto jiyajinia quiquiaaritij, tariucuacaanu Pueyaso sequesano tohuateenura maninia, Herodes cusonu nuhuaji. Pueyasoori naa pohuatequiaari na sequenu panishano caminiujiuniacuaja:

“Cua niyanu piiriinjia, Egipto jiyajiniji na tacatenuhuara”.

Herodes puecootesacari muerasu

¹⁶ Jiyaniijia Herodes jaara niishiquiaari cuno niishijiacaari na ruuretaquiaari saaja, Herodesri jiyanoehua juaaquiaari. Na pueya jiyaroquiaari puetunu naatujoori canuuniyojuajanaa nojori puecoonura Belén tiacajinia, na shocuaqueya tiacajinia quiniaa muerasunio. Naa miiquiaariiri Jesu na monura juucua. Herodesri na pueya sequequiaari cuara puecoosaaria puetunu shusha roosanojuanaa, mariyata canapute caapiqui marijia shocoteo quiquiaarijiani. Herodesri naa sequequiaari niishijiaca pohuatanuucua nojuaja, Jesu rijiaari tarijia niquishaaquiaari. Juhuanajuajaari maja caapiqui marijia shocojonu quiquiaari rijia niquishaanujiniji. ¹⁷ Naacuajitij, tariucuacaanu Pueyaso sequesano caminiujiunia Jeremías sequesanoori tohuateequiaari. Jeremías sequesanoori naa naajiotasaaquiaaritij:

¹⁸ “Sapuenuuri tojishiya Ramá tiacajinia. Jiyanoehua taraatia.

Raquelri necohuacua sariyacojiya. Majaari na paniniu

na cumanijasaanura. Necohuari tari puecoosaarucuaa”.

¹⁹ Na nuhuaji, Herodes jaara cusoquiaari, Pueyaso seruuri Joseecua muetaquiaariuhua na maquenujinia, Egipto jiyajinia nojori quishacarijia. ²⁰ Na sequereeri:

—Quia sanere. Mueya quia tacaretaarohua Israel jiyajiniohua na nucuataja. Mueya monu panijiacaari tari cusunuurucuaa.

²¹ Joseeri sanequiaari. Mueya tacaretaquiaariuhua Israel jiyajiniohuara na nucuatajaari. ²² Israel jiyajinia na tiuquishacari, Joseeri numootesaaquiaari Herodes niyanu Arquelaori jiyaniijia quiriquiaa jiyacari, na que niti Judea jiyajinia. Nocuaji, Joseeri puerequiaari quiniqui na quiniuria. Jiyacarijiuhuj, Pueyasoori na niishitioquiaari na maquenujinia, tamocora na quianura. Naaratej, Joseeri mueya nucua pacuquiaari Galilea jiyajiniara. ²³ Galilea jiyajinia nojori tiuquiiijosacari, Nazaret tiacajinia quishiiri. Naacuajitij, tariucuacaanu Pueyaso sequesano caminiujuinia sequesanoori tohuateequiaari nojori jaara naa naajio-taquiaaritij:

“Jiyaniquishaanutaniyari Nazaret tiacajinijinio pueyano”.

3

Tiuquinijiona Juan pahuatasacari cariiquia jiyajinia
(Mr 1.1-8; Lc 3.1-9, 15-17; Jn 1.19-28)

¹ Na nuhuaji, tamonu pueyanoori cariiquia jiyajinia quiquiaari Judea jiyajinia, Jordán moo shuriucua. Nojuajaari sesojosaaquiaari Tiuquinijiona Juan. Nojuajaari Pueyaso sequenu panishano poojotaquiaari pueya niquiara. ² Naa pahuataquiaaritij:

—¡Nioojia nia tacatore sesa nia miiniujiniji! Pueyasoori tari nia jiyanooni panija, na muerasu nia quiniuria seetanujua-naa.

³ Jiyanohua tarijia, Pueyasoori na pueyano Isaías pahuataniquiaari miriqui na sequenu panishano pueyara. Isaías naa na pahuataquiaaritij:

“Pueyano rupaari tojishaaree cariiquia jiyajinia. Naa nacajoriquiaari: ‘Nia jeecanamitiri Jiyaniijia nuu, maja mojoquetunu na quiniuria’ ”.

Tiuquinijiona Juanjanaacuajaari nio tariucuacaanu pahuatasano tohuateequiaari, pueya na niishitiojosacari nojori jeenucuanura nojori jiuujia Jesuucujia.

⁴ Cuno Juan toqueeri camello cajacajiniji shitiasano quiquiaari. Na cajiniocua camarucutequiaari shoque sacuanijiasanoori. Na miaquesanoori quiquiaari cariiquia jiyajinia na riuriatasano sequeru, samiyatunio.

5 Pueyari Juancua quiojoquiaari na tojtianura. Queraatia pueyari nocua quiojoquiaari Jerusalén tiacajinijinio, Judea jiyajinijiniojuhuj, puetunu Jordán moo shocuaqueyajinijinojuanaano. ⁶ Pueya jaara pohuataquiaari Juan niquiara sesa nojori miijosano, Juanri nojori tiuquinijioquiaari Jordán moojinia, Pueyaso tojjiara nojori quiniu panishacari.

⁷ Na tiuquinijosacari pueya, Juanri queraatia Fariseocuaca niquiquiaari nocua nijiyano, Saduceocuacanio. (Nojoriiri Moisés Rootasanojiniji niishitiojonaa quiquiaari.) Tiuquinijiona Juanri nojori sequequiaari:

—¡Niaaquiiri sesa pueya, juhua sacocua! ¿Cante nia nu-mooteree nia mashiniuria Pueyaso saniitionuucujaji nia-janiyani? Nio pa quishacarini, quera Pueyaso saniitiosacari jiyanohua na ruuretajaca pueya. ⁸ Niaa jaara seetanujuanaa nioojia tacatore sesa nia miiniujiniji, ¡saaja maninia nia miiri, maja sesa! ⁹ Majaari nia jiyaniniu niaari Pueyaso muerasu, Abraham niquiuhuacuajinio supueno nia quiniuucua. Cua tojiri, Pueyaso jaara paniri, nojuajaari na naata Abraham niquiuhuara shipininiu nio saijinijijihuahuj. ¹⁰ Nio miriqui sequesano nia tojirijihuahuj pueyanaa. Naana jaara maninia jajau muetuyaquiri, na camaruuri na nuya na catijiaso-coriquiano. Naajuhuj, Pueyasoori quera saniitionutaniya nijaniya, na tojiyashijiaca nia quiniuucua.

Tiuquinijiona Juanri pueya sequequiaari socua:

¹¹ —Janiyari moojinia nia tiuquinijiyani, nioojia nia tacatosacari sesa nia miishanojiniji. Cua nuhuaji, tamonuuri niriqiano cutara. Nojuajaari jiyanohua socua jiyaniijiajanaa janiyajiniji. Janiya maara jiyanohua shuquiriaatia quirini, nojuaja jaara cua sequere na seru cua quiniuria quenaaja na sapatu cua jocuanura nera. ¡Nojuajaari jiyaniijiajanaa cutara! Nojuajaari Pueyaso Sohuanu tiuquinijionutaniya nioojiajinia, cumaacaraca nia quiniuria, seetanu Pueyaso muerasujuanaa nia quiniuria. Nia jeequenutaniyajaariuhua juhua manitia, sesa nia miishanojiniji. ¹² Nia tojitiare miriqui cua sequesano. Trigo jaara rapijiosaare maninia, na camaruuri na queyaroojua, jiyocuaaanuji na totinijasocoriquiano. Naa miiquiaari paratu cuaara paara na cocua, na sucuanio, na jajau na racatanura tiajiniaaco. Naajuhuj, cua nuhuaji niniaari tariucua pueca, na tojtianaa na rijionura na quiquojiniara, saniniuujia na tojiyashijiaca na quejoonura manijinia na saniitionura, tee mani maquesaaquiyacujani.

Jesu tiuquinishacari moojinia
(Mr 1.9-11; Lc 3.21-22)

¹³ Na nuhuaji, Jesuuri tiuquiquiaari Galilea jiyajiniji Tiuquinijiona Juancua, Jordán moojinia. Tiuquinijiona Juan sequeeseeri:

—Cua tiuquinirijia.

¹⁴ Juanri saaja na sequeree:

—Maja Jiyaniijianaa. ¡Quiaa cutaraari maninia pueyano! ¿Casaara cucua quia nimiaa cua tiuquininiuria quiajaniya moojiniani? ¡Cua tiuquiniri juhuari cutara!

¹⁵ Jesuuri saa sequereejaa:

—Quiarijia quia miiri cua panishano. Cua tiuquiniri naajaa. Maniniaari pa miiniuria puetunu Pueyaso panishanojuanaa.

Naacuaajitij, Juanri na tiuquiquiaari. ¹⁶ Jesu jaara tiuquinishaaquiaari, nojuajaari ritia tacaquiaari moojiniji. ¡Jiyacaritij, jiya cajiniocuaari riatequee! Jesuuri Pueyaso Sohuanu niquiquiaari nocua roseyano juhua mococoonu niquishano. Nocua tiuushiiri. ¹⁷ Jiyacaritij, jiyocuacaanuji Pueyaso ruupaari tojishaaree naa sequeyano:

—Nioori cua Niyanuniyojua. ¡Na shuquiritiaa jiyanohuanijia!

4

Samaruhua jiyaniijia saniniujiushacari Jesu

(Mr 1.12-13; Lc 4.1-13)

¹ Na nuhuaji, Pueyaso Sohuanuuri Jesu jiyataquiaari cariquia jiyajiniara, Sesaaca saniniujiushocoriquiano cuniqui.

² Majaari quenaaja Jesu miaquenu quiquiaari. Cuarenta juuca, cuarenta niucua na shoconujuquiaari na miaqueyaquishacari. Na nuhuaji miaajequiaariiri. ³ Sesaacaari jiyacari nocua niquiaari na saniniujiuniuria. Jesu sequeeseeri:

—Quiaa jaara seetanujuanaa Pueyaso Niyanu quiri, nio sai quia jataniri panra. Quiocua na sarohua.

⁴ Jesuuri saaja na riucuaaree:

—Maja. Pueyaso Rupaajiniacuajaari naa naajiotasano quiyatej:

“Pueyanoori maja na naatanu saa miaquesanoocujaja. Seetanujuanaa saminio quiya cutaraari na tojishacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataquiaari Jerusalén tiacajinia. Na nujuatequiaari jiyocuacaanuuri, Pueyaso Secojoua tia cacojiria. ⁶ Na sequereeri:

—Quiaa jaara seetanujuanaa Pueyaso Niyanu quiri, niqiuji quia jaataare jiyocua. Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. Nojoriiri quia quianutaniya, maja quenaaja saajiaacua quia jiriataaquiniuucujaji”.

⁷ Jesuuri na riucuaaree:

—¡Maja! Pueyaso Rupaajinia, naa naajiotasanoori quiyajuhujaj:

“Maja quia saniniujiuniu quia Jiyaniijia Pueyaso”.

⁸ Na nuhuaji, Sesaacaari Jesu tacaniquiaari socua jiyanoehua jiyaconaja tuhuananuucua. Cuniqijiji na niqutirii puetunu jiya jiyaniijiacajanaari. Jiyanoehua cumaacaraca quijiaca. Jiyanoehua queraatia casamiriaca quijiacajuhujaj. Jiyanoehua maninia niquishano. ⁹ Jesu sequereeri:

—Janiyacua quia jiyatere jiyaniijiajanaara nojori nitini, quiaa jaara cua cariquimijaji mojoquetare quia shuquiritia-nura janiya, quia jiyaniijia cua quiniuria.

¹⁰ Jesuuri na sequeree:

—¡Niiquiji quia quiaare Satanásnaa! Naa naajiotasano quiyacuajaari Pueyaso Rupaajinia:

“Saaja quia Jiyaniijia Pueyaso quia shuquiritiare cutara. Saaja nojuaja quia tojiri”.

¹¹ Na nuhuaji, Sesaacaari na tarinitiaquiaari. Jiyacaritij, Pueyaso seyari Jesuucua niquiaari na mianuutenura.

Jesu coteesacari poonijionu Galilea jiyajinia

(Mr 1.14-15; Lc 4.14-15)

¹² Jesu niishishacari Tiuquinijiona Juan nujuatesaarucuaa nujuatejojuajinia, nojuajaari Galilea jiyajinia quiaquiaar-iuhua. ¹³ Jesuuri Nazaret tiacajiniji pacuquiaari Capernaum tiacajinia na quiniuria, caminia shuriucua. Cuno jiya quiquiaari Zabulón niquihuacuajinio supueno pueya jiya, Neftalí niquihuacuajinio supueno pueya jiyanio. Zabulón, Neftalínio, nojoriiri supuetana Jacobo niquihua quiquiaari. ¹⁴ Jesu quishacari cuno jiyajinia, naa tohuatteequiaariiri taa tariucuaaanu Pueyaso sequesano caminiujiunia Isaías pohuataquiaari cuno jiyajinjicuaajani. Nojuajaari naa pohuataquiaari Pueyaso niishitiosano nojuaja taa na nuhuaji na sequesano tohuateenutaniyani:

¹⁵ “Zabulón pueya jiya, Neftalí pueya jiyanio, cunoori caminia shuriuquiumia neteja nucuama quiya, mariyata Jordán moo tamajiria. Cunoori mariyata Galilea jiya, tee taucuaca quiyacuajani. ¹⁶ Cuno jiyajinia quiniaari ninishiqui quijiaca quiquiaari. Quiarijia saniniuujia, nojoriiri jiuujia Cuhuatana niquiriucuaa. Nojoriiri cusunu pueretujuaca quiquiaari tarijia. Quiarijia cutara nojoriiri cuhuatasaaree nojori puereyaquiniuucujaji”.

¹⁷ Jiyacaritij, Jesuuri Pueyaso rupaa pohuatanu coteequiaari. Naa sequequiaariiri:

—Nioojia nia tacatore sesa nia miiniujiniji. Pueyasoori nia paniya na pueya nia quiniuria.

Jesu saquiriojosacari sapitiaaja ritianaa
(Mr 1.16-20; Lc 5.1-11)

¹⁸ Jesuuri Galilea caminia shuriuquioco rucuanajoriquiaa. Jiyacaritij, Pedro niquiriiri, tarajanu Andrésnio. Pedro sesa quiquiaarijuhuaj Simón. Nojoriiri sapitiaaja ritianaa quiquiaari shiyaruta. Nojoriiri jiyacari shiyaru jaque-rootariquiaa. ¹⁹ Jesuuri nojori sequeree:

—¡Miji! Cua tarajare. Cua pueyara nia quiri. Janiyacua nia jiyatere pueya quiojuara saniniunijia, juhua sapitiaaja quioonaa.

²⁰ Nojoriiri na shiyaru tiujiaquiaari ritia. Jesuta quiojiya-reeri.

²¹ Jesuuri shiitianiyojua socua rucuanequiaari na tacoji. Socua caapiqui pueya riuriataseeri. Nojoriiri quiquiaari Santiago, tarajanu Juannio. Cuno pojori queeri quiquiaari Zebedeo. Nojoriiri na queta quiriquiaa botejinia. Na shiyaru cushipirijionuuriquiaari. Jesuuri Santiago sequeree Juannio, na pueyara nojori quiniuriajuhuaj. ²² Nojoriiri ritia bote tiujiaquiaari na queta, Jesuta na quiojonura.

Jesu niishitiojosacari queraatia pueya
(Lc 6.17-19)

²³ Jesuuri puetunu Galilea jiyajiniajanaa rucuanejoquiaari na saquiriojosano pueyata. Pueyaso secojojua tiacajiniaqueya niishitiojoriquiaari. Pueyaso rupaa pohuatariquiaari taa Pueyaso jitianu paniya maninia na pueyani. Puetunu tamaatia cusonuunu jiitiacojuajanaa naatanijioquiaariiri. Puetunu nootunejaca pueyajanaa shaataquiaarijuhuaj. ²⁴ Naa maninia na miishanoori poojotasaquiaari puetunu Siria jiyajiniajanaa. Naaratej, pueyari Jesuucua patootaquiaari puetunu cusosuhua-janaa, puetunu tamaatia cusonu jiitijacajanaanio, cumatacuruhuana cusosuhuajuhuaj, nootunejacio. Nocua jiyatasaaquiaarijuhuaj samaruhuaraca quijiaca, canashiyaquiji cusojonuujuacanio. Jesuuri nojori naatanijioquiaari puetunujuanaa. ²⁵ Jiyanhua queraatia pueyari Jesu nuhujiquiaari Galilea jiyajiniji, Decápolis tiacajinijinio. Na nuhujiquiaarijuhua Jerusalén tiacajinijinio, Judea jiyajinijiniojuhuaj, mariyata Jordán moo taquijiria jiyajinijinionio.

5

Jesu pahuatasacari Pueyaso rupaa tuhuananujiniji
(Lc 6.20-23)

¹ Jesu niquishacari jiyano hua queraatia pueya nocua niyano, nojuajaari tuhuananuucua tacaquiaari tiji na cajiniuria. Na saquiriojosano pueyari nocua catecanoquiaari.

² Jesuuri nojori niishitiojonu coteequiaari. Naa na pueya sequereeri:

³—Shuquiriaatia quijiaca cutaraari noo pojori, canapuate niishiyani noojia sesa quiya. Nojoriiri Pueyaso pueyara quiriqiano, pueyaracaanu na jitianura nojori.

⁴ 'Shuquiriaatia quijiaca cutaraari noo pojori canapuate taraatia quiyani sesa na miiniuucua. Pueyasoori nojori cumanijanutaniya.

⁵ 'Shuquiriaatia quijiaca cutaraari noo pojori, canapuate maja tama nerajaaja niishiriojojuacani. Nojoriiri nio jiya camaruhua quiniutianiya, taa Pueyaso sequequiaaricujani.

⁶ 'Shuquiriaatia quijiaca cutaraari noo pojori, canapuate maninia quiniuucua jiaatiaa jiyano huanani, taa pa jiaatiaacuaa miaquenuucuanani. Pueyasoori maninia quijiacara nojori jiyatenutaniya.

⁷ 'Shuquiriaatia quijiaca cutaraari noo pojori, canapuate naquiya miishanoocua taraajejani. Pueyasoori nojoriicua taraajenutaniyajaacuhuj.

⁸ 'Shuquiriaatia quijiaca cutaraari noo pojori canapuate maninia jiuujiaracani. Nojoriiri Pueyaso niqiniutianiya cutara.

⁹ 'Shuquiriaatia quijiaca cutaraari noo pojori, canapuate pueya jyanootiootejani. Nojoricuajaari Pueyaso muerasu quiniutianiya.

¹⁰ 'Shuquiriaatia quijiaca cutaraari noo pojori, canapuate naquiya miishanoni, Pueyaso panishano nojori miiniuucua. Pueyasoori nojori jitianutaniya pueyaracaanu shuquiriaatia, na muerasu nojori quishacari.

¹¹ 'Shuquiriaatia quijiaca niajaniya, tamasaca jaara nia macaatiri cua tojitiajaca nia quishacari, naajuhuj, nojori jaara miya naquiya niajaniya. Naajuhuj, niaari shuquiriaatia quijiaca, nojori jaara saquiriojotare niaacuara na saponuta, maninia nia tojiniuucua janiya. ¹² Naa jaara naa miishaaretej, jiyano hua nia timiquiore. ¡Shuquiriaatia nia quiriujiuhuj! Pueyasoori cunora jiyano hua maninia nia miiniutianiya jiyocuacaanu nia quishacari nata. Tariucuaaanu Pueyaso sequesano caminiujiuniaacuajaari naa naquiya miishaquiaarijiuhuj, nia supueyaquishaacarijiyojua.

Pueyaso muerasuuri juhua shoni quiya mijiria, juhua ninishiqui cuhuatanaajuhuj

(Mr 9.50; Lc 14.34-35)

¹³ 'Mijiria, niaari juhua shoni quiya, mijiria quiniaa mariqui socua seseyareeri. Shoni jaara na tiquiriiquia jatama, ¿maatucua taa tiquiriiquiara quiriohuani? Maja na naata. Shoni jaara naa quiriritij, najuhuana quiyari, shaaca. Jiyano shoni cuaara jataaaria nuujinia, pueya rapijioso-coriquiano.

¹⁴ 'Naajuhuj, niaari juhua ninishiqui cuhuatana mijiria quiniaara. Tiaca jaara tuhuananuucua quiri, majaari na naata na jamaaniu. ¹⁵ Naajuhuj, pueya jaara samaritiu noshitiri, jiyocuacaanu morotashiyari, tiaco na cuhuatana maninia, pueya niquiniuria maninia nocuaji. Majaari samaritiu niataaanu conatu cariquiaco. ¹⁶ Naajuhuj, niajaniya cuaara maninia miiria pueya niquiara. Maninia nia miishacari, niaari pueya cuhuataa juhua samaritiu. Naa maninia miijia nia quishacaritij, pueyari Jiyocuacaanu Quijia nia Que Pueyaso maniniuhuaqueetananiya.

Jesu niishitiojosanoori tariucuacaanu Moisés Rootasanojiniji

¹⁷ 'Majaari nia jiyaniniu janiyari niquiaarini Moisés Rootasano cua tarinitiniuria niajaniya, Pueyaso sequesano caminiujiunaa rootasanonio. Maja. Niquiaari cutaranijia puetunu cuno rootasanojuanaa cua tojiniuria, cua tohuateenurajuhuj. ¹⁸ Pueyanaa, seetanujuanaa nia sequeyanijia. Nio jiya quishacarijia, jiya cajiniocuanio, majaari quenaaja niquiriyatu naashanoniyojua Pueyaso Rupaajiniji shaajetesaanu quiniutianiya. Majaari na shaajetesaanu quiniutianiya puetunu Pueyaso naajiotesanajuanaa cuaara tohuateerejaatijia. ¹⁹ Naaratej, tamonu pueyano jaara jiyaniri tamonu rootasano tariucuacaanu Pueyaso Rupaajiniji najuhuana sequesano, nojuajaari cocuaatia miya. Nojuaja jaara cuno tariucuacaanu rootasano tojiyaquiri, cuno pueyanoori socua rerequetesano quiniutianiya narta Pueyaso muerasujinijinio. Naajuhuj, nojuaja jaara pueya niishitiojore nojori tojiyaquiniuria cuno rootasano, cuno pueyanoori socua rerequetesano quiniutianiya puetunu narta Pueyaso muerasujinijijianaa. Saniniuujia, cante tariucuacaanu Pueyaso rootasano tojiqiaanianijia, na niishitiojoquiaa tamasaajaariuhuj, cuno pueyanoori socua tojishano pueyano quiniutianiya Pueyaso shuriucua jiyocuacaanu. ²⁰ Nia numooteyanijia, niaa jaara quiyaquiri socua maninia quijiaca Fariseocuacajiniji, Moisés

Rootasano niishitiojonaajinijinio, majaari Pueyaso muerasu nia quiniu quiniutianiya.

*Jesu niishitiojosano maja pa juaaniuria
(Lc 12.57-59)*

²¹ 'Niaacuajaari tojiquiaari taa pa supuetanaa seque-saaquiaaricuajani: "Maja monu. Cante pueyano monani, nojuajaari nequesoreesaanutaniya". ²² Janiyari saniniuujia nia niishitiojiyani, cante narta pueyanota juaajiani, cunoori nequesoreesaanutaniya. Naajuhuj, cante narta pueyano saarijiojuani, cunoori nequesoreesaanutaniya jiyaniijianu-cua niquiara. Naajuhuj, cante narta pueyano sesacareeni, cunoori quera jatashiya mani quiquiojinia, pueyaracaanu saniitiosocoriquiano.

²³ 'Naacuajitij, nia niquitionu panishacari Pueyasora nia casaa, niaa jaara jiyacari niishiquii, quiaari quiarta pueyano juaatiriucuaa quiocuara, ritia quia tiujiare cuniqui quia niquitiosocoriquiano Pueyasora, catijiaja shuriucuni. ²⁴ Quiarta pueyanota quia jiyanoootioocoocuara coteenu. Na nuhuaji cutara quia naata niquitionu quia casaa Pueyasora.

²⁵ 'Tamonu jaara quia jiyataa nequesoreenaacua, sesa quia miiniuucua nojuaja, maninia quia pohuatate ritia nojuaja, taa quia miiniutianiyanani na jiyanooniuria quia-janiya. Ritia nia jeecatoore nucuaco nia quiasacarijia, quiaa mariqui nequesoreena niquitiosaareeri. Nequesoreena naasucuaari quia niquitionutaniya nujuatejojua camarnu saniniuujia. Nojuajaari quia nujuatenutaniya nujuatejojua-jinia. ²⁶ Seetanujanaa nia sequeyanijia, majaari quia tohu-atanu quiniutianiya, quiaa cuaara niquitiojeaatijia puetunu na sequesano cumaneecajanaa quia cumaneecajiniji.

Jesu niishitiojosano, maja pa camishoo maajiicua pa jiaati-aquiniuria

²⁷ 'Niaacuajaari tari tojiquiaari nio tariucuaaanu rootasano: "Maja tamonu niquiocua numuetucunu". ²⁸ Janiya cutaraari nia sequeyani, pueyano jaara na camishoo maaji niquiri nocua na jiaatianuta, cunoori juhua na numuetucuree tari noojiajinia.

²⁹ Na nuhuaji, Jesuuri nio miriqui sequesano sequequiaari pueyara, jyanohua na niishitiojonura nojori:

—Naaratej, quia miaquetajara quia namijia jaara sesa mitiri quiajaniya, quia namijia quia jiatere. Tamocora quia jatate. Quiajaniyara socua maninia cutaraari namijijiu quia quiniuria, maja quia jatasaanura mani quiquiojinia puetunu quia cuaqueyatajanaa. ³⁰ Naajuhuj, quia miaquetajara quia

numatu jaara quia miitiri sesa, quia jiyatarenoj. Tucua-caanu quia jatara. Socua maninia cutaraari quiara quia jiyatanura quia numatu, maja puetunu quia cuaqueyatajanaa quia jatastaanura manijinia, pueyaracaanu quia miiniuria naquiya tii.

Naa na pohuatasacaritij, Jesuuri pa niishitiojiya maja pa tojiniuria poojia panishano, sesa na miitiniuria pa cuaqueya.

Jesu niishitiojosano maja pueya cartenura necocua
(Mt 19.9; Mr 10.11-12; Lc 16.18)

³¹ Jesuuri naa niishitiojoquiaarijiuhuj:

—Pa supuetanaari naa rootasaaquiaarijiuhuj: “Pueyano jaara necocua cartere, maaji cuaara niqutiosaaria naajione, pueya niishiniuria neyacaqui na carteree”. ³² Janiyari saniniujia nia sequeyanijia, pueyano jaara necocua cartere, sesa miya Pueyaso niqiuaraari. Naacujitij, na cartesano maajiiri tamonuta quiniutianiya na nuhuaji. Cunoori sesa Pueyaso niqiuara. Pueyano jaara niishiri necocuaari tamonu caya numuetucujutequiaa, saa cunoraja cutara na naata na cartenu. Pueyanoori sesa miyajuhuj, jaara cartesano maaji camiri.

Jesu niishitiojosano maja pa sapojonura

³³ 'Niaari tarijia tojitiaquiaari taa pa supuetanaa rootasaaquiaarini. Naa rootasaaquiaariiri: “Majaari nia jatanu nia sequesano, niaa jaara sequere: ‘Seetanujanaari cua sequesano. Pueyasocuaajaari niishiya majaari cua sapojonu’ ”. ³⁴ Janiya cutaraari nia sequeyani, nia sequesano jaara seetanujanaa sequesano quiri, saaja nia sequere “jaa”. Jaara seetanujanaa quiyaquiri nia sequesano, saaja nia sequere “maja”. Majaari nia sequesano nia maatenu najuhuaana naatej: “¿Janiyate sapojuani? Cua rupaari juhua jiya cajiniocua. Maja na jatanu quiniutianiya”. Majaari naa sequenutej pueyanaa. ¿Majateeri nia niishiniu, jiya cajiniocuaari Pueyaso quiquio? ³⁵ Naajuhuj, ¿casaara nia sequequiaa najuhuanani: “Cua sequesanoori juhua pa jiya? Majaari na shaajenu quiniutianiya”. Maja naa sequenutej. Pa jiya, cunoori Pueyaso niaja na niohuaca. Naajuhuj, ¿casaara nia sequequiaani: “Cua sequesanoori juhua Jerusalén tiaca? Pueyaracaanu quiniutianiyari”. Maja naa sequenutej. Jerusalén tiacaari pa Jiyaniijia Pueyaso tiaca. ³⁶ Naajuhuj, ¿casaara nia sequequiaa naa najuhuanani: “Quia naataari cua sequesanoocua tiuuniu, cua naca quishacarijia”? Majaari naa sequenutej pueyanaa. Niaa jaara naa sequeretej, nia niishiri, majaari nia naata quenaaja niquimi nia muesujinijinio nia jiyatenu taariuria, muerumuecaranio. ³⁷ Naaratej, pueyaracaanu

saaja seetanjuanaa nia sequere “jaa”, “maja”. Cante na sequesano maatejani, cunoori Sesaaca niishitiojosano niajaniya.

Jesu niishitiojosano maja pa naminiuria
(Lc 6.29-30)

³⁸ 'Niaacuajaari tari rootasaaquiaari: “Pueyano jaara tamonu pueyano namijia cocuartare, na namijia cuaara cocuartaariajuhuaj, pueya nequesoreenaa niquiara. Naa-juhuaj, pueyano jaara tamonu pueyano quiaja shaatare na pishacari, na quiaja cuaara shaatasaariajuhuaj”. ³⁹ Janiyari saniniuujia nia sequeyani, pueyano jaara quia miiniu paniri sesa, quia cuaqueya quia tarinitiare nera. Majaari na nujuatanu. Naacuajitij, pueyano jaara quia maseca piri, majaari juaaniu. Quia jiyanoori. Nojuaja jaara socua quia piriohua, quia jiyanoori. Majaari na naminiu. ⁴⁰ Pueyano jaara quia toque jaariutianu paniri, nera quia tarinitiare. Cuaara na paara. Mariyata quia cushishano shiniquiaacuaji quia niq-uitiore nareja. Majaari jamueja quia quiniu. ⁴¹ Tamonu camarnu jaara quia sequere na naacutanura na casami quia jatanura nuu cajiniocua, majaari na tarijonu. Saniniuujia, shuquiriaatia quia naacutare na casami jatanura socua tucuacaanu na sequesanojiniji. ⁴² Tamonu pueyano jaara quia casami masenu paniya nera, quia niq-uitiore nareja. Naajuhuj, tamonu pueyano jaara quia casaa panu paniya nareja rupaquijiara, quia niq-uitiore. Majaari na ruuretanu. Capora quia quiri.

Jesu niishitiojosano pa paraca pa paniniuria
(Lc 6.27-28, 32-36)

⁴³ 'Niaacuajaari nio tariucuaaanu sequesano tojtiaquiaarijuhuaj: “Quia shuriucua quinia quia paniri. Saniniuujia, majaari quia paraca quia niquinu”. ⁴⁴ Janiya cutaraari nia sequeyani, nia paraa nia paniri. Nia sesacaja pueya nia maninuhuaqueetare pueya niquiara. Pueyano jaara niaacuara saquiriojotare na sapojonuta, nocuara nia secojore Pueyaso. Sesa nia miiniaacuara nia secojorejuhuaj. ⁴⁵ Naa maninia nia miishacaritij, niaari seetanjuanaa jiyocuacaanu Quijia nia Que Pueyaso muerasu quiniutianiya. Nia niishiri, Pueyasoori pananu muetaniquiaa sesa pueyara na janura, maninia pueyara na janurajuhuj. Pueyasoori maru nitiquiaa maninia miijiaca pueyara, sesa miijiacarajuhuj, maninia nojori nataacuaca moritianura. ⁴⁶ Naa jaara saaja nia panijiaca pueya panijia quiriqia, ¿Pueyasoteeri cunora nia shuqiritianutaniya, socua na casaajiniji na niq-uitionura niajaniya? Maja. Sesa miijiaca pueyani, noo pojori canapuate cumaneeca

masejoquiaa na sapojonutani, nojoriiri maninia miiquiaa na panishano pueyajuhuaaj. ⁴⁷ Niaa jaara saaja nia panishano pueya saruhuataquiaa, ¿niaateeri cunora maninia miijiaca quiya Pueyaso niquiara? Maja. Pueyaso niishiyashijiaca pueyari naa maninia miiquiaa na panishano pueyajuhuaaj. ⁴⁸ Naaratej, maninia miijiaca nia quiri juhua jiyocuacaanu Quijia nia Que Pueyaso. Nojuajaari seetanujuanaa maninia miijia. Rimiajata miyashijia cutara.

6

Jesu niishitiojosano saaja maninia pa miiniuria Pueyaso niquiara

¹ Tama nia cuaqueyajaaja nia cojuare maja maninia nia miiniuria saaja pueya niquiara, pueya maniniuhuaqueetanura nijaniya. Pueya jaara nia maniniuhuaqueetare maninia nia miiniucua, nia Que Pueyasoori maja na niq-uitionu quiniutianiya nijaniya socua, maninia nia miiniucua. ² Naaratej, niaa jaara casamiijiuniucua pueya niq-uitionu paniri nareja nia casamijiniji, majaari juhua sesa jiuujiaraca pueya nia miiniu. Cuno pojoriiri pueya numootequiaa na niq-uitionu panishacari na casaa, puetunu pueyajanaa shootianura nojori. Cuno pojoriiri naa mi-iquiaaqui Pueyaso secojojua tiacajinia, tiacaacacojuhuaaj, pueya maniniuhuaqueetanura nojori. Seetanujuanaa nia sequeyanijia, cuno pojoriiri tari maseree narta pueya maniniuhuaqueetanu. Majaari nojori masenu quiniutianiya socua Pueyasojiniji naa maninia nojori miiniucua. ³ Saniniujia, niaa jaara nia casaajiniji casamiijiuniucua niq-uitionu paniri nareja, quia mueneca cuara niishiyaquiiria quia niq-uitiosano quia miaquetajata. ⁴ Naa miriqui sequeree nijaniyanijia cua niishitiojonura nijaniya, jiyasohuaja nia miiniuria puetunu maninia nia miiniu panishanojuanaa. Naacujitij, saaja nia Que Pueyasoori jiyasohuaja maninia nia miishano niishiniutianiya. Naaratej, nojuacuajaari nia niq-uitionutaniya na casamijiniji, na shuquiritiasacari nijaniya.

*Jesu niishitiojosano naa pa secojonura Pueyaso
(Lc 11.2-4)*

⁵ Nia secojosacari Pueyaso, majaari juhua sesa jiuujiaraca pueya nia miiniu. Cuno pojoriiri Pueyaso secojonu maniniucuaquiaa na nujanuta pueya niquiara, saaja pueya shootianura nojori. Nojoriiri naa secojonuquiaa Pueyaso secojojua tiacajinatej, tiaca nuucujiniajuhuaaj, tee queraatia pueya quiyacuajani. Seetanujuanaa nia sequeyanijia, cuno pojoriiri tari maniniuhuaqueetasaareecuaja. Jiyano pueyatej,

majaari nojori masenu quiniutianiya socua Pueyasojiniji. ⁶ Niajaniya saniniuujia, nia secojosacari Pueyaso, nia sohucamara nia tiuquiri. Nia tiootiu nia tiore. Na nuhuaji, cuniqui nia Que Pueyaso nia secojore jiyasohuaja tamajaaja. Nia Que Pueyaso niqushacari naa jiyasohuaja nia miishanotej, nojuaja cutaraari nia niqutionutaniya na casamijiniji, na shuquiritasacari niajaniya.

⁷ Nia secojosacari Pueyaso, majaari nia sequesano pacutejojua nia quiniu puera, juhua Pueyaso niishiyashijiaca. Cuno pojoriiri jiyaniya Pueyasoori nojori tojiniutianiya pueyaraaanu na pacutejosacari tariucua na sequesano. ⁸ Majaari juhua nojori nia miiniu. Pa secojiyaquishaacarijiyojua, pa Que Pueyasocuaajaari tari niishiya casaa pa paniyani. ⁹ Naaratej, naate nia secojore:

“Canaa Quenaa, quiaa cutaraari jiyocuacaanu Quijia. Pueya cuara niishiiria quiaari saaja maninia quijia. ¹⁰ Quia quiri canaa Jiyaniijia, canaa quia jitianura. Quia panishano cuara miishaaria mijiria, taa jiyocuacaanu na miishaaquiaacuaani. ¹¹ Canaa quia niqutiore canaa miaquesocoriquiano quiarijiani. ¹² Canaa quia jiyanoori sesa canaa miishanojiniji, taa canaa jiyanooquiaa tamasaacuaani, sesa nojori miishacari canaa. ¹³ Majaari canaa quia shanacunu canaa saniniujiushaanura sesa canaa miiniuria. Saaja canaa quia cojuare cutara Sesaacaacuaaji. Saaja quiajaniya cutaraari seetanujuanaa Jiyaniijiajanaa. Quiaa cutaraari puetunu cumaacaracajanaa. Quiaari shanohua shacantuuca quijia cutara. Quiaari naa quijia pueyaraaanutej. Tariucuaaja”.

¹⁴ Naatej, niaa jaara jiyanoori tamasa, sesa na miishacari niajaniya, nia Que Pueyasoori nia jiyanooniu-tianiyajuhuj. ¹⁵ Saniniuujia, niaa jaara tamasa jiyanooyaquri, nia Que Pueyasoori maja na jiyanooniu quiniutianiya niajanijajuhuj sesa nia miishanojiniji.

Jesu niishitiojosano taate pa naata miaqueyaquiniuni Pueyaso pa secojonura

¹⁶ Niaa jaara miaqueyaquiya Pueyaso nia secojonura, majaari macuhuajeconu pueya niqiara, taa sesa jiuujaraca pueya miiquiaacuaani. Nojoriiri naa miiquiaatej, pueya niishishocoriquiano nojori miaajeya. Naa pueya shootiasacari nojoritij, seetanujuanaa nia sequeya cutarania, narta pueyari tari nojori maniniuhuaqueetareecuaja. Majaari Pueyasojiniji nojori masenu quiniutianiya socua. ¹⁷ Niajaniya saniniuujia, nia miaqueyaquishacari Pueyaso nia secojonura, nia jiquioco nia jeequere. Nia canuure nia

muesu, taa nia miiquiaa pueyaracaanucujani. ¹⁸ Naa nia miri Pueyaso nia secojosacari, maja pueya niishiniuria cunogui miaajeya. Saaja pa Que Pueyaso cutara cuaara niishiiria nia miishano. Naacujitij, nojuajaari nia niqutionutaniya na casamijiniji na shuquiritianuucua niajanija.

Pa casami pa racatare jiyocuacaanu Pueyaso shuriucua (Lc 12.33-34)

¹⁹ 'Pueyanaa, maja mijiria nia racatanu nia casami nahuanaj. Saaja capora nia quiri cutara. Mijiria pa racatasacari pa casami, surequeyari na miaquenutaniya. Tiyarashiniutianiyajaariuhuj. Nohuasenuujuacaari nocua tiuquiniutianiya na nohuasenura. ²⁰ Nia racatare cutara nia casami Pueyaso shuriucua jiyocuacaanu. Tii cutaraari shaaqui surequeya, shaaqui tiyara. Naajuhuj, nohuasejooari maja na naata nocua tiuquiniu tii, jiyocuacaanuji nia casami na nohuasenura. ²¹ Naa jaara nia casami racatare mijiria, niaari nocua niishiriojonutaniya pueyaracaanu. Nia casami jaara racatasano quiri Pueyaso shuriucua saniniuujia, niaari Pueyasoocua niishiriojonutaniya. Majaari nia tacaaniu quiniutianiya mijiria casaacua tari.

Pa cuaqueyajinia cuhuatanajiniji pohuatasano (Lc 11.34-36)

²² 'Pa namijiaari juhua poojia cuhuatana. Naacujitij, paa jaara sesa casaacua jiaatiaashijia quirini, poojiaari juhua cuhuashiqui quiya maninia. ²³ Naa jaara sesa casaacua jiaatiajaca quiri saniniuujia, nioojiaari juhua ninishiqui quiya. Nioojia jaara sesa casaacua jiaatiaja quiri, nioojiaari socua ninishiqui quiya cariyojuaru pueyanojiniji.

Pueyaso panijia pa quiri, maja cumaneeca panijia (Lc 16.13)

²⁴ 'Maja nia naata poonijionu maninia caapiqui camarnura. Naa jaara caapiqui camarnuraca quiri, niaari tamonu paniniutianiya, niaari saniniuujia tamonu niquiniu paniyaquiniutianiyacujua. Naacujitij, niaari shuquiriaatia poonijionutaniya nia panishano camarnura. Niaari tamonu soojotanutaniyacujua. Naajuhuj pueyanaa, majaari nia naata Pueyasora poonijionu maninia, cumaneecaacua nia jiaatiasacarijuhuj.

Pueyaso na muerasu cojuaja (Lc 12.22-31)

²⁵ 'Naaratej, nia sequeyanijia, maja puera nia niishiriojonu casaa nia miaquenutaniyani, casaa nia ratunutaniyani, casaa nia cushiniutaniyani. Pueyaso jaara pa shipiniquiaari pueyano pa quiniuria, ¿majateeri na niqutionu quiniutianiya

pa miaquenu panishano, pa cushiniu panishanonio, maninia pa rishiniuria? Taaquiriirini. ²⁶ Jiyocuacaanu jaacuatujuaca nia niquiricuaa. Nojoriiri maja na natanu. Majaari na senoonu. Majaari nojori mishinijionu tiaco na miajajaura. Naajaa, pa Que Pueyasoori nojori niqutioquiaa na panishano. Nia niishiri. Niaa cutaraari socua Pueyaso panishano cuno jiyocuacaanu jaacuatujuacajiniji. ²⁷ ¿Nia naatate socua jiyaconajara maashiniu, jiyanoahua nia tacaaniutia? Maja.

²⁸ 'Naajuhuj, ¿casaara nia tacaquiaarini nia niishiriojosacari casaa nia cushiniutianiyani? Naana shuucuaca nia niquiriquiacuaa. Nojoriiri maja na niishiniu poonijionu. Majaari na niishiniu na maniniushitiajara shitianujuhuj. ²⁹ Seetanujuanaa nia sequeyanijia, pa supuetanaa jiyaniijia Salomónri jiyanoahua shanohua toqueya cushijia quiquiaari. Naajaa, na toqueeri maja socua shanohua niquishano quiquiaari cuno naana shuucuacajiniji. ³⁰ Naana shuuri saaja rupaquijia shanohua niquishano.

Jaara sorere, namitiashiyari catijasocoriquiano. Pueyasoori naana shuu shipiniquiaari saaja rupaquijia shanohua niquishocoriquiano, na nuhuaji catijasocoriquianonio. Nojuaja jaara naa shanohua naana shuucuaca shipiniquiaari, ¿majateeri socua maninia na miiniu quiniutianiya niaara? ¿Casaara nia tiuyaquiya nia Que Pueyasocuaarini? ³¹ Naaratej pueyanaa, maja nia tacaaniu. Majaari nia sequenu: ¿casaa pa miaquenutaniyani?, ¿casaa pa ratunutaniyani?, ¿casaa pa cushiniutianiyani?

³² Pueyaso niishiyashijiacaari naa sequejacatej, puera nojori tacaashacari puetunu na panishano casaacuajanaa. Niaa cutaraari jiyocuacaanu quijia Queraca. Nojuacuajaari tari niishiya puetunu nia panishanojuanaa. ³³ Naaratej, coteenu nia niishiriojore Pueyaso tojijiara nia quiniuria cutara. Pueyasocua nia niqutiore puetunu nia panishanojuanaa.

³⁴ Naajuhuj, majaari tariquiria nia tacaaniu. Saaja nia niishiriojore cutara, taa nia miiniutianiya maninia quiarijiani. Tariqui cutara niocua niishiriojore taa nia miiniutianiya maniniani. Tariucujaja quiarijia nia niishiriojosano nio juucara. Majaari socua tariquiria nia tacaaniu. Saaja nia Que Pueyasocua nia tiuuri, juhuajaniya nia quiniuria.

7

*Majaari quarta pueyanoocuara soqueto nia quiniu
(Lc 6.37-38, 41-42)*

¹ 'Maja niarta pueyano nia soquenu najuhuanaj, Pueyaso mariqui nia jiyanoyaquirijiaariuhuj. ² Taa nia sesacaquiaa

tamasacacuaani, niaari naa sesacasaanutaniyajuhaaj. Naatej, taa nia miiquiaa tamasacacuaani, Pueyasoori mariyata naa miiniutianiya niajanijajuhaaj. ³ Nio miriqui cua sequesano nia tojiri. ¿Casaara nia niquiya rucucua nia tarajanu namijiajiniani, niaa jaara puereetuuca maca jiiitaa tama nia namijiajiniajaaja cutara? ⁴ Maca nia jiiitiasacari tama nia namijiajiniajaaja, ¿casaara nia sequeya niarta pueyanoni: “Cuno rucucua pa taquiri quia namijiajiniji”? ⁵ Sesa jiuujiaracanaa, coteenu nia pare cuno maca nia namijiajiniji cutara. Na nuhuaji niocua maninia niquiri cutara, nia tarajanu rucucua nia taquiniuria na namijiajiniji. Nio miriqui cua sequesanoori nio sequeya: nioojia seque nia jecare coteenu, na nuhuaji cutara niocua maninia nacasure niarta pueyano.

⁶ Majaari Pueyaso ruuretajaca nia niishitiojonu Pueyaso rupaa najuhuanaj. Cuno tojiyashijiacaari nia tojiyaquiniutianiya, naatej taa tamonu pueyano sare tojiyaquiquiaa niajanijacuaani. Majaari Pueyaso soojeaca nia pohuatanu Pueyaso miishano shanohua niajaniyara. Nojoriiri saaja rerequetenutaniya Pueyasojiniji nia pohuatasano, naatej taa cushiya rapijioquiaa marajinia juhuajaniya na niishishoo maninia casaacuaani.

Pueyaso pa secojorej
(Lc 11.9-13; 6.31)

⁷ Pueyaso nia secojore. Nojuajaari nia niqutionutaniya nia masesano. Niaa jaara pajere, niaari nia pajesano riuritanutaniya. Tohuateyaji nia piquiri, niaacuajiiri riataasaanutaniya. ⁸ Cante Pueyaso maseya na panishanoni, seetanujuanaa na masenutaniyari. Naajuhuaaj, cante pajejani, na panishano riuritanutaniyari. Cante tohuateyaji piqijiani, nocuajiiri riataasaanutaniyajuhaaj.

⁹ Mueya jaara na que nenecojore neecaruura, ¿na queteeri na niqutionutaniya saajia? ¡Maja! ¹⁰ Mueya jaara na que nenecojore sapitiaajara, ¿na queteeri na niqutionutaniya soconu? ¡Maja! ¹¹ Niajaniyari sesa miiniu niishijiaca. Naajaa, niaacuajaari maninia casaa niqutionu niishijia, nia mueya jaara nia nenecojore. Nia Que Pueyaso cutaraari jiyano hua socua maninia niqutionu niishijia, na muerasu secojosacari nojuaja.

¹² Pueyaracaanu maninia nia miiri tamasaca, taa nia paniquiaa pueya miiniuria niajanijacuaajani. Niaa jaara maninia miiriquia nio cua sequesano, niaari tari tojitiaa maninia puetunu tariucuaaanu Moisés Rootasanojuanaa, tariucuaaanu Pueyaso sequesano caminiujiuniaa rootasanonio.

Pueyasocua nuuri secanuniyojua

(Lc 13.24)

¹³ 'Pueyasocua neteja nuu nia pajere, shiitianiyojua nuuri tuneja. Saniniuujia, puereetuuca nuuri neteya mani quiquojiniara. Puereetuuca na tuneja. Puereetuucari neteya, carianujuhuj. Naaratej, queraatia pueyari juhuajaniya cuno nucuaco quiojiya saniitiosocoriquiano. ¹⁴ Saniniuujia, shiitianiyojua nuuri maninia cutara. Cuno nucuaco quiojonaari pueyaracaanu quiniutianiya Pueyasota cutara. Jiyanojua shiitianiyojuaari cuno nuu tuneja. Secaja pueyari na riuriataa, cami na quiojonura.

Naanaari niishishano na jajaujiniji

(Lc 6.43-44)

¹⁵ 'Tama nia cuaqueyajaaja nia cojuare sapojonuujuacaacuaji, noo pojoriicuaji canapuate najuhuana sequejacuajani: "Pueyaso Rupaa pohuatananijia". Nojoriiri sapuenu juhua maninia pueya niquishano, nojori sapojonura nianianiya. Nojoriiri sapuenu juhua borregoniyojua niquishano, seetanujuanaa juhua puereeta sare nojori quishacari, sayoru. ¹⁶ Niocua nojori niishiri, sesa nojori miiniuucua. Nojoriiri maja na naata miiniu maninia, naatej taa cohuatucuaani, majaari na naata muetunu marijiaca. ¿Shuuniateeri na naata muetunu cohujaru? Maja. Naajuhuj, cuno sesa jiuujiaraca pueyari maja na naata maninia miiniu. ¹⁷ Maninia naanaari, maninia jajau muetujua cutara. Saniniuujia, sesa naanaari, sesa jajau muetujuaaja. ¹⁸ Maninia naanaari maja na naata sesa jajau muetunu. Naajuhuj, sesa naanaari maja na naata maninia jajau muetunu. ¹⁹ Naana jaara sesa jajau muetujua quiri, nushiyari, manijinia catijasocoriquiano. ²⁰ Naacuajitij, niocua cuno sapojonuujuaca pueya niishiri nojori miishanojiniji sesa.

Saaja noojiaqueya pueyari Pueyaso muerasura quiniutianiya

(Lc 13.25-27)

²¹ 'Cuno pojori canapuate cua sequejacani: "Cua Jiyaniijianaa, cua Jiyaniijianaa", noojiaqueya nojoriininijioori maja nojori tiuquitianu quiniutianiya cua Que Pueyaso quiquojinia. Saaja seetanujuanaa cua Que tojitiajaca cutaraari nocua tiuquitianutaniya. ²² Cua nequesoreesacari pueya nio jiya puequesacari, queraatia pueyari cua sequenutaniya: "Cua Jiyaniijianaa, cua Jiyaniijianaa, canaacuajaari quia rupaa pohuataquiaari pueya niquiarani. Canaa sequesacari quia sesa, canaari samaruhua tohuatanijioquiaari quia cumacatani. Naajuhuj, canaari cusosuhua naatanijioquiaarini quia sesa canaa jiyaniquishacari". ²³ Janiyari

saniniuujia naa sequejaca riucuanutaniyani: “Maja cua niishiniu nijaniya. ¡Nia quiojorohua! Niaari saaja sesa miijiacaca quiquiaari”.

Jesu tojitiajaca miishanoori pueyaracaanu rishiniutianiya cutara

(Mr 1.22; Lc 6.47-49)

²⁴ 'Naacuajitij, cante cua sequesano tojjiani, cuno pueyanoori shuquiriaatia quiniutianiya juhua niishijia pueyano. Niishijia pueyanoori tiaquiaari cumueeca jiyajinia. ²⁵ Na nuhuaji, maruuri jiyanoohua niquiaari. Moori pajaashiquiaari. Paratuuri jiyanoohua piyarojoquiaari cuno tiaacuara. Naajaa, majaari na pojoretanu quiquiaari, cumueeca jiyajinia na nujuatasacari. ²⁶ Cante cua sequesano tojiyashijia saniniunijia, cunoori moseeca. Cua sequesano ruuretajaari taraatia quiniutianiya juhua moseeca pueyano. Moseeca pueyanoori jaaquiajia tiaquiaari. ²⁷ Maruuri jiyanoohua niquiaari. Moori pajaashiquiaari. Paratuuri jiyanoohua piyarojoquiaari cuno tiaacuara. Cuno pueyano tiaari pojotaquiaari. Na camaruuri jiyanoohua taraatia quiquiaari na tia pojotasacari.

²⁸ Jesu jaara niishitiojonu puecaquiaari, pueyari jiyanoohua jiuujiateriquiaa na niishitiojosano nojori tojishacari. ²⁹ Pueyari naa jiuujiatequiaari seetanu cumaacatajanaa Jesu niishitiojosacari juhua jiyaniijiajanaa, maja juhua Moisés Rootasanojiniji niishitiojanaa. Cuno pojoriiri nareja tariucuacaanu rootasano caminiujuquiaari pueyaracaanu.

8

Jesu naatanishacari sesa cusonu jiiitaja

(Mr 1.40-45; Lc 5.12-16)

¹ Jesu jaara tuhuananujiniji rosequiaariuhua na cojiniaata, jiyanoohua queraatia pueyari na nuhuajiriqiaa. ² Tamonu pueyano cusosuuri jiyacari Jesuucua catecanoquiaari. Jiyanoohua sesa cusonu jiiitaciaariiri. Tahue rupaaajinia, cuno cusonu sesaari quiquiaari “lepra”. Pueyano shuuri juhua miaquesano quijia na cuaqueyajinia cuno cusonu na jiiitiasacari. Cusosuuri Jesu cariquimiaaji mojuquetaquiaari Jesu na sequenura na panishano. Naa na sequereeri:

—Jiyaniijianaa, quia jaara paniri, niishiyacuajanijia quia naata cua cusonu cushiriitiniu.

³ Jesuuri nocua taraajequiaari. Nocua niaree na juaashiquiaari. Na sequereeri:

—Jaa, paniyanijia. Cuaara cushiriiria quia cusonu.

¡Jiyacaritij, ritia cushiriiquiri! Jeequerohuari. ⁴ Na nuhuaji, Jesuuri naa na rootaquiaari:

—Cua tojiri. Maja tamasaca niquiara quia pohuatanu cua miishano quiajaniya. Saaja Pueyaso secojonaa jiyaniijia quia cuaqueya quia niquitiri, na cartenura quiajaniya, pueya tajinia quia rucuanefonuhua juhujaniya. Na nuhuaji, ritia quia niquitiore quia seru Pueyasoocua catijiaso-coriquiano. Naa quia miiritij taa Moisés niishitiojoquiaari tarijiacuajani, juhua jeequesano quia quiniuria Pueyasora. Naacuajitij, pueyari niishiniutianiya quiaari tari jeequero-hua quia cusonujiniji.

Jesu naatanishacari Romano capitán seru
(Lc 7.1-10)

⁵ Jesu jaara tiuquiquiaariuhua na pueyata Capernaum tiacajiniohua, Romano soldadohua jiyaniijiaari Jesuucua niquiaari na secojonura Jesu. ⁶ Naa na sequequiaariiri:

—Jiyaniijianaa, cua seruuri cusosu mataa maquetujinia. Majaari na naata pooniniu quenaaja. Jiyano-hua naquiya miya na noonutaari.

⁷ Jesuuri na sequequiaari:

—Janiyacuaajaari nocua quianutaniyani na cusonu cua shaatanura.

⁸ Soldadohua jiyaniijiaari na riucaaree:

—¡Maja jiyaniijianaa! Janiyari maja pueyano maniniuni, cua tajinia quia tiuquiniuria. Nareja quia sequere, cua seru cusonu cuaara shaateera tamajaaja. Niishiyacuajanijia, quiaari na shaatanutaniya saa quia rupaataja. ⁹ Janiyari jiyaniijiaracajaniuhuj. Na tojiquiaanijia. Naajuhuj, cua soldadohuari cua tojtiaquiaajuhuj cua sequesacari nojori. Naacuajitij, janiya jaara tamonu sequerene: “Quia quiaare”, cunoori ritia quiaquiaa. Naajuhuj, janiya jaara tamonu sequerene cuaara niiria, cunoori ritia niya cucua. Janiya jaara cua pataaco seru sequerene cuaara miiria cua panishano, na miiquiaari. Cua sequesano jaara naa tojishaaquiaacuaa, quia sequesano cutaraari tojishaanutaniya.

¹⁰ Jesu jaara tojiquiaari naa cuno tahue sequesantej, jiuu-jiatequiaariiri. Na cojiniaa sequereeri:

—¡Seetanujuanaa nia sequeyanijia, majaari quenaaja parta Israel pueyajinijinio cua niquiniu quiquiaa Pueyasoocua tiu-ujia cutara, juhua nio tahue! ¹¹ Seetanujuanaa nia sequeyanijia, queraatia taucuaaari Pueyasoocua tiuujiaa quiniutianiya juhua nio tahue. Nojoriiri tucuaaanuji nijionutaniya pananu muetasamaji, pananu tiuquishocojijihuj. Nojoriiri pa supuetanaata cajitiuniutianiya na miaquenu-unura Pueyaso shuriucua. Tii quiniutianiya shuquiriaatiaari pa supuetanaata: Abrahamta, Isaactajuhuj, Jacobotanio. ¹² Parta Israel pueya, canapuete Abraham jinianuucujinino

supuenoni, nojoriiri saniniuujia tamocora quejoosaanutaninya ninishiqui, nojori tojitiaaquiniucua Pueyaso. Nojoriiri tii sariyocuatunutaniya naquiya na miishacari. Na quiaca miaquenuunutaninyari na noonuta. Nojoriiri juucua saquiriojosaaquiaari Pueyaso muerasu nojori quiniuria. Nojoriiri jiyaniya nojoriiri Pueyaso muerasu cutara Abraham jiananuucujinino nojori quishacari.

¹³ Na nuhuaji, Jesuuri cuno soldadohua camarnu sequenciaari:

—Quia tiajinia quia quiaarohuaqui. Cuaara quiiriaqui taa quia sequereecuajani.

Jiyacaritij, na seruuri ritia naataquiaariuhua.

Jesu naatanishacari Pedro reyarucua

(Mr 1.29-31; Lc 4.38-39)

¹⁴ Jesuuri quiaaree Pedro tiajinia. Tii Pedro reyarucua niquishiiri cusosu mataano na maquetujinia. Naseeca matariquiaari. ¹⁵ Jesuuri na juaashiquia quiasee. Na naseeca cusonuuri ritia na tajiquiaari. Ritia sanequiaariiri Jesu na mianuutenura.

Jesu naatanijosacari queraatia pueya

(Mr 1.32-34; Lc 4.40-41)

¹⁶ Shusha ninishacari cuno juucaja, cuno tiacajinijinio pueyari queraatia samaruhuaraca pueya jaatucunuquiaari Jesuucua. Jesuuri cuno samaruhua tohuatanijioquiaari saa na rupaataja. Puetunu cusosuhujanaa naatanijioreejaariuhuj. ¹⁷ Naa tohuateequiaariti supuetana Isaías naajiotasano, Pueyaso niishitishacari nojuaja Jesujiniji. Naa naajiotasano quiyari:

“Nojuajaari taraatia pa miiniu jaariutiaree pajaniyajiniji. Pa niti cusoyareeri puetunu pa cusonujanaa na jatanura”.

Tamasaca pueya quiniu panishacari Jesu pueyara juucua

(Lc 9.57-62)

¹⁸ Jesu jaara jiyanohua queraatia pueya niquiquiaari na shocua maano, na pueya sequereeri:

—Caminiya taquijiria pa niuutiaare.

¹⁹ Jiyacaritij, Moisés Rootasanojiniji niishitiojona pueyanoori Jesu sequeree:

—Niishitiojonanaa, janiyari quiata quianu paniyani. Janiyacua quia tarajareni puetunu tiquiyocujanaa quia rucuanijosacari.

²⁰ Jesuuri na riucuaaree:

—Quioojuapue cutaraari na raa jiitiaa. Shuhuuri na jesuhua jiitiaajuhuj. Saniniuujia, pueyano cua quishacari

mijiria, majaari cua maquejara cua jiiitianu quenaaja, taa cuno casami jiiitiaacuaa na maquetujuarani.

²¹ Tamonu Jesu pueyajinijiniori Jesu sequeree:

—Cua jiyaniijanaa, cua tarinitiare, cua que niquirijiaara. Janiya jaara na shaajareni, janiyacua quia tarajare cutarani.

²² Jesuuri na riucuaaree:

—Naajaa, cuata quia quiaare cutara. Quia tarinitiare no-juaja. Macunucua cuaara jamoora tama narta macujuaaja. Naatej, cante Pueyaso tojitiaashijiacani, nojoriiri tariucua juhua macunucua quiya Pueyasora.

Jesu suraajasacari paratu, mohuacanio

(Mr 4.35-41; Lc 8.22-25)

²³ Na nuhuaji, Jesuuri botejina tacaquiaari. Na saquiriojosano pueyari nata quiojoquiaari. ²⁴ Paratuuri senota piyarojonu coteequiaari nojori niutiasacari. Jiyanoehua piyarojoriquiaari. Caminiaari jiyanoehua queyocuariquiaa paratu piyarojosacari. Mohuacaari bote jiniacuma mishiriquiaa. Jesuuri jiyacari maqueriquiaa. ²⁵ Na pueyari cunora na niucujasee. Jesu sequetureeri:

—¡Jiyaniijanaa, canaa quia naacutare! ¡Paa tari tiuquitiaareeni!

²⁶ Nojori riucuaareeri:

—¿Casaara nia pueretiuyani? ¿Majateeri nia niishiniu Pueyasooocua tiuuniu?

Jesuuri saneree. Paratu sequereeri, mohuacanio:

—¡Niaaj, nia suraajere!

Paratu, mohuacaari ritia suraajequiaari. ²⁷ Jesu pueyari jiuujiatequee. Tama nojorijiaarijia sequequiaari:

—¡Juhuej! ¿Taamueca pueyanotucuaanojoni? ¡Paratuuri na tojiya, mohuacajuhua!

Jesu tohuanishacari samaruhua, caapiqui pueyajiniji Gadara jiyajinia

(Mr 5.1-20; Lc 8.26-39)

²⁸ Jesuuri na saquiriojosano pueyata tiuquiiioquiaari caminia taquijiria Gadara jiyajinia. Jiyacaritij, caapiqui pueyanoori Jesuucua tohareetaquiaari raacajiniji, macunucua nucuhua paaquiosaquiji. Nojoriiri samarhuaraca quiquiaari. ¡Jiyanoehua pueya pueresano! Cuno nucuaco, majaari pueya rucuanenu quijia, cuno pojori na puerenucua. ²⁹ Samarhuaraca caapiqui pueyanoori Jesuucua nacaturee:

—¿Casaacua miji quia niyani, Pueyaso Niyanunaa? ¿Quiaate juhuacarijia niyaree canaa quia saniitionura Jesunaa?

³⁰ Jiyacaritij, cushiyari cateca naataja miaquenuuriquiaa. Jiyanoehua queraatia cushiyari quiquiaari. ³¹ Samaruhuari cuno caapiqui pueya pocuatequiaari. Naa Jesu secojoreeri:

—¡Quiaa jaara canaa tohuatanijiore nio caapiqui pueyanojiniji, canaa quia jiyarore cuno cushiyacua canaa tiuquitiatura!

³² Jesuuri cuno samaruhua sequereer:

—¡Nia quiaare!

Samaruhuari cuno caapiqui pueyajiniji tohuareetaquiaari. Cushiyacua tiuquitiaseeri. ¡Cushiyari cocuatequee! Saaja caminiajinia totesee tacobinijiiri. Cushiyari tii shushiniuushii.

³³ Cushiya cojuanaari netecuatuquiaariuhua na shiri-iquiniutia na tiacajiniara. Nojori tiuquiiijosacariuhua, pueya niqiuara pahuatatuquiaari cushiyajinijiiri, samaruhuaraca pueyajinijinio. ³⁴ Naaratej puetunu pueyajanaari cuno tiacajiniji nijioquiaari Jesuucua. Nojori niquishacari Jesu, na sequetureeri nojori jiyajiniji na quianura tamaqui.

9

Jesu naatanishacari cumatacuruhuana cusosu
(Mr 2.1-12; Lc 5.17-26)

¹ Na nuhuaji, Jesuuri botejinia rosetaquiaari na saquiri-ajosano pueyata. Caminia taquijiria niuutiaquiaariuhuari tama na tiacajiniarajaaja. ² Tii nojori tiuquiiijosacari, Jesuucua patasaaquiaariiri cumatacuruhuana cusosu pueyano. Patasaaquiaariiri na matujinia. Jesu niquishacari taa na patanaa tiuquiaari jiyanoehua nocuani, cusosu sequereeri:

—¡Quia shuquiriri sanajanaa! Quiaacuajaari tari jiyanooshaaree sesa quia miishanojiniji.

³ Noojiaqueya Moisés Rootasanojiniji niishitiojonaari Jesu sequesano tojitiariquiaa. Nojoriiri tama noojiajiniajaaja niishiriojonuuquiaari: “¡Nio pueyanoori tama na cuaqueyajaaja jiyateya juhua Pueyaso na quiniuria naa na sequesacari! ¡Cunoori jiyanoehua sacuaraatia!”. ⁴ Jesuuri cuno pueya niishiriojosano niishiquiaari. Nojori sequereeri:

—¿Casaara sesa nia niishiriojijiani? ⁵ Seetanujuanaa, pueyano maja na naata jiyanooniu pueya miishano sesa. Naajuhuj, majaari na naata tamajaaja pueya na naataniniu.

⁶ Naajaa, janiyari nia niishitiniutianiyani janiyari mijiria jiyarosaaquiaarini cua jiyanooniuria pueya, sesa nojori miishanojiniji.

Jiyacaritij, Jesuuri cusosu sequequiaari cuno pueya niqiuara:

—¡Quia sanere! Quia matu quia pataarohua quia tiajinia.

⁷ Cusosuuri sanequiaari. Na tiajinia quiaarohuari. ⁸ Na niquitiushacari Jesu miishano, puetunu pueyajanaari shiri-iquitiuquiaari. Nojoriiri Pueyaso maniniuhuaqueetaquiaari pueya na niquitionuucua na cumaaca, naa Jesu miiniuriatej.

Jesu sequesacari Mateo na pueyano na quiniuria
(Mr 2.13-17; Lc 5.27-32)

⁹ Jesu quiasacari cuno tiacajiniji, tamonu pueyano niquiquiaari cajiyanoori cumaneeca masejojuajinia Romano jiyaniijiara. Na sesa quiquiaari Mateo. Nojuacuajaari janiya; nio naajionani. Jesuuri cua sequequiaari:

—Cua nuhuajiyare cua pueyano quia quiniuria.

Janiyari ritia sanequiaarini. Janiyari nata quiaareeni.

¹⁰ Na nuhuaji, janiyari Jesu masuuquiaarini cua tiajinia na miaquenura, na pueyajuhuj. Naacujitij Jesuuri cua tiajinia tiuquitiaquiaari miaquenura. Queraatia cuarta cumaneeca masejonaari canaa cojiriquiaajuhuj, queraatia noo pojori-jiuhuj, Fariseocuaca jiyaniquitiushano sesoriquia pueyatatej. Puetunu canaajanaari Jesuta miaquenuuriquiaani. ¹¹ Fariseocuaca jaara Jesu niquiquiaari miaqueyano canaata, nojori soosano pueyani, nojoriiri naa Jesu saquiriojosano pueya nequesotaree:

—¿Casaara nia niishitiojona miaqueya cuno sacuaraatia cumaneeca masejonaatani, sesoriquia pueyatanió?

¹² Jesuuri naa nojori sequesano tojirii. Nojori sequere miriquiiri:

—Cante na cuaqueya jiyaniyani maja cusosu na quiniu, nojuajaari maja naarajona na paniniu. Cusosuhua cutaraari naarajona panijia. Naajuhuj, sesa miijiaca pueyari cua paniya nojori cua jiyanooniuria sesa nojori miijiosanojiniji.

¹³ Niaa cuara niishitiojosuhuara socua, maninia nia niishiniuria casaa tariucuacaanu Pueyaso sequesano niishitiojiyani naa na sequesacaritij:

“Niaacuajaari nia seya catijiaquiaa cucuara. Maninia juhuari nia taraajenura tamasaacua. Cuno cutaraari cua shuquiritiasano”.

Naara niquiaarinijia nia sequesano sesa miijiaca cua jiyanooniuria sesa nojori miishanojiniji. Maja cutaraari mijiria cua ninu quiquiaari maninia pueyacu.

Pueya nequesotasano casaara Jesu pueya tarinitiaaqui quiaa quenaaja miaquenuni
(Mr 2.18-22; Lc 5.33-39)

¹⁴ Tiuguinijiona Juan pueyari Jesuucua niquiaari naa na nequesotanura:

—¿Casaara quia pueya tarinitiaaqui quiaa quenaaja miaquenuni, nojori secojonura Pueyasoni? Canaacuajaari

miaquenu cartequiaani Pueyaso canaa secojonura taa Fariseocuaca miiquiaacuaani.

¹⁵ Jesuuri nojori riucuaaree miriqui:

—Pueyano camishacari, ¿na masuusano pueyatucua taa-
tia quiriiri, camiriquiano pueyano jaara nojoritia quiyajaa?
Maja. Tamacari cutara, camiriquiano pueyanoori nojori
tajiniji rishaanutaniya. Jiyacari cutara maja cua pueya mi-
aquenu quiniutianiya, janiya jaara nojori tajiniji rishaareni.

¹⁶ Socua cua tojitiare pueyanaa. Pueyano jaara cushipir-
ijionu paniri na toque mocua, maja na naata quiarinio to-
querau ruposaanu toque mocua cuhuocojinia, jeequesoo-
jua na quishacari. Quiarinio toquerau jaara ruposaare
toque mocua cuhuocojinia, na jeequesacari, posequenutani-
yari. Cunota, toque mocua cuhuocoori socua sutenutaniya.
¹⁷ Naajuhuj, majaari pa naata uva caaca racatanu shoque
tariucuacojinia. Uva quiariniacu jaara racatasaare juucua
shoque tariucuacojinia, jaara jerema vinora na quiniuria,
shoque tariucuaco surtanutaniyari. Vinoori niitiasaanu-
taniya najuhuanaj. Shoque tariucuacoori maja na naata
tooniu, uva caaca jaara jerema. Naaratej, uva caaca nia shuu-
jioire shoque quiariquiojinia, maja najuhuana nia niitianura
uva caaca. Naajuhuj, majaari na naata cua niishitiojosano
cojitishaanu tariucuacaanu niishitiojosanota. Cua niishitio-
josano nia tojitiare cutara.

Caapiqui maajipohua naatanijiosacari

(Mr 5.21-43; Lc 8.40-56)

¹⁸ Jesu pocuasacarijia, nocua niquiaariiri Pueyaso secojo-
jua tia camarnu. Jesu cariquimiaji mojuquetaquiaariiri. Na
sequereeri:

—¡Quiyatuuri shusha cusoquee! Naajaa, miji, cuata
quia quiaare. Niishiyanjia quiaa jaara niare nocua quia
juaashiquia, samiitianutaniuhuari.

¹⁹ Jesuuri saneree. Nata quiaareeri. Canaa, Jesu
saquiriojosano pueyani, canaari nata quiaareejuhuj.
²⁰⁻²¹ Canaa quiasacari, tamonu maaji cusosuuri Jesuucua
catecanoquiaari jiyasohuaja na paramaji. Cuno maajiiri
pueyaracaanu naatequiaari. Doce marijiaari tari na
shoconujuquiaari pueyaracaanu na naatesacari. Tama
niishiriojoriquiaajaarijia: “Janiya jaara Jesu toque quiareni,
cua nanacaari curetanutaniya”. Cunora, maajiiri Jesu
toque casaca quiasee jiyasohuaja. ²² Jesuuri na nijiniara
tacatequee. Cuno maaji niquiriiri. Na sequereeri:

—Shuquiriaatia quia quiri, sanauna. Cucua quia tiu-
ushacari, quia nanacaari tari curetaquee.

Jiyacaritij, cuno maaji jiniacumaari ritia sacuantaquee.

²³ Jesuta canaa tiuquishacari Pueyaso secojojua tia camarnu tiajinia, canaari pueya niquishiini macura naajua joneneniuyano taraatia, sapiyoniuyanonio. ²⁴ Jesuuri cuno pojori sequeree:

—¡Niiquiji nia tohuareetare! Nio maaji samiriuuri maja macu. Nareja maqueyano.

Pueyari Jesu saroojotaree saaja, naa na sequesacaritij. ²⁵ Jesuuri cuno pojori tohuatanijioree saaja. Na nuhuaji, sohuacamara tiuquimiaari macuucua. Na juaashiquiajiniji na quiaseeri. ¡Maaji samiriuuri sanemaa! ²⁶ Naa Jesu miishanojinijiiri pohuatasaaquiaari puetunu cuno jiyajiniajanaa.

Jesu jeecasacari caapiqui cariojuaru namijiaa

²⁷ Canaa jaara tohuareetaquiaari cuno tiajinijini, caapiqui cariojuaruuri Jesu nuhuajiquiaari. Canaa nuhuaji nacariquiaari nojori niishishacari Jesuuri seetanujuanaa Pueyaso Jiyarosano. Naaratej, Jesu sequeturiquiaari:

—¡Supuetana David niquiohuacuajinio supueno pueyanonaa, canaacua quia taraajere quenaaja!

²⁸ Canaa tiuquishacariuhua canaa quijia tiajinia, cariojuarujuriiri Jesuucua catecanoquiaari. Jesuuri nojori nequesotaree:

—¿Niaate cucua tiuya nia namijiaa cua jeecanura?

Jesu riucuatereeri:

—Jaa, jiyaniijanaa. ¡Quia naatacuaaquiniatejaj!

²⁹ Jesuuri na juaashiquia niaree nojori namijiaacua. Jesuuri cariojuarujuri sequeree:

—Cucua nia tiuuniuucua, cuara quiiria taa nia sequereecuajani,

³⁰ Cuno pojori namijiaari maniniuujiaacara quiquiaariuhua. Jesuuri jiyanohua nojori rootaree:

—¡Majaari tamasaca niquiara nia pohuatanu cua miishano!

³¹ Na tohuareetasacari, cuno cariojuarujuriiri ritia pohuatanu coteequiaari Jesu miishanojiniji. Naacuajitij, Jesujiniji niishishaaquiaariiri puetunu cuno jiyajiniajanaa.

Jesu pocuatesacari tiquia pueyano

³² Cariojuarujuri tohuareetanu nuhuaji, tamasaca pueyari Jesuucua jaatucuquiaari samaruraca pueyano. Cuno pueyanoori maja na naata pocuanu quijia. Tiquiatuhuj.

³³ Jesuuri samaru tohuatanirii cuno pueyanojiniji. Na nuhuaji, cuno pueyanoori ritia pocuanu coteequiaari. Naa pueya niquishacaritij, nojoriiri jiyanohua jiuujiatequiaari. Sequetureeri:

—¡Naa miishanoori maja na niquishaanu quiquiaari Israel jiyajinia!

³⁴ Fariseocuacaari saaja Jesu macaatiquiaari pueya niqiuara. Naa sequetureeri:

—Cuno Jesuni, nojuajaari samaruhua jiyaniijia cumaacaraca. Naacuaajitij, na naata samaruhua tohuatanijionu.

Jesu taraajesacari pueyacua

³⁵ Jesuuri puetunu tiacajiniajanaa rucuanajoquiaari Pueyaso rupaa na pohanura, puereetuuca tiacajinia, shiitianiyojua tiacajiniano. Maninia rupaa pohanuraquiaari iri Pueyaso secojojua tiacajiniaqueya, pueya niishiniuria taa Pueyaso jiyanoonu paniya nojorini. Naajuhua, nojuajaari queraatia tamaatia cusonu naatanijioquiaari puetunujanaa, nootunejacanio.

³⁶ Jesu shootiasacari pueya, nojoriicua taraajequiaari jiyanohuari. Pueyari taraatia niquishano quiquiaari, juhua tashuquioono pueya. Nojoriiri taraatia quijiaca quiquiaari juhua cojuasoo borregohua. Shaaqui na camaru. ³⁷ Cunora, Jesuuri canaa na saquiriojosano pueya sequequiaari:

—¡Nia niquiri! Jiyanohua queraatia pueya. Cuno pojoriiri juhua puereetuuca sucohua. Saniniuujia, secajaari na senoonaa. ³⁸ Nocuaaji nia sequeyanijia, na Camaru nia secojore, nojuaja cuara jiyaroora queraatia poonijionaa na senooriquiano nera.

10

Jesu saquiriojosacari doce pueya na jiyaramiquishocoriquiano (Mr 3.13-19; Lc 6.12-16)

¹ Jesuuri canaa na doce saquiriojosano pueya sequequiaari na rootasano canaa tojiniuria, canaa na jiyaramiquiyaquishacarijia. Jesuuri canaa niqutioquiaari na cumaaca, samaruhua canaa tohuatanijionura, cusosuhua canaa naatanijionura, puetunu noonujanaa canaa shaatanurajuhua.

² Niiori canaa sesaca, na jiyaramiquishocoriquiano pueya sesacani: coteenuuri quiquiaari Simón. Pedroori na sesa quiquiaarijuhuaj. Pedro tarajanu Andrésri quiquiaarijuhuaj. Quiriquiaajaariuhua Santiago, tarajanu Juannio. Cuno pojoriiri Zebedeo niqiohua quiquiaari. ³ Felipeeri quiriquiaajaaruaj, Bartolomé, Tomásnio. Quiriquiaajaariuhua janiya Mateoni. Janiyari tarijia quiquiaarini cumaneeca masejojua Romano jiyaniijia. Quiriquiaajaariuhua socua tamonu Santiago. Cuno Santiagoori Alfeo niyanu quiquiaari. Quiriquiaajaariuhua Lebeo. Na sesa tarajanuuri quiquiaari Tadeo. ⁴ Quiriquiaajaariuhua Simón. Nojuajaari

Cananeo pueya maanujinijinio quiquiaari. Judas Iscarioteeri quiquiaajuhuj. Nojuajaari Jesu quiateriquiano quiquiaari mosocoriquiano.

Jesu rootasano na pueya na jiyaramiquiyaquishacarijia
(Mr 6.7-13; Lc 9.1-6)

⁵ Jesuuri nio na doce pueya jiyaramiquiquiaari Pueyaso rupaa canaa pohuatanura. Coteenu, canaa rootaquiaari-iri, canaa na jiyaramiquiyaquishacarijia. Naa canaa sequequiaariiri:

—Majaari taucuacaacua nia quiojonu. Naajuhuj, majaari nia tiuquiniu Samaria pueya tiacajinia. ⁶ Saaja parta Israel pueyacua nia quiaare cutara. Nojoriiri juhua borregohua tashuquioonu quiya. ⁷ Nojori niqiuara nia pohuatare puetunu tiacajiniajanaa. Nojori nia sequere: “Pueyasoori quiarjia nia jiitianu paniya, niaa jaara na rupaa tojtiajacara quiri”. ⁸ Cusosuhua nia naatanijiore. Macunucua nia samitianijiore. Canapuate lepra cusonu jiitiaani, cuno cusonu nia shaajare pueya cuaqueyajiniji. Samaruhua nia tohatanijiore pueyajiniji. Niaacuajaari nio cumaaca maseree nareja. Naaratej, nareja nia naatanijiorejuhuj. Majaari cua cumaaca nia jamuenu.

⁹ Majaari cumaneece nia panu. ¹⁰ Majaari nia caashoque nia panu. Majaari socua toqueya nia panu, sapatunio. Saa nia cushishanotaja nia quiaare. Majaari nia panu nia mijotu. Nia naacutasano pueya cuara niqutioora saniniuujia nia panishano.

¹¹ Nia rucuanijosacari, niaa jaara tamonu tiacajinia tiuquishii, nia nequesotare tee maninia pueyano quiyani. Cuno pueyano tiajinia nia jiyojetare, niaa cuara cuniquiji quiaarejaatijia. ¹² Niaa jaara tamonu tiajinia tiuquishi-iquia, pueya nia sequere naatej: “Pueyaso cuara nioojia cajitiiria”. ¹³ Cuno tiajinia quiniaa jaara maninia pueya quiri, juhujaniya quiniutianiyari taa nia sequereecuajani. Nojori jaara Pueyaso tojiyashijiaca quiri saniniuujia, nojori jiuujiacaari cajitiyaquishaanutaniya. ¹⁴ Tamonu tia camaru jaara nia tiuquinitianu paniyaquiri na tiajinia, Pueyaso Rupaa ruuretajaca nojori quiniuucua, nojori niqiuara nia niohuacaacuaji nia rapijiotare jiya jooqua. Naacuajitij, cuno pueyari niishiniutianiya Pueyasoori nojori jiyanyo-aquiniutianiya, nojori maseyaquiniuucua na rupaa pohuataanaa. Naa nia miirijihuj cuno tiaca pueya niqiuara, cuno pojori jaara Pueyaso rupaa tojiniu paniyaquiri nia pohuatasacari. ¹⁵ Seetanujuanaa nia sequeyanijia, jiya puequesacari, cua nequesoreesacari pueya, cuno pueyari

jiyanohua saniitiosaanutaniya socua Sodoma tiaca pueyajiniji, Gomorra tiaca pueyajinijinio.

Pueyaso rupaa pohuatanaari naquiya miishaanutaniya

¹⁶ 'Socua cua tojitiare. Janiyari nia jiyaroya Pueyaso tojitiaashijiaca niquiara nia pohuatanura cua rupaani. Niaari nojori tajinia puereeta quiniutianiya, naatej, taa borregohua quiya sayoru tajiniacuaani. Nojoriiri sesa miiniutianiya niajaniya. Nocuaji jiyanoahua niishijiaca nia quiri, tama nia cuaqueyajaaja nia cojuanura. Naajaa, majaari nojori naminiu. Saaja maninia nia quiri juhua noseja, pueyano porocua. ¹⁷ Tama nia cuaqueyajaaja nia cojuare tamasaca pueyacujaji. Cuno pojoriiri nia jiyatanutaniya tiaca jiyaniijianucuaacua nia saniitiosaanura, nojori tojiniu paniyaquishacari cua rupaa. Niaari Pueyaso secojojua tiacajinia piquishaanutaniya. ¹⁸ Cua rupaa nia pohuatuucua, niaari quioosaanutaniya tiaca jiyaniijianucuaacuara, nojori nequesoreenura niajaniya. Niaari jiyaca jiyaniijianucua niqutiosaanutaniyajuhuaaj. Naajaa, naacujitij, niaari nojori niquiara pohuatanutaniya janiyajiniji, taucua jiyaniijianucua niquiaranio. ¹⁹ Niaa jaara jiyaniijianucua tacoji nujuatesaare nequesoreesocoriquiano, majaari nia niishiriojonu taa nia riucuanutaniyani. Nia riucuanu panishacari, niaari jiyacari niishitiosaanutaniyacujaja maninia nia riucuanura. ²⁰ Naacujitij, nia riucuasanoori maja tama niajaniyajinijiaaja quiniutianiya. Pueyaso Sohuanu cutaraari nia pohuatenutaniya jiyaniijianucua niquiara.

²¹ 'Pueyari tama tarajanujuaaja niqutionutaniya mosocoriquiano, tarajanu tiuushacari cucua. Pueyanoori neyanu niqutionutaniya mosocoriquiano, cucua neyanu tiuuniucua. Mueraasapueeri tama na queya tacartanutaniyajaacujua na motenura, na queya tiuushacari cucua. ²² Puetunu pueyajanaari nia niquiniu paniyaquiniutianiya, cucua nia tiuushacari. Naajaa, cante seetanujuanaa cucua tiuujia quiya pueyaracaanuni, nojuaja cutaraari jatanishaanutaniya pueyaracaanu shacantuuca quijia na quiniuria. ²³ Pueya jaara naquiya nia miiri Pueyaso rupaa nia pohuatasacari nojori tiacajinia, cuno tiacajiniji nia mashiri tamonu tiacajiniara tii nia pohuatanura. Seetanujuanaa nia sequeyanijia, juhuanujuaja nia tucuaaquishacarijia pohuatanu Pueyaso rupaa puetunu Israel pueya tiacajiniajanaa, janiyari jiyocuaaanuji tacatenutaniuhuani.

²⁴ 'Nio nia niishirijiuhuaaj. Pueyanoori maja socua tojihano na niishitiojonajiniji. Naajuhuaaj, seruuri maja socua

tojishano na camarnujiniji. ²⁵ Pueyano jaara maninia tojiriquia na niishitiojona, maniniacuaajaari nojuaja jaara na nuhuaji juhua na niishitiojonara quirijiuhuj. Maniniacuaajaari, seru jaara juhua na camarnura quirijiuhuj. Naaratej, nia Jiyaniijia jaara jiyaniquishiyacuaa “Sesaacata”, ¿taariquijia socua na muerasu sesacasaanutaniyatej?

Cante socua pa pueresanoni

(Lc 12.2-7)

²⁶ Naaratej, majaari nia puerenu niarta pueya. Puetunu jiyasohuaja pueya miishanojuanaari niishishano quiniutianiya. Puetunu pueya seetasanojuanaari niishishaanutaniyajuhuj. ²⁷ Jiyasohuaja cua niishitiojosano nijaniyani, cuno nia pohuatare puetunu pueya niquiarajanaa. Cua sasacojosano nia numaa pajamani, cuno nia nacatare puetunu pueya niquiarajanaa. ²⁸ Majaari nia puerenu pa puecojuaca. Nojoriiri maja na naata pa sohanu monu. Saaja nia puerere cutara nooj, cante cumaacaracacujani mani quiquiojinia nia sohanu na quejoonura, nia cuaqueyano.

²⁹ Pa naata saaja niquiriyatu cumaneeniyojuata caapiqui shiyojuanijua masenu pa miaquesocoriquiano. Naajaa, pa Que Pueyasoori puetunu cuno shuhua niishiyajanaa. Naacuajitij, majaari quenaaja niquiriyatujua shiyojua cusonu Pueyaso paniyaquishacari. ³⁰ Naajuhuj, Pueyasoori puetunu nia naca caju niishiyajanaa. Puetunujuanaari na serojosano quiya. ³¹ Naacuajitij, maja nia puerenu. Niaari jiyanohua socua Pueyaso panishano queraatia shuhujiniji.

Maja cumaati Jesucristojiniji pa caririquiniu

(Lc 12.8-9)

³² Njaa jaara tamasa pueya niquiara sequere niaari cucua tiuujia cutara, janiyacua jiyocuaaanu quijia cua Que niquiara sequerejanijuhuj, niaari cua muerasu. ³³ Cante saniniuujia cucuaji seetaja tamasa niquiarani, janiyari cua Que niquiara na tamacanutaniyajaacuhuj.

Jesuucua tiuujia pueyari narta pueya juaashano

(Lc 12.51-53; 14.26-27)

³⁴ Majaari nia jyaniniu janiya mijiria niquiarini pueya quiniuria juhujaniya. Maja. Mijiria cua niniuucua, pueyari juayonuujutanutaniya. ³⁵ Niquiaari cutaranijia pueya tiuuniuria cucua. Naacuajitij, pueya tiushacari cucua, cucua tiuyashijia pueyari nojori niqiniu paniyaquiniutianiya. Naacuajitij, pueyanoori na que paracaaniutianiya, cucua tiuujia na que quiniuucua. Maajiiri na nucua paracaaniutaniyajuhuj, na nucua tiuuniuucua cucua. Pueyano

niquiocuaari na reyarucua paracaaniutianiyajuhuaaj, cucua tiuujia na reyarucua quiniuucua. ³⁶ Naacuaajitij, tama pueya panishano pueyajaajaari na paracara quiniutianiya, cucua nojori tiuuniuucua.

³⁷ 'Cante na queya panijia socua janiyajinijini, jiyano pueyanoori maja maninia cua pueyano na quiniuria. Cante necohua panijia socua janiyajinijini, jiyano pueyanoori maja maninia cua pueyano na quiniuriajuhuaaj. ³⁸ Cante tama na cuaqueyajaaja panitiaaquijia na tojiniuria janiyani, cunoori maja maninia quiria. ³⁹ Cante saaja tama na cuaqueyajaaja cojuanu paniya shuquiriaatia na quiniuria mijiriani, jiyano pueyanotej, nojuaja cutaraari shaajasaanutaniya, pueyara-caanu taraatia na miitiasaanura. Saniniuujia, cante tama na cuaqueyajaaja panitaa naquiya na miishaanura cua tojjia na quiniuucuanu, nojuaja cutaraari rishijiara jatanishaanutaniya. Seetanujuanaa cuata shuquiriaatia quiniutianiya pueyaracaanuuri.

Pueyasoori maninia miijiaca niquitionutaniya na jiiitiasanojiniji
(Mr 9.41)

⁴⁰ 'Cante na tiaco nia tiuquinitiaja cua rupaajiniji nia pohuatasano na tojiniuriani, cuno pueyanoori cua tojiyajuhaaj. Cuno, cante cua tojjiani, nojuajaari cua Jiyarona tojjiajuhuaaj. ⁴¹ Naajuhuaaj, cante Pueyaso rupaa pohuatana tiuquinitiaja na tiaconi, Pueyaso rupaa pohuatana na quiniuucuanu, Pueyasoori cuno pueyano niquitionutaniya maninia na casaajiniji. Nojuajaari niquitiosaanutaniya mariyata taa Pueyaso rupaa pohuatana niquitiosaanutaniyacuaani, Pueyasojiniji na pohuatanu sami. Cante maninia miijia pueyano tiuquinitiaja na tiaconi, maninia pueyano na quiniuucua, na tiaco tiuquinitiaja pueyanoori maninia casaa niquitiosaanutaniya mariyata taa maninia miijia pueyano niquitiosaanutaniyacuaani. ⁴² Naajuhuaaj, cante quenaaja shiniitiuniacu mohuaca raateya tamonuni, cua mueyaniojua na quiniuucua, Pueyasoori seetanujuanaa na jiiitiasanojiniji na niquitionutaniya na raatenu sami.

11

Tiuquinijiona Juanri na pueya jiyaroquiaari Jesu nequesotanura
(Lc 7.18-35)

¹ Jesu jaara canaa na doce saquiriojosano pueya rootanu tucuataquiaari tii, nojuajaari tiji quiaquiaari cuno jiya tiacajinia quiniaa na niishitiojonura Pueyaso rupaa.

² Tiuquinijiona Juan quishacari nujuatejojuajinia, nojuajaari jiyacari niishiquiaari Jesucristo miishanojiniji. Cunora, nojuajaari na pueya jiyaroquiaari Jesuucua naa na nequesofanura:

³ —¿Quiaate seetanujuanaa Cristo, tariucuacaanu Pueyaso sequesano canaacua niriqianotej? ¿Canaate tamonu sashiya soj?

⁴ Jesuuri nojori riucuaaree:

—Nia quiaarohua. Tiuquinijiona Juan nia pohuatasuhua puetunu cua miishanojuanaa nia niquishano, nia tojishanojuhuaj. ⁵ Naa nia pohuatasuhua: “Cariyojuarujuriiri tari niquitiarohua. Shipiiniquiuniuujiaaari maninia rucoorohua. Shu miaqueja cusonu jiitajacaari tari jeequerohua. Numueejunucuaari tari tojitiarohua maninia. Macunucuaari samiitiacorohua. Casamiijiuniucua pueyari Pueyaso rupaa pohuatasaaaree, Pueyaso muerasura nojori quiniuria”.

⁶ Shuquiriaatia quijia cutaraari noo pueyano, cante cucuaji taacanuyaquijiani.

⁷ Tiuquinijiona Juan pueya jaara quiojoquiaariuhua Juan-cua, Jesuuri Tiuquinijiona Juanjiniji naa pohuatanu coteequiaari pueya niquiaratej:

—¿Casaa niqiniuucua nia quiojocanu cariquia jiyajiniani? ¿Niaateeri paratu piyarojosano naajua niqiniuucua quiacanu? Maja. ¿Tiuquinijiona Juanteeri noojia niqijioteja? Maja. ⁸ Cua sequeture, ¿casaa niqiniuucua nia quiojocanuni? ¿Niaateeri pueyano niqiquianu maniniuqui toque cushiyano? Maja. Cuno pojori cante maniniuqui toque cushijiani, nojoriiri jiyaniijianucua tiajinia quijiaa cutara, maja cariquia jiyajinia. ⁹ ¿Taateerinitioj? ¿Casaacua nia quiojocanurini? ¿Pueyaso sequenu panishano caminiujiunia niqiniuucuatee? Jaa. Seetanujuanaa nia sequeyanijia, Tiuquinijiona Juanri jiyanohua socua cutara pueyano tamasaca Pueyaso sequesano caminiujiuniaajiniji. ¹⁰ Cuno Juanjinijicuaajaari tariucuacaanu Pueyaso Rupaajinia pohuatasaaquiaari. Naa naajiotasaaquiaari miriquiiri Pueyaso sequesano janiya nojuajiniji:

“Janiyari cua pueyano jiyaronutaniya quiocuajini. Nojuajaari quia puetanutaniya, quia nuu jecariquiano quiocuaji”.

Juanri naa maninia miiquiaari cucuaji, pueya tojiniuria janiya cua tiuquishacari.

¹¹ 'Seetanujuanaa nia sequeyanijia. Majaari tamonu pueyano quiniu quiquiaari socua cutara pueyano Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, cunoori socua cutara pueyano Tiuquinijiona Juanjiniji.

12 'Tiuquinijiona Juan jaara coteequiaari Pueyaso rupaa pohuatanu, pueyari jiyanoehua saniniujiuriquiaa Pueyaso muerasu nojori quiniuria. Pueyari naa saniniujiya quiarijiajuhuaj. Cante jiyanoehua saniniujiya Pueyaso muerasu na quiniuriani, naa quiniutianiyari. 13 Supuetana Moisés, mariyata puetunu Pueyaso sequesano caminiujiuniaajanaari tariucuacaanu pohuataquiaari taa Pueyaso jitianutaniya pueyani. Naa poojotasaquiaariiri Tiuquinijiona Juan jaara tiuquiquiaariijaatijia. Quiarijiani, Tiuquinijiona Juanta, nojori pohuatasanoori tari tohuateenu coteya. 14 Naa jaara nio cua pohuatasanoocua tiuuniu paniri, nia tojiri nio: Tiuquinijiona Juancuajaari tariucuacaanu pueyara Pueyaso sequesano caminiujiunia Elíascauja. Elíascaujaari sequesaaquiaari niriquiano. 15 Cante numaaracani, cuaara tojiiria cua sequesano.

16 'Nia pohuatareera taamuecate nio pa quishacari pueyani, quiarijiani paa na quiyani. Nio pueyari juhua naatujoori, canapuate carijiniacuma tacuarishijionu paniya juucuan. Nojoriiri narta naatujooriicua naca, nojori tacuarishijionu panishacari juucua. 17 Naa nacaari: "Canaari juucua naajua jonenejiyani. Majaari nia nianujunu paniniu. Canaa jaaquequejosacari taraatia saniniuujia, majaari nia sapuenu". 18 Naajuhuj pueyanaa, Tiuquinijiona Juan quishacari, nojuajaari mashaca ratuyashijia quiquiaari, sumatuu miaqueyashijiajuhuaj. Pueyari saaja na sequequiaari samaruraca pueyanota. 19 Na nuhuaji, janiyari tiuquiquiaarini. Janiya cutaraari sumatuucuaca miaquejani, mashaca ratujuajuhuj. Pueyari cua sequequiaa: "Miaquejoru cuno, ratunu porocuanio. Sesa pueya cojjia, pa soosano Romano jiyaniijia seya cojjia sacuaraatiajuhuaj". Naa nia soosacari janiya, Tiuquinijiona Juannio, niaari puetunu Pueyaso niishitiojosanojuanaa ruuretaa. Naajaa, pueyari na naata niishiniu maninia canaa miishanojiniji, janiya, Tiuquinijiona Juannio, canaari mariyata Pueyaso jiyaramiquishano cutarani.

*Jesu piriyojosacari tojiyashijianucua pueya
(Lc 10.13-15)*

20 Corazín tiacajinia, mariyata Betsaida tiacajinia, Jesuuri tii socua pueya naatanijioquiaari tamasaca tiacajiniji. Jiya-jeneta casaa miiquiaari tii Pueyaso cumaacataari. Pueyari saaja nocua tiyaaquiquiaari. Nojoriiri maja noojia na tacatonu quiquiaari sesa nojori miiniujiniji. Cunora, Jesuuri nojori piriyojoquiaari. Naa sequequiaari nio caapiqui tiacajinia quiniaa pueyari:

²¹ —¡Niaari taraatia saniitiosaanutaniya, nioojia nia taca-toyaquiniuucua sesa nia miishanojiniji! Janiya jaara Pueyaso cumaacata miiquiaari Tiro tiacajiniani, mariyata Sidón tiacajiniano, taa cua miiquiaari nia tiacajiniacuaani, cuno tau-cuaca maara Pueyasocua tari noojia tacatocanu cutara. Nojori maara ritia cocuaque toqueya cushiyonuuquiaari nojori tacaaniu niishishaanura sesa nojori miishanojiniji. Naa-juhuaj, nojori maara juaca quejooquiaari na nacaacua, noojia nojori tacatosacari Pueyasocua, sesa nojori miiniuucua.

²² Naaratej, janiyari nia numooteyani: jiya puequesacari, niaari socua jiyanohua saniitiosaanutaniya Tiro tiacajinia quiniaa pueyajiniji, Sidón tiaca pueyajinijinio. ²³ Capernaum tiacajinia quiniaanaa, ¿niaateeri jiyaniya niaari tamasaca tiaca shocotanutaniya nia jyanishacari niaari socua maninia cutara? ¡Maja! Niaari mani quiquiojinia quejoosaanutaniya. Janiya jaara cua cumaacata cutara casaa miiquiaari Sodoma pueya tiacajiniani, taa cua miiquianu nia tajiniacuaani, Sodoma tiaca maara quiriquiajaj. ²⁴ Nocuaji nia sequeya cutaranijia: jiya puequesacari, niaari socua jyanohua saniitiosaanutaniya Sodoma tiaca pueyajiniji.

*Jesuucua tiuuniaari samaateriquiano cutara
(Lc 10.21-22)*

²⁵ Jiyacaritij, Jesuuri na Que Pueyaso sequequiaari:

—Quia shuquiritiaanjia cua Quena. Quiaari jiya camarnu, jiyocuacaanu camarnunio. ¡Quiaari maninia! Quiaari niishiyashijiaca pueya maninia casaa niishitirii, niishijiaca pueyacuaaji quia jamosanoni. Niishijiaca pueyari saaja tama nojori niishishanoocuaajaaja tiuujia. ²⁶ Naacuajitij cua Quena, quiaari maninia niishitirii niishiyashijiaca pueya, taa quia paniquiaaricujani.

²⁷ Cua tojtitiare pueyanaa, cua Queeri cua niquitioquiaari puetunu casaajanaa cua jiiitasocoriquiano. Majaari seetanujuanaa tamasaca niishiniu janiya. Saa cua Queja cutaraari cua niishiya. Naajuhuaaj, majaari seetanujuanaa tamasaca niishiniu cua Que. Saaja janiya, Neyanuni, na niishiya cutaranijia, naajuhuaaj canapue cua niishitiniu paniya cua Quecuajani. ²⁸ Cucua nia nijiore, puetunu nijaniyanaa, canapuate tacaquioyani, canapuate puera niishirionuujuacani. Niaa jaara cucua nimia, janiyari nia samaraatanutaniyani. ²⁹ Cua niishitiojosano nia tojiri. Janiyajiniji nia niishiri taamuecatucuaa janiyani. Janiyari ritia juayashijiani. Janiyari pueya shocoteyaquijiani. Naacuajitij, nioojaari maja na tacaaniu quiniutianiya nia rupuesacari janiya. ³⁰ Nia tojishacari janiya, nioojaari juhuajaniya

quiniutianiya. Cua poonitijosacari niajaniya, majaari jiya-jeneta na quiniu quiniutianiya niaara, cua cumaquishacari niajaniya.

12

Jesu pueya carojotasacari trigo samaatenu juuca
(Mr 2.23-28; Lc 6.1-5)

¹ Jiyacaritij, Jesuuri canaa na saquiriojosano pueyata cuhuariquia jiuujiaaco tajiriquiaa samaatenu juuca. Canaari jiyacari miaajeriquiaani canaa quiasacari nucuaco. Canaari secaja trigo jajau carojotanu coteequiaarini. Canaari na miojonuuriquiaani. ² Fariseocuaca jaara canaa niqiquiaari naa miyanotej, Jesu sequetureeri:

—¡Quia niquri! ¡Quia pueya trigo shuniitaa! ¡Na shuquiuquijoniuyari! ¡Naa nojori miishacaritij, poonijioniuyari! Cuno maja panishano samaatenu juuca miiniuria. ¡Pa supuetana Moisés cuajaari naa pa rootaquiaaritij!

³ Jesuuri cuno pojori riucuaree:

—¿Majateeri nia serojonu quiquiaari Pueyaso Rupaajinia taa pa supuetana David miiquiaari na miaajesacarini, na pueyano? ⁴ Nojoriiri Pueyaso Secojojua tiajinia tiuquitiaquiaari. Pueyasora niqutiojosano pan satureeri. Cuno panri saaja pueyacuara secojonaa sasocoriquiano quiquiaari, maja socua tamonu pueyano sasocoriquiano. Naajaa, Davidri na saquiaari. Na miishanoori maninia quiquiaari Pueyaso niqiuara. ⁵ Naajuhuj, ¿majateeri nia serojonu quiquiaari tariucuacaanu Moisés naajiosanojinia, taa pueyacuara secojonaa pueyaracaanu poonijioquiaa Pueyaso Secojojua tiajiniani? Nojoriiri naa poonijionuuquiaa samaatenu juucajuhuaj. Naa nojori poonijosacari Pueyaso Secojojua tiajinia samaatenu juucatej, cunoori maja sesa. ⁶ Moisés cuajaari pa rootaquiaari maja pa poonijionura samaatenu juuca. Naajaa, cuno rootasanoori setanujanaa maja na quiniu Pueyaso Niyanura, jaara Pueyaso Secojojua tiajinia poonijionaara quiyaquirijuhuj. ⁷ Maja naasucuaari nia niishiniu quiquiaari casaa nio tariucuacaanu naajiotasano niishitiojiya niajaniya juucuan. Naa sequeyari: “Janiya cutaraari socua nia panitiaani niarta pueyacua nia taraajenura, maja saaja nia niqutiojonura nia seya cucuara catijasocoriquiano”. Naa jaara nio naajiotasano niishijia quiriquia, niaa maara sesa miyashijia pueyacuara tonujiyaquiriquiaj. ⁸ Cua tojitiare quiarijia. Janiyacuajaari

Pueyaso Niyanuni. Naacuajitij, mijiria cua quishacari cua naata sequenu casaate samaatenu juuca miishiyani.

Jesu jeeecasacari pueyano juaashiquia cuseetujuara joojequetano

(Mr 3.1-6; Lc 6.6-11)

⁹ Na nuhuaji, canaari Jesuta quiojoquiaari quiniquijini. Canaari Pueyaso Secojoua tiajinia tiuquishiini. ¹⁰ Pueyanoori tii quiriquiaa cuseetujuara joojequetano na juaashiquia. Taa canaa Judiocuaca camarucua Jesuucua saquiriojotanu paniriquiaa juucuacuajani, jiyacaritij, na sapojonuta Jesu nequesotaturee naari.

—¿Maninateeri samaatenu juuca cusosu naataniniuria? Paacuajaruhua niishitiojosaaquiaarini maja pa poonijionura samaatenu juuca.

¹¹ Jesuuri cuno pojori riucuaaree:

—Niaa jaara niquiriyatujua borregoniyouja jiitiare, cuno jaara tiyare raama samaatenu juuca, ¿majateeri nocua nia quianu, raamaji nia panura nia seruniyouja? ¡Taaquiriirinij!
¹² ¿Majateeri pueyano socua jiyanoehua panishano borregonijini? Taaquiriirinij. Naaratej, maja pa tarinitianu maninia pa miiniuria pueyaracaanu, samaatenu juucajuhuj.

¹³ Na nuhuaji, sesarucouja sequereeri:

—Quia juaashiquia quia shiitiore.

Na juaashiquia shiitioreeri. Ritia jeequequeeri juhua tanecaraja. ¹⁴ Naa Fariseocuaca niquishacari Jesu miishanotej, tohuareetaqueeri. Tama nojorijiaarijia roojotooquiaari nojori motenura Jesu.

Jesujiniji pohuatasano tariucuacaanu naajiotasanojinia

¹⁵ Jesu jaara niishiquiaari Fariseocuaca miiniu panishano nojuaja, quiniquiji quiaqueeri. Queraatia pueyari na nuhuajiquiaari canaata. Jesuuri puetunu cusosuhujanaa naatanijioquiaari. ¹⁶ Jesuuri na naatanijosano pueya rootaquiaari maja tamasaca niqiara nojori pohuatanura cante nojuajani. ¹⁷ Naacuajitij, tariucuacaanu Pueyaso sequesano caminiujunia Isaías pohuatasanoori tohuateequiaari. Nojuajaari juhuacarijia naa pohuataquiaari Jesujiniji Pueyaso sequesano miriquitij:

¹⁸ “Niocujaari cua seru, cua saquiriojosano. Na timiti-
aanijia. Nojuajaari jiyanoehua cua panishano. Jani-
yari cua Sohuanu jiyaronutaniya nocuani. Nojua-
jaari tamasaca pueyapue pohuatanutaniya janiya-
jiniji, nojori quiniuria cua muerasura pueyaracaanu.
¹⁹ Majaari pueyata juaajia na quiniu quiniutianiya.
Majaari nacojojua na quiniu quiniutianiya. Ma-
jaari na rupaa tojishano quiniutianiya tiacaacaco.

²⁰ Majaari quenaaja shuniitiasano naajua na shutianu quiniutianiya puetunujuanaa. Naajuhuj, majaari na maquishajanu quiniutianiya jatarinitiaja nojiyano samaritiu. Nojuajaari naa sesa miijiaca jiyanooniu-tianiya, nojuaja jaara tiuquiriohuajaatijaj, puetunu sesa miiniujianaa na puecanura, Jiyaniijijanaa na quiniuhuara pueyaracaanu. ²¹ Puetunu tiquiyocuaca-jinijinio quijiaca pueyajanaari nocua tiuuniutianiya”.

Pueya sequesacari Jesu samaru cumaacaracana
(Mr 3.20-30; Lc 11.14-23; 12.10)

²² Tiquiaari Jesuucua jaatucusaaquiaari. Cariyojuaru quiriquiaajaariuhuj. Naa quiquiaariiri samaruraca na quiniuucua. Jesuuri na jecaree. Naacujitij, tiquiaari pocujara quiquiaari, niquijjarajuhuj. ²³ Cunora, puetunu pueyajanaari nocuaji jiuujiatequiaari. Sequetureeri:

—¡Nio jiyoteeri pa supuetana David niqiuohuacuajinio supueno pueyano, tariucuacaanu sequesano pa jiyaniijiaara quiriquianotej!

²⁴ Fariseocuaca jaara tojiquiaari naa pueya sequesacari Jesujinijitij, nojoriiri na juaaniutia sequequiaari saaja:

—¡Cuno pueyanoori samaruhua tohuatanijiya Satanás cumaacata!

Satanásri samaruhua jiyaniijia. ²⁵ Jesuuri cuno pueya ni-shiriojosano niishiquiaari. Cunora, nojori sequereeri:

—Jiya camarucua jaara juayonuujutare tama nojorijiaaja, majaari pueyaracaanu na naata quiniu camarnura. Ritia jatashiyari. Naajuhuj, tiacajinia quiniaa jaara juayonu-utare jiyareta tama nojorijiaaja, cuno pueyari maja na naata quiniu jatiqui. Naajaariuhuj, pueyano jaara juayonu-utare tapueyocuacata tama na tiajiniaajaaja, majaari nojori naata jatiqui quiniu. ²⁶ Jaara naa quiriritij, samaruhua jaara tohuatanijiosaare Sesaaca cumaacata, tama na cuaqueya paracayajaarijia. Naacujitij, majaari na naata na cumaaca rishiniu. ²⁷ Janiya jaara samaruhua tohuatanijiya Satanás cumaacatani, taa nia sequeya janiyacujani, cua sequere-toj, ¿cante nia niishitiojosano pueya cumaquiya samaruhua nojori tohuataniniuriani? ¿Satanáste? Majaruhua. No-joricuajaari samaruhua tohuataniquiaa Pueyaso cumaacata. Naacujitij, nojori tohuatanijiosacari samaruhua Pueyaso cumaacata, niaari jiyanohua jiyajeneya nia sequesacari janiya samaruhua tohuatanijiya Sesaaca cumaacatani. ²⁸ Seetanjuanaa Pueyaso Sohanu cumaquishacari janiya, samaruhua cua tohuatanijionura, niaa cumaati cua sequesano tojirii. Naa cua tohuatanijiosacari samaruhaatej,

niaacuajaari niishiya Pueyasoori tari poonijiya juhua Jiyani-
ijia, mijiria nia tajinia.

²⁹ ¿Pueyanote na naata cumueeca pueyano tiajinia tiuquiniu na casami na jaariuutianura? Maja na naata na jaariuutianu, jaara coteenu na morojiyaquiri. Jaara na morojore coteenu, na nuhuaji cutara na naata na casami panu. Naajuhuj, janiyari Pueyaso cumaacata jaariuutiaa Sesaaca jiitiasano pueyani.

³⁰ Cante cua jiyano quiyaquiyani, cunoori cua paraca. Cante cua naacutaquiyua pueya rerecojonura Pueyasorani, nojoriiri saaja pueya cocuataa Pueyasocuaaji.

³¹ Naarate nia sequeyanijia: puetunu pueya miishano sesajanaari na naata jiyanooshaanu. Sesacojojua pueyanoori na naata jiyanooshaanujuhuj. Saniniuujia, cante Pueyaso Sohuanu miishano sesacajani, cunoori maja na jiyanooshaanu quiniutianiya cutara. ³² Cante Pueyaso Nyanu sesacajani, nojuajaari na naata jiyanooshaanujuhuj. Saniniuujia, cante Pueyaso Sohuanu sesacajani, nojuaja cutaraari jiyanoaquishaanutaniya pueyaracaanu. Na ruuretanuucua Pueyaso Sohuanu, majaari na jiyanooshaanu quiniutianiya mijiria, jiyocuacaanujuhuj.

*Naanaari niishishano na jajaujiniji
(Lc 6.43-45)*

³³ Naana jaara maninia naana quiri, maninia jajau muetuyari. Naana jaara sesarunaja quiri, sesa jajau muetuyari. Naacuajitij, na jajaujiniji paari niishiyani taamueca naanatenojoni. ³⁴ Niaari juhua sacocua.

¿Niaatucua taa maninia pocuajaca quirini, niaa jaara pueyaracaanu sesa miijiaca quiyajaa? Paari poojiajiniji pa niishiriojosano pocuaquiaani. ³⁵ Naacuajitij, maninia jiuujiaraca pueyanoori saaja maninia casaa pocuaja. Sesa jiuujiaraca pueyano saniniuujia, sacuaraatia casaa pocuajari.

³⁶ Nia sequeya cutaranijia, Pueyaso saniitionu juuca, pueyari puetunu najuhuaana sesa na pocuasanojinijianaa nequesoreesaanutaniya. ³⁷ Cante maninia casaa pocuaja quiquiaarini, cunoori sequesaanutaniya “maninia pueyanota”. Naajuhuj, cante sesa casaa pocuaja quiquiaarini, nojoriiri saniitosaanutaniya saniniuujia. Naaratej, majaari nia niti nia taquiriocuatenu sacuaraatia casaa nia pocuanura.

*Fariseocuaca niquiniu panishacari Jesu miishano Pueyaso cumaacata
(Mr 8.12; Lc 11.29-32)*

³⁸ Noojiaqueya Moisés Rootasanojiniji niishitiojonaari tii quiriquiaa Fariseocuacata. Nojoriiri Jesu sequequiaari:

—Niishitiojonanaa, jiyajeneta casaa quia miiri Pueyaso cumaacata canaa niquishocoriquiano.

³⁹ Jesuuri nojori riucaaree:

—Niaari sesoriquia pueya, Pueyaso tojiyashijiaca. Majaari nia niquiara casaa cua miiniu quiniutianiya Pueyaso cumaacata. Niaari saaja niquiriyatu cutara miishano niquiniutianiya taa supuetana Jonás miishaaquiaaricuaani. Cuno Jonásri Pueyaso sequesano caminiujiunia quiquiaari. ⁴⁰ Nojuajaari puereetuca sapitiaaja seecojinia shocojotequiaari jiuujianaraca juuca, jiuujianaraca niucuanio. Naajuhuj, janiyari raaco macu niojosaqui camueenujunutaniya jiuujianaraca juucani, jiuujianaraca niucuanio. ⁴¹ Jonás pahuatasacari Pueyaso rupaa Nínive tiacajinia, cuno tariucuacaanu tucuacaari noojia tacatoquiaari sesa nojori miishanojiniji. Cunora, Pueyaso nequesoreenu juuca quishacari, Nínive pueyari saneecuatanutaniya nojori tonujunura nio pa quishacari pueyacuara. Nojoriiri Pueyaso saquiriojotanutaniya nio pa quishacari pueyacuara, nojori ruuretanuucua tamonu Pueyaso sequesano caminiujiunia socua jiyaniijiajanaa cutara Jonásjiniji. ⁴² Naajuhuj, tariucuacaanu jiyaniijia maajiiri niquiaari tucuacaanuji pa supuetanaa jiyaniijia Salomón tojiniuucua. Cunoori quiquiaari jiyanohua niishijia Salomón quiniuucua. Cuno maajiiri pananu shuucuaji niquiaari Salomón na tojiniuria, jiyanohua tucuacaanu na jiyajiniji. Naaratej, Pueyaso nequesoreenu juuca quishacari, cuno maajiiri sanenutaniya na saquiriojotanura nio pa quishacari pueyacuara. Nojoriicuara saquiriojotanutaniyari nojori ruuretanuucua tamonu niishijia, socua niishijia Salomónjiniji cutara.

Samaruuri na tohuatanishaquiji tacatejohua
(Lc 11.24-26)

⁴³ 'Samaru jaara tohuatare pueyanojiniji, joojuashiquio rucuaneyiyari na samaatejara na pajesacari. ⁴⁴ Jaara riuri-ataaquiri na samaatejara, naa niishiriojiyari: "Tacateyaro-huaraqui tariucua cua quiquiojiniohua". Jaara tacatemo-hua, cuno na pueyano riuriasuhuari juhua camaruuju tia, netoosano, maninia jeenucuasano. ⁴⁵ Naaratej, samaruuri socua tamasaca narta samaruhua pajeya. Socua siete narta samaruhua riuriataari socua jiyanohua sesa nojuajiniji. Puetunu nojorijianaa jaara tiuquitiare cuno pueyanoocua tii na quiniuria, cuno pueyanoori na nuhuaji socua jiyanohua sesa quijiara jiyacateja.

Naa quiniutianiyajaariuhua nio pa quishacari pueyara na tojtiaaquiniucua janiya. Nojoriiri socua sesa quijiacara jiyacatenutaniuhua taa cua niyacarijia quijiaca nojori quiquiaaricujani.

Cante seetanujuanaa Jesu nucuani, tapueyocuacajuhuaaj
(Mr 3.31-35; Lc 8.19-21)

⁴⁶ Jesu pohuatasacarijia pueya niquiara, na nucuuari tiuquiiioquiaari Jesu tapueyocuacata Jesuucua. Carijiniacuma quituriquiaari. Jesuta pocoojonu paniriquiaa juucuaari. ⁴⁷ Tamonu pueyanoori Jesu sequeree:

—¡Niishitiojonanaa! Quia nucuahui quia tapueyocuacata carijiniacuma quiya. Quiata pocoojonu paniyaquiniaari.

⁴⁸ Jesuuri saaja na numootena pueyano riuucaree:

—¿Cante cua nucuani? ¿Cante cua tapueyocuacani?

⁴⁹ Jiyacaritij, Jesuuri canaa na tojtianaa pueya shishirii. Tii quiniaa pueya sequereeri:

—Nio cua tojtianaani, nojori cutaraari juhua cua nucu, juhua cua tapueyocuaca cutara. ⁵⁰ Naacujitij, cante cua Que Pueyaso panishano miiquiaa cutarani, nojuaja cutaraari cua tarajanu, cua rimiatu, cua nucuanio.

13

Natoojojua pueyanojiniji pohuatasano
(Mr 4.1-9; Lc 8.4-8)

¹ Cuno juucaja, Jesuuri tohuataquiaari tiajiniji. Caminia casaqueyaji cajishiiri. Canaari nata quiriquiaani.

² Jiyanhua queraatia pueyari nocua rerequeejoquiaari. Puera pueya quiniucua, Jesuuri botejinia tacaquiaari. Tii cajishiiri. Puetunujuanaa pueyari jaaquiajinia jateequiaari, tiji na tojtianura Jesu canaata. ³ Jesuuri queraatia casaa pueya maanu niishitiojoriquiaa miriqui. Naa pohuataquiaari puetunu canaajanaari:

—Pueyanoori natoojonura quiaquiaari na cuhuariquiajinia. ⁴ Na jacutasacari, secajaari nucuaco totequiaari. Shuhuari nocua rosetaquiaari. Puetunujuanaa nucuacoji na natau miojoquiaariiri. ⁵ Tajaacaari totequiaari tamaqui sai tajiniaqueya. Majaari puera jiya quiniu quiquiaari tii. Naaratej, cuno natauri ritia moritiaquiaari. ⁶ Pananu jaara tacaquiaari, cuno natauri ritia sorequiaari maja puera nujuacaraca na quishacari. ⁷ Tajaacaari totequiaarijuhua riyocuaca tajinia. Riyocuaca maashishacari, majaari cuno natau maashiniu quiquiaari maninia. Majaari na muetunu

quiquiaari. ⁸ Maninia jiyajinia totequiaariiri tajaaca sanini-uujia. Tii moritiaquiaari maninia cutaraari. Maninia muetuquiaari cutaraari. Puetunu cuno jiyoneejinijijianaani, noojiaqueyari muetuquiaari cien jajau niquiriyatu jiyonaacua. Tamonu jiyoneeri muetuquiaari sesenta jajau niquiriyatu jiyonaacuajuhuj. Socua tamonu jiyoneeri muetuquiaari treinta jajau. ⁹ Niaa jaara numaaraca quiri, nia tojitiare cua pohuatasano.

Casaara Jesu niishitiojiya miriquini

(Mr 4.10-12; Lc 8.9-10)

¹⁰ Jesuuri naa pohuataquiaari miriqui pueya niquiaratej. Na nuhuaji, canaa, Jesu saquiriojosano pueyani, canaari nocua catecanoquiaarini. Canaari na nequesotaquiaarini:

—Jiyaniijianaa, ¿casaara pueya quia niishitiojoriquiaa miriquini?

¹¹ Jesuuri canaa riucuaaree:

—Pueyasoori nia saquiriojoquiaari, nia niishishoo casaa Pueyasojiniji nia niishiniuria, taa Pueyaso poonijiya pueya jiuujiajiniani, na muerasura nojori quiniuria shuquiriaatia. Tamasacara saniniuujia, majaari nio jiyasohuaja Pueyasojiniji niishishano nojori niishishocoriquiano. ¹² Cante Pueyaso rupaa tojjia cutarani, nojuajaari socua niishitiojosaanutaniya, Pueyasojiniji jyanohua na niishiniuria. Cante Pueyaso tojiyashijiani, shiitianiyojua Pueyasojiniji nojori niishishanoori puetunu jaariuutiasaanutaniyajanaa nojorijiniji. ¹³ Cunora, janiyari miriqui pohuatariquiaa nojori niquiarani. Naacujitij, nojoriiri najuhuaana niquiquiaa cua miishano na niishiyaquiniutia. Nojori tojishacari cua pohuatasano, na numaa shama tojitiuquiaa saajaari. Majaari quenaaja nojori niishiniu na tojishano. ¹⁴ Naa nojori quiniuucuatej, tari tohuateereeri juhuacarijia supuetana Isaías sequesano nojorijiniji. Pueyara Pueyaso sequesano caminiujunia na quiniuucua, nojuajaari naa sequequiaari pueyatej:

“Niaari seetanujuanaa Pueyaso rupaa tojiniutianiya najuhuanaj. Majaari nia niishiniu quiniutianiya. Naaari Pueyaso miishano niquiniutianiya najuhuanaj. Majaari nia niishiniu quiniutianiya nia niquishano. ¹⁵ Nojoriiri cumajiuujiaaca quiya. Nojoriiri juhua numueeju, tojiyashijiaca. Nojoriiri juhua nimishituu quiyajuhuj. Naa juhua nimishituu quituiyari nojori niquiyaquiniuucujaji. Nojoriiri naa juhua numueejunucujuhuj, nojori tojitiaaquiniuucujaji noojiata. Naa quituiyari nojori niishiyaquiniuucujaji noojiata, cucua nojori tacatenuhuara cua jeeanura nojori jiuujia seque”.

16 'Cua pueyanaa, niaari saniniuujia shuquiriaatia quiya maninia nia niishishacari cua miishano, nia tojishacari cua pohuatasanojuhuaj. 17 Seetanujuanaa nia sequeyanijia, queraatia tariucuacaanu pueyari quiarijia nia niquishano niquniuucua jiaatiaquiaari juucua. Naa nio niquniuucua jiaatiaquiaari tariucuacaanu Pueyaso sequesano caminiujia-uniaa, queraatia maninia pueyano. Majaari nojori niquniu quiquiaari saaja. Nojoriiri nia tojishano tojiniuucua jiaatiaquiaari juucujuhuaaj. Majaari nojori tojiniu quiquiaari saaja.

Jesu niishitiojosacari miriqui na pohuatasano natojojua-jiniji

(Mr 4.13-20; Lc 8.11-15)

18 'Nia pohuatareera nia niishiniuria cua pohuatasano natojojua-jiniji. 19 Canapuate Pueyasojiniji cua pohuatasano niishiyaquiyani, nojoriiri juhua nucuaco toteno jajau. Sesaacaari niquiaa. Pueyaso Rupaa jaariutiaa noojiajinijiiri. 20 Noojiaqueya pueyari juhua sai tajiniaqueya jacutasano jajau quiquiaa. Naaratej, nojori jaara shuquiriaatia tojiri Pueyaso Rupaa, nojoriiri ritia shitimia nocua tiuquiaa. 21 Nojoriiri juhua nujuacaaju. Majaari cumaatia na nujuatunu. Naaratej, nojori jaara naquiya miishaare Pueyaso Rupaa tojijiaca nojori quiniuucua, nojoriiri ritia Pueyaso tojiniu tarinitiaquiaa. 22 Noojiaqueya pueyari juhua riyocuaca tajinia toteno jajau quiquiaa. Nojoriiri Pueyaso Rupaa tojirii. Na nuhuaji, nojoriiri saaja puera tacaquiaa nio jiya casamiicua. Naajuhuaaj, nojoriiri sapojosaaquiaa nojori jiyanihacari nojori jaara queraatia casamiriaca quiriquia, nojori maara shuquiriaatia quiriquiaj. Cunora, Pueyaso Rupaari maja na naata poonijionu nojori jiuujiajinia. Naacujitij, cuno pueyari juhua natau muetuhuo quiquiaa. 23 Saniniuujia, cante maninia tojjia Pueyaso Rupaani, maninia na niishiyari. Cunoori juhua jiya maniniuujinia jacutasano jajau. Naacujitij, cuno pueyari juhua maninia natau, maninia muetuna cutara. Jiyano-hua maninia pueyari quiquiaa na tojishacari Pueyaso Rupaa. Naaratej, tamonuuri juhua cien jajau muetujua. Tamonuuri juhua sesenta jajau muetujua. Tamonuuri juhua treinta jajau muetujuaaj.

Jesu pohuatasano miriqui trigo tajinia moritaja sesa jiyasocujiniji

24 Jesuuri tamonu miriqui pohuatasano pohuataquiaari pueya niquiara, nojori na niishitiojonura taa Pueyaso tojiti-aashijiaca pueya quiniutianiya Pueyaso muerasu tajiniani. Jesuuri naa pueya pohuataquiaari:

—Tamonu pueyanoori maninia jajau nataquiaari na cuhuariquiajinia. ²⁵ Puetunu pueyajanaa jaara niucua maqueturiquiaa, na paracaari jiyacari niquiaari. Sesa jiyasocua jajau jaquerooquiaari trigo natasano cuhuariquiajiniari. Na natanu nuhuaji, tacateyarohuari. ²⁶ Trigo jajauri maashiquiaari. Na nuhuaji, na jajau mueratuusacari shusha, sesa jiyasocuaari mariyata niquishaaquiaari maashiyano. ²⁷ Cuhuariquia camaru seyari quiaquiaari na camarujuanaa nojori sequenura: “Jiyaniijianaa, ¿majateeri maninia saquiriojosano jajau quiquianucuaaja quia natasano cuhuariquiajiniani? ¿Teje cuno sesa jiyasocua moritiarucuaa quia natau tajiniacuaraarini?” ²⁸ Cuhuariquia camaruuri nojori riuquaree: “Pa paracaari cunohuj, naa pa miiriucuaani”. Na seyari na nequesotaree: “¿Quiaate paniya canaa quianura cuno jiyasocua jayotanura trigo tajiniaqueyajiniji?” ²⁹ Na seya sequeree saajaari: “Maja. Maja nia jayotanu jiyasocua, niaa mariqui trigo na cojiritiareeri. ³⁰ Naajaa, nia tarinitiare cuaara maashiiria, mariyata cuaara noshiirijaara trigo jajau. Na nuhuaji cutara janiyari senoonaa jiyaronutaniyani, cuaara coteenu jiyasocua namirioora, nojori jiuniocojonura jiyasocua catijasocoriquiano. Na nuhuaji cutara, cuaara trigo jajau racatatuura nataco”.

Jesu pahuatasano miriqui mostaza jajaujiniji
(Mr 4.30-32; Lc 13.18-19)

³¹ Jesuuri socua miriqui pahuataquiaari pueya niquiara, na niishitiojonura taa Pueyaso poonijiya pueya jiuujiajiniani, nocua nojori tiuushacari. Naa sequereeri:

—Tamonu pueyanoori mostaza jajau nataquiaari na cuhuariquiajinia. ³² Seetanujuanaa mostaza jajauri socua jiyanoehua shiitianiyojua puetunu tamonu jajaujinijijianaa. Naajaa, cuno mostaza jaara maashiri, socua puereetuucara maashijiaari narta nataacuacajiniji. Naacuajitij, shuhuari na cashacucuaacua jesuya. Naajuhuj, pueyano tojishacari Pueyaso rupaa, seetanujuanaa maninia Pueyaso muerasura jatanishiyari.

Jesu pahuatasano miriqui pan poreetajajiniji
(Lc 13.20-21)

³³ Jesuuri nio miriqui pahuatasano pahuatarohuacuhua pueya niquiara, taa Pueyaso Rupaa poonijiya mijiriani. Nojori sequereeri:

—Pueyaso rupaari jiyanoehua cumaacaraca na poonijionura juhua pan poreetaja. Maaji jaara pan poreetaja cojitiri jiuujanaraca shiitianiyojua tohuatashi mishaja trigo

cashojuata, puetunujuanaa na poreeteyari. Pueyaso rupaari naa cumaacaracajuhua, pueya na jataniniuria quiariniora.

Casaara saaja miriqui sequesanoa pohuatasaaquiaa pueya niquiarani

(Mr 4.33-34)

³⁴ Puetunu Jesu pohuatasanojuanaa pueya niquiarani, miriqui sequesanoori quiquiaari. Puetunu na pohuatasanojuanaari naa quiquiaariti. ³⁵ Naacuajitij, maninia tohuatetequiaariiri tariucuacaanu pueyara Pueyaso sequesano caminiujiunia sequesano, jaara nio naajiotaquiaari:

“Pueyasoori naa sequeyaquij: ‘Janiyari pueya niishitiojonutaniyani saaja miriqui cua pohuatasano. Naacuajitij, janiyari pueya pohuatanutaniya pueyaracaanu nojori niishishoo casaani, shusha jiya shipinishaanujiniji’ ”.

Jesu niishitiojosacariuhua miriqui na pohuatasano sesa jiyasocujiniji

³⁶ Na nuhuaji, Jesuuri pueya maanu sequere:

—Tariucuaja pueyanaa. Nia quiojorohua.

Na nuhuaji, nojuajaari na quijia tiajinia tacaarohua. Jiyacaritij, canaa, na saquiriojosano pueyani, canaari nocua catecanoquiaarini. Canaari Jesu sequereeni:

—Canaa quia niishitirijia miriqui quia pohuatasano cuno sesa jiyasocujiniji.

³⁷ Jesuuri canaa sequere:

—Janiyacujajaari cunoni, maninia jajau natoojujuani.

³⁸ Nio jiyari juhua cuno cuhuariquia. Pueyaso muerasuuri juhua cuno maninia jajau, cuhuariquiajinia natasanoni. Tamasacaari saniniuujia Sesaaca muerasu quia. Nojoriiri juhua cuno sesa jiyasocua, cuhuariquiajinia natau tajinia maashinioni. ³⁹ Sesaacaari juhua cuno cuhuariquia camaru paraca. Nojuajaari cuno sesa jiyasocua nataquiaari. Nio jiya puequesacariiri juhua cuhuariquia senosacari quiniutianiya. Jiyocuacaanuji Pueyaso seyari juhua cuhuariquia senoonaa quiniutianiya. ⁴⁰ Naatej, taa sesa jiyasocua namitiashiya catijasocoriquianocuaani, naa quiniutianiyajariuhua nio jiya puequesacari. ⁴¹ Janiyari cua seya jiyaronutaniya jiyocuacaanujini. Nojoriiri sesa miijica quioonutaniya, mariyata canapete tamasa miitiquiaa sesani. ⁴² Nojoriiri quejoosaanutaniya mani quiquiojinia. Nojoriiri tii sapuenutaniya pueyaracaanu. Naquiya na miishacari, na quia miaquenutaniyari. ⁴³ Na nuhuaji, Pueyaso tojitajacaari jyanohua shacantuucara quiniutianiya juhua pananu, na Que Pueyaso jiiyasacari nojori pueyaracaanu. Cante numaacani, cuara tojitiara cua sequesano.

Jesu pohuatasano miriqui jiyano hua panishano casaajiniji

⁴⁴ Jesuuri canaa na pueya pohuataquiaari miriqui, Pueyaso muerasu pa quiniuni, cunoori jiyano hua panishano. Nojua-jaari naa sequequiaariti:

—Tamonu pueyanoori tamasaca cuhuariquia tajiriquiaa juucua. Casaa riuriatamaari, jiyano hua panishano casaa. Tiijia na jamorohuari tee na quiriquiaacuajani. Jiyano hua na shuquiritiasacari na riuriatasano casaa, puetunujuanaa tama na casamijiaaja niqutiojoreeri queraatia cumaneeca na jiitianura. Na nuhuaji, puetunu na cumaneecajanaa pataareeri cuno cuhuariquia camaruucua, cuno cuhuariquia na masenura. Naacuajitij, cuno jiyano hua na panishano casaari tama na casaara quiquiaarijiaaja. Naajuhuaaj, socua jiyano hua panishano cutaraari, Pueyaso pueyanora nia quiniuria. Cunoori jiyano hua socua panishano puetunu pa panishano casaajinijijianaa.

⁴⁵ 'Socua nia tojiri nio pohuatasano. Casami niqutiojonaari pueyaracaanu rucuaneriquiaa shano hua cohua-jaaca tiujiau na pajenura. Cunoori noturu shipinijosano sai quiquiaari. ⁴⁶ Tamonu juuca, jiyano hua shano hua noturu saajia niqutiohaquiaariiri. Jiyano hua na panishano. Naaratej, puetunu na jiitiasanojuanaa niqutiojoquiaariiri, cumaneeca na jiitianura, cuno na panishano casaa na masetajara. Na nuhuaji, puetunujuanaa na casami samitia masequiaari cuno noturu saajiaari, jiyano hua na panishanoni. Naajuhuaaj, nia tarinitiare puetunu nia panishano casaa-janaa, Pueyaso pueyara nia quiniuria seetanujuanaa.

Jesu pohuatasano miriqui shiyarujiniji

⁴⁷ 'Pueyaso Rupaari juhua puereetuca shiyaru na camaru jartasano caminiajinia. ⁴⁸ Jaara mishaja quiquiaari sapitiaajata, pueyari na jayotaquiaari jaaquiajiniara. Queraatia tamaatiuniucua sapitiaajaari tii quiriquiaa. Pueyari jaaquiajinia cajitieuquiaari saaja maninia sapitiaaja nojori saquiriojonura. Canaasatujinia na niojotureeri racataso-coriquiano. Sesa sapitiaajaari saniniuujia jacutasaquiaari. ⁴⁹ Naa quiniutianiyajaariuhuaaj jiya puequesacari. Naacuajitij, Pueyaso seyari rosetanutaniya, sesa miijiaca na saquiriojonura maninia pueya tajiniji. ⁵⁰ Na nuhuaji, sesa pueyari quejoosaanutaniya mani quiquiojiniya, taa sesa sapitiaaja jacutasaquiaaricuaani. Nojoriiri tii sapuenutaniya. Na quiaa miaquenutaniyajaariuhua naquiya na miiniutia.

Pueyaso Rupaari jiyano hua panishano: tariucuacaanu naajiotasano, quiari naataja naajiotasanonio

⁵¹ Jesu pohuatanu puecasacari, canaa na pueya nequesotaquiaariiri:

—¿Niaate maninia niishirii puetunu cua pohuatasanojua-naacuaaja?

Canaari Jesu riucuaareeni:

—Taaquiriiriniij Jiyaniijianaa.

⁵² Jesuuri canaa sequere:

—Maniniacuaajaqui. Tariucuaacaanu Pueyaso Rupaajiniji niishitiojona jaara quiarinio cua niishitiojosano Pueyaso-jiniji niishirijiuhuaaj, nojuaja cutaraari Pueyaso Rupaa niishijia seetanujuanaa. Nojuajaari juhua tia camaru, cante tariucuaacaanu shanohua casamiriacacuajani, quiarinio casamiri-acajuhuaaj, na tiajiniaaco racatasano. Na panishacari, na camaruuri na racatasanojiniji na panishano rijia.

Jesu quishacari Nazaret tiacajinia

(Mr 6.1-6; Lc 4.16-30)

⁵³ Jesu jaara puecaquiaari miriqui pohuatanu, tiji quiaquiaariuhuari. Canaari na nuhuajiriquiaani. ⁵⁴ Canaari na maashijia tiacajinia tiuquiquiaariuhuaani. Canaa tiuquiiijosacari, canaari Pueyaso secojojua tiajinia tiuquiquiaarini. Jesuuri tii pueya niishitiojonu coteequiaari. Pueyari jiuujiatequiaari na niishitiojosano nojori tojishacari. Nojoriiri tama sequequiaarijiaaja:

—¿Taa nio pueyano niishiya puerajaanani? ¿Tejenotejaara na cumaacani, cusosuhua na naatanijionurani? ⁵⁵ Na shipininiocuajaari suruhuatuujiniji casaa shipinijiona quijia. Na nucuacuajaari María. Na tapueyocuacaari Santiago, José, Simón, Judasnio. ⁵⁶ Na rimiatusuhuari mariyata niya pa tajinia quiya. ¿Taa na niishiya pueraarini?

⁵⁷ Naaratej, pueyari na ruuretaquiaari saaja. Naa na tiacajinijinio pueya tojitiaaquishacari nojuajatej, Jesuuri nojori sequequiaari:

—Puetunu tiqiyocua pueyajanaari maninia tojitiaquiaa cutara Pueyaso sequenu panishano caminiujiunia. Saaja narta pueya tama na jiyajinijiniojuaarjia na tojitianu paniyaquiya, tama na tiajinijiniojuaja pueyanio.

⁵⁸ Naa nojori ruuretenuucua Jesutej, majaari puera na cumaacata na miiniu quiquiaari tii, nojori tiuyaquiniucua nocua.

14

Herodes motesacari Tiuquinijiona Juan

(Mr 6.14-29; Lc 9.7-9)

¹ Cuno quishacari, Galilea jiya jiyaniijia Herodesri pohuataaquiaari Jesu miishanojiniji na cumaacata. ² Herodesri na seya sequequiaari Jesujiniji:

—¡Nojuacuajaari cua mosano Tiuquinijiona Juan! ¡Samiitiaro-huacuaaqui! Naacujatij, jiyano-hua cumaaca jiiitaari, jiyajeneta casaa na miiniuria Pueyaso cumaacata.

³ Herodesri naa sequequiaariti na monuucua Tiuquinijiona Juan. Nojuajaari naa miiquiaari Juantej: coteenu na quiatequiaariiri. Na morojoquiaariiri cumayocua shipinishano jiyocuata. Na nuhuaji, na nujuatequiaari nujuatejojuajiniaari. Herodesri naa miiquiaari na juaaniutia Juantej, Juan nacasunuucua nojuaja, Herodes quiniuucua tarajanu Felipe niqiuocuata. ⁴ Tiuquinijiona Juanri naa Herodes sequequiaari quiasano na quiyaquishacarijia:

—¡Quiaari Pueyaso tojiyashijia! ¡Majaari maninia quia quiniuria Herodíasta! ¡Nojuacuajaari quia tarajanu Felipe niqiuocua!

⁵ Herodesri cunora Juan monu paniriquiaa juucua. Judiocuaca puereriquiaa saajaari. Judiocuacaari niishiquiaari cutara, Juanri seetanujuanaa Pueyaso sequenu panishano caminiujiunia quiquiaari. ⁶ Tiuquinijiona Juan nujuasacarijia nujuatejojuajinia, Herodesri na rasaanu juucajinia queranacuquiaari na masuusano pueyata. Jiyacaritij, cuno maaji Herodías niyatuuri nianujuquiaari Herodes masuusano pueya niqiara. Jiyaniijia Herodesri jiyano-hua na shuquiritiaquiaari. ⁷ Naaratej, Herodesri necanuru sequequiaari puetunu pueya niquiarajanaa:

—Sanaunaa, cua sequere casaa quia paniyani. Janiyacua quia niquitiore quia panishanoni. ¡Seetanujuanaa quia sequeyanijia! Majaari cua rupaa cua jatanu quiniutianiya. ¿Casaa quia paniniutianiya?

⁸ Jiyacaritij, niyacoo nucua Herodíasri neyatu rootaquiaari jiyasohuaja, casaa na masenutianiya. Naaratej, niyacoori jiyaniijia Herodes sequesee:

—Cua quenunaa, cua niquitiore Tiuquinijiona Juan naca miacojuajinia.

⁹ Jiyaniijia Herodesri taraajequee niyacoo sequesano na tojishacari. Naajaa, majaari na naata na rupaa jatanu quiquiaari, seetanujuanaa na sequenuucua na masuusano pueya niqiara. Naacujatij, Herodesri na seya sequequiaari cuara niquitiosaarianoj. ¹⁰ Naaratej, na pueyano jiyaroquiaari nujuatejojuajiniaari, Tiuquinijiona Juan na nacatatura. ¹¹ Na nuhuaji, Juan nacaari patasaaquiaariuhua miacojuajinia. Niyacoo niquitiosaasuhuari. Niyacoori saniniujia na nucuaacua na pataquiaari.

¹² Na nuhuaji, Tiuquinijiona Juan pueyari quiojoquiaari na quete na panura. Na jamotuquiaariiri. Na nuhuaji, nojoriiri nijioquiaari Jesu pohuatanuucua Tiuquinijiona Juanjiniji.

*Jesu mianuutesacari cinco mil pueya
(Mr 6.30-44; Lc 9.10-17; Jn 6.1-14)*

¹³ Jesu tojishacari Tiuquinijiona Juan tari mosaarucuaa, nojuajaari canaa jiyataquiaari botejinia tamaquiria, pueya quiyaquishaquiria. Pueya jaara niishiquiaari tee Jesu quiaareeni, queraatia pueyari cuno jiya tiacajiniji quiojoquiaari tiriarajuhuj. Nojoriiri na neteyotaquiaari nucuaco caminia shuriquiuco. Cuno pueyari canacuaji cutesee. ¹⁴ Naacuajitij, Jesu rosesacari botejiniji, jiyanoehua queraatia pueya niquishii saajaari. Nojoriicua taraajereeri. Cuno pueya patootasano cusosuhua naatanijioreeri. ¹⁵ Tariucua tenacari, canaa, Jesu saquiriojosano pueyani, canaari nocua niquiaarini. Canaari na sequereeni:

—Canaa Jiyaniijianaa, paa niya quiya pueya quiyaquishaquini. Paari nininiutianiyani. Juhuacarijia pueya quia sequere nojori cuara quiojohuara tiacajinia, na miaquesocoriquiano nojori masenura.

¹⁶ Jesuuri canaa sequeree saaja:

—¿Maatucua casaara quiojyarohuani? Niaa mariqui nojori mianuutere saniya.

¹⁷ Canaari Jesu sequereeni:

—Maja canaa jiitianu miaquesano. Niya quiya saajaari cinco pan, caapiqui sapitiaajanio.

¹⁸ Jesuuri canaa sequeree:

—Miji nia patare.

¹⁹ Jesuuri sequeree pueya cuara cajitiuuria jiyasocujinia. Na nuhuaji, Jesuuri cuno pan pataree, sapitiaajanio. Jiyocuacaanu maureeri na Queecuara, miaquesanoocuara na secojonura. Na nuhuaji, Jesuuri pan neecasequiaari queraatiara. Canaa na niqutiojoreeri puetunu pueyajanaa canaa niqutiojosocoriquiano. ²⁰ Puetunu pueyajanaari miacquenuquiaari. Maninia tooquioreeri. Nojori puecasacari miacquenu, canaari pan neeca reratequiaariuhuani, sapitiaaja raquiquiano. Doce canaasatuuri mishinijosaaquiaari na raacuata. ²¹ Jiyanoehua queraatia pueyari miacquenuquiaari; cinco mil quiquiaari saa canuujua. Majaari maa-jipohua serojosaanu quiquiaari, naatujoorinio.

*Jesu rucuanesacari mohuaca caco
(Mr 6.45-52; Jn 6.16-21)*

²² Na nuhuaji, Jesuuri canaa na saquiriojosano pueya secootequiaari botejinia canaa tacatanura, canaa puetanuracuaa nojuaja caminia taquijiria. Jesuuri jiyacari pueya maanu sequeriquiaa nojori quiojonuhua. ²³ Pueya jaara tari quiojoquiaariuhua, Jesuuri tuhananuucua tacaquiaari tamajaaja, na Que Pueyaso na secojonura. Jaara niniquiaari,

Jesuuri tii quiriquiaa tamajaaja. ²⁴ Canaari saniniuu-
jia caminia jiuujiajinia tari jaaretariquiaacuaani. Mohua-
caari saaja canaacuara cajiniuucuariquiaa, paratu piyaro-
josacari canaacuara. ²⁵ Juhuaquenu panishacari, Jesuuri
canaa rupuesee mohuaca caco na rucuanenuta. ²⁶ ¡Canaa
niquishacari casaa mohuaca caco rucuaneyano, canaari
jiyanohua shiriiquitiuriini! Canaari sariyocuatireeni.

—¡Yae! ¡Samaruruhua!

²⁷ Jesuuri ritia pocuaree. Canaa sequereeri:

—¡Nioojia nia cumaquiri! Janiyacuajanijia. Maja nia
puerenu.

²⁸ Canaa tojishacari Jesu, Pedroori Jesu sequeree:

—¡Jaara seetanujuanaa quiajaniya quiri Jiyaniijianaa, cua
sequere quiocua cua quianura mohuaca caco!

²⁹ Pedro sequereeri:

—Mijicuarajaj.

Pedroori ritia rosequiaari botejiniji. Mohuaca caco
rucuanenu coteequiaariiri Jesuucua na quianura. ³⁰ Na
niquishacari paratu jiyanohua piyarojiyano, Pedroori
puerequiaari. Na pueresacari, moo cariquimia tiuquiniu
coteequiaariiri. Nacareeri:

—¡Jiyaniijianaa cua quiare!

³¹ Jesuuri ritia Pedro juaashiquiajiniji quiaree. Na se-
quereeri:

—Pedronaa, majaqui puera quia tiuuniu cucua. ¿Casaara
cua sequesanoocuaji quia taacanuureeni?

³² ¡Nojori jaara botejinia tacataquiaariuhua, paratuuri jiy-
acari pueyajequee! ³³ Canaa niquishacari naa Jesu miishano
na cumaacatatej, canaari Jesuucua mojuquetacoquiaarini.
Canaari na sequereeni:

—¡Quiaaqui seetanujuanaa Pueyaso Niyanu!

Jesu naatanijosacari cusosuhua Genesaret jiyajinia
(Mr 6.53-56)

³⁴ Canaa jaara caminia taquijiria niuutiaquiaarini, canaari
Genesaret jiyajinia shiitiaseeni. ³⁵ Genesaret pueya jaara ni-
ishiquiaari Jesu tiuquirii, nojoriiri puetunu na jiyajiniajanaa
pueya numootequiaari, cuara patootasaaria cusosuhua Je-
suucua. Naacujitij, Jesuucua patootasaaquiaariiri puetunu
cusosuhujanaa. ³⁶ Pueyari Jesu sequetuquiaari:

—Nareja quia shanacure cusosuhua quiocua, nojori
cuara quia tucuaque toque quiaara quenaaja, nojori
naataconuhua.

Jesuuri naa miirii. Puetunu na toque quianaajanaari naat-
acoquiaariuhua na cusonujiniji.

15

*Casaate sesa miitijia pueyanoni**(Mr 7.1-23)*

¹ Na nuhuaji, Jerusalén tiacajiniinio pueyari canaacua tiuquiiioquiaari Jesuta pocoojonura. Nojoriiri quiquiaari Fariseocuaca, Moisés Naajioneejiniji niishitiojonaanio. Jesu sequetureeri:

²—Quia pueyari shuquitioojua miaquenuuquiaa. ¿Casaara nojori tojitiaaquiquiaa canaa niishitiojosano pa supuetanaa-jinijini? ¡Nojori cuaara miiria taa pa supuetanaa miiquiaar-icuaani!

³ Jesuuri nojori nequesotaree saniniuujia:

—¿Niajanियariuhuj? ¿Casaara nia tojitiaaquiquiaa saniniuujia Pueyaso Rupaani, nia supuetanaa jiiitishano miiniu nia miiniuriani? ⁴ Pueyasocuaajaari sequequiaari: “Quia que tojjia quia quiri, quia nucua tojjianio. Majaari nojori rerequetenu”. Naacuajitij, maninia pa cojuare pa queya. Pueyasoori sequequiaarijuhuaj: “Cuaara mosaaria cante na que sesacajani, na nucua sesacajanio”. ⁵ Niaari saniniuujia sequequiaacujua, maniniacuaajaari pueyano jaara na queya sequere: “Cua quenea, cua nucuanaa, janiyari Pueyasora niqutionutaniya cua casamini. Naacuajiti majaari cua naata nia naacunu cua jiiitiasano casamitia”. ⁶ Naa nia niishitiojosacari pueyatej, niaari pueya tarinitiya na queya nojori cartenura, naacusoo nojori quiniuria. Naa nia tojishacari tama nia niishitiojosanojuaaja juhua nia supuetanaa nia miiniuriatej, niaari Pueyaso Rupaa jiyateya najuhuanara. ⁷ ¡Sapuenu Pueyaso Rupaa tojitiaj-canaa! Supuetana Isaíasquiiri maninia naajiotaquiaaricuaaja niajanijini, na caminiujiushacari nio rupaa Pueyasojiniji:

⁸“Nio pueyari saa na rupaataja cua maninuhuaqueetaquiaa.

Nojori jiuujiaari saniniuujia tucuaaanu quiya janiyajiniji. ⁹ Nojoriiri najuhuaana rerejoquiaa na maninuhuaqueetanura janiya. Nojori niishitiojosanoori tama nojori niishishanojuaaja, maja cua rupaa”.

¹⁰ Na nuhuaji, Jesuuri puetunu pueyajanaa sequere:

—Miji, niya cua tojitiaseecuarajaj maninia nia niishiniuria.

¹¹ Pa miasanoni, cunoori maja sesara na jiyatenu poojia. Pa rupaata pa pocuasano sesani, cuno cutaraari poojia sesojua.

¹² Jiyacaritij, canaa, Jesu saquiriojosano pueyani, canaari nocua catecanoquiaarini naa canaa sequenura nojuaja:

—Jiyaniijianaa, ¿quiaate niishiya Fariseocuacaari juaaquioree naa quia sequesacaritij?

¹³ Jesuuri canaa riucuaaree:

—Naajaa. Cuaara juaaquioora. Cuno pojoriiri juhua sesa jiyasocua, Sesaaca natasano cua Que cuhuariquia-jinia. Nojoriiri juhua sesa jiyasocua jayotasaanutaniya. ¹⁴Seetanujuanaa Pueyaso niishiyashijiaca nojori quishacari, nojoriiri juhua cariyujuaru quiya. Narta cariyujuaru jaatucuyari. Cariyujuaru jaara narta cariyujuaru jaatucure juucua, nojoriiri mariyata raama totenutaniya.

¹⁵Pedroori Jesu sequeree:

—Jiyaniijianaa, canaa quia niishitiojoreja casaa quia sequenu paniriquiaa quia pohuatasacari pa miasanojinijini.

¹⁶Pedro riucuaareeri:

—¿Niaateeri na niishiyaquiyajuhua? ¹⁷ ¿Majateeri nia niishiniu, pa miaquesano pa rupaataari pa seecojinia tiuquiya saaja? Na nuhuaji, pa marecuhuacuma tajimiaari. ¹⁸ Saniniuujia, pa rupaata pa pocuasano sesani, cunoori poojajiniji tohuataa cutara. Naacuaajitij, pueyanoori sesa quiya Pueyaso niquiara, sesa casaa na pocuanuucua. ¹⁹ Pueyano jiuujiajinia coretaari puetunu sesa niishiriojosanojuanaa: monu paniniu; na camishoo maajipohua numuetucunu paniniu; saaja numuetucunuucua jiaatianu; nohuasejonu paniniu; sapojonuta saquiriojotanu paniniu; sacuaraatia coriaacojonu paniniu. ²⁰ Puetunu naa sesa pueya niishiriojosanojuanaa cutaraari pueyano sesojua. Saniniuujia, pueyano jaara miaquere shuquitioojua, naajaa. Cunoori maja na sesonu pueyano Pueyasora.

Taatu tiuushacari Jesuucua

(Mr 7.24-30)

²¹ Jesuuri Genesaret jiyajiniji quiaquiaari canaa na puey-ata. Canaari quiojoquiaari tamonu taucuaca jiyajiniarani. Cuno jiyajinia quiquiaariiri Tiro tiaca, Sidón tiacajuhua. ²² Canaa rucuanijosacari tii, cuno jiyajinijinio taatuuri Jesuucua niquiaari. Nojuajaari Cananeo pueyajinijinio maaji quiquiaari. Jesu nuhuaji nacariquiaari:

—¡Jiyaniijianaa, cucua quia taraajere! ¡Pueyaso Jiyarosanonaa, cucua quia taraajere quenaaja! Quiyatu samaru jiitiaa. Jiyanojua taraatia na miiquiaari.

²³ Jesuuri maja na riucuanu quiquiaari. Sanaa canu-juriquiaa saajaari. Naaratej, canaari Jesu catecanoquiaarini canaa sequenura nojuaja:

—¡Jiyaniijianaa, na panishano quia miiri cuaara quiohuara! ¡Taajeta nacao pa nuhuajini!

²⁴ Jesuuri canaa riucuaaree:

—Janiyari saaja Israel pueyacua jiyarosaaquiaarini. Nojoriiri juhua borregohua tashuquioono. Nojoriicua taraajianijia.

25 Cuno maajiiri Jesu sequesano tojirii. Naajaa, Jesu cariquimiaji mojuquetaseeri. Na sequereeri:

—¡Jiyaniijanaa, cua naacutare!

26 Jesuuri na riucuaree:

—Majaari maninia pa jaariutianura pa niqiuohua miaquesano, sare niqiuohua niqutiosocoriquiano saniniuujia.

27 Maajiiri saaja na sequeree:

—Maniniacuaja quia sequesano Jiyaniijanaa. Naajaa, sareyaniyojuacuajaari miaquesano shiriya miaquenuquiaa, na camaru totinijosano na miaquejajiniji.

28 Jesuuri maaji sequeree:

—Maniniacuaja quia sequesano maajinia. Quiaaqui jiyanhua cucua tiya. Cuaara quiiriaqui taa quia paniyacuajani.

Jiyacaritij, neyatuuri naataquiaariuhua.

Jesu naatanijosacari queraatia cusosuhua

29 Canaari Jesuta cuniquiji quiaquiaariuhuanii. Canaari Galilea caminia shuriuquico tajimiaani. Canaari tuhananuucua tacatamaani. Jesuuri tii cajishii.

30 Queraatia pueyari nocua nijioquiaari. Nojoriiri queraatia cusosuhua niojotaquiaari Jesu shuriucua, nojori tiacajiniji nojori patootasano. Cusosuhuari

quiquiaari shipiiniquiujiunaa pueya, cariyoyuarujurinio, tiquianucujuhua, sesarunecatohuanio, socua queraatia tamaatia cusosuhuanio. Jesuuri nojori naatanijioquiaari puetunujuanaa.

31 Pueyari jiuujiatequiaari nojori niqishacari tiquianucua pocoyano, shipiiniquiujiunaa rucuaneyano maninia, cariyoyuarujuri niqishacari maniniajuhuaj. Naajuhua, sesarunecatohuari maninia

numatucuaraca quiquiaariuhua. Naa pueya niqishacari Jesu miishanotej, nojoriiri Pueyaso maniniuhuaqueetaree. Sequetureeri:

—¡Jiyanhua maninia Israel pueya Pueyaso!

Jesu mianuutesacari cuatro mil pueya

(Mr 8.1-10)

32 Na nuhuaji, Jesuuri canaa na saquiriojosano pueya sequeree:

—Miji pueyanaa. Nio pueyagua taraajeyanijia. Nojoriiri tari jiuujianaraca juuca camueenujiya niya pata. Majaari nojori jiiatunu quenaaja casaa na miaquetusocoriquiano. Majaari cua jiyaronu paniniu miaqueyoyua nojori, nojori mariqui na miaajenuta cusojoniyarohua nucuacoori.

33 Canaari Jesu nequesotareeni:

—¿Canaatucua tee riuriatare queraatia miaquesano nio queraatia pueyarani? Niya, majaari pueya quiniu quenaaja.

³⁴ Jesuuri canaa nequesotaree:

—¿Taa pan nia jiiitiaani?

Canaari na riucuaareeni:

—Canaa saaja siete pan jiiitiaani, secaja sapitiaajaniyo-juanio.

³⁵ Jesuuri pueya sequeree na cajitiuniuria. ³⁶ Na nuhuaji, Jesuuri cuno siete pan pataree, sapitiaajanio. Jesu jaara na Que secojoquiaari coteenu miaquesanoocuara, na nuhuaji na neecasequiaariiri canaa niqutiojonura pueya. ³⁷ ¡Puetunu pueyajanaari maninia miaquenuuquiaari! Tooquioreeri. ¡Canaari miaquesano cureenota mishinijioquiaari siete canaasatuni! ³⁸ Queraatia pueyari na miaquenuuquiaari. ¡Saaja canuuri serojosaaquiaari cuatro mil pueya! Majaari maajipohua serojosaanu quiquiaari, naatujoorinio. ³⁹ Na nuhuaji, Jesuuri pueya sequequiaari nojori quiojonuhua. Na nuhuaji, Jesuuri canaa jiyataquiaari botejinia Magdala jiyajiniara.

16

*Fariseocuaca, Saduceocuaca niqiniu panishacari Jesu mi-
ishano Pueyaso cumaacata*

(Mr 8.11-13; Lc 12.54-56)

¹ Fariseocuacaari Saduceocuacata Jesuucua nijioquiaari nojori saniniujiuniuria nojuaja. Nojoriiri Jesu sequequiaari:

—Casaa quia miiri quia cumaacata canaa niquishocoriquiano, canaa niishiniuria quiaate seetanujuanaa Pueyaso jiyarosano.

² Jesuuri nojori sequeree saaja:

—Jiya jaara naatuuca quiri pananu tiuquishacari, niaari sequequiaa: “Maninia juucaqui tariqui quiniutianiya”.

³ Naajuhuj, pananu jaara tariquiicujaji jama, niqutioocua jaara niquishaarejuhuaj, niaari sequequiaa: “Maruqui niniutianiya”. Niaari naa niishiquiaa taamueca juucate quiniutianiyani jiya nia niquishacari. ¡Mosanucuaanaa! ¿Casaara saniniuujia nia niishiyaquiya casaa Pueyaso niishitiojiya juucua niajaniyani? Nojuacuajaari juucua na cumaacata na miishano miiquiaa nia niquiara najuhanaj.

⁴ Jesuuri nojori niquiara sequereejuhuj:

—Nio sesoriquia pueya, Pueyaso tojitiaashijiacani, nojoriiri Pueyaso cumaacata cua miishano niqiniu paniya juucua. Majaari nojori niqutishaanu quiniutianiya socua. Nojoriiri saaja nio niquiriyatu Pueyaso cumaacata miishocoriquiano niqiniutianiya: janiyari miishaanutaniyani taa supuetana Jonás miishaaquiaaricuaani.

Naa Jesu sequenu nuhuajitij, nojori tarinitiaqueeri. Canaari quiaqueeni.

Jesu numootesacari na pueya Fariseocuaca niishitio-josanoocuaji

(Mr 8.14-21)

⁵ Canaa niuutiasacari caminia taquijiria, canaari canaa coseyaca panu niyajetaquiaari canaa sasocoriquianoni.

⁶ Jiyacaritij, Jesuuri canaa sequere:

—Niishijaca nia quiri. Tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacujinio.

⁷ Cunora, canaari tama sequetooreejaanijia:

—¿Casaa na sequeyani? Pan pa paaquiniuucua naa pa sequeya jiyoteeri.

⁸ Jesu niishishacari naa canaa sequesanotej, canaa sequereeri:

—¿Majateeri juhuanajuaja cucua nia tiuuniu maninia? ¿Casaara tama nia pocoojiyajaaja panjinijini? ⁹ ¿Majateeri juhuanajuaja nia niishiniu tari cua miishanojiniji? ¿Niaateeri tari niyajetarucuaa taa canaasatu mishajate cureecanuni, cinco mil canuu jaara miaquenuucanu cinco panjinijitij? ¹⁰ Niaa jiyoteeri niyajetarucuaajuhuaaj taa canaasatu mishajate cureecanuni, cuatro mil canuu jaara miaquenuucanu siete panjinijitij. ¹¹ ¿Casaara nia jiyaniriini janiya miaguesanojiniji sequeriquiaani? Maja cua sequenu panjiniji. Nia sequeriquiaanijia tama nia cuaqueyajaaja nia cojuare Fariseocuaca pan poreetajaacuaji, Saduceocuaca pan poreetajaacujinio.

¹² Naa na sequesacaritij, canaari jiyacari niishiQuiini maajaari Jesu sequenu quiriQuiaa pan poreetajajiniji. Canaari shusha niishiQuiini Jesuuri miriqui canaa numooteriquiaa tama canaa cuaqueyajaaja canaa cojuanura Fariseocuaca niishitiojosanoocuaji, Saduceocuaca niishitiojosanoocuajinio.

Pedro sequesacari Jesuuri seetanujuanaa Pueyaso Jiyarosano

(Mr 8.27-30; Lc 9.18-21)

¹³ Canaa tiuquijiosacari Cesareya Filipino tiaca jiyajinia, Jesuuri canaa nequesotaree:

—¿Taa pueya sequequiaa janiyajinijini, cantena janiyani?

¹⁴ Canaari Jesu riucuaareni:

—Noojiaqueya pueyari sequequiaa, quiaanaari Tiuquinjiona Juan. Herodes motesano naasucuaanaari samiitiarohuacuaa. Tamasacaari sequequiaacujua, quiaanaari Elías, tariucuaaanu pueyara Pueyaso sequesano caminiujiunia. Tamasacaari saniniujia quia sequequiaacujua, quiaanaari

supuetana Jeremías, pueyara Pueyaso sequesano caminiuji-uniajuhuaj, tamonu Pueyaso sequesano caminiujiunia soj.

¹⁵ Jesuuri canaa nequesotarohua socua:

¿Niajanियariuhua? ¿Taa nia sequeyanijia? ¿Cante janiyani?

¹⁶ Simón Pedroori na riucuaree:

—¡Quiaacuajaari Pueyaso Jiyarosano! Quiaari Cristo, Pueyaso Niyanu.

¹⁷ Jesuuri Simón Pedro sequerohua:

—Quiaacuajaari Pueyaso shuquiritiasano pueyano, Jonás niyanunaa. Jiyocuacaanu Quijia cua Quecuajaari quia ni-
ishitirii cante janiyani. Janiyajiniji quia niishishanoori
maja pueya niishitishano quiajaniya. ¹⁸ Janiyari socua se-
quenu paniya quiajaniyani Pedronaa. Quia sesaari Pe-
dro. Nioori pueyano rupaajinia sequeya “saajia”. Naatej,
taa saajiacuaani jataniyaquishoo, quiaari cumaatia nuju-
ataja quiniutianiya, seetanujuanaa cucua quia tiuushacari,
quia niishishacari janiyani Pueyaso Niyanuni. Naajuhua,
puetunu pueyajanaa cante cucua tiuuriini taa cucua quia
tiuyacuaani, janiyani nojori jiyatenutaniya cua muerasurani.
Puetunu cua saquiriojosano pueyajanaari cumaatia nuju-
atunutaniya, nojori niishishacari janiyani Pueyaso Niyanuni.
Naacuajitij, nojoriiri juhua puereetuuca saajiaacua tiasano
quiniutianiya. Puetunu cua muerasujuanaari juhua cua tia
quiniutianiya, cua quiquio nojori quishacari. Sesaacaari
maja na naata cua tia pojoretanu quiniutianiya. Majaari
na naata na tarinitiniu quenaaja janiya, cua tiasacari cua
quiquiora. ¹⁹ Naajuhua Pedronaa, quiaari juhua cua quiquio
tfootu riatataja jiiitiana quiniutianiya. Naacuajitij, quiaari
coteenu pohuatanutaniya pueya niquiara janiyajiniji, nojori
tiuuniuria cucua, juhua Pueyasooocua nojori tiuquiniuria na
muerasura nojori quiniuria. Naajuhua, quiaa jaara rootare
taate Pueyaso muerasu naata miiniu maniniani, Pueyasoori
sequenutaniya cuaara naa quiiriatej. Naajuhua, quiaa jaara
casaa tenuitye, maja naa pueya miiniuriatej, Pueyasoori naa
sequenutaniyajuhua.

²⁰ Na nuhuaji, Jesuuri canaa na pueya rootaree maja canaa
pohuatanura tamasa niquiara nojuacuajaari Pueyaso
Niyanu.

*Jesu numootesacari na pueya, nojuajaari mosaanutaniya
(Mr 8.31–9.1; Lc 9.22–27)*

²¹ Jiyacaritij, Jesuuri canaa pohuatanu coteequiaari taa
nojuaja miishaanutaniyani. Canaa sequereeri:

—Janiyani Jerusalén tiacajinia quiariquianoni. Parta Ju-
diocuaca jiyaniijianucuaari tii cua miiniutianiya naquiya

jiyanohua. Pueyacuara secojonaa jiyaniijianucuaari nojori rupuenutaniya naa cua paracaashaanurajuhuaaj, mariyata tariucuaaanu Moisés Naajioneejiniji niishitiojonaanio. Naacuajitij janiyari mosaanutaniyani. Jiuujianaraca juucajinia, janiyari samiitianutaniuhuani.

²² Naa Jesu sequesacaritij, Pedroori Jesu jaatucuree tamocora na nacasunura tamajaaja. Jiyanhua Jesu sequereeri:

—¡Maja naa pocuanutej! ¡Pueyaso cuaara cojuaara quiajaniya maja naa quia miishaanuratej!

²³ Jesuuri saaja Pedro nijiniaquequee. Na sequereeri:

—¡Niiquiji quia quiaare Satanásnaa! ¡Quia sanaajere! Sesaaari naa quia pocuateree Pedronaa. Quia sequesanoori maja Pueyasojiniji. Quia niishiriojosanoori juhua mijiria pueya niishiriojosano saaja. Naa quia sequesacaritij, quiaari cua Que sequesanoocuaaji cua tarinitiniu paniya juucua.

²⁴ Na nuhuaji, Jesuuri canaa na pueya sequequiaari:

—Pueya jaara cua tojjiara quiniu paniya, nojori cuaara carteera tama nojori panishanojuaaja. Na nuhuaji cutara, cuaara miiria cua panishano, tama na cuaqueya na panitianutajaaja cucuara. ²⁵ Naatej, pueyano jaara tama na cuaqueyajaaja shuquiritiniu paniya mijiria, cuno pueyanoori na nuhuaji jiyanhua taraatia quiniutianiya. Saniniuujia, cante tama na cuaqueyajaaja panitiaa cucuara mijiriani, cuno pueyanoori na nuhuaji pueyaracaanu shuquiriaatia quiniutianiya cutara. ²⁶ Naajuhuaaj, pueyano jaara masere puetunu nio jiya casamijianaa, na casamiiri najuhuaana quiniutianiya nera, na camaru jaara jatasaare mani quiquiojinia na shaajesacari. Nojuajaari maja na naata Pueyaso jiyanootiniu tama na cuaqueyajaaja, naajaa, nojuaja jaara puetunu na casamijianaa niquitiore Pueyaso, Pueyaso samiitianinihuara nojuaja.

²⁷ 'Janiyacuaajaari jiyanhua shacantuuca quijiara quiniutianiyan, cua Que jiyatesacari janiya Jiyaniijiarajanaa. Na nuhuaji, janiyari mijiria niniutianiuhua jiyocuacaanuji cua Que seyatani, puetunu pueyajanaa cua nequesoreenura. Jiyacaritij, pueyari maninia casaa niquitiosaanutaniya maninia nojori miiniuucua. Pueyaso tojtiaashijiacaari saniniuujia naquiya miishaanutaniya, sesa nojori miiniuucua. ²⁸ Seetanujuanaa nia sequeyanijia, noojiaqueya niajanijajinijinio niya cuata quiyani, majaari nia shaajenu quiniutianiya juhuanajuaja, niaa cuaara niquirijaatijia Pueyaso cumaaca cucua tiuquiyano, cucua tiuujiaa jiitariquiano.

17

*Jesu jatasacari shacantuucara**(Mr 9.2-13; Lc 9.28-36)*

¹ Seis juuca nuhuaji, Jesuuri nio pojori jiyataquiaari jiy-
aconaja tuhuananuucua. Nojoriiri quiquiaari Pedro, Santi-
ago, Santiago tarajanu Juannio. Jiyareta tama nojorijiaar-
ijia quiaquiaari. ² Jesuuri tii tamaatiara jataquiaari nojori
niquiara. Na jiquiocoori jiyanoehua shacantuucara jataquee,
juhua pananu. Na toqueeri mariyata jiyanoehua cohujara
jataquiaarijuhuaj, juhua cuhuatana. ³ Jiyacaritij, nojoriiri
caapiqui supuetanaa niquirii, Moisés, Elíasnio. Jesuta pocoo-
joriquiaari. ⁴ Cunora, Pedroori Jesu sequeree:

—¡Jiyaniijianaa, canaaqui namitia niya quiyani! Quiaa jaara
paniri, canaa quiocuaji suhuoronutaniyani, Moisésrajuhuaj,
Elíasranio.

⁵ Pedro pocuasacarijia, shacantuuca najacaari nojori
mishiquioma. Najacajiniji, rupaari tojishaaquiaari naa
sequeyano:

—¡Nioori cua Niyanuniyojua, cua shuquiritiasano! ¡Saaja
nojuaja nia tojitiare!

⁶ Naa nojori tojishacari Pueyaso pocuaanotej, nojoriiri ja-
camatuquiaari jiyanoehua na puerenuta. ⁷ Jesuuri nojori-
icua nimiaa. Nojori quiaseeri na juaashiquiata. Nojori
sequereeri:

—Nia saneecuatuohua. Maja puerenu.

⁸ Nojori jaara niquinijionuuquiaari, majaari tari na niqi-
tiuniu quiquiaari cuno supuetanaa. Saaja Jesuuri quiriquiaa.

⁹ Nojori rosetasacariuhua tuhuananujiniji, Jesuuri naa no-
jori rootaquiaari:

—¡Majaari nia pohuatanu pueya niquiara tuhuananujiniji
nia niquishano! Niocua na pohuatarohua cutara janiya jaara
samiitiarohuani.

¹⁰ Na pueyari Jesu nequesotaree:

—¿Casaara tariucuacaanu Pueyaso Rupaajiniji
niishitiojona sequequiaacuaraarini, supuetana Elíasnaari
quiocuaji mijiria niniutianihua coteenu, pueya na
jiyanootioteenuhuara necohuata?

¹¹ Jesuuri riucuaaree:

—Elíasri seetanujuanaa coteenu niriqiano quiquiaari,
puetunu pueya jiuujiaajanaa na jeenucuanura. ¹² Janiya
cutaraari nia sequeyani, Elíascuajaari tari niquiaari. Ma-
jaari pueya niishiniu quiquiaari cante nojuajani. Naaratej,
pueyari taraatia na miiquiaari taa nojori paniquiaaricujani.
Nojoriiri naa cua miiniutianiya naquiyajuhuj.

¹³ Naa Jesu pohuatasacari Elíasjinijitij, na pueyari niishiquii
nojuajaari Tiuquinijiona Juanjiniji pohuatariquiaa miriqui.

Jesu naatanishacari samaruraca caya samijia

(Mr 9.14-29; Lc 9.37-43)

¹⁴ Jesu jaara tuhuananujiniji tiuquiiioquiaari canaacua, tamonu pueyanoori nocua catecanoquiaari canaata quiniaa maanujiniji. Jesuucura mojoquetaseeri na sequenura neyanuucura. ¹⁵ Jesu sequereeri:

—¡Jiyaniijianaa, cua niyanuucua quia taraajere quenaaja! ¡Nojuajaari pueyaracaanu cusojoquiaa! Na jiiitasano cusonuri na taquiriocuatequiaa. Na cusojosacari miiquiaa naquiyari. Naacuajitij, sequeyarucua manijinia tiquiaari, moojini-
anio. ¹⁶ Janiyari quia pueyacua na tiuquitiasee na naataninuria juucuan. Nojoriiri maja na naata na naataniniu.

¹⁷ Jesuuri cunora sequereeri:

—¡Niaaqui Pueyasocua tiuyashijiaca, na tojiyashijiacanio! ¿Janiyateeri nia rejeretanutaniya pueyaracaanuni? ¿Taacari nia niishiniutianiya Pueyaso tamajaajarini? Miji nia jaatucuma cuno mueya.

¹⁸ Mueya tiuquishacari nocua, Jesuuri samaru juaarii. ¡Na tohuatereeri! Jiyacaritij, caya samijiaari maninia quiquihua.

¹⁹ Na nuhuaji, tamajaaja canaa quishacari Jesuta, canaari na nequesotareeni:

—Jiyaniijianaa, ¿casaara maja canaa naata cuno samaru tohuatenu quiriquiaani?

²⁰ Jesuuri canaa riucuaere:

—Maja puera maninia nia tiuuniu juhuanajuaja Pueyasocua. Seetanujuanaa nia sequeyanijia, nia tiuuniu Pueyasocua jaara quiriquia shiitianiyojua juhua mostaza jajau quenaaja, jiyacari cutaraari nia naata miiniu puetunu nia panishanojuanaa. Naacuajitij, nio tuhuananu maara nia tojiri, niaa jaara na sequere: “Tuhuananunaa, niiquiji quia quiaare tamaqui”. ²¹ Saniniuujia, jiyano samarutej, na naata tohuatanishano cutara saaja Pueyaso nia secojosacari nia miaqueyaquiniutia.

Jesu pacutesacari pohuatanu nojuajaari mosaanutaniya

(Mr 9.30-32; Lc 9.43-45)

²² Tamonu juuca Jesu rucojosacari canaa na pueyata Galilea jiyajinia, Jesuuri canaa sequereeri:

—Janiyari sapojonuta niqutiosaanutaniya taucuaani. ²³ Nojoriiri cua monutaniya. Jiuujianaraca juucajinia, janiyari samiitianutaniuhuan.

Naa Jesu sequesacari canatej, canaari jiyanohua taraajequiaarini.

Cumaneeca niqutiosacari Pueyaso Secojoua tiaacuara

²⁴ Canaa jaara tiuquiiioquiaari Capernaum tiacajinia Jesutani, tamonu pueyanoori Pedroocua catecanoquiaari. Nojuajaari cumaneeca masejona quiquiaari Pueyaso Secojojua tiaacuara. Cuno pueyanoori Pedro nequesotaree:

—¿Majate nia niishitiojona niqutionu na cumaneeca Pueyaso Secojojua tiaacuara, taa pa jiyaniijianucua sequequiaaricujani?

²⁵ Pedroori na riucuaaree:

—Na niqutioquiaanocujaja.

Na nuhuaji, Pedro tiuquishacariuhua na tiajinia, Jesuuri na nequesotaree:

—¿Taa quia sequeyani Simónnaa? Mijiria jiyaniijianucua jaara cumaneeca paniri, ¿teyano pueyajiniji cumaneeca maseshiyani? ¿Tama na pueyajinijitii, taucuacajiniji soj?

²⁶ Pedroori Jesu riucuaaree:

—Taucuaca niqutiojoteshiyanocujaja nojori jiya jiiitiana sequesano.

Jesuuri na sequeree:

—Naacuaaquiniatejaj. Naacujitij, tama na pueyajaariija maja na niqutionu. Pueyaso Secojojua tiacuajaari cua Que tia. Naaratej, maja cumaati Neyanu sequesaanu na niqutionura na cumaneeca. ²⁷ Naajaa, pa niqutiore juhuari nojori sequesano, paa mariqui nojori juaatiriiri. Nocuaji quia rioosee caminiajinia. Quiocua coteenu quia jatasano sapitiaaja rupaama niquiri. Quiaari tii cumanee riuriatanutaniya. Quiocua cuno cumanee niqutiosuhua nojori, quiria, quiarajuhujaj.

18

Cante jiyaniijiajanaa cutarani

(Mr 9.33-37; Lc 9.46-48)

¹ Jiyacaritij, canaa, Jesu saquiriojosano pueyani, canaari Jesuucua catecanoquiaarini naa canaa nequesotanura nojuaja:

—Jiyaniijianaa, canaa quia sequeretoj, puetunu quia pueyajinijiniojuanaani, ¿cante jiyaniijiajanaa cutarani?

² Jesuuri naatujua piirii. Canaa tajinia na nujuatereeri.

³ Na nuhuaji, Jesuuri canaa sequeree:

—Nia niyajetare socua tojishano pueyano nia quiniu paniniu tamasacajiniji. Seetanujuanaa nia sequeyanijia, nia jataniyaquishacari tama nia cuaqueyajaaja juhua nio naatujoori nia quiniuria, majaari Pueyaso muerasura nia quiniu quiniutianiya quenaaja. ⁴ Naacujitij, cante tama na cuaqueyajaaja jiyateya pueya shocoteyashijia na quiniuria juhua naatujuaani, nojuajaari socua jiyaniijiajanaa quiniutianiya cutara narta Pueyaso muerasujinijinio. ⁵ Naajuhujaj,

cante naatujua maseja maninia na paniniuucua janiyani, nojuajaari cua maseyajuhuaaj.

Paari cocuaatia miyani sesa pa miishacari

(Mr 9.42-48; Lc 17.1-2)

⁶ 'Sesa cutaraari, sesa nia miitiniuria cucua tiujua naatujua. Socua maninia cutaraari sesa miitiriqiano pueyanora, nojuaja jaara juhuacarijia caminia queronijinia jartasaare puereetujau saajia na riquiajiniji morotasano.

⁷ ¡Mijiria quiniaari jiyanoehua cocuaatia miquiaa sesa na miitishacari tamasa! Mijiria, pueyari pueyaracaanu sesa miitishaaquiaajuhuanajaj. ¡Taraatia quiniutianiya cutaraari noo pueyanora, cante sesa miitirii tamonuni!

⁸ 'Nio miriqui cua niishitiojosano nia tojiri: nia juaashiquia, nia niohuaca jaara sesa miitiya niajaniya, nia rashiquiarenoj, tucuacaanu jatasocoriquiano. Naa nia miiri niaa mariqui mani quiquiojia jatasaaereeri puetunu nia cuaqueyatajanaa. Socua maninia cutaraari juaashiquiaaju, niohuacaaju nia tiuquitianura Pueyaso quiquiojia jiyocuacaanu. Niaari tii quiniutianiya shuquiriaatia pueyaracaanu. ⁹ Naajuhuaaj, nia namijia jaara nia miitiri sesa, nia jiatere. Tucuacaanu nia jatarenaj. Jiyanoehua socua maninia cutaraari niaara, jiyocuacaanu nia tiuquiniuria namijijiu, maja nia jataaanura mani quiquiojia, saniitiosocoriquiano puetunu nia namijiaatajanaa.

Naa Jesu niishitiojosacari miriquitij, nojuajaari canaa niishitiojoriquiaa canaa tarinitianura jiyanoehua canaa miiniu panishano, cuno jaara sesa miijiaa jiyateriquia canaa.

Jesu pohuatasano miriqui borrego tashucuanojiniji

(Lc 15.3-7)

¹⁰ Jesuuri naa canaa niishitiojorohua socua:

—Tama nia cuaqueyajaaja nia cojuare nia soyaquiniuucujaji tamonu muerasuniyojua, juhua nio mueyaja. Cua tojitiare. Pueyasocuaajaari na seya seerataquiaa nojori cojuanura muerasu. Cuno na seyari pueyaracaanu cua Que Pueyaso jiquioco shootiaquiaa. Naajuhuaaj, Pueyasocuaajaari na muerasuranooqua niishiriojoquiaa. ¹¹ Naaratej, janiyari mijiria niquiaarini tashucuaano pueya cua pajenura, nojori cua jaariuutianura Sesaaca.

¹² '¿Taa nia sequeyani pueyanaa? Tamonu pueyano jaara cien borregohua jitiare, niquiriyatujua jaara tashucua tapueyocuacajiniji, ¿majateeri na camaru na borregohua cureeno tiujianu rupaquijia, tashucuaano na pajenura? Taaquiriirinij. ¹³ Jaara na riuriatare, seetanujuanaa socua jiyanoehua cuno borrego tashucuaano shuquiritiaari tamasa na borregohuajiniji. ¹⁴ Naajuhuaaj, jiyocuacaanu quijia nia

Queeri maja na paniniu quenaaja niquiriyatujua nio muera-sujinijinio tashucuanura puetunurajanaa.

*Taa pa jiyanoya pa tarajanuni
(Lc 17.3)*

15 'Quiarta Pueyaso pueyano jaara sesa miiri quiajaniya, nocua quia quiaare na nacasunura tamajaaja nia quishacari. Nojuaja jaara tojiri quiajaniya, maniniacuajaari. Niaari maninia rupuetoojuacara quiniutianihuacuahuaj.

16 Nojuaja jaara tojiyaquiri quiajaniya saniniuujia, nocua quia quiaare socua tamonu pueyanota, caapiqui pueyata soj. Nojori niqiara quia nacasure cuno sesa miinia. Niaa jaara naa miiritij, naa quiniutianiyari taa tariucuacaanu Pueyaso Rupaajinia niishitiojosaaquiaaricuajani: "Querajaa pueya jaara mariyata pohuatara na niquishano, na tojishanojuhuaj, cunoori maja sapojonu". Naacuajitij, nojori saquirojotasanoori seetanujuanaa quiniutianiya.

17 Cuno sesa quia miinia jaara nia tojiniu paniyaquiya saaja, puetunu niarta Pueyaso pueya niquiarajanaa quia pohuatara sesa na miishano. Cuno pueyano jaara tojiniu paniyaquiri puetunu Pueyaso pueyajanaa, nojuaja cuara quiiria juhua Pueyaso niishiyashijia niaara. Naacuajitij, majaari socua nia rupuenunoj.

18 'Seetanujuanaa nia sequeyanijia, cana nia jiyanoyaquirii mijiriani, na tojiniu paniyaquishacari niajaniya, cunoori jiyanoyaquishano quiniutianiya jiyocuacaanu cua Que Pueyasorajuhuj. Naajuhuj, cana nia jiyanoorii mijiria na tojishacari niajaniyani, cunoori jiyanooshano quiniutianiya jiyocuacaanu cua Que Pueyasorajuhuj.

19 'Naajuhuj, janiyari seetanujuanaa sequeya niajaniyani. Caapiqui niajaniyajinijinio jaara mariyata niishiriojore nia panishanoocuara nia secojonura Pueyaso, cua Queeri nia tojiniutianiya. Nojuajaari jiyocuacaanuji naa maninia miiniutianiya niaara, taa nia secojosacari nia sequerecuajanoj.

20 Querajaa niajaniyajinijinio jaara rerejore, cucua tiuujia nia quishacari, janiyari tii niaata quiyajaaniuhuj. Naacuajitij, cua Queeri nia secojosano tojiniutianiya cutara.

21 Jiyacaritij, Pedroori Jesu nequesotasee:

—Jiyaniijianaa, tamonu pueyano jaara sesa miiniu pacutejore janiya, ¿janiyatucua pueyaracaanu na jiyanoorini? ¿Majateeri tariucuaja, janiya jaara na jiyanoori siete sesa na miishanojiniji janiyani?

22 Jesuuri Pedro riucuaaree:

—Maja naatej Pedronaa. Maja quia tarinitianu na jiyanooniu. Pueyaracaanu sesa na miishacari quiajaniya, pueyaracaanu quia jiyanoori quiarta pueyano. Majaari quia serojonu sesa na miishano quiajaniya. Pueyaracaanu quia jiyanoori saaja.

Jesu pohuatasano jiyanoyashijia serujiniji

²³ Naaratej, cua tojiri pueyanaa. Nia pohuatareera nia niishiniuria taa Pueyaso paniya jyanootiojuaca na muerasu nia quiniuriani. Tamonu jiya jyaniiijaari nera poonijionaa pueya sequequiaari nojori cuaara tari niqutiojooora nojuaja na cumaneeca, nojori na niqutiojosanojiniji na casami. ²⁴ Noojiaqueya nera poonijionaa pueya jaara tari nojori pasano casamijiniji niqutiojoriquiacuaa tama nojori cumaneecajinijiaaja, jiyacaritij, tamonuuri tiuquinishaareehuaaj. Nojuajaari jyanohua queraatia casami masejoquiaari na jyaniiiajiniji, queraatia millón cumaneeca. ²⁵ Nojuajaari maja na jitianu quiquiaari na cumaneeca, na jyaniiija na niqutionuhua. Na jyaniiijaari cunora na pueya sequeree: “Tamonu camarnu nia niqutiore nio cua seru, necocuataja, cua cumaneecara, necohuajuhuaaj, puetunu na casamijianaanio. Naacuajitij, na cuentaari puequenutaniya”. ²⁶ Cuno na seru tojishacari naa na jyaniiija sequesantej, nocuara jacamaquiaariiri. Na jyaniiija sequereeri: “¡Cua tarinitiare quenaaja cua jyaniiijianaa! ¡Rupaquijiara cua tarinitiarejaara! Janiyacuajaari quia cumaneeca niqutionutaniya puetunujuanaani”. ²⁷ Na jyaniiijaari nocua taraajeree. ¡Na carterohua puetunujuanaari! Naa na jyanooiriiri, nocua na taraajenuuca.

²⁸ Cuno seru tohuatasacari jyaniiija tiajiniji, narta seruta naacuneetooreeri. Cuno narta seruuri tarijia masequiaari shiitianiyojua casami cuno jyanoooshano serujiniji. Se-caja cumaneecaari quiquiaari na cuenta. Naajaa, cuno jyanoooshano seruuri narta seru quiaree. Cumaatia na riquiajinia na miniriiri. Na sequereeri: “¡Ritia cua niqutiore cumaneeca, tarijia quia masesano janiyajiniji!” ²⁹ Narta seruuri na riquiajinia mininia cariquimiaji mojuquetaree. Na sequereeri: “¡Cua tarinitiarecuaraja quenaaja! ¡Janiyacua-jaari quia cumaneeca quia niqutionutaniyani!” ³⁰ Majaari na sashiniu paniniu quiquiaari. Saaja na nujuatequiaari nujuatejojuajiniaari cuaara na cumaneeca na niqutiore-jaatijia. ³¹ Narta seya niquishacari naa cuno jyanoooshano seru miishantej, nojoriiri jyanohua taraajequiaari. Nojoriiri jyaniiijaacua quiojoquiaari puetunu sesa narta seru miishanojuanaa nojori pohuatanura. ³² Naaratej, jyaniiijaari tamonu na seru jiyaree cuno jyanoooshano seru

riniuucua. Na tiuquishacari, jiyaniijaari na juaarii. Na sequereeri: “¡Quiaaqui jiyanoehua sesajuhuanajaj! Quia sequesacari janiya, janiyari quia jiyanooriicuaani, maja quia naata niqutionu quishacari quia cumaneeca. ³³ ¿Majateeri quia naata quiriquiaa taraajenu quiarta seruucua, taa cua taraajeree quiocuacuaani?” ³⁴ Jiyaniijaari jiyanoehua juaarii. Cunora, cuno sesa miijia seru jiyarotareeri nujuatejojuajinia na nujuatesaanura. Sequereejariuhuj cuaara naquiya miishaaria tii, cuaara puetunujuanaa na cumaneeca niqutiorejaatijia, casami na pasanoiniji.

³⁵ Nia Que Pueyasoori naa miiniutianiya nijaniyajuhuj, niaa jaara seetanujuanaa jiyanoyaquiri niarta Pueyaso muerasu.

19

Jesu niishitiojosano maja pa niquiocua pa cartenura
(Mr 10.1-12; Lc 16.18)

¹ Jesu jaara naa pohuatanu puecaquiaariti, canaa na puey-ata quiaquiaari Galilea jiyajiniijiiri. Canaari Judea jiya shuriucua tiuquishii Jordán moo taquijiriani. ² Jiyanoehua quer-aaia pueyari Jesu nuhuajiyaree. Quiniqui canaa quishacari, Jesuuri cusosuhua naatanijioree.

³ Jiyacariti, noojiaqueya Fariseocuacajinijinioori Jesuucua nijioquiaari sesa na pocuatenura Jesu juucua nocuara nojori tonujunura. Naaratej, nojoriiri Jesu nequesotaree:

—¿Maninate pa cartenura pa niquiocua, jaara pa juaatiri?

⁴ Jesuuri nojori riucuaaree:

—¿Majate nia serojonu quiquiaacuaja Pueyaso Rupaajinia? Coteenujuanaa Pueyaso shipinishacari pueyano, Pueyasoori shipiniquiaari caya, maajinio. ⁵ Naaratej, nojori shipinini-aari sequequiaari: “Caya cuaara tiujiaara na que, na nucuanio, necocuata na quiniuria. Nojoriiri juhua niquiriyatu pueyanora quiniutianiya na camitioosacari”. ⁶ Naaratej, caya, maaji jaara camitioore, majaari tari na quiniu caapiqui pueyano. Juhua niquiriyatu pueyanojuaari quiquii. Naacua-jitij, majaari maninia Pueyaso rupuetootesano rupartanura.

⁷ Nojoriiri Jesu sequeree:

—Jaara naa quiriti, ¿casaara supuetana Moisés rootaquiaaricuaarini caya cuaara naajionee niqutioora necocua, na cartenu panishacari?

⁸ Jesuuri nojori riucuaaree:

—Moiséscajaari niishiquiaari niaari puera cumajiuuji-aaca. Naaratej Moisésri nia tarinitiaquiaari nia niquiocua nia cartenura. Coteenujuanaa, Pueyaso jaara shipiniquiaari caya, maajinio, majaari naa na quiniu quiquiaari. ⁹ Cua tojitiare pueyanaa. Janiyari nia sequeya cutarani. Cante

necocua carteree najuhuanani, tamonu maajitia na caminiuria, coteenu necocua jaara tamonu cayata quiyaquiri, neyacaari jiyanoehua sesa miya Pueyaso niquiara. Jaara naa miiritij, Pueyasora, nojuajaari sesoriquia pueyano. Nojuacuajaari juhua pueyano, cante narta pueyano niquiocua numuetucujuani. Naajuhuj, cante artesano maaji camiyani, naa sesa miyajaariuhuj.

¹⁰ Canaa, Jesu saquiriojosano pueyani, canaa tojishacari naa Jesu sequesantej, canaari na sequereeni:

—Jaara naa quiritij taa quia sequeriquiaacuajani, maninia naasucuaari maja mashaja caminiuria. ¿Naatejaaratej?

¹¹ Jesuuri canaa riucuaaree:

—Maja na naata puetunu pueyajanaa nio cua niishitiojosano tojiniu. Saaja noojiaqueya pueya cutaraari na tojiniutianiya, noo pojori canapuate jiyocuacaanuji cumaaca niqutiosaareeni na tojiniuria. ¹² Naajuhuj, noojiaqueya canuuri maja na naata caminiu, riyacajajaaju nojori quishacari. Nojoriiri naa rasanohuanajaj. Tamasaca canuuri maja na caminiu saniniuujia, jiatejosano nojori riyacajajau quishacari. Tamasacaari maja na caminiuuhuj tama nojori paniyaquishacarijaaaja, saaja Pueyasora nojori poonijionu panishacari. Cante na naata naa miiniuni, cuaara naa miiriatej.

Naatujooriicuara Jesu secojosacari Pueyaso

(Mr 10.13-16; Lc 18.15-17)

¹³ Na nuhuaji, pueyari Jesuucua nitiaquiaari necohua juucua, Jesu nianura nojoriicua na juaashiquia, nocuara na secojonura Pueyaso. Canaa, Jesu saquiriojosano pueyani, canaari saaja nojori tenujeree canaa juaaniutiani. ¹⁴ Jesuuri saniniuujia canaa sequere:

—¡Maja nojori tenujunu! Nia tarinitiare naatujoori cuaara cucua nijioora. Nia tojiri, canapuate seetanujuanaa juhua nio naatujoorini, nojoriiri Pueyaso muerasu quiriqiano.

¹⁵ Na nuhuaji, Jesuuri na juaashiquia niaquiaari naatujooriicua, nojoriicuara na secojonura, Pueyaso miiniuria maninia nojori. Na nuhuaji, Jesuuri quiniquiji quiaquiaariuhua.

Jiyanoehua casamiriaca mashaja pocojosacari Jesuta

(Mr 10.17-31; Lc 18.18-30)

¹⁶ Tamonu mashajaari Jesuucua niquiaari. Na nequesotaseeri:

—Niishitiojonanaa. Quiaari maninia pueyano. Cua sequere, ¿taa cua miiniutianiyanani maninia cua quiniuria Pueyaso niquiara, pueyaracaanu quiijara cua quiniuriani?

¹⁷ Jesuuri na riucuaaree:

—¿Casaara quia sequeya janiya maninia pueyanotani? Saaja niquiriyatujuaari maninia quijia cutara. Nojuacua-jaari Pueyaso. Naajaa, quiaa jaara maninia quiniucua jiaataa Pueyaso pueyano quia quiniuria, quia tojiri tariucua-caanu Moisés Rootasano Pueyasojiniji.

¹⁸ Jesu riucuaareeri:

—¿Teyano rootasanoteni?

Jesuuri na sequeree:

—Maja quia monu. Maja quiarta pueyano niquiocua quia numuetucunu. Maja quia nohuasenu. Maja quia saquiri-ojotanu tamonuucua quia sapojonuta. ¹⁹ Quia que, quia nucua tojijia quia quiriquia. Maja nojori quia rerequetenu. Mariyata quiarta pueyano quia paniri taa quia paniyacuaa tama quia cuaqueyajaajani.

²⁰ Mashajaari Jesu sequeree:

—Janiyacuaajaari puetunujuanaa nio tojijia quiquiaari cua naatuajajinijini. ¿Casaa cua miiniutianiya socuani?

²¹ Jesuuri na sequeree:

—Quiaa jaara seetanujuanaa maninia quiniucua jiaa-tiaa Pueyaso niquiara, quia quiaarohua quia tiajinia. Quia niqutiojore puetunu quia casamijianaa cumaneecara. Na nuhuaji, casamijuniucua quia niqutiojore nareja quia cumaneeca. Naacuajitij, quiaari queraatia casami jitianu-taniya jiyocuaaanu. Na nuhuaji, quiocua nimiohua cutara, cua tojijia quia quiniuria.

²² Na tojishacari naa Jesu sequesantej, mashajaari taraa-tia quiaarohua jiyanoehua casamiriaca na quiniucua.

²³ Jiyacaritij, Jesuuri canaa sequeree:

—Seetanujuanaa nia sequeyanijia, jiyanoehua jiyajene-taari pueyano tojiniuria Pueyaso, na pueyano na quini-uria, cuno pueyano jaara puera jiyanoehua casamiriaca quiri.

²⁴ Pueyanaa, ¿camelloteeri na naata cusupuetaja cuhuoco tamajiria tajiniu? Maja na naata. Cua tojitiare. ¡Socua jiyanoehua jiyajenetaari casamiriaca pueyanora, Pueyaso pueyanora na jatanishaanura!

²⁵ Canaa tojishacari naa Jesu sequesantej, canaari jiyanoehua jiuujiatereni. Canaari na nequesotareeni:

—¿Canteeri Pueyaso pueyanora jiyatesaanutaniya socuanitioj?

²⁶ Jesuuri canaa shootiaree tacuriitia. Canaa sequereeri:

—Pueyari maja na naata tama na cuaqueyajaaja jiyatenu Pueyaso muerasu nojori quiniuria. Pueyaso cutaraari na naata na miiniu. Nojuajaari cumaacaraca puetunu na pan-ishanojuanaa na miiniuria.

²⁷ Pedroori Jesu sequeree:

—¿Canaarijiataj? Canaari puetunu canaa casamijianaa tiujiaquiaarini canaa rupuenura quiajaniya. ¿Casaa canaa masenutaniyarinjia?

²⁸ Jesuuri canaa riucuaaree:

—Seetanujuanaa nia sequeyanijia. Nio jiya maniniushitishacariuhua, janiyari cajiniutianiyani jiyaniijia cajitiujinia puetunu cua Quejiniji shanohua cua cumaacatajanaa. Jiyacaritij cua pueyanaa, niaari mariyata cajitijosaanutaniya doce jiyaniijia cajitiucuaajinia. Niaari pa supuetana Israel doce niqiuohuacuajinio caneno pueya nequesoreenaa quiniutianiya. ²⁹ Cua pueya tojiniuria janiya, noojiaqueya nojoriinjiniioori na tia tiujanutaniya, tapueyocuaca, na rimiatuhua, na que, na nucua, necohua, na cuhuariquiano. Canapuate naa tiujiaquiaa na tojiniuria janiyani, cuno pojoriiri Pueyasojiniji socua jiyanohua queraatia masenutaniya nojori tiujiasanojiniji. Nojoriiri pueyaracaanu shuquiriaatia quiijaca quiniutianiyajuhua, shaajeyashijiaca. ³⁰ Saniniuujia, queraatia tojishano pueyari Pueyaso shocotasano quiniutianiya na tojtiaashijiaca nojori quiniucua. Naajuhua, mijiria, queraatia pueyari juhua shocotasano pueya quiya Pueyaso niishiyashijiaca pueyara. Cuno pojori jiyanishano najuhua quijiacani, nojoriiri Pueyaso shuquiritasano pueya quiniutianiya cutara.

20

Jesu pohuatasano cuhuariquiajia poonitijosano pueyajiniji

¹ 'Socua cua tojiri taa Pueyaso miiquiaa na pueyani. Nojuajaari na pueya miiquiaa taa tamonu cuhuariquia camaru miiquiaari na poonitijosano pueyacuaani. Cuno cuhuariquia camaruuri quiaquiaari tariquiicuaji pueya na pajenura na uva cuhuariquiajia nojori poonijionura. ² Cuhariquia camaruuri pueyata pocoojoquiaari taa cumaneeca na niqutionutaniya cuno juuca nojori poonijosanojinijini. Poonijionaa pueyari na sequeree: "Maniniacuaajaari taa quia sequereecuajani". Na nuhuaji, cuno pueya jiyaroreeri uva cuhuariquiajia nojori poonijionura. ³ Pananu tacasacari, cuhuariquia camaruuri tohuataquiaariuhua na tiajiniji. Jiyacaritij, socua tamasaca pueya niqishiiri juhujaniya quiyano tiaca jiuujiajia curotasano cajitiucuaajinia. ⁴ Cuhariquia camaruuri nojori sequesee: "Nia quiaarejuhua, cua uva cuhuariquiajia nia poonijionura. Janiyacua cumaneeca nia niquitiorohua nia poonijionu samini". ⁵ Naacuajitij, nojoriiri quiojoquiaari cuno cuhuariquiajia poonijionurajuhua. Na camaruuri

socua tohuataquiaariuhua panacari. Socua tamasaca pueya niquishiiri juhuajaniya quiyano tiaca jiuujiajinia curotasano cajitiucujinia. Nojori sequereejaaariuhuj nera nojori poonijionura cuno juuca. Pananu mueecosacari, socua pueya riuriataquiaariiri. Nojori jiyaroree poonijionuucuaariuhuj. ⁶ Tariucua pananu piriuushacari, na camaruuri socua tohuataquiaariuhua. Socua tamasaca pueya niquishiiri tiaca jiuujiajinia curotasano cajitiucujinia najuhuana quiyano. Nojori sequereeri: “¿Casaara nia quiojiaquiyaree poonijionuucuanii? ¿Casaa nia miya niyani? Niaa mariqui poonijiore”. ⁷ Nojoriiri na riucuaaree: “¿Canaatucua taa poonijioreni, canaa jaara pajeshiyaquiri poonijionurani?” Cuhuariquia camaruuri nojori sequeree: “Nia quiaarequi cua cuhuariquiajinia nia poonijionura. Janiyacua nia poonijionu sami cumaneeca nia niquitiorohuani”. ⁸ Pananu tiuquishacari, cuhuariquia camaruuri na casami cojuana sequeree: “Cua poonitijosano pueya quia piiri miji, nojori rerejonura. Na nuhuaji, cua sequesano cumaneeca quia niquitiojore puetunu nojorijanaa taa cua sequeree coteenujanaa quiria poonijionaacuajani. Majaari rimiajata nojori niquitiojonu. Coteenu quia niquitiojore tariucua pananu piriuushacari cua jiyaramiquishano. Naa quia niquitiojore puetunujuanaa. Quiocua naa tucuatate niquitiojonu noo pojorijihuaj, canapuete tariquicuajii coteeree poonijionucujani”.

⁹ Jiyacaritij, tariucua pananu piriuushacari poonitijosano pueyari nijomaa. Puetunu nojorijanaari cumaneeca niquitiosaaree taa cuhuariquia camaru coteenujanaa tariquicuajii poonijionaa pueya sequequiaaricuajani. Majaari rimiajata nojori niquitiosaanu quiquiaari cumaneeca, nojori poonijionu sami. ¹⁰ Na nuhuaji, coteenujanaa poonijionaa pueyari sequesaaquiaari na cumaneeca nojori masenura. Nojoriiri jiyaniquiaari nojori naasucuaari socua cumaneeca niquitiosaanutaniya rupaquijia poonitijosano pueyajiniji. Nojoriiri saaja niquitiosaaree taa cuhuariquia camaru sequeree nojori cuno juucacuajani. ¹¹ Nojori masacari na cumaneeca, nojoriiri cuhuariquia camaruta juaaquioree. ¹² Na sequetureeri: “Cuno pueyari saaja rupaquijia poonijioree. Quiaari nojori niquitioeree taa quia niquitioeree canaacuaani. Canaari pananucari cateree cutarani, pueyaraaanu canaa poonijiosacari”. ¹³ Cuhuariquia camaruuri tamonu nojorijinijinio sequeree saaja: “Sanajanaa, maja sesa cua miiniu quirii quiajaniya. ¿Majateeri quia niishiniu, paa jaara tariquicuajii pocoojoriquiaatej, janiyari juhuacarijia quia sequereeni janiyari naa cumaneeca quia niquitio-

taniyani? Quiaari cua riucuaaree: ‘Maniniacuaaja’. ¹⁴Naaratej, quia jiyataarohua quia cumaneeca quia tiajiniohua. Janiyacuajaari naa niqutionu paniriquiaa tariucua pananu pir-iuushacari cua poonitijosano pueyani, taa cua niqutione quiajaniyacuaani. ¹⁵¿Majateeri cua naata miiniu tama cua panishanojuaaja tama cua cumaneecatajaaja? ¿Quiaateeri socua cumaneecaacua jiaatiajara quiqumi, capora cua quini-uucua?”

¹⁶Na nuhuaji, Jesuuri naa sequequiaarijuhuaj, na pohu-atasanojiniji na niishitiojonura:

—Naa quiniutianiyari taa cua sequeriquiaacuajani: canapuete nuhuajishanaani, nojoriiri coteetanaa quiniutianiya. Naajuhuj, cante coteetanaani, nojoriiri nuhuajishanaa quiniutianiya saniniuujia. Queraatia masuusano pueyari quiya. Saniniuujia, secajaari saquiriojosano quiya nojorijinijinio.

Jesu camishacarihua pohuatanu taa na mosaanutaniyani
(Mr 10.32-34; Lc 18.31-34)

¹⁷Tari Jesu quiasacari Jerusalén tiacajiniara, Jesuuri canaa na doce saquiriojosano pueya piirii tamocora nuu shuri-uquicora, tamajaaja canaata na pocoojonura. Canaa sequereeri:

¹⁸—Cua tojiri. Niaacuajaari niquiya paa tari Jerusalén tiacajiniara tacataani. Janiyari tii niqutionaanutaniya pueyacuara secojonaa jiyaniijianucuaani, Moisés Naajioneejiniji niishitiojonaanio. Nojoriiri cucuara saquiriojotanutaniya nojori sapojonuta cua mosaanura. ¹⁹Nojoriiri cua niqutionutaniya taucua. Cuno pojoriiri cua rerequetenutaniya. Cua majacutunutaniyari. Na nuhuaji, niyacutesanojinia cua teetetunutaniyari tii cua cusonura. Jiuujianaraca juucajinia janiyari macujiniji samiitianutaniuhuanii.

Santiago, Juan nucua sequesacari Jesu, maninia na miini-uria necohua
(Mr 10.35-45)

²⁰Jiyacaritij, Zebedeo niquiocuaari Jesuucua catecanoquiaari necohuata. Jesuucua mojuquetaseeri Jesu na sequenura nera na miiniuria na panishano. ²¹Jesuuri na sequereeri:

—¿Casaa quia paniyani?

Jesu riucuaereeri:

—Quiaa jaara Jiyaniijiaara jiyatesaare, quiocua cua niqutiohua cajitijiore quia shuriucua, Santiago, Juannio. Tamonu cuara cajiiria quia miaquetajara, tamonu quia muenecara, quia naacuna nojori quiniuria, juhua jiyaniijianucuaajuhuj.

²² Jesuuri Santiago sequeree, Juannio:

—Majaari nia niishiniu casaa nia maseyani. ¿Nia naatateeri rejeretanu naquiya miiniu taa cua miishaanutaniyacuaani?

Nojoriiri saaja Jesu riuquaree:

—Taaquiriirinij. Canaa naatacuaaquiniatejaj.

²³ Jesuuri nojori sequeree:

—Seetanujuanaa, niaari naquiya miishaanutaniya taa cua miishaanutaniyacuaani. Janiya cutaraari maja cua naata sequenu niajaniya, cante cua miaquetajara cajiniutianiyani, cua muenecarano, Jiyaniijia cua quishacari. Saaja cua Que cutaraari tari na saquiriojosano pueya sequenutaniya cua shuriucua nojori cajitiuniuria, teyano pojoriicuaaji na jeenucuaquiaaricuaajani.

²⁴ Canaa, narta saquiriojosano pueyani, canaari Juan juaariini, Santiagonio, canaa tojishacari nojori masesano juucua. ²⁵ Jesuuri saniniuujia canaa sequeree:

—Miji pueyanaa. Niya cua tojitiasee. Niaacuajaari niishiya, mijiria jiyaniijianucuaari na pueya poonitijioquiaa juhua tama na seyajaaja. Mijiria camarucuaari taraatia miiquiaa na pueya, nojori na miitishacari puetunu na panishanojuanaa. ²⁶ Niajaniya saniniuujia, majaari naa nia quiniu quiniutianiya. Naacujitij, cante tojishano pueyano quiniu paniya niajanijajinijinioni, cuno cuaara quiiria narta Pueyaso pueya cumaquinia. ²⁷ Cante nia jiyaniijia quiniu paniyani, cuno cuaara quiiria juhua nia seru, maninia na miniuria niajaniya, naatej, taa cua miiquiaa niajanijiyacuaani.

²⁸ Janiya cutaraari Jiyaniijiani. Naajaa, majaari mijiria cua ninu quiquiaari pueya cua poonitijionura quiria, shuquiriaa cua quiniuria tamajaaja. Niquiaari cutaranijia pueya cua naacunura, tama janiyajaaja mosaanura pueya niti, queraatia pueyacuaji cua ritianura Sesaaca.

Jesu jeecasacari caapiqui cariojuaru namijiaa

(Mr 10.46-52; Lc 18.35-43)

²⁹ Jesuta canaa quiasacari Jericó tiacajiniji, jiyanohua queraatia pueyari Jesu nuhuajiriquiaa. ³⁰ Jiyacaritij, caapiqui cariojuaruuri nuu shuucuaji cajitiuriquiaa. Nojori niishishacari Jesuuri nojori tajiriquiaa, nojoriiri nakanu coteequiaari:

—¡Jiyaniijianaa! ¡Canaacua quia taraajere! Quiaacuajaari Pueyaso Jiyarosano, Jiyaniijia quia quiniuria pa supuetanaa jiyaniijia David niti.

³¹ Pueyari nojori juaarii nojori sanaajetanura juucua. Nojoriiri saaja jiyacatequee nacanura:

—¡Jiyaniijianaa, canaacua quia taraajere, Pueyaso Jiyarosanonaa!

³² Jesuuri socua nujuasee. Nojori sequereeri:

—¡Miji! ¿Casaa nia paniya cua miiniuria niajanियarani?

³³ Jesu riucuatereeri:

—¡Jiyaniijianaa, canaa namijiaa quia jecare!

³⁴ Jesuuri nojoriicua taraajeree. Nojori namijiaa quiareeri.

¡Nojoriiri niquijiacara quiquii! Na nuhuaji, Jesuucua sacuaa-ree canaataari.

21

Jesu tiuquishacari Jerusalén tiacajinia

(Mr 11.1-11; Lc 19.28-40; Jn 12.12-19)

¹ Canaa quiojosacari, canaari socua tiuquiiijosee Betfagé tiacajiniani, Olivo nacuhua tuhuananu shuriucua. Cuniqiji, majaari puera tucuacaanu quiquiaari Jerusalén tiacajiniara. Jiyacaritij, Jesuuri caapiqui canaa na pueyajinijinio sequiquiaari:

² —Cuno tiacajinia nia quiaare, noj pocuaji niquishiyatej. Niaari tii riuriatanutaniya niquiojuaraca burro morotasano. Niocua na samaacartasee. Niocua miji na jaatucuyarohuanos, necojuataja. ³ Pueya jaara nia tenujunu paniri nocuaji, niocua na sequere: “Jiyaniijia na paniya. Ritia na tacatonutaniuhuacuaja”.

⁴ Naa tohuatteequiaariiri tariucuaaanu Pueyaso sequesano caminiujiunia sequesano, nojuaja jaara naa naajio- taquiaari Jerusalén tiacajinia quiniaa pueyara:

⁵ “Sión tiacajinia quiniaa pueya nia sequere: ‘¡Nia niquiri! Nia Jiyaniijiaari burrojinia niaacua niya. Maninia pueyanoori, juayashijia. Burro nijinia cajiyano, neco- juaacuanio’ ”.

⁶ Jiyacaritij, cuarta Jesu pueyari quiaquiaari. Nojoriiri naa miiquiaari taa Jesu sequequiaari nojoricuajani. ⁷ Nocua jaatucutuquiaariuhua burroori, necojuataja. Na nuhuaji, Jesu cajijia, canaari canaa tucuaque toqueya niojoquiaari burro nijiniani, necojua nijiniano. Na nuhuaji, Jesuuri na nijinia cajirii. ⁸ Jiyanohua queraatia pueyari tii quiriquiaa. Nojoriiri na tucuaque toqueya muevoquiaari nucuaco Jesu- ucuaaji. Tamasacaari jaamasucua piyotaquiaari Jesuucuaaji niojotasocoriquiano nucuaco, nuu niquishaanura shanohua, juhua cutara jiyaniijiaacuaji maniniushitishano. ⁹ Jesu puetanaa, mariyata na nuhuaji nijionajuhua, nojoriiri naa coteequiaari nacojonura: “¡Pueyanaa, nioori pocuaji Tacuna! ¡Nojuacuajaari pa Jiyaniijia, pa supuetanaa jiyaniijia David niti! ¡Cuaara quiiria shuquiriaatia pa Pueyaso jiyarosano! ¡Jiyanohua maniaari pa Pueyaso! ¡Cuaara shuquiritasano quiiria!”

¹⁰ Jesu tiuquishacari Jerusalén tiacajinia, puetunu tii quiniaa pueyajanaari jiuujiatecoquiaari. Sequetureeri:

—¿Cantejaara cunoni, tiuquiyani?

¹¹ Jesuta tiuquiiijionaari nojori riucuaaree:

—Nojuacuajaari Jesu, Pueyaso sequenu panishano camini-
ujiunia, Nazaret tiacajinijinio pueyano, Galilea jiyajinijinio.

Jesu jaacasacari seya niqutiojonaa Pueyaso Secojojua tiacariji

(Mr 11.15-19; Lc 19.45-48; Jn 2.13-22)

¹² Na nuhuaji, Jesuuri Pueyaso Secojojua tiacari mataca-
jinia tiuquiquiaari. Tii pueya niquishiiri seya niqutiojiyano.
Jesuuri puetunu nojorijianaa tohuatanijiooree. Cumaneece
tacatojojuaca juhuacutucua caponeetareeri, tee pueya niq-
tiojoriquiaa taucuaa cumaneeca, Pueyaso Secojojua tiajinia
niqutiojosocoriquiano cumaneecaracuajani. Mococoonu
niqutiojonaa cajitiucua caponeetareejaariuhuj, tee moco-
coonu niqutiojosaariquiaacuajani Pueyasoocuaara catijiaso-
coriquiano. ¹³ Jesuuri nojori sequeree:

—Pueyaso sequesano cuajaari naa naajiotasaaquiaari tari-
jia:

“Cua quiquioori sesojosaanutaniya Pueyaso Secojojua tia”.

¡Niaari saniniuujia na jiyatecanu nohuasenuujuaca
quiquiora!

¹⁴ Secojojua tiajinia na quishacarijia, cariyojuarujuri
pueya, mariyata shipiiniquiujiuniaa pueyari nocua
nijioquiaari. Jesuuri nojori naatanijiooree. ¹⁵ Pueyacuara
secojonaa jiyaniijianucuaari Moisés Naajioneejiniji
niishitiojonaata Jesu shootiariquiaa cusosuhua
naatanijiyano. Jiyacaritij, naatujooriiri Secojojua tiajinia
naa nacooriguiaa Jesujiniji: “¡Pa supuetanaa jiyaniijia
David niquihuacuajinio supueno pueyano! ¡Nojuajaari pa
Jiyaniijia!” Canaa Judiocuaca jiyaniijianucua niquishacari
naa Jesu miishanotej, mariyata nojori tojishacari naatujoori,
nojoriiri juaaquioree. ¹⁶ Nojoriiri Jesu nequesotaree:

—¿Quiaate naatujoori tojiya casaa nojori sequeyani? ¡Nojori-
iri jiyaniya quiaari Pueyaso Jiyarosano!

Jesuuri nojori riucuaaree:

—¡Taaquiririnij! Na tojiyacujaniijia. Maniniacuajaari no-
jori sequesano. ¿Majateeri nia serojonu quiquiaacuaja tariu-
cuacaanu Pueyaso Rupaajinia naa sequesanotej:

“Quiaari naatujoori niishitirii conaajanio, seetanujuanaa no-
jori maniniuhuaqueetanura quia Jiyarosano”?

¹⁷ Naa nojori na sequenu nuhuajitij, Jesuuri nojori tiuji-
aquee. Jerusalén tiacajiniji quiaqueeri canaata Betania tiaca-
jinia. Canaari tii maqueseeni.

Jesu sesacasacari higo naana, muetuhuo na quiniuucua
(Mr 11.12-14, 20-26)

¹⁸ Tariquicuaji, Jesuuri Jerusalén tiacajiniara tacateriquiohua canaa na saquiriojosano pueyata. Jesuuri miaajeriquiaa. ¹⁹ Higo naana niquiriiri nuu shuriucua nujuaano. Nocua canujiyareeri. Shaanoori quiriquiaa, saa na jaamasucuaaja. Cunora, Jesuuri naana sequeree:

—Majaari socua quia jajau sanishaanu quiniutianiya.

¡Naanaari ritia sorequee! ²⁰ Naa canaa niquishacaritij, canaari jiuujiatereeni. Canaari Jesu nequesotareeni:

—¿Taateni? ¿Casaara higo naana sorequee ritiani?

²¹ Jesuuri canaa riucuaaree:

—Seetanujuanaa nia sequeyanijia, niaa jaara Pueyasocua tiuujiaa quiri nioojia nia niquijioteyaquiniutia nocuaji, niaa maara socua cutara miishano miiri, socua jiyajeneta cua miishanojiniji. Naacujitij, niaa maara nia sequesano niquiri niaa jaara nio tuhuananu sequere: “Quia jaataare shoniniacu caminiajinia”. ²² Puetunujuanaa nia masesano nia secojosacari Pueyaso, niaa jaara setanujuanaa nocua tiuuri, niaari nia masesano masenutaniya.

Judiocuaca jiyaniijianucua nequesoreesacari Jesu, cante na jiyaronani

(Mr 11.27-33; Lc 20.1-8)

²³ Jesuuri Pueyaso Secojoua tiajinia tiuquiquiaari. Tii pueya niishitiojoriquiaari. Jiyacaritij, canaa Judiocuaca jiyaniijianucuaari nocua catecanoquiaari. Nojoriiri pueyacuara secojonaa jiyaniijianucua quiquiaari, canaa Judiocuaca camarucuanio. Nojoriiri Jesu nequesotaree:

—¿Canteeri quiajaniani, naa quia miiniuriatej? ¿Canteeri quia jiyatecanu juhua canaa jiyaniijia quia quiniuriani?

²⁴ Jesuuri nojori sequeree saniniuujia:

—Janiyari nia nequesotanutaniya saniniunijia. Niaa jaara cua riucuaare, janiyacua nia sequerohua saniniunijia cante cua jiyaroquiaari naa cua miiniuriani. ²⁵ Naacujitij, cua riucuaare coteenu. ¿Cante Tiuquinijiona Juan jiyaroquiaari pueya na tiuquinijionurani? ¿Pueyasotee? ¿Tama pueyajaaja soj?

Jiyacaritij, tama nojoriijaarijia juayonuutano coteequiaari jiyasohuaja. Tama sequetooreejaarijia:

—Paa jaara na riucuaareni: “Pueyaso na jiyaroquiaari”, pa sequerucua: “¿Naatee? ¿Casaara na niishitiojosanoocua nia tiuyaquiquianucuaarini?” ²⁶ Saniniuujia, paa jaara sequerene: “Nojuajaari nareja pueya jiyarosano quiquiaari”, ¡puereeta quiniutianiyari pajaniyara! Paacuaajaari niishiyani

puetunu pueyajanaari sequequiaa Tiuquinijiona Juanna seetanujuanaa Pueyaso sequesano caminiujiunia quiquiaari.

²⁷ Naaratej canaa Judiocuaca jiyaniijianucuaari Jesu riucuaaree:

—Maja canaa niishiniu canariquitijia na jiyaroquiaaritiijiaj.

Jesuuri nojori sequereee:

—Janiyajuhuj, majaari cua sequenu quiniutianiya nianianiya cante cua Jiyaronani, naa cua miiniuriatej.

Jesu pohuatasano pueyano niquiohuajiniji

²⁸ Jesuuri naa nojori sequerohuacuahuaj:

—¡Cua tojitiare! Tamonu pueyanoori caapiqui niyanuraca quiquiaari. Nojuajaari jiyapueranu jiyaroree: “Quiyanunaa, quiria quia poonijiosee uva cuhuariquiajinia quiar-ijia”. ²⁹ Neyanuuri saaja na riucuaaree: “Maja cua quianu paniniu”. Na nuhuaji, niishiriojorohuari. Quiaqueeri. Poonijioseeri. ³⁰ Na queeri naa na nuhuajishana sequereehuj. Neyanuuri na riucuaaree: “Maniniacuaja, cua quena. Janiya quianutaniyani”. Na nuhuaji, majaari na quianu quiquiaari saaja. ³¹ ¿Taa nia sequeyani pueyanaa? ¿Teyano cuno caapiqui necohuajinijiniote na que tojijia quiquiaarini?

Nojoriiri Jesu riucuaaree:

—Na jiyapueranucuj.

Naaratej, Jesuuri nojori sequereee:

—Seetanujuanaa nia sequeyanijia. Cumaneeca masejonaa pa pueyajiniji Roma tiacajinia quijia jiyaniijiarani, mariyata paanatujurinio, cuno nia soosano pueyari nia shocotan-taniya Pueyaso muerasura nojori quiniuria. ³² Cua tojitiare casaara naa cua sequereee nijaniyani. Tiuquinijiona Juanri niquiaari na niishitiojonura juucua nijaniya, maninia nia quiniuria Pueyaso niquiara. Majaari nia tiuuniu quiquianu nocua. Niaari saaja na tojiyaquiquianu. Cumaneeca masejonaa nia soosano pueya cutaraari nocua tiu-uquianu, paanatujurinio. Nojoriiri na tojitajara quiquianu. Niaacuajaari na niquiquianu taa cuno sesa miijiacaa pueya maninia pueyara jatacanuni. ¡Nijaniyarijiataj, majaari nia tacatonu quiquianu nioojia sesa nia quiniujiniji! Niaari saaja Tiuquinijiona Juancua tiuyashijiacaa quiquianu.

Jesu niishitiojosano cuhuariquia cojuanaa sesa miijiacajiniji

(Mr 12.1-12; Lc 20.9-19)

³³ Socua tamonu cua pohuatasano nia tojiri. Tamonu pueyanoori cuhuariquiajinia uva nattooquiaari. Maninia mataboquiaari puetunu na shuriuquicojuanaari maja casaa tiuquitianura nocua. Saajia quejaquiaarijiaariuhuj

uva rapijiojuara, na caaca reratesaanura. Jiyaconajara tiaquiaarijiaariuhuj, cojuana niquijiaara tiji nohuase-jojuaacuaji. Na nuhuaji, na camaruuri tamasaca pueya niquitioquiaari na cuhuariquia, nera nojori cojuasocoriquiano. Na nuhuaji, na camaruuri tucuacaanu quiaquiaari pueyaracaanu camueenujunura. ³⁴ Jaara tari quiquiaari uva carojotasacari, saniya cuhuariquia camarujuanaari na seya jiyaramiquiquiaari na cuhuariquia cojuanaa pueyacua. Nojori jiyaramiquiquiaariiri nojori masenura cuhuariquia cojuanaa carojotasanojiniji, taa nojori pocoojoquiaari taricuajani. ³⁵ Cuhuariquia cojuanaari cuhuariquia camarujuanaa jiyaramiquishano seya quiooree. Niquiriyatu majacutureeri. Tamonu moturee cutaraari. Tamonu jacuturee saitiaari. ³⁶ Na nuhuaji, na camaruuri socua queraatia seya jiyaramiquiquiaariuhuj. Nojoriiri naquiya miishaaquiaarijiuhuj.

³⁷ 'Na nuhuaji, na camarujuanaari tama sequereeaaja: "Jiyaroreera cua niyanu. Maja cutara nojori rerequetenu quiniutianiya cua niyanu". ³⁸ Cuhuariquia cojuanaa jaara niquiquiaari camarnujuanaa niyanu nojoriicua niyano, nojoriiri tama sequetooreeaaja: "¡Cunocujajai quiquiaari cuhuariquia camaru quiriqiano na que niti, na que jaara shaajee-quee! ¡Pa morej! Naacuajitij, pocua nio cuhuariquia camaruhua quiquiini". ³⁹ Naaratej, camarnujuanaa niyanu tiuquishacari, cuhuariquia cojuanaari na quiaree. Na jaatucutureeri cuhuariquiajiniji tamama. ¡Cuniqui na motureeri!

⁴⁰ Naa Jesu pohuatanu nuhuajitij, nojuajaari cuno canaa Judiocuaca camarucua nequesotaree:

—¿Taa nia sequeyani pueyanaa? Cuhuariquia camaru jaara tiuquiriohua na cuhuariquiajinia, ¿taa na miiniutianiya cuno cuhuariquia cojuanaani?

⁴¹ Jesu tojitianaari na riucaturee:

—¡Cuno cuhuariquia camaruuri nojori puecoonutaniya, nojoriicua na taraajeyaquiniutia! Na nuhuaji, tamasaca pueya sequenutaniya cutaraari, nojori cojuanura nera na cuhuariquia. Nojori cutaraari cuhuariquia camaru panishano niquitionutaniya nojori carojotasanojiniji.

⁴² Jesuuri nojori sequeree:

—Jaa, naa miiniutianiyari. ¿Majate nia serojonu quiquiaaricua nio, tariucuacaanu Pueyaso Rupaajiniani?:

"Pueyari saitia tiariquiaa. Nojoriiri tamonu saajia jiyaniquiaari saajia sesarujajau naasucua. Cuno saajiacuajaari socua panishano saajia quiquiaari. Jiyaniijajanaari naa na jiyatequiaari. Cuno saajiata

tiaree maninia cutaraari. Pueya niquishacari, jiuujiatecoreeri”.

Naa naajiotasano quiyacuajaari.

⁴³ Camarucuanaa, nocuaji nia numooteyanijia, Pueyasoori nia ruuretanutaniya maja tari nia quiniuria na muerasu jitianaa. Tamasaca pueyari nia niti jiyatesaanutaniya cutara, nojori jitianura maninia Pueyaso muerasurano. Nojoriiri maninia Pueyaso tojitianaa quiniutianiya cutara, Pueyaso muerasu canenura jiyanohua nera, juhua cuhuariquia-jiniji senoosano queraatia. ⁴⁴ Cuno saajiajiniji saniniuu-jia, pueyano jaara cuno saajiaacua tiyare, nojuajaari juhua rashiquijiniutianiya. Cuno saajia jaara tiyare pueyanooqua, jacanaura na miiniutianiyari.

⁴⁵ Pueyacuara secojonaa jiyaniijianucua, mariyata Fariseocuaca tojitiasacari naa Jesu pohuatasano tej, nojoriiri niishiquii Jesuuri nojorijiniji pohuatariquiaa miriqui. ⁴⁶ Naaratej, nojoriiri Jesu quianu panirii juucua, nojori juaaniutia. Nojoriiri saaja puereriquiaa pueya. Pueyacuajaari sequeriquiaa Jesuuri seetanujuanaa Pueyaso sequenu panishano caminiujunia quiquiaari. Naaratej, jiyaniijianucuaari jiyamitia puerecoriquiaa Jesu nojori quianura.

22

Jesu pohuatasano miriqui camishacari queranacunujiniji (Lc 14.15-24)

¹ Na nuhuaji, Jesuuri socua niishitiojoquiaari miriqui pohuatasano ta. Naa pohuataquiaariti:

² —Pueyasoori pueya masuya nojoritia na quiniuria shuquiriaatia, taa tamonu cutara jiyaniijia miiquiaari mijiriacaani. Cuno jiyaniijiaari shuquiriaatia quiniu paniriquiaa queraatia pueyata, neyanu camishacari. Naaratej, jiyaniijiaari queraatia sumatutequiaari, queraatia pueya miaquesocoriquiano. ³ Na nuhuaji, na seya jiyaramiquiriiri na masuusano pueya numootenura nojori niniuria queranacunura. Masuusano pueyari maja na niniu paniniu quiquiaari saaja. ⁴ Jiyaniijiaari socua tamasa na seya sequeree: “Cua masuusano pueya nia numootejocoo. Nia sequeese: ‘Jiyaniijia nia sashiya. Puetunujuanaari tari jeenucuasano nia queranacunura. Tari puecoosaaree na juyaca, na shiyoshitishano seyano. Tariucua rariyosanoori quiya. Ritia nia nimia. Nia miaquenuusee’”. Naa na seya na rootanu nuhuajitij, jiyaniijiaari nojori jiyaramiquirii.

⁵ Masuusano pueyari saaja tojitiaaquirii. Puetunujuanaari tama na panishanojuaja miiriquiaa saaja. Tamonuuri

na cuhuariquiajina quiaaree. Tamonuuri na casami niqutiojosaqui quiaareecujua. ⁶ Tamasacaari saniniuujia jiyaniijia seya quiooree. Jiyanojua naquiya nojori miiriiri. Na nuhuaji, nojori puecootureeri. ⁷ Jiyaniijia niishishacari, jiyanojua juaariiri. Nocuaji na soldadojua jiyaramiquiriiri cuno monaa nojori naminiuria saniniuujia, nojori tiaca na catijiatanurajuhuj. ⁸ Na nuhuaji, jiyaniijiaari na seya sequeree: “Puetunujuanaari tari jeenucuasano pa queranacunura cua niyanu camishacari. Cua masuusano pueyacuajaari saaja cua ruuretareeni. Namitia majaari nojori nijionu quimiaa, saaja cua rerequetajaca nojori quiniuucua. ⁹ Quiarijia cutara, nia quiaare nuu tunequetajajinia, tee queraatia pueya tajiniuucua quiaacuajani. Nia masuure puetunu nia niquishano pueyajanaa”.

¹⁰ Na seyari quiojoquiaari tiaca nucuaco. Nojoriiri puetunu na riuriasano pueyajanaa rerejoteree, maninia pueya, sesa pueyano. Queranacunuusaquiiri mishiquiaari masuusano pueyata. Camarnu seyari puetunu pueyajanaa cushiyotequiaari camishacari cushiyosano toqueya, nojori tiuquitasacari tiaco queranacunura.

¹¹ Na nuhuaji, jiyaniijiajanaari tiuquiquiaari masuusano pueya na niquniuria. Tamonu pueyano niquishiiri camishacari cushiyosano toqueeju. ¹² Jiyaniijiaari na sequeree: “Pueyanonaa, ¿taa quia tiuquimiaa camishacari cushishano toqueejuni?” Pueyanoori sanaa na tojiri quiaa. Majaari na riucuanu quirii. ¹³ Cunora, jiyaniijiaari na seya sequeree: “¡Nia morojore na cashacucua, na numatucuanio! ¡Niocua na jartarohua carijiniacuma ninishiqui! Tii sapuenutaniyari. Na quiaa miaquenutaniyajaariuhua na noonuta, naquiya na miishacari”.

¹⁴ Naajuhuj pueyanaa, Pueyasoori queraatia pueya masuya quiarijia na muerasu nojori quiniuria. Saniniuujia, secajari saquiriojosaanutaniya nojorijinijinio seetanujanaa na muerasura nojori quiniuria.

Jiya jiyaniijia cuara niqutiojosaaria na sequesano cumaneeca

(Mr 12.13-17; Lc 20.20-26)

¹⁵ Na nuhuaji, Fariseocuacaari quiojoquiaari Jesu shuricuajia tama nojori niishitiojotoonurajaaja. Nojoriiri Jesu pocuatenu paniquiaari sesa juucua, nocuara nojori saquiriojotanura. ¹⁶ Na nuhuaji, Fariseocuacaari na niishitiojosano pueya jiyaramiquirii Jesuucua, jiyaniijia Herodes panijiaa pueyata. Herodesri jiyaniijia César jiyatesano quiquiaari

Judea jiyajinia jiyaniijia na quiniuria. Fariseocuaca jiyaramiquishano pueyari Jesu sequesee:

—Niishitiojonanaa, canaari niishiyani quiaari maninia pueyano. Majaari quia cuaracashijionu. Quiaari seetanujua-naa casaa niishitiojoquiaa cutara taate canaa naata maninia quiniu Pueyaso niquiarani. Majaari quia puerenu quiquiaa, pueya niquiara quia pohuatanura quia niishishano. Majaari rimiajata quia niquiniu pueya. ¹⁷ Naaratej, canaa quia se-
quere taa canaa miiniutianiyani. Paari sequesaaquiaarini pa cumaneeca pa niqutiojonura jiyaniijiajanaa Césarra, taa cuno tahue César sequequiaaricujani. Quiajaniyariuhuj, ¿taa quia sequeya saniniunijia?

¹⁸ Jesuuri ritia niishiquii, nojoriiri naa na nequeso-tariquiaa na sapojonuta. Nocujaji nojori sequereeri:

—Sapueni maninia quijiacanaa, ¿casaara nia saniniujiya naa janiyani? ¹⁹ Cua niqutiri nia cumaneetoj, cuno, jiyaniijia César sequesano pa niqutiojonura nojuajani.

Nojoriiri Jesu niqutirii cumanee. ²⁰ Jesu niquishacari cuno cumanee, nojori nequesotareeri:

—¿Cana naaquiti nio nocuani? ¿Cana sesate nocua naajio-tasanojaniuhuj?

²¹ Nojoriiri na riucuaaree:

—Jiyaniijia César naaquicujaja, na sesajuhuj.

Jesuuri nojori sequeree:

—Jaara naa quiritij, César nia niqutiojore tama na casaa-jaaja. Nojuacuajaari na camaru. Saniniuuja, Pueyaso nia niqutiojore nerano tama na casaajaaja. Nojuaja cutaraari pa camaru.

²² Nojori tojishacari naa Jesu sequesantej, jiuujiate-coreeri. Na tarinitiatoreeri. Quiojyarohuari.

¿Macunucuate samiitiaconutaniuhua?
(Mr 12.18-27; Lc 20.27-40)

²³ Cuno juucaja, Saduceocuacaari Jesuucua nijioquiaari. Nojoriiri jiyaniquiaari macunucua maja na samiitiaconu quiniutianihua. Naaratej, nojoriiri Jesu sequesee:

²⁴ —Niishitiojonanaa, supuetana Moisésri pa sequequiaari na naajiotasanojinia, pueyano jaara cusoyare mueyaju, na tarajanu cuara camirria mashiquio, mueya na mueratenura tarajanu niti. ²⁵ Tariija, tamonu pueyanoori niya quiquiaari.

Siete niqiuohuaraca quiquiaariiri, saa canuujua. Jiyapuer-anuuri camiquiaari. Na nuhuaji, shaajequiaariiri mue-tuhojua. Naaratej, na mashiquioori camitishaaquiaari ney-aca tarajanuta. ²⁶ Nojuajaari muetuhuojua shaajequiaariji-uhuj. Naaratej, neyaca tarajanuuri mashiquio camiquiaar-ijihuhuj. Nojuajaari mueyaju cusoquiaarijihuhuj. Naa cu-sonuquiaariiri puetunu cuno siete canuujuaana. ²⁷ Na nuhuaji, mashiquioori cusoquiaarijihuhuj. ²⁸ Saniniuujia, macunucua jaara samiitiacorohua, ¿teyano cuno siete neya-caajinijiniote seetanu neyacajanaa quiniutianiyani, puetunu cuno pojorijianaa jaara neyaca quiquiaari?

²⁹ Jesuuri nojori riucuaaree:

—¡Niaari jiyanohua jiyajeneya nia niishiyaquishacari Pueyaso Rupaajinia naajiotasano, Pueyaso cumaacanio! ³⁰ Macunucua samiiticosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Caya, maajinio, nojoriiri juhuajaniya quijiaca quiniutianiya juhua jiyocuacaanu quijiaca Pueyaso seya, maja camiyosano. ³¹ Socua cua tojitiare. Macunucuaari seetanujuaana samiitiacoriqianohua. ¿Majateeri nia serojonu quiquiaacuaja taa Pueyaso sequequiaari niajaniyacuajani? Naa sequequiaariiri:

³² “Janiyari nia supuetana Abraham Jiyaniijiani, nia supuetana Isaac Jiyaniijiajuhuj, nia supuetana Jacobo Jiyaniijiano”.

Naaratej, nia sequeyanijia, Pueyaso muerasu shaajecononi, nojoriiri maja macunucua na quiniu. Canapuete seetanujuaana Pueyaso muerasuni, nojori cutaraari pueyaracaanu quijiaca.

³³ Pueya tojishacari naa Jesu niishitiojosanotej, nojoriiri jiyanohua jiuujiateree.

Puetunu Pueyaso rootasanojinijijianaani, teyanote socua na pueya tojishocoriqianoni

(Mr 12.28-34)

³⁴ Fariseocuaca jaara niishiquiaari Jesu Saduceocuaca sanaajaree, nojoriiri Jesuucua nijioquiaari nojori saniniuujuniuria nojuaja, nojori nequesoreenuta. ³⁵ Nojoriiri jaarajaaja Jesu pocuatenu paniriquiaa sesa juucua. Tamonu nojorijini-jinioori Moisés Rootasanojiniji niishitiojona quiquiaari. Na saniniuujuniuria, nojuajaari Jesu nequesotaree:

³⁶ —Niishitiojonanaa, ¿Pueyaso rootasanojinijini, teyanote socua pa tojishocoriqianoni?

³⁷ Jesuuri na riucuaaree:

—Naa naajiosano quiyacuajaari:

“Quia Jiyaniijia Pueyaso quia paniri puetunu quioojiata-janaa, puetunu quia sohuanutajanaa, puetunu quia niishitiajatajanaano”.

³⁸ Niocuaajaari socua na pueya tojishocoriquiano Pueyaso rootasano. ³⁹ Tamonu na sequesanoori quera juhua nio-juhuaj. Naa sequeyari:

“Quiarta pueyano quia paniri taa quia paniyacuaa tama quia cuaqueyajaajani”.

⁴⁰ Puetunu Moisés rootasanojuanaa, mariyata puetunu tariu-cuacaanu Pueyaso sequesano caminiujiuniaa rootasanojuanaari nio caapiqui rootasanojinijicuaaja.

¿Cante Cristo supuetanani?

(Mr 12.35-37; Lc 20.41-44)

⁴¹ Fariseocuaca quishacarijia cuniqui, Jesuuri nojori nequesotaree:

⁴² —¿Taa nia niishiriojiya Cristojinijini? ¿Cante na supuetanani?

Nojoriiri Jesu riucuaaree:

—Pa jiyaniijiarano Cristoni, nojuajaari pa supuetana David niquiohuacuajinio supuenutaniya.

⁴³ Jesuuri nojori sequerohuacuahuaj:

—Taaquiriirinij. Jaara naa quiriritij, ¿niaateeri niishiyacuaja casaara David sequequiaari “cua Jiyaniijiaata” Cristocuaaarini, Pueyaso Sohuanu jaara na pocuatequiaari? Naa sequequiaariiri:

⁴⁴ “Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuaara quia paraa shocojotare quiocuajijiaatijia’ ”.

⁴⁵ ¿Cristotucua taa David niquiohuacuaji supuereni, David jaara Cristo jiyaniquiya na jiyaniijiaata?

⁴⁶ Nojoriiri Jesu niquitiaree sanaa. Nojoriiri maja na naata na riucuanu quiquiaari. Cuno nuhuaji, pueyari maja socua na nequesoreenu paniniu quiquiaari Jesu.

23

Jesu juaashacari Fariseocuaca, Moisés Rootasano niishitiojonaano

(Mr 12.38-40; Lc 11.37-54; 20.45-47)

¹ Na nuhuaji, Jesuuri tii quiniaa pueya sequeree, canaa na saquiriojosano pueyano:

² —Moisés Rootasanojiniji niishitiojonaa, mariyata Fariseocuacaari supuetana Moisés niti quiya, tariucuacaanu Pueyaso Rupaa nojori niishitiojonura. ³ Naaratej, nia tojitiare puetunu nojori sequesanojuanaa niajaniya. Saniniuujia, maja cutaraari nia miiniu taa nojori

miiquiaacuaani. Nojoriiri najuhuaana niishitiojoquiaa taa pueya miiniutianiyani. Majaari saniniuujia nojori miiniu tama nojori niishitiojosanojuaaja. ⁴ Nojoriiri tama nojori niishishanojuaaja rootaquiaa, maja saaja tariucuacaanu Pueyaso niishitiojosano pa supuetanaa. Nojori rootasano pueya miishocoriquianoni, cunoori juhua jiyanohua niiquia casaa pueya nitiasocoriquiano. Nojoriiri maja quenaaja na naacutanu quiquiaa na juaashiquia sacasaruta. ⁵ Nojoriiri puetunu na miishanojuanaa miiquiaa saaja pueya niquishocoriquiano, pueya shuquiritianura nojori. Nojoriiri Pueyaso Rupaajiniji naajiotasano cushitiaquiaa na jiniji morotasano, na numatucuaacuanio. Nojoriiri naa miiquiaa taa pa supuetanaa miiquiaaricuaani. Saniniuujia, nojoriiri najuhuaana socua puereetuucara na quiquiora cusupuequiaa pueya shootiasocoriquiano. Naajuhuj, nojoriiri na toqueecuaji sohuatacojua tunujutaquiaa taa pa supuetanaa Pueyaso tojitiajaca miiquiaaricuaani. Saniniuujia, nojoriiri puera tucuacujuara na tunujutaquiaa saaja pueya niquishocoriquiano, pueya shootianura nojori. ⁶ Nojori jaara masuusaare tamonu tiajina queranacunura, nojoriiri secooquiaa socua panishano cajitiujinia nojori cajitiuniuria tia camaru shuriucua. Naajuhuj, Pueyaso secojojua tiacajinia pueya rerejosacari, nojoriiri cajitiuniu paniquiaa camarucua cajitiucujinia pueya shootianura nojori. ⁷ Nojori rucuanijosacari tiacajinia, nojoriiri paniquiaa pueya saruhuatanura nojori. Panitiuquiaajaariuhua pueya jiyaniquiniuria nojori “niishitiojonaata”.

⁸ 'Niajaniya saniniuujia cua pueyanaa, majaari pueya shanacunu niaacua, nojori jiyaniquiniuria niajaniya “niishitiojonaata”. Niajaniya cutaraari niquiriyatujua Niishitiojonaraca. Puetunu niajanijajanaari niarta Pueyaso pueya tapueyocuaca. ⁹ Naajuhuj, majaari tamonu pueyano mijiria nia jiyaniquiniu “cua queta”. Niaacuajaari niquiriyatu Queraca. Nojuajaari jiyocuacaanu Quinia. ¹⁰ Naajuhuj, majaari pueya nia shanacunu niaacua, nojori jiyaniquiniuria niajaniya “cua jiyaniijjata”. Niaari niquiriyatujua Jiyaniijjaracacujaja. Nojuacuajaari Pueyaso jiyarosano nia Jiyaniijjaranoni. ¹¹ Cante jiyaniijjajanaa cutara niajaniyajinijinioni, cuno cuara jiyateera tama na cuaqueyajaaja nia cumaquinia na quiniuria. ¹² Cante tama na cuaqueyajaaja jiyateja pueya shocotaja na quiniuriani, narta pueya jiyaramiquijia na quiniurijuhuj, jiyano pueyano cutaraari cararosaanutaniya. Cante saniniuujia juhua narta pueya serura jiyateja tama na cuaqueyajaajani, cunoori jiyaniijjara jiyatesaanutaniya cutara.

¹³ ¡Cua tojitiare, Moisés Rootasanojiniji niishitiojonaanaa, niajaniya Fariseocuacajuhuj, niaari cocuaatia miiquiaa! ¡Niaari sapuenu juhua maninia quijiaca niquishano! Niaari pueya tarinitiaaqui quiaa nojori rupuenura Pueyaso. Niaari maja nia tiuuniu Pueyasocua. Naajuhuj, majaari pueya nia tarinitianu nojori tiuuniuria Pueyasocua, na muerasura nojori quiniuria.

¹⁴ ¡Niaari taraatia miishaanutaniya, Moisés Rootasanojiniji niishitiojonaanaa, niajaniya Fariseocuacajuhuj! Niaari sapuenu juhua maninia miijiaca niquishano. Niaari mashiquiopue tiaca masequiaa secaja nia cumaneecata, nia sapojonuta nojori. Naacujitij, niaari nojori tiaca masequiaa tama niajanijarajaaja. Naa nia miiniu nuhujitij, niaari shitiarayocua secojoquiaa najuhuana Pueyaso, pueya niquiara, maninia pueya nia jyanishaanura. Naaratej, niaari socua jyanohua saniitosaanutaniya tamasaca pueyajiniji.

¹⁵ ¡Niaari puereeta miishaanutaniya Moisés Rootasanojiniji niishitiojonaanaa, niajanijajuhuj Fariseocucanaa! Niaari sapuenu juhua maninia miijiaca niquishano. Niaari tucua-caanu rucuanajoquiaa jiya caco, shoniniacu caminia taquijiriano, tamonu nia niishitiojonura najuhuana Pueyaso tojijara na quiniuria juucua, juhua tama niajanijajaaja. Nia niishitijosano pueyano jaara nia tojijara quiri, nojuajaari socua jyanohua saniitiosocoriquiano quiya niajanijajiniji, sesa nia rootasano tojijia na quiniuucua.

¹⁶ ¡Niaari taraatia miishaanutaniya mosanucuanaa! Niajanijari juhua cariojuaru, cante tamonu pueyano jaatucuya juucuan, nuu nia niishiyaquishacari. Naacujitij, niaari capa niishitiojoquiaa. Niaari rootaquiaa, pueyano panishacari tamonu tiuuniuria na sequesanoocua, nojuaja cuara sequeera: “Taa oro Pueyaso Secojoua tiajinia pueyaracaanu quiyacuaani, naajuhuj, cua sequesano quiajanijari seetanujuanaa tohuateenutaniya quiara”. Saniniuujia, niaari sequequiaa, Pueyaso Secojoua tiajinia oro jaara sequeyaquishaare, majaari na sequesanoocua tiuushaanu. Naacujitij, niaari sequequiaa, pueyano sequesanoori nareja sequesano, nojuaja jaara sequere: “Taa Pueyaso Secojoua tia pueyaracaanu quiyacuaani, naajuhuj, cua sequesano quiajanijari seetanujuanaa tohuateenutaniya quiara”. Niaari sequequiaa cuno sequesanoocuaari maja tiuushaanu. ¹⁷ ¡Mosanucuanaa, niaari juhua cariojuaru! ¿Teyanote socua pueresanoni, cuno orotee, Pueyaso Secojoua tia soj? Cuno oroori naa pueresanora jiyatesaaquiaari saaja Pueyaso Secojoua tiajinia na quiniuucua. ¹⁸ Niaari rootaquiaajuhuj,

pa sequesacari parta pueyano, casaa pa miiniutianiya nerani, pocua na tiuuniuria paa cuaara sequeera naatej: “Seetanujuanaa quia sequeyanijia. Naatej, taa casaa Pueyasooacara catijiaja juhuacutuucua niasano jiyanoahua maninia quiyacuaa Pueyasorani, naajuhuj, cua sequesanoori saaja maninijuhuj. Majaari cua sapojonu”. Naacujitij, niaari sequequiaa, paa jaara naa sequereni, paa cuaara miiria pa sequesano. Saniniujia, niaari sequequiaa: “Pa sequesanoori najuhuaana sequesano, paa jaara saaja Pueyasooacara catijiaja juhuacutu sequereni. Majaari nocua tiushaanu”. ¹⁹ ¡Cariyojuarujurinia! ¿Majateeri nia niishiniu? ¿Teyanote socua maniniani, Pueyasooacara catijasocoriquiano casaatee, Pueyasooacara catijiaja juhuacutu soj? Catijasocoriquiano casaari narejajuhuanajaj, jaara Pueyasooacara catijiajaacua niasoo quiyaquiri. ²⁰ Naaratej, cante Pueyasooacara catijiaja sequere seetanujuanaani, nojuajaari maja saaja Pueyasooacara catijiaja na sequenu quirii. Nojuaja cutaraari na caco niasano sequereehujaj. ²¹ Naajuhuj, cante Pueyaso Secojoua tia sequere najuhuanani, cunoori maja saaja Pueyaso Secojoua tia na sequenu quirii. Nojuajaari Pueyaso sequereecuaaja, Pueyaso Secojoua tia na sequesacari. ¡Pueyasocujiaari na Secojoua tiajinia quijia! ²² Naajuhuj, pueyano jaara sequere na sequesano seetanujuanaa juhua jiya cajiniocua, nocua tiushaanura, cunoori maja saaja jiya cajiniocua na sequenu quirii. ¡Pueyaso cajishaqui sequerejaariuhuj, Pueyasojuanaa sequerejaariuhuj, jiyocuaaanu casaa na sequesacari!

²³ ¡Niaari taraatia miishaanutaniya, Moisés Rootasanojiniji niishitiojonaanaa, nijaniyajuhuj Fariseocuaanaa! Niaari sapuenu juhua maninia miijicaa niquishano. Niaari Pueyaso niqutiojoquiaa maninia puetunu nio nia nataujinijijianaa, shanohua jaanujua jaamasucua, miaquesanojinia jatasano casaa: menta, anis, cominonio. Niaari jacaria serojoquiaa diez casaa puetunu cuno cien casaajinijijianaa, Pueyasora nia niqutiosocoriquiano taa supuetana Moisés sequequiaaricuaajani. ¡Niaari saniniujia socua pa tojishocoriquiano Moisés rootasano tojitiaaquiquiaa! ¡Naacujitij, majaari maninia pueyano nia quiniu taa Moisés rootaquiiaaricuaajani! ¡Majaari nia taraajenu quiquiaa niarta pueyanocua! ¡Majaari nia tiuuniu Pueyasocua! Niaari maninia niqutiojoquiaa nia nataacuacajiniji. Taa nia niqutiojoquiaa nia nataacuacajinijicuaani, inaa nia tojitiarejuhua socua pa tojishocoriquiano rootasano Moisés Naajiotasanojiniji! ²⁴ Pueya nia niishitijosacari Moisés Rootasanojiniji juucua,

niaari juhua cariyujuaru cante narta cariyujuaru jaatucuya juucuaní. Niaari juhua tamonu pueyanójuhuaj. Na ratusacari, nujujua taquiríi na mashacajiníjiri. Socua na ratusacariuhua, ¡saaja cuartia miataaree juhuajaniyari!

²⁵ ¡Niaari cocuaatia miiquíaa, Moisés Rootasanojiníi niishitíojonaanaa, niajaníyajúhuaj Fariseocuacanaa! Niaari sapuenu juhua maninia miíjiaca níquishano. Niaari juhua noo pueyajúhuaj, cante nareja na ratujua cuaqueya jeequejóquíaani, na miacojua cuaqueyano. Na jiniacumaari saníniuujia jíyanohua curuutuuca quiyajaa. Nio miríqui cua sequesano nia niishiri. Nioojiaari naa quiyajúhuaj. Niaari nohuasenuujuaca, jamuejacano. ²⁶ ¡Cariyójuaru Fariseocuacanaa, nia ratujua jiniacuma nia jeequere coteenu, nia miacojua jiniacumano! Naacuajitíj, na cuaqueyari maninia jeequesano quiniutianíyajúhuaj.

²⁷ ¡Niaari taraatia miishaanutaniya, Moisés Rootasanojiníi niishitíojonaanaa, niajaníyajúhuaj Fariseocuacanaa! Puetunu niajaníyájanaari sapuenu juhua maninia miíjiaca níquishano, juhua macunucua quíquío shanohua níquishano, cohujata noshíjiosano. Saníniuujia na jiniacuma quiyari sacuaratia jaanujua pueya nucuhoa mocuaca. ²⁸ Niaari naajúhuaj. Niaari sapuenu juhua maninia pueya níquishano. Saníniuujia nioojiaari jíyanohua sesa, jíyanohua saponu niishíjia.

²⁹ ¡Niaari taraatia miishaanutaniya, Moisés Rootasanojiníi niishitíojonaanaa, niajaníyajúhuaj Fariseocuacanaa! Niaari sapuenu juhua maninia miíjiaca níquishano. Niaari macunucua niojotajara shanohua níquishano shipiníjioquíaa, tariucuacaanu pueyara Pueyaso sequesano caminiujiuníaa nucuhuacuají. Naajúhuaj, niaari tariucuacaanu Pueyaso tojtíajaca puecoosano quíquío maníniushitíjia. ³⁰ Naa nia miishacaritíj, niaari juhua sequequiaaruhua: “Paa jaara shipiníjiosaaquíaari pa supuetanaa quishacaríjia tariucuacaanuni, paa maara nojorí cojíyaquíquíaari cutarani, nojorí puecoosacari Pueyaso sequesano caminiujiuníaa”. ³¹ Saníniuujia, naa nia sequesacaritíj, niaari tama niaacuara toreejaacujua. Níaaquíiri cuno tariucuacaanu Pueyaso sequesano caminiujiuníaa puecoonaacuajiníio supuenocujaa. ³² Naa Pueyaso sequesano caminiujiuníaa puecoonaacuajiníio supueno nia quishacaritíj, Pueyaso Jíyarosano nia morejúhuaj, nia tucuatánura nia supuetanaa coteesano.

³³ ¡Sesa miíjiaca pueyanaa, niaari noonacuraca, juhua sacocua! ¿Níaaateerí jíyaniya niaari saníitíoyaquishaanutaniya maní quíquíojiníia nia supuetanaata? ³⁴ ¡Cua tojtíiare!

Janiyari Pueyaso rupaa caminiujiuniaa jiyaramiquiniutianiya niaacuani, Pueyaso Rupaa niishijiacajuhuj, Pueyaso rupaa niishitiojonaanio. Nojoriiri nia pohuatanutaniya Pueyasojiniji. Niaari noojiaqueya nojorijinijinio puecoonutaniya. Niaari tamasaca teetejonutaniya niyacutesanojinia nojori nia monura. Niaari tamasaca majacunutaniya Pueyaso secojojua tiacajinia. Niaari tamasaca neteyojotanutaniya puetunu tiacajinijijianaa, naquiya nia miiniuria nojori. ³⁵ Niaacuajaari niishiya, coteenujanaa mosaaquiaariiri Abel, maninia miijia pueyano. Naa puecoosaaquiaariiri queraatia Pueyaso tojtiajaca pueya. Na nuhuaji, socua jaatesaaquiaari monuuri Zacarías, Berequíás niyanu. Cuno maninia pueyanoori mosaaquiaari Pueyaso Secojojua tiajinia, Pueyasocuara catijiasaqui shuriucua. Monu porocua nia quiniuucua taa nia supuetanaa quiquiaaricuaani, niaari saniniuujia nocua namishaanutaniyacujua puetunu tariucuacaanu Pueyaso tojtianaa puecoosaanuucujanaa. ³⁶ Seetanujuanaa nia sequeyanijia, nio pa quishacari pueyani, nojoriiri saniitiosaanutaniya puetunu cuno pueya puecoosaanuucujanaa.

Jesu nujuquesacari Jerusalén tiacajinia quiniaa pueyacua (Lc 13.34-35)

³⁷ ¡Jerusalén tiacajinia quiniaa pueyanaa, jiyanojua taraanijia niaacuani! Niaari Pueyaso sequesano caminiujuniaa pueya puecoojuaca. Niaari Pueyaso jiyaramiquishano pueya jacujuaca saitia nojori pohuatanuucua Pueyaso rupaa nia niquiara juucua. Janiyari cucua nia nijionura panijia juucuanitaraatia nia miyaquishaanuucujia cua tacunura niaacuaji, naate taa caacaraja rijioquiaacuaa necohua na nesu cariquiacorani, na cojuanura nojori. Niaari saaja cua paniyaquijia cua cojuanura nijaniya. ³⁸ Cua tojitiare. ¡Niaari nia quiquiojiniji sanaajasaanutaniya ni-iquiji! ³⁹ Seetanujuanaa nia sequeyanijia, majaari socua nia niqiniu quiniutianiya janiya, niaa cuaara cua tiuquishacarihua sequerejaatijia: “Pueyaso cuaara shuquiritiiria pa Jiyaniijia quiriqiano na jiyarosano.”

24

Jesu pohuatasacari, Pueyaso Secojojua tia niyartasaanutaniya

(Mr 13.1-2; Lc 21.5-6)

¹ Jesuuri Pueyaso Secojojua tiajiniji tohuataarohua. Nata canaa quiojosacari nucuaco, canaa, na saquiriojosano pueyani, canaari nocua catecanoquiaarini. Canaari Jesu

niquitiriquiaa Pueyaso Secojojuua tiani, shanohua niquishano tia. ² Jesuuri saa canaa riucuareejaa:

—Jaa, na niquiyacujaniija. Niaa cumaati maninia na niquiyacujua. ¡Seetanujuanaa nia sequeyanijia, cuno tia niaa na niquiyani, cunoori niyartasaanutaniya puetunujuanaa! ¡Majaari quenaaja tamonu saajia manu quiniutianiya tamonu caco!

*Taa pa niishiniutianiya quera jiya puequesacari
(Mr 13.3-23; Lc 21.7-24; 17.22-24)*

³ Na nuhuaji, canaari Olivo cuhuariquia tuhuananuucua quiojoquiaarini. Jesu cajishacari tii, canaa na saquiriojosano pueyani, canaari nocua catecanoquiaarini. Tama canaa quishacarijaaja, canaari na nequesotareeni:

—Canaa quia sequere ¿taacari Pueyaso Secojojuua tia niyartasaanutaniyani? Naajuhuaaj, ¿taa canaa niishiniutianiyarini taacari quia tacatenutaniuhua mijiriani? Canaa quia sequerejuhuaaj, ¿taacari jiya puequenutaniyani?

⁴ Jesuuri canaa riucuaree:

—Tama nia cuaqueyajaaja nia cojuare tamasaca mariqui nia sapojoreeri. ⁵ Queraatia sapojonuujuaaari supuenutaniya. Nojoriiri tama na cuaqueyajaaja sequenutaniya: “Janiyacuaaja Cristoni, Pueyaso Jiyarosano”. Naa nojori sequesacariitij, queraatia pueya sapojonutaniyari. ⁶ Naajuhuaaj, niaari pueyapue miaquetoojonujiniji tojiniuuniutianiya, niya, tamonu jiyacajinianio. Niaari miaquetoojonura miananajotoonujiniji tojiniuuniutianiya-juhuaaj. Niaa jaara naa tojiniuuritij, majaari puerenu. Naa quiniutianiyari mijiria. Naajaa, juhuanajuajaari maja jiya puequesacari quiniutianiya. ⁷ Tamonu pueyari tamasaca pueyata miaquetoojonutaniya. Tamonu jiyajiniji jiyani-ijiaari tamonu jiyaniijiata miaquetoojonutaniyajuhuaaj. Jiyacaritij, jiyanohua miaajenuuri quiniutianiya queraatia jiyacajinia, cusonuunujuhuaaj. Rijiaari queraatia jiyacajinia jiuuquiujutianutaniya. ⁸ Naa naquiya miishacari mijiriatej, cunoori juhua manajaraca cotesacari noonu. Na nuhuaji, socua jiyacatenutaniyari naquiya miishacari, mijiria cua tiuquiyaquishacariija.

⁹ Jiyacaritij, niaari jiya camarucua niqutiojosaanutaniya cua muerasu nia quiniuucua, naquiya nojori miitianura niajaniya. Niaari puecoosaanutaniya. Puetunu jiyacajini-jinio pueyajanaari nia niquiniu paniyaquiniutianiya, cua muerasu nia quiniuucua. ¹⁰ Jiyacaritij, queraatia cucua tiu-uniaa pueyari cucua tiuuniu tarinitianutaniya nojori jaara naquiya miishaare. Nojoriiri narta Pueyaso muerasu tacar-tanutaniya. Majaari nojori niquiniu paniniu quiniutianiya

tarijia narta Pueyaso muerasu. ¹¹ Queraatia sapojonuujuaca Pueyaso rupaa pohuatanaari supuenutaniya. Nojoriiri queraatia pueya sapojonutaniya. ¹² Jiyacaritij, sesa miiniuri socua jiyanoehua jiyacatenutaniya mijiria. Cunora, queraatia pueyari narta pueya paniniu tarinitianutaniya. ¹³ Saniniuujia, cucua tiuujia jaara rejeretare pueyaracaanu cuno naquiya miishacari jiya cuara puequerejaatijia, nojuaja cutaraari shacantuuca quijiara jatanishaanutaniya, pueyaracaanu na rishiniuria. ¹⁴ Pueyaso rupaa jaara pohuatasaare janiyajiniji pueyapue niquiara puetunu jiyacajiniajanaa, nojori niishiniuria taate nojori naata cua muerasura quiniuni, jiyacaritij, jiyari shusha puequenutaniya cutara.

¹⁵ 'Pueyaso sequesano caminiujiunia Danielri tariucuacaanu pohuataquiaari sacuaraatia casaanaari supuenutaniya, puereeta niquishano. Cunoori Pueyaso pueya shaajariquiano. (Cante nio serojiyani, cuara niishiiria casaa na sequeyani.) Niaa jaara cuno sacuaraatia casaa niquiri Pueyaso Secojoua tiajinia nujuatesano, niocua mashiri. ¹⁶ Jiyacaritij, canapuate Judea jiyajinia quiyani, nojori cuara mashiiria tuhuananuhuacua. ¹⁷ Canapuate na tia cacojiria quiyani, nojori cuara tiuquiyaquiiiria na tiajiniaaco maja na tarishiniuria na casamiicua. ¹⁸ Canapuate cuhuariquiajinia quiyani, cuara tacateyaquiuhuara na tiajinioehua na toqueyacua. ¹⁹ Jiyacaritij, jiyanoehua taraatia quiniutianiyari maajipohuara, canapuate manajaatohua quiyani, mariyata canapuate supuejaca muerasu jiitiaani. ²⁰ Juhucarijia Pueyaso nia secojoriquia nia mashiyocuatunu panishacari quiyaquiniuria shuniyara, samaatenu juucanio. ²¹ Cuno quishacari, jiyanoehua naquiya miiniuri quiniutianiya seetanujuanaa. Jiya coteenujiniji, jiyano naquiya miiniuri maja na niquishaanu quiquiaari tari. Naajuhuj, naa naquiya pueya miiniu nuhuajitij, majaari socua na caminiu quiniutianihua juhua nio naquiya miiniu. ²² Cuno naquiya miishacari jaara tajiyaquiri ritia, pueya maara cureyaquirij. Pueyaso cutaraari na tajitiniutianiya ritia, na saquiriojosano pueyacua na taraajesacari.

²³ 'Jiyacaritij, majaari nia tojiniu, tamonu jaara sequere nijaniya: "¡Cua tarajanunaa, Cristoqui tari tiuquirioehua! Niya quiyano". Naajuhuj, majaari nia tojiniu tamonu jaara nia sequere: "Nooj, jati quiyatej". ²⁴ Queraatia sapojonuujuacaari supuenutaniya. Nojoriiri tama na cuaqueyajaaja jiyatenutaniya juhua Pueyaso jiyarosadora. Tamasacaari sequenutaniyacujua: "Janiyari Pueyaso sequenu panishano caminiujiuniani". Nojoriiri pueya sapojonutaniya jiyajeneta

nojori miishanota. Naa nojori miishacaritij, mijiria quiniaa pueyari jiyaniutianiya nojoriqui seetanujuanaa Pueyaso jiyaramiquishano. Jaara na naata quiri, Pueyaso saquiriojosano pueya sapojonutaniyajaariuhuj. ²⁵ Pueyanaa, naa cua sequesacari niajanijatej, janiyacuaajaari juhuacarijia nia numootereeni. ²⁶ Naaratej, majaari nia quianu cua pajuenuuca, pueya jaara sequere niajanija: “Cristo jati cariquia jiyajinia quia”. Naajuhuj, majaari pueya nia tojiniu nojori jaara sequere niajanija: “Miji, Cristo sohucamara cajiya. Nia niquishijia”. Majaari nia shanacunu naa nia sapojosaanuratej. ²⁷ Mijiria cua tiuquishacariuhua, majaari jiyasohua cua tiuquiniu quiniutianiuhua. Naatej, taa pueya niquiquiaa miacana nunujijano pananu muestasamajicuaani, pananu tiuquishocorano, pueyari naa cua niquiniutianiya cua tiuquishacariuhua. ²⁸ Tee casaa mocua quiyani, mohuari tii rerequeejonutaniya.

Jesuuri naa niishitiojoriquiaa miriqui, mijiria quiniaa pueya jaara sesere puera, nojoriiri saniitiosaanutaniya.

*Taa na quiniutianiyanii Cristo tiuquishacariuhua
(Mr 13.24-37; Lc 21.25-33; 17.26-30, 34-36)*

²⁹ Jesuuri naa canaa pahuataquiaari socuatej:

—Ritia naquiya miishaanu nuhuajijia, pananuuri ninishiquiria quiniutianiya. Racaari maja na cuhuatanu quiniutianiya. Riyari totenutaniya. Jiya cajiniocua cumaaca jiiitajacari tetecatunutaniya. ³⁰ Jiyacaritij, puereeta casaari jiya cajiniocua niquishaanutaniya, mijiria quiniaa niishiniuria janiyari quera roseyani. Puetunu nio jiyajinia pueyapuejanaari sapiyonuunutaniya, jiyanojua nojori taraajenuta. Na nuhuaji, cua niquitiuniutianiyari cohujaja najacajinia rosejano, jiyanojua cua cumaacata, jiyanojua shacantuuca. ³¹ Janiyari jiyocuacaanuji cua seyata tiuquiniutianiuhuani, cua jiyaramiquiniuria nojori puetunu cua saquiriojosano pueyacuajanaa. Nojori tojtiasacari trompeta jonenenu jiyanojua, nojoriiri cua saquiriojosano pueya rerejotenutaniya cucua, puetunu nio jiyajinijijanaa.

³² ‘Nia pahuatareera higo naanajiniji, socua maninia nia niishiniuria taacari jiya puequenutaniyani. Higo naana cashacucua jaara macumaaca quiri, na jaamasucuaari mueratiuya. Naa nia niquishacaritij, niaari niishiya tacareejoniqui quera quiniutianiya. ³³ Naajuhuj, niaa jaara puetunu cua sequesanojuanaa niquiri tari tohuatejano, niocua niishiri janiyari quera tiuquihuani. Tari jiya puequesacari quera. ³⁴ Seetanujuanaa nia sequeyanijia,

nio pa quishacari pueyani, majaari nojori shaajenu quiniutianiya juhuanojuaja, nojori cuaara puetunujuanaa cua pohuatasano niquirijiaatijia. ³⁵ Jiya, jiya cajiniocuanio, cunoori shaajenutaniya. Cua sequesano cutaraari tohuateenutaniyacujua. Cua rupaari pueyaracaanu seetanu rupaajanaa quiniutianiya.

³⁶ 'Maja cutaraari quenaaja tamonu pueyano niishiniu taacari jiya puequenutaniyani, mariyata taacari cua niniutianihuani. Jiyocuacaanu quiniaa Pueyaso seyari maja na niishiniujuhuaj. Majaari quenaaja cua niishiniujuhuaj. Saaja cua Queeri tamajaaja na niishiya cutara.

³⁷ 'Quera cua tiuquiniu panishacariuhua, mijiria pueyari juhuajaniya quiniutianiya taa Noé quishacari mijiria tariucuaaanu pueya quiquiaaricuaani. ³⁸ Jiyacaritij, nio jiya pajaashitiaquishacarijia, supuetanaari juhuajaniya miaqueenuujua quiquiaari. Juhuajaniya queranacunuuriquiaajaariuhuj. Juhuajaniya necohua camiyoteriquiaajaariuhuj Noé jaara tiuquitiaquiaarijiaatijia na puereetuuca buquejiniacuma. ³⁹ Nojoriiri saaja juhuajaniya quiriquiaa pajaa jaara nojori pajaashitiaquiaarijiaatijia. Puetunu pueyajanaari canashiyaquiji netasaaquiaari. Mariyata naa quiniutianiyari cua tiuquishacariuhua. ⁴⁰ Jiyacaritij, caapiqui pueya quishacari cuhuariquiajinia, niquiriyatuuri rishaanutaniya, Pueyaso pueyano na quiniuucua. Tamonuuri jateenutaniya saniitiosocoriquiano saniniuujia. ⁴¹ Naajuhuj, caapiqui maajipohua riiquiniuushacari tunanajiniacuma, niquiriyatuuri rishaanutaniya. Tamonuuri jateenutaniya. ⁴² Nocuaji juhua sutejaca nia quiriquia. Majaari nia niishiniu taacari nia Jiyaniijia tiuquiniutianihuani. ⁴³ Nio nia niishiri. Tia camaru jaara niishiriquia taacari nohuasejojua niniutianiya nocuani, nojuaja maara nocuaji sutere maja nohuasejojua tiuquiniuria na casami nohuasenura. ⁴⁴ Naaratej pueyanaa, niaa cumaati cua sashiya, janiya mariqui nia jiyajenetemo-huarini.

Jesu pohuatasano maninia serujiniji, sesoriquia serujinijinio

(Lc 12.41-48)

⁴⁵ 'Socua cua pohuatasano nia tojitiare pueyanaa. Jiyanohua casamiriaca pueyanoori queraatia seyaraca quiquiaari. Cuno jiyaniijaari tucuacaanu quianu paniquiaari tamonu jiyajinia. Naaratej, na nuhuajiria, nojuajaari niquiriyatu na seyajinijinio jiyatequiaari juhua na tia camarura, narta seya na mianuutenura maninia, puetunu juucajanaa. Cuno seruuri niishijia quiquiaari, na camarnu tojjiajuhuaj. ⁴⁶ Cuno seruuri shuquiriaatia quiniutianiya

na camarnu jaara na riuriasuhua maninia poonijiyano taa na camarnu sequequiaari na nuhuajiriacuajani. ⁴⁷ Naaratej, seetanujuanaa nia sequeyanijia, na camarnuuri na jiyatenutaniya puetunu na jiitiasanojuanaa cojuanara. ⁴⁸ Saniniuujia, cuno seru jaara sesa miijia quiri, nojuajaari tama sequenutaniyajaacujua: “Cua jiyaniijiaari jiyanohua tarishiniutianiya”. ⁴⁹ Jaara naa niishiriojore, nojuajaari narta seya piquiniu coteenutaniya. Mashaasequenuujuaca cojiniutianiyajaariuhua queranacunuunura. ⁵⁰ Naa juhuajaniya na quishacaritij, na jiyaniijiaari jiyacari na jiyajenetenutaniya. ⁵¹ Naa sesa na quiniuucuatej, na jiyaniijiaari jiyanohua na saniitionutaniya. Na nuhuaji, na jatanutaniyari na cojiritiasocoriquiano saniitionu sapuenu juhua maninia niquishano miijia pueyata. Nojoriiri tii nujuquetunutaniya. Na quica miaquenuunutaniyari, naquiya na miiquiosacari.

25

Jesu pohuatasano diez niyacoojorijini

¹ 'Nia pohuatareera taa Pueyaso shuriucua tiuquitianu panijiaa quiniutianiya cua tiuquishacariuhuani. Nojoriiri juhua diez niyacoojori quiniutianiya, canapute camiriquiano pueyano sashiriquiaacuajani. Cuno niyacoojoriiri quiojoquiaari camiriquiano pueyano sashiniuria, na tiuquishacari nojori tiuquitianura nata tiaco. Nojoriiri samaritiu patootaquiaari. ² Cinco cuno niyacoojorijiniiri mosanucua quiquiaari. Tamasacaari saniniuujia niishijiaa quiquiaari cutara. ³ Mosanucuaari saaja niquiriyatu samaritiu patootaquiaari. Majaari socua samaritiu nojori panu quiquiaari. ⁴ Niishijiaa cutaraari socua samaritiu pooquiaari, nojori samaritiu puequesacari na noshitishocoriquiano. ⁵ Camiriquiano pueyano tarishishacari, puetunu nojorijianaari maquenuujuquiaari. Nojoriiri socua maquetuquee. ⁶ Shiyaqueya, tamonu pueyanoori nacaquiaari: “¡Camiriquiano pueyano cumaji tari! ¡Nia naacusee!” ⁷ Puetunu cuno niyacoojorijianaari ritia saneecuatuquiaari. Quera pueetacoyano na samaritiu nishiriiniuuriiri. Nocuaji niishijiaa niyacoojoriiri socua na pootusano samari noshitirii. ⁸ Jiyacaritij, mosanucua niyacoojoriiri narta niyacoojori sequeree: “Canaara nia rashiquiojoreja nia samaritiujini. Canaa samaritiu tari pueetaareeni”. ⁹ Cuno cinco niishijiaa niyacoojoriiri nojori riuquaree: “Maja. Maja maninia canaa niquisitionura nijaniya, puetunu pa samaritiujianaacua senota pueetama. Ritia nia quiaare juhuari na masejosaqui, socua nia

masenura tiji”. ¹⁰ Cuno mosanucua niyacoojori quiojosacari samari masenuucua, camiriquiano pueyanoori nojori niyacari tiuquishii. Cuno samaritiuriaca niyacoojori cutaraari camiriquiano pueyanota tiuquitiaquiaari camishaqui tiaco queranacunura. Tia tiotiuuri mishiquioosaaree. ¹¹ Na nuhuaji, mosanucua niyacoojoriiri tiuquiiioquiaariuhua. Tia tohuateyaji jiiquioonuusuhuari. Sequetureeri: “Jiyaniijianaa, jiyaniijianaa, canacuaji quia riatareja tiotiu!” ¹² Jiyaniijiaari saa sequereejaa: “Seetanujuanaa nia sequeyanijia, maja cua niishiniu nijaniya”.

¹³ Naa na pahuatanu nuhuajitij, Jesuuri canaa na saquiriojosano pueya sequereee:

—Pueyanaa, nia quiri juhua sutejaca, nia niishiyaquishacari taacari cua tiuquiniutianiuhuani, casaa juucatej.

*Miriqui Jesu pahuatasano cumaneeca poonitijionaaajiniji
(Lc 19.11-27)*

¹⁴ Na nuhuaji, Jesuuri socua miriqui pahuataquiaari canaa na niishitiojonura taa Pueyaso muerasu miishaanutaniya jiya puequesacarini. Jesuuri naa canaa pahuataquiaaritij:

—Tamonu jiyaniijiaari tucuacaanu quianu paniquiaari tamonu jiyajinia. Na nuhuajiria, na seya niqutiojoquiaari na racatasano cumaneecaari, nojori cuaara poonitijioora cuno cumaneeca na canijasocoriquiano. ¹⁵ Naacuajitij, coteenu seru niqutioree cinco mil cumaneecaari. Tamonuuri niqutiosaaree dos mil. Tamonuuri niqutiosaaree mil cumaneeca. Na jiyaniijiaari naa nojori niqutiojoquiaari na niishishacari nojoriiri rimiajata niishijiaa quiquiaari, socua cuno cumaneeca nojori canjianura. Na nuhuaji, nojori jiyaniijiaari quiaquiaari. ¹⁶ Cinco mil cumaneeca jiiitianaari ritia coteequiaari casami masenura na niqutiojosocoriquiano socua cumaneecara, na reratenura na jiyaniijiaara. Naacuajitij, cuno seruuri socua cinco mil cumaneeca reratequiaari coteenu na jiiitiasanojiniji. ¹⁷ Naajuhuaaj, dos mil cumaneeca jiiitianaari socua dos mil cumaneeca reratequiaari na jiiitiasanojiniji. ¹⁸ Mil cumaneeca masenaari saniniuujia maja na poonitijionu quiquiaari na jiyaniijia niqutiosano cumaneeca. Nojuajaari saaja jiyajinia jiuutiaquiaari na jamojuara na jiyaniijia cumaneeca. ¹⁹ Seya jiyaniijiaari camueenujuquiaari jiyanohua. Socua tiuquiquiaariuhuari na cumaneeca na masejonuhua na seyajiniji. ²⁰ Coteenu nocua tiuquiquiaariiri cante cinco mil cumaneeca niqutiosaaquiaaricujani. Nojuajaari na jiyaniijia sequereee:

“Jiyaniijianaa, quiaari cua niqutiocanu cinco mil cumaneeca. Niya quiyari socua cinco mil cumaneeca quiara, cua poonijosanojiniji cua reratesano”. ²¹ Na jiyaniijaari na sequeree: “Maniniacuaja. Quiaacuajaari maninia cua seru. Majaqui najuhuana cua tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jitianarani. Miji quia tiuquimia. Niya cuata quia quishii shuquiriaatia”. ²² Na nuhuaji, tamonu seruuri na jiyaniijaacua tiuquishijiuhuaj, nooj, cante dos mil cumaneeca niqutiosaaquiaaricuajani. Na jiyaniija sequereeri: “Jiyaniijianaa, quiaari cua niqutiocanu dos mil cumaneeca. Niya quiyari socua dos mil cumaneeca quiara, cua reratesano cua poonijosanojiniji”. ²³ Na jiyaniijaari na sequeree: “Maniniacuaja. Quiaacuajaari maninia cua seru. Majaqui najuhuana cua tiuuniu quiquianu quiocua. Quiaacuajaqui maninia miiquianu secaja cua niqutiosanota quiajaniya. Janiyari quia jiyatenutaniya queraatia jitianarani. Miji quia tiuquimia. Shuquiriaatia niya quia quishii cuata”. ²⁴ Na nuhuaji, tamonu seruuri tiuquishijiuhuaj cante mil cumaneeca niqutiosaaquiaaricuajani. Na jiyaniija sequereeri: “Jiyaniijianaa, janiyari niishiyani quiaacuajaari quarta pueyacua taraajeyashijia. Quiaari tamasaca natoosanojiniji senoojua. Quiaari tamasaca poonijosanojiniji miajajuhuj. ²⁵ Naaratej, janiyari quia cumaneeca pueretacanu nohuasenujuacani. Cunora janiyari quia cumaneeca jamocanu raamani. Quia niquri. Niya quiyacuaja quia cumaneeca puetunujuanaa”. ²⁶ Na jiyaniijaari na juaarii: “¡Quiaaqui sesoriquia pueyano! ¡Tajeca seque! ¿Quiaateeri niishiquianu janiyari tamasaca natoosanojiniji senoojuani, tamasaca poonijosanojiniji miajajuhuj? ²⁷ Quiaa jaara cua jiyaniquianu naa quijiatej, ¿casaara cua cumaneeca quia niqutioyaquiquianu cumaneeca cojuanaarini? Nojori jaara cua cumaneeca poonijiotecanu, nojori maara socua na canijiacanu quiria”. ²⁸ Jiyacaritij, jiyaniijaari tamasaca na seya sequeree: “Nio sesa cua serujiniji nia jaariuutiare cua mil cumaneeca. Nia niqutiore cutara cua maninia seru, cante diez mil jiiitia tariucuajani. ²⁹ Naacuajitij, cante casaa jiiitaacuaani, nojuajaari socua niqutiosaanutaniya, queraatia jiiitaja na quiniuria. Saniniuujia, cante secaja jiiitia najuhuanani, nojuajaari secaja na jiiitasano jaariutiasaanutaniya puetunujuanaa. ³⁰ Nio najuhuana quijia seru saniniuujia, nia jatare carijiniacuma ninishiqui. Tii sapuenutaniyari. Na quiaa miaquenutaniyari na noonuta, naquiya na mishacari”.

Jiya puequesacari, puetunu pueyapuejanaanari nequesoreesaanutaniya saniitiosocoriquiano

31 'Puetunu cua seyajanaanari jiyocuacaanuji cua cojiniutianiya janiya jaara tiuquiriohuani Pueyaso shacantuuca cumaacata, Jiyaniijiajanaa cua quiniuria mijiria. Janiyari shanohua puereeta jiyaniijia cajitiujinia cajiniutianiyani, pueya cua nequesoreesacari. 32 Puetunu pueyapuejanaanari cucua rerejotesaanutaniya puetunu nio jiyajinijiniojuanaa. Janiyari maninia pueya saquiriojonutaniya sesoriquia pueya tajinijini, taa borrego cojuana na borregohua saquiriojoquiaa cabraacuaca tajinijicuaani. 33 Janiyari maninia pueya nujuatejonutaniya cua miaquetajarani. Saniniuujia, janiyari sesoriquia pueya nujuatejonutaniya cua muenecarani. 34 Na nuhuaji, janiyari cua miaquetajara nujuatiuyano sequenutaniyani: "Miji, cua Que shuquiritiasano pueyanaa. Shusha jiya shipinishacari niaarano cua Que riuriotaca nia masere. 35 Cunoori niajanियara, maninia miijiacua nia quiniuucua. Cua miaajesacari, niaari cua miaqueteja. Cua jiyamuesacari, niaari cua raateja. Tucuaaanu cua rucuanesacari, niaari nia tiaco cua tiuquinijia. 36 Toqueeju cua quishacari, niaari cua niqutioquiaari. Cusosu cua quishacari, niaari cua niqiniuucua quiaja. Nujuatejojuajinia cua quishacari taraatia, niaari cucua quiojojua cua cumanijianuucua". 37 Na nuhuaji, maninia pueyari cua nequesotanutaniya: "Jiyaniijianaa, ¿taacari canaa niqiquiaari quiajaniya miaajeyanoni? ¿Canaateeri quia miaquetequiaarini? Majaruhua. ¿Taacari canaa niqiquiaari quiajaniya jiyamueyanoni? ¿Canaateeri quia raatequiaarini? 38 ¿Taacari canaa niqiquiaari quiajaniya canaa jiyajinia rucuaneyanoni? ¿Canaateeri canaa tiajinia quia tiuquiniquiaarini? Majaruhua naa canaa miiniu quiquiaari quiajaniya. ¿Naajuhua, taacari canaa niqiquiaari quiajaniya toqueejuni? ¿Canaateeri quia niqutioquiaari toqueni? Maja. 39 ¿Taacari canaa niqiquiaari quiajaniya cusosuni, nujuatejojuajinianio? ¿Canaateeri quioquia quiojoquiaari canaa niqiniuria quiajaniyani? Maja".

40 'Janiyari cuno maninia pueya riucuanutaniyani: "Seetanujuanaa nia sequeyanijia. Naa jaara naa maninia miiquiaari tamonu cua muerasuniyojuajinijinio, niaari maninia cua miiquiaarijuhuaj".

41 'Na nuhuaji, janiyari cua muenecara nujuatiuyano sequenutaniyani: "¡Cua shuriucuaji niqiqui nia quiaare, sesoriquia pueyanaa! ¡Niaari cua Que sesacasano! Niaari mani quiquiojinia quejoosaanutaniya. Cuno

mani quiquioori maquesaashijia. Shipinishaaquiaariiri samaruhua jiyaniijiaacuaji, na seya samaruhuacuajinio. ⁴² Niaari naa miishaanutaniyaqui nia taraajeyaquiniuucua cucua. Cua miaajesacari, majaari nia miaquetenu quijia janiya. Cua jiyamuesacari, majaari quenaaja nia raatonu quijia janiya. ⁴³ Cua rucuanijosacari nia jiyajinia, majaari nia tiajinia nia tiuquininiu quijia janiya. Toqueeju cua quishacarijiuhuj, majaari toque nia niquitionu quijia janiya. Nujuatejojuajinia cua quishacari, cusosu cua quishacarijiuhuj, majaari nia quianu quijia cua niquiniuucua quenaaja”.

⁴⁴ Jiyacaritij, cuno pueyari cua nequesotananiya: “Jiyaniijianaa, ¿taacari canaa niquiquiaari quiajaniya miaajeyanoni, jiyamueyanojuhuj? Majaari canaa niquiniu quijia quiajaniya canaa jiyajinia rucuaneyiano tiaaju, toqueeju quiyano, cusosu quiyano, nujuatejojuajinia quiyanojuhuaj. Canaa jaara naa quiyano quia niquiquiaarini, canaa maara quiocua taraajequiaarini”. ⁴⁵ Janiyari nojori riucuanutaniyani: “Seetanujuanaa nia sequeyanijia, nia taraajeyaquiniuucua tamonu cua muerasuniyojuaacua, niaari seetanujuanaa cucua taraajeyaquiquiaari”. ⁴⁶ Jiyacaritij, maninia miyashijia pueyari quejoosaanutaniya pueyaracaanu saniitiosocoriquiano. Saniniuujia maninia miijia pueyari Pueyaso shuriucua quianutaniya, pueyaracaanu shuquiriaatia nojori quiniuria.

26

Judiocuaca camarucua roojotoosacari Jesu nojori quianura (Mr 14.1-2; Lc 22.1-2; Jn 11.45-53)

¹ Jesu jaara puetunu nio pahuatasanojuanaa pahuatanu puecaquiaari, canaa na saquiriojosano pueya sequereeri:

² —Niaacuajaari niishiya, tama tariquiiri Pascua juucara queranacusacari. Janiyari jiyacari taucuaca niquitiosaanutaniyani, mosocoriquiano niyacutesanojinia teetesano.

³ Jiyacarijiuhuj, canaa Judiocuaca camarucuaari rerejoquiaari Caifás tiajinia. Caifásri pueyacuara secojonaa jiyaniijiajanaa quiquiaari. Cuno pueya rerejoquiaarini, nojoriiri quiquiaari pueyacuara secojonaa camarucua, canaa Judiocuaca camarucuanio. ⁴ Nojoriiri cuno tiajinia pocoojoquiaari taa nojori sapojonutaniya Jesu na quiatusocoriquianoni, nojori mosocoriquiano. ⁵ Nojoriiri tama sequetooquiaarijiaaja: “Maja pa monu Pascuara queranacusacari, paa mariqui pueya juaatiriiri”.

*Tamonu maaji totasacari na shanohua jaanutaja Jesuucua
(Mr 14.3-9; Jn 12.1-8)*

⁶ Tamonu juuca, Jesuta canaa quishacari Betania tiacajinia, canaari Simón tiajinia miaquenuuriquiaani. Cuno Simónri tarijia lepra cusonujiniji Jesu naatanishano quiquiaari. ⁷ Miaquejajinia Jesu cajishacari, tamonu maajiiri nocua catecanoquiaari. Shiitaniyojua shucuariquiaja pataconiyojua cacatariquiaari, cohuaja saajiajiniji quejasano. Tii quiriquiaari shanohua jaanutaja. Cuno jaanutajaari jiyanojua queraatia cumaneecata masesano quiquiaari. Cuno maajiiri Jesu nacaacua na totaree puetunjuanaa. ⁸ Canaa jaara niquiquiaari naa cuno maaji miishanotej, canaari juaaquioreeni. Noojiaqueya canaajinijiniori naa sequeturee:

—¿Casaara cuno maaji niitiaree najuhuana shanohua jaanutajani? ⁹ ¿Cuno jaanutaja maara queraatia cumaneecara niquitiosaare, casamiijiuniucua niquitiosocoriquiano!

¹⁰ Jesu tojishacari taa canaa sequeriquiaa cuno maajini, canaa sequereeri:

—¿Casaara nio maaji nia taroojiyani? ¿Na miishano janiyani, cunoori jiyanojua maninia quiria! ¹¹ Casamiijiuniucuaari niaata quiriquiano pueyaracaanu cutara. Janiya saniniuujia, majaari cua quiniu quiniutianiya pueyaracaanu niaata. ¹² Nio maaji totasacari cucua na shanohua jaanutajani, juhuacarijia cua cuaqueya jeecaari, raaco cua niasaanura janiya jaara mosaareni. ¹³ Seetanujuanaa nia sequyanijia, pueyaracaanu pueya pohuatasacari Pueyaso rupaa janiyajiniji, nio maaji miishanoori pohuatasaanutaniya juhua puetunu jiyacajiniajanaa. Naa na miishano janiyani, majaari na niyajetasaanu quiniutianiya pueyaracaanu.

*Judas tacartasacari Jesu, na quiatenura
(Mr 14.10-11; Lc 22.3-6)*

¹⁴ Jiyacaritij, Judasri pueyacuara secojonaa jiyaniijianucuaacua quiaquiaari. Nojuajaari niquiriyatu canaajinijinio Jesu doce saquiriojosano pueyano quiquiaari. Na sesaari quiquiaari Judas Iscariote. ¹⁵ Secojonaa jiyaniijianucua sequeeseeri:

—¿Taa cumaneeca nia niquitionutaniya janiyani, janiya jaara nia quiatere Jesuni?

Nojoriiri ritia treinta cumaneeca niquitioquiaari Judas. ¹⁶ Na nuhuaji, Judasri pueyaracaanu niishiriojoriquiaa maatucua taacari quiatere Jesuni.

*Jesu miaquesacari na nuhuajiria na pueyata
(Mr 14.12-25; Lc 22.7-23; Jn 13.21-30; 1 Co 11.23-26)*

¹⁷ Puetunu marijjarajanaa, canaa Judiocuacani, canaari poreetesoo pan miaquenuuquiaari puetunu siete juucajanaani. Coteenu juucaari sesojosaaquiaari Pascua juuca. Naaratej, Pascua juuca, canaa, Jesu saquiriojosano pueyani, canaari nocua catecanoquiaarini naa canaa nequesotanura nojuaja:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

¹⁸ Jesuuri canaa riucuaaree:

—Paacuajaari miaquenutaniyani tari cua sequesano pueyano tiajinia Jerusalén tiacajinia. Tii nia quiaare. Tia camaru nia sequesee: “Canaa niishitiojonaari naa quia sequeya: ‘Quera cua cusosacari. Janiyari cua nuhuajiria cua pueyata miaquenutaniya Pascua borrego quia tiajiniani’ ”.

¹⁹ Canaari naa miiquiaarini taa Jesu sequequiaari canaacuajani. Canaari tii majeetequiaari borregoni, Pascua juuca miaquesocoriquiano.

²⁰ Jaara niniquiaari, Jesuuri canaa na doce pueyata mi-
aquejajinia cajituriquiaa. ²¹ Canaa miaquenuusacari, Jesu-
uri canaa sequere:

—Seetanujuanaa nia sequeyanijia, tamonu niajanijajini-
jinioori cua tacartanutaniya, cua paraa na quiatenura janiya,
nojori monura janiya.

²² Canaari jiyanoehua taraajequeeni naa Jesu sequesacaritij.
Puetunu canaajanaari Jesu nequesotareeni:

—¿Janiya jiyoteeri Jiyaniijianaa?

²³ Jesuuri canaa riucuaaree:

—Cante cuata tureneetaa pa miacojuajinjini, nojuacua-
jaari cua quiatenutaniya mosocoriquiano. ²⁴ Janiyacuajaari
mosaanutaniyani taa janiyajinjiji naajiotasaaquiaaricuaajani
tariucuaaanu Pueyaso Rupaajinia. Saniniuujia, jiyanoehua
taraatia miishaanutaniyari cua quiateriquiano pueyano.
Maara socua maninia quiquiaari cuno pueyanora jaara
raaquishaaquiaari.

²⁵ Na quiateriquiano Judasri socua Jesu nequesotaree-
juhuaj:

—¿Janiya jiyoteeri Niishitiojonanaa?

Judas riucuaareeri:

—Taaquiriirinij. Quiajanijacuaaquiniatejaj.

²⁶ Canaa miaquesacari, Jesuuri pan ririi. Na Que Pueyaso
secojoree nocuaraari.

Na nuhuaji, na necasereeri puetunu canaarajanaa, canaa
miaquesocoriquiano. Canaa sequereeri:

—Jajaa, nia masere. Nia miaquere. Nio panri cua
cuaqueya.

²⁷ Na nuhuaji, Jesuuri raatonuque pataree. Pueyaso na seconu nuhuaji nocuara, Jesuuri canaa na niqutioree. Canaa sequereeri:

—Niojiniji nia rature puetunu niajanijajanaa. ²⁸ Nioori cua nanaca, Pueyaso jiyanooniuria niajanija. Cua nanacaari queraatia pueyacuara shoonutaniya, nojori jiyanooshanura sesa nojori miishanojiniji. ²⁹ Seetanujuanaa, majaari socua cua ratunu quiniutianiya niaata mijiria nio uva caacajiniji. Janiyari niaata na ratunutaniya cutarani janiya jaara tacatemohuani, pueyaracaanu Jiyaniijijajanaa cua quiniuria. Jiyacaritij, jiyanohua maninia quiniutianiyari cuno quishacari. Paari mariyata jiyanohua shuquiriaatia quiniutianiya pueyaracaanuni.

Jesu sequesacari Pedro, nojuaja nocuaji seetanutaniya
(Mr 14.26-31; Lc 22.31-34; Jn 13.36-38)

³⁰ Canaa jaara jaaquequejoquiaari supuetana David naajioneejinijini, na nuhuaji canaari quiojoquiaarini Olivo cuhuariquia tuhuananuucua. ³¹ Jesuuri jiyacari canaa sequere:

—Puetunu niajanijajanaari cucua tiuuniu tarinitianutaniya quiari niucuaaja. Naa naajiotasano quiyacuajaari Pueyaso sequesano tarijia: “Janiyari borrego cojuana monutaniyani. Na borregohuari niaaquejonutaniya tamajaaja”. ³² Naajaa, janiya jaara samiitiarohua macujinijini, janiyari nia puetanutaniya Galilea jiyajiniani.

³³ Pedroori Jesu sequeree:

—Puetunu quia pueyajanaa jaara quiocua tiuuniu tarinitiare, janiya cutaraari maja cua catenu quiniutianiya quiocuaji.

³⁴ Jesuuri Pedro sequeree saaja:

—Seetanujuanaa nio niucuaajani, caacaraja niuni jiyaquishacarijia, quiaari naa pacutejonutaniya seetanu cucuaji: “Maja cua niishiniu cuno pueyano”.

³⁵ Pedroori Jesu sequeree:

—¡Pueya cuara moora janiyaqui, naajaa, majaari cua seetanu quiniutianiya quiocuaji!

Puetunu canaa Jesu pueyajanaari mariyata naa sequesuaritij, taa Pedro sequeriquiaacuaani.

Jesu secojosacari Getsemani cuhuariquiajinia
(Mr 14.32-42; Lc 22.39-46)

³⁶ Na nuhuaji, Jesuuri tamonu cuhuariquiajinia tiuquijioquiaari canaa na saquiriojosano pueyata. Cuno cuhuariquia sesaari quiquiaari Getsemani. Jesuuri canaa sequeree:

—Niyaja nia cajituri cua secojosacari cua Que jati socua nia tacoji.

³⁷ Jesuuri Pedro jiyataquiaari, caapiqui Zebedeo niquiohuanio. Jesuuri juhuacatecara taraajequiaari. Jiyanoehua tacaariquiaajaariuhuj. ³⁸ Jiyacaritij, Jesuuri nojori sequere:

—¡Coojia quera jiaqueya jiyanoehua cua taraajenuta! ¡Quera cusoyanjia! Niyaja cua sashitiuri. Nia sutere nia tarajanura janiya quenaaja.

³⁹ Jesuuri nojori shuriucuaji canujiyaree tamajaaja socua nojori tacoji. Jiyocuara jacamaseeri Pueyaso na secojonura. Naa sequereeri:

—¡Cua Quena, jaara na naata quiri, maja quenaaja cua cartenu naquiya cua miishaanura! Naajaa, janiya cuara miishaariaqui taa quia paniyacuajani, maja juhua cua panishano.

⁴⁰ Na nuhuaji, Jesuuri na pueya niquishuhua. Nojoriiri saaja maqueturiquiaa. Pedro sequereeri:

—Pedronaa, ¿majate nia naata cuata sutenu quenaaja ru-paquijia? ⁴¹ Nia sutere Pueyaso nia secojonura, niaa mariqui sesa miiriiri niaa jaara saniniujiushaare. Seetanujuanaa, poojiaari maninia miiniu panijia. Pa cuaqueyari saniniuujia sasaca quiyacujua. Naacuajitij, majaari pa naata maninia miiniu Pueyaso cumaquiyaquishacari pajaniya.

⁴² Jesuuri socua tacatequiaariuhua tamajaaja Pueyaso secojonuhua. Naa sequereeri:

—Cua Quena, janiya jaara naquiya miishaareni, janiya cuara miishaariaqui taa quia paniyacuajani.

⁴³ Jesuuri na pueyacuata tacateyarohuacuhuj. Maquetiuyano nojori riuriasuhuariuhuj. Nojori namijiaari saaja seecutayariquiaa jiyanoehua nojori maquenu paniniutia. ⁴⁴ Jesuuri nojori tarinitiaquiaari socua. Quiaquiaariuhuari na Que secojonuhua. Secojonu pacutequiaariiri taa na secojoriquiaa coteenucuajani. ⁴⁵ Na nuhuaji, na pueyacuata nimiohuariuhuj. Nojori sequesuhuari:

—Quiaritia cutara nia maquetiuyare. Nia paniyatere cutara maquetunu. ¡Juaj! ¡Nia tojiri! ¡Janiyari tari quiatesaanutaniya sesa miijiaca pueyani! Nojoriiri cua miiniutianiya taa na panitiuyacuajani. ⁴⁶ ¡Nia saneecuatere! Pa quiaare. Cumaji tari cua quiateriquiano.

Moronucua na paraa jaatucutasacari Jesu

(Mr 14.43-50; Lc 22.47-53; Jn 18.2-11)

⁴⁷ Jesu pocusacarijia, Judasri jiyacari tiuquishii. Nio Judascuajaari niquiriyatu canaajinijinio Jesu doce saquiriojosano pueyajiniji quiquiaari. ¡Queraatia pueyari Judasta nijioquiaari! Nojoriiri secojonaa jiyaniijianucua jiyaramiquishano pueya quiquiaari, canaa Judiocuaca

camarucua jiyaramiquishano pueyajuhuaaj. Nojoriiri nijiniaquetucuaaja mueruu pooriquiaa, macacanio. ⁴⁸ Judasri tari niishitioquiaari Jesu quiaturiquiano pueya taa nojori niishiniutianiyani teyanote Jesuni. Nojuajaquiiri tari nojori sequequiaari: “Teyano pueyano cua nujiya pa tiuquishacarini, cunocuaajaari nojuaja. Niocua na quiasee ritia”. ⁴⁹ Naacujitij, Judas tiuquishacari Jesuucua, na sequeseeri:

—Quiocua tiuquiyaniija Niishitiojonanaa.

Jiyacariija na nujuureeri. ⁵⁰ Jesuuri na sequeree:

—Cua rupuenanaa, ¿casaacua quia niyareerini?

Jiyacaritij, Judasta nijionaa pueyari Jesu quiatusee. ⁵¹ Jiyacaritij, tamonu canaajinijinio pueyanoori ritia shitiaree na nijiniaquetucuaaja mueruu na shuucuaji. Nata jaateree secojonaa jiyaniija seru numocoori. ⁵² Jesuuri na sequeree:

—¡Na co jiniacuma quia shiriohua quia mueruu! ¿Majate quia niishiniu, cante mueruuta miaqueja pueyanoni, mueruuta mosaanutaniyajaariuhuaaj? ⁵³ ¿Quiaate niishiyaquiyajuhuaaj, janiya jaara cua Que sequereni cucua na jiyaramiquiniuria na seya jiyocuacaanuji na cojuanura janiya, cua Que maara ritia cucua jiyaramiquiri cincuenta mil na seyajinijinio? ⁵⁴ Naajuhuaaj, janiya jaara naa cua Que sequere na cojuatenura janiyani, ¿tariucuaaanu Pueyaso Rupaajinia janiyajiniji naajiotasanotucua taa tohuateereni?

⁵⁵ Jiyacaritij, Jesuuri na paraa sequeree:

—¿Taateni? ¿Janiyateeri nohuasejojuani, naa nia tiuquitia-nura cua quianura mueruuta, macacatania? Niaacuajaari juucua cua niqijia puetunu juucajanaa Pueyaso Secojoua tiajinia cajiyano, pueya cua niishitiojosacari. ¿Casaara tii nia quiaaquiquianu janiyani? ⁵⁶ Naajaa, naacujitij puetunu nia miishanojuanaari tohuateenutaniya, taa tariucuaaanu Pueyaso Rupaajinia naajiotasaaquiaari janiyajinijicuaajani.

Jiyacaritij, canaa, na saquiriojosano pueyani, canaari Jesu tiujiaquiaari niquiriyatuni. Puetunu canaajanaari mashiy-ocuatereeni.

Judiocuaca camarucua nequesoreesacari Jesu

(Mr 14.53-65; Lc 22.54-55, 63-71; Jn 18.12-14, 19-24)

⁵⁷ Jesu quianaari na jaatucuquiaari jiyaniija Caifásua. Caifásri pueyacuara secojonaa jiyaniija quiquiaari. Judiocuaca camarucuaari tari Jesuucuaaji rerejoquiaari Caifás tiajinia. Nojoriiri quiquiaari Moisés Rootasanojiniji niishitiojonaa, canaa Judiocuaca camarucuanio. ⁵⁸ Pedroori Jesu nuhuajiquiaari tucuaaanuji secojonaa jiyaniija tiajinia. Cuno puereetuua tia shocuaari mataca quiquiaari. Pedroori

tii carijiniacuma tiuquiquiaarijiuhuj. Jiyaniijia Caifás seya tajinia cajishiiri, na niquniuria taa nojori miiniutianiya Jesuni.

⁵⁹ Pueyacuara secojonaa jiyaniijianucuaari puetunu canaa Judiocuaca camarucuatajanaa pajeriquiaa pueya, nojori saquiriojotanura na sapojonuta Jesuucuaara, na mosaanura.

⁶⁰ Queraatia pueyari najuhuaana Jesuucuaara saquiriojotaree juucua. Nojori sequesanoori rimiajata quiquiaari tamasaca sequesanojiniji. Na nuhuaji, socua caapiqui pueyari mariyata sesa saquiriojotaree Jesuucuaara. ⁶¹ Nojoriiri na sequere:

—Cuno pueyano naa sequecanutej: “Janiya jaara Pueyaso Secojoua tia niyartareni, janiyari na tianu tucatanutaniuhua jiuujianaraca juucajiniani”.

⁶² Jesuuri sanaa nujuariquiaa saaja. Nocuaji, secojonaa jiyaniijiaari nujuaree. Jesu sequereeri:

—¿Majate quenaaja quia riucuanuujua? ¿Quiaate pueya tojirii quiocuara saquiriojotaano? ¿Seetanutejanaa nojori sequesano?

⁶³ Jesuuri saaja sanaa na tojiriqiaa. Nocuaji secojonaa jiyaniijiaari Jesu sequeree:

—¡Cua tojiri! Paa niya quiya Pueyaso niquiarani. ¡Cua riucuaare! ¡Majaari sapojonu! ¿Quiaate Cristo, Pueyaso Niyanu?

⁶⁴ Jesuuri na riucuaare:

—Jaa. Nojuacuajaniijia taa quia sequereecuajani. Cua tojitiare. Na nuhuaji, niaari cua niquniutianiya Pueyaso miaquetajara cajiyano. Niaari cua niquniutianiyajuhuj jiyocuacaanuji tacateyanohua cohuajajinia.

⁶⁵ Pueyacuara secojonaa jiyaniijia jaara tojiqiaari naa Jesu sequesantej, tama na toque sutareejaarijia na juaaniutia. Nata quiniaa sequereeri:

—¡Juhuej! ¡Nia tojishuriucuaara na sequesano! ¡Nojuajaari tama na cuaqueyajaaja jiyateya juhua Pueyaso na quiniuria! ¡Jiyanohua sacuaraatiaari na sequesano Pueyaso niquiara! ¿Paatucua casaara sashiri socua tamonu saquiriojotanura nocuaraarini? Niaacuaja shusha tojitiaree tama na sequesanojuaaja sacuaraatia Pueyaso niquiara. ⁶⁶ ¿Taa pa miiniutianiyanoj? ¿Taa nia sequeyani?

Nojoriiri pueyacuara secojonaa jiyaniijia riucuaare:

—¡Cuaara mosaaria!

⁶⁷ Jiyacaritij, tamasacaari Jesu jiquioco riocojoree. Na jiquioco na masetejotureejaariuhuj. Tamasaca saniniuujia, Jesu namijia na morotunu nuhuaji, na mocoritia na piquitiiri. ⁶⁸ Na nuhuaji Jesu nequesotatureeri:

—Quiaa jaara Cristo quiri, Pueyaso jiyarosano, quia ni-shiritioj, ¿cante quia piriini?

*Pedro seetasacari Jesuucuaaji**(Mr 14.66-72; Lc 22.56-62; Jn 18.15-18, 25-27)*

⁶⁹ Pedroori jiyacari tii cajiriquiaajaa carijiniacuma. Jiyacaritij, secojonaa jiyaniijia seruuri Pedro niquishii. Nojuaaari niyacoo quiquiaari. Pedro sequereeri:

—¡Jaj, quiaacuaaja cuno Jesuta rucuanajojua, cuno Galilea jiyajiniijinio pueyanotani!

⁷⁰ Pedroori jiyacari seetaree puetunu pueya niqiarajanaa. Naa sapojoreeri:

—¡Maja cua niishiniu casaa quia sequeyani!

⁷¹ Pedroori tohuateyajiria canujyaree. Jati, tamonu niyacoori na niquiriijuhuaaj. Cuno seruuri jiyacari tii quiniaa sequeere:

—¡Nio pueyanoori cuno Jesuta quijiajuhuaaj, cuno Jesu, Nazaret tiacajiniijinio pueyanoni!

⁷² Pedroori Jesujiniji socua seetanu camiriohuacuuhuaaj:

—¡Maja cua niishiniu cuno pueyano! ¡Pueyasocuaajaari niishiya, seetanujuanaa nia sequeyanijia!

⁷³ Pasaja na tarishiniu nuhuaaji, quiniqui quiniaari Pedro sequetusee:

—¡Quiaaqui seetanujuanaa cuno Jesu pueyajiniijinio! ¡Quiaari juhua nojori pocuaajuhuaaj!

⁷⁴ Jiyacaritij, Pedroori socua jiyacaterree sapojonura. Naa cuno pueya sequereeri:

—¡Pueyasocuaajaari niishiya maja cua niishiniu cuno pueyano, niaa na sequeyani! ¡Pueyasocuaajaari cua sequesano tojiya! ¡Majaari cua sapojonu niajaniya!

Caacarajaari canashiyaquiji niunijioquee. ⁷⁵ Jiyacaritij, Pedroori naa cuno niucuaaja Jesu sequesano niishiquii: “Pedronaa, caacaraja niunijiyaquishacarijia, quiaari tari janiyajiniji seetanu pacutejonutaniya”. Pedroori tia shocua mat-acajiniji tohuataquiaari ritia. ¡Jiyanohua nujuquequeeri na taraajenuta!

27*Judiocuaca camarucua niquitiosacari Jesu jiyaniijia Pilato*
(Mr 15.1; Lc 23.1-2; Jn 18.28-32)

¹ Tariquiicuaaji, puetunu pueyacuara secojonaa jiyaniijianucuaajanaari rerejoree narta Judiocuaca camarucuaata. Nojoriiri roojotooree taa na miitiuniutianiya Jesu na motenurani. ² Na nuhuaaji, Jesu morotureeri na jaatucutunura jiyaniijia Pilatoocua. Pilatoori jiyaniijia Césarjanaa jiyatesano quiquiaari Judiocuaca jiyaniijia na quiniuria Judea jiyajinia.

Judas Iscariote cusosacari

³ Judasri jiyano hua macuhua jequiaari na niquishacari Jesuuri mosaanutaniya na quiatenuucua nojuaja. Na tacaaniutia, Judasri quiaquiaari secojona jiyaniijianucuaacua, canaa Judiocuaca camarucuaacuanio, nojori na niquitionuhwara cuno treinta cumaneeca. ⁴ Judasri nojori sequeese:

—¡Janiyaqui sesa miiriucuaani, najuhwana cua quiatenuucua maninia pueyano niajaniya!

Nojoriiri saa na riucua reeja:

—Naajaa. Maja canaa miishano. Cunocua jaari tama quia miishanojuaja.

⁵ Judasri nojori cari cuno treinta cumaneeca jatarae Pueyaso Secojoua tiajinia. Tiji quiacuhuari. Na riquiajiniji morotaquiaari sohuaneyocuaari. Naa cusoquiaariiri. Sohuaneyocuaacuaji jaasutaari. ⁶ Secojona jiyaniijianucuaari Judas jatasano cumaneeca reratequiaari. Nojoriiri tama sequetooquiaarijiaaja:

—Nio cumaneecaari maja na naata Pueyasora racatajajinia niasocoriquiano. Nio cumaneecaari pueyano monu sami.

⁷ Puetunu nojorijiana jaara niishiriojoquiaari taa na miitiuniutianiya cuno cumaneecani, nojoriiri marau panioru pueyano cuhuariquia masequiaari cuno cumaneecata. Cuno cuhuariquiaari jiyatesaaquiaari ruconaa jamojuara, nojori jaara cusoyare Jerusalén tiacajinia nojori quishacari. ⁸ Pueyano monu samitia cuno cuhuariquia masesaanucua, cuno cuhuariquiaari sesojosaaquiaari “Nanaca samitia masesano cuhuariquia”. Naa quiyajaari na sesa. ⁹⁻¹⁰ Naacua jitij, Pueyaso sequenu panishano caminiujiunia supuetana Jeremías sequesanoori maninia tohuatequiaari. Nojuajaari naa sequequiaaritij:

“Nojoriiri na treinta cumaneeca pataquiaari cuhuariquia masenura marau panioru pueyanojiniji, taa cua jiyaniijia Pueyaso sequequiaari janiyacujani. Tarijia, cuno treinta cumaneecata, maninia pueyanoori nata masesaaquiaari. Israel pueyari naa sequequiaaritij: ‘Cuara treinta cumaneecata masesaaria cuno pueyano’”.

Pilato nequesoreesacari Jesu

(Mr 15.2-5; Lc 23.3-5; Jn 18.33-38)

¹¹ Jesuuri jaatucusaaquiaari jiyaniijia Pilatoocua. Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucua ree:

—Jaa. Naacua aquiniatejaj, taa quia sequereecuajani.

¹² Secojonaa jiyaniijianucua, canaa Judiocuaca camarucuanio, nojori jaara Jesuucua saquiriojotariquiaa, Jesuuri sanaa tojiriquiaa nojori. ¹³ Naaratej, jiyaniijia Pilatoori Jesu sequeree:

—¿Majate quia tojiniu nojori, quiocuara tonujiyano queraatia?

¹⁴ Majaari Jesu riucuanu quirii quenaaja. Pilatoori nocuaji jiuujiateree, casaara na riucuaaquia quenaajani.

Pilato sequesacari Jesuuri mosaanutaniya
(Mr 15.6-20; Lc 23.13-25; Jn 18.38-19.16)

¹⁵ Puetunu Pascua juucarajanaa, Pilatoori nujuatejojuajinia nujuatesano pueyano cartenu jitiqiaari. Judiocuaca panishano pueyanoori cartesaquiaari pueyaracaanu.

¹⁶ Cuno quishacari, tamonu pueyanoori nujuatejojuajinia nujuatesano quiriquiaa, Barrabás jyanishano. Puetunu pueyajanaari na niishijia sesa na miiniuucua. ¹⁷ Pueya rerejosacari Jesu na nacojotasacari Pilato niqiuara, Pilatoori nojori nequesotaquiaari:

—Judiocuacanaa, ¿teyano pueyano nia paniya cua cartenurani, Barrabáste, Jesu soj? Nojuajaari pueya sequesano, Pueyaso jiyarosanona.

¹⁸ Pilatoori naa nojori nequesotaree na niishishacari casaara canaa Judiocuaca camarucua monu paniriquiaa Jesuni. Puetunu pueyajanaari tari canaa camarucua tojitiaaquiriquiaa, nojori tojtianura Jesu. Cunora, camarucuaari Jesu monu paniriquiaa.

¹⁹ Pilato cajishacari na nequesoreesaqui, necocuaari nocua jiyaroquiaari tamonu na seru, naa na numootenuratej: “¡Narejatejataj, nareja! ¡Janiyari niucua maquiyojoree puereeta cuno pueyanoocujini!”

²⁰ Jiyacaritij, secojonaa jiyaniijianucuaari, canaa Judiocuaca camarucua pueya niishitiojoriquiaa nojori sequenura, Barrabás cuara cartesaaria, Jesu cuara mosaaria saniniuujia. ²¹ Naacuajitij, jiyaniijia Pilato jaara pueya nequesotaquiaariuhua teyano nojori paniya na cartenurani, nojoriiri na riucuaaree:

—¡Barrabás quia cartere!

²² Pilatoori nojori nequesotaree:

—¿Naatee? ¿Taa cua miiniutianiya Jesuurinitioj, pueya sequesano “Pueyaso jiyarosanoni?”

Puetunu pueyajanaari ritia na riucuaaree:

—¡Cuaara teetsaaria niyacutesanojinia!

²³ Pilatoori nojori nequesotarohuacuahuaj:

—¿Casaarateni? ¿Sesa miiritijiaara?

Pueyari saaja socua jyanohua nacaree:

—¡Cuaara mosaaria niyacutesanojinia teetesano!

²⁴ Pilato cartenu saniniujiushacari Jesu juucua, pueyari saaja socua jiyanoehua nacooriguiaa. ¡Socua jiyanoehua juaaquioriguiaari! Pilato niishishacari maja na naata quiniutianiya Jesu cartenu, taa na paniriquiaa juucuacuajani, nojuajaari mohuaca maseree. Pueya niquiara shuquitiareeri. Na shuquitiasacari, Judiocuaca sequereeri:

—¡Majaari cucua na tiutiasaanu quiniutianiya nia mosacari nio maninia pueyano! Cunoori maja cua miishano quiniutianiya. ¡Cunoori tama nia miishanojuaaja!

²⁵ Puetunu pueyajanaari na riucaaree:

—Naajaa. ¡Jaara mosaare, cuaara tiutiasaaria canaacua, canaa niquiohuacuano!

²⁶ Na nuhuaji, Pilatoori Barrabás tohuateree nujuatejojuajiniji. Saniniuujia Jesu majacutereeri. Na nuhuaji, na soldadoehua na niquitioreeri niyacutesanojinia nojori teetesocoriquiano.

²⁷ Jiyaniijia Pilato soldadohuari jiyacari Jesu jaatucuree Pilato tiajiniaaco. Nojoriiri puetunu narta soldadohuajanaa rerejoteree Jesu shocuaqueya. ²⁸ Na nuhuaji, nojoriiri Jesu toque jocuaturee. Tamonu tucuaque toque cushitishaareeri, shaaruque, juhua jiyaniijiajanaa cushishano. Naa na miitiuriiri na macaatiuriia. ²⁹ Nojoriiri juhuacontucua maaturee na nacaquerajuhua. Na nuhuaji, na cushititurii Jesuuri. Naajua niquitiosaareejaariuhua, juhua na macara, na miaquetajata na muetunura juhua jiyaniijia. Na nuhuaji, soldadohuari Jesuucuaara mojuquetacoquiaari. Nojoriiri naa na macaatiirii:

—¡Jejee, Judiocuaca jiyaniijianaa!

³⁰ Nojoriiri Jesu riocojoree. Na naajua na jaariutiatureeri. Nataja na naca piquitiuriiri. ³¹ Naa nojori macaatiiniu nuhuaji Jesutej, nojoriiri cuno tucuaque toque jocuaquiaariuhua nocuaji. Tama na toquejaaja cushitishaarohuari. Na nuhuaji, nojoriiri na jiyataquiaari na teetenura niyacutesanojinia.

Jesu teetesacari niyacutesanojinia

(Mr 15.21-32; Lc 23.26-43; Jn 19.17-27)

³² Nojori tohuareetasacari tiacajiniji puecoosaquiria nojori quiojosacari, nojoriiri tamonu pueyano naacumaa. Nojuajaari Cirene jiyajinijinio pueyano quiquiaari. Simónri na sesa quijia. Soldadohuari cuno Simón pateree Jesu teetejara niyacutesano. ³³ Nojoriiri tiuquiiijioose sesa miijia puecoosaqui. Pueya puecoasaquini, na sesa quiquiaari “Gólgota”. Nioori pueyano rupaajinia sequeya “Pueyano nacaco”. ³⁴ Quiniqui,

soldadohuari Jesu raateree vino juucua, casaa piajata cojitis-hano. Jesu jaara na saniquiaari, majaari na ratunu quirii.

³⁵ Jesu jaara niyacutesanojinia teetesaquiaari tari, soldadohuari saitia tacuarishijioree nojori niishiniuria cante Jesu toque poonutaniya nerani. Naacuajitij, tama nojorijiaarijia Jesu toque seraatiaquiaari. Naa tohuateequiaariiri tariucuacaanu Pueyaso sequesano caminiujiunia sequesano, nojuaja jaara naa naajiotaquiaari:

“Pueyari saitia tacuarishijioree cua toque nojori seraatiana”.

³⁶ Na nuhuaji, cuno soldadohuari cajitiuquiaari Jesu na cojuanura.

³⁷ Jesu nacaacuma, naajioneeri rupertasaquiaari. Tii naajiosano quiriquiaari casaara na teetesaareeni. Naa naajiosano quiriquiaari: “Nioori Jesu, Judiocuaca Jiyaniijia”.

³⁸ Caapiqui nohuasenuujuacaari Jesu shuriucua teetesaquiaarijihuaj, socua tamonu caapiqui niyacutesanojinia; tamonu na miaquetajara, tamonu na muenecara.

³⁹ Tamasaca pueya tajishacari nucuaco Jesu shuriuquioco, nojoriiri Jesu macaatiquiaari. Na maanuquenuta, nojoriiri Jesu sequetuquiaari:

⁴⁰ —¡Jaj! ¡Cumaacaraca quijia naatiijia! Quiaacuajaari sequeja quiaa jaara Pueyaso Secojoua tia niyartare, quia naata na tianu tucatanuhua jiuujianaraca juucajinia. ¿Naatee? ¡Quiaa jaara naa cumaacaraca quiriritij, canaa niquiara quia roserecuarajaj, quiaa jaara Pueyaso Nyanu quiri seetanujuanaa!

⁴¹ Secojonaa jiyaniijianucuaari tii quiriquiaajuhua Moisés Rootasanojiniji niishitiojonaata, canaa Judiocuaca camarucuanio. Nojoriiri Jesu macaatiriquiaajuhuj. Tama seque-tooriquiaajaarijia:

⁴² —Saaja tamasaca naatanijiojuaqiiri. Maja cutaraari na naata tama nocuajijiaaja tacunu. Jaara seetanujua-naa pa Israel pueya jiyaniijia quiri, cuaara roseera quiar-ijia pa niquiara niyacutesanojiniji, nocua pa tiuuniuria.

⁴³ ¡Pueyasoocua tiuujia naatiijia! Jaara naa quiriritij, Pueyaso cuaara na roshiniiria, nojuaja jaara seetanujuanaa Pueyaso panishano quiri. Nojuacuajaari pa sequeja: “Janiyari Pueyaso Nyanuni”.

⁴⁴ Cuno caapiqui nohuasenuujuaca Jesu shuriucua teetosano quiriquiaani, nojoriiri Jesu macaatiriquiaajuhuj.

Jesu cusosacari

(Mr 15.33-41; Lc 23.44-49; Jn 19.28-30)

⁴⁵ ¡Panacari, mijiriaari ninishiquiria quiquii! Pananu mueecosacari cuhuatemohuari. ⁴⁶ Jiyacaritij, Jesuuri jiyanhua nacaquiaari naatej:

—¡Elí, Eliinaa! ¿lama sabactani?

Nioori pueyano rupaaajinia sequeya: “¡Cua Pueyasonaa, cua Pueyasonaa!, ¿casaara quia carteree janiyani?” ⁴⁷ Tamasaca na shuriucua nujuatunaari na tojitiariquiaa. Nojoriiri sequeere:

—¡Nia tojiri! ¡Supuetana Elías jiiquioonuyano! Noo Elías, tariucuacaanu pueyara Pueyaso sequesano caminiujiunia quiquiaaritij.

⁴⁸ Tamonuuri ritia netequee namasu casaa na riniuria. Naajuaacua na morotanu nuhuaji, jereeca vinojinia na shiriiri. Na nuhuaji, Jesuucua na shiitioreeri na raatenura. ⁴⁹ Tamasacaari sequeere:

—¡Pa shanacure! ¡Elías jiyoteeri nocua niniutianiya na roshininiuria niyacutesanojiniji!

⁵⁰ ¡Jiyacaritij, Jesuuri jiyanhua nacarohua! ¡Na nuhuaji na sohanu tohuataniriiri! ¡Cusoqueeri! ⁵¹ Pueyaso Secojua tiajinia, shiquiaruque toquejiniji sohuacaari quiquiaari Pueyaso Quishaqui mishiquietaja. ¡Jesu cusosacari, cuno toqueeri sutequee jiyocuacaanuji jiyocuara puetunujuanaa! ¡Rijiaari jiya jiuuquiutiaquiaari jiyanhua! ¡Sairi jiaquetacquiaari noojiaacoji! ⁵² ¡Macunucua raacaari riatequequiaari! ¡Queraatia tariucuacaanu Pueyasoocua tiuuniaari samiitiacooquee na raacajinia! ⁵³ Jesu jaara samiitiaquiaariuhua, cuno samiitiaconohua pueyari tohuareetaquiaari na raacajiniji. Nojoriiri Jerusalén tiacajinia tiuquitiaquiaari. Nojoriiri queraatia pueyacua muetaquiaari tii, Pueyaso panishano tiacajiniani. ⁵⁴ Soldadohua capitánri na pueyata Jesu cojuariquiaa, Jesu cuaara cusoyarejaatijia nojori niqiuara. Nojori jaara jiya niquitiuquiaari jiuuquiutiaano, socua puetunu nojori niquishanojuanaanio, nojoriiri jiyanhua puereturee. Sequetureeri:

—¡Nio pueyanoqui seetanujuanaa Pueyaso Niyanu quiqiuani!

⁵⁵ Queraatia maajipohuari tii quiriquiaajuhuj. Nojoriiri tucuaaanuji shootiaturiquiaa Jesu. Nojoriiri Jesu nuhuajiquiaari Galilea jiyajiniji, Jesura pueraquenuuriquiano. ⁵⁶ Cuno maajipohua tajinia quiriquiaari María Magdalena, Santiago nucua Maríajuhuj, José nucua Maríano, mariyata Zebedeo niquiohua nucuanio.

Jesu quete niasacari raaco

(Mr 15.42-47; Lc 23.50-56; Jn 19.38-42)

⁵⁷ Tamonu pueyanoori quiquiaari Arimatea tiacajinijinio. Jiyanoohua casamiriaca quijiaari. Na sesa quiquiaari José. Nojuajaari tarijia Jesu tojijiaara quiquiaari. Joseeri Jesu cusonu juucaja tiuquiquiaari cuno tenacari. ⁵⁸ Joseeri Pilatoocua quiaquiaari Jesu quete na masenura. Pilatoori na pueya sequeree cuaara na niqutiosaarianoj. ⁵⁹ Joseeri Jesu quete paquiaari na jeenucuanura raaco na niasocoriquiano. Na jiuniocoreeri quenaaruke cohujaque toquejinia. ⁶⁰ Na nuhuaji na niaquiaari tama na raacojaarijia. Quiarinio raa quiquiaariiri, José jiuutianishano saajiajinia. Na nuhuaji, Joseeri puereetuuca saajia saquitiniquiaari raa tiotiuuria. Quiacuahuari. ⁶¹ María Magdalenaari na sesaanucuata caji-tiuriquiaa raa caneja taquijiria.

Soldadohwa cojuasacari Jesu raa

⁶² Pascuara jeenucuanu juuca nuhuaji, secojonaa jiyani-ijianucuaari Pilatoocua quiojoquiaari Fariseocuacata. ⁶³ Naa na sequetuseeri:

—Jiyaniijianaa, canaari cuno sapojouja pueyano sequesano niishiQuiini, na sequesano saminio na quishacarijia. Nojuajaari sequeja: “Janiyari jiuujianaraca juucajinia samitianutaniuhuaní”. ⁶⁴ Nocuaji na raa quia cojuatere maninia tiosano, jiuujianaraca juuca cuaara shocorejaatijia, na pueya mariqui niucua macu nohuasequeeri. Nojori jaara na nohuasere, nojoriiri sequenutaniya Jesu samiitiarohuacuaa. Nojori jaara naa sapojore pueyatej, socua jiyacatenutaniyari Jesu sequesano, nojuaja jaara sequecanu: “Janiyari Pueyaso Jiyarosanoni”.

⁶⁵ Pilatoori nojori sequeree:

—Niya quiyacuaja cua soldadohwa. Nojori nia cojuatere maninia cuno raa, taa nia paniyacuajani.

⁶⁶ Nojoriiri soldadohwa nujuatejoquiaari raa nojori cojuanura. Raa tiotiuuri rupanacusaaquiaarijuhuaj jiyaniijia Pilato sesa naajiotajata.

28

Jesu samiitiasacariuhua

(Mr 16.1-8; Lc 24.1-12; Jn 20.1-10)

¹ Samaatenu juuca jaara shocoquiaari, coteenu juuca se-maanajinijinio juhuaquesacari, shusha cuhuatesacari, María Magdalenaari raa niquniuucua quiariquiaa na sesaanucuata. ² ¡Canashiyaquiji, rijiaari jiyanoohua jiuuquiutiaree! Cunoori quiquiaari Pueyaso seru rosenuucua jiyocuacaanuji raacua. Raa tiotiu saajia saquitinishiiri. Na nuhuaji, saajiaacua cajiriohuari. ³ ¡Pueyaso seruuri niquishaquiaari

shacantuuca juhua miacana! Na toqueeri jiyanoehua cohua-
jaque quiquiaari, juhua sohuanatuu. ⁴ Raa cojuatunaari
jiyanohua shiriiquitiuquiaari nojori niquishacari Pueyaso
seru. Jiyanoehua tetecatureeri. Na puerenuta socua cusojonu-
ureeri. ⁵ Maajipohua jaara tiuquiquiaari raajinia, Pueyaso
seruuri nojori sequeree:

—Maja nia shiriiquiniu. Janiyacuajaari niishiyani niaari
Jesu pajeya, niyacutesanojinia mosanotej. ⁶ Maja niya na
quiniu. Tari samiitiarohuano, taa nojuaja sequequiaari
niajaniyacujani. Miji. Nia niquishushiiria na masaqui.
Shaaqui. ⁷ Ritia nia quiaarohua. Na saquiriojosano pueya
nia sequesuhua: “Jesu tari samiitiarohua. Nojuajaari nia
puetanutaniya Galilea jiyajinia. Niaari jati na niqiniu-
tianiya”. Janiyacuajaari tari nia sequereeni. Naa nia pohanu-
atasuhua na pueya.

⁸ Maajipohuari masaacujutanuuriquioehua raajiniji na
puerenuta, na shuquiriniutiajuhuaj. Nojoriiri socua
netecuatiuyarohuaquij, canaa na pohanuanuhua
Pueyaso seru sequesano nojori. ⁹ ¡Jiyacaritij, Jesujuanaari
canashiyaquiji nojoriicua muetaquee nuujinia! Nojori
saruhuatereeri. Maajipohuari nocua catecanoree. Na
cariquimiaji mojuquetacoreeri. Jesu niuhuaca quiatereeri.
Jesu shootiatereeri na jiuujiatenuta. ¹⁰ Jesuuri nojori
sequeree:

—Maja nia puerenu. Nia quiaarohua. Cua pueya nia
sequesuhua nojori cuara quiojoora Galilea jiyajinia. No-
joriiri seetanujanaa cua tapueyocua. Nojoriiri jati cua
niqitiuniutianiya.

Raa cojuanaa pohanuatasano

¹¹ Maajipohua quiojosacariuhua, nojiaqueya raa coju-
naajiniijinioori tiacajinia quiojoquiaariuhua pueyacuara sec-
ojonaa jiyaniijianucua nojori pohanuaturu nojori niquis-
hano. ¹² Pueyacuara secojonaa jiyaniijianucuaari canaa Ju-
diocuaca camarucuata rerejoree na rojotoonura taa na mi-
itiuniutianiya. Na nuhuaji, nojoriiri queraatia cumaneeca
niqitioquiaari raa cojuanaa, pueya niqiuara nojori pohanu-
aturu tamaatia nojori niquishanojiniji. ¹³ Soldadohuari
naa rootasaaquiaritij:

—Niocua naa sequere pueyatej: “Canaa maquesacari,
Jesu pueyaquuiri niucua nohuasequee Jesu quete raajiniji”.
Niocua naa sequeretej. ¹⁴ Jiyaniijia Pilato jaara niishiri naa
nia pohanuatasacaritij, majaari nia puerenu. Canaacuajaari
na shiniajanutaniya jaara juaari. Naacuajitij, majaari na
juaanu quiniutianiya niajaniya.

¹⁵ Jiyacaritij, soldadohuari cumaneeca maseree. Nojori-iri naa pohuatanu coteequiaari taa nojori rootasaareecua-jani. Nojori cuaracashishanoori ritia caminiujiushaaquiaari canaa Judiocuacara. Naacuajitij, canaa Judiocuacaari naa sequeyajaa quiarijia.

Jesu rootasacari na pueya na jiyaramiquiyaquishacarijia nojori

(Mr 16.14-18; Lc 24.36-49; Jn 20.19-23)

¹⁶ Canaa, Jesu once saquiriojosano pueyani, canaari Galilea jiyajinia quiojoquiaari tamonu tuhananuucuaani. Jesuuri canaa sequequiaari canaa quiojonura tiriara, tii canaa co-quetoonura nata. ¹⁷ Canaa niquishacari Jesu quiyano tii, canaari nocuara mojuquetacoquiaari canaa shuquiritianura nojuajani. Tamasaca canaajinijinioori jiyaniriquiaa maja naasucuaari Jesu. ¹⁸ Jesuuri canaacua catecanoree. Canaa sequereeri:

—Janiyari puetunu cumaacajanaa niqitiosaareni, Jiyaniijiajanaa cua quiniuria jiyocuacaanu, mijirianio. ¹⁹ ¡Naaratej, nia quiojore! ¡Puetunu pueyapuejanaa nia pohuatare cua rupaa, cua tojtiajacara nojori quiniuria! Moojinia nia tiuquinijiore cua tojtiajaca Pueyaso sesajinia, nojori rupuesacari pa Que Pueyaso, janiya, na Sohuanunio. ²⁰ Nojori nia niishitiojore puetunu cua rootasanojuanaa nijaniya, nojori tojishocoriquiano. Nia niishiri nio: janiyacuaajaari niaata quiniutianiya pueyaracaanuni, jiya cuara puequerejaatijia!

MARCO NAAJIOTASANO JESUCRISTOJINIJI

Cariiquia jiyajinia Tiuquinijiona Juan poojotasacari Pueyaso rupaa

(Mt 3.1-12; Lc 3.1-9, 15-17; Jn 1.19-28)

¹ Pueyaso Niyanu Jesucristojinijiiri naa coteetasaquiaari pohuatanutej. ² Tariucuacaanu pueyara Pueyaso sequesano caminiujuunia Isaiasri Pueyaso Niyanu niyacari naajiotaquiaari. Naajiotaquiaariiri taa Tiuquinijiona Juan poojotanutaniya pueya jeenucuanura nojori jiuujiani, niriqiano Jesu tojijia nojori quiniuria. Isaiasri naa naajiotaquiaari Pueyaso sequesano miriqui Neyanutej:

“Janiyari quiocuaji jiyaronutaniya tamonuni, quiocuaji quia nuu jeenucuariquiano. ³ Na nacanuuri tojishaanutaniya cariiquia jiyajinia. Naa pueya sequeyari: ‘¡Nia jeenucuare Jiyaniijia nuu! ¡Nia nuunore maninia, maja shuutiuniu!’”

⁴ Quiari naataja, Tiuquinijiona Juanri seetanujuanaa naa miiquiaari cariiquia jiyajiniatej. Nocua nijionaa pueya tiuquinijioriquiaa moojiniaari. Tiuquinijiona Juanri cuno pueya sequequiaari:

—¡Nioojia nia tacatore sesa nia miiniujiniji, moojinia cua tiuquinijionura nijaniya! ¡Pueyasocua sesa nia miishanojiniji nia jiyanoori puetunujuanaa!

⁵ Puetunu Judea jiyajinijinio pueyajanaari nocua nijioquiaari nojori tojtianura nojuaja, Jerusalén tiacajinijinio pueyano. Cuno pueya jaara sesa na miishano pohuataquiaari Juan niquiara, Pueyaso niquiarajuhuj, Juanri nojori tiuquinijioquiaari Jordán moojinia.

⁶ Tiuquinijiona Juan toqueeri camello cajacajiniji shitiasano quiquiaari. Na cajiniocua na camarucutesanoori quiquiaari shoque sacuanijiasano. Na miaquesanoori quiquiaari sequeru, samiyatunio, cariiquia jiyajinia na riuriatasano. ⁷ Juanri pueya niquiara pohuataquiaari naatej:

—Tamonuuri cua nuhuaji niniutianiya. Nojuajaari socua cumaacaraca janiyajiniji. Janiya maara shuquiriaatia quirini, nojuaja jaara quenaaja cua sequere cua naacutanura nojuaja, juhua na seru, na sapatu neyocua cua samaacatanura. Nojuajaari Jiyaniijiajanaa cutara janiyajiniji.

⁸ Janiyari nia tiuquinijiya moojiniani, juhua jeequejosano nia quiniuria sesa nia miishanojiniji. Cua nuhuaji ninia cutaraari Pueyaso Sohanu tiuquinijionutaniya nioojiajinia,

na cumaaca nia jiitianura, seetanjuanaa maninia miijiaca nia quiniuria.

Jesu tiuquinishacari moojinia
(Mt 3.13-17; Lc 3.21-22)

⁹ Jesuuri jiyacari Nazaret tiacajiniji quiaquiaari Tiuquinijiona Juancua. Nazaret tiacaari Galilea jiyajinia quijia. Tiuquinijiona Juanri Jesu tiuquiniquiaari Jordán moojinia. ¹⁰ Jesu tacasacari moojiniji na tiuquinishaanu nuhuaji, jiyacaritij, nojuajaari jiya cajiniocua niquiquiaari riateyano. Pueyaso Sohuanu niquiriiri nocua roseyano juhua mococonu. Nocua tiuushiiri. ¹¹ Jiyacaritij, jiyocuacaanuji tojishaaquiaariiri Pueyaso pocuaano. Naa Jesu sequequiaariiri:

—¡Quiaari Quiyanuniyojua, cua panishano! ¡Jiyanohua quia timitiaanijia!

Samaruhua jiyaniijia saniniujiushacari Jesu
(Mt 4.1-11; Lc 4.1-13)

¹² Na nuhuaji, Pueyaso Sohuanuuri Jesu jiyatequiaari ritia cariiquia jiyajiniara. ¹³ Jesuuri cuarenta juuca shocotequiaari tii tamajaaja, puereeta jiya camaruhua casami quishaqui. Tii na quishacari, Satanásri Jesu saniniujiuriquiaa na tojijiaara Jesu quiniuria juucua. Na nuhuaji, Pueyaso seyari nocua nijioquiaari na naacunura, na mianuutenurajuhua.

Jesu coteesacari poonijionu Galilea jiyajinia
(Mt 4.12-17; Lc 4.14-15)

¹⁴ Jiyaniijia Herodes jaara Tiuquinijiona Juan nujuatequiaari nujuatejojuajinia, na nuhuaji, Jesuuri Galilea jiyajinia quiaquiaariuhua. Nojuajaari pueya niquiara poojotaquiaari tii, maninia pohuatasano Pueyasojiniji, taa Pueyaso jiitianutaniya na muerasuni. ¹⁵ Jesuuri naa sequequiaari pueyatej:

—Nia sequeyanijia, nio pa quishacarini, quiarijiaari Pueyaso jiyanooshacari pueya, na muerasura nia quiniuria. Cunora, Pueyasojiniji cua pohuatasanoocua nia tiuuri. Nioojia nia tacatore sesa nia miiniujiniji, Pueyaso tojtiajaca nia quiniuria.

Jesu saquiriojosacari pueya, na tarajariquiano
(Mt 4.18-22; Lc 5.1-11)

¹⁶ Galilea caminia shuriuquioco Jesu rucuanijosacari, nojuajaari Pedro niquiquiaari, tarajanu Andrésnio. Nojoriiri shiyaru jaquerootanaa quiquiaari. Jiyacaritij, nojoriiri shiyaru jaquerootariquiaa caminiajinia. ¹⁷ Jesuuri nojori sequesee:

—¡Miji, cua nuhuajitiuyare! Janiyari nia jiyatenutaniya pueya quioojuara saniniunijia, juhua sapitiaaja.

18 Nojoriiri ritia na shiyaru tiujiaquiaari. Jesuta quiojiya-reeri.

19 Socua shiitaniyojua na tacoji Jesu canujusacari, Santiago niquishiiri, tarajanu Juannio. Nojoriiri na shiyaru cushipirijionuuriquiaa botejinia. Nojoriiri Zebedeo niquiohua quiquiaari. 20 Jesuuri jiyacari nojori sequequiaari nata nojori quianurajuhuj. Nojoriiri na que Zebedeo tiujiaquiaari botejinia na naacunaata. Nojoriiri Jesuta quiojoquee.

Samaruraca pueyanojiniji pohuatasano
(Lc 4.31-37)

21 Nojoriiri Capernaum tiacajinia tiuquishii. Samaatenu juuca, Jesuuri tiuquiquiaari Pueyaso secojojua tiajinia. Tii pueya niishitiojonu coteequiaariiri. 22 Pueyari jiyanoehua jiuujiatequiaari na rootasano nojori tojishacari. Jesuuri juhua jiyaniijajanaa niishitiojoriquiaa. Majaari na niishitiojonu quiquiaari taa Moisés Rootasanojiniji niishitiojonaa niishitiojoquiaaricuaani. Nojoriiri saaja Moisés pohuatasanojiniji caminiujuquiaari, pueya niquiara nojori pohuatasacari Pueyaso Rupaa. 23 Samaruraca pueyanoori Pueyaso secojojua tiajinia quiriquiaa tiijuhuj. Nojuajaari nacaquiaari:

24 —¡Nazaret tiacajinijinio Jesunaa!, ¿quiaateeri tari canaacua nimiaa, canaa quia shaajanura? Janiyari quia niishiyani. ¡Quiaacujaari Pueyaso Niyanu!

25 Jesuuri cuno samaru juaarii. Na sequereeri:

—¡Quia sanaajere! ¡Quia tohuatare nio pueyanojiniji!

26 Jiyacaritij, samaruuri jiyanoehua taraatia miirii cuno pueyano. Jiyanoehua na sariyotequiaariiri na tohuatasacari nojuajiniji. Juhua macu tiujiaquee pueyanoori. 27 Puetunu pueyajanaari shiriiquitiuquiaari. Tama nojorijiaariija nequesoreetooquiaari:

—¿Casaatucuaa nioni? ¡Nioruhua quiarinio niishitiojosano! ¡Nio pueyanoqui cumaacaraca! ¡Taa samaruhua tojitiaa nojori na jiyarosacariiri!

28 Pueyari ritia caminiujuquiaari Jesujiniji puetunu Galilea jiyajiniajanaa.

Jesu naatanishacari Simón Pedro reyarucua
(Mt 8.14-15; Lc 4.38-39)

29 Jaara tohuareetaquiaariuhua Pueyaso secojojua tiajiniji, Jesuuri Simón, Andrés tiajinia quiaquiaari Santiagota, Juantanio. 30 Simón reyarucuaari naseeca matariquiaa maquetujinia. Cusosutuhuj. Tiajinia quiniaari Jesu sequeturee nojuaja cusosu mataa. 31 Jesuuri nocua canujiyaree. Na

juaashiquiajiniji cusosu sanaseeri. Na cusonuuri seetanujuaanaa ritia taji quiaari nocuaji. Naacujitij, nojuajaari pueya mianuutenu coteequiaari ritia.

Jesu naatanijosacari queraatia cusosuhua

(Mt 8.16-17; Lc 4.40-41)

³² Shusha ninishacari, Jesuucua patootasaaquiaariiri puetunu cusosuhujanaa, samaruhuaraca cusosu pueyanio. ³³ Puetunu cuno tiacajiniji pueyajanaari tia tohuateyaji rerequeequiaari tee Jesu quiriquiaacuajani. ³⁴ Jesuuri queraatia puetunu tamaatia cusonujuaanaa naatanijioquiaari na rupaa cumaacata. Queraatia samaruhua tohuatanijioquiaari tamasaca pueyajinijijaariuhuj. Samaruhuari niishiquiaari cante Jesuni. Nocuaji, majaari Jesu shanacunu quiquiaari samaruhua pocuanura quenaaja.

Jesu pahuatasacari Pueyaso rupaa Galilea jiyajinia

(Lc 4.42-44)

³⁵ Jesuuri jiyanhua tariquicuaji sanequiaari, ninishiqui quishacarijia. Tiacajiniji quiaquiaari tamaquiriaari, tii Pueyaso na secojonura tamajaaja. ³⁶ Na nuhuaji, Simónri Jesu pajenuucua quiojoquiaari, nata quiniaata. ³⁷ Jaara na riuriatatuquiaari, na sequetuseeri:

—¡Puetunu pueyajanaa quia juureta!

³⁸ Jesuuri saaja nojori sequeree:

—Pa quiaare juhuari catecanaataja tiacajinia. Tii pa pahuatarehua Pueyaso rupaa pueya niquiara. Janiyacuajaari cunora jiyasohuaja tohuataareeni.

³⁹ Naacujitij, Jesuuri puetunu Galilea jiyajiniajanaa ru-cuanejoquiaari. Pueyaso rupaa pahuataquiaariiri Pueyaso secojojua tiacajiniaqueya puetunu Galilea jiya tiacajiniajanaa. Nojuajaari samaruhua tohuatanijioquiaarijiuhuj.

Jesu naatanishacari lepraraca pueyano

(Mt 8.1-4; Lc 5.12-16)

⁴⁰ Lepraraca cusosu pueyanoori Jesuucua catecanoquiaari. Jesu cariquimiaji mojuquetaseeri. Na sequereeri:

—Quiaa jaara paniri, quia naata cua naataniniu cua cusonujiniji.

⁴¹ Jesuuri nocua taraajequiaari. Na juaashiquia niaree nocuaari. Na sequereeri:

—Taaquiririnij. Quia naataniniu paniyanijia. Quia cuaqueya cuara jeequehuara.

⁴² Jesu jaara naa na sequequiaaritij, na lepraari ritia cushiriiquii. Na cuaqueyajiniji shaajequiaariiri na cusonu.

Na cuaqueyari maniniara quiquiaariuhua. ⁴³ Na jiyaroy-aquishacarijia na naatanishano pueyano, Jesuuri jiyanoehua na rootaquiaari. Na sequereeri:

⁴⁴ —¡Cua tojiri, majaari pueya quia pohuatanu cua miishano! Saaja pueyacuara secojonaa jiyaniijia quia cuaqueya quia niqitishii, na cartenuhuara quiajaniya, pueya tajinia quia rucuanefonuhua juhuajaniya. Mariyata ritia quia niqitiore quia seru Pueyasooacara catijasocoriquiano. Naa quia miiri taa Moisés niishitiojoquiaaricuajani, puetunu pueyajanaa niishiniuria quiaa tari naatarohua quia cusonujiniji.

⁴⁵ Cuno pueyano jaara quiaquiaari, juhuacatecara pohuataquiaari puetunu pueyajanaari taa na naatanishaarohuani. Naaratej, puetunu pueyajanaari Jesu niqiniu panijia. Cunora, Jesuuri maja tari na naata tiuquiniu quiquiaari juhuajaniya tamonu tiacajinia. Nocuaji Jesuuri pueya quiyaquishaqui rucuanefojua. Naajaa, puetunu cuno jiyajiniji pueyajanaari saaja nocua nijioquiaari na niqiniuria.

2

Jesu naatanishacari cumatacuruhuana cusosu
(Mt 9.1-8; Lc 5.17-26)

¹ Na rucuanefonu nuhuaji, Jesuuri Capernaum tiacajinia tiuquiquiaariuhua na saquiriojosano pueyata. Pueya jaara niishiquiaari Jesu tari na quijia tiajinia tiuquiriohua, ² queraatia pueyari nocua nijioquiaari cuno tiajinia. Nojoriiri tiaco mishiquiaari, tohuateyajijiuhuaj. Jesuuri cuno pueya niqiuara pohuataquiaari Pueyaso rupaa. ³ Jesu quishacari tii, nocua patasaaquiaariiri pueyano cusosu na matujinia. Cuatro pueyari na patamaa. Cuno cusosuuri pootia mataja quiquiaari pueyaracaanu, cumatacuruhuana na quiniuucua. ⁴ Cusosu patanaari maja na naata tiaco tiuquitianu quiquiaari Jesuucua, puera pueya rerequesacari tohuateyaji. Nocuaji nojoriiri tia cacojiria cusosu tacataquiaari tacatuhuoco. Nojoriiri tia nijinia cuhuataquiaari. Namitia Jesu nujuasaquijianaa cuhuataturee tiaari. Na nuhuaji, tia cuhuocojiniji, Jesuucua roshinitiasaareeri cusosu na matujinia. ⁵ Jesuuri cusosu patanaa pueya niquirii seetanujuanaa nocua tiuyano. Naaratej, Jesuuri cusosu sequereeri:

—Quiyanunaa, sesa quia miishanojiniji quia jiyanoorii taricujaniija.

⁶ Moisés Rootasanojiniji niishitiojonaari tii cajitiuriquiaa.
⁷ Nojori tojishacari Jesu jiyanoehua cuno pueyano, nojoriiri

niishiriojonuuree: “¿Casaara nio pueyano pocuaa naani? Majaari quenaaja pueyano naata pa jiyanooni u sesa pa miishanojiniji. ¡Nojuajaari tama na cuaqueyajaaja jiyateya juhua Pueyaso na quiniuria! ¡Cunoori jiyano hua sacuaraatia! ¡Saaja Pueyaso cutaraari na naata pa jiyanooni u!”⁸ Jesuuri tamaajaaja ritia niishiquiaari noojiainia naa cuno pueya niishiriojonuusano. Jesuuri cunora nojori sequeree:

—¿Casaara naa nia niishiriojiyani?⁹ ¿Casaate jiyajeneshiya sequenurani: “Sesa quia miishano tari jiyanoosharee”? ¿Mariyata jiyajenetateeri sequenurajuhuaaj: “Quia sanere. Quia matu quia pataarohua”?¹⁰ Seetanujuanaa nia sequeyanijia, janiyari quiaritia nia niishitiniutianiyani, pueyano cua quishacari mijiria, naajaa, janiyari Pueyaso cumaaca jiitiaa sesa miijiaca cua jiyanooniuriani.

Jiyacaritij, Jesuuri cumatacuruhuana cusosu sequeree:

¹¹—Cua tojiri. ¡Quia sanere! Quia matu quia patare. Quia tiajinia quia quiaarohua.

¹² Cusosuuri ritia sanequee. Pueya niquiara na matu pataarohuari. Naaratej, pueyari jiuujiatequiaari. Pueyaso maniniuhuaqueetatureeri. Cuno pueyari naa sequetuquiaaritia, na shuquiritiasacari Pueyaso:

—¡Majaari quenaaja pa niquiniu quiquiaari naa miishanotej!

Jesu sequesacari Leví na nuhuajiniuria
(Mt 9.9-13; Lc 5.27-32)

¹³ Na nuhuaji, Jesuuri na saquiriojosano pueyata tacatequiaariuhua caminia casaqueyajiria. Queraatia pueyari nocua nijioquiaari. Jesuuri cuniqui nojori niishitiojoquiaari Pueyaso rupaa. ¹⁴ Na nuhuaji, Jesu quiijosacari na saquiriojosano pueyata cuniquiji, Jesuuri Leví niquimaa cajiyano Roma tiacajinia quijia jiyaniijiaara cumaneeca masejojua-jinia. Nojuajaari Alfeo niyanu quiquiaari. Jesuuri na sequeree:

—Miji. Cua nuhuajiyare.

Jiyacaritij, Leviiri sanequiaari. Jesu pueyanora quiaquiaariiri.

¹⁵ Cuno niucuaaja, Jesuuri Leví tiajinia miaqueriquiaa. Leví tiajinia miaquenuuriquiaajaariuhua queraatia narta cumaneeca masejona. Queraatia tamasa pueyari nojoritia miacquenuuriquiaajuhuaaj, canapue Judiocuaca camarucua sequiquiaari sesa pueyatacujani. Nojoriiri Jesuta miacquenuuriquiaa, Jesu saquiriojosano pueyatano. Jiyano hua queraatia pueyari Jesu rupuenaa quiriquiaa. ¹⁶ Moisés Naajioneejiniji niishitiojona, mariyata Fariseocuaca jaara Jesu

niquirii cuno pueyata miaqueyano, nojoriiri Jesu saquiriojosano pueya nequesotaquiaari:

—¿Casaara nia niishitiojona miaqueya cuno cumaneeca masejonaatani, mariyata cuno sesa miijiacatani? ¿Casaara cuno pojoritia na ratuyajaaniuhuj?

¹⁷ Jesuuri cuno pueya sequesano tojirii. Nojori sequeree miriquiri:

—Jiyotuucaari maja na paniniu naarajona. Cante cuso-suni, cuno cutaraari naarajona paniya. Majaari cua ninu quiquiaari maninia miijiacacua. Niquiaari cutaranijia nia sequesano sesa miijiacacua jiyanooniuria sesa nojori mijiosanojiniji.

Pueya nequesotasacari Jesu, casaara na pueya miaquenu carteyaquiyaari, nojori shuquiritiniuria Pueyaso

(Mt 9.14-17; Lc 5.33-39)

¹⁸ Tamacari, Tiuquinijona Juan tojitiajaca, mariyata Fariseocuaca miaqueyaquishacari, tamasaca pueyari Jesuucua nijioquiaari. Na sequetuseeri:

—¿Casaara quia saquiriojosano pueya carteyaquiya miaquenu quenaajani? Tiuquinijona Juan pueya cutaraari miaajecoquiaa Pueyaso nojori shuquiritiniuria. Fariseocuacaari naa miiquiaajuhuj. ¿Casaara naa quia pueya miyaquiyaaniuhuj?

¹⁹ Jesuuri nojori riucuaaree miriqui:

—¿Masuusano pueyateeri miaajenutaniya nojori jaara queranacusaqui quiya, pueyano camishacari maaji? Camiriquiano pueyano jaara nojoritia quiyajaa, maja na naata nojori miaajenu, shuquiriaatia nojori quishacari.

²⁰ Tamacari cutara, cuno camiriquiano pueyanoori nojori tajiniji rishaanutaniya. Cua pueyari jiyacari miaqueyaquiniutianiya cutara.

²¹ Seetanujuanaa nia sequeya cutaranijia, toque mocua cuhuocoori maja na naata cushipirijiosaanu quiariqui toquerauta. Jaara jeequesaare, quiarinio toquerauri posequeja. Naacuajitij, toque mocua cuhuocoori socua queraaquetaree. ²² Naajuhuj, quiariniacu uva caacaari maja na naata racatasaanu shoque tariucuacojinia. Quiariniacu uva caaca jaara jerema, shoque tariucuaco pojuaretaari. Naacuajitij, paari najuhuana niitiaa uva caacani, shoquenio. Cunora, maninia cutaraari quiariniacu uva caaca shuujionu shoque quiariquiojinia, maja vino niitiasaanura najuhanaj, shoquenio.

Jesuuri naa pohuataquiaaritij, pueya na niishitiojonura quiarinio na niishitiojosanoori maja na naata cojitishaanu tariucuacaanu niishitiojosanota.

Jesu pueya carojotasacari trigo samaatenu juuca
(Mt 12.1-8; Lc 6.1-5)

²³ Jesuuri samaatenu juuca quiojoquiaari cuhuariquiajini-aaco na saquiriojosano pueyata. Na pueyari jiyacari trigo carojotanu coteequiaari na miaajenuta. ²⁴ Fariseocuaca jaara na niquiquiaari, Jesu sequetureeri:

—¡Quia niquiri! ¿Casaara quia saquiriojosano pueya pooni-jiya samaatenu juucani? ¡Pueyaso Rupaajinia, paari piriyo-joshiyacujani maja samaatenu juuca pa poonijionura!

²⁵ Jesuuri nojori sequeree:

—¿Majateeri nia serojonu quiquiaari Pueyaso Rupaajinia pa supuetanaa jiyaniijia David miishanojiniji, nojuaja jaara miaajequiaari na cojiniaata, nojori jiitiaaquishacari na coseyaca? ²⁶ Cuno quishacari, supuetana Abiatar pueyacuara secojonaa jiyaniijia quiquiaari. Davidri tiuquiquiaari Pueyaso Secojoua tiajinia. Nojuajaari Pueyasora niquitiosano panjiniji saquiaari. Cuno panri saaja Pueyaso Secojoua tia cojuanaa sasocoriquiano quiquiaari. Naajaa, Davidri na saquiaari. Na neecasequiaarijiaariuhua nata quiniaa pueyara.

²⁷ Jesuuri nojori sequequiaarijihuaj:

—Pueyasoori samaatenu juuca shipiniquiaari pueyara. Maja cutaraari Pueyaso shipininiu quiquiaari pueya, samaatenu juucara. ²⁸ Naaratej, pueyano cua quishacari mijiria, janiyari cumaacaraca cua Quejinijini cua sequenura casaa pa miiniutianiya samaatenu juucani. Janiyacuajaari samaatenu juuca camarnuni.

3

Jesu jeecasacari pueyano juaashiquia cuseetucjuara jooje-quetano

(Mt 12.9-14; Lc 6.6-11)

¹ Jesuuri Pueyaso secojojua tiajinia tiuquiquiaariuhua na saquiriojosano pueyata. Tii quiriquiaari pueyano, cuseetucjuara joojequetano juaashiquiaraca. ² Cuniqi quiniaa Fariseocuacaari shanacutariquiaa na niquiniuria taa Jesu miiniutianiyanoj. Nojoriiri tama sequetooreejaaja:

—¿Jesuteeri sesarucjua pueyano juaashiquia jeecanutaniya samaatenu juucani?

Nojoriiri Jesuucuaara saquiriojotanu paniriquiaa, nojuaja jaara samaatenu juuca poonijiore. ³ Jesuuri jiyacari sesarucjua pueyano sequeree:

—Quia sanere. Niya quia nujuasee canaa tajinia pueya niquiara.

⁴ Na nuhuaji, Jesuuri pueya nequesotaree:

—¿Casaate samaatenu juuca miishiyani? ¿Paate maninia miyani, paate sesa miya soj? ¿Pueyanote naatanishiya, moshijajanaa soj?

Nojoriiri sanaa niqutiariquiaa saaja, Jesu sequesacari naatej. ⁵ Jesuuri na shocuaqueya nujuatiuyano pueya niqunijioree na juaaniutia. Nojoriicua taraajeriquiaaajar-iuhuj, cumajiuujiaaca nojori quiniuucua. Majaari nojori niishiniu paniniu quiquiaari taa Pueyaso paniya pueyacua taraajeja pa quiniuriani. Jesuuri sesarucojua pueyano se- queree:

—¡Quia juaashiquia quia shiitiore!

Na juaashiquia shiitioreeri. ¡Jiyacaritij, na juaashiquiaari ritia jeequequee! ⁶ Fariseocuaca niquishacari naa Jesu mi- ishanotej, nojoriiri tohuareetaquee na juaaniutia. Nojoriiri Herodes panijiaa pueyata pocojoquiaari ritia, taa nojori monutaniya Jesuni.

Queraatia pueya rerequeejosacari caminia casaqueyajij

⁷ Na nuhuaji, Jesuuri quiojoquiaari caminiajinia na saquiriojosano pueyata. Queraatia pueyari na nuhuajiquiaarijuhua Galilea jiyajiniji. ⁸ Pueya niishishacari puetunu Jesu maninia miishanojinijijianaa na cumaacata, queraatia pueyari nocua nijioquiaari na niquniuria. Nojoriiri nocua nijioquiaari puetunu jiyacajinijiniojuanaa: Judea jiyajinijinio pueya, Jerusalén tiacajinijinio pueyajuhuj, Idumea jiyajinijinio pueyano. Nijioquiaarijiaariuhua Jordán moo taquijirajiniji pananu muetasamaji pueya, Tiro tiacajinijinio pueyano. Sidón tiacajinijinio pueyari nijioquiaarijuhuj na niquniuria Jesu. ⁹ Nocuaji Jesuuri na saquiriojosano pueya sequequiaari:

—Niocua juhuacarijia bote cojuare quiria, cua tacajara pueyacuaaji, maja pueya tanuujunura janiya.

¹⁰ Jesuuri jiyacari jiyanojua queraatia pueya naatanijioriquiaa. Nocuaji cusosuhuari Jesuucua riutioconeetariquiaa na quianura Jesu, nojori cusonujiniji nojori naataconuhua.

¹¹ Samaruhuaraca pueya jaara Jesu niqutiuhuaari, nojori- iri nocuara mojoquetacoquiaari. Naa nacatuquiaariiri:

—¡Quiaacuajaari Pueyaso Niyanu!

¹² Nocuaji Jesuuri nojori sequequiaari na juaaniutia, maja nojori sequenura pueya niqiuara cante nojuajani.

Jesu saquiriojosacari doce pueya na pueyajinijinio, na ru- paa pohuatariquiano

(Mt 10.1-4; Lc 6.12-16)

¹³ Na nuhuaji, Jesuuri tacaquiaari tuhuananuucua. Nojuajaari tiji sequequiaari cana na paniquiaaricujani. Nocua nijioquiaariiri na jiyaniquishano pueya. ¹⁴ Jesuuri doce pueya saquiriojoquiaari nata nojori quiniuria. Nojori jiyatereeri na jiyaramiquishocoriquiano, Pueyaso rupaa nojori pohu-atanura. ¹⁵ Nojori niqutioree na cumaacaari, cusosuhua nojori naatanijionura, samaruhua nojori tohuatejonurajuhuj. ¹⁶ Niiori na saquiriojosano doce pueya sesaca: Simón, Jesuuri na sesojoquiaari Pedro; Santiago, tarajanu Juannio. ¹⁷ Jesuuri nojori sesojoquiaari “Boanerges”. Naa sequenu paniyari nio, “Ritia juaajia, juhua miacana”. Nojoriiri Zebedeo niquiohua quiquiaari. ¹⁸ Socua quiquiaariiri Andrés, Felipe, Bartolomé, Mateo, Tomás, Santiagonio. Nojuajaari Alfeo niyanu quiquiaari. Socua quiquiaari Tadeo, Simónnio. Nojuajaari Romano pueya jatanu panijiaca pueya maanujini-jinio quiquiaari. ¹⁹ Quiquiaariijaariuhua Judas Iscariote, Jesu quiatequiaari mosocoriquianoni.

Judocuaca camarucua sapojosacari, Jesu samaruhua cumaaca jiitiaa

(Mt 12.22-32; Lc 11.14-23; 12.10)

²⁰ Na nuhuaji, Jesuuri na saquiriojosano pueyata tamonu tiajinia tiuquitiaquiaari tamonu tiacajinia. Quer-aaia pueyari tiuquitiaquiaarijuhua cuno tiajinia Jesuucua. Naacuaajitij, majaari nojori naata miaquenu quiquiaari. ²¹ Jesu tapueyocuaa jaara niishiquiaari naa nocuaajitij, nojoriiri nocua nijioquiaari na riniuucua juucua. Tama seque-tooriquiaajaariija:

—¡Jesuqui tari paatecara quiriijuhuanajaj!

²² Moisés Rootasanojiniji niishitiojonaa Jerusalén tiacajiniji nijiono pueyari saniniuujia naa sequetuquiaari Jesujiniji:

—Samaruhua jiyaniiija Satanáscajaari cumaaca niqutiorucuaa cuno pueyano. Cunora, samaruhua tohuatanijiya pueyajiniiji.

²³ Naaratej, Jesuuri cuno pojori sequequiaari nojori na niishiriojotenura:

—Miji, niya cua tojitiasee. ¿Pueyanoteeri na naata Satanás tohuatenu pueyanojiniji tama Satanás cumaacatajaaja? Maja na naata. ²⁴ Naajuhuj, mijiria jiya jiyaniiija jaara juayonuutaa tama na pueyatajaaja, nojuajaari maja na naata nujuatanu na paraa, jaara nocua nijioma. Nojuajaari shocotasaanutaniya. ²⁵ Naajaariuhuj, pueyano jaara tapueyocua-cata juayonuutare, majaari nojori naata jatiqui quiniu nojori tiajinia. ²⁶ Niaari saniniuujia cua sequeree, janiyana Satanás cumaacata tohuatanijioquiaa samaruhuanani. Satanás jaara naa miiritij, cuno maara tari quiri na shaajasaanurajanaa.

²⁷ Naajuhuj, pueyano maja na naata tiuquiniu cumueeca pueyano casamiriaca tiajinia, na casami na jaariuutianura, jaara coteenu na camaru morojiyaquiri. Pueyano jaara coteenu na camaru morojorejaatijia, naa cutara na naata na casami jaariuutianu.

²⁸ Seetanujuanaa nia sequeya cutaranijia, pueyano sesa miishanoori na naata jiyanooshaanu. Janiyajiniji sesa na pocuasanoori jiyanooshiyajuhuj. ²⁹ Saniniuujia, cante sesa rimiaaqueja Pueyaso Sohuanuucuarani, cuno cutaraari maja na jiyanooshaanu quiniutianiya quenaaja. Jiyano pueyanotej, nojuajaari pueyaracaanu saniitiosaanutaniya.

³⁰ Jesuuri naa nojori sequequiaaritij, pueya sequesacari, nojuajana samaruraca quijia, Pueyaso Sohuanu cumaacata na tohuatejosacari samaruhua.

Jesu nucuajiniji pohuatasano, Jesu tapueyocuacajinijinio
(Mt 12.46-50; Lc 8.19-21)

³¹ Jiyacaritij, Jesu nucuuari tiuquiiioquiaari, Jesu tapueyocuacanio. Majaari tiajiniaaco na tiuquitianu quiquiaari Jesuucua. Saaja carijiniacumaji tamonu pueyano sequetureeri na numootenura Jesu nojoriicua. ³² Jesu shocuaqueya cajitiuniaari Jesu sequeturee:

—Quia nucuana quia tapueyocuacata jati carijiniacuma nujuatiuya. Quia pajenuyaquinia.

³³ Jesuuri saaja nojori sequeree:

—¿Cante cua nucuani, cua tapueyocuacajuhuj?

³⁴ Na nuhuaji, na shocuaqueya cajitiuniaa niquinijioreeri. Sequereeri:

—Nio pueyari cua nucua, cua tapueyocuacanio. ³⁵ Cante cua Que panishano miijiani, nojuaja cutaraari cua tarajanu, cua rimiatsu, cua nucuanio.

4

Miriqui pohuatasano natoojouja pueyanojiniji
(Mt 13.1-9; Lc 8.4-8)

¹ Jesuuri socua Pueyaso rupaa niishitiojonu coteequiaar-
ihua caminia casaqueyaji. Jiyanoohua queraatia pueyari
rerequeejoquiaari nojori tojtianura nojuaja. Boteeri tii
cuatariquiaa caminiajinia. Naacuajitij, Jesuuri botejinia
tacaquiaari. Tii cajishiiri, caminia casaqueyaji rerequee-
jono pueya na niishitiojonura tiji. ² Cuno pueya niishi-
tiojoreeri queraatia miriqui pohuatasanota. Na niishitio-
josacari pueya, Jesuuri naa sequequiaaritij:

³ —Nia tojitiare nio sequesano. Tamonu juuca, pueyano
na cuhuariquiajinia natoojonuucua quiaquiaari. ⁴ Na ja-
cutasacari, nucuaco totequiaariiri tajaaca. Shuhuari na

miojoree. Majaari na moritianu quiquiaari. ⁵ Tajaacaari totequiaari sai tajiniaqueyajuhuj. Majaari cuniqui puera jiyá quiniu quiquiaari na maashiniuria. Naacujitij, najuhuaana ritia moritiaquiaariiri. ⁶ Pananu jaara jaquiaari, na catijareeri. Maja puera nujuacaraca na quishacari, ritia sorequeeri. ⁷ Tajaacaari totequiaarijuhua riyocuaca tajinia. Jiohuacacaari socua ritia maashiquiaari. Natauri tarinitiu-cuara quiquiaari saniniuujia. Naaratej, majaari na muetunu quirii. ⁸ Tajaacaari saniniuujia totequiaari maninia jiyajinia cutara. Cuno cutaraari maninia maashiquiaari cuno jiyajinia. Senoosaareeri queraatia. Niquiriyatu jiyonajiniji carojosaquiaariiri treinta jajau. Tanajajiniji socua sesenta jajau, najuhuj socua cien jajau tanajajiniji.

⁹ Jesuuri nojori sequeree:

—Cante numaaracani, cuara cua sequesano tojitiaara.

Casaarate miriqui pohuatasanoni
(Mt 13.10-17; Lc 8.9-10)

¹⁰ Na nuhuaji, Jesu quishacari tamajaaja, na saquiriojosano doce pueyari na nequesotaquiaari, tamasaca pueyanio. Cuno pojoricujaaari Jesu shuriucua quiriquiaa. Nojoriiri Jesu sequeree:

—¿Casaa miriqui quia pohuatasano sequenu paniyani?

¹¹ Jesuuri nojori sequeree:

—Pueyasoori nia niishitiojiya jiyasohua na miiniu panishano, taa na muerasu na jiiitianutaniya pueyaracaanu cutarani. Tamasacara saniniuujia, canapuate Pueyaso ruuretajacani, nojoririaari miriqui pohuatashiyacujua. ¹² Naacujitij, nojoriiri cua cumaacata cua miishano niquitiuquiaa pueyaracaanu najuhuanaj. Majaari nojori niishiniu na niquishano. Najuhuj, nojori jaara Pueyaso Rupaa tojitiare, majaari na niishiniu na tojishano. Nojori jaara niishiri, nojori mariqui noojia tacatorohuari sesa nojori miishanojiniji nojori jiyanooshaanura.

Jesu niishitiojosacari miriqui na pohuatasano natoojonajiniji

(Mt 13.18-23; Lc 8.11-15)

¹³ Jesuuri nojori sequequiaarijuhuj:

—¿Majateeri nia niishiniu miriqui cua pohuatasano? ¿Ni-aatucua taa niishiriquia socua tamonu cua pohuatasanoni? ¹⁴ Cua pohuatasano cuhuariquiajinia natoojonajinijini, nojuajaari juhua Pueyaso Rupaa pohuatana. ¹⁵ Noojiaqueya pueyari juhua nucuaco toteno jajau. Najuhuaana Pueyaso Rupaa tojiyari. Na tojinu nuhuaji, Satanásri nimiaa. Nojuajaari puetunu Pueyaso Rupajaanaa noojiajinia natasano

jaariutiaguaa. ¹⁶ Tamasaca pueyari juhua noo jajau sanini-uujia, sai tajiniaqueya jacutasanotej. Nojori jaara Pueyaso Rupaa tojiri, jiyanohua na timitiaari. ¹⁷ Cunoori juhua secaja nujuacaraca moritiano jajau, sai tajinia na moritianuucua. Majaari na rishiniu. Naajuhuj, cuno pueya jaara saniniu-jiushaare taraatia, jaara naquiya miishaarejuhuj Pueyaso Rupaa tojijiaa nojori quiniuucua, nojoriiri ritia Pueya-soocua tiuuniu tarinitiaja. ¹⁸ Noojiaqueya pueyari juhua noo jajau, jiohuacaca tajiniaqueya jacutasanotej. Pueyaso Rupaa tojijari. ¹⁹ Na nuhuaji, nojoriiri puera niishiriojiya taa nojori quiniutianiya maninia mijiriani. Nojoriiri sapojosaaquiaa puera na shuquiritiasacari mijiria casami. Nio jiya casamicua jiaatiaquiaajaariuhuj. Puetunu cunorajanaa, nojoriiri Pueyaso rupaa tojitiaquiaa na numaa shama. Naacuajitij, nojoriiri juhua muetuhuo quiya. ²⁰ Noojiaqueya pueya sanini-uujia, nojori cutaraari maninia tojitiaja Pueyaso Rupaa. Cuno pueyari juhua cuhuariquiajiniya natau, queraatia muetujua, maninia jiyajinia natasano. Cuno maninia nataujinijinioni, noojiaqueyari maja puera na muetunu. Tarajanuuri maninia muetuna. Naajuhuj, tarajanuuri jiyanohua queraatia muetujua. Naajuhuj, cante Pueyaso Rupaa tojijia cutarani, nojajaari juhua maninia muetujua natau.

*Pueyaso muerasuuri juhua samari
(Lc 8.16-18)*

²¹ Jesuuri nojori sequerejuhuj:

—¿Samaritiutiiri noshitishano, conatu cariquiaco jamotaso-coriquiano, maquetu cariquiacojuhuj? Maja. Samaritiiu jaara noshitishaare, morijiuucua morotashiyari, tiajiniaaco na cuhuatanura maninia. ²² Naajuhuj, jiyasohua nia miishanoori puetunujuanaa niishishaanutaniya. Cua pohu-atasanoori juhua samaritiiu, puetunu pueya jiuujiaajanaa na cuhuatanura. Naajuhuj, Pueyaso Rupaa jaara nioojiajiniya jamosaare, juhua muetunutaniyari puetunu pueya niqishocoriquianojuanaa. ²³ Niajaniya, canapuate numaa jiiitaani, nia tojitiare cua pohuatasano.

²⁴ Jesuuri naa nojori sequequiaarjiiuhuj:

—Nia niishiri nia tojishano. Nia shanacutajataja, teyanota nia shanacujuquiaa nia niquitiosocoriquianocuajani, Pueya-soori cunotaja niaara shanacunutaniyajuhuj. Naacuajitij, niaa jaara capora quiriqiaa tamascata, Pueyasoori socua capora quiniutianiya niaarajuhuj. ²⁵ Cante na rupaa tojijiani, socua na niishitiojonutaniyari. Saniniuujia, canapuate na rupaa tojitiaaquiiani, secaja na niishishanoori puetunu jaariutiasaanutaniyajanaa.

Miriqui pohuatasano natau moritianojiniji

²⁶ Jesuuri nojori sequequiaarijuhuaj:

—Nia niishitiojonu saniriiria taa Pueyaso muerasu supuequiaani, Pueyaso jiitiasano nojori quiniuria. Tamonu pueyanoori na cuhuariquiajinia nataquiaari jajau. Na nuhuaji, majaari na tacatenu quiquiaariuhua pueyaracaanu na natasano na niquiniuria. ²⁷ Cuno pueyanoori na natanu nuhuaji camueenujuquiaari. Cuno jajauri moritiaquiaari juuca, niucuanio. Maashiquiaariiri na camaru maquesacari, na niquishacarijuhuaj. Tamonu juuca, na camaru tacatesacariuhua na natasano na niquiniuria, tariucua puereetuucari quiquiaari. Majaari na camaru niishiniu quiquiaari taa na moritiareeni. ²⁸ Jiyari tamajaaja moritianijia natau. Coteenu moritiaari na jiyona. Na nuhuaji, na jajau coori supueya. Na nuhuaji, na jajauri querasapijiaacara quimiaa na noshiniuria. ²⁹ Na natau jaara noshimia, na senoonari na senoojua na racatasocoriquiano. Pueyaso muerasuuri naa miishaanutaniyajuhuj.

Miriqui pohuatasano mostaza jajajuniji

(Mt 13.31-32; Lc 13.18-19)

³⁰ Jesuuri socua sequequiaari:

—¿Juhua casaa niquishanote Pueyaso cumaacani? ¿Casaatate pa naata na saniniuuniuni, taa Pueyaso Rupaa poonijiya pueya jiuujiajiniani? Quiarijia nia pohuatareeraj. ³¹ Pueyaso Rupaari pueya jiuujiajinia quiya juhua mostaza jajau. Mostaza jajauri jiyanojua socua shiitianiyojua puetunu tamasaca jajajunijijianaa, majaari puera maatia na niquishaanu. Pueyaso Rupaari naajuhua pueya jiuujiajinia, nocua nojori tiushacari. ³² Mostaza jajau jaara natsaare, maashiyari socua puereetuucara tamasaca nataujiniji. Na cashacucuaari maashiya puereetucucara. Shuhuari na cashacucua cariquiaco nujuatujua shinishiqui.

Pueyaso Rupaari pueyano jiuujiajinia naa cumaacaracajuhuj, na jataniniuria na tojjia, maninia miijia na quiniuria.

Jesu niishitiojosacari pueya saa na miriqui pohuatasano-taja

(Mt 13.34-35)

³³ Jesuuri naa queraatia miriqui pohuatasanota niishitiojoquiaari Pueyaso rupaa saaja pueya niishishano casaata. Majaari socua jiyajeneta casaa na pohuatanu quiquiaari. ³⁴ Naacuajitij, nojuaja jaara casaa niishitiojonu paniquiaari pueya niquiara, nojuajaari puetunujuanaa naa niishitiojoquiaari miriqui na pohuatasanota. Tamajaaja nojori quishacari saniniuujia, Jesuuri na saquiriojosano pueya niishitiojoquiaari maatia, casaa miriqui na pohuatasano sequenu paniriquiaani.

Jesu pueyajetesacari paratu, mohuaca cajiniuucuanunio
(Mt 8.23-27; Lc 8.22-25)

³⁵ Cuno juuca jaara niniquiaari, Jesuuri na saquiriojosano pueya sequequiaari:

—Caminia taquijiria pa quiaare.

³⁶ Cuniqijia pueya tiujiatiuyareeri, nojori quianura caminia taquijiria. Na pueyari Jesuta quiojiyaree cuno botejiniaja, tee nojuaja quiriquiaacuajani. Jesu quiasacari caminia taquijiria, tamasaca boteeri nata jaatequetariquiaajuhua.

³⁷ Maja puera na quenaacoyaquishacarijia, maruuri paratuta canashiyaquiji jiyanojua niquiaari nojoriicua nojori niuutiasacari. Paratuuri jiyanojua cajiniuucuatequiaari mohuaca nojori botejiniacumara. Nocuai na boteeri tari quera tiuquitiariquiaa mohuacata. ³⁸ Jesuuri jiyacari bote pajamaji maqueriquiaa juhuajaniya. Na nacaacuaji mataja caco maqueriquiaari. Na pueya niucujatusacari nojuaja, Jesu sequetureeri:

—¡Niishitiojonanaa!, ¿majateeri quia puerenuujua paa tari tiuquitiaareeni?

³⁹ Jesuuri sanemaa. Paratu sequereeri, caminianio:

—¡Quia suraajere! ¡Tariucujaj!

Paratuuri tajimiohua. Caminiaari pootia maquee.

⁴⁰ Jesuuri na saquiriojosano pueya sequeree:

—¿Casaara nia puereya puerani? ¿Niaateeri Pueyasocua tiuyashijaca quiyajaaruhaaj?

⁴¹ Nojoriiri jiyanojua shiriiquitiurii. Tama nojorijiaarijia sequetooquiaari:

—¿Cantejaaranojoni? ¡Paratu, caminiaari na tojirii!

5

*Gerasa jiyajininio samaruhuaraca pueyanojiniji pohu-
atasano*

(Mt 8.28-34; Lc 8.26-39)

¹ Na nuhuaji, nojoriiri caminia taquijiria tiuquijioquiaari, Gerasa jiyajinia. ² Jesu tacasacari botejiniji, nocua niquiaariiri tamonu pueyano raacajiniji, macunucua nuchua paaquiosaquiji. Cuno pueyanoori samaruraca quiquiaari. ³ Raacajinia quijia quiquiaariiri. Majaari na naata moronu quishaaquiaari quenaaja cumayocua shipinishano casaata. ⁴ Pueyari juucua na morojouja, na cashacucua, na juaashiquiacanio. Saaja na turojotajaari. Majaari quenaaja na nuuatata pueyano quiniu quijia.

⁵ Pueyaracaanu tuhuananuhuacua rucuanajoquiaariiri, raacajinianio. Na rucuanajosacari sariyacojojuaari, juuca, niucuanio. Tama na cuaqueyajaaja piquijia

saitiaari. ⁶ Nojuaja jaara Jesu niqiquiaari tucuacaanuji, nocua netequiaariiri. Jesu cariquimiaji mojuquetaseeri. ⁷ Jesuucuaara nacareeri:

—¿Casaacua miji quia niyani, Jesunaa, jiyocuacaanu Quijia Pueyaso Niyanunaa? ¡Quia secojiyanijia maja naquiya quia miiniuria janiya!

⁸ Samaruhuaraca pueyanoori naa sequeree Jesutej, tari Jesu sequenuucua samaru nojuajiniji na tohuatanura.

⁹ Jesuuri na nequesotaree:

—¿Taa sesanaacatequia?

Na riuacuareeri:

—Canaa jiyanoohua queraatiani, cunora cua sesa “Queraatia”.

¹⁰ Cuno samaruuri jiyanoohua Jesu secojoriquiaa maja nojori na taanuunura cuno jiyajiniji. ¹¹ Cushiyari jiyacari cateca naataja miaquenuuriquiaa tuhuananucari. Jiyanoohua queraatia cushiyari quiriquiaa. ¹² Samaruhuari Jesu secojoree naatej:

—¡Canaa quia jiyarore canaa tiuquitianura cuno cushiyacua!

¹³ Jesuuri samaruhua jiyaroree. Samaruhuari pueyanojiniji tohuareetaquee. Cushiyacua tiuquitiaseeri. Dos mil cushiya naasucuaari quiriquiaa. Cuno cushiyari cocuatequiaari, samaruhuaraca nojori quiniuucua. Tacinijini tote-see caminiajiniaari. Puetunujuanaari tii shushiniuuquiaari.

¹⁴ Cushiya cojuanaari jiyacari netecuaturuhua na shiriinquiniutia. Na tiacajinia pueya poojotanuuhua nojori niquishanoori, cuhariquiacajinia quinia pueyano. Nocuaji pueyari nijioquiaari nojori niqiniuria casaate quiquiaarini. ¹⁵ Cuno pueya jaara tiuquiiioquiaari Jesu quishaqui, cuno tarijia samaruhuaraca quijia pueyano niqutiushiiri panaatia cajiyano, toqueraca. Naa nojori niquishacari nojuajatej, pueyari pueretuquiaari. ¹⁶ Jesu miishano niqutiuniaari cuno pueya pohuataquiaari taa samaruhuaraca pueyano miishaareeni, mariyata cushiyajinijinio. ¹⁷ Cunora, cuno pueyari Jesu secooteree na quianuhua cuniquiji, nojori jiyajiniji.

¹⁸ Jesu jaara tacaquiaariuhua na botejina, cuno tarijia samaruhuaraca quijia pueyanoori nata quianu paniquiaari juucua. ¹⁹ Majaari Jesu paniniu quiquiaari. Na sequeree saajaari:

—Quia quiaarohua quia tiajina quia pueyacua. Quia pohuatasuhua nojori taa Pueyaso miirii quiajaniani, quiocua na taraajenuucua.

²⁰ Pueyanoori quiaarohua. Nojuajaari pohuatanu coteequiaari cuno na jiya diez tiacajinia taa Jesu miiquiaari

maninia nojuajani. Puetunu pueyajanaari jiuujiatequiaari nojori tojshacari nojuaja. Cuno diez tiaca sesa quiquiaari “Decápolis”.

Jairo niyatujiniji pahuatasano, Jesu toque quiana maajijini-jijuhuj

(Mt 9.18-26; Lc 8.40-56)

²¹ Jesu jaara niuutiaquiaariuhua botejinia caminia taquijiriohua, queraatia pueyari nocua tiuquiiioquiaari na quishaqui. ²² Jesu quishacarijia caminia casaqueyaji, nocua tiuquiquiaariiri tamonu pueyano, Pueyaso secojojua tia jiyaniijia. Na sesa quiquiaari Jairo. Jaara Jesu niquiquiaari, na cariquimiaji mojuquetaseeri. ²³ Naa Jesu secojoree jiyanohuari:

—¡Quiyatu quera cusoya! ¡Miji, quia juaashiquia nocua quia niaquee na naatanuhua!

²⁴ Jesuuri jiyacari nata quiaaree, na saquiriojosano pueyano. Puera jiyanohua queraatia pueyari na nuhuajiriquiaa. Jesu tanuujuturiquiaari. ²⁵ Cuno pueya tajinia quiriquiaajaariuhua tamonu cusosu maaji. Doce marijiaari tari na shoconujuquiaari pueyaracaanu na naatesacari. ²⁶ Queraatia naarajonaari nareja naquiya na miiquiaari. Socua na jiyacatojoquiaari saajaari. Najuhuana na cumaneeca puecaquiaariiri na naarajosaanura juucua. ²⁷ Cuno maaji jaara Jesujiniji tojiquiaari, na nijiniji na nuhuajiquiaari jiyasohuari. Na tucuaque toque quiasee pueya tajiniaari. ²⁸ Cuno maajiiri tama sequequiaarijiaaja: “Janiya jaara quenaaja na toque quiareni, janiyari naatanutaniuhua”. ²⁹ Naacuajitij, na quiasacari Jesu toque, na nanacaari ritia curetaquee. Jiyacari na niishiquiiri. Tama sequequiaarijiaaritia: “¡Cua cusonu tari tajiyatema!” ³⁰ Jesuuri jiyacari niishiquii nojuaja na cumaacata cusosu naatanirii. Cunora, nojuajaari tacarecuaree na niquiniuria pueya. Pueya nequesotareeri:

—¿Cante cua toque quiareeni?

³¹ Na saquiriojosano pueyari na sequere:

—Quiaacuajaari queraatia pueya niquiia quia tanuujiyano. Quiaari najuhuana nequesotaariquiohua saajuhuj: “¿Cante cua quiareeni?”

³² Jesuuri saaja na shocuaqueya niquinijioriquiaa, na niquiniuria cante na toque quiareeni. ³³ Maajiiri jiyacari tetecariquiaa na puerenuta. Jesu cariquimiaji mojuquetasee ritiaari. Nojuajaari niishiquiaari Jesu cumaaca na naataniriohua. Cunora, Jesu sequeree puetunu seetanujuanaari. ³⁴ Na nuhuaji, Jesuuri na sequeree:

—Sanaunaa, cucua quia tiuuniucua, quiaacuaja tari quia cusonujiniji naatarohua. Juhujaniya quia quiaarohua. Quia cusonucujaja tari tajiyatemohua quiocuaji.

³⁵ Jesuuri cuno maajiicua pocuariquiaajaa pueya tiuquijiosacari Jairo tiajiniji. Cuno pojoriiri maaji samiriu que sequetusee:

—¡Quia niyatu tari cusoquee! Maja najuhuana Niishitijona riniu quia tiajiniaara.

³⁶ Jesuuri nojori sequesano tojirii. Naaratej, maaji samiriu que sequereeri:

—¡Maja puerenu! ¡Cucua quia tiuuri saaja!

³⁷ Majaari Jesu paniniu quiquiaari tamasaca quiojonura nata. Saaja nata quiojoquiaari cutaraari Pedro, Santiago, Santiago tarajanu Juannio. ³⁸ Nojori jaara tiuquijioquiaari Jairo tiajinia, pueya niquishii nujuquetiuyanoori, sariyocatiuyanonio. ³⁹ Jesu jaara tiajiniaaco tiuquiquiaari, cuno pojori sequereeri:

—¿Casaara puera nia cojuatuneyani? ¿Casaara naa nia nujuqueyani? Maaji samiriu maja macu. Nareja maqueyano.

⁴⁰ Pueyari saaja Jesu saroojotaquiaari nojuaja na rerequetenuta, naa nojori na sequenucuatej. Jesuuri cunora nojori tohuatanijioree tiajiniaacoji. Jesuuri macuucua sohuacamara tiuquinitiaquiaari Jairo necocuata, tama na pueyajaajanio, cuniqui tii nata qutiuriquiaani.

⁴¹ Macu juaashiquiajiniji quiaaseeri. Na sequereeri:

—Talita, cumi.

Nioori pueyano rupaajinia sequeya: “¡Maaji samiriuniaa, quia sequeyanijia, quia sanere!”

⁴² Jiyacaritij, maaji samiriuuri ritia sanequee. Juhucatecara rucuanereeri. Doce marijiaari tari cuno maaji samiriu shocojoquiaari na queyata na quishacari. Pueya niquishacari naa Jesu miishanotej, nojoriiri jiyanhua jiuujiatequiaari. ⁴³ Jesuuri jiyanhua nojori rootaree maja nojori pohuatanura pueya niquiara na miishano. Saaja sequeree cutaraari maaji samiriu cuara mianuutesaaria.

6

Jesu quishacari Nazaret tiacajinia (Mt 13.53-58; Lc 4.16-30)

¹ Jesuuri cuniquiji quiaquiaariuhua tama na jiyajiniohuaaja. Na saquiriojosano pueyari nata quiojoquiaarijuhuaj.

² Jaara quiquiaari samaatenu juuca, Jesuuri tii niishitijonu coteequiaari Pueyaso secojojua tiajinia. Queraatia pueyari na tojitiariquiaa. Nojoriiri jiuujiatequiaari. Tamajaaja sequetooquiaariiri:

—¿Tee nio pueyano niishitiojosaaquiaari puetunu niojuanaani? ¿Teje na masecanu puetunu na niishishanojuanaani, cuno cumaacanio, jiyajeneta miishano na miiniuriani? ³ Nojuacuajaari suruhuatujiniji casaa shipinijiona tiajiniaacora, niya pa tiacajiniani. Nojuajaari pa tiacajinia quinia María niyanu. Niya quiyajaariuhua na tapueyocuaca: Santiago, José, Judas, Simónnio. Na rimiatuhuari niya quiyajuhuj pa tiacajiniani.

Cunora, majaari nojori tojtianu paniniu quiquiaari Jesu. ⁴ Naaratej, Jesuuri nojori sequereer:

—Pueyari tiquiyocua Pueyaso sequenu panishano caminiujiunia tojiniu paniquiaa cutara. Saaja tama na tiacajinijinio pueya cutaraari maja na tojitiuniu paniniu, na jiyasojinijinio supueno pueyajuhuj, tama na tiajinia quiniaajaajanio.

⁵ Naacuajitij, nocua nojori tiuyaquiniucua, majaari na naata na cumaacata na miiniu quiquiaari. Saaja secaya cuso-suhucua niojoquiaari na juaashiquiaari, nojori na naatani-ionura. ⁶ Jesuuri jiuujiatequiaari nojori tiuyaquishacari nocua. Na nuhuaji, Jesuuri rucanejoquiaari pueya na niishitiojonura, queraatia shiitianiyojua tiacajinia catecaja na tiaca shocua.

Jesu jiyaramiquishacari na saquiriojosano pueya Pueyaso rupaa pohuatanura

(Mt 10.5-15; Lc 9.1-6)

⁷ Na nuhuaji, Jesuuri na saquiriojosano doce pueya sequequiaari nocua nojori niniuria. Nojori jiyaramiquiniu coteereeri, nojori quiojonura caapiqui, caapiqui, Pueyaso rupaa nojori pohuatanura. Nojori niqutioree na cumaacaari samaruhua nojori tohuatanijionura pueyajiniji. ⁸ Nojori sequereeri maja nojori panura nojori panishano, saaja nojori miojotu cutara. Nojori sequereajaariuhuj, maja nojori panura caashoque, coseyaca, cumaneecanio. ⁹ Nojori sequereeri saaja nojori cushiniuria na sapatu cutara, maja socua toque nojori panura na cushishocoriquiano. ¹⁰ Nojori sequereajaariuhuj:

—Niaa jaara tiuquishiiquia tamonu tiajinia, cuniquijia nia jiyojetare, niaa jaara cuniquiji quiaarejaatijia. ¹¹ Pueya jaara nia tiuquinitianu paniyaquiri na tiajinia, nia pohuatasano nojori tojiniu paniyaquishacarijiuhuj, niocua cuniquiji quiaare. Niocua nia niohuacaacuaji jiya joocua pitiare nojori niquiara, nojori niishiniuria Pueyasoori nojori saniitionutaniya, na rupaa tojiyashijianucua nojori quiniucua.

¹² Na nuhuaji, Jesu jiyaramiquishano pueyari quiojoquiaari. Nojoriiri Pueyaso rupaa pohuatanuuquiaari pueya

tacatonuhuara nojori jiuujia Pueyasooqua. ¹³ Nojoriiri queraatia samaruhua tohuatanijioquiaari. Naajuhuj, nojoriiri cusosuhuacua tarooquiaari naana jajau shiyocua, nojori naatanijosacari queraatia pueya.

Tiuquinijiona Juan mosacari
(Mt 14.1-12; Lc 9.7-9)

¹⁴ Jesu miishanojinijiiri caminiujiushaaquiaari puetunu cuno jiyajiniajanaa. Naacujitij, Galilea jiya jiyaniijia Herodesri Jesujiniji pohuatasaaquiaarijuhuaj. Herodesri cunora sequequiaari:

—¡Tiuquinijiona Juanqui samiitiarohuacuaa, cua mosano pueyanotej! Naaratej, cuno Jesuuri cuno cumaacaraca, jiya-jeneta casaa na miiniuria na cumaacata. Nojuacuajaari cua mosano Juan samiitianohua.

Jiyaniijia Herodesri na jiyajenetaquiaari jiyanohua cumaacaraca Jesu quiniuucua. ¹⁵ Tamasaca pueyari Jesujiniji sequequiaari tamaatia saniniuujia, nojori jiyajenesacarijuhuaj. Naa sequetuquiaariiri:

—¡Nojuacuajaari tariucuaaanu pueyara Pueyaso sequesano caminiujiunia Elías!

Tamasaca pueyari saniniuujia naa sequequiaari, nojori jiyajenesacarijuhuaj:

—Nojuacuajaari quiarjia nio pa quishacari Pueyaso sequesano caminiujiunia pajaniyara, juhua tariucuaaanu pueyara Pueyaso sequesano caminiujiuniaajuhuj.

¹⁶ Herodes jaara pueya sequesano tojiquiaari, nojuajaari saa sequequiaarijia:

—Nojuacuaja Tiuquinijiona Juan, cana cua nacataniquianucujani. Samiitiarohuacuaaquiiri.

¹⁷ Tiuquinijiona Juan moyaquishacarijia, nojuajaari Herodías rupaajinia nujuatesaaquiaari. Cuno maaji Herodíasni, nojuajaari Herodes tarajanu Felipe niquiocua quiquiaari coteenu. Herodesri tarajanu Felipe niquiocua jaariutiaquiaari necocuara. ¹⁸ Nocuaji, Tiuquinijiona Juanri Herodes nacasujua. Naa na sequejaari:

—¡Pueyasora, majaari maninia quia jiitianura quia tarajanu niquiocua!

¹⁹ Cunora, cuno maaji Herodíasri maja na niquiniu paniniu quijia Tiuquinijiona Juan. Na monu panijiaari. Majaari na naata quiquiaari saaja. ²⁰ Herodesri Tiuquinijiona Juan puereja. Nojuajaari niishiquiaari Tiuquinijiona Juanri

maninia pueyano, Pueyaso tojijia pueyano, maja sesa miijia. Naaratej, Herodesri maninia na cojuateja nujuatejojuajinia. Majaari na shanacunu quiquiaari sesa na miishaanura. Herodesri Tiuquinijiona Juan pohuatasano tojiniu maniniucujaja. Nojuajaari saaja noojia niqijoteja quiquiaari. Majaari na niishiniu quijia taa na miiniutianiyani. ²¹ Saniniuujia, cuno maaji Herodíasri pueyara caanu niishiriojoriquiaa, Tiuquinijiona Juan na motenura. Jiyacaritij, namitia nera, Herodes rasaanu juuca quiquiaari. Cuno juuca, jiyaniijia Herodesri queraatia pueyata queranacuree. Na queranacunura, nojuajaari Galilea jiyajinijinio jiyaniijianucua masuuquiaari, tama na soldadohua jiyaniijianucujajaanio. ²² Jiyacaritij, Herodíasri niyatuuri tiuquiquiaari queranacusaqui, tii na nianujunura puetunu pueya niqiarajanaa. Herodesri niyacoo nianujunu shuquiritiaquiaari jiyanoehua. Nata miaquenaa pueyari jiyanoehua na shuquiritiaquiaarijuhuj. Naaratej, jiyaniijia Herodesri niyacoo sequeree:

—Cua masere quia panishano. Janiyacua quia niqitioreni.

²³ Herodesri socua puetunu pueya niqiarajanaa na sequerohuacuhuj:

—¡Seetanujuanaa quia sequeyanijia, maja cua sapojonu! Janiyari quia niqitionutaniya quia masesanoni. Quiaa jaara cua masere cua jiitiasano cajiniocua, naajaa, janiyari quia niqitionutaniyani.

²⁴ Niyacoori tohuataquee na nucua Herodíasri na nequesotatura. Na sequeseeri:

—Cua nucuaana, ¿casaa cua masenutaniya cua quenuni?

Na nucuaari na sequeree:

—¡Quia masere Tiuquinijiona Juan naca!

²⁵ Cuno niyacoori ritia tiuquiquihua jiyaniijia Herodes quishaqui. Na sequereeri:

—¡Quiarijia cua niqitiore Tiuquinijiona Juan naca miacojuajinia!

²⁶ Naa jiyaniijia Herodes tojishacaritij, jiyanoehua tarajequeeri. Naajaa, seetanujuanaa na sequenuucua na masusano pueya niqiara, majaari tari na naata ruuretanu quiquiaari cuno niyacoo masesano. ²⁷ Naaratej, jiyaniijiaari ritia jiyaroree na soldado, Juan naca na niqitionura cuno niyacoo. ²⁸ Soldadoori quiaaree nujuatejojuajinia. Juan nacataseeri. Na naca patamohua miacojuajiniaari. Soldadoori niyacoo na niqitiosuhua. Nojuajaari na nucua na niqitiose saniniuujia.

²⁹ Tiuquinijiona Juan pueya jaara na niishiquiaari, na maanu patuquiaariiri, na jamotusocoriquiano.

Jesu mianuutesacari cinco mil pueya

(Mt 14.13-21; Lc 9.10-17; Jn 6.1-14)

³⁰ Jesu jiyaramiquishano pueyari tiuquiiioquiaariuhua Jesuucua nojori rucuanefonu nuhuaji Pueyasos rupaa nojori pohuatanura. Nojoriiri Jesu pohuataquiaari puetunu nojori miitiushanojuanaa, nojori niishitiojosanojinijinio. ³¹ Na nuhuaji, Jesuuri nojori sequeree:

—Miji, pueya quiaquishaqui pa quiaare tamaqui, tii pa samaatenura rupaquijia quenaaja.

Jiyanohua queraatia pueyari pueyaracaanu nojoriicua nijioriquiaa. Tamasacaari quiojoriquiohuacuaa. Tamasacaari saniniuujia shusha tiuquiijioriquiaacujua. Naaratej, majaan jeya nojori quiniu quiquiaari na miaquenura quenaaja.

³² Jiyacariitij, Jesuuri saaja na jiyaramiquishano pueyata quiaquiaari botejina, pueya quiaquishaqui. ³³ Queraatia pueyari saaja nojori niqutiurii quiaano. Cuno pojoriiri Jesu niishitiuquiaari. Naaratej, puetunu caminia shuriuquioco tiacajinijijianaa pueyari netecuatuquiaari. Nojoriiri Jesuucuaaji cutesee. ³⁴ Jesu rosesacari botejiniji, saaja queraatia pueya niqiriiri. Nojori na niquishacari, cuno pojoriicua taraajequiaariiri. Nojoriiri juhua cojuanaaju borregohua quiriquiaa. Naaratej, Jesuuri nojori niishitiojonu coteeree queraatia casaa Pueyasojiniji. ³⁵ Jaara quiquiaari tari tenacari, na saquirojosano pueyari nocua nijioquiaari. Na sequetuseeri:

—Tari tenacari. Paa tiajiyaqui quiyani. ³⁶ Pueya quia sequere, nojori cuara quiojooora cateca naataja tiacajinia, na miaquesocoriquiano nojori masenura tii.

³⁷ Jesuuri nojori riucuaree saaja:

—Niaa mariqui nojori miaquetereja saniya.

Nojoriiri na sequeree:

—¿Quiaateeri paniya queraatia pan masenuucua canaa quianura puetunu cuno pojoririjanaa? ¡Pa mianuutenura nojori, panishiyari dosciento cumaneeca! Majaan pa jitianu.

³⁸ Jesuuri nojori nequesotaree:

—¿Taa pan nia jiitiaani? Nia niquishiitioj.

Nojori jaara niishiquiaari taa pante quiyani, na sequetusuuari:

—Cinco pan quiya, caapiqui sapitiaajanio.

³⁹ Jesuuri jiyacari na pueya sequeree nojori cajitijionura pueya jiyasocujinia, na mianuutesocoriquiano. ⁴⁰ Pueyari cajituriicien, tamocora cincuenta, tamaqui socua cien,

camiria cincuenta. Pueyari naa queraatia maapuera raquiriojotasaaree nojori mianuutesaanura. ⁴¹ Jesuuri cuno pan pataree, sapitiaajanio. Na nuhuaji, jiyocuacaanu maureeri Pueyaso na secojonura nocuara. Na nuhuaji pan neecasequiaari na saquiriojosano pueyaraari, nojori serotasocoriquiano pueya. Cuno caapiqui sapitiaaja shiquioreereejaariuhua puetunu pueyarajanaa. ⁴² Puetunu pueyajanaari maninia miaquenuquiaari. Maninia tooquioreejaariuhuj. ⁴³ Na nuhuaji, doce canaasatuuri mishinijosaaquiaari pan raacuata, sapitiaaja raquiquiatanio. ⁴⁴ Cinco mil pueyari cuno panjiniji miaquenuunaa quiquiaari.

Mohuaca caco Jesu rucuanenujiniji pohuatasano
(Mt 14.22-27; Jn 6.16-21)

⁴⁵ Nio nuhuaji, Jesuuri na saquiriojosano pueya tacanitiaquiaari botejinia, nojori puetanura nojuaja caminia taquijiria Betsaida tiacajiniara. Jiyacaritij, Jesuuri pueya sequeriquiaa nojori quiojonuhua na tiacajiniohua. ⁴⁶ Pueya jaara tari quiojoquiaariuhua, Jesuuri tuhananuucua tacaquiaari tii na secojonura na Que Pueyaso. ⁴⁷ Jaara niniquiaari, boteeri tari caminia jiuujiajinia jaaretariquiaa. Jesuuri juhuanojuaja na jatesaqui quiriquiaajaa. ⁴⁸ Jesuuri nojori niquiquiaari najuhuaana juaarioconuyano. Majaari nojori naata jaaretanu quiriquiaa, puera paratu piyarojosacari nojoriicuara. Quera juhuaquenu panishacari, Jesuuri nojori rupuesee. Mohuaca caco canujuriquiaari. Quera nojori tajiriquiaari. ⁴⁹ Nojori jaara na niquitiuquiaari mohuaca caco canujiyano, nojoriiri na jiyanitiuquiaari samaru. Nocuaji sariyocuatereeri. ⁵⁰ Puetunu nojorijianaari na niquitiurii. Shiriiquitiuriiri. Jesuuri ritia pocuaree. Nojori sequereeri:

—¿Casaara nia puereyani? ¡Nioojia nia cumaquiri! ¡Maja pueretunu! Janiyacuajanijia.

⁵¹ Botejinia tacasee nojoriicuaraari. Paratuuri jiyacari pueyajequee. Nojoriiri na shootiariquiaa tacuriitia, jiyanohua na jiuujiatenuta. ⁵² Nojoriiri juhuanojuaja maja na niishiniu quiquiaari Jesu miishano, queraatiara na jiyatesacari pan, pueya miaquesocoriquiano. Nojori jiuujiacaari juhua ninishiqui quiquiaarijia.

Jesu naatanijosacari cusosuhua Genesaret jiyajinia
(Mt 14.34-36)

⁵³ Jesuuri na pueyata caminia niuutiaquiaari. Tiuquijioseeri Genesaret jiyajinia. Nojoriiri tii morotasee na bote. ⁵⁴ Nojori jaara tohuareetaquiaari botejiniji,

cuniquijinio pueyari ritia Jesu niishiquiaari. ⁵⁵ Pueyari jiyacari netecuatuquiaari, Jesujiniji nojori pohuatanura puetunu cuno jiyajiniajanaa. Cusosuhuari juhuacatecara patootasaaquiaari na matucujinia tee Jesu quiriquiaa na rucuanijosacari nojori jiyajiniacuajani. ⁵⁶ Tiquiyocua Jesu rucuanijosacari, cusosuhuari nocuaji niojotasaaquiaari nucuaco, tuhuaqui tiacajinia, queraatia shiitianiyojua tiacajiniajuhuaj, cuhuariquiacajiniano. Pueyari Jesu secojoree cusosuhua na quiatenura quenaaja na toque casaca. Canapuate na toque quiaquiaarini, puetunu nojorijianaari na cusonujiniji naatacoquiaariuhua.

7

Casaate sesoriquiara pa jiyateja Pueyasorani (Mt 15.1-20)

¹ Jesuucua catecanoquiaariiri Fariseocuaca, Moisés Rootasanojiniji niishitiojonaanio, canapuate Jerusalén tiacajiniji nijioquiaaricuajani. ² Cuno pojori quishacari tii, nojoriiri noojiaqueya Jesu pueyajinijinio niquiquiaari shuquitioojua miaqueyano. Nojoriiri jiyanjia, nojori rucuanijosacari sesa miijiaca pueya tajinia, sesa nojori quiniu na naata nojoriicua pacunu. Nojoriiri cunora shuquitianu jiitiquiaari, nojori jyanishacari nojori jiuujia naasucua curuushiniutianiya, shuquitioojua nojori miaquesacari. Naaratej, cuno pueyari Jesu pueya pocuanu coteequiaari. ³ Cuno Fariseocuaca, puetunu narta Judiocuacajanaanio, nojoriiri maja na cartenu quijia tariucuaaanu nojori supuetanaa niishitiojosano. Naaratej, majaari nojori miaquenu quijia shuquitioo. ⁴ Naacujitij, nojori jaara miaquesano niquitiojosaquiji tacatequiohua, majaari nojori miaquenu shuquitioojua. Socua queraatia quiyari cuno pojori niishishano. Naacujitij, nojoriiri jyaniquiaa, sesa nojori quiyaquiniuucujaji Pueyaso niquiara, nojori cuara na ratujua jeequejora, pataco, coshi, na maquetucuanio. ⁵ Naaratej, Fariseocuaca, Moisés Rootasanojiniji niishitiojonaanio, nojoriiri Jesu nequesotaquiaari:

—¿Casaara quia pueya tojitiaaquiya pa supuetanaa niishitiojosanoni? Nojoriiri maja na shuquitianu quiquiaa na miaquenuunura.

⁶ Jesuuri cuno pojori riucuaree:

—¡Niaari sapuenu juhua maninia pueya niquishano! ¡Ni-aacujajaari seetanujuanaa sesa miijiaca! Pueyaso sequesano caminiujiunia Isaíasri maninia sequequiaari nijaniyajinijicujaja, naa na naajiotasacari Pueyaso sequesano:

“Nio pueyari saaja na rupaata shuquiritiaa janiya. Nojori jiuujiaari saniniuujia tucuacaanu quiya janiyajiniji. ⁷ Nojori miishano quiriani, cunoori najuhuanaj. Naa nojori miishanoni, majaari na shuquiritiniu janiya. Nojori niishitiojosanoni, cunoori tama pueya niishitiojosanojuaaja, maja cua sequesano”.

⁸ Niaari cua pueya pocuariquiaa. ¿Niajaniyariuhuaaj? ¿Casaara Pueyaso sequesano nia tojiyaquiaanijia? Niaacuajaari Pueyaso sequesano tojiyaquiya, tama nia supuetanaa niishishanojuaaja nia miiniuria najuhuanaj.

⁹ Jesuuri socua naa sequequiaari cuno pojoritij:

—Tama nia miiniu jiiitishanoocua nia miiniuriajaaja, ¡niaari Pueyaso sequesano shocortaa saaja! ¹⁰ Moiséscuajaari naa rootaquiaari: “Maninia quia miiri quia que, quia nucuanio. Majaari nojori rerequetenu. Cante na que, na nucua sesacajani, cuno pueyano cuara mosaaria”. ¹¹ Niaari sequeya saniniuujia, maniniacuaja, pueyano jaara na que, na nucua sequere: “Maja cua naata naacutanu niajaniya cua casamitia. Janiya tari Pueyasora jiyateree puetunu cua jiiitiasanojuanaani”. ¹² Niaari sequequiaajuhuaaj, pueyano jaara naa sequeretej, maniniacuaja maja na naacutanura na que, na nucuanio. ¹³ Naacuajitij, niaari Pueyaso sequesano shocortaa saaja, tama nia niishishanojuaaja nia miiniuria najuhuanaj. Cuno nia niishishanocuajaari saaja nia supuetanaajiniji caminiujiushano. Niaari socua queraatia casaa miiquiaa juhua cunojuhuaaj.

¹⁴ Naa na nacasunu nuhuaji cuno pojoritij, Jesuuri pueya rerejoterohua na shocua. Nojori sequereeri:

—Cua tojitiare puetunu niajaniyajanaa, maninia nia niishiniuria. ¹⁵ Casaa pa miaqueyani, Pueyasora naajaa. Cunoori maja na naata pueyano jiyatenu sesa miijiara. Poojiajinia pa niishiriojosano cutaraari sesara pa jiyateya Pueyasora. ¹⁶ Cante numaaracani, nojuaja cuara tojitiaara cua sequesano.

¹⁷ Jesu jaara tiujiaquiaari cuno pueya, tiajiniaaco tiuquiyarohuari. Na saquiriojosano pueyari tii na nequesotaree pueya na niishitiojosanojiniji. ¹⁸ Jesuuri nojori sequeree:

—¿Niaateeri cua sequesano niishiyaquiyajuhuaaj? ¿Majaateeri nia niishiniu? Puetunu pa jiniacuma tiuquijiajanaani, cunoori maja na jiyatenu sesa miijiara pajaniya. ¹⁹ Pa misanoni, majaari na tiuquiniu poojiajinia, saaja pa seecojinia mishiya cutaraari. Na nuhuaji pocoma tajiyari pa marecuhuacuma.

Nio sequesanota, pueya niishitiojoriquiaari, puetunu miaguesanojuanaari maniniacuaja pa miaquesocoriquiano.

Maja cutaraari na naata na jiyatenu pajaniya juhua curuu-tuucara Pueyasora. ²⁰ Jesuuri sequereejuhuj:

—Pueyano niishiriojosano sesa noojiajiniani, cuno cutaraari sesara na jiyatequiaa. ²¹ Pueyano jiuujiajiniji supueya cutaraari sesa niishiriojosano, sesa na miiniuria. Naacujitij, pueyanoori na camishoo maajipohua numuetucujua, seya numuetucujuajuhuj. Tamonu pueyano casami nohuasejoquiaari. Pueya moquiaajaariuhuj. ²² Narta pueyano niqiuocua numuetucquiaari. Tamonu pueyano casamiicua jiaatiaquiaari. Jiyanohua sesa miiquiaari. Cuaracashijionu niishiyari. Tama na cuaqueyajaaja shuquiritiquiaari na miiniu jiiitishanota. Narta pueyano miananajoquiaari. Tamonuucua tonujuquiaari. Naajuhuj, saaja tama na cuaqueyajaaja shuquiritiaja quiquiaari. Juhujaniya sesa miiquiaajaariuhuj, moseeca na quiniuucua. ²³ Puetunu nio sesa miishanojuanaari pueya jiuujiajiniji supuequiaa. Cuno cutaraari sesa quijiaara pueya jiyateja Pueyaso niquiara.

Taatu tiuushacari Jesuucua

(Mt 15.21-28)

²⁴ Jesuuri cuniquiji quiaaree Tiro tiaca shocua jiyajiniara. Tii tiuquishii tamonu tiajiniaari. Majaari na paniniu quiquiaari pueya niishiniuria nojuajiniji, tee na quiyani. Naajaa, majaari na naata jamaaniu quiriquiaa. ²⁵ Tamonu maajiiri ritia Jesujiniji niishiquiaari. Neyatuuri samaruraca quiriquiaa. Naaratej, maajiiri Jesuucua niquiaari. Na cariquimiaji mojuquetaseeri. ²⁶ Cuno maajiiri Sirofenicia jiyajinijinio taatu quijia. Jesu secoseeri samaru na tohuataniniuria neyatujiniji. ²⁷ Jesuuri maaji sequeree miriqui:

—Quia tarinitiare, muerasu cuaara coteenu miaquenuura. Majaari maninia muerasu pa jaariutianura na miaquesano, sareyacari jatasocoriquiano.

²⁸ Maajiiri Jesu riuuaree:

—Jaa, Jiyaniijianaa. Naajaa, sareyacujajaari miaqueja cariquiacoji tatucujaja, muerasu totinijosano miaquesano shiriya.

²⁹ Jesuuri na sequeree:

—¡Quiaacuaja maninia cua riuuaree! Quia tacateyarohua. Samarucujajaari tari tohuataree quia niyatujiniji.

³⁰ Maaji tiuquishacariuhua na tiajiniohua, neyatu riuritasuhuari na maquetujinia mataano. Samaruuri tari tohuatano quiriquiaa nocujia.

Jesu jeecasacari numueju, tiquia pueyano

³¹ Jesuuri tacatequiaariuhua Tiro tiaca shocua jiyajiniji. Na tacatesacariuhua, Sidón tiaca shocojoquiaariuhuari, Decápolis jiya tiacanio. Galilea caminiajinia tiuquishuhuari. ³² Tii na quishacari, nocua jaatucusaquiaariiri numueeju, tiquia pueyano. Na jaatucunaari Jesu secojotuojaari na juaashiquia na nianura nocua, na jeeanura cuno pueyano. ³³ Jesuuri pueyano numueeju jaatucuree tamocora pueyacuaaji. Na numaama shirii na juaashiquiaari. Na nuhuaji, tama na juaashiquiajiniajaaja riocoreeri. Na riacau cojuata pocuaashijia niti quiareeri. ³⁴ Jiyacaritij, jiyocuacaanu maureeri. Noojia niareeri. Na nuhuaji, cusosu numaa sequereeri:

—¡Efata!

Nioori pueyano rupaajinia sequeya: “¡Quia riatere!”

³⁵ Jiyacaritij, numueeju numaari riatequequee. Na nitiiri jeequequeejuhuaj. Ritia pocuaquee maniniaari. ³⁶ Jesuuri cuno pojori rootaree maja nojori pohuatanura na jeecasano pueyanojiniji tamasaca niquiara. Nojoriiri saaja tiqiyocua pohuatanuuquiaari. Naa Jesu rootasacari na naatanijosano pueyatej, maja nojori pohuatanura na miishanojiniji, nojoriiri saaja socua jiyacatequiaari pohuatanura. ³⁷ Pueyari jiyanohua jiuujiatequiaari Jesu miishano na niqutiushacari. Tama nojorijaarjia sequetooquiaari:

—¡Puetunujuanaa miya maniniaari! Numueejunucua jiyateya tojitiajacaraari. Tiquianucua pohuateyajaariuhuj.

8

Jesu mianuutesacari cuatro mil pueya (Mt 15.32-39)

¹ Jiyacaritij, jiyanohua queraatia pueyari rerejoquiaari Jesu na tojitanura. Majaari nojori jiitianu quiquiaari casaa quenaaja na miaquetusocoriquiano. Jesuuri na saquiriojosano pueya piirii. Nojori sequereeri:

² —Nio pueyacua taraajeyanijia. Nojori tari jiuujianaraca juuca quiya niya cuata. Majaari quenaaja nojori jiitiatunu miaquesano. ³ Janiya jaara nojori jiyaramiquiriohua na tiajinia miaqueyojuani, nucuaco cusojoniuvarohuacua. Noojiaqueya nojorijinijinioori niyara nijiorucuaa tucuaaanuji.

⁴ Na saquiriojosano pueyari na riucuaaree:

—¿Paatucua taa miaquetere nojori niyani, pueya quiyaquishaquini?

⁵ Jesuuri nojori nequesotaree:

—¿Taa pan nia jiitiaani?

Nojoriiri na sequeree:

—Nareja siete.

⁶ Jesuuri na pueya sequeree, nojori cuaara sequeera puetunu pueyajanaa nojori cajitiuniuria. Na nuhuaji, Jesuuri cuno siete pan pataree. Pueyaso secojoree nocuaraari. Na nuhuaji, na saquiriojosano pueyara na neecasereeri. Nojori-iri saniniuujia pueya na serotaree puetunujuanaa. ⁷ Secaja sapitiaaja jiitaturiquiaajaarihuaj. Jesuuri socua nocuara secojorohuacuhaj. Na nuhuaji, na pueya sequereeri nojori niqutiojonura pueya. ⁸ Puetunu pueyajanaari maninia mi-aquenuuree. Tooquioreejaarihuaj. Miaquesano cureenota mishinijiosaaquiaariiri siete canaasatu. ⁹ Na miaquenaa pueyari quiquiaari cuatro mil pueya. Na nuhuaji, Jesuuri nojori sequeree nojori quiojonuhuara. ¹⁰ Na nuhuaji, Jesuuri botejinia tacataquiaari na saquiriojosano pueyata. Quiaareeri Dalmanuta jiyajiniara.

Fariseocuaca niqiniu panishacari Jesu miishano Pueyaso cumaacata

(Mt 16.1-4; Lc 12.54-56)

¹¹ Fariseocuacaari Jesuucua tiuquijiose. Nata juayonuu-taseeri. Nojori saniniuujuniuria Jesu, nojoriiri na sequeree juucua cuaara nojori niquishocoriquiano casaa miiria Pueyaso cumaacata. Nojoriiri naa na sequeturee, nojori niishiniuria Jesute seetanujuanaa Pueyaso Jiyarosano. ¹² Jesuuri noojia niaree na taraajenuta. Sequereeri:

—¿Casaara nio pueya niqiniu paniya Pueyaso cumaacata miishanoni? Seetanujuanaa nia sequeyanijia, majaari cua niqitiniu quiniutianiya nijaniya cua cumaacata cua miishano.

¹³ Jiyacaritij, cuno pojori tiujiaqueeri. Na pueyata botejinia tacataarohuari. Caminia taquijiria niuutiaareeri.

Jesu numootesacari na pueya Fariseocuaca niishitiojosanoocuaji

(Mt 16.5-12)

¹⁴ Jesu pueyari na coseyaca niyajetatuquiaari. Nareja niquiriyatujua panniyojua jiitaturiquiaa botejiniari. ¹⁵ Jiyacaritij, Jesuuri nojori sequeriquiaa miriqui:

—Cua tojitiare. Niocua tama nia cuaqueyajaaja cojuariquia Fariseocuaca pan poreetajaacuaji, Herodes pan poreetajaacuajijihuaj.

¹⁶ Majaari na pueya niishiniu quiriquiaa naa Jesu seque-sacaritij. Nojoriiri cunora tama sequetooriquiaajaaja:

—Pa jiyaniijia jiyoteeri naa pa sequeya, coseyaca pa paaquiniuucua pa sasocoriquiano.

¹⁷ Jesuuri na saquiriojosano pueya niishiriojosano ni-ishiquii. Nojori sequereeri:

—¿Casaara naa nia niishiriojiya pan nia jiitiaaquishacarini? ¿Majateeri juhuanajuaja nia niishiniu tamonu juuca cua miishanoiniji? ¿Niaateeri cumajiuujiaacato, maja nia niishinuria? ¹⁸ ¿Majateeri cua miishano nia niquiniu quiquiaacuaja nia namijiata? ¿Majateeri nia tojinu quiquiaa nia numatajuhuaj? ¿Niaateeri ritia niyajetarucuaa cua miishano? ¹⁹ Janiya jaara cinco pan neecasecanu cinco mil pueyaratej, ¿taa canaasatu nia mishinijiocanu miaquesano cureenotani?

Nojoriiri na riucuaree:

—Doce.

²⁰ —Naajuhuaaj, janiya jaara siete pan neecaserucuaa cuatro mil pueyaratej, ¿taa canaasatu nia mishinijiorucuaani?

Nojoriiri na riucuaree:

—Siete.

²¹ Naaratej, Jesuuri nojori sequeree:

—¿Majateeri juhuanajuaja nia niishiniu naa cua miishanoinijitij?

Jiyacariti nojoriiri Jesu sequesano niishiquii.

Jesu jeecasacari cariyojuaru pueyano, Betsaida tiacajinia

²² Na nuhuaji, Jesuuri Betsaida tiacajinia tiuquiiioquiaari na pueyata. Tii na quishacari, Jesuucua jaatucusaquiaariiri cariyojuaru pueyano. Pueyari Jesu secojotuquiaari cuno cariyojuaru namijia na quianura quenaaja. ²³ Jesuuri cariyojuaru quiaree na juaashiquiajiniji. Tiaca jiyaquiria na jaatucuyareeri. Cariyojuaru namijia piquiojoree na riacautaari. Na nuhuaji, na juaashiquia niaree nocuaari. Na nequesotareeri:

—¿Quia naatate niquiniu shiitaniyojua quenaaja?

²⁴ Cariyojuaruuri niquiniu sanirii. Jesu sequereeri:

—¡Jaa! ¡Pueya niquiyanjia, juhua nacuhua rucoyano!

²⁵ Jesuuri socua pacuterohua na juaashiquia nianu cariyojuaru namijiaacua. Cariyojuaruuri niquiniu saniriohuacuhuaaj. Jiyacaritij, tojetaarucujanaa maninia niquijiara quiquiiri. ²⁶ Jesuuri na tiajinia na jiyarorohua. Cariyojuaru rootaree naari:

—Majaari tiacajinia quia quianuhua pueya quia pahuatana nua cua miishanoiniji quiajaniya.

Pedro sequesacari, Jesu seetanujuanaa Pueyaso Jiyarosano (Mt 16.13-20; Lc 9.18-21)

²⁷ Na nuhuaji, Jesuuri quiojoquiaari na saquiriojosano pueyata tucuaqui tiacajiniara Cesareya Filipino tiaca shocuaqueya. Na quiasacari nucuaco, na pueya nequesotareeri:

—¿Taa pueya sequequiaa janiyani, cantena janiyani?

²⁸ Nojoriiri na riucuaree:

—Noojiaqueya pueyari quia sequequiaa, quiaanaari Tiuquinijiona Juan. Tamasacaari saniniuujia quia sequequiaacujua quiaanaari supuetana Elías. Naajuhuj, tamasaari quia sequequiaa, quiaa naasucuaanaari tariucuaaanu pueyara Pueyaso sequesano caminiujiunia, samiitianohuatuhuj.

²⁹ Na nuhuaji, Jesuuri nojori nequesotaree:

—¿Niajanियarijataj, taa nia sequeyani, cante janiyani?

Pedroori na sequeree:

—Quiajanियacuaja Cristo, Pueyaso Jiyarosano.

³⁰ Jesuuri nojori rootaree maja nojori pohuatanura tamasa niquiara nojuajiniji Pedro niishishano.

Jesu numootesacari na pueya, nojuaja mosaanutaniya
(Mt 16.21-28; Lc 9.22-27)

³¹ Jiyacaritij, Jesuuri na pueya niishitiojonu coteequiaari tama nojuajinijijiaaja, taa Pueyaso Niyanu miishaanutaniya jiyano-hua naquiya taraatiani. Naa na pueya sequereeri:

—Parta Israel pueya jiyaniijianucuaari cua tojitiaaquiniutianiya, pueyacuara Pueyaso secojonaa jiyaniijianucujuhuj. Naajuhuj, Moisés Rootasanojiniji niishitiojonaari cua rerequetejaca quiniutianiya. Janiyari mosaanutaniyani. Na nuhuaji, janiyari jiuujianaraca juucajinia samiitianutaniuhuan.

³² Jesuuri naa seetanujuanaa nojori sequequiaari. Na pohuatasanoori maja miriqui na quiniu quiquiaari. Jesu jaara naa sequequiaari, Pedroori tamocora na jaatucuree. Cuniqum na nacasureeri maja naa na pocuanuratej. ³³ Jesuuri na nijiniara tacatequee saaja. Na saquiriojosano pueya na niqiniutia, Pedro sequereeri:

—¡Cua shuriucuaji quia quiaare, Satanásnaa! Quia niishiriojosanoori maja Pueyasojiniji. Majaari quia niishiriojonu juhua Pueyaso panishano. Quiaari saaja juhua nio jiyajini-jinio pueya niishiriojiya.

³⁴ Naa na sequenu nuhuajitij, Jesuuri na saquiriojosano pueya piirii, puetunu cuniqum quiniaa pueyajaanio. Nojori sequereeri:

—Pueyano jaara cua tojijiara quiniu paniri, nojuaja cuaara niiria cucua, seetanujuanaa noojiata na panishacari janiya. Nojuaja cuaara niyajetaara tama na cuaqueya na cojuanurajaaja. Cuaara cucuara panitiaara tama na cuaqueyajaaja. ³⁵ Saniniuujia, cante tama na cuaqueyajaaja shuquiritiniu panijiani, na nuhuaji, nojuajaari jiyano-hua taraatia quiniutianiya pueyaracaanu. Saniniuujia, cante tama na cuaqueya panitiaa cua panishano na miiniuriani, na pohuatanura janiyajinijijuhuj, cuno pueyano cutaraari pueyaracaanu

quiniutianiya shuquiriaatia. ³⁶ ¿Niaarate maninia, pueyano jaara puetunu nio jiya casamijanaa jiitiare, na nuhuaji na sohanu jaara jatasaare mani quiquiojinia pueyaracaanura? ³⁷ ¿Pueyanote na naata Pueyaso niquitionu queraatia na casamijinijinio, Pueyaso jiyatenuhuara nojuaja pueyaracaanu rishijia na quiniuria nata? Maja na naata. ³⁸ Cante cua rupaa pohuatanu caririquiya sesa miijiaca pueya niquiara nio jiyajiniani, janiyari nojori caririquiniutianiyajaacuhuj. Naajuhuj, cante caririquiya mijiria quiniaa niquiara sequenurani, janiya nojori jiyaniijiani, janiyari cua tacatesacariuhua nojori caririquiniutianiya-juhuaj. Janiyari jiyacari cua Que cumaacata jiyocuacaanuji tacatenutaniuhuani, maninia miijiaca cua Que seyatajuhuaj.

9

¹ Jesuuri nojori sequequiaarijuhuaj:

—Seetanujuanaa nia sequeyanijia pueyanaa. Noojiaqueya niya quiniaajinijinio quiarijiani, majaari nojori cusunuunu quiniutianiya juhuanujuaja, nojori cuara niquirijiaatijia Pueyaso cumaaca tiuquiyano cucua, na muerasu jitiariquianoni.

Jesu jatasacari shacantuucara
(Mt 17.1-13; Lc 9.28-36)

² Seis juuca nuhuaji, Jesuuri jiyaconaja tuhuananuucua tacaquiaari. Saaja nata quiojoquiaariiri Pedro, Santiago, Juannio. Jesu quishacari tuhuananujiniji, na cuaqueyari tamaatiuucua jataquiaari nojori niquiara. ³ Na toqueeri shacantuquera jataquiaari, socua jiyanohua cohuajara sohanatuujiniji. Nio jiyajinia toqueya jeequejonaari maja na naata jiyanohua cohuajaquera toque na jiyatenu, taa Jesu toque jataquiaaricuaani. ⁴ Jiyacaritij, nojoriiri supuetana Elías niquitiuquiaari, supuetana Moisésjuhuaj, Jesuta pocoojiyano tii. ⁵ Jiyacaritij, Pedroori Jesu sequeeree:

—Niishitiojonanaa, ¡canaa namitia niya quiyani! ¡Canaacua niaacuaji suhuorojoreni: quiara, Moisésra, Elíasranio!

⁶ Jesu pueyari shiriiquitiuriquiaa. Nocujaji Pedroori naa juhuajaniya pocuariquiaa. Majaari na niishiniu quiriquiaa casaa na pocuariquiaani. ⁷ Jiyacaritij, jiyocuacaanuji cohuaja najacaari nojoriicua rosequiaari. Cohuajaari nojori mishiQuiomaa. Cohuaja najacajiniji, Pueyasoori tojishaaree pocuaano. Naa sequequiaaritij:

—¡Niocuaja cua Niyanuniyojua, cua shuquiritiasano! ¡Saaja nojuaja nia tojiri!

⁸ Jiyacaritij, nojori jaara ritia niquinijionuuquiaari na shocuaqueya, majaari quenaaja tamonu na niquitiuniu quiquiaari socua. Saaja Jesuuri tamajaaja quiriquiaa.

⁹ Nojori rosetasacariuhua tuhananuucocoji, Jesuuri nojori rootaquiaari maja nojori pohuatanuhua tamasaca niquiara nojori niquishano. Jesuuri nojori sequequiaari cuaara noojiajinia racatatuura, nojuaja jaara samiitiarohuajaatijia. ¹⁰ Cunora, tama nojorijiaarijia maninia racataquiaari noojiajinia nojori niquitiushano. Maja cutaraari nojori niishitiuniu quiquiaari, casaara naa Jesu sequeeree nojorini “cua samiitiasacariuhua”. ¹¹ Cunora, nojoriiri Jesu nequesotaquiaari:

—¿Casaara Moisés Rootasanojiniji niishitiojonaa sequequiaacuaraarini, Elíasna coteenu tiuquiniutianiuhua Pueyaso Jiyarosocoriquianoocuaiji?

¹² Jesuuri nojori riucuaaree:

—Seetanujuanaacuaaquiniatejaj, Elíasri coteenu tiuquiriquiano quiquiaari, puetunu cucuaiji jeenu-cuariquianojuanaa. ¿Niaate niishiya casaara tariucuaaanu Pueyaso Rupaajinia naa naajiotasaaquiaari janiyajinijini: “Pueyaso Jiyarosanoori naquiya miishaanutaniya? Pueyari na soonutaniyajuhuj”. ¹³ Janiyari seetanujuanaa nia sequeyani, Elíascuajaari tari niquiaari. Pueyari naquiya na miiquiaari taa nojori paniquiaaricuaijani. Pueyaso Rupaajiniacuajaari naajiotasaaquiaari nojuajaari naa miishaanutaniyaquij. Seetanujuanaa tari naa miishaaquiaariiri.

Jesu tohuatesacari samaru, caya samijajiniji

(Mt 17.14-21; Lc 9.37-43)

¹⁴ Na nuhuaji, Jesu jaara tacatequiaariuhua na saquiri-ajosano pueya quishaqui, queraatia pueya niquishuhuari nojori shocua maano. Tii quitiuriquiaajaariuhua Moisés Rootasanojiniji niishitiojonaa. Nojoriiri Jesu pueyata juay-onuutariquiaa. ¹⁵ Pueya jaara Jesu niquitiuquiaari, puetunu pueyajanaari nocuaiji jiuujiatequiaari. Nojoriiri nocua netecuatuquiaari na saruhuatanura. ¹⁶ Jesuuri na saquiriojosano pueya nequesotaree:

—¿Casaajiniji nia juayonuutariquiaa cuno pojoritiani?

¹⁷ Tamonu cuno pueyajinijinioori Jesu riucuaaree:

—¡Niishitiojonanaa, quiocua nitiaaree quiyanunijia! ¡Samaru jiiitaano! ¡Samaruuri na jiyatequiaari tiqiara! ¹⁸ Tiquiyocua na quishaqui, samaruuri na pojotequiaa. Naa na cuso-josacaritij, cushau jataquiaa na rupaamajiiri. Na quiacamiaquequiaajaariuhuj. Na nuhuaji, pootia maquiaari juhua macu. Quiyanuuri cunora sasacara quiyaree. ¡Socua

piriuquiuniutianiyari! Janiyacuajaari tari sequeree quia pueyani, nojori tohuatenura cuno samaru nojuajiniji. Nojori-iri maja na naata na tohuatenu quiriquiaa.

¹⁹ Jiyacaritij, Jesuuri naa sequeree:

—¡Niaaqui Pueyasooqua tiuyashijiacaja! ¿Janiyatucua pueyaracaanu nia jiitariquiiani? ¿Janiyateeri pueyaracaanu nia rejeretanutaniyajaaniuhuj? ¡Miji nia jaatucure cuno caya samijia!

²⁰ Nocua jaatucusaareeri caya samijia. Samaru niquishacari Jesu, caya samijia miirii taraatiaari. Caya samijiaari pojoquee Jesu niquiara. Tii taquiriocuariquiaari. Na rupaamajiiri cushariquiaa. ²¹ Jesuuri caya samijia que nequesotaree:

—¿Taacari na coteecanu naa na quiniuria juhuacatecarani? Na queeri Jesu riucuaaree:

—Na naatujuajiniji naa quijiajuhuanajaj. ²² Na cusojua-nura juucua, cuno samaruuri sequeyarucua na pojotequiaa manijinia, moojiniajuhuj. Naaratej, ¡jaara quia naata quiri, canaacua quia taraajere quenaaja! ¡Canaa quia naacure!

²³ Jesuuri na sequeree:

—¿Casaara naa quia sequeree janiyani, “jaara quia naata quiri”? Cante Pueyasooqua tiuya noojiata seetanujuanaani, nera miishiyari puetunu na panishanojuanaa.

²⁴ Jiyacaritij, caya samijia queeri nacaree:

—¡Jaa, quiocua tiuyanijia! ¡Cua naacure socua cua tiuni-uria quiocua!

²⁵ Jesu niquishacari queraatia pueya nocua rerequee-jijano, ritia samaru sequereeri:

—¡Tojiyashijia, tiquia samarunaa, janiya quia sequeyani, quia tohuatare nio caya samijiajiniji! ¡Puetunu quia tohu-atarejanaa! ¡Majaari socua quia tacatenuhua, nocua quia tiuquiniuhua!

²⁶ Samaruuri sariyocuaquee. Caya samijia taquiriocu-aterohuariuhuj. Na tohuatesacari caya samijiajiniji, juhua macu na tiujiaqueeri. Nocujaj, queraatia na niquitianaa pueyari sequequiaari:

—¡Juaj! ¡Tari cusoquee cutaratej!

²⁷ Jesuuri na juaashiquiajiniji na quiaree. Na sanareeri. Caya samijiaari juhujajaniya nujuaquiaariuhua.

²⁸ Na nuhuajaj, Jesuuri tiaco tiuquitiaquiaari na pueyataja. Tamajaaja nojori quishacari tii, na saquiriojosano pueyari na nequesotaree:

—¿Casaara maja canaa naata cuno samaru tohuatenu quiriquiaani?

²⁹ Jesuuri nojori riucuaaree:

—Jiyano samaruuri na naata tohuatanishaanu cutara saaja jiyano hua Pueyaso nia secojonuta nia miaqueyaquiniutia.

Jesu pohuatanu pacutesacariuhua nojuaja mosaanutaniya (Mt 17.22-23; Lc 9.43-45)

³⁰ Nojori jaara quiojoquiaariuhua tiji, Galilea jiya tajimi-aari. Majaari Jesu paniniu quiquiaari pueya niishiniuria tee na quiyani. ³¹ Jesuuri jiyacari saaja na saquiriojosano puey-ata quiniu paniriquiaa. Jiyacari, nojori niishitiojori quiaari. Naa nojori sequereeri:

—Janiyari pueya niqutiosaanutaniyani, nojori miiniuria janiya taa nojori paniyacujani. Nojoriiri cua monutaniya. Jiuujianaraca juucajinia, janiyari samiitianutaniuhuni.

³² Majaari quenaaja na pueya niishiniu quiriquiaa Jesu sequesano. Nojoriiri saaja puereriquiaa maninia na nequesoreenura casaa naa na sequenu paniriquiaani.

¿Cante jiyaniijajanaa cutarani? (Mt 18.1-5; Lc 9.46-48)

³³ Nojoriiri Capernaum tiacajinia tiuquijiose. Tari nojori quishacari tiajinia, Jesuuri nojori nequesotaree:

—¿Casaajiniji nia juayonuutariquiaa nucuamajini?

³⁴ Nojoriiri saaja sanaajetaquee. Na juayonuutanujiniji niishitiuriquiaacuajaari. Nucuamaji, nojoriiri riutioconee-tariquiaa teyano nojorijinijiniote socua tojishano pueyanoni.

³⁵ Jesuuri jiyacari cajirii nojori na rootanura. Na doce pueya piiriiri. Nojori sequereeri:

—Cante socua tojishano pueyanora quiniu paniyani, nojuaja cuara quiiria juhua serura, narta pueya na naacunura puetunujuanaa.

³⁶ Na nuhuaji, Jesuuri mueya nujuatequiaari nojori tajinia. Cuno mueya paree nojori niquiaraari. Na pueya sequereeri:

³⁷—Cante jiyano mueya maseja na paniniutia janiyani, nojuajaari cua maseyajaacuhuj. Cante cua maseyani, majaari saaja na masenu janiya. Jiyocuacaanu Quijia cua Jiyarona maseyajaariuhuj.

Tamonu pueyano tohuatanijosacari samaruhua Jesu cumaacata (Mt 10.42; Lc 9.49-50)

³⁸ Tamacari, Juanri Jesu sequereeri:

—¡Niishitiojonanaa, canaari tamonu pueyano niquiriini quia sesa jiyaniquiyano samaruhua na tohuatanijionura pueyajiniji! Nojuajaari maja pajaniyajinijinio. Nocujaji, ¡canaari na tenujureni maja socua naa na miiniuriatej!

³⁹ Jesuuri nojori sequereeri:

—¿Casaara nia tenujureeni? Pueyano jaara maninia miishano miiri cua sesa cumaacata, na nuhuaji, nojuaja maja na naata sesa pocuanu janiyajiniji. ⁴⁰ Nia niishiri, cante maja pa paracani, nojuajaari pa jiyano. ⁴¹ Nia rucuanijosacari, cante nia raateya mohuacaniyojua na paniniutia janiyani, cua pueya nia quiniuucujuhuj, Pueyasoori saniniuujia maninia casaa na niqutionutaniya na jiiiasanojiniji.

Puereeta quiniutianiyari sesa miijiacara
(Mt 18.6-9; Lc 17.1-2)

⁴² Nio mueyari cucua tiuujia. Cante jiyano mueya miitirii sesani, nera maara socua maninia quiri, puereetujajau saajia jaara morotasaare na riquiajiniji, caminia queronijinia jartasocoriquiano. ⁴³⁻⁴⁴ Nio miriqui cua niishitiojosano nia tojiri: tama nia juaashiquiajaaja jaara nia jiyatere sesa miijiaara, nia juaashiquia nia rashiquiare juhuari niaa mariqui mani quiquiojinia jatasareeri, sesa miijia nia quiniuucua. Cuno mani quiquiojiniani, majaari mani maquesanu. ¿Niaateeri paniya tii nia jataaanura caapiquiquiojuata? Jiyanohua socua maninia cutaraari niaara, juaashiquiaaju nia tiuquinishaanura Pueyaso shuriucua, pueyaracaanu shuquiriaatia nia quiniuria nata. ⁴⁵⁻⁴⁶ Naajuhuj, nia niohuaca jaara nia jiyatere sesa miijiaara, nia rashiquiarenoj maja nia jataaanura mani quiquiojinia. ¿Niaateeri paniya tii nia jataaanura caapiquiniocuata, pueyaracaanu tii nia saniitiosaanura? Jiyanohua socua maniniaari niquiniocuata Pueyasocua nia tiuquiniuria, pueyaracaanu nata nia quiniuria shuquiriaatia. ⁴⁷⁻⁴⁸ Naajuhuj, nia namijia jaara sesa miitiriquia nijaniya, nia jaterenoj. Naa nia tarinitiare sesa nia miiniu, maja nia jataaanura caapiqui namijiata pueyaracaanu mani noshishaqui. Sesa miijiaaari cuno mani quiquiojinia quejoosaanutaniya, pueyaracaanu nojori saniitiosaanura. Cuno manijinia, majaari porohua casonuunu. Maniiri tii pueyaracaanu noshiya. Majaari na maquesanu. Jiyanohua socua maniniaari nia tiuquiniuria Pueyasocua niquiriyatujua namijiata pueyaracaanu shuquiriaatia nia shootianura nojuaja.

Naa Jesu niishitiojosacari miriquitij, nojuajaari pueya niishitiojoriquiaa nojori tarinitianura jiyanohua na miiniu panishano, cuno jaara sesa miijiaara jiyateriquia nojori.

⁴⁹ Jesuuri socua niishitiojorohua:

—Puetunu Pueyaso muerasujanaari saniniuujishaanutaniya juhua manitia, taa shu caquishiyacuaani na moqueyaquiniuucujaji. ⁵⁰ Naajuhuj, shoniiri jiyanohua maninia, shu moqueyaquiniuucujaji. Saniniuujia, shoni jaara shaacara quiri, ¿maatucua taa tiquiriiquiara quiriohua

saajaniuhuj? Maja na naata. Naajuhuj, Pueyaso cumaaca nia jiitiare nioojiajinia, niaa mariqui najuhua quijia quiriiri juhua Pueyaso niishiyashijia pueya. Naajuhuj, jiyanoojiaca nia quiri, jatiqui nia quiniuria shuquiriaatia.

10

Jesu niishitiojosano maja pueya cartenura necocua
(Mt 19.1-12; Lc 16.18)

¹ Na nuhuaji, Jesuuri Capernaum tiacajiniji quiaquiaari na saquiriojosano pueyata. Judea jiyajinia quiojiyareeri, Jordán moo taquijiriajuhuaj, pananu muetasamaji jiyajinia. Pueyari jati nocua rerejoquiaariuhua Jesu quishaqui. Jesuuri nojori niishitiojonu coteeree socua, taa na niishitiojoquiaari tarijiacuajani. ² Jiyacaritij, noojiaqueya Fariseocuaaari Jesuucua nijioquiaari na saniniuuniuria nojori nequesotanuta, nocuara nojori saquiriojotanura juucua. Cunora, cuno pojoriiri Jesu nequesotaree:

—¿Maninate pueyano cartenura necocua?

³ Jesuuri nojori nequesotaree saniniuujia:

—Cua sequeretoj, ¿taa Moisés sequequiaari niajaniani?

⁴ Cuno pueyari Jesu riucuaaree:

—Moisésri pa sequequiaaricuaaja, pueyanoori na naata necocua cartenu. Neyaca cuara coteenu na niqutioora na cartetaja naajionee, necocua na cartenura. Moiséscajaari naa pa sequequiaaritij.

⁵ Jesuuri cuno pojori sequeree:

—Moisésri naa sequequiaari niajaniatej, pueyaracaanu cumajiuujiaaca nia quiniuucua, nia niquiocuaacua tarajeyashijia nia quiniuucua juhuaj. ⁶ Saniniuujia, Moisésri naa naajiotaquiaari pueyajiniji:

“Pueyaso jaara puetunu casaajanaa shipiniquiaari, nojua jaari niquiriyatu caya shipiniquiaari, niquiriyatu maa-jinio”.

⁷ Naaratej, pueyanoori na queya tiujianutaniya necocuara na caminiuria. ⁸ Nojori jaara camitioore, nojoriiri juhua niquiriyatujua pueyanora quiquii. Naacuaajitij, nojoriiri maja juhua caapiqui pueya na quiniu tari. Saaja juhua niquiriyatujua pueyano quiyari. ⁹ Cunora, pueyano cuara necocua carteyaquiiria, Pueyaso rupuetootesano nojori quiniuucua.

¹⁰ Majaari Jesu saquiriojosano pueya niishitiuniu quiquiaari naa Jesu sequesano. Na nuhuaji, tiajinia nojori quishacariuhua, na saquiriojosano pueyari Jesu nequesotaquiaari casaa na sequenu paniriquiaa naani.

¹¹ Jesuuri nojori sequeree:

—Cante necocua carteya tamonu maajitia na caminiuriani, cuno pueyanoori jiyanoohua sesa miya coteenu necocua. Pueyasora, naa na miishacaritij, nojuajaari juhua narta pueyano niqiuocuata quijia. ¹² Naajuhuj, maaji jaara cartere neyaca tamonuta na caminiuria, cuno maajiiri sesa miya Pueyaso niqiuarajuhuj.

Jesu niasacari na juaashiquia naatujooriicua

(Mt 19.13-15; Lc 18.15-17)

¹³ Na nuhuaji, Jesuucua jaatucunuusaquiaariiri naatujoori, Jesu nianura na juaashiquia nojori nacaacua. Na saquiriojosano pueyari naatujoori jaatucunaa tenujuriquiaa saaja. ¹⁴ Jesu jaara na niqiuquiaari, juaaquiiri. Nojori sequereeri:

—¡Nia tarinitiare naatujoori cuaara niiria cucua! ¡Maja na tenujunu! Canapuate Pueyaso muerasura quiniu paniyani, nojori cuaara juhua nio naatujooriria jataara. ¹⁵ Seetanujuanaa nia sequeyanijia, Pueyasocua nia tiuuri seetanujuanaa, taa naatujoori tiuya cucuacuaani na taacanuyaquiniutia. Saaja naacujiti niaari Pueyaso pueyara jiyatesaanutaniya cutara, pueyaracaanu Pueyaso jütiasano nia quiniuria.

¹⁶ Jesuuri jiyacari cuno naatujooriniyojua pooree. Nojori nacaacua niojoree na juaashiquiaari Pueyaso na secojonuta, Pueyaso miiniuria maninia nojori.

Jiyanoohua casamiriaca mashaja pocoojosacari Jesuta

(Mt 19.16-30; Lc 18.18-30)

¹⁷ Quera Jesu quianu panishacari quiniquiji, nocua netequiaariiri tamonu pueyano. Jesu cariquimiaji mojquetaseeri. Na nequesotareeri:

—Maninia niishitiojonanaa, ¿taa cua miiniutianiyani, seetanujuanaa Pueyaso pueyanora cua quiniuriani?

¹⁸ Jesuuri na sequeree:

—¿Casaara quia sequeya janiya maninia pueyanotani, quia niishiyaquishacari janiyani? Saaja Pueyaso cutaraari seetanujuanaa maninia. ¹⁹ Quiaacuajaari Pueyaso niishitiojosano niishiya. Moiséscaajaari naa na naajiotaquiaari:

“Maja quia camishoo maaji quia numuetucunu. Maja monu. Maja nohuasenu. Maja tamonuucuaru tonujunu sapojonuta. Maja cuaracashijionu. Quia queya tojjia quia quiriquia”.

²⁰ Pueyanoori Jesu riucuaaree:

—Niishitiojonanaa, janiyacujaari puetunu cuno rootasanojuanaa tojjia pueyaracaanu cua naatujuajiniini.

²¹ Jesuuri na paniniutia na niquirii. Na sequereeri:

—Juhuanajuaja niquiriyatu casaari quiyajaa quia miishoo. Quia quiaarohua. Puetunu quia casamijianaa quia niqutiojocoo. Na nuhuaji, casamijiuniucua nareja quia niqutiore quia masesano cumaneeca quia casami sami. Naacuajitij, quiaari quia casami jitianutaniya jiyocuacaanu Pueyaso shuriucua. Na nuhuaji cutara, quiocua nimiohua cua nuhuajiriqiano.

²² Cuno pueyano jaara tojiquiaari naa Jesu sequesantej, jiyanoehua taraajequeeri. Na taraajenuta quiacuhua na tiajiniaari. Nojuajaari jiyanoehua casamiriaca pueyano quiquiaari. ²³ Na nuhuaji, Jesuuri na shocuaqueya niqinijioree. Na saquiriojosano pueya sequereeri:

—jijanoehua jiyajeneta cutaraari casamiriaca pueyano quiniuria Pueyaso pueyanora!

²⁴ Na saquiriojosano pueyari shiriiquitiuquiaari naa na sequesacaritij. Na nuhuaji, Jesuuri nojori sequenu pacutequiaari:

—Sanajooriniaa, seetanujuanaa nia sequeyanijia. Jiyanoehua jiyajenetaari casamiriaca pueyano quiniuria Pueyaso pueyanora. ²⁵ Taa camello maja na naata cusupuetaja cuhuoco tamajiria tajiniucuaani, naajuhuj, casamiriaca pueyanoori maja na naata tama na cuaqueyajaaja jiyatenu Pueyaso pueyano na quiniuria.

²⁶ Na saquiriojosano pueya jaara na tojitiaquiaari, nojoriiri socua jiyanoehua jiuujiateree. Naaratej, tama nojorijiaarijia nequesoreetooquiaari:

—¿Canteeri Pueyaso pueyanora jiyatesaanutaniya socuanitioj?

²⁷ Jesuuri nojori niquirii. Naa sequereeri:

—Pueyano maja na naata tamajaaja Pueyaso pueyanora quiniu. Pueyaso cutaraari na naata na jiyatenu na muerasura. Pueyasora, maja jiyajeneta casaa quiniu.

²⁸ Pedroori Jesu sequeree:

—Jiyaniijianaa, canaari puetunu canaa jiiitasanojuanaa tiujiaquiaarini quia pueya canaa quiniuria.

²⁹⁻³⁰ Jesuuri nojori riucuaree:

—Seetanujuanaa nia sequeyanijia, shuquiriaatia quijia quiniutianiya cutaraari noo pueyano cante na jiiitasano tiujiaaja cua tojijia na quiniuucuaani, janiyajiniji pohuatana na quiniuucujuhuj. Cante na tia tiujiajani, tapueyocuaca, na rimiatuhua, na queya, necohua, na cuhuariquiano, nojuajaari maninia miishaanutaniya quiarijia mijiria na quishacarijia. Nojuajaari socua jiyanoehua queraatia niqutiosaanutaniuhua na tiujiasanojiniji. Niqutiosaanutaniyari tiaca, tapueyocuaca, na rimiatuhua,

na nucua, necohua, cuhuariquiano. Naajuhuj, naquiya miishano quiniutianiyari cua tojijia na quiniuucua. Naajaa, na nuhuaji, pueyaracaanu Pueyasota shuquiriaatia quiniutianiyari quiarinio jiyajinia. ³¹ Saniniuujia, queraatia tojishano pueyari najuhuana quijiaca quiniutianiya Pueyasora, nojori tojiyaquiniuucua nojuaja. Saniniuujia, Pueyaso ruuretajacara, queraatia Pueyaso pueyari quiarijia juhua najuhuana quijiaca niquishano quiquiaa. Naajaa, nojoriiri na nuhuaji seetanujuanaa juhua jiyaniijianucua quiniutianiya Pueyasora, na tojitiajaca nojori quiniuucua.

Jesu pacutesacariuhua pohuatanu nojuaja mosaanutaniya (Mt 20.17-19; Lc 18.31-34)

³² Jerusalén tiacajiniara nucuamaji nojori quiasacari, Jesuuri na saquiriojosano pueya puetariquiaa. Nojoriiri na nuhuaji sacuariquiaa na puerenuta. Socua pueyari na nuhuajituriquiaa nojori puerenutajuhuj. Nuujajiniocua, Jesuuri na doce saquiriojosano pueya jaatiaree tamocora tamajaaja. Tii nojori sequeriquiaari taa nojuaja miishaanutaniyani, nojori tiuquishacari Jerusalén tiacajinia.

³³ Nojori sequereeri:

—Niaacuajaari niishiya, paa tari Jerusalén tiacajinia quiaani, tee cuniqui Pueyaso Nyanu niquitiosaanutaniya pueyacuara secojonaa jiyaniijianucuan, Moisés Rootasanojiniji niishitiojonaanio. Cuno pojoriiri cucuara tonujunutaniya jiyaniijianucua na sapojonuta, cua mosaanura. Janiyari taucuaca niquitiosaanutaniyani. Janiyari jiyanohua naquiya miishaanutaniyani. ³⁴ Nojoriiri cua rerequetenutaniya. Cua riocojotunutaniyari. Cua piqutiuniutianiyajaariuhuj. Naa cua miishaanu nuhuajitij, nojoriiri socua cua monutaniya. Naajaa, jiuujianaraca juucajinia, janiyari seetanujuanaa samiitianutaniuhuan.

Santiago, tarajanu Juanta, nojori sequesacari Jesu, maninia nojori na miiniuria

(Mt 20.20-28)

³⁵ Na nuhuaji, Santiagoori, tarajanu Juanta Jesuucua catecanoquiaari. Nojoriiri Zebedeo niquiohua quiquiaari. Jesu sequetuseeri:

—Niishitiojonanaa, canaara quia miiri canaa masenu panishano quiajaniya.

³⁶ Jesuuri nojori nequesotaree:

—¿Casaa nia paniya cua miiniuria niaarani?

³⁷ Nojoriiri Jesu riucuaree:

—Pueyaso jaara quia jiyatere pueya jiyaniijia, quiocua canaa cajitijiore quia shuriucua, tamonu quia miaquetajara, tamonu quia muenecara, quia naacunaa canaa quiniuria.

³⁸ Jesuuri nojori sequeree:

—Majaari nia niishiniu nia masesano. ¿Nia naatateeri rejeretanu naquiya miiniu taa cua miishaanutaniyacuaani? Naquiya cua miiniuuri jiyano hua noonu quiniutianiya juhua pueyano jaara mani noshiyanojinia tiuquinishaare.

³⁹ Nojoriiri na riu cuaree:

—Taaquiriirinij, canaa naatacuaaquiniateja naquiya miiniu rejeretanu juhua quiajaniya.

Jesuuri nojori sequeree:

—Seetanujuanaa, niaari na nuhuaji cua ratusano raturiquianojuhuaj. Niaari juhua manijinia tiuquinishaariquianojuhuaj, taa cua tiuquinishaanutaniyacuaani.

Jesuuri naa nojori sequeriquiaa miriqui, taa jiyano hua naquiya na miishaanutaniyani, na cusosacari pueyacuara. Jesuuri naa nojori sequeree socuatej:

⁴⁰ —Maja cutara cua naata niqutionu niajaniya nia masesano, cua cajitiniuria niajaniya cua miaquetajara, cua muenecarano. Cunoori noo pojori niquticosaanutaniya cutara, canra tari na jeenucuasaaquiaaricujani.

⁴¹ Narta saquiriojosano pueya jaara tojiquiaari nojori masesano Jesu juucua, nojoriiri juaaquioquiaari. ⁴² Jesuuri nojori piirii. Nojori sequereeri:

—Niaacuajaari niishiya, mijiria jiya jiyaniijianucuaari na pueya jiiitiquiaa juhua na seya, tama nojori panishano na miiniuriajaaja nojoritia. Naajuhuj, pueya jiyaniijianucuaari na jiiitiasano pueyacu paaretaquiaa na cumaaca, tojishano pueya nojori quiniuria. ⁴³ Niajaniya saniniuuja, majaari naa nia quiniu quiniutianiya. Cante tojishano pueyanora quiniu paniya niajanijiniinioni, cuno cuara jiyateera tama na cuaqueyajaaja juhua narta Pueyaso pueya serura na quiniuria. ⁴⁴ Cante nia jiyaniijia quiniu paniyani, nojuaja cuara quiiria narta Pueyaso muerasu cumaquinia.

⁴⁵ Janiyajuhuj, majaari mijiria cua ninu quiquiaari pueya cua poonijiotenura quiria, tama cua cuaqueya cua shuquiritiniuriajaaja. Janiya cutaraari niqiaarini pueya cua naacutanura, tama janiyajaaja mosaanura pueya niti, queraatia pueyacuaji cua ritianura Sesaaca.

Jesu jeecasacari Bartimeo namijia
(Mt 20.29-34; Lc 18.35-43)

⁴⁶ Nojoriiri jiyacari tiuquiiioquiaari Jericó tiacajinia. Jesuuri cuno tiacajiniji quiariquiaa na saquiriojosano pueyata. Queraatia pueyari nata quiariquiaajuhuj. Jiyacaritij, tamonu cariyujuaru pueyanoori tii cajiriquiaa nuu shuucua. Na sesa quiquiaari Bartimeo, Timeo niyanu. Nojuajaari cumaneeca mashiniquijiona quiquiaari, cariyujuaru

na quiniuucua. Nojuajaari maja na naata poonijionu quijia tamajaaja. ⁴⁷ Nojuaja jaara tojiquiaari cuno tajiyano pueyano quiquiaari Jesu, Nazaret tiacajinijinio, nojuajaari naa nacanú coteeree:

—¡Jesunaa, Pueyaso Jiyarosanonaa, cucua quenaaja quia taraajereja!

⁴⁸ Queraatia pueyari na tenujuriquiaa na sanaajanura juucua. Saaja socua nacaree jiyanoahuari:

—¡Pueyaso Jiyarosanonaa, cucua quia taraajere!

⁴⁹ Jiyacaritij, Jesuuri socua nujuasee. Pueya sequereeri:

—Miji nia sequere cuno nacaani.

Cariyojuaruuri naa sequesaaree:

—¡Quia sanere! ¡Quia shuquiriri! ¡Quia sequeyacuaja! ¡Nocua quia canujiyare!

⁵⁰ Naa na tojishacaritij, cariyajuaruuri na tucuaque toque jataquee. Ritia jaaqueeri Jesuucua na catecanonura.

⁵¹ Jesuuri na nequesotaree:

—¿Casaa quia paniya cua miiniuria quiajaniyani?

Cariyojuaruuri na riucuaaree:

—¡Niishitiojonanaa, niqijiara quiniu paniuhanijia! ¡Cua namijia quia jeececarohua quiria!

⁵² Jesuuri na sequeree:

—Quia quiaarohua. Quia namijiaacuaja tari jeececarohua cucua quia tiuuniuucua.

Jiyacaritij, cariyajuaruuri tari na naata niqiniu quiriquiaa. Nucuaaco Jesu nuhuajiyareeri.

11

Jesu tiuquishacari Jerusalén tiacajinia

(Mt 21.1-11; Lc 19.28-40; Jn 12.12-19)

¹ Nojoriiri tari catecanoriquiaa Jerusalén tiacaacua. Jiyacaritij, nojoriiri tiuquijiosee Olivo cuhuariquia tuhuananucua. Cunoori Betfagé tiaca shuriucua, Betania tiaca shuriucuanio. Jesuuri caapiqui na saquiriojosano pueya jiyaroree tiji. ² Nojori sequereeri:

—Cuno tiacajinia nia quiaare, pa tacoji niquishiyani. Niaa jaara tiuquishii tii, niaari burro riuriatanutaniya morotasano, pueyano cajishoojua na nijinia. Niaa jaara niquishinioj, niocua na samaacartasee. Niocua na jaatucumohua miji. ³ Pueya jaara naa nequesotare niajaniya: “¿Casaara nia samaacartaanoj?”, niocua na sequere: “Jiyaniijia na paniya rupaquijia. Ritia na niqutionutanihuacuaja”.

⁴ Nojoriiri quiojoquiaari. Burro riuriatatuseri morotasano nuujinia, tamonu tia tohuateya shuriucua. Nojoriiri na samaacartasee.

⁵ Tamasaca tii quiniaari nojori sequeree:

—¿Casaa nia miyani? ¿Casaara nia samaacartaa cuno burroni?

⁶ Nojoriiri na riucuaquiaari taa Jesu rootaquiaari nojoricuajani. Naaratej, cuno pueyari nojoriria na tariniti-aquiaari. ⁷ Na nuhuaji, Jesuucua jaatucutumohua cuno burroori. Pueyari na toqueya niojoquiaari burro nijinia, Jesu cajjiara. Na nuhuaji, Jesuuri nocua cajirii. ⁸ Queraatia pueyari na toqueya muevoquiaari nucuaco, Jesuucujaji nojori maniniushitiniuria nuu. Tamasacaari jaamasucua piyotarquiaari cuhuariquiacajiniji, Jesuucujaji nojori niojotascoriquiano na nucuacohuaj. ⁹ Jesu puetanaa, mariyata na nuhuaji nijionaari jiyanoahua nacojonu coteequiaari nojori shuquiriniutia. Naa sequeturiquiaari:

—¡Pa shuquiritiare pa Jiyaniijia Pueyaso! ¡Jiyanoahua maniniacuaja pa Jiyaniijia, cuno, Pueyaso cumaacata tiuquiyani! ¹⁰ ¡Pueyaso cuaara na jiyateera maninia Jiyaniijia na quiniuria pajaniyara! ¡Nojuajaari pa supuetanaa jiyaniijia David niti pa jiitianutaniya maninia cutara! ¡Jiyocuacaanu Quijia pa Pueyasocuajaari pa shuquiritiasano!

¹¹ Jesuuri naa tiuquiquiaari Jerusalén tiacajinatej. Pueyaso Secojoua tiajinia tiuquishiiri. Na niqiniijionu nuhuaji puetunu casaajanaa, Betania tiacajiniara quiaquiaari ritiaari na doce saquiriojosano pueyata. Jiyacaritij, tari tenacariiri quiriquiaa.

Jesu sesacasacari jajauju higo naana
(Mt 21.18-19)

¹² Tariqui, nojori quiojosacari Betania tiacajiniji, Jesuuri miaajeriquiaa. ¹³ Tucuacaanuji niquirii higo naanaari queraatia jaamasucuaraca. Nocua canujiyareeri na niqiniuria seetanujanaa jajauracate quiriquiaa. Saaja queraatia jaamasucuaari quiriquiaa. Maja higo muetusacari quiquiaari jiyacari. ¹⁴ Jesuuri naa sesacaree higo naana:

—Maja quiocuaji socua quia jajau miasaanu quiniutianiya.

Na saquiriojosano pueyari na tojitiariquiaa naa na sequesacaritij.

Jesu jaacasacari seya niqutiojonaa Pueyaso Secojoua tiajiniji

(Mt 21.12-17; Lc 19.45-48; Jn 2.13-22)

¹⁵ Nojori jaara tiuquijioquiaari Jerusalén tiacajinia, Jesuuri tiuquiquiaari Pueyaso Secojoua tiajinia. Tiji pueya tohuatanijionu coteereeri, cuno pojori, canapuee Pueyasooacara puecoosocoriquiano seya niqutiojoriquiaa cumaneecaracuajani. Na masejonaa tohuatanijioreejaarihuaj. Cumaneeca tacatojojuaca juhuacutucua caponeetareeri, tee pueya tacatojoriquiaa taucuaca cumaneecacuajani, Pueyaso

Secojojua tiajinia niqutiojosocoriquiano cumaneecaracua-jani. Naajuhuj, Jesuuri mococoonu niqutiojonaa cajitiu-cua caponeetaree. ¹⁶ Naajuhuj, majaari na shanacunu quiquiaari pueya niyacunura najuhuaana Pueyaso Secojojua tia, na nitiootasano casamitia. ¹⁷ Na nuhuaji, pueya niquiara niishitiojonu coteereeri. Naa sequereeri:

—Tariucuacaanu Pueyaso Rupaajinia naa naajio-tasanocuaajaari quiya:

“Cua tia sesaari quiniutianiya, Pueyaso Secojojua tia. Puetunu jiyacajinijiniojuanaa pueya secojonuujuara quiniutianiyaari”.

Niaari saniniuujia na jiyatequiaari nohuasenuujuaca quiqiora.

¹⁸ Pueyacuara secojonaa jiyaniijianucua, mariyata Moisés Rootasanojiniji niishitiojonaari niishiquiaari naa Jesu miishanojiniji. Cunora, nojoriiri rojotooquiaari taa na motunutaniya Jesuni. Saniniuujia, puetunu pueyajanaari jiuujateriquiaa Jesu niishitiojosano nojori tojishacari. Cunora, Judiocuaca jiyaniijianucuaari Jesu puereturiquiaa, puetunu pueyajanaa tojishacari na niishitiojosano. ¹⁹ Jaara niniquiaari, Jesuuri Jerusalén tiacajiniji quiacuhua na saquiriojosano pueyata.

Higo naana sorenojiniji pohuatasano
(Mt 21.20-22)

²⁰ Tariquiicuaaji, nojori shocosacari higo naana, na niqiu-tiuciaariiri tariucua soreno, puetunu na nujuacatajanaa. ²¹ Pedroori jiyacari Jesu sequesano niishiquii. Jesu sequereeri:

—Niishitiojonanaa, ¡quia niqiri! ¡Quia sesacasano higo naanaqui tari soreree!

²² Jesuuri nojori riucuaaree:

—Pueyasocua nia tiuuri. ²³ Seetanujuanaa nia sequeyani-jia, niaa jaara Pueyasocua tiuuriquia nia taacanuyaquiniutia, nia naata nio tuhuananu sequenu: “Shiiquia niqiiiji. Quia jaataare shoniacu caminiajinia”. Niaa jaara naa sequere seetanujuanaa Pueyasocua nia tiuuniutia, niaari nia sequesano niquiniutianiya. Naacuajitij, Pueyasocuaaji nia taacanuyaquishacari, nia sequesanicuaajaari tohuateenu-taniya taa nia sequereecuajani. ²⁴ Janiyari cunora nia sequeyani, puetunujuanaa nia masesano nia secojosacari Pueyasoni, nia niishiri niaa na jiiitaa tari. Na nuhuaji, niaari seetanujuanaa na masenutaniya. ²⁵ Nia secojosacari, niaa jaara niishiquii niaa sesa quiya tamonu pueyanota, sesa na miiniucua niajaniya, nojuaja nia jiyanoori. Naacuajitij, jiy-ocuaacaanu Quijia nia Queeri nia jiyanooniutianiya sesa nia

miishanojinijijuhuj. ²⁶ Niaa jaara jiyanoashijia quiriquia, jiyocuacaanu Quinia nia Queeri nia jiyanoaquiniutianiya, sesa nia miishanojinijijuhuj.

Pueya nequesotasacari Jesu, cante na jiyaronani
(Mt 21.23-27; Lc 20.1-8)

²⁷ Na nuhuaji, nojoriiri quiaquiaariuhua Jerusalén tiacajinihua. Jesu rucuanesacari Pueyaso Secojjua tiajinia, nocua catecanoquiaariiri pueyacuara secojonaa jiyaniijianucua, Moisés Rootasanojiniji niishitiojonaajuhuj, narta Judiocuaca camarucuanio.

²⁸ Nojoriiri Jesu nequesotaree:

—¿Cante quia sequecanu naa quia miiniuriani? ¿Cante quia jiyatecanu Pueyaso Secojjua tia jiyaniijia quia quiniuriani?

²⁹ Jesuuri nojori riucaaree:

—Janiya nia nequesotanutianiya saniniunijia. Niaa jaara cua nequesotasano riucaare coteenucuaa, janiyari nia sequenutaniyajuhuj cante cua jiyaroquiaari naa cua miiniuriani. ³⁰ Cua riucaaturetoj, ¿cante Tiuquinijiona Juan jiyaroquiaari pueya na tiuquinijionura moojiniani? ¿Narejaca pueyatee, Pueyaso soj? Cua riucaature.

³¹ Jiyacaritij, cuno pueyari jiyasohuaja tama juayonuutano coteequiaarijiaaja. Naa sequetooquiaariiri:

—Paa jaara na sequereni Pueyaso na jiyaroquiaari, pa riucaarucua: “¿Casaara nocua nia tiuyaquiquianucuaarini?”

³² ¿Paatucua taa sequereeri, nojuaja nareja pueya jiyarosano quiquiaari?

Cuno pojoriiri narta Israel pueya puereturiquiaa sequenura, Tiuquinijiona Juanri nareja pueya jiyarosano quiquiaari. Nojoricuajaari niishiriquiaa puetunu pueyajanaari niishiquiaari Tiuquinijiona Juanri seetanujuanaa Pueyaso sequesano caminiujiunia quiquiaari. Cunora, nojoriiri Tiuquinijiona Juan rerequetenu pueretuquiaari, pueya quishacari tii. ³³ Naacujitij, maja na naata na riucaatunu quishacari, Jesu sequetureeri:

—Maja canaa niishiniu.

Jesuuri nojori sequeree:

—Janiyajuhuj, maja cua sequenu quiniutianiya niajaniya, cante cua jiyaroquiaari naa cua miiniuriani.

12

Miriqui pohuatasano sesa miijiaca poonijionaaajiniji
(Mt 21.33-46; Lc 20.9-19)

¹ Jiyacaritij, Jesuuri miriqui pohuatanu coteequiaari cuno pojori niqiuara. Cuno camarucua sequereeri:

—Tamonu pueyanoori cuhuariquiajinia uva natooquiaari. Na nuhuaji, na shuriuquioco maticoreeri. Naajuhuj, saajia quejaquiaariiri uva rapijiojuara, na caaca reratesaanura. Jiy-aconajara tiareejaariuhuj, tiji na cuhuariquia na cojuajara nohuasejojaacuaji.

¹Na nuhuaji, tamasaca poonijionaa pueya na niqutioneeri nojori cojuasocoriquiano nera. Naacuajitij, uva carojotasacari, nojoriiri nojuaja niqutionutaniya tijjiuhuj, na camarujanaa na quiniuucua. Na nuhuaji, nojuajaari tu-cuacaanu quiaquiaari, tii marijia na shocotejonura. ²Jaara tari quiquiaari uva carojotasacari, saniya cuhuariquia camarujanaari na seru jiyaroquiaari cuhuariquia cojuanaa pueyacua. Na jiyaroquiaariiri cuhuariquia cojuanaa niqutionura nojori carojotasanojiniji, taa na camarujanaa pocoojoquiaaricujaja nojoritia tarijiani. ³Cuhuariquia cojuanaa pueyari saaja jiyarosano seru quiaturee. Na piquitiuriiri. Na nuhuaji, juhuasu na jiyaroturohua na camarnuucuaari. ⁴Na camaruuri socua jiyaroquiaari tamonu na seru. Cuno seruuri jacusaaree saitia. Na nacaari sur-tasaaree saajiata jasano. Na sesacatureejaariuhuj. ⁵Na camaruuri socua jiyaroquiaari tamonu na seru. Cuno na seru cutaraari mosaaquiaari. Na nuhuaji, socua jiyaramiquiquiaari queraatia na seyari. Puetunu nojorijini-jiniojuanaani, tamasacaari piquishaaquiaari. Tamasacaari puecoosaaquiaari cutara.

⁶'Cuhuariquia camaruuri saaja niquiriyatujua niyanuniyojua jiitiaquiaari, jiyanohua na panishano. Cunora, nojuajaari socua cuno neyanuniyojua jiyaroquiaari. Na queeri tama sequequiaarijiaaja: "Cuno pueya jaara niquiri cua niyanu, nojoriiri na tojiniutianiya cutara". ⁷Cuno cuhuariquiajinia poonijionaa niquishacari nojori camarnu niyanu nojoriicua niyano, nojoriiri saaja tamajaaja niishitiojotooquiaari:

—¡Nioori pa camarnu niyanu! Nio cuhuariquiaari tama nerajaaja quiniutianiya, na que jaara cusoyare. ¡Pa morej! ¡Pocua nio cuhuariquia camaruhuara quiquii tamajaajani!

⁸'Cunora, na quiatureeri. Na motureeri. Na motunu nuhuaji, nojoriiri macu jataree cuhuariquiajiniji tamama.

⁹Jiyacaritij, Jesuuri cuno pojori nequesotaree:

—¿Taa cuhuariquia camaru miiniutianiya socuani? Nia sequereera pueyanaa. Nojuajaari cuhuariquia cojuanaa puecoonutaniya. Na nuhuaji, tamasaca pueya niqutionutaniya cuno cuhuariquiaari, nera nojori cojuanura.

¹⁰¿Majateeri tariucuacaanu Pueyaso Rupaajinia nia sero-jonu quiquianucujaja nio? Naa sequeyari:

“Tiajonaa pueyari tamaatiujiajau saajia jataree nojori tiasacari saijiniji tia. Na nuhuaji, cuno jatasano saajiaari socua cutara saajiara jiyatesaarohua tamasaca saijiniji. ¹¹ Cunoori pa Jiyaniijia miishano. Pajaniyara, na miishanoori jiyanohua maninia. Nocuaji jiuujiatesano”.

¹² Jiyacaritij, cuno Judiocuaca camarucuaari niishiriicuaaja miriqui Jesu pohuatasanoori tama nojorijinijiaaja quiriquiaa. Naaratej, nojoriiri Jesu quiatunu panirii juucua, nojori nujuatesocoriguiano. Nojoriiri pueya puereriquiaa saaja, naa nojori miiniuria Jesutej. Naacujitij, nojoriiri nareja quiojoquiaariuhua. Naa Jesu pohuatasacari miriqui cuno saajiajinijitij, nojuajaari tama na cuaqueyajinijiaaja pohuatariquiaa.

Jiya jiyaniijia cuaara pueyaracaanu niqitiosaaria na sequesano cumaneeca

(Mt 22.15-22; Lc 20.20-26)

¹³ Na nuhuaji, Jesuucua jiyaramiquishaaquiaariiri noojiaqueya Fariseocuacajinijinio, Herodes panijiaca pueyajinijiniojuhuaj. Cuno pojoriiri Jesu pocuatenu paniquiaari sesa juucua, jiyaniijia nojori saquiriojotanura nocuara. ¹⁴ Naaratej, cuno pojoriiri Jesuucua nijioquiaari. Na sequetuseeri:

—Niishitiojonanaa, canaari niishiyani quiaa cutaraari sapojiyashijia. Quiaari seetanujuanaa sequeja. Majaari rimiajata quia niqiniu pueyajuhuj. Majaari pueya naata sapojonu quiajaniya. Quiaari seetanujuanaa pueya jiuujia niqijia. Quiaa cutaraari seetanujuanaa Pueyasojiniji niishitiojojua, taate pa naata maninia quiniu Pueyaso niqiarani. Naaratej, canaa quia sequere, ¿maniate pa niqitiojonura pa cumaneecajiniji jiyaniijia Césarra, taa cuno tahue sequeriquiaari pajaniyacujani? ¿Taa quia sequeyani, niqitiojoshiyatee, maja soj?

¹⁵ Jesuuri ritia niishiquii, naa nojori nequesotasacari nojuajatej, cuno pojoriiri na saniniujiuriquiaa sesa na pohuatenura najuhuanaj. Naaratej, Jesuuri nojori sequeree:

—¿Casaara nia saniniujiya janiyani? Miji nia riri cumanee cua niquishocoriguiano.

¹⁶ Nera rishaareeri cumanee. Jaara na niqiquiaari, Jesuuri nojori nequesotaree:

—¿Cana naaquiti nocuani? ¿Cana sesateeri nocua naajio-tasanojaniuhuj?

Nojoriiri na riuquaree:

—Jiyaniijia César naaquicuaaja, na sesajuhuj.

¹⁷ Jesuuri jiyacari nojori sequeree:

—Jaara tama César casaajaaja quiri, tama na casaajaaja nia niqutiore na camaru. Saniniujia, Pueyaso nia niqutiore nerano tama na casaajaaja.

Jesu jaara naa nojori riucuaquiaariti, nojoriiri jiyano hua jiuujiatequiaari.

*¿Macunucuate samiitiaconutaniuhua?
(Mt 22.23-33; Lc 20.27-40)*

¹⁸ Fariseocuaca nuhuaji, noojiaqueya Saduceocuacajinijini iori Jesuucua nijioquiaari. Saduceocuacaari jiyaniya macunucua maja na samiitiaconu quiniutianiuhua. Naaratej, nojoriiri Jesu nequesotasee nojori niishiniuria taa na sequenutaniya macunucujinijini. Na sequetuseeri:

¹⁹ —Niishitiojonanaa, supuetana Moisés cuajaari pa rootaa na naajioneejina, pueyano jaara cusoyare mueyaju, tarajanu cuaara camiiira mashiquio, mueya na mueratenura tarajanu niti. ²⁰ Tariija, tamonu pueyanoori niya quiquiaari. Siete niqiuohuaraca quiquiaariiri, saa canuujua. Jiyapueranuuri camiquiaari. Na nuhuaji, shaajequiaariiri muetuhuoju. ²¹ Naaratej, na nuhuajishanaari tarajanu mashiquio camiquiaari. Nojuajaari muetuhuoju cusoquiaarijuhuaj. Naajuhuj, jiyareta na nuhuajishanaari na camiquiaari. Nojuajaari juhua tapueyocuaca cusoquiaari mueyajujuhuj. ²² Cuno siete canuuri naa camiyoquiaari cuno maaji. Puetunu nojorijianaari csonuuquiaari. Majaari quenaaja niquiriyatujua mueya nojori mueratenu quiquiaari. Na nuhuaji, cuno maajiiri cusoquiaarijuhuaj. ²³ Naacuajitij, macunucua jaara samiitiacorohua, ¿teyano cuno siete neyacaajinijiniote setanu neyacajanaa quiniutianiya, puetunu cuno pojorijianaa jaara neyaca quiquiaari?

²⁴ Jesuuri nojori riucuaaree:

—Niaari jiyano hua jiyajeneya Pueyaso Rupaajinia naajiotasano nia niishiyaquishacari, Pueyaso cumaacanio. ²⁵ Macunucua samiitiacosacariuhua, majaari canuu camiyonu quiniutianiya maaji. Naajuhuj, maajipohuari maja na camiyonu quiniutianiya neyacaara. Canuu, maajipohua, nojoriiri mariyata quiniutianiya juhua jiyocuacaanu quijiaca Pueyaso seya, maja camiyosano. ²⁶ Niaa macunucua samiitianijionujiniji nequesoreetaate. ¿Majateeri nia serojonu quiquiaacuaja supuetana Moisés naajioneejina, taa Pueyaso sequequiaari Moisés cuaja nequeru casaja noshiyanojinijini? Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiajuhuaj, quia supuetana Jacobo Jiyaniijiano”.

²⁷ Naacuajitij, paari niishiyani Pueyaso pueya shaajeconoori saminiucua quiya Pueyasora cutara. Pueyasoori maja macunucua Jiyaniijia, saaja saminiucua pueya Jiyaniijia cutaraari. Janiyari cunora nia sequeyani, niaari jiyanohua jiyajeneya nia niishiyaquiniucua Pueyaso Rupaa.

Puetunu Pueyaso Rootasanojinijianaani, teyanote socua pa tojishocoriquianoni

(Mt 22.34-40)

²⁸ Tamonu pueyanoori Jesu tojiri quiaa Saduceocuaca rihuaneyano maninia saaja. Cuno pueyanoori Moisés Rootasanojiniji niishitiojona quiquiaari. Nojuajaari Jesuucua catecanoquiaari. Jesu nequesotareeri:

—¿Teyano tariucuaaanu Pueyaso Rootasanojinijiniote socua pa tojishocoriquianoni?

²⁹ Jesuuri na riucuaaree:

—Pueyaso sequesano socua na pueya tojishocoriquianoori nio: “Nia tojitiare Israel pueyanaa, pa Jiyaniijia Pueyasoni, nojuacuajaari pa Jiyaniijiajanaa. Majaari tamonu quiniu socua. ³⁰ Nia Jiyaniijia Pueyaso nia paniri puetunu nioojiatajanaa, puetunu nia sohuanutajanaa, puetunujuaanaa nia niishitiajata, puetunu nia cumaacatajanaano”. Nio rootasanoori socua pa tojishocoriquiano puetunu Pueyaso rootasanojinijianaa. ³¹ Socua tarajanu na rootasano pa tojishocoriquianoori quera juhua coteenu na rootasanojuhuaj. Naa sequeyari: “Quiarta pueyano quia paniri taa quia paniyacuaa tama quia cuaqueyajaajani”. Puetunu Pueyaso rootasanojinijianaani, majaari socua tamonu rootasano quiniu socua tojishocoriquiano nio caapiqui na rootasanojiniji.

³² Jiyacaritij, cuno Moisés Rootasanojiniji niishitiojonaari na sequere:

—Quiaacuaja maninia sequeree, niishitiojonanaa. Seetanujuanaari quia sequesano: quiyacuaaquiniateja niquiriyatujua Pueyaso. Majaari socua tamonu quiniu juhua nojuaja. ³³ Seetanujuanaa jiyanohua maninia cutaraari Pueyaso pa paniniuria puetunu poojiatajanaa, puetunujuanaa pa niishitiajata, puetunu pa sohuanutajanaa, puetunujuanaa pa cumaacatanio. Naajuhuj, jiyanohua maniniaari parta pueyano pa paniniu, juhua tama pa cuaqueyajaaja. Paa jaara nio sequesano tojijiaa quirini, cunoori jiyanohua

socua maninia Pueyasora, puetunu seya catijiasanojinijijanaa nocuara, mariyata puetunu pueya niqutiojosano na casamijinjijianaa nera.

³⁴ Jesu jaara tojiquiaari naa cuno pueyano riucuasano maniniatej, na sequereeri:

—Quiaaqui quera Pueyaso pueyanora quiya.

Na nuhuaji, majaari socua pueya nequesoreetanu paniniu quiriquiaa Jesu.

¿Canaacuajinio supuenote Cristoni?

(Mt 22.41-46; Lc 20.41-44)

³⁵ Jesuuri Pueyaso Secojojuia tiajinia niishitiojoriqiaa pueya. Jiyacaritij, nojuajaari na tojitianaa pueya nequesotaree:

—¿Casaara Moisés Rootasanojiniji niishitiojonaa sequequiaacuaraarini: “Cristonaari supuetana David niqiuohuacuajinio supuenutaniya”? ³⁶ Pueyaso Sohuanu pohuatesacari supuetana David, nojuacuajaari sequequiaari:

“Jiyaniijia Pueyasoori cua Jiyaniijia Cristo sequeree: ‘Quia cajirijiaara cua miaquetajara, janiya cuaara quia paraa shocojotare quiocuajijiaatijia, Jiyaniijiajanaa quia quiniuria pueyaracaanu cutara’ ”.

³⁷ Supuetana David jiyaniijiacasacari Cristo, ¿Cristotucua taa supuetana David niqiuohuacuajinio supueno quirini? David-cuajaari na jiyaniquiya “cua Jiyaniijiaata”.

Queraatia pueyari shanohua tojitiariquiaa Jesu pohuatasano.

Jesu sequesano Moisés Rootasano niishitiojonaajiniji

(Mt 23.1-36; Lc 11.37-54; 20.45-47)

³⁸ Jesuuri nojori na niishitiojosacari sequeriquiaa:

—Tama nia cuaqueyajaaja nia cojuare Moisés Rootasano niishitiojonaacuaji. Cuno pojoriiri puera tucuaque toque cushiyonu maniniucuaaja nojori rucuanejotajara, pueya shootianura nojori. Nojoriiri timiquiaa pueya saruhuatasacari nojori, nojori quishacari tiaca jiuujiajinia curotasano cajitiucujinia. ³⁹ Nojori jaara masuusaare tamonu tiajinia queranacunura, nojoriiri ritia secoquiaa socua panishano cajitiujinia nojori cajitiuniuria tia camaru shuriucua. Naajuhuj, Pueyaso secojojuia tiacajiniaqueya pueya rerejosacari, nojoriiri camarucua cajitiucujinia cajitiuniu paniquiaa, pueya shootianura nojori. ⁴⁰ Nojoriiri mashiquiopue tiaca masequiaa secaja cumaneecata nojori na sapojonuta. Naa nojori miiniu nuhuajitij, nojoriiri Pueyaso secojoquiaa shitiarayocua pueya niquiara, maninia pueya nojori jiyanishaanura. Naaratej, Pueyaso

saniitiosacari maninia miyashijiaca pueya, nojoriiri socua jiyanhua naquiya miishaanutaniya tamasacajiniji.

Casamijiu mashiquio niquitiosacari na cumanee juurane
Pueyasora

(Lc 21.1-4)

⁴¹ Tamacari, Jesuuri cajiriquiaa Pueyaso Secojoua tiajinia cumaneeca niquitiojoua tacoji, tee pueya niojoriquiaa na cumaneeca Pueyasoracuajani. Jesuuri tiji pueya shootiariquiaa na cumaneeca niquitiojiyano. Queraatia casamiriaca pueyari queraatia cumaneeca niquitiojoriquiaa. ⁴² Jiyacari tiuquishijiaariuhua casamijiu mashiquio. Caapiqui cumaneeniyoua niasee cumaneeca niojouajiniaari. Cuno cumaneeca na niasanoori maja puera cumaneeca na quiniu quiriquiaa. Saaja cobrejiniji shipinishano quiquiaariiri. ⁴³ Jesuuri jiyacari na saquiriojosano pueya piirii. Nojori sequereeri:

—Seetanujuanaa nia sequeyanijia, nio casamijiu mashiquio cutaraari socua queraatia niquitioree puetunu tamasacajinijijianaa. ⁴⁴ Puetunu pueyajanaari na cumaneeca curenojiniji niquitiojoriquiaa. Saniniuujia, nio maajiiri puetunujuanaa na miaquesocoriquiano na masetajarano niquitioree cutara.

13

Jesu sequesacari Pueyaso Secojoua tia niyartasaanutaniya
(Mt 24.1-2; Lc 21.5-6)

¹ Jesu tohareetasacari Pueyaso Secojoua tiajiniji, tamonu na saquiriojosano pueyajinijinioori na sequere:

—Niishitiojonanaa, quia niquiri Pueyaso Secojoua tia, puereetujuaaca saitia tiasano. ¡Jiyanhua shanhua tia!

² Jesuuri na riuquaree:

—¿Quiaateeri cuno shanhua tia niquiya, saijiniji tiasano jyaconajani? Cuniqi, majaari saajia cureenu quiniutianiya tamonu caco maano quenaaja. Puetunu niyartasanojuanaa quiniutianiyari.

Taa pa niishiniutianiyani jiya puequesacari quera
(Mt 24.3-28; Lc 21.7-24; 17.22-24)

³ Na nuhuaji, nojoriiri quiojoquiaari olivo cuhuariquia tuhananuucua. Cuniqiji, maja puera tucuaaanu quiquiaari Pueyaso Secojoua tia. Na taquijiriaja quiquiaariiri. Jesu cajishacari tii, nocua catecanoquiaariiri Pedro, Santiago, Juan, Andrésnio. Nojoriiri na sequetuquiaari jiyasohuaja:

4 —Canaa quia sequere taacari Pueyaso Secojoua tia niyartasaanutaniyani. ¿Casaa Pueyaso miiniutianiyani canaa niishiniuria quia sequesano quera tohuateya?

5 Jesuuri nojori riucuaare:

—Tama nia cuaqueyajaaja nia cojuare tamasaca sapojyaquiniuucuaaji niajaniya. ⁶Nia numooteyacuajanijia, queraatia sapojonuujuaacari nijionutaniya nojori sequenura niajaniya: “Janiya Cristoni”. Naa sapojotunutaniya queraatia pueyari.

⁷Niaa jaara tojiniuuri miaquetoojonujiniji niya, tucuaaanujuhuaj, majaari najuhuana nia shiriiquituniu. Seetanujuanaa naa quiniutianiyari. Naajaa, jiyacari, majaari jiya puequesacari quiniutianiya juhuanoujaaja. ⁸Tamonu rupaa pocuajacaari miaquetoojonutaniya tamaatiuucua rupaa pocuajacata. Pueyari tamonu jiyajiniji miaquetoojonutaniya tamonu jiyajinijinio pueyata. Naajuhuaaj, rijiaari jiuuquiujutianutaniya queraatia tiquiyocua tiacajinia. Jiyanohua mi-aajesacariiri quiniutianiya jiyacari. Naajaa, puetunu niojuanaari saaja shusha naquiya miiniu coteesacari quiniutianiya.

⁹Tama nia cuaqueyajaaja nia cojuare. Niaari tama nia tiacajinia jiyaniijianucuaajaaja niquitiosaanutaniya sanitiesocoriquiano. Naajuhuaaj, niaari Pueyaso Secojoua tiacajiniajanaa majacusaanutaniya. Niaari jiyatasaanutaniyajuha tiaca jiyaniijiaacua, jiya jiyaniijianucuaacuanio, nojori nequesoreenura niajaniya, janiyajiniji pohuatanaa nia quiniuucua. Naacuajitij, niocua janiyajiniji pohuatate nojori niquiarajuhuaaj. ¹⁰Jiya puequeyaquishacarijia, Pueyaso rupaari tari pohuatasano quiniutianiya puetunu jiyacajinijanaa. ¹¹Cua tojiri, niaa jaara jiyatashiyare jiyaniijianucuaacua nequesoreesocoriquiano, majaari nia tacaaniu taa nia sequenutaniyani, taa nia pocuanutaniyani. Majaari quenaaja nia niishiriojonu naatej. Saaja nia sequere nojori niquiara jiyacari Pueyaso Sohuanu niishitiojosano niajaniya. Nia pocuasanoori maja niajanijajiniji quiniutianiya, nia pocuasacari nojori niquiara. Cunocuaajaari Pueyaso Sohuanu niishitishano quiniutianiya, na pocuatesacari niajaniya. ¹²Jiyacarijuhuaj, pueyanoori sesa miiniutianiya tama tarajanujuaaja, cua tojjia tarajanu quiniuucua. Tama tarajanujuaarijia na niqutionutaniya mosocoriquiano. Jiyacaritij, pueyari tama necohujaaja miiniutianiya sesa, cu-cua tiuujia necohua quiniuucua. Naajuhuaaj, necohuari tama na queya tacartanutaniya monujuaaja, na queya tojiniuucua Pueyaso rupaa. ¹³Puetunu nio jiyajinijinio pueyajanaari maja na niqiniu paniniu quiniutianiya niajaniya, cua tojitiajaca nia quishacari. Naajaa, cante seetanujuanaa

pueyaracaanu cucua tiuyajaani nio jiya jaara puequerejaatia, nojuaja cutaraari shacantuuca quijiara jatanishaanutaninya, pueyaracaanu cuata na quiniuria shuquiriaatia.

¹⁴ 'Niaa jaara cuno jiyano hua sacuaraatia casaa niquiri Pueyaso Secojoua tiajinia nujuatesano, taa supuetana Daniel sequeya na naajioneejiniacuajani, niocua ritia mashiri. (Cante nio serojiyani, nojuaja cuara niishiiria casaa na sequeyani.) Judea jiyajinia quiniaa cuara mashiiria ritia tuhuananuhuacua, cuno sacuaraatia casaa jaara nujuatesaare Pueyaso Secojoua tiajinia. ¹⁵ Canapuate jiyacari quiya na tia cacojiriani, nojori cuara tiuquitiaaquiiria tiajiniaaco na casaa na riniuria juucua. ¹⁶ Canapuate jiyacari quiya na cuhariquiainiani, nojori cuara tacateyaquiuhuara na toqueya na poonuhuara. ¹⁷ Jiyacaritij, jiyano hua taraatia quiniutianiyari maajipohuara, nojori jaara manajaatohua quiya, jaara jiyacari jiitiare supuejaca conaajahuaj. ¹⁸ Nia secojosacari, Pueyaso nia maseriquia juhuacarijia, nia mashiycuatusacari cuara quiyaquiiria shiniquia quishacari. ¹⁹ Cuno quishacari, jiyano hua naquiya miiniuuri quiniutianiya. Tariucuaaanu, majaari naa naquiya miiniu quiquiaari Pueyaso shipininiu nuhuaji nio jiya. Naajuhuaj, cuno naquiya miiniu nuhuaji, majaari jiyano naquiya miiniu quiniutianihua socua, juhua nio. ²⁰ Pueyaso jaara ritia tajitiyaquiri cuno naquiya miiquiosacari, pueya maara mijiria cureyaquirij. Pueyasocuaajaari ritia tajitiniutianiya cuno naquiya miiniu, na saquiriojosano pueyacua na taraajenuucua.

²¹ 'Jiyacaritij, tamasaca jaara nia sequere: "Nia niquiri, Cristo tari niya quiya", jaara sequerejuhuaj: "Nooj, jati quiyatej", majaari na tojitianunoj. ²² Jiyacaritij, queraatia sapojonuujuaacari supuenutaninya. Nojoriiri sequenutaninya: "Janiyacuaaja Cristoni". Tamasacaari sequenutaninya juhuaj: "Janiya Pueyaso sequenu panishano caminiujiuniani". Nojoriiri pueya niquishoo casaa miiniutianiya na cumaacata, Pueyaso saquiriojosano pueya na sapojonura juucua. Jiyacaritij, queraatia pueya cutaraari sapojosaanutaninya. ²³ Cunora pueyanaa, tama nia cuaqueyajaaja nia cojuare. Janiyacuajaari tari juhuacarijia nia numooteyani. Majaari cua sequesano nia niyajetanu.

Pueyaso Niyanu tacatenujiniji pohuatasano
(Mt 24.29-35, 42, 44; Lc 21.25-36)

²⁴ 'Naa naquiya pueya miiniu nuhuajitij, pananuuri ninishiquiria quiniutianiya. Naajuhuaj, racaari maja na cuhatanu quiniutianiya mijiria. ²⁵ Riyari

totenutaniya. Jiyocuacaanu cumaacaraca quijiacaari tetecatunutaniyajuhuj. ²⁶ Jiyacari, janiya Pueyaso Niyanuuri niqushaanutaniya jiyocuacaanuji roseyano cohujajiniani, jiyanohua shacantuuca cua cumaacata. ²⁷ Jiyacaritij, janiyari cua seya jiyaramiquiniutianiyani nojori rerejotenura puetunu cua saquiriojosano pueyajanaa. Nojoriiri puetunu nio jiyajinijiniojuanaa rerejotesaanutaniya, socua jiyanohua tucuacaanu jiya cajiniocua puequeetujinijinio.

²⁸ Quiarijia cutara nia niishiri higo naanajiniji. Shuniyara, na jaamasucuaari totequiaa jaranacujua na quiniuria. Na nuhuaji, na cashacucua jaara macumaaca quiri, quiarinio jaamasucuaari mueratumohua. Niaa jaara naa niquiritij, niaari niishiquiaa tacareejonuqui quiniutianiya. ²⁹ Quiarijia saniniuujia, naatej taa nia niishiquiaa higo naanacuaani, niocua naa niishirijuhuj janiya quera tiuquiuhuani, niaa jaara puetunu cua pohuatasanojuanaa niquri tohuateyano. ³⁰ Seetanujuanaa nia sequeyanijia, puetunu cua pohuatasanojuanaari niqushaanutaniya nio pa quishacari quiniaa pueya cusonuyaquishacarijia. ³¹ Jiya cajiniocuaari shaajenutaniya, nio jiyajuhuj. Cua Rupaa cutaraari maja na jatanu quiniutianiya. Cua sequesanoori puetunujuanaa tohuateenutaniya.

³² Maja cutaraari nia niishiniu taacari cua tiuquiniuti-niuhuani, casaa juucatej. Majaari jiyocuacaanu quijiaca Pueyaso seya niishiniujuhuj. Janiyajanaari maja cua niishiniu. Saaja cua que Pueyaso cutaraari tamajaaja na niishiya.

³³ Cunora, janiyari nia sequeya cutarani, maja juhua maquenuujuuaca nia quiniu. Pueyaracaanu nia niqutiare cucuaji, juhua sutejaca. Tamajaaja nia soquere. Saaja pueyaracaanu nia secojoriquia Pueyaso. Majacuaajaari nia niishiniu taacari cua tiuquiniuti-niuhuani. ³⁴ Cunoori quiniutianiya juhua tamonu pueyano quianu panishacari tamonu jiyajiniara tucuacaanu. Na quianura, nojuajaari na seya seerataaree maninia nojori cojuanura na tia. Tamasaca niqutioree na poonijosanoori, nojori poonijosocoriquiano. Tamonu sequereeri, tohuateyaji na cojuanura pueyaracaanu, nojuaja cuara tiuquiuhuarajaatijia. ³⁵ Naaratej, nia sutere. Maja maquenuujunu. Majaari nia niishiniucuaaja taacari tia camaru tiuquiniuti-niuhuani, shusha ninishacari, shiyaqueya, caacaraja niunijosacari, tariquicuaji soj. ¿Taacari cua tiuquiniuti-niuhuani? Johuj, maja pa niishiniu. ³⁶ Cunora, juhua sutejaca nia quiri-quia, janiya mariqui nia

jiyajenetesuhuari, canashiyaquiji cua tiuquishacariuhua niaacua. ³⁷ Cua sequesano niajaninyani, cunoori puetunu pueyarajanaa: “¡Nia sutereja! ¡Maja maquenu!”

14

Judiocuaca camarucua roojotoosacari nojori quianura Jesu (Mt 26.1-5; Lc 22.1-2; Jn 11.45-53)

¹ Jiyacari, juhuanojuaja querajaa juuca quiriquiaajaari Pascua juucara queranacunura. Pascua juucajuhuaj, poreetajaaju shipinishano pan miaquenu coteesaaquiaari siete juucara. Pueyacuara secojonaa jiyaniijianucuaari jiyacari Moisés Rootasanojiniji niishitiojonaata roojotooriquiaa Jesuucua. Nojoriiri roojotooriquiaa taa nojori sapojonuta nojori quiatunutaniya Jesu jiyasohuajani, na motusocoriquiano. ² Nojoriiri naa sequetooriquiaa:

—Maja queranacusacari naa pa miiniutij, paa mariqui puetunu pueyarajanaa juaatiriiri.

Tamonu maaji totasacari na shanohua jaanutaja Jesuucua (Mt 26.6-13; Jn 12.1-8)

³ Jesuuri Betania tiacajinia quiriquiaa Simón tiajinia na saquiriojosano pueyataja. Cuno Simónri tarijia lepra cusotaja quiquiaari. Jesu cajishacari tii miaquejajinia, tamonu maajiiri tiuquiquiaari. Shiitianiyojua shucuariquiaja pataconiyojua cacatariquiaari, shanohua cohujaja saajiajiniji quejasano. Mishaja quiriquiaari shanohua jaanutajata, nardo jaamasucuaajiniji shipinishano. Jiyanojua queraatia cumaneecata masesano quiquiaariiri. Jiyacaritij, cuno maajiiri na shucuariquiaja pataconiyojua cocuataree, na totanura Jesu nacaacua. ⁴ Tamasaca tii quiniaa pueyari juarii naa cuno shanohua jaanutaja niitiasaanucua. Tama nojorijiaarjia sequetooriquiaa:

—¿Casaara cuno shanohua jaanutaja niitiasaaree najuhuanani? ⁵ ¡Cuno jaanutaja maara niqutiosaacanu queraatia cumaneecara, casamijiuniucua niqutiosocoriquiano!

Nojoriiri juhuacatecara cuno maaji juarii.

⁶ Jesuuri nojori sequeree saaja:

—¡Nia tarinitiare! ¿Casaara nia rimiaaqueya nio maajicuarani? Naa na miishano janiyani, cunoori jiyanojua maninia quiria. ⁷ Casamijiuniucua pueyacuajaari pueyaraaanu quiriquiano niaata. Nia naatacuajaari maninia miiniu nojori nia panishacari. Janiya saniniuuja, maja cutaraari cua quiniu quiniutianiya pueyaracaanu niaata. ⁸ Nio maajiiri maninia miirii. Majaari na naata miiniu quiriquiaa socua maninia nio na miishanojiniji. Na totasacari cucua na shanohua jaanutajani, nojuajaari juhuacarijia cua cuaqueya

jeenucuaa, raaco cua niasaanura janiya jaara mosaareni.
⁹ Seetanujuanaa nia sequeyanijia, puetunu jiyacajiniajanaa tee Pueyaso rupaa pohuatasaanutaniyani, nio maaji miishanoori pueyaracaanu pohuatasaanutaniyajuhuj. Naa na miishano janiyatej, majaari na niyajetasaanu quiniutianiya.

Judas tacartasacari Jesu, na quiatenura

(Mt 26.14-16; Lc 22.3-6)

¹⁰ Jiyacaritij, Judas Iscarioteeri quiaquiaari pueyacuara secojonaa jiyaniijianucuata roojotoonura taa nojori na quiatenutaniya Jesuni. Nojuajaari Jesu saquiriojosano pueyajinijinio quiquiaarijihuj. ¹¹ Jiyaniijianucua jaara tojiqiaari, Judas nojori quiatenu paniya Jesu, nojoriiri jiyanohua shuquiririi. Nojoriiri Judas sequere:

—Canaa quia niqutionutaniya cumaneecani, canaa quia quiatenu sami Jesu.

Cunora, Judasri niishiriojonu coteequiaari taacari nojori na quiatenutaniya Jesuni.

Jesu miaquesacari na nuhuajiria na pueyata

(Mt 26.17-29; Lc 22.7-23; Jn 13.21-30; 1 Co 11.23-26)

¹² Puetunu marijiajanaa, Judiocuacaari Jerusalén tiacajinia rerejoquiaari poreetesoo pan nojori miaquenuunura siete juuca. Coteenu juuca sesaari quiquiaari “Pascua”. Cuno juuca puecoosaaquiaariiri Pascuara riuriotaca borregohua, Pueyaso niqiuara miaquenuusocoriquiano. Naaratej, Pascua juuca quishacari, Jesu saquiriojosano pueyari Jesu nequesotaree:

—Jiyaniijianaa, ¿tee quia paniya canaa majeetenura quiocuaji borregoni, pa miaquesocoriquiano quiarijia Pascuarani?

¹³ Jiyacaritij, Jesuuri caapiqui na saquiriojosano pueyajinijinio sequere:

—Nia quiaare Jerusalén tiacajinia. Niaari tii riuriatanutaniya tamonu pueyano, na mohuaca pataano na patacujinia. Niaa jaara na riuriatasee, niocua na nuhuajimia.

¹⁴ Jaara tiuquishii tiajinia, niocua cuno tia camaru sequesee: “Niishitiojona naa quia sequeya: ‘¿Tee cuniqui cua miaquenutaniya cua saquiriojosano pueyata quiarijia Pascua niucuan?’ ” ¹⁵ Jiyacaritij, nojuajaari nia niqitiniutianiya puereetuuca sohuaca, jiyocuacaanu nataco, tariucua maninia jeenucuasano. Niocua cuniqui borrego majeetesee, niucua pa miaquesocoriquiano.

¹⁶ Na saquiriojosano pueyari quiojoquiaari. Tiacajinia tiuquiiijoseeri. Nojori tiuquiiijosacari, nojoriiri puetunujuanaa riuriatasee taa Jesu sequere nojoricuajani. Nojoriiri tii majeetesee borrego, Pascuara miaquesocoriquiano.

¹⁷Jaara niniquiaari, Jesuuri tiuquiiijiosee na saquirojosano doce pueyata. ¹⁸Nojori miaquenuusacari, Jesuuri nojori sequeree:

—Seetanujuanaa nia sequeyanijia, tamonu niajanijajini-jinio niya cuata miaqueyani, nojuajaari cua tacartanutaniya na quiatenura janiya, naquiya cua miishaanura.

¹⁹Jesu sequesacari naatej, nojoriiri jiyanohua taraajequee. Jiyacaritij, tama nojorijiaarijia na nequesoreetanu coteeree:

—¿Janiya jiyoteeri quia quiatenutaniyani Jiyaniijianaa?

Puetunu nojorijianaari naa na nequesotaree.

²⁰Jesuuri nojori riuquaree:

—Niquiriyatujua doce niajanijajiniocujaa, nojuacua-jaari nio, shusha pan shiya miacojuajiniani, nojuajaari cua quiatenutaniya. ²¹Janiyacuaajaari maninia tohuateenu-taniya puetunujuanaani, taa tariucuaaanu Pueyaso Ru-paaajinia janiyajiniji naajiotasaaquiaaricujani. Saniniu-ujia, jiyanohua taraatia quiniutianiyari cuno pueyanora, cantucujaa cua quiatenutaniya mosocoriguianoni. Maara socua maninia quiquiaari cuno pueyanora, nojuaja jaara raaquishaaquiaari.

²²Nojori miaquenuusacari, Jesuuri pan ririi. Na Que Pueyaso secojoree nocuaraari. Na neecasenu nuhuaji, nojori niqutiojoreeri. Na niqutiojosacari, naa miriqui seque-quaariiri:

—Jajaa. Nia miaquere. Nioori cua cuaqueya.

²³Na nuhuaji, Jesuuri ratujua pataree. Na Que Pueyaso secojoreeri nojori ratusocoriguianoocuaara. Na secojonu nuhuaji, na saquirojosano pueya niqutioreeri nojori ratunura tiji. Puetunu nojorijianaari ratujuajiniji raturee.

²⁴Nojori sequeree miriquiiri:

—Nioori cua nanaca. Cua nanacaari queraatia puey-acuara shoonutaniya. Naacuajitij, Pueyasoori seetanujua-naa jiyanooniutianiya pueya, saaja nojori tiuuniucua cu-cua, taa Pueyaso sequequiaaricujani. ²⁵Seetanujuanaa nia sequeyanijia, maja socua cua ratunu quiniutianihua uva caacajiniji, janiya cuara tacatemohuajaatijia pueyaracaanu Jiyaniijajanaa cua quiniuria. Jiyacaritij, janiyari shusha niaata na ratunutanihuani.

*Jesu sequesacari Pedro, nojuaja nocuaji seetanutaniya
(Mt 26.30-35; Lc 22.31-34; Jn 13.36-38)*

²⁶Pueyasora na jaaquequenuunu nuhuaji, nojoriiri quio-joquiaari olivo cuhuariquia tuhuananuucua. ²⁷Na quio-josacari, Jesuuri nojori sequeree:

—Nio niucujani, puetunu niajanijajanaari cucua tiuuniu tarinitianutaniya. Naa naajiotasano quiyacuajaari niajanijajiniji tariucuacaanu Pueyaso Rupaajinia. Naa sequeryari:

“Janiyari borrego Cojuana monutaniyani. Na borregohuari na camaru nuhuaji niyaquejonutaniya tamajaaja”.

²⁸ Na nuhuaji, janiya jaara samiitiarohua macujinijini, janiyari nia puetanutaniya Galilea jiyajiniani.

²⁹ Pedroori jiyacari Jesu sequeree:

—Niya cuata quiniaa naasucua quiocuaji carajenutaniya. ¡Janiya cutara maja cua catenu quiniutaniya quiocuaji!

³⁰ Jesuuri saaja na sequeree:

—Pedronaa, janiya seetanujuanaa quia sequeyani, nio niucujani, quiaari janiyajiniji naa seetanutaniya pueya niquiara: “¡Maja cua niishiniu Jesu!” Quiaari naa pacutejonutaniya sequenutej, caacaraja caminiujiaquishacarijia niunijionu.

³¹ Pedroori saaja na pataariquiaa naa Jesu sequesacari nojuajatej. Socua sequerohuari:

—¡Janiya cuara mosaaria quiataqui, naajaa, majaari cua seetanu quiniutaniya quiocuaji!

Narta saquiriojosano pueyari naa sequetureejuhuj.

Taraatia Jesu secojosacari Getsemaní cuhuariquiajia
(Mt 26.36-46; Lc 22.39-46)

³² Nojoriiri jiyacari tiuquiiijioquiaari tamonu cuhuariquiajia. Cuno cuhuariquia sesa quiquiaari Getsemaní. Jesuuri na saquiriojosano pueya sequeree:

—Niyaja nia cajitiuri, cua secojosacari cua Que socua nia tacoji.

³³ Nojuajaari saaja nocua rupojiyaree jiuujianaraca na pueya: Pedro, Santiago, Juannio. Jesuuri juhuacatecara shiriqiriqiaa. Tacaariquiaajaariuhuj. ³⁴ Nojori sequereeri:

—¡Coojiajia taraajeya jiyanojuanijia, quera cusoyanjia! Niyaja nia jiyojetare. ¡Niocua niquitiareja! ¡Majaari maquenu!

³⁵ Jesuuri socua shiitaniyoyua quiaaree nojori tacoji. Na secojonura Pueyaso, mojuquetaseeri. Jiyocuara jacamaquiaariiri. Pueyaso masereeri, maja naquiya na miishaanura juucua. ³⁶ Na secojosacari, nojuajaari naa sequequiaar-itij:

—Cua Quenaa, quiara maja jiyajeneta quia panishano quia miiniuria. Naaratej, janiya quia secojiyani, nio raatonuque cucuaji quia tajitiri. Naajaa, cuara quiyaquiiria juhua cua panishano. Saaja cuara quiiria cutara taa quia paniyacuajani.

“Nio raatonuque” na sequesacari, Jesuuri miriqui sequeriquiaa naquiya na miishocoriquiano.

³⁷ Na secojonu nuhuaji, na saquiriojosano pueyacuatacaterohuari. Nojori riuriasuhua maquetiuyanoori. Jesuuri Pedro sequeree:

—Simónnaa, ¿quiaate maqueya? ¿Majateeri quenaaja quia naata rejeretanu rupaquijia quia maquenu? ³⁸ Nia sutere. Maja maquenu. Pueyaso nia secojore niaa mariqui sesa mitishaareeri. Seetanujuanaa, poojiaari maninia miiniu panijia. Pa cuaqueyari saniniuujia sasaca quiyacujua. Majaari pa naata maninia miiniu pa panishano tamajaaja. Cunora, Pueyaso nia secojore na cumaquiniuria niajaniya maninia nia miiniuria.

³⁹ Jesuuri quiaquiaariuhua socua secojonuhua. Na secijosacari, socua sequenu pacutequiaariiri juhua coteenu na sequesano. ⁴⁰ Na nuhuaji, socua tacatequiaariuhua na saquiriojosano pueyacuataari. Nojori riuriasuhuariuhua maquetiuyano. Nojori namijiaari saaja seecutayariquiaa na maquenuujunuta. Jiyacaritij, nojoriiri maja na niishiniu quiriquiaa taa na riucuatunutaniyanoj. ⁴¹ Jesuuri socua quiaquiaariuhua na Que secojonura. Na tacatesacariuhua secojonujiniji, nojori sequesuhuari:

—¿Niaate maquetiuyajaa? ¿Niaate samaateyajaa? ¡Tariucujaja! ¡Quiarijia cutara janiyari sesa miijiaca pueya quiateaanutaniyani, nojori miiniuria janiya taa nojori panitiuyacuajani! ⁴² Nia saneecuatire. Pa quiaare. Cua quia-teriquiano tari cumaji.

Na paraa quiasacari Jesu

(Mt 26.47-56; Lc 22.47-53; Jn 18.2-11)

⁴³ Jesuuri pocuariquiaajaa Judas tiuquishacari nojoriicua. Cuno Judasri, Jesu saquiriojosano doce pueyajinijinio quiquiaarijuhuaj. Queraatia pueyari Judasta nijioquiaari. Cuno pueyari nijiniaquetucujaja mueruu pooriquiaa, macacanio. Cuno pojoriiri pueyacuara secojonaa jiyaniijianucua jiyaramiquishano pueya quiquiaari, Moisés Rootasanojiniji niishitiojonaa jiyaniijianucua jiyaramiquishanojuhuaj, Judiocuaca camarucua jiyaramiquishanonio. ⁴⁴ Judas, Jesu quiateriquianoni, nojuajaari juhuacarijia nata quiniaa pueya rootaquiaari, nojori niishiniuria teyanote Jesuni. Naa nojori sequequiaariiri:

—Teyano pueyano cua nujuya pa tiuquishacarini, cunocujajaari nojuaja. Niocua na quiaasee. ¡Niaari maninia morojosano jaatucutaarohuaquinioj!

⁴⁵ Naacujitij, Judas jaara tiuquiquiaari Jesuucua, nocua catecanouquiaariiri. Na sequereeri:

—¡Niishitiojonanaa!

Jiyacari na nujuureeri. ⁴⁶ Judasta nijionaa pueyari jiyacari Jesu quiasee. Morojosanoori jaatucutashiyarohua.

⁴⁷ Cuniqui Jesuta quiniaa pueyajiniinioni, niquiriyatu no-jorijiniinioori na shuucuaaji shitiaquiaari nijiniaquetucuaaja mueruu. Nata jaateree pueyacuara secojonaa jiyaniijia seru numocoori. ⁴⁸ Jesuuri nocua nijionaa pueya sequeree:

—¿Casaara cucua nia nijioree nijiniaquetucuaaja mueruu-tani, macacatanio, morojosano nia riniuria janiya juhua nohuasejojuani? ⁴⁹ Janiyacuajaari puetunu juucajanaa nia tajinia quiquiaani, Pueyaso Secojoua tiajinia cua niishitio-josacari pueya niquiara. Majaari tii cua quishacari nia quianu quiquianu janiya. Naajaa, naa nia miiriqui, tariu-cuacaanu janiyajiniji Pueyaso Rupaajinia naajiotasano tohu-ateenura.

⁵⁰ Jiyacaritij, puetunu Jesu saquiriojosano pueyajanaari na shuriucuaaji mashiyocuatucuaari. Tamajaaja Jesu tiu-jiatuqueeri. ⁵¹ Saaja tamonu mashajaari Jesu nuhuaji sacuariquiaa cutara. Cuno mashaja sesaari Marco. Nojua-jaari saaja puereetueque lino toquerauta cuhuajaatiariquiaa. Jesu quiatunaa niquishacari nojuaja, na quiatureejaari-uhuj. ⁵² Nojuajaari saaja na toque tiujiaquee nojori juaashiquiajinia. Juhuasuri ritia netequee. Mashimiaari. Janiyacuajaari cuno pueyano quiquiaarini, nio naajiona-juhuaj.

Judiocuaca camarucua nequesoreesacari Jesu
(Mt 26.57-68; Lc 22.54-55, 63-71; Jn 18.12-14, 19-24)

⁵³ Jesu quiatunaari Jesu jaatucucuaari pueyacuara secojonaa jiyaniijia tiajinia. Puetunu nio pojorijianaari tii rere-joquiaari: pueyacuara secojonaa jiyaniijianucua, Judiocuaca camarucujuhuj, Moisés Rootasanojiniji niishitiojonaanio. ⁵⁴ Pedroori Jesu nuhuajiquiaari tucuaaanuji. Jateeseeri pueyacuara secojonaa jiyaniijia tia carijiniacuma. Cuno jiyaniijiajanaa seya tajinia cajishiiri. Mani jitiuriquiaa no-joritia cuniquiiri.

⁵⁵ Pueyacuara secojonaa jiyaniijianucua, puetunu Judiocuaca camarucujanaari niishiriojonuuriquiaa nojori saquiriojotanura Jesuucuaara. Jesuucuaara tonujuriquianoori pajesaaquiaari juucua, na motenura. Saaja shaaqui quiquiaariiri sesa casaa, nocuara tonujusocoriquiano. ⁵⁶ Queraatia pueyari nocuara tonujuriquiaa juucua, nojori sapojonuta. Nojori saquiriojotasoanooori saaja rimiajata quiriquiaa puetunujanaa. ⁵⁷ Na nuhuaji, tamasaari sanetaquiaari nocuara nojori tonujunura na sapojonutajuhuj. Nojoriiri naa sequetuquiaaritij:

58 —Canaa na tojiquianu sesa sequeyanoni. Naa sequecanuuri: “Janiya nio Pueyaso Secojoua tia niyartanutaniyani, pueya tiasanoni. Jiuujianaraca juucajinia, janiyari tamajaaja na tianu tucuatanutaniuhuani. Cunoori maja pueyata tiasano na quiniu quiniutianiya”.

59 Nojori saquiriojotasanoori saaja rimiajata quiquiaari jiyaniijianucua niquiara.

60 Jiyacaritij, pueyacuara secojonaa jiyaniijiaari nujuaree pocuanura. Jesu nequesotareeri:

—¿Majate quenaaja quia riucuanuujua? ¡Quia tojiri, pueyaruha quicuara tonujiya!

61 Jesuuri saaja sanaa nujuariquiaa. Majaari na riucuanu quiriquiaa quenaaja. Pueyacuara secojonaa jiyaniijiaari socua na nequesotaquiaariuhua:

—¿Quiaate Cristo, jiyocuacaanuji Pueyaso Jiyarosano?

62 Jesuuri na riucuarree:

—Jaa, nojuacuajanijia. Niaari cua niquiniutianiya jiyocuaaanu cumaaca Jiitiana miaquetajara cajiyano. Na nuhuaji, niaari cua niquiniutianiya tacatehuano cohujajinia jiyocuaaanuji.

63 Pueyacuara secojonaa jiyaniijia jaara tojiquiaari naa Jesu sequesantej, tama na toquejaaja sutaree na juaaniuti-aari. Sequereeri:

—¿Casaara pa sashiya tamasa saquiriojotanura saa nocuarajaanihuaj? 64 Niaacuaja shusha tojirii Pueyasocuara na sequesano sacuaraatia. ¿Niajanियarijijataj, taa nia niishiriojijani?

Puetunu pueyajanaari sequequiaari:

—¡Cuaara mosaaria!

65 Jiyacaritij, tamasaari Jesu riocojonu coteequiaari. Na jiquioco morotureejaariuhua maja na niquiniuria. Na nuhuaji, pueyari na piquiniu coteequiaari. Na piniu nuhuaji, na nequesotaturiquiohuari:

—Quia niishiritioj, ¿cante quia piriini?

Secojoua tia cojuanaa pueyari na jiquioco piquitiurijihuaj.

Pedro seetasacari Jesujiniji

(Mt 26.69-75; Lc 22.56-62; Jn 18.15-18, 25-29)

66 Pedroori jiyaniijia tia carijiniacuma quiriquiaa. Jiyacaritij, tamonu niyacoori rucanejoriquiaa carijiniacuma. Nojuajaari pueyacuara secojonaa jiyaniijia seru quiquiaari.

67 Pedro niquishii cajiyanoori, mani jitiuyano. Tacuriitia na shootiariquiaari. Na nuhuaji na sequereeri:

—Jaj, quiaacuajaruhua Jesuta rucanejojuajuhua, cuno Nazaret tiacajinijinio pueyanotani.

68 Pedroori na seetaree. Na sequereeri:

—¡Cuno pueyano maja cua niishishano! ¡Majaari quenaaja cua niishiniu casaa quia sequeyani!

Pedroori canujiyaree. Mataca tohuateyaji nujuaseeri. Caacarajaari jiyacari niunijioree. 69 Cuno niyacoo jaara Pedro niquiquiaariuhua socua, juhuacatecara nata quiniaa sequereeri:

—¡Nio pueyanoori cuno Jesu pueyajinijiniojuhuaj!

70 Pedroori socua na seetaquiaari. Pasaja na tarishishacari, cuniqui nata quiniaari Pedro sequeree socua:

—Seetanujuanaa, quiaari cuno pueyajinijinio. Quiaacua-jaari Galilea jiyajinijinio pueyano. Canaa tojishacari quia-janiya, quia pocuanuuri juhua nojori pocuanujua.

71 Pedroori socua jiyanhua sapojonu coteequiaari. Naa sequereeri:

—¡Pueyaso cuara saniitioora janiyaqui, janiya jaara sapo-jiyani! ¡Seetanujuanaa, maja cua niishiniu cuno pueyano, canajiniji nia nequesoreetaacuajani!

72 Jiyacaritij, caacarajaari niunijionu pacuterohuacuhuj. Pedroori jiyacari niishiquii naa Jesu sequesano nojuajatej: “Juhuanujuaja caacaraja niunijionu pacutejiyaquishacarijia juhuaquenu panishacari, quiaari janiyajiniji tari seetanu pacutejonutaniya”. Pedro jaara niishiquii naa Jesu sequesano nojuajatej, jiyanhua nujuquequeeri.

15

Jesuucuaa pueya saquiriojotasacari Pilato
(Mt 27.1-2, 11-14; Lc 23.1-5; Jn 18.28-38)

1 Tariquiicujaji, pueyacuara secojonaa jiyaniijianucuaari rerejoquiaari Judiocuaca camarucuata, Moisés Rootasano-jiniji niishitiojonaatajuhuj, Sanedrín maanutanio. Nojoriiri moronucua Jesu jaatucutaquiaari Pilatoocua. Cuno Pilato-juajaari Judea jiya jiyaniijia quiquiaari. 2 Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Jaa. Naacuaaquinatejaj, taa quia sequereecuajani.

3 Pueyacuara secojonaa jiyaniijianucuaari Jesuucuaa tonujuriquiaa queraatia sesa casaa. 4 Pilatoori Jesu nequesotarohuacuhuj:

—¿Majateeri quenaaja quia riucuanuujua? Quia tojiri taa cuno pojori saquiriojotaa quiocuarani.

5 Jesuuri maja na riucuanu quiriquiaa quenaaja. Cunora, Pilatoori jiyanhua jiuujiatequiaari.

*Na paraa sequesacari Jesu cuaara mosaaria
(Mt 27.15-31; Lc 23.13-25; Jn 18.38-19.16)*

⁶ Puetunu mariijarajanaa, Pascuara queranacunu juuca, Pilatoori nujuatesano pueyano tohuataniniu jiitiquiaari nujuatejojuajiniji, cana pueya paniquiaari na cartesaanuracua-jani. ⁷ Jiyacaritij, tamonu pueyanoori nujuatejojuajinia nujuariquiaa. Na sesa quiquiaari Barrabás. Nojuajaari tamasaca pueyata pueyano moquiaari. Cunoori quiquiaari nojori juaashacari, Romano taucuaca jiyaniijia jiitianuucua Judiocuaca. ⁸ Pilato nequesoreesacari Jesu, jiyacaritij, queraatia pueyari Pilatoocua nijioquiaari naa nojori secojonura nojuaja:

—Pueyano quia carterohua nujuatejojuajiniji, taa quia mi-iquiaacuaja puetunu mariijarajanaani.

⁹ Pilatoori nojori riucuaree:

—¿Cana nia paniya cua cartenurani? ¿Niaate niarta Judiocuaca jiyaniijia paniya cua cartenura?

¹⁰ Nojuajaari tama niishiquiaariijiaaja, pueyacuara secojonaa jiyaniijianucuaari Jesu niquiniu paniyaquiquiaari pueya shocotenuucua nojori saniniuujia Jesuucua.

¹¹ Pilato nequesotasacari nojori, pueyacuara secojonaa jiyaniijianucuaari jiyacari pueya shiniujuiquiaari nojori sequenura Pilato, nojuaja cuaara carteera Barrabás.

¹² Naarate Pilatoori nojori nequesotarohua socua:

—¿Taa nia paniya cua miiniuria nio pueyanoni, nia sequesano niarta Judiocuaca jiyaniijiani?

¹³ Nojoriiri naa nacaree jyanohua:

—¡Cuaara mosaaria niyacutesanojinia teetesano!

¹⁴ Pilatoori nojori riucuaree:

—¿Casaarateni? ¿Casaa na miiquianu sesajaarani?

Nojoriiri saaja jyanohua nacaree:

—¡Niyacutesanojinia quia teetere!

¹⁵ Pilatoori socua tariniquiaari. Nojuajaari maninia quiniu paniquiaari Judiocuacata. Cunora, Barrabás cartereeri. Saniniuujia, Jesu majacuteree cutaraari. Na nuhuaji, na soldadohua na niquitioreeri, niyacutesanojinia na teetesaa-nura.

¹⁶ Jiyacaritij, soldadohuari Jesu jaatucuquiaari jiyaniijia Pilato tiajiniaaco. Nojoriiri puetunu narta soldadohuajanaa rerejoteree Jesu shocua. ¹⁷ Soldadohuari Jesu cushitiquiaari shaaruque toque, juhua jiyaniijiajanaa cushishano. Juhuacontucua maatusano cushitishaareejaariuhua na nacaquera.

¹⁸ Na nuhuaji, nojoriiri na rupaa paaretanu coteequiaari Jesu na macaatiniuria:

—¡Jejee, Judiocuaca camarnuna nooj!

19 Nojoriiri na naca piquirii naajuata. Na riocojoturee-jaariuhuj. Nocuara mojoquetacoreeri juhua jiyaniijajanaa cariquimiaji, nojori sapojonuta na macaatiniuria nojuaja. 20 Naa na rerequetesaanu nuhuajitij, toque naatuqueeri nocuaji jocuasaquiaari. Tama na toquejaaja cushitishaaru-huari. Na nuhuaji, soldadohuari na tohuataniquiaari. Na jiyatatuquiaariiri niyacutesanojinia na teetsaanura.

Jesu teetesacari niyacutesanojinia
(Mt 27.32-44; Lc 23.26-43; Jn 19.17-27)

21 Soldadohua jiyatasacari Jesu, tamonu pueyanoori jiyacari tacateriquiohua na cuhuariquiajiniji. Cuno pueyano sesa quiquiaari Simón. Soldadohuari Jesu teetejarano niyacutesano patanirii nojuaja. Nojuacuajaari Alejandro que, Rufo quenio.

22 Jesuuri shiitianiyojua tuhuananuucua jiyatasaaquiaari. Cuno tuhuananu sesa quiquiaari Gólgota. Nioori pueyano rupaaajinia sequeya, “Pueyano nacaco”. 23 Soldadohuari Jesu raatequiaari vino juucua, mirrata cojitishano. Saaja na ratuyaquiriiri. 24 Jiyacaritij, nojoriiri Jesu teetequiaari niyacutesanojinia. Na nuhuaji, soldadohuari saitia tacuarishijioquiaari, nojori niishiniuria cantucua Jesu toque poore nerani. Naacuajitij, nojoriiri Jesu toqueya seraatiaquiaari tama nojoririjaaja.

25 Jiyacaritij, niyacutesanojinia na teetesacari, shusha pananu tacasacariiri quiquiaari. 26 Naajioneeri na nacaacuma rupotasano quiquiaarijiuhuj. Tii sequequiaariiri casaara na mosaareeni. Naa naajiosano quiquiaariiri cuno rupotasanojinia: “Nioori Judiocuaca jiyaniijia”. 27 Jiyacaritij, caapiqui nohuasenuujuacaari Jesu shuriucua teetejosaquiaarijiuhuj, socua tamonu caapiqui niyacutesanojinia; tamonu na miaquetajara, tamonu na muenecara. 28 Naa tohuateequiaariiri taa tariucuaaanu Pueyaso Rupaaajinia na naajiotasaquiaaricujani. Naa sequeyari:

“Na sesaari sesa miijiaca pueya sesacata cojiritiasaaquiaari naajiotasaanujuhuj”.

29 Pueya tajishacari nucuaco Jesu shuriuquioco, nojoriiri na macaatiquiaari. Na maanuquenuta naa na seque-
tuquiaariiri:

—¡Jaj! ¿Majateeri quiajaniya cumaacaracuaja? ¿Quiaateeri jyaniriquiaa, quiaa jaara Pueyaso Secojoua tia niyartare, quia naata na tianu tucuatunuhua jiuujianaraca juucajini? 30 Quiaa jaara naa cumaacaraca quirijitij, niyacutesanojiniji quia roserecuarajaj.

31 Pueyacuara secojonaa jiyaniijianucua, Moisés Rootasanojiniji niishitiojonaari na macaatiquiaarijihuaj. Tama nojorijaarijia naa sequetooquiaari:

—¿Maatucua saa tamasaca naatanijioriquiajaari? Tama nojuaja cutaraari maja na naata niyacutesanojiniji rosenu. 32 Jaara seetanujuanaa quiri Pueyaso Jiyarosano, pa jiyaniijia na quiniuria, cuaara roseera niyacutesanojiniji pa niquiara. Pocua jiyacari nocua tiuuri cutarani.

Cuno nohuasenuujuaca Jesu shuriucua teetejosano quiriquiaani, nojoriiri na sesacariquiaajuhuaj.

Jesu cusosacari

(Mt 27.45-56; Lc 23.44-49; Jn 19.28-30)

33 Panacari, jiyari ninishiquiria quiquiaari puetunujuanaa. Tarishiquiaariiri. Shusha tenacariishacari cuhuatemohuari.

34 Jiyacaritij, Jesuuri jiyanohua na rupaa paaretaquiaari:

—Eloi, Eloi, ¿lama sabactani?

Nioori sequeya: “Cua Pueyasonaa, cua Pueyasonaa, ¿casaara quia carteree janiyani?”

35 Na shuriucua nujuatunaa tojtiasacari naa Jesu paaretasacari na rupaatej, nojoriiri sequeturee:

—¡Nia tojiri, supuetana Elías jiiquioonuyano, nocua na niniuria!

36 Tamonu pueyanoori ritia netequiaari namasu casaa na shiniuria jereeca vinojinia. Na nuhuaji, na morotaree naajuaacuaari, na shitiasocoriquiano Jesu rupaama. Na raatereeri. Na nuhuaji, nojuajaari sequequiaari:

—¡Pa shanacure! ¡Supuetana Elías jiyoteeri nocua niniutianiya na roshininiuria niyacutesanojiniji!

37 Jiyacaritij, Jesuuri jiyanohua na rupaa paaretaruahuacuaj. Cusoqueeri. 38 Jiyacaritij, Pueyaso Secojoua tiajiniaacuma, shiquiquia toquejiniji sohuacaari sutequee tamajaaja, jiyocuacaanuji jiyocuara. Cunoori pueya pueresano quiquio mishiquiotaja quiquiaari, pueya mariqui cusoqueeri Pueyasoocua nojori tiuquishacari juucua, jiyanooshoojua nojori quishacari. 39 Cuno Romano soldadohua jiyaniijiaari Jesu tacoji nujuariquiaa. Na niquishacari taa Jesu nacaquiaarini, naajuhuaj, taa Jesu cusoquiaari na rupaa na paaretanutani, jiyacariti nojuajaari naa sequeree:

—¡Nio pueyanoqui seetanujuanaa Pueyaso niyanu!

40 Maajipohuari tii quiriquiaajuhuaj. Tucuacaanuji Jesu shootiaturiquiaari. María Magdalenaari nojoritia quiriquiaajuhuaj, socua narta maajipohuanio. Cuno maajipohuani, nojoriiri quiquiaari Salomé, Maríano, cante Santiago, José nucua quiquiaaricujani. Nio

Santiago, nojuajaari socua naatujua na sesaanucua Santiagojiniji. ⁴¹ Puetunu nio maajipohuajanaari Jesu nuhuajiniaa quiquiaari. Nojoriiri nera pueraquenuunaa quiquiaari, Galilea jiyajinia na quishacari. Socua queraatia maajipohuari tii quiriqiaajuhuj, canapue te Jerusalén tiacajiniara nijioquiaari Jesutacuajani.

Jesu quete niasacari raaco

(Mt 27.57-61; Lc 23.50-56; Jn 19.38-42)

⁴² Jesu cusonu juucani, cuno juuca sesa quiquiaari "Jeenucuanu juuca", maja samaatenu juuca poonijionura. Saniniuujia, tariqui quiquiaariiri samaatenu juuca. Cunora, pueyari juhuacarijia jeenucuaquiaari puetunujuanaa. ⁴³ Cuno juucajani, jeenucuanu juuca ninishacari quera, tamonu pueyanoori Pilatoocua quiaquiaari. Nojuajaari José, Arimatea tiacajinijinio pueyano. Cuno Joseeri tojishano pueyano quiquiaari narta Sanedrín pueyara. Joseeri mijiria Pueyaso Jiyarosocoriquiano niquniuucua jiaatiaja quiquiaarijihuaj, canaa Jiyaniijiajanaa na quiniuria. Nojuajaari maja na puerenu quiquiaari Pilatoocua na tiuquiniuria, Jesu quete na masenura. ⁴⁴ Pilatoori jiyanhua jiuujiatequiaari na tojishacari Jesu tari cusoquee. Pilatoori soldadohua jiyaniijia sequeree nocua na niniuria. Nocua na tiuquishacari, na nequesotareeri:

—¿Taacari Jesu cusoqueeni?

⁴⁵ Soldadohua jiyaniijia jaara na riucuaquiaari taacari na cusoqueeni, Pilatoori jiyamitia José sequeree Jesu quete na panura. ⁴⁶ Joseeri jiyacari shanhua quenaaruke toque masequiaari tama na cumaneecatajaaja. Na nuhuaji, macu roshiniriiri niyacutesanojiniji. Cuno toquejinia na jiunio-coreeri. Na nuhuaji, na niaquiaari raacoori. Cuno raari jiuutiasano quiquiaari saajiajinia. Joseeri raa tioree jiyanhua puereetuca quejasano saajiata. ⁴⁷ María Magdalena, José nucua Maríano, nojoriiri na niqutiariquiaa tee na niasareeni.

16

Jesu samiitiasacariuhua

(Mt 28.1-10; Lc 24.1-12; Jn 20.1-10)

¹ Samaatenu juuca jaara shocoquiaari, María Magdalena, Santiago nucua Maríajuhuj, Salomeenio, nojoriiri shanhua jaanutaja masequiaari macuucua na tuujutasocoriquiano. ² Jiyanhua tariquiicujaji Domingo juuca, shusha pananu muetasacari, nojoriiri raajinia quiojoquiaari. ³ Nucua na quiojosacari, tama nojoriijaarijia sequetooriquiaa:

—¿Canteeri pocuaji shuquitiniutianiya tamocora raa tiotiuni?

⁴Nojori jaara niqiquiaari raa, saajia niqutiuriiri tariucua tamocora shuquitishano. Puereetuca saajiaari quiquiaari raa tiotiu. ⁵Nojoriiri raaco tiuquitiamaa. Mashaja niqutiushiiri tii cajiyano nojori miaquetajara, cohujaja tucuaque toque cajitiaano. Nojoriiri jiyanohua shiriiquitiuquiaari na niqutiushacari nojuaja. Cuno mashajaari Pueyaso seru quiriquiaa. ⁶Maajipohua sequereeri:

—¡Maja nia shiriiquiniu! Janiyari niishiyacuajani, niaari Jesu pajeya, Nazaret tiacajinijinio pueyano, niyacutesano-jinia teetsaarucuaani. ¡Nojuacuaja tari samiitiarohua! Maja niya na quiniu. Nia niquishuriiria na maja, tee na niasaarucuaacuajani, shaaqui. ⁷Na saquiriojosano pueya nia sequesuhua, Pedrojaajanio: “Nojuajaari nia puetanutaniya Galilea jiyajiniara. Niaari tii na niqiniutianiya, taa na sequesecanu niajanuyacuajani”.

⁸Maajipohuari netecuatuquiaariuhua raajiniji. Nojoriiri tetecaturiquiaa na shiriiquiniutia. Majaari quenaaja tamasaca pueya na sequetunu quiquiaari na puerenuta.

*Jesu muetasacari María Magdalenaacua
(Jn 20.11-18)*

⁹Jesu samiitianu nuhuaji, cuno Domingo juucaja, shusha semaana coteenu juucani, Jesuuri coteenujanaa muetaquiaari María Magdalenaacua. Jesucuaajaari tarijia siete samaruhua tohuatanijioquiaari cuno Maríajiniji. ¹⁰María Magdalena niqiniu nuhuaji Jesu, nojuajaari quiaquiaari Jesu cojiniaa na numootenura. Cuno pojoriiri jiyacari taraajecoriquiaa. Nujuqueturiquiaari Jesu mosaanuucua. ¹¹María Magdalenaari nojori sequesee:

—Pueyanaa, ¡Jesu tari samiitiarohua! ¡Janiya na niquiriini!
Nojoriiri María sequesano cuaracashitirii saaja.

*Jesu muetasacari caapiqui na saquiriojosano pueyacua
(Lc 24.13-35)*

¹²Na nuhuaji, Jesuuri socua caapiqui na pueyacua muetaquiaari nojori quiojosacari tamocora. Nojuajaari tamaatia niquishano quiriquiaa nojoriria. ¹³Nojori niishishacari nojuacuaja Jesu quiquiaari, nojoriiri ritia riujiuuquiaariuhua tamasaca nojorijinijinio nojori numootenuhuara. Naa-juhuaj, Jesu saquiriojosano pueyari nojori pahuatasano cuaracashitiriijuhuaj.

*Jesu rootasacari na jiyaramiquishocoriquiano pueya
(Mt 28.16-20; Lc 24.36-49; Jn 20.19-23)*

¹⁴ Tamacari, Jesuuri na once saquiriojosano pueyacua muetaquiaari. Nojoriiri miaquejajinia cajitiuriquiaa jiyacari. Jesuuri jiyacari nojori juaarii cumajiuujiaaca nojori quiniuucujaja. Majaari quenaaja nojori tiuuniu quiquiaari nojorijinijinio pueyacua, nojori sequesacari: “Canaa Jesu niquiriini, samiitiarohuacuaaqui”. ¹⁵ Na nuhuaji, Jesuuri nojori sequeree:

—Nia quiaare puetunu jiyacajiniajanaa, janiyajiniji Pueyaso rupaa nia pohuatanura, puetunu nia pohu-
 atasanooocua tiuujiaaca pueyapuejanaa jiyanooshaanura.
¹⁶ Cante moojinia tiuquinishiya Pueyaso rupaacua na
 tiuuniuucuan, Pueyasoori na jiyatenutaniya na pueyanora.
 Saniniuujia, cante Pueyaso rupaacua tiuyaquiiani,
 nojuajaari saniitiosano quiniutianiya. ¹⁷ Cucua tiuujiaacaari
 nocuaji pueya jiuujiatesano casaa miiniutianiya cua
 cumaacata, pueya niishiniuria Pueyaso rupaaqui seetanu
 rupaajanaa. Naacujitij, cucua tiuuniaa pueya nia
 quiniuucua, niaari samaruhua tohuatanijionutaniya cua
 cumaacata, nia jiyaniquishacari cua sesa. Niaari nia
 niishiyaquishoo rupaaca pocujaja quiniutianiyajuhuj.
¹⁸ Naajuhuj, niaa jaara soconu sajitishaare, niaa jaara
 casaa raatesaarejuhuj nia cusojuasaanura juucua, majaari
 nia cusonu quiniutianiya. Naajuhuj, cusosuhuacua nia
 niasacari nia juaashiquia, cusosuhuari naataconutaniuhua.

Jesu tacasacariuhua jiyocuacaanu na Queecua
 (Lc 24.50-53)

¹⁹ Na pocuanu nuhuaji, Jiyaniijia Jesuuri tacan-
 ishaaquiaariuhua jiyocuacaanu. Nojuajaari Pueyaso
 miaquetajara cajiquiaariuhua. ²⁰ Na nuhuaji, na
 saquiriojosano pueyari quiojoquiaari Pueyaso rupaa
 nojori pohuatanura puetunu jiyacajiniajanaa. Jiyaniijia
 Jesuuri pueyaracaanu nojori cumaquiriquiaa. Pueya
 niqitiriijiaariuhua na cumaacata na pueya miijosano,
 pueya niishiniuria maatia, Jesu jiyaramiquishano pueya
 pohuatasanoori seetanu rupaajanaa.

LUCAS NAAJIOTASANO JESUCRISTOJINIJI

Niya pohnatashiyari casaara Lucas naajiotaquiaari nioni

¹ Queraatia pueyari suraattia naajionu saniniujuquiaari puetunu canaa tajinia miishanojuanaa. ² Nojoriiri naajioquiaari taa Jesu jiyaramiquishano pueya pohnataquiaari Jesujiniiji pajaniyani. Cuno pojoriiri Jesu niquninaa quiquiaari, shusha poonijionu na coteesacari. Nojoriiri na nuhuaji na rupaa pohnatanaara jiyatesaaquiaari. ³ Janiyari niishiriojoriquiaani, maniniaruhua quiocuara cua naajionurajuhua jua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniiji. ⁴ Naacuaajitij, quiocuara naajiyaniija na coteenujiniiji, seetanujuanaa quia niishiniuria puetunujuanaa, taa quia niishitiojosaacanucujani.

Pueyaso seru pohnatasacari Tiuquinijiona Juan rasaanunianiya

⁵ Herodes jaara jiyaniija quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niqiuohuacuajinio supueno quiquiaari. Necocua sesa quiquiaari Isabel. Cuno maajiiri supuetana Aarón niqiuohuacuajinio supueno quiquiaari. Nojori supuetanaari mariyata tariucuaaanu pueyacuara secojonaa quiquiaari. ⁶ Zacaríasri necocua Isabelta maninia miijiaca quiquiaari Pueyaso niqiuara. Nojoriiri puetunu Pueyaso rootasanojuanaa tojtiajaca quiquiaari, taa Pueyasojiniji caminiujiuniaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijiaca nojori quishacari. ⁷ Nojoriiri maja na muetunu quijia, niyajaru Isabel quiniucua. Naajuhua j, nojoriiri maja tari na naata muetunu quiquiaari, saaquiapue nojori quishacari.

⁸ Tamacari, Zacaríasri narta pueyacuara secojonaata poonijoriquiaa Pueyaso Secojoua tiajinia Pueyaso niqiuara Jerusalén tiacajinia. Jiyacari saniniuujia nojori poonijosacariiri quiquiaari. ⁹ Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojina, Secojoua tiajinia. Pueyacuara secojo naari jiitiquiaari saajia naajiosano jacutanura juhua tacuarishijosacari, nojori niishiniuria teyano nojorijinijiniote Pueyaso Shuriucua Quiquio

tiuquiniutianiyani, shanohua jaanutaja na catijianura tii. Cuno juuca saniniuujia, saajiaari Zacaríascuara tacatequiaari. Naacuajitij Zacaríasri seeratasaaquiaari tii na tiuquiniuria shanohua jaanutaja na catijianura. ¹⁰ Na catijasacari, puetunu pueyajanaari Pueyaso secojonuuriquiaa Secojojua tia carijiniacuma. ¹¹ Jiyacaritij, Pueyaso seruuri Zacaríascuara muetaquiaari. Nujuariquiaari shanohua jaanutaja catijiasaqui miaquetajara. ¹² Zacaríasri shiriquirii na niquishacari Pueyaso seru. Jiyanoehua na puerereeri. ¹³ Pueyaso seruuri na sequeree:

—Maja puerenu Zacaríasnaa. Pueyasocuajaari quia secojosano tojiquiaari. Quia niquiocua Isabelri quiara muetunutaniya. Quiocua na sesojore “Juan”. ¹⁴ Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuqiritianutaniya na rasacari. ¹⁵ Quia niyanuuri cutara pueyano quiniutianiya Pueyaso niquiara. Nojuajaari vino ratuyashijia quiniutianiya, najatunacunio. Pueyaso Sohuanuraca pueyano quiniutianiyari na rasaacarijiyojua. ¹⁶ Nojuajaari queraatia Israel pueya tacatonutaniuhua nojori Jiyaniijia Pueyasocua. ¹⁷ Nio Juanri pa Jiyaniijia puetana quiniutianiya. Nojuajaari pueyara Pueyaso sequesano caminiujiunia supuetana Elías sohuanu jiitianutaniya, na cumaacanio. Naacuajitij, pueya jiuujia taraajonutaniyari, nojori jiyanooniuria necohua. Naajuhua, nojuajaari tojitiaashijia pueya rootanutaniya maninia, Pueyaso tojitiaajaca nojori quiniuria. Naacuajitij, pueya jiuujiacaari jeenucuasano quiniutianiya pa Jiyaniijiaacuaji.

¹⁸ Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujua-naa tohuateenutaniya quiria? Janiyari tari saaquianoni. Cua niquiocuaari motajajuhua.

¹⁹ Pueyaso seruuri na riucuarree:

—Janiyacuajaari Gabrielni, Pueyaso taccoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyasojiniji. ²⁰ Quiarijia saniniuujia, cua sequesanoocua quia tiuyaquini-uucua, quiaari tiquia quiniutianiya. Majaari quia pocuanu quiniutianiya cuara rasaarejaatijia quia niyanu. Naa-jaa, puetunu cua sequesanojuanaari naa quiniutianiya taa Pueyaso paniyacujani.

²¹ Jiyacaritij, pueyari Pueyaso quiquio carijiniacuma sashiriquiaa, Zacarías cuara tohuatohuara. Nojoriiri shiriquitiurii pueyaracaanu Zacarías tarishishacari Pueyaso Shuriucua Quiquiojinia. ²² Zacaríasri socua

tohuatamohua. Majaari na naata pocuanu quiriquiaa. Nareja shishinioriquiaari. Naacujitij, pueyari niishirii Pueyasoqui casaa niqutirii Zacarías, Pueyaso Shuriucua Quiquiojinia na quishacari.

²³ Zacarías jaara puecaquiaari puetunu na poonijionu juucajanaa taa na sequesaaquiaaricuajani, na tiajinia quiaarohuari. ²⁴ Na nuhuaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuara na shocojoquiaariijaatijia cinco raca. Nojuajaari tama sequequiaariijaaja: ²⁵ “Quiarijiani, cua Jiyaniijaari maninia miirii janiya. Majaari socua pueya rerequetenu quiniutianiya janiya, muetujua cua quishacari tari”.

Pueyaso seru sequesacari Jesu rasaanutaniya

²⁶ Seis raca jaara shocojoquiaari Isabel manajesacarihua, Pueyasoori na seru Gabriel jiyaroree Nazaret tiacajinia, Galilea jiyajinia. ²⁷ Tamonu niyacocua na jiyaroreeri, cante tari sequesaaquiaaricuajani José jiyaniishano pueyanota na caminiuria. Na camiriquianoori supuetana jiyaniijia David niqiuohuacuajinio supueno pueyano quiquiaari. Niyacoo sesa quiquiaari María. ²⁸ Pueyaso seruuri nocua tiuquimiasa. Na sequereeri:

—Janiyari quiocua jiyarosaareeni, Pueyaso shuquiriti-asano niyacoona. Jiyaniijia Pueyasoori quiata quiya, socua shuquiriaatia quia quiniuria tamasaca maajipohuajiniji.

²⁹ Maríari jiyanoehua tacaquiaari naa Pueyaso seru sequesacari nojuaja. Nojuajaari tamajaaja niishiriojoriquiaa: “¿Casaara naa na sequeree janiyani?” ³⁰ Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuqiritiniutianiya. Quiaacuajaari na timitiasano. ³¹ Quiarijiani, quiaari manajenutaniya. Quiaari cayaniyosua ranutaniya. Quiocua na sesojore “Jesu”. ³² Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocua-caanu Quijia Niyanu. Pa Jiyaniijia Pueyasoori na jiyatenu-taniya Jiyaniijiarajanaa na quiniuria na supuetana David niti. ³³ Israel pueya jiyaniijia quiniutianiyari. Pueyaracaanu jiiitianutaniya na pueyari. Majaari na shaajenu quiniutianiya Jiyaniijia na quishacari.

³⁴ Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

³⁵ Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacujitij, quia niyanuranoni, cunoori Pueyaso Niyanu quiniutianiya. Nojuajaari seetanujanaa Pueyaso tojjia quiniutianiya. ³⁶ Naajuhaj,

quia supuetanajinijinio motaja Isabelri neyanu ranutaninya-juhuaj. Cuno maajiiri sequesaaquiaari “niyajaru maajitia”. Naajaa, seis racaari tari na shocojiya na manajesacari. ³⁷ Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

³⁸ Maríari sequereer:

—Maniniacuaajaqui. Janiyacuajaari cua Jiyaniijia Pueyaso seruni. Pueyaso cuara miiria janiya taa quia sequereecua-jani.

Na nuhuaji, Pueyaso seruuri quiacuhua.

María quiasacari Isabel niquniuucua

³⁹ Maríari jiyacari quiaquiaari na secoonuta Judea jiyajinia, Zacarías tiajiniaara tamonu tiacajinia. Cuno jiyari tuhuanuhuaraca. ⁴⁰ Zacarías tiajinia María tiuquishacari, Isabel sequereeri. ⁴¹ Isabel tojishacari María sequesano nojuaja, ¡conajaari na jiniacuma nujuanequequee! Pueyaso Sohuanuuri Isabelcua tiuquiquii na cumaaca na jitianura. ⁴² Naacuajitij, Isabelri jiyacari na rupaa paaretaree. Naa María sequereeri:

—¡Pueyasocuaajaari socua maninia miiriucuaa quiajaniya tamasaca maajipohuajiniji! ¡Maninia miiniutianiya quia niyanujaarihuaj! ⁴³ ¿Janiyateeri pueya tojishano maajini, cua Jiyaniijia nucua tiuquniuria cua tiajinia, na niquniuria janiya? ¡Maja! Naajaa, ¡jiyanohua timiyanijia! ⁴⁴ Shusha cua tojishacari quiajaniya cua sequeyano, cua mueyari cua jiniacuma nujuanequequee na shuquiriniutia. ⁴⁵ Shuquiriaatia quia quiri, quia tiuuniuucua Pueyaso sequesanoocua quiajaniya.

⁴⁶ Maríari sequereer:

—¡Coojia jiyanohua shuquiritiaa cua Jiyaniijia Pueyaso!

⁴⁷ ¡Cua sohuanuuri cua Jiyanoonia Pueyaso timitiaani!

⁴⁸ Juhua najuhuaana quijianijia. Naajaa, Pueyasoori cua jiyanoorii. Cua saquiriojorucuaari na tojijia cua quishacari. Quiarijiani, pueyari pueyaracaanu cua sequenutaniya: “Pueyaso shuquiritiasano María”.

⁴⁹ ¡Pueyasoori jiyanohua maninia miirii janiya! Nojuajaari puetunu cumaacaracajanaa. Nojuajaari tojetaarucujanaa maninia quijia. ⁵⁰ Nojuajaari pueyaracaanu jiyanooquiaa na tojitianaa, canapuate na rerequeteyaquijiacacuajani.

⁵¹ ¡Nojuajaari jiyanohua maninia miiquiaa na cumaacata! Nojuajaari niishijiaca pueya shocotequiaari, canapuate tama na cuaqueyajaaja jiyatequiaari juhua niishijiacaracuajani. ⁵² Nojuajaari cutara jiyaniijianucua jataree, cuno pojori jiyanishano

niishiyashijiaca pueya jiyatesaanura jiyaniijiara nojori niti saniniuujia. ⁵³ Miaajeejunucua tootjioereeri maninia sumatuuta. Puera casamiriaca pueya taanuquiaariiri, casaaju nojori quiojonura. ⁵⁴ Na pueya Israel naacureeri. Majaari na niyajetanu quiquiaari nojoriicua na taraajenu. ⁵⁵ Naa miiquiaariiri taa na sequequiaari pa supuetanaacuajani. Pueyasoori naa pa supuetana Abraham sequequiaari: “Seetanujuanaa quiocua taraajenutaniyanijia, quiocujinio supueriquiano pueyacuanio”.

⁵⁶ Na nuhuaji, Maríari queraatia tarishiquiaari Isabel tiajinia. Jiuujianaraca raca nuhuaji, Maríari tacatequiaariuhua na tiajiniohua.

Tiuquinijiona Juan rasacari

⁵⁷ Na nuhuaji, Isabel rasacari quiquiaari. Jiyapueratereeri. ⁵⁸ Na shuriucua quiniaa, mariyata na jiyasoocujinio supueno pueyajuhuj, nojoriiri jiyanohua shuquiriquiaari nojori tojishacari taa Pueyaso jiyanohua taraajequiaari Isabelcuani, na shuquiritiniuria neyanuta. Nojoriiri Isabelta shuquiriquiaarijiuhuj. ⁵⁹ Nojoriiri Zacarías tiajinia rerejoquiaari conaaja jiitiasacari ocho juuca, na cararaatiuquia co miatesaanura, taa Moisés rootaquiaaricuajani. Nojoriiri na sesojonu paniriquiaa juucua Zacarías, na que sesaanucua na quiniuria. ⁶⁰ Na nucuaari saaja sequeree:

—¡Maja! Sesojosaanutaniyano “Juan”.

⁶¹ Pueyari saaja sequeree:

—¿Casaarateni? ¡Majaari quenaaja tamonu quia pueyajini-jinio cuno sesaraca na quiniu quiquiaari! ¿Casaara naa quia sesojonu paniyarini?

⁶² Cunora, pueyari na que Zacarías shishinioree na nequesotanura taa na sesojonu paniriquiaa neyanuni. ⁶³ Zacaríasri naajioju casaa maseree na naajionura tii neyanu sesarano. Naajioreeri: “Na sesa, Juan”. ¡Pueyari jiuujiatequee! ⁶⁴ Jiyacaritij, Zacarías nitiiri sasaquitiacuhua. Juhucatecara pocuarohuari. Pueyaso miishano pohuataree pueya niquiaraari, na shuquiritiasacari Pueyaso. ⁶⁵ Cunora, na tia shuriucua quiniaa pueyari jiuujiateree. Puetunu niojuanaari caminiujiushaaquiaari puetunujuanaa cuno Judea tuhuananuhuacua quijiaca pueyara. ⁶⁶ Puetunu nio tojtianaa pueyajanaari niishiriojonuuquiaari. Tama nojorijiaarijia nequesoreetooquiaari:

—¿Casaaquitijia cuno mueya quiniutianiya na nuhuajitijiaj?

Pueyari niishiquiaari Pueyasoori seetanujuanaa cuno mueyata quiriquiaa, na cumaquiniuria.

Zacarías sequesano na shuquiritiasacari Pueyaso

⁶⁷ Na que Zacarías jiuujiaari jiyanoohua mishaja quiriquiaa Pueyaso Sohuanuta. Pueyaso Sohuanuuri na pohuateree. Naaratej, Zacaríasri naa sequequiaari:

⁶⁸ — ¡Jiyanoohua maninia pa Jiyaniijia Pueyaso, pa supuetana Israel Jiyaniijia! ¡Cuaara jiyanoohua shuquiritiasaaria mijiria na niniuucua na pueyacua, pocuaji na tacunura! ⁶⁹ Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David niquiohuacuajinio rasaanutaniya, taa Pueyaso sequequiaari tariucuacaanucujani. ⁷⁰⁻⁷¹ Tariucuacaanu na sequenu panishano caminiujiuniaacuajaari naa pohuataquiaari pa supuetanaa niquiaratej, taa pa paraa na ritianutaniya pocuajini, pa niquniu paniyaquijia pueyanio. ⁷² Nojuajaari sequequiaarijiuhuj, majaari na niyajetanu quiniutianiya na sequesano pa supuetanaa, pocua na taraajenura. ⁷³⁻⁷⁴ Pueyasoori pa supuetana Abraham sequequiaari seetanujuanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia. ⁷⁵ Nojuajaari Abraham sequequiaarijiuhuj maninia quijjara pa jataniniutianiyaquiniaari, saaja nera pa quiniuria pueyaracaanu. ⁷⁶ Quiajaniya saniniuujia, quianuniyojuanaa, quiaari sesojosaanutaniya Jiyocuacaanu Quinia sequenu panishano caminiujiunia. ¡Quiaari pa Jiyaniijiaranojuanaa puetanutaniya, juhua na nuu jeenucuariquiano! ⁷⁷ Quiocua Pueyaso saquiriojosano pueya niishitiojore, nojoriiri na naata jiyanooshano quiniu sesa nojori miishanojiniji Pueyaso pueya nojori quiniuria. ⁷⁸ ¡Pa Pueyasoori jiyanoohua jiyanoojia! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. ⁷⁹ Maninia pa cuhuatanutaniyari, maninia pa rucuanenonura Pueyaso niquiara, panaatia poojiacata. Naacuajitij, majaari socua pa cajitiuniu quiniutianiya taraatia ninishiqui, juhua pa jamaca shuriucua.

⁸⁰ Conaajaari maashiquiaari. Nojuajaari tama na cuaqueyajaaja cumaquiquiaari socua seetanujuanaa Pueyasocua tiuujia na quiniuria. Nojuajaari pueyaracaanu cariiquia jiyajinia quijia quiquiaari nojuaja jaara Pueyaso sequenu

panishano caminiujiuniu coteequaariijaatijia narta Israel pueya niqiuara.

2

Jesu rasacari

(Mt 1.18-25)

¹ Tiuquinijiona Juan rasaanu nuhua, jiyaca jiyaniijajanaa César Augustoori Roma tiacajiniji sequequiaari puetunu na jiitiasano pueyapuejanaa cuara serojosaaria puetunu nojori jiyacajinijanaa. ² Pueya jaara coteenujanaa serojosaaquiaari, Cirenio jyanishano pueyanoori jiyacari Siria jiyajinia jiyaniijia quiquiaari. Nojuajaari jiyaniijara César Augusto jiyatesano quiquiaari. ³ Puetunu pueyajanaari sequesaaquiaari nojori cuara quiojohuara na raja tiacajinia, na sesaca naajiotasaanura tii.

⁴ Joseeri jiyacari Nazaret tiacajinia quiriquiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaquiaaricuaani. Naaratej, Joseeri Belén tiacajinia quiaquiaariuhua. ⁵ Maríari tari sequesaaquiaari nojuaja Joseeta caminiutianiya. Naaratej, Maríari nata quiaquiaarijuhua Belén tiacajinia, nojori sesaca naajiotasaanura tii. José niqiuocaranoori tariucua manajaraca quiriquiaa. ⁶ Belén tiacajinia nojori quishacari, jiyacari tari quiquiaari María ranu juuca. ⁷ Tii jiyapueratereeri. Conaaja jiuuicoquiaari toqueraacuacajiniaari. Na nucuaari na niaciaari juyaca miaquejajinia. Maríari naa raquiaari cuniqui maja quiquio quishacari nojoriria ruconaa tiuquijia tiajinia.

Pueyaso seya muetasacari borrego cojuanaa pueyacua

⁸ Belén tiaca shuriucua cuno niucuaaja, borregohua cojuanaari suteriquiaa cuhariquijajinia, na seya nojori cojuasacari. ⁹ Canashiyaquiji Pueyaso seruuri nojoriicua muetaquiaari. Jiyaniijia Pueyaso shacantuuca cumaacaari nojori cuhuataquiaari. ¡Nojoriiri jyanohua shiriqutiuri! ¹⁰ Pueyaso seruuri nojori sequeree:

—¡Maja nia puerenu! Niaacua nimiaanijia, jyanohua maninia casaa cua pohuatanura nijaniya. Cunora, puetunu pueyajanaari shuquiriniutianiya. ¹¹ ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuj. ¹² Niaa jaara nocua quiaare, niaari conaaja riuriatanutaniya toqueraacuacajinia jiuuicosano, juyaca miaquejajinia maano. Naacuajitij, niaari niishiniutianiya, seetanujanaari cua pohuatasano nijaniya.

¹³ Jiyacaritij, narta Pueyaso seyari na cojishii. Jiyanohua queraatia quiriquiaari. Nojoriiri naa maniniuhuaqueetariquiaa Pueyaso:

¹⁴ —¡Jiyanohua maninia pa Pueyaso, jiyocuacaanu Quijia! ¡Nojuajaari jiyanohua pa shuquiritiasano, na jiyaronuucua jiyacua quiniaa Jiyanoonia! Naacuajitij, cana Pueyaso shuquiritiaani, nojoriiri jiyanoootioonutaniya narta pueyata.

¹⁵ Pueyaso seya jaara tacataquiaariuhua jiyocuacaanu na quiquojiniohua, borregohua cojuanaari tama seque-tooquiaarijiaaja:

—¡Belén tiacajinia pa quiaarequij! ¡Pa niquishii cuno, casaajiniji pa Jiyaniijia numooteree pajaniyacujani!

¹⁶ Nojoriiri ritia quiojoquiaari. Conaaja riuriatatuseri, María, Josénio. Conaajaari juyaca miaquejajinia niasano mariquiaa. ¹⁷ Nojoriiri niquishacari conaaja, nojoriiri ritia tii quiniaa pueya caminiujiurii conaajajiniji Pueyaso seru pohuatasano nojori. ¹⁸ Puetunu pueyajanaa, cante nojori pohuatasano tojiriquiaani, nojoriiri jiuujiateree. ¹⁹ Majaari María niyajetanu quiquiaari puetunu nojori pohuatasanojuanaa. Noojiajinia na niishiriojoriquiaa pueyaracaanuri. ²⁰ Borregohua cojuanaari quiojoquiaariuhua. Nojoriiri Pueyaso maniniuhuaqueetariquiaa nojori tojishanojiniji, nojori niquishanojinijinio. Puetunujuanaari naa quiquiaari taa cuno niucua Pueyaso seru pohuataree nojoricujani.

Conaaja Jesu pasacari Pueyaso Secojoua tiajinia, Pueyasora jiyatesocoriquiano

²¹ María conaaja jaara ocho juuca jiiatiaquiaari, na cararaatiuuquia coori miatesaaquiaari, taa Moisés rootaquiaaricujani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Mariacuajani, na manajeyaquishacarijia.

²² Na nuhuaji, Moisés sequesano juucaari quiquiaari na nuca neyacata cuara juhua tuteera, jeequesano nojori quiniuria Pueyaso niquiara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. ²³ Na queyari naa miiquiaaritij, tariucuacaanu Pueyaso Rupaajinia naajiotasano tojitiajaca nojori quiniuucua. Naajiotasanoori naa quiyatej: “Puetunu nia jiyapueranuhajanaa cuara Pueyasora jiyatesaaria”. ²⁴ Naaratej nojoriiri quiaaree na seru mosaanura nojoriicuara Pueyaso Secojoua tiajinia, juhua jeequesano nojori quiniuria Pueyaso niquiara, taa pueya rootasaaquiaari Moisés naajiotasanojinijicujani. Pueyasoori naa sequequiaari Moisés tarijiatej:

“Cuaara puecoosaaria caapiqui mococoonu. Mococoonu jaara quiyaquiri, cuaara puecoosaaria caapiqui shini-jia”.

²⁵ Jiyacaritij, tamonu pueyanoori Jerusalén tiacajinia quijia quiriquiaa. Na sesa quiquiaari Simeón. Nojuajaari maninia miijia quiquiaari Pueyaso niquiara. Pueyaracaanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyarooro Israel pueyacuaji Tacuriquiano. Nojuajaari Pueyaso Sohuanu jiitiaja. ²⁶ Pueyaso Sohuanuuri na niishitiquiaari majaari na shaajenu quiniutianiya nojuaja cuaara niquiri Cristojaatijia, Pueyaso jiyarosaariquiano. ²⁷ Pueyaso Sohuanuuri na jiyatequiaari namitia cuno juuca Pueyaso Secojoua tiajinia. Naacuajitij, Jesu jaara pasaaquiaari Secojoua tiajinia, nera na miishaanura puetunu tariucuacaanu rootasanojuanaa, Simeónri jiyacari tii na niquirii. ²⁸ Simeónri Jesu patee. Na cacanuureeri. Naa Pueyaso sequeree jiyanoohua na shuquiriniutiaari:

²⁹ —¡Cua Jiyaniijianaa, tariucuaja! ¡Quiarijia cutara cua naata cusonu juhuajaniya, shuquiriaatia cua quishacari! Quiaacuajaari tari cua niqutirii tarijia quia sequesano janiya, quia seru cua quiniuucua. ³⁰ Tari niquirii quia Jiyarosancuajaniija, canacuaji Tacuriquianoni. ³¹ Nojuajaari quia niqutiosano puetunu jiyacajinia quiniaa pueyapueecuarajanaa. ³² Nojuajaari puetunu taucuaca jiuujiajanaa cuhuatanutaniya, maninia nojori niishiniuria quiajaniya. Naajuhuaaj, quia pueya Israelni, nojoriiri tamasa pueya shuquiritasano quiniutianiya na seera.

³³ Jesu que, na nucuajuhuaaj, nojoriiri jiuujiateree naa Simeón sequesacari conaajajiniji. ³⁴ Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiitiaara maninia niajaniya.

Jesu nucua María sequereajaariuhuaaj:

—¡Cua tojiri! ¡Nio conaajaari cutara pueyano quiniutianiya! Queraatia Israel pueyari juhua tiuriiniutianiya nojori ruuretasacari nojuaja. Saniniuujia, queraatia Israel pueyari cumaatia nujuatujuaca quiniutianiya, nocua nojori tiushacari. Na cumaacata na miiniuucua, pueyari na naata Pueyaso niishiniu maninia. Naajaa, queraatia pueyari na ruuretanutaniya saaja. ³⁵ Naacuajitij, tama pueya niishiriojosano nojiacajinijaariija niishishaanutaniya. Quiara saniniuujia, jiyanoohua taraatiaari quiniutianiya. Quioojaari juhua mueruuta tohuariquiiitishaanutaniya quia mueyacu quia miishacari.

³⁶ Cuniqijia, Pueyaso Secojoua tiajiniani, tamonu mota-jaari tii quiriquiaajuhua. Cuno motajaari Pueyaso seque-sano caminiujunia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niqiuohuacuajinio supueno maaji quiquiaari. Jiyano-hua motaja quiquiaariiri. Shusha niyacoo na quishacari, no-juajaari camiquiaari. Na nuhuaji, siete marijiaari na shocojoquiaari neyacata na quishacari. ³⁷ Neyaca cu-sonu nuhuaji, socua ochenta y cuatro marijia na shoco-joquiaari mashiquio na quishacari. Nojuajaari pueyara-caanu quiquiaari Pueyaso Secojoua tiajinia, Pueyaso na shuquiritiasacari juuca, niucuanio. Nojuajaari sequeyarua miaqueyaquiquiaari Pueyaso na secojosacari pueyara-caanu. ³⁸ Simeón pocuasacarijia, jiyacaritij, Anaari nocua nimiaa. Na niquishacari conaaja Jesu, Anaari noojiajinia niishiquiaari cante nojuajani. Cunora, Pueyaso sequeree na shuquiriniutiaari: “¡Paacarasho!” Na nuhuaji, noju-jaari juhuacatecara Jesujiniji pohuataree Pueyaso Jiyaroso-coriquiano sashijiaca pueya niquiara. Nojori sequereeri:

—¡Niocuajaari pa sashishano pa pueyacuaji Tacuriquiano!

Na queya tacartasacariuhua conaaja Nazaret tiacajinio-hua

³⁹ Jesu queyari puetunu Moisés naajioneejinia Pueyaso rootasanojuanaa tucuataquiaari na conajara. Na nuhuaji, nojoriiri Galilea jiyajiniara tacatequiaariuhua tama nojori tiacajiniohuajaaja, Nazaret tiacajinia. ⁴⁰ Naatujua Jesuuri maashiquiaari. Socua cumueecara quiquiaariiri, maninia niishijiaranio. Pueyasoori jiyano-hua na naacujua.

Mashajaniyojua Jesu quishacari Pueyaso Secojoua tiajinia

⁴¹ Puetunu marijiajanaa, Jesu queyari quiojoquiaari Nazaret tiacajiniji, Jerusalén tiacajiniara, Pascua juuca-jinia nojori queranacunura. ⁴² Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jiitiquiaaricuajani puetunu marijiajanaa. ⁴³ Queranacunuunu jaara puequequiaari, Jesu queyari quiojoriquiohua juhuajaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriquiaa. ⁴⁴ Nojoriiri jiyaniquiaari Jesu naasucua narta quiojonaa tajinia quiariquiohuajuhua. Naacuajitij, nojoriiri juhuajaniya rucuaneree puetunu cuno juucajanaa. Cuno niucujaja, nojoriiri Jesu pajequiaari nojori pueya tajinia, no- jori niishishano pueya tajinianio. ⁴⁵ Shaquiquiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

⁴⁶ Jiuujianaraca juuca nuhuaji, nojoriiri socua Jesu riuriataquiaari Pueyaso Secojoua tiajinia, Moisés Rootasanojiniji niishitiojonaa pueya tajinia cajiyno. Nojori tojiriquiaari. Nojori nequesoreetariquiaajaariuhuj.
⁴⁷ Puetunu pueyajanaa, canapue te na tojitiariquiaani, nojoriiri jiuujiatequiaari niishijia Jesu quishacari. Jesuuri maninia nojori rihuaneriquiaa saaja, nojori jaara na nequesoreeriquiaa. ⁴⁸ Na queya jaara na niquiquiaari, nojoriiri shiriiquituquiaari. Na nucuaari na sequeree:

—Quiyanunaa, ¿casaara naa quia miirii canaani? ¡Janiyari quia queta quia pajeriquiaani jiyano hua canaa tacaaniutia quiocua!

⁴⁹ Jesuuri na riucuaare:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojoua tiajinia quiniuucua jiaatiani?

⁵⁰ Majaari nojori niishiniu quiquiaari Jesu sequesano.

⁵¹ Jesuuri na queyata quiaarohua nojori tiajiniohua Nazaret tiacajinia. Na queya tojjia quiquiaariiri. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. ⁵² Jesuuri socua maashiquiaari, socua niishijia quiquiaariijaariuhuj. Pueyaso shuquiritasano quiquiaariiri. Puetunu pueyajanaari na shuquiritiaquiaarijuhuj.

3

Tiuquinijiona Juan pahuatasacari Pueyaso rupaa cariquia jiyajinia

(Mt 3.1-12; Mr 1.1-8; Jn 1.19-28)

¹ Na nuhuaji, Tiuquinijiona Juanri Pueyaso rupaa pahuatanu coteequiaari. Jiyacaritij, quince marijiaari tari shocojoquiaari César Tiberio, jiyaniijiajanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajinianio. Lisanasri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri jiyaniijianucuaara César Tiberio jiyatesano quiquiaari cuno jiyacajinia.
² Jiyacaritij, Anásri Caifásta Judiocuacaacuara secojonaa jiyaniijianucua quiriquiaa. Jiyacaritij, Zacarías niyanu Juanri cariquia jiyajinia quiriquiaa. Tii na quishacari, Pueyasoori na rupaa na niishitiquiaari. ³ Naaratej, Juanri puetunu Jordán moo shuriuquioco jiyacajanaa tajiquiaari

na poojotasacari Pueyaso rupaa pueya niquiara. Nojuajaari naa pohuataquiaariti:

—¡Nioojia nia tacatore maja socua sesa nia miiniuria, moojinia cua tiuquinijionura nijaniya, Pueyaso jiyanooniuria nijaniya sesa nia miishanojiniji!

⁴ Naacuajitij, supuetana Isaías naajiotasanoori tohuatequiaari. Pueyaso sequenu panishano caminiujiunia na quiniuucua, nojuajaari naa miriqui naajiotaquiaari supueriquiano Juanjiniji:

“Pueyano rupaari tojishiya cariquia jiyajinia nacaano. Sequeyari: ‘¡Jiyaniijia nuura nia jeenucuare! ¡Puetunu maniajanaa nia nuunure, maja shuutiuniu na quiniuria! ⁵ ¡Puetunu tacocuajanaa cuara mishiquiojosaaria maninia jamatunu na nuu quiniuria! ¡Puetunu tuhuananuhajanaa cuara jiuurioosaaria jakananu na nuu quiniuria! ¡Shuyorocotunu nuu cuara pocuareesaaria! ¡Puetunu surocoshiquiajanaa cuara mishiquiojosaaria jakananu na nuu quiniuria! ⁶ Naacuajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootiriquiano pueyani’ ”.

Naa miriqui Isaías naajiotasanoni, cunoori pueya numooteriquiaa juhuacarijia nojori jeenucuanura nojiaca, Jiyaniijia Jesu tojitiajaca nojori quiniuria.

⁷ Pueya jaara quiojoquiaari na tiacajiniji Tiuquinijiona Juancua, Juan tiuquinijionura nojori, Juanri naa nojori juaquiaari:

—¡Niaacujaari juhua sacocua! ¿Cante nia numooteree nia mashiniuria jyanohua Pueyaso saniitionu panishacari nijaniyani? ⁸ ¡Maninia mijiara nia quiri, canaa niishiniuria niaari seetanujanaa nioojiaca tacatoree sesa nia miiniujiniji! ¡Majaari najuhua tama nia cuaqueyajaaja nia sequenu: “Pueyaso pueyanonijia, supuetana Abrahamjinijnio cua supenuucua”! ¡Nia niishiri, Pueyaso jaara paniri, nojuajaari na naata nio saijiniji shipininiu Abraham niquiohuarajuhua! ⁹ ¡Pueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijasocoriquiano. Naajuhua, nijaniyari juhua sesa muetuna naana, maninia miyashijia nia quishacari. ¡Niaari quera saniitoshiyacaja!

¹⁰ Naaratej, pueyari Tiuquinijiona Juan nequesotaree:

—¿Taa canaa miyarinitioj?

¹¹ Juanri nojori riucuaaree:

—Cante querajaqueya toqueracani, nojuaja cuaara niq-
uitioora taque cante toqueejuni. Naajuhuj, cante mi-
aquesanoracani, nojuaja cuaara niquitioora miaquesanoo-
junucua.

¹² Roma tiacajinia quijia jiyaniijiajanaa Césarra cumaneeca
masejonaari Tiuquinijiona Juancua nijioquiaarijuhuaj. No-
joriiri tiuquinijosano quiniu paniriquiaajuhuj. Naaratej,
nojoriiri Juan nequesotaree:

—Niishitiojonanaa, ¿canaarijataj, casaa canaa miyarinijia?

¹³ Juanri nojori riucuaaree:

—Maja puera cumaneeca nia masenu pueyajiniji. Saaja nia
jiyaniijia sequesano nia masejore.

¹⁴ Naajuhuj, soldadohuari Tiuquinijiona Juan nequesota-
ree:

—¿Canaarijataj? ¿Casaa canaa miiniutianiyarinijia?

Juanri nojori riucuaaree:

—Niaacujaari puecootajaraca. Naajaa, majaari pueya
casami nia jaariutianu, nojori nia miananajonuta, nojori-
icuaa nia tonujusacarijuhua nia saPONUTA. Juhujaniya
nia quiri saaja nia jiyaniijia niquitiosano cumaneecata.

¹⁵ Pueyari jyanohua niishiriojoriquiaa Tiuquinijiona
Juanjiniji. Nojoriiri Pueyaso sequesano na Jiyaroso-
coriquiano niquniuucua jiaatija. Naaratej, nojoriiri
jiyaniriquiaa Tiuquinijiona Juan naasucua Cristo,
tariucuaaanu Pueyaso sequesano na Jiyarosocoriquianotej.

¹⁶ Nocujaji, Tiuquinijiona Juanri puetunu pueyajanaa
sequeree:

—Janiya nareja nia tiuquinijiya moojiniani, juhua
jeequejosano nia quiniuria sesa nia miishanojiniji. Tamonu
cutaraari cua nuhuaji niniutianiya. ¡Nojuajaari Pueyaso
Sohuanu tiuquinijionutaniya nioojiajinia, na cumaaca nia
jiitianura, seetanujuanaa maninia miijia nia quiniuria!
¡Nojuajaari juhua manitia nia saniniuujuniutianiyajuhuj,
maninia jiuujiaraca nia quiniuria! ¡Nojuajaari socua
jiyanohua cumaacaraca janiyajiniji! Janiya maara
shuquiriaatia quirini, nojuaja jaara cua sequere cua
naacutanura nojuaja juhua na seru, quenaaja na sapatu
neyocua cua saacatanura.

¹⁷ Niaari niishiyacuaja taa
pueyano miiquiaa na trigoni paratu panura na cocua,
na sucuanio, saniniuujia na jajau na racatasocoriquiano
tiajiniaaco. Naajuhuj, cuno pueyanoori tari niya quiya
na pueya na saquiriojonura na tojiyashijiaca pueya
tajiniji, na rijiosocoriquiano nata nojori quiniuria. ¡Sesa
pueyari juhua trigo socua catijiasaanutaniya saniniuujia!
¡Nojoriiri jataasaanutaniya manijinia! ¡Cuno maniiri maja na
maquesanu quiniutianiya!

18 Tiuquinijiona Juanri naa pohuataquiaari Pueyaso rupa pueya niqiuara. Maninia rupaari, na tojitiajaca pueya quiniuria shuquiriaatia. Socua queraatia quiquiaariiri na pohuatasano na numootenura pueya. 19 Jiyaniijia Herodesri jiyacari tarajanu Felipe niqiuocua jitiariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyojoquiaari sesa na miishanojiniji. Herodesri maja na tojiniu quiquiaari saaja. Jiyaniijia Herodesri socua queraatia sesa casaa miijia quiquiaari. 20 Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniaari.

Jesu tiuquinishacari moojinia

(Mt 3.13-17; Mr 1.9-11)

21 Tiuquinijiona Juan jaara puetunu pueyajanaa tiuquinijoriquiaajaa, nojuajaari Jesu tiuquiniquiaarijihuaj. Jesu tohuatasacari moojiniji, na que Pueyaso secojoriquiaari. Jiyacaritij, jiya cajiniocuaari riatequee. 22 Pueyaso Sohuanuuri Jesuucua roseyaree juhua mococoonu niquishano. Jiyocuaaanuji, Pueyaso rupaari tojishaaree sequeyano:

—¡Quiaacuajaari cua panishano quiyannunioyua! ¡Jiyanohua quia shuquiritiaanjia!

Jesu supuetanaa sesaca

(Mt 1.1-17)

23 Treinta marijia jaara na shoconujuquiaari, Jesuuri na Que Pueyasora poonijionu coteequiaari. Pueyari jiyaniquiaari José naasucua seetanujuanaa na que quiquiaari. Joseeri Elí niyanu quiquiaari. 24 Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. 25 Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. 26 Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. 27 Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. 28 Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. 29 Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. 30 Matatri Leví niyanu quiquiaari. Leviiri Simeón

niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. ³¹ Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. ³² Natánri David niyanu quiquiaari. Davidri Isaí niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. ³³ Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. ³⁴ Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. ³⁵ Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. ³⁶ Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeri Lamec niyanu quiquiaari. ³⁷ Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. ³⁸ Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

4

Samaruhua jiyaniijia saniniujiushacari Jesu (Mt 4.1-11; Mr 1.12-13)

¹ Jesu quiasacariuhua Jordán moojiniji, Pueyaso Sohuanuuri noojiajinia quiriquiaa puetunu na cumaacajanaa na jitianura. Pueyaso Sohuanuuri na jiyatequiaari pueya jiyaqui cariiquia jiyajiniara. ² Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri. ³ Jiyacaritij, Sesaacaari na sequeree:

—Quiaa jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

⁴ Jesuuri saaja na riucaaree:

—Pueyaso Rupaajiniacuajaari naa naajiotasano quiya:

“Pueyanoori maja saminiio na quiniu saa miaquesanotaja. Seetanujuanaa saminiio quiyari na tojishacari puetunu Pueyaso Rupaajanaa”.

⁵ Na nuhuaji, Sesaacaari Jesu jiyataaree jiyanoohua jiy-
aconaja tuhuananuucua. Sesaacaari ritia niqutirii Jesu
puetunu mijiria jiyacajanaa. ⁶ Jesu sequereeri:

—Janiya quia niqutionutaniya puetunu nio jiyaca jiyani-
ijianucua cumaacajanaani, maninia jiyaniijiajanaa quia
quiniuria mijiria. Janiyari puetunu nio jiyacajanaa niq-
uitiosaaquiaarini. Naacuajitij, janiyari cumaaca niqutio-
quiaani cana cua niqutionu paniyacujani, jiyaniijiaara na
quiniuria. ⁷ Puetunujuanaari quiara quiniutianiya, quiaa
jaara cucuara mojuquetare quia shuquiritianura janiya.

⁸ Jesuuri saaja na sequereeri:

—Pueyaso Rupaajiniacuajaari naa naajiotasano quiya:
“¡Quia Jiyaniijia Pueyaso quia shuquiritiare! ¡Saaja nojuaja
quia tojiri!”

⁹ Na nuhuaji, Sesaacaari Jesu jiyataaree Jerusalén tiaca-
jinia. Na tacaniriiri Pueyaso Secojoua tia cacojiria, jiyocua-
caanu. Jesu sequereeri:

—Niiquiji quia jaataare jiyocua, quiaa jaara seetanujuanaa
Pueyaso Niyanu quiri. ¹⁰ Pueyaso Rupaajiniacuajaari naa
naajiotasano quiya:

“Pueyasoori na seya sequenutaniya na cojuanura quiajaniya.

¹¹ Nojoriiri quia quianutaniya, saajiaacua quia jiri-
ataaquiniuucujaji”.

¹² Jesuuri na riucuaaree saaja:

—Naa naajiotasano quiyajaariuhua Pueyaso Rupaajinia:
“Maja quia Jiyaniijia Pueyaso quia saniniujiuniu”.

¹³ Sesaacaari naa Jesu saniniujiuniu puecaquiaari
puetunujuanaa. Majaari quenaaja na naata quiriquiaa
sesa na miitiniuria. Naaratej, rupaquijia na tarinitiaquiaari
tamacaririaari.

Jesu coteesacari na poonijosano miiniu Galilea jiyajinia
(Mt 4.12-17; Mr 1.14-15)

¹⁴ Na nuhuaji, Jesuuri tacatequiaariuhua Galilea jiya-
jinia puetunu Pueyaso Sohuanu cumaacatajanaa. Puetunu
cuno jiyajiniajanaa pueyari Jesujiniji caminiujiutioquiaari.
¹⁵ Jesuuri Pueyaso secojojua tiajiniaqueya niishitiojoquiaari
puetunu tiacajiniajanaa cuno jiyajinia. Puetunu pueya-
janaari na timitiaja.

Jesu quishacari Nazaret tiacajinia
(Mt 13.53-58; Mr 6.1-6)

¹⁶ Jiyacaritij, Jesuuri quiaquiaari Nazaret tiacajinia, tee
na canashitishaaquiaaricujani. Samaatenu juuca, Jesuuri

Pueyaso secojojua tiajinia tiuquiquiaari taa na jitiqquiaari miiniucujani. Nojuajaari nujuaquiaari Pueyaso Rupaa seronura pueya niqiuara. ¹⁷ Pueyari na niqutioree tariucuaaanu Pueyaso sequesano caminiujiunia Isaías naajionee jiuinicosano, pueya niqiuara na serojosocoriquiano. Jesuuri na saacartaree. Serojonu coteereeri tee nio naajiotasano quiyacuajani:

¹⁸ “Pueyaso Sohuanuuri coojiajinia quiyani, na cumaaca cua jitianura. Naacuajitij, Pueyasoori cua seeratarucuaa maninia rupaa cua pohuatanura casamiijiuniucua pueya niqiuara. Cua jiyaroreejaariuhua Sesaaca quioosano pueya cua pohuatanura maninia rupaa Pueyasojiniji. Naacuajitij, nojoriiri cartesano quiri-ohua Sesaaca sapojosanojiniji. Cua jiyaroreejaariuhua cariojuarujuri pueya namijiaa cua jeecanura, maninia niqiujiara nojori quiniuhua. Cua jiyaroreejaariuhua taraatia miitiasusano pueya cua jiyatenura shuquiriaatia quijiacara. ¹⁹ Cua jiyaroreejaariuhua cua pohuatanura pueya niqiuara, quiarijiaari Jiyaniijia Pueyaso jiyanooshacari pueya”.

²⁰ Na serojonu nuhuaji, Jesuuri naajionee jiuinocorohua. Na niqutiorohua na cojuanaari. Jesuuri cajiriohua. Puetunu pueyajanaari tacuriitia na shootiaturiquiaa. ²¹ Jesuuri juhucatecara pocuarohua. Naa sequereeri:

—Quiarijiani, Pueyaso Rupaaajinia nio naajiotasanoori tari tohuateeree nia niqiuara.

²² Puetunu pueyajanaari jiuujiaterree shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojorijiaarijia nequesoreetooriquiaa:

—¿Majate nio pueyano José niyanucujaja, niya pa tiacajinia maashiniotej?

²³ Jesuuri nojori sequereeri:

—Niaa jiyoteeri cua sequenu paniya nio tariucuaaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniajaajani, taa nia tojiquianucujaja cua miishanojiniji Capernaum tiacajiniacuaani.

²⁴ Jesuuri socua sequereeri:

—Seetanujuanaa nia sequeyanijia, puetunu Pueyaso sequenu panishano caminiujiuniaajanaari tojishoo quijia, tama nojori tiacajiniajaaja. ²⁵ Supuetana Elías quishacari, queraatia mashiquiopueeri quiquiaari Israel jiyajinia. Jiyanhua miaajesacari quiquiaariiri maru

nियाकुिशहारी पुयाराकानु. Jiuujianaraca marijiaari shocojoquiaari socua seis racanio, maru nियाकुिशहारी.
²⁶ Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacujitij, cuno taatu mashiquioori miaquesano jiitiaquiaari puayaracaanu cutara, Elías na mianuutesacari miaajenu quishacari puayaracaanu. Elías quiniuucua Pueyasooocua tiuujia, cuno taatu miaquesanoori maja na pueetanu quiquiaari nojoriria.
²⁷ Naajuhuaaj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinijinio naatanishaanu quiquiaari Eliseo jiitiasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajinijinio pueyanoni.

²⁸ Pueyaso secojojua tiajinia quiniaa pueya tojishacari naa Jesu pohuatasanotej, puetunu nojorijianaari jiyanohua juaaquioree. ²⁹ Nojoriiri saneecuatuquee. Jesu caponeeturee nojori tiacajinijiiri. Nojoriiri Jesu jaatucuquiaari socua jiyocuacaanu nojori quijia tuhuananujinijiria, teyanooocua nojori tiaca tiasano quiquiaaricuajani. Nojoriiri na capotunu paniriquiaa juucua tacobiyaji naa na monura. ³⁰ Jesuuri saaja nojori tajiniaaco canujuquiaari juhujaniya. Quiniquiji tamocora quiaareeri.

Samaruraca pueyanojiniji pohuatasano
(Mr 1.21-28)

³¹ Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. ³² Nojoriiri jiuujiatereee na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiuujunia.

³³ Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanohua nacareeri:

³⁴—¡Nazaret tiacajinijinio Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacuajaniija, cante quia-janiyani! ¡Quiaacuajaari sesa miyashijia Pueyaso Niyanu!

³⁵ Jesuuri samaru sequereee:

—¡Quia sanaajere! ¡Quia tohuatare nio pueyanojiniji!

Samaruuri pueyano pojotequee puetunu pueya niquiara-janaa. Pueyanojiniji tohuataqueeri. Majaari na nuhuajiria sesa na miiniu quirii pueyano. ³⁶ Puetunu pueyajanaari shiriiquitiurii. Tama Jesujiniji sequetooreejaariija:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanoohua cumaacaraca! ¡Cunora samaruhua tohuataniriiri!

³⁷ Puetunu cuno jiyajiniajanaa, Jesu miishanojinijiiri caminiujiushaaquiaari pueya niqiuara.

Jesu naatanishacari Simón Pedro reyarucua

(Mt 8.14-15; Mr 1.29-31)

³⁸ Jesuuri Pueyaso secojojua tiajiniji tohuareetaquiaari na pueyata. Quiojiyareeri. Simón tiajinia tiuquitiushiiri. Simón reyarucuaari jiyacari jiyanoohua naseeca matariquiaa. Pueyari Jesu sequeree na naataniniuria. ³⁹ Jesuuri cusosu caco nujuasee. Jesuuri na naseeca cusonu jiyaroree. ¡Na naseecaari ritia shinitiaquee! Tariucua jiyotuucuaari jiyacari sanemaa, na tiajinia quiniaa pueya na mianuutenura.

Jesu naatanijosacari queraatia cusosuhua

(Mt 8.16-17; Mr 1.32-34)

⁴⁰ Pananu tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuacua-janaa. Nojoriiri queraatia tamaatia cusonu jiitiaquiaari. Jiyacari na naatanijioree puetunujuanaari. ⁴¹ Naajuhua, queraatia samaruhuari tohuareetaquiaari cusosuhuajiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juaarii. Majaari na shanacunu quirii nojori pocuanura, nojori mariqui pueya niqiuara pohuatareeri, no-juajaari Pueyaso Jiyarosano.

Jesu pohuatasacari Pueyaso rupaa Pueyaso secojonuujua tiajiniaqueya

(Mr 1.35-39)

⁴² Tariquicuaji, Jesuuri tiacajiniji quiaquiaari tamaquicua tamajaaja. Pueyari na pajequiaari. Nojoriiri socua nocua tiuquiiioquiaari na pajenuusacari. Majaari nojori cartenu paniniu quiquiaari Jesu quianura cuniquiji.

⁴³ Jesuuri nojori sequeree saaja:

—Janiyari jiyarosaaquiaarini pueyapue niqiuara cua pohuatanura quiarinio Pueyaso Rupaa. Quiarijiani, Pueyasoori pueya jiyanoonu paniya, nojori quiniuria na pueya, nojori tiushacari nocua. Naaratej, janiyari na rupaa pohuatanura quianu paniya tamonu tiacajiniajaniuhua. Janiyacuajaari cunora jiyarosaaquiaarini.

⁴⁴ Naacuajitij, Jesuuri puetunu Judiocuaca jiyajiniajanaa rucuanajoquiaari Pueyaso rupaa pohuatanura puetunu Pueyaso secojonuujua tiajiniaqueyajanaa.

5

*Sapitiaajara jaquerootanaa shiriiquitiushacari**(Mt 4.18-22; Mr 1.16-20)*

¹ Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanoehua pueyari nocua catecanoquiaari catecaji na tojtianura nojuaja. Nojoriiri Jesu tanuujuriquiaa puera. ² Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. ³ Jesuuri Simón botejinia tacaquiaari. Simón sequereeri cuara bote juaariocotaara caminia jiuujajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. ⁴ Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

⁵ Simónri na riucuaaree:

—Niishitiojonanaa, canaacuajaari tari jaquerootariquiaa najuhuanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraquij.

⁶ Nojori jaara socua na shiyaruhua jartaquiaariuhua, jiyanoehua queraatia sapitiaaja ritiatureeri! Shiyaruhuari sureequetanu coteequiaari. ⁷ Nojoriiri jatiqui nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinijioturee sapitiaajataari. ¡Quera tiuquitiariquiaari queraatia sapitiaajata! ⁸ Simón Pedro niquishacari naa Jesu miishano nojoririatej, Jesuucuaara mojuquetareeri. Jesu sequereeri:

—¡Jiyaniijanaa, maja cua rupuenu socua! Janiya puera sesa pueyanoni quia rupuena cua quiniuria.

⁹ Simónri shiriiquirii, jiyanoehua queraatia sapitiaaja nojori quiasacari. Nata quiniaa pueyari shiriiquitiuriijiuhuj. ¹⁰ Cuno pojoritia quiriquiaajaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

¹¹ Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

*Jesu naatanishacari lepraraca cusosu**(Mt 8.1-4; Mr 1.40-45)*

¹² Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

¹³ Jesuuri na quiaree. Na sequereeri:

—Taaquiririnij. Quia naataniniu paniyanijia. Quia cuaqueya cuaara jeequehuara.

Naa na sequesacarij, na lepraari shaajequee na cuaqueyajiniji. ¹⁴ Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojonaa jiyaniijia quia niquitishii quia cuaqueya, na cartenuhuara quiajaniya, pueya tajinia quia rucuanefonuhara juhuajaniya. Naajuhua, quia seru quia niquitiose Pueyasocuara catijasocoriquiano. Naa quia miiri taa Moisés rootaquiaaricujani, puetunu pueyanaa niishiniuria quiaa tari jeequerohua quia cusonujiniji.

¹⁵ Maninia Jesu miishanojinijiiri jiyanhua socua tamaquicua caminiujiushaaquiaari pueya niquiara. Naaratej, jiyanhua queraatia pueyari nocua nijioquiaari na tojiniuria, mariyata Jesu naatanijionura nojori, nojori cusonujiniji. ¹⁶ Jesuuri saaja pueya quiaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

*Jesu naatanishacari cumatacuruhuana cusosu
(Mt 9.1-8; Mr 2.1-12)*

¹⁷ Tamonu juuca, Jesuuri pueya niquiara niishitiojoriquiaa. Na tojtianaa tajinia cajituriquiaajaariuhua Fariseocuaca, Moisés Rootasanojiniji niishitiojonaanio. Nojoriiri nijioquiaari puetunu Galilea jiya tiacajinijianaa, Judea jiya tiacajiniji, Jerusalén tiacajinijinio. Jesuuri jiyanhua Pueyaso cumaaca jiitariquiaa cusosuhua na naatanijionura. ¹⁸ Jiyacaritij, socua pueyari tiuquijioquiaari.

Nojoriiri cumatacuruhuana cusosu patariquiaa na matujinia. Nojoriiri juucua na tiuquitianu paniriquiaa tiajiniaaco Jesuucua. ¹⁹ Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari.

Nocuaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneece majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia. ²⁰ Jesu niquishacari taa nojori tiuuriquiaa nocuani, cunora Jesuuri cusosu sequeree:

—Pueyanonaa, quiaacuaja tari jiyanooshaaree sesa quia miishanojiniji.

²¹ Naa Jesu sequesacaritij, Moisés Rootasanojiniji niishitiojonaa, mariyata Fariseocuacaari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooni sesa na miishanojiniji! ¡Saaja Pueyaso cutaraari na naata pa jiyanooni!”

²² Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiyani? ¿Niaateeri cucuaji taacanuyajaa? ²³ Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetatejaariuhua sequenura: “Quia sanere. Quia rucuanere”?

²⁴ Cunora, janiyari quiaritia nia niishitiniutianiyani, janiyari mijiria jiyarosaaquiaarini pueya cua jiyanooniuria sesa nojori miishanojiniji.

Naacuajitij, Jesuuri cumatacuruhuana pueyano sequeree:

—Cua tojiri. ¡Quia sanere! ¡Quia matu quia pataarohua quia tiajinia!

²⁵ Jiyacaritij, pueyanoori sanequee nojori niquiara. Na tiajinia pataarohua na matuuri. Shuquiriaatia quiariquiohua na tiajiniohuari Pueyaso na maniniuhuaqueetanuta. ²⁶ Puetunu pueyajanaari shiriiquitiurii. Nojoriiri Pueyaso maniniuhuaqueetariquiaa cuno maninia casaa nojori niquiniuucua. Nojoriiri na puerenuta naa sequetuquiaarijiuhuaaj:

—¡Paari quiaritia jiyanoohua maninia miishano niquiriini! ¡Nocuaji jiuujiatesano!

*Jesu sequesacari Leví, na pueyano na quiniuria
(Mt 9.9-13; Mr 2.13-17)*

²⁷ Nio nuhuaji, Jesuuri tohuataquiaari. Tamonu pueyano niquiriiri jiyaniijiajanaa Césarra cumaneeca masejosaqui cajiyanu. Na sesa quiquiaari Leví. Jesuuri na sequeree:

—¡Cua nuhuajiri, cua pueyano quia quiniuria!

²⁸ Jiyacaritij, Leviiri ritia sanequiaari. Puetunu na jiitiasanojuanaa tiujiaqueeri. Jesuta quiaqueeri.

²⁹ Na nuhuaji, Leviiri jiyanoohua queraatia sumatuquiaari na tiajinia, Jesu na queranacutanura. Queraatia narta cumaneeca masejonaari tii quiriquiaajaacuhuaaj. Nojoritia miaquejajinia cajitiuriquiaari, socua tamasaca pueyano. ³⁰ Moisés Rootasanojiniji niishitiojonaa, mariyata narta Fariseocuacaari juhuacatecara Jesu pueyacuara rimiaaquenu coteequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacatajaajanio? Nojoriiri pa paraa sequera cumaneeca masejonaa.

³¹ Jesuuri nojori riucuaaree:

—Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya. ³² Naajuhuaaj, majaari mijiria cua niniu quiquiaari maninia miiijia pueyacia. Niquiaari cutaranijia sesa miiijaca cua tacatonuhwara Pueyasooeua, maninia miiijia nojori quiniuria.

Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura (Mt 9.14-17; Mr 2.18-22)

³³ Pueyari Jesu sequereee:

—Tiuquinijiona Juan pueya cutaraari sequayarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuacaari naa miiquiaajuhuaaj. Quia pueya saniniuujia, saaja miaquequiaari, ratuquiaari. ¿Casaarateni?

³⁴ Jesuuri nojori riucuaaree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. ³⁵ Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhuaaj, janiyari cua pueya tajiniji jaariutiasaanutaniyani. Jiyacariti nojori cutaraari miaqueyaquiniutianiya.

³⁶ Jesuuri socua nojori niqiuara pahuataquiaari nio miriqui sequesano:

—Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniuujia, jaara naa miiritij, na toque quiariqui sesoyari. Quiarinio toquerauri sesoshiyajuhuaaj, toque mocuajinia na posequesacari. Cua rupaari naajuhuaaj, juhua quiarinio toque.

³⁷ Naajuhuaaj, majaari na naata quiariniacu uva caaca mishinishaanu shoque tariucuacojinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhwana niitiashiya. Shoqueeri najuhwana sesoshiyajuhuaaj. ³⁸ Naaratej, maninia cutaraari quiariniacu uva caaca shuujionu shoque quiariquiojinia, maja vino niitiasaanuucuaaji, na quiquio shoquenio. Naajuhuaaj, nia niishitiojosanoori juhua tariucuaco shoque. ³⁹ Naajuhuaaj, pueyano jaara vino tariucuanacu ratujua quiri, majaari na paniniu quiariniacu vino. Sequeyari: “Tariucuanacuuri maniniacuaja”. Naajuhuaaj,

majaari cua niishitiojosano nia paniniu, quiarinio na quini-uucua.

Jesu pueya carojotasacari trigo samaatenu juuca
(Mt 12.1-8; Mr 2.23-28)

6

¹ Tamonu samaatenu juuca, Jesuuri trigo cuhuariquia-jiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuuquiojoriquiaa na corequetanura. Na nuhuaji, na jajau miojonu-uriquiaari. ² Fariseocuacaari na niquitiariquiaa. Nojoriiri Jesu pueya juaarii:

—¿Casaara nia tojitiaaquiya Moisés Rootasanoni, taa na sequequiaaricujani maja pa poonijionura samaatenu juuca?

³ Jesuuri nojori riucaaree:

—¿Majateeri nia serojonu quiquiaacuaja casaa supuetana David miiquiaari na miaajesacarini, mariyata na cojiniaa miaajesacarijuhuaj? ⁴ Nojuajaari Pueyaso Secojojua tiajinia tiuquiquiaari. Pueyasora niojosano pan pooquiaariiri. Na sareeri. Mariyata nata quiniaa niquitiojoreeri nojori sanurajuhuj. Cuno panri sequesaaquiaari saaja pueyacuara secjonaa sasocoriquiano. Naajaa, Davidri na saquiaari. Majaari Pueyaso juaaniu quiquiaari naa David miiniuucua.

⁵ Jesuuri socua cuno Fariseocuaca sequequiaari:

—Janiyacujaaari Pueyaso Jiyarosanoni. Jiyaniijara jiyatesaaquiaarinijia cua sequenura casaate samaatenu juuca miishiyani, Pueyaso pa shuquiritiniuria.

Jesu jeeacasacari pueyano juaashiquia, cuseetucjuara joojequetano

(Mt 12.9-14; Mr 3.1-6)

⁶ Tamonu samaatenu juuca, Jesuuri Pueyaso Secojojua tiajinia tiuquiquiaari. Tii niishitiojoriquiaari. Quiniqui quiriquiaari pueyano, cuseetucjuara joojequetano na juaashiquia miaquetajara. ⁷ Moisés Rootasanojiniji niishitiojona, mariyata Fariseocuacaari Jesu shanacutariquiaa. Nocuara tonujunu paniriquiaari Jesu jaara cuseetucjuara joojequetano juaashiquiaraca pueyano jeeicare samaatenu juuca. ⁸ Jesuuri tari niishiriquiaa taa nojori niishiriojoriquiaani. Jesuuri cuno rimiajatucjuara pueyano sequeree:

—¡Quia sanere! ¡Niya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanuracujani. ⁹ Jesuuri nocuara tonujunu panijiaa pueya sequeree:

—Nia nequesotareeraj. Cua sequere, ¿taa pa niishitiojosaaquiaari Moisés Rootasanojinijini? ¿Paate maninia miya

samaatenu juucani? ¿Paate sesa miya soj? ¿Cusosuhuate naatanijoshiya, puetushiyajanaa monu soj? ¿Taa nia sequeyani?

¹⁰ Jesuuri puetunu na shocuaqueya quiniaajanaa niqini-jioree. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeequequee! ¹¹ Cuno pueyari jiyanoohua juaaquioree naa Jesu miishacaritij. Nojoriiri na pocoojoquiaari tamajaaja: “¿Taa pa miiniutianiya socua cuno Jesuurini?”

Jesu saquiriojosacari doce pueya na jiyaramiquishocoriquiano

(Mt 10.1-4; Mr 3.13-19)

¹² Jiyacaritij, Jesuuri tamonu tuhananuucua quiaquiaari, Pueyaso na secojonura. Puetunu niucujajanaa secojoriquiaa Pueyasoori. ¹³ Jaara juhuaquequiaari, Jesuuri na tojitiajaca pueya sequequiaari nocua nojori nijionura. Puetunu nojorijinijuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocoriquiano pueya”. ¹⁴⁻¹⁵ Nioori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquiriojosaaquiaarijuhuaj, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. ¹⁶ Santiago niyanu Judasri saquiriojosaaquiaarijuhuaj, Judas Iscarioteno. Nojuajaari quiquiaari Jesu quia-teriquiano mosocoriquiano.

Jesu niishitiojosacari queraatia pueya

(Mt 4.23-25)

¹⁷ Na nuhuaji, Jesuuri tuhananujiniji rosetaquiaarijuhua na saquiriojosano pueyata, jamatujiniara. Cuno jamatujinia, queraatia na nuhuajiniaa pueyari tari nocuaji quiriquiaa. Mariyata jiyanoohua queraatia pueyari tii quiriquiaa puetunu Judea jiyajinijinio, Jerusalén tiacajinijiniojuhuaj, shoniniacu caminia shuriuquiumia quijiacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori tojiniuria Jesu, na cusonujiniji nojori naatanijosaanurajuhuj. Jesuuri nojori naatanijioree. ¹⁸ Naajuhuj, taraatia samaruhua miishano pueyari naatanijosaaquiaarijuhuaj. ¹⁹ Puetunu cusosuhujanaari Jesu quianu paniriquiaa, naatanijosano nojori quiniuria. Jesu cumaacaari jiyanoohua poonijioriquiaa. Naaratej, puetunu pueyajanaari naatanijosaariquiaa, saaja nojori quiasacari nojuaja.

Jesu pohuatasano shuquiriaatia quiijajiniji, taraatia quiijajinijinio

(Mt 5.1-12)

²⁰ Na nuhuaji, Jesuuri na pueya niquirii na pocuanura. Naa sequereeri:

—Niaari Pueyaso shuquiritasano, niaa jaara niishiriquia nioojia saaja sesa miihia. Naa jaara niishiri nioojia naa quiyatej, niaari Pueyaso jiiitasano pueya quiniutianiya.

²¹ 'Niaari Pueyaso shuquiritasano, niaa jaara maninia miijia quiniucua jiaatiaa, taa miaajeyano pueyano miaquesanoocua jiaatiaacuaani. Naa jaara naa quiniucua jiaatiaa, Pueyasocuaajaari nia jataniniutianiya maninia quiijara nia quiniuria.

'Niaari Pueyaso shuquiritasano, niaa jaara sesa nia miiniu nuhuaji taraajequiaa. Niaari na nuhuaji saroojonutaniya nia shuquiriniutia, niaa jaara jiyanooshaarohua.

²² 'Niaari Pueyaso shuquiritasano, pueya jaara nia niquniu paniyaquiri, pueya jaara nia taanuure, pueya jaara nia macaatiri, pueya jaara nia soore cua tojijiaca nia quishacari. ²³ Naa jaara naa miishaaretej, jiyanohua nia timiri. Nia jaacuatate nia shuquiriniutia. Naa jaara naa nia miishacari rejeretajaca quiri, Pueyasoori nia niishishoo casaa racatasano jiiitiaa jiyocuacaanu, na niqutiosocoriquiano niajaniya. Nia paraa supuetanaari naa taraatia miiquiaari tariucuacaanu Pueyaso sequenu panishano caminiujiunaa pueyajuhuj.

²⁴ 'Niaari saniniuujia taraatia quiijaca quiniutianiya, jamuejaca casamiriaca pueyanaa. Niaacuajaari tari shuquiriaatia quiquianu, puetunu nia panishanojuanaa nia jiiitasacari.

²⁵ 'Taraatia quiijacaari niajaniya, cante sequejani: "Janiyacuaaja maninia pueyanoni. ¿Janiyatucua casaara paniri Pueyaso jiyanooniuria janiyani?" Naa sequejaca pueyanaa, na nuhuaji, niaari niishiniutianiya niaari saaja sesoriquia pueya seque.

'Taraatia quiijacaari niajanijajuhuj, jeya nia quiyaquishacari Pueyasora, saaja tamajaaja shuquiriaatia nia quiniuria nia cojesacari pueyaracaanu. Niaari na nuhuaji sapuenutaniya Pueyasooju nia quishacari pueyaracaanu.

²⁶ 'Taraatia quiijacaari niajaniya, puetunu pueyajanaa jaara maninia pohuataquiaa niajanijajiniji, maninia nia cojiniucua cuno pueya, Pueyaso tojiyashijiaca pueyani. Cuno pojori supuetanaacuajaari naa shuquiritiaquiaari cuno sapojonuujaca, canapueete maja seetanujuanaa Pueyaso sequesano caminiujiunaa quiquiaaricujani.

Pa paraa panijiaca pa quirij
(Mt 5.38-48; 7.12)

²⁷ 'Niajaniya, cante niya cua tojitiaacuajani, cua tojitiuri. jNia paraa nia paniri! Maninia nia miiri nia niquniu paniyashijia pueya. ²⁸ Saaja maninia nia riucua nia juayano pueyano. Sesa nia miijiaca pueyacuara nia secojore Pueyaso. ²⁹ Pueyano jaara quia maseca piri, quia jiyanoori nojuaja. Jaara taquijiria pirijihuaaj, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niqutiorejuhuaj. ³⁰ Pueyano jaara quia sequere quia casamijiniji quia niqutionura nojuaja, quia niqutiore nareja. Pueyano jaara quia casaa jaariutiare, majaari na sequenu: "Cua niqutiorehua". ³¹ Maninia nia miiri tamasaca, taa nia paniquiaa tamasaca miiniuria niajanijacuaani.

³² 'Niaa jaara saaja nia panijiaca paniriquia, majaari nia jiyaniniu Pueyasoori nia shuquiritiaa naa nia miishacari. Sesa miijiaca pueyari naa paniquiaa nojori panijiacajuhuaaj. ³³ Maja puera maninia miijia niajaniya, niaa jaara maninia miiquiaa saaja noo pojori, canapuate maninia miiquiaa niajanijacuaani. Sesa miijiaca pueyari naa maninia miiniu niishiquiaajuhuaaj, noo pojori canapuate maninia miiquiaa nojoricuaani. ³⁴ Maja puera maninia miijia niajaniya, niaa jaara nia masena niqutioquiaa na panishano, nia niishishacari nojuaja ritia niqutionutaniuhua niajanijajiniji na masesano casaa. Sesa miijiaca pueyari na casaa rupaquijiara niqutioquiaa narta sesa miijia pueyajuhuaaj, na niishishacari nojori ritia niqutionutaniuhua nojori masesano casaa rupaquijiara. ³⁵ Nia paniri nia paraa. Maninia nia miiri nojori. Nia casami nia niqutiore nareja, pueya jaara na paniya rupaquijiara. Majaari nia taraajenu cuno pueyano jaara nia niqutioyaquiriohua nia casaa. Naa nia miishacaritij, niaari seetanjuanaa Jiyocuacaanu Quijia muerasu. Pueyasoori socua jiyanohua queraatia nia niqutionutaniya tamasaca nia niqutiosanojiniji. Naaratej, capora nia quiriri, taa nia Que Pueyasocuaani. Nojuajaari nareja niqutiojoquiaa sesa miijiaca pueya, mariyata canapuate na sequeyashijiacani "paacarasho". ³⁶ Naaratej, jiyanootio nia quiriri, taa nia Que Pueyasocuaani, jiyanoojia.

Maja sesa nia niishiriojonu niarta pueyanoocuaa
(Mt 7.1-5)

³⁷ 'Maja nia rimiaaquenu tamasacaacuara, Pueyaso mariqui saniniuujia nia jiyanoyaquiriiri. Niaa jaara tamasacaacuara tonujiyashijia quiriri, naajuhuaaj, Pueyasoori maja na saneenu quiniutianiya sesa nia miishanojuhuaj.

Niaa jaara jiyanootio quiri, Pueyasoori nia jiyanooniutianiyajaacuhuj. ³⁸ Niaa jaara tamasaca niqutioquiaa na panishano, Pueyasoori naa nia niqutionutaniya nia panishanojuhuaj, maninia shanacusano, jiuuquiutiasano, maninia quianujusano, mishaja quera niitiyano. Pueyasoori mariyata juhua nia shanacutajajiniaja niqutionutaniya niajaniya, taamueca shanacutajajinia nia niqutioquiaa pueyacuani.

³⁹ Jesuuri socua niishitiojoquiaari pueya, nio miriqui sequesanta:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama. ⁴⁰ Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaariuhuj, juhua na niishitiojonaja.

⁴¹ ¿Casaara nia niquiya rucucua maano quia tarajanu namijiajiniani, niaa jaara puereetuuca maca jiitiaa tama nia namijiajiniajaaja? ⁴² Niaa jaara puereetuuca maca shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno rucucua pa taquiri quia namijiajiniji”? Sesa jiuujiaracanaa, tama nia namijiajinijiaaja nia pare coteenu cuno maca. Na nuhuaji cutara nia naata maninia niqiniu, cuno rucucua nia taquiniuria nia tarajanu namijiajiniji. Naaratej, majaari nia rimiaaquenu niarta pueyanoocuara.

Naanaari niishishano na jajaujiniji

(Mt 7.17-20; 12.34-35)

⁴³ Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. ⁴⁴ Puetunu naanajanaari maninia niishishano na muetusanoiniji. Majaari pa naata satuna carjonu shuunajiniji. Naajuhuj, majaari pa naata tuhuaracona carojotanu saarianajiniji. ⁴⁵ Naajuhuj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaraatia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

Miriqui Jesu pohuatasano cumueeca jiyajiniji, sasaca jiya-jinijinio

(Mt 7.24-27)

⁴⁶ ¿Casaara nia sequequiaa janiyani, “Cua jiyaniijianaa, cua jiyaniijianaa”, niaa jaara cua rootasano tojitiaaquiquiaa? ⁴⁷⁻⁴⁸ Cua tojiri. Cante cua rupenara quirii cua rootasano tojijia na quiniuriani, nojuajaari juhua tamonu pueyano cante

maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucuaaji. Na nuhuaji, moo jaara pajaashiquiaari, pajaacaari jiyanohua cajiquiaari cuno tiaacua. Naajaa, majaari na mueecurujutanu quiquiaari, maninia nujuatejosano na morijiuucua quishacari cumueeca jiyajinia. ⁴⁹ Saniniuujia, cante najuhuana cua niishitiojosano tojiyaquiquiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanohua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

7

Jesu naatanishacari Romano capitán seru (Mt 8.5-13)

¹ Jesu jaara pueya niishitiojonu puecaquiaari, na pueyata quiaaree Capernaum tiacajiniaari. ² Romano soldadohua capitánri quiniqui quijia quiquiaari. Jiyanohua na panishano seruuri cusosu matariquiaa. Quera cusoriquiaari. ³ Capitán jaara tojiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuara niiria nocua na seru na naataniniuria. ⁴ Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyanohua, nojoritia na quianura. Nojoriiri Jesu sequeree:

—Cuno Romano capitánri canaa jiyaroreeni, ¡nojuajaari jiyanohua maninia pueyano! ¡Quenaaja quia miiri na panishano! ⁵ Nojuajaari parta Judiocuaca panijia. ¡Nojuacuaajaari Pueyaso secojojua tiatequiaari canaara tama na cumaneecatajaaja!

⁶ Naacuajitij, Jesuuri nojoritia quiaquiaari capitán tiajiniara. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujiuniuria na sequesano Jesura. Naaratej, nojoriiri naa Jesu caminiujiushii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. ⁷ Nocuaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere, cua seruuri naatanutaniuhua. ⁸ Janiyari niishiyajaaniuhua, cuno cusonuuri quia tojiniutianiya taa cua tojiquiaa cua

jiyaniijianucuaaani. Janiyari cua jiyaramiquishano soldadohua jiitiaajuhua. Janiya jaara tamonu sequereni, ‘Quia quiaare’, nojuajaari quiaqueequiaa. Janiya jaara tamonu sequereni, ‘Miji’, ritia nimiaquiaari. Janiya jaara cua seru sequereni casaa na miiniuria, ritia na miyari. Niishiyanjia quiaari jiyano cumaacaracajuhua”.

⁹ Jesu tojishacari cuno pojori caminiujiushano capitán sequesano, Jesuuri jiuujiateree. Jesuuri na nuhuajinia pueya niqiniijoree. Nojori sequereeri:

—Seetanujanaa nia sequeyanijia, puetunu parta Israel pueyajinijiojuanaani, ¡majaari quenaaja cua niqiniu quiqiuana Pueyasocua tiuujia pueyano juhua nio tahue!

¹⁰ Capitán jiyaramiquishano pueya tiuquijiosacariuhua capitán tiajiniohua, nojoriiri Capitán seru niqishuhua tariucua naatanohua.

Jesu samiitianishacariuhua mashiquio niyanu

¹¹ Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhua, socua queraatia tamasaca pueyano.

¹² Nojori catecanosacari Naín tiacaacua, Jesuuri pueya niqiquiaari macu pataano jamosocoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucuaata macu nuhuaji sacuariquiaa, jamajiniara nojori quiojosacari.

¹³ Jesu niqishacari mashiquio, nocua taraajereeri. Na sequereeri:

—Maja nujuquenu.

¹⁴ Jesuuri macuucua catecanoree. Macu quiquio quiatareeri. Na patanaari pootia na nujuataquee. Jesuuri macu sequeree:

—Mashajanaa, janiya quia sequeyani: “¡Quia sanere!”

¹⁵ ¡Macuuri cajiquii! Juhuacatecara pocuareeri. Jesuuri na nucuaacua na jaatucuree. ¹⁶ Puetunu pueyajanaa jaara naa Jesu miishano niqiquiaari, jiyanohua pueretureeri. Nojoriiri Pueyaso shuquiritiaree jiyanohua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajinia! ¡Jiyanohua cumaacaraca!

Nojoriiri naa sequetureejuhua:

—¡Pueyasoori shusha quiarjia na saquiriojosano Israel pueya niishiriohuacuuhua, na cumaquiniuria pajaniya!

¹⁷ Jesujiniji pueya pohuatasanoori caminiujiushaaquiaari puetunu Judiocuaca jiyajiniajanaa, mariyata puetunu na shocuaqueya jiyacajiniajanaano.

Tiuquinijiona Juan jiyaramiquishano pueya nequesoresacari Jesu
(Mt 11.2-19)

¹⁸ Tiuquinijiona Juan pueyari puetunu Jesu miishano-juanaa pohuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

¹⁹ —Jesuucua nia quiaare. Niocua na sequesee: “¿Quiaate seetanujuanaa Pueyaso Jiyarosano, tariucuacaanu sequesano niriqianotej, tamonute sashishiyajaara soj?”

²⁰ Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesotanura quiajaniya: “¿Quiaatena Cristo, Pueyasojiniji niriqianotej, canaate tamonu sashiyajaara soj?”

²¹ Nojori tiuquiijosacari Jesuucua, jiyacaritij, Jesuuri queraatia pueya naatanijioree nojori niquiara; cusosuhua, pueyaracaanu nootunejaca, samaruhuaraca pueyano. Mariyata queraatia cariojuarujuri jiyaterohua niquijiacaraari. ²² Na nuhuaji, Jesuuri naa Tiuquinijiona Juan pueya sequeree:

—Nia quiaarohua. Tiuquinijiona Juan nia pohuatasuhua taa nia niquiriicuajani, nia tojishanonio. Nia sequesuhuanoj: “Cariojuarujuriiri niquijiacara quiriohua. Shipiiniuquiujuniaari maninia rucoorohua. Lepra cusotajacaari cushiritishaarohua juhua juhuanaraja nojori quiniuhua. Numueejunucuaari tojjiacara quiriohua. Macunucuaari samitianijiosaarohua. Casamiijiuniucua pueyari Pueyaso rupaa pohuataasaaree, Pueyaso pueyara nojori jiyatesaanura. ²³ Shuquiriaatia quijia cutaraari nooj, cante cucua tiuuniu tarinitiaaquiyani”.

²⁴ Tiuquinijiona Juan jiyarosano pueya jaara quiojoquiaaruhua, Jesuuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niquiniucua nia quiojocanu cariiquia jiyajiniani? ¿Niaate noojia niquijioiteja niquiniucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. ²⁵ ¿Casaa niquiniucua nia quiojocanunitioj? ¿Niaate maniniuqui toque cushijia niquiniucua quiojocanu? Niaacuajaari niishiya, shanohua toqueya cushiyonujuacaari saaja jiyaniijianucua tiajinia quiyano niquishano. Nojoriiri tama na panishanojuaaja miijiacaa. ²⁶ ¿Taateerinitioj? ¿Casaa niquiniucua nia quiojocanuurini? ¿Pueyaso sequenu panishano caminiujiuniate

quiquianu? Taaquiriirini. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujiuniajinijianaa. ²⁷ Cuno Juanjini-jicuaajaari tariucuacaanu Pueyaso Rupaa-jinia naajiotasano quiquiaari. Pueyaso sequesano nojuajiniijiiri naa naajiotasaaquiaritij:

“Cua sequenu panishano caminiujiuriquiano jiyaroyanjia, na puetanura quiajaniya, nuu jeenucuariquiano quiocuaji”.

²⁸ Seetanujuanaa nia sequeyanijia, puetunu Pueyaso sequenu panishano caminiujiuniaajinijiniojuanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, Pueyasora, nojuajaari socua cutara pueyano Tiuquinijiona Juanjiniji.

²⁹ Puetunu pueyajanaa, mariyata cumaneeca masejonaa Roma tiacajinia quijia jiyaniijiarani, nojoriiri niishiquianu Tiuquinijiona Juan pohuatasano Pueyasojinijiiri seetanu rupaa-janaa quiquianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijiosaacanu.

³⁰ 'Saniniuujia, Fariseocuaca, mariyata Moisés Rootasanojiniji niishitiojonaani, nojoriiri Tiuquinijiona Juan pohuatasano ruuretacanu saaja. Naacuajitij, majaari nojori tiuquinijiosaanu quiquianu, nojori seetanuucua nojoriiri sesa miijiacajuhuj. Nojoriiri Pueyaso miiniu panishano nojoriria soocanu saaja. Naacuajitij, majaari nojori jiyanooshaanu quiquianu.

³¹ Jesuuri socua sequeree:

—¿Quiarjia nio pa quishacari pueyarijiaataj? ³² Nojoriiri juhua naatujoori, na tacuarishijionu panishacari, na cajitiushacari tiaca jiuujiajinia cajitiucua cura-tasanojinia. Nojoriiri narta naatujooriicua naca: “Canaari juucua naajua jonenejiyani. Majaari nia nianujunu paniniu. Canaari taraatia jaaquequejosano jaaquequejiyani. Majaari nia sapuenu paniniujuhuj”. ³³ Naajuhuj pueyanaa, niaari Tiuquinijiona Juan tojiyaquiquianu Pueyaso rupaa na pohuatasacari nia niquiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na sequeja, “samaruraca”. ³⁴ Na nuhuaji, janiyari niquianuni. Janiyari saniniuujia miaquesano miaquejojuani, vino ratujuajuhuj. Cunora niaari cua sequequiaa: “Cunoori sacuaraatia miaquejoru, ratunu porocuanio, sesa miijiaca rupueja sacuaraatia, mariyata pa soosano cumaneeca masejonaa rupuenanio”. Naa nia sequesacaritij, niaari cua to-

jitiaaquiyajaacuhuj. ³⁵ Naajaa, pueya jaara canaa pohu-
 atasano tojjiaca quiri, jiyacari cutara nia naata niishiniu
 canaa niishitiojosanoori seetanujuanaa Pueyasojiniji, cua
 tojjiaca jatasacari maninia quijiacara.

Jesu miaquesacari Fariseo Simón tiajinia

³⁶ Tamonu Fariseo pueyanoori Jesu masuuquiaari na tia-
 jinia na miaquenura. Jesuuri na tiajinia quiaaree. Mi-
 aquenuujua shuriuquiumia roshishiiri. ³⁷ Paanatuuri cuno
 tiacajinia quijia quiquiaari. Na niishishacari Jesuuri cuno
 Fariseo tiajinia tiuquirii miaquenura, nojuajaari cuno tia-
 jinia quiaquiaarijuhuaj. Shiitaniyoyua seesariquiaja pat-
 aconiyoyua cacatariquiaari, cohujaja saajiajiniji quejasano.
 Mishaja quiriquiaari shanohua jaanutajata. ³⁸ Maajiiri Jesu
 cashacuucuma mojuquetasee. Nujuqueriquiaari. Na namiji-
 aacaari Jesu niohuacaacua totejoriquiaa. Naa Jesu niohuaca
 piquiojoreeri. Na nuhuaji, na muecacata na sacuanijiaro-
 huari. Na niohuaca nujuureeri. Na shanohua jaanutaja
 totaree Jesu niohuacaacuaari. ³⁹ Cuno Fariseo pueyano
 niquishacari naa cuno maaji miishanotej, noojiajinia ni-
 ishiriotoriquiaari: “Jesu jaara seetanujuanaa Pueyaso se-
 quenu panishano caminiujiunia quiri, mariqui niishiri cante
 na coyani, taamueca maajitijianojoni”. ⁴⁰ Jesuuri cuno
 Fariseo pueyano niishiriotosano niishiriquiaa. Cunora na
 sequereeri:

—Simónnaa. Quia sequenu paniyanijia.

Fariseo pueyanoori Jesu riucuaaree:

—Cua sequere, Niishitiojonanaa.

⁴¹ Jesuuri na sequeree:

—Caapiqui pueyanoori cumaneeca masequiaari
 rupaquijiaara tamonu cumaneeca niquitiojonajiniji.
 Niquiriyatu pueyanoori queraatia cumaneeca masequiaari,
 juhua quiniento juuca poonijiosanojiniji masesano.
 Tamonu pueyanoori masequiaari nareja juhua cincuenta
 juuca poonijiosanojiniji masesano. ⁴² Na nuhuaji, nojori
 sequesano juuca jaara tari quiquiaari na camaru nojori
 niquitionuhuara na cumaneeca, majaari nojori jitianu
 quiquiaari cumaneeca. Naaratej, cumaneeca niquitiojonaari
 nojori sequeree: “Naajaa, maja socua nia niishiriojonu
 nia niquitionuhuara tarijia cua niquitiosano cumaneeca
 nijaniya”. Cumaneeca niquitiojonaari naa cuno caapiqui
 pueya jiyanooquiaari. Simónnaa, cua sequeretoj, ¿teyano
 cuno caapiqui pueyanojinijiniote socua cuno cumaneeca
 niquitiojona panijiaara quiniutianiyani?

⁴³ Simónri Jesu riucuaaree:

—Cunocujani, cante socua queraatia cumaneeca niquitiosaaquiaaricujani.

Jesuuri na sequeree:

—Taaquiriirinij.

⁴⁴ Jiyaciritij, Jesuuri cuno maajiicua tacateree. Simón sequereeri:

—¿Quiaate nio maaji niquiya? Cua tiuquishacari quia tiajinia, majaari quenaaja quia niquitionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequeree na namijiaacata. Na sacuanijiarohua na muecacataari. ⁴⁵ Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari. ⁴⁶ Naajuhuj, majaari quia totanu quirii miesu nunacu cua nacaacua. Nio maaji cutaraari cua niohuacaacua totaree shanohua jaanutaja. ⁴⁷ Naaratej cua tojiri. Nio maajiiri jiyanohua sesa miiija quiriquiaa. Naaratej, jiyanohua cua paniyari puetunu sesa na miishanojinijianaa cua jiyanooniucua nojuaja. Saniniujia, cante secaja sesa na miishanojiniji jiyanooshaareeni, naajuhuj, nojuajaari secaja panijia na jiyanoonia.

⁴⁸ Na nuhuaji, Jesuuri cuno maaji sequeree:

—Quiaacuajaari tari jiyanooshaaree sesa quia miishanojiniji.

⁴⁹ Narta masuusano pueya nata cajitiuuyoori juhuacatecara tama sequetooreejaaja:

—¿Cantucuaa nio pueyanoni, sesa miiija jiyanooriquianoni?

⁵⁰ Jesuuri maaji sequeree saaja:

—Cucua quia tiuushacari, quiaacuajaari tari jiyanooshaaree. Juhujaniya quia quiaarohua.

8

Jesura pueraquena maajipohujiniji pohuatasano

¹ Na nuhuaji, Jesuuri rucuanajoquiaari queraatia tiacajinia, shiitianiyojua tiacajiniajuhuaj. Nojuajaari tii Pueyaso rupaa pohuatariquiaa, taa Pueyaso jitianu paniya na muerasuni. Na doce saquiriojosano pueyari na cojiriquiaajaacuhuj. ² Noojiaqueya maajipohuari na tarajariquiaajujuaj. Cuno maajipohuari tamaatia cusonujiniji Jesu naatanijosano quiquiaari. Tii quiriquiaajaariuhua noo maajipohua, Jesu nojorijiniji tohuatanijioquiaari samaruhtej. Nojorijinijinoori quiquiaari Maria Magdalena. Jesuuri cuno Mariajiniji tohuatanijioquiaari siete samaruha. ³ Quiriquiaajaariuhua Juana, Cuza niquiocuani. Cuzaari jiyaniija Herodes jiiitasano casami cojuana quiquiaari.

Susaanaari nojorijiniinio quiquiaarijuhuaj. Socua queraatia maajipohuari quiriquiaa. Puetunu cuno maajipohua-janaari Jesu naacutaquiaari tama nojori jiiitasano casaata-jaaja. Nojoriiri nera pueraquenuunaa quiquiaarijuhuaj, tiqiyocua nojori rucuanajosacari Jesuta.

Jesu pohuatasano natoojona pueyanojiniji

(Mt 13.1-9; Mr 4.1-9)

⁴ Queraatia cuno jiya tiacajiniinio pueyari nijioquiaari nojori niquniuria Jesu. Jaara nocua rerequeejoquiaari queraatia pueya, Jesuuri nojori niishitiojoquiaari miriqui, nio pohuatasano. Nojori sequereeri:

⁵ —Tamonu pueyanoori na cuhuariquiajinia quiaquiaari natojonuucua. Na jacutasacari, secajaari totequiaari nucuaco. Tii rapijiosaaquiaariiri. Shuhuari na miojoquiaari.

⁶ Tajaacaari toteree sai tajinia. Cuno jajau jaara moritiaquiaari, ritia sorereeri puera joojuashiqui na quishacari.

⁷ Tajaacaari toteree riyocuaca tajinia. Riyocuacaari socua ritia maashiquiaari. Na natasanoori tarinitiuucara quirii. ⁸ Socua tajaacaari maninia jiyajinia toteree. Tii maashiquiaari maniniaari. Queraatia mueturee cutaraari. Noojiaqueya cuno nataujiniijiiri cien jajau quiquiaari niquiriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:

—¡Niaa jaara numaaraca quiri, nia tojitiare cua pohuatasano!

Casaarate miriqui pohuatasano

(Mt 13.10-17; Mr 4.10-12)

⁹ Na nuhuaji, Jesu pueyari na nequesotaree casaa na miriqui pohuatasano niishitiojonu paniyani. ¹⁰ Jesuuri nojori riucuaaree:

—Niaari saquiriojosaaquiaari nia niishiniuria taa Pueyaso poonijiya pueya jiuujiajiniani, na muerasura nojori quiniuria. Cunoori tariucuacaanu pueya niishishoo. Janiyari tamasaca pueya niqiara pohuataquiaa miriqui cutarani. Naacuajitij, nojoriiri cua pohuatasano niishiyaquiquiaa na tojitiasacari. Naajuhuj, cua cumaacata cua miishano cariyoshitiquiaari, nojori niqiara cua miishacari.

Jesu niishitiojosacari na pueya, miriqui na pohuatasano natojonajiniji

(Mt 13.18-23; Mr 4.13-20)

¹¹ Nia niishitiojoreera miriqui cua pohuatasano natojonajiniji. Pueyano natojosano jajauri juhua Pueyaso rupaa. ¹² Pueyano jaara Pueyaso rupaa tojiri najuhuanaj, nojuajaari juhua nucuaco toteno jajau. Sesaacaari nimiaa.

Pueyaso rupaa na tojishano jaariutiarohua noojiajiniijiiri, maja nocua na tiuuniuria, nojuaja mariqui jiyanooshaareeri. ¹³ Sai tajinia toteno jajauri juhua noo pueya, canapueete Pueyaso rupaa tojiriini. Na nuhuaji, rupaquijia Pueyasooocua tiuquuaa shuquiriaatiaari. Naa miijiacaari juhua puera shiitianiyojua nujuacaraca. Naacuajitij, nojori jaara saniniujiushaare, nojoriiri ritia Pueyasooocuai rupatequiaa. ¹⁴ Riyocuaca tajinia toteno jajauri juhua noo pueya, canapueete maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriaca nojori quiniuria, tama na cuaqueyajaaja nojori shuquiritiniuriajuhuaj. Naaratej, nojoriiri juhua muetuhuo natau quiya, tarinitiu-cuara riyocuaca tariyoshitishano. ¹⁵ Maninia jiyajinia toteno jajauri saniniuujia juhua noo pueya, canapueete maninia tojitiareecuaja Pueyaso rupaani. Na racataa maninia noojiajiniiaari. Pueyaracaanu na tojitiaquiaari. Majaari na pishiniu Pueyasooocuai. Naacuajitij, nojoriiri juhua queraatia muetujua natau.

*Pueyaso muerasuuri juhua samaritiu cuhuataja
(Mr 4.21-25)*

¹⁶ Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare, morijiuucua morotashiyari na cuhuatanura, pueya tiuquitiasacari tajiniaaco. Naa-juhuaj, Pueyaso Rupaari pueya jiuujia cuhuataja. Cunora, Pueyaso Rupaa cuara maatia pohuatasaaaria puetunu pueya niqiarajanaa. ¹⁷ Puetunu jamojosano casaajanaari riuritaasaanutaniya. Puetunu jiyasohuaja nia miijosanojuanaari niishishaanutaniyajuhuj. Cahuatasaanutaniyari maninia niqishocoriquiano. ¹⁸ Cunora, cua sequesano tojitiajaca nia quiri maninia. Cante maninia jiitiaa cua rupaani, nojuajaari socua na niishijara jiyatesaanutaniya. Saniniuujia, cante cua rupaa tojiyashijiani, secaja najuhuana na niishishanoori jaariutiasaanutaniya, puetunu shaaquiriajanaa.

*Jesu tapueyocuaca tiuquiiijosacari Jesuucua nojori nucuata
(Mt 12.46-50; Mr 3.31-35)*

¹⁹ Jiyacaritij, Jesu nucua Jesu tapueyocucata tiuquiiioquiaari Jesu quishaqui. Majaari nojori naata tiuquitianu quiriquiaa Jesuucua. Jiyanohua queraatia pueyari nocuara ritiariquiaa saaja tia tohuateyaji. ²⁰ Tamonuuri Jesu nu-mooteree:

—Quia nucua quia tarajanuhuata jati carijiniacuma quiya. Quia niqitiuniu paniyaquinia.

²¹ Jesuuri tii quiniaa niqiara sequeree saaja:

—Canapuate seetanujuanaa Pueyaso Rupaa tojitiajacani, nojoriiri cua nucua cutara, cua tarajanuhuanio.

Jesu pueyajetesacari paratu, mohuacanio

(Mt 8.23-27; Mr 4.35-41)

²² Tamonu juuca, Jesuuri botejinia tacataquiaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa. ²³ Nojori niuutiasacari, Jesuuri maqueriquiaa. Canashiyaquiji paratuuri juhuacatecara piyarojonu coteeree jiyanohua. Mohuaca queyaqueteriquiaa bote jiniacumaraari. Boteeri quera tiuquitiariquiaa tari. ²⁴ Jiyacaritij, na pueyari Jesu niucujasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucujaja! ¡Nia suraajere!

Paratu, mohuacaari ritia suraajequee. Paratu piyarojonuuri tajimiaa, caminia queyocuaanonio. ²⁵ Jesuuri na pueya sequerohua:

—Niaacuaja juucua Pueyasocua tiuujiaa. ¿Casaa nia tojetareerini?

Nojoriiri Jesuucujaja jiuujiatecoree. Shiriiquitiuriquiaari Jesu miishano nojori niquishacari. Tama nojorijiaarijia nequesoreetooriquiaa:

—¿Cantucuaanojoni? ¡Paratu, mohuacaari na tojirii na sequesacari!

Gerasa jiyajininio samaruhuaraca pueyanojiniji pohuatasano

(Mt 8.28-34; Mr 5.1-20)

²⁶ Na nuhuaji, nojoriiri shiitiaseequiaari Gerasa jiyajinia, Galilea jiya taquijiria. ²⁷ Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno jiya tiacajininio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quijia. Naajuhuj, majaari tiajinia na quiniu quijia. Saaja raacajinia quijiaari, macunucua nucuhua paaquiosaqi. ²⁸ Na niquishacari Jesu, na cariquimiaji mojoquetaseeri. Jesuucua nacareeri:

—¿Casaara quia niyaree miji canaa quia cushitionurani Jesunaa? ¡Quia niishianijia! ¡Quiaacuajaari Jiyaniijiajanaa Pueyaso Nyanu! ¡Cua tarinitiare quenaaja! ¡Maja naquiya cua miiniu!

²⁹ Samaruhuaraca pueyanoori naa sequeriquiaa Jesutej, Jesu sequesacari tari nojuaja, cuara tohuataara cuno pueyanojiniji. Samaruuri sequeyarucua cuno pueyano miitiquiaari sesa. Narta pueyari juucua na cashacucua,

na numatucua morojoquiaari cumayocua jiyocua shipinishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiquiyocua, pueya quiyaquishaqui na quiniuria.
³⁰ Jiyacaritij, Jesuuri na nequesotaree:

—¿Taateja quia sesani?

Samaruuri na riucuaaree:

—Cua sesa “Queraatia”.

Naa Jesu sequequiaariiri jiyanohua queraatia samaruhua na jiiitasacari. ³¹ Samaruhuari jiyanohua secojoree Jesu, maja nojori na jiyaronura puequeetuuju raama saniitiosocoriquiano. ³² Jiyacaritij, queraatia cushiyari miaquenuuriquiaa cateca naataja, tuhananujinia quiniqui. Samaruhuari cunora Jesu secojoree nojori na tiuquitianiniuria cushiyajinia. Jesuuri nojori tarinitiaree. ³³ Cunora, samaruhuari pueyanojiniji tohuareetaquee. Cushiyajinia tiuquitiaaseeri. Puetunu cushiyajanaari cocuateree. Tacojiniji totesee caminiajiniaari. Tii shushiniuuriiri.

³⁴ Cushiya cojuanaa jaara niquiquiaari naa miishanotej, nojoriiri netecuatuquiaari na shiriiquiniutia, Jesu miishano nojori pahuatanura tiacajinia, cuhuariquiacajiniajuhuaj, tee pueya quiriquiaacuajani. ³⁵ Puetunu pueyajanaari Jesuucua nijioquiaari na tiacajiniji, pueya pahuatanuusanojiniji nojori niquiniuria. Nojori tiuquiiijosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretuquiaariiri. ³⁶ Jiyacaritij, Jesu miishano niquitiuniaari shusha nijiono pueya pahuataree taa samaruhuaraca pueyano naatanishaarohuani. ³⁷ Cunora, puetunu Gerasa jiyajinijinio pueyajanaari jiyanohua puereturiquiaa. Naaratej, ¡Jesu secojotureeri na quianura nojori jiyajiniji! Naaratej, Jesuuri botejinia tacataquiaariuhua na pueyata na quianuhua. ³⁸ Cuno pueyano, canajiniji samaruhua tohuareetareecuajani, nojuajaari Jesu secojoree juucua nata na quianura. Jesuuri saaja naa na sequeree:

³⁹ —Quia tiajinia quia quiaarohua. Quia pueya niquiara quia pahuatasuhua taa Pueyaso miirii maninia quiajaniani.

Pueyanoori quiaarohua. Puetunu na tiacajiniajanaa pahuatasuhuari taa Jesu miiriucuaa maninia nojuajani.

Jesu naatanishacari Jairo niyatu, Jesu toque quiana maa-
jinio

(Mt 9.18-26; Mr 5.21-43)

⁴⁰ Jesu jaara niuutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. ⁴¹ Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyaniijia quiquiaari cuno tiacajinia. Jesu cariquimiaji mojoquetaseeri na secojonura na tiajinia Jesu quianura. ⁴² Neyatuniyojuaari quera cursoriquiaa jiyacari. Majaari socua niquiohwaraca na quiniu quijia. Doce marijiaari tari shocojoquiaari cuno neyatu.

Jesu quiasacari Jairota, jyanohua queraatia pueyari nata quiojoriquiaajuhua. Pueyari jyanohua na tanuujuriquiaa, nata nojori quiojosacari nucuaco.

⁴³ Tamonu maaji cusosuuri cuno pueya tajinia quiriquiaa-juhuaj. Doce marijiaari tari na shocojoquiaari pueyara-caanu na naatesacari. Cuno maajiiri puetunu na cumaneeca puecaquiaarijanaa najuhuanaj, na naarajosaanura juucua. Naarajonaari maja na naata na naataniniu quiquiaari. ⁴⁴ Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

⁴⁵ Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniya.

Pedroori Jesu sequeree:

—Niishitiojonanaa, ¿majateeri quia niquiniucujaja? Queraatia pueyacuajaaari quia tanuujiya.

⁴⁶ Jesuuri saaja sequeree:

—Maja. Cusosu cua quiareeni. Niishiyanijia cua cumaa-caari tari na naatanirii.

⁴⁷ Maaji niishishacari na miishano jiyasohuaja tari niishishaaree, Jesuucua nimiaari. Na puerenuta tetecariquiaari. Jesu cariquimiaji mojoquetaseeri. Puetunu pueya niquiarajanaa pohuatareeri casaara Jesu na quiareeni. Pohuatareejaariuhua taa na naataquee ritiani, Jesu na quiasacari. ⁴⁸ Jesuuri na sequeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua. Juhujaniya quia quiaarohua.

⁴⁹ Jesu pocoojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeeseeri:

—¡Quia niyatu tari cusoquee! Maja najuhuana riniu paniniu Niishitiojona quia tiajiniara.

⁵⁰ Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucujaja naatanutaniuhua.

⁵¹ Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio. ⁵² Puetunu tii quiniaa pueyajanaari maaji samiriuucua nujuqueturiquiaa. Sapiyonuuriquiaajaariuhuj. Jesuuri nojori sequeree:

—Maja najuhuana nia nujuquenu. Maaji samiriu maja macu, nareja maqueyano.

⁵³ Naa Jesu sequesacaritij, pueyari na saroojotaree saaja. Nojoricujajaari niishiriquiaa maaji samiriuuri seetanujuaanaa macu quiriquiaa. ⁵⁴ Jiyacaritij, Jesuuri macuucua tiuquiquii. Na juaashiquiajiniji na quiaseeri. Jiyano hua na sequereeri:

—Maaji samiriuniaa, ¡quia sanere!

⁵⁵ Na sohuanuuri nocua tacatemohua jiyacari. Samiiti-amohuari. Ritia sanequereeri. Jesuuri na nucua sequeree na mianuutenura. ⁵⁶ Na queyari jiyano hua jiuujiateree. Jesuuri nojori sequeree, maja nojori pohuatanura tamasa niquiara na miishano.

9

Jesu jiyaramiquishacari na doce pueya Pueyaso rupaa nojori pohuatanura

(Mt 10.5-15; Mr 6.7-13)

¹ Jesuuri na doce saquiriojosano pueya rerejotequiaari na jiyaramiquishocoriquiano. Nojori niquitioree cumaacari, puetunu tamaatia sesa samaruhaajanaa nojori tohuatejonura, cusosuhua nojori naatanijionurajuhuj. ² Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni paniya nojorini, na muerasu nojori quiniuria. Nojori jiyaramiquiri-ijiaariuhua cusosuhua nojori naatanijionura. ³ Jesuuri nojori sequeree:

—Maja nia panu nia rucuanejotajara nia panishano. Maajaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano.

⁴ Naa jaara tamonu tiajinia tiuquishiiquia, niocua cuniqui jiyojetaseequiaaja, niaa jaara cuno tiacajiniji quiaarejaatijia. ⁵ Naa jaara tamonu tiacajinia tojinu paniyaquishaare, cuno tiacajiniji nia quiaare. Nia nuhuajiria, cuno pueya niquiara niocua nia niohuacajiniji cuno tiaca jaaquia nutare. Naacujatij, cuno pueyari niishiniutianiya, Pueyasoori

nojori jiyanoyaquiniutianiya, nojori tojitianu paniyaquiniu-ucua Pueyaso rupaa pohuatanaa.

⁶ Na nuhuaji, Jesu pueyari quiojoquee puetunu cuno jiya-jinia shiitianiyojua tiacajiniajanaa, Pueyaso rupaa nojori pohuatanura tii. Nojoriiri Pueyaso rupaa pohuatanuuquiaari pueya jiyanooshaanura, Pueyaso pueya nojori quiniuria. Naajuhuj, cusosuhua naatanijiotuquiaariiri.

Jiyaniijia Herodes niishiniu panishacari cante Jesuni
(Mt 14.1-12; Mr 6.14-29)

⁷ Jiyaniijia Herodesri pohuatasaaquiaari puetunu Jesu miishanojinijijianaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesucujaari jiyaniijia Herodes nacatanishano Tiuquinijiona Juan samiitianohua”. ⁸ Tamasaca pueyari Jesujiniji sequeriquiaajuhuj: “Supuetana Eliasuja tari tiuquiriohua”. Nojuacujaari tariucuacaanu Pueyaso sequenu panishano caminiujiunia quijia. Saniniuujia, tamasa pueyari sequeriquiaajuhuj: “Jesucujaari tamonu tariucuacaanu Pueyaso sequenu panishano caminiujiunia samiitianohua”. ⁹ Herodesri saniniuujia sequeree:

—Janiyacujaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojinuiyani.

Cunora, Herodesri jiyanohua Jesu niqiniu paniriquiaa juucua.

Jesu mianuutesacari cinco mil pueya
(Mt 14.13-21; Mr 6.30-44; Jn 6.1-14)

¹⁰ Jesu jiyaramiquishano pueya tacatesacariuhua, nojoriiri Jesu pohuataquiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. ¹¹ Pueya niishishacari tee Jesu quiriqiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijioreejuhuj.

¹² Tenacariishacari, Jesu doce pueyari nocua catecanoquiaari. Na sequetureeri:

—Pueya quia jiyaramiquiri cateca tiacajinia, nojori cuara cuniqui pajenuura na miaquenuusocoriquiano, na maquetujuarajuhuj. Nojori panishanoori shaaqui niya pa quishaquini.

¹³ Jesuuri nojori sequeree saaja:

—Niaa mariqui nojori mianuutere saniya.

Nojoriiri Jesu sequeturee:

—¿Canaateeri miaquesanoracajaarani? Canaa saaja cinco panniyojua jiiitiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

¹⁴ Cuniqúi nojoritia quiriquiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuaara cajitiuuria cincuenta jatiqui, socua cincuenta tamaqui. Mianuutesocoriquiano puetunu pueyajanaa, cuaara naa cajitiuuriatej.

¹⁵ Nojoriiri Jesu sequesano miirii. Puetunu pueyajanaari cajitiurii. ¹⁶ Na nuhuaji, Jesuuri cuno cinco pan pataree, caapiqui sapitiaajanio. Jiyocuacaanu maureeri na Que Pueyaso na secojonura miaquesanoocuara. Na nuhuaji na neecasereeri. Na pueya na niqutioreeri puetunu pueyajanaa nojori serotasocoriquiano. ¹⁷ Puetunu pueyajanaari na miaquenuuree. Maninia tooquioreeri. Na nuhuaji, doce canaasatuuri mishinijiosaaquiaari pan raacuata, sapitiaaja raquiquiatanio.

Pedro sequesacari Jesuuri seetanujuanaa Cristo
(Mt 16.13-19; Mr 8.27-29)

¹⁸ Tamacari, Jesuuri Pueyaso secojoriquiaa tamajaaja. Na saquiriojosano pueyari nata quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

¹⁹ Nojoriiri na riucuaaree:

—Noojiaqueya pueyari quia sequequiaa, quiaana nacatasano samiitianohua Tiuquinijiona Juan. Tamasacaari quia sequequiaajuhuaaj, quiaana Elías, tariucuacaanu Pueyaso sequenu panishano caminiujunia. Tamasacaari saniniuujia quia sequequiaa, quiaa naasucuaana tamonu tariucuacaanu Pueyaso sequenu panishano caminiujunia samiitianohua.

²⁰ Jesuuri saniniuujia nojori nequesotaree:

—¿Niajaniyariuhuaaj? ¿Taa nia sequeyani, cante janiyani?

Pedroori na sequeree:

—Quiajaniyacuajaari Cristo, Pueyaso Jiyarosano.

²¹ Jesuuri jiyanoehua nojori rootaree maja nojori pahuatana tamaasaca niqiuara cante nojuajani.

Jesu numootesacari na pueya, nojuaja mosaanutaniya
(Mt 16.20-28; Mr 8.30-9.1)

²² Jesuuri naa nojori sequerohuacuuhuaaj:

—Janiyari jiyanoehua naquiya miishaanutaniyani. Pa Judiocuaca camarucuaari cua niqiniu paniyaquiniutianiya, na tojitianu paniyaquishacari janiya. Naajuhuaaj, pa pueyacuara secojonaa jiyaniijianucuaari cua

niquiniu paniyaquiniutianiya, Moisés Rootasanojiniji niishitiojonaanio. Nojoriiri cua monutaniya. Naajaa, jiuujianaraca juucajinia, janiyari samiitianutaniuhuani.

²³ Na nuhuaji, Jesuuri puetunu pueyajanaa sequeree:

—Cante cua nuhuajiniu paniyani, cua pueyano na quiniuria, nojuaja cuaara niyajetaara tama na miiniu panishanojuaaja. Cuaara panitiaara tama na cuaqueyajaaja puetunu juucajanaa, cua tojijia na quiniuria seetanujanaa. ²⁴ Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyanohua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. ²⁵ Pueyano jaara puetunu nio jiya casamijianaa jiiitiana quiri, cuno maara najuhuaana quiri, nojuaja jaara na shaajesacari jatasaae mani quiquiojinia Pueyasooju.

²⁶ Cante cua seera caririquiya mijiria quiniaa pueya niquiara sequenurani, janiyari nojori jiyaniijiani, naajuhuj janiyari nojori seera caririquiniutianiyani cua tiuquishacariuhua Jiyaniijia cua quiniuria. Janiyari shanohua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhuaj. Naajuhuj, cante cua rupaa pohuatanu caririquiya sesa miijiaca pueya niquiarani, janiyari nojori seera caririquiniutianiyajuhuj.

²⁷ Seetanujanaa nia sequeyanjia, noojiaqueya niajanijinijinoori maja nia cusuunu quiniutianiya juhuanojuaja, niaa cuaara niquirijiaatijia Pueyaso cumaaca tiuquiyano cucua, na muerasu jiiitariquianoni.

Jesu jatasacari shacantuucara
(Mt 17.1-8; Mr 9.2-8)

²⁸ Naa Jesu sequenu nuhuajitij, ocho juuca nuhuaji, nojuajaari tuhananuucua tacaquiaari na Que Pueyaso na seconura. Nata quiaareeri Pedro, Santiago, Juannio. ²⁹ Jesu secojosacari Pueyaso, na jiquiocoori tamaatiara jataquiaari. Na toqueeri jiyanohua cohuajara jataquiaarijuhuaj, shacantuquera. ³⁰ Jiyacaritij, caapiqui pueyari nocua muestaquiaari. Jesuta pocoojoriquiaari. Nojoriiri quiriquiaa supuetana Moisés, supuetana Elíasnio. ³¹ Nojori nujuatasaquiiri shacantuuca quiriquiaa puetunu nojori shocujanaa. Nojoriiri pocoojoriquiaa taa Jesu mosaanutaniya Jerusalén tiacajiniani. ³² Jiyacaritij, Pedroori jiyanohua maquenuujuriquiaa, nata quiniaajuhuj. Naajaa, majaari

nojori maquenu quiriquiaa. Naacuaajitij, nojoriiri Jesu shacantuuca niqiquiaari. Cuno caapiqui supuetanaa niqitiurijiaariuhuj, Jesuta pocoojiyano. ³³ Cuno caapiqui pueya quiojonu panishacariuhua Jesu shuriucuaaji, Pedroori Jesu sequeree najuhuanaj:

—¡Niishitiojonanaa, canaa namitia niya quiyani! ¡Canaa suhuororeera jiuujianaraca suhuorotucua; quiara, Moisésra, Elíasranio!

Pedroori naa najuhuaana pocuariquiaa. Majaari na niishiniu quiquiaari casaa na sequeriquiaani. ³⁴ Pedro pocuasacarijia, cohuaja najacaari nojori mishiquiomaa. Nojoriiri puereturiquiaa cohuaja najacajinia nojori quishacari. ³⁵ Na nuhuaji, nojoriiri Pueyaso tojirii pocuaano cuno cohuaja najacajiniji. Naa sequereeri:

—¡Nioori cua Niyanu, cua saquiriojosano nia Jiyaniijia na quiniuria! ¡Nojuaja nia tojitiare!

³⁶ Naa nojori tojinu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niqitiariquiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samitiaquiaariuhuaajaatijaj.

Caya samijajiniji Jesu tohuatesacari samaru
(Mt 17.14-21; Mr 9.14-29)

³⁷ Tariqui, nojori jaara rosetaquiaariuhua tuhuananujiniji, queraatia pueyari Jesuucua nijioquiaari. ³⁸ Cuno pueya tajiniji, tamonu pueyanoori naa nacaquiaari:

—¡Niishitiojonanaa, cucua quia taraajere quenaaja! ¡Cua niyanuniyojua quia niquiri! ¡Jiyaniojuanaari quiyanuniyojua! ³⁹ ¡Samaruuri na miiquiaa taraatia! ¡Na sariyotequiaari! ¡Na taquiriocuatequiaaariuhuj! ¡Na rupaamajiri cushaaquiaa! ¡Na cuaqueya miiquiaa moquitiuriuriaari! Majaari ritia na cartenu paniniu quiquiaa. ⁴⁰ Janiyari juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

⁴¹ Jesuuri sequeree:

—Pueyaso tojitiaashijiacanaa, niaaqui Pueyasocua tiuyashijiacajuhuanajaj. ¿Janiyateeri pueyaracaanu rejeretanutaniya niajaninyani? Miji quia niyanu quia jaatucure.

⁴² Caya samijia catecanosacari Jesuucua, samaruuri na pojotequee. Na taquiriocuatereeri. Jesuuri samaru sequeree na tohuatanura. Caya samijia naataniriiri. Na niqitiorohua na queeri. ⁴³ Puetunu pueyajanaari jiyanohua jiuujiateree nojori niquishacari Jesu miishano Pueyaso cumaacata.

Jesu pacutesacari pohuatanu nojuaja mosaanutaniya
(Mt 17.22-23; Mr 9.30-32)

Pueya jiuujiatesacarijia puetunu Jesu miishanojinijianaa, Jesuuri na pueya sequeree:

⁴⁴ —Maninia nia tojiri casaa cua sequenutaniya nianianiyani. Majaari na niyajetanu. Janiyari niquitiosaanutaniyani pueya miiniuria janiya taa nojori paniyacuajani.

⁴⁵ Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriria. Naacuajitij, majaari nojori naata niishiniu quiquiaari. Nojoriiri Jesu nequesotanu puereturiquiaajuhua, casaa nojori na pohuatasano sequenu paniriquiaani.

Cante jiyaniijiajanaa cutarani
(Mt 18.1-5; Mr 9.33-37)

⁴⁶ Jesu pueyari juhuacatecara juayonuutariquiaa teyano nojorijinijiniote jiyaniijiajanaa quiniutianiyani. ⁴⁷ Jesuuri nojori niishiriojosano niishirii. Naaratej, Jesuuri naatujua nujuateree na shuriucua. ⁴⁸ Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniuucua, nojuajaari cua rupueyajuahua. Cante cua rupueyani, cua Jiyarona rupueyajaariuhua. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuani, nojuajaari jiyaniijiajanaa quiniutianiya puetunu narta Pueyaso muerasujinijiojuanaa.

Cante maja pa paracani, nojuajaari pa jiyano
(Mr 9.38-40)

⁴⁹ Juanri Jesu sequeree:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Canaari na tenujurucuaani nojuaja quiyaquiniucua pajaniyajinijinio.

⁵⁰ Jesuuri na riucuaaree:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiyaquiya, nojuajaari pa jiyano?

Jesu nacasusacari Santiago, Juannio

⁵¹ Quera Jesu tacanu panishacari jiyocuacaanu, nojuajaari juhuacatecara Jerusalén tiacajiniara quiaaree, juhua jiuujiaaju na puereyaquiniutia. ⁵² Jerusalén tiacaacuara nuu cajiniocua Samaria jiyajinia Jesu quishacari na pueyata, noojiaqueya na pueyajinijinio puerateree tamonu tiacajinia nojori masenura tia nojoriicuaajiiri. Naacuajitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura. ⁵³ Cuno

Samaria pueya jaara niishiquiaari Jesuuri Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia. ⁵⁴ Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijianaa, ¿quiaate paniya canaa tininiuria mani jiy-ocuaaanuji, cuno pojori na catijianura, taa tariucuaaanu Pueyaso sequenu panishano caminiujiunia Elías miiquiaar-icuaani?

⁵⁵ Jesuuri nojoriicua tacateree. Nojori nacasureeri naa nojori saniitionu panishacari cuno Samaria pueya. Naa nojori sequereeri:

—Majaari nia niishiniu cana sohuanute naa nia niishirio-joteyani. Nia niishiri, majaari cua niniu quiquiaari mijiria cua puecoonura pueya. Saaja niquiaari cutaranijia, puey-acuaji cua tacunura.

⁵⁶ Na nuhuaji, nojoriiri tamonu shiitianiyojua tiacajinia quiojyaree tii maquenura.

Tamasaca pueya quiniu panishacari Jesu pueyara juucua (Mt 8.19-22)

⁵⁷ Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu paniyanijia. Janiy-acua quia tarajareni puetunu tiqiyocua quia rucuanes-josacarijianaa.

⁵⁸ Jesuuri na riucuarree:

—Quioojuapueeri na raaca jiitiaa cutara. Shuhuari na jesuhua jiitiaajuhuj. ¿Saniniuuujia Pueyaso Niyanuurijjataj? Majaari cua jiitianu tama cua maquejarajaaja.

⁵⁹ Jesuuri tamonu pueyano sequereee:

—Cua nuhuajiniara quia quiri.

Nojuajaari saa sequereeeja:

—Cuaara Jiyaniijianaa. Cua que cuaara cua niqiiara shaa-jeerajaara. Janiya jaara na jamoreni, janiyacua na nuhuaji quiata rucuanejore cutarani.

⁶⁰ Jesuuri na riucuarree:

—Naajaa, quia tarinitiare. Cua tojitiaashijiacaari juhua macunucua. Naaratej, cuno macunucua cuaara jamoora tama narta macujuaaja. Quia rucuanejore cutara Pueyaso rupaa quia pohuatanura.

⁶¹ Na nuhuaji, tamonu pueyanoori Jesu sequereee:

—Jiyaniijianaa, janiya cutara quiata quianu paniyani. Co-teenu cua tiajinia quiquiooraj, cua pueya cua niqiniuria cua nuhuajiria.

⁶² Jesuuri miriqui na riucuarree:

—Pueyano jaara na juyaca poonitijiya, jiya jiacataja na jayotanura na cuhuariquia na jeenucuanura, maja cumaati na nijiniara na niquniu. Na camaru jaara na nijiniara niquri, sesa naaniutianiyari shuyorocotiuyocuara. Naajuhuj, cua pueyano jaara na quiqiojinia tacatenu panijiohua quiri, nojuajaari maja maninia Pueyasora poonijiona.

10

Jesu jiyaramiquishacari setenta y dos na pueyajinijinio, Pueyaso rupaa nojori pohuatanura

¹ Nio nuhuaji, Jesuuri socua setenta y dos pueya saquiri-
ojoquiaari, nojori puetanura nojuaja, puetunu Israel pueya
tiacajiniajanaa Pueyaso rupaa nojori pohuatanura. Jesu-
uri nojori nuhuaji tii quianu paniriquiaajuhuj. Puetunu
nojorijianaa jiyaramiquiriiri caapiqui, caapiqui. ² Nojori
nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua
senoosocoriquiano. Saniniuujia, secaja na senoonaari quiya.
Cunora, cuhuariquia camaru nia secojore, socua senoona
na jiyaramiquiniuria puetunujuanaa na senoosaanura. ³ Nia
quiojiyare pueyanaa. Nia niishiri, janiyari nia jiyaramiquiya
juhua borrego niqiohuani puereeta sareya tajinia. Pueyaso
paraari juhua puereeta sareya. ⁴ Nia quiojosacari, majaari
nia caashoque nia patanu, nia cumaneeca quiqiojuhuaj,
nia sapatunio. Majaari nucuaco nia tarishiniu pueya nia
saruhuatasacari. ⁵ Tamonu tiajinia nia tiuquishacari,
coteenu nia saruhatate na camaru nio sequesano:
“Juhujaniya nia quiri, nio tiajinia quiniaanaa”. ⁶ Cuno
tiajinia quiniaa pueya jaara jyanoojiaca quiri, naa nia
sequesacaritij, Pueyasoori nojori miiniutianiya maninia.
Nojori jaara juaajiaca quiri saniniuujia, Pueyasoori nojori
shuquiritiyaquiniutianiya. ⁷ Tee nia masesaareni, cuno
tiajinia nia jiyojere. Nia miaquere, nia rature nojori
niquitiosano niajaniya. Nia pohuatanuucua Pueyaso
rupaa nojori niqiuara, niajaniya cuara niquitiosaaria nia
panishano. Majaari tamasaca tiajinia nia pacunujunu tii
nia miaquenura. ⁸ Nia tiuquijiosacari tamonu tiacajinia,
pueyano jaara nia masuure na tiajinia nia quiniuria, niocua
niaara nojori rupojosano miaquere. Majaari na soonu.
⁹ Cusosuhua nia naatanijiore cuno tiacajinia. Pueya niqiuara
nia sequere: “Pueyasoori quiaritia nia jiyatenu paniya
na muerasu nia quiniuria”. ¹⁰ Nia tiuquishacari tamonu
tiacajinia, pueya jaara tii nia tojiniu paniyaquiri, niocua
cuno tiaca nuucujinia naa nacare pueya niqiuara: ¹¹ “Nia
tiacajinijinio jaaquiani, canaari canaa niohuacaacuaji na

majiriuutiaani. Cunoori nia niishiniuria, Pueyaso jaara nia saniitiore, majaari canaacua na tiuutiasaanu quiniutianiya. Pueyasocuaajaari nia jiyanoonu paniriquiaa juucua, na muerasu nia quiniuria". ¹² Seetanujuanaa nia sequeyanijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanoohua saniitiosaanutaniya Sodoma tiacajinia quiniaa pueyajiniji.

*Jesu piriyojosacari Pueyaso tojitiaashijiaca pueya
(Mt 11.20-24)*

¹³ ¡Corazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. ¡Niaari jiyanoohua saniitiosaanutaniya! ¡Niaari socua Pueyaso tojiyashijiaca quiya cuno tariucuacaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niquiquiaari, taa cua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuquiaari, nojori taraajesacari sesa nojori miiniuucua. Naajuhua, nojori maara juaca niojoquiaari nojori nacaacua quera nojori macaashacari, sesa miijiaca nojori quiniuucua. ¹⁴ Niaa cutaraari cua cumaacata cua miijosano niquijiaca. Naajaa, majaari nioojia nia tacatonu quiquianu Pueyasocua. Naaratej, Pueyaso saniitionu juucajinia, ¡niaari socua jiyanoohua saniitiosaanutaniya Tiro tiaca pueyajiniji, Sidón tiaca pueyajinijinio! ¹⁵ Niajanijarijataj, Capernaum tiacajinia quiniaa pueyanaa, ¿niaateeri jiyaniya niaari jiyocuacaanu quiniaara jiyatesaanutaniya? ¡Maja! ¡Niaari puequeetuaju raama quejoosaanutaniya saniya!

¹⁶ Cua pueyanaa, cante nia tojitiajacani, nojoriiri cua tojitiajacajuhua. Naajuhua, cante nia ruuretaa cua rupaa nia pohuatasacari, nojoriiri cua ruuretaajuhua. Cante cua ruuretaani, nojoriiri cua Jiyarona ruuretaajuhua.

Jesu jiyaramiquishano setenta y dos pueya tiuquijiosacariuhua nocua

¹⁷ Jesu jiyaramiquishano setenta y dos pueyari Jesuucua tiuquijioquiaariuhua. Nojoriiri jiyanoohua shuquiriaatia quiriquiaa. Jesu sequetureeri:

—¡Jiyaniijianaa, samaruhuari canaa tojitiacanuni canaa tohuatanijiosacari nojori, canaa jiyaniquishacari quia sesa!

¹⁸ Jesuuri nojori sequeree:

—Taaquiririnij. Janiyari Sesaaca niquiquianuni juhua niaco tiyano jiyocuacaanuji. ¹⁹ Janiyacuajaari cua cumaaca nia niquitocanuni, juhujaniya nia rucuanenura sacocua caco, turucuaniniu caconio. Cua cumaacata, niaari puetunu

Sesaaca cumaacajanaa shocotanutaniya, juhuajaniya panaatia nia rucuanenonura, cua rupaa nia pohuatanura. Majaari quenaaja tamonu casaa miiniu quiniutianiya naquiya niajaniya. ²⁰ Naajaa, majaari saaja shuquiriaatia nia quiniu samaruhua tojitianuucua niajaniya. Shuquiriaatia nia quicutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

Jesu shuquirishacari

(Mt 11.25-27; 13.16-17)

²¹ Jiyacaritij, Pueyaso Sohuanuuri Jesu shuquiritirii jiyanoehua. Cunora, Jesuuri na Que Pueyaso sequeree:

—¡Quia shuquiritiaanijia cua Quenaa! ¡Quiaacuajaari Jiyaniijiajanaa quiya jiyocuacaanu, mijiriano! ¡Quiaari maninia miirii! Cua pueyari juhua naatujoori, maja puera niishijia. Naajaa, quiaari quarijia nojori niishitirii quia niishishano, quia jamosano mijiria niishijiaacuaji. Jaa, cua Quenaa, quiaacuajaari naa nojori panitiaja.

²² Cua Queeri tari cua niqutioquiaari puetunu na jiitasanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Niyanuni, saaja cua Que cutaraari cua niishiya. Naajuhua, majaari tamonu niishiniu cutara cante cua Queni. Saaja janiya cutaraari na niishiyani. Naajuhua, noo pueyari na niishiya, canapue cua niishitiniu paniya cua Quecuajani.

²³ Na nuhuaji, Jesuuri na pueyacuatacatere. Saaja nojori sequereeri:

—Shuquiriaatia quiijia cutaraari niajaniya, nia niqiniuucua puetunu nia niquishanojuanaa nia rupuenuucua janiya. ²⁴ Seetanujuanaa nia sequenianijia, queraatia tariucuacaanu Pueyaso sequesano caminiujiunaa pueya, mariyata jiyaca jiyaniijianucuanio, nojoriiri nia niquishano niqiniuucua jiaatiaquiaari juucua. Majaari na niqitiuniu quiquiaari. Nojoriiri cuata nia quishacari nia tojishano tojitianuucua jiaatiaquiaari juucujuhua. Majaari na tojitiuniu quiquiaari.

Samaria jiyajinijinio maninia miijiajiniji pohuatasano

²⁵ Na nuhuaji, Moisés Rootasanojiniji niishitiojona pueyanoori Jesuucua niqiaari nata na pocoonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

²⁶ Jesuuri na riucaaree:

—¿Taate Moisés Rootasanojinia naajiotasanoni? ¿Taa quia niishiriojoquiaani, quiaa jaara na serojoquiaa?

²⁷ Moisés Rootasanojiniji niishitiojonaari Jesu riucaaree:

—Naa sequeyano:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia cumaacatajanaa, puetunu quia niishitiajatajanaanio. Naajuhuaaj, quiarta pueyano quia paniri taa quia paniyacuaa tama quia cuaqueyajaajani”.

²⁸ Jesuuri na sequeree:

—Quiaacuajaari maninia riucuarree. Naa quia miishacari-tij, quiaari pueyaracaanu rishijia quiniutianiya.

²⁹ Moisés Rootasanojiniji niishitiojonaari tama nocuaji tacunu paniriquiaajaaja, maninia quijia na quiniuria Pueyaso niquiara. Naaratej, naa nequesotarohua Jesuuri:

—¿Canteeri cuarta pueyanoni?

³⁰ Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajiniji. Nohuasenuujuaca pueyari na quiaree. Puetunu na jiiitasanojuanaa na jaariuutiatureeri, na cushishano toquenio. Na piquitiuriiri. Quera macu na tujiatuqueeri. ³¹ Na nuhuaji, pueyacuara secojonaari cuno nucuaco quiariquiaajaacuhuaaj. Na niquishacari piquishano narta Judio pueyano mataano nuu shuriuquiocora, na shocortamaa saajaari. ³² Na nuhuaji, Levita pueyanoori cuno nucuaco quiariquiaajuhuaaj. Na niquishacari narta Judio piquishano pueyano, nojuajaari saaja na shocortamaajuhuaaj. ³³ Na nuhuaji, Samaria jiyajinijinio tahueri cuno nucuaco quiariquiaajuhuaaj. Na niquishacari parta Judio pueyano mataano, Samaria jiyajinijinio tahueri nocua taraajeree. ³⁴ Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijiniajaarijia. Ritia na jiyataaree rucoojuuaca tiuquiiijiojua tiajiniaraari. Cuniqúi na cojuatareeri. ³⁵ Tariquí, cuno tahue quianu panishacariuhua, nojuajaari caapiquí cumaneeca pueraree. Ruconaa tia camaru na niquitioreeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacua saniniuujia quia niquitiorohuanijia cua tacatesacariuhua”.

³⁶ Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca ruconaa pueyajinijini, ¿teyano cuno pojorijinijiniote narta pueyanocua taraajeja cutarani?

³⁷ Moisés Rootasanojiniji niishitiojona pueyanoori Jesu riucuarree:

—Cuno Samaria jiyajiniinio tahuecuajani, nocua taraaje-
quiaarini.

Jesuuri na sequeree:

—Taaquiriirini. Quia quiaarohua. Naa pueyacua taraajeja
quia quirijihuj, taa cuno tahue taraajequiaaricuaani.

Jesu quishacari Marta, María tiajinia

³⁸ Socua na rucuanesacari, Jesuuri tamonu tiacajinia
tiuquiquiaari na pueyata. Cuno tiacajinia na quishacari,
tamonu maajiiri na masuuquiaari. Naaratej, na tiajinia
na tiuquinitiareeri. Cuno maaji sesa quiquiaari Marta.
³⁹ Martaari tarajanu jiiitaja. Na sesaari quiquiaari María.
Maríari Jesu niohuaca shuriuquiumia cajiriquiaa, na tojini-
uria Jesu pohuatasano. ⁴⁰ Marta cutaraari poonijioriquiaa
queraatia na miishocoriquiano na jiiitiasacari. Cunora, Mar-
taari Jesuucua catecanoree. Na sequereeri:

—Jiyaniijianaa, ¿majate cucua quia taraajenu? Cua tara-
januuri cua tarinitiaquee niquiriyatujua, puetunu nio pooni-
jiosanotajanaa. ¡Quia sequere na naacutanura janiya!

⁴¹ Jesuuri saaja na sequeree:

—Martanaa, quioojia quia cajitiri sanaunaa. Quiaari puera
quia miishano tacaatiaa. ⁴² Saaja niquiriyatu casaa cutaraari
jiyanohua panishano. María cutaraari cuno socua panishano
casaa saquiriojoree. Tamonuuri maja na naata na tojishano
jaariutianu noojiajiniji.

11

Jesu niishitiojosacari na pueya nojori secojonura Pueyaso
(Mt 6.9-15; 7.7-11)

¹ Tamacari, Jesuuri Pueyaso secojoriquiaa tamaqui. Na
puecasacari secojonu, tamonu na pueyajiniinioori na se-
queree:

—Jiyaniijianaa, canaa quia niishitiojore canaa secojonura
Pueyaso, taa Tiuquinijiona Juan niishitiojoquiaari na puey-
acuaani.

² Jesuuri nojori sequeree:

—Pueyaso nia secojosacari, naa nia sequere:

“Jiyocuacaanu quijia canaa Quenaa, puetunu pueyajanaa
cuaara niishiiria quiaari tojetaarucujanaa sesa
miyashijia. Pueya cuaara seetanujuanaa quia
jiyateera nojori jiyaniijia quia quiniuria. Quia
panishano cuaara miishiiria mijiria, taa jiyocuacaanu
miishiyacuaani. ³ Canaa quia niquitioriquia canaa
miaquesocoriquiano canaa panishano puetunu
juucajanaa. ⁴ Canaa quia jiyanoori sesa canaa
miishanojiniji, taa canaa jiyanooquiaacuaa sesa canaa

miiniaani. Naajuhuj, canaa quia cojuare, maja sesa canaa miitishaanura”.

⁵ Jesuuri naa sequereejuhuj, socua nojori na niishitiojonura:

—Niaa jaara nia rupuenaacua quiaare shiyaqueya, casaa nia masenura nojuajiniji, ¿nojuajatucua taa quia sequereni?, quiaa jaara na sequere: “Cua rupuenanaa, cua niqutiore jiuujanaraca pan. ⁶ Tamonu cua cojiniaari shusha tiuquiriohua tucuacaanuji, miaajeyari. Shaaquiri cua sumatuu cua miaquetesocoriquiano nojuaja”. ⁷ ¿Quiaatucua taa miirini quia rupuena jaara na tiajiniaacumaji quia riuquare?: “Maja cua taajetenu. Cua tia tiotiu tioree tarinijia. Tari cua mueya mataa maquetujinianijia. Maja cua naata sanenu cua niqutionura quia panishano”. ⁸ Jaara naa sequerefej, niaa jaara na tia tiotiu piquiniu tarinitiaaquiri, janiyari seetanujuanaa nia sequeyani, nojuajaari sanenutaniya na niqutionura nijaniya puetunu nia panishanojuanaa. Majaari na sanenu quiniutaniya saaja nia rupuena na quiniucua. Sanenutaniyari pueyaracaanu taajeta nia piquishacari na tia tiotiu. ⁹ Naajuhuj, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajeriquia. Niocua na riuriatare. Tiotiu nia piquiriquia. Niaara riataaanutaniyari. ¹⁰ Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riataaanutaniyari.

¹¹ ¿Niaatucua nia niyanu niqutiore saajia, neecaruu na masesacari nijaniya? Maja. ¿Niaatucua soconu niqutiore nia niyanu, sapitiaaja na masesacari nijaniya? Maja. ¹² ¿Niaatucua turucuaniniu niqutiore nia niyanu, caacaraja riuriuquiu na masesacari nijaniya? Maja. ¹³ Puetunu nijaniyajanaari sesa miiniu niishijaca. Naajaa, niaari maninia casaa niqutionu niishiya nia niquiohua. ¿Taatucuaa socua jiyocuaaanu Quijia nia Que Pueyasoni, tojetaarucujanaa sesa miyashijiani? Seetanujuanaa capora na quishacari, nojuacuajaari na Sohuanu niqutionu niishijia na muerasu, canapuete na masequiaacujani.

*Pueya sequesacari Jesu, samaru cumaacaracana
(Mt 12.22-30; Mr 3.20-27)*

¹⁴ Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jiiiasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri. ¹⁵ Tamasaca pueyari saa sequequiaarijia:

—Cuno pueyanoori samaruhua tohuatanijiya samaruhua jiyaniijia Satanás cumaacata.

¹⁶ Tamasaca pueyari Jesu saniniuujuniu paniriquiaa. Naaratej, nojoriiri na sequeturee na cumaacata na miiniuria casaa, na niquitiniuria nojori, nojori niishiniuria nojuajaari seetanujuanaa Pueyasojinijinio. ¹⁷ Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya jaara miaquetoojiya tama nojori pueyatajaaja, nojoriiri maja na naata na paraa nujuatanu, na paraa jaara nocua tiuquitiare raquiritano nojori quishacari. Naajuhuj, niquiriyatu tiajinia quiniaa jaara tama nojorijiaaja juayonuujutaquiaa, nojoriiri maja na naata jatiqiu quiniu. ¹⁸ Naajuhuj, niaari cua sequeriquiaa, janiyana samaruhua tohuatanijiya Satanás cumaacatani. Jaara naa quiritij, ¿Satanástucua taa pueyaracaanu quiri jiyaniijiani, nojuaja jaara tama na samaruhajaaja tohuatanijiya tama na cumaacatajaaja? ¹⁹ Naajuhuj, janiya jaara samaruhua tohuatanijiya Satanás cumaacatani, taa nia sequeyacuajani, ¿nia niishitiojosano pueyariuhuj, cana cumaacata nojori tohuatanijioquiaa samaruhuanu? ¿Taa nia sequeyani? ¿Satanás cumaacataate? Majaruhua. Naacujitij, tama nijaniyajaaja nia niishiri, niaari jiyajeneya. ²⁰ Naa Pueyaso cumaacata cua tohuatanijosacari samaruhatej, naacujiti nia niishiri, Pueyasoori tari nia masuya seetanujuanaa na muerasu nia quiniuria.

²¹ 'Niojinia nia niishiriojorejuhuaj: cumueeca pueyano jaara na tia cojuaa queraatia na miaquejotaja casaata, majaari tamonu naata na jiitiasano casami jaariuutianu. ²² Saniniuujia, socua cumueeca pueyano jaara nocua tiuquiri, na miaquejotaja casaa jaariuutiaari, cuno, nocua na tiuushano juucuanu. Na nuhuaji, na jaariuutiasano casami paari, na pueya na serotasocoriquiano. Naajuhuj, janiyari Satanás jiitiasano jaariuutiajani.

²³ Cante cua jiyano quiyaquiyani, nojuajaari cua paraca. Cante cua naacutaquiya pueya rerecojonura Pueyasorani, nojoriiri saaja pueya cocuataa Pueyasocujaji. Naaratej, jacaria nia niishiriojore casaa nia niishiriojiya janiyajinijini.

Samaruhuari riujiuujia na quiquiojiniohua
(Mt 12.43-45)

²⁴ 'Samaru jaara tohuatare pueyanojiniji, joojuashiquio rucuaneyiyari na samaatejara na pajenura. Jaara na riuriataaquiri, niishiriojiyari: “Cua quiquiojinia riujiuyarohuaraqiu teje cua tohuatacanucujani”. ²⁵ Samaru tiuquishacariuhua cuno pueyanocua, na riuriasuhuari shaaco, juhua maninia netoonujusano tia, maninia

jeenucuasanojuhuaj. ²⁶ Naaratej, cuno samaruuri socua sesa miijiaca nojuajiniji siete narta samaruhua riquiohua nata na quiniuria. Puetunu nojorijianaari cuno pueyanojinia tiuquitasuhua. Naacujitij, cuno pueyanoori socua sesara jiyacateja, tarijia na quiniujiniji.

Seetanujuanaa shuquiriaatia quiniu cutara

²⁷ Jesu pohuatasacari nio, tamonu maajiiri jiyacari pueya tajiniji naa nacaree:

—iShuquiriaatia quijia cutaraari cuno maaji cante quia raquiaarini, cante quia canashitiquiaarini!

²⁸ Jesuuri saaja na riucuaaree:

—Socua shuquiriaatia quijia saniya sajara cante Pueyaso rupaa tojjiani, cante Pueyaso panishano miiquiaajaaniuhuj.

Sesa pueyari saaja Pueyaso cumaacata miishano niqiniu panijiaca

(Mt 12.38-42; Mr 8.12)

²⁹ Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuataree nojori niqiuara:

—Nio pa quishacari pueyari sesa miijiaca. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosani. Seetanujuanaa majaari socua cua niqitiniu quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás miishaaquiaaricuaani.

³⁰ Jonás miishaanuuri nocuaji jiuujiatesano quiquiaari cutara. Naacujitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyajaaniuhuj, nio pa quishacari pueya niishiniuria janiyari Pueyaso Jiyarosani.

³¹ Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuucuaji jiyajinia jiyaniijia quiquiaari. Nojuajaari jiyanohua tucuacaanuji niqiuari narta jiyaniijia Salomón tojjiniucua, jiyanohua niishijia Salomón quishacari. Jiya puequesacari Pueyaso saniniujiushacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijiajanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. ³² Naajuhuj, cuno tariucuaaanu Nínive tiacajinia quiniaa pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonujunutaniyajuhuj, nojori

tacatoyaquiniuucua nojori jiuujia sesa nojori miishanojiniji, Pueyaso rupaa nojori tojiyaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujiunia Jonás jaara Pueyaso rupaa pohuataquiaari nojori niquiara. Pueyaso sequenu panishano caminiujiunia quiaríjia nia tajinia quiyani, nojuajaari socua cutara Jonásjiniji. Janiyacuajaari nojuajani.

Pueya jiuujia cuhuatanajiniji pohuatasano
(Mt 5.15; 6.22-23)

³³ Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuacaanu na morotanu, tiaco tiuquitianaa cuhuatariquiano. ³⁴ Pa namíjiaari juhua pa cuaqueya cuhuatanajuhua. Naacuajitij, paa jaara Pueyaso casaacua jiaatiaja quirini, paari cuhuashiqui quiya puetunujuanaani. Saniniuujia, pa namíjia jaara sesa casaa niquiniuucua jiaatiaja quiri, paari ninishiqui quiya puetunujuanaani. ³⁵ Tama nia cuaqueyajaaja nia cojuare, niaa mariqui nioojia cuhuatana maquishajareeri. ³⁶ Niaa jaara puetunujuanaa juhua cuhuashiqui quiya, sesa casaacua jiaatiaashíjia nia quishacari, niocua maninia niquíjiaara quiri puetunujuanaa, juhua samaritiu cuhuatasacari niajaniya. Naacuajitij, niocua niishíjia quiri, maninia míjia nia quiniuria.

*Jesu nacasusacari Fariseocuaca, Moisés Rootasanojiniji ni-
ishitiojonaanio*
(Mt 23.1-36; Mr 12.38-40; Lc 20.45-47)

³⁷ Jesu puecasacari pocuanu, tamonu Fariseo pueyanoori na masuuquiaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishíjianaari. ³⁸ Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuacaari jíyaníjia, nojori rucojosacari tamasaca pueya tajinia, tamasaca sesa miishanoori na naata nojoriicua pacunu. Nocuaji nojoriiri shuquitianu niishíjia, tiajinia nojori tiuquishacariuhua. ³⁹ Naa cuno Fariseo pueyano niishiriojosacaritij, Jesuuri saa na sequereejaa:

—Niajaniya Fariseocucanaa, niaari juhua noo pueya, canapuate saaja na ratujua cuaqueya jeequejoquiaacuajani, saaja na miacojua cuaqueyano. Majaari na jiniacuma na jeequenu. Niaari naajuhua. Niaari sapuenu maninia pueya niquishano. Saniniuujia nioojiacaari jíyanohua sesa quiya, casami nia masejonuucua nia nohuasejonuta, puetunu sesa

nia miiniutiajanaajuhua. ⁴⁰ Mosanucuaanaa, ¿niaateeri ni-
ishiyaquiya, pa cuaqueya Shipiniaari poojia shipiniquiaar-
ijihua? Naaratej, nioojia nia jeequere cutara, maja saaja
nia cuaqueya. ⁴¹ Niaa jaara puetunu nioojiajia nia jiiti-
asanojuanaa jiyatere Pueyasora na quiniuria, niaa maara
juhua jeequesano quiri puetunujuanaa.

⁴² ¡Niaari taraatia miishaariquiano, Fariseocuacanaa! Ni-
aari miaquesano jaamasucua serojoquiaa jacaria diez jaa-
masucua, puetunu cien jaamasucua jinijiojuanaa, Pueya-
sora nia niqutiosocoriquiano. Cuno jaamasucuaari cu-
lantro, menta, socua tamonu jaamasucuaniojuanio. Niaari
naa maninia miiquiaa taa Moisés niishitiojoquiaaricuajani.
Naajaa, Moisésri niishitiojoquiaarijihua maninia pa miini-
uria parta pueya, Pueyaso pa paniniuriajuhuaj. Majaari
cuno na sequesano nia miiniu quiquiaa. Puetunu na seque-
sanojuanaa tojjijaca nia quiri. Majaari saaja jaamasucua
niqutiojojuaca nia quiniu.

⁴³ ¡Niaari taraatia miishaariquiano, Fariseocuacanaa!
Niaari jiyaniijianucua shuriucua cajiniucua jiaatiaquiaa,
Pueyaso secojojua tiajia nia quishacari, juhua cutara
pueya nia quiniuria pueya niqiuara. Naajuhua, niaari
pueya paniquiaa nojori saruhuatanura nijaniya juhua
jiyaniijianucua, nia rucuanijosacari tiacajia.

⁴⁴ ¡Niaari taraatia miishaariquiano! Niaacuajaari juhua
niquishoo jamaca. Pueyari juhuajaniya na caco rucoquiaa
na niishiyaquishacari. Naajuhua, pueyari juhuajaniya nia
rupuequiaa, nojori niishiyaquishacari nioojiaari jiyano-
hua sesa, juhua pueyano mocua jamajia.

⁴⁵ Jiyacaritij, tamonu Moisés Rootasanojiniji niishitiojon-
aari Jesu sequeere:

—¡Niishitiojonanaa, naa quia sequesacari Fariseocuatej,
quiaari canaa sequeyajuhua!

⁴⁶ Jesuuri na riucuaere:

—Taaquiriirinj. ¡Niaari taraatia miishaariquianojuhuaj,
Moisés Rootasanojiniji niishitiojonaanaa! Puetunu nia
rootasanojuanaari juhua jiyano-hua niiquia casaa nitiaso-
coriquiano. Majaari nia tojtiajaca pueya nia naacunu
quiquiaa quenaaja nia juaashiquia sacasaruta, cuno niiquia
casaa nitiasaanura. Naacujitij, pueyari maja na naata re-
jeretanu nia niishitiojosano.

⁴⁷ ¡Niaari taraatia miishaariquiano! Niaari macunucua
niojotajara shipinijioquiaa shanohuara, tariucuaaanu
pueyara Pueyaso sequesano caminiujunaa nucuhuacujaj,
teyano nia supuetanaa puecoquiaaricuajani. ⁴⁸ Naacuajitij,

canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhua.

⁴⁹ Naacuajitij, Pueyasoori na niishiniutia sequequiaari:

“Janiyari cua sequenu panishano caminiujiuniaa jiyaramiquiniutianiya Israel pueyacuani, cua rupaa niishitiojonaanio. Israel pueyari noojiaqueya puecoonutianiya. Tamasacaari naquiya miishaanutaniyajuhuj”.

⁵⁰ Cunora, Pueyasoori nio pa quishacari pueya naminiutianiya puetunu na sequenu panishano caminiujiuniaa nanacaacuajanaa, canapute nio jiya coteejajiniji puecoosaaquiaaricuajani. ⁵¹ Coteenujanaa mosaaquiariiri Abel. Na nuhuaji, queraatia Pueyaso sequesano caminiujiuniaari puecoosaaquiaari. Na nuhuaji, Zacaríasri socua jaatesaaquiaari monujuhuj. Nia supuetanaari na moquiaari Pueyaso Secojoua tiajinia, Pueyaso Shuriucua Quiquio tacoji, Pueyasoocuara catijiasaqui shuriucua. Seetanujanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

⁵² ¡Niaari taraatia miishaariquiano, Moisés Rootasanojiniji niishitiojonaanaa! Niaari najuhuaana Pueyaso Rupaa jiitiaa. Majaari nia tojinu paniniu, Pueyaso jiyanooshano pueya nia quiniuria. Saniniuujia, tamasaca jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

⁵³ Jesu jaara nio sequequiaari, Moisés Rootasanojiniji niishitiojonaa, mariyata Fariseocuacaari jiyanohua juaaquioree. Jiyanohua nojori juaaquiiosacari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua. ⁵⁴ Nojoriiri nocuara tonujunu paniriquiaa juucua, jaara sesa quiri na sequesano.

12

Jesu niishitiojosano, maja sapuenu maninia pueyano niquishano pa quiniuria

¹ Jiyacaritij, jiyanohua jiyanohua queraatia pueyari Jesuucua rerejoree. Tama nojoriijaarijia rapijiotooriquiaa puera nojori rerequejosacari. Jiyacaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocuaca pan poreetajaacuaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniuujiniji. Nojoriiri sapuenu maninia miijiaca pueya niquishano tamasaca

niquiara. Saniniuujia, nojori jiuujiaari saa sesaja pueyara-caanu. ² Nia niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniyajuhuj. ³ Puetunu nia sequesanojuanaa ninishiquini, cuhuashiqui caminiujiushaanutaniyari. Naajuhuj, nia sasacojosano tama nia sohuacamarajaajani, cunoori jiyocuacaanu tia nijiniji nacatasaanutaniya puetunu pueya tojishocoriquianojuanaa.

Cante puereshiya cutarani
(Mt 10.26-31)

⁴ 'Cua rupuentaanaa, majaari nia puerenu canapueete nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani. ⁵ Seetanujuanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jata-nura niajaniya mani quiquiojiniani, na cusojuanu nuhuaji niajaniya. Saaja nojuaja nia puerere cutara.

⁶ 'Cinco shuhuari saaja caapiqui cumaneecaniyojuata masesano. Pueyara, cunoori najuhuanaj. Naajaa, majaari Pueyaso niyjetanu cuno shuhua jaara puecoosaare. Nojuajaari na niishiya cutara. ⁷ Naajuhuj, nia miesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanohua Pueyaso panishano cutara queraatia na cojuasano shuhujiniji.

Tamasaca niquiara pa sequere paari Jesucristo pueyani
(Mt 10.32-33; 12.32; 10.19-20)

⁸ 'Cua tojitiare. Cante tamasaca niquiara sequejani: "Janiya Jesucristo pueyanoni", naajuhuj, janiyari cua Que Pueyaso seya niquiara sequenutaniyani: "Nojuaja cua pueyano". ⁹ Cante saniniuujia tamasaca pueya niquiara seetaa janiyajinijini, cua pueyano na quishacarini, janiyari cua Que Pueyaso seya niquiara na tamacanutaniyajuhuj.

¹⁰ 'Cante cua sesacareeni, nojuaja na naata jiyanooshaanu. Saniniuujia, maja cutaraari na naata jiyanooshaanu cante Pueyaso Sohuanu sesacareeni.

¹¹ 'Cua muerasu nia quiniucua, niaari Pueyaso secojojua tiajinaqueya jiyatasaanutaniya, nequesoreenaa niquiara, mijiria jiyaniijianucua niquiaranio. Nojori nequesoreesacari niajaniya, majaari nia niishiriojonu taa nia riucuanutaniyanoj, casaa nia sequenutaniyajaaniuhuj. ¹² Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanutaniyani.

Puereetaari casamiriaca pa quishacari

13 Tamonu pueyanoori pueya tajiniji naa Jesu sequerquiaari:

—Niishitiojonanaa, cua tarajanu quia sequere na niqutionura janiya canaa shipininio jiiitasanojiniji, taa canaa shipininio sequequiaari canaacuajani, saminio na quishacarijia.

14 Jesuuri saaja na riucuaaree:

—Pueyanonaa, ¿janiyateeri pueya nequesoreenara jiyatesaaquiaarini, cua serotanura niajaniya nia shipininio casamini?

15 Jesuuri naa nojori sequequiaarijiuhuj:

—Jiyanohua nia cojuare tama nia cuaqueyajaaja, maja casamiicua jiaatiajaca nia quiniuria. Pa naata shuquiriaatia quiniu casamiiju. Queraatia casamiiri maja na naata seetanujuanaa shuquiriaatia quijiacara na jiyatenu pajaniya.

16 Na nuhuaji, Jesuuri pueya niishitioree nio miriqui pohu-
atasanota. Naa sequereeri:

—Tamonu pueyanoori quiquiaari, jiyanohua casamiriaca. Na cuhuariquiajinia na natoosanoori jiyanohua muetuquiaari. Naacuajitij, queraatia miaquesocoriquiano jiiitaquiaariiri na cuhuariquiajiniji na carojotasano. 17 Tama sequerejaarijia: “¿Taa cua miiniutianiyani? Cua tiajosano cua racatajara cua carojotasanoori puetunujuanaa tari mishaja quiya. ¿Tee cua racatanutaniya shusha cua carojotasanoorinitioj? 18 ¡Aj, niishiquiinijia! Coteenu cua tiajosano cua casamiicuaaji niyaroorohuaraquij. Janiyari socua puereetucocuaru tiajonutaniyani. Janiyari cuniqui mishinijionutaniya puetunu cua carojotasano cua cuhuariquiajinijiniojuanaani, puetunu cua jiiitasano casamijianaanio. 19 Na nuhuaji, janiyari tama cua cuaqueyajaaja sequenutaniyani: ‘Pueyanonaa, quiarijia cutara juhuajaniya quia quiri. Quiaari queraatia casamiriacacuaja, queraatia marijara. Quiaari queraatia quia miaquesocoriquiano jiiitaacuaja. Quiarijia cutara quia samaatere. Quia miaquere. Quia rature. Tama quia cuaqueyajaaja quia shuquiritiri’”. 20 Cuno niucuaaja, Pueyasoori na sequequiaari: “Moseecanaa, quiaari quiarijia macu juhuaquenutaniya. ¿Canteeri puetunu quia jamuesano casamijianaa jiiitanutaniya quia nuhuajini? ¿Canra na quiniutianiyarini?” 21 Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujuanaa casamijiuniucua Pueyasora.

*Pueyasoori na muerasu cojuaja maninia
(Mt 6.25-34)*

²² Na nuhuaji, Jesuuri na saquiriojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenutaniyani, casaa nia cushiniutaniyani. ²³ Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuj. Naajaariuhuj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuj. ²⁴ Riquiacujua nia niquiriquia. Majaari nojori natojonu. Majaari nojori carojotanu na racatasocoriquiano, na nuhuaji na miojosocoriquiano. Naajuhuj, majaari nojori jitianu na miojosano na racataja. Majaari tiaca nojori jitianu na carojotasano nojori racatajarajuhuj. Naajaa, Pueyasoori nojori miojotequiaa. Niaa cutaraari socua jiyanoehua Pueyaso panishano cuno riquiacuhujiniji. ²⁵ Naajuhuj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanoehua nia tacaaniutia? Maja nia naata. ²⁶ Naaratej, nia tacaaniu jaara najuhuaa quia socua shiitianiyojua nia rishiniuria, ¿niaatucua casaara tacaari tamonu casaacuani?

²⁷ 'Natau shuucuaca nia niquishurij, taa nojori coreque-taani. Majaari nojori poonijionu. Majaari na cusupuenunu-juhuj. Supuetana jiyaniijia Salomónri jiyanoehua shanoehua toqueyaraca quiquiaari. Cuno jiyanoehua shanoehua niqushano na cushishano toqueni, naajaa, majaari na shocotanu cuno natau shuucuaca. ²⁸ Pueyasoori cuno natau shuucuaca shipiniquiaari rupaquijia naa shanoehua niqushocoriquian-otej. Jaara sorere, tariqui catijiashiya saniniuurijia pan majeetetajara. Pueyaso jaara naa maniniushitiyacuaa shu-ucucatej, ¿majateeri na naata cushitiniu nijaniyajuhuj, jatarinitiaja Pueyasoocua tiuujiacanaa? ²⁹ Naaratej, nia sequeyanijia, maja nia tacaaniutia nia pajenu casaa nia mi-aquenutaniyani, casaa nia ratunutaniyani. ³⁰ Pueyaso ni-ishiyashijia pueyari pueyaracaanu na panishano casaacua tacaquiaa. Nijaniya cutaraari Queraca. Nojuacuajaari tari niishiya puetunu nia panishanojuanaa. ³¹ Naaratej, nia niishiriojore Pueyaso panishano nia miiniuria. Nojuajaari saniniuujia nia niqutionutaniya puetunu nia panishanojuanaa.

*Nia casami nia racatare Pueyaso shuriucua
(Mt 6.19-21)*

³² 'Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na

quiniuucua, jnia niqutionutaniya puetunu na jiitiasanojua-naari! ³³ Nia casami nia niqutiojore cumaneecara. Na nuhuaji, cuno cumaneeca nia niqutiojore nareja casamiiji-uniuucua pueya. Naa nia miishacaritij, niari jiyocuacaanu racataa nia jiitiasano. Tee Pueyaso racataa nareja nera nia niqutiosanocuajani, cuniqui, nia cumaneeca quiquioori maja na piquiniu. Niaari tii nia racatasano jiitianutaniya pueyaracaanu. Majaari nohuasejojua na naata nocua tiuquiniu na nohuasenura. Naajuhuj, surequeyari maja na naata miaquenu nia casami tii. ³⁴ Nia casami jaara naa racatasano quiya jiyocuacaanu Pueyaso shuriucuatej, niari saaja Pueyasocua niishiriojonutaniya, tee nia casami racatasano quiyacuaani.

Jeenucasano nia quiri nia Jiyaniijiaacuaji

³⁵ 'Juhuata jeenucasano nia quiri pueyaracaanu, nia sashishacari nia Jiyaniijia, taa tiajiniaaco maninia seyacuaani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshitishanojuhuaj. ³⁶ Naa jeenucasano nia quirijiuhuj, juhua cuno seyaja. Nojoriiri na jiyaniijia sashiya na caminiujiniji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. ³⁷ Shuquiriaatia quijiaca cutaraari cuno seya, canapuate na jiyaniijiaacuaji suteyajaani, na jiyaniijia cuaara tiuquiriohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocuanutaniyari na mianuutenura nojori. ³⁸ Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutianiyari cuno seya, nojori jaara suteyajaa tia tohuateya riatariquiano nojori jiyaniijiaacuaji. ³⁹ Nio nia niishirijiuhuj, tia camaru jaara niishiri taacari nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami na nohuasenura. ⁴⁰ Naajuhuj, jeenucasano nia quiri pueyanaa, juhua cuno sutejaca seyaja. Niaa jaara jiyaniya juhuanujuaja maja cua tiuquiniu quiniutianiuhua, janiyari jiyacari nia jiyajenetenutaniyani.

Jesu pohuatasano maninia serujiniji, sesa serujinijinio (Mt 24.45-51)

⁴¹ Jiyacaritij, Pedroori Jesu nequesotaree:

—Jiyaniijianaa, ¿quiaate nio pohuataree saa canaaraja, puetunu pueyarajanaa soj?

⁴² Jiyaniijiaari na riucuaaree:

—Tamonu seru jaara maninia seru quiri, nocua tiuushano, niishijajuhuaaj, na jiyaniijjaari cuno na seru jiyatenutaniya narta seya jiiitariquiano na niti na niyacari. Nojori jiyaniijja niyacari, cuno seeratasano seruuri narta seya mianuutenu-taniya maninia, taa nojori jiyaniijjajanaa mianuutequiaa nojoricuaani. ⁴³ Cuno seruuri shuquiriaatia quiniutianiya na jiyaniijja jaara na riuriatasuhua naa maninia miyanojua, taa na sequesaaquiaari na miiniuriacuajani. ⁴⁴ Seetanujuanaa nia sequeyanijja, na jiyaniijjaari cuno maninia seru jiyatenu-taniya puetunu na jii-tiasano casamijianaa cojuana na quini-uria. ⁴⁵ Saniniuujia, cuno seru jaara sesa miiniuria niishiri-ojore, na jiyaniishacari na jiyaniijjaari jiyanojua tarishiniu-tianiya, nojuajaari niishiriojonutaniya nojuaja na naata mi-niu na panishano. Cunora, nojuajaari narta seya majoonu coteenutaniya, seya maajipohuanio. Naajuhuaaj nojuajaari saaja miaquejonutaniya. Pueyaracaanu rarujunutaniyari. Mashaasequejonutaniyajaariuhuaaj. ⁴⁶ Na jiyaniishacari na jiyaniijja juhuanajuaja maja na tiuquiniu quiniutianiuhua, jiyacaritij, cuno juucaja, na jiyaniijjaari tiuquiniutianiuhua canashiyaquiji. Naa cuno seru miiniuucua sesatej, na jiyani-ijjaari jiyanojua na saniitionutaniya. Na jatanutaniyari Pueyaso tojiyashijaca pueyata na saniitiosocoriquiano.

⁴⁷ Tamonu jiyaniijja jaara na seru rootare maninia, taa nojuaja miiniutianiyanii, cuno seru jaara jeenucuaaquiri na jiyaniijjaacuaji, mariyata jaara miyaquiri taa na jiyaniijja se-quequiaari na nuhuajiriacuajani, nojuajaari jiyanojua ma-jacusaanutaniya cutara. ⁴⁸ Saniniuujia, tamonu seru jaara sesa miiri na niishiyaquiniuucua na jiyaniijja panishano na miiniuria, nojuajaari saaja secaja majacusaanutaniya. Naa-juhuaaj, cante queraatia niquitiosaareeni, cuno serujiniijiri queraatia masenu panishaanutaniya. Naajuhuaaj, cante jiy-atesaaree queraatia jii-tiana na quiniuriani, na jiyaniijjaari nocua tiuuniutianiya socua jiyanojua maninia miijja na quiniuria.

Jesuucua tiuujjacaari narta pueya panishoo

(Mt 10.34-36)

⁴⁹ Mijiria niqiaarinijja, juhua mani cua noshitiniuria pueya tajinia. ¡Seetanujuanaa na noshitiriquia tarinij! Cua rupaari juhua mani quiniutianiya. ⁵⁰ Coteenu, janiyari jiyanojua saniniuujishaanutaniya juhua manitiani. Nocuaji coojiaari tacaya janiya jaara naa miishaarejaatijja. Seetanu-juanaa na jiyateri-quia tariucua tucuateenonij. ⁵¹ ¿Niaateeri jiyaniya janiyari niqiaarini mijiria quiniaa quiniuria juhua-janiya? ¡Maja! Seetanujuanaa nia sequeyanijja, jani-yari niqiaarini pueya cua raquiriojotanura. ⁵² Naaratej,

pueyari quiarijia juayonuutanu coteenutaniya. Pueyano jaara necocuata jiitiare jiuujianaraca niquiohua na tiajinia, jiuujianaraca nojorijinijinio jaara cucua tiuuri, cuno caapiqui cucua tiuyashijacaari saniniuujia nojori juaajiacu quiniutianiya. Naa noojiaqueya pueyajinijinio tiuuniucua cucuatej, queraatia pueyari naa tama tacarese-tanutaniyajaacujua. Naacuajitij, tamonu tiajinia, quera-jaa pueyari caapiquiriyatu cucua tiuujia juaajiacu quiniutianiya. ⁵³ Pueyari necohua paracaajia quiniutianiya, necohua tiuushacari cucua. Naajuhuj, necohuari na que paracaajia quiniutianiya na que tiuushacari cucua. Naajuhuj, maajipohuari necojori paracaajia quiniutianiya necojori tiuushacari cucua. Naajuhuj, necojoriiri na nucua paracaajia quiniutianiya na nucua tiuushacari cucua. Naajuhuj, maajipohuari necohua niquiocohua paracaajia quiniutianiya, necohua niquiocohua quiniucua cucua tiuujia. Naajuhuj, pueya niquiocohuari na quinia paracaajia quiniutianiyajuhuj, cucua tiuujia na quinia quiniucua.

Pueya cuaara niishiiria quiarijia Pueyaso miishanojiniji, casaa na niishitiniu paniyani

(Mt 16.1-4; Mr 8.11-13)

⁵⁴ Jesuuri naa sequequiaari pueyajuhuj:

—Niaa jaara niquitioocua niquiquiaa pananu tiuquishocora, niaari sequequiaa: “Maruqui niniutianiya”. Seetanujanaa naa quiquiaari. ⁵⁵ Naajuhuj, paratu jaara piyarojoquiaa pananu shuucuaji, niaari sequequiaa: “Tacarejonuqui quiniutianiya”. Naa quiquiaari.

⁵⁶ Pueyanaa, ¿niaateeri seetanujanaa niishijia? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuujia, nia niquishacari quiarijia Pueyaso miishano nia niquiara, majaari cuno nia niishiniu, casaa na sequenu paniyani. Naaratej, majaari seetanujanaa niishijia niajaniya.

Niaacuara tonujunata nia jecatooore

(Mt 5.25-26)

⁵⁷ Niaacuajaari niishiya, sesa miijiacaari saniitosaanutaniya. Naaratej, tama niajanijajaaja nia niishirojore, casaate maninia nia miiniuriani. ⁵⁸ Tamonu pueyano jaara quiocuara tonujure quia sesonuucua na casaa, quia saniri juhuata nata pocojonu maninia, na jaatucusacari quiajanija nequesoreena pueyanoocua. Quia sequerenoj casaa quia miiniutianiya nerani, na jiyanooniuria quiajanija. Quiaa jaara jecatoyaquiri nata, nojuajaari quiocuara saquiriojotanutaniya nequesoreena pueyano. Jaara quiocuara saquiriojotare nequesoreena pueyano,

nequesoreenaari saniniuujia quia niquitionutaniya na pueya, quia nujuatesaanura nujuatejojuajinia. ⁵⁹ Seetanujuanaa nia sequeyanijia, majaari nia tohuatanu quiniutianiya nujuatejojuajiniji, niaa jaara puetunu nequesoreena sequesano cumaneecajanaa niquitiorejaatijia niaacuara tonujuna pueyano.

13

Nioojia nia tacatore sesa nia quiniujiniji

¹ Jiyacari, tamasaca pueyari Jesuucua tiuquiiioquiaari. Cuno pueyari naa Jesu pohuataquiaari:

—¡Jiyaniijia Pilatoori Galilea jiyajinijinio pueya puecooru-cuaa! ¡Na nuhuaji, nojori nanaca cojitiriiri Pueyasooacara nojori puecoosano seya nanacata!

² Jesuuri nojori sequeree:

—¿Niaateeri jiyaniya cuno Galilea pueyari naa miishaaru-cuaa socua jiyanoehua sesa miijiaca nojori quiniuucua narta Galilea pueyajiniji? ³ Seetanujuanaa nia sequeya cutaranijia, nojoriiri maja socua sesa miijiaca quiquianu nijaniyajiniji. Nijaniyajuhuj, niaa jaara tama nioojiajaaja tacatoyaquiri sesa nia miiniujiniji, niaari taraatia puecoosaariquiano-juhuaj. ⁴ ¿Cuno dieciocho pueyarihuaj, canapuede cusonucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaca quiquianu narta Jerusalén tiacajinia quiniaa pueyajiniji? ⁵ Seetanujuanaa nia sequeyanijia, nojoriiri maja socua sesa miijiaca quiquianu nijaniyajiniji. Janiyari quiarijia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuj.

Miriqui Jesu niishitiojosano muetuhuo naanajiniji

⁶ Jesuuri na nuhuaji pueya niishitiojoquiaari nio miriqui pohuatasanota:

—Tamonu pueyanoori higo naana jiitiaquiaari na uva cuhuariquiajinia. Tamacari, na camaruuri nocua quiaquiaari na niquiniuria. Na jajau mianu paniriquiaa juucuaari. Shaanoori quiriquiaa. ⁷ Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhuana niquiaani na jajau pajenura. Pueyaracaanu muetuyaquiyari. Tari na shocojorucuaari jiuujianaraca marijia. ¡Quia nure! Tamonu cuaara na nujuasaqui natasaaria, na muetunura cutara”.

⁸ Cuhuariquia cojuanaari na riucuaaree: “Jiyaniijianaa, quia tarinitiarejaara tamonu marijara. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutianiyani. ⁹ Janiya jaara naa

na miirini, muetunutaniya naasucua. Jaara muetuyaquiri, pocua socua na nureni”. Naajuhuj pueyanaa, Pueyasoori sashiya, maninia miijiaca nia quiniuria.

Jesu jeecasacari porocuatucua samaatenu juuca

¹⁰ Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojua tiajinia. ¹¹ Tamonu maaji cusosuuri tii quiriquiaajuhuj. Dieciocho mariijaari na shoconujuquiaari porocuatu na quishacari. Samaruuri naa na jiyatequiaari. Majaari quenaaja na naata maninia nujuanu quijia. ¹² Jesu jaara na niquiquiaari, na sequereeri:

—¡Maajiniaa miji! ¡Quia nijiniacuaja tari jeequerohua!

¹³ Jesuuri na juaashiquia niaree maajiicua. Jiyacar-itij, maajiiri maninia jeequequee. Nojuajaari Pueyaso maniniuhuaqueetanu coteeree naa na miishaanuucuatej. ¹⁴ Pueyaso secojojua tiajinia jiyaniiijaari juarii naa Jesu miiniucua samaatenu juuca. Naaratej, tii quiniaa pueya sequeree Jesu niquiaraari:

—¡Seis juucacuajaari quiya puetunu semaanajiniajanaa pa poonijionura! ¡Niocua cuno juuca nijioriquia nia naatanijiosaanura, maja samaatenu juuca!

¹⁵ Jiyaniiija Jesuuri sequeree:

—¡Sapueno juhua maninia miijiaca niquishano pueyanaa, puetunu niajanijajanaari nia juunu, nia burro samaacartaquiaa samaatenu juuca, nia jaatucusocoriquiano mohuaca na raatenura! ¹⁶ ¿Nio maajiirihuj? Nojuaja cutaraari supuetana Abraham niquiohuacuajinio supueno. ¿Majateeri maniniajuhua samaatenu juuca pa samaacatanura Satanás morojosano? Dieciocho mariijaari tari nio maaji shoconujurucuaa pueyaracaanu porocuatu na quishacari.

¹⁷ Naa Jesu sequesacaritij, puetunu na paraajanaari caririquituri. Saniniuujia, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

Miriqui Jesu pahuatasano mostaza jajaujini

(Mt 13.31-32; Mr 4.30-32)

¹⁸ Jesuuri sequequiaari:

—¿Taate cua naata niishitiojonu niajanijani, nia niishinuria taa Pueyaso poonijia pueya jiuujiajinia na rupaatani? ¹⁹ Na rupaari juhua mostaza jajauniyojua, pueyano natasano na cuhuariquiajinia. Cuno jajau jaara moritiare, puereetucara caneyari. Naacuajitij, shuhuari na cashacucuaacua jesuya. Naajuhuj, Pueyaso rupaari caneya pueya jiuujia-cajinia puetunu nio jiyajiniajanaa maninia miijiaca nojori quiniuria.

Miriqui Jesu pohuatasano pan poreetajajiniji
(Mt 13.33)

²⁰ Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijiya mijiria na rupaatani? ²¹ Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca shiitianiyojua tohuatashijinia. Pan poreetajaari puetunu cuno cashojua miniquiootasanojuanaa poreeteja. Pueyaso rupaari naa poonijiojuajuhua.

Juhua shiitianiyojua tohuateyari quiya Pueyasoocua pa quianura
(Mt 7.13-14, 21-23)

²² Jesuuri Jerusalén tiacajiniara quiariquiaa na pueyata. Nucuaco na quiasacari, pueya niishitiojoriquiaa tiacajinaari, shiitianiyojua tiacajinianio. ²³ Jiyacaritij, tamonu pueyanoori na nequesotaree:

—Jiyaniijianaa, ¿saaja quenaaraqui pueyateeri Pueyaso pueyara jiyatesaanutaniya?

Jesuuri nojori riucuaaree miriqui:

²⁴ —Jiyanhua nia saniniujiuri shiitianiyojua tohuateyaco nia tiuquiniuria, Pueyaso nia rupuenura. Juhucarijia nia numooteyanijia, queraatia pueyari nocua tiuquitianu paniniutianiya juucua. Majaari nojori naata quiniutianiya saaja. ²⁵ Cua tojitiare. Tia camaru jaara sanere, tohuateya tionutaniyari. Niajaniya, cante na tia carijiniacuma quiyajaani, niaari tohuateya piquiniuuniutianiya najuhuanaj. Niaa jaara naa nacare: “¡Jiyaniijianaa, canaacuaji quia ritare tohuateya!”, nojuajaari nia riucuanutaniya: “Maja cua niishiniu tejenote niajaniyani”. ²⁶ Jiyacaritij, niaari juhucatecara sequenutaniya: “¿Majateeri canaa quia niishiniu? Canaacuajaari quiata miaquenujuani. Canaari quiata ratujua mariyatani. Quiaacuajaari canaa tiaca nuucuacajinia niishitiojua”. ²⁷ Tia camaruuri nia riucuanutaniya: “Janiyacuajaari tari nia sequereeni, maja cua niishiniu tejenote niajaniyani. Nia quiojorohua niiquiji, puetunu niajaniyananaa sesa miijiacanaa”. ²⁸ Naa na taanuusacari niajaniyatej, niaari nujuquetunutaniya. Niaari nia quiaca miacuenutaniya jiyanhua nia taraajenuta, nia niquishacari Abraham, Isaac, Jacobo, puetunu pueyara Pueyaso sequesano caminiujiunaa Pueyaso shuriucua quiyanoocuaa. ²⁹ Queraatia tamasa pueyapueeri nijionutaniya puetunu

jiyacajinijuanaa Pueyaso shuriucua cajitiuniuria, nojori miaquenuunura nata. Nijionutaniyari pananu muestasamaji, pananu tiuquishacojini, pananu shuucujaji jiyacajinijuanaa, pananu muestasamaji miaquetajara jiyacajinijuanaa. ³⁰ Quiarijiani, queraatia pueyari juhua tojishoo quiya narta pueyara. Cuno quishacari saniniuujia, nojori cutaraari seetanujuanaa tojishano pueya quiniutianiya Pueyasora, Pueyaso tojitiajaca nojori quiniucua mijiria. Naajuhujaji, quiarijiani, queraatia pueyari juhua tojishano pueya quiya narta pueyara. Saniniuujia, jiya puequesacari, nojoriiriri najuhuaa quijiaca quiniutianiya Pueyasora, nojori tojitiaaquiniucua nojuaja.

Jesu taraajesacari Jerusalén tiacajinia quiniaa pueyacua (Mt 23.37-39)

³¹ Jiyacari noojiaqueya Fariseocuacaari Jesuucua tiuquijioquiaari. Nojoriiriri Jesu numooteree:

—¡Niiquiji quia mashiri! ¡Jiyaniijia Herodes quia monu paniya!

³² Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohuatanijiyani. Janiyari cusosuhua naatanijiyajaaniuhujaji. Janiyari naa miya quiarijiani, tariquijiuuhujaji. Janiyari tama tariqui tucuatanutaniya puetunu cua miiniu panishanojuanaani”. Naa nia sequesuhua cuno pueyano. ³³ Cuaara rupaquijia cua sashiiria. Janiya quiarijia rucuanenutaniyajaarani, tariqui, tama tariquinio. Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiuniaajanaa puecoosaquiaaricuaani. Majaari tamaqui cua monu quishaanutaniya.

³⁴ ‘Jerusalén tiacajinia quiniaa pueyanaa, niaacuajaari Pueyaso sequesano caminiujiuniaa puecojuaca. Niaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatiajani, taa caacaraja necohua rijioquiaacuaa na nesu cariquiaconi. Niaari saaja paniyaquiquiaa cua cojuanura niajaniya. ³⁵ ¡Cunora, cua tojitiare! Nia quiquioori tojetaarucuaajanaa shaaqui quiniutianiya. Naajuhujaji, majaari socua nia niquiniu quiniutianiya janiya, niaa jaara nia timitiasacari janiya sequerejaatijia: “¡Cuaara shuquiriaatia quiiria pa Jiyaniijia, Pueyasojiniji tiuquihuano!”

14

Jesu naatanishacari cusosu poreeno pueyano

¹ Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasaca Fariseocuacatanio. Nojoriiri Jesu shootiaturiquiaa nojori niishiniuria casaa na miiniutianiya samaatenu juucani. ² Jiyacaritij, tamonu pueyanoori Jesu tajoji nujuariquiaa, poreeno cusotaano. ³ Jesuuri Moisés Rootasanojiniji niishitiojonaa nequesotaree, Fariseocuacanio:

—¿Taa nia serojoquiaa Moisés Rootasanojiniani? ¿Maninate cusosu pa naataniniu samaatenu juuca?

⁴ Nojoriiri saaja sanaa na tojitiariquiaa. Jesuuri cusosu quiaree jiyacari. Na naataniriiri. Na jiyarorohua na tiajini-aari. ⁵ Na nuhuaji, Jesuuri cuno Fariseocuaca sequeree:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhuara nia seru?

⁶ Majaari nojori riucuanu quirii quenaaja.

Taa pa miyani queranacunura masuusano pa quishacari, taamueca pueyate masuushiyajaniuhua

⁷ Jesuuri shootiariquiaa taa masuusano pueya socua panishano cajitiucujinia nojori cajitiuniuria riutioconeetariquiaani. Jesuuri cunora nojori niquiara pohuataree nio pohuatasano. Naa sequereeri:

⁸ —Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijini. ⁹ Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajanija: “Shiiquia. Quia sanere nio pueyanoocuai”. Naacujitij, quiaari cajitishaanutaniya quia caririquiniutia pueya paniyaquishano cajitiujinia, miaqueja puequetujinia. ¹⁰ Nocuai nia sequeyanijia, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacujitij, quia masuuna jaara niquiri quiajanija, nojuajaari quia sequenutaniya: “Cua rupuenanaa, ¡niya quia cajishii socua panishano cajitiujiniani!” Naacujitij, cuniqui quiata quiniaari niishiniutianiya, quiajanijaqui nia masuuna panishano pueyano.

¹¹ Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

¹² Jesuuri na masuuna pueyano sequereejuhua:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaca, quia panishano pueyano. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriiri quia masuunutaniya saniniuujia. Naacuajitij, quiaari tari namishaarohuacuaja. Cunora, majaari socua quia masenu quiniutianiya Pueyasojiniji. ¹³ Naaratej, quiaa jaara queranacunu paniya, quia masuure casamiijiuniucua pueya, sesaruneca pueya, sesacujuanucua pueya, cariyjuarujurinio. ¹⁴ Naacuajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajaniya saniniuujia. Naaratej, Pueyaso cutaraari maninia miiniutianiya quiajaniya saniniuujia, na samiitianijosacariuhua maninia miijiaca pueya.

Miriqui Jesu pohuatasano na queranacunujiniji
(Mt 22.1-10)

¹⁵ Jesuta cajiyoano pueyano tojishacari naa Jesu pohuatanotej, Jesu sequereeri:

—¡Shuquiriaatia quijia cutaraari cuno, cante Pueyaso shuriucua miaquenutaniya jiyocuacaanuni!

¹⁶ Jesuuri na sequeree:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuquiaari. ¹⁷ Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucuasaaree niaacuaji. Nia miaquesee”.

¹⁸ Puetunu masuusano pueyajanaari juhuacatecara sequequiaari maja na naata quianu miaquenuucua. Coteenu masuusano pueyanoori cuno seru sequeree: “Janiyari shusha maseree tamonu cuhuariquiani. Janiyari nocua quiaa na niquiniuucuanu. Cua jiyanoori quenaaja. Maja cua naata quianu quiata queranacunuucua”. ¹⁹ Tamonu masuusano pueyanoori sequeree: “Janiyari diez poonijiojuaca juyaca masereeni. Na saniniuucua quiaanjia. Quiocua cua jiyanoori cua quiaaquishacari queranacunujinia”. ²⁰ Tamonu masuusano pueyanoori sequerejuhuaj: “Shusha camiriinjia. Cunora, maja cua naata quianu”. ²¹ Seruuri tamajaaja tacateyarohua na camarnu tiajiniohua. Na jiyaniijia pohuatasuhua na masuusano pueya sequesanoori. Na jiyaniijiaari juaaquii. Na seru sequereeri: “Ritia quia quiaare tamasaca pueya masuunucua tiaca nucuaacaco. Miji quia rijiooco casamiijiuniucua pueya, sesaruneca pueya, sesacujua pueya, cariyjuarujuri

pueyano”. ²² Seru tiuquishacariuhua, na jiyaniijia seque-suhuari: “Jiyaniijianaa, janiyari tari miiriini taa quia se-queere janiyacujani. Juhuanajuaja maja tia mishiniu”. ²³ Na jiyaniijiaari na sequeere: “Socua pueya quia pajecoo tiaca nucuaacaco, tamasa tiacajiniara nucuaacaconio. ¡Socua pueya quia nenecojocoo nojori niniuria, cua tia mishiniuria! ²⁴ Seetanujuanaa nia sequeyanijia, coteenu cua masuusano pueyajinijinioni, majaari quenaaja niquiriyatu nojorijini-jinio saniniu quiniutianiya cua sumatusano”.

Saaja tama na cuaqueya panitiajajaarija na naata Cristo nuhuajiniu

(Mt 10.37-38)

²⁵ Jiyanohua queraatia pueyari Jesuta quiojoriquiaa. Jesu-uri nojoriicua tacateree. Nojori sequeereeri:

²⁶ —Cante cucua niya cua pueyano na quiniuriani, no-juaja cuaara niishiiria nio. ¡Maja nia naata cua pueyano nia quiniu nia paniyaquishacari janiya socua nia quejiniji, nia nucujinijinio! Nia niquiocua, nia niquiohua, nia tapuey-ocuaca, nia rimiatuhuahuj, nia panishacari nojori socua janiyajiniji, ¡majaari nia naata cua pueyara nia quiniu! Naa-juhuaj, ¡majaari quenaaja nia naata tama nia cuaqueyajaaja panijia nia quiniu socua janiyajiniji! ²⁷ Cante tama na cuaqueyajaaja panitiaaquijia cucuarani, majaari na naata cua pueyanora na quiniu. ²⁸ Niaa jaara jyaconaja tia tianu paniri, ¿majate coteenu nia cajiniu nia niishiriojonura taa cumaneecate panishaanutaniyani, na tucuatunura puetunu-juanaa? Naajuhuaaj, niaari niishiriojiya, queraatia quiyacua-jate nia cumaneeca. ²⁹ Niaa jaara coteenu naa miyaquiri, niaari najuhuaana morijiucua nujuatejonutaniya, na nuhuaji majaari socua nia cumaneeca quiniu nia tucuatunura nia tia. Puetunu nia tia niquiniaajanaari juhuacatecara nia macaa-tiniutianiya. ³⁰ Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucu-atanu quiarijia”. ³¹ Naajuhuaaj, jia jiyaniijia jaara quianu paniri narta jiyaniijia miaquetoona, ¿majate coteenu na cajiniu na niishiriojonura, na naatate diez mil na puey-ata shocotanu cuno tamonu jiyaniijia, nocua niyano veinte mil na pueyatani? ³² Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetoonu quiniutianiya. Sanini-uujia, tucuaaanu narta jiyaniijia quishacarijia, nocua ji-yaramiquiniutianiya na pueyari, nata nojori pocoojonura maninia, nojori jyanootioonura. ³³ Naajuhuaaj, niaa jaara carteyaquiri puetunu nia jiiiasanojuanaa, majaari nia naata cua pueyanora nia quiniu.

Miriqui Jesu pohuatasano shonijiniji

(Mt 5.13; Mr 9.50)

³⁴ 'Shoni jaara tiquiriqquia quiya, maniniaari, pa panishano. Jaara shaacara quiquii, ¿taate na naata tiquiriqquiara na quiniuhuani? Maja na naata. ³⁵ Najuhuana quiyari. Majaari quenaaja maninia na quiniu cuhuariquiajinia jatasocoriquiano maninia na moritianiniuria nataacuaca. Majaari quenaaja maniniajuhuj, na paatishaanura na moqujianura, natau pajama niojosocoriquiano. Jaara naa maninia quiyaquiritij, nareja jatashiyari. Cante numaacani, cuaara tojtiaara miriqui cua pohuatasano. Cuaara na niishiirijuhuj. Seetanujuanaa cua tojtiajaca pueyani, nojoriiri juhua shoni mijiria.

15

Jesu pohuatasano miriqui tashucvano borregojiniji

(Mt 18.10-14)

¹ Roma tiacajinia quijia jiyaniijara cumaneeca masejona, mariyata sesa miijiaca pueyari Jesuucua nijioriquiaa na pohuatasano nojori tojtianura. ² Cuno pojoriiri Fariseocuaca soosano pueya quiriquiaa, Moisés Rootasanojiniji niishitijona soosano pueyano. Cunora, Fariseocuacaari, mariyata Moisés Rootasanojiniji niishitijonaari tama rimiaaque-turiquiaaja Jesuucua. Naa pocuaturiquiaa Jesuuri:

—Cuno pueyanoori sesa miijiaca pueya shanacuquiaa nocua nojori nijionura. ¡Juhujaniya nojoritia miaquequiaajaariuhuj!

³ Naaratej, Jesuuri nojori niqiara pohuataree nio miriqui pohuatasano:

⁴ —Niaa jaara cien borregohua jitiariquia, nojorijinijinio niquiriyatuniyojua jaara tashucua, ¿taa nia miiquiaani? ¿Niaatucua nia noventa y nueve borregohua cureeno tiuji-aquiri rupaquijia cuhuariquiajinia, tashucvano borrego nia pajenura, niaa cuaara na riuriatarohujaatijia? Taaquiririni. Niaacuajaari naa miiquiaaquij. ⁵ Niaa jaara na riuriatasee, niari nia shuquiriniutia na paquiohua nia numeecuaji. ⁶ Niaa jaara na tiuquitiarohua nia tiajiniohua, niari nia rupuenaa, mariyata nia shuriucua quiniaa rerejotenutaniya nia sequenura nojori: “¡Cuata nia shuquiriri quiarijia! ¡Tari riuriatarohua cua borregoniyojua tashucuanonijia!” ⁷ Seetanujuanaa nia sequeyanijia, naajaariuhuj, jiyocuacaanu quiniaari jiyanohua shuquiritiquiaa niquiriyatu sesa miiji jaara noojia tacatore sesa na miiniujiniji. Cuno pueyanoori socua jiyanohua shuquiritasano

tamasaca noventa y nueve pueyajiniji, canapuetucuja tari maninia pueyacuani.

Jesu pahuatasano miriqui juurequetesano cumaneejiniji

⁸ 'Naajuhuj, tamonu maaji jaara diez cumaneecaraca quiri, jaara niquiriyatu juurequetere tiajiniaaco, ¿maatucua taa miirini? Na samaritiu noshitiniutianiyari, na tia na netoonujunura. Pueyaracaanu jacaria na pajenutaniyari cuaara na riuriatarejaatijia. ⁹ Na riuriasacari na juurequetesano cumanee, maajiiri na rupuenaa, mariyata na shuriucua quiniaa maajipohua rerejotenutaniya na sequenura nojori: “¡Miji nia nimia! ¡Cuata nia shuquiriri! ¡Tari riuriatarohua cua juurequetesano cumaneenijia!” ¹⁰ Seetanujuanaa nia sequeyanijia, jiyocuacaanu Pueyaso seyari naa shuquiriquiaajuhuj sesa miijia jaara noojia tacatore sesa na miiniujiniji.

Jesu pahuatasano taa tamonu pueyano jiyanooquiaari neyanuni

¹¹ Na nuhuaji, Jesuuri nio pahuatareejuhuj:

—Tamonu pueyanoori caapiqui niyanuraca quiquiaari. ¹² Socua naatujuaari na que sequeree: “Cua quena, quiar-ijia cua niqutiore quia jiiiasanojiniji, quiria quiriquireano quiaa jaara shaajeyare”. Naacujitij, na queeri puetunu na jiiiasanojuanaa niqutiojoree necohua. ¹³ Socua naatujuaari rupaquijia camueenujuquiaari na que tiajinia. Na nuhuaji, puetunu na que niqutiosanojuanaa nojuajani, nojuajaari saniniuujia tamasaca na niqutiojoree na cumaneecara. Na nuhuaji, na cumaneecata quiaquiaari tucua-caanuuri, tamonu jiyajinia. Cuniqi, puetunu na cumaneecajanaa puecaquiaariiri sesa na miiniutia. ¹⁴ Nojuaja jaara puetunu na cumaneeca puecaquiaarijianaa, cuno jiyajiniaari jiyanohua miaajesacari quiquiaari. Mashajaari juhuacatecara miaajequiaari. ¹⁵ Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. ¹⁶ Mashajaari cushiya miaquesano miaquenu paniriquiaa juucua na miaajenuta. Cunoori tamaatia pu-rootu cocua quiquiaari. Majaari tamonu pueyano niqutionu quijia quenaaja na miaquesocoriquiano. ¹⁷ Na nuhuaji, tama sequereejaarijia: “Cua queeri queraatia na tiajiniaaco seyaraca. Nojoriiri maninia miaquenuquiaa taquiya. Nojori sumatuuri cureequiaajuhuj. ¿Janiyarijiataj? ¡Janiyari niya quera cusoya cua miaajenutani! ¹⁸ ¡Cua queecua

tacateyarohuaraquij! Janiyacua na sequesuhuani: ‘Cua quena, janiyari Pueyaso miiquianu sesani. Janiyari sesa miiquianu quiajaniyajuhua. ¹⁹ Majaari socua cua sequenu quia niyanuta. Janiyari puera sesa miijiani. Cua jiyatere juhuari juhua quia seru cua quiniuria, quiara cua poonijionura’”. ²⁰ Naa na niishiriojonu nuhuajitij, mashajaari quiaquiaariuhua na queecua.

¹⁹ Tucuacaanu na quishacarijia na que tiajiniji, na queeri na niquirii. Nocua taraajereeri. Nocua neteyareeri na naacunura. Na cacaseeri. Na nujuuneguereejariuhua. ²¹ Neyanuuri na que sequeree: “Cua quena, janiyari sesa miiquianu Pueyasoni, quiajaniyano. Majaari cua sequenu quia niyanuta”. ²² Na queeri saaja na tiaco seya sequeree: “¡Ritia! ¡Socua maniniuqui toque miji nia riquioo! ¡Niocua quiyanu cushitirinioj! ¡Jaaniisho nia cushitiri! ¡Sapatu nia cushitirijihua! ²³ Pa riutianishano juunu niquiojua nia quiacoo mosocoriquiano. Quiarjia pa queranacure. Pocua miaquenuureni, quiyanu pa shuquiritiasacari. ²⁴ Nio quiyanuniyojuaari juhua macu quiriquiaa. Quiarjia samiitiarohuari. Nojuajaari shaajequiaari. ¡Tari pocua muetarohuari!” Naacuajitij, nojoriiri juhuacatecara queranacuquiaari.

²⁵ Jiyacaritij, jiyapueranuuri cuhuariquiajinia quiriquiaa. Na tacatesacariuhua tiajiniohuara, jaara tari cateca quiriquiaa, saaja pueya tojirii jaaquequenuyanoori, nianujuniuyanonio. ²⁶ Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” ²⁷ Seruuri na riucuaaree: “Quia nuhuajishanacuaa tari tiuquiriohuano. Quia queeri shuquiriaatia quiya maninia na tiuquishacariuhua, maja cusosu. Naaratej, canaa sequereeri querasapiquia juunu niquiojua canaa monura”. ²⁸ Jiyacaritij, jiyapueranuuri jiyanohua juuaquii. Majaari tiajinia na tiuquiniu paniniu quiriquiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria. ²⁹ Na que sequeree saajaari: “Quiaacuajaari niishiya, janiyari pueyaracaanu poonijioquiaa quiarani. Majaari quenaaja cua tarijonu quiquiaa quiajaniya. Naa maninia tojjia cua quishacari quiajaniyatej, ¡majaari quia niquitionu quiquiaari janiya quenaaja niquiriyatu cabranijojua, cua queranacunura cua rupuentaata! ³⁰ Quiarjia saniniuujia, quia niyanu seque tiuquishacariuhua, ¡quiaari querasapiquia juunu niquiojua moree nera! ¡Nojuajaari quia cumaneeca puecakanu paanatumjuriicua!” ³¹ Na queeri na sequeree: “Sanajanaa, quiaari pueyaracaanu cuata quiya. Puetunu cua jiiitasanojuanaari quia casaa. ³² Naajaa, quiarjiani, maninia

pa queranacure. Shuquiriaatia pa quirij. Quia tarajanuuri juhua macu quiriquiaa tari. Quiarijia samiitiarohua pajaniyaraari. Nojuajaari juhua tashucuacanu pocuaji. Quiarijia pocua muetarohuari”.

16

Miriqui Jesu pohuatasano pueyanojiniji, cante na jiyaniijia cumaneeca riutiocojuani

¹ Jesuuri na pueya pohuataquiaari nio miriqui pohuatasanojuhuj, nojori na niishitiojonura:

—Tamonu casamiriaca pueyanoori tamonu pueyano jiitaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riuticoriquiaa jiyasohuaja, tama nerajaaja. ² Cunora, jiyaniijiaari cuno na seru sequeree: “¿Taa quia miiquiaa janiyani? ¡Quiaana sesa miiquiaa! Quiarijia cua niqutiore quia naajiotasano puetunu quia miishanojinijijianaa. Majaari socua quia quiniu quiniutianiya cua casami cojuana”. ³ Cunora, cumaneeca cojuanaari niishiriojoquee. Tama sequereejaarijia: “¿Taa cua miiniutianiyarini cua jiyaniijia jaara cua jatara cua poonijosanojiniji? Janiyari maja cumueecani, cuhuariquiajinia cua poonijionura. Naajuhuj, jiyanoehua cararaatiaari quiria, pueyajiniji nareja cua mashiniquijionura cua panishano. ⁴ ¡Jaj! Tari niishiquiinijia taa cua miiniutianiyani tamasaca taraajenura cucua, nojori masuunura janiya nojori tiajinia cua quiniuria, janiya jaara nio poonijosanojiniji jataaareni”. ⁵ Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniijia niqutiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niqutiojocanu quiajaniyani?” ⁶ Pueyanoori na riucuarree: “Cua niqutiojanu cien patacocua mishaja shiyocuani”. Cumaneeca cojuanaari na sequeree: “Ritia quia cajiri. Niya quiya quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta patacocua mishaja shiyocua”. ⁷ Na nuhuaji, tamonu pueyano nequesotareeri: “¿Quiajaniyariuhuj? ¿Casaa cua jiyaniijia niqutiojocanu quiajaniyani?” Na riucuarreeri: “Cua niqutiojanu cien canaasatu mishaja trigoni”. Cumaneeca cojuanaari na sequeree: “Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. ⁸ Na jiyaniijia jaara niishiquiaari sesa na seru miishano, na sequereeri: “¡Quiaaquijyanohua niishijia tama quia cuaqueyajaaja quia cojuanura!”

'Seetanujuanaa pueyanaa, Pueyaso niishiyashijiaca pueyari socua jiyanoehua niishijiaca cuhuashiqui quijiaca pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuujia nojori.

⁹ 'Naarate nia nacasuyanijia, naa capora nia quirijiuhuj, maninia nia miiniuria pueya. Maja nia casami nia jamuenu. Cunocuaajaari nareja Pueyaso niqutiosano niajaniya. Naacuaajitij, capora nia quishacari mijiria jaara puequema, nia Jiyaniijiaari nia tiuquinitianutaniya pueyara-caanu quishaqui jiyocuaaanu, jiyanoehua na shuquiriti-asacari niajaniya.

¹⁰ 'Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenu-taniya. Saniniuujia, cante jiyatesaare secaja casaa cojuana na quiniuriani, cuno pueyano jaara secaja na cojuasano-jiniji nohuasejoquiaa jiyasohujaja, majaari tari nocua tiu-usaanu. Nojuaja jaara jiyatesaare queraatia casami co-juanara, naa nohuasejonutaniyajaariuhuj. ¹¹ Naajuhuj, niaa jaara maninia jiiitiaaquiquiaa mijiria casami, Pueya-soori niaacua tiuyaquiniutianiya seetanujuanaa maninia jiy-ocuaaanuji casami nia jiiitianura. ¹² Naacuaajitij, niaa jaara tamonu pueyano casami cojuaaquiquiaa maninia, ¿Pueyasotucua taa niqutiore niaarano na riuriotacani? Maja cutaraari nia niqutiosaanu quiniutianiya.

¹³ 'Poonitijosano pueyanoori maja na naata caapiqui jiyaniijiaraca quiri, tamonu samiritiaari, na panishacari tamonu. Naajuhuj, niquiriyatu jiyaniijia tojjia quiniutianiya maniniaari, na soosacari tamonu. Naajuhuj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijio-te-saanutaniya saaja. Naacuaajitij, Pueyasoori maja na naata nia poonitijionu nera.

¹⁴ Fariseocuacaari jiyanoehua cumaneeca panijiaqui. Naaratej, nojori tojishacari Jesu sequesano, nojoriiri saaja na rerequeteree. ¹⁵ Jesuuri nojori sequeree:

—Niaacuaajaari tama nia cuaqueyajaaja jiyatequiaa sa-puenu pueyano maniniu nia niquisaanura. Pueyasocua-jaari nioojia niishiya. Niaari pueya jiyajenetequiaa nojori jiyanishacari niaari Pueyaso panishano cutara, queraatia casami nia jiiitiasacari. Saniniuujia, casaa pueya jiyatequiaa socua jiyanoehua na panishanorani, Pueyasoori cuno soya cutara.

Moisés Rootasanoori coteenu quiquiaari, quiarijia quiya cutaraari quiarinio Pueyaso Rupaa

¹⁶ 'Moisés Rootasano, mariyata puetunu tariucuacaanu Pueyaso sequenu panishano caminiujiuniaa pohuatasanojuanaari pueya tojitiasocoriquiano quiquiaari, Tiuquinijiona Juan pohuatasanojuhuaj. Quiarijia saniniuujia, maninia rupaa Pueyasojinijiiri pohuatasaaquiaa, taa Pueyaso jiyanooni paniya pueyani, na muerasu nojori quiniuria. Quiarijiani, puetunu pueyajanaari jiyanohua saniniuujia Pueyaso muerasu nojori quiniuria.

¹⁷ 'Nio jiyari shaajeriquiano, jiya cajiniocuanio. Saniniuujia, tariucuacaanu pueyara Pueyaso sequesano caminiujiuniaa pohuatasano cutaraari maja na shaajenu quiniutianiya quenaaja.

Jesu niishitiojosano, pueyano carteyaquiniuria necocua (Mt 19.1-12; Mr 10.1-12)

¹⁸ 'Pueyano jaara necocua cartere tamonu maajitia na caminiuria, cuno pueyanoori jiyanohua sesa miya Pueyaso niqiuara. Naajuhuj, cante cartesano maajitia camiyani, cunoori sesa miyajuhuj.

Jesu pohuatasano casamiriaca pueyanojiniji, Lázarojinijinio

¹⁹ 'Casamiriaca pueyanoori quiquiaari. Jiyanohua maniniuqui toqueya cushiyojojuaari, juhua jiyaniijianucua toqueya. Jiyanohua na shuquiriniutia, puetunu juucajanaa queranacujuaari. ²⁰ Jiyacaritij, casamijiu pueyanoori quijiajuhuaj. Jiyanohua sapueyaraca. Nojuajaari cuno casamiriaca pueyano tia tohuateyaji nojotasano puetunu juucajanaa. Na sesaari quijia Lázaro. ²¹ Nojuajaari casamiriaca miaquejajiniji totinijosano raacua miaquenu panijia juucua. Saaja sareyari na sapueya rimianacunuujua. ²² Na nuhuaji, cuno casamijiu pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanohua quiquiojinia. Cuno casamiriaca pueyanoori cusoquiaarijuhuaj. Jamosaaquiaariiri. ²³ Sesa miijiacarano quiquiojinia na quishacari, naquiya na miishacari tii, nojuajaari mauquiaari. Cuniqiji tucuacaanu niqiri Lázaroori, shuquiriaatia quiyano supuetana Abrahamta. ²⁴ Casamiriaca pueyanoori nacaree: "¡Cua supuetana Abrahamnaa, cucua quia taraajere quenaaja! ¡Lázaro quia jiyarore cucua! ¡Cuaara na juaashiquia nacatu shiiria mohuacajinia! ¡Cua niti shiniajaquee quenaajacua! ¡Janiyari puera jiyanohua naquiya miya nio manijiniani!" ²⁵ Abrahamri saaja na riucaree: "Sanajanaa, quia niishiri

taa jiyanoehua maninia quia quiquiaarini, pueyaracaanu jiyocua quia quishacari. Lázaroori saniniuujia jiyanoehua taraatia quiquiaari pueyaracaanu, jiyocua na quishacari. Lázaroori quiaritia nia cumanijiashiya. Quiaari saniniuujia naquiya miishiyacujua. ²⁶ Naajuhuaaj, jiyanoehua tucuaa taccoori pa tajinia quia. Cunora, cante niiquiji niuuniu paniya cuniqijiria quiocuani, majaari na naata. Naajuhuaaj, cante quia quiquiojiniji niuuniu paniya niqijiriani, majaari na naatajuhuaaj”. ²⁷ Casamiriaca pueyanoori supuetana Abraham sequerohuacuahuaj: “Naa naasucuaaj cua supuetana Abrahamnaa. Naajaa, quia secojiyanijia, Lázaroo quia jiyarorohua cua que tiajinia. ²⁸ Tii quiyajaari cua tapueyocuaca. Cinco tarajanuhuaracanjia. Lázaroo cuara nojori numooteera, maja nojori quejoosaanurajuhua nio saniitiosaqui quiquiojinia”. ²⁹ Abrahamri na riuacuaree: “Nojoricuaajaari Moisés Rootasano jiiitaa, puetunu Pueyaso sequesano caminiujunaa naajiotasanojuanaanio. Quia tapueyocuaca cuara tojitiaara cuno”. ³⁰ Casamiriaca pueyanoori riuacuaree: “Naa naasucuatuhuaaj, cua supuetana Abrahamnaa. Naajaa, tamonu pueyano macunucuaajinijinio jaara muetarohua nojoriicua, nojoriiri noojia tacatonutaniya sesa nojori miiniujiniji”. ³¹ Abrahamri saaja na riuacuaree: “Nojori jaara Moisés Rootasano tojitianu paniyaquiquiaa, Pueyaso sequesano caminiujunaa naajionuutasanonio, majaari nojori tojitianu quiniutianiyajuhuaaj, macu pueyano jaara samiitiarohua”.

17

Puereetaari quiniutianiya sesa miijiacara

(Mt 18.6-7, 21-22; Mr 9.42)

¹ Na nuhuaji, Jesuuri na pueya sequequiaari:

—Mijiria, pueyari pueyaracaanu sesa miitishaaquiaa. Jiyanoehua taraatia quijiaari cuno, cante sesa miitirii tamonuni. ² Jiyano pueyanoratej, maara socua maninia quiri nera, puereetuca saajia jaara na riquiajiniji morotasaare, shoniniacu caminia jiuujiajinia jartasocoriquiano. Jaara naa miishaaretej, maara maninia quiri, maja sesa miijiaara na jiyatenura niquiriyatu nio muerasuniyojuajinijinio. ³ Cunora, tama nia cuaqueyajaaja nia cojuare maja quenaaja sesa nia miitiniuria pueya.

⁴ Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniuucua quiajaniya, quia jiyanoorinijioj. ⁴ Nojuaja jaara sequeyarucua sesa miya quiajaniya niquiriyatu juuca, naajaa, quia jiyanooriquia, nojuaja jaara quia sequere: “Sesa miirii quiajaniyanijia. Cua

jiyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooni.

Pueyasooqua tiuujia pueyanoori jiyanoohua cumaacaraca

⁵ Jesu saquiriojosano pueyari Jesu sequequiaari:

—Jiyaniijianaa, socua jiyanoohua canaa quia tiutiri Pueyasooqua, socua cumaaca canaa jiitianura.

⁶ Jiyaniijia Jesuuri nojori riucuaaree:

—Pueyasooqua nia tiuuniu jaara quiri quenaaja juhua mostaza jajauniyojua, jiyanoohua shiitaniyojua, niaa jaara nio satuna jiyona sequere: “Niiquiji quia pacure. Moojinia quia nujuasee”, maara nia sequesano tojiri.

Pueyasora poonijonatuca taa miijia quiriquianij

⁷ 'Niaa jaara seruraca quiriquia, nojuaja jaara tiajinia tiuquiriohua quia cuhuariquiajiniji tee na namitariquiaacuajani, quia seya cojuanujiniji soj, ¿niaatucua na sequere: “Miji, quia miaquesuhuaaja”? ⁸ Majaruhua. Niaari saaja na sequenutaniya: “¡Quiria quia sumature! Cua mianuutere coteenu. Cua raaterejuhuaj. Cua miaquenu nuhuaji, quiocua saniniuujia miaquerohua. Quiocua raturohuajuhua”. ⁹ Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? ¡Maja! ¹⁰ Naajuhua, niaa jaara puetunu Pueyaso sequesanojuanaa miiri, tama nia sequerejaaja: “Janiyari maja maninia seruni. Majaari tama cua niishitiajajiniijiaaja cua miiniu quiquiaa cua Jiyaniijiaara. Janiyari saaja pueyaracaanu paniquiaa cucua na tequejonura juhua naatujuaacuani”.

Jesu naatanijosacari diez pueya, lepraraca cusosuhua

¹¹ Jesuuri Jerusalén tiacajiniara na pueyata quiariquiaacuahuaj. Jiyacari, Galilea jiya, Samaria jiya tajiniaaco quiariquiaari. ¹² Quera na tiuquishacari shiitaniyojua tiacajinia, diez pueya lepraraca cusosuhuari na naacuquiaari. Nojoriiri tucuaaanujijia Jesuucuaaji nujuatusee. ¹³ Nojoriiri Jesuucua nacaree:

—¡Niishitiojona Jesunaa, canaacua quia taraajere!

¹⁴ Jesu niquishacari nojori, nojori sequereeri:

—Nia cuaqueya nia niquitishii pueyacuara secojonaa, taa supuetana Moisés sequequiaaricuajani.

Nojori canujuucuatatusacarijia, nojori cusonuuri shaajee. ¹⁵ Tamonu nojorijinijinio niquishacari na cuaqueya tari cushiriiquii, nojuajaari Jesuucua tacateyarohua. Nojuajaari na rupaa paaretariquiaa na maniniuuhuaqueetasacari Pueyaso. ¹⁶ Jesu cariquimijiaji mojuquetaseeri. Jiyocuara

naniriiri. Jesu sequereeri: “¡Paacarasho Jesunaa!” Cuno pueyanoori Samaria jiyajiniinio tahue quiquiaari. ¹⁷ Jesuuri na pueya niquiara naa sequereer:

—¿Majateeri diez cusosuhua naatanijiosaanu quirii? ¿Tee-teeri narta naataconohua nueve pueyani? ¹⁸ ¿Saaja nio tahue-teeri tacaterohua Pueyaso na maniniuhaqueetanura?

¹⁹ Na nuhuaji, Jesuuri cuno tahue sequereer:

—Quia sanere. Quia quiaarohua. Quiaacuaja naatarohua cucua quia tiuuniuucua.

Taa na quiniutianiya, Jiyaniija Cristo tiuquishacariuhua (Mt 24.23-28, 36-41)

²⁰ Fariseocuacaari Jesu nequesotaquiaari taacari Pueyaso Jiyarosocoriquiano niniutianiya jiyaniijara na quiniuria mijiriani. Jesuuri nojori riucuarer saaja:

—Pueyaso Jiyarosano jiitiasacari na muerasu, majaari namijiata niquishano. ²¹ Majaari na naata sequesaaanu: “Niya quiya pa Jiyaniija quiquio”, “Jati quiyaruhua”. Pueyasocujaari tari niya jiitiaa na muerasu nia tajinia.

²² Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niquiniuucua jiaatianutaniya niaata cua quiniuria rupaquijia, taa niaata cua quiya quiarijiacuaani. Majaari nia niquiniu quiniutianiya janiya. ²³ Tamasacaari nia sequenutaniya: “¡Niya quiyacuaja nia Jiyaniija!” Tamasacaari saniniuujia sequenutaniyacujua: “¡Nooj, jati quiyatej!” Majaari nia tojiniu jiyano pueyatej, nojori jaara naa nia sequeriquia. Majaari nojori neteyotanu najuhuanaj. ²⁴ Mijiria cua tacatesacariuhua, cuno juuca, janiyari niquishaanutaniya, naatej, taa miacana puetunu jiya cajiniocuajanaa niquishaaquiaacuaani na nunujusacari.

²⁵ Saniniuujia, mijiria cua quishacariija, janiyari coteenu jiyanohua naquiya miishaanutaniya. Nio pa quishacari pueyari cua paniyaquiniutianiya. ²⁶ Quera cua tiuquiniu panishacariuhua mijiria, naa quiniutianiyari taa mijiria quiniaa pueya quiquiaaricuaa supuetana Noé quishacarini.

²⁷ Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raruujuaari. Juhuajaniya maaji camiyojuaari. Pueyari necojori camiyoteja. Pueyari naa juhuajaniya mijioriquiaa Noé jaara tiuquitiaquiaari na puereetuca buquejinia. Canashiyaquiji, maruuri jiyanohua niquiaari. Puetunu mijiria quiniaajanaari cusunuuquiaari pajaacajinia. ²⁸ Naa quiquiaarijihua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojuaari. Juhuajaniya na casami niquitiojojuaari. Na

cuhuariquiaca natoojuaari. Na tiacara tiajojuajaariuhuj.
²⁹ Naa juhuajaniya nojori quishacaritij, Lotri tohuataquiaari
 Sodoma tiacajiniji. Jiyacaritij, maniiri asufreta cojitishano
 juhua maru niqiaari jiyocuacaanuji. Puetunu cuno
 sesa miijiacajanaari manijinia catequiaari. ³⁰ Naa
 quiniutianiyajaariuhua quera jiya puequesacari. Pueyari
 juhuajaniya quiniutianiya. Janiyari jiyacari canashiyaquiji
 tiuquiniutianihuani.

³¹ 'Cuno juuca, pueyano jaara na tia cacojiria quiya,
 cuaara roseyaquiiria na casamiicua tiajiniaaco. Naajuhuj,
 pueyano jaara na cuhuariquiajinia quiya, nojuaja cuaara
 tacateyaquiuhuara na tiajinia. ³² Nia niishiriquia supuetana
 Lot niqiuocua. Na mashishacari, nojuajaari ritia cuso-
 quiaari na nijiniara na niqiniuucua, na casamiicua na
 taraajesacari. ³³ Cante saaja shuquiriaatia mijiria na quini-
 uria niishiriojojuani, nojuajaari na nuhuaji jiyanohua taraa-
 tia quiniutianiya Pueyasooju. Saniniuujia, cante tama na
 cuaqueyajaaja panitiaja cua tojijiara na quiniuriani, no-
 juajaari pueyaracaanu shuquiriaatia quijiara jiyatesaanu-
 taniya.

³⁴ 'Cua tojiri. Cuno niucujuhuj, caapiqui pueya
 juriatoosacari juucua na maquetujinia, niquiriyatujuaari
 rishaanutaniya jiyocuacaanura, Pueyaso pueyano na
 quiniuucua. Tamonuuri tiujiasaanutaniya saniitioso-
 coriquiano. ³⁵ Cuno juucajuhuj, caapiqui maajipohua
 riiquiniushacari jatiqui juucua, cucua tiuujiaari tarajanu
 shuriucujia rishaanutaniya. Tamonuuri tiujiasaanutaniya
 saniitiosocoriquiano. ³⁶ Caapiqui pueya quishacari
 cuhuariquiajinia, cua pueyanoori rishaanutaniya.
 Tamonuuri tiujiasaanutaniya saniitiosocoriquiano.

³⁷ Jesu pueya tojishacari naa Jesu sequesantej, nojoriiri na
 nequesofaree:

—¿Tee nio quia pahuatasano niquishaanutaniyarini?

Jesuuri nojori riucaaree miriqui:

—Tee casaa moqueyani, mohuari tii rerejiya.

Naajuhuj, majaari quenaaja niquiriyatu Pueyaso to-
 jiyashijia cureenu quiniutianiya saniitiosoo.

18

*Jesu pahuatasano mashiquiojiniji, pueya nequesoreena
 pueyanojinijinio*

¹ Jesuuri na pueya pahuataquiaari nio miriqui pahu-
 atasano nojori na niishitiojonura, nojori cuaara Pueyaso
 secojoora pueyaracaanu, nojori taacanuyaquiniutia. ² Naa
 nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijiaari, pueya rerequetejano. ³ Cuno tiacajiniaja tamonu mashiquioori quiquiaarijiuhuj. Mashiquioori cuno nequesoreenaacua rucuanejoua pueyaracaanu. Na secojojuaari sesa na miinia pueyano cuara na niquitiohuara na casaa saniniuujia, sesa na miishanojiniji nojuaja. ⁴ Majaari nequesoreena tojiniu paniniu quijia pueyaracaanu cuno mashiquio. Naajaa, pueyaracaanu nocua na rucuanajosacari, cuno nequesoreenaari socua tama sequequiaarijiaaja: “Janiyari maja Pueyaso puerejani. Janiyari pueya tojiyashijia cutarani. ⁵ Naajaa, naa nio mashiquio taajetesacari janiya pueyaracaanutej, janiyari quiarijia na panishano miiniutianiya nerani, mariqui cua juaatijiore pueyaracaanuuri na nenecojosacari janiya”.

⁶ Maninia na pueya niishiniuria na pohuatasano, Jiyaniijia Jesuuri naa nojori sequerohuacuhuj:

—Naa miiquiaariiri, cuno pueya nequesoreena seque. Jiyanojua pueya rerequeteja quiquiaariiri, naajaa, nojuaajari maninia miiquiaari cuno mashiquiora. ⁷ ¿Nia que Pueyasoorijiataj? ¿Niaateeri jiyaniya maja nojuaja tojiniu quiniutianiya na muerasu, canapuate na secojoquiaani juuca, niucuanio? ¿Pueyasoteeri nia sashitiniutianiyajaa? ¡Maja! ⁸ Nojuajaari maja na tarishiniu quiniutianiya. Ritia nia naacunutaniyari sesa nia miijica pueyacuaji. Sesa nia miijicaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasocua tiuujica riuritanutaniya naa pueyaracaanu secojonuujuacani?

Jesu pohuatasano miriqui Fariseo pueyanojiniji, Romano jiyaniijia cumaneeca masejojuaajinijinio

⁹ Jesuuri socua nio miriqui pohuatasano pohuataquiaari noo pueya niquiara, canapuate tama na cuaqueyajaaja jiyaniijiani nojoriiri maninia pueyano. Naacuajitij, nojoriiri tamasaca pueya soojea, nojori jyanishacari cuno pueyari socua sesa miijica nojorijiniji. Cunora, Jesuuri nojori niquiara naa pohuataquiaari:

¹⁰ —Fariseo pueyanoori quiaquiaari Pueyaso Secojoua tiajinia na secojonura Pueyaso. Jiyacaritij, Romano jiyaniijia cumaneeca masejojua pueyanoori quiaquiaari Pueyaso na secojonura tiijuhuj. ¹¹ Fariseo pueyanoori nujuariquiaa Pueyaso na secojosacari. Naa sequeriquiaari: “Pueyasonaa, paacarasho janiyari maja juhua tamasaca pueyani. Tamasaca cutaraari nohuasenuujuaca, sesa miijica, maaji porocujuhuj. Naajuhuj, shuquiriaatia quiyaniijia, janiyari maja sesa miijiani juhua nio pueyanouja

niya cuata secojiyani, cumaneeca masejona pueyanoni.
¹² Janiyari caapiqui juuca miaqueyaquiquiaani puetunu semaanajanaa cua shuquiritiniuria quiajaniya. Naajuhua, janiyari pueyaracaanu puetunu cua masesanojinijianaa niqutioquiaa quiarani, taa Moisés rootaquiaaricujani”.
¹³ Cumaneeca masejonaari saniniuujia tucuaaanuji nujuasee. Na secojosacari, majaari quenaaja na maunu quiriquiaa jiyocuacaanu. Tama nojuajaari na jiriquia piquiriquiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianijia!” Naa secojoquiaariiri.
¹⁴ Seetanujuanaa nia sequeyanijia, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuujia jiyanoyaquishoo tacateyarohuacujua. Naacuajitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararosaanutaniya. Saniniuujia, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquijia na quiniuria.

Jesu niasacari na juaashiquia conaajaacua
 (Mt 19.13-15; Mr 10.13-16)

¹⁵ Jiyacaritij, conaajaari poosaariquiaa Jesuucua, Jesu nianura nojoriicua na juaashiquia, Pueyaso jiitianura maninia nojori. Jesu saquiriojosano pueya jaara niqiquiaari conaaja pooshiyano Jesuucua, nojoriiri na poonaa juarii. ¹⁶ Jesuuri saaja conaaja poonaa sequeree, conaaja cuara nocua poosaaria. Na nuhuaji, na pueya sequereeri:

—Naatujoori cuara poosaaria cucua. Maja na poonaa tenujunu. Cante Pueyaso muerasura quiniu paniyani, nojori cuara jiyateera tama na cuaqueyajaaja juhua nio naatujooriria. ¹⁷ Seetanujuanaa nia sequeyanijia, cante tama na cuaqueyajaaja jiyateyaquiya juhua naatujooriria Pueyaso rupaacua na tiuuniuriani, cuno pueyanoori maja na naata Pueyaso muerasura na quiniu.

Casamiriaca pueyano pocoojosacari Jesuta
 (Mt 19.16-30; Mr 10.17-31)

¹⁸ Tamonu Judiocuaca camarnuuri Jesu nequesotaquiaari:
 —Maninia niishitiojonanaa, ¿taa cua miiniutianiyani, jiya puequesacari cua samiitianishaanura, pueyaracaanu quijiaa cua quiniuria Pueyasotani?

¹⁹ Jesuuri na riucuaaree:

—¿Casaara quia sequeya janiya maninia pueyanotani? Saaja Pueyaso cutaraari seetanujuanaa maninia. Majaari

socua tamonu quiniu. ²⁰ Pueyanonaa, quiaacuajaari Moisés Rootasano niishijia. Naa naajiotasanocujaari quiya: “Maja quia camishoo maaji numuetucunu. Maja monu. Maja nohuasenu. Maja tamonuucua saquiriojotanu quia saponuta. Quia que, quia nucua tojjia quia quiri”.

²¹ Pueyanoori Jesu riucuaaree:

—Janiyacuajaari cua naatujuajiniji puetunu cuno tojjia-janaani.

²² Naa na sequesacarij, Jesuuri na sequeree:

—Quiyajaari niquiriyatu casaa quia miishoojua. Nio quia miiri: puetunu quia jiiitasanojuanaa quia niqutiojore cumaneecara. Na nuhuaji, casamiijiuniucua pueya cuno cumaneeca quia niqutiojore nareja. Naacuajitij, quiaari jiyanhua casamiriaca quiniutianiya cutara jiyocuacaanu. Na nuhuaji, quiocua nimiohua cutara, cua pueyano quia quiniuria.

²³ Na tojjishacari Jesu sequesano, nojuajaari jiyanhua taraajequée, jiyanhua queraatia casamiriaca na quishacari.

²⁴ Jesu niquishacari nojuaja taraajeyano, Jesuuri na pueya sequeree:

—Casamiriaca pueyara, jiyanhua jiyajenetaari Pueyaso muerasu nojori quiniuria. ²⁵ ¿Camelloteeri na naata cusupuetaja cuhuoco tamajiria tajiniu? Maja na naata. Naajuhuj, casamiriaca pueyanora, socua jiyanhua jiyajenetaari Pueyaso muerasu na jatanishaanura.

²⁶ Pueya tojjishacari naa Jesu sequesantej, nojoriiri naa na nequesotaree:

—¿Canteeri Pueyaso muerasura quiniutianianitioj?

²⁷ Jesuuri nojori riucuaaree:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

²⁸ Pedroori Jesu sequeree:

—Jiyaniijianaa, ¿canaarijiaataj? Canaari puetunu canaa jiiitasanojuanaa tiujiaquiaarini canaa nuhuajiniuria quiajaniya.

²⁹ Jesuuri na riucuaaree:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanhua queraatia masenutaniya mijiria na quishacarijia. ³⁰ Na nuhuaji, samiitianishano quiniutianiyari pueyaracaanu shuquiriaatia na quiniuria Pueyaso shipinishocoriquiano quiarinio jiyajinia.

*Jesu pacutesacari pohuatanu, nojuaja mosaanutaniya
(Mt 20.17-19; Mr 10.32-34)*

³¹ Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarjia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucua-caanu pueyara Pueyaso sequesano caminiujiuniaa sequerquiaaricuaaja janiyajinijini. ³² Naacuajitij, janiyari tahua niq-uitiosaanutaniyani. Nojoriiri cua macatiniutianiya. Taraatia cua miitiuniutianiyari. Cua riocojotunutaniyani. ³³ Cua piquitiuniutianiyajaariuhuj. Na nuhuaji, cua motunutaniyari. Naajaa, jiuujianaraca juucajinia, janiyari samiitianutanihuani.

³⁴ Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

Jesu jeeacasacari cariyjuaru pueyano Jericó tiacajinia
(Mt 20.29-34; Mr 10.46-52)

³⁵ Na pueyata Jesu quishacari tari cateca Jericó tiacaacuara, cariyjuaru pueyanoori nuu shuucujaji cajiriquiaa, cumaneeca na masejonura pueya tajishacari nucuaco. ³⁶ Cariyjuaru tojishacari queraatia pueya tajiyano, pueya nequesotareeri:

—¿Casaatejanojoni?

³⁷ Pueyari na sequeree:

—Nazaret tiacajinijinio Jesucuaaja tajiya.

³⁸ Cariyjuaruuri nacaquee:

—¡Jesunaa! ¡Supuetana David niquiohuacuajinio supueno pueyanonaa! ¡Cucua quia taraajere quenaaja!

³⁹ Jesu puetanaa pueyari na juaarii na sanaajanura juucua. Nojuajaari saaja socua jiyanohua nacaree:

—¡Supuetana David niquiohuacuajinio supueno pueyanonaa! ¡Cucua quia taraajere!

⁴⁰ Jesu tojishacari nojuaja, nujuaseeri. Jesuuri pueya sequeree cariyjuaru cuara jaatucusaaria nocua. Cariyjuaru tiuquishacari nocua, Jesuuri na nequesotaree:

⁴¹ —¿Casaa quia paniya cua miiniuria quiajaniani?

Cariyjuaruuri Jesu riucuaaree:

—¡Jiyaniijianaa, niquijiara quiniu paniuhuanijia!

⁴² Jesuuri na sequeree:

—¡Niquijiara quia quiriohua! Quia namijiacuaaja tari jeequerohua cucua quia tiushacari.

⁴³ Jiyacaritij, cariyjuaruuri maninia niquijiara quiquii. Jesu nuhuaji sacuaareeri na shuquiritianuta Pueyaso. Puetunu Jesu miishano niquiniaajanaari Pueyaso maniniuhuaqueetariquiaa.

19

Jesu pocoojosacari Zaqueota

¹ Jesuuri Jericó tiacajinia tiuquiiioquiaari na pueyata. Tiaca jiuujiaaco quiariquiaari. ² Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijara cumaneeca masejonaa camarnu quiquiaari. ³ Nojuajaari Jesu niishiniu panijia juucua. Majaari na naata niquniu quiriquiaa Jesu, puera jiyanohua pueya quiniucua Jesu shocua. Naajuhuj, Zaqueori puera posucuashi quijia. ⁴ Cunora, Zaqueori netequiaari Jesu tacoji. Nuu shuucujaji sicómoro naanaacua macaseeri, maninia na niquniuria tiji Jesu, jaara cunoco tajimia. ⁵ Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, iritia quia rosemohua! Janiya quiarijia quia tiajinia maquenutaniyani.

⁶ Zaqueori ritia rosemohua. Jesu tiuquinitiaree na tiajiniaari jiyanohua na shuquiriniutia. ⁷ Tamasaca pueya jaara Jesu niquiquiaari Zaqueo tiajinia tiuquiyano, puetunu nojorijianaari Jesu sesacanu coteequiaari. Tama sequeturiquiaajaarijia: “Cuno pueyanoori sesa miijia pueyano tiajinia tiuquishii”. ⁸ Na nuhuaji, Zaqueori nujuaree. Jesu sequereeri:

—Seetanujuanaa quia sequeyanijia, Jiyaniijianaa, janiyari quiarijia quiocua tiuuriini. Naacujatij, janiyari casamiijiu-niucua nareja niqutiojonutaniya puetunu cua jiiitasano cajiniocujinijijianaani. Naajuhuj, janiya jaara puera cumaneeca masecanu tamasaca pueyajiniji cua sajojonutani, janiyari nojori niqutionutaniuhua socua jiyanohua queraatia cumaneecani cua nohuasesanojiniji nojori.

⁹ Jesuuri na sequeree pueya niquiara:

—¡Quiarijiani, nio tiajinia quiniaa pueyari tari jiyanooshaaree! Nio pueyanocujajaari supuetana Abraham niquiohuacuajinio supuenojuhuj. Nojuajaari cucua tiuuri taa Abraham tiuquiaari Pueyasocuaacuaani. ¹⁰ Janiyacujajaari cunora mijiria niquiaarini, tashucuaano pueya cua pajenura, nojori cua jaariutianura Sesaaca.

Miriqui Jesu pohuatasano diez cumaneecajiniji
(Mt 25.14-30)

¹¹ Tii quiniaa pueyari Jesu pohuatasano tojitiariquiaa. Jesuuri tari cateca quiriquiaa Jerusalén tiacajiniji. Pueyari jyaniriquiaa Jesuuri Israel pueya jiyaniijara quiniutianiya tari, Pueyaso muerasu na jiiitianura mijiria. Nocujaji, Jesuuri nojori pohuataree nio miriqui pohuatasano, nojori na niishitiojonura. ¹² Naa nojori niquiara pohuatareeri:

—Tamonu jiyaniijia niyanuuri quiquiaari. Nojuajaari tu-cuacaanu tamonu jiyajinia quiaquiaari jiyaniijia na jiyate-saanura. Jiyaniijia na jiyatesaanu nuhuaji, nojuajaari taca-teriquianohua quiriquiaa, narta pueya jiyaniijia na quini-uria. ¹³ Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijianaa niqutiojoree niquiriyatu cumanee, orojiniji shipinishano. Nojori sequereeri: “Nio cumanee nia poonitijiore, janiya cuaara tiuquiriohuajaatiinijiaj”. ¹⁴ Na nuhuaji quiaqueeri. Na jiyajinijinio pueyari maja na niqiniu paniniu quijia cuno pueyano. Cunora, nojoriiri pueya jiyaramiquirii na nuhuaji, jiyaniijiajanaa nojori sequenura: “Maja canaa paniniu cuno pueyano, canaa jiyaniijia na quiniuria”.

¹⁵ 'Naajaa, nojuajaari saaja jiyatesaaree jiyaniijia na quiniuria. Na nuhuaji, na jiyajinia tacateyarohuari. Jaara tiuquishuhua, na cumaneeca na niqutiojosano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori reratequiaarini, nojori poonitijosacari na niqutiojosano cumaneeca. ¹⁶ Coteenu seruuri nocua nimiaa. Na jiyaniijia sequeeseeri: “Cua jiyaniijianaa, cua poonitijosacari quia niqutiosano cumanee janiya, janiyari socua diez cumaneeca reratecanuni”. ¹⁷ Na jiyaniijiaari na sequeree: “¡Maniniacuajal ¡Quiaacuajaari maninia cua seru! Quiaari secaja cua niqutiosano quiajaniya poonitijioriquiaa shitimia quiria. Naaratej, janiyari quia jiyatenutaniya diez tiaca jiyaniijia quia quiniuriani”. ¹⁸ Na nuhuaji, tamonu na seruuri nocua nimiaajuhuj. Nojuajaari na jiyaniijia sequeree: “Cua jiyaniijianaa, cua poonitijosacari quia niqutiosano cumanee janiya, janiyari socua cinco cumaneeca reratecanuni”. ¹⁹ Na jiyaniijiaari na sequereejuhuj: “Quiaari cinco tiaca jiyaniijia quiniutianiya”.

²⁰ 'Na nuhuaji, tamonu na seruuri nocua nimiaajuhuj. Na jiyaniijia sequeeseeri: “Jiyaniijianaa, niya quiya quia cumanee quia niqutiosano janiya. Janiyari na cojuacanu maniniani, toqueraujinia jiuniocosano. ²¹ Janiyari naa mi-iquianuni cua pueresacari quiajaniya. Janiyari niishiyani, quiaari quiarta pueyacia taraajeyashijia. Quiaari tamasaca racatasanojiniji poojua. Quiaari tamasaca natoosanojiniji senoojuajuhuj”. ²² Na jiyaniijiaari na juaarii: “Sesaacanaa, tama quia sequesanojaja janiyari quia nequesoreenu-taniyani. ¿Naatee? ¿Quiaateeri niishiquianu janiyari pueyacia taraajeyashijiani? ¿Janiyateeri tamasaca racatasanojiniji poo-juani? ¿Janiyateeri tamasaca natoosanojiniji senoojuajuhuj? ²³ Quiaa jaara jiyaniquianu janiya naa miijiani, ¿casaara

cua cumanee quia niquitioyaquiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriatasuhuanu, cua tiajinia cua tiuquishacariuhua”. ²⁴ Cunora, na jiyaniijiaari tii quiniaa pueya sequeree: “¿Cua cumanee nia jaariutiare cuno! Nia niquitioyare cua maninia seru, cante diez cumaneeca jiitiaacujani”. ²⁵ Nojoriiri na sequeree: “Jiyaniijianaa, ¿casaarateni? Nojuacuaja tari diez cumaneeca jiitiaa”. ²⁶ Jiyaniijiaari saaja nojori riucuaaree: “Seetanujuanaa nia sequeyanijia, cante tari jiitiaani, nojuajaari socua niquitiosaanutaniya. Cante na jiitiaaquiyani, secaja na jiitiasanoori puetunujuaanaa jaariutiasaanutaniya, cucua tiuyashijia na quiniuucua. ²⁷ Quiarijia, cua paraa saniniuujia, cuno pojori canapuate cua paniyaquiquianu nojori jiyaniijia cua quiniuriani, miji nia jayore nojori. Niya cua niquiara nia puecoore cua ruuretajaca seque”.

Jesu tiuquishacari Jerusalén tiacajinia
(Mt 21.1-11; Mr 11.1-11; Jn 12.12-19)

²⁸ Nio na pohuatanu nuhuaji, Jesuuri na pueya puetaareecuahuaj Jerusalén tiacajiniara. ²⁹ Jaara cateca quiriquiaa tari Betfagé tiaca, Betania tiacanio, Olivo cuhuariquia tuhuananujuhua, Jesuuri caapiqui na pueya sequeree:

³⁰ —Cuno shiitianiyojua tiacajinia nia quiaare, pa tacoji niquishiyani. Niaa jaara tiuquishii, niaari burro riuriatanutaniya morotasano, pueyano cajishoojua na nijinia. Niaa jaara na niquishii, niocua na samaacartasee. Niaari na jaatucumohua miji. ³¹ Pueya jaara nequesotare niajaniya casaara nia samaacartaanoj, niocua na riucuaare: “Jiyaniijia na paniya”.

³² Jesu pueyari quiaaree. Nojoriiri na riuriatasee taa Jesu sequequiaaricujani. ³³ Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

³⁴ Nojoriiri na riucuaaree:

—Jiyaniijia na paniya.

³⁵ Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitirii na nijinia. ³⁶ Na quiasacari Jerusalén tiacajiniara, pueyari na toqueya muevojuaari nucuaco Jesuucua. ³⁷ Nojori rosetanu panishacari Olivo cuhuariquia tuhuananujiniji, puetunu Jesu pueyajanaari juhuacatecara nacoquiaari nojori shuquiriniutia. Nojoriiri Jesu maniniuhuaqueetariquiaa puetunu na cumaacata na miishanojuanaa nojori niquiniuucua. Nojoriiri cunora

jiyanohua shuquiritariquiaa Pueyaso. ³⁸ Nojoriiri naa na-cooriquiaa:

—¡Pueyaso cuaara shuquiritiiria pa Jiyaniijia, Pueyaso Jiyarosano na quiniuucua! Pueyaso pocua taraajerohuani. Pa jiyanoorihuani. ¡Nojuajaari jiyanoohua maninia! ¡Pa shuquiritiarenøj!

³⁹ Cuniqúi pueya tajinia quiniaa Fariseocuaca tojishacari naa nojori sequesantej, nojoriiri Jesu sequeree:

—¡Niishitiojonanaa, quia pueya quia sanaajare, maja naa nojori sequenura!

⁴⁰ Jesuuri saa sequereejaa:

—Seetanujuanaa nia sequeyanijia, nio pojori jaara sanaajetare, ¡sairi saniniuujia nacoanutaniyacujua!

⁴¹ Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quiniaacua nujuqueree. ⁴² Cunora, juhua pueyano sequeree Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniuriajuhuaj. Taraatia quiijanaa, quia Jiyanooriquianoori juucua niya quiya. Majaari quia niishiniu nojuaja, juhua nimishitiu quia quishacari. ⁴³ Cunora, na nuhuajiiri jiyanoohua taraatia quiniutianiya quiara. Quia paraari quia mataconutaniya quia shocuaqueya, na cosenura maninia quiajaniya quia mashiyaquiniuucujaji. Naacuajitij, quia paraari quiocua juhuacanutaniya na miaquejonura quiajaniya.

⁴⁴ Quiaari jiyareta sureesaanutaniya. Quia tiacajinia quiniaari puecoosaanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa miishaanutaniyatej quia niishiyaquiniuucua, Pueyasoori quiocua niquiaari najuhuanaj, quiocuaji na tacunura juucua. Quiaari saaja na ruuretacanu.

Jesu jaacasacari seya niqutiojonaa Pueyaso Secojoua tiajiniji

(Mt 21.12-17; Mr 11.15-19; Jn 2.13-22)

⁴⁵ Na nuhuaji, Jesuuri Pueyaso Secojoua tiajinia tiuquiquiaari na pueyata. Nojuajaari juhuacatecara pueya tohuatanijioree, canapuate na seya niqutiojoriquiaacuajani Pueyasocuara puecoosocoriquiano. ⁴⁶ Jesuuri nojori sequeree:

—Tariucuacaanu Pueyaso Rupaajinia naa naajio-tasaquiaariti Pueyaso sequesano: “Cua tiaari pueya

secojonuujua janiya”. ¡Niari saniniuujia na jiyatecanu nohuasenuujuaca quiquiora!

⁴⁷ Puetunu juucajanaa, Jesuuri jiyacari pueya niishitiojoriquiaa Pueyaso Secojojua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari roojotooriquiaa juucua taa na motunutaniya Jesuni. ⁴⁸ Puetunu pueyajanaari saaja shamaatia tojitiariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriquiaa Jesu.

20

Pueya nequesotasacari Jesu, cante na jiyaronani
(Mt 21.23-27; Mr 11.27-33)

¹ Tamonu juuca, Jesuuri Pueyaso Secojojua tiajinia niishitiojoriquiaa. Pueya niqiuara pohuatariquiaari taate nojori naata Pueyaso muerasura quiniuni. Jiyacaritij, pueyacuara secojonaa jiyaniijianucuaari Jesuucua nijomaa. Moisés Rootasanojiniji niishitiojonaari nojoritia nijomaa-juhuaj, narta Judiocuaca camarucuanio. ² Nojoriiri Jesu nequesotaree:

—¿Cante quia jiyatecanu Pueyaso Secojojua tia jiyaniijia quia quiniuriani? ¡Canaa quia riucuaire! ¿Cante quia jiyaronani?

³ Jesuuri nojori sequeree saniniuujia:

—Janiya nia nequesotanu panijahuaj. Cua riucuaire. ⁴ ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

⁵ Nojoriiri juhuacatecara tamajaaja pocoojoquiaari. Tama sequetooriquiaajaarijia:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?” ⁶ Saniniuujia, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricuajaari sequequiaa: “Juanna seetanujuanaa Pueyaso sequenu panishano caminiujiunia quiquiaari”.

⁷ Nojoriiri cunora Jesu riucuairee:

—Johuaj. Maja canaa niishiniu canaquitijia Juan jiyaroquiaari na tiuquinijionura pueyatej.

⁸ Naaratej, Jesuuri nojori sequeree:

—Janiyahuaj, majaari cua sequenu quiniutaniya nianianiya, cante cua jiyaroquiaarini naa cua miiniuriatej.

*Miriqui Jesu pohuatasano sesa miijiaca poonijionaaajiniji
(Mt 21.33-44; Mr 12.1-11)*

⁹ Na nuhuaji, Jesuuri pueya niishitiojonu coteero-huacuhuj nio miriqui pohuatasanota. Sequereeri:

—Tamonu pueyanoori cuhuariquiajinia uva natoouquiaari. Na nuhuaji, na niqutioquiaari tamasaca pueyari, nojori cojuanura nera. Na camaruuri tucuacaanu quiaaree, tii na shocotejonura marijia. ¹⁰ Uva quishacari noshuriu-jua, saniya cuhuariquia camarujuanaari na seru jiyaroree cuhuariquia cojuanaa pueyacua. Jiyarosaareeri tiji na masenura na camarurajanaa, uva carojotasanojiniji. Na camarujuanaacuajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia camaru seru tiuquishacari, ¡cuhuariquia cojuanaari na piquitiurii saaja! Na jiyaroturohua juhuasu-
uri. ¹¹ Cunora, cuhuariquia camarujuanaari tamonu na seru jiyaroree. Cuhuariquia cojuanaari na miitiurii sesajuhuj. Na saarijotureeri. Na piquitiuriiri. Na jiyaroturohua juhua-sujaariuhuj. ¹² Cuhuariquia camarujuanaari socua tamonu na seru jiyaroree nojoriicua. Nojoriiri sesa miitiurii nojuajuhuj. Na nuhuaji, nojoriiri na caponeeree cuhuariquiajiniji tariucua naatishano.

¹³ 'Naaratej, cuhuariquia camaruuri tama sequereajaaja: “¿Taa cua miiniutianiyarini? Quiyanuniyojua jiyaroreera-
aqij. Cuno pojori jaara cua panishano niyanu niqutiuri, maja naasucua nojori rerequetenu quiniutianiya nojuaja”. ¹⁴ Saniniuujia, cuhuariquia cojuanaa jaara cuhuariquia camaru niyanujuanaa niquirii nojoriicua niyano, tama nojori-
jiaarijia sequetooree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. ¹⁵ Naacujitij, cuno cuhuariquia cojuanaa pueyari cuhuariquia camaru niyanu jaatiurii cuhuariquia-
jiniji. ¡Cuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniuucua neyanutej, ¿taa na que miiniutianiya cuno sesa pueyarini? ¹⁶ Seetanujuanaa nia sequeyanijia, nojuajaari nocua quianutaniya nojori na puecoonura. Na nuhuaji, na cuhuariquia niqutionutaniya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—¡Juhuej! ¡Pueyaso cuaara naa miyaquiiriাতেj!

¹⁷ Jesuuri nojori niqinijioree. Nojori sequereeri:

—¿Naatee? ¿Nio naajiotasanoorihuaj, tariucuacaanu Pueyaso Rupaajiniyani? ¿Niaate niishiya casaa na sequeyani? Naa sequeyariquij:

“Saitia tianaa pueyari tamonu saajia soojotanutaniya, nojori jiyanihacari cuno saajia sesarujau. Na nuhuaji, cuno saajiaari socua panishano saajiara jiyatesaanutanihua”.

¹⁸ Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanoocua tiyare, cuno pueyano jacanajonutaniyari. Shahuej.

¹⁹ Jiyacaritij, pueyacuara secojonaa jiyaniijianucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirii, Pueyaso saquiriojosano Israel pueya jütianaa nojori quiniuucua, Jesuuri miriqui pohuatariquiaa nojoriijiniiji, tianaajiniiji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijiaca pueya.

Jiya jiyaniijia cuaara niqutiosaaria na sequesano cumaneeca

(Mt 22.15-22; Mr 12.13-17)

²⁰ Naaratej, nojoriiri tamasaca pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocuatenura sesa juucua, nocuara tonujusaanura. Jesu jaara nojori riu-cuaquiaari sesa, maara Romano jiyaniijia niqutiosaaquiaari saniitiosocoriquiano. ²¹ Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuj, majaari rimiajata quia niquiniu pueya. Quiaacuajaari seetanujuanaa niishitiojoquiaa, taa Pueyaso paniya canaa miniuriacuajani. ²² Cunora, canaa quia sequere taa canaa miniutianiyan. Roma tiacajinia quijia jiyaniijiaari pa sequesquiaari Judiocuaca cuaara cumaneeca niqutiojooora nera, na jütiasano pueya pa quishacari. Naaratej, ¿maninateeri pa miiniuria na sequesano?

²³ Jesuuri niishiquii nojoriiri nojuaja nequesotariquiaa nahuhanaj, nojori sapojonuta. Cunora, nojori sequereeri:

²⁴ —Cua niqutiri quia cumanee. ¿Nioorihuaj? ¿Cana naaquiti nocuani? ¿Cana sesate nocua naajiotasanoni?

Jesu riu-cuatureeri:

—Cunocuaja canaa sequesano Roma tiacajinia quijia jiyaniijia César naaqui, na sesajuhuj.

²⁵ Jesuuri nojori sequereeri:

—Jiyaniijia César cuaara tama na casaajaaja niqutiosaaria. Nojuacuajaari na camaru. Saniniuujia, Pueyaso nia niqutiore cutara nerano tama na casaajaaja. Nojuajaari pa camarnu.

²⁶ Saaja maninia Jesu riucuasacari pueya niquiara nojori, majaari nojori naata nocuara tonujunu quirii. Nojoriiri saniya jiuujiateree Jesu riucuasacari saaja maninia nojori. Naacuajitij, nojoriiri socua sanaajetaree.

¿Paate samiitiaconutaniuhua?
(Mt 22.23-33; Mr 12.18-27)

²⁷ Na nuhuaji, noojiaqueya Saduceocuacajinijiniori Jesu-ucua niqiaari. Saduceocuacaari jiyaniijia macunucua pueya maja na samiitiaconu quiniutianiuhua. Naaratej, nojoriiri Jesu sequeree:

²⁸ —Niishitiojonanaa, supuetana Moisés cuajaari pa rootaa na naajioneejina, pueyano jaara cusoyare mueyaju, tarajanu cuaara camiria mashiquio, mueya na mueratenura tarajanu niti. ²⁹ Tamonu mashajaari seis tapueyocucaraca quiqiaari. Nojuajaari jiyapueranu quiqiaari. Coteenu camiquaariiri. Nojuajaari cusoquiaari muetuhuoju. ³⁰ Cunora, na nuhuajishanaari na mashiquio camirii. Nojuajaari muetuhuoju cusoquiaarijiuhuj. ³¹ Naaratej, neyaca tarajanuuri mashiquio camiquaarijiuhuj. Nojuajaari muetuhuoju cusoquiaarijiuhuj. Puetunu cuno mashiquiorijianaari naa camiyocuaari cuno maajitia. Puetunu nojorijianaari cusunuuquiaari muetuhuoju. ³² Na nuhuaji, pueya mashiquioori shaajequiaarijiuhuj. ³³ Naacuajitij, macunucua jaara samiitiacorohua, ¿teyano cuno siete neyacaajinijiniote setanu neyacajanaa quiniutianiyaari? Cuno mashiquiocuajaari puetunu cuno siete pueya niqiuocua quiqiaari.

³⁴ Jesuuri nojori riucuaaree:

—Mijiria pa quishacarijia, canuu, maajipohuari camiyocuaa. ³⁵ Saniniuujia, majaari noo pojori camiyonu quiniutianiya canapuate samiitianijiosaanutaniuhuacuajani, maninia quiijaca nojori quiniucua Pueyaso niquiara mijiria. ³⁶ Majaari nojori shaajenu quiniutianiuhua. Nojoriiri shaajeyashijaca quiniutianiya juhua Pueyaso seya. Nojori samiitiaconuucua macujiniji, cunora, nojoriiri Pueyaso muerasujanaa quiniutianiya cutara. ³⁷ Supuetana Moisés cuajaari pa niishitiquiaari, macunucuaari samiitianijiosaanutaniuhua. Moisésri naa naajiotaquiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuaj”.

³⁸ Naacuajitij, paari niishiyani, puetunu Pueyasooqua tiuujiaca shaajecono pueyajanaani, nojoricuajaari saminiucua quiya Pueyasora. Pueyasoori maja macunucua Jiyaniijia. Na pueya shaajeconocuaajaari saminiucua quiya nera cutara.

³⁹ Noojiaqueya Moisés Rootasanojiniji niishitiojonaa pueya tojishacari naa Jesu sequesantej, nojoriiri Jesu sequeree:

—Maniniacuajaari quia sequesano, Niishitiojonanaa.

⁴⁰ Naa Jesu rihuanesacari saaja maninia nojoritij, majaari socua pueya nequesoreenu paniniu quiriquiaa nojuaja.

¿Cante Cristo supuetanani?

(Mt 22.41-46; Mr 12.35-37)

⁴¹ Jesuuri naa nojori nequesotaree saniniuujia:

—¿Casaara na sequesaaquiaacuaraarini, Pueyaso Jiyarosanaari supuetana David niquiohuacuajinio supuenutaniya? ⁴²⁻⁴³ Supuetana Davidjanaacuajaari naa naajiotaqueaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuaara quia paraa shocotare puetunujuanaajaatijia’”.

⁴⁴ ¿Cristotucua taa David niquiohuacuajinio supuereni? Davidcuajaari na sequeya “cua Jiyaniijiaata”.

Cuno pueyari maja na naata na riuquanu quiriquiaa.

Jesu numootesacari na pueya, Moisés Rootasanojiniji niishitiojonaa pueyacuaji

(Mt 23.1-36; Mr 12.38-40; Lc 11.37-54)

⁴⁵ Puetunu pueyajanaa tojitasacarijia Jesu, Jesuuri naa na saquiriojosano pueya sequeree:

⁴⁶ —Tama nia cuaqueyajaaja nia cojuare Moisés Rootasanojiniji niishitiojonaa pueyacuaji, nia miyaquini-uucuaaji taa nojori miiquiaacuaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuanura nojori juhua tojishano pueya, nojori rucuanesacari tiaca jiuujiajinia curotasano cajitiucuajinia. Nojoriiri socua panishano cajitiucuajinia cajiniu maniniucuaquiaa Pueyaso Secojoqua tiajinia, tamasaca tiajiniajuhuaj, nojori jaara masuusaare queranacunura. ⁴⁷ Naajuhuaaj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajitij, pueya niquiara, nojoriiri najuhuana tucuyocua secojoquiaa Pueyaso, pueya jiyaniuria nojori maninia pueya cutara. Naa

nojori miiniuucuatej, nojoriiri jiyanhua saniitiosano quiniutianiya.

21

Casamiiju mashiquio niqutiosacari na cumanee juuranee Pueyasora

(Mr 12.41-44)

¹ Pueyaso Secojoua tiajinia, Jesuuri casamiriaca pueya shootiariquiaa na cumaneeca niojiyano cumaneeca racataja quiquiojinia, nojori niqutiosano Pueyasora. ² Jesuuri tamonu casamiiju mashiquio niquiriijuhua caapiqui cumaneeniyojua niaano tiijihuaaj. Na niasanoori nareja cobrejinihi shipinishano cumaneeca quiquiaari. ³ Jesuuri na pueya sequeree:

—Seetanujuanaa nia sequeyanijia, cuno casamiiju mashiquioori socua queraatia niqutioree Pueyaso, cuno casamiriaca pueyajinihi. ⁴ Puetunu cuno pojorijianaari saaja na cureeno cumaneecajinihi niqutiojiya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneecajanaa niqutioree.

Jesu pahuatasacari, Pueyaso Secojoua tia niyartasaanutaniya

(Mt 24.1-2; Mr 13.1-2)

⁵ Noojiaqueya tii quiniaa pueyari pocoojoriquiaa Pueyaso Secojoua tiajinia. Jiyanhua shanhua saitia shipinishano quiriqiaari. Nojoriiri na shootiariquiaa, naajuhuaaj taa na maniniushitishaaquiaari nareja pueya niqutiojosano casamitiani. Jesuuri nojori sequeree:

⁶ —Puetunu cunujuanaa niaa na niqiyani, tamacari niyartasaanutaniyari. Majaari quenaaja tamonu saajia cureenu quiniutianiya tamonu caco maano. Puetunu niyartasaanutaniyajanaari.

Taa nio jiya puequenu panishacari quiniutianiyani

(Mt 24.3-28; Mr 13.3-23)

⁷ Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casaa canaa niqiniutaniyarini, canaa niishiniuria quia sequesanoori quera tohuateya?

⁸ Jesuuri nojori riucuaaree:

—Tama nia cuaqueyajaaja nia cojuare niaa mariqui sapojosaareeri. Queraatia sapojonuujuaca pueyari supuentaniya. Nojoriiri sequenutaniya: “¡Janiya Cristoni, Pueyaso Jiyarosano! ¡Nio jiya quera puequeya!” Niaa jaara naa sequesaretej, majaari nia tojiniu cuno sapojonuujuaca.

⁹ Naajuhuj, majaari nia puerenu niaa jaara tojiri tamonu jiyajinijinio pueyari tamasaca jiyacajiniji pueyata miaquetoojiya, naajuhuj, pueya jaara juaatiooquiaa tama nojori jiyaniijia nojori jatanurajaaja. Naa quiniutianiyari coteenu. Naajaa, juhuanojuaja maja nio jiya puequesacari.

¹⁰ Jesuuri naa nojori pohuatariquiaa socua:

—Tamonu rupaa pocujacaari miaquetoojonutaniya tamaatia rupaa pocujacata. Naajuhuj, tamonu jiyajinijinio jiyaniijiaari miaquetoojonutaniya tamonu jiyajinijinio narta jiyaniijiaata. Naa queraatia miaquetoojonuuri quiniutianiya. ¹¹ Rijiaari jyanohua jiuuquiujitnutaniya queraatia jiyacajinia. Jyanohua miaajenuuri quiniutianiya queraatia tamonu jiyacajiniajuhuaj. Paaqueja cusuuri quiniutianiya niya, tamaquicuajuhuj. Naajuhuj, jyanohua puereeta casaari niquishaanutaniya jiyocuacaanu, mijiria quiniaa niishiniuria jiya puequenuraari tari catecanoya.

¹² 'Cuno puereeta quiyaquishacarijia, niaari quioosaanutaniya naquiya nia miishaanura, cua pueya nia quiniuucua. Niaari jaatucusaanutaniya Pueyaso secojonuujua tiajinaqueya nequesoreesocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoreesocoriquiano. Niaari naa miishaanutaniya nia pohuatanuucua janiyajiniji pueya niqiara. ¹³ Naacuajitij, nia naata cuno jiyaniijianucua niqiara pohuatanu janiyajiniji. ¹⁴ Nioojiaca nia cajitiri, maja juhuacarijia nia niishiriojonura taa nia riucuanutaniya nojorini. ¹⁵ Janiyacuajaari jiyacari nia niishitiojonutaniyani taa nia riucuanutaniyanon, mariyata casaa nia pohuatanutaniya jyanohua cua niishitiajatani. Niaari nojori sanaajanutaniya maninia nia rihuanesacari saaja. Nia paraari maja na naata nia sequesano rerequetenu quiniutianiya. ¹⁶ Jiyacarijiuhuj, tama nia queyajaarijia nia tacartanutaniya, cua pueya nia quiniuucua. Nia tapueyocuacaari nia tacartanutaniyajuhuj, nia jiyasoocujinino supueno pueyajuhuj, nia rupuenanio. Nojoriiri noojiaqueya niajanijini puecoonutaniya. ¹⁷ Puetunu mijiria quiniaa pueyajanaari nia niquiniu paniyaquiniutianiya cua pueya nia quishacari. ¹⁸ Naajaa, majaari nia puerenu. Majaari quenaaja niquiriyatu muesu shaajenu quiniutianiya nia nacajiniji, Pueyaso jaara paniyaquiri. Pueyaso jaara naa nia muesu cojuaacuaa, ¿maatucua casaara cojuaaquiri saniya niajaniani? ¹⁹ Naaratej, rejeretajaca nia quiri. Naa cutaraari shacantuuca quijiacara jatanishaanutaniya pueyaracaanu

nia rishiniuria, niaa jaara cumaatia nujuatare pueya miishacari sesa niajaniya.

²⁰ Niocua niishiri Jerusalén tiaca tari niyartasaanutaniya, niaa jaara na paraa niquiri puetunu na shocuaqueyajanaa maano. ²¹ Jiyacaritij, canapuate Judea jiyajinia quiyani, cuno pojori cuaara mashiiria tuhuananuhuacua. Canapuate Jerusalén tiacajinia quiyani, nojori cuaara ritia mashiiria tiji. Canapuate na cuhuariquijania quiyani, nojori cuaara tacateyaquiuhuara Jerusalén tiacajiniohua. ²² Cuno quishacari, jiyanhua saniitiosacariiri quiniutianiya. Jiyacaritij, puetunu Pueyaso Rupaajinia naajiotasanojuanaari tohuateenutaniya. ²³ Jiyanhua taraatia quiniutianiyari noo maajipohuara, canapuate manajaatohua quiya jiyacarini, mariyata canapuate conaaja supueja jitiaani. Jiyanhua naquiya quiniutianiyari cuno quishacari nio jiyajinia. Nio jiya pueyari jiyanhua saniitiosaanutaniya. ²⁴ Noojiaqueya nojorijinijinoori puecoosaanutaniya tahua miaquetoosacari nojoritia. Tamasaca nojorijinijinoori quioosaanutaniya. Nojoriiri puetunu jiyacajiniarajanaa rijiosaanutaniya poonitijosocoriquiano. Taucuacaari Jerusalén tiaca jitianutaniya tama nojoririjaaja, Jerusalén tiaca nojori jitianu cuaara puequerejaatijia, taa Pueyaso sequequiaari tamajacuajani.

*Taa na quiniutianiyani Jesu tacatesacariuhua
(Mt 24.29-35, 42-44; Mr 13.24-37)*

²⁵ Mijiria quiniaa niishiniuria jiya quera puequeya, nojoriiri puereeta casaa niquiniutianiya pananujinia, racajinia, riyajiniajuhuaj. Shoniniacu caminiaacuaji shiriiquitiuniutianiyajaarihuaj, jiyanhua na queyocuasacari. Nojoriiri cushitiiniutianiya na pueretunutajuhua, jiyanhua cojuata shoniniacu caminia cajiniuucasacari. ²⁶ Mijiria quiniaari cusojonuunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuuquiutiasaanutaniya jiyanhua. ²⁷ Jiyacaritij, mijiria quiniaari cua niqutiuniutianiya cohuaja najacajinia niyano, jiyanhua shacantuca cua cumaacata. ²⁸ Naaratej, niaa jaara nio cua pohuatasano niquiri tari coteyano, niocua tama cumaquitiorejaaja. ¡Niocua timiri! ¡Niaacuajaari quera rijiosaanutaniya niiquiji, pueyaracaanu cuata nia quiniuria!

²⁹ Jesuuri nojori pohuataree nio miriqui pohuatasanojuhuaj:

—Higo naana nia niquiri, tamonu jaranacujua naanano. ³⁰ Na jaamasucua jaara mueratuure, niaari niishiya, taca-reejonuqui quera quiniutianiya. ³¹ Naajuhua, niaa jaara

puetunu cua pohuatasanojuanaa niquiri tari tohuateyano, niocua jiyacari niishiri, janiyari quera tiuquihuani, Jiyani-ijijajanaa cua quiniuria.

³² 'Seetanujuanaa nia sequeyanijia, puetunu cua sequesanojuanaari tohuateenutaniya Pueyaso tojitiaashijiaca pueya puequeyaquishacarijia. ³³ Jiya cajiniocua, mariyata nio jiyari shaajenutaniya. Cua sequesanoori saniniuujia puetunu tohuateenutaniyajanaa cutara, taa cua sequeyacuajani.

³⁴ 'Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutanio. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. ³⁵ Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyaquiji majaacuaani. ³⁶ Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tacoji, cua nequesoreesacari puetunu pueyajanaa.

³⁷ Jesuuri puetunu juucajanaa niishitiojojua Pueyaso Secojoua tiajinia. Saniniuujia, niucua quiojojuaari Olivo cuhuariquia tuhuananujinia tii na quiniuria. ³⁸ Puetunu pueyajanaari tariquicuaji quiojojua Pueyaso Secojoua tiajinia, nojori tojiniuria Jesu pohuatasano.

22

Judiocuaca camarucua rojotoosacari Jesu nojori quianura (Mt 26.1-5, 14-16; Mr 14.1-2, 10-11; Jn 11.45-53)

¹ Quera Pascuara queranacunuusacari quiquiaari, pueya miaquesacari pan na poreetajaaju shipinishano. ² Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari rojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jiyanohua queraatia pueya paniniuucua Jesu.

³ Jiyacaritij, Satanásri Jesu pueyano Judas Iscariote jiuujiajinia tiuquiquiaari. ⁴ Nojuajaari pueyacuara secojonaa jiyaniijianucuaacua quiaquiaari, Pueyaso Secojoua tia cojuanaa jiyaniijianucuaacuajuhua. Judasri cuno pojoritia pocoojoquiaari. Nojori sequereeri nojuaja na naata nojori

quiatenu Jesu. ⁵ Nojoriiri shuquiririi. Cunora, Judas seque-
 tureeri taa cumaneeca nojori niqutionutaniya nojuajani.
⁶ Judasri jaarajaaja nojori sequesano tojirii. Jiyacaritij, Ju-
 dasri juhuacatecara niishiriojoquiaari taa na quiatenutaniya
 Jesu jiyasohujani.

Jesu miaquesacari na nuhuajiria na pueyata

(Mt 26.17-29; Mr 14.12-25; Jn 13.21-30; 1 Co 11.23-26)

⁷ Poreetajaaju pan miaquenu juucaari tari quiquiaari.
 Cuno juucajuhuaj, borregoori mosano quijia, Pueyaso
 niqiara miaquesocoriquiano Pascuara queranacusacari.
⁸ Cunora, Jesuuri Pedro jiyaroree Juannio, nojori
 miaquesocoriquiano nojori majeetenura. Nojori sequereeri:
 —Nia quiaare. Borrego nia majeeteseecuaa pocuaji, pa
 miaquesocoriquiano quiarijia Pascuara.

⁹ Nojoriiri na nequesotaree:

—¿Tee quia paniya canaa majeetenurani?

¹⁰ Jesuuri nojori riucuaaree:

—Niaa jaara Jerusalén tiacajinia tiuquishii, niaari tamonu
 pueyano riuritanutaniya mohuaca taquitiaano patacojinia.
 Niocua na nuhuaji rupaamia na tiajinia. ¹¹ Cuno tia-
 jinia na tiuquishacari, niocua cuno tia camaru sequesee:
 “Canaa niishitiojona naa quia sequeya: ‘¿Teete sohuacani,
 cua pueyata cua miaquejara quiarijia Pascua niucuan?’ ”
¹² Nojuajaari nia niqitiniutianiya puereetuuca sohuaca,
 nataco na tiajinia, tariucua jeenucuasano. Niocua cuniqui
 miishii puetunujuanaa pa miaquesocoriquiano.

¹³ Jesu pueyari quiaaree. Nojoriiri puetunujuanaa riuri-
 ataquiaari taa Jesu sequequiaari nojoricuajani. Nojoriiri
 tii miishii puetunujuanaa, Pascua niucua nojori miaqueso-
 coriquiano.

¹⁴ Jaara tari quiquiaari Pascuara miaquesacari niucua,
 Jesuuri na saquiriojosano pueyata cajitiushii miaquejajinia.

¹⁵ Jesuuri nojori sequereeri:

—Janiyari jiyanohua niaata miaquenu paniriquiaa
 nio Pascua niucuan, pueya moyaquishacarijia janiya.
¹⁶ Seetanujuanaa nia sequeyanijia, majaari socua
 cua miaquenu quiniutianiya Pascuara, janiya jaara
 tiuquiriohuajaatijia puetunu Pueyaso muerasuranotajanaa.
 Jiyacari cutara, paari jatiqui miaquenutaniyani,
 Jiyaniijiajanaa cua quishacari.

¹⁷ Na nuhuaji, Jesuuri ratujua pataree. Pueyaso sequereeri:

—Paacarasho nio mashacara.

Na pueya sequereeri:

—Jajaa, nio nia masetare. Nia rature puetunu niajaniya-
 janaa. ¹⁸ Seetanujuanaa nia sequeyanijia, majaari socua cua

ratunu quiniutianiya uva caacajiniji, janiya jaara tiuquirio-huajaatijia, Jiyaniijajanaa cua quiniuria puetunu Pueyaso muerasurajanaa.

¹⁹ Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niqutiojoreeri. Nojori sequereeri:

—Nioori cua cuaqueya niaacuara mosocoriquiano. Niocua naa miiriquia pueyaracaanutej, nia niishiriojonura janiya.

²⁰ Nojori miaquenu nuhuaji, Jesuuri ratujua patareejuhuj. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

²¹ Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya.

²² Janiyari naa miishaanutaniyani taa janiyajiniji juhuacarijia pohuatasaaquiaaricujani tariucuacaanu Pueyaso Ru-paajinia. Saniniuuja, cua tacartanaari jiyanoohua taraatia quiniutianiya naa na miiniuucua janiya.

²³ Jesu pueyari jiyacari juhuacatecara nequesoreetoree tama nojorijiaaja:

—¿Canteeri na tacartanutaniyani?

Cante seetanujuanaa jiyaniijajanaani

²⁴ Jesu pueyari tama juayonuutariquiaajaacujua, teyano nojorijiniote jiyaniijajanaani. ²⁵ Jesuuri nojori sequeree saaja:

—Mijiria, jiya jiyaniijianucuaari jiyanoohua jiyaramiquiniu niishijia nojori jiiitasano pueya, juhua nojori poonitijosano pueya. Nojoriiri tama nojorijiniijiaaja sequeja: “Canaari maninia miiquiaa canaa pueyani”. ²⁶ Niajaniya saniniuuja, majaari naa nia quiniu juhua nojorijia. Cante socua tojishano pueyano quiya niajaniyajinijinioni, nojuaja cuara tama na cuaqueyajaaja jiyateyaquiiria na cumaaca paaretaja pueyacua. Cuara quiiria jacaria pocuaja. Naajuhuj, cante jiyaniijajanaa quiya niajaniyajinijinioni, nojuaja cuara jiyateera tama na cuaqueyajaaja juhua nia serura. ²⁷ ¿Taa nia sequeyani? ¿Cante jiyaniijajanaani? ¿Miaqueyano pueyanotee? ¿Na mianuutena soj? ¡Miaqueyano pueyanocuaja! Naajaa, janiyari juhua nia seru quiquiaa niaarani, maninia cua miiniuria niajaniya. Naajuhuj, naa maninia miijiaca nia quiriquia.

²⁸ Niaacuajaari pueyaracaanu cua cojiriquiaa janiya jaara saniniujiushaariquiaani. ²⁹ Naaratej, janiyari nia jiyatenu-taniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria. ³⁰ Naacuajitij,

niaari cua miaquejajinia cajitiuniutianiya cuata nia miaquejonura, cuata nia raruujunurajuhuaaj, Jiyaniijajanaa cua quishacari. Niaari mariyata jiyaniijianucua quiniutianiya, supuetana Israel doce niqiuohuacujinio supueno pueyapue nequesoreena nia quiniuria.

Jesu sequesacari Pedro, nojuaja nocuaji seetanutaniya
(Mt 26.31-35; Mr 14.27-31; Jn 13.36-38)

³¹ Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jyanohua na saniniujiuniuria niajaniya. Naacua-jitij, niaari jyanohua saniniujiushanutaniya, naatej, taa trigo quejooshiya jiyocuacaanucuaani, paratu panura na cocua. ³² Janiyari saniniuujia Pueyaso secojoree quiocuara cutarani Simónnaa, cucua tiuuniu quia tarinitiaaquiniucuaaji. Naacua-jitij, quiaa jaara quioojia tacatorohua cucua, quiocua quiarta pueya cumaquiriohuajuhuaaj, nojori tiuuniuria seetanujuanaa pueyaracaanu cucua.

³³ Simónri Jesu sequeree:

—¡Cua Jiyaniijianaa, quiaa jaara nujuatejojuajinia nujuate-saare, janiya cuara nujuatesaaria quiatajuhuaaj! ¡Quiaa jaara mosaare, naajaa, janiya cuara cojiritiasaaria quiajaniya-juhuaaj!

³⁴ Jesuuri na sequeree:

—Pedronaa, seetanujuanaa quia sequeyanijia, caacaraja niunijyaquishacarijia quiarjia, quiaari tari naa cucuaji seetanu caminiujiuniutianiya pueya niquiara: “¡Maja cua ni-ishiniu Jesu!”

Quera Jesu miishacari taraatia

³⁵ Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoqueejuni, cumaneeca quiquioaju, sapatuujunio, ¿niaateeri nia panishano casaa niquitioyaquishaaquiaari?

Nojoriiri Jesu riucuaaree:

—Maja. Canacuajaari puetunu canaa panishanojuanaa niquitiojosaaquiarini.

³⁶ Jesuuri nojori sequeree:

—Quiarjia saniniuujia, cante caashoqueracani, cuara na pataara. Cante cumaneeca quiquioracani, cuara na pataarajuhuaaj. Cante nijiniaquetucuaaja mueruu jiitiaaquiyani, cuno cuara niquitioora na shiniquiaacuaji toque, nijiniaquetucuaaja mueruu na masenura na toque samitia. ³⁷ Seetanujuanaa nia sequeyanijia, tariucuacaanu Pueyaso Rupaajinia

janiyajiniji naajiotasanoori tohuateenutaniya. Janiyajiniji naajiotasanoori naa sequeyatej: “Nojuajaari jiyaniishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaaricujani.

³⁸ Nojoriiri Jesu sequeree:

—Jiyaniijianaa, niya quiya caapiqui nijiniaquetucujaja mueruu.

Nojori riucuaereeri:

—Tariucujaja.

Jesu secojosacari Pueyaso, Getsemani cuhuariquiajina
(Mt 26.36-46; Mr 14.32-42)

³⁹ Na nuhuaji, Jesuuri tohuataquiaari tiajiniji. Olivo cuhuariquia tuhuananujiniara quiaaereeri. Nojuajaari cuniqui quianura jitiquiaari. Na saquiriojosano pueyari na nuhuajiyaree. ⁴⁰ Na tiuquishacari tii, Jesuuri nojori sequeree:

—Pueyaso nia secojore, niaa mariqui sesa miiriiri niaa jaara saniniujiushaare.

⁴¹ Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojoquetasee Pueyaso secojonuraari. ⁴² Naa secojoreeri:

—¡Cua Quenaa, maja cua miiniu paniniu naquiya! Naa-jaa, janiya cuara miyaquishaaria taa cua paniyani. Janiya cuara miishaaria cutara taa quia paniyacujani.

⁴³ Jiyacaritij, Pueyaso seruuri jiyocuacaanuji nocua nimiaa na cumaquiniuria. ⁴⁴ Jesuuri jiyanohua naquiya miiriquiaa. Noojiaari quera jiaqueriquiaa na tacaaniutia. ¡Jiyanohua, jiyanohua secojoriquiaa Pueyasoori! Cunora, na paneyacaari puereetujuaaca juhua nanaca quiriquiaa, na caate-sacari jiyocua. ⁴⁵ Na secojonu nuhuaji, Jesuuri sanerohua. Na pueyacuatacategyarohuari. Nojori niquishuhua maquetiuyano saajaari, puera nojori taraajenuucua. ⁴⁶ Jesuuri nojori sequeree:

—¿Casaara nia maquetiuyani? Nia saneecuatere. Pueyaso nia secojore na cojuanura niajaniya, maja sesa nia miiniuria niaa jaara saniniujiushaare.

Judiocuaca camarucua quiasacari Jesu
(Mt 26.47-56; Mr 14.43-50; Jn 18.2-11)

⁴⁷ Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajinijinio quiquiaari. Judasri Jesuucua nimiaajanaa. Na saruhuataseeri na nuju-unuta. ⁴⁸ Jesuuri na sequeree:

—Judasnaa, ¿quiaate tama cua tacartaajaaja, quia nuju-unuta sapojonu janiya?

49 Jesu pueya niquishacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

50 Tamonu nojorijinijiniori pueyacuara secojonaa jiyaniijia seru pirii na mueruuta. Saaja na miaquetajara numoco jaatereeri. 51 Jesuuri na sequeree:

—¡Tariucujaja! Maja naa miiniu.

Jesuuri numoco ririi. Na ruporohuari. 52 Judasta quiriquiaari pueyacuara secojonaa jiyaniijianucua, Pueyaso Secojojua tia cojuanaa jiyaniijianucujuhuaaj, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequeree:

—¿Casaara cucua nia nijioree nijiniaquetucujaja mueruutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej? 53 Pueyaracaanu cua quishacari niaata Pueyaso Secojojua tiajinia, majaari nia quianu quijia janiya. Naajaa, quiarijia cutaraari niajaniyara, nia panishano nia miiniuria janiya. Quiarijiani, Sesaacaari cumaacaraca na panishano na miiniuria.

Pedro seetasacari Jesujiniji

(Mt 26.57-58, 69-75; Mr 14.53-54, 66-72; Jn 18.12-18, 25-27)

54 Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajinia. Pedroori tucuaaanuji na nuhuajiriquiaa. 55 Jiyacaritij, pueyari jiyaniijia tia carijiniacuma mani noshitirii. Na shocua cajitiuriohuari. Pedroori nojori tajinia cajishiijiuhuaaj. 56 Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuaaj.

57 Pedroori seetaree. Naa sequereeri:

—Niyacoonaa, ¡majaari quenaaja cua niishishano cuno pueyano!

58 Na nuhuaji, tamonu pueyanoori Pedro niquiriijiuhuaaj. Nojuajaari cuno jiyaniijia seru quiriquiaajuhuaaj. Pedro sequereeri:

—¡Quiaaqui cuno pojorijinijinio pueyanojuhuaaj!

Pedroori saa sequereejaa:

—¡Maja, pueyanonaa! ¡Janiya maja nojorijinijinioni!

59 Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocujajaari cuno pueyanota quijia. Nojuajaari Galilea jiyajinijiniojuhuaaj.

60 Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacarajaari niunijioree. ⁶¹ Jiyaniijia Jesuuri tacatequee. Na nijiniara niquirii Pedroori. Pedroori jiyacari Jiyaniijia sequesano nojuaja niishiquii, naa na sequesantej: “Quiaari tari seetanu caminiujiuniutianiya janiyajiniji pueya niquiara, caacaraja niunijiyaquishacarijia”. ⁶² Pedroori cuniquiji tohuataquee. Jiyanoohua nujuquereeri na taraajenuta, sacuaraatia na seetanuucua.

Pueya macaatishacari Jesu
(Mt 26.67-68; Mr 14.65)

⁶³ Jesu cojuanaa pueyari Jesu macaatiriquiaa. Nojoriiri na piquitiuriquiaa. ⁶⁴ Nojoriiri Jesu namijia morotuquiaari coteenu. Na jiquioco piquitiuriohuari. Na nuhuaji, na seque-
tureeri:

—¡Quia niishiritioj! ¿Cante quia piriini?

⁶⁵ Nojoriiri socua queraatia sesa casaa sequeturiquiaa na macaatinuria Jesu.

Judiocuaca jiyaniijianucua nequesoreesacari Jesu
(Mt 26.59-66; Mr 14.55-64; Jn 18.19-24)

⁶⁶ Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucuaata, mariyata Moisés Rootasanojiniji niishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tajoji, nojori nequesoreenura tii nojuaja. Nojoriiri naa Jesu nequesoreeree:

⁶⁷ —Canaa quia sequere, ¿quiaate Cristo, Pueyaso Jiyarosano?

Jesuuri nojori riucuaaree:

—Janiya jaara nia sequereni: “Taaquiriirinij”, niaari saaja cua sequenutaniya: “Quiaa sapojiya”. ⁶⁸ Saniniuuja, janiya jaara nia nequesoreere Pueyaso Jiyarosanojinijini, majaari nia riucuanu quiniutianiya janiya. ⁶⁹ Naajaa, quiarijiani, janiyari puetunu cumaacaraca Quijiajanaa miaquetajara cajiiniutianiya jiyocuacaanuni.

⁷⁰ Naa Jesu sequesacaritij, puetunu nojorijianaari na sequere:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucuaaree:

—Taaquiriirinij. Naacuaaquinatejaj, taa nia sequeyacua-jani.

⁷¹ Nojoriiri tama sequetooreejaaja:

—¿Paatucua casaara socua tamonu pueyano pajere nocuara tonujuriquianoni? Paacuaajaari tari tama pa numaatajaaja sesa na sequesano tojitiareeni.

23

Pilato nequesoreesacari Jesu

(Mt 27.1-2, 11-14; Mr 15.1-5; Jn 18.28-38)

¹ Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pilatoocua. ² Cuniqúi, nojoriiri juhuacatecara Jesuucua saquiriojotaree na sapojonuta. Pilato sequetureeri:

—Canaari nio pueyano niishiyani. Nojuajaari canaa Israel pueya nasojoquiaa pocuara. Nojuajaari niishitiojoquiaa-juhuaj, maja canaa Israel pueya niqutiojonura canaa cumaneeca pa jiyaniijiajanaa Césarra, taa César sequequiaaricua-jani. Naajuhua, tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

³ Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucuaaree:

—Taaquiriirinij. Naacua, taa quia sequereecuajani.

⁴ Jiyacaritij, Pilatoori pueyacuara secojonaa jiyaniijianucua sequeree, pueya maanunio:

—Nio pueyano nequesoreeree tarinijia. Nojuajaari maja sesa miiijia.

⁵ Nojoriiri saaja socua jiyacaterree Jesuucua tonujunu. Naa sequetureeri:

—¡Nojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarijia, niya niishitiojiyajaariuhua Judea jiyajiniani.

Jiyaniijia Herodes nequesoreesacari Jesu

⁶ Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinijinio?

⁷ Nojoriiri na riucuaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. ⁸ Nojuajaari pueyaracaanu Jesu niqini-uucua jiaatiaja juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumacata niqiniu panijia juucua. Naacujitij, na niquishacari Jesu, nojuajaari timirii. ⁹ Herodesri queraatia nequesoreeree Jesu. Majaari quenaaja Jesu riucuanu quiquiaari nojuaja.

¹⁰ Pueyacuara secojonaa jiyaniijianucuaari tii quiriquiaa-juhuaj, Moisés Rootasanojiniji niishitiojonaanio. Cuno pojoriiri jiyanoehua Jesuucuaara saquiriojotariquiaa queraatia sesa casaa. ¹¹ Herodesri na soldadohuata Jesu rerequeriquiaa. Na macaatiriiri. Na cushitirii jiyanoehua shanoehua toqueeri juhua jiyaniijia cushishano. Na nuhuaji, Herodesri pueya jiyarotrohua Jesu Pilatoocua. ¹² Herodesri cuno juuca Pilato rupuenara quiquiaari. Coteenu, majaari nojori niqitioonu paniniu quijia. Nojoriiri saaja shocotetoojua.

*Puetunu pueyajanaa sequesacari Jesu cuaara mosaaria
(Mt 27.15-26; Mr 15.6-15; Jn 18.39–19.16)*

¹³ Na nuhuaji, Pilatoori pueyacuara secojonaa jiyaniijianucua rerejotequiaari na tacoji, Judiocuaca camarucujuhuj, tii quiniaa pueyano. ¹⁴ Nojori sequereeri:

—Niaari nio pueyano jaatucuree cucua najuhuanaj. Niaari cua sequeturee, nojuajaari niarta pueya nasojoquiaa. Janiyacuajaari na nequesoreeriquiaa nia niquiarani. Niaacuaajaari cua tojitiariquiaa cua nequesoreesacari nojuaja. Quiarijia niishiya cutaranijia, puetunu nocuara nia tonujusanojuanaari maja seetanujuanaa. ¹⁵ Jiyaniijia Herodesquiiri tari niishiyajuhuj, majaari seetanujuanaa nocuara nia saquiriojotasano. Cunora, Herodesri pocua na jiyarorohua. Seetanujuanaa, majaari sesa na miiniu quiquianu na mosaanura. ¹⁶ Janiyari na majacutenutaniya narejani, cartesaarohuari.

¹⁷ Pascua juucara queranacusacari, Pilatoori nujuatesano pueyano cartenu jiitiquiaari nujuatejojuajiniji. Nojuajaari naa miiquiaari pueyaracaanutej, pueya na shuquiritiniuria. ¹⁸ Jiyacaritij, puetunu pueyajanaari juhuacatecara jiyanoehua nacaree jatiqui:

—¡Jesu quia more! ¡Barrabás quia cartere saniniuujia!

¹⁹ Tarijia cuno Barrabásri narta nasojosano Judiocuacata Romano pueya taanuquiaari juucua Jerusalén tiacajiniji. Nojuajaari jiyacari pueyano moquiaarijuhuaj. Cunora, nojuajaari nujuatejojuajinia nujuatesano quiriquiaa. ²⁰ Pilatoori Jesu cartenu panijia juucua. Naaratej, Pilatoori pueyata pocoojorohua socua. ²¹ Pueyari saaja jiyacateere jiyanoehua nacoonura jatiqui:

—¡Cuaara mosaaria niyacutesanojinia teetesano! ¡Cuaara mosaaria!

²² Pilatoori pueya sequenu pacuterohuacuhuj:

—¿Maatucua casaara mosaarejaarani? ¿Sesa miiriitijiaaraj? Janiyacuajaari tari na nequesoreereeni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

²³ Pueyari saaja socua jiyanoehua nacooree niyacutesanojinia na mosaanura. Pueyacuara secojonaa jiyaniijianucuaari mariyata pueyata jiyanoehua nacooriquiaa. Puera jiyanoehua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. ²⁴ Naaratej, Pilatoori socua tariniriohua. Pueya panishano miiriiri. ²⁵ Pueya sequesano pueyano cartereeri, cante nujuatesaaquiaari nujuatejojuajiniacuajani na taanuunu paniniuucua Romano pueya, na monuucua pueyanohuaj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

Niyacutesanojinia Jesu teetesacari
(Mt 27.32-44; Mr 15.21-32; Jn 19.17-27)

²⁶ Pueya jiyatasacari Jesu puecoosaquiria, nojoriiri tamonu pueyano quiaree Jerusalén tiacajiniara riujiuyano juucua. Nojuajaari Cirene jiyajinijinio pueyano quiquiaari. Na sesa quiquiaari Simón. Nojuajaari niyacutesano patesaaree Jesu nuhuaji.

²⁷ Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuriquiaari, nocua nojori taraajenuta. ²⁸ Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaja nia nujuquette, nia niquiohuacuanio. ²⁹ Na nuhuaji, jiyanoehua taraatia quishacariiri quiniutianiya niaara, jiyanoehua taraatia. Jiyacaritij, pueyari sequenutaniya: “Socua shuquiriaatia quijiaca cutaraari noo maajipohua cante muetuyashijiani, cante manajeyashijianucuanii, mariyata cante mueya supueteyashijianucujaniuhaj”. Mueyaraca maajipohuari jiyacari jiyanoehua taraajenutaniya, nojori niquishacari necohua miishacari naquiya.

³⁰ Naquiya miishacari, jiyacaritij, pueyari tuhuananuhua sequenutaniya: “¡Canaacua quia jiyaretaare!” Naajuhuj, shiitianiyojua tuhuananuhua sequenutaniyari: “¡Canaacua nia tiyare canaa nia jamonura!” ³¹ Jiyacariiri jiyanoehua naquiya miishacari quiniutianiya. Quiarijia, janiya jaara naa naquiya miishiyacuaani, ¿taaquitijia Pueyaso tojitiaashijia miishaanutaniyatejaj?

³² Caapiqui sesa miijiacaari jaatucunuusaariquiaajuhuj, mariyata teetesocoriquiano Jesuta. ³³ Nojoriiri puecoosaqui tiuquijiose. Cuniqui pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiacaari teetejosaarejuhaj, niquiriyatu na miaquetajara, tamonu

na muenecara. ³⁴ Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—¡Cua Quenaa, quia jiyanoori nio pojori! Majaari nojori niishiniu casaa na miitiuyani.

Na nuhuaji, soldadohuari saitia tacuarishijioree, nojori niishiniuria taa nojori seraatianutaniya Jesu toqueni. ³⁵ Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama sequetooriquiaajaaja:

—Nojuajaari saaja tamonu pueya naatanijiojua. Quiarijia, nojuaja jaara seetanujuanaa Pueyaso Jiyarosano Cristo quiri, cuaara roseera niyacutesanojiniji pa niquiara.

³⁶ Soldadohuari Jesu macatiriquiaajuhuj. Nojoriiri Jesu raateree piiquia vino juucua. ³⁷ Jesu sequetureeri:

—Quiaa jaara Judiocuaca jiyaniijia quiri, ¡niyacutesanojiniji quia roserecuarajaj!

³⁸ Jesu nacaacuma, suruhuatuneeri rupotasaquiaari naajiosano Griego rupaaajinia, Romano pueya rupaaajinia, Hebreo rupaaajinianio. Tii naajiotasano quiriquiaari naa nocuara pueya saquiriojotasano: “Nio pueyanoori Judiocuaca jiyaniijia”.

³⁹ Tamonu cuno sesa miijiacajinijinio Jesu shuriucua teetesano quiriquiaani, nojuajaari Jesu rerequeteriquiaajuhuj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniquiji. ¡Canaa quia roshinijiorejuhuj!

⁴⁰ Narta sesa miijiaari na juaarii:

—¿Quiaateeri Pueyaso puereyashijia? Quiaari mosaanutaniyajuhuj. ⁴¹ Pajaniya cutaraari sesa pa miiniucua naquiya miishiyani. Paacuaajaari maninia saniitioshiyani sesa pa miiniucua. Saniniuujia, nio pueyano pa tajinia nujuataani, ¡nojuajaari sesa miyashijia cutara!

⁴² Na nuhuaji, narta sesa miijia juaaniaari Jesu sequeree:

—Jesunaa, majaari cua niyajetanuujuu, Pueyaso jaara quia jiyatere Jiyaniijiajanaa quia quiniuria.

⁴³ Jesuuri na riucuree:

—Seetanujuanaa quia sequeyanijia, quiarijiani, nio juucaja, quiaari cuata quiniutianiya shuquiriaatia quishaqui cutara.

Jesu cusosacari

(Mt 27.45-56; Mr 15.33-41; Jn 19.28-30)

⁴⁴ Panacari, jiyari ninishiquiria quiquiaari puetunujuaanaa, juhua niucua! Pananu piriuushacari, cuhuatemohuari.

⁴⁵ Jiya quishacarijia ninishiqui, jiyacaritij, Jerusalén tiacajinia Pueyaso Secojojua tiajinia, jiyanohua shiquiquia toquejiniji sohuacaari noojiaacoji sutequiaari puetunujuanaa querajaquera! ⁴⁶ Jiyacarijuhuaj, Jesuuri nacaree:

—¡Cua Quenaa, cua sohanu quia cojuare!

Naa na sequenu nuhuajitij, Jesuuri cusoquee.

⁴⁷ Romano soldadohua jiyaniijia niquishacari puetunu niojuanaa, nojuajaari maninia sequeree:

—¡Seetanujuanaa, nio pueyanoqui sesa miyashijia quiquianu!

Naa na sequesanoori Pueyaso shuquiritirii.

⁴⁸ Puetunu pueyajanaa, canapuate Jesu shootiariquiaa cusoyanoni, nojoriiri taraatia na tiajinia quiojoquiaariuhua. Nojoriiri tama na jiriquiaajaa piquiniuquiaariuhua, jiyanohua nojori tacaaniutia naa nojori monuucua Jesu.

⁴⁹ Saniniuujia, puetunu Jesu niishishano pueyajanaari tii jiyojetarohuajaa, maajipohuajuhua, canapuate Jesu nuhuajiquiaari Galilea jiyajiniucujani. Puetunu nojorijianaari tucuaaanuji niquitiariquiaa Jesu.

Jesu quete niasacari raaco

(Mt 27.57-61; Mr 15.42-47; Jn 19.38-42)

⁵⁰ Tamonu maninia pueyanoori quiquiaari. Nojuajaari Pueyaso tojjia pueyano quiquiaari Arimatea tiacajiniijinio. Cuno tiacaari Judea jiyajiniajuhuaj. Cuno pueyano sesa quiquiaari José. Nojuajaari Judiocuaca jiyaniijianucujiniijinio quiquiaari. ⁵¹ Cuno Joseeri Pueyasocua tiuuja quiquiaari. Nojuajaari pueyaracaanu sashijia, Pueyaso Jiyarosocoriquiano cuara Jiyaniijiaara jiyatesaaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuara mosaaria. ⁵² Naacujitij, Jesu cusosacari, Joseeri Pilatoocua quiaquiaari, Jesu quete na masenura. ⁵³ Na nuhuaji, Jesu quete roshinirii niyacutesanojiniijiri. Na jiuniocoreeri cohuajaque quenaaruque toquejinia. Jesu quete niaree tarijia na jiuutianishano saajajiniaari. Cuno raajinia, juhuanojuaja maja macu niasaanu quiquiaari. ⁵⁴ Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteeriquiaa tari. Judiocuacaa, pananu tiuquishacari, tamonu juucaari tari coteequiaari nojoriria.

⁵⁵ Cuno maajipohua, cante Jesuta nijioquiaari Galilea jiyajiniucujani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareni.

⁵⁶ Nojori riujuushacariuhua na tiajiniohua, nojoriiri juhuataja shanohua jaanutaja cojitijosuhua, macuucua nojori

niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricujani.

24

Jesu samiitiasacariuhua

(Mt 28.1-10; Mr 16.1-8; Jn 20.1-10)

¹ Coteenu semaana juucajinia, cuno maajipohuari tariquicuaji raajiniara quiaquiaari. Nojori cojitijosano shanohua jaanutaja patootaareeri. ² Nojori tiuquiiijosacari raajinia, saajiajiniji quejasano raa tiotiu niquitiushiiri tariucua tamocora shuuguitishano. ³ Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. ⁴ Nojoriiri shiriiquirii. Majaari nojori niishiniu quiriquiaa taa nojori miiniutianiyani. Canashiyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. ⁵ Maajipohuari na puerenuta jiyocuara naniquioree. Cuno canuuri nojori sequeree:

—¿Casaara nia pajeya saminio pueyano macu niojosaquini?

⁶ Maja tari niya na quiniu. ¡Tari samiitiarohuano! ¿Niaateeri tari niyajetaree na sequesano nijaniya, Galilea jiyajinia na quishacarijia? ⁷ Nojuajaari tari nia sequecanucuaaja, nojuaja sesa miijiaca niquitiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

⁸ Jiyacaritij, maajipohuari shusha niishiquii tarijia Jesu sequesano nojori. ⁹ Nojori tacatesacariuhua jamajiniji, nojoriiri Jesu once saquiriojosano pueya caminiujiushuhua puetunu niojuanaa, puetunu Jesuucua tiuunaa pueyajanaanio. ¹⁰ Cuno maajipohua, Jesu saquiriojosano pueya pahuataquiaariuhuani, nojoriiri nio maajipohua quiquiaari: María Magdalena, Juana, Santiago nucua Maríajuhuj, socua tamasaca maajipohuanio. ¹¹ Jesu once pueyara, maajipohua pahuatasanoori juhua paateca sequesano quiquiaari saaja. Nojoriiri saa cuaracashitirijiaa maajipohua pahuatanuusano.

¹² Naajaa, Pedroori tiajiniji netequiaari raajiniara. Raaco na cuuquesacari, saaja Jesu jiunocotaja cohuajaque toque niquiquiaari maanoori. Pedroori juhua jiuujiaaju tacateyarohua na shiriiquiniutia, na niquishanojiniji, maajipohua pahuatasanojininio.

Jesu tojitianaa pueya niquishacari Jesu, nojori quiasacari Emaús tiacajiniara
(Mr 16.12-13)

¹³ Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajiniji, niohuacata quiasacari tiriara. ¹⁴Nojori quiojosacari nucuaco, nojoriiri Jesujiniji pocoojoriquiaa, mariyata shusha naataja pueya miishanojiniji Jesu. ¹⁵Naa nojori pocoojosacari nucuacotej, Jesujuanaari jiyacari nojori rupuesee. Juhujaniya nojoritia pacutaareeri. ¹⁶Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. ¹⁷Jesuuri nojori nequesotaree:

—¿Casaa nia pocoojotaacuaani?

Nojoriiri nujuatuquee. Taraajecoyano niquishaariquiaari.

¹⁸Cuno caapiqui pueyanojinijini, tamonu sesa quiquiaari Cleofas. Nojuajaari Jesu riucuaaree:

—Puetunu pueyajanaacuaajaari niishiya casaate Jerusalén tiacajinia miishaarucuaa taraatiani. Quiaacuaajaari Jerusalén tiacajinia quiquianujuhuaj. ¿Quiaatucua casaara niishiyaquirini casaate miishaarucuaani?

¹⁹Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajinijinio Jesuuri mosaarucuaajaj! Nojuajaari Pueyaso sequesano caminiujiunia quiquianu. ¡Jiyanohua maninia quijiaari na cumaacata na miijosano, na niishitiojosanojuhuaj! Pueyaso timitiasano quijiaari, puetunu pueya panishanojuanaanio. ²⁰Pueyacuara secojonaa jiyanijianucua, mariyata pa camarucuaari na niquitiorucuaa Romano jiyaniijia na motesocoriquiano. Niyacutesanojinia mosaarucuaari. ²¹Canaari juucua jiyaniquianuni, nojuajaari Romano pueya taanuunutaniya, pa Israel pueya quiniuria juhuajaniya tama pajaniyajaaja. Quiarijiani, jiuujianaraca juucaari tari na shoconujiya na mosaanujiniji. ²²Tamasaca maajipohua canaa maanujinijinioori canaa shirioree nojori pohuatasanota. Nojoriiri quiarijia tariquicuajji quiojomaa Jesu raajinia. ²³Nojoriiri maja na riuriatanu quishii na quete. Nojori tacatesacariuhua, nojoriiri canaa pohuatasuhua, nojorinia Pueyaso seya niquirii juhua na maquenujinia. ¡Cuno Pueyaso seyanaari nojori sequeree, Jesu tari samiitiarohua! ²⁴Na nuhuaji, tamasaca canaajinijinioori raajinia quiojiyareejuhuj. Seetanujuanaa naa quiriquiaari, taa maajipohua sequeree canaacuajani. Maja cutaraari nojori niquiniu quirii Jesu.

²⁵Jiyacaritij, Jesuuri nojori sequeree:

—Pueyanaa, majaquiiri juhuanojuaja nia niishiniu. Niaari taacanuyajaa puetunu tariucuaaanu Pueyaso

sequesano caminiujiuniaa naajiotasanoocujajanaa nia tiuuniuria. ²⁶ ¿Majateeri naa na pohuatasaanu quiquiaaricujaja: “Cristoori coteenu naa mosaanutaniyaquij. Na nuhuaji cutara, jiyanoehua cumaacaracara quijiara jiyatesaanutaniuhuari Jiyaniijiajanaa na quiniuria”?

²⁷ Jesuuri juhuacatecara nojori niishitiojoree puetunu tariucuaaanu Pueyaso Rupaajiniijijianaa, tee nojuajiniji naajiotasano quiyacujani. Moisés naajiotasanojiniji pohuatanu coteereeri, na nuhuaji, puetunu Pueyaso sequesano caminiujiuniaa naajiotasanojinijijianaanio.

²⁸ Nojori tiuquishacari cuno tiacajinia, terara nojori quiojoriquiaacujani, Jesuuri juhua shocoriquiano canujoriquiaa. ²⁹ Nojoriiri nojoritia na jiyojetenu paniriquiaa jiyanoehua. Nojoriiri na sequeree:

—¡Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojese cuniqui. ³⁰ Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso secojoreeri. Nojoriria na neecasereeri. Na nuhuaji, nojori serotareeri. ³¹ Jiyacaritij, nojori namijiaari juhua riatequequee. Jiyacariqui na niishitieuquiiri. Jesuuri saaja shaajequee cuniquijia nojori tajiniji. ³² Nojoriiri seque-tooree:

—¡Jesucujajiquiri quiriquiaa! ¡Cunora poojiaqui jiyamitia timiriquiaa na pocoojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinia naajiotasanootej!

³³ Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaarohuari. Nojori tiuquishacariuhua, nojoriiri puetunu Jesu once saquiriojosano pueyajanaa riuriatasuhua tii tariucua rerejono, mariyata socua narta Jesu pueyata. ³⁴ Tariucua tajinia quiniaari Emaús tiacajiniji tiuquiiijionaa sequeree:

—¡Pa Jiyaniijiaqui seetanujuanaa samiitiarohua! ¡Simónri na niquirii!

³⁵ Na nuhuaji, shusha tiuquiiijionaari nojori pohuatareejuhuaj, taa Jesu pocoojoriquiaa nojoritiani, nucuaco nojori quiasacari, mariyata taa nojori niishirii nojuajani, pan na neecasacari nojoriria.

*Jesu muetasacariuhua na saquiriojosano pueyacua
(Mt 28.16-20; Mr 16.14-18; Jn 20.19-23)*

³⁶ Nojori pocoojosacariija nojori niquishanojiniji Jesu, jiyacaritij, Jesujuanaari canashiyaquiji nojori tajinia nujuaquee. Naa nojori sequereeri:

—¿Niaate quiyajaa? Nioojia nia cajitiri.

³⁷ Nojoriiri shiriiquitiuquii. Jiyanoehua puereturiquiaari. Nojoriiri Jesu jiyaniriquiaa naaqui. ³⁸ Jesuuri nojori sequeree:

—¿Casaara nia pueretiuyani? ¿Casaara nia jiyajenetaa janiyani? ³⁹ Cua juaashiquia nia niquri, cua niohuacanio, nia niishiniuria janiyacuaajaari quiyani. ¡Cua cootiuri! ¡Cua niqutiuri! Naaquiiri maja cuaqueyaraca, maja nucuhearaca taa nia niquiya janiyacuaajani.

⁴⁰ Naa nojori na sequesacaritij, Jesuuri nojori niqitijioree na juaashiquia, na niohuacanio. ⁴¹ Puera nojori jiuujiate-sacari, puera nojori shuquirishacarijiuhuj, nojoriiri taacanuuriquiaajaa, maja naasucua Jesu. Cunora, Jesuuri nojori sequeree:

—¿Niaate miaquesocoriquiano jiitiaacuaa?

⁴² Nojoriiri Jesu niqitiooree sapitiaaja raqui caquishano. ⁴³ Jesuuri na maseree. Nojori niquiara na miaquereeri. ⁴⁴ Na nuhuaji, nojori sequereeri:

—Janiyari naa miishaarucuaani taa cua pohuataquiaari nijaniyacuaajani, pueyaracaanu niaata cua quishacari tarijia. Nia sequequiaaricuaajanijia, janiyari naa miishaanutaniyani, taa Moisés naajiotaquiaari janiyajinijicuaajani. Puetunu Pueyaso sequesano caminiujiuniaajanaari janiyajiniji naajionuutaquiaarijiuhuj. Supuetana Davidri janiyajiniji naajiotaquiaarijiuhua na jaaquequejoneejinia. Quiarijia tari tohuateerucuaari puetunu janiyajiniji cuno naajionuutasanojuanaa.

⁴⁵ Jiyacaritij, Jesuuri nojori niishitirii tariucuaaanu Pueyaso Rupaa naajiotasano. ⁴⁶ Nojori sequereeri:

—Tariucuaaanu naa naajiotasanoori quiya: “Pueyaso Jiyarosocoriquianoori mosaariquiano, na nuhuaji, jiuujianaraca juucajinia samiitianutaniuhuari”. ⁴⁷ Naa naajiotasaaquiaarijiuhuj, Jerusalén tiacajinia, janiyajinijiiri pohuataaanutaniya pueya niquiara, na nuhuaji puetunu jiyacajinijanaanio. Pueya tiuushacari cucua, nojori jaara noojiaca tacatorohua sesa nojori miiniuininiji, sesa nojori miishanoori tuujusaanutaniya, Pueyaso jiyanooshacari nojori. ⁴⁸ Niaacuaajaari puetunu cua miishanojuanaa niquijia. ⁴⁹ Cua tojitiare. Janiya jaara jiyocuacaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricuaajani. Niyaja pootia nia quiri Jerusalén tiacajiniani, niaa jaara jiyocuacaanuji niriquiano cumaaca maserejaatijia.

*Jiyocuacaanu Jesu tacasacariuhua
(Mr 16.19-20)*

⁵⁰ Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqúi nojori quishacarijia, Jesuuri na juaashiquia shiitioquiaari nojoriicuara na secosacari Pueyaso, Pueyaso jiitianura maninia pueyaracaanu nojori. ⁵¹ Nojoriicuara na secosacarijia, Jesuuri nojori shuriucuaji tacanishaaquiaari jiyocuacaanu. ⁵² Nojoriiri na shuquiritari. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanoehua shuquiriaatia quiriqúiaa. ⁵³ Nojoriiri pueyaracaanu quijia Pueyaso Secojua tiajinia. Tii Pueyaso maniniuhuaqueetatuja pueyaracaanuuri. Tariucuaja.

JUAN NAAJIOTASANO JESUCRISTOJINIJI

Pueyaso Rupaa jatasacari pueyanora

¹ Paari Jesucristojiniji niishiyani taamuecateja na Que Pueyasoni. Naaratej, Jesucristoori sesojosaaquiaari “Pueyaso Rupaa”. Nojuajaari tari pueyaracaanu quijia, jiya quiyaquishacarijia. Na Que Pueyasota quijiaari. Pueyaso quijiajaariuhuj. ² Jiya coteesacari, nojuajaari na Que Pueyasota quiriquiaa. ³ Na Queeri na shipinitiquiaari puetunu casaajanaa. Puetunu casaajanaari na shipinishano. Maja tamonu shipinia quiniu socua. ⁴ Nojuajaari quijiajuhanaj. Naaratej, nojuajaari na naata pueya jiuujia cuhuatanu, pueyaracaanu rishijia nojori quiniuriajuhuaj. ⁵ Jesucristoori cuhuashiqui quijia. Naaratej, na rupaata poojia cuhuataari. Saniniuujia, Sesaacaari ninishiqui quijia. Naajaa, majaari na naata Pueyaso Rupaa na shocotanu. ⁶ Pueyasoori quiari naataja tamonu pueyano jiyaroquiaari, Neyanujiniji pohuatariquiano. Na sesa quiquiaari Tiuquinijona Juan. ⁷ Pueyasoori na jiyaroquiaari pueya na niishitiniuria cante Jesucristoni, pueya tiuuniuria Jesuucua, nojori jiuujia na cuhuatanura. ⁸ Juanri maja pueya jiuujia cuhuatana. Nojuajaari Jesucristojiniji pohuataquiaari pueya niishiniuria cante saniya poojia cuhuatana cutarani. ⁹ “Pueyaso Rupaari” seetanu poojia cuhuatanajanaa. Nojuajaari Jesucristo. Jiyocua niquiaariiri puetunu pueyajanaa niishiniuria cante Pueyasoni.

¹⁰ “Pueyaso Rupaari” mijiria rucanejojua quiquiaari. Pueyari tama nojori Shipiniajaaja niishiyaquiquiaari. ¹¹ Tama na saquiriojosano Israel pueyacia niquiaariiri. Nojoriiri na tamacaquiaari saaja. ¹² Saaja noojiaqueya pueyari nocua tiuquiquiaari. “Pueyaso Rupaari” cuno pueya jiyatequiaari Pueyaso muerasura nojori quiniuria. ¹³ Nojoriiri Pueyaso jatanishano, seetanujuanaa na muerasu nojori quiniuria. Pueyaso saquiriojosano pueyajiniji pueyano supuesacari, cunoori maja na naata na jiyatenu Pueyaso pueyano na quiniuria. Pueyari maja na naata muetunu tariucua Pueyaso pueya. Naajuhuj, pueyanoori maja na naata tama na cuaqueyajaaja jiyatenu Pueyaso pueyano na quiniuria. Pueya cutaraari Pueyaso muerasura jataquiaa Neyanuucua nojori tiuushacari saaja.

¹⁴ “Pueyaso Rupaari” seetanujuanaa pueyanora jataquiaari mijiria na quiniuria. Nojuajaari Jesucristo.

Canaata quiquiaariiri. Canaari na cumaacata na miiijosano niqiuquiaarini. Jiyanoehua maninia quiquiaariiri. Na Que Pueyasoori na cumaquijia jiyanoehua maninia na miiniuria, Neyanuniyojua na quishacari. Nojuajaari saaja seetanu rupaajanaa sequeja Pueyasojiniji. Jiyanoojia quijiaari. ¹⁵ Tiuquinijiona Juanri Jesucristojiniji pahuataquiaari pueya niqiuara. Jiyanoehua na rupaa paaretaquiaariiri pueya tojitianura nojuaja. Naa sequejaari:

—Janiyacuaajaari nojuajiniji nia pahuatajani, janiya jaara nia sequejani: “Tamonu pueyano cua nuhuaji niniutianiya”. Nojuajaari jiyaniijiajanaa cutara janiyajiniji. Nojuajaari tari quijia cua quiyaquishacariija.

Juanri naa pahuataquiaari Jesucristojiniji.

¹⁶ Jiyaniijiajanaa Jesucristo quiniucua, puetunu pajaniyajanaari na jiiitasanojiniji masequiaani. Jiyanoehua capora na quiniucua, nojuajaari pueyaracaanu pa cumaquiquiaa. ¹⁷ Pueyasoori supuetana Moisés naajioitequiaari na rootasano pajaniyara. Cunoori maja na cumaquiniu quiquiaari pajaniya. Quiarijia saniniuuja, pa panijia Pueyaso quiniucua, nojuajaari Neyanujanaa jiyaroquiaari pocua, pa jiyanooshaanura, naajuhua, seetanu rupaajanaa pa niishiniuria nojuajiniji. ¹⁸ Majaari quenaaja tamonu pueyano niquiniu quijia Pueyaso. Neyanu, cante na Que shuriucua quijiacuajani, nojuajaari na Que pa niishioquiaari.

*Tiuquinijiona Juan pahuatasano Jesucristojiniji
(Mt 3.11-12; Mr 1.7-8; Lc 3.15-17)*

¹⁹ Jerusalén tiacajinijinio canaa Judiocuaca camarucuaari na pueya jiyaramiquiquiaari Tiuquinijiona Juancua, nojori nequesoreenura Juan cante nojuajani. Nojori jiyaramiquishano pueyari quiquiaari supuetana Leví niqiuohuacujinio supueno pueya. Noojiaqueya cuno pojorijinijinioori quiquiaarijihua pueyacuara secojonaa pueya. ²⁰ Nojori nequesotasacari Tiuquinijiona Juan, nojuajaari maja quenaaja na seetanu quiquiaari cante nojuajani. Seetanujanaa naa nojori sequequiaariiri:

—Janiyari maja Pueyaso Jiyarosano Cristoni.

²¹ Cuno pueyari socua na nequesotarohua:

—¿Canteeri quiajaniani? ¿Quiaa jiyoteeri Pueyaso sequesano caminiujunia Elías soj? ¿Quiaa jiyoteeri samiitiarohuacuaa?

Tiuquinijiona Juanri saaja nojori riucuaaree:

—Maja. Janiya maja supuetana Elíasni.

Cuno pueyari socua na nequesotarohuacuahuaj:

—¿Quiaa jiyoteeri Pueyaso sequesano caminiujiunia, nooj tariucuacaanu sequesaaquiaari niriqianotej?

Juanri saaja nojori riucuaaree:

—Maja.

²² Cuno pueyari socua na sequeree:

—Canaa quia pohuatareja, ¿cante quiajaniyani? Canaacua saniniuujia canaa camarucua pohuatasuhanijia.

²³ Juanri saaja naa nojori riucuaaree:

—Janiyacuaajaari nooni, cariiquia jiyajinia nacajatej, taa supuetana Isaías juhuacarijia naajiotaquiaari janiyajinijicujani: “¡Jiyaniijiaacuaji nia nuunore maninia! ¡Maja shuutiuni!”

²⁴ Jiyacaritij, Fariseocuaca camarucua jiyaramiquishano pueyari Tiuquinijiona Juan nequesotaree:

²⁵ —Quiaa jaara quiaquiri Cristo, Elíasjuhuaj, cuno tariucuacaanu sequesaaquiaari niriqiano Pueyaso sequenu panishano caminiujiuniatej, ¿casaara pueya quia tiuquinijiya moojinacuaraarini?

²⁶ Juanri nojori riucuaaree:

—Janiyari nareja moojinia tiuquinijiya pueyani. Saniniuujia, tamonuuri niya quia, nia niishiyaquishoojua. ²⁷ Nojuajaari cua nuhuaji niniutianiya. Nojuajaari Jiyaniijiajanaa cutara. Majaari quenaaja cua naata na seru quiniu na sapatu neyocua cua saacatanura nera.

²⁸ Naa cuno pojori nequesoreesacari Tiuquinijiona Juantej, cunoori quiriquiaa Betania jiyaniishano tiacajinia, Jordán moo taquijiria, tee cuniqui Juan tiuquinijioriquiaa moojinia pueyacuajani.

Jesu juhua Pueyaso borregoniyojua pocuara mosaariquiano

²⁹ Tariqui saniniuujia, Tiuquinijiona Juanri Jesu niquirii nocua niyano. Juanri naa sequeree canaa niquiara:

—Paari pueyaracaanu mooquiaa borregohuani Pueyaso jiyanooniuria pajaniya. ¡Nia niquiri! ¡Cuno cumaji canujiyani, cunoori Pueyaso Jiyarosano, juhua borrego puetunu pueyacuara mosocoriquiano, seetanujuanaa sesa pa miishanojiniji pa jiyanooshaanura! ³⁰ Janiyacuajaari nojuajiniji nia pohuatajani janiya jaara nia sequejani: “Cua nuhuaji niniutianiyari Jiyaniijiajanaa cutara. Nojuajaari tari rishijia cucuaji cua quiaquishacarijia”. ³¹ Janiyari na niishiyaquijiajuhuaj, cante nojuajani. Naajaa, janiyari parta Israel pueya tiuquinijioquiaa moojiniani, noojia nojori jeenucuanura, Pueyaso Jiyarosano nojori niishiniuria cutara.

³² Tiuquinijiona Juanri pueya sequereejuhuj:

—Janiyari Pueyaso Sohuanu niqiriucuaani jiyocua-caanuji roseyano nocua juhua mococoonu. Nocua tiuushiiri.³³ Cuno, cua jiyaroquiaari pueya cua tiuquinijionura moojiniani, nojuajaari cua sequequiaari: “Quiaa jaara cua Sohuanu niqiri pueyanoocua roseyano, nocua na tiuuniuria, quiocua niishiri, cunocujaari cua sequesano quiajaniya. Nojuajaari cua Sohuanu tiuquinijionutaniya pueya jiuujiajinia cutara, seetanujuanaa cua muerasu nojori quiniuria”. Nojuaja jaara naa cua sequeyaquiquiaari, janiya maara na niishiyaquiquianuni.³⁴ Janiyacuajaari tari na niquiquianuni. Naaratej, janiyari saniniuujia nia pohuataani pueyanaa, jnojuajaari seetanujuanaa Cristo, Pueyaso Niyanu!

Coteenujuanaa Jesu pueyajiniji pohuatasano

³⁵Tariqui, Tiuquinijiona Juanri tii quishiiquiuhua caapiqui na pueyata. Janiyari niqiriyatu cuno caapiqui pueyano-jinijinio quiriquiaani.³⁶ Tiuquinijiona Juan jaara Jesu niquiquiaari shocoyano, jiyacari canaa sequereeri:

—¡Nia niqiri! Cunoori cua sequesano niajaniya, Pueyaso Jiyarosano pocuara mosocoriquiano juhua borrego, sesa poojia seque jeequesaanura.

³⁷Naa canaa tojishacari Juan sequesantej, canaari Jesu nuhuajiquiaarini.³⁸ Jesuuri canaacua tacateree. Canaa na niquishacari na nuhuaji sacuaano, canaa sequereeri:

—¿Casaa nia paniyani?

Canaari na sequereeni:

—Niishitiojonanaa, ¿tee quia maquequiaacuaani?

³⁹Jesuuri canaa riucuaaree:

—Miji. Nia niquiquii.

Canaari nata quiaareeni. Canaari na quijia niqutiushiini. Tari pananu piriuushacariiri quiriquiaa jiyacari. Cunora, canaari tii maquetusee Jesutani.

⁴⁰Tiuquinijiona Juan niqitiniuucua Jesu canaa, canaari Jesu nuhuajiquiaarini. Andrésri cua cojiriquiaa. Andrésri tarajanu jitiaja. Na sesaari quijia Simón Pedro.

⁴¹Tariquicuaji, Andrésri ritia tarajanu Simón pajenuucua quiaquiaari. Na riuriatasacari, na sequereeri:

—¡Cua tarajanunaa, canaari Cristo niqiriquiacuaani, tariucuaaanu Pueyaso sequesano na jiyarosocoriquianotej!

⁴²Na nuhuaji, Andrésri tarajanu Simón jiyataaree Jesuucua. Jesu niquishacari Simón, na sequereeri:

—Quiaacuajaari Simón, Juan niyanu. Quiarijia saniniuujia, quia sesaari quiniutianiya Cefas.

Griego rupaajinia, nioori sequeya Pedro. Pedroori saniniuujia pueyano rupaajinia sequeya “Saajia”.

Jesu saquiriojosacari Felipe, Natanaelno

⁴³ Tariqui, Jesuuri Galilea jiyajiniara quiariquiaa. Felipe riuriatamaari. Na sequereeri:

—Cua tarajare cua pueyano quia quiniuria.

⁴⁴ Felipeeri nata quiaaree. Nojuajaari Betsaida tiacajini-jinio quiquiaari. Andrésri tarajanu Pedrota cuno tiacajini-jinio quiquiaarijuhuj. ⁴⁵ Na nuhuaji, Felipeeri Natanael pajeree. Na riuriatasacari, na sequereeri:

—¡Canaa noo pueyano niquiriini, Moisés nojuajiniji naajio-taquiaari tariucuacaanutej! Tariucuacaanu Pueyaso seque-sano caminiujiuniaa pueyari nojuajiniji naajionuutaquiaar-ijuhuj. ¡Nojuajaari Nazaret tiacajinijinio Jesu, José niyanu!

⁴⁶ Natanaelri saa riucuarreejaa:

—¡Jaj! ¿Na naatate maninia miijia pueyano supenujuaara cuno sesa miijaca Nazaret tiacajiniji?

Felipeeri na sequeree saaja:

—¡Miji! ¡Pa niquishii!

⁴⁷ Jesuuri Natanael niquirii nocua niyano. Na sequereeri:

—Nio pueyanoori seetanu pa supuetana Israel niquio-huacuajinio supuenojuanaa cutara. Majaari na niishiniu sapojonu.

⁴⁸ Natanaelri na sequeree:

—¿Taa quia niishiya janiyarini?

Jesuuri na riucuarree:

—Felipe sequeyaquishacarijia quiajaniya cucua quia nini-uria, janiyari tari quia niquirii cojیاتani, higo naana pajama tateyano.

⁴⁹ Natanaelri shiriiquirii. Jesu sequereeri:

—Niishitiojonanaa, ¡quiaacuajaqui Pueyaso Niyanu! ¡Quiaari parta Israel pueya jiyaniijiaranojuhuaj!

⁵⁰ Jesuuri na sequeree:

—¿Quiaateeri cucua tiuuquii shusha saaja cua sequesacari quiajaniya: “Quia niquirii higo naana pajama tateyanonijia”? Seetanujuanaa quia sequeyanijia, quiaari na nuhuaji cua cumaacata cua miijosano niqiniutianiya cutara.

⁵¹ Jesuuri cuniqui quiniaa pueya sequereejuhuj:

—Seetanujuanaa nia sequeyanijia, niaari jiya cajiniocua niqiniutianiya riateno. Pueyano cua quishacari, niaari Pueyaso seya niqiniutianiya cucua roseetaano, cucuaji taqueetaanojuhuaj.

2

Jesu jatanishacari mohuaca vinora, pueyano camishacari

¹ Jiuujianaraca juuca nuhuaji, tamonu pueyanoori camiquiaari Caná tiacajinia, Galilea jiyajinia. Masu-usano pueyari queranacuriquiaa. Jesu nucuaari tii quiriquiaajuhuj. ² Jesuuri na saquiriojosano pueyata masuusaquiaarijiuhuj, camishacari queranacunura. Janiyari na saquiriojosano pueyano quiriquiaa jiyacari tarijiuhuj. ³ Jiyacaritij, mashacaari ritia puequemaa. Na nucuaari Jesu sequeree:

—Sanaa, mashaca tari puequemaa.

Mashacaari quiquiaari uva caaca, vinotuhuj. ⁴ Jesuuri na nucua riucuaaree saaja:

—Maajiniaa, ¿casaara quia sequeya janiyani? Juhuanajuaja maja cua poonijosacari Pueyaso cumaacata.

⁵ Na nucuaari pueya raatojonaa sequeree:

—¡Niocua Jesu tojirijia! Jaara nia sequere, niocua puetunu na sequesanojuanaa miiri.

⁶ Tii cajituriquiaari seis conatu, saajiajiniji quejasano. Canaa Judiocuacaari sequeyarucua shuquirioojua tiajinia nojori tiuquishacariuhua, juhua jeequesano nojori quiniuria Pueyaso niqiara. Nojori mohuaca cajitiacojua quiquiaari-iri cuno conaa. Jiyanhua puereetucocua quijiaari. Cuno conatuuri setenta tumococua mishaja mohuacata mishinishano quijia. ⁷ Jesuuri pueya raatojonaa sequeree:

—Mohuaca nia taquirioore. Niocua nio conaa mishinijiore.

Pueya raatojonaari conaa mishinijioore. Mohuacaari conaa rupaacuma puecacosee. ⁸ Jesuuri nojori sequeree:

—Quiarijiani, tiji nia shuuri. Queranacunu camaru nia sanitiore coteenu.

Raatojonaari na raatesee. ⁹ Queranacunu camaruuri vinora jatanano mohuaca sanirii. Majaari na niishiniu quiquiaari cuno na ratusanoori mohuacajiniji jatanishaaree vinora. Saaja pueya raatojonaa cutaraari na niishiriquiaa. Nojoricuajaari mohuaca mishinijiooree cuno conaajinia. Queranacunu camaru saniniu nuhuaji cuno ratusano, camiyano pueyano piiriiri. ¹⁰ Na sequereeri:

—Pueyaruhuatijia coteenu raateja shocuanacu vinote. Puetunu masu-usano pueya jaara tari raruure queraatia, na nuhuaji raatesano cutaraari shaarunacu vino. ¡Quiarijia saniniuujia, nio cua rusanoni, cunoori socua maniniuniacu vino coteenu quia raatojotesanojiniji!

¹¹ Naa Jesu jatanishacari mohuaca vinoratej, cunoori coteenujuanaa na cumaacata na miishano quiquiaari Caná tiacajinia, Galilea jiyajinia. Nojuajaari naa niqitiquiaari

Pueyasojiniji na cumaaca. Naacuajitij, canaa na saquiriojosano pueyani, canaari niishiquiaarini Jesuuri seetanujuaana Pueyaso Jiyarosano.

¹² Na nuhuaji, Jesuuri Capernaum tiacajinia quiaaree na nucuata, tapueyocuacatajuhuaj, canaa na saquiriojosano pueyano. Canaari tii camueenujuquiaari pasajani.

Jesu jaacasacari seya niqutiojonaa Pueyaso Secojoua tiajiniji

(Mt 21.12-13; Mr 11.15-18; Lc 19.45-46)

¹³ Quera canaa Judiocuaca queranacusacari Pascua juucara Jerusalén tiacajinia, Jesuuri tii canaa jiyataareejuhuaaj.

¹⁴ Na tiuquishacari, Pueyaso Secojoua tiajinia quiaaari. Tii niquishii pueyari juyaca niqutiojiyano Pueyasooacara puecoosocoriquiano, borregohua, noseyano. Pueyari tii na juhuacutucujinia cajitiuriquiaajuhuaaj, pueya na tacatojonura taucuaca cumaneeca, Pueyaso Secojoua tiajinia niqutiojosocoriquiano cumaneecara. ¹⁵ Naa na niquishacari pueya miyano Pueyaso Secojoua tiajiniatej, Jesuuri seya morojotaja jiyocua tatucuaaree. Na majacutajara na shitia-reeri. Cunota, puetunu nojorijianaa jaacaree Pueyaso Secojoua tiajinijiiri, puetunu nojori borregohuatajanaa, mariyata puetunu nojori juyacatajanaanio. Cumaneeca rerecojoree jiyocuara juhuacutucujinijiiri. Naajuhuaaj, cumaneeca juhuacutucua caponeetareeri. Pojotaariquiaacuaari.

¹⁶ Noseya niqutiojonaa pueya sequereeri:

—iNiiquiji nia patootare nio noseya! ¿Casaara nia jiyatecanu juhua casami niqutiojosaquiria cua Que tiani?

¹⁷ Jiyacaritij, canaa, Jesu saquiriojosano pueyani, canaari niishiquiini, seetanujuaanaa tariucuacaanu Pueyaso Rupaa-jinia naa naajiotasanoori quiya:

“Quia tiaacua juaatishaaree jiyanoahuanija, jiyanohua cua panishacari quia tia”.

¹⁸ Naa Jesu miiniuucuatej, narta Judiocuaca camarucuaari Jesu nequesotaturee:

—¿Cante quia sequerucuaa naa quia miiniuriani? ¡Canaa quia niqutiricuaraja Pueyaso cumaacata quia miishano, canaa niishiniuria quiaari seetanujuaanaa Pueyaso Jiyarosano!

¹⁹ Jesuuri nojori riucaaree miriqui:

—Pueyaso tia nia niyartare, janiyacua saaja jiuujanaraca juucajinia na tucuatrohua tianu tamajaajani.

²⁰ Narta Judiocuaca camarucuaari na riucaaree:

—¡Cuarenta y seis marijiaari shoconujuquiaari pueya tuccatanura nio secojoua tia! ¿Quiaateeri jiyaniya quia naata

na tianuhua ritia, saaja jiuujianaraca juucajinia? ¡Maja quia naata!

²¹ Jesuuri tama na cuaqueyajaaja pohuatariquiaa, Pueyaso tia na sequesacari. ²² Naacuaajitij, Jesu jaara samiitiaquiaar-iuhua, canaa na pueyari jiyacari shusha niishiquiaari naa Jesu sequesano miriquini. Naaratej, canaari tariucuacaanu Pueyaso Rupaajinia naajiotasanoocua tiuquiaarini, Jesu sequesanoocuanio.

Jesu puetunu jiuujia niishijajanaa cutara

²³ Canaari ocho juuca camueenujuquiaari Jesuta Jerusalén tiacajiniani, Pascuara queranacunuusacari. Tii canaa quishacari, tii quiniaa pueyari Jesu cumaacata na miijosano niquiquiaari. Naaratej, queraatia pueyari nocua tiuquiaari. ²⁴ Naajaa, majaari Jesu tiuuniu quiriquiaa seetanujuanaa nojoriicua. Nojuajaari nojori niishiriquiaa, taamueca pueyate nojorini. ²⁵ Tamonu pohuataaquishacarijia nojuaja, nojuajaari tari niishiya taamueca jiuujiaracate pueyani.

3

Nicodemo pocoojosacari Jesuta

¹ Niucua, tamonu pueyanoori niquiaari Jesuucua. Na sesa quiquiaari Nicodemo. Nojuajaari canaa Judiocuaca camarucuaajinijinio quijia, Fariseocuaca maanujinijiniojuhuaj. Tojishano pueyano. ² Jesuucua na tiuquishacari, naa na sequeeseeri:

—Niishitiojonanaa, quia cumaacata quia miiniuucua canaa niquiara, canaari cunora niishiyani quiaari Pueyaso jiyarosano, canaa niishitiojoriquiano. Seetanujuanaa, Pueyaso jaara pueyano naacuyaquiri na cumaacata, nojuajaari maja na naata cusosuhua naatanijionu taa quia miiquiaacuaani.

³ Jesuuri Nicodemo sequeree:

—Seetanujuanaa quia sequeyanijia, pueyano jaara juhua conaaja raaquishaarohua, majaari na naata Pueyaso pueyanora na quiniu, Pueyaso jitianura nojuaja.

⁴ Nicodemoori Jesu nequesotaree:

—¿Pueyanotucua taa rasaarohuani, nojuaja jaara tari cumantumaca quiya? Majaari na naata na nucua saracajinia tiuquiniuhua na rasaanuhuara.

⁵ Jesuuri na riucuaaree:

—Seetanujuanaari cua sequesano. Cua tojiri. Paari co-teenu rasaquiaari pueyano pa quiniuriani. Saniniuujia, cante quiarinio pueyanora jataniyaquishano Pueyaso Sohuanutani, nojuajaari maja Pueyaso jitianoniyojua na quiniu quiniutianiya. ⁶ Mijiria pueya muetusanoori saaja

pueyano. Saniniuujia, cante Pueyaso Sohuanu jatanishano quiarinio pueyano na quiniuriani, nojuajaari Pueyaso pueyano cutara, pueyaracaanu rishiriquiano. ⁷ Naaratej, majaari quia shiriiquiniu puera, naa cua sequenuucua quiajaniyatej, quiaa cuaara rasuhuara, seetanujuanaa quiarinio pueyano quia quiniuria. ⁸ Mijiria, paratuuri piyarojoquiaa taa na paniyacuajani. Paari nareja na cojuatunenu tojiquiaani. Majaari pa niishiniu teje na piyarojiyani, tee cunocora na quiaaaniuhuj. Naajaariuhuj, majaari quia niishiniu taa Pueyaso Sohuanu jataniquiaa pueyanoni, quiarinio pueyano na quiniuria.

⁹ Nicodemoori Jesu nequesotarohuacuhuj:

—¿Pueyanotucua taa quiarinio pueyanora jatanishaarejaarani?

¹⁰ Jesuuri na riucuaaree:

—¿Majateeri quia niishiniu cua sequesano quiajaniya? Quiaari Pueyaso Rupaa niishitiojonacuaja Israel pueyara. ¹¹ Canaari seetanujuanaa pohuataquiaa canaa niishishanoni, canaa niquishanojuhuaj. Niaari saniniuujia saaja na cuaracashitiquiaa, canaa pohuatasacari niajaniya seetanu rupaajanaa. ¹² Niaa jaara saaja cuaracashitiquiaa cua pohuatasano mijiria casaajiniji, ¿niaatucua taa niishiriquiani, janiya jaara nia pohuatare jiyocuacaanuji casaani? ¹³ Janiyari jiyocuacaanu quijiani. Majaari quenaaja tamonu pueyano tacanu quiquiaari jiyocuacaanu, saaja tijinio roseno cutara. Nojuacuajaari janiya. ¹⁴ Cariiquia jiyajinia pa supuetanaa Israel pueya rucuanijosacari, Moisésri na shipinishano soconu nujuaretaquiaari macaacua, soconu sasuhua niquishocoriquiano. Na niquiniaa pueyari naatacoquiaariuhua. Naajuahuaj, janiyari macaacua nujuaretasocoriquianoni. ¹⁵ Naacuajitij, puetunu cucua tiuuniaajanaari pueyaracaanu quijiaca quiniutianiya.

Pueyasoori puetunu mijiria quiniaa pueyajanaa panijia

¹⁶ 'Jijanohua cua Que Pueyaso paniniuucua puetunu mijiria quiniaa pueyajanaa, nojuajaari Neyanujuanaa jiyaroquiaari puetunu pueyapueecuarajanaa mosocoriquiano. Puetunu cucua tiuuniaa pueyajanaari saniitioyaquishaanutaniya cutara. Nojori cutaraari pueyaracaanu rishijiaca quiniutianiya Pueyaso shuriucua. ¹⁷ Pueyasoori maja na jiyaronu quiquiaari janiya pueya cua saniitionura. Seetanujuanaa cua jiyaroquiaari cutaraari pueyacuaji Tacuna cua quiniuria.

¹⁸ Cante cucua tiuujiani, majaari na saniitiosaanu quiniutianiya. Saniniuujia, cante cucua tiuyashijiani, nojuajaari tari pueyaracaanu saniitiosocoriquiano jiyatesano quiya.

¹⁹ Janiyari mijiria niqviaarini pueya jiuujia cua cuhuatanura Pueyaso Rupaata. Pueyari saaja na ruuretaquiaa, ninishiqui nojori jiuujia quiniuucua. Sesa miijiaca nojori quiniuucua, majaari nojori paniniu cuhuatasano nojori quiniuria. Naaratej, nojoriiri saniitosaanutaniya. ²⁰ Puetunu sesa miijiacajanaari cua niqniu paniyashijia, pueya jiuujia cuhuatana cua quishacari. Majaari nojori ninu paniniu cucua, sesa nojori miishano mariqui niishishaareeri. ²¹ Saniniuujia, cante maninia miiquiaani taa Pueyaso sequeya na Rupaa-jiniacuajani, nojoriiri cuhuashiqui quiniu panijiaca cutara. Nojoriiri cucua nijioquiaa na niishishaanura nojori miishano cutaraari puetunu maniajanaa, taa Pueyaso paniyacuajani.

Tiuquinijiona Juan pohuatasacari socua Jesujiniji

²² Na nuhuaji, Jesuuri quiojoquiaari canaata Judea jiyajinia, canaa na saquiriojosano pueyatani. Tii canaa quishacari Jesuta, canaari pueya tiuquinijioriquiaa moojiniani, pueya tacatosacari noojia sesa nojori miishanojiniji. ²³ Tiuquinijiona Juanri jiyacari pueya tiuquinijioriquiaajuhua Enón tiacajinia, Salím tiaca shuriucua. Juanri tii tiuquinijioriquiaa pueya, queraatia mohuaca quishacari tii. Pueyari nocua quiojoquiaarijuhuaj tiuquinijosano nojori quiniuria. ²⁴ Juanri jiyacari nujuatejojuajinia nujuatesoo quiriquiaajaa.

²⁵ Cuno quishacari, Tiuquinijiona Juan pueyari tamonu narta Judio pueyanota pocoojioriquiaa taate pueya naata juhua jeequesano quiniu Pueyaso niquiarani. ²⁶ Nocuaji nojoriiri Tiuquinijiona Juan sequetusee Jesujiniji:

—Niishitiojonanaa, noo pueyano, quiaa nojuajiniji canaa pohuatacanutej, noo quiata quiquianu Jordán moo taquijiratej, nojuajana pueya tiuquinijiyajuhuj. Puetunu pueyajanaana nocua quiojiya tiuquinijosano nojori quiniuria.

²⁷ Tiuquinijiona Juanri nojori riucuaree saaja:

—Saaja Pueyaso cumaquishacari pueyano, pueyano na naata maninia miiniu Pueyasora. ²⁸ Niajanuyacuajaari cua tojiquianu sequeyano: “Janiyari maja Pueyaso Jiyarosano Cristoni. Janiyari nareja nocuaji jeenucuariquiano jiyarosaaquiaarini”. ²⁹ Pueyano rupuena jaara camiya necocuara, quiarijia cutara necocuaari seetanujuanaa saaja nerano. Naajaa, na rupuena quishacari na shuriucua, na timitiaari na tojishacari necota pocoojiyano shuquiriaatia. Naajuhuj, janiyari cunora shuquiriaatia quiarijia quiyani pueya rupuesacari Jesucristo. ³⁰ Janiyari cunora jiyarosaaquiaaricuajani, pueya cua tojitiniuria nojuaja. Naaratej, pueya cuara carteera janiya, Cristoocua

nojori pacunura saniniuujia, nojori tojiniuria nojuaja. ³¹ Cante jiyocuacaanuji niquiaaricujani, nojuajaari Jiyaniijajanaa cutara. Janiyari saaja mijiria quiniani. Cunora, cua pahuatasanoori saaja mijiria cua tojishano. Jesucristo saniniuujia, nojuajaari jiyocuacaanuji ninio cutara. Nojuajaari Jiyaniijajanaa. ³² Naacuajitij, na pahuatasanoori tama na niquishanojuaaja jiyocuacaanu, na tojishanonio. Pueyari na pahuatasano cuaracashitiquiaa saaja. ³³ Canapuate Jesucristo pahuatasanoocua tiuujiacani, nojoriiri sequeya, seetanujuanaaqui Pueyaso sequesano Neyanujiniji. ³⁴ Pueyasoori jiyanoehua queraatia na Sohuanu niqutioquiaari na Jiyarosano. Naacuajitij, seetanu Pueyaso rupaajanaa pahuataari. ³⁵ Pueyasoori jiyanoehua panijia Neyanu. Naaratej, nojuajaari na jiyatequiaari puetunu casaa jiiitanarajanaa na quiniuria. ³⁶ Canapuate Neyanuucua tiuujiacani, nojoriiri tari jatanishano pueyaracaanu rishijia nojori quiniuria Pueyasota. Saniniuujia, canapuate Neyanuucua tiuyashijiacani, nojoriiri tariucua Pueyaso juaashano quiya. Nojoriiri saniitosaanutaniya Pueyasooju nojori quiniuria pueyaracaanu.

4

Jesu pocoojosacari Samaria jiyajinijinio maajitia

¹ Fariseocuacaari pahuatasaaquiaari, jiyanoehua queraatia pueya Jesuucua quiojiya na tojitianaa nojori quiniuria. Nojoriiri pahuatasaaquiaarijuhuj, Jesuuri socua queraatia pueya tiuquinijiya Tiuquinijiona Juanjiniji. ² Seetanujuanaa majaari Jesujuanaa tiuquinijionu quiriqiaa pueya. Saaja canaa cutaraari pueya tiuquinijioriquiaani. ³ Jesu jaara niishiquiaari Fariseocuaca naa pahuatasaarucuaa nojuajinijitij, nojuajaari Judea jiyajiniji jiyataquiaariuhua canaa Galilea jiyajiniara.

⁴ Canaa quiasacari nucuaco, canaari Samaria jiyacuma tajiriquiano quiriqiaani. ⁵ Naa canaa quiasacari nucua-cotej, canaari Sicar tiacajinia tiuquishiini, Samaria jiyajinia. Cuniqiji, cateca quiriqiaari supuetana José cuhuariquia, na que Jacobo niquticosano nojuaja. ⁶ Cuno cuhuariquijinia quiriqiaari cuari, supuetana Jacobo jiuutiasano tariucuaaanu. Pueyaracaanu Jesu rucuanenuucua nucua-maji, nojuajaari cuno cuari shuriucua cajishii na samareenuta. Panacariiri quiriqiaa. ⁷⁻⁸ Jiyacaritij, canaari tiacajinia quiaamaani canaa miaquesocoriquiano canaa masenura casaa. Canaa niyacari, cuno Samaria tiacajinijinio maajiiri cuarimia quiaquiaari mohuaca taqutianura. Jesuuri na sequeee:

—Cua raatere.

⁹ Cuno maajiiri Jesu sequeree:

—Pueyanonaa, ¿casaara quia sequeya Samaria jiyajinijinio maaji raatenura quiajaniyani? Quiaacuajaari Judio.

Cuno maajiiri naa sequeree Jesutej, na niishiniucua Judioacuacujaari maja na niqiniu paniniu quijia Samaria jiyajinijinio pueya.

¹⁰ Jesuuri saaja na sequeree:

—Majaari quia niishiniu cante quia sequereeni: “Cua raatere”. Quiaa jaara niishiriquia casaa Pueyaso jiiitiaa quiarani, quiaa maara cua sequere cua raatenura quiajaniya. Quiaa jaara cua masere, janiya maara quia raatere pueya samiitianiija mohuacani.

¹¹ Maajiiri na sequeree:

—Jiyaniijianaa, majaari quenaaja quia jiiitanu casaa, mohuaca quia taquiriatajara. Nio cuariiri jiyanohua tucuaa. ¿Quiaatucua teje taquitiare cuno mohuacani, pueya samiitianiijiani? ¹² ¿Quiaateeri jiyaniijianaa cutara, socua pa supuetana Jacobojiniji? Nojuajaari nio cuari tiujiaquiaari canaara. Nojuajaari niiquiji ratujua quiquiaari necohuata, na seesano seyano.

¹³ Jesuuri na riucuaaree miriqui:

—Puetunu nio cuarijiniji ratujuacajanaari saaja jiyamuecoquiaa. ¹⁴ Saniniuujia, cante cua mohuaca ratunutaniyani, majaari socua na jiyamueni quiniutianihua. Cua mohuacaari juhua samo naca pacartanutaniya pueyaracaanu nojiajinia, shuquiriaatia na rishiniuria pueyaracaanu.

¹⁵ Cuno maajiiri Jesu sequeree:

—¡Pueyanonaa, cuno mohuaca cua niqutiore cua ratuso-coriquiano, maja socua cua jiyamuenura, naajuhuj, maja pueyaracaanu cua taquiriojonura nio cuarijiniji!

¹⁶ Jesuuri na sequeree:

—Miji quia niyaca quia sequecoo coteenu.

¹⁷ Maajiiri na riucuaaree:

—¿Janiyate niyacaracajaarani, quiaa jaara naa cua sequere? Jesuuri na sequeree:

—Quiaacuajaari seetanujuanaa cua sequeree: “Niyacaajunijia”. ¹⁸ Seetanujuanaari. Quiaari tari cinco niyacaaraca quiquiaari. Mariyata cuno, quiarijia quiata quiyani, majaari quia niyacajuhuj.

¹⁹ Naa cuno maaji tojishacari Jesu sequesantej, Jesu sequereeri:

—Jiyaniijianaa, ¡quiaaqui Pueyaso sequenu panishano caminiujiunia! ²⁰ Canaa supuetanaa pueyari niya nio tuhananuucua Pueyaso secojonuujua tarijia. Niajaniya

saniniuujia, Judiocuacani, niaari sequequiaa Pueyaso cuaara secojosaaria saaja Jerusalén tiacajinia.

²¹ Jesuuri na riucuaaree:

—Seetanujuanaa quia sequereera maajiniaa. Cua sequesanoocua quia tiuuri. Quera quiniutianiyari Pueyaso nia secojosacari puetunu tiquiyocua nia quishacarijanaa. Majaari tari Pueyaso secojosaanu quiniutianiya saaja Jerusalén tiacajinia, nio tuhuananuucujuhuaaj, taa quia sequereecuajani. ²² Niajanियari maja nia niishiniu cana nia secojoquiaani. Canaa Judiocuacani, canaa cutaraari niishiyani cana canaa secojoquiaani. Pueyasocuajaari canaa Judiocuaca supuetanaa niishitioquiaari pueyacuaji Tacunaari supuenutaniya tama canaa Judiocuacajinijiniojuaaja. ²³ Quiarijia cutara, cante seetanujuanaa Pueyaso shuquiritiajacani, nojoriiri na Que Pueyaso secojonutaniya puetunu noojiatajanaa, seetanujuanaa na tojjijaca nojori quishacari. Pueyasoori naa paniya pueya secojonura nojuaja, cante na secojonuujuacacuajani. ²⁴ Pueyasoori sohuanu. Naaratej, cante Pueyaso shuquiritiniu panijiacani, nojori cuaara secojora Pueyaso puetunu noojiatajanaa, Pueyaso Sohuanu tojjijaca nojori quishacari.

²⁵ Cuno maajiiri Jesu sequeree:

—Janiyacujaari niishiyani Pueyaso sequesano Cristo mijiria na jiyarosocoriquianoori niniutianiya. Nojuaja jaara tiuquiri, nojuajaari puetunu maninia pa pohuatanutaniyajanaa.

²⁶ Jiyacaritij, Jesuuri maatia na sequeree:

—Janiyacujaari cunoni, quiata pocoojiyacujani.

²⁷ Jiyacaritij, canaari Jesuucua tiuquijiorohuani. Canaari jiuujiatequiaarini canaa niquishacari Jesu pocoojiyano cuno maajitia. Majaari quenaaja canaa nequesotanu quirii Jesu, casaa cuno maaji paniriquiaani, mariyata casaajiniji nojori pocoojoriquiaani. ²⁸ Cuno maajiiri cuniquijia na pataco tiujiaquee. Na tiacajinia quiaarohuari. Na tiuquishacari, na tiacajinia quiniaa pueya sequesuhuari:

²⁹ —¡Miji pueyanaa, nia niquiquii pueyano! ¡Nojuajaari cua sequeree puetunu cua miishanojuanaa! ¿Majate Cristoni, tariucuacaanu Pueyaso sequesano pocua na jiyarosocoriquianotej?

³⁰ Pueyari cuno tiacajiniji Jesuucua nijioquiaari. ³¹ Cuno maaji quiasacari na tiacajiniohua, jiyacaritij, canaari Jesu mianuutenu paniriquiaa juucuan. Canaari na sequeriquiaani:

—¡Niishitiojonanaa, quia miaquere!

³² Jesuuri saaja canaa sequeree:

—Janiyacuja miaquesanoracani, cuno miaquesanoori nia niishishoo.

³³ Canaa, Jesu saquiriojosano pueyani, canaari naa tama nequesoreetooreejaanijia:

—Pa niyacari miaquetesaaquee jiyotucuaajaari.

³⁴ Jesuuri miriqui canaa sequeree:

—Cua miishacari cua Jiyarona panishano, cunoori cua miaquesano, naajuhuj, cua tucuatascari na panishano.

³⁵ Niaari sequequiaa: “Cuaara shocojooajaara cuatro raca. Pueyari jiyacari shusha coteenutaniya na nataacuaca carojotanu”. Janiyara, maja naatej. Seetanujuanaa nia sequeya cutaranijia, nia namijia nia riatate maninia nia niquniuria. Nataacuacacuja tari noshiquia, carojotasocoriquiano. ³⁶ Na carojotanaari na poonijionu sami niquitioshiya. Na carojotasanoori pueyaracaanu quiriquiano. Naacujitij, cuhuariquia natoonaari jatiqui shuquiriniutaniya nataacuaca carojotanaata. ³⁷ Naaratej, seetanujuanaari nio tariucuaaanu sequesano. Naa sequeyari: “Tamonuuri saaja nareja nataja. Na nuhuaji, tamonuuri saniniuujia na carojotaja”. ³⁸ Janiyari saniniuujia nia jiyaramiquiquianuni nataacuaca nia carojotanura quenaaja nia poonijiaquishoo cuhuariquiajinia. Cunoori tamasaca poonijiosano quiquiaari. Niaari juhuajaniya tamasaca poonijiosanojiniji carojotaquiaa shuquiriaatia.

³⁹ Queraatia pueya cuno Samaria tiacajinijinioori Jesuucua tiuquuaari, nojori tojishacari naa cuno maaji sequesanootej: “Cua sequeree puetunu cua miishanojuanaani”. ⁴⁰ Naaratej, cuno pueya jaara Jesuucua tiuquijioquiaari, nojoriiri na masuuquiaari tii na camueenujunura nojori tiacajinia quenaaja. Naaratej, canaari Jesuta tii camueequiaari caapiqui juucani. ⁴¹ Socua queraatia cuno pueyajinijinioori Jesuucua tiuquuaari, nojorijianaa jaara Jesu tojiquiaari Pueyaso rupaa pohuataano. ⁴² Naaratej, nojoriiri cuno maaji sequeuree:

—Quiarijiani, majaari canaa tiuuniu Jesuucua, saaja canaa quia pohuatanuucua nojuajiniji. Quiarijia cutara, canaacuaajaari tama canaa numaatajaaja tojirii na pohuatasanoni. Naaratej, canaari quiarijia niishiyani, Jesuuri seetanujuanaa Pueyaso jiyanootiriquiano pajaniya, puetunu mijiria quiniaa pueyajanaanio.

Jesu naatanishacari jiyaniijia Herodes pueyano niyanu

⁴³ Caapiqui juuca Jesu camueetanu nuhuaji canaa, Samaria pueya tiacajinia, nojuajaari cuniquiji canaa na pueya jiyataaree Galilea jiyajiniara. ⁴⁴ Jesuuri tarijia sequequiaari: “Nio tariucuaaanu sequesanoori seetanujuanaa sequesano. Naa

sequeyari: ‘Pueyaso sequenu panishano caminiujiuniaari maja tojishano quijia tama na jiyajiniaajaaja’ ”. ⁴⁵ Naajaa, Jesu jaara canaa tiuquitiaseequiaari jiyacari Galilea jiyajinia, cuniquijinio pueyari maninia na tiuquitiquiaari saaja. Nojori-iri naa maninia na tiuquitiquiaari tari nojori niquniuucua Jesu miishano na cumaacata Jerusalén tiacajinia, Pascuara nojori queranacusacari tii.

⁴⁶ Galilea jiyajinia canaa quishacari, Jesuuri canaa jiyataaree Caná tiacajinia, tee na jataniquiaari mohuaca vinoracua-jani. Jiyacaritij, Capernaum tiacajinia quiquiaariiri tamonu pueyano, Galilea jiya jiyaniiija jiyatesano camarnura. Cuno pueyano niyanuuri jiyanhua cusosu matariquiaa. ⁴⁷ Cuno camarnu jaara niishiiquiaari Jesu tari tiuquiriohua Judea jiyajiniji, nojuajaari jiyacari niqiaari Capernaum tiacajiniji Jesuucua, Caná tiacajinia. Na tiuquishacari Jesuucua, na sequeseeri:

—¡Jiyaniijanaa, cucua quia taraajere! ¡Cua niyanu quia naataniquii, quera cusoyano!

⁴⁸ Jesuuri na riuquaree:

—Niaa jaara cua cumaacata cua miishano niquiyaquiri, niiaari cucua tiuyaquiquiaa.

⁴⁹ Cuno camarnuuri saaja Jesu sequeree:

—¡Jiyaniijanaa, mijijiaj, jati pa quiaare cua tiajinia, quiyanu cusoyaquishacariija!

⁵⁰ Jesuuri na sequeree:

—Quia quiaarohua. Quia niyanucuaaja tari naatarohua.

Cuno camarnuuri Jesu sequesanoocua tiuurii. Quiaarohuari. ⁵¹ Jiyacari na tiajinia, na seyari niquiquiaari camarnu niyanuuri seetanujuanaa maninia naatarohua. Naaratej, nojoriiri quiojoquiaari na camarnu numootenuucua. Nojori quiojosacari, na camarnu naacuturee saaja nuu cajiniocuaari. Nojoriiri na sequeree:

—¡Quia niyanu tari naatarohua!

⁵² Nojori camarnuuri nojori nequesotaree:

—¿Taacari na cusonu tajiyatemohuacuaani?

Nojoriiri na riuquaree:

—Naseeca nocuaji tajimiohuacuaa shusha pananu mueecosacari nio niniriquiacuaani.

⁵³ Cusosu queeri niishiiquii, Jesucuaajaari jiyacari na sequeriquiacuaa: “Quia niyanu tari naatarohua”. Naaratej, camarnuuri necocuataja Jesuucua tiuurii, puetunu necohuatajanaanio.

⁵⁴ Judea jiyajiniji Jesu tiuquishacariuhuaaj, naa na naatanishacari cuno cusosutej, cunota tari caapiqui quiquiaariiri na cumaacata na miishano Galilea jiyajinia.

5

Jesu naatanishacari cumatacuruhuana cusosu Betzata cuari shuriucua

¹ Tamacariuhua, socua canaa Judiocuaca queranacusacari quiquiaari Jerusalén tiacajinia. Naaratej, canaari Jesuta nocua quiojoquiaarijuhuaj. ² Jerusalén tiacaari puetunujua-naa puereetuuca sohuacajiniacuma quiya. Tohuateyacaari quiya tiuquitiajara. Tamonu tohuateya sesa quiquiaari “Borregohua tiuquitiaja”. Na shuriucua quiyari cuari. Canaa Judiocuaca rupaajiniani, cuno cuariiri sesojosaaquiaari “Betzata”. Cinco suhuorotucuaari quijia cuno cuari shuriuquioco. ³ Queraatia cusosuhuari tii matacojua cuno cuari shuriuquioco. Cuno cusosuhuari quiquiaari cariyojuarujuri, shipiiniquiujuniaa, cumatacuruhuana cusosuhuanio. Nojoriiri mohuaca sashijia cuaara queyaquetesaaria. ⁴ Pueyaso seruuri noojiaqueya rosequiaari mohuaca na queyaquetenura. Cuari queyaquesacari, cante coteenujuanaa rosequiaari tiini, nojuajaari naataquiaariuhua na cusonujiniji. ⁵ Tamonu cusosuuri tii narta cusosuhua tajinia matariquiaajujuaj. Tari na shoconujuquiaariiri treinta y ocho marijia, pueyaracaanu na matasacari. ⁶ Jesuuri na niquiquiaari mataano. Noojiajinia niishiriijaariuhuj cuno pueyano tari shocotejoquiaari queraatia marijia, naa pueyaracaanu na matasacari. Nocuaji Jesuuri na sequeree:

—¿Quiaate naatanu paniya?

⁷ Cusosuuri na riucuaaree:

—¿Cantucua cua naacure cuarijinia cua rosenurani, mohuaca jaara queyaquetesaarecuaa? Janiya jaara rosenu paniquiaa juucuan, cuarta cusosuuri saaja cua shocotaquiaani.

⁸ Jesuuri na sequeree:

—¡Quia sanere! Quia matu quia pataarohua.

⁹ Jiyacaritij, cusosuuri ritia jeequequee. Na matu pataarohuari. Cuno juucaari Sábado quiriquiaa, canaa Judiocuaca samaatenu juuca Pueyaso niquiara. ¹⁰ Canaa Judiocuaca camarucua jaara cusosu niquiquiaari na matu pataano, na juaatiuriiri. Naa na sequetureeri:

—¿Majateeri quia niishiniu, quiarijiaari Sábado? ¡Maja quia matu quia patanujua!

¹¹ Cusosu naatanohuari nojori riucuaaree:

—Cua naataniniacuaja cua sequereeno: “Quia matu quia pataarohua”. Janiyari cunora na pataani.

¹² Narta Judiocuaca camarucuaari na nequesotaree:

—¿Cantejaara naa quia sequereeni?

¹³ Nojori riucuaareeri:

—Johuaj. Maja cua niishiniu canaquitijia cua naataniriitij.

Jesu naatanishacari cuno pueyano, queraatia pueyari namitia tii quiriquiaa. Naacujitij, Jesuuri ritia tajiniocuareequiaari pueya tajinia, na naatanishano pueyanoocuai. ¹⁴ Na nuhuaji, Jesuuri na riuriataquiaari cuno juucaja Pueyaso Secojojua tiajinia. Jiyacari na sequereeri:

—Quiaacuajaari tari naatanishaarohua. Quiarijia cutara tama quia cuaqueyajaaja quia cojuare maja sesa quia miiniuhuara socua, quiaa mariqui socua taraatia miiriiri.

¹⁵ Naacujitij, cuno pueyanoori Jesu niishirii. Cunora, canaa Judiocuaca camarucuaacua quiaareeri. Nojori sequeseeri:

—Jesuqui cunocujaja cua naataniriini.

¹⁶ Naa Jesu miiniuucua samaatenu juucatej, narta Judiocuaca camarucuaari na quietunu panijia juucua. ¹⁷ Jesuuri saaja nojori sequeree:

—Cua Queeri pueyaracaanu poonijiya. Janiyari cunora poonijiyajaacuhuj.

¹⁸ Naa Jesu sequesacari nojoritij, narta Judiocuaca camarucuaari jiyanhua na monu paniriquiaa. Nojoriiri maja na monu paniniu quiriquiaa saaja samaatenu juuca na poonijionuucua. Socua jiyanhua na motunu paniriquiaari Jesu jiyatenuucua tama na cuaqueyajaaja juhua Pueyaso, Pueyaso na jiyaniquishacari na Queta.

Jesuuri Jiyaniijajanaa, Pueyaso Niyanu na quishacari

¹⁹ Nocuaji Jesuuri narta Judiocuaca camarucua sequeree:

—Seetanujuanaa nia sequedianijia, Pueyaso Niyanu cua quishacari, maja cua naata casaa miiniu tamajaaja. Janiyari saaja miiquiaani taa cua Que cua niqiquiaa miyanocuaani. Casaa cua Que miiquiaacuaani, janiyari naa miiquiaajaacuhuj. ²⁰ Cua Queeri cua panijia. Cunora, nojuajaari puetunu na miishanojuanaa cua niishitiojoquiaa. Naajuhuj, cua niishitiojonutaniyari socua jiyajeneta casaa tariucua cua miishanojinijicuaa. Niaari nocuaji shiriiquitu-niutianiya. ²¹ Cua Queeri macunucua samiitianijioquiaa, pueyaracaanu rishijia nojori quiniuria. Naajuhuj, janiyari pueya samiitianijioquiaani, cana cua samiitianiniu paniyacujani. ²² Cua Queeri maja na nequesoreenu quiniutianiya pueya. Nojuacuajaari tari cua niqitiocanu na cumaaca, puetunu pueyajanaa cua nequesoreenura. ²³ Nojuajaari naa miiquianu puetunu pueyajanaa quiniuria cua tojitiajaca, naatej, taa cua Que na tojitiatuquiaacuaani. Cante cua ruuretajani, cunoori cua Que ruuretajajuhuj, nooj, cante mijiria cua jiyaroquiaaricujani.

²⁴ 'Seetanujuanaa nia sequeyanijia, cante cua sequesano tojjiani, mariyata cante cua Jiyaronaacua tiuyajaanihuaj, nojuajaari pueyaracaanu Pueyasota rishiriquiano cutara. Nojuajaari maja na saniitiosaanu quiniutianiya. Nojuacua-jaari tari samiitianishaarohua juhua macu na quiniujiniji Pueyasooju na quishacari. ²⁵ Seetanujuanaa nia sequeyanijia, quera quiniutianiyari juhua macunucua quijiaca samitiacosacari. Seetanujuanaa quiarijiaari, juhua macunucua quijiacaari cua rupaa tojtianutaniya. Cua rupaa tojtiajacaari samiitiaconutaniya, pueyaracaanu rishijiaca nojori quiniuria. ²⁶ Cua Queeri quijiajuhuanajaj. Majaari na naata shaajenu. Nojuajaari naa quijiara cua jiyatequiaarijihuaj, juhua nojuarajuhuaj. Naacuajitij, cua naata pueya jiyatenu naa quijarajuhuaj. ²⁷ Pueyanora cua quiniuucua, na cumaaca cua niqutioreeri cuarta pueya cua nequesoreenura, nojori cua saniitionurajuhuaj. ²⁸ Cua tojitiare. Majaari nio sequesanoocuaaji nia shiriiquiniu. Tamacari, puetunu macunucujanaari cua rupaa tojitiunutianiya. ²⁹ Macunucua tojitiushacari cua rupaa, nojoriiri samiitiaconutaniya, na jamacajiniji nojori tohuareetanura. Cante maninia miijiaca quiquiaarini, samiitiaconutaniuhuari pueyaracaanu shuquiriaatia quijiaca nojori quiniuria Pueyasota. Saniniuujia, cante sesa miijiaca quiquiaarini, puetunu nojorijianaari quejoosaanutaniya pueyaracaanu saniitiosocoriquiano.

Jiyaniijajanaa na quiniuucua, Jesu tama nojuajiniji pohuataajaaja

³⁰ 'Pueyaso Niyanu cua quishacari, naajaa, majaari cua miiniu tama cua panishanojuaaja. Janiyari sesa miijiaca juaaquiaacuajani, saaja cua Que niishitishacari janiya, nojori miishanoori sesa. Tama cua panishanojuaaja miyashijia cua quiniuucua, janiyari namitajanaa nojori juaaquiaani. Janiyari pueyaracaanu miiquiaa saaja cua Jiyarona panishanoni. ³¹ Pueyano jaara tama nojuajinijiaaja pohuataa narta pueyano, na pohuatasanoocua maja tiuushano. Naaratej, janiya jaara tama janiyajiniji pohuatariquia nia niqiarani, tama cua pohuatasanojuaaja maara najuhuaana quiriquiaaj. ³² Naajaa, quiarijia cutara nia naata niishiniu cua pohuatasanoori seetanujuanaa. Tamonucuaajaari janiyajiniji pohuataa seetanujuanaa. Nojuajaari cua Que. Cunora, niishianijia na pohuatasano janiyajinijiiri maja najuhuanaj.

³³ 'Niaari nia pueya jiyarocanu Tiuquinijiona Juancua, nojori nequesotanura janiyajiniji. Nojuajaari saaja seetanujuanaa nia pohuatacanu janiyajiniji. Majaari na seetanu

quiquianu janiyajiniji. ³⁴ Nojuaja jaara seetacanu janiyajiniji niajaniya, quiria, naajaa. Janiyacuajaari niishiyani seetanujuanaari cua pohuatasano niajaniya tama janiyajinijiaaja. Tiuquinijiona Juanri seetanujuanaa pohuatacanu janiyajiniji niajaniya. Niaa cuaara na pohuatasanoocua tiuuria, Pueyaso jiyanooniuria niajaniya. Janiyari saaja cunora nia pohuataa Tiuquinijiona Juanjinijini. ³⁵ Nojuajaari juhua samaritiu noshitishano nia tajinia na quishacari. Niaari rupaquijia na timitiacanu, juhua na cuhuatasacari niajaniya. Niaari najuhuana tojiquianu na pohuatasano. ³⁶ Tiuquinijiona Juan pohuatasano janiyajinijiiri seetanujuaanaa. Niaa jaara na pohuatasanoocua tiuuniu paniyashijiaca quiyajaa, naajaa. Cua cumaacata cua miishacari, cunora seetanujuanaa nia niishiri, cua Que Pueyasoori cua jiyaroquiaari. Nojuacuajaari cua sequequiaari naa cua miinuriatej. ³⁷ Cua Quejanaari cua jiyaroquiaari. Nojuajaari janiyajiniji niishitioquiaari pueya. Naajaa, majaari quenaaja nia tojiniu quiquiaari na pocuanu. Nojuajaari nia niquishoojuhuaj. ³⁸ Majaari quenaaja na rupaa quiniu nioojiajinia, nia tiuyaquishacari na Jiyarosanoocua. ³⁹ Niaari suraattia serojoquiaa tariucuacaanu naajiosano Pueyaso Rupaa. Niaari jiyaniya niaa jaara Pueyaso Rupaa niishijiaca quiri, niaari naa pueyaracaanu quijara quiniutianiya. Seetanujuanaa majaari naatej. Cuno Naajioneejinia, tiiri janiyajiniji naajiotasano quiyacuaja. ⁴⁰ Niaari saaja cucua ninu paniaquiquiaa cua jiyatenura niajaniya pueyaracaanu quijacara cutara.

⁴¹ Maninia cua miishanoori maja pueya sequenura janiya: “Quiaari maninia pueyano”. Janiyari saaja cua Que shuquiritiaa cutarani. ⁴² Janiyari seetanujuanaa nia niishiyani. Niaari Pueyaso shuquiritiaashijiaca, nia paniaquishacari nojuaja. ⁴³ Cua Quecuajaari cua jiyaroquiaari cua niishitijonura niajaniya nojuajiniji. Quiarijiani, majaari nia tojiniu paniniu janiya. Saniniuujia, tamonu jaara tama na cuaqueyajaaja jiyateya juhua Pueyaso Jiyarosadora na quiniuria, niaa maara cuno tojiri cutara, nojuaja jaara niaacua nimia na niishitijonura niajaniya tama na niishishanojuaja. ⁴⁴ Majaari nia naata cua pohuatasanoocua tiuuniu, niaa jaara saaja niarta pueya shuquiritiasano quiniu paniquiaa, maja Pueyaso shuquiritiasano. ⁴⁵ Majaari nia jiyaniniu janiya niaacuara tonujunutaniya cua Queni. Tama Moisés cuajaari niaacuara tonujunutaniya, cua tojitiaashijiaca nia quiniuuca. Niaari jiyaniya niaa Pueyaso muerasu, juhua Moisés tojijiaca nia quishacari. ¿Niaateeri seetanujuanaa Moisés tojijiaca? ¡Maja! ⁴⁶ Nojuacuajaari janiyajiniji naajiotaquiaari.

Naacuajitij, niaa jaara seetanujuanaa na naajiotasanoocua tiuuriquia, niaa maara cucua tiuurijuhuaj. ⁴⁷ Nocuaji, niaa jaara Moisés naajiotasanoocua tiuyaquiquiaa, ¿niaatucua taa tiuuri quiarijia cua pohuatasanoocuaní?

6

Jesu mianuutesacari cinco mil canuu
(Mt 14.13-21; Mr 6.30-44; Lc 9.10-17)

¹ Na nuhuaji, canaari Jesuta niuutiaquiaari Galilea caminia taquijiriani. Galilea caminia sesa quiquiaarijuuhua Tiberias caminia. ² Jiyanoehua queraatia pueyari Jesu niquiquiaari tari, cusosuhua na naatanijosacari. Naaratej, nojoriiri Jesu neteyotariquiaa caminia shuriuquioco. ³ Canaa shiitiasacari caminia taquijiria, Jesuuri canaa tacatamaa tuhuananuucua. Tii cajitiasee canaari. ⁴ Jiyacaritij, quera Pascuara querana-cusacariiri quiriquiaa. ⁵ Jesu niquishacari jiyanoehua queraatia pueya nocua niyano, canaa cojinia Felipe sequereeri:

—¿Tee pa masenutaniya queraatia pan nio pueyaraarini?

⁶ Naa Felipe nequesotareeri nareja na saniniuria. Jesuuri tari niishiriquiaa taa nojuajanaa mianuutenutaniya cuno pueyani. ⁷ Felipeeri na riucuaaree:

—¡Paa jaara cumaneeca jiitiare doscientos juuca pa poonijosanojiniji pan pa masetajarani, cuno maara najuhuana secaja quiri puetunu nojoririjanaa!

⁸ Jiyacaritij, canaa cojinia Andrésri Jesuucua nimiaa. Andrésri Simón Pedro tarajanu. Nojuajaari Jesu saquiriojosano pueyanojuhuaj. Jesu sequeseeri:

⁹ —Jiyaniijianaa, caya samijia niya cinco pan jiitiaa cebada cashojuajiniji shipinishano, caapiqui sapitiaajanio. Naajaa, cunoori najuhuana puetunu cuno pueyarajanaa.

¹⁰ Jesuuri saaja canaa na saquiriojosano pueya sequeree:

—Puetunu pueyajanaa nia sequere cuaara cajitiuuria.

Cuniqui, canaa tii quiriquiaani, shanohua jiyasocuaari quiriquiaa, maninia cajitijia. Naaratej, pueyari cajituri. Puetunu cuno pueya maanujinijiniojuanaani, saaja canuuri quiquiaari cinco mil pueya. ¹¹ Jiyacaritij, Jesuuri cuno pan pataree. Pueyaso secojoree nocuaraari. Na nuhuaji, canaa na serotaniriiri. Canaari cajitiuyano pueya puetunu na panishanojuanaa niqutiojoreeni nojori miaquenuusocoriquiano. Jesuuri naa miirii sapitiaajajuahuaj. ¹² Puetunu pueyajanaa jaara tooquioquiaari, Jesuuri canaa na saquiriojosano pueya sequereeni:

—Puetunu miaquesano raquiquiajanaa nia reraterohua, maja najuhuana na niitiasaanura.

¹³ Canaari cuno cinco panjiniji pueya miaquesano raacua reratereni. Canaa reratesacari, canaari doce canaasatu mishinijioreeni. ¹⁴ Pueya niquishacari naa Jesu miishano na cumaacatatej, nojoriiri sequeturiquiaa:

—¡Nio pueyanoqui seetanujuanaa Pueyaso sequenu panishano caminiujunia, nooj, tariucuacaanu sequesaaquiaari pocua niriquianotej!

¹⁵ Jesuuri niishirii cuno pueyari na quianu paniriquiaa, nojori jiyatenura nojuaja puetunu Israel pueyajanaa jiyaniijia na quiniuria. Nocuaji, Jesuuri tamajaaja tacaquee socua jiyaconaja tuhuananuucua.

Jesu rucuanesacari mohuaca caco
(Mt 14.22-27; Mr 6.45-52)

¹⁶ Tariucua pananu tiuquishacari, canaa, Jesu saquiri-
ojosano pueyani, canaari rosetaaruhi caminiajiniarani.
¹⁷ Canaari botejinia tacataseeni, cuniquiji Capernaum tia-
cajiniara canaa niuutianura caminia taquijiria. Tariucua
ninishiquiiri quiriquiaa. Majaari Jesu tiuquiniu quiriquio-
hua juhuanajuaja canaacua. ¹⁸ Tari canaa niuutiasacari,
paratuuri jiyanhua piyarojoriquiaa. Caminiaari cunora
jiyanohua cajiniuucuariquiaa. ¹⁹ Canaari tari caminia ji-
uujiajinia quiriquiaani, seis kilómetroruhua canaa rupare-
tasaquiji. ¡Canaari jiyacari casaa niquirii canaacua cate-
canoyanoni! ¡Mohuaca caco canujuriquiaari! ¡Canaari nocuaji
shiriiquiturii jiyanhuanani! ²⁰ Jiyacaritij Jesuuri canaa se-
quereeni:

—¡Maja pueretunu! ¡Janiyacuajanjia!

²¹ Na rupaa canaa tojishacari, canaari shuquiriaatia na
tacanitiurii botejiniani. Canashiyaquiji boteeri ritia shiiti-
asee terara canaa quiariquiaacuajani.

Jesu mianuutesano pueya pajesacari nojuaja

²² Jaara juhuaquequiaari, Jesu mianuutesano pueyari na
pajenuunu coteequiaari tee canaa quiriquiaa caminia taqui-
jiriacuajani. Nojoricuajaari tenacari niquiquiaari saaja
niquiriyatu boteeri shiitariquiaa. Saaja canaa, Jesu saquiri-
ojosano pueyani, canaari cuno botejinia quiaquiaariuhua
nojori niquiarani. Majaari Jesu quianu quiriquiaa cutara
canaata. ²³ Jiyacaritij, Tiberias tiacajiniji boteeri tiuquijio-
quiaari catecaja nojorijiniji, tee Jesu mianuutequiaari no-
joricuajani. ²⁴ Cuno pojori niishishacari maja Jesu quiniu
quiriquiaa tari tii, canaa na saquiriojosano pueyajuhua, no-
joriiri cuno boteyajinia tacataquiaari. Nojoriiri Capernaum
tiacajinia nijioquiaari cuno boteyajinia, tii nojori pajenura
Jesu.

Jesucristo juhua poojia miaquesano

²⁵ Cuno pojori tiuquuijiosacari caminia taquijiria, Jesu riri-
uriatatureeri. Na nequesotatureeri:

—Niishitiojonanaa, ¿taacari quia niyarohuacuaarini?

²⁶ Jesuuri saaja nojori sequeree:

—Janiyari seetanujuanaa nia sequeyani, majaari nia pa-
jenu janiya nia niquiniuucua cua cumaacata cua miishano.
Niaari cua pajenuya saaja cua mianuutenuucua niajaniya,
taa nia tooquiorucuaacujani, cua mianuutesacari niajaniya.

²⁷ Maja saaja miaquesanoocua nia tacaaniu, nia cuaqueya
nia cumaquitajara. Cunoori maja na jiyatenu quiniutianiya
niajaniya pueyaracaanu rishijara. Saaja nia tacaari cutara
nioojia samiitianijia miaquesanoocua, pueyaracaanu rishi-
jia nia quiniuria. Janiyacuajaari cuno nia niqutioriquianoni,
pueyano cua quiniuucua. Cua Quecuajaari cunora cua
jiyaroquiaari. Cunora, cua Queeri cua miitiquiaa cua
miishano na cumaacata, nia niishiniuria janiyari na ji-
yarosanoni.

²⁸ Cuno pueyari Jesu nequesotaree:

—¿Casaa canaa miiniutianiyani Pueyaso panishano canaa
miiniuria, Pueyaso shuquiritiasano canaa quiniuriajuhuaj?

²⁹ Jesuuri nojori riucuaaree:

—Pueyaso Jiyarosanoocua nia tiuuri. Saaja naa nia mi-
shacaritij, Pueyasoori nia shuquiritianutaniya.

³⁰ Cuno pueyari Jesu sequeturee:

—Canaa niquiara quia cumaacata casaa quia
miiricuarajaj, canaa niishiniuria quiaari seetanujuanaa
Pueyaso Jiyarosano. ¿Casaa canaa quia niqutiniutianiya
canaa tiuuniuria quiocuani? ³¹ Canaa quia niqutiricuaraja
quia cumaacata quia miishano, taa Moisés niqutiquiaari
canaa supuetanaacuaani. Nojuajaari jiyocuacaanuji pan
tiniquiaari pueyaracaanu nojoriria, cariiquia jiyajinia
nojori rucuanijosacari. Naa naajiotasano quiyacuajaari
tariucuacaanu Pueyaso Rupaajinia:

“Nojuajaari nojori mianuutequiaari jiyocuacaanuji tinio
pan”.

Naacuajitij, canaari niishiyani Moisés cuajaari Pueyaso ji-
yarosano quiquiaari.

³² Jesuuri nojori riucuaaree:

—Seetanujuanaa nia sequeyanijia, cuno jiyocuacaanuji
panni, cunoori maja Moisés tinishano quiquiaari. Majaari
seetanujuanaa jiyocuacaanuji pan na quiniu quiquiaariji-
uhuj. Quiarijia cutara, cua Queeri niaacua jiyarorucuaa
seetanujuanaa jiyocuacaanuji panjanaa cutara. ³³ Cuno,

Pueyaso niqutiosano pan jiyocuacaanuji rosenoni, cunoori puetunu mijiria quiniaa pueyajanaa samiitianijiojua cutara.

³⁴ Naaratej, cuno pueyari Jesu sequeree:

—¡Jiyaniijianaa, quiocua pueyaracaanu canaa niqutioriquia cuno pan!

³⁵ Jesuuri nojori sequeree:

—Janiyacuaajaari cuno panni, pueya samiitianijiojuani. Cante cucua niyani, majaari na miaajenu quiniutianiya socua. Cante cucua tiuuriijiaanihuaj, majaari na jiyamuenu quiniutianiyajuhua. ³⁶ Taa cua sequeree tari niajanियacuajani, niaari juucua cua niquiya. Majaari quenaaja cucua nia tiuuniu. ³⁷ Naajaa, puetunu cua Que niqutiosanojuanaa janiyani, nojoriiri cucua niya. Cuno pojori, cante cucua nijiyani, majaari cua ruuretanu nojori. ³⁸ Majaari jiyocuacaanuji cua roseno quiquiaari cua miiniuria tama cua miiniu panishanojaa. Mijiria niquiaarinijia saaja cua Que panishano cua miiniuria, cante cua jiyaroquiaaricua-jani. ³⁹ Majaari cua Jiyarona paniniu cua juurequetenura quenaaja niquiriyatujua na niqutiosanojiniji janiya. Nojuajaari paniya cutara, nojori cua samiitianijionura jiya puequesacari. ⁴⁰ Canapuate cucua tiuujiacani, nojori niishishacari janiya Pueyaso Niyanuni, cua Queeri puetunu cuno pojorijianaa paniya pueyaracaanu rishijiaca nojori quiniuria. Naacuajitij, janiyari nojori samiitianijionutaniya jiya puequesacarini.

⁴¹ Jesu sequenuucua, “Janiya jiyocuacaanuji roseno panni”, tii quiniaa narta Judiocuacaari cunora juaaquioree.

⁴² Sequetureeri:

—¿Majate nio pueyano Jesucuaaja, José niyanutej? ¡Paacuajaari na queya niishiyani! ¿Casaara quiarijia na sequeyari: “Jiyocuacaanuji rosenonijia”?

⁴³ Jesuuri nojori sequeree:

—¡Tariucuaja! ¡Maja nia juaaquionu! ⁴⁴ Pueyanoori maja na naata tiuuniu cucua tamajaaja, cua Que jaara noojiajinia poonijiyacquiri. Janiyari puetunu cucua tiuuniaajanaa samiitianijionutaniya jiya puequesacarini. ⁴⁵ Tariucuacaanu pueyara Pueyaso sequesano caminiujunua naajiotasanocuaajaari naa sequeya:

“Pueyasocuaajaari puetunu nojorijianaa niishitiojonutaniya”. Naacuajitij, cante cua Que niishitiojosano tojjia seetanujua-naani, nojuajaari cucua tiuya.

⁴⁶ Cua Queeri maja pueya niquishano quenaaja. Saaja na niquinia cutaraari janiya cante Pueyasojiniji niquiaaricua-jani. ⁴⁷ Seetanujuanaa nia sequeyanijia, cante cucua tiuu-jiani, nojuajaari tari pueyaracaanu rishijiaara jatanishaaree.

⁴⁸ Janiyacuajaari pueya samiitianijia panni. ⁴⁹ Cariiquia jiyajinia nia supuetanaa camarucuneejotasacari, nojoriiri cuno jiyocuacaanuji tinio pan miaquenuuquiaari juucua. Naajaa, saaja cusonuquiaariiri. ⁵⁰ Saniniuujia, cante quiarjia seetanujuanaa jiyocuacaanuji roseno pan miaqueyani, majaari Pueyaso shaajanu quiniutianiya nojuaja. ⁵¹ Janiyacuajaari cuno samiitianijia panni, jiyocuacaanuji rosenoni. Cante nio panjiniji miaquejani, nojuajaari pueyaracaanu quijia quiniutianiya. Nio pan, janiya na niqutionutaniya puetunu mijiria quiniaa pueyacuarajanaani, cunoori tama cua cuaqueyajaaja.

⁵² Jiyacaritij, tii quiniaa narta Judiocuacaari naa seque-tooree tamajaaja na juaaniutia:

—¿Nio pueyanotucua taa miaquetere tama na cuaqueyajaaja pajaniyani?

⁵³ Jesuuri jiyacari nojori sequeeree miriqui:

—Seetanujuanaa nia sequeyanijia, niaa jaara miaqueyaquiri cua shu, niaa jaara ratuyaquiri cua nanacajuhuj, majaari samiitianijosano nia quiniu quiniutianiya, pueyaracaanu quijia nia quiniuria. ⁵⁴ Cante cua shu miaquereeni, cante cua nanaca ratureejaaniuhuj, nojuajaari tari naatarohua shuquiriaatia na quiniuria pueyaracaanu. Jaara cusoyare, naajaa, janiyari na samiitianiniutianihua jiya puequesacarini. ⁵⁵ Cua shuuri seetanujuanaa miaquesano cutara. Naajuhuj, cua nanacaari seetanujuanaa ratusano cutara. Cunoori maja juhua mijiria nia miaquesano. ⁵⁶ Cante cua shu miaquenani, cante cua nanaca ratunajaniuhuj, nojuajaari coojia rupueja. Janiyari noojia rupuejajuhuj, pueyaracaanu rupuetootesano canaa quiniuria. ⁵⁷ Cua Jiyarona cua Queeri seetanujuanaa quijia cutara. Cua Que rupueja cua quishacari, janiyari cunora shaajeyashijiani. Naaratej, cante cua miaquenani, nojuajaari pueyaracaanu quijia quiniutianiyajuhuj, na rupuesacari janiya. ⁵⁸ Janiyari maja juhua nia supuetanaa miaquesano panni. Nia supuetanaari cuno pan miaquenuuquiaari najuhuanaj. Naajaa, saaja cusonuquiaariiri. Janiyari seetanujuanaa jiyocuacaanuji roseno pan cutarani, nia miaquesocoriquiano. Cante cua miaquejani, jaara cusoyare, naajaa, samiitianutaniuhuari pueyaracaanu quijia na quiniuria.

⁵⁹ Jesuuri puetunu niojuanaa pohuataquiaari pueya niqiiara Pueyaso secojojua tiajinia Capernaum tiacajinia.

Queraatia Jesu nuhuajiniaa pueya cartesacari nojuaja

⁶⁰ Naa pueya tojishacari Jesu niishitiojosanotej, queraatia na nuhuajiniaa pueyari naa sequetooquiaari tamajaaja:

—Cuno na sequesanoori jiyanoohua jiyajeneta pa miiniuria puetunujuanaa. Maja pa naata. ¿Cantucua na tojirijaara-jaaranijia?

⁶¹ Jesuuri naa nojori sequesano niishirii noojiajinia. Nocuaji nojori sequereeri:

—¿Niaateeri naa cua sequenuucua juaya? ⁶² ¿Niaatucua taa sequere socuani, niaa jaara cua niquiri tacaano jiy-ocuaaanuhua, teje cua niquiaaricujani? ⁶³ Cua shu maja cumaacaraca pueya na samiitianiniuria. Saaja cua So-huanu cutaraari pueya samiitianijia, pueyaracaanu rishijia-aca nojori quiniuria. Niaa jaara cua sequesanoocua tiuuri, cunoori cumaacaraca cutara na samiitianiniuria niajaniya. ⁶⁴ Noojiaqueya niajanijajiniinooori cucuaji taacanuyajaa.

Jesuuri tarijia niishijia cante nocua tiuyashijiacani, mariyata cante na paraa na quietanutaniyani.

⁶⁵ Naa sequeree socua cuno pojoriiri:

—Janiyacuajaari cunora nia sequereeni: “Maja pueyano naata cucua tiuuniu, cua Que jaara noojiajinia poonijiaquiri”.

⁶⁶ Jiyacaritij, queraatia Jesu nuhuajiniaa pueyari na cartequiaari. Nojoriiri maja tari Jesuta na rucoojonu quijia. ⁶⁷ Nocuaji, Jesuuri jiyacari canaa na saquiriojosano pueya nequesofaree:

—¿Niajanijariuhuj, niaateeri cua cartenutaniyajaacuhuj?

⁶⁸ Simón Pedroori Jesu riucuaaree:

—¡Maja Jiyaniijiajanaa! ¿Canaatucua tamonu jiyaniijiaacua pacureni? Canaa quia pohuatasanocujaaari na naata canaa jataniniu pueyaracaanu rishijia canaa quiniuria. ⁶⁹ Canaacujaaari tari quiocua tiuuquianuni, canaa niishishacari quiaari Pueyaso Niyanu, saa maninia miijiaja.

⁷⁰ Jesuuri canaa sequeree:

—Niaacuajaari tama cua saquiriojosano doce pueyajaaja. Saniniuujia, niquiriyatu niajanijajiniinooori sesaaca.

⁷¹ Naa Jesu sequesacaritij, Judasjiniji sequeriquiaari, Simón Iscariote niyanuni. Nojuajaari seetanujuanaa niquiriyatu canaajiniinoo Jesu doce saquiriojosano pueyajiniinoo quiquiaari. Naajaa, tama na Jiyaniijiajaaja tacartariquiano quiriqiaaquiiri.

7

Tama Jesu tapueyocujaja Jesuucua tiuyashijiaa quiquiaari

¹ Na nuhuaji, Jesuuri Galilea jiyajinia rucuanajoriquiaa. Canaari na cojiriquiaani. Majaari na quiniu paniniu quiriqiaa Judea jiyajinia, tii quiniaa Judiocuaca monu

panishacari nojuaja. ² Jiyacaritij, quera socua canaa Judiocuaca queranacusacariiri quiquiaari Jerusalén tiacajinia. Cuno queranacusacariria pueyari ocho juuca shocotejoquiaari suhuorotucujinia nojori quishacari. Naa miitiuquiaariiri puetunu marijjarajanaa canaa niishiriojonura, canaa supuetanaa Israel pueyari saaja suhuorotucujinia quijiaca quiquiaari, pueyaracaanu nojori camarucuneejotasacari cariiquia jiyajinia nojori quishacari. ³ Jiyacaritij, tama Jesu tapueyocuacajaarijia naa Jesu sequeturee nojori macaatiuria nojuaja:

—¡Majaari niyaja quia jateenu! Quiocua queranacunuucua Judea jiyajinia quiaarejuhuj. Quiocua tii miijiosee quia cumaacata, quia jiyopue niquniuria puetunu quia miishanojuanaa. ⁴ Pueyano jaara puetunu pueyajanaa tojiniu panishano pueyano quiniu paniri, ¿maatucua casaara jiyasohujaja miijiore na cumaacatani? Naatej, taa niya quia miijioquiaa quia cumaacatacuaani, naa quia miijiosee puetunu pueya niqiarajanaa Jerusalén tiacajiniajuhuj.

⁵ Majaari quenaaja tapueyocuaca tiuuniu quijia Jesuucua. Cunora naa na sequetureeri. ⁶ Jesuuri saaja nojori riucuaaree:

—Juhuanajuaja maja cua quiasacari cua miiniuria taa nia sequeyacuajani. Niaa jaara quianu paniri, niama juhujaniya quiaaretej. ⁷ Niarta mijiria quijiaca pueyari maja na naata juaaniu nijaniya. Janiya cutaraari nojori niquniu paniyaquishooni. Cua niqutiuniu paniyaquiquiaari, nojori cua niishitishacari nojori miishanoori sesa. ⁸ Nia quiojiyare queranacunuucua. Janiya cutaraari maja cua quianu quiniu-tianiya juhuanajuaja. Quiarijiani, puera juhuacariijaari cua miiniuria taa nia sequeree janiyacujani.

⁹ Naa nojori na sequenu nuhuajitij, Jesuuri cuniquijia jiyojeree Galilea jiyajinia.

Jesu quishacari cuno queranacunuunujinia

¹⁰ Na tapueyocuaca jaara quiojoquiaaricuaa Jerusalén tiacajiniara tii queranacunuunura, Jesuuri jiyasohujaja quiaaree nojori nuhuajijihuj. ¹¹ Queranacunuusacari, narta Judiocuaca camarucuaari Jesu pajenuuriquiaa. Nojoriiri naa sequeturiquiaa:

—¿Tee cuno pueyano quiyarini?

¹² Puetunu pueyajanaari Jesujiniji sasacojotooriquiaa. Noojiaqueyari sequeriquiaa:

—Jesuuri maninia pueyano.

Tamasacaari saniniuujia sequeriquiaacujua:

—¡Maja maninia pueyano! ¡Pueya sapojoua najuhuanaj!

¹³ Puetunu pueyajanaari naa sasacojotooriquiaa jiyasohujaja, nojori pueresacari narta Judiocuaca camarucua.

¹⁴ Jiuujianaraca juuca jaara tari shocojoquiaari nojori queranacunuusacari, Jesuuri jiyacari shusha tiuquiquiaari Pueyaso Secojojua tiajinia. Tii coteeree pueya niishitiojonu-
uri. ¹⁵ Canaa Judiocuaca camarucuaari jiuujiatequiaari no-
jori tojishacari Jesu niishitiojosano. Naa sequetureeri:

—¡Cuno pueyanoori maja quenaaja na serojonu quiquiaari!
¿Taa na niishiya pueraarini?

¹⁶ Jesuuri nojori sequeree:

—Cua niishitiojosanoori maja tama cua niishishanojuaaja.
Cunoori cua Jiyarona niishitishano janiya. ¹⁷ Cante Pueyaso
panishano miiniu paniyani, nojuaja cuara miiria taa cua
niishitiojiyacuaani. Naacujitij, nojuajaari jiyacari niishiniu-
tianiya, cua niishitiojosanocuaajaari Pueyasojiniji seetan-
juanaa, maja tama cua niishishanojuaaja. ¹⁸ Cante tama
na niishiriojosanojuaaja pohuatajani, nojuajaari saaja naa
miiquiaa juhua tojishano pueyano na quiniuria. Jiyano
pueyano cuara tojiyaquishaaria. Saniniuujia, cante na ji-
yarona niishitiojosano pohuataa pueyani, pueya tojiniuria
na jiyarona, cuno pueyano pohuatasano cutaraari seetan-
juanaa. Cuno pueyanoori maja pueya sapojojua.

¹⁹ ¿Niaateeri seetanujuanaa supuetana Moisés Rootasano
tojitiajaca? Majaruhua. Majaari quenaaja niquiriyatu nia-
janiyajinijinio na rootasano tojjia. ¿Casaara nia monu paniya
janiyani? ¿Supuetana Moiséste naa nia niishitiojiya na naa-
jioneejinia?

²⁰ Nojoriiri Jesu riucuatere na juaaniutia:

—¡Quiaaqui samaruraca! ¿Cante quia monu paniyani? ¡Canaa
quia sequeretoj!

²¹ Jesuuri nojori sequeree:

—Puetunu nijaniyajanaari shiriiquituquianu samaatenu
juuca cua miishacari niquiriyatu casaaniyojua cua cumaa-
cata. ²² Supuetana Moisés cuajaari nia rootaquiaari nia mueya
cararaatiuuquia co nia miatenura, ocho juuca jaara na shoco-
jore na rasaanujiniji. Seetanujuanaa, nio niishishanoori
maja tama Moisés niishishanojuaaja. Cunoori tariucuaaanu
pa supuetanaa niishishano Moisés niyacarijia. Pueyari naa
rootasaaquiaari naa nojori miiniuria necohua, seetanujua-
naa Pueyaso saquiriojosano Israel pueya nojori quiniuria-
juhuaj. Naaratej, jaara quiri samaatenu juuca, naajaa, niaari
naa nia niquiohua cararaatiuuquia co miatejoquiaa. ²³ Naa
nia miishacari samaatenu juucatej Moisés Rootasano nia
tojiniuria, ¿casaara nia juaya janiyani, cua naataniniuucua
cusosu samaatenu juucani? Niaari saaja shiitaniyojua mi-
atejiya, maninia nia niquiohua quiniuria Pueyaso niquiara.

Janiya cutaraari puetunu cuno cusosu cuaqueyajanaa jeecacanuni. ²⁴ Naaratej, maja ritia pueya juaajia nia quiniu, nia niishiyaquishacari maninia. Jacaria niishiriojojua nia quiri, niaa mariqui najuhuana pueya juaariiri na miishano jaara sesa quiyaquiri.

Jesu pahuatasacari tama nojuajinijiaaja

²⁵ Jiyacaritij, noojiaqueya Jerusalén tiacajinijinio pueyari tama sequetooreejaaja:

—¿Majate nio pueyano pa camarucua pajesanocuaaja na mosocoriquianotej? ²⁶ ¿Taateni? Noocuajaruhua juhuajaniya pahuataa pueya niquiaratej. Majaari quenaaja pa camarucua tenujununoj. ¿Pa camarucuate jiyaniya soj, nojuaja seetanujuanaa Cristo, tariucuacaanu sequesano pocua jiyarosaariquianotej? ²⁷ Paacuajaari nio pueyano niishiyani, tejenote nojuajani. Saniniuujia, Cristojuanaa jaara tiuquiri, majaari quenaaja na niishishaanu quiniutianiya cutara tejenote nojuajani.

²⁸ Jesuuri jiyacari niishitiojoriquiaa Pueyaso Secojouajinia. Naa na tojishacari pueya sequesantej, naa na rupaa paaretareeri:

—¿Naatee? ¿Niaateeri cua niishiya? ¿Niaateeri niishiyajuhuj, tejenote janiyani? Naajaa, majaari cua niniu quiquiaari tama cua panishacarijaaja. Janiyari jiyarosanoni. Cua Jiyaronaari seetanujuanaa quijiajuhanajaj. Nojuajaari nia niishishoo. ²⁹ Janiyari na niishiya cutarani. Janiyacuajaari tiji ninioni. Nojuajaari cua jiyaroquiaari.

³⁰ Nojoriiri jiyacari Jesu quiatunu panirii. Naajaa, majaari quenaaja tamonu naata quiriquiaa na quianura. Majaari na naata quianu quishaquiaari, juhuanouaja na monu juuca quiyaquishacarijia. ³¹ Saniniuujia, queraatia cuniqui quiniaa pueyari Jesuucua tiuquiaari. Nocua tiuuniaari naa sequetuquiaari:

—¿Cristojuanaa jaara tiuquiri, nojuajatucua socua jiyajeneta casaa miiri na cumaacata nio pueyano miishanojiniji?

Fariseocuaca quiatenu panishacari Jesu juucua

³² Fariseocuacaari cuno pueya tojiquiaari naa nojori maniniuhaqueetaano Jesu. Naaratej, cuno Fariseocuaca, pueyacuara secojonaa camarucuanio, puetunu nojorijianaari Jesuucua roojotooquiaari. Na nuhuaji, nojoriiri Pueyaso Secojoua tia cojuanaa pueya jiyaramiquiquiaari Pueyaso Secojoua tiajiniaara, tii nojori quianura Jesu. ³³ Jesuuri jiyacari nojori sequeree:

—Janiyari saaja rupaquijia niaata quiniutianiyani. Na nuhuaji, janiyari cua Jiyaronaacua riujiuuniutianihuani.

³⁴ Niaari cua pajenuunutaniya najuhuanaj. Majaari nia riuriatanu quiniutianiya janiya. Majaari nia naata quianu quiniutianiya tee cua quiniutianiyacuaani.

³⁵ Nocuaji, cuno Judiocuacaari tama sequetooreejaaja:

—¿Tee na quianutaniyajanojoni naa pocuaaniquitij, na riuritaacquishaanurajuhuj? ¿Parta Judiocuacaacua quianutaniya soj, noo pojoriicua Griegohua tajinia niaquejoquiaar-itij? ¿Tii niishitiojonutaniya cuno taucuaca soj? ³⁶ ¿Casaa na sequenu paniya pajaniyarini na sequesacari: “Niaari cua pajenutaniya najuhuanaj. Majaari nia riuriatanu quiniutianiya janiya”, na sequesacarijuhuaj: “Maja nia naata quianu quiniutianiya tee cua quiniutianiyacuaani”?

Jesu pahuatasano miriqui Pueyaso Sohuanujiniji

³⁷ Siete juuca jaara tari shocojoquiaari, queranacunuunu puequesacari juucajanaari juhuaquequiaari. Cuno juucaari quiquiaari socua Pueyaso timitiasaanu juuca. Jiyacaritij, Jesuuri nujuaquiaari pueya niquiara. Jiyanohua na rupaa paaretareeri. Naa sequereeri:

—¿Cante jiyamueyani, nojuaja cuara niiria cucua, na ratunura janiyajiniji! ³⁸ Cucua na tiuushacari, nera quiniutianiyari taa na naajiotasaaquiaari tariucuacaanu Pueyaso Rupaajiniacuajani. Naa sequeyari:

“Cante cucua tiuyani, pueyano samiitianijiojua mohuacaari noojiajiniji jaatenutaniya”.

³⁹ Naa Jesu sequesacaritij, nojuajaari Pueyaso Sohuanujiniji pahuatariquiaa miriqui. Jiyacaritij, Pueyaso Sohuanuuri juhuanajuaja maja na quiniu quiriquiaa mijiria, Jesu tacaacquishacarijia Jiyaniijiajanaa na quiniuria. Naaratej, tii quiniaa pueya sequeriquiaari, cante quiarijia nocua tiuyani, nojoriiri Pueyaso Sohuanu masenutaniya na nuhuaji, nojuaja jaara na jiyarosee jiyocuacaanu.

Pueya juaatioosacari Jesuucua

⁴⁰ Jesu jaara pahuatanu puecaquiaari, tii quiniaa pueyari tama pocoojoriquiaajaaja. Noojiaqueya nojorijinijinioori sequeree:

—¿Nio pueyanoqui seetanujuanaa Pueyaso sequenu panishano caminiujiunia, nooj, tarijia sequesaaquiaari pocua niriquianotej!

⁴¹ Tamasacaari saniniuujia naa sequeriquiaacujua:

—¿Nojuacuajaari Cristo, Pueyaso Jiyarosano pocua!

Tamasacaari saaja nojori riucuaree:

—¿Cristoteeri Galilea jiyajiniji supuenutaniya? ¿Maja!

⁴² Tariucuacaanu Pueyaso Rupaajinia naajiotasanojiniji, paari niishiyani, Cristoori pa supuetanaa jiyaniijia

David niquiohuajiniji supuenutaniya. Belén tiacajinia rasaanutaniyari, supuetana David tiacajinia.

⁴³ Naacuaajitij, puetunu pueyajanaari Jesuucua juayonuutaquiaari. ⁴⁴ Tamasacaari saniniuujia Jesu quianu paniriquiaa juucua. Naajaa, majaari na quiatunu quirii.

Judiocuaca camarucua tiuyaquishacari Jesuucua

⁴⁵ Pueyaso Secojoua tia cojuanaa pueyari Jesu toji-tiariquiaa juhuajaniya. Na nuhuaji, socua quiojijyarohuari na jiyaramiquiniaa pueyacua. Nojori jiyaramiquiniaa pueyari quiquiaari Fariseocuaca, pueyacuara secojonaa camarucuanio. Nojori jiyaramiquiniaari nojori sequeree:

—¿Casaara Jesu nia jaatucuyaquimiohuani?

⁴⁶ Nojori jiyaramiquishano pueyari saaja nojori riucuaree: —¡Majaari quenaaja tamonu pueyano pocuanu juhua cuno pueyanouja, seetanu rupaajanaa pohuataja cutara!

⁴⁷ Fariseocuacaari cunora nojori juaarii:

—¿Niaateeri niaacua na shanacuree na saipojonura nia-janiyajuhuaaj? ⁴⁸ ¿Tamonu pa camarucuaajinijiniote nocua tiuurii, canaa Fariseocuacajinijiniojuhuaj? ¡Maja! ⁴⁹ ¡Cuno pojori Jesuucua tiuujiacani, nojoriiri Moisés Rootasano ni-ishiyashijaca! ¡Nojoriiri sessoriquia seque!

⁵⁰ Nicodemoori narta Fariseocuacata tii quiriquiaa. Nojuajaari noo Nicodemo quiriquiaa Jesuucua niquiaari niucuatej. Nojuajaari narta Fariseocuaca sequeree:

⁵¹ —Pueyanaa, supuetana Moisés cuajaari pa rootaquiaari maja najuhuaana pa sesacanura pueyano, paa jaara coteenu na nequesoreyaquirini casaa na miiriini.

⁵² Narta Fariseocuacaari Nicodemo juaarii saaja:

—¿Quiaateeri narta Galilea jiyajinijinio pueyanoujuhuaj? ¡Jacaria quia pajere tariucuacaanu Pueyaso Rupaaajinia! ¡Quiocua jiyacari niishiri majaari quenaaja niquiriyatu Pueyaso sequesano caminiujunia pueyano supueni quiniutianiya Galilea jiyajinia!

⁵³ Na nuhuaji, puetunu cuno pojorijianaari na tiajinia quiojijyarohua.

8

Jesu jiyanooshacari maaji

¹ Jesuuri saniniuujia Olivo cuhuariquiajinia quiaaree. ² Jesuuri tariquicuaji tiuquiriohua Pueyaso Secojoua tia-jinia. Canaari nata quiriquiaajuhuaaj. Pueyari nocua rerejo-quiaari. Nojuajaari cajirii pueya na niishitiojonura juucua.

³ Moisés Rootasanojiniji niishitiojonaa, mariyata Fariseocuacanio, cuno pojoriiri jiyacari maaji jaatucumaa

Jesuucua. Cuno maajiiri riuriatasaaquiaari numuetu-cushiyano. Nojoriiri cuno maaji nujuateree pueya tacoji. ⁴Jiyacari Jesu sequetureeri:

—Niishitiojonanaa, nio maajiiri quiasaaree numuetu-cushiyano. ⁵Moisés Rootasanojiniji paari niishiyani, jiyano maaji cuaara mosaaria saitia jacusano. ¿Quiajanijarijiataj, taa quia sequeyanijia?

⁶Judiocuaca camarucuaari naa Jesu nequesotaree najuhanaj, nojori tojiniuria casaa na sequenutaniyani. Jesu jaara nojori sequere maja nojori miiniuria Moisés Rootasano, nojori maara nocuara saquiriojotare nojori jiyaniijianucua. Jesu cutaraari maja quenaaja nojori na riucuanu quirii. Nojuajaari saaja jojoree, jiyajinia na naajionura na juaashiquiata. ⁷Pueyaracaanu nojori nequesoreesacari nojuaja, Jesuuri socua sanerohua. Nojori sequereeri:

—Teyano niajanijajiniiniote sesa miyashijiani, nojuaja cuaara na coteetaara janu.

⁸Jesuuri jojorohuacuhua socua na naajionura jiyacua. ⁹Cuno pojori tojishacari naa Jesu sequesantej, puetunujuanaari sanaa quiojorohua. Juhuacatecara quiojonu coteequiaariiri socua saaquiapue, na nuhuaji, socua naatujoori nojorijiniji. Nojoriiri naa quiojoquiaariuhua puetunujuaanaa. Saaja Jesuuri jateequee cuno maajitia. ¹⁰Jiyacaritij, Jesuuri sanerohua. Maaji sequereeri:

—¿Teete quiocuara saquiriojotanaani? ¿Majate quenaaja tamonu cureenu quirii na jacunura quiajanijia saitia?

¹¹Maajiiri Jesu riucuaaree:

—Shaaqui puetunujuanaa, Jiyaniijianaa.

Jesuuri maaji sequeree:

—Janijari quia jiyanoya cutarani. Juhujaniya quia quiaarohua. Majaari sesa quia miiniu socua.

Jesuuri pueya jiuujia cuhuatana

¹²Nojori nuhuaji, Jesuuri pueya niishitiojonu coteerohua. Nojori sequereeri:

—Janijari pueya jiuujia cuhuatanani. Cante cucua tiuuriini, majaari tari ninishiqui quijia na quiniu quiniutianiya. Pueyaracaanu cuhuashiqui quijia quiniutianiya cutaraari.

¹³Tii quiniaa Fariseocuacaari naa Jesu juaarii:

—¡Quiaacuajaari tama quia cuaqueyajiniji pahuataa! ¡Puetunu quia pahuatasanojuanaari maja tojishano!

¹⁴Jesuuri nojori riucuaaree:

—Tama cua cuaqueyajinijiaaja cua pahuatasacari, cunoori maja najuhua pahuatasano. Cua pahuatasanoori seetanujuanaa cutara. Janiyacuajaari niishiyani teje cua niqiiarini, tee cua quianutaniuhua. Niaari

saniniuujia niishiyaquiyacuajua teje cua niquiaarini, tee cua quianutaniuhuani. ¹⁵ Niaari pueyacuara saquiriojotaquiaa saaja nia niquishanojiniji, nia tojishanojinijijiuhuaj. Janiya cutaraari maja cua saquiriojotanu pueyacuara. ¹⁶ Janiya jaara juaari sesa miijia cutarani, cua sequesano cutaraari seetanujuanaa, niquiriyatujua cua quiyaquishacari. Cua Jiyarona cua Quecuajaari cua cojiquiaa cuata na juaaniuria sesa miijiaca. ¹⁷ Niaacuajaari Moisés Rootasanojiniji niishitiojoquiaa: “Caapiqui pueyano pohuatasano jaara juhua tarajanu pohuatasano quirijiuhuj, cuno cutaraari seetanujuanaa”. ¹⁸ Naajuhuj, canaari caapiquini. Tama cua cuaqueyajaaja cua pohuatasacari, cunoori seetanujuanaa, cua Jiyarona cojishacari janiya. Nojuajaari cua Que.

¹⁹ Fariseocuacaari na nequesotaree:

—¿Teeteeri quia queni?

Jesuuri nojori riucuaaree:

—Majaari nia niishiniu janiya, cua Quejuhuaj. Niaa jaara cua niishiriquia, niaa maara cua Que niishirijiuhuj.

²⁰ Jesuuri puetunu nio pohuatariquiaajanaa Pueyasora niquitiojosano cumaneeca racataja shuriucuaji, Pueyaso Sec-
ojojuua tiajinia. Naajaa, majaari pueya quianu quiriiquinioj,
juhuanoujaaja na monu juuca quiyaquishacarijia.

Jesuucua tiuyashijiacaari jiyanoyaquishaanutaniya

²¹ Jesuuri cuno Fariseocuaca sequerohuacuhuj:

—Janiyari quianutaniyani. Niaari cua pajenuunutaniya ju-
ucua. Niaari cusuunutananiya sesa miijiacaja, jiyanooshoo
nia quishacarijia, cucua nia tiuyaquiniucua. Naaratej, ma-
jaari nia naata quianu quiniutaniya tee cua quianutaniy-
acuaani.

²² Naa Jesu sequesacaritij, cuno narta Judiocuacaari tama
sequetooreejaaja:

—¿Casaara na sequereecuaraarini: “Maja nia naata quianu
quiniutaniya tee cua quianutaniyacuaani”? Tama na
cuaqueyajaaja miaquenutaniya jiyoteeri.

²³ Jesuuri nojori sequereee:

—Niaari ninishiqui quiquiojinijinio. Janiya cutaraari jiy-
ocuaaanujinijinioni. Niaari saaja mijiria quijiaca. Janiya
cutaraari maja niiquijinioni. ²⁴ Janiyacuajaari cunora nia se-
quereeni, niaari jiyanooshoojua cusuunutananiya nia cuara-
cashitiniucua janiyari maja Pueyaso Niyanuni, taa cua
sequequiaa niajaniyacuajani. Cunora niaari jiyanooshoo
quiniutaniya, pueyaracaanu saniitiosano nia quiniuria.

²⁵ Nojoriiri Jesu nequesotaree:

—¿Canteeri quiajaniyani?

Jesuuri nojori riucuaaree:

—Janiyari najuhuana niaata pocoojiyani. Majaari nia tojiniu janiya. Janiyacuajaari tari nia sequereeni cante janiyani. ²⁶ Janiyari queraatia jiitiaajaa cua sequesocoriquiano niajaniyani. Niaa jaara nocua tiuyaquiri, niaari pueyaracaanu saniitiosaanutaniya. Puetunu cua sequesanojuanaa niajaniyani, cunoori seetanujuanaa. Cua pohuatasano mijiria, cunoori cua Jiyarona sequesano janiya. Na sequesanoori seetanujuanaa cutara.

²⁷ Majaari nojori niishiniu quiriquiaa Jesuuri na Que Pueyasojiniji pohuatariquiaa na sequesacari “cua Jiyarona”.

²⁸ Jesuuri cunora nojori sequeree:

—Niaa jaara cua teetere, niaari shusha jiyacari niishiniu-tianiya, janiyari Pueyaso Niyununi. Niaari niishiniutianiya-juhuaj, majaari tama cua niishiriojosanojuaja cua miiniu quijia. Janiyari saaja cua Que niishitiojosano pohuatajani. ²⁹ Cua Jiyaronacuajaari cuata quiya. Majaari cua Que cartenu janiya, pueyaracaanu cua miiniuucua na panishano.

³⁰ Naa Jesu pohuatasacari pueya niquiaratej, queraatia pueyari jiyacari nocua tiuuri.

Pueyaso pueyajiniji pohuatasano, Sesaaca pueyajinijinio

³¹ Jesuuri shusha nocua tiunnaa narta Judiocuaca sequeree:

—Niaa jaara seetanujuanaa cua pohuatasano tojijiaca quiri pueyaracaanu, niaari cua pueya quiniutianiya. ³² Niaa jaara naa miiritij, niaari seetanu rupaajanaa niishijiaca quiniutianiya. Naacujitij, niaari seetanujuanaa juhua cartesano pueya quiniutianiya, juhuajaniya quijia nia quiniuria.

³³ Narta Judiocuacaari Jesu riucuaaree:

—Canaacuaruhua supuetana Abraham jihuacuajinio supueno pueyani. Majaari quenaaja canaa quiniu quijia tamasa poonijotesano pueya. ¿Casaara naa quia sequeya canaarini, canaa quiniuria cartesano pueyani?

³⁴ Jesuuri nojori sequeree:

—Seetanujuanaa nia sequeyanijia, cante sesa miijiacani, nojoriiri juhua poonijotesano pueya quiya. Majaari na naata maninia miijia na quiniu. ³⁵ Poonijotesano pueyanoori maja seetanujuanaa na quiniu juhua na camarnu niyanu. Maja na naata sequenu: “Janiya pueyaracaanu quiniutianiya cua camarnutani”. Na camarnu jaara na paniyaquiri, na naata na jatanu na panishacari. Camarnu niyanu cutara, na queeri maja na jatanu quijia, neyanu na quiniuucua. ³⁶ Naajuhuj, janiya jaara nia jaariuutiare nia poonijotena-jinijini, niaari seetanujuanaa cartesano pueya quiniutianiya, Pueyaso muerasura nia quiniuria cutara. ³⁷ Janiyacuajaari

niishiyani, niaari seetanujuanaa pa supuetana Abraham jihuacuajinio supueno pueya. Naajaa, niaari cua tojiniu paniyaquiya. Niaari cunora cua monu paniya. ³⁸ Janiyari nia pohuatariquiaa cua Quejiniji cua niquishanoni. Niaari saniniuujia nia que sequesano miiquiaacujua.

³⁹ Nojoriiri Jesu sequeree:

—¡Abrahamcuaajaari canaa shipininio!

Jesuuri nojori riucuaaree saaja:

—Abraham jaara seetanujuanaa nia shipininio quiri, niaa mariqui maninia miijiaca quiricuara, taa Abraham quiquiaaricuaani. ⁴⁰ Saniniuujia, niaari cua monu paniya saaja cua pohuatanuucua seetanu rupaajanaa, cua tojishano Pueyasojiniji. Abrahamri maja naa na miiniu quijia cutara. ⁴¹ Niaari saaja sesa miijiaca taa nia que miiquiaacuaani.

Nojoriiri Jesu juaarii:

—¿Casaa quia sequeyani? ¡Canaari maja saa maaji rasanojuani! ¡Pueyasocuaajaari canaa Que, maja tamonu!

⁴² Jesuuri nojori sequeree:

—Pueyaso jaara nia Que quiri seetanujuanaa, niaa mariqui cua paniricuara, Pueyasojiniji ninio cua quishacari. Majaari tamajaaja cua ninu quiquiaari. Cua Que Pueyasocuaajaari cua jiyaroquiaari. ⁴³ Cua rupaa nia tojiniu paniyaquishacari, niaari cunora cua pohuatasano niishiyaquiya. ⁴⁴ Seetanujuanaa, nia quecuajaari Sesaaca, samaruhua jiyaniijia. Niaari cunora miiniu paniquiaa na panishano. Nojuaja jaara shushajanaa coteequiaari sesa miiniuria, nojuajaari naajuhuanajaj, mona. Nojuajaari maja na niishiniu sequenu seetanujuanaa. Pueyaracaanu sapojojaari. Na sapojosacari, naa miyari sapojoua na quiniuucua. Sapojonu niishiniuni, cunoori nojuajiniji supuequiaari. Niaari cuno nia que tojijiaca. Nocuaji niaari naa sapojonuujacajuhujaj. ⁴⁵ Saniniuujia, cua pohuatasacari seetanu rupaajanaa nijaniya, majaari cucua nia tiuuniu quiquiaa. ⁴⁶ ¿Casaa cua miiquianu sesani? Cante na niishiyani cuara sequeera. Saniniuujia, janiya jaara sesa miyashijia quirini, ¿casaara cucua nia tiuyaquiyacuaraarini, seetanu rupaajanaa cua pohuatasacari nijaniyani? ⁴⁷ Cante Pueyaso pueyani, nojoriiri Pueyaso rupaa tojiquiaa cutara. Nijaniya saniniuujia, niaari na rupaa tojiyaquiya, na muerasu nia quiyaquishacari.

Jesucristoori tariucuacaanu quijajuhuanaja Abrahamjiniji

⁴⁸ Narta Judiocuacaari naa Jesu juaarii:

—¡Canaacuajaquiiri maninia sequeriquiaa quiajanijajini, quiaari Samaria jiyajini jahue, samaruraca pueyanotuhuj!

49 Jesuuri nojori riucuaaree:

—Majaari janiya samaruracani. Janiya cutaraari saaja cua Que tojiquiaani. Niaari saniniuujia cua rerequetequiaacujua. ⁵⁰ Naajaa, majaari cua tacaaniu naa nia sesacasari janiya. Tamonu cutaraari quiya, nojuajaari paniya pueya tojiniuria janiya. Nojuajaari cua rerequetejaca saniitioriquiano. ⁵¹ Seetanujuanaa nia sequeyanijia, cante cua rupaa tojjiani, nojoriiri maja na shaajenu quiniutianiya.

52 Narta Judiocuacaari na sequeree:

—¡Quiarijia cutara canaari niishiyani quiaari seetanujuaanaa samaruraca! Canaa supuetana Abrahamri cusoquiaari, mariyata puetunu Pueyaso sequenu panishano caminiujiuniaajanaanio. Quiaari saniniuujia quiarijia sequeyacuaja: “Cante cua rupaa tojjiani, majaari na shaajenu quiniutianiya”. ⁵³ ¿Quiaateeri jiyaniya quiaa socua cutara pueyano canaa supuetana Abrahamjiniji? ¡Maja! Nojuajaari shaajequiaari. Mariyata puetunu Pueyaso sequesano caminiujiuniaa pueyajanaari shaajequiaarijuhuj. ¿Canteeri quiajaniani na quia sequenuratej?

54 Jesuuri nojori riucuaaree:

—Janiya jaara tama cua cuaqueyajaaja jiyatenu paniri juhua jiyaniijiarani, cunoori najuhuanaj. Seetanujuanaa, cua Quecuajaari cua jiyatequiaari Jiyaniijiarajanaa. Nojuajaari nia sequesano nia Pueyasota. ⁵⁵ Niaari seetanujuaanaa na niishiyashijiaca. Janiya cutaraari cua Que Pueyaso niishiyani. Janiya jaara nia sequereni, maja cua niishiniu nojuaja, janiya maara sapojoua quirini taa nia quiyacuaani. Janiya cutaraari na niishiyani. Janiyari cunora na rupaa tojjiani. ⁵⁶ Nia supuetana Abrahamri timiquiaari na niishishacari janiya mijiria supuenutaniyani. Nojuaja jaara cua niquiquiaari mijiria quiyano tari, jiyano hua timiquiaariiri.

57 Narta Judiocuacaari Jesu juaarii. Naa na sequetureeri:

—¡Jaj! Majaruhua juhuanouaja cincuenta marijia shocojonu quiajanija. ¿Taa quia sequeyarini quiaa canaa supuetana Abraham niquiquiaari?

58 Jesuuri nojori riucuaaree:

—Janiya nia sequeya seetanujuaanaani, Abraham raaquishacarijia, janiyari tari quijiani.

⁵⁹ Naa nojori tojishacari Jesu sequesanotej, narta Judiocua-caari sai pajenuuree Jesu na jacutajara juucua. Jesuuri nojoriicuaaji jamaarii saaja. Pueyaso Secojojua tiajiniji tohuata-maari.

9

Jesu jeeacasacari cariyojuaru namijia, naa rasanojuhuanajaj

¹ Tamacari Jesu rucuanajosacari canaata, canaari cariyojuaru pueyano niquiriini, naa rasanojuhuanajaj. ² Canaari cunora Jesu nequesotareeni:

—Niishitiojonanaa, ¿casaara naa cuno pueyano rasaaquiaari cariyojuaruni, na queya miiniuucua sesatee, tama sesa na miiniuucuaajaaja soj?

³ Jesuuri canaa riucuaaree:

—Maja. Maja cunora naa na rasaanu quiquiaari. Naa rasaaquiaariiri Pueyaso cumaaca niishishaanura, na namijia jaara jeecasaare niquijiara na quiniuria. ⁴ Juuca quishacarijia, pa tucuatate miiniu cua Jiyarona sequesano cua miiniuria. Paa quera niniyani. Jaara niniquii, majaari pa naata poonijionu quiniutianiya tari. ⁵ Mijiria cua quishacarijia, janiyari pueya jiuujia cuhuatanani.

Jesu sequesacari: “Paa quera niniyani”, nojuajaari pa shaajenujiniji sequeriquiaa miriqui.

⁶ Naa Jesu sequenu nuhuajitij, nojuajaari jiyocua riocoree. Na riacauta coniquioreeri. Coriyacau mara ruporohua cariyojuaru namijiaacuaari. ⁷ Cariyojuaru sequerohuari:

—Siloé cuarimia quia jeequesee quia namijia.

Hebreo rupaajinia, Siloé cuariiri sequeya “Pueyaso Jiyarosano cuari”. Cariyojuaruuri cuarimia quiaaree. Tii na namijia jeequeseeri. Tariucua niquijiara na tiajinia tiuquiriohua. ⁸ Cariyojuaru na quishacarijia, nojuajaari na mijajau na masetajara cumaneeca mashiniquijiojua quiquiaari. Puetunu pueyajanaari na niqutiujia naa na mashiniquijosacari. Naacuajitij, nojuaja jaara niquijiara quiquiaari, tarijia na niquiniaa pueyari, mariyata na shuriucua quiniaa pueyano, nojoriiri tama sequetooquiaarijiaaja:

—¿Cante cuno pueyanojaarani? ¿Majate noocuaja tarijia cumaneeca mashiniquijiojuatej?

⁹ Noojiaqueya pueyari sequereee:

—¡Taaquiriririni, nojuajacuj!

Tamasacaari saniniuujia sequereecujua:

—Nojuajaquinio naasucua. Juhua nojuaja niquishiyacuj, majaari seetanujuanaa nojuaja.

Tarijia quijia cariyojuaruuri saa sequereejaa:

—Taaquiriirini, janiyacuaaquiniatejaj.

¹⁰ Naaratej, pueyari na nequesotaree:

—¡Quiaacuja cariojuaru quijiaruhua! ¿Taa niquijiara quia quiriohuarini?

¹¹ Nojuajaari pueya riucuree:

—Cuno, Jesu jiyanishano pueyanoni, nojuajaari mara coniquioree cucuara. Cua namijiaacua na ruporohuari. Na nuhuaji, cua jiyaroreeri Siloé cuarimia cua jeequenura cua namijia. Janiyari quiaareeni. Cua namijia cua jeequesacari, janiyari niquijiara quiquiini!

¹² Pueyari na nequesotaree:

—¿Teeteeri quia namijia jeezana pueyanoni?

Nojori riucureeri:

—Johuaj. Maja cua niishiniu.

Fariseocuaca nequesoreesacari na namijia jeeCASANO pueyano

¹³ Pueyari Fariseocuacaacua jiyataaree Jesu jeeCASANO cariojuaru pueyano. ¹⁴ Jesu jaara mara coniquioquiaari na jeeCANURA cuno pueyano namijia, cuno juucaari Judiocuaca samaatenu juuca quiquiaari. ¹⁵ Nocuaji Fariseocuacaari tarijia cariojuaru quijia nequesotaree taa niquijiara na quiriini. Nojuajaari nojori riucuree:

—Jesu cua namijiaacua rupojorucuaa marani. Na nuhuaji, janiyari cua namijia jeequeseeni. Naacuaajitij, janiyari quiar-ijia niquijia quiyani.

¹⁶ Noojiaqueya cuno Fariseocuacajinijinioori saa sequereejaa:

—Cuno pueyano, nio pueyano namijia jeeCARUCUAANI, nojuaja maja Pueyaso Jiyarosano. ¡Nojuajaari Moisés Rootasano tojiyashijia, naa na miiniuucua samaatenu juuca!

Tamasacaari saniniuujia sequeriquiaacujua:

—Jaara sesa miijia quiri, ¿maatucua casaara poonijiore Pueyaso cumaacatacuaraarini?

Naa nojori juayonuutanuucuatej, nojoriiri juhua raquiti-irri. ¹⁷ Nocuaji tarijia quijia cariojuaru nequesotaturuhuar-ihuaj:

—Niquijia quia quishacari quiarijia, ¿taa quia sequeya Jesuni? ¿Maninia miijiatee?

Nojuajaari saaja Fariseocuaca riucuree:

—Janiyara, nojuajaari Pueyaso sequesano caminiujiunia.

¹⁸ Tii quiniaa Judiocuacaari na cuaracashitirii saaja. Nojoriiri jiyaniquiaari maja naasucua seetanujuanaa cariojuaru cuno pueyano quiniu quijia. Nocuaji nojoriiri na queya sequeturee nojoriicua na niniuria. ¹⁹ Nojori tiuquishacari, cuno Judiocuacaari nojori nequesotaree:

—Canaa nia sequere, ¿nio pueyanote seetanujuanaa nia niyanu, nia sequesano cariojuaru rasanohuanani? ¿Taa quiaritia niquijara na quiriohuarini?

²⁰ Na queyari cuno pojori riucuaree:

—Taaquiriirini, nojuacuaaquinateja canaa niyanujuaj. Naa cariojuaru rasaaquiaariiri. ²¹ Majaari canaa niishiniu cutara taa na quiriohua niquijarani. Majaari canaa niishiniujuhuaj, cante na namijia jeecarucuaani. Nojuaja nia nequesotare, tari cumantumacacuaja. Nojuajanaa cuaara nia pohuataara cutara.

²² Na queyari naa riucaquiaari narta Judiocuaca camarucuatej, na pueretusacari nojori. Judiocuaca camarucuaari tari sequetuquiaari: “Cante Jesu sequeyani nojuaja seetanujuanaa Pueyaso Jiyarosano, na sequejaca pueya cuaara tenujusaaria maja Pueyaso secojojua tiajinia na tiuquiniuria socua”. ²³ Naaratej, na queyari naa narta Judiocuaca riucaquiaari: “Nojuaja nia nequesotare, cumantumacacuaja”.

²⁴ Cunora cuno Judiocuacaari socua piiriohua na namijia jeecasano pueyano. Nojoriicua na nishacari, na seque-
tureeri:

—¡Paacuajaari Pueyaso niquiara niya quiyani! Naaratej, ¡seetanujuanaa canaa quia pohuatare cuno pueyanojiniji! ¡Canaa cutaraari niishiyani cuno pueyanoori sesa miijia!

²⁵ Na namijia jeecasano pueyanoori nojori riucuaree:

—Naajaa, jaara sesa miijia quiri, jaara maninia miijia quirijuahuaj, maja cua niishiniu cuno. Janiya cutaraari niishiyani, ¡janiyari tarijia niquiyashijia quiquiaarini! ¡Janiyari saniniuujia quiaritia niquijia quiya cutarani!

²⁶ Nojoriiri na nequesotarohuacuahuaj:

—¿Taa na miiriucuaa quiajaniyajaarani, niquijia quia quiniuriani?

²⁷ Narta Judiocuaca camarucua sequeree saajaari:

—Janiyacuja tari nia pohuatareeni. Majaari nia tojiniu paniniu janiya. ¿Casaara nia paniya socua cua pacutenura sequenu niajaniyani? ¿Niaate na pueyara quiniu paniya soj?

²⁸ Naa na sequesacari nojoritij, cuno Judiocuaca camarucuaari na sesacaturee. Naa na sequetureeri:

—¡Quiaari cuno pueyano tojijiacuja! ¡Canaa cutaraari supuetana Moisés Rootasano tojitiajacani! ²⁹ ¡Canaa cutaraari niishiyani Pueyasojuanaari Moisésua muetaquiaari na rootanura nojuaja! ¡Saniniuujia cuno pueyanoorijiatat, majaari quenaaja pa niishiniu teje na supuequiaarini!

³⁰ Na namijia jeecasano pueyanoori nojori riucuaree:

—¡Niaaquiiri mosanucua seetanujuanaa! ¿Majateeri nia niishiniu teje na supuequiaarini? ¡Nojuajaari cua namijia

jeecarucuaa! ³¹ ¡Paacuaajaari niishiyani Pueyaso maja na tojiniu quijia sesa miijiaa secojosano! ¡Saaja na timitiajaca secojosano tojiya cutaraari, cante na panishano miiquiaacua-jani! ³² ¡Majaari quenaaja pa tojiniu quijia tamonu pueyano-jiniji, cante cariojuaru namijia jeecajani, naa cariojuaru rasanohuanaj! ³³ Cuno pueyano jaara Pueyaso Jiyarosano quiyacuri, ¿taa cua namijia na jeecarucuaacuaraarini?

³⁴ Cuno pojoriiri na juaaniutia na sequeturee:

—¡Quiaari sesa miijia rasaaquiaari! ¿Quiaateeri jiyanojuaa canaa niishitiojonu paniyaruhua?

Naaratej, narta Judiocuaca camarucuaari na tenujuturee maja socua na tiuquiniuria Pueyaso secojoja tiajinia. Naacuajitij, cuno pueyanoori juhua taanuusano pueyano quiquiaari narta Pueyaso timitiajaca pueyajiniji.

Jesu tojtiaashijiaa pueya juhua cariojuaru

³⁵ Jesuuri niishiquiaari cuno pueyanoori tenujusaarucuaa. Jaara na riuriataquiaari, Jesuuri na sequeree:

—¿Quiaate Pueyaso Niyanuucua tiuujia?

³⁶ Jesu sequereeri:

—Jiyaniijianaa, cua sequere canteeri nojuajani, nojuaja cua niishiniuria nocua cua tiuuniuria.

³⁷ Jesuuri na sequeree:

—Quiaacuaja na niquiyaruhua. Nojuajaari cunocuja, quiata pocoojiyani.

³⁸ Jiyacaritij, pueyanoori Jesu cariquimiaji mojoquetaree. Na sequereeri:

—¡Quiocua tiuyanijia, cua Jiyaniijianaa!

³⁹ Na nuhuaji, Jesuuri cuniqui quiniaa pueya niquiara sequeree:

—Janiyari mijiria niquiaarini juhua cua raquiriojotanura mijiria quiniaa. Naacuajitij, cante niishiyani nojuaja juhua cariojuaru quiya, nojuajaari juhua namijiaraca quiniutianiya cucua na tiuushacari. Saniniuujia, cante jiyaniyani nojuaja niquijia cutara, nojuajaari juhua cariojuarura tari jiyatesaaree, cucua na tiuyaquiniuucua.

⁴⁰ Tii quiniaa Fariseocuaca jaara tojiquiaari naa Jesu sequesantej, nojoriiri Jesu sequeree:

—Naa quia sequesacaritij, ¿quiaateeri sequeya canaari cariojuarujurijihuaaj?

⁴¹ Jesuuri nojori riuquaree:

—Niaa jaara tama nia cuaqueyajaaja jiyatere juhua cariojuarura cucua nia tiuuniuria, Pueyaso maara nia jiyanoori. Quiarijiani, tama nia sequenucuaajaaja, “Canaa niquijia cutarani”, niaari jiyanooshoojua nioojia nia tacatoyaquiniuucua.

10

Jesu pohuatasano miriqui borrego cojuanajiniji

¹ Jesuuri socua pohuatarohua pueya niquiara. Naa sequereeri:

—Seetanujuanaa nia sequeyanijia, cante borrego mataca tohuateyaco tiuquiyaquijiani, nojuaja jaara tamocoji tiuquimia, cunoori nohuasejojua. ² Saniniuujia, cante tohuateyaco tiuquijia cutarani, cunoori borregohua camarujuanaa cutara. ³ Tohuateya cojuanaari tiotiu riataquiaa nocuaji. Borregohua camaruuri puetunu na seya sesacajanaa jiyaniquijia. Na borregohuari na rupaa niishijia. Na camaruuri naa na tohuatanijiojua puetunujuanaa na matacainiji. ⁴ Puetunu na borregohuajanaa jaara tohuareetama, na camaruuri na puetaja. Na seyari na nuhuaji sacujaja, na camaru rupaa nojori niishishacari. ⁵ Saniniuujia, borregohuari maja na nuhuajiniu quijia na niishiyaquishoo pueyano. Saaja nocuaji cocuatejaari na niishishacari cunoori maja na camaru rupaa.

⁶ Jesuuri naa pohuataquiaari miriqui nojori niquiara. Nojoriiri saaja niishiyaquiquiaari casaa na niishitiojonu paniriquiaa nojorini.

Jesucristo, maninia pa cojuana

⁷ Nocuaji Jesuuri naa nojori sequerohua maatia:

—Seetanujuanaa nia sequeyanijia, janiyari juhua tohuateyani, cua borregohua tiuquitianura cua Que Pueyasocua. ⁸ Cante cua niyacarijia nijioquiaari coteenuni, nojoriiri sesa miijiaca quiquiaari, nohuasenuujuaca. Cua borregohuari namitia nojori numueejushiquiaari. ⁹ Janiyari juhua tohuateyani. Cante janiyajiniji tiuquiya cua Queecuanu, nojuajaari Pueyaso pueyanora jiyatesaanutaniya cutara. Cuno pueyanoori maninia cojuasano juhua borrego. Janiyari na tiuquininiutianiyani, tii na quiniuria maninia cojuasano. Janiyari juuca na tohuatenutaniyani, jiyasocua cua miaquetenura carijiniacuma.

¹⁰ 'Nohuasejojuaari saaja tiuquijia borregohuacua na nohuasenuura, na puecoonurajuhuj. Naa na shaajaaja puetunujuanaari. Janiyari saniniuujia niquiaarini cua borregohua cua jiyatenura pueyaracaanu quijiacara, seetanujuanaa jiyanojua shuquiriaatia quijiaca nojori quiniuria. ¹¹ Janiyari maninia cojuanani, maja tamonu. Pueyano jaara maninia na seya cojuana maniniu quiri, tama na cuaqueyajaaja panitiaja na seyacuaari. ¹² Saniniuujia, borregohua camarujuanaa jaara tamonu cojuateya na seya, cuno pueyano jaara niquiri sare nocua canujiyano,

nojuajaari na puerenuta neteja. Borregohua tiujiaqueeri. Naa miiijaari cuno borregohua quiyaquiniuucua na seyajanaa. Naacujitij, sareeri borregohua soojua. Naa na cocuatajaari. ¹³ Cuno borregohua cojuanaari naa neteja sareecuaji na tacayaquishacari seetanujanaa cuno borregohuacua. Nojuajaari saaja paniya na poonijosano sami na niquitiosaanura.

¹⁴ Janiya cutaraari maninia cojuaja borregohuani, na camarujanaa cua quishacari. Janiyari puetunu cua seyajanaa niishijiani. ¹⁵ Nojoriiri cua niishiyajuhuaaj, taa cua Que niishiya janiyacuaani, mariyata taa cua niishiya cua Quejaniuhuaaj. Janiyari tama cua cuaqueyajaaja panitiaja cua borregohuacuarani. ¹⁶ Janiyari socua borregohua jiitiaani. Nojoriiri maja nio cua borregohua maanujinijinio. Janiyari nojori rijionutaniya niyarajuhuaaj. Nojoriiri cua tojtitariquiano. Naacujitij, puetunu cua borregohuajanaari jatiqui quiriquiano, niquiriyatu cojuanaracajuhuaaj.

¹⁷ Cua Queeri cua paniya naa cua panitiasacari tama cua cuaqueyajaaja cuno borregohuacuara. Janiyari tama cua panishacarijaaja mosaanutaniyani, na nuhuaji cua samiitianuhuara, pueyaracaanu quijia cua quiniuhuara. ¹⁸ Majaari quenaaja tamonu naata monu janiya cua paniyaquishacari. Janiyari cua panishacari cusonutaniya cua borregohuacuarani. Janiyari cumaacaracani nojoriicuara cua cusonura. Janiyari cumaacaracajuhuaaj cua samiitianuhuara. Cua Quecuajaari naa cua miiniuria cua jiyaroquiaari mijiria.

¹⁹ Narta Judiocuaca jaara tojiquiaari naa Jesu sequesantej, nojoriiri socua tama juayonuutaquiaarijaaja Jesuucua.

²⁰ Queraatia pueyari jiyacari sequeree:

—¡Cuno pueyanoori samaruraca! ¡Maja na tojiniu, pueyanaa! ¡Najuhuana pocuaano!

²¹ Tamasacaari saniniuujia sequeriquiaacujua:

—¿Samaruraca pueyanoteeri maninia casaa pohuatajajaara juhua nio pueyanojua? ¡Maja! ¿Pueyanoteeri na naata samaru cumaacata jecanu cariojuaru namijijaara? ¡Maja na naata!

Judiocuaca camarucua niqiniu paniyaquishacari Jesu

²² Tamacari, Jerusalén tiacajiniaari queranacusaariquiaa. Cunoori quiriquiaa pueya niishiriojonura nojori juhua cuno juucajinia Pueyaso Secojoua tia jiyatequiaariuhua seetanujanaa juhua Pueyaso quiquiora na quiniuhuara. Jiyacariiri shuniya quiriquiaa. ²³ Jesuuri tii quiriquiaajuhuaaj. Pueyaso Secojoua tiajinia quiriquiaari. Nojuajaari pueya jiyaniquis-hano tariucuacaanu jiyaniijia Salomón canujuucojojuajinia

riujiuuniuquiojoriquiaa. ²⁴ Jiyacaritij, canaa Judiocuaca camarucuaari tii na cosesee. Naa na nequesotatureeri:

—¿Taacari canaa quia sequenutaniya socuaari cante quia-janiyani? ¡Quiaa jaara seetanujuanaa Pueyaso Jiyarosano quiri, quiarijia canaa quia sequere!

²⁵ Jesuuri nojori riucuaaree:

—Janiyacuaaja tari nia sequecanuni. Niaari saaja na cuaracashitiquianu. Niaa cuaara niishiiria cante janiyani, nia niquishacari cua miishano cua Que sequesano janiya. ²⁶ Niaari saaja cucua tiyaquiquiaa cua borregohua maanujinijinio nia quiaquishacari. ²⁷ Cua borregohuari cua rupaa tojjia cutara. Janiyari nojori niishiyajaanihuaj. Nojoriiri cunora cua nuhajuquiaa. ²⁸ Janiyari pueyaracaanu quijiara nojori jiyatequiaani. Majaari nojori juurequenu quiniutianiya. Majaari quenaaja tamonu naata jaariutianu quiniutianiya nojori janiyajiniji. ²⁹ Cua Queeri cua borregohua cua niqutioquiaari. Nojuajaari socua jiyanohua cumaacaraca tamasaca cumaacaraca quijiacajiniji. Naacua-jitij, maja quenaaja tamonu naata cua borregohua jaariutianu cua Quejiniji. ³⁰ Janiya cua Queta, canaari juhua niquiriyatuni.

³¹ Jiyacaritij, canaa Judiocuaca camarucuaari sai rijioro-huacuhaj, Jesu na jacutajara juucua. ³² Jesuuri saaja nojori sequeree:

—Janiyari queraatia maninia casaa miiquianu saaja cua Que cumaacata nia niquiarani. ¿Teyanoocua nia jacunu paniya janiyani?

³³ Nojoriiri Jesu riucuaaree:

—Majaari canaa jacunu quiniutianiya quiajaniya maninia quia miiniuucua. ¡Canaari quia jacunutaniyani sacuaraatia quia pocuanuucua Pueyaso niquiara! ¡Quiaari tama quia cuaqueyajaaja jiyateya juhua Pueyasora! ¡Cunoori jiyanohua sesa! ¡Quiaacuajaari pueyano, juhua canaajuhuj!

³⁴ Jesuuri nojori sequeree:

—Niaacuajaari tariucuaaanu naajiosano Pueyaso Rupaa jiiitaa. Pueyaso sequesanoori naa naajiotasano quiya tii: “Janiyacuaajaari nia sequequiaarini, niaari pueyasohua”.

³⁵ Paacuajaari niishiyani, Pueyaso Rupaajinia naajiotasanoori maja na naata cuaracashitishaanu. Pueyasojuanaari pueya jiyaniquiquiaari “pueyasohuata”, noo pojori, teyano nojuaja jiyatequiaari Israel pueya jiiitanaaracuajani. ³⁶ Naajuhuj, Pueyasocuaajaari cua saquiriojoquiaari mijiria na jiyarosocoriquiano. Naa Pueyasojuanaa Jiyarosano cua quishacaritij, ¿niaatucua casaara sequereni janiya Pueyaso niquiara pocuaaree sesani,

cua sequesacari janiya Pueyaso Niyanuni? ³⁷ Janiya jaara cua Que panishano miyaquiri na cumaacatani, janiya maara nia juayaquirini cucua nia tiuyaquiniuucua. ³⁸ Niaacuajaari cua Que cumaacata cua miishano niquiquiaa. Niaa jaara cua pohuatasanoocua tiuuniu paniyaquiri, naajaa, cua Que cumaacata cua miishanoocua nia tiuuri quenaaja. Niaa jaara niishiri puetunu cua miishanojuanaari cua Que Pueyaso cumaacata miishano, niaa maara niishiri Pueyasoori coojia rupueja, janiyari noojia rupueyajaaniuhuj.

³⁹ Jiyacaritij, nojoriiri socua Jesu quiatunu paniriohuacuhuj. Jesuuri saaja nojoriicuaji mashiquii.

⁴⁰ Jesuuri canaa jiyataarohua Jordán moo taquijiria tee Juan tiuquinijioquiaari tarijia pueyacuajani. Canaari tii quishiini. ⁴¹ Queraatia pueyari Jesuucua nijioquiaari tee canaa quiriquiaacuajani. Nojoriiri tama sequequiaarijiaaja Jesujiniji:

—Tiuquinijiona Juanri maja quenaaja na miiniu quijia casaa Pueyaso cumaacata. Naajaa, puetunu nio pueyanojiniji na sequesanojuanaaquiiri seetanujuanaa quijia.

⁴² Naacuajitij, queraatia pueyari Jesuucua tiuquiaari tii, tee canaa quiriquiaacuajani.

11

Lázaro shaajenujiniji pohuatasano

¹ Jiyacaritij, tamonu pueyanoori cusosu matariquiaa. Na sesa quiquiaari Lázaro. Nojuajaari Betania tiacajinijiniojuanaa quiquiaari, Judea jiyajinia. Na rimiatuhua quiquiaari María, Martanio. Nojoriiri cuno Betania tiacajinijinio quiquiaarijuhuaj. ² Lázaro rimiatu Maríani, nojuajaari noo maajicuaja Jesu niohuaca sacuanijiaquiaari na muecacatatej, nocua na totanu nuhuaji na shanohua jaanutaja. ³ Lázaro matasacari cusosu, na rimiatuhuari pueyano jiyarotuquiaari Jesu numootenuucua. Naaratej, cuno pueyano tiuquishacari Jesuucua, nojuajaari naa caminiujuquiaari Lázaro rimiatuhua sequesano nojuaja:

—Jiyaniijianaa, quia panishano pueyanona cusosu mataa.

⁴ Jesu tojishacari naa cuno pueyano sequesanotej, tii quiniaa pueya sequereeri, canaajuhuj:

—Nojuajaari maja na cusonu quiniutianiya na shaajenura puetunujuanaa. Cuno cusonu na jitiiasanojinijini, pueyari Pueyaso cumaacata miishano niquiniutianiya. Pueyari cunora Pueyaso Niyanu maniniuhuaqueetanutaniya, cua Que Pueyasojuhuj.

⁵ Marta, María, Lázaronio, nojoriiri Jesu panishano pueya quijia. ⁶ Naajaa, Jesu jaara numootesaaquiaari Lázarojiniji,

majaari nocua na quianu quiquiaari ritia. Caapiqui juuca camueeree cuniquijiaaraari, tee canaa quiriquiaacuajani.

⁷ Na nuhuaji, canaa na saquiriojosano pueya sequereeri:

—Judea jiyajinia pa quiaarohuacuara socua.

⁸ Canaari Jesu sequereeni:

—Niishitiojonanaa, cuniquijinio Judiocuacacuajaari shusha naataja tii quia jacunu paniquianu. ¿Casaara socua tii quia quianu paniuhuariniuhuj?

⁹ Jesuuri canaa riucaaree miriqui:

—Janiyara, juuca juhuanajuaja. Juucaari maninia seetanujuanaa pa rucuanenonura. Paa jaara pananu tiuquiyaquishacarijia rucuanenonura, paari maninia niquiya pocuajini. Majaari pa tiuriini. ¹⁰ Paa jaara ninishiqui rucuanenonura saniniunijia, paari tiurijiani cuhuashiqui na quiyaquishacari.

Jesuuri naa sequeriquiaa miriquitij, nera, maja puereeta na quiniu quiriquiaa Judiocuaca niquiara na rucuanenonura, na mosaanu juuca quiyaquishacarijia. ¹¹ Na nuhuaji, Jesuuri naa canaa sequereeri socua:

—Pa rupuena Lázaroori tari maqueque. Janiyari na niucujanucua quianutaniyani.

¹² Canaari Jesu sequereeni:

—Jiyaniijianaa, nojuaja jaara maqueya, maniniacuajaqui. Naacuajiti paari niishiyani naatananiuhuacuajaqui. ¿Paatucua casaara najuhuaana nocua quiaareni?

¹³ Naa Jesu pohuatasacari canaa Lázarojinijitij, canaa sequeriquiaa juucuaari Lázaro tari macu quiriquiaa. Canaari saniniunijia jyaniriquiaani Jesu naasucuaari canaa pohuatariquiaa Lázaro nareja maqueriquiaa. ¹⁴ Nocuaji Jesuuri maatia canaa sequereeri:

—Lázaro tari cusoyarucuaa. ¹⁵ Janiyari timiyani tii cua quiyaquiniucua Lázaro quishacarijia samini. Naa quiarijia macu na quishacarijia, niaari socua jiyajeneta casaa cua miishano niquniutianiya, seetanujuanaa cucua nia tiuuniuria cutara. Quiarijia cutara, nocua pa quiaare.

¹⁶ Jiyacaritij, Tomásri canaa narta saquiriojosano pueya sequereeri:

—Pa Jiyaniijata pa quiaarejuhuj, nata pa cojiritiasaanura pueconu.

Cuno Tomásri pueya sesojosano quiquiaari “Caapueya muetusano”.

Jesu, macunucua samiitianijojua

¹⁷ Canaa jaara tiuquijioseequiaarini, Jesuuri pohuatasaaquiari Lázaro tari cuatro juuca shocotejoriquiaa raaco na niasaanujiniji. ¹⁸ Betania tiacaari catecaja Jerusalén tiacajiniji. (Nareja media hora paa jaara ritia

rucuaneyareni). ¹⁹ Naaratej, queraatia narta Judiocuacaari quiojoquiaari Marta, María tiajinia, nojori na cumanijanura na nanu nuhuaji. ²⁰ Marta jaara niishiquiaari Jesu shusha tiuquiriquiaa, nojuajaari nocua tohuataquiaari canaa na naacunura. Majaari María niniu quiriqiaa cutara. Tiajiniaja quiriiri. ²¹ Canaacua Marta tiuquishacari, nojuajaari Jesu sequesee:

—Jiyaniijanaa, ¡quiaa jaara niya quiquianu, cua nanu maara shaajeyaquiquianu! ²² Naajaa, janiyari niishiyani quiaa jaara Pueyaso secojore, Pueyasoori quia secojosano tojiniutianiya.

²³ Jesuuri Marta sequeree:

—Quia nanucuaja samiitiananiuhua.

²⁴ Martaari na riucuaaree:

—Taaquiriirinij, janiyacuaaja niishiyani nojuajaari samiitiananiuhua macunucua samiitiacosacariuhua jiya puequesacari.

²⁵ Jesuuri na sequeree:

—Janiyacuaajaari macunucua samiitianijiojuani. Cante cucua tiuujiani, jaara cusoyare, naajaa, samiitiananiuhuari. ²⁶ Cante cucua tiuurii saminio na quishacarijiani, nojuaja jaara cusoyare, naajaa, majaari na shaajenu quiniutianiya seetanujuanaa. ¿Quiaate cua sequesanoocua tiuya Martanaa?

²⁷ Nojuajaari Jesu riucuaaree:

—Jaa, Jiyaniijanaa. Janiyacuaja niishiyani quiaari Cristo, Pueyaso Nyanu, nooj tariucuacaanu sequesaaquiaari mijiria niriqianotej.

²⁸ Naa Marta riucuanu nuhuaji Jesutej, na tiajinia quiaarohuari. Naa María numaama sasacasuhuari:

—Niishitiojona jati quiya. Quia sequeyano nocua quia quianura.

²⁹ Naa María tojishacari Marta sequesanootej, ritia sanequeeri. Jesuucua nimiaari tee canaa quiriqiaacuajani.

³⁰ Jesuuri juhuanujuaja maja na tiuquitianu quiquiaari canaa cuno tiacajinia. Canaari tiaca shuriucua quiriqiaajaani tee Marta naacuquiaari canacuajani, Jesuucua na nishacari.

³¹ Nojori cumanijanaa pueya jaara María niqiquiaari ritia tohuataano tiajiniji, nojoriiri na jyaniquiaari na nanu raajinia nujuquenuucua quiaa naasucua. Naaratej, nojoriiri na nuhuaji quiaaree.

³² María tiuquishacari canaacua, Jesu cariquimiaji mojqetaseeri. Naa na sequereeri:

—Quiaa jaara niya quiquianu, cua nanu maara shaajeyaquiquianu.

³³ Jesu niquishacari María nujuqueyano, mariyata nata quiniaa nujuqueyanojuhuaj, Jesuuri nojori taraajetaree.

³⁴ Jesuuri pueya nequesotaree:

—¿Tee na niasaarucuaani?

Pueyari Jesu sequeree:

—Miji, Jiyaniijianaa. Quia niquiquii. Niya niasaarucuaano.

³⁵ Jesuuri nujuquesee. ³⁶ Tii quiniaa Judiocuaca niquishacari Jesu nujuqueyano, tama sequetooreejaarjia:

—¡Nia niquiri! Jiyanohua Lázaro panijiaquiiri.

³⁷ Noojiaqueya cuno pojorijinijinioori sequeriquiaajuhuj:

—Jesu jaara cariyjuaru namijia jeecacanucuaa, maara Lázaro naataniquianujuhuj maja na shaajenura.

Jesu samiitianishacari Lázaro

³⁸ Jesuuri jiyanohua na taraajenuta raa jiyajiria catecanoquiaari, canaajuhuj. Raari puereetuca saajiata mishiquiosano quiriquiaa. ³⁹ Jesuuri pueya sequeree:

—¡Saajia nia ruutiniri tamocora!

Martaari Jesu sequeree:

—¡Jiyaniijianaa, cuatro juuca tari na shoconujiya! ¡Tari mocuaatia jaaniuya naasucua!

⁴⁰ Jesuuri Marta sequeree:

—Janiyacuaaja tari quia sequereeni, quiaa jaara cua sequesanoocua tiuuri, quiaari Pueyaso cumaacata cua miishano niquiniutianiya.

⁴¹ Jiyacaritij, pueyari saajia ruutinirii tamocora. Jesuuri jiyocuacaanu mauree. Naa Pueyaso sequereeri:

—Cua Quenaa, quia timitiaanijia. Quiaari tari cua sequesano tojiriucuaacuaaja. ⁴² Janiyari niishiyani quiaari pueyacaanu cua tojiquiaa. Janiyari naa quia sequereeni, niya quiniaa pueya niishiniuria quiaari mijiria cua jiyaroquiaari.

⁴³ Naa Jesu sequenu nuhuajitij, jiyanohua na rupaa paaretareeri. Naa sequereeri:

—¡Lázaronaa, quia tohuatama!

⁴⁴ Macuuri tariucua saminio tohuatamaa. Na juaashiquiaca, na niohuacaari jiuniosano quiriquiaajaa. Na nacaari puetunu na jiquiocotajanaa mishiquiosano quiriquiaajuhuj, toquerauta morosano. Jesuuri pueya sequeree:

—Nia saacatare, cuaara rucuanera.

Judocuaca camarucua roojotoosacari na monura Jesu

(Mt 26.1-5; Mr 14.1-2; Lc 22.1-2)

⁴⁵ Naa Jesu samiitianishacari Lázarotej, queraatia narta Judocuacaari nocua tiuquiaari, noo pojori

canapuate Mariácuá nijiioquiaari na cumanijianu-racuajani. ⁴⁶ Noojiaqueya cuno Judiocuacajinijinoori Fariseocuacaacua quiojoquiaari nojori pohuatanura Jesu miishano. ⁴⁷ Naaratej, Fariseocuaca, pueyacuara secojonaa jiyaniijianucuanio, nojoriiri rerejoquiaari puetunu Judiocuaca camarucuatajanaa. Nojoriiri sequetuquiaari:

—¿Taa pa miiniutianiya? Cuno pueyanoori queraatia casaa miiquiaa na cumaacata pueya niquiara. ⁴⁸ Paa jaara nareja na shanacure naa na miiniuriatej, ¡puetunu pueyajanaari na pueyara quiniutianiya, nocua nojori tiuushacari! Nojoriiri na jiyaniijiaara socua na jiyatenutaniya. Naaratej, pa jítianaa Romano pueyari pocua nijionutaniya Pueyaso Secojua tia nojori niyartanura, pa pueya na puecoonurajuhuj.

⁴⁹ Caifásri tii quiriquiaajuhuj. Nojuajaari canaa pueyacuara secojonaa jiyaniijiajanaa quiriquiaa cuno marijiaara. Jiyacaritij, nojuajaari narta camarucua sequeree:

—¡Niaaquiiri niishiyashijiaca seetanujuanaa! ⁵⁰ ¿Majateerini niishiniu? Maninia cutaraari niquiriyatu pueyano cusonura pa niti, maja najuhuana puetunu pa pueyajanaa puecoosaanura.

⁵¹ Caifás sequesanoori maja tama na sequesanojuaja quiquiaari. Pueyacuara secojonaa jiyaniijiajanaa na quishacari, Pueyasoori naa na pohuaterree taa Jesu cusonutaniya puetunu Judiocuacaacuarajanaani.

⁵² Seetanujuanaari. Jesuuri maja cusoriquiano quiquiaari saaja Judiocuacaacuara. Nojuajaari cusoriquiano quiquiaari puetunu tariucua Pueyaso saquiriojosano pueyapueecuarajanaajuhuj, tee tiquiyocua niaaquejonu na muerasurano quiyacuajani. Nojuajaari cusoriquiano puetunu cuno pojorijianaa na rerejotenura, jatiqui na quituniuria juhua niquiriyatu maanu. ⁵³ Naacuajitij, cuno juucajiniji, cuno Judiocuaca camarucuaari roojotooriquiaa taa nojori monutaniya Jesuni.

⁵⁴ Nocuaji, Jesuuri maja tari na rucuanefonu quijia narta Judiocuaca niquiara. Cunora tamaquiria canaa jiyataquiaariiri. Canaari nata quishii cariiquia jiya shuriucua tamonu tiacajiniani. Cuno tiaca sesa quiquiaari Efraín.

⁵⁵ Jaara quera quiquiaari tari canaa queranacusacari Pascua juucara, queraatia pueyari quiojoriquiaa Jerusalén tiacajiniara tama na tiacajinijiaaja. Nojoriiri quiojoquiaari juhuacarijia nojori jeenucuanura na cuaqueya nojori puecoosacari tama na seyajaaja nojoriicuara. Nojoriiri naa miiquiaari jiyanooshano nojori quiniuria Pueyaso niquiara, taa supuetana Moisés rootaquiaaricuajani. Nojoriiri naa miiquiaari juhujaniya nojori queranacunura Pueyaso

niquiara Pascua juuca. ⁵⁶ Pueyari tii Jesu pajenuuriquiaa. Pueyaso Secojoua tiajinia nojori quishacari, nojoriiri tama nequesoreetooriquiaajaaja:

—¿Taa nia sequeyani? ¿Pa queranacunujinia niniutianiy-atenojotij, maja soj?

⁵⁷ Pueyacuara secojonaa jiyaniijianucua, Fariseocuacanio, nojoriiri tari pueya rootaquiaari, tamonu pueyano jaara niishiri tee Jesu quiyani, cuaara nojori numooteera nojori quiatenura Jesu.

12

María totasacari na shanohua jaanutaja Jesuucua
(Mt 26.6-13; Mr 14.3-9)

¹ Seis juuca jaara cureeriquiaajaa Pascua juucara, canaari jiyacari Jesuta Betania tiacajinia quiaareeni, Lázaro quijia tiacajinia, teyano Jesu samiitiani quiaaricujani. ² Cuno tiacajinijinio Jesu rupuenaa pueya timitiasacari Jesu, nojoriiri sumatunuquiaari nojori miaquenuunura cuno niucua Jesuta. Martaari miaquesano patootariquiaa pueyara. Lázaroori Jesuta miaquenuuriquiaa narta masuusano pueyata, canaatano. ³ Jiyacaritij, Maríari Jesuucua pataree na shanohua jaanutaja. Cunoori “nardo” jyanishano nataujiniji shipinishano quiquiaari. Jyanohua queraatia cumaneecata masesano. Puereetuca motiiquio cajiniocua puecariquiaari cuno shanohua jaanutaja. Maríari Jesu ni-huacaacua na totaree. Na nuhuaji, na sacuanijiarohua na muecacataari. Puetunu tiacojuanaari shanohua jaanuriquiaa. ⁴ Naa María miishacaritij, niquiriyatu canaajinijinio Jesu saquiriojosano pueyanoori juaarii. Nojuajaari Judas Iscariote quiriquiaa, na nuhuaji Jesu quiatequiaari na paraani. Nojuajaari naa sequeree:

⁵ —¿Casaara cuno shanohua jaanutaja niquitioyaquisharee queraatia cumaneecarani, casamiijiuniucua pueya niquitiojosocoriquianoni? ¡Jaara masenu panishaare, maara niquitiosaare juhua niquiriyatu marijara pueyano poonijionu sami!

⁶ Naa Judas sequesacaritij, majaari seetanujuanaa na taraajenu quiriquiaa casamiijiuniucua pueyacu. Naa sequereeri saaja cumaneecaacua jiaatiaja na quiniucua, nohuasejousa na quishacari. Judasri cumaneeca quiquio cojuatana quijia puetunu canaarajanaa. Naacuajitij, nojuajaari tiji nohuasejousa, pueya niquitiojosanojiniji canaara. ⁷ Jesuuri saaja Judas sequeree:

—Nareja quia niquiri. Nojuajaari nio shanohua jaanujata cojuataja pueyaracaanu, juhuacarijia na jeenucuatajara cua cuaqueya, pueya niaaquishacarijia janiya raajinia, janiya jaara mosaareni. ⁸Casamiijiuniucua pueyari pueyaracaanu niaata quiriquiano cutara. Saniniuujia, janiyari maja pueyaracaanu niaata quiriquianoni.

Pueyacuara secojonaa jiyaniijianucua roojotoosacari Lázaroocuara

⁹ Queraatia canaa Judiocuacaari niishiQUIAARI Jesu Betania tiacajinia quiriquiaa. Cunora, nojoriiri nocua quiojoQUIAARI na niquniuucua, Lázaro niquniuucujahuaj, teyano Jesu samiitianiquiaaricujani. ¹⁰⁻¹¹ Jesu samiitianiniuucua Lázaro, queraatia canaa Judiocuacaari Jesuucua tiuquuaari, na pueya nojori quiniuria. Cunora, canaa pueyacuara secojonaa jiyaniijianucuaari roojotooQUIAARI Lázaro na motunurajuhuj.

Juhua Jiyaniijajanaa Jesu tiuquishacari Jerusalén tiacajinia (Mt 21.1-11; Mr 11.1-11; Lc 19.28-40)

¹² Cuno queraatia pueya, tari Jerusalén tiacajinia quiriquiaacuaa Pascua juucara queranacunurani, nojoriiri niishiQUIAARI Jesu tariqui tiuquiniutianiyajuhuj. ¹³ Nocuaji, nojoriiri tucuru piyotaree. Na nuhuaji, nijiyareeri Jesu naacunuucua, na tucuru shiiniotanuariQUIAARI. Naa nacooriguiaajaariuhua nojori shuquiritiasacari Jesu:

—¡Pocuaji Tacuna! ¡Pocuaji Tacuna! ¡Cuaara shuquiriaatia quiiria pa Jiyaniijia, teyano Pueyaso jiyaroQUIAARI pocuacujani! ¡Nojuacuajaari Israel pueya Jiyaniijajanaa!

¹⁴ Jesuquiiri jiyacari burro niQUIOJUA riuriatamaa. Tari na nijinia cajiriquiaari, taa tariucuaacaanu Pueyaso Rupaajinia naajiotasano quiyacujani. ¹⁵ Naa sequeyari:

“¡Sión tuhananuucua quiniaa pueyanaa, maja puerenu! ¡Nia niquiri! ¡Nia Jiyaniijia cumaji niya niaacua! ¡Burro niQUIOJUA nijinia cajiyari!”

¹⁶ Jiyacaritij, majaari canaa niishiniu quiriquiaa naa canaa tiuquitishacari canaa Jiyaniijia Jesutej, canaari nio tariucuaacaanu Pueyaso Rupaajinia naajiotasano tohuateeriquiaani. Pueyaso jaara Jesu samiitianiquiaariuhua, canaari jiyacari shusha niishiQUIAARINI cuno naajiotasanoQUIIIRI Jesujiniji quiQUIAARI.

¹⁷ Cuno pueya, Jesu samiitianishacari Lázaro niQUIQUIAARINI, nojoriiri pueya pohuatariQUIAa taa Jesu jiiQUIOOQUIAARI Lázaro na raacoji na tohuanurani.

¹⁸ Queraatia pueya niishishacari naa Jesu miishano na cumaacatatej, nojoriiri Jesu naacunuucua nijiyaree.

¹⁹ Nocuaji, Fariseocuacaari tama sequetooriquiaajaaja:

—¡Canaacuajaari cunora nia sequequiaani pa morejanaa! ¿Niaate na niquiya? ¡Puetunu pueyajanaari cuno pueyanooqua pacuree, na pueya nojori quiniuria!

Grecia jiyajinijinio taucuaca pocoojonu panishacari Jesuta

²⁰ Grecia jiyajinijinio taucuacaari Jerusalén tiacajiniara nijioquiaarijiuhuj Pueyaso niquiara nojori querana-cunuunura Pascuara. ²¹ Cuno pojoriiri canaa cojinia Felipeecua catecanoquiaari. Felipeeri Betsaida tiacajinijinio quiquiaari. Cunoori Galilea jiyajinia tiaca. Cuno Griegohuari Felipe sequeturee:

—Pueyanonaa, canaa quia Jiyaniijia Jesuta pocoojonu paniyani.

²² Jiyacaritij, Felipeeri Andrés sequeese cuno pojori sequesano nojuaja. Na nuhuaji, Andrésri Felipeta quiaaree Jesuucua. Nojoriiri Jesu pohuataseejuhuj. ²³ Jesuuri naa nojori riucuaaree:

—Quiarijiani, tama janiyajaarijia mosaanutaniya pueya nitini. ²⁴ Seetanujuanaa nia sequeyanijia, sohuajajau jaara raama jataaquishaare, pueyaracaanu niquijijajau quiniutianiyari. Saniniuujia, jaara natasaare juhua na moquenura, saaja moritianutaniyari queraatia na muetunura. ²⁵ Naajuhuj, cante tama na cuaqueyajaaja panijia puerani, nojuajaari puetunu shaajenutaniyajanaa. Saniniuujia, cante tama na cuaqueyajaaja panitiaja na tojiniuria janiya mijiriani, nojuajaari pueyaracaanu shuquiriaatia rishijara jiyatesaanutaniya. ²⁶ Cante quiria poonijionu paniyani, cuara seetanujuanaa cua tojjijia quiiria. Tee cua quiniutianiyacuaani, cua tojitiajacaari tii quiniutianiyajuhuj. Cua Queeri cua tojjijaca timitianutaniya. ¡Jiyanoqua maninia nojori miiniutianiyajaariuhuj!

Jesu pohuatasacari nojuaja mosaanutaniya

²⁷ Quiarijiani, janiyari jiyanoqua tacayani. ¿Casaa cua sequeyarini? ¿Janiyate sequeya soj: “Cua Quenaa, maja naquiya cua miitiniu”? Maja. Maja naa cua sequenu quiniutianiya. Janiyacuajaari cunora niquiaari mijiriani. ²⁸ ¡Cua Quenaa, janiya cuara miishiiriaqui taa quia paniyacuajani, pueya niishiniuria quiaari jiyanoqua maninia!

Jiyacaritij, Pueyasoori tojishaaree pocuaano jiyocua-caanuji. Naa Neyanu sequereeri:

—Janiyacujaari naa niishitirii pueyani, pueyaracaanu quia miishacari cua panishano. Janiyari socua pacutenutaniuhua pueya niishitiniuni, quiaa jaara nojoriicuara mosaare.

²⁹ Cuno pueya, canaata tii quiriquiaa Jesutani, nojori tojishacari Pueyaso pocuaano, nojoriiri sequeturee:

—¡Miacanacuaja cuno tojishaareni!

Tamasacaari saniniuujia sequereecujua:

—¡Pueyaso serucuaja nocua pocuareeno!

³⁰ Saniniuujia, Jesuuri canaa sequeree:

—Cuno rupaa niaa na tojiriini, majaari quiria na quiniu quiriquiaa. Cunoori nia tojishocoriquiano quiriquiaa, nia niishiniuria cua Queeri cua tojiquiaa cua secojosacari nojuaja.

³¹ Quiarijiani, mijiria quiniaa miishacari naquiya janiya, nojoriiri saniniuujia saniitiosocoriquiano jiyatesaaree tari. Naajuhuj, mijiria jiyaniijia Sesaacaari jatasaanutaniyajuhaaj, maja cumaacaraca na quiniuria socua. ³² Janiya jaara nujuaretasaareni, janiyari puetunu pueyapuejanaa nijiotenutaniya cucuani. Nojoriiri juhua jaatiasaanutaniya cucua, cucua nojori tiuuniuria, nojori ruuretatura janiya soj.

³³ Naa Jesu sequesacaritij, canaa niishitiriiri taa pueya monutaniya nojuajani. ³⁴ Tii quiniaa pueyari na riuucaree:

—Canaacuajaari tariucuacaanu Pueyaso Rupaajiniji niishiyani, Pueyaso Jiyarosocoriquiano Cristoori pueyaracaanu rishiriquiano cutara. Quiajaniyarijiataj, ¿casaara quia sequeyarinijia, Pueyaso Jiyarosanoori nujuaretasaanutaniya tii na cusonura? ¿Canteeri cuno pueyanoni, quiaa na sequeya Pueyaso Jiyarosanooni?

³⁵ Jesuuri nojori sequeree saaja:

—Janiya, nioojia cuhuatanani, janiyari niaata quiniu-tianiyajaara rupaquijiani. Nocua nia tiuuri juhuacarijia, ninishiqui quiaquishacarijia. Cante ninishiqui rucuanajuani, nojuajaari maja na niishiniu tee na quiaani. ³⁶ Nioojia cuhuatanaacua nia tiuuri, niaata cua quishacarijia, seetanujuanaa cuhuashiqui quijiaca nia quiniuria.

Naa Jesu sequenu nuhuaji cuno pojoritij, quiacuahuari. Nojoriicuaji jamaashiiri.

Judiocuaca tiuyaquishacari Jesuucua

³⁷ Jesuuri jiyanojua queraatia jiyajeneta na cumaacata miishano miiquiaari pueya niquiara. Nojoriiri saaja nocua tiuyaquiquiaari. ³⁸ Naacuajitij, tariucuacaanu Pueyaso sequenu panishano caminiujiunia Isaías pahuatasanoori tohuatequiaari, nojuaja jaara naa sequequiaari:

“Jiyaniijianaa, ¿cante canaa pahuatasanoocua tiuuriini, canaa pahuatasacari quia Jiyarosocoriquianojinijini? ¡Shaaqui! ¿Cante niishiriijiaaniuhuj, jiyajeneta casaa nojori niquishanoori seetanujuanaa quia cumaacata miishano quiriquiaa? ¡Shaaqui!”

³⁹ Naacuaajitij, majaari nojori naata tiuuniu quiquiaari Jesuucua. Isaíasri naa naajjotaquiaarijihuhaj:

⁴⁰ “Pueyasoori nojori jiyateree juhua nimishitioria, maja nojori niquniuria na namijiata. Nojori niishitiaja cushitioreejaariuhaj, maja nojori niishiniuria nojori jiuujiata. Naa nojori miiriiri maja nojori tacatonura nojori jiuujia, cua jiyanooniuria nojori, quiarinio pueyara cua jataniyaquiniuria nojorijihuhaj”.

⁴¹ Supuetana Isaíasri naa caminiujuquiaari Pueyaso niishitishano nojuajatej, Jesu na niquniuucua na shacantuuca cumaacajinia quiyano. Naa na pohuatasacaritij, nojuajaari juhuacarijia Jesujiniji pohuatariquiaa.

⁴² Naajaa, queraatia narta Judiocuacaari Jesuucua tiuquiaari. Queraatia canaa jiyaniijianucuaari nocua tiuquiaarijihuhaj. Cuno jiyaniijianucuaari maja na pohuatanu quijia pueya niqiara, Jesuucua tiuujica nojori quishacari. Nojoriiri na pohuataaquijia, Fariseocuaca na pueretusacari, Fariseocuaca mariqui nojori tenujureeri maja socua nojori tiuquitianura Pueyaso secojojua tiacajinia. ⁴³ Nojoriiri saaja narta pueya shuquiritiasano pueya quiniu panijia, maja Pueyaso shuquiritiasano cutara.

Pueya tojitiaaquiniuucua Jesu sequesano, nojoriiri saniitiosaariquiano

⁴⁴ Jesuuri jiyanohua na rupaa paaretaree. Naa sequereeri: —¡Cante cucua tiuuriini, majaari saaja na tiuuniu cucua! ¡Cua Queecua tiuuriijiaariuhaj, cante cua jiyaromniaaricujani! ⁴⁵ ¡Cante cua niqiriini, nojuajaari cua Jiyaroma niqiriijihuhaj! ⁴⁶ Janiyari mijiria niqiaarini cua cuhatanura niajanija. Naacuaajitij, cante cucua tiuuriini, majaari tari na quiniu ninishiqui. ⁴⁷ Pueyano jaara cua rupaa tojiriquia najuhuanaj, janiyajanaari maja nocuara cua saquiriojotanu quiniutianiya na saniitiosaanura. Majaari cua ninu quiquiaari mijiria, pueya cua saniitionura. Janija cutaraari niqiaarini nojoriicujia cua tacunura. ⁴⁸ Cante cua ruuretaja saajani, cua sequesano tojijaquiyajariuhaj, nojuajaari tari nocuara saquiriojotana jiiitia na saniitiosaanura. Nojoriria cua sequesano cutaraari tama nojoriicuara saquiriojotariquianojuaja nio jija puequesacari. ⁴⁹ Cua pohuatasanoori maja tama cua niishishanojuaja. Cua Jiyaroma cua Quecuajaari cua niishitiquiaa casaa cua sequenutaniyani, mariyata casaa cua niishitiojonutaniyani. ⁵⁰ Janiyari niishiyani cante cua Que rupaa tojijiani, nojuajaari pueyaracaanu quijia quiniutianiya cutara. Naaratej, janiyari seetanujuanaa saaja na sequesano caminiujuquiaani, taa na niishitiquiaa janiyacujani.

13

Jesu jeequejosacari na saquiriojosano pueya niohuaca

¹ Jesuuri canaa na saquiriojosano pueyata rerejoquiaari Pascuaacuara juucajinia. Jesuuri jiyacari niishiquiaari tari quiquiaariiri quera na tiujiasacari canaa mijiria, na Queecua na tacanuhuara. Nojuajaari canaa paniriquiaajaa, taa canaa na paniquiaari pueyaracaanucujani, mijiria na quishacari canaata.

² Cuno niucujaja, Jesuuri canaa na saquiriojosano pueyata miaqueriquiaa. Sesaacaari tari Judas Iscariote niishitirii noojiajania, nojuaja cuara Jesu quiateera na paraa, na mosaanura. Cuno Judasri tamonu Simón jiyaniishano pueyano niyanu quiquiaari. ³ Jesuuri niishijia nojuaja see-tanujanaa Pueyasojiniji niquiaari. Naajuhujaj, nojuajaari niishiquiaari, na Que Pueyasoori na jiyatequiaari Jiyaniijiarajanaa, puetunu casaa jiitianajanaa na quiniuria. Niishiriquiaajaariuhua nojuajaari quera na Queecua tacanutaniuhua. ⁴ Jiyaniijiajanaa na quishacari, naajaa, nojuajaari miaquejajiniji sanequiaari. Na tucuaque toque jocua-reeri. Na nuhuaji na cajiniocua camarucuteree cuaqueya tuujutajaari. ⁵ Na nuhuaji, mohuaca shuurii tohuatashijini-aari. Canaa niohuaca jeequejoriquiaari juhua tiaco seru. Na nuhuaji, na sacuanijiariquiaajaariuhujaj na cajiniocua na camarucutesano cuaqueya tuujutajata.

⁶ Na jeequenu panishacari Simón Pedro niohuaca, Pedroori saaja Jesu sequeree:

—Jiyaniijianaa, ¿taa quia miyani? ¿Quiaateeri cua niohuaca jeequenutaniya?

⁷ Jesuuri Pedro riucuarree:

—Quiarijiani, majaari quia niishiniu casaara naa cua miyani. Naajaa, quiaacuaja na nuhuaji niishiniutianiya.

⁸ Pedroori Jesu sequeree:

—¡Cua Jiyaniijianaa, janiya cutaraari maja quenaaja cua shanacunu quiniutianiya cucua quiajaniya, cua niohuaca quia jeequenura!

Jesuuri na riucuarree:

—Janiya jaara quia niohuaca jeequejiyaquirini, majaari cua pueyano quia quiniu quiniutianiya.

⁹ Simón Pedroori na sequeree:

—¡Jaara naa quiriritij Jiyaniijianaa, maja saaja cua niohuaca jeequenucuarajaj! ¡Quia jeequerejuhua cua juaashiquiaca, cua nacanio!

¹⁰ Jesuuri na sequeree:

—Cante shusha nanajani, saaja na niohuacaari jeequeshiya cutara. Na cuaqueyacuajaari tariucua jeequesano quiya. Puetunu niajanijajanaari tari

jeequejosano quiyacuaja. Saa niquiriyatujuaari jeequesoo quiya saniniuujia.

¹¹ Jesuuri tari niishiquiaari cante na quiatenutaniya na paraani. Nocuaji sequeriquiaari: “Niquiriyatu pueyanoori jeequesoo quiya cutara”.

¹² Canaa niohuaca na jeequejonu nuhuaji, Jesuuri na toque cushiriohua. Miaquejajinia cajiriohuari. Canaa nequesota-reeri:

—¿Niaate niishiya casaara naa cua jeequejoree nia niohuacani? ¹³ Niaacuajaari cua sequequiaa “Niishitiojonata”, nia “Jiyaniijiatanio”. Seetanujuanaa nojuacuajanijia, taa nia jiyaniquiquiaa janiyacujani. ¹⁴ Naaratej, janiya jaara jeequejoree nia niohuacacuaani, nia Jiyaniijia cua quishacari, nia Niishitiojonajuhuj, naa nia miiriquia niarta Pueyaso muerasujuhuj. ¹⁵ Janiyari naa miiriini, cua niishitiojonura niajaniya, naa nia miitioonurajuhuj taa cua miirii nia-janiyacuaani. ¹⁶ Seetanujuanaa nia sequeyanijia, seruuri maja socua tojishano quijia na camarnujiniji. Naajuhuj, jiyarosano pueyanoori maja socua tojishano quijia na jiyaronajiniji. ¹⁷ Naa jaara cua rootasano niishiri, niaari shuquiriaatia quijiaca quiniutianiya niaa jaara na tojijiaca quiri.

¹⁸ 'Shusha cua sequesano niajaniyani, cunoori maja puetunu niajaniyaranujuanaa. Janiyacuajaari niishiyani canapue cua saquiriojoquiaarini, taamueca pueyate niajaniyani. Naacuajitij, tariucuacaanu Pueyaso Rupaajinia janiyajiniji naajiotasanoori tohuateenutaniya. Naa sequeyari:

“Tama cuata miaquenajaarijia cua paracara quirii”.

¹⁹ Janiyari juhuacarijia nia toyani. Naacuajitij, cua pohuatasano jaara tohuateere, niaari niishiniutianiya janiyari seetanujuanaa Pueyaso Niyanuni. ²⁰ Seetanujuanaa nia sequeyanijia, cante cua jiyaramiquishano pueya tojijiani, nojuajaari cua tojiyajuhuj. Cante cua tojijiara quiriini, nojuajaari cua Jiyarona tojijiara quiriijihuj.

Jesu pohuatasacari, Judascuajaari na paraa na quiateriquiano

(Mt 26.20-25; Mr 14.17-21; Lc 22.21-23)

²¹ Naa Jesu sequenu nuhuaji canaatej, jianohua na taraajenuta naa canaa sequereeri:

—Seetanujuanaa nia sequeyanijia, niquiriyatu niajaniyanijininoori cua paraa cua quiatenutaniya.

²² Canaari jiyacari tama niqutiooreejaanijia. Majaari canaa niishiniu quiriquiaa canajiniji naa Jesu sequeriquiaani. ²³ Jiyacaritij, janiyari na shuriucuaji

cajiriquiaa miaquenuujuajiniani, na panishano pueyano cua quiniucua. ²⁴ Naaratej, Simón Pedroori cua mashiniquirii sanaa cua nequesotanura Jesu, canajiniji naa na sequereeni. ²⁵ Naarate janiyari Jesuucua tatereeni, jiyasohuaja cua nequesotanura nojuaja. Janiyari naa na sasacareeni:

—Jiyaniijianaa, ¿canteeri naa quia miiniutianiyani?

²⁶ Jesuuri cua riucuaaree:

—Janiyari pan rau piquiojonutaniya caacajiniani. Cana cua niquitionutaniyani, nojuajaari cuno.

Jesuuri jiyacari pan rau piquiojoree. Judas Iscariote na niquitioreeri. Nojuajaari tamonu Simón jyanishano niyanu. ²⁷ Judas masacari cuno pan rau, Satanásri noojiajinia tiuquiquii. Jesuuri jiyacari Judas sequeree:

—Cuno, quiaa na niishiriojiya miiniuni, quiocua ritia mirinij.

²⁸ Canaa na saquiriojosano pueya nata miaquenuuriquiaani, majaari quenaaja canaa niishiniu quiriquiaa casaara naa Jesu sequeree Judasni. ²⁹ Judasri canaa cumaneeca cojuatana quijia. Naaratej, noojiaqueya canaajinijiniori jyaniriquiaani Jesu naasucua na jiyaroriquiaa socua casaa na masenura canaa queranacunuutajara, casamiijiuniucua na niquitiojonura cumaneeca soj. ³⁰ Judas jaara masequiaari Jesu niquitiosano pan, jiyacari tohuataqueeri. Tariucua niucuaari quiriquiaa.

Jesu rootasano quiarinio

³¹ Judas tohuatanu nuhuaji, Jesuuri canaa sequeree:

—Quiarijia cua miishanojiniji, janiyari maniniuhuaqueetasaanutaniyani. Pueyasoori jyanohua maniniuhuaqueetasaanutaniyajuhuj, naa cua miishanojiniji. ³² Pueyaso jaara maniniuhuaqueetasaare naa maninia cua miiniuucuatej, nojuajaari cua jiyatenutaniya cumaacaraca quijia cua quiniuria na shuriucua. Quera naa cua miiniutianiyari. ³³ Quiquiohuaniojuanaa, janiya rupaquijia niaata quiniutianiyajaarani. Taa cua sequecanu parta Judiocuacacuaani, janiyari naa nia sequeyajaaniuhuj. Niaari cua pajenuunutaniya juucua. Majaari nia naata quianu quiniutianiya cucua, tee cua quianutaniyacuaani. ³⁴ Quiarijia nia niishitiriiria nio quiarinio rootasano. Nia tojiri. ¡Panitiojuaca nia quiri! Naatej, taa cua paniquiaacuaa nijaniyani, naa nia panitioorejuhuj. ³⁵ Niaa jaara naa panitiojuaca quiri, puetunu Pueyaso niishiyashijiaa pueyajanaari naacujaji niishiniutianiya, niaari cua tojitiajaca pueya.

Jesu pohuatasacari Pedro nocuaji seetanutaniya
(Mt 26.31-35; Mr 14.27-31; Lc 22.31-34)

³⁶ Simón Pedroori jiyacari Jesu nequesotaree:

—Jiyaniijianaa, ¿tee quia quianutaniyani?

Jesuuri na riucuaaree:

—Tee cua quianutaniyacuaani, majaari quia naata nuhujiniu janiya. Naajaa, quiaari na nuhuaji quiariquiano.

³⁷ Pedroori na sequeree:

—Jiyaniijianaa, ¿casaara quia sequeyarini, quiarijia cutara maja cua naata quianu quiata? Janiyacuaja tama cua cuaqueyajaaja tarinijotaaree quiocuarani.

³⁸ Jesuuri na riucuaaree:

—¿Naatee? ¿Quiaate tama quia cuaqueyajaaja tarinijotaaree cucuara? Janiyari seetanujuanaa quia sequeyani: juhuaquenu panishacari caacaraja niunijyaquishacarijia, quiaari jiyacari cucuaji seetanu pacutejonutaniya tari.

14

Jesuuri juhua nuu Pueyasooqua

¹ Jesuuri naa canaa sequeree socua:

—Maja nia tacaaniu, pueyanaa. Nioojia nia cajitiri. Saaja Pueyasooqua nia tiuuri. Cucua nia tiurijiuhuj. ² Cua Que tiaari puereetuuca. Queraatia quiquioori tii quiya. Cunora, janiyari coteenu nia puetanutaniyani, niaacuaji cua jeenucuanura nia quijiara. Jaara naa quiyaquiritij, janiya maara nia sequeyaquirini janiya nia puetanutaniyani, niaacuaji cua jeenucuanura. ³ Cua jeenucuanu nuhuaji nia quiquiora, janiyari niaacua tacatenutaniuhuani, cua rijionuhuaa niajaniya, cuata nia quiniuriajuhuaj tee cua quiniutaniyacuaani. ⁴ Niaacuajaari cua quiquiojiniara neteja nuu niishiya, tee cua quianutaniyacuaani.

⁵ Tomásri Jesu sequeree:

—Jiyaniijianaa, ¡maja canaa niishiniu quenaaja tee quia quiaani! ¿Canaatucua taa cuno nuu niishirini, quiaa na sequeyani?

⁶ Jesuuri na riucuaaree:

—Janiyacujaari cuno nuuni, Pueyasooqua nia quianura. Janiyacuajaari seetanujuanaa Pueyaso Rupaani. Janiyari pueya samiitianijiajuhuaj. Majaari pueya naata Pueyaso rupuenu tamajaaja. Saaja janiya cutaraari pueya rpueteja Pueyasoni, nojori tiuushacari cucua. ⁷ Niaa jaara seetanujuanaa cua niishiquiaaricuaa, niaa maara cua Que niishirijiuhuj. Seetanujuanaa, niaari tari na niishiyacuaja. Niaari na niquiquiaajuhuj.

⁸ Felipeeri na sequeree:

—Jiyaniijianaa, quiaa jaara canaa niquitiri quia Que Pueyaso, canaacua panaatia quiriohuani.

⁹ Jesuuri Felipe riucuaaree:

—Felipenaa, janiyacuaruhua pueyaracaanu niaata quiquiaa juucuani. ¿Majateeri juhuanajuaja quia niishiniu janiya? Cante cua niquiquiaani, cua Que niquiquiaajaariuhuj. ¿Casaara quia sequeya cua niquitiniuria cua Que niajanियarini? ¹⁰ ¿Majateeri quia tiuuniu cucua cua sequesacari quiajaniya, janiyari cua Que jiuujiajinia quiyani, cua Queeri saniniuujia coojiajinia quiyacujua? Canaari maja rimiajatani. Nio, cua sequesano niajanियani, cunoori maja tama cua niishishanojuaja. Cua Que, coojiajinia quiyani, nojuajaari na panishano miitiquiaa janiya. ¹¹ Cucua nia tiuuri cua sequesacari niajaniya, janiyari cua Que jiuujiajinia quiyani, cua Queeri saniniuujia coojiajinia quiyacujua. Niaa jaara cua sequesanoocua tiuuniu paniyaquiri, cucua nia tiuuriqui na cumaacata cua miiniuucua nia niquiara. ¹² Seetanujuanaa nia sequeyanijia, cante cucua tiuujiani, nojuajaari puetunu cua miishanojuanaa miiniutianiyajuhuj. Cua tacasacariuhua cua Que shuriucua cua quiniuhuara, cucua tiuujiaaari cua cumaacata seetanujuanaa socua jiyajeneta casaa miiniutianiya cua miishanojiniji. ¹³ Seetanujuanaa nioojiajinia cua quishacari, janiyari niaara miiniutianiyani puetunu nia masesanojuanaa nia secojosacari cua Que. Naacuajitij, pueyari cua Que timitianutaniya, nojori niishishacari cua Queeri jiyanohua maninia miijia. ¹⁴ Nioojia rupuetoosacari coojiaata, janiyari puetunu nia masesanojuanaa miiniutianiya niaarani.

Jesu sequesacari, nojuaja Pueyaso Sohuanu jiyaronutaniya mijiria

¹⁵ Niaa jaara seetanujuanaa cua panijica quiri, niaari cua rootasano tojitiajaca quiniutianiya. ¹⁶ Naajuhuj janiyari cua Que secojonutaniyani, niaacua na jiyaronura tamonu cua niti mijiria, nia cumaquiriquiano. Nojuajaari pueyaracaanu niaata quiriquiano. ¹⁷ Nojuajaari Pueyaso Sohuanu, seetanu rupaa jitianajanaa. Pueyaso tojiyashijica pueyari maja na naata cuno Sohuanu na jitianu, nojori niquiyaquiniuucua nojuaja, na niishitiuyaquiniuucua nojuajuhuj. Niaa cutaraari na niishijica. Nojuajaari niaata quiyacuaja. ¡Pueyaracaanu nioojiajinia quiriquianojaariuhuj!

¹⁸ Majaari seetanujuanaa cua tiujianu quiniutianiya niajaniya juhua japueyojuaca nia quiniuria. Janiyacuajaari tacatenutaniuhuani niaata cua quiniuhuara. ¹⁹ Pueyaso tojitiaashijica pueyari quiari naataja cua niquiyaquiniutianiya socua. Niaa cutaraari cua niquijica quiniutianiya. Samitianijiojua cua quiniuucua, niaari pueyaracaanu quijica

quiniutianiyajuhuaaj. ²⁰ Jiyacaritij, niaari niishiniutianiya janiyari cua Que jiuujia rupuejani, niaari coojia rupuejajuhuaaj. Janiyari saniniuujia nioojiajinia quijiani. ²¹ Cante cua rootasano niishijiani, nojuaja jaara na tojjia quirijiuhuaaj, nojuajaari cua panijia cutara. Cante cua panijiani, cua Queeri na panijia quiniutianiyajuhuaaj. Janiyari na panijia quiniutianiyajuhuaaj. Janiyari cua panijiaacua niniutianiyan, seetanujuanaa na niishiniuria janiyari nata quiyani.

²² Canaa cojinia Judasni, nooj, Judas Iscariote sesaanucuatej, nojuajaari Jesu nequesotaree:

—Jiyaniijanaa, ¿casaara saaja canaacua quia niniutianiyarini, maja puetunu mijiria quiniaa pueyacujanaa?

²³ Jesuuri na riucuarree:

—Cante cua panijiani, cua rootasano tojjiajaariuhuaaj. Cua Queeri jiyano pueyano panijia. Naaratej, canaari nocua niniutianiyan, noojiajinia canaa quiniuria, canaa quiquiora canaa jiyatenura nojuaja. ²⁴ Saniniuujia, cante cua paniyaquijiani, jiyano pueyari cua rootasano tojiyashijiacajuhuaaj. Puetunu cua rootasanojuanaa, niaa na tojiquiaani, cunoori maja tama cua niishishanojuaja. Cunoori cua Que niishitishano janiya, cante mijiria cua jiyaroquiaaricujani.

²⁵ Janiyari puetunu niojuanaa nia pohuataani, niaata cua quishacarijia mijiria. ²⁶ Cua Que jiyarosocoriquiano na Sohuanuuri nia cumaquiriquiano. Nojuajaari nia niishitiojonutaniya puetunu cua niishitionu panishanojuanaa nijaniya. Naajuhuaaj, nojuajaari nia niishitiniutianihua puetunu tari cua pohuatasano nijaniyajanaa.

²⁷ Janiyari nioojia cajitiniutianiyan. Janiyari coojia nianutaniya nioojiajiniani, juhuajaniya quijia nia quiniuria taa cua quiyacuaani. Naacujitij, niaari seetanujuanaa juhua-janiya quiniutianiya. Mijiria quiniaa pueyari maja na niishiniu cumanijianu juhua janiya. Naaratej, maja nia tacaani. Majaari puerenujuhuaaj. ²⁸ Tari nia sequereecuajanjia: “Janiya quera quiohuani. Janiyari na nuhuaji tacatenutanihuani niaata cua quiniuria”. Niaa jaara seetanujuanaa cua panijia quiriquia, niaa maara shuquiriri nia niishishacari janiyari cua Queecua quiohuani. Nojuajaari seetanu Jiyaniijajanaa cutara janiyajiniji. ²⁹ Janiyacuajaari juhuacarijia nio nia sequeyani. Naacujitij, niaa jaara niquiri tohuateyano cua sequesano nijaniya, niaari niishiniutianiya puetunu cua pohuatasanojuanaari seetanujuanaa.

³⁰ Majaari puera cua pocoojonu quiniutianiya niaata tari. Cua Paraca cucua quenaacoya tarini, na miiniuria janiya taa na paniyacujani. Nojuajaari Pueyaso tojtiaashijia jiyaniijia. Pueyaracaanu cua Que Pueyaso tojjia cua quiniuucua,

cua Paraca maara naquiya cua miyaquiri janiya jaara cucua na shanacuyaquirini. Na cumaacaari maja na shocotanu cua cumaaca cutara. ³¹ Naajaa, na miishanojiniji janiya, puetunu pueyajanaari niishiniutianiya, janiyari puetunu cua Que sequesanojuanaa tojjijiani, na panijia cua quiniuucua.

'Nia sanetare. Niiquiji pa quiaare.

15

Jesu pueyari juhua Jesu cashacucua, Jesu quishacari juhua neyona

¹ Jesuuri naa pahuataquiaari socua canaa niquiara:

—Janiyari juhua uva jiyonani, cua Que natau. ² Cua pueyari juhua cua cashacucua. Tamonu cua cashacucua-jinijinio jaara muetuyashijia quiri, cua Queeri na piyotaja. Teyano cua cashacucujinijiniote muetujua saniniunijia, cua Queeri na nacareetaja, socua queraatia na muetunura. ³ Nia tojiniuucua cua rootasano, niaari tari juhua nacareetasano quiya. ⁴ Pueyaracaanu coojia nia rupuere, taa cua rupueya nioojiacuaani, niaa mariqui juhua uva cashacucua piyotasaareeri. Jaara neyonaacuaji piyotasaare, majaari na naata muetunu tari. Naajuhuj, majaari nia naata muetujua quiniu, niaa jaara coojia rupueyashijiaca quiri.

⁵ 'Janiyari juhua nia jiyonani. Niaari juhua cua cashacucua. Cante coojia rupuejani, taa cua rupueya niajaniyacuaani, naacuajitij, niaari juhua queraatia muetujuaca quiniutianiya. Cucuaji rupatejacaari maja na naata casaa miiniu janiyaju. ⁶ Cante cua rupueyashijiani, nojuajaari taraatia miishaanutaniya juhua uva cashacucua piyotasano neyonajiniji, tamocora jaquerootasano. Jaara sorere, tatu-cuasaarohuari manijinia quejoosocoriquiano. Tii cateyari.

⁷ 'Niaa jaara coojia rupuejaca quiri, niaa jaara cua rootasano tojjijia quirijihuj, puetunu nia panishanoocuarajanaa nia secojore Pueyaso. Nojuacuajaari nia masesano miiniutianiya. ⁸ Naa cua Que miishacari nia panishanotej, niaari juhua queraatia muetujuaca quiniutianiya. Naacuajitij, cua Queeri jiyanohua timiti-asaanutaniya. Naacuajitij, niishishaanutaniyajaariuhua niaari cua tojitiajaca pueyaniyojua. ⁹ Janiyari nia panijiani, taa cua Que paniya janiyacuaani. Coojia rupuejaca nia quiri pueyaracaanu, cua panishano pueya nia quiniuria. ¹⁰ Janiyari cua Que panishano, pueyaracaanu cua miiniuucua na panishano. Naajuhuj, niaa jaara cua rootasano tojjijia quiriquia, niaari pueyaracaanu cua panishano pueya quiniutianiyajuhuj.

¹¹ 'Janiyari naa nia sequeyani, shuquiriaatia quijiaca nia quiniuria, taa shuquiriaatia quiija cua quiyacuaani. Naacua-jitij, niaari tojetaarucujanaa shuquiriaatia quijiaca quiniu-tianiya. ¹² Cua tojiri. Nioori cua sequesano niaara: "¡Pueyara-caanu panitioojuaca nia quiriquia, taa cua paniya niajaniy-acuaani!" ¹³ Cante tama na cuaqueyajaaja panitiaja na cusonura na rupuenaa nitini, naa miijia cutaraari seetanu-juanaa jiyanohua narta pueya panijia. ¹⁴ Niaa jaara cua sequesano miijiaca quiri, niaari cua rupuenaa. ¹⁵ Naacua-jitij, majaari cua sequenu quiniutianiya tari niajaniya cua seyata. Pueyano seruuri maja na niishiniu casaa poonijosano na camarnu miiquiaacuaani. Janiyari quiarijia nia sequeya cua rupuenaatani, cua niishitiniuucua niajaniya puetunu cua Que sequesanojuanaa janiya. ¹⁶ Majaari nia saquirio-jojonu quiquiaari janiya. Janiya cutaraari nia saquiriojo-quaarini cua jiyaramiquiniuria niajaniya, cua panishano nia miiniuria. Naa nia miishacari cua panishanotej, niaari juhua queraatia muetujua naana quiniutianiya. Puetunu nia miishanojuanaa cua cumaacatani, cunoori pueyaracaanu rishijia quiniutianiya. Cuno miishanoori maja najuhua-naj. Naaratej, cua Queeri puetunu nia masesanojuanaa nia niqutionutaniya seetanujuanaa coojia rupuejaca nioojia quishacari. ¹⁷ Janiyari cunora nia sequeyani: "Pueyaracaanu panitioojuaca nia quiri".

Pueyaso niishiyashijiaca pueyari Pueyaso muerasu niqiniu paniyashijiaca

¹⁸ 'Pueyaso niishiyashijiaca jaara nia niqiniu paniyaquiriquia, majaari nia tacaani. Cuno pojoricujaari naa cua niqitiuniu paniyaquijiacacuaa. ¹⁹ Niaa jaara Pueyaso muerasu quiyaquiriquia, Pueyaso niishiyashijiaca maara nia panijiaa quiriquia, taa nojori paniquiaa narta Pueyaso niishiyashijiacacuaani. Niaari Pueyaso niishiyashijiaca quiquiaarijihuaaj. Naajaa, janiyari nojori tajiniji nia saquiriojoquaarini, cua pueya nia quiniuria. Cunora, Pueyaso niishiyashijiacaari nia niqiniu paniyaquiquiaa, maja tari nia quishacari juhua nojori. ²⁰ Majaari nio cua sequesano nia niyajetanu: "Seruuri maja socua tojishano na camarnujiniji". Naaratej, Pueyaso niishiyashijiaca jaara naquiya cua miiquiaacuaa, niaari naquiya miishaanutaniyajuhuaaj. Naajuhuaaj, nojori jaara cua rootasano tojiqiaacuaa, nojoriiri nia rootasano tojiijiaa quiniutaniyajuhuaaj. ²¹ Nojoriiri naa naquiya miiniutianiya niajaniyatej, cua pueya nia quiniuucua, nojori niishiyaquishacari cua Jiyarona.

²² 'Janiya jaara niyaquiquiaari nojori cua pohuatanura Pueyaso rupaani, nojoriicuaara maara saquiriojotaaquishaare, sesa nojori miishanojiniji. Nojori niquiara cua pohuatanuucua Pueyaso rupaa, majaari nojori naata sequenu quiniutianiya: "Cua jiyanoori. Maja cua niishiniu quiquiaari quia rootasano". ²³ Cante cua niquiniu paniyashijiani, nojoriiri cua Que niquiniu paniyashijiajuhuj. ²⁴ Sesa nojori miishano maara nojoriicuaara saquiriojotaaquishaare, janiya jaara cua cumaacata miyaquiquiaari nojori niquiarani. Janiyari socua jiyajeneta casaa miijioquiaari cua cumaacata nojori niquiarani, socua tamasaca miishanojiniji. Naajaa, naa nojori niquishacari cua cumaacata cua miishanotej, nojoriiri saaja cua niquitiuniu paniyaquijiaca, cua Que niquitiuniu paniyaquijiacaajaariuhuj. ²⁵ Naajaa, naa nojori miiniuucua janiyatej, tariucuacaanu Pueyaso Rupaajinia naajiotasano janiyajiniijiri tari tohuateeree. Naa sequeyari: "Janiyari najuhuana niquiniu paniyaquishiyani".

²⁶ 'Janiya jaara cua Que shuriucua quishuhuani, janiyari tiji Pueyaso Sohuanu jiyaronutaniya mijiriani. Nojuajaari seetanu rupaajanaa jiitiaja. Nojuajaari janiyajiniji niishitiniutianiya pueya. ²⁷ Niaari janiyajiniji pohuatanutaniya pueyajuhuj, pueyaracaanu cuata nia quiniuucua shushajanaa cua cotesacari pohuatanu Pueyaso rupaa.

16

¹ 'Janiyari naa nia numooteyani maja nia tarinitianura cucua tiuuniu niaa jaara naquiya miishaare. ² Cua pueya nia quiniuucua, majaari nia shanacusaanu quiniutianiya nia tiuquitianura Pueyaso secojojua tiacajinia. Pueya jaara nia puecoorejuhuj cua tojitiajaca nia quiniuucua, nojoriiri jiyaniniutianiya nojori maninia miya Pueyasora, naa nojori miishacari. ³ Nojoriiri naa miiniutianiya niajaniyatej, nojori niishiyaquiniuucua janiya, cua Quejuhuj. ⁴ Janiyacuajaari juhuacarijia naa nia sequeyani. Naacuaajitij, niaa jaara naquiya miishaare, niocua jiyacari niishiri janiyacuaajaari tari naa nia sequequiaarini. Majaari quenaaja nio cua sequenu quijia niajaniya, pueyaracaanu niaata cua quiniuucua.

Pueyaso Sohuanu miishanojiniji pohuatasano

⁵ 'Quiarijiani, janiyari cua Jiyaronaacua quiohuani. Quiarijiani, majaari quenaaja niajanijajinijinio nequesotanu janiya: "¿Tee quia quiohuarini?" ⁶ Janiya jaara nia sequereeni janiya quianutaniuhuani, niaari saaja taraajequee. ⁷ Seetanujuanaa nia sequeyanijia, socua

maninia quiniutianiya niaaraari, janiya jaara quiaarohuani. Janiya jaara quiaaquiyaarohuani, majaari Pueyaso Sohuanu niniu quiniutianiya niaacua, na cumaquiniuria niajaniya. Janiya jaara quiaarohua cutarani, janiyari niaacua na jiyaronutaniyani. ⁸ Mijiria na tiuquishacari, nojuajaari pueya jiuujiajania poonijionutaniya, nojori na niishitiniuria nojoriiri seetanujuanaa sesa miijiaca. Nojori niishitiniutianiyaajaariuhua nojoriiri na naata sesa miyashijiacara jiyatesaanu. Naajuhuj, nojori niishitiniutianiyari Pueyasoori na naata jiyanooni nojori, maja Sesaacata nojori cojiritiasaanura mani quiquiojina quejoonu. ⁹ Seetanujuanaa, Pueyasora, nojoriiri sesa miijiaca nojori tiuyaquiniuucua cucua. ¹⁰ Jiyocuacaanu cua tacasacariuhua cua Queecua, majaari socua nia niquiniu quiniutianiya janiya. Naacujitij, Pueyaso Sohuanuuri pueya niishitiniutianiya, janiyari seetanujuanaa cua Que Pueyaso jiyanootijia cucua tiuuriquiano pueyani. ¹¹ Cua shocotasacari Sesaaca, Pueyaso Sohuanuuri pueya niishitiniutianiya, nojoriiri saniitiosaanutaniya. Naacujitij, nojori jiyaniijia Satanás jaara tari saniitiosocoriquiano quiyacuaa, nojoriiri saniitiosaanutaniyajuhuj, cucua nojori tiuyaquiniuucua.

¹² Janiyari queraatia jiiitiaajaa cua pohuatanura niajaniyani. Naajaa, majaari cua pohuatanu quiniutianiya quiarijia niajaniya. Juhuanujuaja maja nia naata na niishiniu. Pueraruhua. ¹³ Pueyaso Sohuanu tiuquishacari niaacua, nojuajaari nia niishitiniutianiya puetunujuanaa cutara. Nojuajaari seetanu rupaajanaa jiiitaja. Nojuajaari maja tama na niishishanojuaja na niishitiniu quiniutianiya niajaniya. Puetunu na tojishanojuanaa janiyajinijini, cuno nia niishitiniutianiya cutaraari. Nia niishitiniutianiyajaariuhua taate nio pa quishacari nuhuaji quiniutianiyani. ¹⁴ Niaari cua shuquiritianutaniya, nojuaja niishitiniuucua niajaniya janiyajiniji. ¹⁵ Puetunu cua Que jiiitiasanojuanaani, cunoori cua casaajuhuj. Naaratej, janiyari nia sequereeni, Pueyaso Sohuanuuri janiyajiniji masenutaniya cua jiiitiasano niaara, na caminiujiuniuria niajaniyarajuhuj.

¹⁶ Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuhuj.

Nia taraajenuuri jatanutaniya shuquiriaatia nia quiniuria

¹⁷ Jiyacaritij, noojiaqueya canaa na saquiriojosano pueyajinijinioori tama nequesoreetooreejaaja:

—¿Casaa na sequenu paniyarini, nojuaja jaara sequeree: “Niaari saaja quiarijia cua niquiya. Na nuhuaji cutara, majaari socua nia niquiniu quiniutianiya janiya”? ¿Casaa na sequenu paniyajaaraniuhua na sequesacari: “Pasa naataja na nuhuaji niaari cua niquiniutianihuacuahuaj”, na sequesacarijuhuaj: “Cua Queecua quianutaniuhanijia”?¹⁸ Naajuhuj, ¿casaa na sequeyarini na sequesacari “quiarijiani”, mariyata “pasa naataja na nuhuaji”? ¡Majaari pa niishiniu casaaraqui na sequeyatejaj!

¹⁹ Jesuuri tari canaa nequesotanu panishano nojuaja niishirii. Cunora naa canaa sequereeri:

—Janiyari nia sequereeni: “Niaari quiarijia cua niquiya, na nuhuaji cutara maja socua nia niquiniu quiniutianiya janiya. Pasa naataja na nuhuaji, niaari cua niquiniutianihuacuahuaj”. ¿Niaatejaara niojiniji nequesoretoya tama niajanijajaaja? ²⁰ Seetanujuanaa nia sequeyanijia, niaari nujuquenutaniya. Niaari taraajeconutaniyajuhuj. Jiyacaritij, Pueyaso niishiyashijiacaari taquiya shuquiriaatia quiniutianiyacuaa niajanijajiniji. Naajaa, cuno nia taraajenuuri jatanutaniya shuquiriaatia nia quiniuria. ²¹ Naajaariuhuj, maaji ranu panishacari na mueya, jiyanohua naquiya miyari. Naajaa, mueya na ranu nuhuaji, naquiya na miiniu niyajetaqueeri, na mueya na timitiasacari. ²² Quiarijiani, niaari naa taraatia quiyajuhuj. Naajaa, niaacua tacatenu-taniuhanijia. Niaari jiyanohua shuquiriniutianiya nia niquishacari janiya. Majaari quenaaja tamasaca pueya naata quiniutianiya cuno nia shuquiriniu jaariutianu.

²³ Jiyacaritij, majaari socua nia nequesotanu quiniutianiya janiya. Seetanujuanaa nia sequeyanijia, cua Queeri nia niquitionutaniya puetunu nia maseranojuanaa nojuaja, seetanujuanaa coojia rupuejaca nioojia quishacari. ²⁴ Majaari juhuanujuaja nia secojonu Pueyaso seetanujuanaa taa cua sequeyacuajani, seetanujuanaa coojia rupuejaca nioojia quishacari. Naa nia secojoretej. Niocua nia panishano niquitiosaare, seetanujuanaa shuquiriaatia nia quiniuria.

Jiyaniijia Jesuuri Sesaaca shocotana

²⁵ Janiyari pueyaracaanu nia pohuataquiaa miriquini. Janiya quera nia pohuatanutaniya maatia seetanujuanaa cua Quejiniji cutarani. ²⁶ Jiyacaritij, niaari cua Que secojonutaniya coojia rupuesano nia quishacari. Jiyacaritij, majaari na panishaanu quiniutianiya cua shiniujiuniuria cua Que, na tojinuria niajanija. ²⁷ Cua Quejanaacuajaari nia panijia, nia

paniniuucua janiya, nia niishiniuucujuhua janiyari na jiyarosani. ²⁸ Niaacuaajaari niishiya, janiyari cua Que shuriucua ni quiaarini pueyanora cua quiniuria mijiria. Quiaritia saniniuujia, janiyari nio jiya tiujianutaniyani, cua Queecua cua quianuhua.

²⁹ Naa Jesu sequesacari canaatej, canaari na sequereeni:

—Quiaritia cutara, quiaari maatiajanaa sequeree, maja miriqui. ³⁰ Quiaritia cutara, canaari niishiyani quiaari puetunu casaajanaa niishijia. Majaari quenaaja na panishaanu pueya nequesoreenura quiajaniya. Naacujitij, canaari niishiyani, quiaacuaajaqui Pueyaso Jiyarosano.

³¹ Jesuuri canaa sequeree:

—¿Naatee? ¿Niaate shusha cucua tiuyaruhua? ³² Tari quenaacoyari naquiya cua miishaanura. Seetanujuanaa quiaritiaari. Niaari cucua cocuatasaanutaniya puetunujuanaa. Niaari tamajaaja cua tiujianutaniya. Naajaa, seetanujuanaa maja cua quiniu tamajaaja. Cua Quecuaajaari cua cojiyani. ³³ Janiyari puetunu niojuanaa nia sequeyani, nioojia nia cajitiniuria nio cua pohuatasanoocua nia tiuushacari. Mijiria nia quishacari, niaari seetanujuanaa naquiya miinitianiya. Naajaa, janiyacuaajaari mijiria jiyaniijia shocota-reeni. Naacujitij, nioojia nia cumaquiri tamajaaja.

17

Jesu secojosacari na pueyacuara

¹ Naa Jesu sequenu nuhuajitij, jiyocuacaanu na mausacari, naa na Que sequereeri:

—Cua Quena, janiya nio juuca naquiya miishaanutaniyani taa quia sequequiaaricuaajani. Cua tojiniuucua quiajaniya, quia Jiyarosano quia jiyatere pueya timitiasano cua quiniuria. Naacujitij, janiyacua saniniuujia quia jiyatere pueya timitiasano quia quiniuriani, tojetaarucuaajanaa maninia mijia quia quiniuucua. ² Quiaacuaajaari quia cumaaca cua niquitioquiaari puetunu pueyajanaa cua jitiannura. Naacujitij, janiyari saniniuujia nojori jiyatenutaniya pueyaracaanu quijiaca nojori quiniuriani, teyano pojori quia niquitioquiaari janiyacuaajani. ³ Nojori niishishacari saaja quiajaniyari seetanujuanaa Pueyasocuaaja, naajuhua, nojori niishishacari janiyari quia jiyarosani, naacujitij, nojori pueyaracaanu quijiara quiniutianiya shuquiriaatia.

⁴ Janiyari tari tucataree quia sequesano cua miiniuria mijiriani. Naa cua miiniuucua puetunu quia panishanujanaatej, pueyari quia timitiaa. ⁵ Jiya shipiniyaquishacari, janiyari jiyano-hua shuquiriaatia quijia quiquiaari quia shuriucua, jiyaniijiajanaa cua quishacari. Cua Quena,

naa quijiara cua jiyaterohua quiarijiani, quia shuriucua cua quiniuhuara.

⁶ 'Quia niqutiosano pueya janiya, quia saquiriojosano pueya quia niishiyashijiaca pueyajinijioni, quiarijia cutara, nojoriiri niishiya cante quiajaniani. Nojoriiri quia niishiya, nojori niquniuucua cua miijosano quia cumaacata, cua pohuatasano quiajanijini nojori tojiniuucujuhua. Nojoriiri quia pueya quijia. Quiaari saniniuujia nojori cua niqutioquiaari. Nojoriiri quiarijia quia rupaa tojtiajaca cutara. ⁷ Nojoriiri niishiya puetunu cua jiitiasanojuanaani, cunoori quia niqutiosano janiya. ⁸ Janiyari quia rupaa rootacanu nojorini, quia niishitishano janiyani. Nojoriiri seetanjuanaa nocua tiurii. Nojoriiri seetanjuanaa niishiya, janiyari quia shuriucujia niqiaarini. Niishitiuyajaariuhua, janiyari seetanjuanaa quia jiyarosanoni.

⁹ 'Janiyari cunora nojoriicuara quia secojiyani, seetanjuanaa quia pueya nojori quiniuucua. Majaari cua secojonu quia niishiyashijiaca pueyacuara. Saaja noo pojoricuara quia secojiyanijia, quiaa na niqutioquiaari janiyatej. ¹⁰ Naaratej, puetunu cua jiitiasano pueyajanaari quia pueyajuhua. Mariyata puetunu quia jiitiasano pueyajanaari cua pueyajuhua. Nojori tiuuniuucua cucua, nojoriiri jatanishano pueya quiniutianiya. Naacuajitij, queraatia pueyari cua timitianutaniyahua, naa nojori niquishacari cua cumaaca.

¹¹ 'Majaari puera cua tarishiniu quiniutianiya mijiria. Cua pueya cutaraari mijiria quiniutaniyajaara, janiya jaara quiaarohua quiocuani. Jiyanohua maninia cua Quena, nojori quia cojuare quia cumaacata, teyano pojori quia niqutioquiaari janiyacujani. Naa quia jiitiare nojori, jatiqui nojori quiniuria juhua niquiriyatu jiuujiaraca, taa pa quiyacuani. ¹² Mijiria cua quishacari nojoritia, janiyari nojori cojuajani quia cumaacata, quia rupaacua tiuujia nojori quishacari. Majaari quenaaja niquiriyatu nojorijinijinio cua juurequetenu quiqiaari. Saa nojuuari juurequecanu cutara, tariucua juurequeriquiano quiqiaacujatej. Naacuajitij, tariucuaacuani quia rupaajinia naajiotasanoori tohua-tecanu.

¹³ 'Quiarijiani, janiyari quiocua quianutaniyani, tee quia quiyacuani. Niya cua quishacarijia, janiyari nio sequeya nojori niquiarani, nojori jiitianura cua shuquiriniujiuhua, tojetaarucujanaa shuquiriaatia quijia nojori quiniurijuhua. ¹⁴ Janiyari nojori niishitocanu quia rupaani. Naa nojori tojishacari quia rupaatej, quia niishiyashijiaca pueyari nojori niquniu paniaquiquiaa. Cua pueya nojori quishacari, nojoriiri maja saaja mijiria quijia na quiniu

tari, taa janiyacuaani. Naaratej, mijiria quijiaca pueyari nojori niquniu panियाquiuaa. ¹⁵ Naa cua secojosacari quiarjia nojoriicuaratej, majaari cua sequenu quiajaniya nojori quia rijionura niquiji. Saaja quia secojiya cutarani-
 jia, nojori quia cojuanura Sesaacaacujaji. ¹⁶ Nojoriiri maja mijiria quijiaca na quiniu tari cua pueya nojori quishacari, taa nio jiyajiniinio cua quiyacuiyacuaani. ¹⁷ Quia rupaa quia poonijiotere nojori jiuujiajinia, tojetaarucujanaa quia tojjijaca nojori quiniuria. Quia rupaari seetanu rupaajanaa cutara. ¹⁸ Quiaacujajari cua jiyaroquiaari mijiria quiniaa pueya niquiara cua pohuatanura quia rupaa. Naajuhujaj, janiyari cua pueya jiyaramiquiyani mijiria quiniaa pueyacuajuhujaj. ¹⁹ Quia tojjijaca nojori quiniuria seetanujua-
 naa, janiyari tama cua cuaqueyajaaja jiyateya puetunu quia panishanojuanaa miijia cua quiniuriani. Naacujajitij, nojori niishishacari seetanu rupaajanaa janiyajiniiji, nojoriiri toje-
 taarucujanaa maninia miijiacara jatanishaanutaniya.

²⁰ 'Majaari saaja cua secojonu nio pojoriicuarara, tariucua quia tojtiajacacuaani. Janiyari secojiyajuhujaj na nuhuajij cucua tiuuriquiiano pueyacuara, noo pojoriicuarara cante cucua tiuuniutianiya na nuhuajini, nojori tojishacari nio pojori pohuatasano janiyajiniiji. ²¹ Cucua tiuuriquiiano pueyacuara secojiyanijia puetunu cucua tiuuniaajanaa cuara quiiria jatiqui, juhua rupuetootesano, taa pa quiyacuaani, cua Quenaa. Naatej, taa cua quia quioojiajiniaacuaani, quiaari saniniujia coojiajinia quiyacujua. Nojori jiuujia cuara juhua rupuetootesano quiiria poojiatajuhujaj, mijiria quiniaa pueya niishiniuria, quiaari cua jiyaroquiaari mijiria. ²² Janiyari nojori cumaquia quia Sohuanutani, quia niq-
 uitiosano janiyacuaa, juhua niquriyatuu jiuujiaraca nojori quiniuria, naatej, taa niquriyatuu jiuujiaraca pa quiyacuaani. ²³ Quiaari coojiajinia quia. Naajuhujaj, janiyari nojori jiu-
 uujiajinia quiyajaacuhujaj. Naacujajitij, paari nojoritia juhua niquriyatuu quiniutianiyani. Naacujajitij, mijiria quijiacaari niishiniutianiya, quiaari seetanujuanaa mijiria cua jiyaro-
 quiaari. Nojoriiri niishiniutianiyajuhujaj, quiaari jiyanohua cua pueya panijia, taa quia panija janiyacuaani.

²⁴ 'Cua Quenaa, cuno pueya quia niqutiosano janiyani, janiyari paniyani nojori quiniuria cuata quia shuriucua, nojori niquniuria cua shacantuca cumaaca. Quiaari cuno cumaaca cua niqutioquiaari pueyaracaanu quia paniniucua janiya, jiya shipiniyaquishacarijia. ²⁵ Tojetaarucujanaa sesa miyashijia cua Quenaa, mijiria quijiaca pueyari maja na niishiniu quiajaniya. Janiya cutaraari quia niishiyani. Nio cua pueyari niishiyajuhujaj, janiyari seetanujuanaa quia

jiyarosanoni. ²⁶ Janiyari nojori niishitioanucujani cante quiajaniani. Janiyari naa pueyaracaanu nojori jiuujiajinia niishitiniutianiya quiajanijini, seetanujuanaa nojori niishiniuria quiajaninya. Naacujitij, taa quia paniya janiyacuaani, nojori cuaara cuno paniniu jiiitaara nojori jiuujiajiniajuhuaj. Naa nojori niishishacari quiajaniatej, janiyari nojori jiuujiajinia quiniutianijahuaj.

18

Na paraa quiasacari Jesu

(Mt 26.47-56; Mr 14.43-50; Lc 22.47-53)

¹ Naa Jesu secojonu nuhuaji na Quetej, nojuajaari canaa puetaaree Cedrón surocono taquijiria. Tii quiquiaari olivo cuhuariquia. Cuno cuhuariquiaari matacosano quijia puetunu na shocuajanaa. Jesuuri tii tiuquitiamaa canaa, na Que Pueyaso na secojonura. ² Jesuuri tii jiiitiquiaari canaata na rerejonura. Naacujitij, na paraa na quiateriquiano Judasri cuno cuhuariquia niishiquiaarijuhuaj. ³ Canaa quishacari tii, Judasri jiyacari soldadohua tiuquitiasee, Pueyaso Secojoua tia cojuanaa pueyano. Cuno pojoriiri pueyacuara secojonaa jiyaniijianucua jiyaramiquishano pueya quiriquiaa, Fariseocuaca jiyaramiquishano pueyano. Nojoriiri pueya na miaquetaja pooriquiaa, nocuaji na nunutaja jayoco, samarinio. ⁴ Jesuuri tari puetunujuanaa niishiriquiaacuaja taa nojuaja miishaanutaniyani. Naaratej, nojuajaari cuhuariquia matacainijini tohuatamaa, na paraa na naacunura. Na naacusacari nojori, nojori nequesotareeri:

—¿Cana nia pajeyani?

⁵ Na paraari na riucuaaree:

—Canaa Nazaret tiacajinijinio Jesu pajeyani.

Jesuuri nojori riucuaaree:

—Janiyacuaaja nojuajani.

Jesu tacartana Judasri cuno pojoritia quiriquiaa tii. ⁶ Jesu sequesacari, “Janiyacuaaja nojuajani”, na paraari na nijiniara pojotuquee. ⁷ Jesuuri socua nojori nequesotarohua:

—¿Cana nia pajeyani?

Nojoriiri socua pacuterohua sequenu:

—Canaa Nazaret tiacajinijinio Jesu pajeyani.

⁸ Jesuuri nojori riucuaaree:

—Janiyacuaaja tari nia sequereeni, janiyacuaaja nojuajani.

Niaa jaara cua pajeya, nareja nia niquiri nio, cua cojiniaani.

⁹ Naacujitij, tama Jesu sequesanojuaarjia tohuateequiaari, nojuaja jaara naa na Que sequequiaari: “Majaari quenaaja niquiriyatu pueyano cua juurequetenu quiquiaari quia niqutiosano pueyajinijinio janiya”. ¹⁰ Jiyacaritij, Simón

Pedroori tama na mueruujaaja shitiaree na shuucuaji shiyano. Nata, pueyacuara secojonaa jiyaniijia seru numoco jaatereeri, na miaquetajara na numoco. Cuno seru sesa quiquiaari Malco. ¹¹ Jesuuri Pedro sequeree:

—Na co jiniacuma quia shiiriohua quia mueruu. Cua Que jaara paniya naa cua miishaanura naquiyatej, ¿janiyatucua nio pojoriria tama cua cuaqueyajaaja tarinitiaaquiri naquiya cua miishaanurani? ¡Taaquiriirinij!

Anás nequesoreesacari Jesu

(Mt 26.57-58; Mr 14.53-54; Lc 22.54)

¹² Jiyacaritij, na paraari Jesu quiaree. Nojoriiri quiquiaari Romano soldadohua, nojori jiyaniijiajuhuaj, Pueyaso Secojua tiaco cojuanaa pueyano. Nojoriiri Jesu morojoturee. ¹³ Na nuhuaji, nojoriiri coteenu na jaatucutaquiaari Anáscua, canaa pueyacuara secojonaa jiyaniijia Caifás cama na quini-uucua. Cuno marijara, Caifásri pueyacuara secojonaa jiyaniijiajanaa quiriquiaa. ¹⁴ Cuno Caifáscuajaari tari naa sequiquiaari narta Judiocuaca camarucua: “Maniniacuajaari niquiriyatu pueyano mosaanura puetunu pueya nitijianaa, maja najuhuana puetunu pueyajanaa puecoosaanura”.

Pedro coteesacari seetanu Jesujiniji

(Mt 26.69-70; Mr 14.66-68; Lc 22.55-57)

¹⁵ Simón Pedroori cuata Jesu nuhuajiriquiaa tucuacaanuji. Janiya cutaraari pueyacuara secojonaa jiyaniijiajanaa niishishano pueyano quiquiaarini. Naacuajitij, janiyari tiuquinishaaree cutara Jesutani, jiyaniijia tia shocua mataca jiniacuma. ¹⁶ Saaja Pedro cutaraari tohuatheyaji jateesee. Jiyaniijiajanaa niishishano pueyano cua quiniuucua, janiyari tohuatheyaji cojuana niyacoota pocoojoseeni, Pedro na tiuquininiuriajuhuaj. ¹⁷ Cuno niyacoori Pedro nequesotaree:

—¿Majate quiajaniya cuno Jesu pueyajinijiniojuhuaj?

Pedroori na riucuaaree:

—¡Maja janiya!

¹⁸ Shiniquiaari jiyacari jaanujiriquiaa. Nocuaji cuno jiyaniijia seyari Pueyaso Secojua tiajinia cojuanaa pueyata mani naatequiaari. Nojoriiri na jitiuriquiaa. Pedroori nojoritia tii quiriquiaajuahuaj. Mani jitiuriquiaari.

Pueyacuara secojonaa jiyaniijia nequesoreesacari Jesu

(Mt 26.59-66; Mr 14.55-64; Lc 22.66-71)

¹⁹ Jiyacaritij, pueyacuara secojonaa jiyaniijia Anásri Jesu nequesoreenu coteeree canaa na saquiriojosano pueyajiniji. Jesu niishitiojosanojiniji Jesu nequesoreerejaarihuaj. ²⁰ Jesuuri na sequeree:

—Janiyacuaajaari pueyaracaanu puetunu pueya niquiara-janaa maatia niishitiojoquiaani. Janiyari pueyaracaanu tiqiyocua Pueyaso secojonuujuaca tiacajiniaqueya niishitiojoquiaa pueyani. Naajuhuj, janiyari niya Jerusalén tiacajinia Pueyaso Secojoua tiajinia niishitiojoriquiaani, tee puetunu parta Judiocuacajanaa rerejoquiaacuajani. Majaari quenaaja jiyasohua cua rootanu quiquiaa pueya. ²¹ ¿Casaara quia nequesoreya janiyani? Quia nequesoreere juhuari cuno pojori, canapuate cua pohuatasano tojiqianuni. Nojoricua-jaari quia sequenutaniya casaa cua rootaquiaa nojorini.

²² Jiyacaritij, Pueyaso Secojoua tiaco cojuana pueyanoori Jesu shuriucua nujuariquiaa. Naa Jesu riucuasacari jiyaniijia Anástej, Secojonuuju tiaco cojuana pueyanoori Jesu jiquioco maseteree. Naa Jesu sequereeri:

—¿Naa riucuasanote pueyacuara secojonaa jiyaniijia?

²³ Jesuuri na riucuaaree:

—Janiya jaara sesa riucuaareeni, cua sequere casaate sesa quiriini. Saniniuujia, janiya jaara maninia sequereeni, ¿casaara quia maseteree cua jiquiococuaraarini?

²⁴ Canaa pueyacuara secojonaa jiyaniijiajanaa Caifás quiniuucua, jiyacaritij, Anásri Jesu moronucua jiyarotaree Caifáscua.

Pedro pacutesacari seetanu Jesujiniji
(Mt 26.71-75; Mr 14.69-72; Lc 22.58-62)

²⁵ Anás nequesoreesacarijia Jesu, Pedroori tii jitiuriquiaa-jaa. Tii quiniaa pueyari jiyacari na nequesotaree:

—¿Majate quiajaniya cuno pueyano pueyajinijiniojuhuaj? Pedroori saaja seetaree. Sequereeri:

—¡Maja janiya!

²⁶ Pueyacuara secojonaa jiyaniijia seruuri Pedro niquirii. Nojuajaari noo pueyano cuna quiriquiaa, Pedro jaatesano na numocotej. Nojuajaari Pedro sequeree:

—¡Janiyacujaruhua quia niquirii cuno pueyanota quia quishacari olivo cuhuariquiajiniani!

²⁷ Pedroori na seetarohuacuhuj. Caacarajaari jiyacari niunijioquee.

Jiya jiyaniijia Pilato nequesoreesacari Jesu
(Mt 27.1-2, 11-14; Mr 15.1-5; Lc 23.1-5)

²⁸ Caifás tiajiniji, Jesuuri jaatucusaaquiaari Romano jiyaniijia tiajinia. Cuno tiaari jiyanhua puereetuca quiriquiase, jiyaniijiaacuaji tiasano. Cuno jiyaniijiani, nojuajaari Romano jiyaniijiajanaa César jiyatesano quiquiaari jiyaniijiajanaa na quiniuria Judea jiyajinia. Na sesa quiquiaari Pilato. Canaa Judiocuaca jaara tiuquijioquiaari Jesuta Pilato tia carijiniacuma, shusha

juhuaqueriquiaari. Nojoriiri maja na tiuquitianu quiquiaari Pilato tiaco, nojori mariqui juhua curuushiriiri Pueyaso niqiuara, nojori tiuquitianuucua tahue tiajinia. Nojori jaara juhua curuutuuca quiri Pueyaso niqiuara, naacujitij, nojori maara Pascuara miaquesano borrego miaqueyaquirij. ²⁹ Naaratej, Pilatoori nojoriicua tohuataquiaari. Nojori nequesotareeri:

—¿Casaa nio pueyano miiriucuaani, miji nia nitianura cucuani?

³⁰ Nojoriiri saaja riucuaaree:

—Jaara sesa miyashijia quiriquia, ¿canaatucua casaara quiocua na nitiamani?

³¹ Pilatoori nojori sequeree:

—¡Niiquiji nia jiyataarohua! ¡Tama nia nequesoreesuhua-jaaja, taa nia supuetanaa rootasano sequeyacuajani!

Canaa Judiocuaca camarucuaari Pilato riucuaaree:

—¡Niajaniya Romano pueyani, niaacuajaari canaa sequericanu maja canaa monura pueyano!

³² Naacujitij, naa tarijia Jesu sequesanoori tohuateeriquiano quiquiaari, nojuaja jaara sequequiaari taa na mosaanutaniya niyacutesanojiniani. Saaja Romano pueyari naa monu niishiquiaari niyacutesanojinia. ³³ Jiyacaritij, Pilatoori na tiaco tiuquiyarohua. Jesu piiriiri nocua na niniuria. Tii Jesu nequesotareeri:

—¿Quiaate setanujanaa Judiocuaca jiyaniijia?

³⁴ Jesuuri Pilato sequeree:

—¿Cunote tama quia niishishanojuaaja naa quia nequesotanura janiyatej? ¿Tamonu soj quia pohuatacanu janiyajiniji?

³⁵ Pilatoori Jesu juaarii. Na sequereeri:

—¡Quiaa jaara Judiocuaca jiyaniijiarano quiri, janiyara naajaa! ¿Janiyateeri quiarta Judio pueyanoni? ¡Tama quiarta Judiocuacacujaari cucua nitiamaa quiajaniya, nia pueyacuara secojonaa jiyaniijianucuata! ¡Cua sequere casaa quia miiriucuaani!

³⁶ Jesuuri na riucuaaree:

—Janiyacujaari Jiyaniijiani, maja juhua mijiria jiyaniijia. Janiya jaara mijiria jiyaniijia quiriquiani, cua pueya maara cua quiatunaa cuarta Judiocuacata miaquetoore, maja nojori quiatunura janiya. Majaari jiyaniijia cua quiniu mijiria, taa quia quiyacuaani.

³⁷ Pilatoori Jesu nequesotaree:

—¿Naatee? ¿Quiaateeri jiyaniijia?

Jesuuri na riucuaaree:

—Jaa. Janiyacuaja Jiyaniijiani. Janiyacuajaari cunora rasaaquiaarini. Janiyari mijiria niquiaarini seetanu rupaa-janaa cua niishitiniuria pueya. Cante seetanu rupaa-janaa panijiani, nojoriiri cua sequesano tojitiajaca.

³⁸ Pilatoori najuhuaana na nequesotaree:

—¿Casaateeri cuno seetanu rupaa-janaani?

Naa na nequesotanu nuhuajitij, Pilatoori tohuatamo-huacuhua canaa Judiocuacaacua.

Pueya sequesacari Jesu cuaara mosaaria

(Mt 27.15-31; Mr 15.6-20; Lc 23.13-25)

Pilatoori jiyacari pueya sequeree:

—Nio pueyano nequesoreereecuajanjia. Nojuajaqui maja sesa na miiniu quiqianu. ³⁹ Niajaniya Judiocuacani, niaari puetunu Pascua juucarajanaa cua nenecojoquiaa cua cartenura nujuatejojuajiniji nujuatesano pueyano. Quiari-jiani, ¿cana nia paniya cua cartenura nio Pascua juucarani? ¿Niarta Judiocuaca jiyaniijiatee?

⁴⁰ Puetunu pueyajanaari naa jiyano-hua nacooro-huacuhuj:

—¡Maja cuno cartenu! ¡Barrabás quia cartere cutara!

Cuno Barrabásri nohuasejojua quijia.

19

¹ Jiyacaritij, Pilatoori na soldadohua majacuteree Jesu, co-queeca casaata. ² Soldadohuari juhuacontucua maaturee Jesu nacaquera. Na nuhuaji cushitishaarohuari. Na macaa-tiniuria, shaaruque toque cushitishaarohuari, juhua jiyani-ijia toque. ³ Naa nojori miiniu nuhuaji Jesutej, nojoriiri nocua catecanoquiaari. Na sequetureeri:

—¡Judiocuaca jiyaniijiana! ¡Quia timiri, Judiocuaca jiyani-ijiana!

Naa nojori sequesacari Jesutej, nojoriiri na jiquioco piqui-tiurii.

⁴ Pilatoori socua tohuataquiaari canaa Judiocuacaacua. Nojori sequereeri:

—¡Nia niquiri! Janiya na tohuateya niaacuani, nia niishini-uria janiyacuja tari na nequesoreereeni. Janiyari quiarijia niishiyani, nio pueyanoqui maja sesa na miiniu quiriucuaa.

⁵ Jesu muetasacari nojoriicua, juhuacontucujiniji nacaque cushiriquiaari, shaaruque toquenio. Pilatoori Judiocuaca sequeree:

—Nia niquiri niarta pueyano.

⁶ Canaa pueyacuara secojonaa jiyaniijianucua, Pueyaso Secojoua tiaco cojuanaa pueyajuhuj, nojori jaara Jesu niqiuquiaari, naa nacoonu coteetureeri:

—¡Niyacutesanojinia quia teetere tii na cusonura! ¡Niyacutesanojinia quia teetere!

Pilatoori nacoyano riucuarree saaja:

—¡Maja! ¡Janiyacuaajaari niishiyani, nio pueyano maja sesa na miiniu quiqianu! ¡Niaa jaara na monu paniri, nia teetere tama niajanijajaaja!

⁷ Canaa Judiocuacaari Pilato riucuarree:

—¡Canaari Pueyaso Rootasano naajionee jiiitiaani! ¡Canaari cunojiniji niishiyani, nio pueyano cuaara mosaaria tama na cuaqueyajaaja na jiyatenuucua Pueyaso Niyamura!

⁸ Pilato tojishacari naa canaa Judiocuaca sequesantej, nojuajaari socua puerequiaari. ⁹ Pilatoori na tiaco tiuquiyarohua Jesuucua. Na nequesotareeri:

—¿Tejenotejaara quiajaniani?

Jesuuri maja na riucuanu quirii. ¹⁰ Pilatoori na sequeree:

—¡Cua riucuarrejaj! ¿Quiaate niishiyaquiya, janiya jiyaniijiani? ¡Janiya jaara panirini, cua naata cua pueya sequenu na teetenura quiajanija! ¡Janiya jaara paniyaquirijiuhuj, cua naata quia cartenujuhuaj!

¹¹ Jesuuri saaja na riucuarree:

—Jiyocuacaanu Quijia jaara quia jiyateyaquiquiaari jiyaniijia quia quiniuria, quiaa maara quia cumaaca paaretaaquiri cucuj. Naaratej, cante niyara cua nitiamaa quiocuani, nojuajaari socua jiyanohua sesa miirii quiajanijajiniji.

¹² Naa Pilato tojishacari Jesu sequesantej, nojuajaari socua shiriiquiquiaari. Nocuaji, Jesu cartenu saniniujiuriquiaa juucuaari. Judiocuacaari saa nacooreejaa. Naa Pilato sequetureeri:

—¡Cante tama na cuaqueyajaaja jiyateja jiyaniijiarani, nojuajaari pa jiyaniijia César paracara quijia! ¡Naaratej, quiaa jaara cuno pueyano cartere, majaari socua pa jiyaniijiajanaa César rupuena quia quiniu quiniutianiya!

¹³ Naa Pilato tojishacari pueya sequesano nojuajatej, nojuajaari na soldado sequeree na tohuatenuhuara Jesu pueya niquiara. Pilatoori jiyacari cajirii pueya na nequesoreesajiji cajituijinia. Pilato tii cajiriquiaani, na tacoji pueya nujuatusaquini, cunoori shanohua saitia shipinishano quiquiaari. Naaratej, na sesa quiquiaari “Saitia maniniushitishano”. Judiocuaca rupaajinia saniniuujia, cunoori quiquiaari “Gábata”. ¹⁴ Jiyacariiri panacari quiriqiaa. Cuno juuca, canaa Judiocuacaari juhuacarijia jeenucuariquiaa Pascuara juucajinia. Pilatoori jiyacari tii quiniaa Judiocuaca sequeree:

—¡Nia niquiri nia jiyaniijia!

¹⁵ Pueyari saa nacooreejaa:

—¡Cunoori maja canaa panishano canaa jiyaniijia na quiniuria! ¡Niyacutesanojinia quia teetere!

Pilatoori nojori sequeree:

—¿Janiyatucua nia jiyaniijia teetereni? ¡Maja!

Pueyacuara secojonaa jiyaniijianucuaari Pilato sequeree:

—¡Jiyaniijia Césarcuajaari canaa jiyaniijiajanaa! ¡Maja socua tamonu jiyaniijia canaa jitianu!

¹⁶ Pilatoori socua Judiocuaca niqutioree Jesu, nojori teetesocoriquiano. Naaratej, nojoriiri na jiyataquiaari na teetenucua.

Jesu teetesacari

(Mt 27.32-44; Mr 15.21-32; Lc 23.26-43)

¹⁷ Jesuuri tama na teejaranojuaaja canujutaaree pueya puecoosaquiria. Puecoosaqui sesa quiquiaari “Pueyano nacaco tuhuananu”. Judiocuaca rupaajinia saniniuujia, “Gólgota”. ¹⁸ Jesuuri tii teetesaaquiaari, socua caapiqui pueyano. Jesuuri cuno pojori tajinia nujuaretasaaree.

¹⁹ Pilatoori naa naajiotequiaarijihuaj Jesu nacaacuma rupotasocoriquiano: “Nazaret tiacajinijinio Jesu, Judiocuaca jiyaniijia”. ²⁰ Naajiosano quiriquiaari canaa Judiocuaca rupaajinia, Romano pueya rupaajiniajuhuaj, Griego rupaajinianio. Jesuuri catecaja teetesaaquiaari Jerusalén tiacajiniji. Naacuajitij, queraatia Judiocuacaari cuno naajio serojoquiaari. ²¹ Naaratej, Judiocuacaacuara secojonaa jiyaniijianucuaari Pilato juaatiurii:

—¿Casaara naa quia naajiotereeni: “Judiocuaca jiyaniijia”? Cuaara naajiosaaria cutara: “Tama na cuaqueya sequejaaja, Judiocuaca jiyaniijianijia”.

²² Pilatoori nojori riucuaaree saaja:

—Janiyacuaajaari naa naajiotereeni. ¡Cuaara naa quiiriatej!

²³ Cuno cuatro soldadohua teetenu nuhuaji Jesu, nojoriiri Jesu toqueya seraatiaree. Socua quiriquiaari Jesu tucuaque cacojoqui. Cuno toqueeri shitiasano quiquiaari na riquiajiniji jiyocuara. Maja cusupuesano. ²⁴ Naaratej, cuno soldadohuari sequetooquiaari:

—Maja pa sureenu nio toque. Coteenu pa tacuarishijiore, pa niishiniuria cante nera na panutaniyani.

Naacuajitij, tariucuacaanu Pueyaso Rupaajinia naajiotasanoori tohuateequiaari. Naa naajiotasano quiyari:

“Cua toqueeri seraatiasaaree. Cua tucuaque toqueecuaa tacuarishiyonuureeri, na pasocoriquiano”.

Seetanujuanaa, naa miitiuquiaariiri cuno soldadohua.

²⁵ Niyacutesano shuriucua tee Jesu teeriquiaacuajani, tii nujuaturiquiaari na nucua, na nucua tarajanujuhuaj, Cleofas niquiocua Maríajuhuaj, María Magdalenanio.

²⁶ Jiyano hua Jesu panishano pueyanoori Jesu nucua shuriucua nujuariquiaa. Cuno pueyanocua jaari janiya. Jesu ni quishacari canaa, na nucua sequereeri:

—Maajinia, cua panishano pueyano cuara quiiria juhua quia mueya cua niti.

²⁷ Na nuhuaji, cua sequere jaari huaj:

—Juanna, cua nucua cuara quiiria juhua quia nucua.

Naaratej, janiyari María riquiaari cua tiajiniarani, tii na quiniuria canaata.

Jesu cusosacari

(Mt 27.45-56; Mr 15.33-41; Lc 23.44-49)

²⁸ Na nuhuaji, Jesuuri ni shiquiaari puetunu nojuajiniji naajiotasano juanaari tari tohuateeree. Naaju huaj, tariucua canu Pueyaso Rupaajinia naajiotasano tohuateenuraju huaj, Jesuuri seque quiaari:

—¡Jiyamueyanijia!

²⁹ Cuniqi, vino jereecaari patacojiniya mishaja cajitiriquiaa. Jiyacaritij, namasu casaari jereeca vinojiniya shishaaree. Naajuaacua na morotatureeri. Na nuhuaji, Jesu rupaama shitiasaareeri. ³⁰ Jesu ratunu nuhuaji cuno jereeca vino, naa sequerohuari:

—¡Tari tucuateree puetunu juanaacua janijia!

Naa na sequenu nuhuajitij, naniquiiri. Cusoqueeri.

Soldado jitiasacari Jesu shuucua ji na cashanata

³¹ Cuno juucaari canaa Judiocuaca jeenucuasacari quiriquiaa Pascuaacua juucajiniya. Cuno marijara, Pascua juucaari Sábado juucajiniya quiriquiaajuhua, samaatenu juuca. Naaratej, canaa Judiocuaca camarucuaari maja na paniniu quiquiaari samaatenu juuca macunucua jaasuconura na niyacutesanojiniya. Naaratej, nojoriiri Pilato sequeree cuno teetejosano pueya cashacucua na shuniitianiniuria, ritia nojori cusonuunura, na roshinijiosaanura cuno juucaja. ³² Naaratej, Pilatoori na soldadohua jiyaramiquirii. Cuno soldadohuari coteenu shuniitiaree niquiriyatu pueyano cashacucua. Na nuhuaji, tamonu cashacucua shuniitiatree jaari huaj.

³³ Saniniuujia, nojori pacusacari Jesuucua, Jesuuri tariucua macu quiriquiaa cutara. Nojoriiri cunora na cashacucua shuniitiaaquirii.

³⁴ Naajaa, tamonu soldadoori Jesu shuucua ji jitiaree na cashanata najuhanaj. Ritia shooqueeri nanaca, mohuacanio. ³⁵ Cuno pueyano, na naajiojiniya naa nia pohuataani, cunocua jaari janiya. Janiyajanaari na niquiquiaarini. Naarate janiyari seetanujuanaa nia pohuataani. Tama janiyajaaritia ni shiyani cua sequesanoori

seetanujuanaa, nocua nia tiuuniuria. ³⁶ Jesuuri naa miishaaquiaaritij, tariucuacaanu nojuajiniji naajiotasano tohuateenura. Naa sequeyacuajaari juhuacarijia nojuajiniji naajiotasano:

“Majaari quenaaja na nucu shuniitiasaanu quiniutianiya”.

³⁷ Tamaquiiri nojuajiniji naa naajiotasano quiyajuhuaaj:

“Cashanata na shuucuaji na jitiatusano niquitiuniutiani-yari”.

Jesu quete niasacari raaco

(Mt 27.57-61; Mr 15.42-47; Lc 23.50-56)

³⁸ Na nuhuaji, Arimatea tiacajinijinio Joseeri Pilato seque-see:

—Cua niquitiore Jesu quete raaco cua niasocoriquiano.

Nio Joseeri jiyasohuaja Jesuucua tiuujia quiquiaari, na pueresacari narta Judiocuaca. Pilatoori na sequequiaari na panura Jesu quete. Naacuajitij, Joseeri quiaaree. Macu paquiaariiri. ³⁹ Nicodemojuhuaaj, noo pueyano Jesuucua niqiaari niucua nata pocoojonuratej, nojuajaari jiyacari tiuquishii Joseecua. Nojuajaari queraatia shanohua jaanutaja nitiariquiaa, macuucua niojosocoriquiano. Na niqiaari quiquiaari cuarenta y cinco kilo. Cuno shanohua jaanutajaari quiquiaari mirra, aloeta cojitijiosano. ⁴⁰ Joseeri Nicodemota Jesu jiuniocoree toqueneecajinia. Nojori jiuniosacari, nojoriiri nocua niojoriquiaa cuno shanohua jaanutaja. Canaa Judiocuacaari naa miitiujiaca quiquiaari, na macu na niatunura raaco. ⁴¹ Tee Jesu teetesaaquiaaricujani, cuniquijia na shuriucua quiquiaariiri cuhuariquia. Cuno cuhuariquijianiani, quiarinio jiuutiasano raari quiriquiaa, macunucua niojojuara. Cuno raaconi, juhuanujuaja maja macu niasaanu quiquiaari. ⁴² Macuuri cuno raaco niasaaquiaari, cateca na quiniucua. Naajuhuaaj, quera puequeriquiaari canaa Judiocuaca jeenucuanu juuca. Cunoori, Pascuaacuara juuca.

20

Jesu samiitiasacariuhua

(Mt 28.1-10; Mr 16.1-8; Lc 24.1-12)

¹ Domingo, coteenujuanaa semaana juucani, María Magdalenaari tariquicuaji quiaquiaari Jesu raajiniara. Nin-ishiQuiiri quiriquiaajaa. Na tiuquishacari, cuno puereetuuca saajia niquishiiri tariucua tamocora ruutinishano, teyanota raa tiosaaquiaaricujani. ² Naa na niquishacaritij, nojuajaari neterohua Simón Pedroocua, cucuanio. Canaa sequesuhuari:

—¡Pueyanaa, pa Jiyaniijiaqui na raajiniji pasaaree! ¡Majaari canaa niishiniu teeriquitijia na niasaaretejaj!

³ Naaratej, janiyari Pedrota netequiaari raajiniarajuhua.
⁴ Canaari mariyata netecuaturiquiaa coteenuni. Janiya cutaraari socua ritia netequiaari Pedrojinijini. Naacujitij, janiyari coteenu tiuquishii raajiniani. ⁵ Janiyari raaco cuuque-seeni. Janiyari saaja Jesu jiuniocotaja toque niquirii maanoni tee Jesu quete niasaarucuaacuajani. Majaari cua tiuquiniu quimiaa raaco. ⁶ Simón Pedroori cua nuhuaji tiuquishii. Cami tiuquimiaajanaa cutaraari. Nojuajaari Jesu jiuniocotaja toque niquishii tii maanojuhuaj. ⁷ Jesu naca jiuniocotaja niquiriijaariuhua tamoco maano, maninia mariquiosano. Majaari na manu quiriquiaa Jesu cuaqueya jiuniocotaja toqueta. ⁸ Pedro tiuquiniu nuhuaji raaco, janiyari shusha jiyacari tiuquimiaajaaniuhua. Cua niquishacari Jesu jiuniocotaja toque, janiyari niishiquiini Jesuqui tari samiitiarohua. ⁹ Canaari juhuanojuaja maja canaa niishiniu quiriquiaa tariucuaaanu Pueyaso Rupaajinia naajiotasano Jesujiniji. Tii sequeyacuajaari Jesuuri samiitianutaniuhua macujiniji. ¹⁰ Na nuhuaji, canaari tiajinia quiaarohuani.

Jesu muetasacari María Magdalenaacua
 (Mr 16.9-11)

¹¹ Canaa quiojosacariuhua raajiniji, María Magdalenaari tiijia jateequiaari. Raa shuriucua nujuqueriquiaari. Na nujuquenuta, raaco cuuquereeri. ¹² Raaco na niquishacari, caapiqui Pueyaso seya niquiriiri, cohuajaque toqueyaraca. Nojoriiri macu niasaqui cajituriquiaa, tamonu na nacaacora, tamonu na cashacuucumara. ¹³ Pueyaso seyari María Magdalena sequere:

—Maajiniaa, ¿casaara quia nujuqueyani?

Nojuajaari Pueyaso seya riucuaare:

—Cua jiyaniijia quete niiquiji pasaarucuaa. Majaari cua niishiniu teeriquitijia na niasaarucuaatejaj.

¹⁴ Naa na sequenu nuhuajitij, na nijiniara tacaterohuari. Saaja Jesu niquirii na shuriucua nujuaanoori. Maja cutaraari na niishiniu quiriquiaa nojuaja Jesu.

¹⁵ Jesuuri na nequesotaree:

—Maajiniaa, ¿casaara quia nujuqueyani? ¿Cana quia pajeyani?

Maríari na jyanirii cuno cuhuariquia cojuana pueyano naasucua. Cunora, naa na sequereeri:

—Pueyanonaa, quiaa jaara canaa macu parucuaa, cua sequere tee quia niarucuaanoj. Janiyacua nocua quiaare na panurani.

¹⁶ Jesuuri na sequere:

—¡Maríanaa!

Jiyacaritij, Maríari nocua tacatequee na niishishacari nojuajaari Jesu. Hebreo rupaajinia na sequereeri:

—¡Rabuni!

Cunoori sequeya, “Cua Niishitiojonanaa”. ¹⁷ Jesuuri María sequereeri:

—Maja cua quianu. Juhuanajuaja maja cua tacanu quiquiao cua Queecua. Quia quiaarohua. Cua tapueyocuaca quia sequesuhua: “Janiya cua Que Pueyasooocua tacanutaniuhuaní. Nojuajaari nia Quejuhuaj. Nojuajaari cua Jiyaniijia, nia Jiyaniijiajuhuaj”.

Jesuuri naa na saquiriojosano pueya sequereeri na tapueyocuacata, na Que Pueyaso na jiyatesacari nojori Quejuhuaj. ¹⁸ Jiyacaritij, María Magdalenaari nimiohua canaacua, Jesu saquiriojosano pueyacuaní. Nojuajaari canaa pohuatasuhua taa Jesu na niquiriini. Naajuahuaj, Jesu sequesano caminiujurií canaaraari.

Jesu muetasacari na saquiriojosano pueyacua

(Mt 28.16-20; Mr 16.14-18; Lc 24.36-49)

¹⁹ Cuno domingo juucajani, shusha ninishacari, canaa, Jesu saquiriojosano pueyani, canaari jatiqui quiriquiaa tiaconi. Canaari tia tohuateya mishiquiojoquiaari cumaatiani, canaa pueresacari Jesu motenaa Judiocuaca. Naa tia tiotiu mishiquiojosano quishacaritij, Jesuuri saaja canaacua tiuquimíaa. Canashiyaquiji nujuasee canaa tajiniaari. Naa canaa sequereeri:

—¿Niaate quiyajaa? Juhujaniya nia quiri.

²⁰ Naa canaa na sequenu nuhuajitij, canaa niqitijioree na juaashiquiaari, na shuucuaji cashana jiyanio. Canaari jiyanohua timiriini canaa niquishacari canaa Jiyaniijia.

²¹ Jesuuri socua pacuterohua sequenu:

—¡Juhujaniya nia quiri! Naatej, taa cua Que jiyaroquiaari janiya mijiria na rupaa cua pohuatanuracuaani, janiyari naa nia jiyaramiquiniutianiyajuahuaj.

²² Naa canaa na sequenu nuhuajitij, canaa caco nooriiri. Sequereeri:

—Pueyaso Sohuanu nia tiuquiniri nioojiajinia. ²³ Níaa jaara pueyano jiyanoori sesa na miishanojiniji, seetanujuaanaa jiyanooshano quiniutianiyari. Saniniuuja, níaa jaara pueyano jiyanoyaquiri sesa na miishanojiniji, Pueyasora, jiyanooshoo quiniutianiyajaariuhuj.

Tomás niquishacari Jesu, saminio seetanujuaanaa

²⁴ Majaari Tomás quiniu quiriquiaa canaata, narta saquiriojosano pueyatani, Jesu muetasacari canaacua. ²⁵ Naaratej, canaari Tomás sequesquiaari na nuhuajini:

—¡Caapueyanonaa, canaa pa Jiyaniijia niquiriicuaani!

Tomásri saa canaa sequereejaa:

—Majaari cua tiuuniu quiniutianiya nia sequesanoocua, janiya jaara Jesu juaashiquiajania niquiyaquiri clavo jiyacani. Janiya jaara cua juaashiquia shiyaquiri clavo jiyamani, janiya jaara cashana jiyama pueraaquiri na shuucua-jijiuhuaj, janiyari nia cuaracashitiniutianiya.

²⁶ Cuno nuhuaji, socua tamonu domingora, canaa, Jesu saquiriojosano pueyani, canaari rerejoquiaariuhuani. Tomásri jiyacari canaata quiriquiaa cutara. Tia tiotiuuri maninia mishiquiojosano quiriquiaa. Naajaa, Jesuuri saaja canacua tiuquiquiaari. Canashiyaquiji canaa tajinia nujuaseeri. Canaa sequereeri:

—¿Niaate quiyajaa? Juhuajaniya nia quiri.

²⁷ Jiyacari Tomás sequereeri:

—Miji, Tomásnaa. Cua juaashiquia quia niquiri. Quia juaashiquia quia shiri clavo jiyama. Cashana jiyama cua shuucuaaji quia puerarejuhuaj. ¿Casaara cucuaaji quia taacanuyajaani? Cucua quia tiuuri.

²⁸ Tomásri jiyacari Jesu sequereeri:

—¡Cua Jiyaniijianaa! ¡Cua Pueyasonaa!

²⁹ Jesuuri na sequereeri:

—Quia niquishacari janiya, quiaari shusha cucua tiuya. Socua shuquiriaatia quiniutianiya cutaraari noo pojori, canapuate cucua tiuuniutianiya saaja nojori tojishacari janiyajinijini, nojori niquiyaquishacari janiya.

Casaara Juan naajioquiaari nio naajioneeni

³⁰ Jesuuri jiyanohera socua queraatia casaa miiquiaari na cumaacata canaa na saquiriojosano pueya niquiara. Cunoori nio nequesoreetuneejinia naajiotasoo. ³¹ Janiyari seaja saquiriojoree niya cua naajiotasocoriquianoni, nia niishinuria Jesuuri seetanujuanaa Pueyaso Jiyarosano, Pueyaso Niyanutuhaj. Janiyari nio naajioreeni nocua nia tiuuniuria, Pueyaso muerasura nia jiyatesaanura, pueyaracaanu rishijica nia quiniuria.

21

Tiberias caminiajina Jesu muetasacari na saquiriojosano pueyacua

¹ Na nuhuaji, Jesuuri canaa na saquiriojosano pueyacua muetaquiaariuhua Tiberias caminiajina. Naa quiquiaariti na muetasacari canacua. ² Nio pojoriiri jiyacari mariyata quiriquiaa: Simón Pedro, Tomás (Caapueyano jiyanishano), Natanaeljuhuaj. Nojuajaari Caná tiacajinijinio quiquiaari, Galilea jiyajinijinio. Janiyari cua tarajanuta tii quiriquiaa-jaaniuhuaj. Canaari Zebedeo niquiohuani. Socua caapiqui

Jesu saquirojosano pueyajinijinoori tii quiriquiaajuhua.
³ Simón Pedroori jiyacari canaa sequeree:

—Sapitiaajara quejootaseera shiyaru.

Canaari na riucuaareeni:

—Canaa quiata quiaajuhua.

Naacuajitij, canaari quiojijareeni. Canaari botejinia tacataseeni. Canaari puetunu cuno niucuajanaa shiyaru quejootariquiaa sapitiaajara juucuaní. Canaari shaa juhuaquetumaani. ⁴ Jiyacaritij, Jesuuri caminia casaqueyaji jaaquijinia nujuariquiaa. Majaari canaa niishiniu quiquiaari cante nojuajani. ⁵ Jesuuri canaa jiiquiooree. Canaa nequesotareeri:

—¡Sanajooriniaa! ¿Niaate na quiaree?

Canaari na riucuaareeni:

—¡Maja! ¡Shaaqui sacaj!

⁶ Jesuuri canaa sequeree:

—¡Nia shiyaru nia jartare nia miaquetajara bote tamajiria!
 ¡Niaari cuniqui na quianutaniya cutara!

Canaari naa miiriini taa na sequeree canaacuajani. Na nuhuaji, majaari canaa naata canaa shiyaru jaatianu quiriquiaa, queraatia sapitiaaja canaa ritiasacari.
⁷ Jiyacaritij, janiyari Pedro sequereeni:

—¡Pa Jiyaniijiaqui!

Naa Pedro tojishacari cua sequesantej, nojuajaari ritia na toque cushirii. Nojuajaari juhuasu quiriquiaa. Na toque na cushiniu nuhuaji, caminiajini jaataareeri Jesuucua na quianura. Jiritiuuri quiriquiaa. ⁸ Canaari na nuhuaji jaa-tiariquiaa shiyaru botejinijini. Jaaquiaari namitia maja tucuaaanu na quiniu quiriquiaa, saaja cien metroruhua. ⁹ Canaa rosetasacari botejiniji, canaari na mani niquishiini. Sapitiaajaari tii majeeriquiaa, pannio. ¹⁰ Jesuuri canaa sequeree:

—Nia sapitiaajajiniji miji nia riri rarishocoriquiano.

¹¹ Simón Pedroori ritia botejini tacamaa. Shiyaru tacanitiaree jaaquijiniaari. Queraatia sapitiaajaari quiriquiaa. Ciento cincuenta y tres sapitiaaja, saa puereetunucuja. Naa queraatia sapitiaaja quishacaritij, naajaa, majaari shiyaru turejetanu quirii quenaaja. ¹² Jesuuri canaa sequeree:

—Pueyanaa, miji. Nia miaquesee.

Majaari quenaaja niquiriyatu canaajinijinio nequesotanu quiriquiaa, cantejaaranojoni. Canaacuajaari niishiriquiaani nojuacuajaari canaa Jiyaniijia Jesu. ¹³ Jiyacaritij, Jesuuri pan rishii manijiniji. Canaa na serotareeri. Sapitiaaja rariquia canaa niquitiojoreejaariuhua.

¹⁴ Jiyacari Jesu muetasacari canaa na saquiriojosano puey-acuatej, cunota tari quiquiaari jiuujianaraca na muetasacari canaacua na samiitianu nuhuaji.

Jesu pocoojosacari Simón Pedrota

¹⁵ Canaa miaquenuunu nuhuaji, Jesuuri Simón Pedrota pocoojoriquiaa. Na nequesotareeri:

—Juan niyanu Simónnaa, ¿quiaate cua panijia socua nio quiarta saquiriojosano pueyajiniji?

Pedroori na riucuaaree:

—Jaa, Jiyaniijianaa, quiaacuajaari niishiya janiyari quia paniyani.

Jesuuri na sequeree:

—Cua borregohua niquiohuaniojua cojuanara quia quiriqui.

Naa Jesu sequesacari Pedrotej, nojuajaari miriqui na sequeriquiaa maninia na jiitianura narta Pueyaso muerasu.

¹⁶ Jesuuri Pedro nequesotarohuacuhuj:

—Juan niyanu Simónnaa, ¿quiaate cua panijia?

Pedroori Jesu riucuaaree:

—Jaa, Jiyaniijianaa. Quiaacuajaari niishiya janiyari quia paniyani.

Jesuuri na sequeree:

—Cua borregohua cojuanara quia quiriqui.

¹⁷ Jesuuri socua camiriohua Pedro nequesotanu:

—Juan niyanu Simónnaa, ¿quiaate cua paniya?

Pedroori socua taraajequee pueyaracaanu Jesu nequesoreesacari nojuaja. Seetanujuanaa Jesu riucuaareeri:

—¡Jiyaniijianaa, quiaacuajaari puetunujuanaa niishijia! ¡Quiaari niishiya janiyari quia paniyani!

Jesuuri na sequeree:

—Cua borregohuaniojua cojuanara quia quiriqui.

¹⁸ Seetanujuanaa quia sequeyanijia, mashaja quia quishacari, tama quiajanijajaarijia quia toque cushijia, quia quianura quia panishaqui. Saniniuujia, quiaa jaara saaquiano quiri, quiaari nareja quia numatucua shiitionutaniya tamasaca cushitiniuria quia toque. Na nuhuaji, quiaari canujutesaanutaniya quia paniyaquishaquiria.

¹⁹ Naa Jesu pohuatasacari miriqui Pedrotej, nojuajaari Pedro numooteriquiaa taa nojuaja mosaanutaniyani. Pedro jaara naa mosaare, nojuajaari Pueyaso timitiniutaniya na mosaanuucua. Na nuhuaji, Jesuuri na sequeree:

—¡Pueyaracaanu cua tojjia quia quiri! Pa quiaarej.

Juanjiniji pohuatasano

²⁰ Pedro tacatesacari na nijiniara, Jesu panishano pueyano niquirii na nuhuaji sacuaanoori. Nojuacuajaari janiya. Janiyari noo pueyanocuajani, canaa miaquenuusacari Pascuara, Jesu shuriucua cua cajishacari na nequesotaquiaariti: “¿Cantejaara cunoni, quia quiatenutaniyani?” ²¹ Quiarijiani, Pedro niquishacari janiya saniniuujia, Jesu nequesotareeri:

—Jiyaniijianaa, janiya jaara naa mosaanutaniyacuaani, ¿nojuajaarijataj, taa na miishaanutaniyarini?

²² Jesuuri Pedro riucuaaree:

—Janiya jaara paniri nojuaja rishiniuria pueyaracaanuni, janiya jaara jiyocuacaanuji tiuquiriohuajaatijia, quiara, naajaa. Quiajaniya cutara, pueyaracaanu cua tojijia quia quiri.

²³ Naa Jesu sequenuucua Pedrotej, puetunu cuarta Jesu pueyajanaari jyaniriquiaa janiya naasucua shaajyaquiriquianoni. Jesuuri seetanujuanaa maja naa na sequenu quiquiaari janiyajiniji. Nojuajaari saaja naa sequequiaari Pedro: “Janiya jaara paniri pueyaracaanu na rishiniuriani janiya jaara jiyocuacaanuji tacatemohujaatijia, quiajaniyara naajaa”.

²⁴ Janiyacuajaari nojuajani, Jesucristo panishano pueyanoni. Nio cua naajiojiniani, janiyari nojuajiniji cua niquishano pohuataani. Cua pohuatasanoori seetanujuanaa.

²⁵ Jesuuri jyanohua queraatia socua casaa miiquiaari na cumaacata mijiria. Puetunu na miishanojuanaa jaara naajio-tasaare, naa naasucua nio jiyajinia maara quiquio quiyaquiri puetunu cuno nequesoreetunecaacuajijianaa.

JESUCRISTO JIYARAMIQUISHANO PUEYA MIISHANO

“Pueyaso Sohuanu niaacua jiyarosaanutaniya”

¹ Quiocuara naajionu pacuterohuanijia, cua panishano Teófilonaa. Coteenu cua naajiosanojinia, janiyari quia pohu-ataquiaarini taa Jesu na poonijiosano coteequiaari mijiriani. Puetunu na miishanojuanaa naajiotaquiaarinijia, mariyata na niishitiojosano na coteenujiniji, jaara tacanishaaquiaariuhua jiyocuacaanu na Queta na quiniuhuara. ² Mijiria na quishacarijia, Jesuuri na jiyaramiquishocoriquiano pueya rootaquiaari Pueyaso Sohuanu cumaacata, taa nojori miiniutianiya na nuhuajini. ³ Jesu cusonu nuhuaji, nojuajaari muetaquiaariuhua na saquiriojosano pueyacua. Nojoriicua mueranacujuquiaariiri. Cuarenta juuca nuhuaji taciaquiaariuhua puetunujuanaari. Na miishanota nojoriicua na mueranacujusacari, nojori niishitiriiri nojuaja seetanujuanaa saminio quiya. Nojoritia pocoojoquiaariiri taa Pueyaso jiiitianutaniya na muerasuni.

⁴ Nojoritia na pocoojosacari tamonu juuca, Jesuuri nojori numootequiaari maja ritia nojori quianuhuara Jerusalén tiacajiniji. Nojori sequequiaariiri:

—Nia sashirijiaara cua Que cuara niquitioorajaara na Sohuanu niajaniya. Nojuajaari cua sequequiaari na niquitionutaniya niajaniyana, taa cua caminiujuquiaari tari niaaracuajani. ⁵ Naa sequequiaari niajaniyacujanijia: “Tiuquinijiona Juanri nia tiuquinijioquiaari moojinia, Pueyaso tojijia nia jatasacari. Pueyasoori saniniuujia na Sohuanu nioojiajinia tiuquinijionutaniya, seetanujuanaa Pueyaso tojijia nia quiniuria”. Quera niaacua tiuquiniutaniyacujaari. Naaratej, nia sashiri.

Jesu tacasacariuhua jiyocuacaanu

⁶ Tamonu juuca, Jesu pueyari Jesuucua rerejoquiaari. Na nequesotatureeri:

—Jiyaniijianaa, ¿quiaate Jiyaniijia jiyatesaanutaniya quiarjia Israel pueyara, maninia pa quiniuhuara tama pa jiyaniijiatajaaja, taa pa supuetanaa quiquiaaricuaani?

⁷ Jesuuri nojori riucuaaree:

—Nio cutaraari maja nia niishishocoriquiano, taacari Israel pueya jiyaniijia nia cua jiyatesaanutaniyani. Pa Que Pueyasoori cuno niishishano racataa tama nerajaaja. Saa nojuajaari na niishiya cutara. ⁸ Naajaa, niaari Pueyaso cumaaca masenutaniyacuja, Pueyaso Sohuanu jaara

nioojiajinia tiuquiri. Niaari janiyajiniji pohuatanutaniya pueya niquiara Jerusalén tiacajinia, puetunu Judea jiyajiniajanaano, Samaria jiyajiniajuhuaj. Naa pohuataaanutaniyajaariuhua puetunu jiyacajiniajanaa, socua tucuacaanu jiya puequeetujinianio.

⁹ Jesu puecasacari pocuanu, nojuajaari tacanishaaquiaari na pueya shootiasacarijia nojuaja. Cohuajajinia shaajemaari pueya niquiyaquiniuucujaji nojuaja. ¹⁰ Nojori mautasacari jiya cajiniocua Jesu tacasacari, canashiyaquiji, caapiqui pueyari nojori shuriucua nujuatuquiaari. Nojori toqueeri jiyanoehua cohuajaque quiriquiaa. Nojoriiri jiyocuacaanujinio Pueyaso seya quiquiaari. ¹¹ Nojoriiri Jesu pueya sequere:

—Galilea jiyajinijinio pueyanaa, ¿casaara nia mautaa jiyocuacaanuni? Taa nia niquirii tacaanocujani, niaari naa na niqiniutianiya tacatehuanohuajuhuj.

¹² Nojoriiri jiyacari Olivo nacuhua tuhuananuucua quiriquiaa. Pueyaso seya nuhuaji, Jesu pueyari Jerusalén tiacajiniohua tacatequiaari. Cuniquiji, cateca naataja quiquiaari Jerusalén tiaca. Moisés Naajiotasanojiniji, Judiocuacaari naa rootasaaquiaari maja socua tucuacaanu nojori rucuanenura samaatenu juuca. ¹³ Nojori tiuquijiosacari Jerusalén tiacajinia, nojoriiri nojori quijia tiajinia tiuquitiaquiaariuhua. Nojoriiri nataco tacataquiaari na sohuacajinia, tee nojori sashiquiaari Pueyaso Sohuanucujani. Nojoriiri quiquiaari Pedro, Juan, Santiago, Andrés, Felipe, Tomás, Bartolomé, Mateo, tamonu Santiagonio cante Alfeo niyanu quiquiaaricujani. Quiquiaarijiaariuhua Simón, cante tari quiquiaari Romano pueya jatanu panijiacujani. Mariyata quiriquiaari Judas, Santiago tarajanu. ¹⁴ Nojoriiri jiyacari pueyaracaanu Pueyaso secojonuuriquiaa tii maajipohuata, mariyata Jesu nucua Mariata, Jesu tapueyocucatanio.

Pueya saquiriojosacari Matías Judas niti

¹⁵ Nojori sashishacari Pueyaso Sohuanu tii, tamonu juuca, Pedroori nujuaquiaari pueya niquiara na sequenura nojori. Naa naasucuatuhuj ciento veinte pueyari tii quiriquiaa puetunujanaa. Naa nojori sequereeri:

¹⁶ —Cua tapueyocucanaa, Pueyaso Sohuanu sequesanoori maja na naata naajaa tajiniu. Seetanujanaa tari tohuateerucuaari Judasjiniji na pohuatanishano pa supuetanaa jiyaniijia David. Naacujitij, Judasri Jesu monaarano niishitiquianu tee Jesu quiriquiaani, nojori na quietenura. Judasri cunora niqitiosaacanu cumaneeca, naa nojori na nishitiniuucua Jesu quiasaanura. ¹⁷ Nojuacujajari

parta Jesu saquiriojosano pueyano quiquiaarijuhuaj. Nojuajaari mariyata Jesu jiyaramiquishano quiriquiaa juhua pajaniyajuhuj. ¹⁸ Tamonu cuhuariquiaari masesaanu sesa na miishano samitia. Na nuhuaji, tama cusoyareejaarijia. Jiyocuacaanuji tiqiuana na nacaraari. Na saracaari cocuaretasee. ¹⁹ Jerusalén tiacajinia quiniaa jaara na niishiquianu, nojoriiri cuno cuhuariquia sesojoree “Acéldama”. Acéldamaari pueyano rupaajinia sequeya “Nanaca samitia masesano cuhuariquia”. ²⁰ Judasjinijiiri naa naajiotasaaquiaarijuhua tariucuacaanu supuetana David jaaquequejojuajinia. Naa sequeyari:

“Na quiquio cuaara quiiria shaaco. Cuaara quiiria sanaaca, camaruuju”.

Sequeyajaariuhuj:

“Tamonu pueyano cuaara jiyatesaaria na poonijosano miriquiano na niti”.

²¹ Cuarta Jesu saquiriojosano pueyanaa, niya quiyacuaaja pueya, canapuetucuaaja pa tarajaquiaarini pueyaracaanu pa Jiyaniijia Jesu quishacari pata. ²² Nojoriiri Juan niquiquiaarijuhuaj Jesu tiuquiniyano moojinia, Jesu tacasacariuhua jiyocuacaanunio. Canapuetucuaaja puetunu nio niquiquiaarijanaani, niquiriyatu nojorijinijinio cuaara jiyatesaaria Jesu jiyaramiquishanora, pata na quiniuria, Jesu samiitianujiniji na pohuatanurajuhuj.

²³ Naaratej, pueyari caapiqui pueya saquiriojoquiaari. Cuniqi quiriquiaari José. Nojuajaari socua caapiqui sesaraca quiquiaari: Barsabás, mariyata Justo. Tamonu pueyanoori quiriquiaajuhuj, Matías. ²⁴ Na nuhuaji, pueyari naa secojoquiaari Pueyaso:

—Jiyaniijianaa, quiaari puetunu pueya jiuujia niishijianaa. Canaa quia niishitiri teyano pueyano tari quia saquiriojoreeni, quia jiyaramiquishocoriquiano na quiniuria, Judas niti poonijioriquiano. ²⁵ Judasri quia niquitiosano poonijosanojiniji catecanu sesa na miiniucua, naquiya miishaqui na quianura, sesa miijia na quiniucua.

²⁶ Na nuhuaji, pueyari naajiosano saajia jaquerooree nojori niishiniuria teyanote Pueyaso panishano pueyanoni. Saajiaari Matíascuara tacatasee. Naacuajitij, Matíasri Jesu saquiriojosano pueyanora quiquiaarijuhuaj. Naacuajitij Jesu saquiriojosano pueyari juhua juhuanoraja quiquiaariuhua doce.

2

Pueyaso Sohuanu tiuquishacari

1 Pentecostés juuca jaara quiquiaari, puetunu Jesuucua tiuuniaajanaari rerejono quiquiaari tamonu tiajinia Jerusalén tiacajinia. 2 ¡Canashyaquiji, paratuuri tojishaaquiaari jiyocuacaanuji, juhua paratu pocuaano jiyanhua cojuata! Jiyanhua tojishaareeri cuno tiajinia tee Jesu pueya cajituriquiaacuajani. 3 Jiyacari, juhua maniiri niquishaaree pueya caco rimianuqueyano. Puetunu nojori cacojuanaa rimianacuriquiaari juhua mani. 4 Jiyacaritij, Pueyaso Sohuanuuri puetunu tiajinia quiniaa jiuujiajiniajanaa tiuquirii. Pueyari juhuacatecara tamaatia rupaaca pocuaree. Pueyaso Sohuanuuri naa nojori pocooteree puetunujuanaa tamaatia rupaaca.

5 Cuno quishacari, queraatia Judiocuaca puetunu jiyacajinijiniojuanaari camueenujuriquiaa Jerusalén tiacajinia. Nojoriiri jiyacari Jerusalén tiacajinia queranacunuuriquiaa Pentecostés juuca. Nojoriiri Pueyaso tojitiajaca quiquiaari. 6 Nojori tojishacari cuno cojuatunenu, nojoriiri cuqueree tee Jesu pueya pocooriquiaa tamaatia rupaacacuajani. Nojori tojishacari naatej, nojoriiri jiyanhua cushitiirii. Naatej, puetunu rucoonaajanaari tama na jiyajinijinio rupaacajaaja tojitiariquiaa, cuno pojori pocoosacari. Nojoriiri maja na niishiniu quiquiaari casaara naa nojori miiriini. 7 Nojoriiri jiyanhua jiuujiatecoree. Tama sequetooreejaariija:

—¡Juhuej! ¿Cuno pojoriti maja Galilea jiyajinijinio pueyacuaja naa pocoyaniquitij? 8 ¿Taa nojori pocuaa puetunu coteenu pa rupaacajanaani? Pajaniyacujaaari queraatia tamaatia jiyacajinijinioni, puetunu tamaatia rupaaca pocuajacajanaa.

9 Seetanujuanaari. Cuno pojoriiri Partiya jiyajinijinio nijiono quiquiaari, Media jiyajinijinio, Elam jiyajinijinio, Mesopotamia jiyajinijinio, Judea jiyajinijinio, Capadocia jiyajinijinio, Ponto jiyajinijinio, Asia jiyajinijinionio. 10 Quiquiaariijaariuhuj Frigia jiyajinijinio, Panfilia jiyajinijinio, Egipto jiyajinijinio, África jiyajinijinionio. Cuno Africa jiyajinijinio pueyari quera Cirene tiaca shuriucuaji quiquiaari. Roma tiacajinijinio pueyari tii quiquiaarijuhuaj, canapuete Jerusalén tiacajinia pacunaa quiquiaaricuajani. Puetunu cuno pojorijianaari Judiocuaca quiquiaari. Noojiaqueyari rasaanquiaari Judiocuacajanaa. Tamasacaari na cararaatiuquia co miatejosaaquiaari Judiocuacara na quiniuria, Pueyaso tojijiacara nojori quiniu panishacari. 11 Creta jiyajinijinio pueyari tii quiriquiaajuhuj, Arabia jiyajinijinionio. Puetunu cuno jiyacajiniajanaari tamaatia rupaaca pocuajaca quiquiaari. Nojoriiri socua naa sequetoquiaari:

—¿Taateni? ¡Puetunu pajaniyajanaari cuno Galilea pueya tojitiaani Pueyaso cutara miishano pohuataano, tama pa coteenu rupaajiniajaaja!

¹² Puetunu nojorijianaari jiuujiateriquiaa nojori jiyajenenuta. Tama nojorijaarijia nequesoreetooquiaari nojori tacaaniutia:

—¿Casaa na miitiuyajaaranonjoni?

¹³ Tamasaca nojorijinijinioori saaja Jesu pueya macaatirii. Tama nojorijaarijia tama sequetooreejaacujua:

—Cuno pojoriqui mashaasequenuya shocuanacuhuata.

Pedro pohuatasano pueya niquiara

¹⁴ Jiyacaritij, Pedroori juhuacatecara pocuaree cuno pojori niquiara. Pedroori nujuaturiquiaa narta once pueyata. Na rupaa paaretaree Judiocuaca tojiniuriaari. Naa sequereeri:

—Cuarta Judiocuacanaa, maninia nia tojitiare casaa cua sequenutaniya nijaniyani. Puetunu Jerusalén tiacajinia quiniaajanaa cuaara niishiiria cua pohuatasano. ¹⁵ Niaari canaa jiyaniya mashaasequenuyano. Pananucujaari shusha taqueejiya. Maja canaa mashaasequenuunu.

¹⁶ Niaari canaa tojitiaa tamaatia rupaaca pocuaano. Niocujaari tariucuaaanu Pueyaso sequesano caminiujiunia Joel pohuatasano. Cuno niaa na niquiyani, cunocujaari na sequesano, shusha tohuateyani. Nojuajaari naa sequequiaaritij:

¹⁷ “Pueyasoori naa sequeyaquij: ‘Quera jiya puequesacari, janiyari cua Sohuanu niquitionutaniya puetunu pueyarajanaani. Naacuajitij, mashiquioriiri janiyajiniji pohuatanutaniya, niyacoojorinio. Cua Sohuanuuri cua niishishano niquitiniutianiya mashiquiori juhua na maquenujinia. Cua niishishano niishitiojonutaniya saaquiapue na maquenujiniajaariuhuj. ¹⁸ Cuno quishacari, janiyacua cua Sohuanu niquitiore puetunu cua tojitianaajanaani, canuu, maajipohuanio. Nojoriiri janiyajiniji pohuatanutaniya pueya niquiara.

¹⁹ Puereeta cua miishanoori jiya cajiniocua niquishaanutaniya. Cua miishanoori jiyacua niquishaanutaniyajuhuj, pueya na numootenura.

Nanacaari niquishaanutaniya, mani, jiyanohua najacanio. ²⁰ Pananuuri ninishiquiria quiniutianiya. Racaari juhua nanacara quiniutaniyajuhuj. Naa coteenutaniyari jiya puequenura. Na nuhuaji, Jiyaniijajanaari rosenutaniya mijiria quiniaa na nequesoreenura, saminiucua pueya, macunucuanio. Na rosesacari, cutara juuca quiniutaniyari,

puereetajuhuj. Jiyano hua shanohua quiniutianiyari na rosesacari. ²¹ Puetunu Jiyaniijia secojonaa pueyajanaari jiyanooshaanutaniya Pueyaso pueya nojori quiniuria' ”.

'Supuetana Joelri naa naajiotaquiaari Pueyaso sequesano tarijiatej. ²² Naaratej, socua cua tojitiare cuarta Israel pueyanaa. Jesujiniji nia pohanutaniyanijia, Nazaret tiacajinijinio pueyano. Pueyasocujiaari pa niishitiquiaari, Jesuuri na jiyarosano pueyano quiquiaari. Naacujitij, Pueyasoori na poonitijioquiaari pa niqiuara jiyano hua jiyajeneta casaa na miiniuria. Paacujiaari nocuaji jiuujiatequiaarini pa niquishacari Jesu miishano Pueyaso cumaacata. Na miishanoori maninia quiquiaari pa niishiniuria Jesuuri seetanujuanaa Pueyaso Jiyarosano quiquiaari. Niajanijacujiaari maninia niishiya puetunu maninia na miishanojuanaa. ²³ Saniniujia, Jesu jaara niqitiosaarucuaa nijaniya, niaari na quiarucuaa juhua sesa miijia. Na nuhuaji, niaari Pueyaso tojiyashijia pueya na moterucuaa maca niyacutesanojinia, taa Pueyaso paniquiaari tarijiacuajani. Pueyasocujiaari niishi quiaari naa mosaanutaniyari Jesu. ²⁴ Pueyaso cutaraari na samiitianiriohuacuaa macujiniji. Na carterohua macujinijiiri. Majaari quenaaja tamonu cumaacaraca quijia quiniu quiquianu Jesu na jiyojetenura macu quiquiojinia pueyaracaanura. ²⁵ Pueyaso Sohanu jaara pohanutequiaari pa supuetanaa jiyaniijia David, nojuajaari juhuacarijia naa pohanutequiaari Jesu sequesocoriquianotej:

“Cua shuriucua niquiquiaa Jiyaniijianijia. Nojuajaari cua shuriucua quiya, cua miaquetajara, maja quenaaja casaa teteyatenura janiya. ²⁶ Naaratej, coojiaari timirii. Cua niti taquiriocuateree cua shuquiriniutianijia. ²⁷ Naajuhuj, cua cusosacari, cua queteeri juhuajaniya quiniutianiya, cua niishishacari quiaari cua tarinitiaaquiniutianiya macunucua quiquiojinia. Quiaari cua shu moquijiaaquiniutianiya saa maninia miijiaja cua quishacari quia niqiuara. ²⁸ Quiaari cua niishitiojoree maninia cua miiniuria, pueyaracaanu quijiaara cua quiniuria. Quiaari jiyano hua cua shuquiritiniutianiya quiaata cua quishacari pueyaracaanu”.

²⁹ 'Cua pueyanaa, paacujiaari niishiyani, pa supuetanaa jiyaniijia Davidri jamosaaquiaari na cusosacari. Na jamaari niya quiyajaa Jerusalén tiacajinia. ³⁰ Nojuajaari niishi quiaari Pueyasoori tari na sequequiaaricujia:

“Davidnaa, tamonu pueyanoori supuenutaniya quiajanijiniji, jiyano hua quia nuhuaji. Cuno pueyanoori Jiyaniijiaara cua jiyatesano quiniutianiya quia niti. Nojuaja-

jaari cua jiyarosocoriquiano Cristo. Seetanujuanaa naa quiniutianiyari Davidnaa. Maja cua sapojonu”.

’Pueyanaa, paacuaajaari niishiyani Davidri Pueyaso sequesano caminiujiunia quiquiaari. ³¹ Naacuajitij, Davidri Cristojiniji pohuatariquiaa jiyanohua tariucuacaanujiniji, juhua tari na niquishano. Pueyaso Sohuanuuri na niishitiquiaari taa Cristo miishaanutaniyani. Naacuajitij, Davidri Cristo samiitianujiniji pohuatariquiaa naa na sequesacari: “Pueyasoori na tarinitiaaquiniutianiya macunucua quiquiojinia”, mariyata naa na sequesacari: “Na quete moquijiaaquiniutianiyari”. ³² Pueyasoori nio Jesu samiitaniriohuacuaa. Na samiitianu nuhuaji, puetunu canaajanaari na niquiquianuni. Janiyari nia pohuataa seetanu canaa niquishanojuanaani. ³³ Cutara na cumaacata, Pueyasoori na tacaniriohua na miaquetajara cajiriquiano, Jiyaniijajanaa na quiniuria. Na nuhuaji, Jesuuri Pueyaso Sohuanu maseree na Quejiniji, taa Pueyaso sequequiaari tarijiacuajani. Jesuuri saniniuujia quiarijia canaa na niqutioree. Naaratej, niaari canaa niquirii tamaatia rupaaca pocuaano. ³⁴ Majaari David tacanu quiquiaari jiyocuacaanu cutara. Nojuacuajaari Jesujiniji sequequiaari:

“Jiyaniijia Pueyasoori cua Jiyaniijia sequequiaari: ³⁵ ‘Cua miaquetajara quia cajishiijiaara, janiya cuara quia paraa shocotarejaatijia’ ”.

³⁶ Cunora, puetunu nijaniyajanaa Israel pueyanaa, niaa cumaati niishiya, Pueyasocuajaari nio Jesu jiyatecanu Jiyaniijajanaa na quiniuria. Niaacuajaari niyacutesanojinia na mocanucuaaja. Nojuajaari Cristo, Pueyaso jiyatesano Jiyaniijiaara. Majaari canaa pohuatasanojiniji nia taacanuunu pueyanaa.

³⁷ Pueya tojishacari naa Pedro pohuatasanotej, nojori-iri tetecatuquiaari. Pueyari saniniuujia Pedro nequesotakuiaari, na cojiniaanio:

—Canaa pueyanaa, ¿taa canaa miiniutianiyarinijia?

³⁸ Pedroori nojori riucuaquiaari:

—Nioojia nia tacatore sesa nia miiniuujiniji. Nijaniya cuara moojinia tiuquinijiosaaria Jesucristoocua nia tiushacari, nia jiyanooshaanura sesa nia miishanojiniji. Naa nia miishacaritij, Pueyasocua nia niqutiore na Sohuanu. ³⁹ Pueyaso sequesacari nojuaja na Sohuanu niqutionutaniya pueya, cunoori niaaranocuaaja, nia niqiuohuaranonio, tucuaaanu quijiacarajuhuaaj. Pueyaso Sohuanucuaajaari puetunu pueyajanaa niqutiosaanutaniya, cana pa Jiyaniijia Pueyaso sequeya na muerasura na quiniuriacuajani.

⁴⁰ Pedroori jiyacari pueya pohuatatee queraatia socua Jesujiniji na niishishano. Jiyanoehua nojori nacasureeri. Naa nojori sequereeri:

—Nioojia nia tacatorohua Pueyasocua, maja Jesu ruuretajaca nia cojiritiasaanura quejooonu mani quiquiojinia.

⁴¹ Pedro pohuatasanoocua tiuuniaari tiuquini-jiosaaquiaari. Cuno juuca, tres mil pueya naasucuaari coteenu Jesu tojitianaa rupuentaara quiquiaari. Pueyaso pueyari naa canequiaaritiij. ⁴² Puetunu nojorijianaari maninia tojtiaquiaari pueyaracaanu Jesu jiyaramiquishano pueya niishitiojosano. Nojoriiri jatiqui quijia maninia. Majaari nojori juayonuujutanu quijia. Nojoriiri pueyaracaanu rerejojua neecaruu serotanura Jesu cusonu niishiniuria. Mariyata Pueyaso secojonuujua pueyaracaanuuri.

Panitiojuaca Jesu tojitianaa quishacari juhua tapueyocucata

⁴³ Jesu jiyaramiquishano pueyari jiyajeneta miishano miijioriquiaa Pueyaso cumaacata. Naacuaajitij, puetunu pueyajanaari puereturiquiaa. Pueyari shiriiquitiurii. ⁴⁴ Puetunu Jesuucua tiuuniaajanaari maninia rupuetooquiaari juhua tapueyocucata. Nojoriiri maja jamuejaca quiquiaari. Casamiriaca pueyari na casami niqutiojoquiaari nareja casamiijiuniucua pueya.

⁴⁵ Tamasacaari na jiitiasano casami niqutioquiaari na cumaneeca na masenura na casami sami. Na cumaneeca na masenu nuhuaji, nojoriiri tamasaca niqutioquiaarijuhuaj, casamiijiuniucua jiitianura puetunu nojori panishanojuanaajuhuj. Tamasaca pueyari na cuhuariquia niqutioquiaari nojori jiitianura na cumaneeca, tamasaca na naacunurajuhuj. ⁴⁶ Nojoriiri jatiqui rupuetooquiaari. Nojoriiri rerejojua puetunu juucajanaa Pueyaso Secojoua tiajinia. Mariyata tama nojori tiajiniaajaaja nojoriiri rerejojua, neecaruu neecasenura Jiyaniijia Jesu cusonu nojori niishiniuria, mariyata jatiqui nojori miaquenuunura nojori shuquiriniutia. Nojoriiri maninia jiuujiaraca quiquiaari. Nojoriiri maja tamonu pueya shocotanu panijaca quiquiaari. ⁴⁷ Nojoriiri pueyaracaanu Pueyaso maniuhuaqueetariquiaa nojori shuquiriniutia. Puetunu Jesuucua tiuyashijaca pueyajanaari nojori paniquiaari. Puetunu juucajanaa, Jiyaniijia Jesuuri nojori canijiariquiaa, socua pueya tiushacari nocua.

3

Sesarunocua pueyano jecacacari

1 Tamonu juuca, Pedroori Juanta tacatariquiaa Pueyaso Secojojua tiajiniara. Tari quiquiaariiri pananu piriuushacari. Nojoriiri jiyacari quiojonu jiiitiquiaari Pueyaso secojonura Secojojua tiajinia. 2 Jiyacaritij, tamonu sesarunocua pueyanoori tii cajititariquiaa Secojojua tia tohuateyaji. Nojuajaari naa rasanjuhuanaja quiquiaari. Pueyaracaanu patoojotasaquiaariiri Pueyaso Secojojuajiniara, pueya na mashiniquiniuria cumaneeca nojori tiuquitiasacari. Na cajitiasaqui tohuateya sesa quiquiaari “Tohuateya Maniniu”. 3 Sesarunocua pueyano jaara niquiquiaari Pedro, Juannio, nojori tiuquitianu panishacari Secojojua tiajinia, nojori maseree juucua na cumaneecaari. 4 Pedroori Juanta na shootiaree tacuriitia. Jiyacaritij, Pedroori na sequeree:

—Canaa quia niquiri.

5 Sesarunocuaari juucua shootiariquiaa nojori. Cumaneeca niquitiosaariquiano jiyaniriquiaa juucuaari. 6 Pedroori na sequequiaari:

—Shaaqui cua cumaneeca. Shaaqui tojetaarucujanaa. Naajaa, cua jiiitiasanota quia naacureera quiarijia. Quia sequeya Jesucristo sesajinianijia: “Quia sanere. Quia rucuanerejuhuaj”.

7 Pedroori na juaashiquiajiniji na quiaquiaari. Na nujuatereeri. Na niohuacaari jiyacari ritia jeequequiaari na sanesacari. Na sairi maniniujiacara quiquiijihuaj. 8 Sesarunocuaari juhuacatecara rucuanequiaari. Nojoritia tiuquiquiaari Pueyaso Secojojua tiajiniaari. Maninia rucuaneriquiaari. Jaacuatariquiaari. Pueyaso maninuhuaqueetariquiaajaarihuaj. 9 Puetunu pueyajanaari na niquiquiaari rucuaneyano, Pueyaso maninuhuaqueetaanojuhuaj. 10 Puetunu pueyajanaari na niishiquiaari nojuajaari sesarunocucuaaja, Secojojua tiajinia tohuateya Maninujinia cumaneeca mashiniquiijiojuatej. Pueyari cunora jiuujiatequiaari. Jiyanohua shiriiquitiuquiaariiri.

Pedro pahuatasacari Pueyaso rupaa pueya niquiara

11 Sesarunocuaari Pedro juaashiquia carteyaquiquiaari, Juan juaashiquiano. Nojoriiri Pueyaso Secojojuajinia nujuaturiquiaa tamocora. Nojori nujuatusaquiiri pueya jiyaniquishano tariucuaaanu jiyaniijia Salomón canujuucojojua quiquiaari. Puetunu pueyajanaari nocua netecuatuquiaari na shiriiquiniutia. 12 Pedro niquishacari nojori, pueya sequequiaariiri:

—Cuarta Israel pueyanaa, ¿casaara nia jiuujiateya nocuajini? ¿Casaara nia niquitiaa canaani? ¿Niaate jiyaniya canaa na niohuaca jecareeni? Maja canaa. Majaari canaa

cumaacata na jeequenu quirii. Niaa naasucuaari jiyaniya canaari nio miiriini socua maninia miijia canaa quiniucua Pueyaso niquiara tamasa pueyajiniji. ¡Maja! ¹³ ¡Jesucuaaari na jecarohua! Nojuacuajaari na Que Pueyaso jiyatesano Jiyaniijiajanaa na quiniuria. Jiyaniijiajanaara na jiyate-nacuajaari Pueyaso, cante nio pojori pa supuetanaa jiyani-ijia quiquiaaricuajani: Abraham Jiyaniijia, Isaac Jiyani-ijiano, Jacobo Jiyaniijiajuhuaj. Tama pa supuetanaa Jiyani-ijia Pueyasocuaajaari Neyanu Jesu jiyatequiaari Jiyaniijia-janaa na quiniuria. Niaa cutaraari Pueyaso Nyanu niq-uitiocanu jiyaniijia Pilato, nojuaja na motenura. Pilato cartenu panishacari Jesu, majaari nia paniniu quiquianu na cartesaanura. ¹⁴ Niaa maara maninia pueyanoocuaaji tacucanu saniya cutara, niaari pueyano puecojuaacua shiri-iquitiurii saaja Pilato cartenura jiyano sesoriquia pueyano seque. ¹⁵ Niaari naa motecanu pueyano samiitianijiacua-jatej. Naajaa, Pueyasoori na samiitianiquianuhua macujiniji. Canaari na niquiquianuni. Naacuajitij, canaari nojuajiniji nia pohuataani. ¹⁶ Nio sesarunocua pueyanoori Jesuucua tiu-urii. Naacuajiti jeequerohuari. Nojuacuajaari sesarunocua quiquiaari taa nia niquiquiaaricuajanoj. Jesuucua na tiu-ushacari, na cuaqueya cumaquiriiri. Na cuaqueyari see-tanujuanaa jeequerohua maninia, taa nia niquiyacuajanoj. ¹⁷ Cuarta Israel pueyanaa, quiarijia niishiyaniijia, majaari nia niishiniu quiquianu casaa nia miiquianuni. Majaari pa camarucua niishiniu quiquianujuhuaj. Niaari Pueyaso Jiyarosano mocanu nia niishiyaquishacari cante nojuaja quiquianuni. ¹⁸ Naacuajitij, Pueyasoori na sequesano tohu-atecanu, tarijia na niishitishano na rupaa caminiujiunaa. Seetanujuanaa, puetunu Pueyaso sequesano caminiujiuni-aajanaari pa supuetanaa niquiara poojotaquiaari: “Pueyaso Jiyarosanooroori naquiya miishaanutaniya”. Jesuuri naa miishaacanu taritij. ¹⁹ Naaratej, nioojia nia tacatore sesa nia miishanojiniji. Pueyasocua nia tacaterohua sesa nia miiniu tuujusaanura. ²⁰ Naacuajitij, pa Jiyaniijia Pueyasoori na naata juhua maniniushiquiariria jiyatenuhua pajaniyara, shuquiriaatia pa quiniuhuara mijiria na jiyarosacariuhua Jesu. Pueyasoori tarijia na sequequiaari pa Jiyaniijia nio quiniuria. ²¹ Nojuajaari jiyocuaaanu quiniutianiya na Que shuriucua, Pueyaso cuara tucutarejaatijia puetunu tar-iucuaaanu na pohuatanishanojuanaa na sequenu panis-hano caminiujiunaa. ²² Moisés cuajaari naa sequequiaari pa supuetanaatej:

“Jiyaniijia Pueyasocuaajaari niaacua jiyaronutaniya nojuajiniji pohuatana tama nia niquiohuacuajinio supueno-

juaaja, taa na jiyaroquiaari janiyacuaani. Nojuaja jaara supuere, niocua puetunu na sequesanojuanaa tojiri. ²³ Canapuede cuno pueyano pohuatasano ruuretanutaniyani, nojoriiri Pueyaso saquiriojosano pueya tajiniji shaajasaanutaniya puetunurajanaa”.

²⁴ Pueyanaa, puetunu Pueyaso sequesano caminiujiuniaa-janaari Moisés nuhuaji naa Jesujiniji pohuatanuquiaarijihuaj. Naacuaajitij, Samuelri Jesucristojiniji pohuataquiaari taa na niniutianiyani. Naajuhuj, Samuel nuhuaji, puetunu Pueyaso sequesano caminiujiuniaajanaari naa pohuatanuquiaarijihuaj. ²⁵ Puetunu Pueyaso sequesano Jesujiniji-jianaani, cunoori quiaritia pajaniyara, taa Pueyaso pohuataniquiaari tariucuacaanu na sequenu panishano caminiujiuniaacuajani. Nojoriiri pa supuetanaa quiquiaari. Pajaniyaranojaariuhuj Pueyaso sequesano pa supuetana Abraham. Pueyasoori naa sequequiaari pa supuetana Abraham: “Quia muetusanojiniji tamonu pueyanoori supuenutaniya quia nuhuaji, cante pueya shuquiritiniutianiya puetunu jiyacajiniajanaacuajani”.

²⁶ Pueyaso jaara na tojijia Niyanu samiitiani-quianu, coteenu na jiyaroree pocuaari poojia tacatoriquiano, sesa pa miiniu pa cartenura, shuquiriaatia quijiara pa quiniuria.

Pedroori naa pohuataquiaari pueya niquiaratej.

4

Judiocuaca camarucua nequesoreesacari Pedro, Juannio

¹ Pedro pohuatasacarijia pueya niquiara, nocua nijioquiaariiri pueyacuara secojonaa, Pueyaso Secojoua tia cojuanaata, Saduceocuacatanio. ² Nojoriiri Pedro tojiquiaari pueya niishitiojiyano. Nojuajaari pueya niishitiojoriquiaa macunucuaari saneecuatumutaniuhua na jamacajiniji, naatej taa Jesu samiitiarohuacuaani. Cuno jiyaniijianucua jaara naa tojiquiaari sequeshiyanotej, nocuaji jiyanohua juaaquiocuaariiri, na ruuretasacari Pedro sequesano. ³ Cuno juaaquiocuaanoori Pedro quiatuquiaari, Juannio. Jiyacariiri tariucua tenacari quiquiaari. Tariucua niucua nujuatejosaaquiaariiri. Nojoriiri tii juhuaquequiaari nujuatejojuajinia. ⁴ Naajaa, queraatia pueyari Jesuucua tiuquiaari Pedro pohuatasacari Jesujiniji. Quera cinco mil saaja canuuri tari Jesuucua tiunnaa quiquiaari. Maajipohuari serojosoo quiquiaari.

⁵ Tariqui, Judiocuaca camarucuaari rerejoquiaari camarucua nacasunaata, Moisés Rootasanojiniji niishitiojonaatanio. Nojoriiri Jerusalén tiacajinia rerejoquiaari Jesujiniji pohuataanaa nojori nequesoreenura.

⁶ Anásri tii quiriquiaajuhuj. Nojuajaari pueyacuara secojonaa jiyaniijia quiquiaari. Caifásri tii quiriquiaajuhuj, tamonu Juannio, Alejandronio, mariyata puetunu secojonaa jiyaniijia tapueyocuacanio. ⁷ Pedro, Juannio, nojoriiri nujuatejojuajiniji tohuatejosaaquiaari. Nujuatejosaaree jiyaniijianucua tajiniaari. Pedro shocua, Juan shocua cajitiuniaari nojori nequesoreeree:

—¿Taa nia miiriucuaa noonijia, sesarunocuatej? ¿Cana cumaacata nia jecarohuacuaanoj? ¿Cante nia sequecanu naa nia miiniuriani?

⁸ Jiyacaritij, Pueyaso Sohuanuuri Pedro jiuujia cumaquiquiaari Pueyaso niishitiajata na pocuanura. Naacuajitij, Pedroori naa nojori riucuaquiaari:

⁹—Canaa camarucuaanaa, nia pohuatareera sesarunocua-jiniji, taa na jeequerohuacuaani. ¹⁰ Niaa canaa nequesoreetaate, nia tojitiare canaa sequesano, nia niishiniuria cua pohuatasano, puetunu Israel pueyajanaa niishiniurijuhuj. Nio pueyano niya nujuaani, nojuajaari Jesucristo cumaacata jeequerohuacuaa. Niaari Nazaret tiacajinijinio Jesu cusojuacanu niyacutesanojinia. Pueyaso cutaraari na sanacanhua macujiniji, pueyaracaanu na quiniuhuara. ¹¹ Niajanियari juhua saitia tijaonaa Pueyasora. Nia tiasacari, niaari maniniujiajau saajia jataquiaari, nia jyanishacari sesarujajau naa-sucua. Na camaruuri saniniujia sequeya:

“Cuno nia jatasano saajiani, cunoori saniya cua maniniujia-jau saajia”.

Niaari naa Jesu jataquiaari juhua saajia sesarujajau. Naa-jaa, Pueyasoori na niaquiaariuhua socua maniniushiqui. ¹² Majaari tamonu quiniu pocuaji tacuna. Puetunu pueya tajinijiniojuanaani, maja Pueyaso tamonu pueyano sesa jyaniquiniu quiquiaari cante pocuaji tacuriquianoni. Saaja Jesu cutaraari sequesaaquiaari pocuaji tacuriquianora.

¹³ Judiocuaca camarucuaari jyanohua na namijiaa ri-unitiquioquiaari nojori niquishacari taa Pedro, Juan seetanujuanaa cumaacata pohuatariquiaa nojori niquiarani. Nojoriiri Pedro, Juan niishiquiaari nojoriiri seetanujuaanaa maja puera naajionujuaca quiquiaari. Nareja poonijionujuaca pueyajinijinio quiquiaariiri. Naa nojori niishishacaritij, nojoriiri seetanujuanaa niishirii nojoriiri Jesu cojiniaa quiquiaari. ¹⁴ Sesarunocua jeequenohuari cuniqui nojori shuriucua nujuariquiaajaacuhuj. Naaratej, jyanijianucuaari socua sanaajetaquiaari. Saaja niishiriojonu-uriquiaari. ¹⁵ Camarucuaari Pedro, Juan tohuanijioquiaari tamocora nojori tajiniji. Jiyareta camarucuaari tama pocoo-joquiaarijiaaja. ¹⁶ Naa sequetuquiaariiri:

—¿Taa pa miya socua nio pueyarini? Puetunu Jerusalén tiacajinia quiniaajanaari nojori cutara miishanojiniji niishiya. Majaari pa naata seetanu parta Israel pueya, pa sequenura nojori, cuno sesarunocuaari jecaso. Nojoricuajaari tari maninia na niishitiuya. ¹⁷ Nio pojori pa piriyojore juhuari, maja socua quiarijia nojori pohuatanura Jesujiniji pueya niquiara, nojori miishano paaqueyaquiniuria socua niya pa tiacajiniani.

¹⁸ Camarucuaari socua piiquiaariuhua Pedro, Juannio. Nojori nacasuree jiyanoahuari, maja socua quenaaja nojori pohuatanura Jesujiniji pueya niquiara.

¹⁹ Pedroori Juanta nojori riucuaquiaari:

—¿Canaatucua casaara Pueyaso samiritiare canaa tojiniuria nijaniyani? ¿Taa nia sequeyani jiyaniijianucuaanaa? ²⁰ Maja cutaraari canaa naata tarinitianu pohuatanu canaa niquishano, canaa tojishanonio.

²¹ Camarucuaari nojori piriyojoquiaari juucuohuaj. Puetunu pueyajanaari saaja maniniuhaqueetariquiaa Pueyaso, puetunu maninia na miishanojinijijianaa. Naaratej, camarucuaari socua Pedro tarinitiaquiaari Juannio. Majaari na mojoosaanu quirii. ²² Pedro jecasanohua sesarunocua pueyanoni, nojuajaari cuarenta marijia shocotejoquiaari tari na quishacari.

Jesu pueya secojosacari Pueyaso, na cumaquiniuria nojori

²³ Pedro, Juan jaara cartesaaquiaari, nojoriiri narta Pueyaso pueyacua quiojoquiaariuhua. Nojori pohuataatureeri Judiocuaca camarucua sequesano nojori, camarucua nacasunaa sequesanojuhuaj. ²⁴ Na tojishacari camarucua piriyojosano, puetunu nojorijianaari Pueyaso secojonu coteequiaari. Naa sequetuquiaariiri:

—Canaa Jiyaniijianaa, quiaari jiya cajiniocua shipinia, jiyanio. Shoniacu caminiaari quia shipinishanojuhuaj. Puetunu casaajanaari quia shipinishano. Quiaari jiyanohua maninia. ²⁵ Canaa supuetanaa jiyaniijia Davidri quia seru quiquiaari. Naacuaajitij, quia Sohuanuuri na pohuatequiaari quia sequesano Jesujiniji juhua tariucua miishano. Quiaari naa na pohuatequiaaritij:

“¿Casaara jiyacua quiniaa pueya juayani? Pueyari najuhuana sesa niishiriojoriquiaa juucua. ²⁶ Jiyajinijinio jiyaniijianucuaari na juaaquiaca sanetaree. Queraatia tiacajinijinio camarucuaari Jiyaniijia Pueyasocuara roojotooree, na jiyarosano Cristoocuaranio”.

²⁷ Pueyasonaa, naacuaaquiniatejaj. Jiyaniijia Herodes, Poncio Pilatonio, nojoriiri nio tiacajinia rerejocanu narta taucacata, Israel pueyatano. Quia Niyanuucua

roojotoocanuuri, tama quia Jiyarosanoocuarajaaja.
 28 Naa nojori miiniuucuatej, nio pueyari tari quia miiniu panishano miiriucuaa, taa quia sequequiaari tariucuaaanucujani: “Cua Nyanu cuaara mosaaria puetunu pueyacuarajanaa”. 29 Canaa Pueyasonaa, quia tojishuriucuaraj. Nojoriiri quiarijia canaa miananojiya saniniuujia. Canaacuajaari quia seyani. Canaa jiuujia quia cumaquiri quiarijia, canaa pohanatunura socua quia rupaa canaa puereyaquiniutia. 30 Cusosuhua cuaara naatanijiosaaria quia cumaacata. Canaa jiyaniquishacari quia Nyanu sesa, jiyajeneta casaa cuaara miijiosaaria quia cumaacata pueya niquishocoriquiano. Nojuacuajaari saa maniniaja.

31 Nojori puecasacari secojonu, nojori quishaqui tiaari canashiyaquiji jiuuquiutiaquiaari. Pueyaso Sohuanuuri puetunu nojori jiuujiajinia tiuquiquiaari, nojori na cumaquiniuhua. Naacuajitij, pueyari saaja maninia pohanatunura quia Pueyaso rupaa pueya niquiara. Majaari na pueretunu quiquiaari.

Jamueyashijiaca Jesu tojitianaa quishacari

32 Jesuucua tiunuaari maninia juhua rupuetootesano quiquiaari puetunujuanaa. Nojoriiri juhua seetanujuanaa tapueyocucataja quiquiaari. Majaari nojori sequenu quiquiaari: “Cua casami saaja quiria quiniutianiya”. Nojori jiiitasano casamiiri saniniuujia puetunu narta Jesuucua tiunuaarajanaa quiquiaarijuhuaj. 33 Jesu saquiriojosano pueyari Jesu samiitianujiniji poojotaquiaari jiyanojua cumaacata. Naajuhua, Pueyasoori puetunu Jesuucua tiunuaajanaa naacuriquiaa jiyanojua, shuquiriaatia nojori quiniuria. 34 Puetunu Pueyaso pueyajanaari na panishano jiiitiaquiaari puetunujuanaa. Nojorijinjinio jaara cuhuariquia jiiitiaquiaari, tiano, nojoriiri na niqutioquiaari cumaneecara. 35 Jaara cumaneeca masequiaari na casaa sami, nojoriiri nareja na niqutioquiaari Jesu saquiriojosano pueya. Nojoriiri saniniuujia casamiiju Pueyaso pueya na serotaquiaari, nojori jiiitianura na panishanojuhuaj. 36 Nojorijinjinio, tamonu pueyanoori quiquiaari. Na sesaari José, Levita pueyano. Jesu jiyaramiquishano pueyari na sesojoquiaari Bernabé. Niiori sequeya “Cumanijiana”. Chipre jiyajinia na raja. 37 Bernabeeri cuhuariquia jiiitiaquiaari. Na cuhuariquia niqutioquiaari cumaneecaraari. Jaara masequiaari cumaneeca na cuhuariquia sami, nojuajaari nareja na niqutioquiaari Jesu jiyaramiquishano pueya, casamiiju narta Pueyaso pueya niqutiojosaanura saniniuujia.

5

Ananías, Safira sesa miishanojiniji pohuatasano

¹ Tamonu pueyanoori quiquiaari. Na sesaari Ananías quijia. Necocua sesa quiquiaari Safira. Nojoriiri na cuhuariquia niquitioquiaari cumaneecarajuhuj. ² Ananíasri na cuhuariquia samijiniji queyataquiaari nera. Na cureeno pataquiaari Jesu saquiriojosano pueyacuaari. Juhua papatasoo niquitioquiaari na sapojonutaari. Necocuaari na miishano niishiquiaarijiuhuj. Majaari neyacata na quiniu quiriquiaa Ananías niquitiosacari nareja na cumaneeca. ³ Ananías niquitiosacari na cumaneeca, Pedroori na sequere:

—Ananíasnaa, ¿casaara quia tiuquinirii Sesaaca quioojiajiniani, quia sapojonura Pueyaso Sohuanu juucuani? ¡Nojuacuajaari cua niishitiquii nio cumaneecaari maja puetunu quia masanojuanaa quia cuhuariquia samijiniji! ¡Quiaacuajaari tiji queyataree! ⁴ Quia cuhuariquia quia niquitioyaquishacarijia cumaneecara, cuno cuhuariquiaari quia casaa quiriquiaa. Na nuhuaji, quiaa jaara quia cuhuariquia niquitioree cumaneecara, quia cuhuariquia samiiri quia casaa quiriquiaajuhuj. ¿Casaara naa sesa quia niishiriojoreerini? Naa sacuaraatia quia miishacaritij, majaari quia sapojonu quirii parta pueyano. ¡Quiaa cutaraari Pueyaso sapojoree juucua!

⁵ Ananías tojishacari naa Pedro sequesantej, ¡macuuri pojoquee! Puetunu pueyajanaa jaara tojinuuquiaari nocuaji, jiyanojua shiriiquitituuquiaariiri. ⁶ Mashiquioriiri na jiunio-coquiaari toquejinia. Na nuhuaji, na patuquiaari na jamonuraari.

⁷ Jiuujianaraca hora nuhuaji, necocuaari juhuajaniya tiuquiquiaari Pedroocujuhuj. ⁸ Pedroori na nequesotaree:

—Cua sequere, ¿niojuanaate nia cuhuariquia sami quiriu-cuaa?

Na riuquareeri:

—Jaa, niojuanaacuaaquiniatejaj.

⁹ Pedroori na sequere:

—¿Casaara naa nia rojotoorucuaa Pueyaso Sohuanu nia sapojonurani? Quia niquiri. Cuno mashiquioriiri quia niyaca jamonu nuhuaji shusha tiuquijiohua. Nojoriiri quiarijia quia panutaniyajuhuj.

¹⁰ Jiyacaritij, maajiiri macu pojoquee Pedro shuriucujuhuj. Mashiquiori tiuquijiosacariuhua, nojoriiri Safira niquishuhua pojianojuhuaj, tariucua macu. Nojoriiri na patuquiaarijiuhuj. Neyaca shuriucua na jamotuquiaariiri.

¹¹ Puetunu Pueyaso pueyajanaa, tamasaca pueyano, nojori jaara tojiniuquiaari puetunu nio miishanojinijijianaa, jiyanohua pueretuquiaariiri.

Queraatia miijosacari Pueyaso cumaacata pueya niquiara

¹² Jesu jiyaramiquishano pueyari jiyanohua cutara casaa miijoquiaari Pueyaso cumaacata. Queraatia pueya naatani-jioquiaariiri. Puetunu Pueyaso pueyajanaari pueyaracaanu rerejoquiaari pueya jiyaniquishano tariucuacaanu jiyani-jia Salomón canujuucojojuajinia, Pueyaso Secojoua tiajinia. ¹³ Tamasaca pueyari nojori puerequiaari. Majaari nojori rupuesaanu quijia. Na pueretujuacaari nojorijiniji sequetujua:

—Cuno pojoriiri maninia pueya.

¹⁴ Queraatia pueyari Jiyaniijia Pueyasocua tiuquiaari, canuu, maajipohuanio. ¹⁵ Naajuhuj, cusosuhuari patootasaaquiaari na maquetucujinia nuujiniara. Pueyari naa niishiriojoquiaari, Pedro jaara cusosuhua shuriuquioco tajimia, cusosuhuari naataconutaniuhua Pedro naaqui jaara nojori caco netema. ¹⁶ Queraatia Jerusalén tiaca shocua quiniaa pueyari na cusosuhua patootaquiarijihuaj, Jerusalén tiacajiniara. Samaruhua sesosano pueyari jaatucunuusaaquiarijihuaj. Puetunu pueyajanaari naatanijosaaquiaari.

Pedro, Juan nujuatejosacari nujuatejojuajinia

¹⁷ Naaratej, pueyacuara secojonaa jiyaniijia, nata quiniaa narta Saduceocuanio, nojoriiri juaaquiokiaari shocotasano nojori quishacari. ¹⁸ Secojonaa jiyaniijiaari na pueya jiyaroquiaari Jesu jiyaramiquishano pueya nojori quioonura. Jaara na quiootuquiaari, nujuatejosaquiaariiri Judiocuaca nujuatejojuajinia. ¹⁹ Pueyaso seruuri niucua jiyocuacaanuji nojoriicua rosequiaari. Nujuatejoua tohuataya riataseeri. Na tohuatejosacari Pedro, Juannio, nojori sequereeri:

²⁰ —Juhujaniya nia quiaarohua. Pueyaso Secojoua tiajinia puetunu Jesujinijijianaa nia pohuatare pueya niquiara. Nia pohuatarejuhaj taa jatanishano pueya nia quiya quiarijiani.

²¹ Nojoriiri Pueyaso seru sequesano tojiquiaari. Nojoriiri tariquiicujia quiojoquiaari Pueyaso Secojoua tiajinia. Tii niishitiojonuuriquiaa juhuajaniya Jesujiniji pueyari. Jiyacari, pueyacuara secojonaa jiyaniijiaari nata quiniaata saniniujia quiojoquiaari pueya nequesoreesaqui. Puetunu

Israel pueya camarucujanaa rerejotereeri, nojori nequesoreenura Jesu jiyaramiquishano pueya. Puetunu nojorijanaa jaara tari rerejoquiaari, na pueya sequequiaariiri nojori tohuatejonura Jesu jiyaramiquishano pueya nujuatejojuajiniji, nequesoreesocoriquiano. ²² Na pueya jaara tiuquiti-aquiaari nujuatejojuajinia, majaari nujuatejosano na riuri-atatunu quishii nujuatejojuajinia. Nojoriiri tacaretacuhua na shaacanu nuhuaji. ²³ Naa pohuatanuusuhua camarucua niquiaraari:

—Canaa tiuquishacari nujuatejojuajinia, canaari maninia cumaatia mishi-quionucua na riuriataseeni. Tii cojuanaari maninia cojuariquiaa na tiotiu. Canaa riatasacari tohuateya, ¡shaacoori quiriquiaa!

²⁴ Secojojua tia cojuanaa camarnu, mariyata pueyacuara secojonaa jiyaniijianucuaari tama sequetooquiaariijaaja nojori shiriiquiniutia:

—¿Taateerini? ¿Taariquitijia socua na nuhuaji quiniutianiyatej?

²⁵ Jiyacaritij, tamonu pueyanoori camarucuaacua tiuquishii. Naa nojori sequeeseri:

—¡Noo pojori, niaa na nujuatejocanu nujuatejojuajiniatej, nojoriiri juhuajaniya pueya niishitiojonuya Pueyaso Secojojua tiajinia!

²⁶ Tari nojori niishishacari tee Jesu jiyaramiquishano pueya quiriquiaani, Secojojua tia camarnuuri na pueyata quiojoquiaari Jesu jiyaramiquishano pueya quioonura. Jaara na quiootuquiaari, nojoriiri jacaria na jaatucunuquiaariuhua. Secojojua tia camarnuuri pueya puereriquiaa. Nojori jaara caponeere Jesu jiyaramiquishano pueya na juaaniutia, pueya mariqui nojori jacure saitia saniniuuriija. Nojoriiri cuno puerequiaari. Nocuaji Jesu jiyaramiquishano pueyari jacaria jaatucunuusaaquiaari. Majaari na caponeesaanu quiquiaari. ²⁷ Jaara tiuquitiasaaquiaariuhua, nojoriiri Israel pueya camarucujanaa tajinia nujuatejosaaquiaari, Sanedrín-cuaca tajiniatuhuj. Pueyacuara secojonaa jiyaniijaari nojori sequequiaari:

²⁸ —¡Majaquiiri nia niishiniu tojinii! Canaacuajaari tari nia tenuitycanu juucuanii maja socua cuno Jesujiniji nia pohuatanura pueya niquiara. ¿Niaate nia numaa shama tojiquianu canaa sequesano? Naa nia niishitiojosacaritij, ¡puetunu Jerusalén tiacajinia quiniaajanaari canaacua tiuutianutaniya Jesu mosaanu! Canaa sequetunutaniyari: “Cuno pojoriiri Jesu motucanu”.

²⁹ Pedroori narta Jesu saquiriojosano pueyata nojori riu-cuaquiaari:

—Seetanujuaanaari, pueya cuaara Pueyaso sequesano mi-iria coteenu, maja narta pueya sequesano. Maja cutaraari canaa tarinitianunoj. Na nuhuaji cutara, nio jiyajinia jiyani-ijianucua sequesano cuaara miishaaria. ³⁰ Pueyasoori tariu-cuacaanu pa supuetanaa Jiyaniijia quiquiaarijuhuaj. Cuno Pueyasojuanaacuaajaari niyacutesanojinia nia cusojuasano samiitianiquianuhua. ³¹ Pueyasoori na tacaniquianu jiy-ocuaacaanu. Na miaquetajara na cajitiquianuuri Jiyaniijia-janaa na quiniuucua, pocuaji Tacuna na quiniuucuajuhuaj. Naa miiquianuuri Israel pueya tacatonuhuaara noojia Pueya-soocua, Pueyaso jiyanooniuria pajaniya sesa pa miishano-jiniji. ³² Naaratej, canaari canaa tojishano pohuataani, canaa niquishanonio. Naajuhuj, Pueyaso Sohuanuuri canaa ni-ishitiojoquiaa maninia canaa pohuatanura pueya niquiara. Pueyasocuaajaari na tojtianaa niqutioquiaa na Sohuanu.

³³ Naa Judiocuaca camarucua tojishacari nojori sequesantej, juaaquioreeri. Nojori puecoonu panirii juucuaari. ³⁴ Jiyacaritij, tamonu pueyanoori narta camarucua tajiniji nujuaquiaari pocuanura. Na sesa quiquiaari Gamaliel, Fariseo pueyano. Nojuajaari Pueyaso tariucuacaanu rootasano niishijia quiquiaari cutara. Naajuhuj, nojuajaari jiyanoohua narta Israel pueya tojishano pueyano quiquiaari. Gamalielri Secojua tia cojuanaa camarnu sequequiaari Jesu jiyaramiquishano pueya na tohuatanijionura rupaquijia. ³⁵ Na nuhuaji, saa camarucua quishacarijia tii nata, nojuajaari naa nojori sequequiaaritij:

—Cuarta Israel pueyanaa, jacaria nia niishiriojore taa nia miiniutianiya nio pueyani. ³⁶ ¿Majateeri nia niishiniu taa Teudas miiquiaari quiari naatajani? Nojuajaari jiyaniijia quiniu paniquiaari juucua. Queraatia pueyari na nuhuajiquiaari, quera cuatrociento pueya. Na nuhuaji, Teudasri mosaaquiaari. Puetunu na pueyajanaari niaquejoquiaariuhua. Naa puequequiaariiri Teudas miiniu panishano. ³⁷ Teudas nuhuaji, jiyaniijia César naajiotanishacari puetunu pueya sesacajanaa, Galilea jiyajinijinio tamonu Judasri jiyacari César ruuretaquiaari. Queraatia pueyari na nuhuajiquiaari nojori jiyaniijia na quiniuria juucua. Nojuajaari mosaaquiaarijuhuaj. Puetunu na pueyajanaari niaquejoquiaariuhujuhuj. ³⁸ Naaratej, naa nia sequeyanijia: nia tarinitiare nio canuu. Nojori niishitiojosano jaara tama nojori niishishanojuaja quiri, shaajenutaniyari. ³⁹ Saniniuujia, nojori miishano jaara seetanujuaana Pueyasojiniji quiri, majaari nia naata nojori

tarinitiniu quiniutianiya nojori miishanojiniji. Nocuaji tama nia cuaqueyajaaja nia cojuare, majaari Pueyasota nia miaquetoojonuruhua, naa nojori nia miishacaritij.

⁴⁰ Puetunu camarucujanaari Gamaliel sequesano tojiqiaari. Na nuhuaji, Jesu jiyaramiquishano pueyari tiuquinitiasaarahua. Camarucuaari nojori mojooree nareja. Nojori tenujutureeri maja Jesujiniji nojori pohuatanura socua pueya niquiara. Naa nojori miishaanu nuhuajitij, Jesu pueyari cartequesaaquiaariuhua. ⁴¹ Jesu jiyaramiquishano pueyari camarucua rerejojuajiniji tohuareetaquiaariuhua shuquiriaatia. Nojoriiri timiquioriquiaa cararaatia nojori camarucua miiniuucua nojori, Jesujiniji nojori poojotanuucua maninia. Majaari nojori seetanu quiquiaari nojori Jiyaniijia Jesujiniji. ⁴² Majaari nojori pishiniu quiquiaari nojori pohuatanura Jesujiniji. Socua pueya niishitiojonura jiyacatequiaariiri. Nojoriiri pueyaracaanu pueya niquiara pohuatariquiaa Jesucristojiniji, puetunu juucajanaa, Pueyaso Secojoua tiajinia, mariyata puetunu Jerusalén tiacajiniaqueyajanaanio.

6

Mashiquiopue mianuutenaara saquiriojosacari

¹ Jiyacaritij, Jesuucua tiuuniaa pueyari socua canequiaari. Puetunu nio pojorijinijiniojuanaani, noojiaqueyari Judio rupaa pocuanaa quiquiaari. Naajuhuj, noojiaqueyari Griego rupaa pocuanaa quiquiaari. Jiyacaritij, Griego rupaa pocuanaari juaaquiouquiaari Judio rupaa pocuanaata. Griego rupaa pocuanaari naa sequequiaari Judio rupaa pocuanaatej:

—¿Casaara canaa mashiquiopue nia niquitioyaquiquiaa miaguesanonijia?

² Nocuaji, Jesu jiyaramiquishano doce pueyari puetunu Jesuucua tiuuniaa pueyajanaa rerejoquiaari. Naa nojori sequequiaariiri:

—Maja maninia canaa cartenura Pueyaso rupaa pohuatanu, canaa mianuutenura mashiquiopue. ³ Cunora canaa tapueyocucanaa, tama nijaniyajinijinio nia saquiriojore siete maninia miijiaca pueya, niishijiaca, Pueyaso Sohuanuraca cutara. Nojori nia seeratare nio poonijiosano, maninia nojori mianuutenura pa mashiquiopue. ⁴ Canaacua saniniujia saa Pueyaso secojorenijia. Naajuhuj, majaari canaa tarinitianu quiniutianiya Jesujiniji niishitiojonu.

⁵ Puetunu pueyajanaari na shuquiriniutia naa riucuaquiaari:

—Taaquiririnij, naacuaaquiniateja maniniaajaj.

Jiyacaritij, pueyari Esteban saquiriojoquiaari. Nojuajaari jiyanoehua Pueyasooeua tiuujia pueyano quiquiaari. Nojuajaari Pueyaso Sohuanu cumaacaraca quiquiaarijuhuaj. Nio pojoriiri Estebanta saquiriojosaaquiaarijuhuaj: Felipe, Prócoronio, Nicanornio, Timónnio, Parmenasjuhuaj, Nicolásnio. Nicolásri tahue quiquiaari Antioquia tiacajini-jinio. Tii rasaaquiaariiri. Nojuajaari tarijia Judiocuaca niishitiojosano pueyano quiquiaari, Judio pueyanora na quiniuria. ⁶ Puetunu pueyajanaa jaara cuno siete pueya saquiriojoquiaari, nojori jiyataquiaariiri Jesu jiyaramiquishano doce pueyacia. Jesu saquiriojosano pueyari cuno siete canuu nacaacia niaquiaari na juaashiquiaca. Pueyaso secojoturee nojoriicuaraari Pueyaso Sohuanu cumaquiniuria nojori, mi-aquesano niqutiojonaa nojori quiniuria.

⁷ Jiyacariti Pueyaso rupaari socua tojishano quiquiaari. Jesuucua tiuuniaari socua canequiaarijuhuaj. Queraatia Judiocuacaacuara secojonaa pueyari Jesuucua tiuquiaarijuhuaj.

Jesu ruuretajaca quiasacari Esteban

⁸ Estebanri Pueyaso cumaacaraca quiquiaari jiyanoehua. Pueyasoori maninia na jitiaquiaari. Naacuajitij, nojuajaari cusosuhua pueya naatanijioquiaari Pueyaso cumaacata. Pueyari niishiquiaari Esteban pahuatasanoori seetanujua-naa Pueyasojiniji quiquiaari, nojori niquishacari jiyajeneta na miishano Pueyaso cumaacata. ⁹ Jiyacariti, tamasa Judioeuaari Jerusalén tiacajinia quiriquiaa. Nojori maanuri sesojosaaquiaari “Quioosanojiniji carteqesano pueya”. Quiquiaarijiaariuhua Cirene tiacajinijinio pueya, Alejandria tiacajinijinio pueya, Cilicia jiyajinijinio pueyajuhua, Asia jiyajinijinio pueyano. Puetunu nojorijianaari Esteban-cua rerejoquiaari nata juayonuutanura. ¹⁰ Nojoriiri maja na naata Esteban shocotanu quiquiaari nojori niishishanota. Estebanri saniya nojori shocotaquiaarijia. Nojuajaari Pueyaso Sohuanu niishitiojosanota saa maninia pahuataquiaarijia nojori niqiuara. ¹¹ Maja socua nojori rejere-tasacari Esteban pahuatasano, nojoriiri tamasa pueya niqutioquiaari cumaneeca, najuhua nojori cuaracashiniuria camarucua niqiuara Estebancuara. Cuno pueya, cumaneeca niqutiojosaaquiaari na cuaracashiniuriani, nojoriiri naa sequequiaari Judiocuaca camarucua niquiaratej:

—¡Taaquiriririni, canaacuajaari cuno pueyano tojiquianu Moisés sesacaanoni, Pueyaso sesacaanojuhuaj!

¹² Naa nojori sequesacaritij, puetunu pueyajanaari juaaquioree, Judiocuaca camarucujuhua, Moisés Rootasano niishitiojonaanio. Puetunu nojorijianaari

Estebancua catecanoquiaari. Na quiatureeri. Na nuhuaji, na jaatucutuquiaari pueya nequesoreesaquiriaari, Israel pueya camarucua nequesoreesocoriquiano tii nojuaja. ¹³ Socua pajesaaquiaariiri tamasa, Estebancuara tonujuriquiano najuhuanaj, na cuaracashiniutia. Cuno pojoriiri naa sequequiaari camarucua niquiaratej:

—Nio pueyanoori pueyaracaanu sesacaquiaa Pueyaso Secojoja tia. Moisés Rootasano sesacaariquiohuariuhuj. ¹⁴ Canaari socua naa na sequesano tojiquiaajaaniuhuj: “Nazaret tiacajinijinio Jesuni, nojuajaari Pueyaso Secojoja tia niyartanutaniya”. Naajuhuj, tariucuacaanu Moisés ni- ishitiijosano pajaniya pa cartetenutaniyaquiniaari.

¹⁵ Puetunu camarucujanaari na cajitiushaquiiji niqutiariquiaa Esteban. Nojoriiri na jiquioco niqiuquiaari sha-cantuuca, juhua Pueyaso seru jiquioco.

7

Esteban pohuatasano

¹ Pueyacuara secojona jiyaniijiaari Esteban nequesotaquiaari:

—¿Seetanutejanaa taa nio pojori sequereecuajani?

² Nojuajaari na riucuaare:

—Cua panishano pueyanaa, cua camarucuaanaa, cua tojitiare. Pueyasoori jiyanohua maninia. Nojuajaari pa supuetana Abrahamcua muetaquiaari Mesopotamia jiyajinia na quishacari, na pacuyaquishacarijia Harán tiacajinia.

³ Pueyasoori jiyacari naa na sequequiaari:

“Quia tiujiaare quia jiya, quia pueyano. Niiquiiji quia quiaare, janiya cuaara quia sequerejaatijia, niya quia quishii. Quiocua tii jiyojese cutara”.

⁴ Abrahamri Pueyaso sequesano tojiquiaari. Quiaquiaariiri Caldeo pueya jiyajiniji. Harán tiacajinia quishiiri. Tii shaajajiaari na shipininioori. Na nuhuaji, niyara pacuquiaari-iri, paa tii quiyani. ⁵ Jiyacaritij, Pueyasoori juhuanajuaja maja Abraham na niqutionu quiquiaari nio jiya. Naacuajitij, Abrahamri maja quenaaja jiya na jitianu quiquiaari tama na quijiarajaaja. Naajaa, Pueyasoori na sequequiaari:

“Janiya na nuhuaji quia niqutionutaniya nio jiyani. Quiaa jaara shaajeyare, quia niqiuohuara quiniutianiya saniniuurijia”.

Pueyaso jaara naa sequequiaari Abrahamtej, Abrahamri jiyacari juhuanajuaja niqiuohuaju quiquiaari. ⁶ Pueyasoori naa pacutequiaari sequenu Abrahamtej:

“Puetunu quia jinianuucujinio supueno pueyajanaani, nojoriiri na niishishoo pueya jiyajinia quiniutianiya.

Cuno jiya pueyari nojori poonijiotenutaniya jiyano hua. Naa naquiya miishaanutaniyari. Tii nojori quishacari, na shoconujunutaniyari cuatro ciento marijia”.

⁷ Pueyasoori Abraham sequereehuhaj:

“Janiyari saniniuujia cuno taucuaca naminiutianiya quiocuajinio supueno pueyacuani. Janiyari nojori saniitionutaniya saniniunijia nojori poonijiotenuucua quiocuajinio supueno pueya. Na nuhuaji, nojoriiri tiji quiojonutaniuhua niyara. Nojori tiuquijiosacariuhua, nojoriiri cua secojonuujuaca quiniutianiya niya”.

⁸ Pueyasoori naa Abraham rootaquiaarijihuhaj:

“Niocua nia cararaatiuuquia co miatejore. Cunoori juhua naajiosano nia cuaqueyajinia quiniutianiya, pueyara-caanu nia niishiniuria cua sequesano nijaniya”.

Naa Pueyaso sequesanoori quiquiaari puetunu Israel pueyarajanaa. Naaratej, Abraham niyanu Isaac jaara rasaquiaari, na queeri neyanu cararaatiuuquia co miatequiaari na camueesacari ocho juuca. Isaacri naa miiquiaari neyanu Jacobojuhaj. Pueyasoori Jacobo sesojoquiaari “Israel”. Jacoboori naa miiquiaari necohuahuhaj. Necohuari quiquiaari doce canuu. Cuno doce canuu, Jacobo niqiuohuani, nojoriiri puetunu pa doce Israel pueyapue supuetanaajanaa.

⁹ 'Pa supuetana Jacobo niqiuohujinijinioni, tamonuuri sesojosaaquiaari José. Tapueyocuacaari José juaajiaca quiquiaari jiyano hua, puera na que panishano José quishacari. Majaari nojori niqitiuniu paniniu quijia nojuaja. Na queeri socua jiyano hua José panijia quiquiaari na pueranaajiniji. Tapueyocuacaari cunora casami niqitiojonaa pueya niqitioquiaari cumaneecara tarajanu José. Casami niqitiojonaari José jiyataquiaari Egipto jiyajinia, saniniuujia tii na niqitiosocoriquiano serura. Naajaa, Pueyasoori Joseeta quiriquiaa. ¹⁰ Pueyasoori na naacuquiaari naquiya na miishacari. Pueyasoori na jiyatequiaari niishijia. Naaratej, Egipto jiya jiyaniijia Faraónri na maniniucuaquiaari. Na jiyatequiaariiri puetunu Egipto jiya pueya camarnurajanaa. Na jiyateree na tia camarnurajaariuhaj.

¹¹ 'Na nuhuaji, miaajenuuri quiquiaari puetunu Egipto jiyajiniajanaa, Canaán jiyajinianio. Pa supuetanaa quishacari Canaán jiyajinia, nojoriiri quera titiacoquiaari na mijajaa. Seetanujuanaa shaaqui quiquiaariiri nojori miasano. ¹² Jiyacaritij, Jacoboori caminiujiushaaquiaari:

“Egipto jiyajinia quiyaquinia trigo”. Naaratej, necohua jiyaroreeri trigo masenura. Jiyacari nojori quiojosacarini, cunoori shushajanaa nojori quianu quiquiaari Egipto jiyajinia. Cuno Jacobo niqiuohuani, nojoriiri pa supuetanaacuja. ¹³ Coteenu nojori masesano jaara puequequiaari, nojoriiri Egipto jiyajinia tacatequiaariuhua socua trigo nojori masenura. Jiyacaritij, Joseeri tapueyocuaca sequequiaari: “Janiya nia tarajanuni”. Joseeri Faraón niishitiquiaari tapueyocuacajuhuj. Naaratej, Faraónri shusha niishiquiaari tejeno pueyanote José quiquiaarini. ¹⁴ Joseeri tapueyocuaca sequequiaari: “Pa que Jacobo nia riquioo niyara, puetunu necohuatajanaa”. Puetunu nojorijianaari quiquiaari setenta y cinco pueya. ¹⁵ Jacoboori naa pacuquiaari Egipto jiyajinaratej. Na nuhuaji, saaquianoori tii shaajeseequiaari. Necohuari tii puequeseequiaarijiuhuj, tariucua saaquiapue. ¹⁶ Na nuhuaji, Egipto jiyajiniji pacusaaquiaariiri nojori nucuhua. Siquem tiacajinia niojosaaquiaariiri na supuetana Abraham raaco. Cuno raari cuhuariquiajinia quijia. Abrahamri cuno cuhuariquia masequiaari tariucuaaanu pueyajiniji raa na jiitianura necocua na nijara jaara cusoyare. Cuno cuhuariquia masequiaariiri cumaneecata Hamor niqiuohujiniji, Siquem tiacajinia.

¹⁷ Pueyasocujaari tariucuaaanu Abraham sequequiaari nojuajaari nio jiya na niqutionutaniya. Quera na niqutionu panishacari, Israel pueyari jiyanoehua canequiaari Egipto jiyajinia. ¹⁸ Jiyacaritij, tamonu pueyanoori jiyaniijia quiquiaari Egipto jiyajinia. Cunoori jiyanoehua tarijia quiquiaari José shaajenu nuhuaji. Naacuajitij majaari cuno jiyaniijia niishiniu quiquiaari José. ¹⁹ Cuno jiyaniijiaari taraatia miiquiaari shusha roosano pa supuetanaa niqiuohua. Pa supuetanaa sequequiaariiri shusha roosano cuara quejoosaria moojinia. Pa supuetanaari taraatia miiquioquiaari naacuatej. ²⁰ Moisésri jiyacari rasaanquiaari. Pueya-soori na maniniucuaquiaari. Na queyari na jiitiaquiaari rupaquijia. Jaara na shoconujuquiaari jiuujianaraca raca, conaajaari carijiniacuma niasaaquiaari. ²¹ Faraón niyatuuiri na paquiaari saniniuujia. Na canashitiquiaari juhua na mueyari. ²² Egipto pueyari Moisés niishitiojoquiaari puetunu nojori niishishanojuanaa. Puetunu Moisés sequesanojuanaari jiyanoehua tojishano quiquiaari cutara. Puetunu na miishanojuanaari maninia quiquiaarijiuhuj.

²³ Cuarenta marijia jaara shocojoquiaari Moisés, mashaja na quishacarijia, narta Israel pueyacua rucuanenu paniquiaariiri, nojori na niquniuria. Judiocuacacujaari

cuno pojori, naa sesojoshiya Israel pueyatani, maja tamonu. ²⁴ Naacuajitij, Moisés jaara quiaquiaari narta Israel pueya niquiniucua, saaja Egipto pueyano niquishii narta Israel pueyano majacuyanoori. Moisésri narta Israel pueyanoocua namiquiaari. Na juaaniutia moquiaari saniniuujia cuno Egipto pueyanoori. ²⁵ Moisésri juucua jiyaniquiaari narta Israel pueyari niishiniutianiya Pueyasoori na jiyaroree nojori na mashiquiniuria Egipto jiyajiniji. Majaari nojori niishiniu quiquiaari saaja. ²⁶ Moisésri socua tariqui quiaquiaari narta Israel pueya niquiniuuquiohuaj. Nojuajaari saaja riuriatasee tama nojori piyotaanojuaaja. Juucua nojori ruparetanu panishiiri. Nojori sequereeri: “¿Niaateeri tamonu, niaa jaara naa miitioyaniquitij? ¿Casaara naa nia nootujutoyani?” ²⁷ Cuno narta pueyano piquiriquiaani, nojuajaari saaja Moisés caporee. Na sequereeri: “¿Cante quia jiyatecanu juhua canaa jiyaniijia quia quiniuriani, naa quia sequenura canatej? ¿Cante quia jiyatecanu canaa nequesoreenarani? ²⁸ ¿Quiaateeri cua monu panijahuaj, naatej taa quia morucuaa cuno Egipto pueyanocuaani?” ²⁹ Moisés tojishacari naa cuno pueyano sequesanootej, ritia mashiquiaari Egipto jiyajiniijiri. Madián jiyajinia quishiiri tamonu pueya jiyajinia. Moisés quishacari cuno jiyajinia, tii camiquiaariiri. Caapiqui canuuniyojua mueratejoquiaariiri.

³⁰ Cuniqiu na quishacari, na shocojoquiaariiri cuarenta marijia socua. Tamonu juuca, Moisésri rucuanajoriquiaa cariiquia jiyajinia, pueya sesojosano Sinaí tuhuananu shuriucua. Pueyaso seruuri tii nocua muetaquiaari nequeru casaja noshiyanojiniji. ³¹ Moisés niquishacari mani noshiyano, nojuajaari shiriiquiquiaari. Jaara nocua catecanoquiaari na niquiniuria maninia, saaja Jiyaniijia Pueyaso tojirii manijiniji pocuaanoori. ³² Pueyasoori naa na sequequiaaritij:

“Janiyacuaajaari Pueyasoni: quia supuetanaa Jiyaniijia: Abraham Jiyaniijia, Isaac Jiyaniijiajuhuaj, Jacobo Jiyaniijiano”.

Moisés jaara naa tojiquiaaritij, tetecareeri. Majaari mani noshiyano na niquiniu paniniu quiquiaari na puerenuta. ³³ Pueyasoori na sequequiaari:

“Cuniqijia quia jocojore quia sapatu. Niya, quiaa tii nujuuani, nioori cua quishaqui. ³⁴ Janiyacuajaari cua pueya niquiquiaa Egipto jiyajinia quiyanoni. Egipto pueyari nojori miitiaa puera. Cua pueyari noonu rejeretacoya. Janiyari nojori sariyocuatunu tojiquiaa taraatiani. Nojoriicua roseyareenijia cua mashiquini-

uria nojori Egipto pueyajiniji. Cunora, janiyari quia jiyaronutaniya Egipto jiyajiniani”.

Pueyasoori naa Moisés sequequiaariti.

³⁵ 'Israel pueyari tarijia Moisés juaaquiaaricuaja. Naa na sequetuquiaariiri: “¿Cante quia jiyatecanu juhua canaa jiyaniijia quia quiniuriani, canaa nequesoreenarajuhua?” Naajaa, Pueyaso cutaraari seetanujuanaa na jiyaroquiaariuhua nojori jiyaniijia na quiniuria, Pueyaso seru jaara nocua pocuaquiaari nequeru casaja noshiyanojiniji. Na jiyaroquiaariiri puetunu nojori tohuatanijioriquianojuanaa Egipto jiyajiniji. ³⁶ Moisés cuajaari pa supuetanaa mashiquiquiaari Egipto jiyajiniji. Nojuajaari jiyajeneta miishano miijioquiaari Pueyaso cumaacata cuno jiyajinia, mariyata nojori niutiasacari Naatunacu jiyaniishano caminiajuhuaj. Naa miiquiaari pueyaracaanu cariiquia jiyajiniajaariuhua. Cuarenta marijiaari nojori shocojoquiaari pueyaracaanu nojori rucuanijosacari tii. ³⁷ Nio Moisésni, nojuajaari naa sequequiaari puetunu Israel pueyajanaa:

“Pueyasoori niaacua jiyaronutaniya tamonu pueyano, na rupaa pohuatariquiano nia niquiara, taa na jiyaroquiaari janiyacuaani. Tama nia niquiuhuacuajinijuaaja supuenutaniyari. Niocua saa nojuaja tojiri cutara”.

³⁸ Nio Moisésri narta Israel pueyata quiquiaari cariiquia jiyajinia. Nojuajaari Pueyaso seruta pocoojoquiaari Sinaí tuhananuucua pa supuetanaa jateesacari tuhananu cari. Moisésri Pueyaso seru rootasano na tojishano niishitiojoquiaariuhua pa supuetanaa. Cuno rootasanoori samiitianijia rupaa quiquiaari pajaniyara, maninia pa quiniuria pueyaracaanu.

³⁹ 'Pa supuetanaari saa na ruuretaquiaarijia. Majaari nojori tojiniu paniniu quiquiaari Moisés. Egipto jiyajinia tacatenu paniquiaariuhua saajaari. ⁴⁰ Naacujitij, Moisés tarishishacari tuhananuucua Pueyaso seru na tojishacari, pueyari socua Moisés tarajanu Aarón sequequiaari: “Puera quia shipinijiorequi pueyasohua, nojori puetariquiano pajaniya. Majaari pa niishiniu taa Moisés miishiicuaani. Shaajeseecuaa naasucujuhuanajaj, mariqui tiuquiriohua. Nojuajaari najuhua pa mashiquiquianu Egipto jiyajiniji”.

⁴¹ Naacujitij, nojoriiri na pueyasora shipiniquiaari juhua seru juunu niyanujua niquishano. Nojoriiri na seya puecooquiaari na shuquiriniutia na juaashiquiata na shipinitiushano pueyasooacara. Nojoriiri jiyacari sacuaratia timiquioriquiaa. ⁴² Pueyasoori socua nojoriicuaaji pishiquiaari. Nojori tarinitiaquiaariiri jiya cajiniocua nunucojuua nojori jiyatenura tama nojori

pueyasohuarajaaja. Seetanujuanaa naa naajiotasano quiyajaariuhua tariucuacaanu Pueyaso sequesano caminiujiuniaa naajioneejinia. Naa sequeyari:

“Israel pueyanaa, ¿canaacuara nia puecoquiaari pueyara-caanu nia seyani cariiquia jiyajinia nia camarucunee-tasacari cuarenta marijia cuaara nia shocojoquiaar-ijiaatijia? ¿Cucuaratee? ¡Maja! ¿Canaacuara nia cati-jiaquiaari nia seyani? ¿Cucuaratee? ¡Maja! Niaari puetunu cuno miiquiaarijianaa tama nia jiyatesano pueyasohuacarajaaja. ⁴³ Niaari Moloc suhuorotu pataquiaari, shoquejiniji suhuorotu, nia pueyasora nia jiyatesanoni. Cunocuaajaari nia sequesano, ‘canaa pueyaso’. Niaari Refam pataquiaarijuhuaj, juhua rijia niquishano shipinishano. Niaari puetunu nio shipini-jioquiaarijianaa nia pueyasohuara, nojori cariquimi-aji nia mojoquetaconura, nia shuquiritiasacari nojori. Nocuaji, janiyari nia jiyaronutaniya tucuacaanuni, Babilonia jiya tamajiria”.

Pueyasocuaajaari naa sequequiaari pa supuetanaatej nojori miiniuucua sesa.

⁴⁴ Estebanri socua pahuataquiaari naatej:

—Pa supuetanaari Pueyaso secojojua suhuorotu jiiquiaarijuhuaj, cariiquia jiyajinia nojori quishacari. Nojoriiri tii racataquiaari Pueyaso niquitiosano saajianeeca. Nocua naajiotasano quiquiaariiri Pueyaso rootasano na pueyara. Pueyasoori cuno suhuorotujiniji pocuaquiaari na pueyacua. Cuno suhuorotuuri shipinishaaquiaari taa Moisés niquitishaaquiaaricujani Sinaí tuhananuucua na quishacari. Pueyasoori jiyacari naa sequequiaari Moisés: “Quia shipiniri taamueca cua niquitiquianu quiajaniyacuajani”. ⁴⁵ Na nuhuaji, pa supuetanaa, canapuate naatujoori quiriquiaa Moisés quishacarini, nojoriiri cuno suhuorotu pataquiaari. Na patatuquiaariiri Josuéta nojori pacusacari nio jiyajinia paa tii quiyani. Nojori miaquetoosacari taucuacata, nojoriiri Pueyaso secojojua suhuorotu patariquiaa. Pueyasoori cuno taucuaca jataquiaari nio jiyajiniji, saniniuujia pa supuetanaa jiya na quiniuria. Cuno suhuorotuuri pa supuetanaata quiquiaarijia, David jaara jiyaniijia quiquiaari. ⁴⁶ Jacoboori pa supuetanaa jiyaniijia David supuetana quiquiaarijuhuaj. Davidri Pueyaso tojjia quiquiaarijuhuaj. Pueyasoori na shuquiritiaquiaari. Naaratej, Davidri Pueyaso Secojojua tiara tianu paniquiaari juucua. ⁴⁷ David niyanu Salomón cutaraari Pueyasora tiaquiaari. ⁴⁸ Naajaa, jiyocuacaanu Quijiaari maja na quiniu pueyano tiasanojiniaaco.

Tariucuacaanu Pueyaso sequesano caminiujiuniaari naa naajiotaquiaari Pueyaso sequesano nojuaja:

49 “Jiyocuacaanuuri cua quiquio. Jiyari saniniuujia cua niohuaca cua niaja. ¿Taamueca tia nia tianutaniya quiriajaarani?” Jiyaniijaari naa sequeyaquij. ‘¿Taa nia sequeyani: na mueecujuara pa miiri, shuquiriaatia na quiijara? Maja. 50 ¿Majateeri puetunu nio jiyajinia niquishanojuanaa cua juaashiquiata cua miishanocuaja, jiyocuacaanujuhuj?’ ”

51 Estebanri socua nojori sequequiaari:

—¡Niaari tojtiaashijianucua! ¡Niaari Pueyaso sequesano ruuretaquiaa juhua nia supuetanaa! Nioojiaari maja juhua Pueyaso pueya jiuujia. Nia numaacaari maja Pueyaso rupaa na tojiniu paniniu. Niaari pueyaracaanu tojiyaquiya Pueyaso Sohanu niishitiojosano. Niaari Pueyaso tojiyashijianucua juhua nia supuetanaajuhuj. 52 Nia niishiritioj, ¿nia supuetanaate quena niquiriyatujua Pueyaso sequesano caminiujiuniaa miitaaquiquiaari? Nia supuetanaari puetunu Pueyaso sequesano caminiujiuniaajanaa miiquioquiaari naquiya. ¿Quenaaja niquiriyatu nojorijinijiniote miitiasoo cureequiaari? Maja. Nojoriiri tari pucooquiaari noo pueya, canapuate maninia miijia mijiria niriqüianojiniji pohuatanuuquiaaricujani. Cuno maninia miijia jaara tiuquiquiaari, niaari sesa miijia pueya na niquitocanu nojori mosocoriquiano. ¡Niaari naa mocanu Pueyaso Jiyarosantej! ¡Niaari pueyaracaanu Pueyaso ruuretaquiaa! 53 Naacujitij jiyocuacaanuji Pueyaso seya pohuatasano Pueyaso rootasano niaarani, majaari cuno nia tojiniu quiquiaajuhuj.

Jesu ruuretajaca mosacari Esteban

54 Pueya jaara naa tojtiquiaari Esteban sequesantej, nojoriiri jiyanojua juaaquioree. Na juaaniutia miaquenuuree na quiacaari. 55 Jiyanojua Pueyaso Sohanu cumaquishacari Esteban jiuujia, nojuajaari jiyocuacaanu mauquiaari. Saaja Pueyaso shacantuuca niquiriiri. Jesu niquiriijaariuhua na Que Pueyaso miaquetajara nujuaano. 56 Naa na niquishacaritij, nojori sequeree juucuaari:

—¡Nia niquishurinijaja! Jiyocuacaanu niquiya riatenonijia. ¡Pueyaso Niyanu niquiyaniija na Que miaquetajara nujuaano!

57 Pueyari na numaaca mishiquiojonuuquiaari saaja, maja na tojitiuniuria Esteban sequesano. Jiyanojua sariyocuatiquiaari na juaaniutiaari. Na nuhuaji, Estebancua cocuatequiaariiri. 58 Na caponeetuquiaari Jerusalén tiacajiniiri. Tiacajiniiji tohuatesaaree tamamaari. Na tohuatesaanu nuhuaji, tii na jacutuquiaari saitiaari. Na jacaturiquianoori

na toqueya cojuatequiaari tamonu mashaja. Nojori toqueya cojuana sesa quiquiaari Saulo. ⁵⁹ Nojori jacutusacari saitia Esteban, Estebanri Pueyaso secojoriquiaa naatej:

—Jiyaniijianaa, cua sohuanu quia riri quia shuriucuara.

⁶⁰ Na nuhuaji, mojuquetareeri. Jiyanohua nacaquiaari na nuhuajiriaari:

—Jiyaniijianaa, majaari nio pojori saniitionu naa nojori mi-iniuucua janiyatej!

Naa na sequenu nuhuajitij, cusoqueeri.

8

Saulo miishacari naquiya Jesuucua tiuuniaa

¹⁻² Pueyaso panijiaa pueyari Esteban quete patuquiaari na jamotusocoriquiano. Nojoriiri Esteban sapuequiaari. Cuno juuca, Jerusalén tiacajinia quiniaa Judiocuacaari juhuacatecara miitianu coteequiaari puetunu Jesuucua tiuuniaajanaa. Nocuaji, puetunu nojorijianaari tiji mashiquiaari. Saaja Jesu saquiriojosano doce pueyari tii cureequiaari nojori nuhuaji. Nojoriiri na mashishacari niaquejoquiaari puetunu Judea jiyajiniajanaa, Samaria jiyajinariano. ³ Jiyacari Sauloori socua jiyacateriquiaa miitianu Pueyaso pueya. Nojori pajequiaari puetunu tiacajiniaqueyajanaari Jerusalén tiacajinia. Na riuriasacari, na jayoquiaari tiacojiiri, na nujuatejosocoriquiano nujuatejojuajinia, maajipohua, canuunio.

Jesujiniji pahuatasacari Samaria jiyajinia

⁴ Mashiyocuatuno pueyari puetunu na quiasacojuanaa Jesujiniji pahuatanuquiaari pueya niquiara. ⁵ Nojorijinijinio quiquiaarijuhuaj Felipe. Nojuajaari mashiquiaarijuhuaj tamonu tiacajiniera Samaria jiyajinia. Cuno tiacajinia juhuacatecara pahuataquiaari Jesucristojinijijaarijuhuaj. ⁶ Puetunu pueyajanaari Felipe pahuatasano tojinuucua rerejoquiaari. Pueyari sanaa na tojtiaquiaari. Nojoriiri Felipe shootiaquiaari tacuriitia, na miishacari jiyajeneta casaa Pueyaso cumaacata. ⁷ Samaruhua tohuatanijioriquiaa pueyajinijiiri. Samaruhua tohuareetasacari pueyajiniji, sariyocumaquiaari. Queraatia cumatacuruhuana cuso-suhuari naatanijosaaquiaarijuhuaj, sesacujanucuanio. ⁸ Naaratej, puetunu cuno tiacajinia quiniaa pueyajanaari jiyanohua shuquiriquiaari.

⁹ Shimiacuuri cuno tiacajinia quijiajuhuaj. Na sesa quiquiaari Simón. Cuno tiacajinia quiniaa pueyari na puertujua. Puetunu pueyajanaa sapojojujaari jiyajeneta na mijiosanota. Naa sequeja tama na cuaqueyajaarijia: “Janiya cutaraari tojishano pueyanoni”. ¹⁰ Puetunu pueyajanaari

na tojjia quiquiaari, camarucua, muerasunio. Nojoriiri sequetuquiaari: “Nio pueyanoqui jiyanohua Pueyaso cumaaca jiiitia”.

¹¹ Puereeta Simón miishacari pueyaracaanu, pueyari sapojosaaquiaari. Naaratej, pueyari na sequesanoocua tiuquiaari. ¹² Na nuhuaji, nojori jaara tojjiquiaari Felipe pohuatasacari Pueyaso rupaa, Jesucristojinijiiuhuj, cuno Samaria pueyari Jesuucua tiuquiaari cutara. Canuu, maajipohuajuhuj, nojoriiri tiuquinijosaaquiaari moojina. ¹³ Simónri Jesuucua tiuquiaarijiiuhuj. Tiuquinishaaquiarijiiuhuj. Na tiuquinishaanu nuhuaji Felipeecua sacuaquiariiri. Felipe shootiaquiaari tacuriitiaari Felipe miijosacari jiyajeneta casaa Pueyaso cumaacata.

¹⁴ Jerusalén tiacajinia Jesu saquiriojosano pueya jaara tojjiquiaari taa Samaria pueya tiurii Pueyasoo cuani, nojoriiri cuniquiji jiyarotuuquiaari Pedro, Juannio. ¹⁵ Nojori tiuquishacari Samaria jiyajinia, cuniqui quiniaa Pueyaso pueyacuara secojotureeri nojori jiuujiajinia Pueyaso tiuquitiuria na Sohuanujuhuj. ¹⁶ Majaari Pueyaso Sohuanu tiuquiniu quiquiaari juhuanujuaja nojori jiuujiajinia. Nojoriiri nareja moojina tiuquinijosano quiquiaari Jesuucua nojori tiushacari. ¹⁷ Pedro, Juan, cunora na juaashiquia niojoquiaari pueyacu, nojoriicuara na secojotusacari Pueyaso. Naa nojori miishacari, Pueyaso Sohuanuuri cuno pueya jiuujiajinia tiuquiquiaari cutara.

¹⁸ Simónri niquiriquiaa taa Pueyaso Sohuanu tiuquiquiaari pueya jiuujiajinia Jesu saquiriojosano pueya niasacari na juaashiquia nojoriicuani. Naaratej nojuajaari Jesu saquiriojosano pueya niqutionu paniquiaari cumaneeca juucua, cuno cumaaca na jiiitanurajuhuj. ¹⁹ Simónri na sequequiaari nojori:

—Cua niqutionureja cuno cumaaca. Janiyacu Pueyaso Sohuanu panijacaacua niare cua juaashiquianijia, Pueyaso Sohuanu nojori masenurajuhuj, taa nia miyacuaani.

²⁰ Pedroori na sequequiaari saaja:

—¡Quia cumaneeca cuara shaajeera quiatajuhuj! Quiaa naasucuaari jiyaniya Pueyaso Sohuanu cumaneecata masesano. Quia niishiri, Pueyasoori na Sohuanu niqutioquiaa nareja na tojjitajaca pueya. ²¹ ¡Pueyaso Sohuanu cumaacaari maja quiarano! Quioojaari jiyanohua sesa quiya Pueyaso niqiuara, nocuaji maja na cumaaca niqutiosaanu quiniutianiya quiajaniya. ²² Jiyanohua sesa quia niishiriojosanojiniji quia pishiriohua. Pueyaso quia secojore na jiyanooniuria quiajaniya naa quia niishiriojosanojiniji quioojiajiniatej. ²³ Niishiyacuajaniija,

quiaari juhua cartesoo quiyajaa, sesa miiniuucua jiiitino quia quishacarijia. Quioojaari puera najiquitishano quiyajaa jiyanyashijia quia quiniuucujuhua.

²⁴ Simónri na riucuaquiaari:

—¡Pueyaso nia secojorequi cucuara, mariqui cua sanitioreeri taa nia sequeyacuajani!

²⁵ Na nuhuaji, Pedroori Juanta socua pahuataquiaari Jiyaniijia Pueyaso rupaa cuno pueya niquiara. Pueya niquiara pahuatatureeri socua Samaria jiya tiacajinia, cuniqui quiniaa tiuuniuria Jesuucujuhua. Maninia ru-paari Pueyasojiniji pahuatasaaquiaari queraatia tiacajinia, Samaria jiyajinia. Na nuhuaji, Pedroori tacatequiaariuhua Juanta Jerusalén tiacajinihua.

Jesujiniji Felipe pahuatasacari Etíope pueyano

²⁶ Cuno nuhuaji, Pueyaso seruuri Felipeecua rosequiaari. Na sequeseeri:

—Quia sanere Filipenaa. Pananu shuucujiria nucuama quia quiaare. Quiocua tiuquishii tamonu nuujinia, Jerusalén tiacajiniji neteja Gaza tiacajiniara. Cuno nuuri cariquia jiyacuma neteya.

²⁷ Felipe tojishacari naatej, nojuajaari ritia sanequiaari. Nucuama quiaquiaariiri. Nuujinia naacuneetooquiaari saaja Etiopía jiyajinijinio pueyanotaari. Cuno pueyanoori riyacajajaaju quiquiaari Etiopía jiya jiyaniijia naacutana na quiniuucua, maaji na jiyaniijia quiniuucua. Na jiyaniijia sesa quiquiaari Candace. Cuno maajiiri cuno pueyano jiyatequiaari Etiopía jiya casami jiiitianara, na cumaneeca cojuariquiano nera. Nio Etíope pueyanoori Jerusalén tiacajinia quiaquiaari Pueyaso secojonuucua. Cuniqiji tacateyanoori Filipeta naacuneetooquiaari nuujinia.

²⁸ Nucuacoji na tacatesacariuhua na jiyajinihuara, caballoori na jaatiariquiohua, rucuanejotajarujinia cajiyano. Pueyaso rupaa serojoriquiohuari, tariucuaaanu Pueyaso sequesano caminiujiunia Isaías naajioneejiniji. ²⁹ Pueyaso Sohuanuuri jiyacari Felipe sequequiaari:

—¡Ritia nocua quia catecanore! Quiocua nata quiaare.

³⁰ Jaara nocua catecanoquiaari, Felipeeri Etíope pueyano tojiquiaari Isaías naajiosano serojiyano cojuata. Felipeeri na nequesotaquiaari:

—¿Quiaate quia serojosano niishiya casaa na sequeyani?

³¹ Etíope pueyanoori na riucuaquiaari:

—¿Janiyatucua taa niishirinio, tamonu jaara cua serojosano niishitioyaquiri janiyani?

Felipe sequereeri:

—Miji quia tacama. Cua shuriucua quia cajishii.

³² Etíope pueyanoori nio serojoriquiaa tariucuacaanu Pueyaso Rupaajinia:

“Juhua borrego jaatucusaaquiaariiri mosocoriquiano. Naatej, taa borregocuaani sanaa niquiyari na cajaca miatejosacari, nojuajaari naa quiquiaarijuhuaj. Majaari na sariyocuanu quiquiaari quenaaja naquiya na miishacari. ³³ Naquiya miishaaquiaari cararaatiaari. Nocua namiyaquishaaquiaariiri. Mashaja na quishacarijia, nojuajaari shaajasaaquiaari nio jiyajiniji. Cunora, majaari na muetunu quiquiaari. NiQUIOHUAJUURI MOSAAQUIAARI”.

Etíope pueyanoori nio serojoriquiaa Pueyaso rupaajiniji.

³⁴ Na nuhuaji, Etíope pueyanoori Felipe nequesotaree:

—Cua sequere pueyanonaa, ¿canajiniji Isaías pohuataa niya na naajiosanojiniani? ¿Tama nojuajiniji pohuataatee? ¿Tamonujiniji soj?

³⁵ Felipeeri Etíope pueyano niishitiojonu coteequiaari Jesujiniji shusha na serojosano Isaías naajiosanojiniji. Felipeeri naa na sequeree:

—Isaías naajiosacari nio, nojuajaari juhuacarijia Jesujiniji pohuataquiaari, taa quiarijia Jesu miishaacanu taraatiacua-jani.

Felipeeri socua na pohuataquiaari Jesu miishanojiniji. ³⁶ Nojori quiasacari nuacuaco, caminiaco shuriuquioco taji-tariquiaari. Etíope pueyano jaara caminiaco niquiquiaari, Felipe sequereeri:

—¿Majate maninia cua tiuquinishaanura niya?

³⁷ Felipeeri na sequeree:

—Quiaa jaara seetanujuanaa tiuuri Jesuucua, quia naata tiuquinishaanu.

Cuno pueyanoori na riucuaree:

—Jaa, janiya Jesucristoocua tiuyani. Nojuacuajaari Pueyaso Niyanu. Na niishiyanijia.

³⁸ Etíope pueyanoori jiyamitia na seru sequeree:

—Quia nujuaretare rucuanejotaja.

Felipeta rosetamaa caminiacojiniaari. Felipeeri tii na tiuquiniquiaari Jesuucua na tiuushacari. ³⁹ Nojori tacatasacariuhua caminiacojiniji, Pueyaso Sohuanuuri Felipe riquiaari canashiyaquiji cuno Etíope pueyano shuriucuaji. Nojuajaari juucua tacareecuaquiaari na tiuquininiaacua. Majaari socua na niqiniu quiquiaari Felipe. Tariucua tiuquinishanoori shuquiriaatia quiaquiaariuhua na jiyajiniohua. ⁴⁰ Pueyaso Sohuanuuri Felipe jataquiaari Azoto tiacajinia. Nojuajaari cuniquiji

puetunu tiacajinia poojotaquiaariuhujanaa Pueyaso rupaa Jesujiniji. Naa tiuquishuhua Cesareya tiacajiniaari.

9

Saulo jatasacari Jesu tojiniaara na quiniuria

¹ Sauloori jiyacari pueyaracaanu Jesuucua tiuuniaa mi-ananajoriquiase. Nojori puecoonu paniquiaari puētunujua-naari. Naaratej, Sauloori pueyacuara secojonaa jiyaniijiaacua quiaquiaari. ² Naa na sequeseeri:

—Damasco tiacajinia quianu paniyanijia. Quiria quia naajiore cuniqui secojojua tiaca camarucuaacuara Damasco tiacajiniani, cuno naajioneeta cua tiuquijionura nojori rerejojuaacajinia. Jesu tojiniaa pueya morojonu paniya cuniquijinijia. Janiyari cua quioosano jaatucunutaniya niyara Jerusalén tiajinianani, canuu, maajipohuanio.

³ Naacuajitij, nucuaco Saulo quiasacari, tari quenaacoturiquiaa Damasco tiacajiniaraari. Jiyacaritij, jshacantuucaari canashiyaquiji nunuquiaari jiyocuacaanuji! ⁴ Sauloori juhua jatasaaquiaari na cari. Na pojosaquiji tojiquiaari rupaa na sequeyanoori:

—¡Saulonaa, Saulonaa, cua tojiri! ¿Casaara quia miitiaa puera janiyani?

⁵ Sauloori na riucuaaree:

—¿Cantequia Jiyaniijianaa?

Jiyocuacaanuji nocua pocuaanoori na riucuaquiaari:

—Janiya Jesuni. Quiaari puera cua miitiaajanaajataj, cu-cua tiuuniaa quia miitiasacari puera. Naa quia miishacari puera quia juaaniutiatej, quiaari tama quia cuaqueya sesoyajaacujua. Quiaari juhua juaajia pueyano. Quiaari quia juaaniutia juhua jiohuaca patiyashijiya.

⁶ Sauloori na puerenuta na tetecasacari na sequequiaari:

—Jiyaniijianaa, ¿casaa quia paniya cua miiniuriani?

Jiyaniijiaari na sequeree:

—Quia sanere. Naajaa quia tiuquishii Damasco tiacajinia. Quiaari tii sequesaanutaniya cua panishano quia miiniuria.

⁷ Saulota quiojonaari shiriiquitiuquiaari nojori jaara tojitiuquiaari jiyocuacaanuji pocuanu. Nojoriiri juucua na niquiniu paniquiaari. Saaja shaaquiiri quiriquiaa. ⁸ Na nuhuaji, Sauloori na pojosaquiji sanerohua juucua. Majaari na naata niquiniu quiquiaari saaja. Nata quiniaari na jaatucutaquiaari Damasco tiacajiniara. ⁹ Nojuajaari tii camueenujuquiaari jiuujianaraca juuca, cariyujuaru na quishacari. Majaari na miaquenu quiquiaari pueyaracaanu cariyujuaru na quishacari. Ratuyaquiquiaarijiaariuhuj.

¹⁰ Tamonu Jesuucua tiuunia pueyanoori Damasco tiacajinia quijia. Na sesa quiquiaari Ananías. Jiyaniijia Jesuuri na sequequiaari juhua na maquenujina:

—¡Ananíasnaa!

Nojuajaari na riucuaquiaari:

—¿Casaate cua Jiyaniijianaa?

¹¹ Jiyaniijiaari na sequeree:

—Quiarijia quia quiaare Saulo pajenuucua. Nojuajaari noo Saulo, Tarso tiacajinijinio pueyanotej. Nojuajaari Judas tiajina quiya. Judas tiaari jati tamonu nuujinia quiya. Cuno nuu sesa, Nu Maniniu. Sauloori cuno tiajina sec-ojia Pueyaso. ¹² Nojuajaari juhua na maquenujina tari niquirii quiajaniya nocua tiuquiyano. Tari quia sesa ni-ishiyajaariuhuj. Sauloori tari quia niquirii na maquenujina. Quiaari quia juaashiquia niariquiaa nocua, na namijia jeequenuhuara, maninia na niquinihuara.

¹³ Ananías jaara naa tojiquiaari Jiyaniijia sequeyanotej, nojuajaari sequeree:

—¡Cua Jiyaniijianaa, queraatia pueyari cuno pueyanojiniji cua pohuatacanuni! ¡Quiocua tiuuniaa pueya miitiaquiaa taraatia Jerusalén tiacajiniaari! ¹⁴ Pueyacuara secojonaa jiyaniijia jiyarosanonaari cunohuj, quiarijia niya tiuquiriini. ¡Nojuajanaari quia secojonaa pueya quioonutaniya, mo-rojonucuaca canaa na jiyatasocoriquiano Jerusalén tiacajiniara!

¹⁵ Jiyaniijiaari Ananías sequequiaari saaja:

—Naajaa, quia quiaare. Janiyacuajaari cuno pueyano saquiriojoquiaari tarijia cua jiyaramiquishocoriquianoni. Nojuajaari tamasaca jiyacajinia poojotanutaniya janiyajiniji taucuaca niquiara. Taucuaca jiyaniijianucua poojotanutaniya janiyajinijiaariuhuj, Israel pueyano. ¹⁶ Janiyacuajaari Saulo niishitiojonutaniyani taa jiyano-hua naquiya pueya miitianutaniya nojuajani, janiyajiniji na pohuatasacari.

¹⁷ Naaratej, Ananíasri quiaquiaari. Judas tiajina tiuquishi-iri, tee Saulo quiriquiaacuajani. Na tiuquishacari, Sauloocua niasee na juaashiquiaari. Na sequereeri:

—Cua tarajanunaa, pa Jiyaniijia Jesu, quiocua muetaru-cuaa nio tiaca nucuamaji niyara quia nishacarini, nojuajaari quiocua cua jiyaroreeni. Cua jiyaroreeni quia namijia jeequenuhuara maninia, Pueyaso Sohuanu tiuquiniuria quioo-jiajinajuhuj.

¹⁸ Jiyacari ritia totequiaariiri juhua sapitiaaja cocua Saulo namijiajiniji. Maninia niquiquiaariuhua na nuhajiiri. Na

nuhuaji, Sauloori ritia tiuquinishaaquiaari moojinia Jesuucua na tiuushacari. ¹⁹ Na nuhuaji, miaquereeri, raturohua-jaariuhuj. Noojia jatarohuari. Pasaja camueenujuquiaari Damasco tiacajiniaari Jesuucua tiuunaa pueyata.

Jesujiniji Saulo pohuatasacari Damasco tiacajinia

²⁰ Sauloori juhuacatecara coteequiaari Jesujiniji pohuatanu narta Judiocuaca secojojuaca tiajinia Damasco tiacajinia. Nojuajaari pueya niqiara na pohuatasacari sequeja:

—¡Jesuuri seetanujanaa Pueyaso Niyanu!

²¹ Naa nojori tojishacari Saulo pocuaanotej, pueyari shiri-iqiquiaari. Na shiri-iqitiuniutia sequetureeri:

—Nio pueyano pocuaani, ¿majate nootej, naquiya miiquiaa Jesuucua tiuunaa pueya Jerusalén tiacajiniatej? Niyara niyareejaariuhuj, Jesuucua tiuunaa pueya na morojonura. Nojuajaari nojori jiyatanu paniriquiaa juucua Jerusalén tiacajinia secojonaa jiyaniijianucua na niqitiojosocoriquiano, nojori nujuatejosaanura.

²² Sauloori socua noojia cumaquiquiaari Pueyaso Sohuanuta, jiyanohua maninia na pohuatanura puetunu juucajanaa. Nocuaji pataquiaari saaja Damasco tiacajinia quiniaa narta Judiocuacaari. Sauloori maninia pohuataquiaari tariucuacaanu Pueyaso Rupaajiniji, seetanujanaa maatia pueya niishiniuria Jesuuri Pueyaso Jiyarosano pocuaji tacuriquiano.

Saulo mashishacari narta Judiocuacaacuaji

²³ Quiniqui Saulo camueenujusacarijia pueyaracaanu, narta Judiocuacaari nocuara rojotooquiaari na motunura juucua. ²⁴ Tamonuuri Saulocua jiyanooquiaari. Naa na sequequiaariiri:

—¡Quiaa monu panishiya sacaj!

Judiocuacaari na shiriquiaa tiaca tohuateyaji, na monu paniniutia juucua Saulo. Na shanacuturiquiaari juuca, niucuanio. ²⁵ Damasco tiacaari puereetuca sohuacaraca quiquiaari puetunu na shocuajanaa. Jesuucua tiuunaa pueyari saaja Saulo mashi-quiquiaari niucua. Sohuacajiniji roshinitiasaquiaari jiyocuacaanuji puereetuca canaasatujiniaari. Sauloori naa mashi-quiaaritij.

Saulo quishacariuhua Jerusalén tiacajinia

²⁶ Na tiuquishacariuhua Jerusalén tiacajinia, Sauloori Jesuucua tiuunaa pueya rupuenu paniquiaari juucua. Nojoriiri saaja na puerequiaari. Na puerenuta sequetuquiaariiri:

—Pueyasocua tiuujiaquinio naasucua jiyanotej.

²⁷ Bernabé cutaraari maja na puereenu quiquiaari Saulo. Nojuajaari Jesu saquiriojosano pueyacua na jiyataquiaari,

Saulo niishiniuria puetunu nojorijanaa. Bernabeeri Jesu jiyaramiquishano pueya sequequiaari:

—Sauloori pa Jiyaniijia niquiquianu Damasco tiacaacua neteja nucumaji. Jiyaniijiaari nata pocoojocanu. Sauloori cunora juhuajaniya pohuatariquiaa Jesujiniji Damasco tiacajinia.

²⁸ Sauloori narta Jesuucua tiuunaa pueyata jyojequiaari cuniquijia Jerusalén tiacajinia. Nojoritia rucanejojuaari, mariyata Jesujiniji pohuataja juhuajaniyari. ²⁹ Saulo pocuasacari, nojuajaari setanujuanaa cumaacata pocuaquiaari Jiyaniijia Jesuucua na tiushacari. Griego rupaa pocuanaa Judiocuacata pocoojoquiaariiri. Noojiaqueyari Saulota juayonuutaquiaari saaja. Nojoriiri socua na motunu paniquiaari. ³⁰ Jesuucua tiuunaa pueya jaara niishiquiaari naatej, nojoriiri Saulo jiyataquiaari Cesareya tiacajinia. Cuniquiji jiyarosaquiaari na raja Tarso tiacajiniaari.

³¹ Na nuhuaji, puetunu Judea jiyajinia Jesuucua tiuunaa pueyajanaari panaatia quiquiaari quenaaja, Samaria jiyajinia, Galilea jiyajinianio. Tamasacaari maja tari naquiya na miishaanu quijia. Nojoriiri socua Jiyaniijia tojitiajacara quiquiaari nojori pueretusacari nojori mariqui na tojiyashijiara quiriohuari. Pueyaso Sohuanu naacusacari nojori, Pueyaso pueyari socua canequiaari queraatiara.

Pedro naatanishacari Eneas

³² Pedroori pueyaracaanu rucanejojua Jesuucua tiuunaa pueyacua, nojori na niishitiojonura socua Jesujiniji. Tamonu juuca nojuajaari Pueyaso pueya niquiniucua quiaquiaari Lida tiacajiniajuhuj. ³³ Tii quiriquiaari tamonu pueyano. Na sesa quiquiaari Eneas. Cuno pueyanoori cumatacuruhuaana cusosu quijia. Tari na shocojoquiaari ocho marijia pootia na matasacari na matujinia. ³⁴ Pedroori cuno cusosu sequequiaari:

—Eneasnaa, ¡Jesucristo tari quia naatanirii! ¡Quia sanere! Quia matu quia jeecare.

Eneasri ritia sanequiaari. ³⁵ Puetunu pueyajanaa Lida tiacajinia quiniaa, mariyata Sarón tiacajininijinio pueyajuhuj, puetunu nojorijianaari nio miishano niquiquiaari. Nojoriiri cunora tama na supuetanaa niishitiushano casaajaaja cartequiaari. Puetunu nojorijianaari Jesuucua tiuuquiaari.

Dorcas samiitianishaanujiniji pohuatasano

³⁶ Jiyacarijiuhuj, Jope tiacajinia quiquiaari tamonu maaji. Na sesa quiquiaari Tabita. Tabitaari griego rupaajinia sequesano “Dorcas”. Dorcasri saniniuujia pueyano rupaajinia

sequeshiyacujua “nequeru”. Cuno maajiiri Jesuucua tiuujia quiquiaari. Nojuajaari maninia miiija maaji quiquiaari. Casamiiuniucua pueya niquitiojojua nareja na jiiiasanojiniiri. ³⁷ Na nuhuaji, Pedro quishacari Lida tiacajinia, Dorcasri cusoquiaari. Na csonu nuhuaji, pueyari macu cuaqueya jeequequiaari. Na jeequetunu nuhuaji, nojoriiri na niaquiaari cuno tiajinia nataco, tamonu sohuacajinia. ³⁸ Jope tiacaari cateca quiya Lida tiacajiniji. Pedroori Lida tiacajinia quiriquiaajaa Dorcas shaajesacari. Jesuucua tiuuniaa pueyari tari niishiriquiaa tee Pedro quiyani. Naaratej, caapiqui pueyano jiyarotureeri Pedro na numootenura. Nojoriiri na jiyarosano caapiqui pueyano sequequiaari:

—Niocua naa Pedro sequesee: “Quia quiaarena ritia Jope tiacajinia. Majaari tarishiniu”.

³⁹ Pedroori nojoritia tacatequiaariuhua Jope tiacajiniohua. Na tiuquishacari, quiniqui quiniaari Pedro tiuquiniquiaari macuucua sohuacamara. Mashiquiopueeri Pedro shocua rerejoquiaari na nujuquetunuta. Nojoriiri Pedro niquitijioquiaari Dorcas cusupuenuusano toqueya, cacojoquiyanio. Cunoori quiquiaari na cusupuenuusano saminio na quishacariija. ⁴⁰ Pedroori jiyacari puetunujuanaa pueya tohuatanijioquiaari sohuacamaji. Na nuhuaji, nojuajaari mojuquetaquiaari Pueyaso na secojonura. Na secojonu nuhuaji, macuucua tacatereeri. Na sequereeri:

—¡Dorcasnaa, quia sanere!

Macuuri juhua na maquenujiniji niucuaquiaari. Na niquishacari Pedro, cajiriiri. ⁴¹ Pedroori na juaashiquiajiniji na quiaquiaari. Na nujuatereeri. Na nuhuaji sequequiaari Jesuucua tiuuniaa pueyari, mashiquiopuenio:

—Miji pueyanaa, jnia nimia!

Nojori tiuquitasacari, saaja maaji niquitiushii nujaanoori, tariucua saminio. ⁴² Pedro miishanoori puetunu Jope tiacajiniajanaa niishishaquiaari. Queraatia pueyari cunora Jesuucua tiuquiaari. ⁴³ Pedroori na nuhuaji janiya camueenujuquiaariijaara Jope tiacajinia. Nojuajaari Simón tiajinia quiriquiaa cuniqui na camueenujusacari. Nio Simónri piiquia casaata shoqueya majeetejojua quiquiaari, casaara shipinishocoriquiano shoquejiniji.

10

Pedro quiasacari Cornelio niquiniuucua

¹ Cesareya tiacajinia quiquiaariiri tamonu tahue, Romano soldadohua jiyaniijia. Na sesa quiquiaari Cornelio. Na soldadohuari cien quiquiaari. Cuno soldadohua maanuuri sesojosaaquiaari “Italiano”. ² Cornelioori Pueyaso secojojua

pueyano quiquiaari, mariyata puetunu na tiajinia quiniaata-janaanio. Nojuajaari seetanujuanaa Pueyaso shuquiritiniu panijia quiquiaari. Cornelioori queraatia na cumaneecajiniji niqutiojojua quiquiaari nareyajuhuj, casamijiuucua Judiocuaca niqutiojosocoriquiano. Pueyaso secojojua pueyaracaanuuri. ³ Tamonu juuca, tariucua pananu piri-uushacari, Cornelioori Pueyaso seru niqiquiaari juhua na maquenujinia nocua niyano na tiajinia. Na sequeseeri:

—Cornelionaa.

⁴ Cornelioori saaja Pueyaso seru shootiaquiaari na shiri-iquiniutia. Na nuhuaji na riucuaereeri:

—¿Casaate jiyaniijianaa?

Pueyaso seruuri na sequeree:

—Pueyasoori quia secojosano tojiquiaa. Quia timitiaari capora quia quiniuucua, quia jiitiasanojiniji quia niqutiojosacari nareja casamijiuucua pueyara. ⁵ Naaratej, quia seya quia jiyaramiquiri Jope tiacajinia. Nojori cuaara Simón masuunuucua quiaara. Na sesaari Pedrojuhuj. ⁶ Nojuajaari na sesaanucua pueyano tiajinia quia. Tia camaruuri shoque majeetejojua piiquiajinia. Cunoori na poonijiosano. Na tiaari shoniniacu caminia casaqueyaji naniya. Simón Pedroori quia sequenutaniya casaa quia miiniutianiyani Pueyaso jiyanooniuria quiajaniya.

⁷ Pueyaso seru jaara quiaquiaariuhua, Cornelioori caapiqui na seyajinijinio piiquiaari, niquiriyatu na soldadonio. Cuno soldadoori Pueyaso secojona quiquiaarijuhuaj. Maninia na jiyaniijia naacujua quiquiaariijaariuhuj. ⁸ Cornelio jiyarosaacarijia na seya, nojori pohuataree coteenuuri puetunu Pueyaso seru sequesanojuanaa nojuaja. Na nuhuaji, nojori jiyaramiquirii Jope tiacajiniaari.

⁹ Tariqui, Cornelio seya quiasacari nucuaco, nojori quenaacotusacari tari Jope tiacajiniara, Pedroori jiyacari tacaquiaari tia cacojiria, Pueyaso na secojonura. Pananu quishacari pa nacasuhuojuajinia quiquiaari jiyacari. ¹⁰ Nojuajaari jiyacari miaajeriquiaa. Neraari juucua sumatusaariquiaacuaja. Nera sumatusacarijia, Pueyasoori casaa na niqutiquiaari juhua na maquenujinia, na quishacari tia cacojiria. ¹¹ Pedro niquishacari jiyocuacaanu, saaja jiya cajiniocua niquirii riatelyanoori. Sonaque queraque niquirii tiji roshinitiashiyanoori, na nacatucujiniji morojotasano. Pedroocua roshinitiasaareejanaari. ¹² Sonaque jiniacuma quiriquiaari puetunu casaajanaa: sacocua, jiyacua rucoojuacanio, jiyocuacaanu jaacuatujuacajuhuj. Cuno casamiiri quiquiaari Judiocuaca pueresano casaa

puetunujuanaa. Maja nojori miaquesano. ¹³ Jiyacaritij, Pedroori rupaa tojirii jiyocuacaanuji na sequeyano. Naa sequeriquiaari:

—¡Pedronaa, nocua quia sanere! Quia puecoore quia mi-aquesocoriquiano.

¹⁴ Pedroori na riucuaree:

—¡Maja cua Jiyaniijianaa! ¿Janiyatucua taa miaquere sacuaraatia cua miaquesooni? ¡Cunocuaajaari tarijia quia sequesano canaa pueresocoriquiano!

¹⁵ Jiyocuacaanuji rupaari socua na sequerohua:

—Pedronaa, majaari miaquesocoriquiano Pueyaso jiyatesano soonu.

¹⁶ Pueyasoori naa pacutejoquiaari sequenu Pedrotej. Na nuhuaji, sonaqueeri tacanitiasaaquiaariuhua jiyocuacaanu. ¹⁷ Pedro tacaashacari naa na niquiniucua juhua na maquenujinatej, jiyacari Cornelio jiyaramiquishano pueyari tia tohuateyaji tiuquiiioquiaari, Simón tia na pajetunura. Cornelio pueyari nequesoreetariquiaa nucuacoji nojori tiuquiniuria Simón tiajinia. ¹⁸ Nojoriiri tohuateyaji nacaquiaari:

—¿Niya quiyate Simón jiyanishano pueyano? Na sesaari Pedrojuhuj.

¹⁹ Pedroori juhuanajuaja niishiriojoriquiaa na niquishanojiniji juhua na maquenujinia tia cacojiria. Pueyaso Sohuanuuri jiyacari na sequeree:

—Pedronaa, jiuujanaraca pueya quia pajeya. ²⁰ Tariucujaja. Quia sanerohua. Nojoriicua quia roseyarohua. Quiocua nojoritia quiaarohuajuhuj. Majaari taacanuunu. Janiyacuajaari nojori jiyaramiquiriucuaa quiocuani.

²¹ Pedroori Cornelio jiyarosano pueyacua rosequiaari. Nojori sequeseeri:

—Janiyacuaja nia pajesano pueyanoni. ¿Casaacua nia niya-reecuarani?

²² Nojoriiri na riucuaree:

—Canaa jiyaniijiaari Romano soldadohua jiyaniijia. Na sesa Cornelio. Nojuajaari canaa jiyarorucuaa quiocuani. Maninia miiijia pueyanoori. Jiyaniijia Pueyaso tojjijajaariuhuj. Puetunu Judiocuacajanaari maninia na miiniucua na panitiuya. Pueyaso seruuri na sequerucuaa, nojuaja masuunura quiajaniya na tiajinia quia quianura, na tojiniuria puetunu quia sequesanojuanaa.

²³ Pedroori Cornelio pueya tiuquinitiaquiaari na quijia tiajinia. Nojori sequereeri:

—Niyaja nia maqueseajaara. Pocua tariqui quiaariquiani. Jaara juhuaquequiaari, Pedroori nojoritia quiaquiaari. Nata quiojoquiaariijaariuhua Jope tiacajinijinio Jesuucua tiunnaa pueya.

²⁴ Tama tariqui saniniuujia, nojoriiri Cesareya tiacajinia tiuquijioquiaari. Cornelioori na tiajinia sashiriquiaa Pedro, puetunu na tiajinia quijiacatajanaa, queraatia na rupuenatanio. Cornelioori puetunu nio pueyajanaa masuuquiaari, nojori rerejonura juhuacarijia na tiajinia Pedro tiuquiyaquishacarijia. ²⁵ Pedro tiuquishacari, Cornelioori nocua tohuataquiaari. Carijiniacuma na naacuseeri. Pedroocuara mojuquetaquiaariiri juhua Pueyasooacara. ²⁶ Pedroori saaja na sanaquiaari. Na sequereeri:

—¡Quia nujuare! Janiyari cayajuhuj, juhua quiajaniya.

²⁷ Tiaco na tiuquitasacari, pocojoriquiaa Pedrotaari. Pedro tiuquishacari, saaja queraatia pueya niquishiiri. ²⁸ Pedroori nojori sequeree:

—Taucuacanaa, niaacuajaari niishiya canaari Judiocua-cani. Judiocuaaari rootasaaquiaari maja canaa rupuenura taucua, maja quenaaja tahue tiajinia canaa tiuquiniurijuhuj. Saniniuujia, Pueyasoori quiarijia cua niishitiorucuaa cutara maja cua soonura tamasaca. Taucuaaari maja sacuaraatia quiarijia quiria. ²⁹ Naaratej, cua niishishacari niaari cua masuurucuaa niyara, janiyari ritia canujiyarucuaani cua taacanuyaquiniutia. Cua totureja, ¿casaara nia masuurucuaa janiyari?

³⁰ Cornelioori na riucuaare:

—Cuatro juucaari tari shoconujiya. Janiyari jiyacari Pueyaso secojoriquiaa juucua cua tiajiniani, pananu mueecosacari. Jiyacaritij, pueyanoori cucua muetarucuaa. Jiyacaricuajaari quiriqúiaa, tee pananu tiuyanijia. Cuno pueyano toqueeri shacantuque quiriqúiaa. ³¹ Cua sequereeri: “Cornelionaa, Pueyasoori quia secojosano tojirii. Naajuhuj, niishiyari taa quia niquitiojoquiaa quia casami casamijiuniucuaani. ³² Naaratej, quia seya quia jiyaramiquiri Jope tiacajinia, cuara Simón masuunuucua quiatuura. Na sesaari Pedrojuhuj. Nojuajaari na sesaanucua tiajinia quia, shoniniacu caminia casaqueyaji. Tia camaruuri piiquiajinia shoqueya majeetejonu poonijiojua. Simón Pedro jaara nimia quia tiajinia, quiata pocojonutaniyari”. Pueyaso seruuri naa cua sequerucuaaqui Simónnaa. ³³ Janiyari jiyamitia ritia jiyarorucuaa cua seya Jope tiacajiniani, nojori pajenura tii quiajaniya. Quiaacuajaari maninia miirii cucua quia nishacari. Quiarijiani, puetunu pajaniyajanaari niya Pueyaso niqiiara quiyani. Naa quia pohuatate canaa tojishocoriquiano quiarijia, taa Pueyaso niishitiorucuaa quiajaniya canaa quia pohuatanuracuajani.

Pedro pohuatasacari Cornelio tiajinia

³⁴ Pedroori juhuacatecara pohuatanu coteequiaari. Sequereeri:

—Quiarijia niishiya seetanujuanaa cutaranijia, Pueyasoori maja rimiajata na niquiniu pajaniya. Majaari nia jiyaniniu Pueyasoori saaja Judiocuacaacia jiaatiaa, Israel pueya nojori quiniuucua. Maja. Nojuajaari tamasaacia jiaatiaajuhuj. ³⁵ Tiquiyocua jiyacajinia Pueyaso secojojua pueya quishacari, nojoriiri Pueyaso jiyanooshano pueya quiyajuhuj, maninia miiijia nojori quishacari. ³⁶ Pueyasoori na rupaa pohuataniquiaari puetunu canaa Israel pueyara-janaa, jiyanooshano canaa quiniuria Jesucristoocua canaa tiushacari. Nio Jesucristoori puetunu mijiria quiniaa Camarnujuanaa. ³⁷ Tiuquinijiona Juanri Pueyaso rupaa pohuataquiaari pueya tiuquinijosaanura. Na nuhuaji, Jesuuri cutara miishano miiniu coteequiaari Pueyaso cumaacata. Niaari tari niishiyacuaja na miishano canaa Galilea jiyajinia, na nuhuaji na miishano puetunu Judea jiyajinia-janaanio. ³⁸ Niaari niishiyajuhuj, Pueyasoori na Sohuanu niquitioquiaari Jesu, na cumaaca na jitianura. Nojuajaari maninia miiquiaari pueya, tiquiyocua na rucuanesacari. Cusosuhua naatanijiojuaari. Samaruhua camarnu sesosano jeecaquiaarijiaariuhuj. Puetunu naa miiijia maniajanaari na Que Pueyaso quiniuucua nata. ³⁹ Canaari puetunu na miishanojuanaa niquiquiaarini, puetunu canaa Judiocuaja jiyajiniajanaa, Jerusalén tiacajiniajuhuj. Janiyari seetanujuanaa canaa niquishano pohuataani. Na nuhuaji, pueyari na teetequiaari niyacutesanojinia. Tii na cusojuatuquiaariiri. ⁴⁰ Jiuujianaraca juucajinia, Pueyasoori na samiitianiquiaariuhua. Jiyacaritij, na saquiriojosano pueyacia na mueratereeri. ⁴¹ Majaari na muetanu quiquiaari puetunu pueyacuajanaa. Saaja canaacua muetaquiaariiri, teyano Pueyaso saquiriojoquiaari coteenu tariucua-caanucujani, Jesujiniji pohuatanuuriquiano. Na samiitiasacariuhua, canaari nata miaquenuquiaari mariyatani. Canaari nata raruquiaarijiuhuj. ⁴² Jesu jaara canaa jiyaramiquiquiaari, nojuajaari canaa sequequiaari: “Naa nia pohuatare pueya niquiara: ‘Pueyasoori Jesu jiyatequiaari puetunu mijiria quiniaa nequesoreenarajanaa, macunucua nequesoreeriquianojuhuj’ ”. ⁴³ Tariucuaaanu pueyara Pueyaso sequesano caminiujiuniaari naa juhuacarijia sequequiaari Jesujinijiuhuj: “Cante nocua tiuyani, nojuajaari jiyanooshaanutaniya sesa na miishanojiniji”.

Pueyaso Sohuanu tiuquishacari taucuaca jiuujiajiniajuhuj

⁴⁴ Pedro pohuatasacarijia taucuaca niquiara, Pueyaso Sohuanuuri Pedro tojitianaa taucuacaacua niquiari, nojori jiuujiajinia na tiuquiniuria. ⁴⁵ Pueyasooqua tiuuniaa Judiocuacani, Pedrota nijioquiaari Jope tiacajinijini, nojoriiri shiriiquiquiaari Pueyaso niqitiosacari cuno taucuaca na Sohuanu. ⁴⁶ Cuno taucuacaari nojori niquiara pocooriquiaa tamaatia rupaacajinia. Pueyaso maniniuhuaqueetaturiquiaari. ⁴⁷ Naaratej, Pedroori sequequiaari:

—Nio pueyari tari jiitiaa Pueyaso Sohuanu noojiajinia, taa pa jiitiaacuaani. Naaratej, nojori cuaara tiuquinijosaaaria quiarijia. ¿Cantucua nojori tenujure maja na tiuquinijosaanurani?

⁴⁸ Pedroori na nuhuaji sequequiaari cuno taucuaca tiuquinijosaanura Jesucristo sesajinia, nojori tiuushacari nocua. Na nuhuaji, Cornelioori Pedro sequequiaari:

—Niyaja quia camueenujurejaara canaata. Maja senota quianuhua.

11

Taucuacajiniji Pedro pohuatasacari Jerusalén tiacajinia

¹ Jesu jiyaramiquishano pueya, mariyata puetunu Jesuucua tiuuniaa pueyajanaa Judea jiyajinia, nojoriiri naa pohuatasaaquiaariti: “Taucuacanaari Pueyaso rupaacua tiuuriucuaajuhuj”. ² Nocuaji, Pedro jaara tacatequiaariuhua Jerusalén tiacajiniohua, narta Pueyaso pueyari na juaaquiaariuhua. Na juaaniaari taucuaca cararaatiuuquia co miatejonu panijiaca quiquiaari, taucuaca quiniuria seetanujuanaa Pueyaso pueya nojoriria. ³ Nojoriiri naa juaaquiaari Pedro:

—¿Casaara quia quiaarucuaa cuno taucuacaacuani? Nojoriiri maja Judiocuaca juhua pajaniya. ¡Quiaanaari nojoritia miaquejocanujuhuj! Quia miishanoori maja maninia taa Pueyaso rootaquiaari tariucuaaanucujani.

⁴ Pedroori suraatiaja nojori pohuataquiaari puetunujuaanaa tahuajiniji. Coteenu pohuataree na niquishano juhua na maquenujiniaari. Naa sequeereeri:

⁵ —Jope tiacajinia cua quishacari, janiyari panacari secoriquiaani. Janiyari jiyacari juhua cua maquenujinia sonaque na nacatucujiniji morojotasano niquiriini. Jiyareta cucujanaa roshinitiasaareeri. ⁶ Cua niquishacari sonaquejina cua niishiniuria casaate mii quiriquiaani, janiyari

saa puereeta casami niquiriijiaani. Janiyari niquiriini jiyacua rucojuaca, sacocuajuhua, jiyocuacaanu jaacuatujua-canio. Puetunujuanaari pa miaquesocoriquiano pa puere-sano casaa quiriquiaa. ⁷ Janiyari jiyacari jiyocuacaanuji ru-paa tojiriini. Cua sequereeri: “Pedronaa, nocua quia sanere. Quia puecoore quia miaquesocoriquiano”. ⁸ Janiyari saaja na riucuaareni: “¡Maja cua Jiyaniijiana! ¿Janiyatucua taa miaquere sacuaraatia cua miaquesooni?” ⁹ Jiyocuacaanuji rupaari socua cua sequerohuani: “Pedronaa, majaari mi-aquesocoriquiano Pueyaso jiyatesano soonu”. ¹⁰ Pueyasoori naa pacutejocanu sequenu juucua janiyatej. Na nuhuaji, sonaque tacanitiarohua jiyocuacaanuuri. ¹¹ Jiyacaritij, jiu-ujianaraca canuuri cua quijia tiajinia tiuquishii. Nojoriiri Cesareya tiacajiniji jiyaramiquishano quiqianu, na pajenu-unura janiya. ¹² Nojori tiuquiyaquishacarijia, Pueyaso So-huanuuri cua sequeree: “Quiocua nojoritia quiaare. Majaari taacanuunu. Majaari tahua soonu nojori quia rupuesacari”. Naa cua tojiniuucuatej, janiyari cunora juhuajaniya nojoritia quiaarucuaani. Nio seis parta Jesuucua tiuuniaa pueyari cu-ata quiojiyarucuaajuhua. Canaari mariyata cuno tahua tia-jinia tiuquishiini. ¹³ Tia camaruuri canaa pohuatarucuaa taa na niquiquianu Pueyaso seru na tiajinia nocua nujuaanoni. Pueyaso serunaari na sequeree: “Jope tiacajinia quia jiyarore quia seya, nojori cuara quiaara Simón masuunuucua. Na sesaari Pedrojuhuaj. ¹⁴ Nojuajaari quia sequenutaniya taate quia naata jiyanooshano quiniuni, Pueyaso pueyano quia quiniuria, puetunu quia tiajinia quiniaajuhua”. ¹⁵ Saaja cua coteesacari Pueyaso rupaa pohuatanu nojori niquiara, Pueyaso Sohuanuuri nojoriicua niquianu, taa pocua co-teenujuanaa na niquianucujani. ¹⁶ Janiyari jiyacari ni-ishiquii pa Jiyaniijia sequesanonni. Naa na sequesanotej: “Juanri moojinia tiuquinijiya pueya. Pueyaso cutaraari na Sohuanu jiyaronutaniya niaacua, nioojiajinia na tiuquini-uria”. ¹⁷ Naacuajitij, taucuaa tiuushacari pa Jiyaniijiaacua, Pueyasoori na Sohuanu niquitiorucuaa nojorijihua, taa na niquitiocanu pajaniyacuaani. Cante Jesucristoocua tiuyani, Pueyasoori na Sohuanu na niquitioya. ¿Janiyatucua taa Pueyaso sequereruhuarini: “Maja cuno pojori niquitionu quia Sohuanu”?

¹⁸ Jerusalén tiacajinia quiniaa Pueyaso pueya jaara to-jiquiaari naa Pedro sequesanotej, nojoriiri sanaajetaquiaari. Tama nojorijaarijia Pueyaso maniniuhaqueetaquiaari. Naa sequetuquiaariiri:

—¡Pueyasojuhuanaja jiyanohua maninia! Nojuajaari tau-cuaca panijajuhua nojori tacatonura noojia sesa nojori mi-

ishanojiniji, jiyanooshano nojori quiniuriajuhuaj, pueyara-caanu nojori rishiniuria Pueyasota.

Antioquiya tiacajinia Jesu pueyajiniji pohuatasano

¹⁹ Esteban jaara mosaaquiaaricuaa, Judiocuacaari juhuacatecara Jesuucua tiuunias miiquiaari naquiyajuhuj. Queraatia Jesuucua tiuunias pueyari nocuaji mashiy-ocuatquiaari. Nojoriiri tiquiyocua niaquejoquiaari. Noojiaqueyari na mashiyocuatucari tiuquiiioquiaari Fenicia jiyajinia. Tamasacaari tiuquiiioquiaari Chipre jiyajinia. Noojiaqueyari Antioquiya tiacajinia tiuquiiioquiaarijuhuaj. Nojoriiri tii pohuatanuuquiaari Pueyaso rupaa Jesujiniji saa Judiocuacaraja, maja taucucara. ²⁰ Mashiyocuatunaa tajinia quiquiaariiri Chipre jiyajinijinio pueya, Cirene tiacajinijinio pueyajuhuj. Nio pueya jaara tiuquiiioquiaari Antioquiya tiacajinia, nojoriiri Jesujiniji pohuataquiaari Griegohua niquiarajuhuj. ²¹ Jiyaniijia Jesu cumaacaari nojoritia quiquiaarijuhuaj. Naacuajitij, queraatia Griegohuari tariucuaaanu tama nojori niishishanojuaaja cartequiaari, Jiyaniijia Jesu tojijiaca nojori quiniuria.

²² Jerusalén tiacajinia quiniaa Pueyaso pueya jaara nio niishiquiaari, nojoriiri Bernabé jiyarotuchiaari Antioquiya tiacajinia. ²³ Bernabé jaara tiuquiquiaari nojoriicua, nojuajaari jiyanohua shuquiriquiaari na niquishacari taa Pueyaso miir-iucuaa maninia cuno Griegohuani, nocua nojori tiuushacari. Naaratej, nojuajaari naa rootaquiaari nojori:

—Pa Jiyaniijiaacua nia tiuuri pueyaracaanu. Majaari nocua tiuuniu nia cartenu. Suraatia na tojijiara nia quiri.

²⁴ Bernabeeri jiyanohua maninia pueyano quiquiaari. Pueyaso Sohuanuuri noojia cumaquiquiaari jiyanohua. Naacuajitij, na pohuatasacari Jesujiniji, queraatia pueyari Jiyaniijiaacua tiuuchiaari.

²⁵ Na nuhuaji, Bernabeeri Tarso tiacajinia quiaquiaari Saulo pajenuucua. Jaara na riuriataquiaari, na jiyataquiaari Antioquiya tiacajiniaari. ²⁶ Nojori quishacari Pueyaso puey-ata cuno tiacajinia, nojoriiri tii shocotequiaari niquiriy-atu marijia. Nojoriiri queraatia Pueyaso pueya niishitio-jonuuquiaari. Tii Antioquiya tiacajiniani, Jesuucua tiuunias pueyari coteenu sesojosaaquiaari “Cristiano”. Nioori pueyano rupajinia sequeshiya “Cristo tojiniaa pueya”.

²⁷ Cuno quishacari, Jerusalén tiacajiniji Pueyaso sequenu panishano caminiuunias pueyari tiuquiiioquiaari Antioquiya tiacajinia. ²⁸ Tamonu nojorijinijinioni, na sesa quiquiaari Ágabo. Nojuajaari Jesuucua tiuunias pueya rerejonaa tajiniji nujuaquiaari pocuanura. Naa

caminiujuquiaari Pueyaso Sohuanu niishitiosano nojuajaari:

—¡Pueyanaa, puetunu pa jiyacajiniajanaani, miaajenuuri quiniutianiya!

Seetanujuanaa sequequiaariiri Ágabo. Cuno miaajenuuri quiquiaari Claudio quishacari jiyaniijiajanaa, Césartuhuj. Nojuajaari Roma tiacajiniji jiitiaquiaari puetunu jiyacajanaa. ²⁹ Antioquia tiacajinia quiniaa Pueyaso pueya tojishacari naa Ágabo sequesantej, nojoriiri sequequiaari:

—¡Judea jiyajinia quiniaa parta Pueyaso pueya pa naacure!

Nojoriiri naa miiquiaari. Naaratej, cante queraatia cumaneeca jiitiaquiaarini, nojoriiri queraatia niqutioquiaari. Saniniuujia, cante maja puera cumaneecaraca quiquiaarini, nojoriiri secaja niqutioquiaari na jiitiasanojiniji. ³⁰ Na nuhuaji, nojoriiri nareja na niqutiojosano cumaneeca jiyarotaquiaari Bernabeeta, Saulotanio. Nojoriiri Pueyaso pueya jiitianaa niqutioquiaari saniniuujia Judea jiyajinia.

12

Jacobo nacatasaanujiniji pohuatasano, Pedro nujuatesaanujinijinio

¹ Jiyacaritij, Herodesri jiyaniijia quiquiaari Judea jiyajinia. Nojuajaari Jesuucua tiunnaa miiquiaari naquiya. Noojiaqueya quiootequiaari na saniitiosocoriquiano nujuatejojuajiniaari. ² Naa Juan tarajanu Santiago motequiaaricujajaari nijiniaquetucujaja mueruuta. ³ Judiocuacaari shuquiriquiaari naa nojori jiyaniijia motesacari Santiagotej. Naaratej, Herodesri Pedro quiatequiaari na soldadohuajuhuj, Judiocuaca timitianura socua nojuaja. Pedroori quiasaaquiaari Judiocuaca queranacunuusacari, nojori sasacari pan na poreetajaaju majeetesano. ⁴ Pedro quiasaanu nuhuaji, Herodesri na nujuatequiaari nujuatejojuajinia. Na tohuatenu paniriquiohua juucua Pascua nuhuajiiri, na nequesoreesocoriquiano puetunu quiniqui quiniaa Judiocuaca niquiarajanaa. Dieciséis soldadohuari Pedro cojuariquiaa pueyaracaanu. Nocua sanitijiootokiaariiri; coteenu cuatro, na nuhuaji socua cuatro. Nojoriiri naa sanitijiootokiaaritij. ⁵ Pedroori maninia cojuasaaquiaari nujuatejojuajinia. Jiyacaritij, Jesuucua tiunnaa pueyari saniniuujia nocuara secojonuuriquiaa jyanohua, Pueyaso naacunura Pedro.

Pueyaso mashiquishacari Pedro nujuatejojuajiniji

⁶ Cuno niucujani, na juhuaqueyaquishacarijia, quera Herodes tohuatesee tariquicuaji Pedroni, na

nequesoreesocoriquiano puetunu pueya niqiarajanaa. Pedroori caapiqui soldadohua tajiniocoma maqueriquiaa, maninia saatijiotasano cumayocuata na numatucua cajiniocua. Tamasaca soldadohuari nujuatejojua tohuateyaji cojuariquiaacujua. ⁷ Jiyacaritij, Pueyaso seruuri canashiyaquiji coretaquiaari jiyareta Pedro shuriucujanaa nujuatejojua jiniacuma. Na shacantuucaari jiyanoehua cuhuataquiaari nujuatejojua. Pueyaso seruuri Pedro jiuuquirii na shuucujaji. Na niucujareeri. Na niucuasacari, na sequereeri:

—¡Ritia quia sanere!

Cumayocuaari tamajaaja saacarejetaquiaari Pedro numatucuaacujaji. ⁸ Pueyaso seruuri na sequereejuhujaj:

—¡Quia cajiniocua camarucujua quia saatiri socua! ¡Quia sapatu quia cushirijuhujaj!

Pedro jaara naa miiquiaari puetunu na sequesanojuanaa, Pueyaso seruuri socua na sequerohua:

—¡Quia toque quia cushiri ritia! Majaari tarishiniu. ¡Quiocua cua nuhuaji rupaashijia!

⁹ Pedroori ritia Pueyaso seru nuhuaji sacuariquiaajaa. Jiyanoehua jiyajeneriquiaari. Majaari na niishiniu quiriquiaa puetunu na niquishanojuanaa. Nojuajaari jyaniriquiaa na maquenujina niquiya naasucua. ¹⁰ Nojoriiri coteenu shocoma na tacoji cojuanaa soldadohua. Socua na tacoji cojuanaa tajitiumiaajaariuhujaj. Naa quenaacoturee nujuatejojua tohuateyajiiri. Nojuajaari Pueyaso seruta nujuatusee jiyareta tohuateyaji. Tohuateyari cumueeca casaata shipinishano quiquiaari. Jiyacaritij, tohuateyari tamajaaja riatequee. Nojoriiri tohuareetamaa carijiniacuma. Pueyaso seruuri Pedro jiyatariquiaa sapuenujaara tiaca jiuujiaaco. Na nuhuaji, na shuriucujaji shaajeeeri. ¹¹ Pedroori jiyacari shusha niishiquii. Naa sequereeri:

—¡Seetanujuanaaqui quiriquiaa! ¡Cua Jiyaniijiaquiiri na seru jiyaroree cucua, na mashiquiniuria janiya Herodescujaji, cuarta Judiocuacaacujijuhujaj! Naa na jiyaroreeri maja cua miishaanura taa nojori niishiriojoriquiaa na miiniuria juucua janiyani.

¹² Nojuajaari naa na niishiriojonuta María tiajinia quiaquiaari. Nio Maríacuajaari tamonu Juan nucua. Cuno Juan sesaari Marcojuhuaj. Cuno tiajinia, queraatia Pueyaso pueyari Pedrocuara tii secojonuuriquiaa jiyacari. ¹³ Pedroori jiyacari piquiquiaari carijiniacuma mataca tohuateyaji. Tiaco seruuri na tojiquiaari piquiyano. Nio seru sesaari quiquiaari Rode, niyacoo. Nojuajaari juucua catecanoquiaari tohuateyaji, na niquiniuria cante

quiriquiaani. ¹⁴ Nojuajaari saaja Pedro tojishii tia camaru jiyaniquiyano, na tiotiu na riatanura nocuaji. Niyacoo tojishacari seetanujuanaa Pedro rupaa, majaari tiotiu na riatanu quiquiaari na shuquiriniutia. Saaja netequiaariuhua tiaco quiniaa numootenuraari. Nojori sequesuhuari:

—¡Pedrocuajaqui nooj, tohuateyaji nujuaatej!

¹⁵ Pueyari saa niyacoo riucuaquiaarijia:

—¿Quiaate paateya? Teyano Pedrote nujuatesaarucuaacua-jani.

Niyacoori nojori sequenu pacutequiaariuhua:

—¡Taaquiririnij! ¡Pedrocuaaquiniatejaj, nooj nujuaatej!

Pueyari saaja sequequiaari:

—Maja nojuaja. Pedro cojuana Pueyaso seru naasucuaaja.

¹⁶ Nojori nacojosacari tiaco, Pedroori tohuateyaji piquijioriquiaajaa. Tiotiu jaara socua riatasaaquiaari, nojuacuaajaari quiriquiaa. Pueyari na niquishacari shiriquitiuquiaari.

¹⁷ Pedroori nojori sanaajaree jiyacari na juaashiquiata. Cuniqiu quiniaa pohuatareeri taa Pueyaso tohuaterohua nojuaja nujuatejojuajinijini. Pedroori naa sequequiaari nojorij:

—Niocua naa pohuatate Santiagojuhuaj, parta Jesuucua tiuuniaanio.

Na nuhuaji, Pedroori tiji tohuatacuhua. Tamaqui quiaareeri.

¹⁸ Jaara juhuaquequiaari, nujuatejojuajinia cojuanaa soldadohuari jiyanohua shiriquitiuquiaari. Majaari nojori niishiniu quiquiaari taa Pedro miirii nujuatejojuajiniji nojori tajinijini. Tama nojorijiaarijia naa sequetuquiaari na puerenuta:

—¡Pa jiyaniijia Herodesri quiarijia pa puecoonutaniya, maninia pa cojuaaquiniuucua Pedro!

¹⁹ Herodes niishishacari, na shuriucua nujuatunaa soldadohua jiyaroquiaariiri nujuatejojuajinia nojori pajenura Pedro. Nojori jaara na riuriataaquiquiaari, Herodesri nujuatejojuajinia Pedro cojuanaa soldadohua nequesoreequiaari na juaaniutia, na niishiniuria juucua taa Pedro juurequeree nojori shuriucujini. Na nuhuaji, Herodesri jiyanohua na juaaniutia na shuriucua nujuatunaa soldadohua sequequiaari, nojori puecoonura narta soldadohua, nojori cojuaaquiniuucua maninia Pedro nujuatejojuajinia. Naa na miiniu nuhuajitij, Herodesri Judea jiyajiniji pacuquiaari. Cesareya tiacajinia quishiiri.

Herodes shaajenujiniji pohuatasano

²⁰ Jiyacaritij, Herodesri jiyanohua juaariquiaa Tiro tiacajinia quiniaa pueyata, Sidón tiacajinia quiniaatanio. Nio

caapiqui tiacajinijinio pueyari jiyaniijia Herodes tiajinia quiojoquiaari nata nojori pocoojonura juucua. Majaari cuno juuca nojori pocoojonu quirii jiyaniijia Herodesta. Nocuaji, nojoriiri Herodes seru sequeree:

—Quiocua quia jiyaniijia sequere, canaa nata jiyanootoonu paniyani.

Cuno Herodes seru sesaari quiquiaari Blasto. Nojuajaari na jiyaniijia panishano quiquiaari. Na jiyaniijia maqueja cojuana quiquiaarijiaariuhuj. Tiro tiacajiniji pueya, mariyata Sidón tiacajinijinio, nojoriiri na cumaneecata masetujua na miaquesocoriquiano jiyaniijia Herodes jiitiasano pueyajiniji. Nojoriiri jiyamitia jecatoonu paniriquiaa cuno jiyaniijata, maninia nojori quiniuhuara nata, Herodes niqutiojotenuhuara na jiitiasano pueya na miajajaura Sidón tiacajinijinio pueya, Tiro tiacajinijinio pueyanio. ²¹ Herodes seruuri nojori sequequiaariuhua:

—Niocuana tamonu juuca nimia, jiyaniijata nia pocoojonura.

Na nuhuaji, cuno pueyari na sequesano juucajinia niquiaariuhua. Jiyaniijia Herodesri nojoriicuaji maniniushiquiaari. Na maniniuqui toque cushiquiaariiri. Jiyaniijiaacuajinio shipinishano cajitiujinia cajiriohuari. Tiji pocuaquiaari cuno pueyacuari. ²² Puetunu cuniqui quiniaa pueya tojishacari naa maninia Herodes pocuaano nojori niquiaratej, nojoriiri nacoonu coteequiaari. Naa sequetuquiaari na nacoosacariiri:

—¡Nio pueyano pocuaani, majaari nareja pueyano! ¡Nojuajaqui Pueyaso!

²³ Pueya sequesacari naa Herodestej, nojuajaari juhua shuquiuriosaaquiaari sajaruhua. Majaari quenaaja cuno pueya na sequenu quirii: “Maja naa cua sequetunutej. Janiya maja Pueyasoni”. Nocuaji, Pueyaso seruuri canashiyaquiji na tojetequiaari. Na pocuasacarijia cusomaari. Na sarapiyari na jiniacuma miaquequiaari. Naa cusotaquiaari tama na sarapiyajaarijia.

²⁴ Pueyaso rupaari saniniuujia socua niyacasaaquiaari, tiquiyocua pohuatasacari puetunu pueya niquiarajanaa. Naacuajitij, Pueyasocua tiuuniaa pueyari socua queraatiara canequiaarijiuhuj. ²⁵ Bernabé, Saulonio, nojori jaara niqutioquiaari cumaneeca Jerusalén tiacajinia Pueyaso pueya jiitianaa, nojoriiri ritia quiojoquiaariuhua Antioquiya tiacajinihua. Nojoriiri jiyacari Jerusalén tiacajiniji riquiaariuhua Juan. Juan sesaari quiquiaarijiuhuj Marco.

13

*Saulo Bernabeeta rucuanefonu coteesacari Jesujiniji pohu-
atanura tiqiyocua*

¹ Antioquiya tiacajinia Jesuucua tiuniaa pueyajinijini, noojiaqueyari quiquiaari Pueyaso sequenu panishano Pueyaso pueyara caminiujiuniaa. Quiquiaarijiaariuhua Pueyaso Rupaa niishitiojonaa. Nioori nojori sesaca: Bernabé; Simónnio, na sesa tarajanu quiquiaari Negro; Lucionio. Nojuajaari Cirene tiacajinijinio pueyano. Quiquiaarijiaariuhua Manaén. Nojuajaari mariyata Galilea jiyajinia jiyaniijiarano Herodesta canashitijosaaquiaari. Quiquiaarijiaariuhua Saulo. ² Tamonu juuca, puetunu nojorijianaari Pueyaso secojonuuriquiaa. Cuno juucajuhuaj, majaari nojori miaquenuunu quiriquiaa socua na secojonuunura Pueyaso. Jiyacaritij, Pueyaso Sohuanuuri nojori sequequiaari:

—Bernabé Saulonio, nojori nia jiyatere cua panishano miriquiano, taa cua sequequiaari tariucuacaanucujani.

³ Nojoriiri jiyacari socua maja na miaquenuunu quiquiaari. Saaja Pueyaso secojonuuriquiaa socua jiyanohuari. Na secojonuunu nuhuaji, nojoriiri Bernabé nacaacua, mariyata Saulo nacaacua niatuquiaari na juaashiquiaca. Nojoriiri naa miishaaquiaari nojori jiyatesaanura Pueyaso jiyaramiquishano pueyara, Pueyaso rupaa pohuatanuuriquiano jiyanohua Pueyaso Sohuanu cumaacata.

Jesujiniji pohuatasacari Chipre jiyajinia

⁴ Pueyaso Sohuanu jiyaramiquishano Bernabé, Saulonio, nojoriiri cuniquiji janiya quiaquiaarijiaara nucuaco Seleucia tiacajiniara, shoniniacu caminia casaqueyaji. Nojoriiri cuniquiji quiaquiaari puereetuca buquejinia Chipre jiyaniishano jiyajiniara. Chipre jiyari jiya tucuaatiaja, shoniniacu caminia jiuujiajinia. ⁵ Nojori tiuquiiijosacari Salamina tiaca tacatajajiniji, tii Pueyaso rupaa pohuatanuunu coteequiaari puetunu cuniqui quiniaa Judiocuaca secojojuaca tiajinaqueyajanaari. Juanri nojoritia quiriquiaajuhuj, nojori naacuriquiano. ⁶ Naa nojori rucoojosacari Pueyaso rupaa pohuatanura Chipre jiya tucuaatiajaacuatej, socua tiuquijioseequiaari Pafos tiacajiniaari Chipre tamajiria. Nojoriiri tii riuriataquiaari shimiacu, narta Judio pueyano. Na sesa quiquiaari Barjesús. Nojuajaari cuniqui quiniaa sapojoquiaari naatej: “Janiyacujaja Pueyaso sequenu panishano caminiujiunia pajaniyarani”.

⁷ Cuno shimiacuuri pueyaracaanu Sergio Paulota quiquiaari. Sergio Pauloori Chipre jiya jiyaniijia quiquiaari. Cuno jiyaniijiaari jiyanohua niishijia quiquiaari. Nojuajaari

Bernabé masuuquiaari Saulonio, nojori pohanura Pueyaso rupaa nojuaja. ⁸ Cuno shimiacu sesaari Griego rupaaajinia sequesaaquiaari Elimas. Nojuajaari saaja cuno jiyaniijia niqiuara cuaracashitiquiaari Pueyaso rupaa. Naa sequeree cuno jiyaniijiaari:

—Maja cuno pojori tojinu. Jiyanohua sesaari nojori pohanurata. Quia sapojotiuano.

⁹ Saulo sesaari Pablo quiquiaarijuhuaj. Jiyacari, Pueyaso Sohuanu cumaquishacari nojuaja, Pabloori jiyanohua shitimia shimiacu jiquioco shootiaree naa na sequesacari nojuaja:

¹⁰ —¡Sesaaca niyanu sequenaa! ¡Maninia miijaca para-caajiana! ¿Casaara pueya quia tenujiya Pueyasooajini? ¹¹ ¡Cua Jiyaniijiaari quiarijia quia saniitionutaniya! ¡Quiaari cariyajuara quiniutianiya seetanujanaa! ¡Quiaari pasaja tarishiniutianiya cariyajuara quia quishacari!

Jiyacari, juhua niniquiaari na namijajinia cajimaa. Cariyajuara quiquiri. Juhua ninishiqui quiaquejoquiaari puetunu cunocjuanaari, na juaashiquiaajini na jaatucusanura juuca. ¹² Cuno jiyaniijia jaara na niqiuquiaari-tij, Pueyasooajia tiuriiri na niqiuara nojori pohanurata shanohua Jiyaniijia Jesujini.

Pablo, Bernabé quishacari Antioquia tiacajinia, Pisidia jiyajinia

¹³ Pabloori na cojiniaata Pafos tiacajini quiaquiaari buquejia Perge tiacajinara, Panfilia jiyajinia. Juanri Perge tiacajinia catesequiaari nojoriicua. Tiji riujuuquiaari-hua Jerusalén tiacajinohu. ¹⁴ Na nuhaji, Pabloori Bernabeeta Perge tiacajini quiaquiaari Antioquia tiacajinia. Antioquia tiacaari Pisidia jiyajinia. Tii nojori quishacari, nojoriiri samaatenu juuca quiaquiaari narta Judiocuaca seconuujua tiacajinia. Na tiuquishacari, cajitiushi-iri. ¹⁵ Jiyacari, tariucuacaanu Moisés Rootasanoori serojosaaquiaari. Tariucuacaanu Pueyaso sequesano caminiujunia naajotasanoori serojosaaquiaarijuhuaj. Na nuhaji, rerejua tia camarnuuri na sequequiaari Pablo, Bernabee-nio:

—Cuarta Judiocuacanaa, nia jaara Pueyasojini nia niishano casa sequenu paniri, nia niishitiojore quiarijia niya quinaa niqiuara.

¹⁶ Pabloori sanequiaari. Na juaashiquiata sanaajaree pueyari. Naa nojori sequereeri:

—Nia tojitiare cuarta Israel pueyanaa, nijaniyajuhuaj, canapete Pueyaso tojitiajacacujani tamasa pueyapuejininio. ¹⁷ Paari sequequiaani: “Pueyasoori pa

Jiyaniijia, Israel pueya pa quiniuucua”. Seetanujuanaa, paacuaajaari Pueyaso saquiriojosano pueyacujinioni. Tariucuacaanu, Pueyasoori maniniushiquiari pa supuetanaa saquiriojoquiaari na pueyara quiriquiano. Na nuhuaji, jiyanohua pa supuetanaa canetequiaariiri Egipto jiyajinia nojori quishacari. Na nuhuaji, Pueyasoori nojori mashiquiquiaari cuno jiyajiniji na cumaacata. ¹⁸ Cuarenta marijiaari pa supuetanaa shoconujuquiaari pueyaracaanu nojori rucoojosacari najuhuana cariiquia jiyajinia. Pueyasoori jiyacari nojori rejeretaquiaari na tojtiaaquishacari nojuaja. ¹⁹ Na nuhuaji, Pueyaso cumaacata, siete tamaatiuucua rupaa pocuajaca taucuacaari puecoosaaquiaari Canaán jiyajiniji, saniniuujia cuno jiya na niqutiosocoriquiano pa supuetanaa. ²⁰ Pa supuetanaa jaara Canaán jiya camaruhua quiquiaari tari, socua cuatrociento cincuenta marijiaari nojori shoconujuquiaari saaja nequesoreenaa jiitiasacari nojori. Na nuhuaji Samuelri nojori nequesoreenara jiyatesaaquiaarijiuhuj. Nojuajaari Pueyaso sequesano caminiujiunia quiquiaarijiuhuj. ²¹ Samuel quishacarijia, pa supuetanaari Pueyaso secojonuuquiaari na panitiushacari jiyaniijia, nojori jiitariquiano nequesoreenaa niti. Naacujitij, Pueyasoori nojori jiyaniijia jiyatequiaari Saúl, Cis niyanu, supuetana Benjamín niqiuohuacuajinio supueno pueyano. Saúlri nareja cuarenta marijia shocotejoquiaari pa supuetanaa jiyaniijia na quishacari. ²² Na nuhuaji, Pueyasoori Saúl soojotaquiaariuhua Saúl tojiyaquiniuucua nojuaja. Saúl niti David jiyatequiaariuhua Israel pueya jiyaniijia saniniuurijia. Pueyasoori na sequequiaari Davidjiniji, na timitiasacari nojuaja:

“Isaí niyanu Davidcuaajaari cua shuquiuriojua. Nojuajaari cua panishano pueyano. Nojuajaari puetunu cua panishano miiniutianiyajanaa”.

²³ Quiari naataja, Pueyasoori na sequesano tohuateequiaari na mueratesacari pocuaji Tacuna. Nojuajaari Jesu, David niqiuohuacuajinio supuenoni. Pueyasoori na seerataquiaari Israel pueyacujia Tacuna quiriquiano, taa na sequequiaari tariucuacaanucujani. ²⁴ Jesu coteyaquishacarijia rucua-nenu na Quejiniji pahuatanura, Tiuquinijiona Juanri co-teenu nocuaji pahuataquiaari Pueyasojiniji puetunu Israel pueya niquliarajanaa. Tiuquinijiona Juanri nojori sequequiaari noojia nojori tacatonuhuara Pueyasocua, na-juhuj, moojinia nojori tiuquinijiosaanura, Pueyaso tojijia nojori quiniuria. ²⁵ Quera Tiuquinijiona Juan shaajesacari, nojuajaari naa sequequiaari: “Janiyari maja Pueyaso Ji-

yarosanoni taa nia jiyaniquiaa najuhuana janiyacujani. Na Jiyarosano cutaraari cua nuhuaji niniutianiya. Nojuajaari seetanujuanaa Jiyaniijiajanaa cutara. Janiya maara jiyanohua shuquiriaatia quirini, nojuaja jaara cua sequere na serura cua quiniuria quenaaja na sapatu cua jocuanura nera. Nojuaja cutaraari saaja maninia miijia”.

²⁶ 'Cuarta pueyanaa, niajaniya cante Abraham niquiohuacuajinio pueyacujani, cua tojitiare, niajanijajuhua tau-cuacanaa, canapuate Pueyaso tojijiacacuajani. Niaaranoori nio maninia rupaa Pueyasojiniji, nia jiyanooshaanura sesa nia miishanojiniji. ²⁷ Jerusalén tiacajinia quiniaa, mariyata na camarucuanio, nojoriiri maja na niishiniu quijia cante Jesu quiquiaarini. Majaari nojori niishitiuniu quiquiaari-ijihua Pueyaso sequesano caminiujiuniaa naajiotasano tariucuacaanu. Cunoori najuhuana nojori serojonuusano puetunu samaatenu juucajanaa. Naacuajitij, nojori jaara moquiaari Jesu, maninia tohuateequiaariiri Pueyaso sequesano caminiujiuniaa naajiotasano, taa Jesujiniji sequesaaquiaari tariucuacaanucujani. ²⁸ Jesuuri seetanujuanaa maja na miiniu quiquiaari sesa. Tama nojorijiaarijia juhua sesa miijiaara na jiyatequiaari cutara. Naacuajitij, Pilato sequetuquiaariiri cuaara na moteeranoj. ²⁹ Nojori jaara tari miiquiaari taa nojuajiniji naajiotasano quiya tariucuacaanu Pueyaso Rupajiniacuajani, na roshinitiuquiaari niyacutesanojinijiiri. Raaco na niatureeri. ³⁰ Naajaa, macu na quishacari, Pueyasoori saaja na samiitiani quiaariuhua. ³¹ Na samiitianu nuhuaji, Jesuuri sequeyarucua na pueyacia mueranacujuquiaari, noo pojoriicua canapuate na tarajaquiaari na quiasacari Galilea jiyajiniji Jerusalén tiacajiniaracuajani. Nojoricuajaari quiarijia nojuajiniji poojotaniuhua puetunu pueya niquiarajanaa.

³² 'Canaari timiyani canaa pohuatasacari niajaniya, ¡Pueyaso pohuatasano pa supuetanaari tari tohuateecanu! ¡Pocujia Tacunacuajaari tari miiquianu puetunu pa jiyanooshaanurajanaa! ³³ Seetanujuanaa, Pueyaso sequesano pa supuetanaa Israel pueyarani, cunoori shusha pajaniyara tohuateecanu, pa supuetanaa Israel pueyacujinio pa quiniucua. Pueyasoori tari tohuateecanu na sequesano pajaniyara, na samiitianishacariuhua Jesu, naatej, taa David jaaquequejonee Salmojinia na sequesano quiyacuajani. Naa naajiotasano quiyari segundo Salmojinia: “Quiaari cua Niyanucujia. Janiyari quiarijia quia samiitianiriini”.

³⁴ Pueyasocuajaari sequequiaari, nojuacuajaari na samiitianiniutianiuhua na moqueyaquiniucujia na raaco.

Nioori naajiotasano quiyajuhuj tariucuacaanu Pueyaso Rupaajinia. Naa sequeyari:

“Janiyari maninia niaara miiniutianiyani taa cua sequequiaari Davidcujani”.

³⁵ Naa naajiotasanoori Jesujiniji quiyajuhua David jaaquequejonee Salmojinia:

“Majaari quia panishano seru cuaqueya quia shanacunu quiniutianiya na moquenura”.

³⁶ Pueyanaa, paari seetanujuanaa niishiyani Davidri puetunu Pueyaso panishano na miiniu nuhuajijianaa shaajequiaari. Nojuajaari na supuetanaa rupuequiaari macunucua quiqiojinia. Na cuaqueyari seetanujuanaa moquequiaari cutara. ³⁷ Noo Jesu saniniuujia, Pueyaso cutaraari na samiitianiquiaariuhua. Majaari na moquenu quiquiaari cutara. ³⁸ Cuarta Israel pueyanaa, niaa cumaati canaa pohuatasano niishiya. Canaari Jesujiniji nia pohuataani. Niaa jaara nocua tiuuri, niaari sesa nia miishanojiniji jiyanooshaanutaniya. ³⁹ Moisés

Rootasanojinia, paari tariucuacaanu niishitiojosaaquiaarini pa seya pa puecoonura Pueyasora, Pueyaso jiyanooniuria pajaniya sesa pa miishanojiniji, maja pa mosaanura saniniuujia. Majaari seetanujuanaa pa jiyanooshaanu quiquiaari naa pa miishacaritij. Quiarijia cutara, canapuate Jesuucua tiuya saniniunijia, nojoriiri puetunu sesa na miishanojinijijianaa jiyanooshiya. ⁴⁰ Niaa cutaraari cocuaatia miiniutianiya pueyanaa, nia jaara cua pohuatasano ruuretare. Pueyasoori na tojiyashijiaca saniitionutaniya taa tariucuacaanu Pueyaso sequesano caminiujiuniasa sequequiaaricujani. Naa sequetuquiaariiri:

⁴¹ “Nia tojitiare, rerequetejacanaa. Niaari jiuujiatenutaniya najuhuanaj. Na nuhuaji, niaari shaajasaanutaniyajuhuj. Janiyari Pueyasoni. Janiyari tarijia nia niquishoo casaa miiniutianiyani. Tamasaca jaara nia pohuatare, niaari saaja na cuaracashitiniutianiya”.

⁴² Na nuhuaji, Pabloori narta Judiocuaca rerejojua tiajiniji tohuareetaquiaariuhua na cojiniaata. Taucuacaari tii quiriquiaajuhuj. Nio taucuacaari Judiocuacaacua pacunaa quiquiaari, Judiocuaca nojori quiniuriajuhuaj, Pueyaso sequesano tojitianaara na quiniuria. Nojoriiri Pablo sequequiaari, Bernabeenio:

—Niocua tamonu sábado canaa pohuatareeruhuj, socua canaa tojiniuria Jesujiniji.

⁴³ Nojori quiojosacariuhua Judiocuaca rerejojua tiajiniji, queraatia narta Judiocuacaari nojori nuhuajiquiaari, queraatia taucacajinijinio Judiocuacaacua pacunaanio.

Cuno pojoriiri maninia Moisés niishitiojosano tojitianaa quiquiaari. Nojoriiri Pablo, Bernabé nuhuaji sacuariquiaa. Naaratej, Pabloori Bernabeeta naa rootaquiaari nojori:

—Saaja Pueyasocua tiuujiaa nia quiriri. Majaari nocuaji taacanuunu. Nojuacuajaari pa cumaquijia.

⁴⁴ Cuno nuhuaji, Sábado juuca jaara tari quiquiaari, quera puetunu cuno tiacajiniji pueyajanaari Pueyaso rupaa tojiniuucua rerejoquiaari. ⁴⁵ Judiocuaca secojojua tia camarucua jaara niquiaari queraatia pueya na rerejojua-jinia mishiyano, Pablo pohuatasano na tojitianura, nojoriiri juaaquoquiaari. Nojoriiri tama sequetooquiaariijaaja:

—Puetunu pueyajanaari cuno pojori tojitiajacara quiniutianiya. Pa tojiyaquiniutianiya saniniuuriija.

Naa sequeturiquiaa pueya niquiara Pablojinijijaariuhuj:

—¡Pabloori maja maninia na niishiniu Pueyaso rupaa! ¡Najuhuana sesa pohuataano! ¡Nojuajaari niishiyashijia!

⁴⁶ Pabloori saaja Bernabeeta sequequiaari na puereyaquiniutia:

—Maniniacuajaqui, cuarta Judiocuacanaa. Canacuajaari naa panitaja nijaniyatej, Pueyaso rupaa canaa coteetanura pohuatanu nijaniya, Pueyaso saquiriojosano Judiocuaca nia quiniuucua. Niaacuajaari saa na ruuretareejaa. ¡Majaquiri nia rishiniu paniniu, pueyaracaanu nia quiniuria Pueyasota! Quiarijiani, canaari saniniuujia taucuacaacua quianutaniyani, Pueyaso rupaa canaa pohuatanura nojori niquiara. ⁴⁷ Canaa Jiyaniijia jaara canaa jiyaramiquiquiaari, nojuajaari naa canaa sequequiaariti: “Quia jiyatequiaari mijiria cuhuatariquianonijia. Quia pohuatasano janiyajinijiri caminiuujushaanutaniya taucuaca niquiara puetunu jiya puequetujiniajanaa, Pueyaso jiyanooniuria nojoriijuhuj”.

⁴⁸ Cuniqiu quiniaa taucuaca jaara naa tojiquiaari sequeshianotej, nojoriiri shuquiriquiaari. Pueyaso rupaa maniniuuhuaqueetareeri. Sequetureeri:

—¡Jiyanohua maninia pa Jiyaniijia Pueyaso rupaa!

Teyano pueya Pueyaso saquiriojoquiaari tariucuacaanu na pueyara quiriquianocuajani, pueyaracaanu nata rishiniuriacuajani, jiyacariti, nojoriiri Jesuucua tiuquiaari.

⁴⁹ Jiyaniijia rupaari pohuatasaaquiaari puetunu cuno jiyajiniajanaa. ⁵⁰ Judiocuacaari na juaaniutia Pueyaso panijiaa maajipohua shiniuujiaquiaari na cojituniuria nojori, nojori miiniuria naquiya Pablo, Bernabeenio. Naa rootatuquiaari cuno tiacajiniji camarucuaajaariuhuj, mariyata cuno jiyajiniji nojori taanuunura Pablo, Bernabeenio. ⁵¹ Naaratej, na nuhuajiria, Pablo, Bernabeenio, nojoriiri na niohuacajiniji seseeca rapijionuutaquiaari.

Naacuajitij, Antioquiya tiacajinia quiniaa pueyari niishiquiaari, Pueyaso saniitiosacari nojori, majaari nojori Pablocua, Bernabeecua na tiuutianu quiniutianiya Pueyaso jiyanoyaquishacari nojori. Na nuhuaji, Pabloori Bernabeeta cuno tiacajiniji quiaquiaari Iconio tiacajinia. ⁵² Jesuucua tiuuniaa pueyari saniniuujia shuquiriaatia jateequiaari Antioquiya tiacajinia, nojori jiiitasacari Pueyaso Sohuanu.

14

Pablo, Bernabé quishacari Iconio tiacajinia

¹ Pablo, Bernabeeta naa miiquiaarijihuahua Iconio tiacajinia. Nojoriiri narta Judiocuaca rerejojua tiajinia tiuquiti- aquiaari. Nojoriiri tii pohuataquiaari Jesujiniji puetunu nojori niquiarajanaa. Queraatia pueyari Jesuucua tiuuquiaari, Judiocuaca, taucucanio. ² Noojiaqueya Judiocuacajinijin- ioori maja na tojiniu paniniu quiquiaari Jesujiniji pohu- atasano. Cuno pojoriiri taucucaca shiniuujiquiaari nojori juaaniuria Jesuucua tiuuniaa pueya. ³ Pabloori, Bern- abeeta cunora socua jijojequiaari pueyaracaanu cuniqui, Jesuucua tiuuniaa nojori cumaguiniuria. Nojoriiri maja na puerenu quiquiaari Jiyaniijiajiniji nojori pohuatasacari. Seetanujuanaa, Jiyaniijiaari nojori naacuquiaari jiyano- hua cutara maninia miishano nojori miiniuria, pueya naatani- ionurajuhuj. Jiyaniijiaari nojori naacuquiaari cuno pueya niishiniuria, seetanujuanaari quiquiaari Pablo, Bernabé pohuatasano. ⁴ Cuno tiacajinia quiniaa pueyari raquiti- quiaari. Noojiaqueyari tama narta Judiocuaca tojiquiaariji- aaja. Saniniuujia, tamasaacari Jesu jiyaramiquishano pueya tojijiaara quiquiaari. Nojoriiri naa quiquiaari cuno tiaca- jinia. ⁵ Naa nojori quishacaritij, Judiocuacaari taucucata roojotooquiaari cuno tiacajinia jiyaniijianucua. Naa roo- jotooquiaariiri nojori sesacanura Pablo, Bernabeenio, na ja- cutunura saitiajuhuj. ⁶ Pablo, Bernabé jaara niishiquiaari naa cuno pueya miiniu panishacari nojoritij, tiji mashiy- ocuatuquiaariiri Licaonia jiyajiniara. Nojoriiri Listra tia- cajinia quiojoquiaari, Derbe tiacajiniaranio, cuno caapiqui tiaca shocua quijiaca tiacajiniajuhuj. ⁷ Nojoriiri tii poojo- taquiaari Jesujiniji nojori niishishano.

Listra tiacajinia pueya jacutusacari Pablo saitia

⁸ Listra tiacajinia quiquiaariiri sesarunocua pueyano. Ma- jaari na rucuanenu quijia. Nojuajaari naa rasaquiaari- juhuanajaj. Majaari na pooniniu quijia na cajitiujiniji. ⁹ Cuno pueyanoori Pablo tojiriquiaa na pohuatasacari Jesujiniji. Pablo jaara na niquiquiaari, na niishiriiri nojuajaari seetanu- juanaa tiuuriquiaa na pohuatasanoocua. Naa Jesuucua na

tiuuniucuatej, Pabloori niishirii cuno pueyano na naata na cashacu jeequenuhua. ¹⁰ Pabloori jiyamitia jiyanoehua na sequeree:

—¡Maninia quia nujuare! ¡Maja porequetanu!

Cuno pueyanoori ritia saneeque. Rucuanenu saniriiri. ¹¹ Cuno Licaonia pueya jaara niqutiuguiaari naa Pablo miishanotej, nojoriiri tama na rupaaajiniajaaja sequetuquiaari:

—¡Cumaacaraca quijiacaari juhua pueyasohua pocua rosetareeni, juhua pueya niquishano!

¹² Naa nojori sequesacaritij, majaari Pablo, Bernabé niishiniu quiquiaari nojori sequesano tama nojori rupaaajiniajaaja. Cuno pueyari Bernabé sesojoree Júpiterta, juhua nojori pueyaso sesa. Pabloori sesojosaareecujua Mercurio, jiyanoehua pocuanu niishijia na quiniucua, juhua nojori pueyaso Mercurio. Nio sesacaari Licaonia pueyapue pueyasohua sesaca quiquiaari, nojori jiitiasano juhua na pueyasohuara cuno jiyajinia. ¹³ Júpiter secojojua tiaari Listra tiaca tohuateya shuriucua quiquiaari. Jiyacaritij, Júpiter secojojua tia cojuanaari juyaca jaatucunuuquiaari, Pabloocuara nojori puecosocoriquiano Bernabeecuaranio, juhua nojori pueyasohuacuara. Maniniushitiajara naana shuucuaca shiyosano patootaquiaarijiaariuhuj. Cuno pueyanoori puetunu pueyatajanaa Pablo, Bernabé shuquiritianu paniriquiaa juucua, juyaca na puecosacari nojoriicuara juhua Pueyasooacuara.

¹⁴ Pablo, Bernabé jaara niquiquiaari naa cuno pueya miiniu paniyano nojoritij, nojoriiri na toqueya sutaquiaari nojori tacaaniutia. Pueya tajiniaaco netecuatuquiaariiri nojori miiniu panishano nojori tarinitianura. Pabloori naa nacaquiaari puetunu cuno pueya tojishocoriquianojuanaa:

¹⁵ —¡Pueyanaa! ¿Casaara naa nia miya canaani? ¡Canaari nareja pueyani taa niajanियacuaani! ¡Canaari naacua niyarucaaa niaacuatej canaa sequenura niajaniya, puetunu nio najuhuana nia miishanojuanaa nia cartenura! ¡Saaja nia shuquiritiare cutara pueyaracaanu rishijia Pueyaso! Nojuajaari nio jiya shipiniquiaari, jiya cajiniocua. Na shipinishanojaariuhua shoniniacu caminia. Puetunu pa niquishanojuanaari na shipinishano. ¹⁶ Pueyasoori tarijia puetunu pueyajanaa tarinitiaquiaari nojori miiniuria tama nojori panishanojuaja. ¹⁷ Naajaa, nojuajaari pa supuetanaa niishitiquiaari cante nojuajani, maninia na miishacari nojoriria. Nojuajaari maru nitiquiaa pajaniyara, pa nataacuaca moritianura, pa miasocoriquiano pa jiitianura queraatia, shuquiriaatia pa quiniuriajuhuaj.

¹⁸ Pablo, Bernabé jaara naa sequequiaari cuno pueyatej, pueyari jatarinitiaja socua tarinitiaquiaari nojoriicuara na

puecoonu panishano juyaca.

¹⁹ Jiyacaritij, Antioquiya tiacajinijinio Judiocuacaari tii tiuquiiijoseequiaari, Iconio tiacajinijinionio. Nojoriiri cuniqui quiniaa nasojosee Pabloocuara, Bernabeecuaranio. Cuniqui jacuturee saitia Pabloori. Nojori jaara jiyaniquiaari Pablo naasucuaari tari cusoyaree saitia jacusano, na jaatiuquiaari tiacajiniji tamamaari. ²⁰ Jesuucua tiuuniaa pueya jaara rerejoquiaari Pablo shocua, macu na quishacari, nojuajaari saaja sanequiaariuhua, saitia jacusano juucua. Na jacunaa tiacajinia tiuquiquiaariuhua saajaari. Tariqui cuno tiacajiniji quiaquiaari Bernabeeta Derbe tiacajiniaari.

²¹ Jaara Jesujiniji pohuataquiaari tii, queraatia pueyari Jesuucua tiuquiaari. Na nuhuaji, nojoriiri Derbe tiacajiniji riujuutiaquiaariuhua. Tiuquiiijioquiaariuhuari Listra tiacajinia, Iconio tiacajinia, Antioquiya tiacajinianio. ²² Pabloori Bernabeeta puetunu cuno tiacajinia quiniaa Pueyaso pueya rootaquiaari socua, maja nojori tarinitianura Jesuucua tiuuniu. Pabloori naa nojori sequequiaari:

—Canapuete Pueyaso shuriucua quiriquianoni, nojoriiri naquia miiniutianiya mijiria.

²³ Nojoriiri maninia Pueyaso tojjijaca pueya saquiriojotuquiaari, nojori jiyatesocoriguiano Pueyaso pueya jiiitariquiano. Naa miitiuquiaari puetunu cuno tiacajiniajanaari, Pueyaso pueya jiiitianura tama nojori nacasunaajaaja. Jesu saquiriojosano pueyari maja na miaquenuunu quiquiaari Pueyaso na secojonuusacari. Nojoriiri naa secojoquiaari Pueyasotej, narta Pueyaso pueya jiiitariquianoocuara:

—Canaa Jiyaniijianaa, nio pueya quiocua tiuujiacani, nojori quia naacure quiocua tiuuniaa narta pueya nojori jiiitianura maninia.

Pablo tacatesacariuhua Bernabeeta Siria jiyajinia Antioquiya tiacajiniara

²⁴ Nojori riujuuniuhuara Antioquiya tiacajiniohuara, Pisia jiya shocotumohuari. Na nuhuaji, tiuquiiijioquiaariuhua Panfilia jiyajiniaari. ²⁵ Tii Pueyaso rupaa pohuatuquiaari Perge tiacajiniaari cuno pueya niquiara. Nojori pohuatanu nuhuaji, Atalia tiacajinia quiojoquiaariijaariuhuj. ²⁶ Cuniquiji, buquejinia jaaretatuquiaari Antioquiya tiacajiniaraari. Cuno Antioquiya tiacaari quiquiaari tee cuniqui narta Pueyaso pueya niaquiaari nojoriicua na juaashiquiacuajani, Pueyaso nojori secojosacari. Nojori naa miiquiaari, Pablo, Bernabé jiyatesaanura tucuacaanu

nojori quiojonura Pueyaso rupaa nojori pohuatanura tau-
cuaca. Cunoori quiquiaari shushajanaa nojori coteenu pan-
ishacari rucuanenonu tamaquiicua. Naacuajitij, nojori tohu-
ateenu nuhuaji puetunu Pueyaso panishanojuanaa, jiyacari
shusha tiuquiijioriquiohuari. ²⁷ Antioquiya tiacajinia nojori
quishacari tari, nojoriiri puetunu Jesuucua tiunia pueya
masuunujuquiaarijianaa. Cuniqúi pohuatauree puetunu
nojori niquiarajanaari, taa Pueyaso naacucanu maninia no-
jori pohuatasacari Jesujinijini. Pohuatanuquiaarijiaari-
uhuj taa Pueyaso taraajetequiaari taucuaca jiuujiani, Jesuu-
cua nojori tiuniuriajuhuj. ²⁸ Pabloori, Bernabeeta cuniqúi
tarishiquiaarijiaara narta Jesuucua tiuniaata.

15

*Jesuucua tiuniaa jiiitanaa nacoosacari Jerusalén tiaca-
jinia*

¹ Jiyacaritij, Judea jiyajinijinio pueyari Antioquiya tiaca-
jinia quiojoquiaari. Nojoriiri tii sesa niishitiojonu cotee-
quiaari cuniqúi quiniaa Jesuucua tiuniaa pueya. Nojori-
iri naa sequeriquiaa Antioquiya tiacajinia quiniaa narta
Pueyaso pueyatej:

—¡Pueyanaa, Jesuucua tiuniaa pueya cuaara na cararaatiu-
uquia co miatejoteera, taa Moisés niishitiojoquiaaricujani!
¡Jaara miatesoo quiri, majaari Pueyaso jiyanoonu quiniu-
tianiya jiyanotej, na pueya nojori quiniuria!

² Pablo, Bernabeenio, nojori jaara tojiquiaari naa cuno
pojori niishitiojosanotej, nojoriiri cuno pojoritia naco-
joquiaari jiyanohua. Naacuajitij, Antioquiya tiacajinia
quiniaa Pueyaso pueyari Pablo, Bernabé sequequiaari nojori
quianura noojiaqueya cuniqúijinio pueyata Jerusalén tiaca-
jinia. Nojori jiyaroreeri na nequesotanura Jesu jiyaramiquis-
hano pueya Jerusalén tiacajinia, mariyata Jesuucua tiuniaa
pueya jiiitanaanio. Nojoriiri jiyaramiquishaaree cuno po-
jori nequesotasaanura, ¿seetanutejanaa naa miishiyatena, taa
cuno Judea jiyajinijinio nijiono pueya niishitiojiya canaacua-
jani?

³ Naacuajitij, Pabloori Bernabeeta jiyarosaaquiaari
Jerusalén tiacajiniara. Nojori quiasacari Jerusalén
tiacajiniara, Fenicia jiyacuma quiojomaquiaariiri, Samaria
jiyacumano. Nojoriiri cuno jiyacajinia Pueyaso pueya
pohuatanuumaquiaari taa taucuaca cartequiaari tama sesa
nojori miishanojuajani, Pueyaso tojijiaara nojori quiniuria.
Jesuucua tiuniaa pueya jaara naa tojiquiaaritij, nojoriiri
jiyanohua shuquiriquiaari.

⁴ Nojori tiuquiiijosacari Jerusalén tiacajinia, puetunu Jesuucua tiuuniaa pueyajanaari nojori rerejotaquiaari, mariyata puetunu Jesu jiyaramiquishano pueyajanaanio. Pablo, Bernabeeri jiyacari nojori pohnataquiaari puetunujuanaa, naajuhuaaj, taa Pueyaso naacuquiaari maninia nojorini, nojori pohnatasacari taucuaca Jesujiniji. ⁵ Cuniqni quiriquiaajaariuhua Fariseocuaca, tariucua Jesuucua tiuujiaca. Cuno pojoriiri rerejonaa tajiniji nujuatuquiaari. Naa sequetureeri:

—Cuno taucuaca Jesuucua tiuuniaani, na cararaatiuuquia co cuaara miatejosaaria Judiocuaca nojori quiyaquishacari. Na nuhuaji, nojori cuaara Moisés niishitiojosano tojjijara quiiira, taa Moisés rootaquiaari tariucuaaanucujani.

⁶ Naa nojori nacojonu nuhuajitij, saa Jesu jiyaramiquishano pueyajaari rerejoquiaari jiyareta Jesuucua tiuuniaa narta pueya jiiianaata. Nojoriiri maninia niishiriojonuquiaari taa na miiniutianiyani. ⁷ Naa pueyaracaanu nojori pocoojosacaritij, Pedroori socua nojori tajiniji nujuaquiaari. Naa nojori sequereeri:

—Pueyanaa cua tojitiare. Niaacuajaari niishiya, pa Jiyaniijiaari cua saquiriojoquiaari na rupaa pohnatariquiano taucuaca tojishocoriquiano, nojori tiuuniuria Pueyasocua-juhuaaj. ⁸ Pueyasocuaajaari poojia niishijia. Nojuajaari cuno taucuaca niishitiquiaari, nojuajaari nojori jiyateree na pueyarajuhuaaj, na Sohuanu na niqutiosacari nojori, taa na niqutioquiaari pajaniyacuaani. ⁹ Majaari nia jiyaniniu Pueyasoori saaja Judiocuaca paniya. Pueyasoori maja rimiajata na paniniu. Nojuajaari puetunu pueya panijajanaa. Cuno taucuaca jaara nocua tiuuquiaari, nojuajaari nojori jiuujia jeequereejuhuaaj saaja Jesuucua nojori tiuushacari. ¹⁰ Naa nia tamacasacari taucacajinijinio parta Pueyaso pueyatej, niaari Pueyaso miishano soojotaaruhua. ¿Casaara nia tamacaa Pueyaso miishanoni? Niaari quiarijia Moisés niishitiojosano tojitiniu paniya Jesuucua tiuuniaa pueya, juhua pa tojishanocuaa. Saniniuujia, majaari quenaaja pa supuetanaa na naata na miiniu quiquiaari puetunujuanaa, taa Moisés niishitiojoquiaaricujani. ¹¹ Paari niishiyani pa Jiyaniijia Jesuuri pa jiyanoojia. Naaratej, pa jiyanooquiaari, na pueya pa quiniuria. Mariyata naa miiquianu cuno taucacajaariuhuaaj. Majaari seetanujanaa maninia pa miiniu quiquiaari pa jiyanooshaanura.

¹² Naa Pedro sequesacaritij, puetunu pueyajanaari socua sanaajetaquiaari. Bernabeeri Pablota jiyacari pohnataquiaari taa Pueyaso na cumaacata miitiquiaari maninia taucuaca niquiarani, naajuhuaaj, taa nojori

naatanijioquiaari cusosuhujaniuhuj. ¹³ Naa nojori pohuatanu nuhuajitij, Santiagoori sequequiaarijiuhuj:

—Cuarta Pueyaso muerasunaa, cua tojitiare. ¹⁴ Simón Pedrocuajaari tari pa pohuataree taa Pueyaso cotecanu shusha na Sohuanuta poonijionura cuno taucuaca jiuuji-ajiniani. Pueyasocujaari nojorijinijinio jiyateya seetanujuanaa na pueyara, nojori maniniuhuaqueetanura nojuaja. ¹⁵ Seetanujuanaari nio. Naajuhuj, tariucuacaanu Pueyaso sequenu panishano caminiujiuniaacuajaari naa naajionuu-taquiaari Pueyaso sequesantej:

¹⁶ “Janiyari David niquiohuacuajinio mueratenutaniya tamonu pueyanoni. Davidcuajaari na supuetanarano. Nojuajaari Jiyaniijajanaa quiriquiano puetunu pueyapuerajanaa, taa David quiquiaari Israel pueya jiyaniijiacuaani. ¹⁷ Naacuajitij, puetunu taucacajanaari cua pajenuunutaniya, noo pojori teyano cua saquiriojoquiaari tariucuacaanucujani, nojori jiyatesocoriquiano na Jiyaniijiaara janiya’. ¹⁸ Jiyaniijiaari naa sequeyaquij. Nojuajaari tariucuacaanu pueya toquiaari nio”.

¹⁹ 'Naaratej pueyanaa, janiyari nia sequeyani, nareja nia niquiri cuno taucuaca, Jiyaniijia Jesuucua tiuuniaani. Majaari nojori najiquitiniu Pueyasocujaji, nia tojitiniu panishacari nojori tariucuacaanu Moisés niishitiojosano. ²⁰ Nareja nojoriicuara pa naajiore. Pocua pa naajioneejinia sequere nojorini, maja tari nojori miaquenuunura shipinishano pueyasocucara na puecootusano casaa, juunu, borregonio. Cuara quituuria saa necocuataja, maja tamonu na numuetucunura socua. Jaara shu miaquetunu paniri, cuara na miaqueera puetunu na nanaca caatinijasanojuanaa, naajuhuj, maja na miaquenuunura casami nanaca. ²¹ Puetunu nio cua sequesanojuanaari parta Judiocuaca tojishano. Cuno niishitiojosanoori pueyaracaanu parta Judiocuaca rerejojuaca tiajiniaqueya naa serojosaaquiaa Moisés naajioneejiniji puetunu samaatenu juucajanaa, puetunu tiquiyocua tiacajinijanaa.

²² Naa nojori pocoojonu nuhuajitij, Jesu jiyaramiquishano pueya, puetunu tii quiniaa Jesuucua tiuuniaa pueyajanaano, nojori jiiitianaajuhuj, puetunu nojorijianaari mariyata niishiriojonuuquiaari. Naacuajitij, nojoriiri narta Pueyaso pueya saquiriojotuchiaari na jiyarotusocoriquiano Antioquiya tiacajinia Pablota, Bernabeetanio. Jiyacari saquiriojosaareeri Judas, Silasnio. Judas sesaari Barsabás quiquiaarijiuhuj. Cuno pojoriiri Jesuucua tiuuniaa pueya tojishano quijia cutara, cuniqui Jerusalén tiacajiniani. ²³ Nojoritia

jiyarotasaquiaariiri naajionee. Cuno naajioneejiniaari naa sequequiaari:

“Niaacuara naajionaani, canaari Jesu jiyaramiquishano pueyani, Jesuucua tiuniaa jiiitanaanio, Jerusalén tiacajinia niarta Jesuucua tiuniaa pueyajuhuaaj. Canaari nia saruhuataani pueyanaa. Taucuaca nia quishacari, naajaa. Jesuucua tiuniaa nia quishacari, niaari canaa tapueyocucacajuhuaaj, tiquiyocua Antioquiya tiacajinia quijiaca, Siria jiyajinia quiniaanio, Cilicia jiyajinia quiniaajuhuaaj. ²⁴ Canaari niajanijajiniji pahuatasaarucuaani, niiquiji pueyanaari niaacua quiacanu. Canaa nia jiyanoori. Majaari canaa jiyaronu quiquianu nojori. Cuno pojoriniaari nia taajetecanu tamaatia nojori niishitiojosacari niajanija. Naajuhuaaj, nia cushitioceanuuri nojori sequesacari nia cararaatiuuquia co nia miatejonura taa Moisés niishitiojoquiaaricuaajani. Nojoriniaari nia shiniujuquianu nia tojitianura socua Moisés Rootasanojuhuaaj. Quiaritia maja naate pueyanaa. ²⁵ Naaratej, saa jiyareta canaajaari niya rerejoreeni canaa niishiriojonura canapue canaa saquiriojonutaniyani niaacua jiyaramiquishocoriquiano. Canaari nojori saquiriojoree tarini canaa jiyarosocoriquiano Pablota, Bernabeetanio, nojori pocoojoriquiano maninia niaata. ²⁶ Canaa panishano pueya Pablo, Bernabeenio, nojoriiri tama na cuaqueya panitiaquiaarijiaaja Jesujiniji nojori pahuatasacari tiquiyocua. ²⁷ Quiarijiani, canaari niaacua jiyaroya canaajinijinio canaa saquiriojosano pueyani. Nojoriiri Judas, Silasnio. Nojoriiri nia sequenutaniya casaa nia miiniutianiyani, naatej, taa canaa pocoojoree canaa rerejosacaricuaajani. ²⁸ Canaa niishiriojosanoori maninia quiya Pueyaso Sohuanura. Canaari na shuquiritiaajuhuaaj. Majaari canaa cushitionu paniniu niajanija puera canaa supuetanaa niishitiojosanota najuhuanaj. ²⁹ Canaari saaja nio nia sequenu paniyani pueyanaa. Nia tojitiare. Majaari socua nia miaquenu shipinijosano pueyasohuacuara puecoosano casaa. Majaari nanaca miaquenu. Naajuhuaaj, niaa jaara shu miaquenu paniri, nia miaquere maninia na nanaca caatinijasano. Naajuhuaaj, saaja nia niqiucohuata nia quiriquia. Majaari socua tamonu numuetucunu. Niaa jaara nio tojjiaa quiri, niaari maninia miyacuaja. Tariucuaja pueyanaa”.

³⁰ Naacuaajitij, cuno cuatro pueyari jiyarosaaquiaari Jerusalén tiacajiniji. Jaara tiuquiiioquiaari Antioquiya tiacajinia, nojoriiri puetunu Jesuucua tiuniaa pueyajanaa numootejoquiaari na rerejonura. Puetunu nojorijianaa

jaara tari rerejoquiaari, jiyacari niquitiosaaquiaariiri cuno naajionee puetunu nojori niquiarajanaa serojosocoriquiano. ³¹ Naajionee jaara serojosaaquiaari, puetunu Jesuucua tiuunaa taucuacajanaari shuquiriquiaari jiyanoehua. Naacuajitij, nojoriiri noojia cajitiquiaariuhua tacaquoyano juucua. ³² Na nuhuaji, Judasri Silasta cuniqui Antioquiya tiacajinia camueenujuquiaari. Nojoriiri Pueyaso Sohuanu cumaaca jiiatiaquiaari, Pueyaso sequenu panishano nojori caminiujiuniuria. Naacuajitij, nojoriiri Jesuucua tiuunaa pueya cumanijiaquiaari jiyanoehua. Na rootatuquiaariiri maja nojori tarinitianura Jesuucua tiuuniu. ³³ Nojoriiri Antioquiya tiacajinia camueenujuquiaari pasaja. Na nuhuaji, nojori quianu panishacariuhua Jerusalén tiacajiniuhua na jiyaronaacua, Antioquiya tiacajinia quiniaa Pueyaso pueyari nojori sequequiaari:

—Maniniacuaja. Juhujaniya nia quiaarohuaqui.

³⁴ Silasri saaja na cojiniaacuaji jateequiaari cuniquijia Antioquiya tiacajinia. Naacuajitij, Judasri tamajaaja tacatequiaariuhua Jerusalén tiacajiniuhua. ³⁵ Pablo, Bernabeeri Antioquiya tiacajinia camueenujuquiaarijihuaj. Nojoriiri cuniqui Jesuucua tiuunaa pueya niishitiojoquiaari. Queraatia cuniquijinio pueyari nojori rupuequiaari niishitiojonurajuhaj. Puetunu nojorijianaari Jiyaniijia Jesujiniji pohuataquiaari tamasaca niquiarajuhaj.

Pablo pacutenu panishacariuhua quianu Pueyaso pueya na niqiniuhua

³⁶ Nojori jaara tari tarishiquiaari tii, Pabloori Bernabé sequequiaari:

—Noo tiacajinia pa camiquioocuara socua niqiniuhua, paa tii pohuatacanu Jiyaniijia rupaatej. Naa pa miiri pa niishiniuria taa parta Jesuucua tiuunaa pueya quiyani.

³⁷ Bernabeeri na riucuaaree:

—Jajaa. Juan pa riyarecuarajaj, pa tarajariquiano.

Juan sesaari Marco quiquiaarijihuaj. ³⁸ Majaari Pablo paniniu quiquiaari Juan quianura nojoritia. Nocuaji Bernabé sequequiaariiri:

—¿Paatucua casaara rupoyare pocua Marco sajaaraniuhua? Nojuacuajaari pa tiujiaquiaariuhua Panfilia jiyajinia pa quishacari. ¿Pueyaso rupaa pa pohuatasacari pa tarajacanu maniniatucuaa? Naacuajaa.

³⁹ Saa nojorijaari socua juayonuutaquiaari Juan Mar-coocua. Nocuaiji Bernabeeri jiyacari Pabloocuaiji rupate-quiaari. Na rupatesacari na rupuena Pablojiniji, nojua-jaari Juan riquiaari cutara na tarajariquiano. Jiyacari-tij, tama nojorijaarijia buquejina quiaquiaari Chipre jiya-jiniara. ⁴⁰ Pabloori saniniuujia Silas saquiriojoquiaari na tarajariquiano. Nojori quiaaquishacarijia, Jesuucua tiuuniaa pueyari nocuara Pueyaso secojotuquiaari. Naa na miitiuniu nuhuajitij, Pablo, Silasnio, nojoriiri panaatia quiaquiaari cu-tara Pueyaso rupaa pohuatanura. ⁴¹ Nojori quiasacari Jesuu-cua tiuuniaa pueya shiniujiuniuucua, Siria jiyacuma tajitiu-miaquiaariiri, Cilicia jiyacumano. Pabloori cuno jiyaca tia-cajinia socua poojotaquiaari Jesujiniji. Naa cumaquiquiaari Jesuucua tiuuniaa pueyari.

16

Timoteo cojishacari Pablo, Silasnio

¹ Pabloori Silasta tiuquijioquiaari Derbe tiacajinia, Lis-tra tiacajinianio. Tii riuriatatuquiaari Timoteo jiyanishano pueyanoori. Cuno mashajaari Jesuucua tiuujia pueyano quiquiaari. Na nucuaari Judio maaji quiquiaari, Jesuucua tiuunijuhuj. Timoteo queeri tahue quiquiaari cutara. ² Litra tiacajinia Jesuucua tiuuniaa pueyari Timoteo manini-ucuatujua. Naa sequetujuaari nojori: “Timoteori jiyano-hua maninia pueyano”. Iconio tiacajinijinio Jesuucua tiuuniaa pueyari naa sequetujuhuj. ³ Naaratej, Pabloori Timo-teo riniu paniquiaari na tarajariquiano. Cunora, coteenu Timoteo cararaatiuuquia co miatetequiaariiri, cuno jiya-jinia quiniaa Judiocuaca sojotanuucaaji nojuaja. Puetunu pueyajanaari na niishijia, na queeri seetanujanaa tahue quijia. Nocuaiji naa miishaareeri. Na nuhuaji, Timoteo cutaraari Pablo cojiquiaari. ⁴ Pabloori Jesuucua tiuuniaa tau-cuaca niquiquiaari puetunu tiacajiniajanaa. Nojori niquiara caminiujuquiaari Jerusalén tiacajiniji Jesu jiyaramiquis-hano pueya sequesano nojoririaari, mariyata Jesuucua tiu-uniaa pueya jiiitanaa sequesanojuhuaj. ⁵ Naa Pablo caminiu-jiushacaritij, puetunu Jesuucua tiuuniaa pueyajanaari socua noojia cumaquiquiaari jiyano-hua. Tamasacaari socua Je-suucua tiuquiaarijuhuaj. Jesuucua tiuuniaa pueyari naa canequiaari socua. Naa caneriquiaa puetunu juucajanaari.

Pueyaso Sohuanu tosarari Pablo, Macedonia jiyajiniara na quianura

⁶ Na nuhuaji, Pueyaso Sohuanuuri Pablo tenujuquiaari maja nojori pohuatanura Jesujiniji Asia jiyajinia. Naacuajitij, nojoriiri Frigia jiyacuma quiojoquiaari, Galacia jiyacumano.

⁷ Naa tiuquiiijioseequiaari Misia jiya shuriucuaari. Nojoriiri cuniquiji quianu paniquiaari Bitinia jiyajinia juucua. Naa-juhuaj, majaari Pueyaso Sohuanu paniniu quiquiaari tii nojori quianura. ⁸ Cunora, Pabloori na cojiniaata cuaniquiaari Misia jiyacuma. Troas tiacajinia tiuquiiijioseeri. Nio Troas tiacaari shoniacu caminia casaqueyaji quiya. Tiiri buque tiuutiacojua. ⁹ Pabloori cuno niucua juhua na maquenujini niquiquiaari Macedonia jiyajinijinio pueyano nocua nujuuano. Cuno pueyanoori Pablo sequequiaari: “¡Miji! Cana quia naacutaquee Macedonia jiyajinia”. Cuno Macedonia jiyari quiquiaari shoniacu caminia taquijiria. ¹⁰ Naa Pablo niqini nuhuaji juhua na maquenujinatej, canaari jiyacari ritia pajequiaarini taa cana quianutaniya cuniquijini. Canaari sequereeni:

—¡Pa quiaarequij! Pueyasocujaari pa panitiaa Jesujiniji pa pahuatanura cuno pueya niquiarajuhuj.

Pablo quishacari Filipo tiacajinia Silasta

¹¹ Canaari Troas tiacajiniji quiaquiaari buquejiniani. Canaari Samotracia jiya tucuaatiajaacua tiuquishiini. Canaari cuniquiji sanequiaari tariquiniuhuj, tiuquishiiri Neápolis tiacajinia. ¹² Canaari cuniquiji quiaama Filipo tiacajiniani. Filipo tiacaari socua panishano tiaca quiquiaari tamasa tiacajiniji Macedonia jiyajinia. Roma tiacajinijinio pueyari tii pacuquiaari tarijia. Nojoriiri cuno Filipo tiaca jiyatequiaari nojori quiquiora. Canaari tii camueenujuquiaari rupaquijiani. ¹³ Cuniqui cana quishacari, canaari samaatenu juuca quiaquiaari cuno tiacajiniji moo casaqueyajiriani. Canaari soquequiaarini cuno pueyari tii jiiitiquiaari Pueyaso secojonura. Canaari tii narejashiquijia cajitiquiaari mariyatani. Jiyacaritij, maajipohuari cuniqui rerejoquiaari na secojonuunura juucua. Canaari saaja nojori niquiara pahuataree Jesujinijini. ¹⁴ Cuniqui maajipohua rerejosaquini, nojori tajinia quiquiaarijiaariuhua tamonu maaji. Na sesa quiquiaari Lidia. Nojuajaari Tiyatira tiacajinijinio quiquiaari. Shanohua quenaaruqueya naatuque toqueya niqutiojojua quiquiaari na cumaneecaraari. Nio maajiiri tarijia Pueyaso secojojua quiquiaari. Tii na quishacari, Pablo pahuatasano tojiriquiaari. Pueyasoori jiyacari na tojeterree. Juhua noojia riatareeri seetanujuanaa Pablo pahuatasano na tojiniuria maninia. Jesuucua tiuuriiri. ¹⁵ Na nuhuaji, Lidiaari puetunu na tajinia quiniaatajanaa tiuquinijosaaquiaari moojinia. Cana tiuquinijionu nuhuaji puetunu nojorijianaa, Lidiaari cana sequequiaari:

—Niaa jaara cucuaji taacanuyaquiri, miji, nia quishii cua tiajinia. Janiyari pa Jiyaniijia tojjiajuhuaj.

Nojuajaari seetanujuanaa canaa panitiaquiaari na tiajinia canaa quiniuria. Naacuajitij, canaari na tiajinia camueenujuquiaarini.

¹⁶ Tamonu juuca, socua canaa pacutesacari quianu pueya secojonuujuajiniara, canaari samaruraca niyacoo niqiquiaarini. Cuno niyacoori camaruhuaraca quiquiaari. Niyacoori “niishijia samaru” jiitiaja. Naaratej, cuno niyacoori puetunu pueya niishiniu panishanojuanaa pohuataja nojoriria. Naa na miishacaritij, na camaruhuara maseja queraatia cumaneecaari. ¹⁷ Cuno niyacoori canaa nuhuaji sacuariquiaa. Naa nacariquiaa canaa na nuhuajishacariiri:

—¡Nio canuu cutaraari jiyocuacaanuji Jiyaniijiajiniji pohuataanaa! Nia niishitiojiyari Pueyaso jiyanooshano nia quiniuria, pueyaracaanu nia rishiniuria nata.

¹⁸ Saa naa canaa nuhuaji nacajaari, cuno tiacajinia canaa camueenujusacari. Pabloori socua na juaatiaquiaari. Nocua tacatequiaariiri. Cuno niyacoojinia quijia samaru sequereeri:

—¡Janiyari Jesucristo sesajinia quia jiyaroyani! ¡Cuno maajijiniji quia tohuatare!

Naa Pablo sequesacaritij, samaruuri na tojiquiaari. Ritia tohuataquiaari cuno niyacoojinijiiri.

¹⁹ Cuno niyacoo camaruhuari niishiquiaari maja tari nojori masenu quiniutianiya socua cumaneeca juhua coteenu, niyacoo pohuatasanojiniji. Naaratej, nojoriiri Pablo, Silas quiooquiaari na juaaniutia. Nojori jaatucunuquiaari tiaca jiuujiajinia curotasano pueya cajitiucujiniaraari. Tiaca jiyaniijianucuaari tii quijiaca pueyaracaanu, nojori jiitiana nura pueya. ²⁰ Niyacoo camaruhuari Pablo, Silas nujuatejoquiaari tiaca jiyaniijianucua tajoji, cuniqui na nequesoreesanura. Jiyaniijianucua sequetureeri:

—¡Nio canuuri Judiocuaca! Nojoriiri niya pa tiacajinia quiniaa pueya juaatijiosee. ²¹ Nojoriiri tamaatia niishishano niishitiojonuya. Maja cumaati pa tojiniunioj. ¡Paari Romano pueyani!

²² Naacuajitij, puetunu cuno pueyajanaari na juaaniutia, Pablo, Silas cosequiaari ritia. Jiyaniijianucuaari nojori toqueya jaamitiquiaari jiyanohua, na jocojosacari nojorijiniji. Na nuhuaji, tamasaari seeratasaree nojori na mojoonura macata. ²³ Jiyanohua na mojoosaanu nuhuaji, nojoriiri socua na tiuquinijioquiaari nujuatejojuajinia. Na nuhuaji, nujuatejojuua tia camarnu seeratasareeri maninia na cojuatenura

nojori nujuatejojuajinia. ²⁴ Naacuaajitij, cuno nujuatejojua tia camarnuuri Pablo, Silas nujuatejoquiaari socua mij, nujuatejojua cariquimiatej. Cuniqiu nujuatejosaaquiaariiri tii na cojuasaanura maninia, na mashiyocuatunuucuaaji. Nojori cashacucuaari suruhuatuneecca quejasano tajiniocoma saati-jiosaaquiaarijiuhuj.

²⁵ Cuno niucua shiyaqueya, Pabloori Silasta Pueyaso seconuuriquiaajaa. Pueyaso maniniuuaqueetaturiquiaari na jaaquequejosanota. Cuniqiu nujuatejosano pueyari nojori tojitiariquiaa. ²⁶ Jiyacaritij, rijiaari canashiyaquiji jiuuquiutiaquiaari jiyanohua cuno nujuatejojua tia. Puetunu na tiotiuhuajanaari riataquequiaari. Puetunu pueya numatucuaacua morojotasano casaajanaari tamajaaja saacarejetaquiaari. ²⁷ Nujuatejojua camarnuuri ritia niucuaquiaari. Saaja niquirii puetunu tohuateya riataquenोजनाari. Cunora, na nijiniaquetucuaaja mueruu shitiaree ritia na shuucuaajiiri tama na cuaqueya na miaquenurajaaja. Naa miiriiri na jiyanihacari puetunu nujuatejosano pueyajanaa naasucuaari tari mashiyocuatuneecca. ²⁸ Pablo jaara na niquiquiaari, nocua nacareeri:

—¡Maja najuhuana naa miiniutij! ¡Canaacuaajaari puetunu-juanaa niya quiyani!

²⁹ Nujuatejojua camarnuuri na shiriiquiniutia tetecariquiaa. Tamonu sequereeri ritia samaritiu na patanura nocua. Samaritiu caaniuji netequee cutaraari nujuatejojua jiniacumara. Pablo, Silas cariquimiaaji mojuquetaseeri. ³⁰ Jiyacari nojori tohuatejoree carijiniacumaari. Nojori nequesotareeri:

—¡Pueyanaa! ¿Taa cua miyarinijia, Pueyaso jiyanooshano cua quiniuriajuhuaj?

³¹ Nojoriiri na riucuaaree:

—Jiyaniijia Jesucristoocua quia tiuuri jiyanooshano quia quiniuria, puetunu quia tiajinia quiniaa quiniuria jiyanooshanojuhuaj.

³² Naaratej, Pabloori Silasta na niquiara pohuataree Pueyaso rupaa Jesujiniji, mariyata puetunu na tiajinia quiniaajanaa niquiaranio. ³³ Jiyacaritij, nujuatejojua camarnuuri cuno niucuaaja Pabloocua jiyanoocuaari, Silascuanio. Nojori cuaqueya majacuyashiquia jeequejoreeri. Na nuhuaji, puetunu cuno pueyajanaari ritia tiuquinijiosaaquiaari mojinia Jesucua nojori tiuushacari. ³⁴ Jiyacari na tiajinia nojori jiyataquiaariiri. Tii Pablo, Silas mianuutereeri. Cuno nujuatejojua camarnuuri jiyanohua

shuquiriaatia quiriquiaa puetunu na tiajinia quiniaatajanaa, Pueyasocua tiuunaa nojori quishacari.

³⁵ Cuno tariqui, Filipino tiaca jiyaniijianucuaari na seya jiyaroquiaari nujuatejojuua tia camarnuucua, na sequenura nojuaja cuaara Pablo, Silas tohuatanijioora tari.

³⁶ Nujuatejojuua camarnuuri Pablo sequesee:

—Tiaca jiyaniijianucua cucua jiyaroree na rupaani, cua cartenura quiarijia niajaniya. ¡Juhuajaniya nia quiaarohuaqui!

³⁷ Pabloori saaja jiyaniijianucua seya sequequiaari:

—¿Majateeri nia jiyaniijianucua niishiniu canaari Romano pueyajuhuaaj? Canaa mojooturiquiaacuaa puetunu pueya niquiarajanaari. Majaari coteenu canaa nequesoreesaanu quiuucuaa. Canaari jiyanojuua nujuatejosaarucuaani. ¿Taa na miitiuniu paniya quiarijia canaarini, jiyasohuaja tohuatejonu paniniu? ¿Jiyasohuaja mojooturiquiaacuaa canaatucuaa? ¡Nojorijianaa cuaara niiria quiarijia, niiquiji nojori tohuatejonura canaa!

³⁸ Jiyaniijianucua seya jaara tacatequiaariuhua, puetunu Pablo sequesanojuanaa pahuataquiaari Filipino tiaca jiyaniijianucua niquiarari. Nocuaji jiyaniijianucuaari puertuquiaari nojori niishishacari Pablo, Silas Romano pueya quiquiaarijihuaj. ³⁹ Naaratej, cuno jiyaniijianucuaari ritia quiaquiaari nujuatejojuajinia Pabloocua, Silascuanio, nojori jiyanoootionura. Jiyaniijianucuaari nojori tohuatejosee. Nojori sequereeri cuaara quiojoora quenaaja nojori tiacajiniji.

⁴⁰ Naacuajitij, Pablo, Silas jaara tohuareetaquiaari nujuatejojuajiniji, Lidia tiajinia quiojoquiaariiri. Tii rootatuquiaari socua Jesuucua tiuunaa pueyari, socua Pueyasocua nojori tiuuniuria. Na nuhuaji, tiji quiojoquiaariuhuari.

17

Tesalónica pueya juaashacari Pueyaso pueya

¹ Pablo rucuanijosacari Silasta Jesujiniji nojori pohuatasacari, nojoriiri jiyacari shoconujutuquiaari Anfípolis tiaca, Apolonia tiacanio. Naa tiuquiiijioseequiaari socua Tesalónica tiacajiniaari. Cuno tiacajinia quiquiaariiri Judiocuaca rerejojuua tia. ² Taate Pablo quijiacuajani, nojuajaari narta Judiocuaca rerejojuua tiajinia quiaquiaari. Cuno tiacajinia na quishacari, jiuujianaraca semaana shocotejoquiaariiri. Puetunu semaana shocojosacarijianaa, samaatenu juuca, cuno pueya niquiarara pahuataquiaari Pueyaso ruupaari. ³ Pabloori nojori niishitiojoquiaari taa tariucuaaanu Pueyaso sequesano caminiujiunaa naajiotaquiaari Pueyaso Jiyarosocoriquianojinijicujani. Niishitiojoquiaariiri cuno

naajiotasanoori tari tohuateequiaari Jesu jaara naquiya mi-
ishaaquiaari, naajuhuj, Jesu jaara na cusonu nuhuaji sami-
itiaquiaariuhua. Naa nojori sequereeri:

—Nio Jesucujani, janiya nia pohuataani, nojuajaari
Pueyaso Jiyarosano pocua.

⁴ Jiyacaritij, noojiaqueya Judiocuacaari Jesuucua
tiuquiaari. Queraatia taucuacaari Jesuucua tiuquiaar-
ijihuj, canapute tari Moisés niishitiojosano tojjijaca
quiquiaaricujani. Queraatia cuno tiacajinia quiniaa
pueya tojjishano maajipohuari Jesuucua tiuquiaarijihuj.

⁵ Pueyasocua tiuyashijaca Judiocuacatej, nojoriiri
jaaquioquiaari juhua shocotasano nojori quiniucua.
Nocujaji, nojoriiri sesa miiijaca taajecori masuunujuquiaari.
Nooj, nareja rucojuaca tiacaacacotej. Cuno pojoriiri
masusaaquiaari nojori na cojiniuria, tamasa nojori
nasojonura. Na nuhuaji, puetunu cuno pojorijianaa
jaara tonujutooquiaari taa na miitiuniutianiyan, nojoriiri
puetunu cuno tiacajinia quiniaajanaa juaatiquiaari Pueyaso
pueyacuara. Nocujaji, puetunu cuno pojorijianaari Jasón
tiaco tiuquitiaquiaari, Pablo, Silas nojori quioonura juucua,
jaaquioyano pueya nojori niquitiosocoriquiano. ⁶ Nojori
jaara na riuriataaquiquiaari, noojiaqueya Jesuucua tiuuniaa
pueyari Jasóna cojiritiasaaquiaari quioonu. Cuno tiacajinia
jiyaniijiacacua na jayotuquiaariiri. Naa nacatureeri:

—¡Nio canuuri puetunu jiyacajinia pueya sesojijajanaa!
¡Niya tiuquiijioreejaariuhua naa na miiniurijuhuj! ⁷ ¡Jasónri
nojori masecanu maninia na tiajinia! ¡Puetunu nojori-
jianaari pa jiyaniijia César sequesano tojtiaashijaca! ¡Nojori-
iri saaja sequequiaa socua tamonu jiyaniijianaari quiya! ¡Na
sesanaari “Jesu”! Naa sequetuquiaaqui nio pojori.

⁸ Puetunu pueyajanaa, mariyata tiaca jiyaniijianucuanio,
nojori jaara naa tojiquiaari sequeshiyanotej, nojoriiri
jaaquioquiaari. ⁹ Jiyacaritij, tiaca jiyaniijianucuaari
queraatia cumaneeca masequiaari Jasónjiniji, narta Jesuucua
tiuuniaa pueyajinijinio. Naa sequeturee nojoriiri:

—¡Pablo jaara niiquiji quiaaquiri, majaari canaa niquitionu
quiniutianihua nia cumaneeca!

Naa na miishaanu nuhuajitij, Jasónri nata quioosano puey-
ata cartequesaaquiaariuhua.

Berea tiacajinia Pablo quishacari Silasta

¹⁰ Cuno niucujaja, cuno tiacajinia quiniaa Jesuucua
tiuuniaa pueyari Berea tiacajiniara mashiquiquiaari Pablo,
Silasnio. Berea tiacajinia na tiuquiiijosacari, cuniqui quiniaa
Judiocuaca rerejowua tiajinia quiojoquiaariiri. ¹¹ Cuniqui
quijica Judiocuaca cutaraari maninia pueya quiquiaari,

maja juhua Tesalónica tiacajinia quiniaa. Naacuajitij, Pablo jaara Jesujiniji pohuataquiaari nojori niqiuara, nojoriiri maninia tojtiaquiaari na pohuatasano. Na nuhuaji, puetunu juucajanaa, tama nojorijiaarjia tariucuacaanu Pueyaso Rupaajinia naajiotasano pajenuquiaari, nojori niishiniuria seetanujuanaa quiriquiaate Pablo niishitiojosano. ¹² Naacuajitij, queraatia Judiocuacaari Jesuucua tiuquiaari, queraatia taucuacanio, canuu, mariyata queraatia tojishano maajipohuanio. ¹³ Tesalónica tiacajinia quiniaa Judiocuaca jaara niishiquiaari Pabloori Berea tiacajinia Pueyaso rupaa pohuataseeecuahuaj, nojoriiri nocua quiojoquiaari nojori taanuunura nojuaja cuniquijijiuhuaj. Na tiuquijiosacari Berea tiacajinia, cuniqui pueya nasojoseeri, Pablo na juaatiuniuria. ¹⁴ Nocuaji, Jesuucua tiuuniaa pueyari cuniquiji ritia mashiquiaari Pablo shoniacu caminiajiniara. Silasri Timoteota Berea tiacajinia jateequiaari saaja. ¹⁵ Berea tiacajinijinio pueyari Pablo mashitiaquiaari, nuu na niishitiniuria. Nojoriiri Pablo jiyataquiaari Atenas tiacajiniara. Nojoriiri cuniqui jataquiaari Pablo. Cuno pojori jaara tacaretanu paniquiaariuhua cuniquiji Berea tiacajiniohuara, Pabloori nojori sequequiaari:

—Niocua ritia jiyarosuhua Silas, Timoteonio. Nojoricua niyaja cua coquesee.

Pablo quishacari Atenas tiacajinia

¹⁶ Pabloori Silas, Timoteo sashiquiaari Atenas tiacajinia. Cuno tiacajinia na rucuanijosacari pueya na sashishacari, Pabloori niqiuquiaari tama cuno pueya shipinijosanojuaja na pueyasohuara. Nojori shipinijosanoori puetunu cuno tiacajiniajanaa quiriquiaa. Pabloori cunora jiyanohua tacaquiaari. ¹⁷ Pabloori Jesujiniji Judiocuaca poojotaquiaari nojori rerejonuujua tiajinia, noo pojori taucuacajuhua, canapuate Pueyaso tojtiajaca quiquiaaricujani. Naajuhua, Pabloori cuno tiaca jiuujiajinia pueya cajitiucuaa curotasanoinia pohuataquiaari Jesujiniji cuniqui quiniaa niqiuara. ¹⁸ Tamasaca niishijiaacari Pablo pohuatasacari Jesujiniji tojtiaquiaa. Nojoriiri caapiqui maapuejinijinio quiquiaari. Tamonu maanuuri sesojosaaquiaari “Epicureohua”, Epicuro jiyanishano niishijia niishitiojosano tojtiajaca nojori quiniuucua. Tamonu maanuuri saniniuujia sesojosaaquiaari “Rejeretajaca”. Naa sesojosaaquiaariiri Zenón jiyanishano niishijia niishitiojosano nojori tojiniuucua. Pablo pohuatasacari nojori niqiuara, nojoriiri maja na niishitiuniu quiquiaari casaa na pohuatariquiaani. Nocuaji tama nojorijiaarjia sequetooquiaari:

—¿Casaariquitijia cuno paateca pahuataa pajaniyatejaj? Najujuana pocuaa pueyaraanuuri.

Tamasacaari saniniuujia sequetuquiaari:

—Tamasaca pueyasohuajiniji poojotana juhuanaruhua.

Nojoriiri naa sequeriquiaa Pablo pahuatanuucua Pueyaso rupaa Jesujiniji, mariyata taa cusonuuno samiitiaconutaniuhua. ¹⁹ Na nuhuaji, nojoriiri Pablo jiyataquiaari tuhuanujiniji, tee nojori jitiquiaari rerejonuunucujani. Cuno tuhuananu sesaari quiquiaari Areópago. Nojoriiri naa sequetuquiaari Pablo:

—Miji. Socua canaa tojishocoriquiano quia pahuataqueeruhua. Canaari quia pahuatasanojiniji socua maninia niishiniu paniyani. ²⁰ Quiaari jiyajeneta sequeriquiaa canaa niquiara quia pahuatasacari. Quiarijia canaa quia tore maninia.

²¹ Puetunu Atenas tiacajinia quiniaa pueyajanaa, mariyata tamonu jiyacajinijinio cuniqui quiniaajuhua, nojoriiri maja socua tamonu casaa na miitiuniu quijia. Saaja quiarinio sequesanojiniji niishitiuniu panijiacari.

²² Jiyacaritij, Pabloori Areópagojiniji nujuaquiaari na pahuatanura na tojtianu panijiacaa niquiara. Naa coteereeri:

—Atenas tiacajinia quiniaa pueyanaa, janiyari quiarijia niishiyani, niaaqui pueyasohuacua jiaatiajaca jiyano. ²³ Janiyari naa nia sequeyani pueyanaa, cua niqiniuucua queraatia nia shipinijosano pueyasohua, cua rucuanijosacari nia tiacajinia. Naajuhua, janiyari saajiajiniji nia shipinishano juhua juhuacutura niquiriucuaajuhua. Nocua naajoori sequeya, “Niishishoo Pueyasora”. Cuno Pueyaso niaa na tojtiaquiaa na niishiyaquiniutiani, nojuajaari nio Pueyasocuaaja janiya nia pahuataani.

²⁴ Cuno Pueyasoori nio jiya shipiniquiaaricuaaja, puetunu pa niquishanojuanaanio. Nojuajaari jiyocuaaanu camarnujuhua. Nojuajaari puetunu tiqiyocuaajanaa Quijia. Majaari pueya tiajosano secojojua tiajinia na quiniu. ²⁵ ¿Taa nia jiyaniyani pueyanaa, cutara Pueyasojuaanaate pa jitiiasano casamijiniji paniyajuhua? Maja. Nojuacuajaari puetunu pa jitiiasanojuanaa shipiniquiaari puera. Pa rishiniuria, na Sohuanujiniji pa niqutioquiaarijiaariuhua, pa rijiosocoriquiano paratunio.

²⁶ Pueyasoori niquiriyatu pueyano shipiniquiaari juhucatecara. Paari cuniquiji canequiaarini, puetunu jiyacajinijanaa pa quiniuria. Pueyasoori tarijia sequequiaari tee pueya quiniutianiyani. Sequequiaarijiaariuhua taacari tii pa quiniutianiyani. ²⁷ Pueyasoori naa panitiaquiaaricuaaja puetunu jiyacajinia quiniaa pueyajanaa pajenura nojuaja.

Pueyasoori pa saniya, na niishiniuria, ¿pueyate na pajenu-taniyani pa riuriatanura nojuaja? Pueyasocuajaari maja na quiniu tucuacaanu pajaniyajiniji. ²⁸ Pueyasoori pa samitiianiya. Pa cumaquiquiaajaariuhua pa poonijionura. Pa rishitiquiaajaariuhuj. Naatej, taa nia pahuatajaca sequequiaaricujani: “Paari Pueyaso muerasuni”. ²⁹ Paa jaara seetanujuanaa Pueyaso muerasu quirini, majaari socua pa jyaniniu Pueyaso naasucuaari juhua orojiniji pa shipinijosano niquishano. Majaari juhua platajiniji shipinishano, juhua saajiajiniji shipinishanonio. Pueyaso cutaraari maja na niquishaanu juhua tama pa niishiriojosanojuaja. Majaari na niquishaanu taa pueya shipinijoquiaacuajani, nojori jyanishacari Pueyaso naasucuaari naa niquishanotej. ³⁰ Pueyasocuajaari pueya miiniu sesa rejeretariquiaa pueyaracaanu. Saniniuujia, nojuajaari quiarijia puetunu tiquiyocua quijiaca pueyajanaa sequeya, nojori cartenura puetunu sesa na miiquiosanojuanaa, saaja nojuaja nojori tojtianura. ³¹ Pueyasocuajaari tari saquiriojoquiaari tamonu juuca taacari na nequesoreenutaniya mijiria quini-aani. Maninia pa nequesoreenutaniya puetunujuanaari. Pueyasoori tari na saquiriojosano pueyano jiitiaa pa nequesoreeriquianojuhuaj. Na samiitianishacari cuno pueyano macujiniji, nojuajaari naa pa niishitiquiaari, cunocujaari na saquiriojosano pueyano.

³² Nojori jaara tojiquiaari Pablo pahuatasacari taa macunucua samiitiaconutaniuhuani, cuno niishijiacaari na saroojotaquiaari na rerequetenuta. Tamasacaari saniniuujia Pablo sequequiaari:

—Canaacua tamacari quia tojiriirianiuhuj.

³³ Na nuhuaji, Pabloori cuno pueya tajiniji quiacuhua. ³⁴ Noojiaqueya cuno pueyajinijinioori Jesuucua tiuuquiaari, Pablo pahuatasano nojori tojtiasacari. Nojorijinijinioori quiquiaari Dionisio jyanishano pueyano. Nojuajaari Areópago niishijiaca pueya maanujinijinio quiquiaari. Jesuucua tiuuquiaariijaariuhua tamonu maaji. Dámaris na sesa. Socua tamasaca pueyari Jesuucua tiuuquiaarijuhuaj.

18

Pablo quishacari Corinto tiacajinia

¹ Na nuhuaji, Pabloori Atenas tiacajiniji quiaquiaari Corinto tiacajinia. ² Cuniqwi riuriataseequiaari tamonu Judio pueyanoori. Na sesaari Aquila quiquiaari. Nojuajaari Ponto jiyajinia rasaanquiaari. Aquilaari necocua Priscilata

shusha Italia jiyajiniji tiuquiiijiono quiriquiaa Corinto tiacajinia, tii Pablo tiuquishacari. Jiyacaritij, Claudioori jiyaniijiajanaa quiquiaari Roma tiacajinia, Italia jiyajinia. Nojuajaari puetunu pueyapue camarnujuanaa quiquiaari puetunu jiyacajiniajanaa. Nojori jiitiaquiaari Roma tiacajinijiiri. Nojuajaari tama na tiacajinia pueyajaaja sequequiaari puetunu Judiocuacajanaa nojori taanuunura Roma tiacajiniji. Naaratej, Aquilaari necocuata quiaquiaari Roma tiacajiniji. Corinto tiacajinia quishiiri. Pabloori nojoriicua quiaquiaari nojoritia na pocoojonura. ³ Aquilaari necocuata suhuoronuutaja toqueya cusupuenuejua quiquiaari juhua Pablojuhuaj. Naaratej, Pabloori nojoritia quishii, mariyata na poonijionuunura tii. ⁴ Pabloori maja nareja na shocotenu quijia samaatenu juuca. Nojuajaari Judiocuaca rerejojua tiajinia rucuanerjojua. Tii nojori pohuataquiaari Jesujinijiiri, taucaca niquliaranio, noo pojori canapueete Judiocuacara jiyatesaquiaaricuajani, tariucuacaanu Moisés niishitiojosano nojori tojishacari.

⁵ Silas jaara Timoteota Pabloocua tiuquiiioquiaari Macedonia jiyajiniji, Pabloori jiyacari coteequiaari puetunu juucajanaa Jesujiniji pohuatanura Judiocuaca niquiara. Nojori sequequiaariiri:

—iJesucujaari nia sashishano, Pueyaso Jiyarosano seetanujuanaa pocua!

⁶ Judiocuaca jaara tojiquiaari naa Pablo sequesantej, na tojitiaaquirii saajaari nojori cuaracashitiniutia Pablo sequesano. Saaja juaaquioreeri. Sesa pocooreejaariuhua. Naaratej, Pabloori nojori niquiara na toque nuutojoquiaari, nojori niishiniuria Pablo tari nojori tiujiaarohua. Pabloori nojori sequequiaari:

—Majaari cucua nia tiuutianu, Pueyaso jaara mijiria quiniaa saniitiore. Niaacuajaari Pueyaso rupaa ruuretaquiaa saaja. Quiarijia taucuaacua quiaa cutaranijia, nojori cua pohuatanura Pueyaso rupaa Jesucristojiniji.

⁷ Na nuhuaji, Pabloori cuno Judiocuaca rerejojua tiajiniji tohuataquiaariuhua. Tamonu pueyano tiajinia quiaquiaariiri. Cuno pueyano sesaari quiquiaari Justo. Nojuajaari Pueyaso tojinia quijia. Na tiaari jiyareta Judiocuaca rerejojua tia shuriucua quiriquiase. ⁸ Crispoori jiyacari cuno Judiocuaca rerejojua tia camarnu quijia. Nojuajaari puetunu na tiajinia quiniaa pueyatajanaa Jesuucua tiuquiaari. Naajuhuaaj, queraatia Corinto pueyari Jesuucua tiuquiaari Pueyaso rupaa nojori tojishacari. Naaratej, puetunu Jesuucua tiunuaajanaari moojinia

tiuquinijiosaaquiaari. ⁹ Jiyacari tamonu niucua, Jiyaniijia Jesuuri Pablo sequequiaari na maquenujinia:

—Maja quia puerenu Pablonaa. Socua quia pohuatare cuno pueya tojishocoriquiano. Majaari sanaajenu. ¹⁰ Janiyacuajaari quiata quiyani. Majaari quenaaja tamonu pueyano jiyashiniu quiniutianiya taa na miiniu paniniuria quiajaniya. Janiyari queraatia pueya nio tiacajinia jiiitiaa cucua tiuriquianoni.

¹¹ Naaratej, Pabloori Corinto tiacajinia jiyojequiaari. Tii na quishacari, quera shocojotequiaari caapiqui marijiaari. Cuniqwi na quishacari, Pueyaso rupaa niishitiojoriquiaa cuno pueyari.

¹² Jiyacaritij, Galión jiyaniishano tahueri Acaya jiyajinia pueya camarnu quiquiaari. Corinto tiacaari Acaya jiyajinia quiriquiasejuhuaj. Jiyacari, Judiocuacaari tii Pabloocuara roojotooquiaari. Na nuhuaji, na quiatuquiaariiri. Naa na jaatucutuquiaari cuno jiya camarnuucuaari, Pablo nequesoreesaanura. ¹³ Naa sequetusee camarnuuri:

—¡Canaa camarnunaa, nio pueyanoori pueya shiniujiya Pueyaso nojori shuquiritianura tamaatia canaa supuetana Moisés Rootasanojiniji!

¹⁴ Pabloori jiyacari juucua pocuanu paniriquiaa. Galiónri saa na rupaa niyacutequeejaa senota. Cuno Judiocuaca sequereeri:

—Judiocuacanaa, niaa jaara maninia miyashijiaca cucua jaatucure cutara, sesa miijiaca sequenio, janiya maara jiyano pueyanooacara nia tonujusacari tojiri cutarani. ¹⁵ Niaari saaja tama nia niishishanojiniji juayonuutaajaacujua. Maja cua nequesoreenu quiniutianiya tama nia juayonuutasacarijiaaja nia sequesano tamasaca shaajecono pueya sesacajiniji, tama nia supuetanaa rootasanojinijiaajanio. ¡Tama nia jecatoorejaaja!

¹⁶ Na nuhuaji, cuno camarnuuri nojori juaarii. Na shuricuaji na jiyaramiquiriohuari. ¹⁷ Naa Galión miishacari nojoritij, narta taucuacaari cuniquijia quiatuquiaari Sóstenes, Judiocuaca rerejojua tia cojuana. Na piquitiurii camarnu Galión niqwiara cuniquijiaari. Majaari Galión tenujunu quirii nojori. Nareja na niquiriquiaari.

Pablo riujiuushacariuhua Antioquiya tiacajiniohua. Na nuhuaji jiuujianaraca pacutequiaariuhua quianuuri

¹⁸ Pabloori cuniqui queraatia camueenujuquiaarijiaara Corinto tiacajinia. Tari na riujiuushacariuhua cuniquiji, na nuhuajiria saruhuataarohua narta Jesuucua tiuunaa pueyari. Buquejinia quiaarohua Siria jiyajiniohuari. Na cojiriquiaajaari Priscila, neyaca Aquilano. Nojori

tacataaquishacarijia buquejiniacuma, Cencrea tiacajiniji na quiojonura, Pabloori jiyacari na naca riuujiuquiaari caritianajara. Nojuajaari Pueyaso sequequiaari tari, maja na naca na riuujiutiniu quiniutianiya nojuaja jaara na sequesano Pueyaso tucataaquiri.

Cunora, naa quiarjia riuujiutirii na nacaari. ¹⁹ Nojori tiuquijiosacari Éfeso tiacajinia, Pabloori tii jatamaquiaari Priscila, Aquilano. Nojuajaari tajimiaa Judiocuaca rerejovia tiajinia. Cuniqii rerejono Judiocuaca pohuatasee Jesujiniijiri. ²⁰ Nojoriiri Pablo nenecojoquiaari juucua cuniqui na camueenujunurajaara nojoritia. Majaari Pablo paniniu quiquiaari. ²¹ Cuniqii quiniaa sequereeri:

—Quiohuanijia pueyanaa. Jerusalén tiacajiniara secohuanijia. Canaari tii rerejonutaniya Jesuucua tiuuniaa pueyatani. Pueyaso jaara paniri, janiyacua nia niquniuria tacate-mohuaraniuhuj.

Cuniquiji tacaquiaariuhua buquejiniiaari. Éfeso tiacajiniji quiaarohuari. ²² Pablo tiuquishacariuhua Cesareya tiacajiniohua, cuniquiji quiamaa Jerusalén tiacajiniiaari, puetunu Jesuucua tiuuniaa na saruhwatanurajanaa. Na nuhuaji, quiaarohua Antioquiya tiacajiniiaari. ²³ Cuniqii tarishiquiaari pasajaari. Na nuhuaji, socua quiaquiaariuhua cuniquijiri puetunu jiyacajiniarajanaa. Quiariquiaari na niquniuhuara Jesuucua tiuuniaa pueya Galacia jiyajinia, Frigia jiyajinianio. Pabloori nojori niquiara pohuataquiaari socua Pueyaso rupaajiniji. Jesuucua tiuuniaa nacasuquiaariiri maja nojori tarinitianura Jesuucua tiuuniu.

Éfeso tiacajinia Apolo pohuatasacari Pueyaso rupaa

²⁴ Jiyacaritij, tamonu Judio pueyanoori Éfeso tiacajinia tiuquiquiaari. Alejandria tiacajinijinio pueyano. Na sesaari Apolo quijia. Nojuajaari maninia Pueyaso rupaa pohuatana quiriquiase. Tariucuacaanu Pueyaso Rupaa naajiosano niishijia quiquiaariijaariuhuj. ²⁵ Nojuajaari maninia niishitiojosaaquiaari Jiyaniijia Jesu niishitiojosojiniji. Shitimia pohuataja pueya niquiaraari. Maninia niishitiojovia Jesujiniji na pohuatasacariijaariuhuj. Seetanujuanaa sequeja Jesujiniji puetunujuanaari. Maja cutaraari na niishiniu quijia Pueyaso Sohuanute pueyano jiuujiajinia tiuquijia. Saaja moojinia tiuquinijionu niishiquiaariiri, taa Tiuquinijiona Juan niishitiojoquiaaricuaani. ²⁶ Apoloori na puerenu jataquiaari tii na pohuatasacari Pueyaso rupaa narta Judiocuaca rerejovia tiajinia. Aquilaari Priscilata tii

quiriquiaajuhuj. Apolo pohuatasano tojitiariquiaari. Apolo jaara puecaquiaari pohuatanu, nojoriiri tamocora na jaatucuquiaari na niishitiojonura taa pa jatanishaaquiaa Pueyaso Sohuanutani, Pueyaso muerasu pa quiniuria cutara. ²⁷ Na nuhuaji, Apolo jaara quianu paniquiaari Éfeso tiacajiniji Acaya jiyajiniara, Jesuucua tiuuniaa pueyari na cumaquiquiaari. Naajuhuj, nojoriiri Acaya jiyajinia Jesuucua tiuuniaa pueyacuara naajioquiaari Apolo patasocoriquiano, maninia cuno pueya tojiniuria nojuaja na tiuquishacari tii. Jaara tiuquishiiquiaari Acaya jiyajinia, Apoloori Jesuucua tiuujaca cumaquiquiaari jiyanoehua, nojori na niishitiojosacari. ²⁸ Apoloori nojori niqiuara niishitiojoquiaari tariucuacaanu Pueyaso Rupaajiniji naajiotasano. Jiyanoehua maninia na niishitiojosacari Jesuuri seetanujuanaa nojori sashishano quiquiaari, naacuajitij Judiocuaca niishishano pataquiaariiri.

19

Pablo quishacari Éfeso tiacajinia

¹ Apolo quishacari Corinto tiacajinia, Pabloori saniniuu-jia Antioquiya tiacajiniji quiaquiaari nucuaco Éfeso tiacajiniara. Na quiasacari, tuhuananuhua shoconujuquiaariiri. Naa tiuquishiiquiaari Éfeso tiacajiniaari. Tii riuritaquiaari Pueyaso pueya maanuuri. ² Pabloori jiyacari nojori nequesotaquiaari:

—¿Niaate Pueyaso Sohuanu tiuquiniquianu nioojiajinia, Pueyaso rupaacua nia tiuushacari?

Pablo riucuatereeri:

—Majaari quenaaja canaa niishiniu quijia Pueyaso Sohuanute quiyajuhuj.

³ Pabloori nojori sequequiaari:

—¿Casaara nia tiuquinijiosaacanucuararini?

Nojoriiri na riucuaquiaari:

—Canaari tiuquinijiosaaquiaarini taa Tiuquinijiona Juan niishitiojoquiaaricujani.

⁴ Pabloori nojori riucuaaree:

—Taaquiririni. Tiuquinijiona Juancuaaquiniateja pueya tiuquinijioquiaarijiaj, nojori jaara noojia tacatoquiaari sesa na miitushanojiniji. Nojori sequequiaarijiaariuhuj: “Cua nuhuaji Niriquianoocua nia tiuuri”. Naa Tiuquinijiona Juan sequesacaritij, nojuajaari Jesucristojiniji sequeriquiaa.

⁵ Cuno pojori jaara Pablo pohuatasano Jesucristojiniji tojiquiaari, nojoriiri socua tiuquinijiosaaquiaariuhua Jesuucua nojori tiuushacari seetanujuanaa. ⁶ Naacuajitij, Pablo niasacari na juaashiquia nojori nacaacua Pueyaso

na secojosacari, Pueyaso Sohuanuuri cuno pojori jiuujia-jinia tiuquiquiaari. Naacuajitij, nojoriiri niishishoo rupaacajinia pocooree. Naajuhuj, Pueyaso Sohuanu niishitiojosano Pueyasojiniji pohuatanuuquiaariiri. ⁷ Cuno pojoriiri doce canuu quiquiaari.

⁸ Pablo quishacari cuno tiacajinia, nojuajaari tii shocotejoquiaari jiuujianaraca raca. Jiyacari, puetunu samaatenu juucajanaa quiaja Judiocuaca rerejovia tiajiniaari. Tii pohuataja Pueyaso rupaa pueya niquiaraari. Naajuhuj, nojori niishitiojuaari taa Pueyaso jitianutaniya pueyaracaanu Jesuucua tiuuniaa pueyani. Pueyari na tojtiaquiaari maninia, na puereyaquiniutia na niishitiojosacari. ⁹ Noojiaqueya cuno pueyajinijinoori saaja ruuretaquiaari Pueyaso rupaa. Na rerequetequiaari saajaari. Sacuaraatia pocooquiaari Jesu rupaajiniji pueya niquiaraari, Jesuucua nojori tiuuniu paniyaquishacari. Nocuaji, Pabloori saa jiyareta Jesuucua tiuuniaa pueya jiyataquiaari cuniquiji, tamaquiria serojonuujua tiajiniaara. Tirano jiyaniishano pueyanoori cuno serojonuujua tia camaru quiquiaari. Pabloori cuniqui puetunu juucajanaa niishitiojovia Pueyaso rupaa Jesuucua tiuuniaa pueya. ¹⁰ Caapiqui marijaari socua Pablo shocojoquiaari tii na poojotasacari Pueyaso rupaa Tirano serojonuujua tiajinia. Naacuajitij, puetunu Asia jiyajinia quiniaa pueyajanaari Pueyaso rupaajiniji caminiujiushaaquiaari, Judiocuaca, taucuacajuhuj. ¹¹ Pueyasoori jiyacari Pablo cumaquiaari jiyajeneta casaa na miiniuria Pueyaso cumaacata. ¹² Naacuajitij, pueyari Pablo paneyaca tuujutaqueya rijioquiaari, Pablo cooshano toqueraacuanio. Cuno pueya jaara na cusosuhucua niojoquiaariuhua cuno toqueraacua, ¡cusosuhuari naatacoquiaariuhua! Naajuhuj, samaruhuari tohareetaquiaarijuhuaj, samaruhua jiitiaja pueyacuaji.

¹³ Tamasaca Judiocuacajinijinoori quiriquiaajuhuj, pueyajiniji samaruhua tohuatanijiojua. Nojoriiri puetunu tiacajiniajanaa rucoojuuca quiquiaari. Jiyacaritij, nojoriiri juhua Pablo miiniu paniquiaarijuhuaj. Juucua naa sequetuquiaari samaruhuari:

—Pablo pohuatasano Jesu sesajinia nia sequeyanijia: “¡Nio pueyanojiniji nia tohareetare!”

¹⁴ Naa miijiacaari siete canuu quijia. Nojoriiri Esceva jiyaniishano pueyano niquiuhua quiriquiaa. Escevaari pueyacuara secojona camarnu quiriquiasejuhuaj, Judio pueyanotuhuj. ¹⁵ Cuno pojori jaara saniquiaari juucua

Jesu sesajinia samaruhua tohuatanijionura pueyanojiniji, samaruuri saaja nojori riucuaquiaari:

—Jesu niishiyacuajanijia. Janiyari Pablo niishiyajaani-uhuj. ¿Canteerini niajanianijia, naa nia sequenura janiy-atej?

¹⁶ Samaruhuaraca pueyanoori jiyacari nojoriicua jaaquee. Nojori piyoree saajaari. Maja na naata nojori nujuataaquishacari, nocuaji netecuatuquiaari tiacojiiri juhuasunucua, jiyareta naatiquishanojuhuaj. ¹⁷ Puetunu Éfeso tiacajinia quiniaa Judiocuacajanaa, mariyata tii quiniaa taucuacanio, nojori jaara niishiquiaari naa miishanojinijitij, jiyanhua pueretuquiaariiri. Naacuajitij, puetunu Éfeso tiacajinia quiniaa pueyajanaari sequequiaari:

—¡Jesuqui seetanujanaa Jiyaniijajanaa cutara!

¹⁸ Naajuhuj, queraatia Jesucua tiuniana pueyari nijio-quiaari, tarijia sesa na miitiushano pohuatanura puetunu pueya niquiarajanaa. ¹⁹ Naajuhuj, queraatia pueyari juhua shimiacuri miiijiojuaca quiquiaari. Nojoriiri na nequesoree-tuneeca mueratejotaquiaari. Cuno nequesoreetuneeca-jiniaari serojosano quijia taate pueyano cumueeca shimi-apura quiniuni. Na camaruhuari jiyacari puetunu cuno nequesoreetuneecajanaa patootaquiaari. Na catijiaquiaari puetunu pueya niquiarajanaari. Puetunu cuno nequesoree-tuneecajanaa catijiasaaquiaarini, cunoori cincuenta mil platajiniji shipinijosano cumaneecata masesano quiquiaari. ²⁰ Naacuajitij, Pueyaso rupaari socua cuno jiyajinia paaque-quiaari, na cumaaca poonijosacari pueya jiuujajinia.

²¹ Na nuhuaji, Pabloori cuniquiji naquerejoquiaari Macedonia jiyajiniarajuhuj, Acaya jiyajiniarano. Cuniquiji riu-juuniu paniriquiohua Jerusalén tiacajiniohuaraari. Seque-quiaarijiaariuhuj:

—Janiya jaara tiuquishuhua Jerusalén tiacajiniohuani, janiyari Roma tiacajinia tajiriquianohuani.

²² Jiyacaritij, Pabloori na naacuna jiyaramiquiquiaari Macedonia jiyajinia. Na jiyaramiquishanoori quiquiaari Timoteo, Erastonio. Nojuajaari cuniqui Asia jiyajinia jiyoje-quiaarijiaara.

Éfeso pueya cushitiishacari na juaaquionuta najuhanaj

²³ Pablo quishacari Éfeso tiacajiniaja, Éfeso tiacajinia quiniaa pueyari jiyanhua juaaquioquiaari Pablo niishitiojonuucua Jesucristojiniji. ²⁴ Naa quiquiaariiri. Demetrio jiyaniushano pueyanocujajari juhuacatecara narta pueya nasojoquiaari. Cuno pueyano, Demetrioni, nojuajaari shiirijiaa tia platajiniji shipinijiojua quiquiaari.

Cuno shiirijiaa tiacaari juhua nojori jiyanishano pueyaso secojojua tia niquishano quiquiaari. Nojori pueyasoori maaji sesaanucua quijia, "Artemisa". Na shipinijosano niqutiojojua na cumaneecaraari. Naacuajitij, Demetrioori nata poonijionaa pueyata queraatia cumaneecaraca quijia. ²⁵ Demetrioori jiyacari nata poonijionaa rerejotequiaari nojori nacootanura Pablo miishanojiniji nojori tiacajinia. Nojoritia rerejoquiaariiri tamasaca pueya, casaa shipinijionaa platajiniji juhua nojorijiuhuj. Puetunu cuno pueyajanaa jaara tari rerejoquiaari, Demetrioori nojori sequequiaari:

—Pueyanaa, niaacuajaari niishiya, paari puetunu pa panishanojuanaa jiitiaani pa niqutiojosacari pa cumaneecara pa shipinijosano. ²⁶ Quiarjia cuno Pablo jiyanishano pueyanoni, nojuajaari queraatia pueya niishitiojoquiaa, pueyano shipinijosano pueyasohuanaari maja seetanu pueyasohujanaa. Niaari na niquiriquiaacuaja naa na niishitiojosacari. Niaari na tojiriqiaajuhuj. Naacuajitij, majaari tari pueya masenu quiniutianiya pa shipinijosano platajiniji casami. Queraatia nio Éfeso tiacajinia quiniaa pueyari na sequesano tojiya. Puetunu pa Asia jiyajinia pueyapuejanaari na sequesano tojtiaajuhuj. ²⁷ Taa cua sequeyacuajani, pa shipinijosano jaara shocotesaare saaja, paari pa poonijosano carteriquiano socuani. Majaari pueya shocotenu quiniutianiya saa pajaniyaja, pa pueyaso Artemisa rerequetenutaniyajaariuhuj. Nocuaji, majaari pueya nijionu quiniutianiya tari pa pueyaso Artemisa secojojua tiajiniara, tii nojori secojonura, naa cuno Pablo niishitiojonuucua pueyaracaanu pueyatej. ¡Naacuajitij, puetunu pa Asia jiyajinijinio pueya, mariyata puetunu jiyacajinijinio pueyapuejanaari pa pueyaso Artemisa rerequetejacara jatanutaniya! ¡Puetunu pueyapuejanaari naa niyajetanutaniya socua pa pueyaso Artemisatej!

²⁸ Cuniqui quiniaa pueya jaara tojiqiaari naa Demetrio sequesanootej, nojoriiri jiyanohua juaaquioquiaari. Naa nacoocuaariiri:

—¡Pa timitiasano Artemisa cuara pueyaracaanu quiiria Éfeso tiacajinia quiniaa pueyaso!

²⁹ Naa nojori juaaquiosacaritij, puetunu cuno tiacajinijanaa pueyari cushitiquiaari. Nojoriiri jiyacari quiooturee caapiqui Pablo cojiniaa pueya, Macedonia jiyajinijinio pueya. Nojoriiri quiquiaari Gayo, Aristarconio. Na jayoturee Éfeso tiacajinijinio pueya rerejojua tiajiniaraari. ³⁰ Pabloori

cuno pueya nacoosaqui tiajinia tiuquiniu paniquiaari juucujuhuj. Quera na pocuasee cuno pueya tajiniani. Jesuucua tiuuniaa pueyari saa na cosequiaaritia na tiuquiyaquini-uucuj. ³¹ Asia jiya camarucuaari na seya jiyaroquiaari Pabloocujuhuj. Camarucuaari coteenu naa sequequiaari na seya:

—Niocua Pablo sequesee, maja cumaati jaarajaaja na tiuquiniu pueya nacojosaqui, mariqui mosaareeri.

Cuno camarucua na seya jiyaroquiaari nocuani, nojori-iri Pablo rupuenaa quijia. ³² Cuno nasojosano rerejono pueyari saaja cushitiquiaari na juaaquionuta. Jiyanohua nacooreeri. Tamasacaari saniniuujia tamaatia nacooriguiaa-juhuaj. Jiyacaritij, tama cuno nojorijinijinio pueyari maja na niishiniu quiquiaari casaajiniji na nacooriguiaani. Secaja nojorijinijiniori na niishiquiaari cutara. ³³ Jiyacaritij, Judiocuacaari Alejandro jyanishano pueyano caponeequiaari pueya nacoyano taccoji na nujuatesocoriguiano. Cuniqijinio pueyajaari tii toquiaari Alejandro casaara pueya nacoyani. Alejandroori Judio pueyano quiquiaarijuhuj. Naaratej, Judiocuacaacuaji tacunu paniriquiaa juucuaari. Alejandro jaara nujaquiaari pocujajiniji, na juaashiquia shiitiquiaariiri pueya sanaajetanura. ³⁴ Saniniuujia, cuno pueya jaara niishiquiaari Alejandroori Judio pueyano, puetunu pueyajanaari socua jiyacatequiaari nacoona. Nojoriiri caapiqui hora shocoteree pueyaracaanu naa na nacoosacari najuhuanaj. Naa sequeturiquiaa na nacoosacariiri:

—¡Pa timitiasano Artemisa cuara pueyaracaanu quiiria Efesio tiacajinia quiniaa pueyaso!

Naa pueyaracaanu nacooriguiaari. ³⁵ Cuno tiaca camarucua naajiona pueyano jaara na naata quiriquiaa nojori na sanaajanura, nojori sequereeri:

—Cuarta Éfeso pueyanaa, puetunu jiyacajinia quiniaajanaari niishiya, pajaniya Éfeso tiacajinia quiniaari pa pueyaso Artemisa secojojua tia cojuanaani. Niishitiuyajaariuhuj paacuajaari cuno casaa juhua pa pueyaso Artemisa niquishano cojuaquiaani, jiya cajiniocuaji tinio pa riuriatasanoni. ³⁶ ¡Canteeri nio niishiyaquiyanijia! Shaaqui. Cunora tariucuaja. ¡Nia sanaajetarohua! Majaari najuhuaana sesa nia miitiuniu, maninia nia niishiriojiyaquishacari. ³⁷ Nio canuu niaa niyara na jayoreeni, nojoriiri maja na nohuasenu quirii casaa pa pueyaso secojojua tiajiniji. Majaari na sesacatunu quiquiaa pa pueyasojuhuaj. ³⁸ Demetrio jaara nata poonijionaata cuno pueyacuara tonujunu paniri, ¿casaara na quiaaquiya pa nequesoreenaa niqiuara tonujunuraarini? ¿Casaara pa

jiitiaa nequesoreenaa pa tiacajiniaarini? ¿Najuhuanaj? Pa nequesoreenaari pa paraa tacujua pocuaji. ³⁹ Niaa jaara tamonu casaacua juaaquioreja, pocua tamonu juuca na rerejotariquiani pa jiyaniijianucuata pa jeecanura puetunu nia sequesanojuanaa. ⁴⁰ Pueyanaa, ¿majate nia puerenu, Roma tiacajinia quijia pa jiyaniijiajanaa jaara pocuara tosaare pa nacojonujiniji? Paa jaara sequesaaare nocua quiojonurani, ¿paatucua taa pocuaji tacureni jaara pa nequesoreere pa nacojonujiniji?

⁴¹ Tiaca camarucuaara naajiona pueyano jaara puecaquiaari pocuanu, pueya sequequiaariiri:

—Nia quiojorohua pueyanaa.

Naacujitij, puetunu pueyajanaari cuniquiji niaquejoquiaariuhua.

20

Pablo rucuanajosacariuhua Macedonia jiyajinia, Grecia jiyajinianio

¹ Pueya jaara na juaaniutia na nacojonu nuhuaji sanaajetaquiaariuhua, Pabloori jiyacari Jesuucua tiuunaa pueya sequequiaari tama jiyareta nojorijiaaja rerejonura. Tii nojori nacasuree maniniaari. Tari na quiasacari cuniquiji, na nuhuajiria cacanuquiaari puetunu nojorijianaari. Na nuhuaji, Macedonia jiyajinia quiaareeri. ² Nojuajaari puetunu cuno jiyajinia rucuanequiaarijianaa. Jesuucua tiuunaa pueya cumashitiquiaari socuaari, maja nojori tarinitianura Jesuucua tiuuniu. Naa na rucuanesacari cuno jiyajiniatej, socua tiuquishiiquiaari Grecia jiyajiniaari. ³ Pabloori tii na quishacari shocotejoquiaari jiuujianaraca raca. Juucua cuniquiji quianu paniriquiaa buquejina Siria jiyajiniaraari. Judiocuacaari na niishiquiaari saaja. Nojoriiri jiyacari na monu paniquiaari. Naa Pablo niishishacaritij, nojuajaari nocuaji Macedonia jiyajiniara neteja nucuacohua tacatequiaariuhua saaja. ⁴ Nucuaco na quiasacariuhua, na tarajaquiaariiri Sópater jyanishano pueyano Berea tiacajinijinio, Pirro niyanu. Na tarajaquiaarijiaariuhua Aristarco, Segundonio. Nojoriiri Tesalónica tiacajinijinio pueya quiquiaari. Nata quiaquiaarijiaariuhua Gayo, Derbe tiacajinijinio. Timoteori nojoritia quiriquiaajaacuhuj, Tíquiconio, Trófimojuhuaj. Nojoriiri Asia jiyajinijinio quiquiaari. ⁵ Puetunu nio canaa tapueyocujajanaari canaa puetaquiaari. Canaacuaji tiuquiiijioseequiaari coteenu Troas tiacajiniaari. Cuniqui sashitiquiaari canaari. ⁶ Jiyacariiri queranacunuusacari quiquiaari, poreetajaaju shipinijosano pan miaquesacari. Queranacunuunu nuhuaji, canaari

Filipo tiacajiniji jaaretaquiaari buquejiniani. Canaari cinco juuca camueenujuquiaari canaa tiuquiniuria Troas tiacajiniani. Canaari tii nojori coqueseeni. Canaari mariyata tii camueenujuquiaari siete juucani.

Pablo niishitiojosacari Troas tiacajinia

⁷ Shusha semaana coteejajinia domingo juuca, canaari rerejoquiaarini pan neecasenura pa Jiyaniijia cusosacari ni-ishiriojonura. Pabloori jiyacari Jesuucua tiuuniaa pueya rootariquiaa niucua. Nojuajaari cuno tariqui quiariquiano quiriquiaa cuniquiji. Naaratej, na nuhuajiria pocoojoriquiaa pueyataari. Pueyaracaanu na pohuatasacari, shiyaqueyari tari quiquiaari. ⁸ Cuno tiajinia canaa tii quiriquiaani, canaari jiyocuacaanu tercero na natacojinia rerejoriquiaani. Quer-aatia samariiri canaa caaniuji noshiquioriquiaa. Pabloori shitimia pohuatariquiaa pueya niquiara. ⁹ Jiyacaritij, tamonu mashajaari tia shuucuaji tacuhajiniji cajiriquiaa. Na sesaari Eutico quijia. Pablo pohuatasacari pueyara-caanu, socua maquequiaari na cajishaquiri. Jiyano-hua na maquesacari, jiyocua tiquii socuaari. Cusoseejanaari. ¹⁰ Pabloori nata quiniaata ritia nocua netecuatuquiaari jiyocua. Pabloori nocua jacamasee na cacatanura. Narta Jesuucua tiuuniaa pueya sequereeri:

—Maja najuhuana shiriqitiuniu. Saminiocuaja.

¹¹ Na nuhuaji, puetunu nojorijianaari tiniota shuquiriaatia tacataquiaariuhua. Pabloori neecaruu neecasequiaari canaa miaquenuusocoriquiano. Pabloori socua pohuataquiaari pueya na niishitiojonura. Naa juhuaquemaajaa socuaari. Tariucua juuca quiaqueeri. Nojuajaari nucuaco quianu paniquiaari cuniquiji Asón tiacajiniara. ¹² Cuno mashajaari saminio jaatucusaquiaariuhua na tiajiniohua. Puetunu pueyajanaari noojia cajitiquiaariuhua, saminio mashaja tacatesacariuhua.

Pablo quiasacari Mileto tiacajiniara

¹³ Pabloori na quiaaquishacarijia tari canaa sequequiaari:

—Nia puetaarecuaa buqueta. Niocua cua rimia Asón tiacajiniji. Janiya nucuaco quianu paniyani.

¹⁴ Naacuajitij, canaari coquetoquiaari Asón tiacajiniani. Canaari cuniquiji Pablo tacanimiaquiaarini. Canaari mariyata tiji quiaaree Mitilene tiacajiniani. ¹⁵ Canaari tariqui shocomaa Quío jiya tucuaatijani. Canaari tama tariqui tiuquishii Samos tiaca tacatajajinijini. Canaari rupaquijia samaatemaacuara Trogilio tiacajiniani. Canaari cuniquiji sanetaaree tariquiniuhuj. Canaari Mileto tiacajinia tiuquishiini. ¹⁶ Canaari naa secooriquiohua ritiani. Majaari Pablo tarishiniu paniniu quiquiaari Asia jiyajinia. Naaratej,

majaari na quianu paniniu quiquiaari Éfeso tiacajiniajuhuaj. Ritia tiuquiniu paniquiaariuhua Jerusalén tiacajiniaari. Pentecostés juucara quiniu paniriquiaa tiiri.

Pablo cumashitishacari Éfeso tiacajinijinio Jesuucua tiuuniaa jiiitanaa pueya

¹⁷ Canaa quishacari Mileto tiacajinia, Pabloori pueyano jiyaroquiaari na masuunura Éfeso tiacajiniji Jesuucua tiuuniaa pueya jiiitanaa. ¹⁸ Nojori jaara canaacua tiuquiiioquiaari, Pabloori nojori sequeree:

—Niaacuajaari maninia niishiya taa cua quishiiquiaari niaatani, cua tiuquishacari Asia jiyajinia niaacua. ¹⁹ Niaata cua quishacari, janiyari pueyaracaanu nia niishitiojojuani, pueyaracaanu pa Jiyaniijjara cua poonijiosacari. Naa cua miishacaritij, majaari cua quiniu paniniu quijia juhua nia jiyaniijjia. Janiyari niaacua cua tacaashacari nujuquejojuani. Janiyari pueyaracaanu naquiya miishanoni, cuarta Judiocuaca paracaashacari janiya. ²⁰ Naajaa, majaari cua pishiniu quijia nia niquiara cua pohuatanura Pueyaso rupa. Janiyari nia niishitiojojuani puetunujuanaa maninia nia quiniuria, maninia miijjia nia quiniuriajuhuaj. Majaari cua niishitiojonu quijia jiyasohuaja. Janiyari puetunu pueya niquiarajanaa nia niishitiojojuani, tama nia tiacajini-aqueyajaajanio. ²¹ Janiyari Judiocuaca sequejani taucua-canio, nojori tacatonuhuara noojia Pueyasoocua, sesa nojori miishanojiniji, pa Jiyaniijjiaacua nojori tiuuniuria cutara. ²² Quiarijiani, Pueyaso Sohuanuuri cua jiyaroya Jerusalén tiacajinia. Majaari cua niishiniu taa cua miishaanutaniya cuno tiacajiniani. ²³ Janiyari saaja niishiya cutarani, puetunu tiacajiniajanaa cua quiasacari, Pueyaso Sohuanuuri cua sequeya: “Quiaari nujuatesaanutaniya. Quiaari naquiya miishaanutaniyajuhuj”. ²⁴ Janiya jaara naa niishirini, majaari cua tacaaniu quiquiaa. Cuaara cua motuuraqui jaara monu panitiuri. Janiyari saaja pa Jiyaniijjia sequesano tucuatanu paniya cutarani. Pa Jiyaniijjia Jesuuri cua jiyaroquiaari cua pohuatanura pueya niquiara, taa Pueyaso jiyanooni paniya pueyani.

²⁵ Janiyari seetanujuanaa nia sequeyani pueyanaa. Puetunu niajanijajanaa, cana niquiara cua pohuataquiaari Pueyaso rupaacuajani, majaari socua nia niquiniu quiniutaniya mijiria janiya. ²⁶ Naaratej, janiyari nia sequeyani, majaari na nuhuaji nia sequenu: “Maja canaa pohuataasaanu quiquiaari Pueyaso rupaani”. ²⁷ Janiyacuajaari tari nia pohuataquiaari puetunu Pueyaso sequesanojuanaa pajaniyarani. ²⁸ Quiarijiani, tama

nia cuaqueyajaaja nia cojuare. Maninia nia cojuare Jesuucua tiuuniaa pueyajuhua. Pueyaso Sohuanucuaajaari nia jiyatequiaari Jesuucua tiuuniaa pueya jiitianaa nia quiniuria. Nojuajaari nojori masequiaari na nanacata tama nerajaaja, pocuara na cusosacari. ²⁹ Janiyari seetanujuanaa niishiyani, janiya jaara niiquiji quiaqueeni, tamasaacari cua nuhuaji nijionutaniya. Jesuucua tiuuniaa pueya sesonutaniyari, sacuaraatia nojori niishitiojosanota. Nojoriiri juhua marucatuque sareya tiuquitianutaniya Jesuucua tiuuniaa pueya tajinia. Taa marucatuque sare tiuquiya borregohua tajiniacuaani, puetunu na sooseejanaari, cuno pojoriiri naa miiniutianiya Pueyaso muerasutej. ³⁰ Naajuhua, tama nijaniyajiniujuaarija najuhuaana tamaatia niishitiojonu coteenutaniya na sapojonuta. Majaari Pueyaso panishano na niishitiojonuunu quiniutianiya tari. Naa sapojotunutaniya Jesuucua tiuuniaa pueyari, pueya tojiniuria nojori saniniuujia. ³¹ Janiyacuajaari nia sequeyani, jiyanhua nia cojuare tama nia cuaqueyajaaja. Nia niishirijuhua, jiuujianaraca marijaari tari cua shocojoree pueyaracaanu cua niishitiojosacari nijaniya. Majaari cua tarinitianu quijia rootanu nijaniya, juuca, niucuanio. Janiyari naajaa cua namijiaacatenuta niishitiojua puetunu nijaniyajanaani. Majaari naa cua miishano nia nijajetanu pueyanaa.

³² Naa tiujianutaniya tarinijia. Janiyacuajaari pa Jiyaniijia juaashiquiajinia nia jataani. Na rupaa nia tojiriquia pueyaracaanu, juhua rishimiaca pueyano nia quiniuria, cumuecara. Nia jaara naa miiritij, Pueyasoori nia rijionutaniya na shurucuara, na saquiriojosano pueyata nia quiniuria. ³³ Niaata cua quishacari, majaari tama quirijaaja cua paniniu quijia cumaneeca, toquenio. ³⁴ Niaari naa quiyano cua niquijiajuhuaj. Janiyari tama cua juaashiquiatajaaja poonijiojuani, cua panishano cua masetajara, cua cojiniaa panishano masetajarajuhua. ³⁵ Janiyari nia niishitiojuani, naa poonijosanotej casamiijuniucua pa naacunura pa jiitiasanota. Majaari pa Jiyaniijia Jesu sequesano nia nijajetanujuhua. Naa sequequiaariiri: “Maninia pueyano jaara na jiitiasanoiniji niqutiore nareja tamonu pueyano, na niqutiosacari tamonu, nojuajaari socua shuquiriaatia quiya, niqutiosano masejajiniji”.

³⁶ Naa nojori na sequenu nuhuajitij, Pabloori mojuqueta-ree. Puetunu nojoritijanaa secojoreeri. ³⁷ Puetunu pueyajaari nujuqueturee. Pablo cacanuutureeri. Na nuju-unequetureejaariuhua. ³⁸ Pueyari jiyanhua taraajeriquiaa Pablo sequenuucua nojori, maja tari socua na niquti-

niu quiniutianiya nojuaja. Nojoriiri caminiajiniara rose-taquiaarijuhuj, Pablo na niqutiuniuria buquejinia na tacasacari.

21

Pablo quiasacari Jerusalén tiacajiniara

¹ Éfeso tiacajiniji canaa ruparetasacari, canaari shoniacu caminia jiuujiaaco quiaareeni. Canaari Cos tiacajinia tiuquishiini. Cuniqiji canaa quiasacari tariqui, canaari Rodas tiacajinia tiuquishiiniuhuj. Tama tariqui canaa quiasacari Rodas tiacajiniji, canaari Pátara tiacajinia tiuquishiini. ² Pátara tiacajinia canaa tiuquishacari, canaari tii riuriatasee tamonu buque quera Fenicia jiyajiniara ruparetaanoni. Canaari tii tacataareeni. ³ Canaa jaaretasacari, canaari canaa muenecara niqumiohua Chipre jiya tucuaatiajani. Canaari Siria jiyajinia tiuquishiini. Cuno buquejinia canaa tii quiariquiaani, casami pariquiaari Tiro tiacajinia jatasocoriquiano. Naaratej, canaari Tiro tiaca tacatajajiniji tiuutiaseeni, casami jatanura tii. ⁴ Jesuucua tiuuniaa pueyari tii quijiajuhuj. Canaari nojoritia quishiini. Canaari siete juuca camueenujusee cuniqui nojoritiani. Pueyaso Sohuanuuri cuniquijinio Jesuucua tiuuniaa pueya niishitioquiaari taa Pablo miishaanutaniyani. Nocuaji nojoriiri Pablo sequetuquiaari maja na quianura Jerusalén tiacajinia. ⁵ Naajaa, siete juuca jaara tari shocojoquiaari cuniqui canaa quishacari, canaari tiji quiaquiaarini. Jiyacartij, puetunu Jesuucua tiuuniaa pueyajanaari necocohuata, mariyata necohuata canaata quiaquiaari canaa na jatanura buquejinia. Canaari rosetaquiaari tiacajiniji tacatajajinijiriani, Pueyaso canaa secojonura jaaquiajania. Puetunu canaajanaari mojuquetacoquiaarini shoniacu caminia casaqueyaji. ⁶ Na nuhuaji, canaari nojori cacanuuree canaa nuhujiriani. Canaari buquejinia tacataqueeni. Nojoriiri tacatajajiniji quiojoquiaariuhua na tiajiniohua.

⁷ Canaari Tiro tiacajiniji jaaretaareeni. Canaari Tolemaida tiacajinia tiuutiaseeni. Canaari cuniqui tacatasee puetunujuaanaani. Canaari tii quijiaca Jesuucua tiuuniaa pueya saruhuataseeni. Canaari nojoritia quishii niquiriyatu juucani. ⁸ Tariqui saniniuujia, puetunu canaajanaari mariyata quiojoquiaari Pablotani. Canaari Cesareya tiacajinia tiuquishiini. Felipeeri cuno tiacajinia quiriquiaa. Canaari na tiajinia quishiini. Felipeeri Jesujiniji pohuatana quijia. Nojuacuajaari Jerusalén tiacajinia coteenujanaa tamasacata jiyatesaquiaari mashiquiopue mianuuteriquiano. ⁹ Felipeeri necojori jiitaja, saa caqueetacaneeja,

niyacoojori. Cuno niyacoojoriiri Pueyaso Sohuanu jiitiajaca. Naacuaajitij, Pueyaso Sohuanu niishitiojosano nojori jiuujiajinia Pueyasojiniji pohuatanuujuaari. ¹⁰ Canaa camueenujusacari cuniqui, jiyacari tiuquishiiquiaariiri Judea jiyajiniinio pueyano. Nojuajaari Pueyaso sequenu panishano caminiujiunia quijiajuhuaj. Ágabo jiyanishano pueyano. ¹¹ Nojuajaari canaacua niquiaari Felipe tiajinia. Jiyacaritij, Pablo cajiniocua camarucujua samaacataseeri. Nata morojoree tama na cashacucuaajaarijia, na numatucuanio. Na nuhuaji sequerohuari:

—Jerusalén tiacajinia parta Judiocuacaari naa morojonutaniya nio cajiniocuaque camarutej. Na nuhuaji, taucua niquitiosaanutaniyari. Pueyaso Sohuanuuri naa cua sequereequij.

¹² Naa Cesareya tiacajinia quiniaa Jesuucua tiuuniaa pueya tojishacaritij, canaajuahuaj, puetunu canaajanaari juucua Pablo nenecojoquiaarini maja na quianura Jerusalén tiacajinia. ¹³ Saa canaa sequereeejaari:

—¿Casaara nia nujuquetiuyajaarani? ¿Niaateeri cua tarajonu paniyaruhua? Majaari saaja cua paniniu pueya morojonura janiya Jerusalén tiacajinia; janiyari tama cua cuaqueyajaaja panitiaacujua. Cuaara cua motuuraqui, cua pohuatanuucua cua Jiyaniijia Jesujiniji.

¹⁴ Maja canaa naata na tarinitiniu quishacari, canaari socua na tarinitiareeni.

—Cuajaquij. Pueyaso cuaara miiria taa na miiniu paniyacuajani.

¹⁵ Naa canaa sequenu nuhuaji nojuaja juucuatej, canaari canaa jiitiasano casaa jeenucuareeni. Canaari Jerusalén tiacajinia quiaareejaanihuaj. ¹⁶ Canaata quiojoquiaariiri Cesareya tiacajiniji Jesuucua tiuuniaa pueyajuhuj. Canaata quiariquiaajaariuhua Mnasón jiyanishano pueyano. Nojuajaari Chipre jiya tucuaatiajajiniinio pueyano quiquiaari. Nojuajaari tarijia Jesuucua tiuujia quijia. Nojuajaari canaa sequequiaari:

—Paa jaara Jerusalén tiacajinia tiuquishiini, niocua cua tiajinia quishii cuata.

Pablo pocoojosacari Santiago

¹⁷ Canaa tiuquijiosacari Jerusalén tiacajinia, cuniquijinio Jesuucua tiuuniaa pueyari canaa timitiaree canaa tiuquijiosacari. ¹⁸ Pabloori tariqui canaata quiaquiaari Santiago niqiniucua. Tii quiriquiaajaariuhua puetunujuanaa Jesuucua tiuuniaa jiitianaa pueya. ¹⁹ Canaa tiuquishacari, canaari nojori saruataquiaarini. Na nuhuaji, Pabloori nojori pohuataquiaari puetunu Pueyaso miishanojuanaa na

pohuatanuucua Jesujiniji, na rucuanijosacari tucuaaanu taucuaa quijia jiyacajinia. ²⁰ Pueya jaara naa tojiquiaari Pablo pohuatasantej, puetunu tii quiniaajanaari Pueyaso maniniuhuaqueetaquiaari nojori shuquiritiasacari Pueyaso.

Na nuhuaji, nojoriiri Pablo sequequiaari:

—Canaa tarajanunaa, taa quia niqiquiaacuajani, jiyanoehua queraatia parta Judiocuacaari Jesuucua tiuya. Puetunu nojorijianaari tariucuacaanu Moisés niishitiojosano tojitiajacajuhuj, nocua nojori jiaatianuta jiyanoehua. ²¹ Nio Jerusalén tiacajinia quiniaa Jesuucua tiuunaa pueyari quiocuaji tojiquianujuhuj. Quiaanaari tamonu jiyacajinia quijiaa parta Judiocuaca niishitiojoquiaa maja nojori miiniuria tari tariucuacaanu Moisés niishitiojosano. Quiaanaari niishitiojoquiaajuhuj maja nojori necohua cararaatiuuquia co nojori miatejonura, taa pa supuetanaa niishitiojosaaquiaaricuaani. ²² Naacuajitij, pueya jaara niishiri quiaa tari niya tiuquiriohua, nojoriiri quia rerejotanutaniya ritia. ¿Taa pa miyarini? ²³ Canaari naa niishiriojiyani, naa quia miiri juhuari. Niya quiyari cuatro pueya na naca tuquenuuteriquiano, tarijia na sequetusano Pueyaso na tohuateenura. ²⁴ Nojori quia jiyataare Pueyaso Secojojua tiajinia. Niocua nia cuaqueya jeequejosee taa pa supuetanaa sequequiaaricuaajani. Naajuhuj, quiocua nojoriria cumaneeca niqutiore nojori naca riuujiushaanura. Quiaa jaara naa miiritij, puetunu pueyajanaari niishiniutianiya majaqui seetanujanaa quiquianu pueya sequesano quiajanijajiniji. Niishitiuniutianiyajaariuhuj, quiaaqui tariucuacaanu Moisés niishitiojosano miyajaa. ²⁵ Majaari Jesuucua tiuunio taucuaacua quia tacaaniu. Canacuajaari tari nojori nacasuquiaari canaa naajioneejiniani, nojoriicuaara canaa naajiosacari. Canaari nojori sequequiaari cutarani maja tari nojori tojiniuria Moisés niishitiojosano. Canaari nojori sequequiaarijiuhuj, maja na miaquenuunura shipinishano pueyasohuacuara puecoosano casaa, naajuhuj, maja na miaquenuunura nanaca. Canaari nojori sequequiaarijiuhuj maja na miaquenuunura shu na nanacataja, naajuhuj, maja na numuetucunura na camishoo maaji. Puetunu pa supuetanaa rootasanojinijianaani, saa niojuaari taucuaa tojishocoriquiano rootasano.

Na cojiniaata Pablo quioosacari Pueyaso Secojojua tiajinia

²⁶ Pabloori narta Pueyaso pueya sequesano tojiquiaari jaarajaaja. Naaratej, nojuajaari cuno cuatro pueya jiyataquiaari tariqui. Nojoritia jeequejoquiaari na cuaqueyari

taa Moisés niishitiojoquiaaricujani. Naa na miiniu nuhuajitij, Pueyaso Secojoua tiajinia tiuquitiaquiaariiri pueyacuara secojonaacua. Na sequetuquiaariiri casaa juuca na tucuatunutaniya na cuaqueya na jeequejonuununi, naajuhuj, casaa juuca nojori panutaniya Pueyasora na niquitiosocoriquianoni.

²⁷ Quera nojori tucuatascari puetunu cuno semaana juucajanaa, Asia jiyajinijinio narta Judiocuacaari Pablo niquiquiaari Pueyaso Secojoua tiajinia. Nojoriiri puetunu pueyajanaa nasajoquiaari ritia. Jiyacari Pablo quiatureeri. ²⁸ Na quiatusacari Pablo, pueya na jiiquioonuutareeri:

—¡Israel pueyanaa, miji! ¡Canaa nia naacuseeja! Nioori noo pueyanocujaja tiqiyocua na rucuanesaqui pueya niishitiojoquiaa sacuaraatia pocuaratej, nio Pueyaso Secojoua tiaacuarajuhuj. Naajuhuj, tariucuacaanu Moisés Rootasano sesacatequiaa pueyajaariuhuj. ¡Quiarijiani, pa Secojoua tiajinia sacuaraatia tiuquinitiaree taucuacaari!

²⁹ Cuno Judiocuacaari naa sequetuquiaari Pablotej, Trófimo jiyaniishano pueyanota nojori niqiniuuca nojuaja tarijia na rucanejosacari cuno tiacajinjiaja. Trófimoori Jesuucua tiuunia tahue quijia, Éfeso tiacajinijinio pueyano. Naaratej, cuno Judiocuacaari jiyaniquiaari Pablo naasucuaari cuno tahue tiuquinirii Pueyaso Secojoua tiajinia.

³⁰ Puetunu Jerusalén tiacajinia quiniaa pueyajanaari juaaquiouquiaari. Pabloocua netecuatuquiaariiri. Na quiatureeri. Pueyaso Secojoua tiacoji na jaatiuquiaari carijiniacumaari. Pueyaso Secojoua tia tohuateyari ritia tionujusaaquiaari na nuhuaji. ³¹ Pueyari tari monu paniriquiaa Pablo. Jiyacaritij, tii Jerusalén tiacajinia quijia Romano soldadohua comandanteeri numootesaaquiaari: “¡Judiocuaca na juaaniutia nacoya!” Cuno comandanteni, nojuajaari soldadohua capitáncuaca jiyaniijia. ³² Jiyacaritij, comandanteeri na soldadohua rerejotequiaari ritia, na capitáncuacanío. Tee pueya nacooriquiaani, nocua netecuatuquiaariiri. Judiocuaca jaara niquiquiaari comandante na soldadohua neretaano nojoriicua, jiyacari shusha cartetuquiaari Pablo piquitiuniuuri. ³³ Comandante tiuquishacari nojoriicua, Pablo quiaseejanaari. Na soldadohua sequereeri:

—Caapiqui cumayocua casaa nia saatijiore na numatucua cajiniocua.

Comandanteeri na nuhuaji pueya nequesoreeree:

—¿Cante nio pueyanoni? ¿Casaa na miiriini?

³⁴ Pueyari saaja jiyajeneta nacooriguiaa. Nioori tamaatia nacooriguiaacujua. Tamasacaari socua tamaatia nacooriguiaajanaajataj. Comandanteeri cunora maja na niishiniu quiquiaari casaa Pablo miiriijiaarani, puera nojori cojuatunenuucua na nacoosacari. Cunora na soldadohua sequereeri:

—¡Pa quijia tiajinia nia jaatucuyarohua!

³⁵ Soldadohua tacatasacari tari nojori quijia tia tacatuhuoco Pablo nojori jaatucusacari, Judiocuacaari jiyacari quera na macaaniutia socua shiiniuquitiaquiaari Pabloocua, na monu paniniuria juucua. Soldadohuari nojoriicujaji Pablo shiitioquiaari jiyocuacaanu. ³⁶ Pueyari soldadohua nuhuaji na cocuatesacari jiiquioonuuriquiaa:

—¡Nia more cuno sesaaca! ¡Nia more!

Tama nocuaji Pablo tacusacarijiaaja

³⁷ Quera soldadohua tiuquinishacari Pablo nojori quijia tiaco, Pabloori soldadohua comandante sequereeri:

—Quenaaja niquiriyatu rupaa sequereera cuno pueya.

Comandanteeri na riucuaree:

—¿Quiaaquiri Griego rupaa pocuaja? Janiya juucua quia jiyaniiriquiaa Egipto jiyajinijinio pueyanoni. ³⁸ ¿Majateeri noo quiajaniya quiquianucujaja, cariiquia jiyajinia jiyatacanu cuatro mil puecojuaca pueyatej?

³⁹ Pabloori saaja na sequereeri:

—Janiyari Judio pueyanoni, Tarso tiacajinia rasanotuhuj. Naacuajitij, janiyari Tarso tiacajinijinio pueyanoni, teyano tiacatucujaja socua panishano tiaca Cilicia jiyajiniani. Quenaaja rupaquijia cua tarishitiricuarajaj. Cuno pueya sequenu paniya niquiriyatu rupaa quenaajanijia.

⁴⁰ Comandanteeri socua na sequereeri:

—Quia pocuare.

Pabloori jiyacari tacatujiniji nujuaquiaari. Na juaashiquia shiitioquiaari pueya na sanaajanuraari. Puetunujuanaa jaara sanaajetaquiaari, nojoriicujara pocuaree tama nojori Hebreo rupaaajiniaari. Naa nojori sequereeri:

22

¹ —Cua tapueyocuacanaa, cua jiyaniijianucuananaa, nia tojitiare cua sequesano niajaniya tama cua tacusacarijiaaja cucujaji.

² Cuno pueya jaara tojiquiaari Pablo pocuasacari nojoriicujara Hebreo rupaaajinia, pueyari maninia sanaajetaquiaar-ijianaa. Pabloori nojori sequereeri:

³ —Janiyari Judio pueyanoni. Tarso tiacajinia cua raja, Cilicia jiyajinia. Janiyari nio Jerusalén tiacajinia

maashiquiaarini. Gamalielri cua niishitiojona quijia. Jiyanoehua rootasaaquiaari pa supuetanaa niishitiojosanonijia. Janiyari pueyaracaanu Pueyaso panishano miiniuucua jiaatiaquiaani, taa quiaritia nia miiniu panianijia. ⁴ Janiyari tarijia Jesuucua tiuuniaa pajejani naquiya cua miitiasocoriquiano. Janiyari na mooquiaarijuhuaj. Janiyari canuu cojiritiaquiaari quioonu maajipohuatajani, cua nujuatejosocoriquiano nujuatejojuajinia. ⁵ Pueyacuara secojonaa camarnuuri cua miijosano niishiyajuhua, puetunu pa jiyaniijianucujanaano. Nojoricuajaari cua niqutitioquiaari nojori naajione Damasco tiacajinia quiniaa parta Judiocuacaacuara. Janiyari juucua quiariquiaa Jesuucua tiuuniaa pueya cua pajenura Damasco tiacajiniani. Quera cua quioosano cua nitiamohua niya Jerusalén tiacajiniani, saniitiojosocoriquiano.

Pablo pahuatasacari Jesuucua na tiuuniujiniji

⁶ Janiyari juucua nucuaco quiariquiaani. Quera cua tiuquishacari Damasco tiacajinia, panacariiri quiriquiaa. Canashiyajuiji jiyanoehua shacantuuca juhua miacanaari cua nunuquiaari. ⁷ Janiyari juhua jataaareeni. Jiyacaritij, janiyari rupaa tojirii cua sequeyanoni: “Saulo, Saulonaa, ¿casaara quia miitiaa puera janiyani?” ⁸ Janiyari na nequesotareeni: “¿Cantequia Jiyaniijianaa?” Cua sequereeri: “Janiyacuaajaari Jesuni, Nazaret tiacajinijinio pueyano. Cunocuaajaari quiaa na miitiaani”. ⁹ Cua cojiniaa pueyari cuno shacantuuca na niquishacari shiriiquititiquiaari. Majaari na tojitiuniu quiquiaari cutara jiyocuacaanuji rupaa cucua pocuaano. ¹⁰ Janiyari socua na sequereeni: “¿Casaa cua miyarini Jiyaniijianaa?” Jiyaniijaari cua sequereeni: “Quia sanerohua. Naajaa quia quiaare Damasco tiacajinia. Quiaari tii sequesaanutaniya puetunu cua panishanojuanaa quia miiniuria”. ¹¹ Cuno shacantuuca cua nunuquiaari jiyocuacaanujini, cua namijia sesoquiaariiri. Janiyari cariyujuaru quiriquiaani. Naacuajitij, cua cojiniaari cua jaatucutuquiaari. Naa cua tiuquitiatusee Damasco tiacajiniaari.

¹² Tamonu pueyanoori cuniqui quijia, parta Judio pueyano. Na sesaari Ananías quijia. Nojuajaari seetanujuanaa tariucuacaanu Moisés niishitiojosano tojjia cutara. Puetunu Damasco tiacajinia quiniaa Judiocuacaari na panijia. Nojoriiri na sequetujua: “Ananías cutaraari maninia pueyano”. ¹³ Ananíasri jiyacari cua niquiniucua niquiaari. Jaara tiuquiquiaari cucua, cua sequeseeri: “Cua tarajanu Saulonaa, maninia niqijiara quia quiriohua”. Jiyacaritij, cua namijiaari ritia jeequequee. Janiyari maninia niqiquii Ananíasni.

14 Cua sequerejaariuhuj: “Pa supuetanaa Jiyaniijia Pueyasocuaajaari quia saquiriojoquiaari tariucuacaanujiniji, na niishitionura quiajaniya na panishano quia miiniuria. Quia saquiriojoquiaarijaariuhuj quia niquiniuria taquiya pocuajinio sesa miyashijia cutara, tama na camaru rupaajiniji quia tojiniuria na sequesanojuhuaj. Nojuacuajaari pa Jiyaniijia Jesucristo. 15 Quiaari puetunu pueyapue niquiarajanaa pohuatanutaniya nojuajiniji quia niquishano, quia tojishanonio”.

16 Ananíasri socua cua sequequiaari: “¿Casaara quia tarishiyarini? Quiarijiani, quiaa cuaara tiuquinishaaria. Jiyaniijia Jesu quia sequere: ‘Cua jiyanoori sesa cua miishanojiniji’. Nocua quia tiuushacari, quia sesa miishanoori jeequesaanutaniya”.

Pablo pohuatasano taa Jesu jiyaroquiaari nojuaja taucua-caacuani

17 Janiya jaara riujuuquiaariuhua Jerusalén tiacajiniohuani, janiyari Pueyaso Secojonuujua tiajinia secojoriquiaani. 18 Cua secojosacari, janiyari Jesu niquiquiaari juhua cua maquenujiniani. Cua sequereeri: “Ritia quia quiaare niiquiji. Nio pueyari maja na tojitianu quiniutianiya quiajaniya, nojori quia pohuatasacari janiyajiniji”. 19 Janiyari saaja na sequereeni: “Cua Jiyaniijianaa, nojoricuajaruhua niishiya janiyari quiocua tiuuniaa pueya quioojuani puetunu rerejojua tiajinijijianaa cua nujuatejosocoriquiano nojori. Janiyari nojori mojuajuahuaj. 20 Naajuahuaj, quia rupaa pohuatana Esteban jaara mosaaquiaariti, janiyari catecaji saitia na jacusacari shootiaquiaarini. Janiyari na jacunaa toqueya cojuariquiaajaaniuhuj, nojori mosacari Esteban. Janiyari jaarajaaja sequequiaarini: ‘Cuaara mosaaria’”. 21 Naa cua sequesacariti, Jiyaniijiaari saaja cua sequereeni: “¡Niiquiji quia quiaareja! Janiyacuajaari tucuaaanu quia jiyaronutaniya taucuaacuani”.

Comandante jiiitasacari Pablo

22 Pueyari sanaa tojitariquiaa Pablo pohuatasacari. Saniniuujia, Pablo jaara jiyaniquiquiaari taucua, pueyari jiyacari cotequiaari nacoonu, taucua soojeaca nojori quiniucua:

—¡Cuaara mosaaria cuno pueyano! ¡Majaari maninia jiyano pueyano rishiniuria socuatej!

Cuno pueyari naa nacooriguiaa.

23 Na juaaquionuta na nacoosacarijia, na toqueya quejootuquiaari jiyocuacaanuuri quera na macaaniutia. Naa

quejootuquiaari jiyajuajaariuhuj. ²⁴ Comandanteeri na capitáncuaca sequequiaari Pablojiniji:

—Nio pueyano nia tiuquiniri nia quijia tiajinia. Niocua na saniri majacununoj, cuaara sequeera casaara naa pueya nacoyani.

²⁵ Soldadohua jaara tari Pablo morojotuquiaari tiaacuara na majacutusocoriquiano juucua, Pabloori capitán sequequiaari:

—¿Jiyaniijia César rootasanotee, naa nequesoreesoojua nia majacunura narta Romano pueyanotej?

²⁶ Capitán jaara tojiquiaari naa Pablo sequesantej, ritia netequiaariiri. Na comandante sequeeseeri:

—¡Quiaa cocuaatia miya! ¡Cuno pueyanona Romano!

²⁷ Comandanteeri ritia Pabloocua catecanoquiaari. Na nequesotaseeri:

—¿Seetanutejanaa? ¿Quiaatena Romanotej?

Pabloori na riucuaaree:

—Taaquiriirinij.

²⁸ Comandanteeri na sequerohuacuahuaj:

—Romano pueyano cua quiniuria, janiyari queraatia cua cumaneeca niqutioquiaarini.

Pabloori saaja na sequeree:

—Janiyari Romano cutarani, nojori tiacajinia cua rasaanucua.

²⁹ Cuno pojori, Pablo majacunura seeratasaaquiaari juucuaani, naa nojori tojitiasacarij, Pablo shuriucuaaji ritia shiriquitiaquiaariiri. Comandante niishishacari Pablo seetanujuanaa Romano quiquiaari, puerereejaariuhuj, Pablo na morojotenuucua.

*Tama nocuaji Pablo tacusacarijiaaja Judiocuaca jiyani-
ijianucua niqiuara*

³⁰ Tariqui saniniuujia, comandanteeri maninia niishiniu paniquiaari casaara Judiocuaca nacoatariquiaacuaa naa Pablóni. Naaratej, comandanteeri Judiocuacaacuara secojonaa jiyaniijianucua rerejotequiaari. Puetunu Judiocuaca camarucua nacasunaa maanujuanaa rerejotequiaarijaariuhuj. Nojoricuajaari Sanedrín maanu. Jiyacari Pablo numatucujiniji ruparetaquiaari cumayocua saatijiotasanoori. Puetunu nojorijianaa jaara tari rerejoquiaari, jiyacari Pablo tohuatequiaariiri. Nojori tacoji na nujuatereeri.

23

¹ Pabloori juhuacatecara pohuatano coteequiaari camarucua niqiuara. Nojori sequereeri:

—Cua tapueyocuacanaa, janiyari pueyaracaanu juhua-janiya quiquiaani, Pueyaso tojjia cua quishacari pueyara-caanu.

² Naa Pablo sequesacaritij, pueyacuara secojonaa jiyaniijajanaari juaarii. Ananías na sesa. Nojuajaari Pablo jiyaniquiaari najuhuana pocuaa naasucua. Nocuaji, Ananíasri Pablo shuriucua nujuatunaa sequequiaari ritia:

—¡Na rupaajinia nia piri naa pocuaaniquitij!

Pablo shuriucua nujuanaari jaarajaaja na piquii. ³ Majaari Pablo niishiniu quiquiaari casaate Ananías quiquiaarini. Naacuajitij, Pabloori juhuajaniya Ananías sequequiaari:

—¡Pueyasoori saniniuujia cucua quia naminiutianiyacujua, Moisés Rootasano tojjiyashijiana! Nia jiyaniyacari janiyari Moisés Rootasano tojjiyashijiani, niaari coteenu cua nequesoreya maninia taa Moisés rootaquiaaricujani. ¡Quiaa sajara Moisés Rootasano tojjiyashijia cutara, quia sequesacari cua pishaanura nia nequesoreyaquishacarijia maninia janiya!

⁴ Pablo shuriucua nujuatunaari Pablo sequequiaari:

—¿Quiaateeri saa rerequeteyajaa pueyacuara secojonaa jiyaniijiaruhua?

⁵ Pabloori nojori riuquaree:

—Cua tapueyocuacanaa, cua jiyanoori. Paacuajaari naa rootasaaquiaari Moisés nequesoreetuneejiniani:

“Majaari sacuaraatia rimiaaquenu nia camarnuucua”.

Cua pueyanaa, maja cutaraari cua niishiniu quiriquiaa nojuajate pueyacuara secojonaa jiyaniijia.

⁶ Pabloori niishiquii cuno Judiocuaca camarucua nacasunaa cuniqui quiriquiaani, noojiaqueya nojorijiniinioori Saduceocuaca maanujiniji quiriquiaa. Tamasacaari saniniuujia narta Fariseocuaca maanujiniji quiriquiaacujua. Naaratej, Pabloori jiyanoohua na rupaa paaretaquiaari naa na sequenura nojori:

—¡Cua tapueyocuacanaa, janiyari Fariseo pueyanoni! Cua shipininioori Fariseo pueyano quiquiaarijuhuaj. Canaari Pueyaso Rupaacua tiuujiacani. Naacuajitij canaari niishiyani Pueyasoori macunucua samiitianijionutaniuhua taa puetunu cuarta Fariseocuaca niya quiniaa tiuyanijia. ¡Ni-aquiiiri jiyamitia cua nequesoreya!

⁷ Pablo jaara naa sequequiaaritij, Fariseocuacaari Saduceocuacata juhuacatecara juayonuutaquiaari tama nojorijiaaja. Naacuajitij, nojoriiri caapiqui maapuera raquiti-iquiaari. ⁸ Saduceocuacaari jiyaniya maja macunucua samiitiaconu quiniutianihua. Nojoriiri sequeyajuhuaaj: “Maja Pueyaso seya quiniu”. Pueyapuenaari sohuanuujuhuaaj. Fariseocuaca cutaraari nojori cuaracashitishanoocua tiuya.

⁹ Naacujajitij, puetunu pueyajanaari nacooriguiaa na juay-onuutasacari. Jiyacaritij, tariucuacaanu Moisés Naajio-tasanojiniji niishitiojonaa pueyari sanetaquiaari. Nojori-iri Fariseocuaca quijiajuhuaj. Nojoriiri naa sequetuquiaari Pablojiniji:

—iNio pueyanoori maja sesa na miiniu quiquianu! Maninia sohuanu jiyoteeri nocua muetacanu, Pueyaso seru soj. Majaari pa niishiniu. ¿Paatucua casaara tenujure Pueyaso panishano na miishacarini?

¹⁰ Pueyari socua jiyacatequiaari nacoonu. Comandan-teeri puerequiaari, na jiyanihacari Pablo naasucua socua sureesaanutaniyaquij. Naa jiyaniquiaariiri, puerajanaa pueya juaaquiosacari. Nocujaj, comandanteeri ritia na soldadohua jiyaramiquiquiaari, na tiajinia nojori tiuquinini-uhua Pablo pueya tajiniji. Naa miituuquiaariiri.

¹¹ Cuno niucuajani, Jiyaniijia Jesuuri Pabloocua mue-taquiaari. Na sequereeri:

—Quioojia quia cumaquiri Pablonaa. Naatej, taa quia pohuatarucuaa janiyajiniji niya Jerusalén tiacajiniacuaani, quiaari naa pohuatanutaniya janiyajiniji Roma tiacajinia quiniaajuhuj, Césarjanaa niquiarajuhuj.

Judiocuaca roojotoosacari Pablo na motunura juucua

¹² Tariqui saniniuujia, noojiaqueya Judiocuacajinijinoori Pabloocua roojotooquiaari na monura. Nojoriiri naa sequetuquiaaritij:

—Paa jaara Pablo moyaquirini, pocua miaqueyaquirini, pocua ratuyaquirijianiuhuj.

¹³ Nojoriiri cuarenta canuu quiquiaari, naa sequetuquiaarini. ¹⁴ Na nuhuajaj, cuno pojoriiri pueyacuara secojonaa jiyaniijianucuaacua quiaquiaari, Sanedrín maanuucuanio. Nojoriiri naa sequetuquiaari:

—Majaari canaa miaquenu quiniutianiya quenaaja casaa, canaa cuara more Pablojaatijia. ¹⁵ Niajaniya, pueyacuara secojonaa jiyaniijianucuaanaa, puetunu Sanedrín maanujua-naanio, nia sequere comandante cuara nitiaara tariqui Pablo niaacua. Niocua naa na sequerenoj: “Miji Pablo quia nitiaare. Canaari socua maninia na nequesoreenu paniyani”. Canaacua jiyacari niaacua na tiuquiyaquishacarijia nuu cajiniocua na moreni.

¹⁶ Tamonu pueyanoori Pablo raaquia caminiujuquiaari naa cuno pojori sequesano camarucatej. Pablo raaquiaari nocujaj ritia soldadohua quijia tiajinia quiaquiaari na cama Pablo na pohuatanura. ¹⁷ Jaara tari na pohuataquiaari, Pabloori jiyacari cuniqui cojuanaajinijinio capitán piiquiaari. Na sequereeri:

—Nio caya samijia quia jiyataare comandanteecua. Nojuajaari comandante numootenu paniya.

¹⁸ Jiyacaritij, capitánri Pablo raaquia jiyataquiaari. Na tiuquishacari, comandante sequequiaariiri:

—Pa quiasano Pabloori cua piiriini. Cua sequereeri cua nitianura quiocua nio caya samijia. Nojuajanaari casaa quia sequenu paniya.

¹⁹ Jiyacaritij, comandanteeri caya samijia numatujiniji quiaquiaari. Tamocora na jaatucureeri. Tii na nequesotaseeri:

—¿Casaa quia sequenu paniya janiyani?

²⁰ Caya samijiaari na sequeree:

—Noojiaqueya Judiocuacajinijiniori Pablocuara rojo-toorucuaa. Quiaari sapojonu sequesaanutaniya tariqui quia jiyatanura Pablo, puetunu Sanedrín maanujuanaa niqiuara nequesoresocoriquiano. ²¹ Quiaa jaara sequesaaere, majaanri nojori tojinu. Cuarenta canuuri tari nuu cajiniocua nocuaji jamaatiuya. Cuno pojoriniaari maja na miaque-nuunu quiniutianiya, majanaari na raruunu quiniutianiya-juhuaj, cuaara moture Pablojaatijia.

²² Comandanteeri caya samijia sequequiaari:

—Maniniacuaja. Majaari tamasaca pohuatenu quia sequesano janiya. Tariucuaja. Quia quiaarohua.

Soldadohua jiyatasacari Pablo camarnu Félix

²³ Comandanteeri caapiqui capitán piiquiaari. Nojori sequereeri na numotejonura dosciento soldadohua, Cesareya tiacajinia quiojoriquiano cuno niucuaja. Mariyata cuaara quiojooora setenta soldadohua caballohua nijinia cajitujia-cajuhuaj, socua dosciento soldadohua saa cashiriacajanio.

²⁴ Comandanteeri na capitáncuaca sequequiaarijuhuaj, nojori niojotanura cajitucua tamasaca caballohua nijinia Pablo cajijia. Nojori sequequiaarijuhuaj:

—Niocua maninia cojuaare Pablo, cuaara tiuquiiria camarnu Félix nequesoresocoriquiano.

²⁵ Comandanteeri na naajionee niquitioquiaari Pablo jiyatanaa. Naa naajiosanoori quiquiaari camarnu Félixcuara:

²⁶ “Camarnu Félixnaa. Nio Claudio Lisias naajionee. ¿Taa quia quiyani cua panishano camarnunaa? ²⁷ Cua jiyarotasano pueyanojiniji quia pohuatareeraj. Na sesa Pablo. Narta Judiocuacaari na motunu paniquianu. Janiyari jiyacari cua soldadohuata nocua tiuquishii namitiani. Janiya jaara niishiquianuni nojuaja Romano pueyano, janiyari cua soldadohua sequereeni: ‘Judiocuacaacuajinia quiare ritia cuno pueyano, mariqui na

motureeri'. ²⁸ Maninia cua niishiniuria casaara naa pueya nacootariquiaa Pabloni, janiyari puetunu Judiocuaca camarucua nacasunaa rerejotecanuni. Janiyari nojoriicua tohuatecanu Pabloni, nojori nequesoreenura nojuajanaa cua tojishocoriquiano. Janiyajanaa jaara Pablo tojiqianuni, casaara pueya monu paniriquiaanoj, janiyari jiyacari shusha niishiriini. ²⁹ Nojoriqiiiri na nacootacanu Pablo tojiyaquiniuucua tariucuacaanu tama nojori supuetanaa rootasanojuaaja. Cunora na motunu paniriquiaari. Janiyari quia sequeyani, ¿maatucua cunora mosaareeri? Majaari quenaaja sesa na miiniu quiquianu, pueyaracaanu na nujuatesaanura. ³⁰ Janiyari sequesaarucuaajuhuj, noojiaqueya Judiocuacajininionaari na monu paniya. Janiyari jiyamitia quiocua cua soldadohua na jiyarotareeni. Janiyari nocuara saquiriojotanaa sequerucuaajuhuj, cuaara quia saquiriojotatuura nocuara cutara. Cunojuanaa quia sequeyanijia cua camarnunaa. Tariucuaja”.

³¹ Soldadohuari naa miiquiaari taa comandante sequequiaari nojoricuajani. Nojoriiri cuno niucuaja Pablo jiyataquiaari. Antípatris tiacajinia tiuquiiijioseeri. ³² Na niohuacata quiojona soldadohuari Antípatris tiacajiniji tariquicuaji riujuutiaquiaariuhua Jerusalén tiacajiniohua. Caballohua nijinia cajitiunia soldadohua cutaraari Pablo jiyataquiaari. ³³ Pablo jiyatanaa jaara tiuquiiijioseequiaari Cesareya tiacajinia, nojoriiri comandante naajionee niqitiosee camarnu Félix. Pablo na niqitiotureejaariuhuj. ³⁴ Camarnu serojonu nuhuaji comandante naajionee, Pablo nequesotaquiaariiri:

—¿Tee quia rasaaquiaarini?

Pabloori na riucuaaree:

—Cilicia jiyajinia rasanonijia.

³⁵ Camarnuuri na sequere:

—Janiyacua quia nequesoreeriquiani quiocuara saquiriojotanaa jaara tiuquiiijiore.

Jiyacaritij, camarnuuri na soldadohua sequequiaari cuaara maninia cojuatuura Pablo tariucuacaanu jiyaniijia Herodes tiaco. Herodes quishacari jiyaniijia, cuno tiaari nocuaji tiasaaquiaari na quijiaara.

24

Tama Pablo tacusacari nocuajijiaaja camarnu Félix niquiara

¹ Pabloori cinco juuca camueequiaari tari Cesareya tiacajinia. Jiyacari tiuquijioquiaariiri nocuara saquiriojotanuuriquiano pueya. Nojoriiri quiquiaari pueyacuara secojonaa jiyaniiija Ananías, mariyata secaja Judiocuaca camarucuanio. Nojoritia tiuquiquiaariiri Tértulo jyanishano pueyanojuhuj. Jyanohua pocuanu niishijia. Puetunu nio pojorijianaari camarnu Félix^{cua} tiuquitiaquiaari Pabloocuara na saquiriojotanura. ² Pablo jaara tohuatesaaquiaari nojoriicua, Tértulo juhuacatecara coteequiaari camarnu Félix saquiriojotanu nocuara. Naa sequequiaari camarnu Félixri:

—Canaa camarnunaa, quiaari jyanohua niishijia. Naa niishijia quia quishacaritij, quiaari maninia quia pueya jiidiaa. Canaari naacua juhuajaniya quiyani, maninia canaa quia jiidiasacari. ³ Canaari cunora quia timitiaani camarnunaa, maninia quia jiidianuucua canaa pueyaracaanu, puetunu canaa jiyajiniajanaa. ⁴ Maja puera cua tarishitiniu paniniu quiajaniya. Quenaaja rupaquijia canaa quia tojiricuara. ⁵ Nio pueyanoori tariucuacaanu canaa supuetanaa rootasano tamacateya queraatia cuarta Judiocuaca. Nojuajaari tamaatia niishitiojoquiaa tamonu jiyacajinia quiniaa Judiocuacajuhuj. Naa sesa na niishitiojonuucua pueyatej, tamasaari maja tari na rupueni paniniu narta pueyano. Nio pueyano tojitiajacaari sesojosaaquiaari Nazarenoocua tiuuniaa maapue. Nio pueyanocuaajaari cuno pojori jiyaniiija. ⁶ Juucua Pueyaso juaatiniu paniquianujaariuhuj, tahue na tiuquininiu panishacari Pueyaso Secojoua tiajinia. Canaari jiyamitia na quiarucuaani, canaa nequesoreesocoriquiano taa tariucuacaanu canaa supuetanaa rootasaaquiaaricuaajani. ⁷ Comandante Lisiasri canaa na jaariutiariucuaa saajani. ⁸ Canaa sequerucuaajaariuhuj: “Cante nio pueyanooacara saquiriojotanu paniyani, cuara quiaara camarnu Félix^{cua}”. Naa canaa sequerucuaari. Nio pueyano quia nequesotasure, quia niishiniuria maninia. Seetanujuanaacuj, canaari cunora nocuara quia saquiriojotaani.

⁹ Cuniqúi quiniaa Judiocuacaari jaarajaaja sequeturee:

—Taaquiriirinij, camarnu Félix^{naa}. Naacuaaquinatejaj, taa Tértulo sequeyacuajani.

¹⁰ Camarnuuri na juaashiquia shiitioquiaari Pablo pocuanura saniniuujia. Pabloori jiyacari coteeree. Naa sequereeri:

—Taaquiriirinij, pocuashiyacuaaquinatejaj. Camarnunaa, janiyari niishiyani, quiaari tari queraatia marijia shocotejiya cuarta Judiocuaca nequesoreena quia quishacari. Naaratej, janiyari juhuajaniya quia

niquiara tama cucuaji tacunu paniyani, cuarta Judiocuaca saquiriojotasacari cucuara quiajaniya. ¹¹ Janiyari shusha tiuquiriohuacuaa Jerusalén tiacajiniani, Pueyaso cua secojonura Secojonuujua tiajinia. Janiyari shusha camueesuhua doce juucani. Cucuara saquiriojotanaa quia nequesoreesureeraj. ¹² Nojoriiri maja quenaaja na riuriatanu quiquianu janiya tamonu pueyanota juayonuutaano. Majaari na riuriatatunu quiquianu janiya pueya ruutaqueyano quenaaja Pueyaso Secojojua tiajinia. Majaari quenaaja nojori riuriatanu quiquianu janiya canaa Secojojua tiajinia juayonuutaano pueyata. Majaari quenaaja naa cua miiniu quiquiaari puetunu tiacajiniajanaa cua rucuanesacari. ¹³ Nio pojori cucuara quia saquiriojotanaa, nojoriiri maja na naata sequenu seetanujuanaa janiya sesa miijiani. ¹⁴ Nojori sequesacari janiyanaari Pueyaso tojjia tamaatia nojorijinijini, cua tojiniuucua cuno Nazareno pueyano, taaquiriirinij. Saaja cuno nojori sequesano cutaraari seetanujuanaa. Janiyari Nazareno tojjiani seetanujuanaa cua tiuushacari puetunu Moisés naajiotasanoocujanaa, naajuhuj, cua tiuushacari puetunu canaa supuetanaa caminiujiushano Pueyasojiniji naajionuutasanoocujanaano. ¹⁵ Janiyari juhua cucuara saquiriojotanaa pueya tiuya Pueyasooocujuhuj, taa Pueyaso samiitianijionutaniuhua macunucuni; maninia miijiaca, sesa miijiicano. ¹⁶ Naaratej, janiyari pueyaracaanu sesa miyaquiniu saniniujuquiaani, maninia cua quiniuria Pueyaso niquiara, pueya niquiaranio. Naacuajitij, janiya jaara samiitiarohuani, majaari cua macuhujenu quiniutianiya.

¹⁷ 'Queraatia marijia cua shocotejonu nuhuaji cua rucuanesacari tamonu jiyacajinia, janiyari shusha tiuquiriohuacuaa cua jiyajiniani. Tamonu jiyacajiniji Jesuucua tiuuniaa niqutiojosano cumaneeca tiuquitiarohuacuaanijia. Janiyari na tiuquitiarohuani na jatanuhuara Jerusalén tiacajinia, Jesuucua tiuuniaa casamijiuniucua niqutiojosocoriquiano, mariyata cua jiiitasanojiniji cua niqutionuhuara Pueyasora. ¹⁸ Naa cua miiniu nuhuaji Pueyaso Secojojua tiajiniatej, Asia jiyajinijinio Judiocuacaari cua naacutucanu tohuataano juucua Pueyaso Secojojua tiajiniji. Janiyari juucua tohuatariquiohuani cua cuaqueya cua jeequenu nuhuaji, taa canaa supuetanaa niishitiojosaaquiaaricujani. Cuno juuca, majaari queraatia pueya quiniu quiriqiaa Pueyaso Secojonuujujajinia. Majaari quenaaja pueyata cua juayonuutunu quiriqiaajuhuj. ¹⁹ ¿Teete cuno

pojoricuarani? Mariqui niya nimiacuara cucuara na saquiriojotanuunura, janiya jaara sesa miiquianuni.²⁰ Cucuara saquiriojotanaa jaara nijiyaquimia, naajaa, nio pojori niya quiyani, nojoriiri Judiocuaca camarucua nacasunaa nequesoreesacari janiya tii quituquianu jiyacarijiuhuaaj. Nojori cuaara sequeera, ¿cuno camarucuate cua sequecanu janiya sesa miiquianuni?²¹ ¿Pueyateeri cucuara saquiriojotaa soj, nio cua sequenuucua Judiocuaca camarucua: “Niaari cua nequesoreya quiarjia, cua niishishacari macunucuaari samiitianijiosaanutaniuhua”? Janiyacuajaari naa nacacanu camarucua nequesoreesacari janiyani.

²² Camarnu Félix jaara naa tojiquiaari Pablo sequesantej, nojuajaari pueya sequequiaari:

—Comandante Lisias cuaara tiuquiirijaara, janiyacua Pablo nequesoreeriquiani.

Camarnu Félixri Jesujiniji pohuatasano tari maninia niishiquiaari. Naaratej, nojuajaari Pabloocua saquiriojotanaa pueya tarinitiaquiaarijaara.²³ Na nuhuaji, camarnu Félixri soldadohua capitán sequequiaari:

—Pablo nia tiuquiniriohuajaara. Niocua maninia na cojuarenoj. Na rupuenaa, tapueyocucanio, nojori jaara Pabloocua nimiaquia, majaari nocuaji na tenujununoj. Nojori cuaara na niqitiotuura na panishano.

²⁴ Na nuhuaji, camarnu Félixri tamaqui quiaquiaari camueenujunura. Na nuhuaji, juhua shusha tiuquiquiaariuhua necocuataari. Necocua Drusilaari Judiocuacajinijinio maaji quijia. Camarnu Félixri na soldadohua sequequiaari:

—¡Pablo nia tohuatere! Janiyari cua niquiocuata na tojinu paniyani. Cuaara canaa niquiara pohuataara taate Jesuucua tiuushanojaarani.

²⁵ Naacuaajitij, Pabloori Félix pohuataquiaari nojori niquiara taate pa naata maninia miijjara pa quiniuni. Pohuataquiaarijiaariuhuaaj taate pa naata tama pa cuaqueyajaaja pa cojuanu maniniani, sesa pa miyaquiniuucujaji. Naajuhuaaj, Pabloori na numootequiaari Pueyasoori sesa miijjaca saniitionutaniya.

Camarnu Félix jaara naa tojiquiaaritij, jyanohua shiri-iquiaariiri. Pablo sequereeri:

—¡Tariucujal! Quia quiaarohuacuarajaara. Janiya jaara jeya quiriqiani, janiyacua quia sequereeraniuhuaaj.

²⁶ Camarnu Félixri naa sequeyarucua na soldadohua sequequiaari Pablo na jiyatanura nocua, nata na pocoojonura.

Nojuajaari juucua jiyaniquiaari Pablo naasucuaari cumaneeca na niqutionutaniya na cartesaanura. ²⁷ Pablo shocojoquiaariiri caapiqui marijia, nujuatesano na quishacari Cesareya tiacajinia. Jiyacaritij, Porcio Festoori saniniuujia camarnura jiyatesaaquiaari Félix niti. Majaari Félix tohuatenu quiquiaari na nuhuajiria Pablo. Naajaa na tiujiaquiaari nujuatesanoori. Naa miiquiaariiri Judiocuaca timitianura nojuaja.

25

Pablo pahuatasacari Festo niqiara Jesujiniji

¹ Jiyacaritij, Festoori tiuquiquiaari Cesareya tiacajinia, Judea jiya camarnu na quiniuria. Jiuujanaraca juuca nuhuaji, Cesareya tiacajiniji quiaquiaari Jerusalén tiacajiniaari. ² Jerusalén tiacajinia na quishacari, pueyacuara secjonaa jiyaniijianucuaari tii Judiocuacajinijinio socua tojishano camarucuata Pabloocuara saquiriojotaquiaari camarnu Festo. ³ Nojoriiri camarnu Festo sequequiaari cuaara na soldadohua jiyarooro, Pablo na riniuria Jerusalén tiacajiniara. Nojoriiri naa sequequiaari camarnu juucuatej, na motunu panishacari Pablo nucuamaji na nishacari. ⁴ Camarnu Festoori saaja nojori riucuaquiaari:

—Nujuatesano quiya Cesareya tiacajiniacujaruhua. ¿Maatucua casaara niyara rishaareni? Janiyacuajaari nocua tacatenutaniuhuani.

⁵ Camarnuuri nojori sequequiaarijuhuaj:

—Niajanijajinijinio socua tojishano pueya cuaara quiojhuara cuata Cesareya tiacajinia. Nojoriiri na naata Pabloocuara saquiriojotanu cua niqiara tii, cua niishiniuria maninia, Pablote seetanujuanaa sesa miiquianujuuara.

⁶ Camarnu Festoori camueenujuquiaari Jerusalén tiacajinia ocho juuca, diez juucaruhua. Na nuhuaji, quiaquiaariuhua Cesareya tiacajiniohuari. Na tiuquiniu nuhuaji, saniniuujia tariqui cajiquiaari nequesoreesaqui camarnu cajitiujiniaari, camarnu na quishacari. Jiyacari na soldado sequequiaariiri cuaara Pablo tohuateera na nequesoresocoriquiano. ⁷ Judiocuacaari tari tiuquiijoquiaari Jerusalén tiacajinijijuhuaj, Pabloocuara na saquiriojotanuunura. Pablo jaara nujuatesaaquiaari camarnu tajoji, cuno pojoriiri jaarajaaja catecanoquiaari Pabloocua. Nojoriiri jiyanohua sesa nocuara saquiriojotanuquiaari najuhuana queraatia casaa. ⁸ Jiyacaritij, Pabloori tama nocuaji na tacusacarijiaaja naa sequequiaari:

—Maja sesa cua miiniu quiquianu. Janiyari tariucuacaanu Moisés Rootasano tojiquiaajaaniuhuj. Majaari sesa cua miiniu quiquianu Pueyaso Secojoua tiajuhuaj. Majaari Roma tiacajinia quijia pa jiyaniijia tojiyashijia cua quiniu.

⁹ Camarnu Festoori jaarajaaja Judiocuaca panishano miiquiaari, cuno pueya paniniuria nojuaja. Naaratej, Pablo nequesotaquiaariiri:

—¿Quiaate Jerusalén tiacajinia quianu paniya, tii cua nequesoreenura quiajaniya?

¹⁰ Pabloori na riucuaquiaari:

—¿Majateeri Roma tiacajiniji pa jiyaniijiajanaa quia jiyatecanu niya camarnura quia quiniuriacuaja? ¿Casaara niyaja quia nequesoreyaquiya janiyarini? Roma tiacajinia quijia pa jiyaniijiacuajaari niya camarnura quia jiyatecanu. Quiaacuajaari niishiyajuhuj, majaari sesa cua miiniu quiquianu Judiocuaca. ¹¹ Janiya jaara sesa miirii seetanujuaanaani, cuaara cua motuuraqui. Cucuara cuno pojori saquiriojotasano jaara coriaa quiri, majaari quenaaja tamonu pueyano naata niqutionu janiya cua mosaanura. ¿Janiyatucua casaara mosaare najuhuanani? Naaratej, janiyari quia sequeyani camarnunaa: jiyaniijia Césarjanaa cuaara cua nequesoreeraqui.

¹² Camarnu Festo pocoojonu nuhuaji na nacasunaata, Pablo sequequiaariiri:

—Quiaacuajaari cua sequeree cua jiyaronura quiajaniya pa jiyaniijia Césarqua, nojuajanaa nequesoreenura quiajaniya. Janiyari nocua quia jiyaronutaniya cua soldadohuatani.

Jiyaniijia Herodes Agripa niquiara Pablo pahuatasacari Jesujiniji

¹³ Naa Pablo sequesaaanu nuhuajitij, pasaja camueenujuquiaariiri. Jiyacari jiyaniijia Agripaari Cesareya tiacajinia tiuquiquiaari Festoocua, na saruhuatanura nojuaja. Agripaari tiuquiquiaari na rimiatu Bereniceta. ¹⁴ Nojori camueenujusacari camarnu Festo tiajinia, Festoori socua jiyaniijia Agripa pahuataquiaari Pablojiniji. Na sequequiaariiri:

—Tamonu pueyanoori niya quiya, Félix tiujiasano nujuatesano. ¹⁵ Jerusalén tiacajinia cua quishacari, Judiocuacaacuara secjonaa jiyaniijianucuaari nocuara cua saquiriojotacanu, Judiocuaca camarucuata. Nojoriiri cua sequetucanu Pablo cua motenura. ¹⁶ Janiyari saaja nojori riucuaacanuni: “Roma tiacajiniji jiyaniijiaari maja ritia na monu pueyano. Nocuara saquiriojotanaa cuaara nijjoma niya nocuara saquiriojotanuunurajaatijia. Monu

panishano cuaara riuhuaneera tamajaaja quenaaja nocuaji, jaara seetanujuanaa quiyaquiri nocuara saquiriojotasano”.¹⁷ Naacujitij, Jerusalén tiacajinijinio pueya nocuara saquiriojotanuuriquiano jaara cucua tiuquuijio canu, majaari socua cua tarishiniu quiquianu. Janiyari tariquii cuaji nequesoreeja cajitiujinia cajiquianuni, pueya camarnu cua quishacari. Janiyari jiyacari cua soldadohua sequereeni nojori jaatucunura cucua cuno pueyano.¹⁸ Cuno pojori Pablo cuara saquiriojotanuucanuni, nojoriiri maja quenaaja na saquiriojotanuunu quiriucuaa juhua cua niishiriojosano.¹⁹ Saaja tamaatia nocuara cua saquiriojotanuureeri. Pablonaari nojori supuetanaa Pueyasojiniji rootasano tamacaquiaa saaja. Cua sequetureejaariuhuj, Jesu jiyanishano pueyanonaari mosaaquiaari. Pablonaari saaja pueya niishitiojiyacujua, cuno Jesu jiyanishanonaari samiitiaquiaariuhua. Saminionaari quiari quiyajaa.²⁰ Naa cua tojishacari nocuara pueya saquiriojotasantej, majaari cua niishiniu quiquianu taa cua miiniutianiyani. Janiyari cunora Pablo nequesotarucuaani: “¿Quiaate Jerusalén tiacajinia quianu paniya, tii cua nequesoreenura socua quiajaniya?”²¹ Nojuajaari saaja cua sequecanu: “Jiyaniijia César Augustojuanaa cuaara cua nequesoreera juhuari”. Janiyari cunora niyaja nujuatesano na jiitiaani, janiya cuaara na jiyarore jiyaniijia César Augustoocujaatijia.

²² Jiyaniijia Agripaari camarnu Festo sequequiaari:

—Janiyari cuno pueyano tojiniu paniyajaacuhuj.

Festoori na riucuaquiaari:

—Quiaacuajaari tariqui na tojiniutianiya.

²³ Tariqui, jiyaniijia Herodes Agripaari niquiaariuhua Bereniceta. Nojoriiri tiuquitiaquiaari nequesoreeja sohucajinia, shanohua jacaria na rucuanenuta, shanohua na toqueya maniniuquiyatajuhuj. Puereeta niquishano. Nojori tiuquitasacari, nojori cojiquiaariiri soldadohua camarucua, mariyata tama cuno tiacajinijinio camarucujaajanio. Camarnu Festoori jiyacari na soldadohua seerataquiaari Pablo na riniuria, nojori tacoji na nujuatesocoriquiano.²⁴ Pablo tiuquishacari, Festoori sequequiaari:

—Jiyaniijia Agripanaa, puetunu niya canaata rerejono pueyajanaanaa, cua tojitiare. Cuno pueyano niaa na niquiyani, queraatia Judiocuacaari nocuara cua saquiriojotanuquiaa, Jerusalén tiacajinia cua quishacari, niya Cesareya tiacajiniajuhuj. Nojoriiri pueyaracaanu cua taajetequiaa. Cua sequetuquiaari: “Cuno pueyano cuaara mosaaria camarnunaa”.²⁵ Janiyacuajaari tari niishiyani,

nio pueyanoori maja sesa na miiniu quiquianu. Naacuajitij, janiyari niishiriojiyani, ¿pueyanotucua casaara najuhuana mosaareni? Tama nojuajaari cua sequerucuaani, cua jiyaronura nojuaja pa jiyaniijia César Augustoocua, pa Jiyaniijiajanaa nequesoreenura nojuaja. Janiyari cunora na jiyaronutaniyani. ²⁶ Saniniuujia majaari cua niishiniu taa cua pohuatanutaniya cua jiyaniijia cua naajiojiniani. Cunora, nio pueyano nitirii niya nia nequesoreesocoriquianonijia, pueyanaa. Janiyari quia panitiaa cutara nojuajanaa quia nequesoreenurani, jiyaniijia Agripanaa. Quia nequesoreere, cua naajionura pa jiyaniijia Augustoocua casaara nio pueyano cua jiyaroree nocuani. ²⁷ Majaari cua naata naajaa jiyaronu quiasano pueyano, maninia nequesoreyaquishoojua.

26

Pablo riuhuanesacari jiyaniijia Agripa

¹ Jiyacaritij, Jiyaniijia Agripaari Pablo sequequiaari:

—Quiocuaji quia riuhuanereja, jaara seetanujuanaa quiyaquiri quiocuara pueya saquiriojotasano.

Pabloori na juaashiquia sanaquiaari. Naa coteequiaari pocuanuuri:

² —Timiyaniijia jiyaniijia Agripanaa, quia sequesacari cua pocuanura quia niquiara, tama cua tacunura cucuajijiaaja, Judiocuaca saquiriojotasanojiniji cucuara. ³ Quiaari puetunu cuarta Judiocuaca miiijosanojuanaa niishijajuhua, puetunu canaa nacojotasanojuanaanio. Janiyari cunora quia sequeyani, nareja cua tojiri cua pohuatasacari quiajaniya.

Pablo pohuatasacari taa na quiquiaari Jesuucua na tiuyaquishacarijiani

⁴ 'Puetunu Judiocuacajanaari niishiyajuhua j taa quijia cua quiquiaari cua naatujuajiniji nojoritia cua quishacari cua jiyajiniani, Jerusalén tiacajinianio. ⁵ Cuno Judiocuaca quia nequesotasureraaj. Nojori cuara quia pohuataara jaara paniri pohuatanu. Cua mashajajiniji, janiyari seetanujuanaa Fariseo quijiani. Fariseocuacaari puetunu canaa supuetanaa rootasano Pueyasojinijijianaa tojtiaja cutara, socua tamasaca cuarta Judiocuacajiniji. ⁶ Nojorijiaari cucuara saquiriojotacanu cua tiushacari Pueyasooocua, taa na samiitianijionutaniuhua macunucuanu. Pueyasoori nojori samiitianijionutaniuhua taa na sequequiaari tariucuacaanu canaa supuetanaacuajani. ⁷ Quiarijiani, canaa supuetana Israel doce niquiohuacuajinio caneno pueyari naa seetanujuanaa Pueyaso sequesano niquiniuria

sashiyajaa. Naaratej, nojoriiri pueyaracaanu Pueyaso secojonuuquiaa, juuca, niucuanio, Pueyaso na tojitasacari. Naa cua sashishacari Pueyaso sequesanojuhuaj Jiyaniijia Agripanaa, nio cuarta Judiocuacaari quiarijia cucuara saquiriojotanuquiaa. ⁸ ¿Niaateeri jiyaniya Pueyasoori maja na naata macunucua samiitianijionuhua?

Taa Pablo miitiaquiaari Jesuucua tiuuniasa tarijiani

⁹ 'Janiyari tarijia sequequiaari tamajaajani sesa cua niishiriojosacari Jesujiniji: "Nazaret tiacajinijinio pueyanocua tiuuniasa pueya paracaariirij". ¹⁰ Janiyari seetanujuanaa taraatia nojori miitiaquiaari Jerusalén tiacajiniani. Pueyacuara secojona jiyaniijianucuaari cua jiyatequiaari nojori cua miitianura. Naacuajitij, janiyari queraatia Jesuucua tiuuniasa riuniujuquiaari nujuatejojuajiniani. Nojori jaara puecoosaaquiaarijuhuaj, janiyari jaarajaaja sequequiaarini: "Maniniacuaja, cuara puecoosaa". ¹¹ Janiyari sequeyarucua naa miitiaquiaari Jesuucua tiuuniasa pueyani, nojori cua pishojonura Jesuucua nojori tiuunio.

'Janiyari naa miiquiaari nojorini puetunu cuarta Judiocuaca rerejojua tiacajiniaqueyajanaa canaa jiyajinia. Janiyari jiyanojua nojori juaajia quiquiaarini. Majaari quenaaja nojori cua niqiniu paniniu quijia. Naa cua miitiasocoriquiano nojoritij, janiyari nojori pajequiaari tucuaaanu tamonu jiyaca tiacajiniani.

Pablo pahuatasacari taa Jesuucua tiuujiaara na quiquiaarini

¹² 'Naacuajitij, janiyari juucua quiariquiaa Damasco tiacajiniani, pueyacuara secojona jiyaniijianucua jiyarosano. Janiyari tiriara quiariquiaani cua pajenura socua Jesuucua tiuuniasa pueya cua miitiasocoriquiano. ¹³ Nucuaco cua quiasacari jiyaniijia Agripanaa, janiyari jiyocuacaanuji nunusaaquiaarini, cuata quiojonaajuhua. Cuno shacantuucaari socua jiyanojua shacantuuca quiquiaari pananujiniji. Panacariiri jiyacari quiriquiaa. ¹⁴ Cuno shacantuuca jaara canaa nunuquiaari, canaari juhua quejoosaaquiaarini. Janiyari jiyacari tojiquiaari rupaani. Hebreo rupaajinia cua sequeriquiaari: "¡Saulo, Saulona! ¿Casaara puera quia miitiaa janiyani? Naa quia miishacaritij, quiaari tama quia cuaqueya miitiaajaacujua. Juhua juaajia pueyano, na juaashacari saaja mocoshoco patiyashiyari". ¹⁵ Janiyari na sequereeni: "¿Cantequia Jiyaniijiana?" Cua riucureeri: "Janiyacuaajaari Jesuni, quiaa na miitiaquiaani. ¹⁶ Quia sanerohua. Janiyacuajaari quiocua muetareeni puetunu cua panishanojuanaa miijiaara

cua jiyatenura quiajaniya, quiarjia janiyajiniji quia niqushano quia pohuatanurajuhuj. Naajuhuj, na nuhuaji janiyari quiocua muetanutaniuhuanani janiyajiniji quia niqushanorano pohuatana quia quiniuria. ¹⁷ Cua jiyarosacari quiajaniya, janiyari quiarta Judiocuacaacuaji quia cojuanutaniyacujani, tamonu jiyacajinijinio taucuacaacuajinio, tiqiyocua quia rucuanijosacari janiyajiniji quia poojotasacari. ¹⁸ Nojoriicua quia jiyaroyanjia, janiyajiniji nojori quia pohuatanura, maja juhua nimishitiu nojori quiniuria pueyaracaanu. Quia pohuatasacari janiyajiniji nojori, nojori jiuujiaari juhua cuhuatasaanutaniya cucua nojori tiushacari. Nojori jaara naa miiri, Sesaacaari maja tari nojori jiyaniijia na quiniu quiniutianiya. Naa nojori tiushacari cucuatej, Pueyasoori puetunu sesa nojori miishanojuanaa jiyanooniutianiya. Pueyasoori puetunu na saquiriojosano pueyatajanaa nojori rupuetootenutaniya, puetunu Pueyaso jiiitasanojinijijianaa nojori jiiitanurajuhuj”.

Pablo pohuatasano Jesu tojjijara na jatanujiniji

¹⁹ Naacuajitij jiyaniijia Agripanaa, janiya jaara naa tojjiquaari sequeshiyano jiyocuacaanujini, majaari cua tarijionu quiquiaarinioj. ²⁰ Janiyari jiyacari juhuacatecara Damasco tiacajinia Pueyaso rupaa Jesujiniji pohuatanu coteequiaarini, na nuhuaji Jerusalén tiacajinia, mariyata puetunu cuno Judea jiyajiniajanaano. Maja saaja cuarta Judiocuaca cua pohuatanu quiquiaari Jesujiniji, janiyari taucuaca pohuataquiaarijuhuaj. Nojori nacasuquiaarinijia cuaara sesa nojori miishano carteera, Pueyasocua nojori tacatonuhuaa nojori jiuujia. Janiyari nojori sequequiaarijuhuaj, cuaara saaja maninia miijiaa quiiria, na niishishaanura Pueyasoori seetanujuanaa nojori jataniquianu. ²¹ Naa cua pohuatanuucuatej jiyaniijianaa, cuarta Judiocuacaari cua quiatucanu Pueyaso Secojonuujuu tiajinia. Cua motunu paniquianuuri. ²²⁻²³ Naajaa, Pueyaso cumaquishacari janiya, majaari cua tarinitianu quiquiaa puetunu pueyajanaa cua pohuatanu Pueyasojiniji; poonijionuutesano pueya, tojishano pueyano. Majaari tama cua niishishanojuuaaja cua pohuatanu quiquiaa. Janiyari pueya niishitiojoquiaani taa tariucuacaanu Pueyaso sequesano caminiujiuniaa naajionuu-taquiaaricujani, naajuhuj, taa Moisés naajiotasano quiya tariucuacaanu Pueyaso Rupaajiniacuajani. Nojori naajionu-utanoori seetanujuanaa. Naa sequeyari:

“Pueyaso Jiyarosocoriquianoori naquiya miishaanutaniya. Na casonu nuhuaji, nojuajaari coteenu samiitariquianohua. Jaara samiitiarohua,

nojuajiniji pohuatasanoori puetunu pueyapuejanaa cuhuatanutaniya. Naacujitij, nojoriiri niishiniutianiya nojori jaara nocua tiuuri, nojoriiri samiitiaconutaniuhujuhuj; Judiocuaca, taucacanio”.

Pablo tiuutiniu panishacari jiyaniijia Agripa Jesuucua juucua

²⁴ Pablo jaara naa sequequiaari tama nocuaji na tacusacartij, camarnu Festoori nacaquiaari:

—¿Taa quia miyani Pablonaa? ¡Quia mueyocuaquui seseree puera quia niishiniuucua!

²⁵ Pabloori na riucuaquiaari saaja:

—Maja cua paatenu, camarnu Festonaa. Cua sequesanoori seetanujanaa, maja cuaracashiniu. ²⁶ Jiyaniijia Agripaari puetunu cua sequesanojiniji niishiyajuhuj. Cunora majaari cua puerenu na niquiara pocuanu. Nojuaja naasucuaari tarijia tosaquiaaricuaaja Jesujiniji, Jesuucua tiuunias pueya miishanojinijijuhuj. Puetunu canaa miishanojuanaari maja jiyasohujaja na miishaanu quiquiaa. ²⁷ Jiyaniijia Agripanaa, ¿quiaate tariucuaaanu Pueyaso sequesano caminiujiunias naajionuutasanoocua tiuyajuhuj? Quiaacuaajaari nocua tiuya. ¿Naatejaaratej?

²⁸ Jiyaniijia Agripaari na sequequiaari:

—¿Quiaateeri ritia cua jiyatenu paniya Jesuucua tiuuniara?

²⁹ Pabloori na riucuaquiaari:

—Naajaa, ritia, na nuhujaji soj, taa quia paniyacujani. Pueyaso maara seetanujanaa naara quia jiyatere taa quia sequeyacujani; maja saaja quiajaniya, mariyata puetunu pueyajanaa niya cua tojitiaani, juhua janiya nia quiniurajuhuj. Maja naatej, taa cumayocuata moronucua cua nujuatashujanija.

³⁰ Jiyacartij, jiyaniijia Agripaari sanequee, camarnu Festojuhuj, Berenicenio, puetunu cuniqui nojoritia cajitiunias pueyano. ³¹ Nojoriiri cuniquiji tamaqui pacutaquiaari jiyareta nojori pocoojonura Pablojiniji. Tama nojoriiri seque-tooquiaari:

—Cuno pueyanoqui seetanujanaa maja sesa na miiniu quiquianu na mosaanura, maja quenaaja na nujuatesaanurajuhuj.

³² Jiyaniijia Agripaari camarnu Festo sequequiaari:

—Paa maara cuno pueyano cartereni nojuaja jaara quia sequeyaquiquianu pa jiyaniijiaacua quia jiyaronura nojuaja.

27

Roma tiacajiniara Pablo jiyarosaanujiniji pohuatasano. Nio naajiona Lucasri nata quiriquiaa na cojiriquiano

¹ Camarucua jaara sequequiaari canaa buquejinia jiyarosaanutaniya Italia jiyajiniani, Pabloori jiyacari narta quioosano pueyata cojiritiasaaquiaari niqutionu soldadohua capitán. Cuno capitán sesaari quiquiaari Julio. Na soldadohua maanuuri sesojosaaquiaari “Augusto”. ² Jiyacaritij, Adramitio tiacajiniji buqueeri quera ruparetariquiaa, Asia jiya tiacajinia shiiniuquitariquiano. Canaari cuno buquejinia jaaretaquiaarini. Canaata quiriquiaajaariuhua Aristarco. Nojuajaari Macedonia jiyajinia Tesalónica tiacajinijinio pueyano quijia. ³ Canaa quianu nuhuaji Cesareya tiaca tacatajajiniji, canaari tariqui tiuquishiiquiaari Sidón tiaca tacatajajiniani. Capitán Julioori jiyacari cuniqui maninia miiquiaari Pablo. Nojuajaari Pablo tarinitiaquiaari cuaara tacaara na rupuenaa pueyacua, nojori na saruhuatanura Sidón tiacajinia, naajuhuj, na rupuenaa niqutionura puetunu Pablo panishanojuanaanio. ⁴ Canaa jaara jaaretaquiaari Sidón tiacajinijini, canaari canaa muenecara niquimiaa Chipre jiya tucuaatijani. Paratuuri buque nacaacoji piyarojoriquiaa saaja. ⁵ Canaari Sidón tiacajiniji niuutiaquiaari Cilicia jiyacuani, Panfilia jiyacuanio. Canaari na shuriuquiumia jaaretamaani. Canaari Mira tiacajinia tiuutiaseeni, Licia jiyajinia.

⁶ Capitánri cuniqui riuriataquiaari Alejandria tiacajinijinio buque. Italia jiyajinia quiariquiaari. Naaratej, canaa tacanitiaquiaari cuno buquejinaari, tii canaa quianura saniniuujia. ⁷ Canaari camueenujuquiaarini, puera jacaria canaa jaaretanuucua. Naa canaa tarishiniuucuatej, canaari socua tiuquishiiquiaari Gnido tiaca taquijiriani. Paratuuri saa canaa patariquiaajaa. Naacuajitij, canaari Salmón jiya tucuaatijaniyojua shuriucuaratamaani. Canaari Creta jiya tucuaatijaja camarucutamaajaaniuhuj. ⁸ Naa puera canaa tarishiniuucua canaa jaaretasacari Creta jiya shuriuquiumiatej, canaari socua tiuquishiiquiaari pueya jiyaniquishano “Tacataja Maniniujiniani”. Cunoori Lasea tiaca shuriucua quiya.

⁹ Canaari puera tarishiquiaari tarini. Judiocuaca miaquenuyaquiniu juucaari tari shocoquiaari. Jiyacaritij, shoniacu caminiajiniara puereeta quijia tari buqueta jaaretanura. Pabloori juucua sequequiaari:

¹⁰ —Camarucuaanaa, janiya niishiyani paari cocuaatia miiniutianiyani. Paa jaara socua jaaretaareni, pa buqueeri jiaquetanutaniya socua. Pa pasano casamiiri niitiiniutianiya.

Paa naasucuaari cusonuunutanijajuhuj. ¿Casaatejaj pa toy-ani?

¹¹ Pablo jaara naa sequequiaaritiij, majaari buque jiyatana capitán tojiniu quiquiaarinioj. Saaja buque camarujuanaa tojiquiaariiri, buque capitánnio. ¹² Cuno tacatajajiniiji canaa tii tiuutiariquiaani, majaari maninia quiquiaari shuniya canaa tajitiniuria tii. Nocuaji, puetunu pueyajanaari seque-
tuquiaari:

—¡Niiquiji pa quiaarej! Fenice tiacajinia pa quishii shuniy-
acuaji.

Cuno Fenice tiaca tacatajaari pananu muetasamaji quiquiaari, cuno Creta jiya tucuaatiajaacuaja.

*Shoniniacu caminiajinia paratu piyarojosacari jiyano-
huanojori*

¹³ Jiyacaritiij, paratuuri jacaria piyarojonu coteequiaari pananu shuucuaji, canaa muenecarajiniiji. Naaratej, nojori-
iri sequetuquiaari:

—¡Pa naatacuajaqui niiquiji quianu!

Canaari cuniquiji ruparetaquiaarini. Creta jiya tucuaatiaja shuriuquiumia jaaretaareeri. ¹⁴ Na jaaretasacari shiitianiyojua, paratuuri canashiyaquiji jiyano-
hua piyarojoquiaari buque. Cuno paratu sesaari quijia “Noreste”. ¹⁵ Paratuuri buque capotariquiaa na shuucujiria saaja. Naaratej, majaari canaa naata jaaretanu quiri-
quiaa paratu piyarojosacoji. Paratuuri saa canaa patariquiaajaa. Nocuaji, canaari buque tarinitiaquiaarini paratu cuara na capotaara tamajaaja. ¹⁶ Paratuuri canaa capotaquiaari tamonu jiya tucuaatiaja tamajiria. Cuno jiya tucuaatiaja sesaari quiquiaari Cauda. Majaari puera paratu piyarojonu quiri-
quiaa tii. Canaa rishano boteniyojuaari buque pajamaji jaasutariquiaa. Canaari jiyano-
hua poonijioquiaari cuniquini, canaa tacaniniuhuara buque cacojiria cuno boteniyojua. ¹⁷ Bote tacanishaanu nuhuaji, canaari buque cuaqueya morojoquiaarini na cumaquiniuria na jiaqueyaquiniuucuaji. Pueyari na puerenuta sequetuquiaari:

—¡Paratuuri pa capotanutaniya jaaquijiniara! ¡Paari tii riitianutaniyani!

Cuno canaa pueresano jaaquiani, na sesa quiquiaari Sirte. Nocuaji, nojoriiri buque toqueya roshinitiaquiaari. Paratu-
uri saaja capotaquiaari buque. ¹⁸ Jaara juhuaquequiaari, paratuuri saaja jiyano-
hua piyarojoriquiaajaa. Naaratej, nojoriiri buque pasano casami quejoonu coteequiaari moojinia. ¹⁹ Canaa camueenujusacari jiuujianaraca juuca naquiya canaa miishacari, canaari buque casamijianaa

quejooquiaari socuani, buque namuenura quenaaja.
²⁰ Tari canaa shocojoquiaariiri queraatia juuca. Majaari quenaaja canaa niquniu quiquiaari pananu, riyanio. Paratu piyarojosacari canaacua, mohuacaari socua jiyanohua cajiniuucuaquiaari canaacua. Nocuaji, canaari niishiriojoriquiaani canaari quiarjia cusonuunutaniyani.

²¹ Majaari tojetaarucujanaa quenaaja canaa miaquenu quiquiaari pueyaracaanu. Pabloori jiyacari nujuaquiaari canaata quiniaa tajiniji. Naa nojori sequequiaariiri:

—Camarucuanaa, niaa jaara tojiqianu quenaaja cua sequesano, maja pa ruparetanura Creta jiya tucuaatiajajiniji, paatuma naa miya naquiyani. ²² Naajaa, nioojia nia cumaquiri. Maja quenaaja niquiriyatu pajaniyajinijinio cusonu quiniutianiya. Pa buque cutaraari juhua rapitiasaanutaniya puetunujuanaa. ²³ Janiyari quiarjia cua maquenujinia cua Jiyaniijia Pueyaso seru niquirii cua shuriucua nujuaanoni. Janiyari cuno Pueyaso tojjiani. Janiyacuajaari na pueyanoni. ²⁴ Pueyaso seruuri cua sequeree: “Majaari puerenu Pablonaa. Quiaacuajaari jiyaniijiajanaa Augustocua tiuquiniutianiya Roma tiacajinia. Quiaari na taccoji nujuanutaniya quia pocuanura. Naajuhuj, Pueyasoori quia secojosano tojjiriucuaa. Naaratej, puetunu quiata quiniaa-janaari quiata rishiniutianiyajuhuj”.

²⁵ 'Naacuajitij camarucuanaa, nioojia nia cumaquiri. Janiyacuajaari seetanujuanaa niishiyani, naa quiniutianiyari taa Pueyaso seru sequeree janiyacujani. ²⁶ Naajaa, paari tamonu jiya tucuaatiajaacua juhua niojosaanutaniyani.

Pabloori naa canaa cumanijiaquiaari.

²⁷ Pueyaracaanu canaa jaaretasacari shoniniacu caminiajinia, caapiqui semaanaari tari canaa shocoquiaari. Tamonu niucua canaa jaaretasacari, canaari Adriajinia quiriquiaa tarini. Pueyari cuno shoniniacu caminia jiuujiajinia sesojoquiaari Adria. Paratuuri canaa niyacuneetetariquiaa jiyareta. Jaara shiyaqueya quiriquiaa cuno niucua, buque jiniacuma poonijionaari niishiquiaari canaari tari jiyacua catecanoyani. ²⁸ Buque jiniacuma poonijionaari jiya shanacuciaari, na niishiniuria queroni quiriquiaajaa. Na shanacutusacari, saaja treinta y seis metro queroni quiriquiaari. Jaara socua na taccoji shanacutuquiaariuhua, saaja veintisiete metro queroni quiriquiaari. ²⁹ Nojoriiri puerequiaari buque naasucuaari shoniniacu caminia casaqueyaji pojotujua saicua cutetanutaniya. Nocuaji, buque pajamaji sohuaneyocuata morojotasano cuatro niajaaca casaa quejootuquiaariiri,

buque nujuatanura pootia. Nojoriiri cuniquijia na puerenuta sashiquiaari cuaara juhuaqueera. ³⁰ Jiyacaritij, buquejinia poonijionaa pueyari juucua cuno niucuaaja jiyasohuaja mashiyocuatunu paniriquiaa buquejiniji. Naaratej, nojoriiri buque nacaacoji sapojonu tinijiotariquiaa niajaaca casaa moojinia. Jiyasohuaja roshinitiuriquiaa jiyocuacaanu tacanishano boteeri, tii na mashiyocuatunura. ³¹ Pabloori jiyacari na jiyatana capitán toquiaari, na soldadohuanio. Naa nojori sequequiaariiri:

—Cuno pojori jaara niya juhuaqueyaquimia pata, niaari cusonuuriquiano.

³² Soldadohuari ritia jiyocuacaanu tunusano bote neyocua jiyatajotaquiaari. Moojinia na tinitiuriiri. Paratuuri na piyarojoquiaari tamoco nojorijiniji.

³³ Juhuaquenu panishacari, Pabloori puetunu buquejinia quiniaajanaa sequequiaari cuaara quenaaja miaquenuura. Naa nojori sequequiaariiri:

—Tari nia shocojiyari catorce juuca pueyaracaanu nia sutesacari. Majaari nia miaquenu quiquiaajuhuj.

³⁴ Quiarjia nia miaquerecuara, nia cuaqueya nia cumaquitajara quenaaja. Majaari quenaaja niquiriyatu nijaniyajinijinio cusonu quiniutianiya quiarjia.

³⁵ Naa na sequenu nuhuajitij, Pabloori pan riquiaari. Na miaqueyaquishacarijia, coteenu Pueyaso secojoree puetunu nata quiniaa niquiarajanaari. Na nuhuaji miaquerohuari.

³⁶ Tamasaca jaara naa niquiquiaari Pablotej, puetunu nojorijianaari noojia cajitiquiaari. Pan satureejaariuhuj. ³⁷ Cuno buquejinia, puetunu canaajanaari quiquiaarini dosciento setenta y seis pueya. ³⁸ Puetunu pueyajanaa jaara tooquioquiaari, na nuhuaji trigo quejootuquiaari moojiniaari, buque namuenura quenaaja.

Buque coquesacari caminiajinia

³⁹ Jaara juhuaquequiaari, buquejinia poonijionaa pueyari maja na niishiniu quiquiaari teyano jiya tucuaatiajatejaara cunoni, nojori na niquiriquiaani. Nojoriiri cuno jiya tucuaatiajaacua niquiquiaari puereetuuca surocohua. Jaaquiaari puetunu na shocujanaa quiriquiaa. Naacuajitij, nojoriiri sequetuquiaari:

—Buque pa saniri shiitianiniu cuno surocohuama.

⁴⁰ Buquejinia poonijionaa pueyari niajaaca sohuaneyocua jiyatajotaquiaari. Cuno niajaacaari caminia jiuujiajinia jateequiaari cuniquijia. Nojoriiri buque niquinijiotetajaa roshinitiaquiaarijiuhuj, buque tacutajara. Buque nacaacuaji teeja toque tacanitiatuureejaariuhuj. Buqueeri canujutaaree jaaquiajiniara, paratu piyarojosano.

⁴¹ Buqueeri saacariji jaaquiajina riitiaseequiaari, caminia cajiniuucasacari mohuaca paatishano jaaquiajina. Buque nacaari jyanohua tiuquishii cumaatia jaaquiajina. Majaari quenaaja na naata pooniu quiriquiaa na matasaquiji. Na pajaari maa rapuequiaarijia moo cajiniuucasacari jyanohua nocua. ⁴² Soldadohuari nojori jiyatasano quioosano pueya puecoonu paniquiaari cuniquijia, nojori jyanishacari cuaconutaniya naasucua, mashiyocuatumaari. ⁴³ Capitán cutaraari Pablo tiuquitiniu paniquiaari jiyaniijia Augustoocua. Naaratej, na soldadohua sequequiaariiri:

—¡Maja quioosano pueya puecootunu!

Cuno capitánri puetunu pueyajanaa sequequiaari:

—Cante cuacojua cutarani, nojori cuaara cuacoora coteenu, jaaquiajina rupaatiushiihuaari. ⁴⁴ Cuaashijianucua saniniuujia cuaara buque jiniacumaji suruhuatuneeacaacia jacamatuura na cuatajara. Tamasaca cuaara buque neecaacia jacamatuurajuhuj.

Naa miitiuquiaariiri. Puetunu pueyajanaari jaaquiajina rupaatiushiihuaari.

28

Pablo quishacari Malta jiya tucuaatiajajinia

¹ Puereeta canaa cuaconu nuhuaji shoniacu caminiajina, canaari namitia puetunujuanaa maninia tacataseequiaari cuno jiya tucuaatiajaacuani. Canaari jiyacari shusha niishiquiaarini, cuno jiya tucuaatiaja sesaari quiquiaari Malta. ² Cuno jiya tucuaatiajaacua quijia tucuaacaari maninia canaacua jyanooquiaari. Shiniquiaari quiriquiaa. Maruuri niriquiaajuhuj. Naa canaa shiniquiosacaritij, tucuaacaari canaara noshitiquiaari puereetuuca mani. Na nuhuaji canaa sequetureeri:

—Miji. Nia jitiushii.

³ Pabloori naanacucua reratejoriquiaajuhuj. Manijinia na quejooriquiaari. Jiyacaritij, soconuquiiiri maniicuaaji mashiriquiaa juucua. Pablo juaashiquia saariiri. ⁴ Cuno jiya tucuaatiajaacua quijia pueyari soconu niquiquiaari Pablo juaashiquiaacuaji sohuataano. Jaara naa niquitiuquiaaritij, tama nojorijiaarijia sequetooquiaari:

—¡Nio pueyano naasucuaari pueyano moju! Cocuaatia miirii juucua shoniacu caminiajina na cuasacari buquejinijiiri. Pueyasoori quiarijia saniniuujia cunora soconu na sajitirii na cusonura.

⁵ Pabloori saaja manijinia majiriataree soconu. Majaari quenaaja na sajiyashi noonu quirii. ⁶ Puetunu pueyajanaari na sashiriquiaa, taacari na poreenutaniyani.

Na sashitiuriquiaajaariuhuj na jiyaniushacari canashiyaquiji cusonutaniya naasucua. Naa pueyaracaanu na sashitiushacari juucuatej, nojoriiri socua tamaatia niishiriojonuquiaari. Nojoriiri Pablojini sequetooquiaari:

—¡Cuno pueyano naasucuaari pueyasojuhanaj!

7 Cuniqúi canaa quishaquini, canaari tamonu pueyano cuhuariquia shuriucua quiriquiaani. Na camaruuri cuno Malta jiya tucuaatiaja camarnu quiquiaari. Na sesaari Publio quijia, maninia pueyano. Nojuajaari canaa masuuquiaari na tiacora. Canaa mianuutequiaari maninia tiiri. Canaari jiuujianaraca juuca na tiajini camueequiaarini. 8 Cuno camarnu queeri jiyacari cusosu matariquiaa. Jiyanohua nasecaari quiriquiaa. Coriyacau rurequeriquiaajaariuhuj, na jiniacuma noonunio. Pabloori nocua tiuquiquiaari na matasaqui. Pueyaso secojoree nocuaraari. Na secojosacari, nocua niaquiaari na juaashiquiaari. Pueyanoori naatarohua. 9 Cuno jiya tucuaatiajaacua cusosuhua jaara niishiquiaari naa Pablo naatanishanocuaa cuno pueyanotej, nojoriiri nijioquiaarijuhuaj. Pabloori puetunujuanaa na naatanijioquiaari. 10 Naa Pablo miiniuucuatej, cuno pueyari na jiiitasano casamijini canaa niqutiojoquiaari nareja. Na nuhuaji, canaa jaara quiaquiaari cuniquiji tamonu buquejiniani, nojoriiri canaa jiyatajara canaa panishano niqutiojotuquiaari narejajuhuj.

Pablo tiuquishacari Roma tiacajinia

11 Canaa sashishacari shuniya cuaara tajiiria, jiuujianaraca racaari canaa shocojoquiaari Malta jiya tucuaatiajaacua canaa quishacari. Alejandría tiacajinijinio buqueeri tii nujuatariquiaajuhuj. Shuniyacuaji tiutiaquiaari tiiquiri. Cuno buque nacatuuri juhua nojori pueyasohua Cástor nacara quejasano quiquiaari, juhua Pólux nacanio. Canaari cuno buquejinia quiojoquiaari cuniquijini. 12 Canaari Siracusa tiaca tacatajajini tiutiaseequiaarini. Canaari jiuujianaraca juuca camueenujusee tiini. Siracusa tiacaari Sicilia jiya tucuaatiajaacua. 13 Cuniquiji canaa quiasacari, canaari cuno jiya tucuaatiaja shuriucuaataareeni. Canaari Regio tiacajinia tiuquishiini. Tariqui, paratuuri maninia piyarojoriquiaa buque nijiniji. Canaari cunora tama tariqui tiuquishii Puteoli tiacajiniani. Canaari quiniqui tacatasee puetunujuanaani. 14 Puteoli tiacajinia Jesuucua tiunuaa pueyari canaa masuuquiaari na tiajinara. Canaa sequetuquiaariiri:

—¡Maja canaa shoconu pueyanaa! Canaa tiajini nia camueenujumajaara.

Naaratej, canaari siete juuca nojoritia camueenujuquiaarini. Na nuhuaji, canaari cuniquiji Roma tiacajiniara

neteja nucuaco quiaquiaarini. ¹⁵ Roma tiacajinijinio Jesuucua tiuuniaa pueya jaara niishiquiaari canaa tari nucuamaji niyani, nojoriiri nucuacoji canaa naacunuucua nijioquiaari. Coteenu nijionaari canaa naacuquiaari Foro de Apio tiacajinia. Tamasacaari saniniuujia canaa naacuquiaari Tres Tabernas jyanishano tiacajinia. Pablo jaara narta Jesuucua tiuuniaa niqiquiaari, noojia cumaquiaariiri. Naaratej, Pueyaso sequequiaariiri:

—¡Paacarasho cua Pueyasonaa!

¹⁶ Canaa jaara tiuquiquiaari Roma tiacajiniani, Pablo jiyatana capitánri puetunu quioosano pueyajanaa niqitioquiaari Roma tiacajinia quioosano cojuanaa camarnu. Pabloori saniniuujia tarinitiasaaquiaari tamonu tiajinia na quiniuria tamajaaja, tamonu soldadota na cojuariquiano.

Pablo pohuatasacari Jesujiniji Roma tiacajinia

¹⁷ Jiuujianaraca juuca na quishacari tari Roma tiacajinia, Pabloori puetunu tii quijiaca narta Judiocuaca camarucujanaa masuquiaari, nata nojori rerejonura. Cuno pueya jaara rerejoquiaari, Pabloori nojori sequequiaari:

—Cua tapueyocucanaa, majaari cua miiniu quiquiaari sesa parta Judiocuacani. Majaari cua numueejushiniu quiquiaa pa supuetanaa niishitiojosanojuhuaj. Naajaa, pueyari cua quiatucanu Jerusalén tiacajinia. Cua niqitiotucanu Romano pueyari, cua morosaanura. ¹⁸ Nojori nequesoreenu nuhuaji janiya, cua cartetunu paniquianu juucuaari, nojori niishishacari maja sesa cua miiniu quiquiaari cua mosaanura. ¹⁹ Romano camarucua jaara cua cartenu paniquianu, parta Judiocuacaari saaja juaaquioree. Janiyari jiyamitia sequecanuni, cuaara cua jiyarotuura jiyaniijia-janaacua niya Roma tiacajiniani, Césarjanaa nequesoreenura janiya. Naajaa, majaari cua saquiriojotanu quiniutianiya saniniuujia nojoriicuara, cuarta Judiocuaca nojori quiniucua. ²⁰ Janiyari cunora nia niqiniu paniriquiaani, cua pohuatanura niajaniya taa puetunujanaa parta Israel pueya niishiyacuajani, niajanijahuaj; macunucuaari samiitiani-jiosaanutaniuhua. Janiyari cunora cumayocuata moronucua niya quiyani.

²¹ Judiocuaca camarucuaari Pablo riucuaquiaari:

—Maja quenaaja canaa masetanu quiquianu Judea jiyajiniji naajionee, canaa pohuataaanura quiajanijajiniji. Cuniqijinio parta Judiocuacaari niya tiuquiiocanujahuaj. Naajaa, nojoriiri maja quenaaja sesa na pohuatanuunu quiquianu canaa quiajanijajiniji. ²² Canaari saaja niishiyani, puetunu tiqiyocujanaa sesacasaquiaaquinaari Jesujiniji

pohuatasano. Quiaa mariqui cunojiniji canaa pohuatare, canaa niishiniuria socua.

²³ Jiyacaritij, Judiocuacaari Pablo sequetuquiaari:

—Canaacua tamonu juuca quia tojiqiiquiani.

Na nuhuaji, nojoriiri na sequetusano juuca nijioquiaari. Pablo quijia tiajinia mishitiuquiaariiri. Pabloori nojori niqiuara pohuatanu coteequiaari tariquiiuaj. Naa niniya-reejaari. Juucua nojori niishitiojoquiaariiri, Jesuuri seetanujuanaa Pueyaso Jiyarosano quiquiaari. Nojori sequequiaari-ijiaariuhuj taa Pueyaso jiiitaa na jiyanooshano pueyani. Naajuhuj, tariucuacaanu Moisés naajiotasano Jesujiniji niishitiojoquiaariiri, Pueyaso sequesano caminiujiuniaa naajionuutasanonio. ²⁴ Noojiaqueya nojorijinijinioori Pablo sequesano tojiqiaari cutara. Tamasacaari saaja na cuarachitiquiaari saniniuujia. ²⁵ Nojorijinijinio jaara Pablo niishitijosano tojiqiaari cutara, tamasaari nojoritia juayonuutano coteequiaari. Naa na juayonuutasacaritij, tohuareetaquiaariiri na quiojonuhua. Pabloori jiyacari nojori sequequiaari:

—Pueyaso Sohuanuquiiri seetanujuanaa tariucuacaanu Pueyaso sequenu panishano caminiujiunia Isaías pohuataniquiaari parta Israel pueya niqiuara, jaara na sequequiaari:

²⁶ “Quia quiaare cuno pueyacua. Quiocua nojori seque-see: ‘Niaari cua rupaa tojiniutianiya. Majaari nia niishiniu quiniutianiya casaa nia tojiyani. Niaari cua cumaacata cua miishano niqiniutianiyajuhuj. Majaari quenaaja nia niishiniu quiniutianiya’. ²⁷ Cuno pueyari noojia cumantaree maja na tojitianura cua rupaa. Naaratej, saaja sesa tojitiaquiaari. Nojori namijiaari mishiquiojosanojuhuj, na niqitaaquini-uucuj, maja na numaata na tojitianura, noojiata na niishituyaquiniuriano. Naa jiyatecanu nojorinjia, maja na niishituniuria janiya, mariqui cucua tacate-turohuari, nojori cua naarajonura”.

²⁸ Pueyanaa, nia niishiri. Naaa jaara ruuretare cua pohuatasano Jesujiniji, taucuacaari saniniuujia pohuatasaanutaniyacujua, taa Pueyaso jiyanooni panija pueyani, maninia na jiiitianura nojori. Taucuacaari na tojitianutaniya cutara.

²⁹ Pablo jaara naa sequequiaari nojoritij, Judiocuacaari quiojiyarohua. Tama nojorijiaarijia juayonuutaarohua na quiojosacariuhua.

³⁰ Caapiqui marijiaari Pablo shocojoquiaari rupaquijia na masesano tiajinia moronucua na quishacari Roma tiacajinia. Puetunu pueyajanaa jaara nocua niquiaari na niqiniuria, nojuajaari maninia na masequiaari na quijia tiajinia.

³¹ Majaari jiyasohuaja na pohuatanu quijia taa Pueyaso jinitiaa na jiyanooshano pueyani. Jiyaniijia Jesujiniji niishitiojojuajaariuhuj. Majaari na sanaajasaanu quijia.

PABLO NAAJIONEE ROMA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pabloni, Jesucristo seru. Nojuajaari cua saquiriojoquiaari saa neraja cua poonijionura. Nojuajaari cua jiyatequiaari na jiyaramiquishano cua quiniuria, seetanu rupajanaa cua pohuatanura pueya niquiara, Pueyaso pueyara nojori jatanishaanura. Janiyari cunora nio naajioteya niacuarani.

² Pueyasocujaari tariucucaanu na sequenu panishano caminiujiunaa pueya niishitiquiaari, nojori naajiotanura Pueyaso Rupaa, pa niishiniuria taa Neyanu na miiniutianiya pocuarani. ³ Pueyano na quiniuria mijiria, Neyanu Jesucristoori rasaquiaari. Na supuetanaari quiquiaari Israel pueya jiyaniijia David. ⁴ Jesu sohuanuuri saniniujia pueyaracaanu Pueyaso Niyanujuhanajaj. Paa cutaraari quiari naataja niishitishaaquiaarini, nojuajaari seetanujanaa Pueyaso Niyanu. Paari quiaritia na niishiya seetanujanaa cutarani, Pueyaso Sohuanu samiitianiniucua nojuaja macujiniji. Nojuajaari tari jiyatesaaquiaari Jiyaniijiajanaa na quiniuria, puetunu cumaacajanaa na jitianurajuhuj. Nojuajaari pa Jiyaniijia Jesucristo.

⁵ Nocua canaa tiuuniucua, Pueyasoori canaa jiyatequiaari na jiyaramiquishano pueya canaa quiniuria, Neyanujiniji canaa pohuatanura. Canaa cumaquiriiri puetunu jiyacajinijinio pueyajanaa canaa tiutiniuria Neyanuucua, na tojitiajaca nojori quiniuria.

⁶ Niajaniyajuhuj, Roma tiacajinia quiniaa Pueyaso pueyanaa, Pueyasoori nia saquiriojoquiaari Jesucristo pueya nia quiniuriajuhuaj. ⁷ Puetunu Pueyaso panishano pueyajanaa, canapue Pueyaso saquiriojoquiaari saa maninija nojori quiniuriacuajani, janiyari niacuara naajioteyani. Pa Que Pueyaso, pa Jiyaniijia Jesucristojuhuj, nojori cuara cumaquiiria niajaniya, maninia na tojijia nia quiniuria. Naajuhuj, nojori cuara nioojiaca cajitiiria shuquiriaatia nia quiniuria pueyaracaanu.

Pablo naquerejosacari Roma tiacajiniara

⁸ Coteenu nia sequenu paniyanijia, janiyari nia timitiaquiaani, maninia niajaniyajiniji pueya pohuatanuucua puetunu jiyacajiniajanaa. Nojoriiri pohuataquiaa, niaanaari

maninia tiuujiaa pa Jiyaniijia Jesucristoocua. Naa Jesucristo miiniucua nijaniyatej, janiyari cua Pueyaso sequequiaani: “¡Paacarasho! Quiaari jiyanoehua maninia”.⁹ Janiyari pueyaracaanu cua Pueyasora poonijioquiaani puetunu cua cumaacatajanaa, Neyanujiniji cua pohuata-nura. Pueyasocuaajaari niishiya, pueyaracaanu cua sec-
ojosacari nojuaja, janiyari niaacuara secojoquiaajuhuaaj.¹⁰ Naa cua secijosacari nojuajatej, janiyari na sequequiaani
cuaara cua tiuqutiiria niaacua, rupaquijia cua quiniuria
niaata, nojuaja jaara naa paniri.¹¹ Janiyari nia niquiniu-
ucua jiaatiaani, cua cumaquiniuria socua nijaniya na So-
huanu cumaacata, socua jiyanoehua Pueyasocua tiuujiaa
nia quiniuria.¹² Majaari cua cumaquiniu paniniu saa nia-
janiyaja. Janiyari paniyani nia cumaquiniuria janiyajuhuaaj.
Naacuajitij, mariyata pa tiuushacari Jesucristoocua, paari
mariyata cumaquitiojonutaniyani.

¹³ Cuarta Pueyaso muerasunaa, janiyari nia sequenu
paniyani nia niishiniuria, janiyari sequeyarucua niaacua
naquerejoquiaa juucuanii. Majaari juhuanujuaja cua naata
quianu niaacua. Janiyari Jesucristojiniji pohuatanu paniya
tii Roma tiacajiniani, tee nia quiyacuajani, cuno taucuaa
tiuuniuria Jesuucujuhuaaj. Tamonu jiyacajinia taucuaaari
tari Jesucristoocua tiuujiaa quiyacuaa, cua pohuatanuu-
cua Jesucristojiniji nojori niquiara. Janiyari naa miiniu
paniya nia tajinijuhuaaj.¹⁴ Cua Jiyaniijiaari cua jiyate-
quiaari na rupaa pohuatanara. Janiyari cunora na rupaa
pohuataquiaani. Majaari na tojiyashijia cua quiniu paniniu.
Naaratej, janiya cuaara pohuataara na rupaa puereetu-
uca tiacajinia pueya niquiara, mariyata tiquiyocua quijiaa
pueya niquiarajuhuaaj. Janiya cuaara na rupaa pohuataara
niishijiaa pueya, niishiyashijiaa pueyano.¹⁵ Janiyari
cunora quianu paniya Roma tiacajiniani, cua pohuatanura
Jesucristojiniji nijaniya.

Pueyaso Rupaari cumaacaraca na jataniniuria pajaniya

¹⁶ Maja cutaraari cua caririquniu Jesucristojiniji
cua pohuatanura. Jesucristo rupaacuajaari Pueyaso
cumaacaraca, pueya na jataniniuria Pueyaso muerasu
nojori quiniuria, nocua nojori tiuushacari. Puetunu
Jesuucua tiuunaa pueyapuejanaari Pueyaso pueyara
jatanishaanutaniya, taa Juidocuaca jatanishaaquiaa
Pueyaso pueyaracaani.¹⁷ Jesucristo pohuatasanojiniji
paari niishiyani, Pueyasoori pa jiyanoquiaa sesa pa
miishanojiniji, saaja Jesucristoocua pa tiuushacari.
Saaja nocua pa tiuuniucua, paari Pueyaso pueyara

jatanishaaquiaani. Cunora, naa naajiotasano quiyacuajaari tariucuacaanu Pueyaso Rupaajinia:

“Pueyaso jiyanooshano pueyanoori pueyaracaanu shuquiriatia quijia quiniutianiya, saaja Pueyasoocua na tiushacari”.

Pueyasora, puetunu pueyajanaari sesa miijiaca

¹⁸ Pueyasoori jiyocuacaanuji na tojiyashijiaca pueya sanitionoquiaa. Naa nojori na saniitiosacaritij, Pueyasoori nojori numootequiaa, nojuajaari puetunu na tojiyashijiaca pueyajanaa sanitionutaniya jiyanoohua na juaaniutia. Naa saniitiosaanutaniyajaariuhuj, puetunu sesa miijiaca pueyajanaa. Naa sesa miijiaca pueya quishacaritij, nojoriiri Pueyasojiniji niishishano ruuretaquiaa saaja. ¹⁹ Nojori jaara Pueyaso niishiniucua jiaatiariquia, nojori maara na niishirij. Pueyasocujajaari tari nojori niishitiquiaari taamuecate nojuajani. Nojoricujajaari tari maninia nojuajiniji niishiya. ²⁰ Majaari pa naata Pueyaso niquniu pa namijiata, pa niishiniuria taamuecate nojuajani. Naajaa, Pueyaso shipininiucua jiya, maatia niishishiyacuajaari nojuajaari Pueyaso, pa niquishacari puetunu na shipinishanojuanaa. Na shipinishanojiniji niishishiyajaariuhuj, majaari na cumaaca puequenu quiniutianiya. Pueyaracaanu quiriquianoori. Naacujatij, Pueyaso sanitionu panishacari na tojiyashijiaca pueya, nojoriiri maja na naata sequenu quiniutianiya Pueyaso: “Maja canaa niishiniu quijia quijaniyajiniji”. ²¹ Nojoricujajaari Pueyaso niishijia najuhuanaj. Na niishijiaca nojori quishacari, nojoriiri saaja na rerequeteja. Nojoriiri na tojtiaaquiquiaajuhuj. Pueyaso miiniucua maninia pueyaracaanu nojori, nojoriiri maja quenaaja na sequetunu quijia: “Paacarasho Pueyasonaa”. Tama nojorijaarijia jiyanoohua cushitiquiaa sesa nojori niishiriojonuusacari najuhuanaj. Naa mosanucua nojori quishacaritij, nojori jiuujajaari juhua ninishiquiria quiquiaa. ²² Nojori jyanishacari nojori cutaraari seetanujuanaa niishijiaca, naacujatij nojoriiri socua niishiyashijiacara quiquiaa. ²³ Nojoriiri Pueyaso shuquiritiaaquiquiaa tama nojori shipinishano casaajaaja nojori shuqiritianura. Pa shipinia Pueyaso cutaraari jyanohua cumaacaraca, pueyaracaanu quijiajuhuanajaj. Nojoriiri Pueyaso niti shuquiritiaquiaa tama nojori shipinijosanojuajaaja. Cuno, nojori shipinijosano Pueyaso niti na shuqiritiasocoriquianoni, cunoori quiquiaa juhua shaajeja pueya niquishano, juhua jacuatujuaca niquishanojuhuaj, juhua nacujiniaaco canujuucatujuaca niquishanojuhuaj, juhua roshiyocatujuaca niqishanonio.

²⁴ Naaratej, Pueyasoori nojori tarinitiaquiaa sacuaraatia casaa nojori miiniuria tama na cuaqueyatajaaja, taa nojori miiniu paniquiaacuajani. Nojoriiri socua jiyacatequiaa sesa miiniuria. Naacuajitij, pueyari tama na cuaqueyajaaja miiquiaa sesa, cararaatia nojori miitioosacari narta pueyanota. ²⁵ Naa sesa miijiaca nojori quishacaritij, pueyari seetanu casaajanaa Pueyasojiniji niishishano ruuretaquiaa, sapojonuunu nojori tojiniuria saniniuuja. Naaratej, pueyari Pueyaso shipinijosano casami shuquiritiaquiaa, saniya na Shipinia niti. Nojuajaari pa Pueyasोजना cutara. Nojuaja cuara shuquiritiasaaria pueyaracaanu cutara.

²⁶ Pueya jaara Pueyaso cartequiaa, Pueyasoori nojori tarinitiaquiaajuhuj, cararaatia casaa nojori miiniuria, taa nojori jiaatiaquiaa miiniuriacuajani. Naacuajitij, maajipohuari maja na caminiu paniniu quiquiaa. Saaja narta maajipohuata cararaatia casaa miiquiaari juhua canuu. ²⁷ Naajuhuj, canuuri maajitia quiniu paniyaquiquiaa, sacuaraatia na jiaatiasacari narta canuucua. Canuuri jiyanohua cararaatia miitiooquiaa. Naa nojori miiniuucuatej, nojoriiri tama na cuaqueyajaaja miitiaquiaa naquiya na miishaanura.

²⁸ Nojori niishiniu paniyaquiniuucua Pueyaso, Pueyasoori nojori tarinitiaquiaa nojori miiniuria tama nojori niishiriojosano sesajaaja. Nojoricuajaari niishiya, nojori miishanoori sesa. Naajaa, nojoriiri saaja na miijiaca quiquiaa, cararaatia miiniu niishiriojonuujuaca nojori quiniuucua. ²⁹ Naacuajitij, nojoriiri puetunu tamaatia sesa miishanojuanaa miiniu niishijiaca. Jaara sesa miiri, timiquioyari. Nojoriiri nio miijiaca: puera casamiriaca quiniuucua jiaatijaca. Sesa miiquiaari na panishano nojori jitianura. Nojoriiri tamasaca pueya jitianasano casamiicua jiaatijaca. Nojoriiri pueya puecojuaca. Nojoriiri pueya ruutaqueja. Nojoriiri na panishano casami nohuasenuujuaca jiyasohua. Nojoriiri narta pueya miitianu panijaca. Rimiaacaturijiaariuhuj. ³⁰ Nojoriiri sacuaraatia sequejojua narta pueya. Nojoriiri Pueyaso niquiniu paniyashijiaca. Nojoriiri tamasaca soojeaca. Nojoriiri tama na cuaqueyajaaja jiyatequiaa juhua socua maninia pueyara tamasacajiniji. Nojoriiri najuhuana sequeja: “Janiya maninia miijiani”. Nojoriiri jiyanohua niishijiaca, niishishoo sesa casaa na miiniuria. Nojoriiri na queya tojiyashijiaca. ³¹ Nojoriiri seetanujanaa mosanucua Pueyaso na tojitiaaquiniuucua. Nojoriiri saaja tama na rupajaaja jataja. Majaari na sequesano na miiniu. Nojoriiri narta pueya paniyashijiaca. Majaari nojori niishiniu jiyanooni. Majaari nojori niishiniu taraajenu narta pueyacua.

³² Nojoricuajaari tariucuacaanu naa Pueyaso sequesano niishiya: “Cante naa sesa miijiacani, cuara puecoosaaria”. Naajaa, nojoriiri saaja sesa miiquiaa juhuajaniya. Majaari nojori quiniu shuquiriaatia saaja tama nojori miishacariijaaja sesa, nojoriiri shuquiriquiaajuhuj tamasa jaara sesa miiri juhua nojori.

2

Pueyasoori sesa miijiacani saniitionutaniya sesa nojori miini-uucua

¹ Naacuajitij pueyanaa, niaa jaara tamonuucua tonujujua quiriquia, majaari nia jiyaniiniu niaari sesa miyashijiaca cutara. Niaa jaara tamonuucua tonujure sesa na miishano, niaari tama niaacuarajaaja tonujiya naa sesa miiniu niishijiaca nia quishacarijuhuaj.

² Paacuajaari niishiyani, Pueyasoori puetunu sesa miijiacajanaa saniitionutaniya, maninia na niishishacari nojori miijosano.

³ Quiajaniya saniniuujia, quiarta pueyacuara tonujujanaa, majaari quenaaja quia jiyaniiniu quiaa saniitioyaquishaanutaniya.

Quiaari saniitiosaanutaniyajuhuj. Quiaacuajaari juhua nojori, sesa miijiajuhuaj. ⁴ ¿Majateeri quia niishiniu, Pueyasocuajaari pueyaracaanu quia sashiquiaa juucua, quioojia quia tacatonuhua nocua? Naaratej, nojuajaari pueyaracaanu maninia quia miiquiaa. Quia rejeretaquiaajaariuhuj.

¿Quiaateeri jiyaniquiaa Pueyasoori naa maninia quia miiquiaa, maninia quia quiniuucua na niquiara? ¡Maja!

⁵ Quiaari quioojia tacatonu paniyaquiquiaa, sesa quia miishanojiniji quia taraajeyaquishacari. Cunora, quiaari puetunu sesa quia miishanojinijijianaa saniitiosaanutaniya jiya puequesacari. Jiyacaritij niishishaanutaniyari, Pueyasoori seetanujanaa maninia saniitiojua.

⁶ Pueyasoori puetunu pueyajanaa miiniutianiya taa nojori miishano quiquiaari mijiriacuajani.

⁷ Naacuajitij, Pueyasoori maninia miijiacani jiyatenutaniya pueyaracaanu rishijiacara. Nojoriiri pueyaracaanu maninia miijiacani quiquiaari mijiria, Pueyaso timitiasano nojori quiniuria, shaajeyashijiaca nojori quiniuriajuhuaj.

⁸ Saniniuujia, Pueyasoori na tojiyashijiaca saniitionutaniya jiyanojua na juaaniutia. Naa saniitiosaanutaniyajaariuhua noo pojori, canapuate saaja sesa miiniu panijiaca quiquiaarini.

⁹ Puetunu sesa miijiacani pueyapuejanaari naquiya miishaanutaniya, taa Pueyaso tojiyashijiaca cuarta Judiocuaca miishaanutaniyacuaani.

¹⁰ Saniniuujia, Pueyasoori puetunu maninia miijiacani pueyapuejanaa miiniutianiya maninia, taa maninia miijiacani Judiocuaca miishaanutaniyacuaani. Pueyaso timitiasano

pueya nojori quiniuucua, nojoriiri jiyanohua shuquiriaatia quijiaca quiniutianiya pueyaracaanu. Naacujitij, nojoriiri juhuajaniya quiniutianiya Pueyasota pueyaracaanu.

¹¹ Pueyasoori maja rimiajata na miiniu quiniutianiya taucuaca, Judiocuacanio. Puetunu maninia pueyajanaari maninia miishaanutaniya. Sesa pueyari saniitiosaanutaniyacujua. ¹² Naacujitij, pueya jaara Pueyaso rootasano Moisés niishiyashijiaca quiriquia, naajaa, nojori jaara sesa miijiaca quiri, nojoriiri saniitiosocoriquiano. Naajuhuj, pueya jaara Pueyaso rootasano Moisés niishijiaca quiriquia, nojori jaara na tojiyashijiaca quiquiaarijuhuaj, nojoriiri cuno Moisés Naajioneejiniji nequesoreesaanutaniya na tojitiaaquiniuucua. ¹³ Majaari nia jiyaniniu niaari jiyanooshaanutaniya sesa nia miishanojiniji nareja najuhuaana nia tojishacari Moisés Rootasano. Niaari jiyanoyaquishaanutaniya maja seetanujanaa na tojiijaca nia quiniuucua. Noo pojori cutaraari jiyanooshaanutaniya, canapute seetanujanaa na tojiijacacujani. ¹⁴ Moisés Rootasano jiitiaashijiaca pueya jaara tamajaaja maninia miiniu niishijiaca quiriquia, naacujitij, niishishiyari, nojoriiri tamajaaja maninia miiniu niishijiaca cutara. ¹⁵ Naa maninia miiniu niishijiaca nojori quiniuucuatej, niishishiyari, Pueyaso rootasano Moisésri juhua nojori jiuujiajinia naajiotasano quiya. Naaratej, nojori jaara sesa miiri, tama nojori jiuujiajaarijia nojori niishitiya: “Sesa miiriinjia”. Naajuhuj, nojori jaara maninia miiri, tama nojori jiuujiajaarijia nojori niishitiya: “Maninia miiriinjia”. ¹⁶ Naacujitij, cuno juuca, Pueyaso nequesoreetesacari Neyanu Jesucristo puetunu mijiria quiniaa pueyajanaani, jiyacaritij, tama pueya jiuujiaari nojoriicuaa tonujunutaniya sesa nojori miishanojiniji jiyasohua. Naaratej, janiyari pueyaracaanu pueya numootequiaacujani cua pohuatasacari Pueyaso rupaa Jesucristojiniji.

Pablo nacasusacari Judiocuaca nojori tojitiaaquiniuucua Moisés Rootasano

¹⁷ Cuarta Judio pueyanonaa, quiaari jiyaniya quiaa Pueyaso pueyano cutara, na saquiriojosano Israel pueyajinijinio quia quishacari, Moisés Rootasano niishijia quia quishacarijuhuaj. Cunora, quiaari sequequiaa: “Janiya cutaraari Pueyaso pueyanoni. ¹⁸ Janiyari niishiyani casaa Pueyaso paniya cua miiniuriani. Moisés Rootasano niishijia cua quishacari, janiyari niishiyani teyano casaate socua tojishocoriquiano rootasanoni Pueyaso cua shuqiritiniuria”. ¹⁹ Quiaari sequequiaajuhuj: “Janiyacujaari seetanu rupaajanaa niishiyashijiaca pueya niishitiojonani. Janiyari juhua ninishiqui

quijiaca pueya cuhuatanani. ²⁰ Janiyari niishiyashijiaca niishitiojojuani, naatujoorinio, maninia cua niishishacari seetanu rupaajanaa Moisés Naajioneejiniji”. ²¹ Naa tamasaca niishitiojona quia quishacaritij, tama quia cuaqueyajaaja quia niishitiojore coteenu, maninia miiija quia quiniuria. Quiaa jaara tamasaca niishitiojoquiaa maja na nohuasenuunura, ¿casaara nohuasejojua quia quiyacuaraarini? ²² Quia rootasacari tamasaca, maja nojori numuetucunura niyacaraca maaji, ¿casaara saniniuujia naa quia miiquiaacuaraarini? Quiaacuajaari sequeja: “Janiyari pueya shipinijosano casaa soojeani, nojori shipinijosano na secojonuusocoriguiano juhua Pueyasoni”. Naa quia soosacari nojori shipinijosano casaatej, ¿casaara quia nohuasejoquiaa cuno casaa nojori secojonuujua tiacajinijicuaraarini? ²³ Quiaari sequequiaajuhuj: “Moisés Rootasanoori jiyanohua maninia. Na timitiaanijia”. Naajaa, quiaari Pueyaso rerequetequiaa quia tojiyaquishacari Moisés Rootasano. ²⁴ Cunora, tariucuacaanu Pueyaso Rupaajinia naajiotasanoori seetanujuanaa naa sequeya:

“Pueyaso niishiyashijiaca taucuacaari Pueyasooacara rim-
iaaquequiaa sacuaraatia, Pueyaso tojiyashijiaca nia
quiniucua nojori niquiara”.

²⁵ Cuarta Judiocuacanaa, Pueyasocujaari pa supuetanaa rootaquiaari pa cararaatiuuquia co cuaara miatesano quiri, na saquiriojosano pueya pa quiniucua. Naacuajitij, nia cararaatiuuquia co jaara miatesano quiri, cunoori maniniacuaja, niaa jaara seetanujuanaa Moisés Rootasano tojiijica quiri. Saniniuujia, niaa jaara Moisés Rootasano tojiyashijiaca quiriquia, niaari juhua miatesoo quiyajaa Pueyaso niquiara. Nia cararaatiuuquia coori najuhuana miatesano quiya. ²⁶ Saniniuujia, taucuaca jaara maninia miiijica quiri taa Moisés rootasano sequeyacuajani, miatesoo nojori cararaatiuuquia co quishacari, naajaa. Pueyasora, nojoriiri juhua miatesano quiya, na muerasu nojori quiniuria. ²⁷ Naacuajitij, na cararaatiuuquia co miatesoo tahue jaara maninia miiija quiri, taa Moisés Rootasano sequeyacuajani, nojuajaari jiyanooshaanutaniya, Pueyaso muerasu na quiniuria. Quiajaniya saniniuujia Judio pueyanonaa, quiaari Moisés Rootasano niishijiacuaja. Quiaacuajaari quia cararaatiuuquia co miatesanoraca. Naajaa, quiaa cutaraari saniitiosaanutaniya quia tojiyaquiniucua Moisés Rootasano. Naacuajitij, cuno tahueri quiocuara tonujuriquiano saniya, Judio pueyanonaa. ²⁸ Pueyasocujaari Judiocuaca saquiriojoquiaari na muerasu nojori quiniuria juucua. ¿Cante seetanujuanaa Judio pueyano Pueyasorani?

¿Na cararaatiuuquia co miatesano pueyanotee, Judio pueyacuajinio supueno pueyanotejuhuaj? Maja. ²⁹ Noo pojori cutaraari seetanujuanaa Judio pueyano Pueyasora, noojia jatanishano pueyanotej. Pueyaso Sohuanu jaara pueyano jiuujia jataniri Pueyaso tojjia na quiniuria, cunoori juhua na cararaatiuuquia co miatesano cutara, seetanujuanaa Pueyaso muerasu na quiniuria. Jiyano pueyatej, nojori cutaraari Pueyaso timitiasano, maja narta pueya timitiasano. Pueyanoori maja na naata pueyano jiyatenu Pueyaso pueyano na quiniuria. Saaja Pueyaso Sohuanu cutaraari na naata.

3

¹ Naa cua sequesacari niajaniyatej, niaa naasucuaari sequeya: “Taucuaca jaara naa maninia miishaanutaniya nojori quiyaquishacari Pueyaso saquiriojosano Judiocuaca, naatej, taa pajaniyacuaani, ¿casaara pa cararaatiuuquia co miatejosaaquiaaricuaaraarini? ¿Paateeri najuhuana Pueyaso saquiriojosano Judiocuacani?” ² Maja, Judiocuacanaa. Maniniacuajaari pa quishacari Judiocuaca. Pueyasocuaajaari Judiocuacaacua tiuuquiaari nojori jiitianura na rupaa. ³ Noojiaqueya Judiocuacajinijinio jaara Pueyaso Rupaacua tiuyashijiaca quiya, ¿Pueyasoteeri cunora na rupaa jatanutaniyajuhuj? ¡Maja! ⁴ Puetunu pueyajanaa jaara saponuujuaca quiriquia, naajaa, Pueyaso cutaraari tojetaarucujajanaa sapojiyashijia. Naaratej, nojuajinijiiri naa naajio-tasano quiya tariucuacaanu na Rupaajinia:

“Puetunu pueyajanaari niishiniutianiya puetunu quia sequesanojuanaari seetanujuanaa cutara. Naajuhuj, pueya jaara quiocuara tonujure juucua, puetunu nojorijianaari sanaajasaanutaniya, saa maniniaja quia miiniucua pueyaracaanu”.

⁵ Pa supuetanaa tiuyaquiniucua seetanu Pueyaso ru-paacuajanaa, naacuajitij, mijiria quiniaa pueyari niishiya, Pueyasoori socua jiyano-hua maninia pueyajiniji. Sesa pa miiniujiniji, paari niishiyani Pueyaso cutaraari jiyano-hua maninia. Naacuajitij, nojuaja jaara pa saniitiore sesa pa miiniucua, ¿taa nia sequeyani? ¿Nojuajate sesa, jaara pa saniitiore sesa pa miiniucua? ¡Juaj! Juhua niishiyashijia pocuareenijia. ⁶ ¡Seetanujuanaa, Pueyasoori sesa miyashijia! Nojuaja jaara sesa miiijia quiriquiajuhuaj, ¿maatucua taa mijiria quiniaa nequesoreereni?

⁷ Tamasaca naasucuaari sequequiaa: “Sapojouja cua quishacari, pueyari Pueyaso timitiaquiaa socua, nojori niishishacari saaja nojuaja cutaraari seetanu rupaajanaa jiti-tiaja. Naaratej, ¿Pueyasotucua casaara cua saniitioreni?”

⁸ Teyano pueyanote naa sequejani, nojuaja naasucuaari naa sequejajuhuaaj: “Socua sesa pa miiri, Pueyaso jiyanooniuria pajaniya. Naacuajitij, pocua Pueyaso shuquiritiare socuani, nojuaja jaara pa jiyanoori”. Tamasacaari canaacuara tonujuquiaa najuhanaj, canaanaari naa niishitiojoquiaani. Canapuete naa sapojonuuquiaa canaacuarani, nojoriiri saniitiosaanutaniya, nojori sesacanuucua canaa.

Pueyasora, puetunu pajaniyajanaari sesa miijiacani

⁹ Quiarijia, jaara naa quiriritij cuarta Judiocuacanaa, ¿paateeri socua maninia miijia taucuacajiniji Pueyasorani? Maja. Janiyacuajaari shusha nia pohuatariquiaani, puetunu mijiria quiniaa pueyajanaari sesa miijia; Judiocuaca, taucuacanio. ¹⁰ Tariucuacaanu Pueyaso Rupaajiniacuajaari naa naajiotasano quiya:

“Majaari quenaaja niquiriyatu maninia miijia quiniu. Shaaqui tojetaarucujanaa. ¹¹ Majaari quenaaja maninia niishiriojojua pueyano quiniu. Majaari quenaaja Pueyasocua jiaatiaja pueyano quiniu-jiuhuaaj. ¹² Puetunu pueyajanaari Pueyasocuaaji tashuquioorucuaa. Puetunu nojorijianaari seserucuaa. ¿Cante maninia miijiani? Shaaqui. Shaaqui tojetaarucujanaa. ¹³ Nojoriiri miananajonu maniniu. Nojori rupaari saa monujua. Nojoriiri na niti taquiriocateja saa sapojonuraja. Cuno pojoriiri juhua soconu noonacu jiitiaa na rupaama, rimiaacatujuri nojori quiniuucua. ¹⁴ Nojori jaara pocuare, saaja tamasa sesacaquiaari, puera juaajia nojori quishacari. ¹⁵ Nojoriiri puecojuaca. Puereeta nanaca shootejaca. ¹⁶ Puetunu mijiria nojori miishanojuanaari casaa sesojua, narta pueya taraajetajuhuaaj. ¹⁷ Majaari nojori niishiniu jiyanooni. ¹⁸ Nojoriiri juhuaajaniya miiquiaa sesa saaja. Majaari na pueretunu Pueyaso”.

¹⁹ Paacuajaari niishiyani, puetunu Pueyaso Rupaajinia naajiotasanojuanaari Pueyaso saquiriojosano Judiocuacara quiquiaari, nojori niishiniuria, puetunu pueyajanaari sesa miijia. Naacuajitij, puetunu mijiria quiniaajanaari sanaajetanutaniya, nojori niishishacari puetunu nojorijianaari sesa miijia; Judiocuaca, taucuacanio. ²⁰ Naacuajitij, pueya tojishacari Moisés Rootasano juucua, cuno rootasanoori maja na naata nojori na jiyatenu sesa miyashijara. Moisés Rootasanojiniji, paari saaja cunojiniji niishiyani, puetunu pajaniyajanaari sesa miijiacani.

Paari Pueyaso jiyanooshano cutarani, Jesuucua pa tiuushacari

²¹ Pueyasoori quiari naataja pa niishitiquianu cutara, taate pa naata maninia miijiara pa jatanishaanuni. Moisés Rootasanojinia, tariucuacaanu Pueyaso sequenu panishano caminiujiuniaa naajionuutasanojiniaari naa sequeyajuhua. Tiiri maatia sequeya taa Pueyaso jiyanooniutianiya pueyani, naajaa, pueya jaara Moisés Rootasano tojiyashijiaca quiri. ²² Quiarijiani, Pueyasoori pa jiyanooquiaa cutara, saaja Neyanu Jesucristoocua pa tiuushacari. Judiocuaca, taucacajuhua, Pueyasoori puetunujuanaa jiyanooquiaa Neyanucua nojori tiuushacari. Majaari rimiajata na jiyanooni. ²³ Puetunu pueyajanaari sesa miijiaca; Judiocuaca, taucacanio. Naacuajitij, nojoriiri juhua tucucacaanu quiya Pueyasojiniji. Sesa miijiaca pueya quiniuucua, nojoriiri soosano pueyara jataquiaari. Naacuajitij, pueyari Pueyaso timitiasoo quiquiaari. ²⁴ Naajaa, jiyanoohua panijia Pueyaso quiniuucua, nojuajaari pa jiyanooquiaari Jesucristo cusuucua pocuara. Naacuajitij, Pueyasoori pa jiyatequiaari juhua sesa miyashijiara. ²⁵ Pueyasoori Neyanu Jesucristo jiyatequiaari pueyacuaji Tacuna na quiniuria, Neyanu nanaca shoonuucua niyacutesanojinia. Naacuajitij, pueya jaara niishiriquia Jesucristo nojori niti cusoquiaari, saaja naa nojori tiuushacari nocuatej, nojuajaari na Que Pueyaso jiyanootiquiaa pueya. Naajuhua, Pueyaso saniitioyaquishacari tariucuacaanu nocua tiuujia pueya Jesu cusoyaquishacarijia, majaari najuhua puera jiuujiaajia na quiniu quiquiaari. ²⁶ Pueyasoori niishiquiaari Neyanu Jesucristoori nojoricuara mosocoriquiano, sesa nojori miijiosano tuujasaanura seetanujuanaa. Naaratej, nojuajaari pueyaracaanu sesa nojori miijiosano rejeretaquiaari saaja. Jesucristo cusuucua quiari naataja pocuara, paari niishiyani, Pueyasoori seetanujuanaa maninia miijia. Nojuajaari maja najuhua na jiyanooni pajaniya. ¡Neyanu motequiaari pocuaraari!

²⁷ ¿Teyano niajanijiniote tojetaarucujanaa saaja maninia miijiani? Shaaqui. Naacuajitij, maninia miyashijiaca pa quishacari, puetunu pueyajanaari sanaajasaanutaniya Pueyaso nequesoreesacari pueya. Saniniuujia, paa jaara puetunu Moisés Rootasanojuanaa tojtiajaca quiriquia maniniani, paa maara tama pa cuaqueyajaaja shuquiritiajaca quiriquia cutarani. Saniniuujia, Pueyasoori pa jiyanooquiaa saaja pa tiuushacari Jesucristoocua. Naacuajitij, majaari pa jitianu tama pa miishanojuaja pa shuquiritasocoriquiano. ²⁸ Naacuajiti paari niishiyani, Pueyasoori pa jiyanoojia puetunu sesa pa

miishanojinijianaa saaja Jesucristoocua pa tiuushacari. Majaari na jiyanoonu pajaniya, Moisés Rootasano pa tojishacari.

²⁹ ¿Niaateeri jiyaniya, Pueyasoori saaja Judiocuaca Jiyano? ¡Maja! Pueyasocuaajaari puetunu mijiria quiniaa pueyapuejanaa Jiyano. ³⁰ Pueyasoori maja caapiqui. Nojuajaari saaja niquiriyatu. Naacuajitij, majaari niquiriyatu Pueyaso quiniu Judiocuacara, socua tamonu Pueyaso taucuacara. Naaratej, puetunu pueyapuejanaari jiyanooshaaquiaa saaja Jesucristoocua nojori tiuushacari; tariucuacaanu na saquiriojosano Judiocuaca, taucuacanio. ³¹ Pueyaso muerasu pa quishacari saaja Jesuucua pa tiuushacari, ¿paateeri Moisés Rootasano shocoteyani? Maja. Paacuajaari Moisés Rootasanojiniji niishiyani, paari sesa miijiacani. Naacuajitij, Moisés Rootasanoori panishiya, pa niishiniuria paa cuaara Jesucristoocua tiuuria, jiyanooshano pa quiniuria.

4

Pueyaso jiyatesacari Abraham juhua sesa miyashijiara

¹ Naaratej cuarta Judiocuacanaa, ¿taa nia sequeya pa supuetana Abrahamjinijini? ² ¿Casaara Pueyaso jiyatequiaari nojuaja juhua sesa miyashijiarani? Abrahamri maja na jiyanooshaanu quiquiaari maninia na miiniuucua. Pueyaso jaara nojuaja jiyanoquiaari maninia na miiniuucua, nojuaja maara tama na cuaqueyajaaja timitiaja quiquiaari. ³ Saniniuujia, tariucuacaanu Pueyaso Rupaajinia naa naajiotasano quiyari Abrahamjiniji:

“Abrahamri Pueyasooocua tiuquiaari. Naaratej, Pueyasoori na jiyatequiaari juhua sesa miyashijiara”.

⁴ Cua tojiri pueyanaa. Pueyano jaara poonijiore tamonura, na poonijiotenaari na poonijionujiniji na cumaneeca niqitiojua. Jaara niqitiosaare, cuno cumaneecaari maja nareja niqitiosano. Cunoori setanujanaa na poonijosanojiniji.

⁵ Saniniuujia, maninia miyashijia jaara Pueyasooocua tiuuri, Pueyasoori na jiyatenutaniya juhua sesa miyashijiara saaja nocua na tiuuniuucua. ⁶ Pa supuetanaa jiyaniijia Davidcuajaari naa pohuataquiaari taa shuquiriaatia pa quiyani, Pueyaso jaara pa jiyatere juhua sesa miyashijia pa quiniuria na niquiara, maninia miyashijia pa quishacarijia. Naa naajiotasaaquiaariiri David sequesano:

⁷ “Shuquiriaatia quijiaca cutaraari noo pueya, canapue Pueyaso jiyanoa sesa na miijosanojinijicuaajani, Pueyaso jaara tuujure sesa nojori miijosanojuhuaj.

⁸ Shuquiriaatia quijiacaari noo pueyajuhuj,

puetunu sesa nojori miishanojuanaa Pueyaso saneyaquishootej”.

⁹ Janiyacuajaari tari sequereeni, Pueyasoori Abraham jiyatequiaari juhua sesa miyashijia na quiniuria, saaja nocua na tiuushacari. Pueyaso jaara naa jiyanooquiaaricuaa Abrahamtej, ¿Pueyasote saaja Judiocuaca jiyanooni panijia, noo pojori canapuate na cararaatiuuquia co miatesano jitiaani, taa nojori supuetana Abrahamcuaani? ¿Taa nia sequeyani? ¿Taucuacaarijiataj? ¿Nojoriti jiyanooshiyajuhuj? ¡Taaquiririnij! ¹⁰ ¿Taa nia sequeyanijia? ¿Abrahamte tari na cararaatiuuquia co miatesano quiquiaari Pueyaso jiyanooshacari nojuaja? Maja. Pueyasocuajaari na jiyanooquiaari miatesoojua na quishacari. ¹¹ Na tiuuniu nuhuaji Pueyasoocua, Pueyasoori shusha jiyacari na niishitiquiaari na cararaatiuuquia co na miatenura. Cunoori quiquiaari na niyajetaaquishaanura, saaja Pueyasoocua na tiuushacari, Pueyasoori na jiyatequiaari juhua sesa miyashijiara, miatesoojua na quishacari. Naacuajitij, miatesoo taucuaca tiuushacari Jesucristoocua, taa Abraham tiuquiaaricuaani, Pueyasoori nojori jiyateya juhua sesa miyashijiaca nojori quiniurijuhuj, mariyata juhua Abraham niquiohua nojori quiniuria. Naacuajitij, puetunu Pueyaso sequesano Abrahamjanaani, cunoori nojoririjuhuj. ¹² Naajuhuj, pueya jaara na cararaatiuuquia co miatesano quiri Judiocuaca nojori quiniuria, naajaa. Nojori jaara Jesucristoocua tiuuri taa Abraham tiuquiaaricuaani miatesoo na quishacarijia, Pueyasoori nojori jiyateya juhua Abraham niquiohua nojori quiniurijuhuj.

Pueyaso sequesano Abrahamni, cunoori Jesucristoocua tiuujiacarajuhuj

¹³ Pueyasocuajaari Abraham sequequiaari, nojuajaari nio jiya camaru quiniutianiya, puetunu necohuatajanaa. Pueyasoori naa sequequiaari Abrahamtej, saaja nocua na tiuushacari. Majaari naa Abraham sequesaanu quiquiaari Moisés Rootasano tojjijia na quiniucua. Jiyacaritij, Moisés Rootasanoori maja na quiniu quiquiaari juhuanajuaja. ¹⁴ Pueyaso sequesano Abraham jaara saaja Moisés Rootasano tojjijiacara quiriquia, na sequesano maara najuhua quiri Pueyasoocua tiuujia pueyara. Naajuhuj, pueya maara najuhua Pueyasoocua tiuujia quiriquijuhuj. Seetanujuanaa Pueyaso sequesano Abrahamni, cunoori puetunu Pueyasoocua tiuujiacarajanaa. ¹⁵ Cunoori maja saaja Moisés Rootasano tojjijiacara. Pueyasocuajaari niishiquiaari, pueyari maja na naata Moisés Rootasano tojinu quiniutianiya puetunujuanaa. Moisés Rootasanojinij, paari niishiyanij,

paari saniitiosaanutaniyani pa tojtiaaquiniucua cuno rootasano. Saniniuujia, Moisés Rootasano jaara quiyaquiriquia, pueya maara sequeyaquishaare: “Niaari sesa miijiaca”.

¹⁶ Pueyasoori tariucuacaanu na sequesano Abraham nareja niqutionu paniquiaari, puetunu necohuarajanaano. Naaratej, seetanujuanaa pa masenura na sequesano Abraham, Pueyasoori sequequiaari, nojuajaari nareja na niqutionutaniya nocua tiuujia. Naacuajitij, Pueyaso sequesanoori maja saaja Moisés Rootasano tojjiacara. Cuno sequesanoori puetunu pueyapuerajanaa, canapute Pueyasocua tiuujia quiyani, taa Abraham quiquiaari Pueyasocua tiuujiacuaani. Naa Pueyasocua tiuujia pa quishacari taa Abraham tiuquiaari Pueyasocuaacuaani, paari Abraham niquiohuani. Naaratej, Pueyasora, Abrahamri pa que. ¹⁷ Pueyasocuaajaari naa sequequiaari Abrahamtej nojuajaari queraatia niquiohuaraca quiriquiano. Naacuajitij, Pueyaso sequesanoori naa naajiotasano quiya:

“Abrahamnaa, janiyari quiarjia quia jiyateree queraatia tamaatia rupaaca pocujaca que quia quiniuriani”.

Abrahamri Pueyaso sequesanoocua tiuquiaari. Nojuajaari niishiquiaari Pueyasoori macunucua samiitianijia. Niishiquiaarijiaariuhuj, Pueyasoori cumaacaraca na panishano na shipininiuria shaaquijiniji.

¹⁸ Abrahamri niishiquiaari, nojuajaari maja na naata necocua na muetutenu, puera saaquiano na quishacari tari. Naajaa, Abrahamri saaja Pueyaso sequesanoocua tiuquiaari. Naacuajitij, nojuajaari seetanujuanaa queraatia tamaatia rupaaca pocujaca pueyapue que, taa Pueyaso sequequiaari nojuacuajani. Pueyasoori naa na sequequiaari:

“Quia niquiohuari tojetaarucujanaa queraatia quiriquiano”.

¹⁹ Naa Pueyaso sequesacari nojuajatej, nojuajaari tari cien marijia shocotejoquiaari. Naa saaquiano na quishacaritij, necocua Saarajuhuj, naajaa, majaari na tarinitianu quiquiaari Pueyaso sequesanoocua tiuuniu. ²⁰ Saaja Pueyaso sequesanoocua na tiushacari, nojuajaari maja noojia na niqijiotenu quiquiaari. Majaari Pueyaso sequesanojiniji na taacanuunu quiquiaarijihuaj. Saaja Pueyasocua na tiushacari, nojuajaari noojia cumaquiquiaari socua. Naacuajitij, nojuajaari naa maniniuhuaqueetaquiaari Pueyaso: “Paacarasho cua Pueyasonaa. Niishianijia quiaari canaa muetutenutaniya taa quia sequecanu janiyacujani.

²¹ Quiaacuajaari cumaacaraca quia miiniuria puetunu

quia sequesanojuanaa”. ²² Naa Abraham tiuuniuucua Pueyasooatej, Pueyasoori na jiyatequiaari juhua sesa miyashijia pueyanora.

²³ Jaara naa naajiotasaaquiaari Abrahamjiniji: “Pueyasoori na jiyatequiaari juhua sesa miyashijiaara”, cunoori maja saaja Abrahamra sequesano. ²⁴ Cunoori pajaniyara sequesanojuhuaj. Cunora, Pueyasoori pa jiyateya juhua sesa miyashijiarajuhuaaj, nocua pa tiuushacari, pa niishishacar-ijuhuaaj nojuacuajaari pa Jiyaniijia Jesucristo samiitianiquiaariuhua macujiniji. ²⁵ Pueyasocuajaari mijiria na jiyaroquiaari sesa pa miishanoocuara mosocoriquiano. Nojuajaari na samiitianiquiaariuhua, Jesu jaatianura nocua pajaniya, juhua tariucua sesa miyashijiaa.

5

Jesuucua tiuunias pueyari jiyanooshano

¹ Naacuajitij, paa jaara tari jiyanooshano quiyani Jesucristoocua pa tiuushacari, paari juhuajaniya quiya Pueyaso niquiarani. Jesucristoori na Que pa jiyanootiquiaari, pocuara na cusosacari. ² Jesucristoocua tiujujaca pa quishacari, Pueyasoori pa timitiaquiaa. Pa cumaquiquiaajaariuhuaaj maninia necohua pa quiniuria. Paari shuquiriyajaacuhuaaj, pa niishishacari paari jatanishaanutaniyani, shacantuuca quijiaca pa quiniuria juhua nojuajuhuaaj. ³ Majaari saa cunojua. Paari shuquiriquiaajuhuaaj, paa jaara taraatia miishaareni. Paacuajaari niishiyani, paa jaara naquiya miishaareni, paari socua juhuajaniya rejeretajaca quiniutianiyan. ⁴ Naa rejeretajaca pa quishacaritij, paari cumueeca Pueyaso muerasu quiniutianiyan. Naa cumueeca Pueyaso muerasu pa quishacaritij, paari juhuajaniya sashijiaa quiniutianiyan, pa niishishacari Pueyasoori seetanujuanaa maninia miiniutianiya pajaniya, taa na sequequiaaricujani. ⁵ Naa pa niishishacaritij, majaari sapojosano pa quiniutianiya. Pueyasocuajaari tari jiyaroquiaari na Sohuanu, poojiajinia quiriquiano, seetanujuanaa Pueyaso paniniu pa jitianura poojiajinia.

⁶ Pueyaso tojiyashijiaa pa quishacarijia, majaari pa naata quiquiaari Pueyaso jiyanootiniu tama pa cuaqueyajaaja. Jesucristoori jiyacari namitia pocuara cusoquiaari na Que na jiyanootiniuria pajaniya. ⁷ Sesa miyashijia pueyano jaara monu panishiya juucua, ^ztamonu maninia pueyanoteeri quiya na sequenura: “Janiya cuara mosaaria juhuari cuno pueyano niti”? Majaruhua. Monu panishano pueyano jaara seetanujuanaa maninia pueyano quiri, na rupuena pueyano

jaara jiyanoehua na panijia quiri, nojuaja maara sequere: “Janiya cuaara na niti mosaaria juhuari”.⁸ Saniniujia, sesa miijiaa pa quishacarijia, Jesucristoori pa niti cusoquiaari cutara. Naacuajitij, paari niishiyani, Pueyasoori jiyanoehua pa panijia.⁹ Quiarijia, paari sesa miyashijiaca quiya Pueyaso niquliarani, Jesucristo cusunuuca pocuara. Naacuajitij, paa cutaraari niishiyani, Pueyaso saniitiosacari na tojiyashijiaca pueya, Cristoori pocuaji tacunutaniya cutara, tariucua na jatanishano pueya pa quiniuucua.¹⁰ Na paraa pa quishacarijia, Pueyasocuaajaari pa jiyanooquiaari, Neyanu cusunuuca pocuara. Quiarijia, nata jeecatoono pa quishacari, Neyanuuri saminio quiya pueyaracaanu pocuaji na tacunura.¹¹ Majaari saaja cunora shuquiriaatia pa quiniu. Paari shuquiriyajuhuj, pa Jiyaniijia Jesucristo rupuetootenuucua pajaniya na Que Pueyasota.

Pa supuetana Adánri maja juhua pa Jiyano Cristo

¹² ¿Casaara pa cusunuuquiaani? Juhuacatecara pa supuetana Adán miiniuucua sesa, naaratej puetunu pueyajanaari sesa miijiacajuhuj. Pueyasocuaajaari tari sequequiaari: “Cante sesa miijiani, cuaara shaajeera”. Seetanujuanaa naari. Puetunu pajaniyajanaari shaajeriquianoni, sesa miijiaa pa quiniuucua.¹³ Moisés Rootasano quiyaquishacarijia, pueyari tari sesa miiniu niishijiaca quiquiaari. Jiyacaritij, pueya miishacari sesa, majaari nojoriicuaara saquiriojotasaanu quijia sesa nojori miishacari.¹⁴ Cuno pojori, Moisés niyacari quiquiaarini, nojoriiri maja na tojiyaquiniu quiquiaari Pueyaso sequesano taa Adán tojiyaquiquiaari Pueyaso sequesano cuuani. Naajaa, puetunu nojorijianaari cusunuuquiaarijuhuaj sesa miijiaa nojori quiniuucua, sesa miijia Adáncuajinio nojori supenuucua. Quiarijia saniniujia, nia pohuatareera Adán miishanojiniji, Jesucristo miishanojinijinio.

¹⁵ Adán miishanoori jiyanoehua tamaatia Jesu miishanojiniji. Coteenu shipinishano pueyano miiniuucua sesa, puetunu pueyajanaari shaajenu niishiya. Saniniujia, Jesucristo miiniuucua maninia, Pueyasoori queraatia pueya jiyatequiaa pueyaracaanu rishijiaca nojori quiniuria cutara.¹⁶ Pueyaso miishano maninia pajaniyarani, cunoori sesa Adán miishano shocotaa jiyanoehua cutara. Naa niquiriyatu sesa casaa Adán miiniuucuatej, puetunu pueyajanaari saniitiosocoriquiano. Saniniujia, maninia Jesucristo miiniuucua pajaniyarani, Pueyasoori pa jiyanooquiaa puetunu sesa pa miishanojinijijianaa.¹⁷ Niquiriyatu pueyano miiniuucua sesa, puetunu pueyajanaari cusunuujuacara quiquiaari. Saniniujia,

niquiriyatu pueyano miiniuucua maninia pajaniyara, cunora, Pueyasoori pa jiyateya juhua sesa miyashijiaca pa quiniuria. Cunoori, Jesucristoocua pa tiuushacari. Majaari saaja cuno, naajuhuj, paari shuquiriaatia quijia jiyaniijianucua quiniutianiya maniniushiquini, Jesucristo rupuesano pa quishacari.

¹⁸ Naa Adán miiniuucua sesatej, nojuajaari puetunu nocuajinio supueno pueyajanaa jiyatequiaari sesa miijiacara, saniitiosano nojori quiniuria. Naajuhuj, Jesucristo miiniuucua maninia, puetunu pueyajanaari na naata jiyanooshaanu, nojori saniitioyaquishaanuucuaaji, pueyaracaanu quijia nojori quiniuria. ¹⁹ Adán tojiyaquiniuucua Pueyaso sequesano, puetunu pueyajanaari sesa miijiacara jiyatesaaquiaarijuhuaj. Saniniuujia, Jesucristo tojiniuucua Pueyaso sequesano, puetunu nocua tiuujiacajanaari juhua sesa miyashijianucua jiyatesaaquihua.

²⁰ Moisés Rootasano jaara niishishaaquiaari, pueyari socua sesa miijiacara jiyacatequiaari. Naa socua sesa miijiacara pa quishacarij, naajuhuj, Pueyasoori socua jiyacatequiaari pocua taraajenujuhuaj. ²¹ Sesa miiniu tarinitianu niishiyashijia pa quiniuucua, puetunu pueyajanaari cusonuriquiano quiquiaari. Saniniuujia, Pueyaso taraajenuucua pocua, nojuajaari Neyanu Jesucristo motequiaari pa niti, pa jiyanooshaanura. Naacuajitij, nojuajaari juhua pa samitianiijioquiaariuhua, pueyaracaanu rishijiaca pa quiniuria pa Jiyaniijia Jesucristota.

6

Pablo niishitiojosano moojinia tiuquinijionujiniji

¹ Pueyaso jaara naa pa jiyanooquiaa pocua na taraajesacari, ¿taa nia sequeyani pueyanaa? ¿Paate socua pueyaracaanu sesa miijia quiniutianiya, pueyaracaanu Pueyaso jiyanooniuria pajaniya, pueya niishiniuria, Pueyasocuaajaqui jiyanoohua maninia na jiyanooniuria pajaniya? ² ¡Maja pueyanaa! ¡Maja naa nia niishiriojonu! Pueyaso jaara tari poojia sesoriquia seque jataniquiaari Neyanu Jesucristo na rupuetesacari pajaniya, ¿paatucua casaara socua sesa miijia quirini? Pueyasora, paacuajaari tari cusonuuquiaari Jesutani. ³ ¿Niaateeri cuno niishiyaquiyajaa? Naajuhuj, paa jaara moojinia tiuquinishaare Jesucristoocua pa tiuushacarini, Pueyaso niqiara, paari Jesu rupuequiaari niyacutesanojiniani. Nojuacuajaari pa niti saniitiosaaquiaari. ⁴ Naacuajitij, paa jaara moo cariquimia shishaareni, jiyacarij, paari juhua Jesuta jamoshiyajuhuj. Naa juhua macu

pa quishacaritij, paari samiitianijiosanohuani, taa Jesucristo samiitianishaaquiaariuhua macujiniji jyanohua Pueyaso cumaacatacuaani. Naa samiitianijiosanohua pa quishacaritij, maninia miijiaca pa quiri juhua quiarinio pueya.

⁵ Paa jaara Jesucristo rupuetesaaquiaari sesa pa miishanoocuara na cusosacarini, naajuhuaaj, paa cutaraari tari samiitianijiosanohua juhua nojuajani, maninia quijiaca pa quiniuria. ⁶ Tarijia, majaari pa naata tarinitianu quiija sesa pa miiniu, sesa jiuujiaraca pa quishacarijia. Sesoriquia poojia sequeeri Jesuta cojiritiasaaquiaari monu, nocua pa tiuushacari, maja socua cumaaca na jiitianura, sesa na mitiniuria pajaniya. ⁷ Naacujitij, sesoriquia poojia seque jaara tari jatanishano quiya, majaari tari sesa miijiaca pa quiniu. ⁸ Paa jaara tari naa cojiritiasaaquiaari monu Jesuta nocua pa tiuushacarini, paari quiarijia niishiya cutarani, paari pueyaracaanu nata quiriquiano saminioni. ⁹ Cristocujaaari samiitiaquiaariuhua. Paari niishiyajuhuaaj, majaari socua na pacutenu quiniutianiuhua cusonu. Nojuacuajaari tari cusoquiaari puetunu sesa pa miishanoocuarajanaa. Naaratej, nojuajaari maja na naata socua cusojuasaanuhua. ¹⁰ Majaari socua Jesucristo pacutenu quiniutianiuhua cusonu, sesa pa miishanoocuara. Nojuacuajaari tari cusoquiaari, Pueyaso jyanooniuria puetunu mijiria quiniaa sesa miishanojuanaa. Nojuaja jaara samiitiaquiaariuhua, nojuajaari seetanujuanaa pueyaracaanu rishiriquiano Pueyasora cutara. ¹¹ Naajuhuaaj pueyanaa, tama nia cuaqueyajaaja nia jiyatere juhua macura, maja socua nia miiniuria sesa. Nia niishirijuhuaaj, niaacuajaari Jesucristota samiitiaconohua, Pueyaso tojjiaca nia quiniuria.

¹² Naaratej pueyanaa, majaari nia shanacunu sacuaratia nioojia seque niishiriojosano nia miiniuria. Seetanujuanaa nia niyajetare tama nia cuaqueya panishanojuaja nia miyaquiniuria. ¹³ Majaari nia cuaqueya nia panitianu sesa nia miiniuria, taa na paniya nia miiniuria juucuacujani. Saniniuujia, nia cuaqueya nia jiyatere cutara saaja Pueyaso panishano miijia na quiniuria. Niaacuajaari tari samiiticoquiaariuhua juhua macunucua nia quiniujiniji. Naacujitij, nia cuaqueya nia jiyatere saa maninia miijia na quiniuriaja. ¹⁴ Niaa jaara nioojiajinia cuno sesa niishiriojosano ruuretajaca quiri, niaari na shocotanutaniya, Pueyaso cumaquishacari niajaniya. Nia niishiri, niaari quiarijia Pueyaso tojitiajaca cutara, maja tari Moisés Rootasano tojjiaca.

Pueyaso tojiyashijiaca pueyani, nojoriiri Sesaaca pueya

15 Cua sequesacari niajaniya, pajaniya maja tari Moisés Rootasano tojjiacani, ¿niaateeri cunora sesa miiniutianiya, Pueyaso quishacari pa jiyanoojia? ¡Maja naa nia miiniu pueyanaa! 16 Niaacuajaari niishiya, paa jaara tama pa cuaqueyajaaja jiyatere tamonu camarnu seru pa quiniuriani, naacuajitij, paari pueyaracaanu na tojijia quiniutianiya. Naajuhuj, niaa jaara sesa miijiaca quiriohua, niaari Sesaaca tojjiaca. Naa sesa miijiaca nia quishacaritij, niaari cusonutaniya. Saniniuujia, niaa jaara Pueyaso tojjiacara quiri, niaari sesa miyashijiaca quiniutianiya. 17 Tarijia, niaari Sesaaca tojjiaca quijia, juhua na seya, sesa miijiaca nia quishacari. Quiarjia, janiyari Pueyaso timitiaani nia tojiniucua Jesucristo rootasano puetunu nioojiatajanaa, taa nia niishitiojosaaquiaaricujani. 18 Jesucristo rupaa nia tojishacari, Pueyasoori nia jiyatequiaari na muerasu nia quiniuria, maja Sesaaca seya nia quiniuria socua. Naacuajitij, niaari Pueyaso tojjiacara jatanishano, saaja maninia miijiaca nia quiniuria. 19 Janiyari naa pohuataa serujiniji niajaniya, maatia nia tojiniuria cua niishitiojosano. Majaari juhuanojuaja nia naata puera jiyajeneta niishitiojosano niishiniu, cumueeca Pueyaso muerasu nia quiaquishacarijia. Tarijia, niaari tama nia cuaqueyajaaja jiyatequiaari Sesaaca panishano nia miiniuria. Naacuajitij, niaari jiyanohua sesa miijiacara jiyatequiaari. Naajuhuj, quiarjia saniniuujia, tama nia cuaqueyajaaja nia jiyatere Pueyaso panishano nia miiniuria. Niaa jaara naa miiri, niaari tojetaarucujanaa maninia miijiaca quiniutianiya Pueyasora.

20 Niaa jaara sesa miijiaca quiquiaarijia Sesaaca tojjiaca nia quishacarijia, niaari juhuajaniya Pueyaso tojiyashijiaca quiquiaari. 21 ¿Sesaacate maninia nia miiquiaari sesa nia miiniucua nera? ¡Maja! Niaa cutaraari saaja caririquiquiaa sacuaraatia casaa nia miiniucua tarijia. Niaari quiarjia niishiyajuhuj, cante sesa miijiaca quiquiaani, nojoriiri shaajasaariquiano. 22 Naa sesa miyashijiaca nia quishacari quiarjia saniniuujia, niaari Pueyaso tojjiacara jiyatesaaquiaari, saaja na panishano nia miiniuria cutara. Naa Pueyaso tojjiaca nia quishacaritij, nojuajaari nia jiyatenutaniya seetanujanaa maninia miijiaca nia quiniuria. Naacuajitij, niaari pueyaracaanu shuquiriaatia rishijiaca quiniutianiyajuhuj. 23 Saniniuujia, sesoriquia pueya miiniucua sesa saaja, nojoriiri naa na miiniucua shaajasaanutaniya. Saniniuujia, saaja Jesucristoocua tiuujia pa quishacari, Pueyasoori saa cunoraja pa jiyatequiaa pueyaracaanu rishijiaca pa quiniuria, pa Jiyaniijia Jesucristo rupuejaca pa quishacari.

7

Paari juhua camishanoni

¹ Pueyanaa, niaacuaajaari Moisés Rootasano niishijiaca. Niaari niishiyajuhua, paa jaara shaajequeeni, paari jiyacari Moisés Rootasano cartequée shushani. ² Naajuhua, paacuaajaari rootasaaquiaarini, maaji jaara camishano quiri, cuaara tamonu cayata quiyaquiiria, neyaca jaara saminio quiyajaa. Neyaca jaara cusoyare, caminio pueyara Moisés rootasanoori maja tari na quiniu cuno mashiquio tojishocoriquiano. ³ Saniniuujia, maaji jaara tamonu pueyanota quiriquia neyaca quishacarijia saminio, cuno maajiiri sequeshiya paanatuta, naa na quiniuucua tamonu pueyanota. Saniniuujia, neyaca jaara cusoyare, mashiquio camishacari tamonu pueyanota, naajaa, majaari Moisés Rootasano tojiyashijia na quiniu cunora. Nojuajaari maja paanatu, naa na miishacari.

⁴ Niaari naajuhua pueyanaa. Jesucristo cusuucua pa niti, niaari juhua cusuucuaarijiuhua, maja Moisés Rootasano tojijiaca nia quiniuria socua. Naacujitij, niaari tamonu tojijiaca quiya cutara. Nojuajaari pa Jiyaniijia Jesucristo, nooj, macujiniji samiitiaquiaariuhuatej. Naacujitij, quiarijia pa Jiyaniijia Jesucristo tojijiaca pa quishacari, paari maninia miijiaca Pueyasorani. ⁵ Tarijia, Pueyaso tojiyashijia pa quishacarijia, Moisés Rootasano pa niishishacari maja quenaaja pa miiniuria sesa casaa, cuno rootasanoori saaja juhua socua pa shiniujuiquiaari sesa pa miiniuria. Naacujitij, tama sesa pa miishacarijiaaja, paari tama pa cuaqueyajaaja jiyateriquiaa saniitiosano pa quiniuria maquesaashijia mani quiquiojiniani. ⁶ Tarijia, paari juhua quioosano pueya Moisés Rootasano tojitishaaquiaarini. Saniniuujia, Jesucristota pa cusuucua, nojuaja jaara pocuara cusuquiaari, paari tari Moisés Rootasano tojiniu cartequiaarini. Moisés Rootasano pa tojiyaquishacari quiarijia, naacujiti pa naata Pueyasojuanaa tojiniu shitimia cutara, na Sohuanu cumaquishacari pajaniya. Majaari juhua tarijia pueya miishano. Tarijia, paari Moisés Rootasano tojitiajaca quiquiaari maniniani, pa puerenuta paa mariqui saniitiosaareeri pa tojiyaquiniuucua niquiriyatu queraatia na rootasanojiniji.

Poojaari saa sesa miiniu niishijiaja

⁷ Tamasaca naasucuaari jiyaniya janiyari Moisés Rootasano soojeani. Maja. Quiria, jiyanojia maniniacuaajaari Moisés Rootasano. Moisés Rootasanojiniji, paacuaajaari niishiyani paari sesa miijiacani. Moisés Rootasano jaara quiyaquiriquia, janiya maara niishiyaquiquiaarini, cua jiaatiasacari tamasaca jiiitasano casamiicua, cunoori

sesa Pueyasora. ⁸ Saniniuujia, Moisés Rootasanojiniji cua niishishacari maja tamasaca casamiicua cua jiaatianura, janiyari saaja juhua shiniujiushaaquiaarini casamiicua jiaatiaja cua quiniuria socuani. Naacujitij, Moisés Rootasano cua niishiyaquishacarijia, coojiaari juhuajaniya quiquiaari juhua maqueja. Saniniuujia, janiya jaara Moisés Rootasano niishiquiaarini, coojia sequeeri juhua niucuaquiaari, puetunu sesa casaajanaa na miiniu paniniuria. ⁹ Moisés Rootasano cua niishiyaquishacarijia, janiyari juhuajaniya quijia quiquiaarini. Saniniuujia, Moisés Rootasano cua niishishacari, janiyari jiyanoehua taraajequiaarini, cua niishishacari janiyari jiyanoehua sesa miijia Pueyaso niquiarani. ¹⁰ Naa sesa miijia cua quishacaritij, janiyari niishiquiaarini, janiyari quera jatashiya saniitiosocoriquianoni. Janiya jaara Moisés Rootasano tojiquiaari shushajanaani, janiyari jiyaniquiaarini, janiya jaara cuno rootasano tojirini, janiya naasucuaari pueyaracaanu rishijia quiniutianiyani. Saniniuujia, Moisés Rootasanoori saaja cucuara tonujuquiaari puetunu sesa cua miishanojinijijianaa. ¹¹ Naacujitij, janiyari jiyanoehua jiyajenequiaarini, cua jyanishacari cua naatacuaja Moisés Rootasano tojiniu maninia, Pueyaso jyanooniuria janiya. Jaara maja cua naata quiquiaari Moisés Rootasano cua tojiniuria maninia, janiyari niishiquiaarini Pueyasoori cua jyanoyaquiniutianiya.

¹² Seetanujuanaa nia sequeyanijia pueyanaa, Moisés Rootasanoori jyanohua maninia. Tojetaarucuajanaa maninia rootasano. Cunoori seetanujuanaa rupaa maniniu Pueyasojiniji. ¹³ Moisés Rootasano jaara naa maninia quiri, ¿janiyateeri nia sequeyani cuno na rootasanoori pa cusojuaja? Maja. Janiyari nia sequeyani, Moisés Rootasanojiniji, paari niishiyani sesa pa miishano cutaraari jyanohua sesa Pueyasora. Naacujitij, paari Moisés Rootasanojiniji niishijiani, paari puetunujuanaa jatasocoriquiano quijia juucuani, seetanujuanaa sesa miijiaca pa quiniuucua.

¹⁴ Paacuajaari niishiyani, Moisés Rootasanoni, cunoori maja nareja pueyano niishitiojosano. Pueyaso niishitiojosanocuajaari pa tojishocoriquiano puetunu poojiatajanaa. Saniniuujia, coojiaari Pueyaso tojiyashijia. Janiyari tamaaja juhua coojia seruni, na panishano cua miiniuria. Naa sesa jiuujiaraca cua quishacaritij, majaari cua naata Moisés Rootasano tojiniu. ¹⁵ ¿Casaara naa sesa cua miiquiaani? Janiyari saaja cua niishishano sesa casaa miiquiaani. Majaari maninia cua miiniu quiquiaa, taa cua paniyacuajani. ¹⁶ Janiya jaara cua panishoo sesa casaa miirini, naacujitij,

janiyari sequequiaani, Moisés Rootasanoori seetanujuanaa maninia. ¹⁷ Naa cua panishoo sesa casaa cua miishacari-tij, cunoori maja tama cua miishanojuaja. Cuno sesa cua miishanoori coojiajiniji supueno tamajaaja. ¹⁸ Quiarijia ni-ishiya cutaranijia, coojiaari tojetaarucujanaa sesa miiniu niishijia. Naacuajitij, janiyari juucua maninia miiniuucua jiaatiaquiaani. Naajaa, majaari cua naata quiquiaa maninia cua miiniuria tamajaaja. ¹⁹ Naacuajitij, cua miishanoori maja maninia, taa cua miiniu paniquiaa juucuacuajani. Cua miishanoori saaja cua miiniu paniyaquishoo quiquiaa. ²⁰ Naacuajitij, janiya jaara cua panishoo sesa casaa miirini, janiyari niishiyani, cunoori tama coojiajiniji supuenojuaja, majaari tama cua miiniu panishanojuaja.

²¹ Quiarijia niishiya cutaranijia, janiyari naa sesa mijiani: janiya jaara maninia casaa miiniu paniyani, janiyari saaja sesa miiquiaani. ²² Janiya cutaraari niishiyani Pueyaso rootasano Moisésri seetanujuanaa maninia cua tojishocoriquiano. Na tojiniuucua jiaatiaquiaa juucuanijia. ²³ Janiyari niishiyajaanihuaj, coojiaari juhua cua ni-ishitiaja paraca quiya. Naacuajitij, cua niishiriojosacari, “Maninia miiniutianianijia”, coojiaari saaja sesa cua miitiquiaa. Naacuajitij, tama janiyajaarijia juhua coojia seruni, cua miishacari puetunu sesa na panishanojuanaa.

²⁴ ¿Taa cua miiniutianiya socuaarini? ¡Tojetaarucujanaa taraatia quijianijia! Pueyaracaanu sesa miijianijia. Majaari cua naata tamajaaja maninia miijia cua quiniu. Naa sesa miijia cua quishacari-tij, cua cuaqueyari macu quiriquiano. ¿Cante na naata cua jataniniuni, naa sesa miijia cua quishacari-tij? ²⁵ ¡Pueyaso shuquiritiaanijia cua niishishacari, nojuacuajaari cua Jiyaniijia Jesucristota cua jataniniutianiya tojetaarucujanaa maninia miijia cua quiniuria! Naacuajitij, mijiria cua quishacarijia, janiyari Pueyaso tojjia quiniu paniyani. Saniniuujia, naa coojia quiniuucua sesatej, saaja sesa cua miitiniu paniquiaari.

8

Pueyaso Sohuanu pa tojishacari, paari maninia miijia quiniutianiyani

¹ Pa rupuesacari Jesucristo, nocua pa tiuushacari, Pueyasoori pa jiyanooquiaa. Naacuajitij, paari tojetaarucujanaa jiyanooshano quiyani. ² Puetunu pueyajanaari cusonu-uriquiano quijia, sesa miijiaca nojori quishacari. Saniniuujia, Jesucristo pa rupuesacari, Pueyaso Sohuanuuri pa jiyatequiaa saaja maninia miijiaca pa quiniuria. Naacuajitij, majaari tari sesa miijiaca pa quiniu pa saniitiosaanura. ³ Moisés

Rootasano pa tojishacari juucua, majaari pa naata quiniu jiyanooshano. Cunoori saaja sesa miijiaca pa quiniuucua. Naaratej, Pueyasoori Neyanujanaa jiyaroquiaari mijiria, pueyano na quiniuria juhua pajaniya, pa niti na mosaanura. Naacuajitij, Jesucristo jiitiasacari juhua pa cuaqueyajuhaaj, Pueyasoori juhua sesa miijiara na jiyatequiaari, pa niti na saniitiosocoriquiano. ⁴ Naacuajitij, Pueyaso Sohuanu pa jiitiasacari quiarijia, pa naata maninia miijiaca quiniu, taa Moisés Rootasano sequeyacuajani. Pueyaso Sohuanu tojjiaaca pa quishacari, majaari tari pa quiniu sesa miijiaca, taa pa quiquiaari tarijiacuajani.

⁵ Canapuate tama na panishanojuaaja miiquiaani, nojoriiri tama na cuaqueyajaaja shuquiritiniuria jiaatiaquiaa. Saniniuujia, canapuate Pueyaso Sohuanu tojjiaaca cutarani, nojoriiri saaja Pueyaso shuquiritiniuria jiaatiaquiaa. ⁶ Tama na cuaqueyajaaja shuquiritiniuria jiaatijacaari saaja shaajecoriquiano cutara. Saniniuujia, Pueyaso shuquiritiniuria jiaatijacaari pueyaracaanu rishiriquiano cutara. Nojoriiri juhuajaniya shuquiriaatia quijiacajuhaaj. ⁷ Cante tama na cuaqueyajaaja shuquiritiniuria jiaatiaquiaani, nojuajaari Pueyaso paraca. Majaari Pueyaso tojjia na quiniu paniniu. Seetanujanaa majaari na naata Pueyaso tojjia na quiniujuhuaj. ⁸ Naacuajitij, canapuate saaja tama na cuaqueyajaaja shuquiritiniuria jiaatiaquiaani, cuno pojoriiri maja na naata Pueyaso shuquiritiniu.

⁹ Niajaniya cutaraari maja nia quiniu juhua cuno porijia, tama na cuaqueyajaaja shuquiritiniuria jiaatijacani. Niaa cutaraari Pueyaso shuquiritijia, Pueyaso Sohuanu cumaquishacari niajaniya, nojuaja jaara seetanujanaa nioojiajinia quiya. Cante Pueyaso Sohuanu jiitaaquiyani, nojuajaari maja Pueyaso pueyano. ¹⁰ Cristo quishacari poojiajinia, pa sohuanuuri tari jatanishano quiya maninia miijiaca pa quiniuria, pueyaracaanu rishijia pa quiniurijahuaj. Pa cuaqueya cutaraari shaajasocoriquiano, sesa miijiaca pa quiniuucua. ¹¹ Naajaa, Pueyaso Sohuanu jaara poojiajinia quiya, nojuajaari pa cuaqueya samiitiani-ionutaniuhua, taa na samiitiani quiaariuhua macujiniji Jesucuaani.

¹² Naa Pueyaso miishacari maninia pajaniyatej, maninia miijiaca pa quiri Pueyaso Sohuanu cumaquishacari pajaniya. Maja cumaati tama pa cuaqueyajaaja pa shuquiritiniuria pa jiaatianu tari, taa pa miiquiaari tarijiacuajani. ¹³ Cante naa miijiaca quiyajaani, nojoriiri shaajasaariquiano. Saniniuujia, niaa jaara Pueyaso Sohuanu cumaacata rejere-tariquia saaja tama sesa nia cuaqueya miiniu panishano-

juaaja, niaa cutaraari pueyaracaanu shuquiriaatia quijiaca quiniutianiya.

¹⁴ Canapueete Pueyaso Sohuanu tojitiajacani, nojoriiri Pueyaso niqiuohua cutara. ¹⁵ Pueyaso Sohuanucuaajaari pa jiyatequiaari Pueyaso muerasuniyojua pa quiniuria. Naacuajitij, cuno pa jiiitasano Sohuanuuri Pueyaso pa sequetequiaa, “cua Quenaa”. Naa Pueyaso muerasuniyojua pa quishacaritij, majaari tari pa puerenu paari saniitiosaanutaniyani, Moisés Rootasano pa tojijaquiniuucua. ¹⁶ Pueyaso Sohuanuuri pa sohuanu rupuequiaa, na niishitiniuria pajaniya, paari Pueyaso muerasuni. ¹⁷ Naa Pueyaso muerasu pa quishacaritij, puetunu Pueyaso jiiitasanojuanaari pa jiiitasano quiniutianiyajuhuj. Pueyasoori Neyanu Jesucristota pa cojiritianutaniya naa maninia na miiniuria pajaniya, paa jaara naquiya miiniu rejeretajaca quirini, Jesucristoocua tiuujiaa pa quiniuucua. Paa jaara naquiya miishaare nocuara mijiriani, paari jiyanohua maninia quijiacara jiyatesaanutaniyani juhua nojuajuhuj.

Pueyasoori maninia miiniutianiya na muerasu

¹⁸ Quiarijia mijiria naquiya pa miiniuni, cunoori saaja rupaquijia. Janiyara, naajaa, cua niishishacari naa naquiya pa miiniu nuhuajitij, paari jiyanohua maninia miishaanutaniyani, pueyaracaanu shuquiriaatia pa quiniuria. ¹⁹ Quiarijiani, puetunu Pueyaso shipinishano casaajanaari pa niqiniuucua jiaatiaa paa jaara quiariniora jatanishaareni. Na niishiniu paniyari taamueca quijiacara Pueyaso jataniniutianiya pajaniya na cumaacatani, tojetaarucujanaa maninia jeenucuasano na muerasu pa quiniuria. ²⁰ Coteenujuanaa pa supuetana pueyano jaara juhuacatecara sesequiaari, jiyacaritij, puetunu Pueyaso shipinijosano casaajanaari sesequiaarijuhuaj. Majaari na sesenu quiquiaari tama na panishacarijaaja. Pueyasocuaajaari naa paniquiaari sesa na quiniuria, na shipinishano pueya sesenucuajuhuj. Naajaa, majaari pueyaracaanu sesa na quiniu quiniutianiya. ²¹ Pueyaso muerasu jaara jatanishaare shacantuuca quijiaca pa quiniuria, jiyacaritij, puetunu Pueyaso shipinijosano casaajanaari pata cojiritiasaanutaniya jeecanujuhuj. Naacuajitij, puetunu Pueyaso shipinijosano casaajanaari maninara quiniutianihua, maja na sesenura socua. ²² Quiarijiani, puetunu Pueyaso shipinijosanojuanaari jiyanohua noojia niojiya taraatia na quishacari. Quiatojiyari juhua maaji noyano, cuara quiariniora jatanishaarejaatijia. ²³ Majaari saaja puetunu Pueyaso shipinishano casaajanaa quiatojonu, poojiaari juhua quiatojiyajuhuj, na panishacari

tojetaarucuajanaa jatanishano quijiaca pa quiniuria. Paacuajaari tari jitiia Pueyaso Sohuanu poojiainiani, pa niishiniuria, paari seetanujanaa Pueyaso muerasuni. Saaja pa cuaqueya cutaraari juhuanojua jatanishoojua. Paari cunora quiatojiyajaani. ²⁴ Paacuajaari tari Pueyaso muerasu quiyani. Jesucristo cutaraari pa saquiriojoquiaari shacantuuca quijiacara pa jatanishaanura. Paari naa na jataniniuria pajaniya sashiyajaani. Pa cuaqueya jaara tari jatanishano quiriquia, paa maara na jataniniuucua jiaatiaquirini. Paa jaara tari jitiariquia pa panishanoni, ¿paatucua casaara nocua jiaatiare socuani? Pa cuaqueya cutaraari juhuanojua jatanishoojua. ²⁵ Naajaa, paacuajaari niishiyani pa cuaqueyari jatanishaanutaniya, jiyocuacaanu pa rupenura pa Jiyaniijia. Cunora, paari mijiria taraatia pa quishacari juhujaniya rejeretaquiaani pueyaracaanu pa sashishacari.

²⁶ Naa rejeretajaca pa quishacari mijiria pa sashishacari pueyaracaanutej, Pueyaso Sohuanuuri pa cumaquiquiaa, cumueeca pa quiyaquishacari. Naacuajitij, Pueyaso pa secijosacari, pa niishiyaquishacari casaacuara pa secojonutaniyani, Pueyaso Sohuanucuaajaari poojiainiji Pueyaso secjoquiaa pocuara. Jiyanohua na secijosacari pocuara, jiya-sohua quiatojiya poojiainiaari. ²⁷ Poojia niishijia Pueyasoni, nojuajaari niishiyacuaja casaa na Sohuanu secojiya nojuaja pocuarani. Na Sohuanucuaajaari maninia secojojua cutara, taa Pueyaso miiniu paniya na muerasuracuajani.

Jesucristo pa shocotanjia cutara

²⁸ Paacuajaari niishiyani, paa jaara maninia miishaareni, paa jaara sesa miishaarejuhuj, Pueyasoori puetunu cuno miishanojuanaa jiyatequiaa saaja maninia na quiniuria na panijacara. Nojuacuajaari pa saquiriojoquiaari na muerasuniyojua pa quiniuria. ²⁹ Naajuhuj, jiya shipiniyaquishacarijia, Pueyasoori tari niishiquiaari na panishano pueyarano. Pueyasoori jiyacari sequequiaari cuno pojoriiri juhua Neyanu Jesucristo quiriquianojuhuj. Naa sequequiaariiri Jesucristo quiniuria pa puerana, queraatia tapueyocucaraca na quiniuria. ³⁰ Naacuajitij, canapue Pueyaso saquiriojoquiaari na muerasu nojori quiniuriacuajani, juhua Jesucristo nojori quiniuriajuhuj, Pueyasoori cuno nojori niishitiquiaa nojori tiuniuria Neyanuuca. Jesucristoocua nojori tiushacari, Pueyasoori nojori jiyatequiaa juhua sesa miyashijacara. Jiyanooshano nojori quishacari, Pueyasoori nojori niqutioquiaa na Sohuanu, na Sohuanu jataniniuria nojori shacantuuca quijiaca nojori quiniuria juhua Neyanu.

³¹ Naa Pueyaso miishacari maninia pajaniyaratej, ¿taa pa sequeyani? Pueyaso jaara pa jiyano quiya, ¿tamonute na naata sesonu pajaniya? ¡Maja! ³² Pueyasoori jiyano hua pa panijia. Nojuajaari Neyanuniyosua jiyaroquiaari pocuara mosocoriquiano. Nojuaja jaara Neyanu jamueyaquiquiaar-icuaa, ¿maatucua casaara quiarijia niqutioyaquiri puetunu pa panishanojuanaani? ³³ ¿Cantucua Pueyaso saquiriojosano pueyacuara saquiriojotare sesa nojori miishanoni? Pueyaso-juanaacuajaari pa jiyatequiaari juhua sesa miyashijiaca pa quiniuria. ³⁴ Jesucristocuaajaari tari cusoquiaari pa niti. ¿Cantucua saniniuujia quiarijia Pueyaso sequeriquia pocuarani: “Cuno pojori quia shaajare”? Pocuaji Tacunacuajaari samitiaquiaariuhua. Quiarijia na Que Pueyaso miaquetajara cajiyari, pocuara na Que na secojonura pueyaracaanu. ³⁵ Nojuajaari jiyano hua pa panijia. ¿Tamonu casaate na naata Cristo tarinitiniu maja na paniniuria pajaniya? ¡Majaari quenaaja casaa quiniu na tarinitiniuria nojuaja! Naaratej, majaari nia jiyaniniu Cristo pa paniyaquiya, paa jaara taraatia miishiyani, paa jaara casaacua tacayani, tamasaca jaara naquiya miya pajaniyani. Naajuhuj, paa jaara quera titiacoya pa miaajenutani, majaari nia jiyaniniu Cristo pa paniyaquiyani, naajuhuj, paa jaara toqueeju quiyani, paa jaara cocuaatia miyani, paa jaara miananajoshiya monurajaniuhuj. Puetunu niojuanaari maja na tarinitiniu Jesucristo, na paniyaquiniuria pajaniya. ³⁶ Paacuajaari taraatia miishocoriquianoni, naatej, taa tariucuaaanu Pueyaso Rupaajinia naajiotasano quiyacuajani. Naa sequeyari:

“Canaa Pueyasonaa, canaari puecooshiya pueyaracaanuni, quia tojitiajaca canaa quiniuucua. Nojoriiri juhua miaquesocoriquiano borregohua canaa puecooquiaa juhuajaniya”.

³⁷ Paari naa miishaaquiaajaaniuhuj. Naajaa, naa taraatia pa miishacaritij, Jesucristo panishacari pajaniya, nojuajaari shocotajacara pa jiyatequiaa. Naacuajitij, majaari saaja pa rejeretanu naquiya pa miishacari. Jesucristoori seetanujuanaa cuno naquiya pa miiniu jiyatequiaa maninia na jecanura pajaniya, juhua nojuaja pa quiniuria socua. ³⁸ Seetanujuanaa niishyanijia, Pueyaso panishacari jiyano hua pajaniya, majaari quenaaja tamonu casaa na naata rupatanu pajaniya Nojuajiniji. Paa jaara quiri saminiojuani, macu soj, naajaa, pa panijia Pueyasocuaajaari pata quiyajaa. Naajuhuj, Pueyaso seya, samaruhanio, puetunu cunojuanaari maja na naata pa rupatanu Pueyasocuaaji. Naajuhuj, majaari quenaaja tamonu cumaacaraca quijiaca na naata pa rupatanu Pueyasocuaaji. Pueyaso paniniu pa-

janiyani, cunoori maja na puequenu quiniutianiya quiarijia, tamacarinio. ³⁹ Naajaarihuaj, tee pa quiyani, jiyocuacaanu, jiya cariquimia soj, naajaa. Pa panijia Pueyasoori tii quiya patajuhuaj. Naacuaajitij, pa Jiyaniijia Jesucristota rupuetootesano pa quishacari, puetunu Pueyaso shipinijosano casaa-janaari maja na naata pa rupatanu Pueyasojiniji.

9

Pueyasajuanaari pueya saquiriojua na pueyara

¹⁻³ Naa Pueyaso pueyano cua quishacaritij, janiyari jiyanohua cuarta Israel pueyacia taraajequiaani, nojori tiuyaquiniuucua pa Jiyaniijia Jesucristoocua. Janiyari pueyaracaanu nojoriicua taraajequiaa jiyanohuani, maja cua naata quishacari cuarta Israel pueya tiutiniu Jesucristoocua. Seetanujuanaa nia sequeyanijia, Pueyaso jaara na naata quiri mani quiquiojinia na jatanura janiya nojori niti, janiya maara sequereni, maniniacuajaari naa cua miishaanura. Nojori jaara na naata quiri Jesucristoocua rupuetesaanu cua niti, janiya maara Pueyaso sequereni: “Cua rupatare cutara Jesucristojiniji, saniya cuarta Israel pueya jiyatesaanura Pueyaso muerasura cutara”. Naa cua sequesacari niajaniatej, janiyari coojiajinia niishiyani, seetanujuanaari cua sequesano. Pueyaso Sohuanuuri cua niishitiyajuhuaaj majaari cua sapojonu. ⁴ Cuarta Judiocuacaari pa supuetana Israel niquiohuacuajinio supueno pueyacuaja. Pueyasoori nojori jiyatequiaari na muerasu nojori quiniuria, nocua nojori tiushacari. Pueyasoori nojori niqitiquiaari shacantuuca na cumaaca, tariucuacaanu nojoritia na quishacari. Pueyasoori nojori sequequiaari: “Janiyacuajaari Pueyasoni. Niaari cua pueya quiniutianiya niaa jaara cucua tiuuri”. Naajuhuaaj, Pueyasoori Moisés niqutioquiaari caapiqui saajianeecua na naajosano, saniniuujia Moisés niishitiojonura tiji nojori. Pueyasoori nojori nishitiquiaarijiuhuaaj taa nojori miiniutianiyan, tariucua jiyanooshano nojori rerejonura na niquiara. Pueyasoori nojori sequequiaarijiuhuaaj, nojuajaari puetunujuanaa na sequesano Abraham tohuateenutaniya nojoriria. ⁵ Israel pueya supuetanaari quiquiaari Abraham, Isaac, Jacobonio. Pa Jiyaniijia Cristoori cuno pojori niquiohuacuajinio supuequiaari. Nojuajaari tari jiyatesaaquiaari Jiyaniijiajanaa na quiniuria, puetunu casamijianaa jiiitiana na quiniuriajuhuaj. Nojuajaari Pueyasojuhuanajaj, juhua na Quejuhuaj. ¡Nojuaja cuara pueyaracaanu maniniuhuaqueetasano quiiria! ¡Cuaara naa quiiria pueyaracaanutej!

⁶ Quiarijiani, queraatia parta Israel pueyajinijinio pueyari maja Pueyaso muerasu. Naa cua sequesacari niajanियatej, majaari nia jiyaniniu tariucuacaanu Pueyaso sequesano pa supuetanaari tohuateyaquiniutianiya. Maja pueyanaa. Tohuateenutaniyanocuaaja. Jaara naa quiriritij, ¿casaara puetunu Israel pueyajanaa maseyaquiniutianiya Pueyaso sequesano nojoririarini? Cua tojitiare pueyanaa. Puetunu pa supuetana Israel niquiohuacuajinio supueno pueyajanaari maja seetanujuanaa Israel pueya Pueyasora. ⁷ Naajaariuhua Abraham niquiohua. Puetunu Abraham niquiohuajanaari maja seetanujuanaa Abraham niquiohua na quiniu quiquiaari Pueyasora. Pueyasocuaajaari naa sequequiaari Abraham:

“Cua sequesano quiajanियari saaja quia niyanu Isaaccuajinio supueno pueyarano quiniutianiya cutara”.

⁸ Naa Pueyaso sequesacari Abrahamtej, naacuajiti paari niishiyani, majaari puetunu Pueyaso saquiriojosano pueyacujinio supueno pueyajanaa seetanujuanaa Pueyaso muerasu. Saniniuujia, seetanujuanaa Pueyaso muerasu cutaraari noo pojori, Pueyaso sequesanoocua tiuujiacatej, taa pa supuetana Abraham tiuuquiaari Pueyaso sequesanoocuaacuaani. Pueyasora, nojori cutaraari Abrahamcuajinio supueno pueya. ⁹ Abrahamri Pueyaso sequesanoocua tiuuquiaari, Pueyaso jaara naa na sequequiaari:

“Abrahamnaa, janiyari quiocua tacatenutaniuhua tamacarini. Janiyari jiyacari quia niquio Saara riuriatanutaniuhua tariucua mueyaracani”.

Naacuajitij, Isaac jaara rasaaquiaari, Pueyaso sequesanoori tohuateequiaari. Naacuajitij, puetunu Abraham niquiohuajinijiniojuanaani, saaja Isaacri Pueyaso saquiriojosano pueyano quiquiaari.

¹⁰ Naa quiquiaariijaariuhua Isaac niquiohua. Isaac jaara neco Rebeca manajoquiaari, Rebecaari caapueya manajequiaari. ¹¹⁻¹³ Cuno caapueya royaquishacarijia, juhuanojuaja nojori niishiyaquishacari maninia miiniu, sesa soj, jiyacariti Pueyasoori na nucua sequequiaari:

“Janiyari quia jiyapueranu jiyatenutaniya na nuhuajishana tojijiarani”.

Naa Pueyaso sequesacaritij, cunoori juhua Pueyaso sequesano tariucuacaanu. Naa sequequiaari cuno royaquishoojua caapueyajinijiiri:

“Jacoboori cua panishano quiniutianiya. Esauuri saniniuujia cua soosano quiniutianiyacujua”.

Naa Pueyaso sequesacaritij, paari niishiyani, Pueyasoori saquiriojoquiaa cana na saquiriojonu paniyacuajani, tama na miiniu panishanojuaaja na tohuateenura. Naacuajitij, Pueyaso jaara saquiriojore pueya, nojuajaari maja na niishiriojonu nojori miishanojiniji; maninia, sesa soj.

¹⁴ Naa Pueyaso miishacari tama na panishanojuaajatej, ¿taa pa sequeyani? ¿Pueyasote sesa miya, naa rimiajata na saquiriojosacari pueyatej? Maja. ¹⁵ Pueyasocuaajaari naa Moisés sequequiaari:

“Janiyari pueya jiyanooniutianiyani teyano pueyano cua jiyanooni paniyacuajani. Naajuhuj, janiyari pueyanooqua taraajenutianiyani, teyano pueyanooqua cua taraajenu paniyacuajani”.

¹⁶ Naacuajitij paari niishiyani, pueyano maja na naata tama na cuaqueyajaaja jiyatenu Pueyaso pueyano na quiniuria. Pueyasocuaajaari tama saquiriojoquiaajaaja cana na jiyanooni paniyani. ¹⁷ Naajuhuj, tariucuacaanu Pueyaso sequesano Egipto jiyaniijaraari naa naajiotasano quiyajuhuj:

“Faraónnaa, janiyari quia jiyatequiaari Egipto pueya jiyaniijia quia quiniuriani, cua cumaacata cua miiijosano cua niqitiniuria quiajaniya. Naacuajitij, puetunu jiyacajinia quiniaa pueyapuejanaari niishiniutianiya, janiyari Pueyasोजना cutarani”.

¹⁸ Naacuajitij, paari niishiyani, Pueyasoori taraajeja teyanooqua na taraajenu paniyani. Naajaariuhuj, nojuajaari na tojiyashijia pueyano jiuujia jiyateja cumajiuujiaacara, teyano pueyano jiuujia na jiyatenu paniya naaracuajani.

¹⁹ Naa cua sequesacari niajanijatej, tamonu naasucuaari sequenutaniya: “Pueyaso jaara naa miiquiaa taa na miiniu paniquiaacuajani, ¿maatucua casaara sesa pa miiniuucua pa saniitioreni? ¿Canteeri na naata Pueyaso tarinitiniu na miiniu panishanojinijini?” ²⁰ Majaari naa sequenu pueyanonaa. ¿Canteeri quiajaniyani, naa quia juaaniuria Pueyasotej? Paacuajaari na shipinishano pueyani. ¿Taa nia sequeyani? Marau jaara pocuanu niishiriquia, ¿nojuajate na naata na paninia juaaniu: “Juaashiquiaracanaa, ¿casaara quia panirii conatura janiyani?”? ²¹ Paniyojojuacuajaari na naata paniniu maraujiniji na panishano casaa, shanohua pataconiyojua, mashaca quiquiora manijinia cajitiariquiano conatunio.

²² Naajuhuj, ¿taa pa sequenutaniyani, Pueyaso jaara niishitiniu paniya na juaaniu, na cumaacanio, na saniitiosacari sesa miijiaca? Naajaa, Pueyasoori jiyanohua rejeretaquiaa sesa miijiaca, cante tari saniitiosocoriquiano

quiyacuajani. ²³ Pueyasoori naa tarishiyajaara na sanitationura na tojtiaashijiaca pueya. Naa na tarishishacaritij, nojuajaari pueya niishitiquiaa na shacantuuca cumaaca, maninia na miishacari na jiyanooshano pueya, cante tari saquiriojosano quiya na shuriucua quiriquianocuajani. ²⁴ Paacuajaari cuno jiyanooshano pueyani, canapue tari Pueyaso saquiriojoquiaaricuajani Judiocuacajiniinionio, taucuacajiniinionio. ²⁵ Naa naajiotasano quiyacuajaari Pueyaso sequesano supuetana Oseas naajioneejinia:

“Cante cua pueya quiyaquiquiaarini, janiyari nojori sequenutaniyani: ‘Niaari cua quiquiohuanioyua’. Naa-juhuaj, cante cua shuquiritiasoo pueya quiquiaarini, nojoriiri cua timitiasano pueyara quiniutianiya”.

²⁶ Naa naajiotasanoori quiyajuhua:

“Tee cuniqui naa pueya sequesaaquiaaricuajani: ‘Niaari maja cua pueya’, nojoriiri cuniquijia jiyaniquishaanutaniya: ‘Niaari Pueyaso niquiohuajanaa cutara’ ”.

²⁷ Saniniuujia, supuetana Isaíasri naa sequequiaari Jacobo niquiohuacuajinio supueno pueyajiniji:

“Israel pueyari jyanohua canenutaniya, juhua shoniniacu caminia shuriuquioco paajia jaaquia, serojosoo. Saniniuujia, saaja secaja nojorijinijinioori Pueyaso pueyara jatanishaanutaniya. ²⁸ Pueyasoori mijiriara na sequesano tohuateenutaniya. Majaari na tarishiniu quiniutianiya”.

²⁹ Supuetana Isaíascuajaari naa sequequiaari tarijiajuhuaj:

“Pa Jiyaniijia Pueyaso jaara Israel pueya niquiohua jyanoyaquiquiaari, Israel pueya maara quiarijia quiyaquiri. Maara tari shaajasaacanu tojetaarucujanaa, naatej, taa Sodoma tiacajinia quiniaa pueya puecoosaaquiaaricuaani, Gomorra tiacajinia quiniaa pueyano”.

Judiocuacaari Pueyaso rupaacua tiuyashijiaca saaja

³⁰ Naa cua pohuatasacari nijaniya tariucuacaanu Pueyaso Rupaajinijitij, paari quiarijia nio niishiyani: taucuacaari maja quenaaja na tacaaniu quijia taate nojori naata Pueyaso jiyanooshano quiniuni. Nojoriiri juhuajaniya quijia saaja. Naajaa, quiarijia, Pueyasoori nojori jiyatequiaa juhua sesa miyashijiacara, saaja Jesucristoocua nojori tiushacari.

³¹ Israel pueyari saniniuujia jyanohua Moisés Rootasano tojjijia juucua, nojori jyanishacari Pueyaso naasucuaari naa nojori miishacari nojori jyanooniutianiya. Majaari Pueyaso jyanooniu quijia nojori. ³² ¿Niaate niishiya casaara Pueyaso jyanoyaquiquiaari nojorini? Pueyasoori nojori jyanoyaquiquiaari nojori tiuyaquiniuucua nocua. Nojoriiri

jiyaniquiaari tama nojorijiaarijia na naata tama nojori cuaqueyajaaja jiyatenu juhua sesa miyashijiacara, Moisés Rootasano nojori tojishacari. Naaratej, majaari nojori tiuuniu quiquiaa Jesucristoocua. Nojoriiri saaja na sooquiaa. Naacujitij, Jesucristoori juhua saajia nojoriria, nocua nojori tiuriiniuria. ³³ Jesucristojiniji miriqui Pueyaso sequesano cuajaari naa naajiotasaaquiaari tariucuaaanu, Jesucristo niyacarijia:

“Cua tojitiare. Janiyari Sión tuhuananuucua nianutaniya saajiani, pueya tiuriiniuria nocua. Saniniuujia, cante nocua tiuyani, nojoriiri puetunu Pueyaso sequesano juanaa na muerasurano masenutaniya”.

10

¹ Cuarta Pueyaso muerasunaa, janiyari jiyano hua Pueyaso secojoquiaani parta Israel pueyacuara, Jesucristoocua nojori tiuuniuria, Pueyaso pueya nojori quiniuriajuhuj. Janiyari jiyano hua nojoriicua tacayani. ² Janiyacuajaari seetanujuaanaa niishiyani, Israel pueyari seetanujuaanaa Pueyaso panishano miiniu panijiacu juucua, na muerasu nojori quiniuria. Nojoriiri naa miiquiaa najuhuanaj, nojori niishiyaquishacari maninia. ³ Nojoriiri saaja sequequiaa, majana Pueyaso naata pueya jiyanooni saaja nojori tiuushacari nocua. Naaratej, nojoriiri jiyano hua saniniuujiquiaa maninia nojori quiniuria Pueyaso niqiuara tama nojori miishanotajaaja. Naacujitij, nojoriiri Jesucristoocua tiuyaqui quiaa Pueyaso jiyanooniuria nojori. Pueyasajuanaari Cristo jiyatequiaari pa niti mosocoriquiano. ⁴ Naacujitij, Cristo jaara mosaaquiaari, nojuajaari Moisés Rootasano tojiniu tohuatequiaari cutara. Naacujitij, Pueyasoori puetunu nocua tiuuniaajanaa jiyatequiaa juhua sesa miyashijiacara. ⁵ Moisés cuajaari naajioquiaari taa na rootasano tojijiacu miiniutaniyani, juhua sesa miyashijiacu nojori quiniuria. Nojuajaari naa naajioquiaari: “Cante puetunu cua rootasano juanaa tojijiani, nojuajaari pueyaracaanu rishijiaa jiyatesaanutaniya”.

⁶ Saniniuujia, saaja Jesucristoocua pa tiuushacari, paari juhua sesa miyashijiacara jiyatesaaquiaani, pueyaracaanu rishijiacu pa quiniuria. Naacujitij, majaari naa nia niishiriojonu nioojiajinia nia taacanuusacari: “¿Cante na naata jiyocuaaanu tacanu Jesucristo na roshiniuria Pueyaso pueyara na jataniniuria pajaniyani?” ⁷ Naajuhuj, majaari naa nia niishiriojonu: “¿Cante na naata macunucua quiquiojinia quianu, Jesucristo na tacaniniuria pocuani?” ¡Pueyanaa, majaari quenaaja naa nia niishiriojonute! ⁸ Pueyaso Rupaacujaari tari naa naajiotasaaquiaari pajaniyara:

“Niaacuajaari cua rupaa jiiitia. Niaari na niishiyajuhua. Nioojiajinia quiyacuajaari”.

Cuno rupaa canaa na pahuataquiaa niajaniani, cunocua-jaari Jesucristoocua nia tiuuniuria. ⁹ Naacuajitij, Pueyasoori pueya jiyatequiaa na pueya nojori quiniuria, Jesucristoocua tiuujia jaara pueya niqiara pahuatare: “Jesucristoori seetanujuanaa Jiyaniijiajanaa cutara”, noojiajinia na niishishacarijiuhua Pueyasoori Jesu samiitianiquiaariuhua macujiniji. ¹⁰ Seetanujuanaa naari: poojiata pa tiushacari Neyanuucua, Pueyasoori pa jiyateya juhua sesa miyashijia pa quiniuria. Naajuhua, pa rupaata pa pahuatasacari: “Janiya Jesucristoocua tiuujiani”, jiyacaritij, Pueyasoori pa jataniquiaa na pueya pa quiniuria cutara.

¹¹ Tariucuacaanu Neyanujiniji Pueyaso sequesanoori naa naajiotasano quiyajuhua:

“Puetunu nocua tiuuniaajanaari puetunu cua sequesanojuanaa cua muerasurano masenutaniya”.

¹² Naacuajitij Judiocuaca, mariyata taucuacanio, nojori jiyanooshaanutaniya nojori jaara sequere: “Jiyaniijianaa, cua jiyanoori”. Pa Jiyaniijiaari maja rimiajata na jiyanooni nocua tiuujia pueya. Nojuajaari jiyanoohua capora. Jiyaniijiajanaa cutaraari. ¹³ Tariucuacaanu Pueyaso Rupaaajiniaari naa naajiotasano quiyajuhua:

“Puetunu pueyajanaari Pueyaso pueyara jatanishaanutaniya nojori jaara Jiyaniijia sequere: ‘Jiyaniijianaa, cua jiyanoori’ ”.

¹⁴ Jaara naa quiritij, ¿pueyatucua taa Jiyaniijia secojonu-ureni, nojori jaara nocua tiuyaquiyajaa? Naajuhua, ¿pueyatucua taa nocua tiurini, nojori jaara nojuajiniji pahuataaquishoo quiyajaa? ¿Nojoritiucua taa nojuajiniji niishijia quirini, tamasaca jaara quenaaja nojori pahuataaquiri?

¹⁵ ¿Pueyaso Rupaa pahuatanaatucua taa cuno pojoriicua quiaareni, nojori jaara jiyaramiquiyaquishaare? ¿Pueyaso rupaa pahuatanaate jiyaramiquiyaquishaaquiaari? ¡Maja! Jiyaramiquishaaquiaaricua. Naaratej, naa naajiotasano quiyari tariucuacaanu Pueyaso Rupaaajinia:

“Jiyanoohua timitiasano pueya cutaraari, noo pojori canapue tamasacaacua quiajani, nojori na pahuatanura Pueyaso rupaa”.

¹⁶ Naajaa, majaari puetunu pueyajanaa tojiniu quiquiaa, Pueyaso Rupaa jaara nojori niqiara pahuatasaare. Naacuajitij, supuetana Isaíasri naa sequequiaari na taraajenuta:

“Jiyaniijianaa, majaari pueya tojiniu paniniu canaa pahuatasano quiajanijiniji”.

17 Naacuajitij pueyanaa, paa jaara Jesucristo rupaa pohu-
atasaareni, paari pa numaata na tojiyani. Paa jaara pa tojis-
hanoocua tiuurini, Pueyasoori pa jiyatenutaniya na pueya pa
quiniuria.

18 Pa jaara Pueyaso pueyara jiyatesaaquiaa saaja
pa tiuushacari Pueyaso rupaacua, jaara naa quiritij,
¿casaara puetunu Israel pueyajanaa Pueyaso pueyara
jiyateyaquishaaquiaariirini? ¿Cristo rupaateeri nojori
niquiara pohuataaquishaaquiaari? Maja. Nojori
niquiaracuajaari pohuatasaaquiaari. Naa naajiotasano
quiyacuajaari tariucuacaanu Pueyaso Rupaajinia:

“Pueyaso Rupaacuajaari puetunu jiyacajiniajanaa pohu-
atasaquiaari. Na rupaari tojishaquiaari puetunu
tiqiyocuajanaa, jiya puequeetujinia”.

19 Jaara naa pohuatasaaquiaaritij, ¿Israel pueyateeri Pueyaso
rupaa niishiyaquiquiaari nojori tojishacari? Maja. No-
joricuajaari na niishijiaca quiquiaari. Nojoriiri saaja na
ruuretajaca quiquiaari. Supuetana Moisésacuajaari naa naa-
jiotaquiaari Pueyaso sequesano Israel pueyara, tariucua na
tojiyashijiaca nojori quishacari:

“Maninia cua miishacari tiqiyocua quijiaca taucuaca nia
niti, janiyari nia juaatiniutianiyani. Niaari jiyanohua
juaaniutianiya cua jiyanooshacari mosanucua tau-
cuaca”.

20 Na nuhuaji, supuetana Isaíasri naa maatia sequequiaari
Pueyaso niishitiosano nojuaja:

“Cucua jiaatiaashijiaca taucuaca cutaraari cua riuriataquiaa,
cua tojijiaca nojori quiniuria cutara. Naajuhuj, jani-
yari cua pajeyashijiaca taucuacaacua muetaquiaani”.

21 Saniniuujia, Isaíasri naa Pueyaso sequesano Israel pueya-
jiniji naajiotaquiaari:

“Janiyari puetunu juucajanaa Israel pueyacuaji masequiaa
juucuani, maninia cua miiniu panishacari nojori. No-
joriiri saaja cua shocotequiaa, cua tojiyashijiaca pueya
nojori quishacari”.

11

Israel pueyajiniji cureenoori Pueyaso saquiriojosano

1 Israel pueya jaara naa Pueyaso tojiyashijiaca quiya,
¿Pueyasote seetanujuanaa nojori tarinitiacanu, na tojiyashiji-
aca nojori quiniucua? ¡Maja pueyanaa! Janiyacuajaari
Israel pueyanojaniuhuj. Abrahamri cua supuetana. Jani-
yari na jinianu Jacobo niyanu Benjamíncuajinio supuenoni.

2 Naacuajitij, janiyari niishiyani, Pueyasoori maja na cartenu
quiquianu puetunu tariucuacaanu na saquiriojosano Israel

pueyajanaa. ¿Niaateeri supuetana Elíasjiniji naajiotasano niishiyaquiya? Tariucuacaanu Pueyaso Rupaajinia naa naajiotasano quiyacuajaari Elías sequesano Pueyaso, na tacaashacari Israel pueya quiniuucua sesa:

³ “¡Cua Jiyaniijianaa, cuarta Israel pueyari puetunu quia sequesano caminiujiuniaa pueyajanaa puecoorucuaa! ¡Saa janiyajaari cureyani! Naajuhuaaj, nojoriiri puetunu juhuacutucuaajanaa niyarequetarucuaa, tee quia tojtiajaca pueya catijiaquiaa na seya quiocuaracuajani. ¡Nojoriiri quiarijia cua pajenuyajuhuaaj, na motunura janiya!”

⁴ Pueyasoori naa Elías riucuaquiaari saaja:

“Janiyari siete mil pueya jittiaajaani. Nojoriiri cua tojtiajaca. Nojoriiri maja na mojuquetaconu quiquiaa cuno sacuaratia shipinishano Baalcuara cua niti, taa narta Israel pueya miiquiaacuaani”.

⁵ Quiarijiaari naajuhuaaj, Pueyasoori secaja na saquiriojosano Israel pueyajinijinio jittiaa, jiyanootio na quiniuucua. ⁶ Naa Pueyaso muerasu nojori quishacari saaja Pueyaso jiyanooniucua nojori, naacuajiti paari niishiyani, majaari Pueyaso saquiriojonu quiquiaari nojori, maninia nojori quiniuucua. Nojori jaara maninia miijiacu quiriquia, nojori maara paniyaquiri na jiyanooshaanura.

⁷ Naacuajitij, paari niishiyani, Pueyasoori saaja na saquiriojosano pueya jiyatequiaa na muerasura. Israel pueya saniniuujia, nojoriiri saaja maninia quiniuria saniniuujia juucua. Naajaa, majaari nojori naata tama na cuaqueyajaaja jiyatenu quiquiaari Pueyaso muerasu nojori quiniuria. Cuno pojori jiuujiaari saaja cumajiuujiaacara quiquiaari, tojetaarucuaajanaa niishiyashijiaca nojori quiniuria. ⁸ Tariucuacaanu Pueyaso Rupaajiniacuajaari naa naajiotasano quiya:

“Pueyasoori nojori jiyatequiaari niishiyashijiacara, maja nojori niishiniuria nojuaja. Naaratej, majaari nojori niishiniu quijia, nojori niquishacari Pueyaso miishano. Majaari nojori niishiniu quijiajuhuaaj, nojori tojishacari na rupaa. Israel pueyari naa Pueyaso tojiyashijiaca quiyajaa quiarijiani”.

⁹ Supuetana David sequesanoori nojorijiniji naa naajiotasano quiyajuhuaaj:

“Pueyasonaa, Israel pueyari puetunu nojori panishanojuanaa jittiaa, maninia quia miishacari nojori. Saniniuujia, nojori tojiyaquiniuucua quiajaniya, nojori shuquiritasano casaa cuara quiriia juhua norijia tama nojoririaajaaja, nojori

saniitiosaanura. ¹⁰ Nojori jiuujia cuaara jataara juhua cariyojuarujuriria, maja nojori niishiniuria seetanu Pueyaso rupajaanaa. Nojori cuaara porequetacoora socua, pueyaracaanu taraatia nojori miishacari”.

Pueyaso jiyanooshacari taucuaca, Israel pueya niti

¹¹ ¿Niaateeri jiyaniya Pueyasoori Israel pueya cartequiaarijianaa, tojiyashijiaca nojori quiniuucua? Maja. Pueyaso tojiyashijiaca nojori quiniuucua, taucuacaari saniniuujia Pueyaso muerasura quiquiaa, nojori tiuushacari Jesucristoocua. Cunoori Israel pueya jiaatianiQUIAA taucuacaacua, Pueyaso muerasu nojori quiniuriajuhuaj. ¹² Quiarijia, puetunu jiyacajiniajanaa taucuacaari shuquiriaatia quiya, Pueyaso muerasu nojori quishacari Israel pueya tiuyaquiniuucua Jesucristoocua. Saniniuujia, Israel pueya jaara Pueyaso muerasura quiriohua Jesucristoocua nojori tiuushacari, jiyacaritij, socua jyanohua maninia quiniutianiyari puetunu pueyapuerajanaa, puetunu jiyacajiniajanaa.

¹³ Taucuacajinijinio cuarta Pueyaso muerasunaa, cua tojiri. Nia sequenu paniyanijia. Janiyari seetanujuanaa jiyaramiquishaaquiiaari Jesucristo rupaa cua pohuatanura taucuaca niQUIARANI. Naaratej, janiyari puetunu cua cumaa-catajanaa pohuataQUIAA Jesucristojiniji taucuaca niQUIARANI, nojori quiniuria Pueyaso muerasujuhuaj. ¹⁴ Janiyari seetanujuanaa naa miiQUIAANI cuarta Israel pueya jiaatiana niaacua, nojori tiuuniuria Jesucristoocujahuaj, nojiaqueya nojorijinijinio Pueyaso jiyatenura na pueyara. ¹⁵ Pueyasoori juhua taanuQUIAARI Israel pueya nocuaji, nojori tiuyaquishacari Neyanuucua. Naajaa, naacuajiti Pueyasoori puetunu mijiria quiniaa pueyapuejanaa jiyanooQUIAA, na muerasu nojori quiniuria. Saniniuujia, Israel pueya jaara jiyanooshaarohua, jiyacaritij, jyanohua maninia quiniutianiyari puetunu pueyapuerajanaa. Israel pueya tiuushacari Jesucristoocua, nojori iiri juhua macujiniji samiiti-aconutaniuhua. ¹⁶ Seetanujuanaa maninia nia niishiniuria nio miriqui cua pohuatasanooni, maatia nia pohuatareeraj. Nia tojiri. Coteenujuanaa pa jiuniocotasano neecaruu jaara maninia quiri Pueyasora pa niQUITIOSOCORIQUEIANO, tariQUIAARI puetunujuanaa maniniajuhua Pueyasora. Naajuhuj, naana nujuaca jaara maninia quiri puetunujuanaa, na cashacucuaari maniniuQUIUCUAJUHUAJ. Nio miriqui cua pohuatasanoori nia niishitiya cutara Israel pueyajiniji. Naacuajitij, Pueyaso jaara Abraham jiyanooQUIAARICUAA nocua na tiuushacari, naacuajiti paari niishiyani, Pueyasoori

puetunu Israel pueyajanaa jiyanooniutianiyajuhuj, nojori jaara tiuuriquia Jesucristoocua.

¹⁷ Supuetana Abrahamri juhua Pueyaso panishano olivo naana nujuaca. Saniniuujia, na jinianuucujainio supueno Israel pueyari juhua na cashacucua. Cuno na cashacucujainijinio jaara Jesucristoocua tiuyaquiuaari, Pueyasoori na piyotaquiaari. Niajaniya saniniuujia taucucanaa, niaari panishoo quiuaari, juhua nacujiniaacoji olivo naana cama, maja natau. Naajaa, Jesucristoocua nia tiuushacari, Pueyasoori nia rupotaquiaari na panishano naanaacua nia moritianura. Naa Pueyaso panishano naanaacua nia moritiasacaritij, cuno naana nujuacaari nia nujuacajuhuj. Naacuajitij, niaacuajaari puetunu Pueyaso sequesanojuanaa supuetana Abrahamra masequiaa tari. ¹⁸ Naa Pueyaso rupotanuucua niajaniya na panishano naanaacuatej, majaari tama nia cuaqueyajaaja nia shuquiritianu. Majaari nia jyaniniu niaa cutaraari socua maninia pueya, Pueyaso cartesano Israel pueyajiniji. Naa jaara jyaniya niaari socua maninia pueya nojorijiniji, nia niishiri, niaari maja nia nujuaca rishitijia. Naa nujuaca cutaraari nia rishitija.

¹⁹ Naa naasucuaari sequeya: “Taaquiririnij. Cuno olivo cashacucuaajaari canaacuaji piyotasaquiaari, saniniuujia canaa rupotasaanura nocua nojori niti”. ²⁰ Taaquiririnij, seetanujuanaacuaaquinateja nia sequesanojuaj. Saniniuujia nia niishiri, nojori Pueyaso panishano naanajiniji piyotasaquiaari, nojori tiuyaquiniucua Jesucristoocua. Naaari saniniuujia cuno naanaacua rupotasano quiya, saaja Jesucristoocua nia tiuuniucua. Naacuajitij, maja tama nia cuaqueyajaaja nia shuquiritianu nia jyanishacari niaari socua maninia pueya cuno Israel pueyajiniji. Saaja puerejaca nia quiri cutara, cua panishano taucucanaa, niaa mariqui piyotasaaruari, niaa jaara Pueyaso tojiyashijiacara quiri-ohua. ²¹ Pueyaso jaara jyanoyaquiuaari na saquiriojosano pueyacuaa, nojori tiuyaquiniucua nocua, ¿maatucua casaara jyanoori niajanianijia? Naaacuajaari taucucua. Naaacuajaari maja na saquiriojosano Israel pueyacujainio. ²² Naacuajiti pueyanaa, nia niishiri. Pueyasoori jyanohua maninia. Naajuhuj, nojuajaari saniitionu niishijia cutara. Naaratej, nojuajaari na tojitiaashijiacara Israel pueya jyanoyaquiuaari. Saniniuujia, nojuajaari jyanohua maninia miiquiaa niajaniya na jyanoooshano pueya nia quishacari, niaa jaara pueyaracaanu nocua tiuujiaa quiri-ohua. Naa-janiya taucucanaa, niaa jaara nocua tiuyashijiacara quiri-ohua, niaari nocuaji rupatasaanutaniuhua. ²³ Saniniuujia, Israel pueya jaara Jesucristoocua tiuujiacara quiri-ohua,

Pueyasoori nojori rupotananiuhua na panishano olivo naanaacua. Pueyasoori jiyanoehua cumaacaracacua na rupotanuuhua na panishano naanaacua. ²⁴ Niajaniya taucacanaa, niaari maja seetanujuanaa Pueyaso saquiriojosano Israel pueya. Niaari juhua nacujiniaacoji olivo naana cashacucua. Naajaa, nia tiushacari Cristoocua, Pueyasoori nia rupotaquiaari na panishano olivo naanaacuaajanaa. Naaratej, majaari jiyajeneta Pueyasora, na piyotasano olivo cashacucua na rupotanuuhua tama neyonaacuaaja, nojori jaara Jesucristoocua tiuujacara quiriohua.

Pueyaso jatanishacari puetunu Israel pueyajanaa na pueyara

²⁵ Taucuacajinijinio cuarta Pueyaso pueyanaa, tariucuaaanu pueyari niishiyaquijia taa Pueyaso miiniutianiya Israel pueyani. Quiarijia cutara nia niishiri Pueyaso niishitishano janiya, maja nia jiyaniuria Pueyasoori nia paniya socua Israel pueyajiniji. Naarate cua tojitiare. Quera puetunu Israel pueyajanaari Pueyaso tojiyashijiaca quiya. Nojoriiri naa quiniutianiya, puetunu Pueyaso saquiriojosano taucuacajinijinio pueyajanaa cuara Jesucristoocua tiuuriijaatijia. ²⁶ Jiyacaritij, puetunu Israel pueyajanaari jiyatesaanutaniya Pueyaso pueyarajuhua, taa tariucuaaanu Pueyaso Rupaajinia naajiotasaaquiaaricuaani. Naa sequeyari:

“Sión tiacajinia supuenutaniyari pueyacuaji Tacuriquiano. Nojuajaari puetunu sesa casaajanaa jaariutianutaniya Jacobo niquiohuacuajinio supueno pueya jiuujajiniji. ²⁷ Naa cua jiyanooshacari puetunu sesa nojori miishanojuanaatej, janiyari jiyacari tohuateenutaniya tariucuaaanu cua sequesano nojori supuetanaani”.

²⁸ Quiarijia Israel pueya tiuyaquishacari Jesucristo ru-paacua saniniuujia, nojoriiri juhua Pueyaso paraa, Pueyaso jiyanooniuria niajaniya saniniuujia, taucacanaa. Naajaa, Pueyasoori cuno Israel pueya panijaa, nojori supuetanaa quiniucua na saquiriojosano pueya. ²⁹ Pueyasoori maja na jaariutianu quijia na niquitiosano. Na saquiriojosano pueya jiyanoojaari. Majaari nojori na ruuretano. Pueyasocua-jaari Israel pueya saquiriojoquiaari na pueya nojori quiniuria, maninia na miiniuria nojori. ³⁰ Maniniushiquiari, niajaniya taucacanaa, niaari Pueyaso tojiyashijiaca quijia. Israel pueya tojiyaquiniucua Pueyaso quiarijia saniniuujia, Pueyasoori niaacua taraajequiaa. ³¹ Nojoriiri Pueyaso tojiyashijiaca quiya quiarijia, Pueyaso taraajenura nojoriicua taa na taraajeya niaacuacuaani. ³² Naacuajitij, Pueyasora, puetunu pueyajanaari na tojiyashijiaca quiya, Israel pueya,

taucuacanio. Naacuajitij, Pueyasoori na naata jiyanooni nojorijuhuj, nojori tiuushacari Jesucristoocua. Pueyasoori maja rimiajata na jiyanooni.

³³ ¡Pa Pueyasoori jiyanoohua niishijia, maninia na miiniuria! ¡Nojuajaari puetunu niishijijanaa cutara! ¿Cante niishiQUIAARINI casaa Pueyaso miiniutianiyani? Na miishanoori jiyanoohua jiyajeneta. ¿Cante na naata na niishiniuni? Shaaqui. ³⁴ Naaratej, seetanujuanaari nio tariucuacaanu sequesano:

“¿Cante na naata Pueyaso niishiriojosano niishiniuni? ¿Tamonuteeri na naata Pueyaso rootanu, maninia na miiniuria? ¡Maja! ³⁵ ¿Pueyasoteeri na panishano jiitiaaQUIAARI tamonu niqutionura nojuaja na panishano, na nuhuaji na niqutionuhuara? ¡Maja!”

³⁶ Seetanujuanaa puetunu casaajanaacujaari Pueyaso shipinishano. Na camaruuri na rishitiquiaa na cumaacata. Puetunu cunojuanaari nerano. ¡Pueyaracaanu pa shuquiritiare pa Que Pueyaso! ¡Nojuajaari jiyanoohua maninia! ¡Cuaara naa quiiriatej!

12

Saaja Pueyasora pa quirij

¹ Cuarta Pueyaso niqiuojuanaa, jiyanoohua maninia Pueyaso jiyanooshacari pajaniya, tama nia cuaqueyajaaja nia jiyatere tojetaarucujanaa saa neraja nia quiniuria. Naacuajitij, niaari Pueyaso shuquiritiniutianiya, pueyaracaanu na tojijiaca nia quishacari. ² Majaari socua nia quiniu taa Pueyaso tojiyashijiaca quiquiaacuaani. Saniya Pueyaso Sohuanu tojijiaca nia quiri cutara, seetanujuanaa quiariniora jatanishano pueya nia quiniuria. Naacuajitij, niaari niishiniutianiya casaa Pueyaso paniya nia miiniuriani. Nia niishitiaja jaara jatanishano quiri, naacuajiti niaari niishiniutianiya casaate maninia nia miiniuriani, Pueyaso nia shuquiritiniuria. Naa nia miishacari Pueyaso panishanotej, niaari niishiniutianiya, cunoori tojetaarucujanaa jiyanoohua maninia.

³ Jiyanoojia Pueyaso quiniuucua, nojuajaari cua jiyatequiaari Neyanujiniji pohuatana cua quiniuria. Naaratej, puetunu niajanijajanaa cua tojitiare quiaritia. Naa jaara Pueyaso cumaaca masequiaari nocua nia tiuushacari, nojuajaari puetunu niajanijajanaa jiyatequiaari tamaatia poonijosano miijiaca nia quiniuria. Naaratej, majaari tama nia cuaqueyajaaja nia jiyatenu paniniu socua maninia quijiaca nia quiniuria tamasacajiniji. Saaja jacaria niishiriojuaca nia quiri, maninia nia miiniuria nia poonijosano, teyano

Pueyaso sequequiaari nia miiniuriacuajani. ⁴ Pa cuaqueyajiniacuma, paari queraatia tamaatia casaa jiitiaani. Puetunu cunujuanaari tamaatia miiniu niishijia, maninia pa quiniuria. ⁵ Paari naajuhuj, taa pa jiniacuma casaacuaani. Queraatia Pueyaso muerasu pa quishacari, naajaa, paari juhua niquiriyatu cuaqueyani, Cristota rupuetootesano pa quishacari, maninia pa miitioonura.

⁶ Naatej, taa pa cuaqueyajiniacuma casaa tamaatia poonijiosano miiniu niishiyacuaani, naajuhuj, Pueyasoori puetunu na muerasujuanaa na cumaaca niquitioquiaa, tamaatia miiniu niishijiaca pa quiniuria. Naaratej, cante Pueyaso cumaaca jiitiaani, Pueyaso niishitishano nojuaja na pahuatanurani, nojuaja cuara seetanujuanaa pueya niquiara pahuataara na taacanuyaquiniutia. ⁷ Naajuhuj, cante Pueyaso cumaaca jiitiaa pueya na naacunurani, nojuaja cuara maninia naacuura pueya. Naajuhuj, cante Pueyaso cumaaca jiitiaa Pueyaso rupaa niishitiojona na quiniuriani, nojuaja cuara maninia niishitiojora Pueyaso rupaa pueya niquiara. ⁸ Cante Pueyaso cumaaca jiitiaa pueya na shiniujiuniuriani, nojuaja cuara pueya shiniujiuuria, maja pueya cartenura Pueyaso rupaa. Cante na jiitiasanojiniji nareja niquitiojojua casamijiuniucua pueyani, nojuaja cuara juhuajaniya niquitiojora nareja, nojori na paniniutia. Naajuhuj, cante Pueyaso pueya jiitianani, nojuaja cuara jiitiaara Pueyaso pueya nojoriicua na tacaaniutia. Cante taraatia miishano pueya naacujuani, nojuaja cuara shuquiriaatia na naacuuranoj.

Pueyaso tojjiaca nia quiri, taa Pablo rootaacuajani

⁹ Seetanujuanaa panitioojuaca nia quiri. Puetunu sesa casaajanaa soojea nia quiri. Majaari maninia miiniu nia tarinitianu cutara. ¹⁰ Jiyanhua panitioojuaca nia quiri, taa nia paniquiaa nia tarajanucuaani. Niarta Pueyaso muerasu nia jiyatere juhua socua maninia pueya niajanijajiniji. Majaari nojori nia rerequetenu.

¹¹ Tama nia cuaqueyajaaja nia cumaquiri maninia nia poonijionura pa Jiyaniijiara. Majaari taajecori nia quiniu.

¹² Shuquiriaatia nia quiri pueyaracaanu, nia niishishacari taa Pueyaso miiniutianiya jiyanhua maninia na muerasuni. Saaja juhuajaniya nia rejeretare niaa jaara naquiya miishaare. Pueyaracaanu Pueyaso nia secojore. Majaari quenaaja nia tarinitianu na secojonu.

¹³ Niarta Pueyaso pueya jaara na panishano jiitiaaquiri, nareja nia niquitiore nojori nia jiitiasanojiniji. Naacujitij, nojori jaara rucoonaa quiri, nojori nia masuure nia tiacora.

¹⁴ Níaa jaara naquíya miishaaríquia, majaari nia miitianaa nia sesacanu. Saaja nia secojore Pueyaso nojoriicuara, Pueyaso taraajenura nojoriicua.

¹⁵ Cante shuquíriaatia quiyacuaani, nojoritia nia shuquíririjihuaaj. Saniniuuja, cante nujuqueyacuaani, nojoritia nia nujuquerejuhuaaj.

¹⁶ Jiyanoootioojuaca nia quiríquia, jatiqui nia quiniuria maninia. Majaari tama nia cuaqueyajaaja nia jiyatenu juhua socua maninia quijiaca pueya tamasacajiniji. Majaari pueya rerequeteja nia quiniu. Saniniuuja, tama nia cuaqueyajaaja nia mueyashitiri cutara, maninia nia rupuenura paniyaquishoo pueyajuhuaaj. Majaari tama nia cuaqueyajaaja nia jiyatenu juhua socua niishijiaca pueya nia quiniuria tamasacajiniji.

¹⁷ Níaa jaara sesa miishaaríquia, majaari nia paraa nia naminiu saniniuuja. Puetunu nia miishanojuanaa cuara quiiria maninia puetunu pueya níquiarajanaa. ¹⁸ Maninia nia quiri puetunu pueyatajanaa, majaari nojori ruutaquenu niaacuara. ¹⁹ Socua cua tojitiare cua panishano cuarta Pueyaso pueyanaa. Níaa jaara sesa miishaaríquia, majaari nojori nia naminiu. Juhujaniya nia rejeretare saaja. Pueyasocuajaari niaacua naminiutianiya nojori. Pueyaso sequesano cuajaari naa naajiotasano quíya na rupaajinia:

“Quiria nia tarinitiare puetunu sesa nojori miishanojuanaa niajaniya. Janiyacuajaari nojori naminiutianiya niaacuani”.

Cua tojiri. Pueyasojunaacuajaari naa sequequiaari. ²⁰ Naaratej pueyanaa, majaari nia paraca nia naminiu. Saaja maninia nia miiri nojori taa tariucuacaanu Pueyaso Rupaajinia naajiotasaaquiaaricujani. Naa sequeyari:

“Quia paraca jaara miaajeya, quia miaqueterenoj. Jaara jiyamueyajuhuaaj, quia raatorenoj. Quíaa jaara naa na miiritij, tama nojuajaaríjia jiyanohua caririquiniutianiya noojiajinia”.

²¹ Naacuajitij, níaa jaara sesa miishaaríquia, majaari nia juaaniu, níaa mariqui sesa miijiara quiriijaariuhuaaj. Saaja maninia nia miiríquia nia paraca. Naacuajitij, niaari Sesaaca shocotanutaniya.

13

Pa jiya jiyaniijianucua tojijiaca pa quirij

¹ Pueyanaa, mijiria nia jiyaniijianucua tojitiajaca nia quiri. Nojoricuajaari Pueyaso jiyatesano, nia jiya jiyaniijianucua nojori quiniuria. Majaari pueyano na naata jiyatesaanu jiyaniijia na quiniuria, Pueyaso jaara paniyaquiri.

² Naacuaajitij, cante mijiria jiyaniijianucua tojiyashijiani, nojuajaari jiyaniijiara Pueyaso jiyatesano tojiyashijia. Cante naa mijiria jiyaniijianucua tojiyashijiani, nojuajaari saniitiosaanutaniya. ³ Paa jaara maninia miijiaca quirini, ¿paatucua casaara pa jiyaniijianucua puereriquiani? Jiyaniijianucuaari maja na pueretenu maninia miijiaca. Sesa miijiaca cuaara na puereera cutara, sesa miijiaca nojori quiniuucua. Saaja maninia miijiaca nia quiri. Naacuaajitij, nia jiyaniijianucuaari maninia poojotanutaniya niajanijajiniji. ⁴ Nojoricuaajaari Pueyasora poonijionaa, maninia nojori jitianura niajanija. Saniniuujia, niaa jaara sesa miiri, nia puerere cutara. Jiyaniijianucua pueyari maja najuhuanaj. Nojoricuaajaari jiyaniijianucua cumaacaraca, sesa miijiaca nojori saniitionura. ⁵ Naacuaajitij, nia jiyaniijianucua tojjijia nia quiri maja nia saniitiosaanura, naajuhuaaj, maja Pueyaso tojiyashijia nia quiniuria. ⁶ Naajuhuaaj, nia cumaneecajiniji nia niqutiore nia jiyaniijianucua, taa nojori sequequiaa nia niqutionuracuajani. Nojoricuaajaari Pueyasora poonijioquiaa pueyaracaanu, maninia nojori jiitianura niajanija. Naaratej, nojoriiri cumaneeca masequiaa niajanijajiniji.

⁷ Naaratej, puetunu nojorijianaa nia niqutiore, taa nojori sequequiaa nia niqutionuracuajani. Naacuaajitij, niaa jaara sequesaa nia cumaneecajiniji nia niqutionura nia jiya jiyaniijiara, nareja nia niqutiore. Naajuhuaaj, cumaneeca jaara jiya jiyaniijiara masenu cojiritiasaare, casami nia masesacari, majaari nia juaaniu. Naajuhuaaj, majaari nia jiyaniijia nia sesacanu, jiyaniijianucua nia jiyatesano pueyano. Majaari nojori nia rerequetenu. Naajuhuaaj, nia jiyaniijianucua tojjijia nia quiri, nojori quiniuucua Pueyaso jiyatesano nia jiyaniijianucua.

⁸ Pueyanaa, majaari najuhuaana casami nia poonu, niaa jaara cumaneecaaju quiri. Saniniuujia pueyanaa, maja cutaraari niarta pueya paniniu nia puecanu. Pueyaracaanu nojori panijia nia quiri cutara. Naacuaajitij, cante narta pueya panijiani, nojuajaari Moisés Rootasano tojjijia cutara. ⁹ Supuetana Moiséscaajaari naa naajiotaquiaari puera, Pueyaso sequesano nojuaja:

“Maja niyacaraca maaji numuetucunu. Maja pueyano monu. Maja nohuasejonu. Maja tamasaca jiitiasano casamicua jiaatiaja nia quiniu”.

Socua queraatia na rootasanoori quiya. Niocuaajaari socua pa tojishocoriquiano na rootasano:

“Quiarta pueyano panijia quia quiri, taa quia paniya tama quia cuaqueyacaani”.

Paa jaara saaja nio Moisés rootasano tojjijia quirini, paari tari puetunu na rootasanojuanaa tojjijia quiyani. ¹⁰ Cante see-tanujuanaa pueyano panijiani, nojuajaari maja sesa na mi-iniu narta pueyano. Naaratej, paa jaara panijia quiriquiani, paari puetunu Moisés Rootasano tojjijia cutarani.

¹¹ Pueyanaa, nio nia niishiri. Pa Jiyaniijia rijionu juuca pajaniyari tari quenaacoya. Cuno juucaari quiar-ijia socua cateca quiya paa jaara nocua tiuquiaarini. Naaratej, cante juhua maqueyajaani, nojuaja cuara niucuaara, pa Jiyaniijiaara na poonijionura. ¹² Mijiria pa quishacari juhua ninishiqui. Paari juhua quera juhuaqueya tarini. Janiyari naa nia sequeyani, pa Jiyaniijiaari quera tiuquiuhua. Nojuaja cutaraari na cumaacata pa cuhuatanu-taniya. Naaratej, puetunu sesa pa miiniujianaa pa cartere. Majaari juhua ninishiqui quijiaca pa quiniu socua. Taa pueya cushiquiaa na toque tariquiicuaaji na poonijionuracuaani, naa nia cushiri Pueyaso cumaacajuhuj. Naa nia miiritij, nera nia poonijionura, puetunu mijiria sesa casaajanaa rejeretajaca nia quiniuriajuhuaj. ¹³ Seetanujuanaa juhua Pueyaso pueya nia quiri. Majaari juhua ninishiqui quijiaca pueya nia quiniu. Niaacuajaari cuhushiqui quijiaca. Naaratej, majaari mashaasequenujuaca nia quiniu. Majaari nia queranacunuunu, cararaatia casaa nia miiniuria. Majaari nia camishoo maaji numuetucunuucua jiaatiajaca nia quiniu. Majaari sacuaraatia casaa miiniuucua nia jitiiniu. Majaari juayonuujutajaca nia quiniujiuhuj. Naajuhuj, majaari tamonu pueyano jii-tiasano casaacua nia jiaatianu. Naajuhuj, majaari nia juaaniu tamonu jaara nia shocotare. ¹⁴ Naacuajiti pueyanaa, majaari nia niishiriojonu nia cuaqueya nia shuquiritiniuria taa nia paniya sacuaraatia nia miiniuriacuajani. Saniniuujia, maninia cutaraari Jiyaniijia Jesucristo niishitiaja nia jii-tianura, na cumaacanio. Naa nia miishacaritij, niaari juhua soldadohua miaquetoojotaja toque cushiyojua, maja Sesaaca miitiniuria sesa niajaniya.

14

Maja quarta Pueyaso pueyacuara nia rimiaaquenu sacuaraatia

¹ Pueyaso pueyajinijinio pueyano jaara Pueyaso rootasanojiniji taacanuujua quiriquia pueyaracaanu, naajaa, na rupuejaca nia quiri. Majaari nata nia juayonuujutatanu tamaatia na niishiriojosacari Pueyaso rootasanojiniji. ² Naacuajitij, Pueyaso rootasano niishijia nia quishacari cutara, niaa naasucuaari niishiya nia naata puetunu miaquesanojuanaa miaquenu cutara. Saniniuujia,

cante Pueyaso rootasanojiniji taacanuujuaani, nojuaja naasucuaari jiyaniya na naata saaja na natau miaquenu, na shuquiritiniuria Pueyaso. ³ Cante puetunu casaajanaa miaqueja cutarani, nojuaja cuaara soyaquiiria narta Pueyaso pueyano, cante na miaquesano miaqueyashijia saniniunijia. Naajuhuj, cante puetunu casaajanaa miaqueyashijiani, nojuaja cuaara sesacaquiiria puetunu casaa miaquejacajanaa. Cuno pojori, shu miaquejaca cutarani, nojoricuajaari Pueyaso jiyatesano na muerasu nojori quiniuriajuhuaj. ⁴ ¿Canteeri pajaniyani, tamonu pueyanora poonijionaa pueya sesacaja pa quiniuriani? Tama nojori camarnucuajaari nojori sequenutaniya, nojori miishanote maninia, sesa soj. Naajuhuj, pa Jiyaniijia Jesucristocuajaari cumaacaraca, na muerasu na jiyatenura maninia quijiaca nojori quiniuria.

⁵ Cua tojiri pueyanaa, noojiaqueya Pueyaso muerasujini-jinioori niquiriyatu juuca seamaanajiniji jiyatequiaa nojori maniniuhuaqueetanura Pueyaso. Tamasacaari saniniuujia sequequiaa, puetunu juucajanaanaari maninia, Pueyaso pa maniniuhuaqueetanura. Puetunu nijaniyajanaa cuaara taacanuyaquiiria tama nia miishanojinijijiaaja, maja nia macuhuajetenura nioojia. ⁶ Cante niquiriyatu juuca seamaanajinia jiyatequiaa samaatenu juucara Pueyaso na maniniuhuaqueetanurani, maniniacuajaari. Nojuajaari naa miiquiaa Pueyaso na shuquiritiniuria. Naajuhuj, cante puetunu casaa miaquejajanaani, maniniacuajaari. Pueyaso na shuquiritiniuria, nojuajaari na miaquequiaa nocuara na secojonu nuhuaji. Naajuhuj, cante shu miaqueyaquijia Pueyaso na shuquiritiniuriani, cuaara naa miiria. Nojuajaari Pueyaso shuquiritiyajuhuj na secojosacari Pueyaso, na natau na miaquenura.

⁷ Seetanujuanaa pueyanaa, majaari pa quiniu tama pajaniyarajaaja. Naajuhuj, majaari quenaaja pa shaajenu tama pajaniyarajaaja. ⁸ Paa jaara mijiria quiyani, paari pa Jiyaniijiaara rishiquiaani. Paa jaara cusoyareni, paari pa Jiyaniijiaara cusoqueeni. Naaratej, paa jaara saminio quiyajaani, naajuhuj, paa jaara tariucua macu quiyani, paari pa Jiyaniijia jiiiasanoni. ⁹ Jesucristocuajaari cunora cusoquiaari, macunucua Jiyaniijia na quiniuria. Nojuajaari samiitiaquiaariuhua saminiucua Jiyaniijia na quiniuriajuhuaj. Naacuajitij, nojuajaari pa Jiyaniijiajanaa cutara.

¹⁰ Naaratej, saaja niquiriyatu Jiyaniijia pa jiiiasacari, ¿paatucua casaara parta Pueyaso muerasu soojeaca quirini, nojori miaqueyaquiniuucua shuni? Naajuhuj, ¿paatucua casaara parta Pueyaso pueya sesacajaca quirini, nojori

miaquenuucua puetunu casaajanaani? Nia niishiri pueyanaa. Puetunu pajaniyajanaari nujuatejosaanutaniya Pueyaso tacojini, Pueyaso nequesoreenura pajaniya. ¹¹ Tariucuacaanu pa Jiyaniijia sequesanoori naa naajiotasano quiya na rupaajinia:

“Seetanujuanaa sequeyanijia, puetunu pueyajanaari cucuara mojuquetaconutaniya, nojori niishishacari janiyari seetanujuanaa Jiyaniijiajanaa cutarani. Puetunu nojorijianaari sequenutaniya: ‘Jiyaniijianaa, quiaari Pueyasोजनाa cutara! Puetunu quia miishanojuanaari maninia’ ”.

¹² Naacuajitij, paari niishiyani, puetunu pajaniyajanaari Pueyaso rihuanenutaniya tamajaajani, na nequesoreesacari pajaniya.

Maja sesa pa miitiniu parta Pueyaso pueya

¹³ Naacuajitij cuarta Pueyaso pueyanaa, maja cumaati pa sesacatoonu, paa jaara tamaatia miiniu niishijiaca quiri parta Pueyaso pueyajiniji saniniunijia. Tama nia cuaqueyajaaja nia cojuare maja niarta Pueyaso pueya niqiuara nia miiniuria nojori jiyaniishano sesa casa. Nojori jaara saniri miiniu nia miishanocuaa, naacuajitij, niaari tari sesa miitirii nojori Pueyaso niqiuara. ¹⁴ Janiyacuajaari niishiyani, majaari quenaaja tamonu sumatuu quiniu pa miaquesacari sesa miijiacara na jiyatenura pajaniya Pueyaso niqiuara. Janiyari naa niishiyani cua Jiyaniijia Jesu rupaacua tiuujia cua quiniuucua. Saniniuujia, cante jiyaniyanijia tamonu sumatuu na naata na jiyatenu sesa miijiaara nojuaja jaara na miaquere, nojuaja cuara miaqueyaquirianoj. Jaara na pueresano saniri miaquenu, nojuajaari tama noojiaajaaja macuhujanutaniya. ¹⁵ Naacuajitij, paa jaara parta Pueyaso pueyano macuhujetere pa miaquenuucua na miaqueyaquishoo casaani, majaari seetanujuanaa parta Pueyaso pueyano panijia pa quiniu. Jesucristocuajaari tama na cuaqueyajaaja panitiaquiaari nocuaji na ritianura Sesaaca. ¿Paateeri na sesonutaniya saniniunijia, na miaquesoo casa pa miaquesacari na niqiuarani? ¹⁶ Naacuajitij, majaari nia shanacunu Pueyaso tojiyashijiaca pueya sesacatura Pueyaso rupaa, nia miaquesano casaacua nia juayonuujutanuucua niarta Pueyaso pueyata. ¹⁷ Seetanujuanaa nia sequeyanijia, majaari Pueyaso muerasu pa quiniu casa pa miaqueyaquiniuucua, casa pa ratuyaquiniuucuanio. Pueyaso muerasu pa quishacari, nojuaja cutaraari paniya maninia miijiacara pa quiniuria, jatiqui pa quiniuria juhuananiya. Pa panitiaajaariuhua shuquiriaatia quiijiacara pa quiniuria. Paacuajaari na Sohuanu jiitiaani, naa maninia pa

quiniuria. ¹⁸ Paa jaara naa quijiaca quiriquiani Cristora pa poonijosacari, Pueyasoori pa shuquiritiaa. Naacujitij, Pueyaso tojiyashijiaca pueyari maja na rerequetenu quiniutianiya pajaniya.

¹⁹ Naarate cuarta Pueyaso pueyanaa, jiyanohua nia saniniujiuri taate nia naata maninia rupuetosano quiniu puetunu niarta Pueyaso pueyatajanaani. Naacujiti nia naata tama cumaquitioonujuaaja maninia Pueyaso muerasu nia quiniuria. ²⁰ Majaari nia sesonu Pueyaso miishano niarta Pueyaso pueya jiuujiajania, saaja nia miaquenuucua nojori niqiara nojori pueresano casaa. Seetanujanaa, Pueyasora, puetunu miaquesano casaajanaari maninia pa miaquesocoriqiano. Saniniuujia, tama nia cuaqueyajaaja nia cojuare cutara, maja niarta Pueyaso pueya niqiara nia miaquenura nojori miakesoo casaa, niaa mariqui nojori cushitioreeri. Naacujitij, majaari nia naata maninia rupuetosano quiniu niaa jaara nia miishanota taraajoriquia niarta Pueyaso pueya. ²¹ Naacujitij, socua maninia juhuari maja pa miaquenura parta Pueyaso pueya pueresano casaa. Naajuhuj, majaari pa ratunu jereeca mashaca nojori niqiara, cuno naa pa miishano jaara quiri nojori shiniujiuniuria sesa nojori miiniuria. Naajuhuj, pa cartere puetunu parta Pueyaso pueya jyanishano sesa miiniu casaajanaa, maja nojori pa taraajonura nojori ruparetanura pocuaji. ²² Naacujitij, Pueyaso Rupaacua nia tiuushacari seetanujanaa, niaa jaara niishiya nia miishanoori maja sesa, tamajaaja nia miirioj saaja Pueyaso niqiara. Shuquiriaatia quijia cutaraari noo pueyano, cante niishiyani na miishocoriqiano casaari maninia Pueyasora, maja noojia na macuhujetenura na miiniu nuhuaji. ²³ Saniniuujia, cante niishiriojiyani na miaquenu panishano casaa naasucuaari sesa quiniutianiya Pueyasora, jaara naa niishiriojiya, seetanujanaa naa sesa quiniutianiyari taa na niishiriojiyacujani. Paa jaara casaa miaquere seetanujanaa pa tiuyaquiniutia Pueyasocuaani, pa miaquesacari, paari tari sesa miirii Pueyaso niqiarani. Seetanujanaa, puetunu pa miishanojuanaari sesa, paa jaara pa taacanunuta na miiriquiani. Naaratej poojiaari macuhujenutaniya.

15

Parta Pueyaso pueya pa shuqiritiri, maja tama pa cuaqueyajaaja

¹ Noojiaqueya parta Pueyaso muerasuuri juhuanajuaja seetanujanaa Pueyaso Rupaacua tiuyashijiaca. Naacujitij cuarta Pueyaso pueyanaa, pajaniya, cante tari seetanu-

juanaa Pueyaso Rupaa tojjiacacuaani, pajaniya cuaara nojori rejeretaara juhuajaniya. Paa jaara socua Pueyaso Rupaa niishijiacacuaani, nojori pa cumaquiri. Majaari pa niishiriojonu tama pa cuaqueyajaaja pa shuquiritiniuria tamaajaaja. ² Puetunu pajaniyajanaa cuaara niishiriojooora taate pa naata parta Pueyaso pueyano cumaquiniuni, shuquiriaatia na quiniuria, maninia Pueyaso tojjia na quiniuriajuhuaj. ³ Paacuajaari niishiyani, majaari quenaaja pa Jiyaniijia Jesucristo niishiriojonu quijia tama na cuaqueyajaaja na shuquiritiniuria. Saniniuujia, nojuaja cutaraari taraatia miiniu rejeretaquiaari na rupuenura mijiria quiniaa pueya, nojori na jaariutianura Sesaaca. Naacuajitij, nojuajaari nio tariucuacaanu tama nojuajiniijiaaja naajiotasano tohuateequiaari:

“Cua Quenaa, cuno pojori, canapuate quia sesacajacani, nojori cuia sesacajuahuaj, cua miiniuucua quia panishano”.

⁴ Seetanujuanaari pueyanaa, puetunu tariucuacaanu Pueyaso Rupaajinia naajiotasanojuanaani, cunoori pajaniyara naajiotasaaquiaari. Cunoori pa niishitiojiya maninia pa rejeretanura puetunu sesa casaajanaa. Pa cumanijiaajaarihuaj. Naacuajitij, paari juhuajaniya sashiya pa Jiyaniijiani. ⁵ Pueyasocuaajaari pa cumaquina, maninia rejeretajaca pa quiniuria, cumanijasano pa quiniuriajuhuaj. Nojuaja cuaara nia jiyateera jiyanoojiaca nia quiniuria taa Cristo quiquiaari jiyanoojiacuaani, rupuetoojuaca nia quiniuria niarta Pueyaso pueyata. ⁶ Naacuajitij nia naata pa Que Pueyaso, mariyata pa Jiyaniijia Jesucristo maniniuuhuaqueetanu, juhua niquiriyatu pueyano, maninia rupuetoojuaca nia quishacari.

Pueyaso rupaari maja saaja Judiocuacara

⁷ Pueyanaa, jiyanootiojuaca nia quiriquia, taa Jesucristo jiyanooquiaa pajaniyacuaani, maninia rupuetosano nia quiniuria. Naacuajitij, pueyari Pueyaso timitianutaniya nojori niquishacari Judiocuaca taucucata Pueyaso maniniuuhuaqueetaano jatiqiu. ⁸ Janiyari seetanujuanaa nia sequeyani, Cristoori mijiria niquiaari Judiocuacaacua, na tohuateenura Pueyaso sequesano nojori supuetanaa. Tariucuacaanu Pueyaso sequesanoori seetanujuanaa. Nojuajaari maja na sequesano na jatanu. ⁹ Judiocuacara Cristo miishanoori taucucara quiquiaarijiuhuaaj, nojori maniniuuhuaqueetanura Pueyaso, na jiyanooniucua nojoriujiuhuaaj. Tariucuacaanu Pueyaso Rupaajinia supuetana David naajiotasanoori naa quijajuahuaj:

“Maninia quia miiniuucua janiya Pueyasonaa, janiyari quia-janiyajiniji poojotanutaniya maniniani taucuaca jiyacajinia. Maninia quia miiniuucua janiya, janiyari quia timitianutaniya cua jaaquequejosanotani”.

¹⁰ Tamaqui Pueyaso Rupaajinia naa naajiotasanoori quiyajuhuj:

“Pueyaso niishiyashijiaca taucuacanaa, Pueyaso saquiriojosano pueya nia cojiri, mariyata jatiqui nia shuquiritianura pa Pueyaso”.

¹¹ Pueyaso Rupaajinia, supuetana David naajiotasanoori naa sequeyajuhuj:

“Pa Jiyaniijia Pueyaso nia maniniuhuaqueetare, puetunu niajaniyajanaa, tamaatia rupaaca pocujaca taucuacanaa. Pueyasora nia jaaquequenuure puetunu jiyacajinia quiniaa pueyajanaanaa, maninia na miiniuucua pajaniya”.

¹² Supuetana Isaías naajiotasanojinijijihuj, paari niishiyani Pueyasoori taucuaca jitianu panijia pueyaracaanu, maja saaja Judiocuaca. Naaratej, Isaíasri naa naajiotaquiaari:

“Supuetana Isaí niyanujiniji supuenutaniyari pueya Jiitiana. Nojuajaari puetunu mijiria quiniaajanaa jiyaniijia quiriquiano. Puetunu jiyacajininio taucuacajanaari nocua tiuujiaa quiniutianiya”.

¹³ Pueyasocuaajaari poojiajinia poonijiojua, juhuajaniya pa sashiniuria pueyaracaanu, nojuaja cuaara miirijaatijia puetunu na sequesanojuanaa pajaniyara. Pueyanaa, Pueyaso cuaara nia timitiiria jyanohua. Naajuhuj, nojuaja cuaara nia jiitiaara juhuajaniya, canapuate nocua tiuujiacacuajani. Naacuajitij, mijiria nia sashishacari, niaari shuquiriaatia rejeretajaca quiniutianiya Pueyaso Sohanu cumaquishacari niajaniya, seetanujuanaa nia niishishacari pa Jiyaniijiaari pa rijionuucua tacatenutaniuhua.

¹⁴ Cua panishano Pueyaso niqiuohuanaa, naa cua naajiojinia cua nacasusacari jyanohua niajaniyatej, majaari nia jyaniniu janiyari niaacuaji taacanuyajaani. Maja. Janiyacuajaari niaacua tiuyani niaacuajaari seetanujuanaa maninia quiijia. Niaacuajaari Pueyaso rupaa niishijiacajuhuj. Naacuajitij, nia naata tama nacasutoojonujuaaja maninia, maninia rupuetoojuaca nia quiniuria Pueyaso niqiuara. ¹⁵ Naajaa, quiarijia janiyari niaacuara naajiyani cua niishitiniuhuara niajaniya tarijia nia niishishano. Cua jyanootiuri, nio cua naajiojinia jyanohua cua nacasunucua niajaniya. Naa nia rootaanijia Pueyaso jiyatenuucua janiya Neyanu Jesucristo jiyaramiquishano, taucuaca cua

pohuatanura na rupaa. ¹⁶ Pueyaso jiyatenuucua janiya nera poonijionara, janiyari cunora Jesucristo rupaa pohuataquiaa taucuacani. Naacujitij, Pueyaso Sohuanu poonijionuucua nojori jiuujiajinia, nojoriiri Pueyaso shuquiritiasano muerasu quiniutianiyajuhuj.

¹⁷ Pueyasora cua poonijosacari, janiyari jiyanohua timitiaa Jesucristoni, cua niquishacari taa taucuaca tiuquiaa na rupaacuani. ¹⁸ Majaari cua timitianu tama cua miishanojuaaja. Janiya cutaraari Jesucristo miishano timitiaani. Nojuacuajaari taucuaca tiutuquiaa na rupaacua. Nojoriiri nocua tiuquiaa nojori niquiara cua pohuatasacari na rupaa, naajuhuj, Pueyaso Sohuanu cumaacata cua miiniuucua nojori niquiara. ¹⁹ Nojori niquishacari Pueyaso Sohuanu cumaacata cua miijosano, nojoriiri niishiquiaa cua pohuatasanoori seetanu rupaaajanaa.

Janiyari pocuaji Tacuna Jesucristojiniji tari pohuataquiaari puetunu tiquiyocuajanaani, Jerusalén tiacajiniji, puetunu Iliria jiyajiniarajanaanio. ²⁰ Naa cua pohuatasacari pa Jiyano Jesucristojiniji puetunu cuno jiyacajiniajanaatej, janiyari pueyaracaanu pohuataquiaari cuniquni, tee Jesucristojiniji tojiyaquishaaquiaari juhuanojuajacuajani. Majaari cua pohuatanu paniniu quiquiaari tee tamasaca pohuataquiaari tari Jesucristojinijini. ²¹ Naa cua pohuatasacari Jesucristojiniji cuno pueya niquiaratej, janiyari nio tariucuacaanu Pueyaso Rupaajinia naajiotasano tohuateeriquiaani. Naa sequeya Jesucristojinijiiri:

“Nojuajiniji pohuatasoojua pueyari nojuajiniji pohuataaanutaniya. Nojoriiri jiyacari niishiniutianiya cante nojuajani”.

Pablo naquerejosacari Roma tiacajiniara

²² Pueyaracaanu nio jiyacajinia cua pohuatasacari Jesucristojiniji, majaari jeya cua quiniu quiriquiaa nia niquiniuucua cua quianura. ²³ Quiaritia cutara, janiyari Jesucristojiniji pohuatanu tucuarucuaa tarini, tee Jesucristo rupaa tojiyaquishaaquiaari juhuanojuajacuajani. Janiyari Espania jiyajinia pohuatanu paniya Jesucristojinijijuhuj. Queraatia marijaari tari cua shocojocanu pueyaracaanu cua naquerejosacari niaacua cua quianura. ²⁴ Naacujitij, Espania jiyajiniara cua quiasacari, janiyacua nia tiacajinia jateemani. Janiya jaara pasaja camueenujusee niaata shuquiriatiani, na nuhuaji, janiyari paniniutianiyani nia naacunura janiya, cua quianura Espania jiyajiniara. ²⁵ Janiyari coteenu Jerusalén tiacajinia tacatenutaniuhua tii quiniaa parta Pueyaso muerasu cua niquitionuhuaa cumaneecani, niya quiniaa parta Pueyaso pueya niquitiojosano nojoriria.

²⁶ Puetunu parta Pueyaso pueya maapuejanaa Macedonia jiyajinia, mariyata niya Acaya jiyajiniani, nojoriiri jiyanoehua maninia miya. Nojoriiri tama niishiriojonuucanujuaaja nareja na cumaneeca niqutiojonura Jerusalén tiacajinia quiniaa casamiijiuniucua Pueyaso pueyara. Cunora, nojoriiri quiarjia na rerateya cuata na jiyarosocoriquiano. ²⁷ Nojoriiri naa miya nojori niishiriojosacari, maniniacuaaari nojori naacunura narta Pueyaso pueya. Seetanujuaana maniniacuaaari nojori miishano. Judiocuacaari maja na jamuenu quiquiaari Pueyaso rupaa pohuataasaanura taucuaca niquiara. Naaratej, taucuaca cuara saniniuujia quiarjia naacuura casamiijiuniucua Judiocuaca, nojori jiiitasano cumaneecata. ²⁸ Naacuajitij pueyanaa, janiyari nojori jiyarosocoriquiano cumaneeca niqutionutaniya Jerusalén tiacajinia parta Pueyaso pueya jiiitianaani. Na nuhuaji, janiyari Espania jiyajiniara quianutaniya cutarani. Cua quiasacari, janiyari nia tiacajinia tacanutaniyani cua niquniuria nianiya. ²⁹ Janiyari seetanujuaana niishiyani, Cristoori cua naacunutaniya maninia pa shuquiriniuria jatiqui, niaacua cua tiuquishacari.

³⁰ Cuarta Pueyaso pueyanaa, cua Jiyaniijia Jesucristo nia jiiitanuucujuhuj, mariyata Pueyaso Sohuanu panitiootesacari pajaniya, janiyari jiyanoehua paniyani nia cojiniuria janiya, Pueyaso nia secojonuta cucuara. ³¹ Cucuara nia secojore Pueyaso, na cojuanura janiya Jesucristo rupaa paraa Judiocuacaacuaji, Jerusalén tiacajinia cua quiasacari. Naajuhuj, nia secojore Pueyaso, Jerusalén tiacajinia quiniaa Pueyaso pueyacuara. Nojoriicuara nia secojore, nojori masenura shuquiriaatia narta Pueyaso pueya taucuaca jiyarosocoriquiano cumaneeca nojoriria. ³² Naajuhuj, quiria nia secojore, niaacua Pueyaso tiuquitiniuria shuquiriaatia janiya, nojuaja jaara naa paniri. Tii cua quishacari niaata, janiyacua tii samaatesee nia shuriucuni. ³³ Pa jiyanoojia Pueyaso cuara maninia jiiitaara puetunu nijaniyajanaa. Cuara naa quiiriatej.

16

Nata quiniaata Pablo saruhuatasacari nojori niishishano pueya

¹ Cuarta Pueyaso pueyanaa, nio maaji niaacua tiuquintianiyani, nojuajaari maninia maaji, Pueyaso tojijia. Na sesaari Febe. Nojuajaari Cencrea tiacajinia Pueyaso pueya maanu naacujua maninia. ² Pa Jiyaniijia panijiaca nia quishacari, nia paniniutia nia masuure nia tiacora nio parta

Pueyaso muerasu naacuna maaji. Niocua nia tiaco jitiarenoj, taa nia jiitiaquiaacuaa parta Pueyaso muerasuni, maninia na quiniuria na camueenujusacari nia tiacajinia. Nojuaja nia naacure maninia, puetunu na panishanotajanaa. Nojuajaari queraatia parta Pueyaso pueya naacujuacuaa. Cua naacujaajaariuhuj.

³ Quiria nia sarhuatare Priscila, neyaca Aquilano. Nojoriiri cua cojiniaa pa Jiyaniijia Jesucristora poonijionura.

⁴ Nojoriiri tama nojori cuaqueyajaaja panitiaquiaari cucuara, nojori tacunura cucuaji cua moyaquishaanura. Janiyari cunora jyanohua nojori timitiaani, naa nojori jyanootiuniuucua cucuatej. Majaari saa janiyaja nojori cua timitianu. Seetanujuanaa puetunu parta Pueyaso muerasu taucucacajinijinojuanaari nojori timitiaajuhuj, naa nojori miiniuucua.

⁵ Quiria nia sarhuatarejuhua parta Pueyaso pueya, noo pojori Priscila, Aquila tiajinia rerejoquiaa Pueyaso secojonuunuratej. Quiria nia sarhuatarejuhua cua rupuenta Epéneto.

Nojuajaari coteenujuanaa Jesucristoocua tiuquiaari Asia jiyajinia.

⁶ María nia sarhuatare quiriajuhuj. Nojuajaari jyanohua poonijioquiaari niaara.

⁷ Quiria nia sarhuatarejuhua Andrónico, Juniasnio. Nojoriiri cuarta Judiocuaca. Nojoriiri cuata nujuatejosaaquiaari nujuatejojuajinia, canaa pohuatanuucua Jesucristojiniji. Puetunu cuarta Jesucristo jiyaramiquishano pueyajanaari nojori panijiacajuhuj. Andrónico, Junias, nojoriiri socua coteenu janiyajiniji tiuquiaari Jesucristoocua.

⁸ Nia sarhuatarejuhua Ampliato. Nojuajaari cua panishano pueyano, Jesucristoocua na tiuuniuucua.

⁹ Naajuhuj, quiria nia sarhuatare Urbano. Nojuajaari pa Jiyaniijia Cristora poonijionajuhuj. Cua rupuenta Estaquis nia sarhuatarejuhuj.

¹⁰ Apeles nia sarhuatare quiriajuhuj. Nojuajaari puetunu casaajanaa rejeretaja cutara, Jesucristoocua tiuujia na quiniuucua.

Aristóbulo tiajinia quiniaa pueya nia sarhuatare quiriajuhuj.

¹¹ Naajuhuj, quiria nia sarhuatare Herodión, parta Judio pueyano. Naajuhuj, Narciso tiajinia quiniaa pueya nia sarhuatare quiria, noo pojori pa Jiyaniijiaacua tiuujia pueyatej.

¹² Trifena nia sarhuatare quiria, Trifosajuhuj. Cuno maajipohuari pa Jiyaniijia poonijionujuaca.

Naajuhuj, pa panishano maaji Pérsida nia sarhuatare quiria. Nojuajaari jyanohua poonijiojua pa Jiyaniijia.

¹³ Rufo nia sarhuatarejuhuj. Nojuajaari maninia tojijia pa Jiyaniijia. Na nucua nia sarhuatarejuhuj. Nojuajaari juhua cua nucua quiquiaari quiria.

¹⁴ Nio pojori quiria nia sarhuatarejuhuj, Asíncrito, Flegonte, Her-

mes, Patrobas, Hermasnio, mariyata nojoritia quiniaa parta Pueyaso pueyano. ¹⁵ Naajuhuj, nio pojori nia saruhuatatare quiria, Filólogo, necocua Julianio, Nereo, na rimiaturio, Olimpasjuhuaj, mariyata nojoritia quiniaa parta Pueyaso muerasunio.

¹⁶ Niarta Pueyaso pueya nia saruhuatatare seetanujuanaa nia paniniutia nojori. Puetunu niiquijinio parta Pueyaso pueya maapuejanaari cua sequecanuni cua saruhuataturia niajaniya.

¹⁷ Cuarta Pueyaso pueyanaa, nia numooteyanijia, jiyanojua nia cojuare tama nia cuaqueyajaaja najuhuaana tamaatia niishitiojonuujuaca pueyacuaji. Nojoriiri Pueyaso pueya maapue cushitiojoquiaa, sesa nojori niishitiojosanota. Naacuajitij, Pueyaso pueyari juaatiooquiaa. Majaari nojori niishitiojonu pueya taa coteenujuanaa nia niishitiojosaaquiaari seetanu rupaajanaa cutarani. Naa sesa niishitiojonuujuacaacuaji nia rupatere. ¹⁸ Nojoriiri maja seetanujuanaa na poonijionu pa Jiyaniijia Jesucristora. Nojoriiri poonijioquiaa tama nojori panishanojuaaja nojori masenura. Najuhuaana shanohua nojori pohuatatanota, nojoriiri niishiyashijiaca pueya sapojoquiaa. ¹⁹ Puetunu tamonu jiyacajinijinio parta Pueyaso pueyajanaari niishiya, niaari seetanujuanaa Jesucristo rupaa tojitiajaca cutara. Naaratej, janiyari jiyanojua nia timitiaani. Naajuhuj, janiyari paniani niishijiaca nia quiniuria, saaja seetanu rupaajanaa tojijiaca nia quiniuria, maninia miijiaca nia quiniurijuhuj. Saniniuujia, sesa niishitiojosano niishiyashijiaca nia quitiriquiani, maja sesa miijiaca nia quiniuria. ²⁰ Naacuajitij, poojia cajitijia Pueyasoori nia cumaquiniutianiya, Satanás nia shocotanura na sapojosacari niajaniya juucua. Niaari juhua na tanacunutianiya jiyocuara, Pueyaso tojijiaca nia quiniucua. Pa Jiyaniijia Jesu cuaara nia cumaquiiria, shuquiriaatia nia quiniuria.

²¹ Timoteo, cuata poonijiona Jesucristorani, nojuajaari cua sequeya nera cua saruhuataturia niajaniya. Cuarta Judiocuaca Lucio, Jasón, Sosípater, nojoriiri nia saruhuataturiajuhuaj.

²² Cuarta Pueyaso pueyanaa, janiyari Tercioni. Janiyari Pablora nio naajiyani, niaacua jiyarosocoriquiano. Janiyari nia saruhuataturiajuhuaj Cristoocua tiujia cua quishacarijuhuaj. Niojuanaa, pueyanaa.

²³ Parta Pueyaso pueyano Gayoori nia saruhuataturiajuhuaj. Nojuajaari na tiajinia cua quiniuria cua masuucanu. Nojuajaari puetunu parta Pueyaso pueyajanaa masuujua, na tiajinia nojori maquenura, nojori tiuquiiijosacari nio tiacajinia.

Parta Pueyaso pueyano Erastoori nia saruhuataajuhuj. Nojuajaari jiyatesaacanu nio tiacajinia jiyaniijia cumaneeca cojuana na quiniuria. Parta Pueyaso pueyano Cuartoori nia saruhuataajuhuj.

²⁴ Pa Jiyaniijia Jesucristo cuaara cumaquiiria puetunu nianijajanaa.

Pablo maniniuhuaqueetasacari Pueyaso, quera na tucutasacari na naajio

²⁵ ¡Pueyanaa, jiyanoehua pa maniniuhuaqueetare pa Pueyaso! Nojuajaari na naata cumaquiniu niajaniya, seetanujuanaa na muerasu nia quiniuria na rupaacua nia tiuushacari. Janiyari naa rootaquiaa niajanijacuajani, cua pohuatasacari Jesucristojiniji. Pueyasojuanaacuajaari tarijia cua niishitiquiaari Neyanu Jesucristojiniji cua pohuatanura. Jiya shipiniyaquishaacarijiyoyua, Pueyasoori jiyasohua tamajaaja na niishishano jiitiaja Neyanu Jesucristojiniji. ²⁶ Saniniuujia, quiari naataja, paari niishiquiaarini, Jesucristocuajaari mijiria niquiaari puetunu pueyajanaa na jaariuutianura Sesaaca. Tariucuacaanu Pueyaso sequesano caminiujiuniaa naajionuutasanojiniji paari quiarjia seetanujuanaa na niishiya cutarani. Pueyaracaanu Quijia Pueyasocuajaari naa paniquiaari quiarjia pa niishiniuria Neyanujiniji. Quiarjiani, Pueyasoori Neyanujiniji pohuataniquiaa puetunu jiyacajinijinio pueya niquiarajanaa, Neyanuucua nojori tiuuniuria. Naa na pohuataniquiaariiri Neyanu Jesu tojijiaca nojori quiniuria, Judiocuaca, taucuacanio.

²⁷ Pa Pueyasoori jiyanoehua niishijia cutara. ¡Pueyaracaanu pa maniniuhuaqueetare nojuaja, maninia na miiniuucua pajaniya, Neyanu Jesucristoocua pa tiuushacari! Cuaara naa shuquiritiasaaria pueyaracaanutej.

COTEENU PABLO NAAJIONEE CORINTO TIACAJINIA QUINIAA PUEYASO PUEYACUARA

Pablo saruhuatasacari Corinto pueya

¹⁻² Corinto tiacajinia quiniaa Pueyaso muerasunaa, ¿ni-
ate quiyajaa? Janiya, pa tarajanu Sóstenesjuhuaj, canaari
nia saruhuataani. Janiya Pablóni, Jesucristo jiyarosano
na rupaa cua pohanura taa Pueyaso paniquiaaricuajani.
Canaa niaacuara naajiyani, socua canaa niishitiojonura nia-
janiya, Pueyaso saquiriojosano pueya nia quiniuucua. Niaari
maninia quiya Pueyaso niquiara, Jesucristo nia rupuesacari.
Niaari seetanujuanaa Pueyaso muerasu, puetunu jiyacajinia
pueyatajanaa, canapue te Jesucristoocua tiuujiacacuajani. Je-
sucristocuajaari nojori Jiyaniijia, pa Jiyaniijiajuhuaj. ³ Pa
Que Pueyaso, pa Jiyaniijia Jesucristo cuaara cumaquiiria
niajaniya, juhuajaniya nia quiniuria.

Paari maninia miishaaquiaani Cristo pa rupuesacari

⁴ Maninia nia quiniuucua, janiyari pueyaracaanu
Pueyaso sequequiaani “Paacarasho”. Pueyasocuajaari
jiyanohua maninia miiquiaari niajaniya, nia rupuesacari
Jesucristo. ⁵ Nia rupuesacari Jesucristo, Pueyasoori
puetunu cumaquiiaarijianaa niajaniya na cumaacata,
nia poojotanura puetunu na rupaajanaa, puetunu
na rupaajanaa nia niishiniuriajuhuaj. ⁶ Maninia nia
tojittiasacari Cristojiniji pohanurano, niaari maninia
miishaaquiaari taa canaa sequequiaari niajanuyacuajani.
⁷ Naacuajitij, niaari tari masequiaari puetunu Pueyaso
niquitionu panishanojuanaa, maninia na muerasu nia
quiniuria, nocua nia jiaatianuta nia sashishacari pa
Jiyaniijia Jesucristo tiuquishacariuhua. ⁸ Pueyasoori
nia cumaquiniutianiya pueyaracaanu, maja quenaaja
niaacua casaa tiuutiasoo quiniuria, sesa nia miishanojiniji.
Naacuajitij, pa Jiyaniijia Jesucristo jaara tiuquiriohua na
ruuretajaca na saniitionura, niaa cutaraari juhuajaniya
quiniutianiya. ⁹ Pueyasocuajaari maninia tohuateequiaa
na sequesano. Nojuacuajaari pa sequequiaari pa cojinuria
Neyanu, maninia pa miishaanura Neyanutajuhua. Cuno
Neyanuni, nojuacuajaari pa Jiyaniijia Jesucristo.

Pueyaso muerasu juhua tamasa niqutioquiaari

¹⁰ Cuarta Jesuucua tiunianaana, cua tojitiare. Pa Jiyaniijia
Jesucristoori cua sequeteya nio. Maninia nia niishiriojore.

Maja juhua tamasaca nia niqutioonu. Maja tamasaca niajaniya. Maninia nia niishiriojore, maja tamaatia. Nia jiuujiaatioorejuhuaj. ¹¹ Naa nia sequeyanijia cuarta Jesuucua tiuniaanaa, Cloe niqiohua pohuatanuucua janiya niajanijini. Nojoriiri cua sequerucuaa niaana juayonuujutaquiaa. ¹² Naa pohuatasaarucuaa niajanijini: puetunu pueyjanaana tama sequequiaaja: “Canaari Pablo pueyani”. Tamascanaari saniniuujia sequequiaacujua: “Canaari Apolo pueyani”. Tamascanaari sequequiaajaacuhaj: “Canaari Pedro pueyani”. Tamascanaari sequequiaajuhaj: “Canaari Cristo pueyani”. ¿Naatee pueyanaa? ¿Casaara tamajaaja naa nia raqitiiquianuni? ¹³ ¿Majateeri nia niishiniu? Paari Jesucristo cuaqueyani. ¿Pa Jiyaniija cuaqueyateeri neequeresetanocuaa? ¿Janiyateeri niaacuara cusoquiaari niyacutesanojiniani, cua pueya nia quiniuria? ¿Niaateeri cua sesajinia tiuquinijosaaquiaari mojiniajuhuaj? ¡Maja, cuarta Pueyaso pueyanaa! ¹⁴ Janiyaquiiri namitia nia tiuquinijiaquiaari mojiniani. Naacuajitij, majaari nia naata sequenu niaa cua sesajinia tiuquinijosaaquiaari. Janiyari niishiya cutarani, janiyari saaja Crispo tiuquiniquiaarini, Gayonio. ¹⁵ Naacuajitij, majaari quenaaja tamonu na naata sequenu janiyari na tiuquiniquiaarini. ¹⁶ Quera niyajetaanijia. Janiyari Estéfanos tiuquinijioquiaarijuhua necohuatajani. Majaruhua socua pueya cua tiuquinijionu quiquiaari.

¹⁷ Jesucristoori maja na jiyaronu quiquiaari janiya pueya cua tiuquinijionura. Cristo cutaraari cua jiyaroquiaari na rupaa cua pohuatanura. Majaari cua maniniushitiniu na rupaa cua pohuatasacari, pueya mariqui shanohua cua pohuatasanoocua tiuuri najuhuaanaari. Cuaara tiuutiuria cutara Jesucristoocua, na miiniuucua maninia pocuara. Pueyasoori pa jiyanoocua saaja Jesucristo cusonuucua niyacutesanojinia pocuara.

Cristoori Pueyaso cumaaca jiitiaa, Pueyaso niishitiajuhuaj

¹⁸ Canaa pohuatasano Cristo cusonujiniji niyacutesanojinia pocuarani, cunoori juhua mosanucua pohuatasano shaajecoriquiano pueyara. Naajaa, Jesucristo rupaari Pueyaso cumaacaracacua na tojitianaara, Pueyaso muerasura na jataniniuria pajaniya. ¹⁹ Pueyaso sequesanoocua nia naajiotasaaquiaaritia:

“Janiyari niishijaca niishishano cushitionutaniyani. Mijiria pueya niishishano jiyatenutaniya najuhuanaranijia”.

Naacuaajitij, cante mijiria pueya niishishanoocua tiuyani, no-juajaari maja na jiyanooshaanu quiniutianiya.

²⁰ ¿Pueyanoteeri jiyanoohua niishitiajaraca Pueyaso muera-sura na jataniniuria pajaniya? ¡Maja! Niishijiajanaa jaara jiyanoohua niishiriojore, ¿pa naatate na sequesanoocua tiu-niu, Pueyaso na jiyanootiniuria pajaniya? Maja. ¿Niishitiojona rootasanote na naata Pueyaso pueyara jiyatenu pajaniya nocua pa tiushacari? Maja. Naacuaajitij, puetunu mijiria niishishanojuanaari najuhuana quiya Pueyasora. ²¹ Pueyari maja na naata Pueyaso niishiniu quiquiaari tama nojori niishitiajataaja. Pueyasoori tama sequequiaarijiaaja na niishitiajata cutara:

“Jaaja. Maninia naatej. Pueya jiyanooriiria saaja nojori tiushacari cua Nyanuucua”.

Pueyari saniniuujia jiyaniya Jesucristo rupaari nareja sequesanojuhanajaj, tojishoo. ²²⁻²³ Naaratej, cuarta Judiocuacaari maja Jesucristoocua tiuniaara na quiniu ritia. Nojoriiri Pueyaso cumaacata miishano niquiniu paniquiaa coteenu saaja. Cunora, nojoriiri canaa tojitiaaquiuaa canaa pahuatasacari Jesucristo mosaanujiniji niyacutesanojinia teetesano. Nojoriiri saaja sequequiaa: “¿Pa Jiyaniijaranotucua casaara naa cararaatia mosaareni?” Griego pueyari naajuhuj. Majaari ritia nojori quiniu paniniu Jesucristoocua tiuniaara. Nojoriiri saaja niishiniuucua jiaatiajaca. Nojoriiri jiyaniya Jesucristoori najuhuana cusoquiaari juhua moseca. Naacuaajitij, canaa pahuatasacari Jesucristo niyacutesanojinia mosaaquiaari, Judiocuacaari jiyaniya Jesucristoori cumaacaju quiquiaari. Nojoriiri jiyaniyajuhuj Pueyaso Jiyarosocoriquianoori ritia Judiocuaca jiyaniijara quiniutianiya cutara. Majaari na niishitiuniu quijia Cristo cuaara coteenu miishaaria naquiya, jiyanooshano nojori quiniuria sesa nojori miijiosanojiniji. Griego pueyari canaa pahuatasano tojiyaquiuaajuhuj. Nojoriiri jiyaniya Pueyasoori niishiyashijia quiquiaari Neyanu na motenura. ²⁴ Paa cutaraari niishiyani Cristoori pocuara cusoquiaari. Naacuaajitij, Pueyasoori cumaacaraca cutara na saquiriojosano pueya na jaariutianura Sesaaca, na muerasura na jataniniuria pajaniya, Judiocuaca, Griegohuanio. ¡Pueyasoori jiyanoohua niishijia cutara! ²⁵ Pueyari jiyaniya Pueyasoori niishiyashijia quiquiaari. Cunora Neyanu cusojuaquiaari niyacutesanojiniaari. Naajaa, naacuaajiti Pueyasoori pa jiyanoocuaari. Pueyasoori jiyanoohua socua niishijia cutara mijiria niishijiacajiniji. Pueyari jiyaniyajuhuj, Pueyasoori cumueecaaju quiquiaari Cristo cusosacari niyacutesanojinia. Naajaa, naacuaajitij,

¡Cristoori Sesaaca shocotaquiaaricuaaja! Pueyasoori jiyanoehua socua cumueeca pajaniyajiniji.

²⁶ Cuarta Jesuucua tiuuniaanaa, niaacuajaari niishiya taamueca pueya nia quiquiaari pueya niquiarani, Pueyaso sequesacari niajaniya na muerasu nia quiniuria. Saaja secaja niajaniyajinijinoori niishijiaca quiriquiaa. Saaja secaja niajaniyajinijinoori tojishano pueya quiriquiaajuhua. Saaja secaja niajaniyajinijinoori jiyaniijianucua niquihuacuaajinio supueno quiriquiaa.

²⁷ Mijiria quiniaa pueyara, Pueyasoori socua niishiyashijiaca pueya saquiriojoquiaari, na muerasu nojori quiniuria. Naacuajitij, mijiria niishijiacaari tamajaaja caririquiniutianiya nojori jaara saquiriojiyaquishaare. Pueyasoori tojishoo pueya saquiriojoquiaarijihuhua, na muerasu nojori quiniuria, mijiria tojishano pueya caririquiniuria nojori jaara saquiriojiyaquishaare.

²⁸ Pueyasoori soosano pueya saquiriojoquiaarijihuhua, tojishoo pueyanio. Pueyasoori naa saquiriojoquiaari najuhuaana quijiaca. Canapujete tama na cuaqueyajaaja jiyaniya cutara pueyanoni, cuno pojoriiri saniniuujia quejoosaanutaniya.

²⁹ Naacuajitij, majaari quenaaja jiyanoehua pocuaja cureenu quiniutianiya Pueyaso niquiara. Tojetaarucujanaa shaaquiiri pocuajaca quiniutianiya. ³⁰ Pueyasojuanaacuajaari nia rupuetequiaari Jesucristo. Naacuajitij, niaari Pueyaso niishitiaja jiiitia. Nia rupuesacari Jesucristo, niaari maninia miiija quiya Pueyasora. Pueyasoori nia jataniya saa na tojijiacaraja nia quiniuria, juhua Neyanu nia quiniuriajuhua. Niajaniyari puetunu jecasaanutaniyajanaa. Paari naa miishiyani Jesucristo pa rupuesacari. ³¹ Seetanujuanaari nio sequesano tariucuacaanu Pueyaso Rupaajiniji:

“Cante shuquiriaatia quiniu paniyani, nojuaja cuara shuquiritiaara pa Jiyaniijia”.

2

Jesucristo mosaanujiniji pohuatasano

¹ Cuarta Jesuucua tiuuniaa pueyanaa, janiya jaara niaacua tiuquiquiaarini, niaacuajaari niishiya taa cua pohuataquiaari Pueyasojiniji Jesucristo rupaa niajaniyani. Majaari jiyajeneta cua pohuatanu quiquiaari niishijiaca niishishano rupaacata. Cua pohuatasanoori niishishaatia quiquiaariija, maja juhua cutara pueyano pohuatasano. Janiyari jacaria pohuataquiaari Pueyaso rupaa niajaniyani.

² Janiyari tari tama sequequiaariijaanija: “Janiyari saaja Jesucristojiniji pohuatanu paniya Corinto pueya niquiarani,

naajuhuaaj, taa na cusoquiaari pocuara niyacutesanojini-ani". ³ Cua pohuatasacari Jesucristo rupaa nia niquiara, janiyari sasaca quiriquiaa cua puerenutani. Janiyari tete-cariquiaani. ⁴ Majaari cua paniniu quiquiaari cua tiu-tiniuria nijaniya Jesucristoocua tama cua niishitajatajaaja. Naaratej, majaari cua pohuatasano quiniu quiquiaari juhua shanohua pohuataja sequesano. Naacujitij, cua pohu-atasacari Jesucristo rupaa nia niquiara, Pueyaso Sohuanu cutaraari nioojiaajinia poonijioquiaari Pueyaso cumaacata cutara. ⁵ Naacujitij, niaari Jesucristoocua tiuquiaari Pueyaso cumaaca miishacari maninia nioojiaajinia. Maja cu-taraari nia tiuuniu quiquiaari saaja pueya niishishanoocua.

Pueyaso Sohuanucujaari pa niishitiya Pueyaso

⁶ Naajaa, canapueete Pueyasoocua tiuujia seetanujuanaa cutarani, nojoriiri niishiya canaa pohuatasano Jesucristojini-jiiri seetanu niishishanojuanaa cutara. Nio niishishanoori maja saa pueya niishishanojua. Maja mijiria jiyaniijianucua niishishano. Mijiria niishijiacaari shaajeconutaniya. No-jori niishishanoori najuhuaana quiniutianiya. ⁷ Canaa po-huatasano cutaraari Pueyaso niishishano tarijia, jiya ship-inishaacarijiyojua. Pueyasoori jiyacari niishiriojoquiaari jiyanohua maninia na miiniuria pajaniya, shuquiriaatia pa quiniuria pueyaracaanu pa Jiyaniijia Jesucristo shuriu-cua. Nio rupaari maja pueya niishishano tari. Pueyasoori maja nio na niishitionu quiquiaari pueya tari. ⁸ Mijiria jiyaniijianucuaari nio niishiyaquiaari. Nojori jaara na niishiquiaari tarijia, nojori maara pa Jiyaniijia moy-aquiaari niyacutesanojinia. ¡Na Shipininia motuquiaari-jaari, pueyaracaanu shacantuuca quijia! ⁹ Naa naajiotasano quiyacuajaari tariucuacaanu Pueyaso Rupaajinia:

“Pueyasoori jiyasohuaja casaa jeenucuasano jittiaa na pani-jiaca pueyara. Cunoori maja pueya niquishano quenaaja. Majaari cunojiniji nojori tojishano que-naajajuhuaaj. Majaari quenaaja pueya niishiriojonu quiquiaari jiyano casaate na naata quiniu nojoriria”.

Quiarijiani, canaari saniniuujia pueya niquiara na pohu-ataani. ¹⁰ Pueyasocujaari quiarijia canaa niishitiquiaari canaa jiuujiajinia na miiniu panishano pajaniyara. Canaa niishitiquiaariiri na Sohuanuta. Na Sohuanuuri puetunu Pueyaso niishiriojosanojuanaa noojiaajinia niishiya. ¹¹ ¿Cante pueyano niishiriojosano noojiaajinia niishiyani? ¿Majate saa na camaru sohuanujua niishiniu? Taaquiriirinij. Naajuhuaaj, saaja Pueyaso Sohuanuuri Pueyaso niishiriojosano noojiaajinia niishiya. ¹² Naaratej, Pueyasoori na Sohuanu

niqutioquiaari pajaniya, pa niishiniuria Pueyaso niishishano. Naacuajitij, majaari pa jiitianu saaja tama pa sohuanujuaja Pueyaso niishishano pa niishiniuria. Paa cutaraari Pueyaso Sohuanuracajaniuhuj. Naacuajitij, Pueyaso Sohuanu cumaquishacari pajaniya, pa naata puetunu Pueyaso niqutiosano pajaniyarajanaa niishiniu. ¡Jiyanohua capora Pueyaso! ¹³ Naacuajitij, canaa pohuatasanoori maja saaja mijiria pueya niishishano. Pueyaso Sohuanujuanaari canaa niishitiojoquiaari Pueyaso rupaa canaa niishiniuria canaa jiuujiajinia. Naacuajitij, canaa naata Pueyaso Sohuanu jitianaa niishitiojonu seetanu Pueyaso rupaajanaa, mariyata taa Pueyaso Sohuanu niishitiojoquiaa canaacuaani.

¹⁴ Mijiria quiniaa pueyari Pueyaso Sohuanu niishitiojosano niishiniu paniyaquiquiaa. Nojoriiri saaja juhua tama mijiria niishiriojosanojuaaja na jiyatequiaa. Seetanujuanaa, nojoriiri maja na naata na niishiniu. Saa Pueyaso Sohuanutaja pa naata Pueyaso Sohuanu niishitiojosano niishiniu. ¹⁵ Cante Pueyaso Sohuanu jittiaani, nojuajaari na naata puetunu niishishanojuanaa saniniujiuniu. Saniniuujia, tamasaca pueyari maja na naata Pueyaso Sohuanu jittiana miishano niishiniu nocuara na rimiaaque-nura. ¹⁶ Tariucuacaanu Pueyaso Rupaajinia naa naajiotasaaquiaarijuhuaj:

“¿Cante pa Jiyaniijia jiuujiajinia na niishiriojosano niishiyani, socua na niishitiojonura nojuajani? Shaaqui”.

Paa cutaraari Jesucristo niishishano niishiyani Pueyaso Sohuanuraca pa quishacari. Naacuajitij, majaari pa niishiniu saa mijiria pueya niishishanojua.

3

Pueyasora poonijionaa pueya cuaara poonijionuuriquia nojori panitioonuta

¹ Cuarta Jesuucua tiuuniaanaa, cua quishacari niaata, majaari cua naata jiyajeneta Pueyaso niishishano cua niishitiojonu quiquiaari niajaniya. Niaari quera juhua Pueyaso Sohuanuuju quiriquiaajaa. Niaari juhua Cristo conaaja quiriquiaajaa, maja Pueyaso tojijiaca seetanujuanaa. Nocuaji, janiyari nia niishitiojoriquiaa jacariani, juhua Pueyaso niishiyashijiaca pueya nia quishacarijia. ² Cua niishitiojosano niajaniyari niishishaatia quiquiaarijia, maja jiyajeneta. Majaari cua naata Pueyaso cutara niishishano cua pohuatanu quiquiaari niajaniya. Cuno niishishanoori cumueeca Pueyaso pueyara, naatej, taa shu quiya tariucua puereetuca pueyaracuaani. Juhua naatujoori nia quishacarijia, majaari

nia naata na tojiniu quiquiaari. Juhuanajuajaari maja nia naata na tojiniu quiarijiani. ³ Niaari juhua Pueyaso Sohuanuuju quiyajaa, juhua Pueyaso niishiyashijiaca pueya. ¿Naatejaaratej? Niaana niarta Pueyaso muerasu shocotanu paniquiaa juucua. Niaanaari juayonuujutaquiaa. Naa nia quishacaritij, niaari juhua Pueyaso Sohuanuuju quiyajaa pueyaracaanu, juhua Pueyaso niishiyashijiaca pueya. ⁴ Niaana sequequiaa: “Canaari Pablo pueyani”. Tamasacanaari sequequiaajuhuj: “Canaari Apolo pueyani”. Naacuajitij, puetunu niajanijajanaari saaja juhua Pueyaso niishiyashijiaca pueya quiyajaa.

⁵ Nia sequeretoj: ¿casaate Apoloni? ¿Casaate janiyani? Canaari nareja Pueyasora poonijionaajuhuanani. Canaari saa Pueyaso panishano miiquiaajaani, Jesucristo rupaa nia tojtianura. Canaari Jesucristo panishano miiquiaarinini taa na sequequiaari canaa miiniuriacuajani. ⁶ Naacuajitij, janiyari Pueyaso rupaa nia pahuataquiaarinini, naatej, taa casaa jajau pueyano natoojoquiaacuaani. Apoloori saniniuujia socua Pueyaso rupaa nia niishitiojoquiaari na cumaquiniuria nijaniya, naatej, taa pueyano na natau shiijioya mohuacacuaani, maninia na maashiniuria. Pueyaso cutaraari na rupaa maashitiquiaari nioojiaacajinia, na muerasu nia quiniuria cutara. ⁷ Naaratej, ¿casaateeri canaani; Apolo, janiyano? Canaari Pueyasora poonijionaa narejani. Saa Pueyasojua cutaraari cumaacaraca. Saaja nojuaja cutara na naata pa tojtiniu na rupaa, seetanujuanaa na muerasu pa quiniuria. ⁸ Naacuajitij, paari niishiyani, cante natoojonani, cante mohuaca shiijiotanani, canaari mariyata saaja Pueyaso poonitijosanoni. Pueyasocujajaari canaa niqutionutaniya na jitiyasano, nera canaa poonijionuucua. Cante socua poonijioreeni, Pueyasoori socua na jitiyasanojiniji na niqutionutaniya taajecori pueyajiniji. ⁹ Canaari mariyata Pueyasora poonijionaani. Niaari juhua Pueyaso nataacuaca nera. Niaari na muerasu cutara, maja canaa muerasu. Naajuhuj, Pueyasoori juhua nia tiaa saitia, na quiquiorano. Saitia tiasacari, sairi coteenu cumaatia niojoshiya na morijiuria, maja tia matanura. ¹⁰ Pueyaso jaara jiyaroquiaari janiya, janiyari Jesucristo rupaa pahuatanu coteequiaari maninia nijaniyani, Pueyaso muerasu nia quiniuria nia tiuushacari cua pahuatasanoocua. Naacuajitij, janiyari juhua Pueyaso tiara shipininiu coteequiaarinini. Cua niishitiojosano nijaniyani, cunoori juhua morijiu nujuatejosano quiquiaari. Cua nuhuaji, tamasaari nia niishitiojoriquiaa socua Jesucristo rupaa, juhua Pueyaso tia tucuatasaanura. Nojori cuaara niishiiria maninia, maninia nojori niishitiojonura

niajaniya, juhua maninia tiasano nia quiniuria.

¹¹ Majaari socua tamonu rupaa quiniu nocua pa tiuuniuria Pueyaso pueya pa quiniuria. Saaja Jesucristo rupaa cutaraari pa jatanijia Pueyaso pueya pa quiniuria. Janiyacuajaari na rupaa pohuataquiaari niajaninyani. Saa na rupaacuja nia tiuushacari, niocua maninia quiri, juhua maninia morijiu-cuaacua tiasano tia, maja na matanura. ¹²⁻¹³ Cante socua Jesucristo rupaa niishitiojiya niajaninyani, cuno cuaara niishitiojora jiyano hua maninia. Cuaara niyajetaaquiiria cutara, nojuajaari na niishitiojosanojiniji nequesoreesaanutaniya Jesucristo muetasacariuhua pocua, pa miishano na saniniu-jiuniuria juhua manitia. Puetunu niishishaanutaniyajanaari taa canaa niishitiojoriquiaa Jesucristo rupaani, maninia, sesa soj. Pa naata sequenu, canaa niishitiojosanoori juhua pueyano tiasano. Pueya jaara tiare orota, platatanio, shanohua saitiano, maniiri maja na naata na catijianu. Cante saniniuujia tiaree macacatani, tucurutajuhuj, turequenacotanio, cunoori taraatia quiniutianiya na tia jaara sanishaare catijianu. Naaratej, pa niishiriojore, ¿pa rootasante seetanujuanaa maninia? ¹⁴ Tamonu jaara maninia miiijia quiquiaari Pueyaso cumaacata, na miishanoori maja najuhuana quiniutianiya Pueyasora. Pueyasoori cuno pueyano niqutionutaniya na jiiitiasanojiniji. Cuno pueyanoori niishijia quiquiaari, juhua maninia tiana pueyano. Maninia casaata tiaquiaariiri, maja na tia catenura jaara sanishaare senu. ¹⁵ Cante saniniuujia tiaquiaari cateja casaatani, na tiasanoori catenutaniya. Puetunu na jiiitiasanojuanaari juurequenutaniya. Saaja nojuajaari Sesaaca jaariutiasaanutaniya juhua manijiniji jaashano. Naa miishaanutaniyari Jesuucua tiuuniasa, canapuate maninia miyashijia quiquiaari mijiriani. Nojuajaari jatarinitiaja Sesaaca jaariutiasaanutaniya, juhua manijiniji jaashano.

¹⁶ ¿Majateeri nia niishiniu pueyanaa? Niaacuajaari Pueyaso quiquio, juhua na tia. Na Sohuanuuri nioojiacajinia quijia. ¹⁷ Tamonu jaara Pueyaso quiquio sesore, Pueyasoori cuno pueyano saniitionutaniya saniniuujia. Puetunu Pueyaso muerasujuanaari juhua na tia quiya. Pueyaso quiquio cuaara quiiria tojetaarucujanaa maninia, saa neraja, maja raquiriojotasano. Niaacuajaari na quiquio.

¹⁸ Tama nia cuaqueyajaaja nia cojuare tamonu mariqui nia sapojoreeri. Cante tama na cuaqueyajaaja jiyaniya niishijiani, nojuaja naasucuaari niishijia saaja Pueyaso niishiyashijiacu niquiara. Cuno pueyano cuaara jataara cuno na niishishano juhua niishiyashijia na quiniuria narta pueya niquiara. Na nuhuaji, cuaara maseera Pueyaso niishitiaja,

seetanu niishijia na quiniurijanaa. ¹⁹ Mijiria pueya niishishanoori juhua paateca sequesano Pueyasora. Tariucuaa-
caanu Pueyaso Rupaajinia naa naajiotasanoori quiya:

“Pueyasoori mijiria quiniaa pueya cushiriquiitianiniu-
tianiya, tama nojori niishitiushanoocuaajaaja nojori
tiuushacari najuhuanaj”.

²⁰ Naa naajiotasanoori quiyajuhuj:

“Pueyasocuaajaari mijiria niishijiaca niishiriojosano niishiya.
Naa sequeyari: ‘Najuhuaanaari cuno pojori niishirio-
jonuusano’ ”.

²¹ Naaratej, maja shuquiriaatia nia quiniu saaja niquiriy-
atu Pueyaso rupaa pohuatana nia tojishacari. Pueyasoori
tamasaca pueya jiyaramiquiquiaa nia cumaquiniurijuhuj,
maja saa niquiriyatu niishitiojonaja. Puetunu casaajanaari
niaara, maninia nia quiniuria. Naaratej, majaari saa
niquiriyatu pueyanoocuaaja nia jiaatianu. ²² Pueyasoori
canaa jiyaramiquiquiaari canaa cumaquiniuria nijaniya.
Naacuajitij, janiya, Apolo, Pedro, canaari niaara quiyani,
maninia canaa miiniuria nijaniya Pueyaso rupaata. Nio
jiyari niaara quiyajuhuj. Pueyaso shipinishanocuaajaari
niaara. Naajuhuj, mijiria nia quishacari, cunoori ni-
aara quiya, socua maninia quijiara nia quiniuhuaa. Taa
nia miishiya quiarjiacuajani, taa nia miishaanutaniyani,
puetunu cunojuanaari niaara, cumueeca Pueyaso muerasu
nia quiniuria. Nia shaajesacariiri maninia quiniutianiya
niaarajuhuj. Pueyasoori nia shaajeteya na shuriucua nia
quianura. Naacuajitij, puetunu casaajanaari niaara quiya.
²³ Nijaniyari Cristora quiya saniniuuja. Cristoori saniniu-
ujia Pueyasora quiyacujua.

4

Jesucristo jiyaramiquishano poonijiosano

¹ Naaratej pueyanaa, nijaniya cuuara niishiiria canaari
saaja Jesucristo seyani. Canaari maja cutara pueyani. Pueya-
soori canaa jiyatequiaari na rupaa canaa niishitiojonura
nijaniya, Pueyaso niishitiojosano canaa. Cunoori tarijia pa
niishishoo. ² Cante Pueyaso niishitiaja jiiitiaani, cuno cuuara
quiiria seetanujanaa Pueyaso miiniu panishano panijia, na
rupaa na pohuatanura puetunu maninijanaa. ³ Nijaniya,
tamasaca pueyajuhuj jaara sequenu paniya taamueca po-
huatanate janiyani, quiiria, naajaa. Mijiria nequesoreenaa
jaara cua nequesoreere cua niishitiojonujiniji, naajaa. ¿Janiy-
ate sesa niishitiojoquiaani? Johuj. Maja cua niishiniu.

⁴ Janiya jaara sesa miiriquiaa cua Jiyaniijjara cua pooni-jiosacarini, majaari cua niishiniu. Majaari coojia macuhua-jenu quijia. Naajaa, maja cua naata tama cua cuaqueyajaaja sequenu janiya cutara maniniani. Saa cua Jiyaniijjaja na naata sequenu taa cua quiquiaarini. ⁵ Naaratej, maja nia rim-iaaquenu tamonuucua, Jesucristo tiuquiyaquishacariuhua pocua. Nia sashiri. Pa Jiyaniijja jaara tiuquiriohua, puetunu jiyasohua pa miishanojuanaari niishishaanutaniya. Niishishaanutaniyajaariuhuj casaara pa miiquiaari puetunu pa miishanojuanaani. Cuno quishacari, pa Jiyaniijjaari maninia pohuatanutaniya cante maninia miiijia quiriquiaa mijiria na quishacarini.

⁶ Cua tojitiare cuarta Jesuucua tiuuniaanaa. Janiyari nareja nia pohuatariquiaa Apolojinijini, janiyajinijijuhuj, maninia nia niishiniuria casaa cua niishitiojiya niajaniani. Naacuajitij, nia niishitiojoriquiaanijia saa Pueyaso rupaa nia tojtianura suraatiaja. Majaari socua tamonu niishitiojosano nia tojinu. Naajuhuj, maja nia sequenu tamonu niishitiojonajiniji: “Cuno niishitiojonaari sesa pohuataja. Tamonu niishitiojona cutaraari shanohua pohuataja. Na tojiriiraj, na shuquiritiniucua janiya”. Maja naate pueyanaa. Mariyata nia tojitiare puetunu Pueyaso jiyaramiquishano pueyanaa, seetanujuanaa nojori pohuatasacari Pueyaso rupaa. ⁷ ¿Niajaniyariuhuj? ¿Taa nia sequeya tama nia cuaqueyajinijijiaajani? ¿Niaateeri socua maninia pueya tamasacajiniji, socua niishijiacajuhuj? Majaruhua. Naajaa, niaa jaara seetanujuanaa socua niishijiac quiri tamonujiniji, ¿taa jiyanohua niishijiacara nia quiquianuni? ¿Tamajaatej? ¡Maja tamajaaja! Niaacuajaari Pueyaso niishitiaja jiiitiaa. Naaratej, maja nia jiyaniniu niaa socua maninia pueya tamasaca pueyajiniji, tama nia niishishanotajaaja.

⁸ Niaa jiyoteeri jiyaniya niaa tari cutara niishijiacara quirii. Niaa jiyoteeri jiyaniyajuhuj, niaa tari jiiitiaa puetunu Pueyaso niqutionu panishanojuanaa niajaniani. Naajuhuj, niaa jiyoteeri jiyaniya Pueyasoori nia jiyateree jiyaniijjanucua nia quiniuria. Niaa naasucuaari canaa shocotaree tari. ¿Naatejaaratej? Seetanujuanaa naara nia jiyateriquiani, canaa quiniuria niarta jiyaniijjanucujuhuj, shuquiriaatia pa quiniuria mariyata. ⁹ Janiyari cuarta Jesucristo jiyaramiquishanoocua niishiriojoriquiaani, Pueyaso naasucuaari canaa jiyatequiaari juhua najuhuana quijiacara, saa puecoosocoriquianojua. Canaa naasucuaari naa quiya mijiriani, puetunu pueyanaa shootianura canaa, Pueyaso seya shootianura canajuhuj. ¹⁰ Canaa tojtiasacari Cristo, canaa naasucuaari niishiyashijiac quiya tamasacarani. Ni-

ajaniyari saniniuujia niishijiaca quiya tamasacara, Jesucristo nia rupuesacari. Canaa naasucuaari Pueyaso muerasu sasaca quiya saajani. Niaari saniniuujia Pueyaso muerasu cumueeca quiya tama nia niquiarajaaja. Pueya jiyoteeri nia shuquiritiaa. Canaari saniniuujia saaja rerequetesano quiyani, pueya soosanojuhuaj. ¹¹ Canaari pueyara caanu miaaqueiaajaani. Canaari jiyamuequiaajaanihuaj. Canaa cushishano toqueniyojuaari jiyareta sesaruqueniyojua. Pueyari canaa miiquiaa taraatiani. Shaaquiiri cana tia, canaa rucoojonuucua pueyaracaanu. ¹² Canaari samareequiaani pueyaracaanu canaa poonijiosacari tama canaa juaashiquiatajaaja. Pueyari canaa sesacaquiaani. Canaari maninia na riucuaquiaa saajani. Canaa jaara naquiya miishaareni, canaari na rejeretaquiaa juhuajaniya saajani. Majaari canaa naminiu quiquiaa saniniuujia nojori. ¹³ Pueya jaara tamasaca niquiara rimiaaquequiaa canaajiniji, canaari nojoritia jecatoonu saniquiaa juucuan. Pueyari canaa jiyatequiaa juhua rucucuarani. Canaari naa quiyajaa nojoririani.

¹⁴ Naa cua naajiosacari niaacuaratej, majaari cua cararonu paniniu niajaniya. Janiyari saaja nia niishitiojonu paniya cutarani. Janiyari nia rootaa juhua cua muerasuniyojuani. ¹⁵ Naa naasucuaari queraatia Jesucristo rupaa niishitiojonaaraca. Naajaa, saa janiyajaari juhua nia queni. Nia tojitasacari Jesucristo rupaa cua pohuatasacari niajaniya, niaari Pueyaso muerasura quiquiaari. ¹⁶ Juhua nia que cua quishacari, nia nacasureenijia pueyanaa. Naate taa maninia muerasu na queecua jiaatiaacuaani, naa cucua nia jiaatiarejuhuaj, juhua janiya nia quiniuriajuhuaj.

¹⁷ Naaratej, janiyari niaacua jiyaroya cua panishano Timoteoni. Nojuajaari juhua cua niyanura quiquiaari na tojishacari Jesucristo rupaa. Timoteori pa Jiyaniijia Jesucristo tojiquiaa maninia. Nojuajaari nia niishitiojonutaniuhua taa cua niishitiojoquiaacuaa puetunu Pueyaso maapuejanaa puetunu jiyacajiniajanaacuaani. Naa nia rootanutaniyari nia niishiniuhuara maninia cua niishitiojosano niajaniya tarijia. Nojuajaari nia pohuatanutaniyajuhua taa quijia cua quiyani cua tojishacari pa Jiyaniijia Jesucristo, naa maninia nia miiniuriajuhuaj.

¹⁸ Noojiaqueya niajaniyajininioori shuquiriaatia quiya, juhua jiyaniijianucua nojori jiyatesacari tama na cuaqueyajaaja. Nojoriiri naa miiriiqui nojori jiyaniishacari maja naasucuaari cua tacatenu quiniutianiuhua, cua niqiniuhuara niajaniya socua. ¹⁹ Janiyacuajaari niaacua naquerejiya tarini, cua Jiyaniijia Jesucristo jaara paniri niaacua cua quianura. Cua tiuquishacari niaacua, janiyari cuno niishijiaca

pueya saniniujiuniutianiyani, cua niishiniuria casaate nojorini, maja naa sacuaraatia nojori quiniuriatej. ¿Cumaacarcate nojori, saaja pocuajaca soj? ²⁰ ¿Canteeri seetanujuanaa Pueyaso pueyanoni? ¿Saaja pocuajatee? ¡Maja pocuaja! Cante Pueyaso Sohuanu jítiaa na cumaquiriquiano Jesucristo na tojiniuriani, cunoori seetanujuanaa Pueyaso pueyano cutara. ²¹ Nia niishiriojore, cuarta Jesucristo tiuuniaanaa. ¿Taa nia paniya cua miiniuria niajaniya cua quiasacari niaacuani? ¿Niaateeri paniya cua saniitionura niajaniya, jacaria cua niishitiojonura niajaniya cua paniniutia soj? ¿Taa nia paniyani?

5

Na que niquiocuata quijiajiniji pohuatasano

¹ Niajanijajiniji pohuatasaarucuaa taraatianijia. Tamonu niajanijajinijionaaari jiyanojuaa sesa miya. ¡Na que niquiocuata quiaquiniaari! ¡Pueyanaa, cuno miishanoori socua jiyanojuaa cararaatia Pueyaso niishiyashijiaca miishanojiniji! Pueyaso niishiyashijiaca pueyani, majaari quenaaja nojori naa sesa miiniu niishiniutij. ² Naa cuno pueyano miishacari sesa nia tajiniatej, ¿niaateeri saaja juhuajaniya cuniqui na jítiaaruhua? ¡Niaa cuaara na tacaatiaara! Cuno sesa miijia cuaara taanuusaaria nia tajiniji, maja na cojiniuria socua niajaniya nia rerejosacari. ³ Cua tojiri taa pa miiniutianiyani. Janiyari maja cua quiniu niaata. Naajaa, coojiaari niaata quia cua niishiriojosacari niajaniya. Naacuajitij, janiyari juhua nia tajinia quiyani. Naacuajitij, janiyari tari cuno sesa miijia saniniujiuriini. ⁴⁻⁵ Naaratej pueyanaa, cua tojitiare. Nia rerejore cuno sesa miijia nia tarinitianura Sesaacara. Coojiaari niaata quiniutianiya naa nia miishacari pa Jiyaniijia Jesucristo cumaquishacari niajaniya. Naacuajitij, Sesaacaari naquiya na miiniutianiya; na cusojuanura naasucua, maja soj. Naajaa, na cuaqueyari naa naquiya miishaanutaniya noojia na tacatonuhua, Pueyaso tojijiara na quiniuhua. Naacuajitij, pa Jiyaniijia Jesucristo muetasacariuhua pocua, nojuajaari samiitianishaanutaniuhua juhua puetunu Pueyaso muerasutajanaa.

⁶ Cuarta Jesucristo tiuuniaanaa, ¿taate nia naata shuquiriaatia quiniu tamajaajani, naa sesa miijia quishacari nia tajiniatej? ¿Majateeri nia niishiniu? ¡Niaa jaara cojiya sesa miijia saniniujiushoojua, socua pueyari mariyata naa sesa miiniutianiyaquij! Sesa miijia niishishanoori tamasaacua paaquenutaniya. Niaacuajaari niishiya, shiitianiyojua pan poreeteja jaara niasaare cashojuajinia, ritia poreeteja puetunu cashojuu miniquiootasanojuanaari. Naajuhua,

sesa miijia jaara sequeyaquishaare na miishano, sesa na miishanoori socua paaquenutaniya.

⁷ Tariija, Pueyasoori pa supuetanaa Judiocuaca rootaquiaari puetunu na pan poretejamanaa nojori jatanura puetunu marijarajanaa. Nojoriiri naa rootasaquiaari saaja poretesoo pan nojori miaquenura siete juuca, shuquiriaatia nojori quiniuria Pueyaso niqiuara. Pueyasoori naa nojori niishitiojoquiaari miriquitij, nojori cartenura puetunu sesa nojori miitiushanojuanaa, nojori rupuenura Pueyaso. Naajuhuj quiarijiani, nia taanuure cuno sesa miijia nia tajiniji, seetanujuanaa sesa miyashijiaca nia quiniuria Pueyaso niqiuara. Pueyaso jiyanooniuria pajaniya, Cristoori tari mosaaquiaari pocuara, taa borregohua puecoosaaquiaari Pascua juucacuaani. Tariucuacaanuuri naa miishano quijia, Pueyaso jiyanooniuria pa supuetanaa Judiocuaca, sesa nojori miishanojiniji. ⁸ Naa Pueyaso pa cojishacari quiarijiatej, tojetaarucujanaa sesa miyashijiaca pa quirij, shuquiriaatia pa quiniuria pa Jiyanoonia niqiuara. Pueyaso pueya maanu pa cojuare puetunu maninijanaa, maja sesa miijiacata cojitishano. Seetanujuanaa maninia pa quiri puetunu pajaniyajanaa.

⁹ Pueyanaa, janiyari tari niaacuara naajiocanuni cua sequenura nijaniya, maja nia cojiniuria sesoriquia pueya, cuno pojori canapute na camishoo maaji numuetucuquiaani. ¹⁰ Naa cua sequesacari nijaniyatej, majaari cua sequenu nia rupueyaquiniuria puetunu sesoriquia pueya sequejanaa mijiria. Saa nia shaajesacarijia cutara nia naata puetunu sesoriquia pueyacujijianaa rupertenu. Nio jiyacua, pueyari naa sesa miijia quiya: nojoriiri sesa miiquiaa tama na niishiriojosanotajaaja. Nojoriiri tama nerajaaja paniquiaa socua casami pueyaracaanu. Nojoriiri nohuasenuquiaa. Nojoriiri tama na panishanoocujajaaja jiaatiaquiaa puera, maja Pueyasocua. ¹¹ Cua tojitiare casaa cua sequecanu tari nijaniyani. Cante tama na cuaqueyajaaja sequejani: “Janiya Pueyaso muerasuni”, maja cunota nia cojitianu, cuno jaara na camishoo maaji numuetucuquiaa. Naajuhuj, majaari nia cojiniu nooj cante casamiriacara quiniucua jiaatiaquiaani. Majaari nia cojiniu nooj cante tama na panishanoocujajaaja jiaatiaquiaaaniuhuj, maja Pueyasocua. Majaari nia cojiniu narta pueya sesacaja. Majaari nia cojiniu mashaasequejojua. Majaari nia cojiniu nooj, cante tamonu casami nohuasejoquiaa na sapojonutani. Janiyacuajaari tari naa nia sequecanuni maja jiyano pueyata nia cojitianura. Majaari jiyano pueyanota nia miaquenu

quenaaja. ¹²⁻¹³ Naa cua sequesacari niajanijatej, majaari cua sequenu quiriquiaa tamasaca pueyajiniji, canapuetucuaaja maja Pueyaso muerasuni. ¿Paate nojori nequesoreenaani? Maja. Pueyasocuajaari nojori saniniujiuniutianiya. Pajaniya cumaati parta Pueyaso pueya saniniujiuquiaani, nojori jaara sesa miiriquia. Naaratej, nia jatare cuno sesa miijia nia tajiniji, noo cante sacuraatia na que niquiocuata quiyacuajani.

6

Sesa miijia cuara nequesoreesaaria narta Pueyaso muerasu niquiara

¹ ¿Seetanutejanaa naa niajanijajiniji pueya pohuatasanojuhuaj? Niarta Jesuucua tiuunia jaara sesa miiri niajanija, niaanaari Pueyaso niishiyashijiaca nequesoreena tonujuquiaa nocuara. ¿Casaara tamajaaja niarta Pueyaso muerasu niquiara nia jecatoyaquiquiaani? ² ¿Niaate niishiyaquia, Pueyaso muerasuuri Pueyaso niishiyashijiaca nequesoreeriquianocuaja, Pueyaso saniniujiushacari nojori? Pueyaso jaara naa nia nequesoreetenutaniya na ruuretajaca, ¿majate nia naata quiarjia niarta Pueyaso muerasu nequesoreenu tamajaaja, nojori jaara sesa miiri shiitianiyojua? ³ ¿Majate nia niishiniujiuhuj, paari Pueyaso seya nequesoreeriquianojuhuaj? Pueyaso jaara pa nequesoreetenutaniya na seya na tojiyashijiaca, ¿majate quiarjia nia naata maninia nequesoreenu niarta Pueyaso muerasu mijiria? ⁴ Niaa jaara nia tapueyocuaacuara tonujunu paniya sesa na miishacari, ¿niaateeri Pueyaso ruuretajaca tonujunutaniya nojoriicuara? ¡Maja maninia naatej! Cuno pojoriiri maja Pueyaso muerasu jiitianaa. ⁵ Naa nia sequeyanijia cua cararonura quenaaja niajanija, cua niishiriojotenura niajanijajuhuj. ¿Seetanujanaa tojetaarucujanaa shaaquiti niishijia niajanijajinijinio, cante na naata nia tonujutoosacari nequesoreenu niajanija maniniani? ¡Quiya jiyotucuaajaari! ⁶ Niajanijanaari tama niarta Jesuucua tiuuniaacuarajaaja tonujutoojoquiaa Pueyaso niishiyashijiaca nequesoreena niquiara. Naa nia miishacarij, ¡niaari sesa miiquiaa pueyanaa!

⁷ Niaari jiyanojua jiyajeneya nia juayonujutasacari. Niaa jaara sesa miishaare, niaa cuara jiyanojootoora saniniuujia, nia casami jaara nohuasesaarejuhuaj. ⁸ Niajanijarijijataj, ¡niaari saaja sesa miiquiaacujua! ¡Niaanaari niarta Pueyaso muerasu miiquiaa sesa! Niaanaari tama niarta Jesuucua tiuuniaajaaja nohuasejoquiaa, sesa miijia nia quiniuucua.

9-10 Maja tama nia cuaqueyajaaja nia sapojonu, pueyanaa. ¿Niaateeri niishiyaquiya Pueyasoori maja na rijionu quiniutianiya sesa miijiaca na shuriucua nojori quiniuria? Jiyano pueyari puetunu quejoosaanutaniyajanaa. Quejoosaanutaniyari noo pojori canapuate na camishoo maajipohua numuetucujuquiaani, naajuhuaaj, noo pojori, canapuate tama na panishanoocuaajaaja jiaatiaquiaani, maja Pueyasocua. Quejoosaanutaniyajaariuhua noo pojori, canapuate narta pueyano niquiocua numuetucujujuani, naajuhuaaj, canapuate maajishuriutia quijia juhua maajitiani. Nohuasenuujuacaari quejoosaanutaniyajuhuaaj, noo pojorijiuhuaaj canapuate pueyaracaanu socua casami paniquiaa tama nerajaa-jani. Mashaasequenuujuacaari puetunu quejoosaanutaniyajuhaaj, tamasa sesacajacanio, tamasaacuara rimiaaquejajuhuaaj. Naa quejoosaanutaniyajaariuhua noo pojori, canapuate nohuasejoquiaa na sapojonutani. Puetunu jiyano pueyajanaari maja Pueyaso muerasu na quiniu quiniutianiya, Pueyasota nojori quiniuria shuquiriaatia pueyaracaanu. ¹¹ Noojiaqueya niajanijajinijinioori jiyano sesa miijiaca pueya quiquiaari tarijia. Na nuhuaji, sesa nia miishanoori jeequesaaquiaari Jesucristocua nia tiuushacari. Pueyaso Sohuanuuri nioojiajinia tiuquiquiaari, Pueyaso na tojitiniuria niajaninya. Naacujatij, nia rupuesacari Jesucristo, Pueyasoori nia jiyanoocuaari. Nia sequereeri: “Niaari saa maniniaja quiya cua niquiara”.

Pa cuaqueya cuaara quiria saa Pueyasoraja

¹² Queraatia pueyari sequequiaa: “Pueyaso jiyanooshacari pajaniya, paari tarinitiasaaree puetunu pa miiniu panishanojuanaa pa miiniuriani”. Seetanujuanaa naacuaaj. Saniniuujia, majaari puetunu pa miiniu panishanojuanaa maninia na quiniu pajaniyara. Seetanujuanaa cua naata miiniu puetunu cua miiniu panishanojuanaa. Naajaa, maja cutaraari cua miiniu puetunu cua miiniu panishanojuanaa, janiya mariqui puera nocua jiyartuureeri. Naa pa jiyartu-usacaritij, na nuhuaji majaari pa naata pa jiiitishano casaa pa tarinitianu. ¹³ Pueyari sequequiaa: “Pueyasoori miaquesano shipiniquiaari pa seecora. Pa seeco shipiniquiaari sumatucuaaji saniniuurijia, shuquiriaatia pa quiniuria”. Seetanujuanaari cuno sequesano. Naajaa, majaari nio pa niyaje-tanu, na nuhuaji, Pueyasoori na shaajanutaniya puetunujuanaa. ¿Pa cuaqueyariuhuaaj? ¿Pueyasoteeri pa cuaqueya shipiniquiaari pa numuetucunura pa camishoo maajipohua? ¡Maja! Pa cuaqueya cutaraari shipinishaaquiaari pa Jiyani-ijiaara, na panishano pa miiniuria. Naajuhuaaj, pa Jiyaniiji-aari pa cuaqueyara quiyacujua, na cumaquiniuria pajaniya,

maninia pa quiniuria pueyaracaanu. ¹⁴ Naajuhuaaj, taa Pueyaso samiitianiquiaaricuaa pa Jiyaniijia Jesu na cuaqueyatani, nojuajaari macujiniji naa pa samiitianiniutianiuhua na cumaacatajuhuaaj.

¹⁵ ¿Niaateeri niishiyaquiyajuhuaaj, Pueyaso Sohuanu quiniuucua poojiajinia, pa cuaqueyari seetanujuanaa pa Jiyaniijia cuaqueya quiya? Naaratej, Jesucristo cuaqueya pa quishacari, maja cumaati pa curuushojonu pa cuaqueya, maaji paanatu pa numuetucunuta. ¡Cunoori jiyanoehua sesa!
¹⁶ Pueyasocujaari coteenujuanaa na shipinishano pueyano sequequiaari:

“Quia camishacari maaji, niaari niquiriyatu cuaqueyara quiniutianiya”.

¿Niaateeri nio niishiyaquiya, cante paanatu numuetucureeni, Pueyasora, nojoriiri niquiriyatu cuaqueyaracara quiquii?
¹⁷ Naajuhuaaj, paa jaara Jesucristo rupuereni, pa sohuanuuri rupuetoree na Sohuanuta, niquiriyatu sohuanuraca pa quiniuria Jesucristota.

¹⁸ Naaratej, nioojia nia tacatore maja nia numuetucunura tamasaca, cante quia camishoo maajini. Puetunu tamaatia sesa pa miishanojuanaani, cunoori maja pa cuaqueya sesojua. Saniniuujia, cante na camishoo maajipohua numuetucujuani, nojuaja cutaraari tama na cuaqueyajaaja sesoya. ¹⁹⁻²⁰ ¿Majateeri nia niishiniu, nia cuaqueyari Pueyaso Sohuanu quiquio? Pueyasoori na Sohuanu jiyaroquiaari poojiajinia na quiniuria. Pueyasoori nia masequiaari tama nerajaaja nia quiniuria. ¡Jiyanoehua naquiya na miiniutia nia masereeri Neyanu na motesacari pocuara! Naacuajitij, Pueyasoori quiarijia pa camarnu quiya. Naaratej, quiarijia maja pa quiniu tama pa cuaqueya camarujuaaja. Naaratej, pa shuquiriritiri pa Pueyaso pa cuaqueyata, pa sohuanutajuhuaaj. Nojuacuajaari pa cuaqueya camaru, pa sohuanu camarujuhuaaj.

7

Pablo rootasano pa caminiuria, camiyojua pa quiniuria soj

¹ Quiarijiani pueyanaa, cucuara nia naajiosanojinia nia nequesotasano riuquareeraj. Cante niquiriyatu quiniu paniya tamajaajani, cuno pueyanoori maninia miya, maaji na camiyaquishacari. ² Saniniuujia, quiarijiani, pueyari puera sesa miiniu niishiquiaa. Nocuaji pueya cuara camiria. Maajipohua cuara camiriajuhuaaj. ³ Pueyano jaara camiri, necocua cuara na cuaqueya jamueyaquiiria neyaca numuetucunu panishacari. Naajuhuaaj, neyaca cuara na

cuaqueya jamueyaquiiria necocua panishacari na numuetucusaanura. ⁴ Necocuaari maja tari tama na cuaqueya camarujuaaja na quiniu. Neyacaari na cuaqueya camaru cutara. Naajuhuj, neyacaari maja tama na cuaqueya camarujuaaja na quiniujiuhuj. Necocuaari neyaca cuaqueya camaru cutara. ⁵ Naacujiti maajipohuanaa, maja nia niyacaacuaji nia jamuenu nia cuaqueya, na panishacari numuetucunu niajaniya. Naajuhua niajaniya canuunaa, maja nia niquiocua nia tarijonu na panishacari na numuetucusaanura. Saniniuujia, jiyanohua Pueyaso nia seconu panishacari, jiyacari cutara nia naata tarinitianu numuetucunu rupaquijia, Pueyaso nia seconura, niaa jaara mariyata naa miiniu paniri. Na nuhuaji cutara, nia numuetucurohua nia niquiocua, Sesaaca mariqui sesa nia miitiriiri tamonu maaji nia paniniuria, nia camueenujusacari puera. ⁶ Nioori quiarijia maja niaara Pueyaso rootasano janiya. Janiyari nareja naa sequeya niajaniani socua panaatia nia quiniuria. ⁷ Naaratej, nia jiyateriquiani taa cua quiyacuaani, niquiocuaaju. Naajaa, Pueyasoori puetunu pa cumaquiquiaajanaa tamaatia pa quiniuria, taa Pueyaso paniyacuajani. Camishoo, camishano soj, naajaa. Taa pa quiyani, paari shuquiriaatia quiquiaa Pueyaso cumaquishacari pajaniyani.

⁸ Camiojua pueyanaa, mashiopuena, cua tojitiare: niaa jaara juhuajaniya quiya taa camiojua cua quiyacuaani, niaari maninia quiniutianiya. ⁹ Cante saniniuujia maja na naata tama na cuaqueya panishanojuaaja rejetenu maninia tamajaajani, cuno cuaara camiiria. Socua maninia cutaraari nia caminiuria, maja maajiicua nia jiaatianura pueyaraaanu. ¹⁰ Camiono pueyanaa, nio nia tojitiare cutara. Nioori pa Jiyaniijia Jesucristo sequesano cutara, maja saa cua sequesanojua. Maajipohuanaa, maja nia cartenu nia niyaca. ¹¹ Cante neyaca carteyani, nojori cuaara jyanootioora, na rupetoonuhua. Jaara maja na naata jyanootioonu, cuaara quiiria tamajaaja pueyaracaanu. Cuaara camiyaquiiria socua. Canuunaa, pa Jiyaniijia Jesucristo sequesanoori mariyata niaarajuhuj. Naa sequeyari: “Maja nia cartenu nia niquiocua”.

¹² Quiarijiani, socua nia niishitiojoreeraj. Nioori tama cua niishitiojosoanojuaaja, maja niaara Jesucristo rootasano. Pueyano jaara Pueyaso tojiyashijia niquiocuaraca quiri, cuaara jiitiaara maninianoj. Quia niquiocua jaara quiata quiniu paniyajaa, majaari na cartenu. ¹³ Naajuhuj, maaji jaara Pueyaso tojiyashijia niyacaraca quiri, cuaara maninia jiitiaara neyaca. Majaari na cartenu, quia niyaca jaara quiata

quiniu panirijia. ¹⁴ Cuarta Pueyaso muerasunaa, Pueyaso tojiyashijia pueya nia jiyanoori, nojori jaara Jesuucua tiuuniaata caminio quiya. Nojoriiri seetanujuanaa maja Pueyaso muerasu. Naajaa, necocuaari Pueyaso pueyano quiya cutara. Naaratej, niajaniya cuaara neyaca jiyanooria necocua quiniucua niarta Pueyaso pueyano. Nareja nia niquirinioj, niaata na rerejonu panishacari. Naajuhuaaj, nia jiyanoori niarta Pueyaso pueyano niquiocua, naajaa, Jesuucua tiuyashijia na quishacarijia. Naa Pueyaso pueyano neyaca quishacaritij, necocua cuaara nareja niquishaariajuhuaaj, na rerejosacari niaata. Naajuhuaaj, maja rimiajata nia niquniu necohua. Necohuari maniniacuaja Pueyasora, maja juhua tama maaji muetusanojuaja. ¹⁵⁻¹⁶ Pueyaso muerasunaa, canuu, maajipohuanio, Pueyaso tojiyashijia jaara nia cartenu paniri, nia tarinitiare. Pueyaso tojiyashijia cartesacari niajaniya, niaari juhua camishoo quiriohua. Maajari socua nia tojiniu coteenu nia niyaca, coteenu nia niquiocuanio. ¡Maja cutaraari nia cartenunoj! Nia niishiriojore pueyanaa, nia niquiocua jaara Pueyaso tojiyashijia quiri, ¿nia naatate na tojitiniu Pueyaso rupaa, Pueyaso muerasu na quiniuria, jaara quiata quiyajaa? Maja pa niishiniu. Naajuhuaaj, maja niishishano quia naatate quia niyaca quia tojitiniu Pueyaso rupaa. Naaratej, maja nia cartenu Pueyaso tojiyashijia. Nareja carteshiya cutaraari tama na panishacarijiaaja na cartenura quiajaniya. Naatej, Pueyasoori paniquiaa juhuajaniya pa quiniuria, camishano, cartesano soj.

¹⁷ Cuarta Jesuucua tiuuniaanaa, taa nia quiquiaari Pueyaso sequesacari niajaniya na muerasu nia quiniuriacuajani, naajaa, naa nia quiri Pueyasora. Janiyari naa nia sequeyani, taa cua rootaquiaacuaja puetunu Pueyaso pueya maapuerajanaani. Taa nia quiquiaarini, naajuhuaaj casaate quia poonijiosano quiquiaarini, cunocuaajaari Pueyaso panishano quiquiaari niaara. ¹⁸ Naacuajitij, cante tarijia na cararaatiuquia co miatesano quiquiaari Judio pueyano na quiniuriani, naajaa, cuno pueyano cuaara naa quiiria pueyaracaanutej, Jesucristoocua na tiushacari quiarijia. Naajuhuaaj, cante miatesoo quiquiaari Pueyaso sequesacari na pueyano na quiniuriani, cuno cuaara quiiria naajuhuaaj. ¹⁹ Cante Judio pueyano na quiniuria miatesaaquiarini, naajaa. Cante miatesoo quiyani, naajaa. Saaja maninia cutaraari pa tojitianura Pueyaso niishitiojosano pajaniya. ²⁰ Naarate nia sequeyanijia, nia quiri taa nia quiquiaaricuajani shushajanaa Pueyaso sequesacari na muerasu nia quiniuria. ²¹ Cante poonitijiotasusano pueyano quiquiaari Pueyaso sequesacari na muerasu nia quiniuriani, naajaa, maja nia niishirio-

jonu nocua. Juhujaniya nia poonijiore saaja. Saniniuujia, jaara nia naata quiriquia cartesano pueyano nia camarnu-jiniji, maniniacujaari. ²² Cante poonitijiotasusano pueyano quiquiaari Pueyaso sequesacari nijaniya na muerasu nia quiniuriani, naajaa, niaari seetanujuanaa cartesano pueya quiya pa Jiyaniijara. Naajuhuj, cante camarnuuj quijia quiquiaari Pueyaso sequeyaquishacarijia na muerasu nia quiniuriani, quiarijiani, niaari pa Jiyaniijia poonitijosano pueya quiya cutara. ²³ Pueyasoori jiyanojua naquiya mi-iquiaari na cusojuasacari Neyanuniyojua, na masenura nijaniya, na muerasu nia quiniuria. Nia masequiaariiri tama nerajaaja nia quiniuria. Naaratej, majaari juhua tamonu camarnu poonitijosano nia quiniu socua. Quiarijia saa Pueyasoraja nia quiri maninia. ²⁴ Naaratej cuarta Pueyaso muerasunaa, taa nia quiquiaari tarijia Pueyaso muerasu nia quiyaquishacarijiani, naa nia quiri quiarijia Pueyaso cumaquishacari pueyaracaanu nijaniya.

²⁵ Quiarijia nia sequereera cua niishiriojosano, taa camishoo pueya miiniutianiyani. Nioori maja pa Jiyaniijia rootasano janiya. Majaari na sequenu quiquiaari cunojiniji. Naajaa, pa Jiyaniijiaari cucua tiuquuaa na sequenu panishano cua caminiujiuniuria nijaniya, na Sohuanu cumaquishacari janiya. ²⁶ Naacuajitij, naa nia sequeyanijia: niaacuajaari niishiya, quiarijiani, jiyanojua puereeta quishacari. Nocuaji nijaniya cuaara quiiria taa nia quiyacuajani. ²⁷ Cante niqiuocuaracani, maja nia paniniu na cartenu. Cante niqiuocuaaju quiyani, majaari nia niqiuocuaaniu paniniu. ²⁸ Naajaa, mashaja jaara camiri, cunoori maja sesa. Naajuhuj, niyacoo jaara camiri, majaari sesa na miishano. Saniniuujia, camishano pueyari socua taraatia miishaanutaniya camishoo pueyajiniji, puereeta quishacari quiniuucua mijiria quiarijiani. Majaari cua paniniu taraatia nia miishaanura. Nocuaji janiyari naa nia niishitiojiyani puera sesa quishacari quiniuucua quiarijiani.

²⁹ Cuarta Pueyaso muerasunaa, nijaniya cuaara niishi-iria nio jiyari puequenutaniya. Majaari mijiria pa quiniu quiniutianiya pueyaracaanu. ¿Taariquitijia mijiria pa tarishiniutianiya socuatejaj? Maja pa niishiniu. Majaruhua puera pa tarishiniu quiniutianiya. Naaratej mijiria pa quishacarijia, jiyanojua pa tojitiare pa Jiyaniijia. Naacuajitij, cante niqiuocuaraca quiyani, majaari nocua nia niishiriojonu puera. ³⁰ Cante na shaajasanoocua sapueyani, naajaa, majaari nia tarinitianu Pueyasora nia poonijionu. Cante queranacuyani, naajaa, Pueyasora pa poonijiore-juhuj. Cante casami niquitojojua quiquiaani, naajaa, maja

casamiicua nia niishiriojonu puera. Socua nia niishiriojore cutara Pueyasocua. ³¹ Canapujete niishijiacani, queraatia casami na masejonura mijiriani, nojori cuaara niishiiria maja casami panijiaca nojori quiniuria puera. Nio jiyari tari puequeya puetunu pa niquishano casaatajanaa. Naaratej, maja casamiicua nia niishiriojonu. Saaja Pueyaso nia tojiri cutara.

³² Janiyari paniyani mijiria casaacua tacayashijiacua nia quiniuria. Pueyaso nia tojitiare juhuajaniya cutara. Camishoo pueyano na naata saaja pa Jiyaniijiaacua niishiriojonu na tojiniuria maninia, pa Jiyaniijia na shuquiritiniuria. ³³ Cante niquiocuaraca saniniunijia, nojuajaari niishiriojoquiaa mijiria casaacua, necocua na shuquiritiniuria. ³⁴ Naacuajitij, noojia niquijioteyari. Naajuhuj, camishoo maajiiri pa Jiyaniijiaacua niishiriojoquiaa maninia, tama na cuaqueya na cojuasacarijiaaja Jesucristora, nera na poonijionura puetunu noojiatajanaa. Saniniuujia, cante niyacaraca quiyani, nojuajaari mijiria casaacua niishiriojoquiaa neyaca na shuquiritiniuria. Naacuajitij, majaari puera jeya na quiniu Pueyaso panishano na miiniuria.

³⁵ Janiyari naa nia sequeyani socua shuquiriaatia nia quiniuria. Maja cua taajetenu paniniu nijaniya puera cua rootasanota. Janiyari nareja naa nia niishitiojiyani, maninia nia quiniuria, pa Jiyaniijia nia tojitianura maninia. Niaa jaara cua niishitiojosano tojiri, nia naata pa Jiyaniijia tojiniu maninia. Naacuajitij, niaari nioojia niquijioteyaquinutianiya.

³⁶ Pueyano jaara naa niishiriojore: “Majaari maninia cua miiniu cua jamuesacari cua niyatu pueyaracaanu na camiyaquiniuria”, cuno pueyano cuaara miiria taa na miiniu paniyacujani. Camishocoriquiano maaraja, cuaara camitioora. Quia niyatu jaara camiri, majaari sesa. ³⁷ Cante saniniuujia maja noojia niquijioteyaquiya na niishiriojosacari neyatuucuni, cunoori maninia miiniutianiya na camitiyaquishacari, jaara na naata neyatu cojuanu maninia. ³⁸ Naacuajitij, cante neyatu camitiriini, maninia miyari. Cante neyatu camitiyaquiyajaaniuhuj, nojuajaari socua maninia miya. Naacuajitij, cuno neyatuuri na naata Pueyaso panishano miiniu socua, camishoo na quishacari.

³⁹ Camishano maaji cuaara carteyaquiiria neyaca, saminio neyaca quishacarijia. Pueyasoori naa sequequiaaritij. Neyaca jaara cusoyare, na mashiquioori maja tari na quiniu juhua camishano. Na panishacari, cuaara camiiria cana na caminiu paniyacujani. Jaara caminiu paniri, cuaara

camiiria Pueyasooocua tiuujia pueyanota cutara. ⁴⁰ Naajaa, mashiquio jaara camiyaquiriohua, socua shuquiriaatia quiniutianiyari, Pueyaso panishano na miiniuria. Janiyari naa niishiriojiyani pueyanaa. Pueyaso Sohuanu naasucuaari cua sequeteree nio.

8

¿Maninate cuno shu pa miaquenura, seya jaara puecoosano quiri nareja shipinishano casaacuara, juhua Pueyasooocuarajanaa?

¹ Cuarta Jesuucua tiuunias pueyanaa, janiya quiarjia nia niishitiojonutaniyani tevano pa miaquesanojinijiti puereshiyani. Pueyaso niishiyashijiacaari na miaqueso-coriquiano seya puecoonu niishijia shipinishano casaacuara juhua Pueyasooocuarara. Pueyari nequesotaquiaa, ¿maninate cuno shu, Pueyaso muerasu miaqueso-coriquianojuhuaj, cuno seru jaara taucuaca jyanishano cumaacaraca quijiaacuara mosano quiri? ¿Janiya cutaraari maja cua miaquenunoj! Nia pohuatারেera casaara cua miaqueyaquiquiaanoj. Cua tojitiare. Paacuajaari niishiyani cuno shipinishano casaari nareja pueyano shipinishano najuhuanaj, nojori jyanitiushano na pueyasoni. Naa pa niishishacari, paari maninia niishijiani. Naajaa, maja cutaraari maninia pa niishiriojonu paa jaara nocuara puecoosano miaqueriquiani. Naa niishijiaari shuquiriaatia quiya tamajaaja. Saniniuujia, majaari na niishiriojonu narta Pueyaso pueyanoocua. Cante narta pueya paniquiaani, cunoori narta pueyacuua niishiriojoquiaa cutara, nojori jiuujia na cumaquiniuria maninia. Jiyano pueyanoori cumueeca Pueyaso pueyano quiniutianiya. ² Naacuajitij, cante tama na cuaqueyajaaja jyaninya niishijiani, cunoori juhuanajuaja maja niishijia seetanujuanaa. ³ Cante Pueyaso panijia saniniunijia, cunoori narta Pueyaso muerasuucua niishiriojoquiaa. Cunoori Pueyaso panishano pueyano cutara. Seetanujuanaa niishijia cutaraari cuno.

⁴ Juhuanajuajaari maja cua riucuanu nia niishiniu panishano: “¿Maninatenaari cuno shu pa miaquenu, seru jaara pueya jyanishano pueyasooocuarara mosano quiri?” ¿Casaatejaara cuno nojori jyanishano pueyasoni? Paacuajaari niishiyani cuno shipinishano casaari maja saminio. Pueyano shipinishano casaari maja cumaacaraca quijia. Naaratej, nojori jyanishano pueyasoni, cunoori maja seetanujuanaa Pueyaso. Niquiriyatu Pueyasoori quiya cutara. Jiyocuacaanu Quijia. Maja socua tamonu quiniu juhua nojuaja. ⁵ Tamasaca pueyari jyaninya queraatia cumaacaraca quijiaaari quiya

juhua Pueyaso, jiya cajiniocua, mijirianio. Nojoriiri na jiyatequiaa nojori cojuanara, nojori cumaquiriquianojuhuaj. ⁶ Naajaa, paari niishiyani saa niquiriyatu Pueyasojuuara quiya. Nojuacuajaari pa Que Pueyaso, pa shipininia. Puetunu casaajanaa shipiniquiaariiri. Pa shipiniquiaariiri tama nerajaaja pa quiniuria. Niquiriyatujua Jiyaniijaari quiyajuhua. Cunoori pa Jiyaniija Jesucristo. Na Queeri na shipiniquiaari puetunu na shipinishanojuanaa. Pajaniyajuhaaj, paari rishiyani saaja na cumaquishacari pajaniya.

⁷ Noojiaqueya Pueyaso pueyari saniniuujia jiyaniyajaa taucuaca shipinijosano casaari seetanujuanaa cumaacaraca quijiaca juhua Pueyasojuhuaj. Nojoriiri najuhuana sesa niishiriojonuujuaca. Jiyano pueya jaara Pueyaso muerasura quiri, juhuanajuaja maja na niishiniu maninia. Majaari tarijia na niishishano na tarinitianu juhuanajuaja. Naacuaajitij, nojori jaara shu miaquere teyanote mosaaree nojori jiyaniishano cumaacaraca quijaacuarani, nojori miaquenu nuhuaji, noojia niqijioteyari. Nojoriiri tama sequeyajaaja: “¡Janiya naasucuaari sesa miiri Pueyaso niqiarani!” Naacuaajitij, nojoriiri noojia macuhajetequiaa. ⁸ Pueyanaa, paacuajaari niishiyani, casaa pa miaquequiaani, naajaa. Pa miaquesanoori maja na naata Pueyaso jyanootiniu pajaniya. Cante cuno shu miaqueyaquiquiaani, naajaa, majaari socua maninia pueyanora na quiniu Pueyasora. Naajuhaaj, cante na miaquequiaani, majaari socua sesa pueyanora na quiniujuhuaj. ⁹⁻¹¹ Niaacuajaari jyanohua tiuquiaa Pueyasocua. Naacuaajitij, niaa naasucuaari na naata juhujaniya tiuquiniu cuno shu miaquenura nojori jiyaniishano pueyaso quiquiojinia. Niaacuajaari niishiya, cuno, nojori sequesano pueyasoni, majaari seetanujuanaa Pueyaso cuno. Naacuaajitij, nia naata nocuara mosano seru miaquenu juhuajaniya. Saniniuujia, nia cajishacari cuno miaquenujuajinia, niarta Pueyaso pueyanoori nia niqiniutianiya na pueresano shu miaquenuyano. Na niquishacari nianianiya, tamajaaja sequenutaniyari: “¡Jaj! ¡Nojoriqui cuno shu miaquenuyacuaa! Saniriirajataj”. Naa sequejatej, nojuajaari jiyaniyajaa cuno miaquesanoori mosaaree seetanujuanaa tamonu cumaacaraca quijaacuara. Naacuaajitij, na sanishacariuhua cuno shu miaquenu, tamajaaja noojia macuhajanutaniyari. Naacuaajitij, niari niarta Pueyaso pueyano sesoya, na niqiarara nia miaquesacari cuno shu. Na niqiniuucua nianianiya cuno shu miaquenuyano, nojuajaari cunora na miaquerejuhuaj. Saniniuujia, nojuajaari juhuanajuaja maja jyanohua Cristoocua tiuuniu na niishiniu. Cristo cutaraari nocuara cusoquiaari, sesa na

miishanojiniji na jiyanooshaanura. Niajaniyari saniniuujia quiarijia na sesorohuacuhua nia niishishanota. Nocuaji janiyari nia sequeyani, maja socua nia miaquenu cuno shu, cuno shu miaqueyaquijia mariqui na pueresano shu miaquerohuariuhua, na rupuesacari niajaniya. ¹² Nia miaquesacari, niaari na pueresano shu na miaqueteya. Naacujitij, noojiaari macuhajenutaniya. Naacujitij, niaari sesa miya niarta Pueyaso pueyano. Niaari pa Jiyaniijia Cristo miya sesajuhuj, naa nia sesosacari tama na pueyanoujaaja. ¹³ ¿Taa nia sequeyani pueyanaa? ¿Maniniate shu pa miacquenu, seya jaara taucuaca jiyaniishano pueyasooacara puecoosano quiri? Janiya cutaraari maja socua cuno shu cua miaquenu quiniutianiya, cuarta Pueyaso pueyano mariqui sesereeri cua miishanojiniji. Saaja maninia miijiacara nia jiyateriquiani, taa cua miiquiaa saaja maniniacuaani.

9

Taa quijia Pablo quiquiaarini, Jesucristo jiyaramiquishano na quishacari

¹ Janiya jaara cuno shu miaquenu paniyani, cua naata miaquenu cua panishano. Naajuhuj cua naata puetunu cua panishanojuanaa miiniu taa cua Jiyaniijia sequequiaari na jiyaramiquishano pueyacuajani. Janiyacuajaari Jesucristo jiyaramiquishanojaaniuhuj. Seetanujuanaa cua namijiata Jesucristo niqiquiaarinijia. Nojuajaari cua jiyatequiaari na jiyaramiquishano cua quiniuria. Naajuhuj, cua pohuatasacari Jesucristojiniji nia niqiara, niaari na muerasura quiquiaari cua pohuatasanocua nia tiuushacari. Naacujitij niishishiyari janiyari Jesucristo jiyaramiquishanojaaniuhuj. ² Tamasaca jaara jiyaniya janiya maja Jesucristo jiyaramiquishanoni, naajaa. Niaacuajaari na niishiya. Niaacuajaari Jesucristo tiuquiaari nia tojishacari cua pohuatasano nojuajiniji. Naacujitij, niaacuajaari niishiya janiyari Jesucristo jiyaramiquishanoni. Na jiyaramiquishano cua quiniucua, cua naata miinijuuhuj taa cuarta Jesu jiyaramiquishano pueya miiquiaacuaani.

³ Tamonu jaara cua nequesoreere taa cua miiquiaani, janiyari saaja naa na riucuaquiaani: ⁴ “Pueyasoori sequequiaari, na jiyaramiquishano pueya cuara niquitiosaaria na miaquesocoriquiano”. Naaratej, canaa jaara naa miiniu paniriquiani, canaa maara nia sequereni canaa nia niqutiojonura canaa panishano. Naajaa, majaari canaa masenu quiquiaa canaa panishano niajaniyajiniji, janiya, Bernabee-nio. ⁵ Naajuhuj, canaa jaara niqiuocaraca quiriqiani, canaa maara canaa niqiuocua rupojoriquia canaacuaani, taa

cuarta Jesucristo jiyaramiquishano pueya miiquiaacuaani. Pa Jiyanijia Jesu tapueyocuacaari naa miiquiaajuhuj. Pedrojuanaari necocuata rucuanejoquiaajuhuj, Jesucristo rupaa na poojotasacari. Naajaa, majaari naa canaa miiniu quiquiaaquij. ⁶ Jesucristoori sequequiaarijuhuj: “Cua jiyaramiquishano pueya cuaara niqutiosaaria cumaneeca, na panishano nojori masetajara”. ¿Niaateeri jiyaniya cuno sequesano maja quiria, maja Bernabeerajuhuj? ¡Cunocuaajaari naa sequesaaquiaari canaarajuhuj! Naaratej, canaa jaara naa paniriquiani, canaa maara canaa panishano masere nijaniyajinijini, canaa niishitiojonuucua nijaniya. Naajaa, canaari tama canaa juaashiquiatajaaja poonijioquiaani, canaa panishano canaa masetajara.

⁷ ¿Soldoteeri tamonu poonijosano jiitiaja, na miaquesano na masetajara? ¡Maja! Soldadohua jiyaniijaari na niqutiojua puetunu na miaquesanojuanaa. ¿Pueyanoteeri na cuhuariquia nataja najuhuanaj? ¡Maja! Na nuhuaji na natau mianutaniyari na poonijosanojiniji. ¿Majateeri serujuunu camaruratu na seru quitiaaca, jaara na paniri? ¡Taaquiririnij! Na ratuyacuaaquiniatejaj. ¿Maatucua casaara najuhuaana seesaareerini? ¿Canaarijiatej? Canaa jaara naa paniriquiani, canaa naata nia masenu canaa panishano nijaniyajiniji. Naajaa, majaari canaa mashiniquijionu quiquiaa quenaaja canaa panishano nijaniyajiniji. Canaari nareja poonijioquiaa tama canaa juaashiquiatajanijia, Jesucristo rupaa canaa pohuatasacari nijaniya.

⁸ Nio cua pohuatasano nijaniyani, majaari tama canaa niishiriojosanojuaaja. Nio niishitiojosanoori tariucuaaanu Pueyaso Rupaa naajiosanojinia quiyajuhuj, taa cua sequeriquiaacuajani. ⁹ Supuetana Moisés caminiujiushano Pueyasojinijiiri naa naajiotasaaquiaritij:

“Maja quia juunu rupaa quia seecutanu maja na miaquenura quia carojotasano, quiaa jaara na rapijioteya na coreetanura”.

¿Pueyasoteeri saa juyacaacua niishiriojoriquiaajaa naa na sequenuratej? ¡Maja! ¹⁰ Pueyasoori naa sequeriquiaaqui na niishitiojonura puetunu pajaniyajanaa. Naaratej, Pueyasora poonijionaani, na niishitiojosano pueya cuaara nojori niqutiojooara na panishano. ¿Taa nia sequeyani? ¿Pueyanote shuquiriaatia cuhuataja na cuhuariquiara? Taaquiririnij. Na camaruuri niishiya na poonijosanojiniji mianutaniya na nuhuajiiri. ¿Majateeri pueyano carojotanu shuquiriaatia na nataujuhuj? Jaa. Niishiyacuajaari na mianutaniyari. ¹¹ Naajaa, niaata cua quishacari, canaari naa poonijioriquiaa Pueyasorani, nioojiaca canaa cumaguinuria maninia. Naacuajitij, canaa cuaara niqutiojosaaria

saniniuujia canaa panishano. Naajaa, majaari canaa paniniu canaa panishano nia niqutionura canaa. ¹² Tamasaca pueya niishitiojosacari niajaniya, niaa cutaraari nojori niqutiojoquiaa nojori panishano. Canaari saniya coteenujuanaa pohuataquiaari Jesucristo rupaa niajaniyani. ¿Majateeri coteenu canaa niquticosaanu canaa panishanojuhuaj? Naajaa, majaari canaa masenu quijia nia casami. Niaata canaa quishacari, canaari sanaa poonijiojua tamajaajani, canaa masetajara canaa panishano. Canaa jiitiaaquishacari canaa panishano, canaari sanaa rejeretaja saajani. Majaari canaa taajetenu paniniu quijia niajaniya, canaa jiitiaaquishacari canaa panishano. Canaari naa miiquiaaritiij, niaa mariqui Jesucristo rupaa tojiniu paniyaquiriiri canaa taajetesacari niajaniya, pueyaracaanu canaa mashiniquijiosacari canaa panishano niajaniyajiniji.

¹³ Niaacuajaari niishiyajuhuj, Jerusalén tiacajinia Pueyaso Secojojuia tiajinia, cuarta Judiocuaca miaquesocoriquianoori puecoosaaquiaa Pueyasooacara, taa Pueyaso rootaquiaari canaa supuetanaacuajani. ¿Niaateeri niishiyaquiyajuhuj, shu camaruuri secojojuajinia poonijionaa niqutioquiaa nojori miaquesocoriquianojuhuaj? Naacuajitij, Pueyaso secojojuia tiajinia poonijionaari miaquesanoraca quiquiaajuhuj. ¹⁴ Pa Jiyaniijia Jesucristoori na rupaa pohuatanaara naa sequequiaarijuhuaj: “Cua rupaa pohuatanaa cuaara niqutiojosaaria na panishano pueyaracaanu”. ¹⁵ Naacuajitij, cua naata puetunu cua panishanojuanaa sequenu nia niqutiojonura janiya, juhuajaniya cua quiniuria, taa cuarta Jesucristo jiyaramiquishano pueya miiquiaacuaani. Naajaa, majaari cua masenu quijia niajaniya cua panishano cua masetajara. Niaa naasucuaari jiyaniya janiyari quiarijia niaacuara naajioree nioni, cua shiniujiuniuria niajaniya nia niqutiojonura janiya cua panishano. ¡Maja! Majaari cua paniniu nia niqutionura janiya cua panishano. Janiya jaara titiaare cua miaajenutani, naajaa. Janiyari tama cua juaashiquiatajaaja poonijionu paniyani, Jesucristo rupaa nia tojitianura, cua panishano cua maseyaquiniutia niajaniyajiniji. Naacuajitij, janiyari tamajaaja shuquiriaatia quiya Pueyaso niquiarani.

¹⁶ Cua tojitianaa jaara niqutiore janiya cua panishano, maja cua naata shuquiriaatia quiniu tamajaaja, cua pohuatasacari Jesucristo rupaa. Janiya jaara pohuataaquiri Jesucristo rupaani, cua Jiyaniijia mariqui cua saniitioreeri cua tojiyaquiniuucua nojuaja. Cua pohuatasacari na rupaa, janiyari saaja na tojiyani. Nojuacuajaari cua jiyaroquiaari

na rupaa cua pohuatanura. Cunoori maja tama cua ni-
ishiriojosano cua miiniuriajaaja. ¹⁷ Majaari cua sequenu
quiquiaari cua Jiyaniijia: “Cua Jiyaniijianaa, quia rupaa
pohuatareera quiajaniyara”. Janiya jaara naa na seque-
quiaarini, cua Jiyaniijia maara cua niqutiore cua pooni-
jiosanojiniji nera, na shuquiritiasacari janiya. Saniniuujia,
tama na panishacarijaaja cua Jiyaniijiajanaacuajaari cua ji-
yaroquiaari na rupaa cua pohuatanura. Cunora, majaari cua
naata na tarijonu. Janiyacuajaari na seruni. ¹⁸ Naacuajitij,
¿taa cua miya socuani, cua Jiyaniijia cua shuqiritiniuria
socuani? Naa miiquiaacuajanijia, nareja poonijioquiaanijia
tama cua juaashiquiatajaaja cua panishano cua jiitianura,
na rupaa cua pohuatasacari. Naaratej, majaari cua sequenu
quiquiaa cua tojtianaa, nojori niqutiojonura janiya cua
panishano. Jesucristocuajaari sequequiaari na rupaa pohu-
atanaa cuaara niqutiosaaria na panishano. Naajaa, majaari
naa cua sequenu quiquiaa nijaniya. Naacuajiti cua naata
pa Jiyaniijia shuqiritiniu socua, cua pohuatasacari na ru-
paa cua maseyaquishacari cua panishano cua tojtianaajiniji.
Naacuajitij, janiyari shuquiriaatia pohuataquiaa Pueyaso ru-
paa pa Jiyaniijiarani.

¹⁹ Majaari pueya niqutionu quiquiaa janiya na jiitiasano-
jiniji cua niishitiojonuucua nojori. Naacuajitij, janiyari maja
juhua nojori seruni. Pueyanoori maja cua jiyarona. Naajaa,
janiyari tama cua cuaqueyajaaja jiyatequiaari juhua
puetunu pueya serujuanaa cua quiniuriani, socua pueya
quiniuria pa Jiyaniijia Jesucristo tojtianaara. ²⁰ Jesucristo ru-
paa cua pohuatasacari cuarta Judiocuaca niqiuara, janiyari
juhua Judio pueyanora quiquiaani. Janiyari naa miiquiaani
nojori mariqui cua tojiaquiriiri, janiya jaara juhua tahue
quiri nojori niquiarani. Naacuajitij, socua Judiocuacaari Je-
sucristo rupaa tojtiaa. Jesucristoocua cua tiuushacari, jani-
yari maja socua cua quiniu juhua cua supuetanaa Judiocuaca
rootasano tojijia. Naajaa, na tojiquiaajaanijia cua quishacari
cuarta Judiocuacata, noo pojoritiatej cante cuno rootasano
tojtiaajaanii. Naacuajitij, cua quishacari juhua nojori, no-
joriiri socua cua tojtiaa cua pohuatasacari Jesucristojiniji.
²¹ Naajuhuj, cua quishacari tamasa pueyata, janiyari
juhua nojori quiquiaani, nojori tojiniuria maninia janiya.
Nojoriiri maja Judiocuaca supuetanaa rootasano tojinuu
niishiniu. Naaratej, janiyari na tojiaquiquiaajuhuj, nojori-
tia cua quishacari. Janiyari naa miiquiaani nojori mariqui
cua sooreeri, janiya jaara juhua tamaatia quijia quiri nojori
niquiarani. Naajaa, Pueyaso rootasano tojiquiaa pueyara-
caanu cutaranijia. Naajuhuj, puetunu Jesucristo niishitio-

josanojuanaa tojiquiaanijia. ²² Noojiaqueya Pueyaso muera-suuri maja na naata tarinitianu najuhuana na supuetanaa rootasano. Cuaara tarinitiaara najuhuana na supuetanaa rootasano. Naajaa, janiyari mariyata cuno najuhuana rootasano tojiquiaajuhuj nojoritia cua quishacari. Nojori jiyanihacari tamonu casaa sesa quiya, janiyari mariyata maja cua miiniu nojori pueresano casaa. Naacujitij, cua naata nojori cumaquiniu maninia Pueyaso rupaata, nojori tojtiasacari janiya, juhua nojori cua quishacari. ²³ Janiyari puetunu naa miiquiaajanaani, socua pueya cua tojtiniuria Jesucristo rupaa. Naa maninia poonijioquiaa cua Jiyani-ijiaranijia, cua masenura puetunu maninia na sequesanojuanaa na muerasura.

²⁴ Niaacujaari niishiya taa pueya tacuarishiyajoquiaacua-jani. Pueya netecuatusacari, puetunu pueyajanaari jiyanhua netecuatujua jaarajaaja. Cante narta netecuatunaa shocotajani, shanhua casaa niqutioshiyari. Ritiuquia pueyanoori jiyanhua shuquiriaatia quijia na shocotanujiniji na masesacari casaa. Naajuhuj pueyanaa, jiyanhua nia poonijiore Pueyasora mijiria, shuquiriaatia nia masenura nia poonijosanojiniji na jütiasanojiniji jiyocuacaanu. ²⁵ Naajuhuj, pueya jaara tacuarishijionu paniri, cante shocotanu paniyani, cuno pueyanoori puetunu najuhuana na miiniu panishanojuanaa tarinitiaja, na cuaqueya quiniuria cumueeca. Naa miiquiaari narta pueya na shocotanura, shuquiriaatia na quiniuria. Saniniuujia, na masesano na shocotanuucuan, cunoori saaja shanhua nacaque jaamasujiniji shitiasano. Majaari na rishiniu. Pajaniyari saniniuujia pueyaracaanu shuquiriaatia quiniutianiyani Pueyaso niqutiosanota pajaniya, paa jaara maninia miiri mijiria pa quishacarini. Naaratej, pa tarinitiare puetunu najuhuana tama pa miiniu panishanojuanaa, pa shuquiritiniuria pa Pueyaso.

²⁶ Pueya netecuatusacari, netecuatunaa cuaara niishiiria tee netenu puequeetu quiyani. Majaari najuhuana na camarucuneejonu. Naajuhuj, cua poonijosacari Pueyasora, majaari cua niqijiotenu coojia.

Mocoritia piyotoosacari, pueyanoori namitia piquiquiaa narta pueyano. Majaari najuhuana na piquiniu capa. Naajuhuj, pa cartere najuhuana pa miijosano. Saaja pa niishiriojore Pueyasocua, maninia pa tojiniuria nojuaja. ²⁷ Janiyari jiyanhua saniniujuquiaa maja cua miiniuria tama cua cuaqueya miiniu panishanojuajani. Janiyari cua cuaqueya jiyartuutenu paniquiaani saa Pueyaso cua tojiniuriaja. Janiyari tari queraatia pueya niishitiojoquiaari Pueyaso rupaani. Janiya jaara tama cua niishitijosanojuaja tojiyaquirini,

Pueyaso mariqui cua cartereeri, maja na rupaa cua pahuatana socua.

10

Supuetanaa Israel pueya miishanoori pajaniyara naajio-tasaaquiaari pa niishiniuria maninia

¹ Cuarta Pueyaso pueyanaa, nia niishiri taa pa supuetanaa Judiocuaca miishaaquiaaricuaani nojori rucuanijosacari pueyaracaanu cariiquia jiyajinia. Majaari nia niyajetanu niaa mariqui Pueyaso tojiyashijiara quiriohuajuhuj. Nojori mashishacari Egipto jiyajiniji, Pueyasoori cohuaja najaca shipiniquiaari nojori na cojuanura, nojori puetariquianojuhuaj. Pueyasoori puereetuca shoniniacu caminia raquitiaquiaari nojori nuura caminia cajiniocua. Naacuajitij, puetunu pueyajanaari niuutiaquiaari joojuashiquio. ² Naaratej, puetunu nojorijianaari juhua Moisés muerasura jiyatesaaquiaari, nojori nuhuajishacari Moisés puereetuca caminia tajiniaaco, cohuaja najaca cariquiaconio. Majaari socua na quituniu quiquiaari Egipto pueya seya. ³ Puetunu nojorijianaari jiya cajiniocuaji casaa miaquenuujua, Pueyaso tinishano nojori miaquesocoriquiano pueyaracaanu cuno cariiquia jiyajinia nojori rucuanijosacari. ⁴ Naajuhuj, nojori jiyamuetusacari, Pueyasoori mohuaca pojuartaniquiaari saajiajiniji. Puetunu pueyajanaari cuno mohuaca ratuquiaari. Pueyasoori cuno saajiajiniji naa raatequiaari nojoritij, na niishitiojonura cuno pueya, nojuajaari nojori nuhuajiriquiaa jiyasohuaja, pueyaracaanu nojori na cojuanura. ¡Nojuacuajaari pa Jiyaniijia Cristo quiquiaari! ⁵ Puetunu cuno supuetanaa Israel pueyajanaari naa maninia cojuasano quiquiaari cariiquia jiyajinia. Naajaa, quera puetunu nojorijianaari Pueyaso tojitiaashijia quiquiaari saaja. Pueyasoori cunora nojori shuquiritiaaquiquiaari. Naaratej nojori cusojuanuuriquiaari cuno cariiquia jiyajinia nojori camarucunetasacari pueyaracaanu, cuara puequequiaariijaatijia puetunu cuno tojiyashijiacajanaa.

⁶ Naa miishaaquiaariti cua supuetanaa Judiocuaca, sesa casaacua nojori jiaatianuucua. Nojorijinijiiri puetunu naajiotasaaquiaarijanaa pajaniyara, pa niishiniuria maja sesa casaacua pa jiaatianurajuhuj. ⁷ Shushajanaa nojori coteesacari rucuanenu cariiquia jiyaco, noojiaqueya nojorijinijinoori caapiqui casaa shipiniquiaari orojiniji juhua juunu niquishano. Nojoriiri tama nojori shipinijosano casaa-jaaja sequequiaari: “Nioori pa Pueyasohua, pa mashiquiniaa Egipto jiyajinia pa camarucuaacuaji”. Naacuajitij, nojoriiri

na shipinishano casaa shuquiritiaquiaari sacuaraatia. Jiyacari nojori miishanoori naa naajiotasaaquiaariti:

“Pueyari cajituri queraanacunura. Na nuhuaji, nujuatuquiaariiri na shipinishano juyaca tajoji na jiareyocuatunura. Socua sacuaraatia casaa miituuquiaariiri”.

¡Maja naa pa miiniuti pueyanaa! Maja pa timitianu tamonu casaa Pueyaso niti. Saaja Pueyaso pa timitiare cutara.

⁸ Na nuhuaji, tamacari, noojiaqueya nojorijinijinioori sesa miiquiaari taatujuritia, cararaatia taucuaca miishacari nojori shuquirishacari na shipinishano casaa tajoji. Pueyasoori nocuaji naa sequequiaari: “¡Cuaara puecoosaria cuno sesa miijiaca!” Cunora, veintitrés mil Judiocuacaari puecoosaaquiaari cuno juuca. Cunojiniji pa niishiri maja pa miiniuria sesajuhua, taa nojori miiquiaaricuaa taatujuritiani.

⁹ Na nuhuaji, noojiaqueya nojorijinijinioori Pueyasota juaaquiouquiaari, tamonu miaquesanoocua nojori jiaatiasacari, puera nojori jishacari nojori miaquesano. Nocuaji Pueyasoori sacocua satejoquiaari cuno pueya. Queraatia pueyari cusonuquiaari. Naaratej pueyanaa, maja cumaati pa juaaniu, Pueyaso jaara pa saniniujiuri. Maja naa pa miiniutij paa mariqui Pueyaso juaatiriiri.

¹⁰ Tamacari, noojiaqueya cuno pueyajinijinioori Moisésta juayonuutaquiaari. Moiséscajaari nojori jitianara Pueyaso jiyatesano quiquiaari. Nocuaji Pueyasoori na seru jiyarouquiaari cuno juaajiaca na cusojuanura. Queraatia pueyari cusonuquiaari jiyacari. Naaratej pueyanaa, majaari pa juaatianu pa jiyaniijianucua.

¹¹ Puetunu pa supuetanaajiniji naajiotasanojuanaari tarucuaaanu naajiotasaaquiaari, pa numootesaanura quiarijiani, quera pa Jiyaniijia muetasacariuhua. ¹² Naaratej pueyanaa, tama nia cuaqueyajaaja nia cojuare nia jiyaniishacari niaari Pueyaso tojjia seetanu cutarajanaa, niaa mariqui sesa miiriiri, juhuajaniya nia quishacari tamajaaja. ¹³ Niaari mariyata saniniujiushaaquiaajuhua, taa puetunu parta Pueyaso pueyajanaa saniniujiushaaquiaacuaani. Naajaa, nia naata Pueyasocua tiuuniu maja puera nia saniniujiushaanura. Pueyasocujaari niishiya taate nia naata rejere-tanuni. Majaari puera pa saniniujiushaanu quiniutianiya. Pueyasocua nia niishitiojore taate nia naata cartesano quiniuhuani taraatia nia miiniucujaji. Naacujiti pa naata rejere-tanu, Pueyaso jaara Sesaaca saniniujiutiri pajaniya.

Maja pa cojiniu tamasaca, na miaquenuusacari na jiyani-tiushano na pueyasocuaru na puecootusano

14 Cua panishano Pueyaso muerasunaa, maja nia tiuquitianu tamasaca pueya jiyanitiushano pueyaso quiquiojinia, na tojitianaa nia cojiniuria, nojori shuquiritiasacari juaashiquiata shipinishano casaa Pueyaso niti. Maja nojori cojiniu, niaa mariqui saniitiosaareeri. 15 Niaacuajaari niishijiaca. Naaratej, nia niishiriojore cua sequesanoocua.

16 Paa jaara rerejore pa Jiyaniijia cusonu juuca pa niishiniuriani, pa ratunu panishacari, paari sequequiaani: "Paacarasho canaa Jiyaniijianaa, quia nanacaari puetunu canaacuarajanaa shooquiaari". Naa pa ratusacari cuarta Pueyaso muerasunaa, puetunu pajaniyajanaari pa Jiyaniijia rupuesano quiquiaani, na nanaca shoonuucua puetunu pocuarajanaa. Naajuhuj, pa miaquesacari, paari sequequiaani: "Canaa Jiyaniijianaa, quiaari quia cuaqueya nootunequiaari puetunu canaacuarajanaa". Naa pa miaquesacari, puetunu pajaniyajanaari jatiqui pa Jiyaniijia cojiquiaani, na cuaqueya cusonuucua pocuara. 17 Cuno pan pa miaquesacari, puetunu pajaniyajanaari niquiriyatu panjini neecasequiaani. Naacuajitij, paari niishiyani puetunu pajaniyajanaari rupuetoono quiya pa Jiyaniijiatani, juhua niquiriyatu cuaqueyaja.

18 Nia niishiriojoriquia taa Israel pueya miiquiaacuaani. Nojori miaquesacari Pueyasooacara na mosano Pueyaso niquiara, na niti nojori mosano seruuri juhua tama nojorijiaaja, Pueyaso jiyanooniuria nojori. Naacuajitij, nojoriiri na naata Pueyaso rupuenu, nojori secojonura nojuaja. 19 Jaara naa quiriritij, ¿taateerini, pueya jaara shipinijosano casaacara mosano shu miaquere? ¿Casaate pueya jyanishano pueyasooacara mosano shuni? Nareja shucuaajaari. ¿Cumaacaraca quiijate cuno, pueya shipinishano casaa juhua Pueyasorani? ¡Maja! 20 Naajaa, nia tojitiare casaa cua sequenutaniyani. ¡Pueyaso niishiyashijiaca pueyari na miaquesocoriquiano na seya puecooquiaa samaruhuacuara! Naa nojori miishanoniquitij, cunoori maja Pueyasora. Naacuajitij, nojoriiri samaruhua rupuequiaa, maja Pueyaso. ¡Majaari cua paniniu nia rupuenura samaruhua! Nocuaji, maja Pueyaso niishiyashijiaca nia cojiniu cuno shu nia miaquenura. 21 Majaari pa naata pa Jiyaniijiatata rupuetoonu, samaruhuata pa rupuetooacarijuhuaj. ¿Pueyasote samaruhuata cojitishiya? Pa Jiyaniijia cusonu juuca pa niishiniuria, ¿paateeri na sequesano miaquenutaniyani, samaruhuacuara mosano casaajuhuj? ¿Cojitishiyatee? ¡Maja pueyanaa! 22 ¿Paateeri pa Jiyaniijia paraca cojiniu paniyani, pa Jiyaniijia pa juaatiniuriani? ¿Pajaniyate socua cumueeca

pa Jiyaniijiajinijini? ¿Majateeri nia puerenu pa Jiyaniijia saniitionu?

Taa pa miiniutianiyani

²³ Tari sequereecuajanijia, pa naata miiniu puetunu pa miiniu panishanojuanaa. Naajaa, majaari puetunu pa miiniu panishanojuanaa maninia pajaniyara. Puetunu pa miiniu panishanojuanaari maja na cumaquiniu quiniutianiya parta Pueyaso pueya. ²⁴ Naaratej, majaari pa niishiriojonu saaja maninia pa quiniuria tamajaaja. Pa niishiriojore parta puey-acua, maninia nojori quiniuriajuhuaj. ²⁵⁻²⁶ Seetanujuanaari nio naajiosano: “Nio jiyari pa Jiyaniijia jiya, puetunu tii quijia casaajanaano”. Naaratej, niaa jaara shu masere shu niq-uitiojosaquiji cumaneecata, majaari nia nequesotanu: “¿Nio shujiyo casaacuara mosano?” Maja naa nia nequesotanutej. Nia panishano nia masere nareja, nia miaquesocoriquiano juhuajaniya. Pa Jiyaniijia shipinishanocujaari. Pa miaquesanoori maja na naata na sesonu pajaniya Pueyasora.

²⁷ Pueyaso niishiyashijia jaara nia masuure nata nia mi-aquenura, nia quiaare, niaa jaara quianu paniri. Juhua-janiya nia miaquere na rupojosano niaara. Majaari nia nequesotanunoj: “¿Nio shuti casaacuara mosaarucuaa?” Majaari naa nia nequesotanu niaa mariqui nioojia macuhua-jetereeri niaa jaara niishiri nia miaquesanoori shipinishano casaacuara mosano juhua Pueyasooacara. Juhujaniya nia miaquere nareja. Puetunujuanaari pa Jiyaniijia shipinishanocuja. ²⁸ Saniniuujia, nia cojinia jaara numootere nijaniya: “Nio shuuri mosaaree shipinishano casaacuara juhua Pueyasooacara”, majaari nia miaquenunoj, niaa jaara naa sequesaare. Maja nia miaquenunoj, nia cojinia mariqui na miaquerejaarihuaj na cojishacari nijaniya. Nia tarajana jiyoteeri jiyaniyajaa cuno shipinishano casaari seetanujuanaa cumaacaraca quijia. Naacuajitij, na miaquesacari nocuara mosano shu, noojia macuhujanutaniyari. ²⁹ Majaari nio cua sequenu niaara. Niaacuajaari tari niishiya nia naata cuno shu miaquenu. Nia sequeya nio cutaranijia nia cojiniaa pueyara, maja nia miaquenura cuno shu nojori niquiara, nia cojinia mariqui noojia macuhujareeri cuno shu na miaquesacari niaata.

Niaa naasucuaari cua nequesotanu paniya: “¿Paatucua pa panishano shu miaqueyaquirini saaja tamonu pueyano pueresacari pa miaquenu panishano shu? ³⁰ Paa jaara Pueyaso sequereni ‘paacarasho’ cuno sumatuurani, ¿majateeri maninia pa miaquenura? ¿Tamasacatucua casaara pa sesacare cuno miaquesano pa miaquesacarini?” ³¹ Cua

tojitiare quenaaja cuarta Pueyaso muerasunaa. Nia mi-aquesacari, nia ratusacari, casaa nia miishacarinio, pueyara-caanu puetunu maninia nia miirijianaa Pueyaso nia shuquir-itiniuria. ³² Puetunu nia miishanojuanaa cuaara qui-iria maninia Judiocuaca niquiara, taucuaca niquiarajuhuaaj, parta Pueyaso pueya niquiaranio. Jiyanohua taraatia cu-taraari, pueya jaara tojiyaquiya Pueyaso, juhuajaniya pa mi-ishacari nojori jiyantiushano sacuaraatia casaa. ³³ Naaratej, janiyari pueyaracaanu maninia miiniu paniquiaa puetunu pueya niquiarajanaani, nojori cuaara tojitiaara Pueyaso, Pueyaso pueyara nojori jiyatesaanura. Majaari cua niishirio-jonu tama cua panishanojuaja cua miiniuria. Janiyari socua niishiriojoquiaa tamasacaacuani, maninia cua miiniuria no-jori niquiara.

11

¹ Naaratej cucua nia jiaatiare, juhua janiya nia miiniuria maninia saaja, naatej, taa Cristoocua cua jiaatiaquiaacuani, juhua nojuaja cua quiniuria. Mijiria na quishacari, nojuacua-jaari pueyaracaanu maninia miiquiaari pueyacuaa.

Maajipohuatucua taa quiriquiani Pueyaso pueya rere-josacari

² Cuarta Jesuucua tiunianaana, janiyari nia shuquiritiaani, pueyaracaanu nia niishishacari janiya, naajuhuaaj, maninia nia tojitiasacari puetunu cua niishitiojosanojuanaa Pueya-sojiniji. ³ Janiyari paniya cutarani socua nio nia niishini-uria: Cristocuajaari caya camarnu. Cayari saniniuujia necocua camarnu, taa pa Que Pueyaso pa Jiyaniijia Cristo camarnu quiyacuaani. ⁴⁻⁵ Naaratej, nia secojosacari Pueyaso, nia caminiujiushacari Pueyaso sequenu panishano Pueyaso pueya maanu niquiarajuhuaaj, jiyacaritij, canuu cuaara jocuaara na nacaque na pocuasacari. Saniniuujia, maajipo-hua pocuanura, nojori cuaara mishiquioora na naca toquer-auta. Cararaatia cutaraari caya jaara pocuare Pueyasora, Pueyasotajuhuaaj, na naca mishiquiosano. Cararaatiajaari-uhuaaj, maaji pocuasacari Pueyasota, Pueyasoranio, na naca mishiquiosoo. Maaji jaara caririquiyashijia quiri, ¿casaara na naca na tuqueteyaquiya puetunujuaanaacuaraarini? ¿Maajiti juhua cayara quiniu paniya? Maja naasucua. ⁶ Maaji jaara na naca mishiquionu paniyaquiri pueya niquiara na pocua-nura Pueyasora, Pueyaso na secojonuranio, cuno tojiyashijia cuaara tuqueteera na naca. ¿Cararaatiatee, maaji jaara na

naca tuquesano quiri juhua caya? Taaquiriirinij. Cararaatia quiyajaariuhuj, na secojosacari Pueyaso, na caminiujiushacari Pueyaso sequenu panishano pueya niquiara-juhuaj, mishiquiosoo na naca quishacari. ⁷ Maajiiri neyaca shuquiritiya na tojijia na quishacari. Naacuajitij, neyacaari narta pueya shuquiritiasano quiyajuhuj. Naaratej, maaji cuara mishiquioora na naca na secojosacari Pueyaso, pueya niquiara, maja neyaca na rerequetenura. Canuuri shipinishaaquiaari juhua Pueyaso na quiniuria, Pueyaso shipinishano casami camarnura na quiniuriajuhuaj. Cayari Pueyaso shuquiritiya Pueyaso tojijia na quishacari. Naaratej, nia rerejosacari, canuuri maja nacaque na cushiniu na caminiujiushacari Pueyaso rupaa, na secojosacari Pueyasojuhuaj.

⁸ Pueyaso jaara coteenujuanaa caya shipiniquiaari, majaari maajijiniji na shipininiu quiquiaari caya. Maaji cutaraari caya riuquiocujiniji shipinishaaquiaari. ⁹ Naacuajitij, maajiiri cayara shipinishaaquiaari. Majaari caya shipinishaanu quiquiaari maajiria. Naaratej, maaji cuara caya tojiiria cutara. ¹⁰ Naacuajitij, maaji secojosacari Pueyaso, na caminiujiushacari Pueyaso sequenu panishano pueya niquiara, cuno maaji cuara mishiquioora na naca. Naacuajitij, pueyari niishiniutianiya cuno maajiiri maja neyaca rerequeteja. Naa maninia quiya Pueyaso seya niquiarajaariuhuj. ¹¹ Naajaa, puetunu pajaniyajanaari mariyata Pueyaso muerasuni, Jesucristoocua pa tiushacari, canuu, maajipohuanio. Naaratej maja pa rerequetenu tamonu. Caya, maaji, nojoriiri mariyata panishano. Maajiiri maja na naata tamajaaja supueno cayaju. Naajuhuj, cayari maja na naata supueno tamajaaja maajijiu. ¹² Seetanujuanaari, maajiiri coteenu shipinishaaquiaari caya cuaqueyajiniji. Na nuhuj, puetunu canujuanaari saniniuujia supuequiaa maajijiniji. Naajaa, puetunu pajaniyajanaari Pueyasojiniji supuequiaani. Naacuajitij, caya, maajinio, nojoriiri mariyata panishano pa naacutoojonura.

¹³ ¿Taa nia sequeyani pueyanaa? ¿Maniateeri, maaji jaara Pueyaso secore na naca mishiquiosoo pueya niquiara? Maja maninia. ¹⁴ Naajuhuj, quera puetunu pueyajanaari sequeja, cararaatia niquishanoori caya jaara tucamuejaru quiya juhua maaji. ¹⁵ ¿Maajirijiataj? Jaara tucamuejaru quiri, cunoori maninia niquishano cutara. Pueyasoori naa maninia shipiniquiaari maaji, tucamuejaru na quiniuria, na naca mishiquioriquiano na muecacata. ¹⁶ Tamonu jaara nacoonu panijaa socua pa muesujiniji, niocua na sequere: “Pablocajaari tari pa niishitiojoree puetunu na niishishano-

juanaa. Naajuhuaaj, puetunu Pueyaso pueya maapuejanaari tamaquiicua naa miiquiaa taa Pablo pohuatatee pajaniyacuaajani. Majaari socua pa niishiniu tamaatia quiniu”. Niojuanaari cua rootasano cunojiniji, pueyanaa.

Corinto pueyari sesa miiquiaari na miaquenujuajinia, pa Jiyaniijia cusonu nojori niishishacari

¹⁷ Cuarta Jesuucua tiunianaanaa, nio, janiya niaacuara na naajiyani, nioori maja cua shuquiritianura niajaniya. Nia rerejosacari pa Jiyaniijia cusosacari nia niishiniuria, niaanaari saaja sesa miiquiaa. Nia rerejonuni, cunoori nia cumaquitioonura juucua. Nia rerejosacari saniniuujia, niaari saaja socua seseyaree. ¹⁸ Janiyari naa pohuatasaarucuaa niajaniyajinijini: “Corinto pueyari sesa na niishiriojonuta nojori jiuujiajinia raquirijitiaquiaa nojori rerejosacari”. ¿Seetanutejanaa nio pohuatasano niajaniyajiniji? Naa naasucuaaj. ¿Casaate cua toyani? ¹⁹⁻²⁰ Seetanu naasucuaanaa niaari nioojiajinia naa niaaquejoquiaaquij. Paacuaajaari tari niishiquiaarini noojiaqueya pueyari Pueyaso pueya maapueecuaji rupatenutaniya. Naa niishishanote canapueete maja Pueyaso muerasuni. Cante seetanujuanaa Pueyasocua tiuujiani, majaari na rupatenu quiniutianiya narta Pueyaso muerasuucuaaji. Cuarta Pueyaso muerasunaa, niaacuajaari Pueyaso pueya maanu. Naaratej, niaa jaara rerejore nia miaquenura pa Jiyaniijia cusonu nia niishiniuria, maja sesa nia niishiriojonu juhua niaaquejono nia quiniuria. Niaa jaara naa niaaquejoriquiatej, majaari pa Jiyaniijia cusonu nia niishiniu quiquiaa seetanujuanaa. ²¹ Niajaniyanaari tama nia patasanojuaaja coteetaquiaa miaquenu. Niaanaari nia miaquesano serotaaquiquiaa. Naacuajitij, casamiijiuniucuaanaari miaajecoquiaacujua. ¡Saniniuujia casamiriacanaari juhuajaniya mashaasequenuquiaacujua! ²² ¡Jiyanohua cararaatiaari naa nia miishanotej! Niaa jaara naa jamuejaca quiriquiatej, ¿majate nia naata tama nia tiajiniajaaja nia miaquenuunu, ratununio? ¿Niaateeri niarta Pueyaso muerasu sooquiaa? Naa nia miishacari casamiijiuniucuatej, niaacuajaari nojori cararoquiaa, casamiijiuniucua nojori quiniuucua. ¿Taa nia sequeyani pueyanaa? ¿Janiyate nia maniniuhuaqueetaani? ¡Maja! Jiyanohua tacayanijia. Majaari cunora cua shuquiritianu niajaniya.

Pa Jiyaniijia rootasano na cusonu pa niishiniuria

²³ Janiyacuajaari nia rootacanu tari pa Jiyaniijia Jesu pohuatasano janiyani, taa na miaquequiaari na saquirojosano pueyatani. Cuno niucuaaja, Judasri pa Jiyaniijia quiateriquiano quiriquiaa taucuaca mosocoriquiano. Cua

tojitiarohuacuara pueyanaa. ²⁴ Judas quiateyaquishacarijia nojuaja, pa Jiyaniijia Jesucristoori pan riquiaari. Na Que Pueyaso sequereeri: “Paacarasho cua Quena”. Na nuhuaji, na neecaserohuari na serotanura na pueya. Nojori sequereeri: “Nioori cua cuaqueya, niaacuara cua panitiaca nia jiyanooshaanura. Nia miaquere. Niocua naa miiriquia pueyaracaanutej, nia niishiniuria cua miishano niaacuara”.

²⁵ Naajuhuj, nojori miaquenu nuhuaji, Jesuuri raatonuque pataquiaari na pueya na serotanura. Coteenu na Que secojoreeri. Na nuhuaji, na pueya sequerohuari: “Pueyaracaanu nia ratusacari nio, nia niishiriquia, cua Queeri cua nanaca seera nia jiyanooquiaa, na muerasu nia quiniuria. Seyari maja socua niaacuara na moonu quishaanutaniya, sesa nia miiniu jiyanooshaanura juucua. Janiya cutaraari nia niti mosaanutaniyani”. Pa Jiyaniijiaari naa sequequiaari. ²⁶ Naa nia miaquesacaritij, nia ratusacarijuhuaj, pueyari niishiniutianiya niaari Pueyaso jiyanooshano pueya, pa Jiyaniijia Jesu cusonuucua pa niti. Naa nia miaqueriquia pueyaracaanu na sequesano pan, pa Jiyaniijia cuaara tiuquiriohuajaatijia.

Nia niishiri taate pa naata miaquenu pa Jiyaniijia cusonu pa niishiniuriani

²⁷ Naaratej, niaa jaara sesa miiri, Pueyaso nia secojore ritia na jiyanooniuhuara niajaniya, nia miaquenuhuara pa Jiyaniijia cusonu nia niishiniuria. Niaa jaara pa Jiyaniijia pan miaquere jiyanooshoo nia quishacarijia, niaa jaara na cusonu mashaca rature jiyanooshoo nia quishacarijuhuaj, jniaari na cusonu rerequeteya! Niaari juhua sequeyaruhua, pa Jiyaniijia najuhwana cusoquiaari. Naa nia miishacaritij, niaa cutaraari saniitiosaanutaniya.

²⁸ Naaratej, tama nioojiajiniajaaja nia niishiriojore taa nia quiquiaani, casaa nia miiquianu sesani. Naa nia miiri coteenu, niaa mariqui sesa nia miishano miaquetareeri Pueyaso jiyanoyaquishacarijia niajaniya. Naa nia miiniu nuhuajitij, niocua shuquiriaatia juhuajaniya miaquerohua pa Jiyaniijia pan. Niocua juhuajaniya raturuhua pa Jiyaniijia raatonuquejiniji cutara. ²⁹ Cante juhuajaniya miaque-reeni, cante juhuajaniya raturee najuhuanani, jiyanooshoo na quishacarijia, cuno pueyanoori Pueyaso saniitiotentaniya tama na cuaqueyajaaja. ³⁰ Naacuajitij, jiyanooshoo nia quishacarijia nia miaquesacari, queraatia niajanijini-jinioori cunora cusosuhua quiya. Noojiaqueya niajanijini-jinijinio cutaraari tari cusonuucanujuhuj, Pueyaso saniitiosacari nojori. ³¹ Nocuaji tama nia cuaqueyajaaja nia

jeecare suraatia, pa Jiyaniijia mariqui saniniuujia nia saniitioreeri. ³² Pa Jiyaniijia jaara pa saniniujiuri, canapuetesesa quiyani, Pueyasoori na saniitioquiaa na muerasu nojori quiniuucua, maninia nojori quiniuhuara juhua maninia na muerasu. Naacuajitij, juhuacarijia na saniitiosacari na muerasu, majaari pa saniitiosaanu quiniutianiya na ruuretatacata jiya puequesacari, Pueyaso jaqueroosacari na tojiyashijiaca.

³³ Naaratej cuarta Jesuucua tiuuniaanaa, niaa jaara pa Jiyaniijia pan sanu paniriquia na cusonu niishiniuria, nia sashiri niarta Pueyaso muerasu, jatiqui nia miaquenura maninia. ³⁴ Miaajeyano maaraja, cuara miaqueera coteenu tama na tiajiniajaaja, Pueyaso mariqui nia saniitioreeri, sesa nia miiniuucua nia rerejosacari nia jamuenuta.

Socua nia nequesotasanojiniji janiya, janiyari nia sequenutaniyani cua tiuquishacari niaacua.

12

Pueyaso Sohuanu cumaquishacari puetunu Pueyaso muerasujuanaa

¹ Cuarta Pueyaso muerasunaa, niaacuajaari tari niishiya Pueyasoori na Sohuanu niqutioquiaa puetunu pajaniyajanaa, na cumaaca pa jiitianura. Quiarijiani, socua nia niishitiojonu paniya cunojinijinjia. ² Niaacuajaari niishiya taa nia quiquiaari tarini, Pueyaso niishiyashijiaca nia quishacarijia. Niaari puetunu sapojosaaquiaarijianaa, pueya shipinishanoocua nia tiuuniuucua najuhuanaj. Sesaacaari naa nia tojitiquiaari najuhuaana pueya shipinishano, nia jyanishano pueyasohuani. ³ Naaratej cua pueyanaa, maja sapojosano nia quiniu socua. ¿Taate pa naata niishiniuni, cante seetanjuanaa Pueyaso Sohuanu cumaacata pohuataa Pueyasojinjini? Naa nia saniniujiuritij: Pueyaso Sohuanu pohuatesacari pueyano, nojuajaari maja na naata Jesucristo sesacanu. Naajuhuj, saaja Pueyaso Sohuanu cumaquishacari pueyano na naata sequenu: “Jesucuaajaari Jiyaniijijajanaa”. Naacuajitij, maja nia tojiniu na rupaa, cante Jesucristo sesacajani.

⁴ Pueyaso Sohuanuuri niquiriyatujua. Naajaa, Pueyaso Sohuanuuri puetunu Pueyaso muerasujuanaa cumaquiquiaa tamaatia miishano pa miiniuria na cumaacata. ⁵ Queraatia tamaatia poonijiosanoori Pueyasora quiya. Naajaa, puetunu pajaniyajanaari niquiriyatujua Jiyaniijiaara poonijioquiaani. ⁶ Puetunu pajaniyajanaari tamaatia miiquiaa pa poonijiosanoni. Saniniuujia, Pueyasojuaanaari na panishano miiquiaa puetunu pueya jiuujiajiniajanaa. ⁷ Pueyasoori puetunu na

muerasjuanaa cumaquiquiaa na Sohuanuta, maninia pa miitioonura, Pueyaso muerasu maapue cumaquishaanura puetunujuanaa. ⁸ Pueyasoori pa cumaquiquiaa tamaatia miishano pa miiniuria. Naacujitij, Pueyaso Sohuanuuri tamonu pueyano pohuataniquiaa Pueyaso niishishano na muerasura. Pueyaso Sohuanuuri tamonu pueyano niishitiquiaajuhua Pueyaso sequenu panishano pajaniya. ⁹ Pueyaso Sohuanuuri tamonu cumaquiquiaa Pueyasooocua na tiuuniuria jiyanoehua, na shiniujiuniuria Pueyaso miiniu panishano pa miiniuria. Pueyaso Sohuanuuri tamonu cumaquiquiaajuhua cusosuhua na naatanijionura Pueyaso cumaacata. ¹⁰ Pueyaso Sohuanuuri tamonu pueyano jiyajeneta miishano miitijajuhua Pueyaso cumaacata. Tamonuuri niishitishaaquiaa Pueyaso sequenu panishano na pohuatanura pueya niqiuara. Pueyaso Sohuanuuri tamonu niishitiquiaa teyano sohuanute tamonu pueyano cumaquiyani, Pueyaso Sohuanuuri, sapojona samaru soj. Pueyaso Sohuanuuri tamonu pueyano pocuatequiaa tamaatia rupaaca, na niishishoo rupaa. Pueyaso Sohuanuuri tamonu pueyano niishitiojoquiaa tamaatia rupaajinia sequesano na pacunura pueya rupaajiniajuhua, pueya tojiniuria maninia tama nojori rupaajiniajaaja. ¹¹ Naacujitij, Pueyaso Sohuanujuanaari puetunu pa cumaquiquiaajanaa, tamaatia pa miiniuria. Naa pa poonitijioquiaari taa na paniyacuajani, cana na panijajaaniuhua.

Puetunu Pueyaso pueyajanaari juhua niquiriyatu cuaqueya quiya

¹² Tamaatia poonijosano puetunu pajaniyajanaa jiiiasacari, paari juhua niquiriyatu cuaqueya quiyani. Mijiria pa cuaqueyari jiyanoehua maninia shipinishano jiyanoehua Pueyaso niishitijata. Pa cuaqueyari maja saaja shu na quiniu. Pa cuaqueyari queraatia tamaatia casaaraca. Puetunu pa cuaqueya casaajanaari jatiqui poonijioquiaa pa cuaqueyajinia, maninia pa quiniuria. Puetunu pa cuaqueya casaajanaari saa niquiriyatu cuaqueyaja quiya. Jiyano pa cuaqueyatej, Pueyaso muerasuuri naa quiyajuhua. Naacujitij, Cristota rupuetootesano pa quishacari, puetunu pajaniyajanaari juhua niquiriyatu cuaqueyaja quiyani, pa Jiyaniijiaara pa poonijionura jatiqui. ¹³ Pueyasoori pa rupuetootequiaa na Sohuanuta, puetunu jatiqui pa quiniurijanaa. Pueyasoori puetunu na muerasjuanaa samiitianiquiaari na Sohuanuta. Pueyaso Sohuanuuri pa jiiiasacari, puetunu pajaniyajanaari rupuetootesano quiya niquiriyatu Sohuanutani. Naacujitij, paari juhua

niquiriyatu cuaqueya quiyani: Judiocuaca, taucucanio, poonitijosano pueyajuhuj, camarnuju pueyano.

¹⁴ Pa cuaqueyajiniji pohuatareeraj. Pa cuaqueyajinia, majaari saa niquiriyatu casaaja quiniu. Queraatia casaari quiya pa cuaqueyajinia. ¹⁵ ¿Taa nia sequeyani pueyanaa? Pa niohuaca jaara sequere: “Janiyari maja juaashiquiani. Naaratej, janiyari maja pueyano cuaqueyajinijini”. ¿Taa nia sequeyani cuarta Pueyaso muerasunaa? ¿Pa niohuacate maja pa cuaqueyajiniji, maja juaashiquia na quiniuucua? Maja. Naajuhuj, majaari pa soonu tamaatia poonijosano pa jittiasacari Pueyasora. ¹⁶ Naajuhuj, pa numaa jaara sequere: “Janiyari maja namijiani. Naaratej, janiyari maja pueyano cuaqueyajinijini”. ¿Taa nia sequeyani pueyanaa? ¿Pa numaaate maja pa cuaqueyajiniji, maja namijia na quishacari? ¿Sooshiyatee? Maja. ¹⁷ Paa jaara saaja puereetuuca namijia quirini, shaaqui pa cuaqueya, ¿paatucua tojirini? Maja pa naata. Paa jaara saaja numaa quirini, shaaqui pa najuhua, ¿paatucua nujuuriquiiani? Maja pa naata.

¹⁸ Pueyasoori namitia pa cuaqueya shipiniquiaari puetunu pa panishano casaatajanaa. Puetunu pa cuaqueya casaajanaari rupuetootesaaquiaari tee Pueyaso paniquiaari ni-anucujani. Naajuhuj, Pueyasoori puetunu na muerasujanaa cumaquiquiaa mariyata, tamaatia poonijosano pa jittianura taa na paniyacujani. ¹⁹ Pa cuaqueya jaara quiriquia saa namijiaja puetunujanaa, ¿pa cuaqueyatuma tee quiriquia socuani? ²⁰ Puetunu pa cuaqueya casaajanaari namitia saaja niquiriyatu cuaqueya quiya.

²¹ ¿Taa nia sequeyani pueyanaa? Pa namijia jaara pa juaashiquia sequere: “Juaashiquianaa, niaari najuhuana quijiaca. Maja nia naata niquiniu”, ¿majate pa juaashiquia pa panishanojuhuj? Taaquiririnij. Naajuhuj, pa naca jaara pa niohuaca sequere: “Niohuacanaa, niaari najuhuana quijiaca. Maja cua paniniu niya nijaniya”, ¿majate pa niohuaca pa panishanojuhuj pa rucuanejotajara? Taaquiririnij. Pueyanaa, naa pa quiri jatiquijihua puetunu parta Pueyaso muerasutajanaa, taa puetunu pa cuaqueyajinia pa jittiasano casaajanaa quiya jatiquicuaani. Naaratej, puetunu parta Pueyaso muerasujanaari pa panishano quiya, pa cumaquitionura maninia. ²² Teyano casaate pa cuaqueyajinia socua sasaca quiya pa niquiarani, cunoori socua pa panishano. Maja pa naata rishiniu cunooju. ²³ Naajuhuj, teyanote maja puera maninia niquishano pa cuaqueyajiniani, paari toque cushiquiaani pa cararaatiuuquia pa mishiquionura, maninia pa niquishaanura. Paari caririquijia cutarani, juhwasu pa quishacari. ²⁴ Saniniuujia, maninia

niquishano casaa pa cuaqueyajiniani, majaari cuno pa mishiquionu quiquiaa toqueta. Pueyasoori naa puetunu pa cuaqueya casaajanaa shipiniquiaari maninia pa cojuanurajuhua teyanote maja maninia niquishano pa cuaqueyajiniani. ²⁵ Naacuajitij, pa cuaqueya casaari maja rimiajata cojuasano na quiniu. Puetunu pa cuaqueya casaajanaari maninia miitiooquiaa, puetunu maninia pa cuaqueya quiniuriajanaa. Naatej, taa pa tacaquiaa pa cuaqueyaracuaani, naa pa miiri parta Pueyaso muerasujuhuj. ²⁶ Pa niohuaca jaara noore, puetunu pa cuaqueyajanaari na tacaatiaa. Pa niohuaca jaara shaaterohua, pa cuaqueyari jaara jaaja puetunujuanaa shuquiriaatia quiriohua. Naajuhuj, parta Pueyaso muerasu jaara taraatia miishaare, naa nojori pa taraajetarejuhuaj. Naajuhuj, parta Pueyaso muerasu jaara maninia miishaare, nojoritia pa timirijuhuj.

²⁷ Puetunu pajaniyajanaari juhua Cristo cuaqueya quiyani. Naaratej, Pueyasoori puetunu na muerasujuaanaa rupueteya Cristo cuaqueyajinia, saa niquiriyatu cuaqueyaja pa quiniuria, pa camarnura pa poonijionura. ²⁸ Cristo cuaqueya pa quishacari, Pueyasoori coteenujuanaa canaa jiyatequiaari Jesucristo jiyaramiquishano pueya canaa quiniuria. Na nuhuaji, Pueyasoori tamasaca jiyatequiaari na rupaa pohuataanaa nojori quiniuria, nojori caminiujiuniuria Pueyaso sequenu panishano pueya niquiarajuhuj. Naajuhuj, Pueyasoori tamasaca jiyatequiaari na rupaa niishitiojonaa nojori quiniuria. Pueyasoori tamasaca jiyatequiaari jiyajeneta casaa nojori miijionura na cumaacata. Tamasacaari jiyatesaaquiaari cusosuhua naatanijionaa nojori quiniuriajuhuaj, Pueyaso Sohuanu cumaquishacari nojori. Tamasacaari jiyatesaaquiaarijuhuj Pueyaso muerasu naacunaara nojori quiniuria. Tamasacaari jiyatesaaquiaarijuhuj Pueyaso muerasu jitianaa nojori quiniuria. Tamasacaari pohuataesaaquiaari tamaatia rupaacajuhuj. Naacuajitij, queraatia tamaatia poonijosanoori quiya. ²⁹ ¿Puetunu Pueyaso muerasujuaanaateeri jiyaramiquishaquiaari Jesucristojiniji nojori pohuatanura tamasaca niquiara? Maja. ¿Puetunu Pueyaso muerasujuaanaateeri Pueyaso rupaa pohuataanaa? Maja. ¿Puetunu Pueyaso muerasujuaanaateeri Pueyaso rupaa niishitiojonaa? Maja. ¿Puetunu Pueyaso muerasujuaanaateeri jiyajeneta miishano miijiaca? Maja. ³⁰ ¿Puetunu Pueyaso muerasujuaanaateeri cusosuhua naatanijionaa? Maja. ¿Puetunu Pueyaso muerasujuaanaateeri tamaatia rupaaca pocuajaca? Maja. Tamaatia rupaajinia pohuatasano jaara quiriquia, ¿puetunu Pueyaso muerasujuaanaateeri na naata na pacunu tama nojori rupaajiniajaaja? Maja. ³¹ Naaratej, nijaniya

cuaara jiaatiaara socua maninia poonijosano nia jiitia-nura Pueyaso Sohuanujiniji, niarta Pueyaso muerasu nia cumaquiniuria maninia.

Cuarta Jesuucua tiuuniaanaa, quiarijiani nia niishitio-joreera casaate socua panishanoni, Pueyaso shuquiritianura pajaniya.

13

Panijiaca pa quirij

¹ Pueyaso Sohuanu jaara cua pohuatere queraatia cua niishishoo rupaaca, Pueyaso seya rupaajuhuj, naajaa, janiya jaara pueya paniyashijia quirini, janiya maara saaja cojuatuneja quiri Pueyasorani. ² Naajuhuj, janiya jaara Pueyaso cumaacaraca quirini Pueyaso sequenu panishano cua caminiujiuniuria, naajaa, cua paniyaquishacari pueya, janiya maara najuhuana quijia quirini. Naajuhuj, janiya jaara niishiri puetunu Pueyaso miiniu panishanojuanaani, puetunu Pueyaso niishishanojuanaanio, naajaa, janiya jaara pueya paniyashijia quirini, janiya maara najuhuana quijia quiri Pueyasorani. Naajuhuj, janiya jaara Pueyaso cumaacaraca quirini, tuhuananuhua cua jatanura tamocora Pueyasocua cua tiuuniucua jiyano huani, naajaa. Cua paniyaquishacari pueya, janiya maara najuhuana quijia quiriquia Pueyasorani. ³ Naajuhuj, janiya jaara puetunu cua casamijanaa nareja niquitiore casamijiuniucua cua paniyaquiniutiani, cua Jiyaniijia maara cua shuquiritiaaquiri. Naajuhuj, janiya jaara tama cua cuaqueyajaaja panitiare Pueyaso rupaa cua pohuatanurani, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini. Naajuhuj, janiya jaara mosaare Pueyaso rupaa cua pohuatanuucuni, naajaa, cua Jiyaniijia maara cua shuquiritiaaquiri, janiya jaara pueya paniyashijia quirini.

⁴ Cante pueya panijiani, nojuajaari panaatia sashijia. Cante pueya panijiani, nojuajaari maninia miiijia puetunu pueyara-janaa. Cante pueya panijiani, nojuajaari tamonu pueya jittiasanoocua jiaatiaashijia. Cante pueya panijiani, majaari tama na cuaqueyajaaja na jiyatenu juhua cutara pueyanora. Naajuhuj, cante pueya panijiani, majaari pueya rerequeteja na quiniu. ⁵ Cante pueya panijiani, majaari pueya na cararajonu. Cante pueya panijiani, majaari saaja nera ni-ishiriojua tamajaaja. Cante pueya panijiani, majaari ritia juaaja. Majaari na niishiniu naminiujuhuaj, tamonu jaara

sesa na miiri. ⁶ Cante pueya panijiani, nojuajaari puey-
 acua taraajeja, nojori miishacari sesa. Saniniuujia, nojua-
 jaari shuquiriaatia quiya pueya miishacari Pueyaso panis-
 hano. ⁷ Cante pueya panijiani, juhuajaniya pueyaracaanu
 rejeretaari, tamasaca miishacari sesa nojuaja. Majaari na
 taacanuunu Pueyaso sequesanojiniji, tamonu sequesanojini-
 jinio. Naajuhuj, majaari na tarinitianu maninia miiniu
 pueyaracaanu. Pueya panijaari naa puetunu rejeretaja-
 janaa, taraatia na miishacari.

⁸ Panijia pa quiniuni, cunoori pueyaracaanu panishaanu-
 taniya, maja saa mijiria pa quishacarijia. Naaratej, socua
 cutara panijara pa quirij. Mijiria pa quishacari, Pueyaso
 Sohuanuuri pa cumaquiya Pueyaso sequenu panishano
 pa caminiujiuniuria, pa niishishoo rupaaca pa pocuanu-
 rajuhuj, Pueyaso niishitishano pajaniya pa pohuatanu-
 ranio. Puetunu nio niishishanojuanaari puequenutaniya
 Jesucristo tiuquishacariuhua pocua. Paniniu cutaraari
 puequeyaquiniutianiya. ⁹ Mijiria pa quishacari, paari saaja
 shiitianiyojua Pueyaso niishishano jiitiaani. Pa niishishano
 Pueyasojiniji pa pohuatasanoni, cunoori saaja shiitianiyojua
 Pueyaso niishishanojiniji. ¹⁰ Naacuaajitij, mijiria pa niishis-
 hanoori najuhuana quiniutianiya paa jaara Pueyaso shuri-
 ucua quirini. Pueyasoori jiyacari pa niishitiojonutaniya
 maninia cutara. Paari jiyacari puetunu maninia niishiniu-
 tianiyajanaani.

¹¹ Janiya jaara naatujua quiquiaarini, juhua naatujua
 pocuaquiaarinijia. Juhua naatujua niishiriojoquiaarinijia.
 Saaja naatujua niishitiaja jiitiaquiaarinijia. Saniniuujia,
 janiya jaara cumantumaca quiquiaarini, janiyari cua
 naatujua quiniu niyajetaquiaarini. Naajuhuj mijiria
 pa quishacari, paari juhua naatujoori quiyajaa Pueyaso
 niquiarani. Pa Jiyaniijia tiuquishacariuhua, paa
 cutaraari cumueeca Pueyaso pueya quiniutianiyanii.
¹² Mijiria pa quishacarijia, paari shiitianiyojua niishiyani.
 Paari juhua ninitia niquiya jariyani, juhua sesarunee
 niquitiujinia. Pueyaso shuriucua pa quishacari, paari maatia
 niishiniutianiyanii. Quiarijiani, saa shiitianiyojuajaari
 pa niishishano. Na nuhuaji, Pueyasota pa quishacari,
 paari puetunu maniniajanaa niishiniutianiyanii, naatej,
 taa Pueyaso niishiya puetunu pajaniyajanaacuaani.
¹³ Quiarijiani, paari Pueyaso rupaacua tiuuniu niishiyani.
 Naajuhuj, paari juhuajaniya sashiniu niishiyani, maatia pa
 niishishacari nojuajaari maninia miiniutianiya pajaniya.
 Niiori maniniacuaaja. Naajaa, pa panishacari Pueyaso,
 pueyanio, cunoori socua maninia cutara Pueyasora, puetunu

tamonu casaajinijiniojuanaa.

14

Niishishoo rupaaca pocuanujiniji niishitiojosano

¹ Naarate cua panishano Pueyaso muerasunaa, nia jiaatiare socua jiyanoehua pueya panijiaca nia quiniuria, Pueyaso panijiacajuhuj. Naajuhuj, nia jiaatiare Pueyaso Sohuanu cumaaca nia jiiitianura maninia nia miiniuria. Panishano cutaraari Pueyaso Sohuanu niishitiaja nia jiiitianura, Pueyaso sequenu panishano nia caminiujiuniuria Pueyaso pueyara. ² Cante niishishoo rupaa pocuaa pueya niquiara Pueyaso Sohuanu cumaacatani, cuno pueyanoori maja na cumaquiniu narta Pueyaso pueya. Na pahuatasanoori saaja Pueyaso tojishano, maja pueya tojishano. Cuno pueyanoori jiyasohuaja Pueyaso Sohuanu niishitishano pahuataa pueya niquiara najuhuanaj. Majaari pueya niishiniu casaa na sequeyani. ³ Saniniuujia, cante Pueyaso sequenu panishano caminiujiujia pueya rupaajiniani, cunoori narta Pueyaso muerasu cumaquiya. Na numooteyari. Na cumanijiaajaariuhuj. ⁴ Na pahuatasanoori maja najuhuaana na quiniu pueyara. Pueyaso pueya maanu tojishacari na pahuatasano, nojoriiri socua cumaquishaanutaniya. Saniniuujia, cante niishishoo rupaajinia pocuaa Pueyaso pueya maanu tajiniani, najuhuaana pocuaari. Saa tama noojia cumaquiyajaariija. ⁵ Puetunu niajaniyajanaa jaara niishishoo rupaaca pocuanu niishijiaca quiriquia, janiya maara shuquiriaatia quirini. Naajaa, janiya maara socua shuquiriaatia quirini puetunu niajaniyajanaa jaara Pueyaso sequenu panishano caminiujiuniaa quiriquia Pueyaso cumaacata. Cante Pueyaso rupaa pahuatanani, cuno pueyanoori socua tojishano pueyano niishishoo rupaa pocuanajiniji. Naajaa, niishishoo rupaa pocuanaari mariyata panishano quiya, na sequesano jaara pueya rupaajinia pacusaare pueya tojishocoriquiano. Naacuajitij, Pueyaso maapueeri cumaquishaanutaniyajuhuj, maatia Pueyaso sequesano nojori tojishacari.

⁶ Cuarta Pueyaso muerasunaa, ¿niaatucua taa sequereni, janiya jaara Pueyaso rupaa pahuatasee niajaniya nia niishishoo rupaajiniani? ¿Niaatucua cumaquishaare cua pocuasacari najuhuaana naa nia niquiaratej? Maja. Niaa cutaraari cumaquishano quiniutianiya, janiya jaara nia pahuatare nia rupaajinijanaa Pueyaso niishitiojosano janiyani. Maninijiaariuhuj janiya jaara nia niishitiojore Pueyaso rupaa nia rupaajiniani. ⁷ Nia

niishiriojore. Jiuujiaaju casamiiri rupaaracajuhua. Naaratej, paari shuquiriaatia tojitiaa naajua jonesesarini, jaaquequejotaja taquinosacarijuhuaj. Saniniuujia, pueyano jaara naajua jonenejonu saniniujiya na niishiyaquishacarijia, saaja nareja cojuatuneyari. Naacuajitij, cante na tojiyani, majaari na niishiniu casaa na jonenenu paniya juucuan. ⁸ Naajuhua, trompeta jaara sesa jonesesaare, ¿soldadohuate na naata niishiniu casaa na miiniutianiyan? Maja. ⁹ Mariyata naajaariuhua, niaa jaara niishishoo rupaa pocuaa pueya niquiara, ¿pueyatucua taa niishirini casaa nia sequeyani? Niaari saaja nia niti taquiriocuateya najuhuaana nojori niquiara. ¹⁰ Niaacuajaari niishiya queraatia rupaacaari mijiria quiya. Puetunu maniniajanaa cutaraari na niishiniaara. ¹¹ Saniniuujia, janiya jaara niishiyaquiya tamonu rupaani, janiyari tahue quiya cuno rupaa pocuanarani. Cuno rupaa pocuanaari tahue quiya quiriajuhua. ¹² Cuarta Jesuucua tiunianaana, niaacuajaari Pueyaso Sohuanuucua jiaatiaquiaa, na cumaaca nia jitianura. Maniniacuaja. Naajaa, nijaniya cuaara jiaatiaara Pueyaso Sohuanu cumaquiniuria nijaniya, puetunu tamaatia poonijosanojuanaa nia miiniuriajuhuaj, maja saaja tamaatia rupaacijinia nia pocuanura. Naacuajitij, nia naata niarta Pueyaso pueya cumaquiniu maninia puetunu nia miishanotajanaa, Pueyaso Sohuanu cumaquishacari nijaniya.

¹³ Naaratej, cante niishishoo rupaajinia pocuaquiaa pueya niquiara Pueyaso Sohuanu cumaacatani, cuno cuaara secjoora Pueyaso, Pueyaso Sohuanu cumaquiniuria nojuaja, na sequesano na pacutenura pueya rupaajiniajuhuaj. ¹⁴ Pa secjosacari Pueyaso pa niishishoo rupaajinia, Pueyaso Sohuanuuri pa sohuanu secjoteya Pueyaso. Majaari pa niishitiaja niishiniu cutara casaa pa sequeyani. ¹⁵ Cunora, ¿casaa pa miiniutianiya Pueyaso pueya maapue tajiniani? Naa pa miiritij: pa sohuanu cuaara secjoora Pueyaso pa niishishoo rupaajinia. Pueyaso pa secjorejuhua tama pa rupaajiniajaaja. Naajuhua, pa sohuanu cuaara jaaquequejooora Pueyaso niquiara pa niishishoo rupaajinia. Pa jaaquequejorejuhua tama pa rupaajiniajaaja. ¹⁶ Pueyaso Sohuanu jaara nia sohuanu secjotere niishishoo rupaajinia, nia tojitianaari maja na naata sequenu: “Jaa, cuaara naa quiiriatej”. Majaari nojori niishiniu tamaatia rupaajinia nia secjosano. ¹⁷ Niaa naasucuaari jiyanohua maninia secjiya Pueyaso. Naajaa, saaja najuhuaa quiyari tamasacara, nojori niishiyaquishacari cuno rupaa. Cuno niishishoo rupaajinia secjosanoori maja na naacunu

tamasaca. ¹⁸ Pueyanaa, shuquiriaatia quiyanijia Pueyaso niquiara, Pueyaso Sohuanu pocuatesacari janiya cua niishishoo rupaacajinia, tamajaaja cua quishacari. Janiyari tamaatia rupaacajinia pocuaja socua nijaniyajiniji cutarani. ¹⁹ Naajaa, janiya jaara pueyaracaanu pocuariquia niishishoo rupaajinia Pueyaso pueya maapue niquiarani, cuno maara najuhuana quiriquiaj. Rupaquijia pohuatasano tama pueya rupaajiniajaajani, cunoori jyanohua socua maninia tucuyocua pohuatasanojiniji niishishoo rupaajinia. Saaja pueya niishishano rupaajinia cutara cua naata nojori cumaquiniu.

²⁰ Cuarta Pueyaso muerasunaa, niaari najuhuana shuquiriya niishishoo rupaajinia nia pocuasacari pueya niquiara, naatej, taa naatujoori shuquiritiaquiaa quiarinio tacuarishijiotajacuaani. Niaa jaara juhua naatujoori quiniu panijajaa, sesa niishiriojiyashijiaca nia quiri, taa naatujoori quiyacuaani. Saniniuujia, majaari seetanujanaa naatujoori nijaniya. Naaratej, cumantumaca nia quishacari, nia niishiriojore maninia nia cumaquitionura nia rerejosacari. ²¹ Tariucuacaanu, tama Pueyaso sequesanojaarijia naajiotasaaquiaari. Naa sequeyari:

“Janiyari taucuaca jiyaramiquiniutianiya cua saquiriojosano Israel pueyacuani, cua sequenu panishano nojori pohuatanura cua pueya. Cua pueya niishiyaquishoo rupaacajinia pohuatanutaniyari. Naajaa, niishiyanijia, tahua pohuatasacari cua rupaa, cua pueyari saa cua ruuretanutaniyajaa, taa nojori ruuretaquiaa cua rupaacuaani jaara tama nojori rupaajiniajaaja pohuataaariquiaa”.

²² Naa Pueyaso sequesacaritij, paari niishiyani, Pueyasoori tamaatia rupaacata na tojiyashijiaca tojitiniu saniniuujiquiaa na rupaa juucua. Paari saniniuujia tari na rupaa tojitiyajaca cutarani. Naaratej, majaari socua panishano Pueyaso sequenura pajaniya pa niishishoo rupaajinia, na tojitiniuria pajaniya nojuaja. Pueyaso sequenu panishano caminiujiushano cutaraari pajaniyara. Cunocujaari tama pa rupaajiniajaaja. Cunoori maja Pueyasocua tiuyashijiacara.

²³ Naaratej, Pueyaso pueya maapue rerejosacari, saaja secaja nijaniyajinijinio cuaara pocuara niishishoo rupaacajinia. Naa pocuanu nia tarinitiare quenaaja, tamasaca Jesuucua tiuyashijiaca quishacari nia rerejojuajinia, nojori mariqui jyaniriiri: “¡Nio pueyaqui puetunu paatecoorijihuanajaj!”

²⁴ Saniniuujia, puetunu nijaniyajanaa jaara Pueyaso sequenu panishano caminiujiya tama nia rupaajiniajaaja, tamonu pueyano jaara niaacua tiuquiri, nojuajaari maninia niishiniutianiya nia pohuatasano. Puetunu nia pohuatasano-

juanaari noojia tacaatiniutianiya sesa miijia na quiniuucua. Tama nojuajaarijia niishiniutianiya: “iJaniyaqui sesa miijia Pueyaso niquiarani!” ²⁵ Nia pohuatasano Pueyasojinijiiri puetunu sesa na miishanojuanaa na niishitiniutianiya noojiajinia. Nocuaji, nojuajaari Pueyaso tojijiara quiniutianiya. Sequenutaniyari: “iPueyasoqui seetanujuanaa nia tajinia niya quiya!”

Puetunu nia miirijianaa maninia. Majaari nia riutiocojonu tamonu pocuasacari

²⁶ Naaratej, cua tojitiare taa nia miiniutianiyanu cuarta Pueyaso muerasunaa. Naa nia miiri nia rerejosacari. Puetunu nia miishanojuanaa cuara quiiria nia cumaquitioonura, socua maninia Pueyaso tojitianaara nia quiniuria. Naacujitij, Pueyaso Sohuanu cumaacata, tamonu naasucuaari jaquequejonutaniya. Tamonu naasucuaari Pueyaso rupaa niishitiojonutaniya. Tamonu naasucuaari Pueyaso Sohuanu niishitiojosano noojiajinia caminiujiuniutianiya. Tamonu naasucuaari niishishoo rupaaajinia pocuanutaniya. Na nuhuaji, tamonu cuara na pacuura nia rupaaajinia, maninia nia tojiniuria. Naa nia miiri maninia. Niquiriyatujua cuara pocuara coteenu, na nuhuaji tamonu, na nuhuaji socua tamonu. Naate nia miiri. Majaari nia riutioconu tamonu pohuatasacari. ²⁷ Naa jaara niishishoo rupaaajinia pocuanu paniri, cuara pocuara saa querajaa pueyaja, maja socua. Cuara pocuara niquiriyatujua, na nuhuaji tarajanu, na nuhuaji socua tarajanu. Naate maninia. Maja nia pocuanu tamonu pocuasacari. Na nuhuaji, tamonu cuara pacuura pueya rupaaajinia, niishishoo rupaaajinia nia sequesano, pueya tojiniuria maninia. ²⁸ Niishishoo rupaa pacuna quiyaquishacari, cuara pocuaaquiiria cante tamaatia rupaaajinia pocuanu paniriquiaa nia niquiarani. Na naata sanaa pocuanu noojiajinia tamajaaja, saa Pueyaso niquiaraja.

²⁹ Naajuhuj, niaa jaara Pueyaso Sohuanu niishitiojosano noojiajinia pohuatanu paniri, cuara pocuara saa querajaa pueyaja, maja socua. Na nuhuaji, Pueyaso Sohuanu cumaaca jitianaa cuara saniniujiuuria nia pohuatasano, nia niishiniuria, cunote seetanujuanaa Pueyaso Sohuanu niishitiojosano, maja soj. ³⁰ Nia pohuatasacari Pueyaso rupaa, tamonu jaara pohuatanu paniya shusha Pueyaso Sohuanu niishitiojosano noojiajinia, cante pohuataajaani cuara sanaajeera, na tarajana pocuanura. ³¹ Naacujitij, puetunu Pueyaso niishitiojosano jitianaaajanaari na naata na pohuatanu. Naaratej, niquiriyatujua cuara pohuataara,

na nuhuaji tamonu, na nuhuaji socua tamonu. Naacuajitij, puetunu niajanijajanaa na naata pohuatanu nia niishishano Pueyasojiniji. Naacuajitij, puetunu Pueyaso muerasujuanaari maninia niishitiojosano quiniutianiya, maninia cumaquishanojuhuaj, maninia nia miiniuria. ³² Maja timia pocuanu jaarajaaja tamonu pocuasacari. Majaari Pueyaso Sohuanu pocuatenu tari niajaniya, tari tamonu pocuasacarcuaa. Nia naata cutaraari sashiniu nia pocuanura. ³³ Pa Pueyaso cutaraari maninia miijiajanaa. Maja cushitiojua. Naarate pueyanaa, maja tamasaca pocuasacari pa riutiocjonu. Saaja maninia pa miiriquia pueyaracaanu.

Cua tojitiare socua. Puetunu Pueyaso pueya maapuejanaa cuara naa miiria na rerejosacari. ³⁴ Maajipohua cuara sanaa tojitiaara Pueyaso rupaa pohuatasacari. Maajipohua cuara niishitiojiyaquiiria pueya niquiara. Maajipohua cuara tojijiaa quiiria, taa pa niishitiojosaaquiaari Moisés Rootasanojinijicuaani. ³⁵ Maajipohua jaara niishiniu paniya socua pohuatana niishitiosanojiniji, nojori cuara nequesotohuara neyaca tama na tiajiniajaaja, na que maaraja. Cararaatia cutaraari maaji jaara nequesoretare caya pohuatasacari, Pueyaso muerasu rerejojuajinia. ³⁶ Nia tojiri nio cua rootasano pueyanaa. Niaacuajaari niishiya, Pueyaso rupaaari supueyaquiiaari niajanijajiniji. Naajuhuaaj, majaari Pueyaso rupaa pohuatanaa jiyaramiquiniu quishaquiaari saa niaacuaja. Tamonu jiyacajinia, queraatia Pueyaso pueya maapueeri cua niishitiojosano tojitiaquiaa maninia cutara. ³⁷ Niajanijajinijinio, noojiaqueya pueyari Pueyaso Sohuanu cumaaca jiiitaa, nia niishiniuria cana cumaacata tamonu pueyano niishitiojiyani. Naacuajitij, ¿taa nia sequeyani? ¿Majate Pueyaso Sohuanu niishitiojosano cua sequesano niajaniya? ³⁸ Cante nio niishiniu paniyaquiiani, cuno jiyoteeri maja Pueyaso Sohuanu cumaacaraca quiija. Cuno pueyano cuara tojiyaquishaaria saniniuujia.

³⁹ Naacuajitij cuarta Pueyaso muerasunaa, nia jiaatiare Pueyaso Sohuanu cumaaca nia jiiitianura, pueya niquiara nia pohuatanura Pueyaso Sohuanu niishitishano niajaniya. Naajuhuaaj, majaari nia tenujunu noo pojori, canapuate niishishoo rupaacajinia pocuanu paniyani, Pueyaso Sohuanu cumaquishacari nojori. ⁴⁰ Nareja maninia nia miiriquia puetunujuanaa. Naacuajitij, niquiriyatu cuara pocuara coteenu, na nuhuaji tamonu, na nuhuaji socua tamonu.

15

1 Cuarta Jesucua tiuuniaanaa, Jesucristo rupaa nia niishiriohua, tarijia cua pohuatasano nijaniya, nia jiyanooshaanurani. Niaari nocua tiuquiaari maninia. Niaari quiarijia maninia na tojtiaajaa. 2 Naacuajitij, Jesucristoori niaacuaji tacuquiaa quiarijia, maninia nia tojtiasacari na rupaa, taa cua pohuataquiaari nijaniyacujani. Niaacuajaari Pueyaso pueyara jatanishano quiya niaa jaara maja najuhuana na rupaa tojiaquiaari. 3 Janiyari niaara caminiujuquiaari Jesucristo rupaani, taa cua tojiquiaaricuaani. Nio cutara rupaa nia coteetaquiaari pohuatanunjia: Cristoori pocuara cusoquiaari niyacutesanojinia, sesa pa miiniuucua. Tariucuacaanu Pueyaso sequenu panishano caminiujuniaari naa naajiotaquiaari, taa Cristo miishaanutaniya naquiyani. Seetanujuanaa naa miishaaquiaariiri. 4 Jesucristo cusonu nuhuaji, raaco niasaaquiaariiri. Jiuujianaraca juuca jaara na shoconujuquiaari macu na quishacari, na raaco samiitiaquiaariuhuari. Naa tohuateequiaariiri puetunu tariucuacaanu Pueyaso Rupaaajanaa, taa nojuajiniji naajiotasaaquiaaricujani. 5 Na nuhuaji, Jesucristoori Pedroocua muetaquiaariuhua. Na nuhuaji, na jiyaramiquishocoriquiano pueyacu muetaquiaarijiaariuhuj. 6 Na nuhuaji, muetaquiaarijihuaj na tojtianaa rerejosaquiiiri. Socua quiniento pueyari na niquitiaquiaari jiyacari. Queraatia jiyacari na niquniaajinijinio pueyari saminio quiyajaa. Noojiaqueyari tari shaajecocanu. 7 Na nuhuaji, pa Jiyaniijiaari Santiagoocua muetaquiaarijihuaj. Na nuhuaji, muetanu pacutequiaariuhua na doce jiyaramiquishocoriquiano pueyacuari.

8 Puetunu cuno pojori nuhuaji, Jesucristoori socua cucua muetaquiaarijihuaj, nocua tiuujia cua quiyaquishacarijia. Naa na paraca cua quishacarijiatej, Jesucristoori cucua muetaquiaari na jiyanooniuria janiya. Ritia cua jiyatequiaariiri na jiyaramiquishano cua quiniuriajuhuaj. 9 ¿Casaarquitijia na saquiriojoquiaari janiyatejaj, na jiyaramiquishano cua quiniuriajuhuaj? Janiyari puera sesa miijia quiquiaarini cua niishiyaquishacari Jesucristo. Cucua na muetaaquishacarijia, janiyari Pueyaso saquiriojosano pueya miitiaquiaarini. Cuarta Jesucristo jiyaramiquishano pueyari maja naa sesa miijiacu na qutiuniu quiquiaari. 10 ¡Pueyasoori jiyanohua maninia! Cua jiyanoocquiaariiri Jesucristo jiyaramiquishano cua quiniuriajuhuaj, taa cua quiya quiarijiacujani. Naa quiyaniijia Pueyaso jiyanooniucua janiya. Majaari najuhuana na jiyanooniu quiquiaari janiya. Na jiyanooshaacari

janiya, janiyari socua jiyanohua nera poonijiocanu cuarta Jesucristo jiyaramiquishano pueyajinijini. Naajaa, maninia cua poonijosanoori maja tama cua miishanojuaaja na quiniu. Pueyasocujaari cua cumaquiquiaa na Sohuanuta, maninia cua miiniuria na panishano.

¹¹ Naacuajitij, naa sequeriquiaa nijaniyanijia: cante nia pohuataquiaari Jesucristo rupaani, naajaa. Janiyari Jesucristo rupaa pohuataquiaajaacuhuj, mariyata taa cuarta Jesucristo jiyaramiquishano pueya pohuataquiaacuaani. Majaari rimiajata canaa pohuatasano. Niaari cuno rupaacua tiuququiaari maninia.

Pueyaso muerasu macunucua samiitiasacariuhua

¹² Cuarta Jesucristo tiuuniaanaa, canaa jaara pohuatariquiaa taa Cristo samiitiaquiaariuhua macujinijini, ¿casaara noojiaqueya nijaniyajinijinio sequequiaani: “Macunucua maja na samiitiaconu quiniutianihua”?

¹³ Macunucua jaara samiitianiyaquishaanutaniya taa nia sequequiaacuajani, Jesucristo jiyoteeri macu quiyajaacuhuj. ¿Cristoteeri macu quiyajaa? ¡Maja!

¹⁴ Cristo jaara macu quiriquiaja, canaa maara najuhuana pohuataa na rupaani. Naajuhuj, niaa maara najuhuana Jesucristoocua tiuya, na pueya nia quiniu paniniuria juucua. ¹⁵ Canaacujaari pohuatanuuquiaani Pueyasoori Jesucristo samiitianiyaquishaanutaniya taa nia jiyaniquiaacuajani,

canaa jiyoteeri sapojonuujuaca Pueyaso jiyaramiquishano pueyani. Naacuajitij, nia sequesano jaara seetanujuanaa quiri, maja jiyoteeri Pueyaso samiitianiniu quiquiaariuhua Jesu. Saniniujia, ¡niaari jiyajeneya cutara! ¡Pueyasocujaari seetanujuanaa Jesu samiitianiyaquishaanutaniya!

¹⁶ Macunucua jaara samiitianiyaquishaanutaniya taa nia sequequiaacuajani, Cristo maara samiitiaquiquiaariuhuj. ¹⁷ Cristo jaara samiitiaquiquiaari, niaa jiyoteeri Cristoocua tiuya najuhanaj, Pueyaso na jiyanootiniuria juucua nijaniya.

¿Macuteeri na naata pocuaji tacunu? Maja na naata. Niaa jiyoteeri jiyanooshoojua quiya. Sesa nia miishano jiyoteeri tuujusoojua quiyajuhuj. ¿Naatejaaratej? ¹⁸ Cristo jaara macu quiriquiaja, tariucua shaajecono nocua tiuniaa pueya maara taraatia quiriquiaj. Nojori maara taraatia shaajecanu puetunurajanaa, maja quenaaja nojori samiitiaconuhua.

¹⁹ Pajaniyajuhuj, canapuede saminio quiyajaani, paa maara jiyanohua taraatia quiyani, pueyaracaanu najuhuana naquiya pa miishacari mijiria. Jaara naa quiritij, pa Jiyaniijia Jesucristo jaara macu quiriquiaja, paa maara najuhuana poonijioriquia pa shuquiritiniuria nojuaja juucua.

20 ¡Namitia naa quiyaquiari! ¡Cristoori seetanujuanaa samiitianishaaquiaariuhua! ¡Canaari na niquitiaquiaarini! Naacuajitij canaari niishiyani Jesucristoori saminio quiyacuaja. Pueyaracaanu saminio quiniutianiyari. Naa pa Jiyaniijia Jesu samiitiasacariuhua coteenu pocuajicuaatej, naacuajitij paari niishiyani puetunu shaajecono nocua tiunnaajanaari samiitianishaanutaniuhuaaacuahuaj. 21-22 Paacuajaari niishiyani, pa supuetana Adánri coteenujuanaa shaajequiaari, Pueyaso na tojiyaquiniuucua. Naacuajitij, puetunu nojuajiniji supuenaajanaari shaajecoquiaajuhua. Adán nuhuaji, parta pueyano Jesucristoori saniniuujia Pueyaso tojjia quiquiaari cutara. Naacuajitij, nojuajaari samiitiaquiaariuhua. Naaratej, puetunu nocua tiunnaajanaari samiitianishaanutaniuhua, pueyaracaanu saminio pa quiniuhuara pa Jiyaniijiata. 23 Pa Jiyaniijia Jesucristoori coteenu samiitiaquiaariuhua. Cristo nuhuaji, puetunu nocua tiunnaajanaari samiitiaconutaniuhua, pa naacuneetonura nata, na nishacariuhua pocua. Paari naa samiitiaconutaniuhua Pueyaso panishacarini. 24-26 Na nuhuaji, nio jiya puequesacariiri quiniutianiya. Pa Jiyaniijia Jesucristoori mijiria tiuquiniutianiuhua, na tucuatenuhuara puetunu na Que panishanojuanaa. Na Queeri na jiyaronutaniya puetunu na paraajanaa na puecoonura. Jesucristoori Jiyaniijiajanaa quiniutianiya, na Que cuaara puecoorejaatijia puetunu Neyanu paraajanaa. Jesuuri puetunu mijiria jiyaniijianucua quejoonutaniyajanaa, mariyata puetunu jiya cajiniocua cumaacaraca quijiacajanaanio. Sesaacaari jataaanutaniyajuhua, puetunu na seyatajanaa. Majaari tamonu Pueyaso ruuretaja cureenu quiniutianiya quenaaja. Pa Jiyaniijia jatanu nuhuaji puetunu na paraajanaa, jiyacari pueya cusojuana shaajanutaniyajaariuhua. Majaari cusonu niishishaanu quiniutianiya socua, shaajenunio. Puetunu casaajanaa jaara maninia jiitiasano quiriohua, Jesucristoori na Que na niqutionutaniuhua, na Que jiitianuhuara puetunujuanaa.

27 Na Que Pueyasoori Jesu jiyatequiaari Jiyaniijia na quiniuria jiyanohua na cumaacata. Naacuajitij, nojuajaari na naata puetunu casaajanaa na tojitianiniu. Nojuajaari Jiyaniijiajanaa. Saa na Que Pueyasojuuari socua Jiyaniijiajanaa, maja tamonu. Pueyasojuanaari Neyanu jiyarocuaari puetunu na shipinishanojuanaa na jeenucuanura na cumaacata. 28 Na tucuatascari, pa Jiyaniijia Jesucristoori na Que sequenutaniya: “Cua Quena, tari tucuatatee quia panishanonijia. Puetunu quia paraajanaa quejooree tarinijia. Majaari socua sesa na miiniu quiniutianiya. Saa

quiajanijajaari pueyaracaanu Jiyaniijijajanaa quiniutianiya cutara, maja socua tamonu”. Naacujitij, pa Que Pueya-soori Jiyaniijijajanaa quiniutianiya pueyaracaanu, puetunu na shipinishanojuanaa na jiitianura maninia.

²⁹ Socua nia niishiriojore pueyanaa. Niaa jaara jiyaniyajaa macunucuaari maja na samiitianishaanu quiniutianihua, ¿casaara pueya tiuquinijosaaquiaa moojinia macu nitini, cuno macu jaara na shaajeyaquishacarijia Jesucristoocua tiuurii? Paa jaara tiuquinijosaaquiaa Jesucristoocua pa tiushacarini, paari miriqui miyani taa pa Jiyaniijia Jesucristo miishaaquiaaricuaani. Nojuajaari raaco niasaaquiaari na cusosacari. Na nuhuaji samiitiaquiaariuhuari. Naajuhuj, paari mariyata samiitianishaanutaniuhuani. Niaari sequeya macunucuaari maja na samiitianishaanu quiniutianihua. ¿Naatejaaratej? Macunucua jaara samiitianijiyaquishaanutaniuhua taa nia jiyaniyacujani, ¿casaara pueya tiuquinijosaaquiaa shusha shaajeno macu niticuaarini?

³⁰ Paa jaara samiitianiyaquishaanutaniyani taa nia sequequiaacuajani, canaquiiri najuhuana tama canaa cuaqueyajaaja panitiaquiaani, pueyaracaanu canaa poonijosacari pa Jiyaniijia. ³¹ Seetanujuanaa nia sequeyanijia, janiyari jiyanohua shuquiriaatia quiyani, Jesucristoocua nia tiushacari, cua pohuatanuucua na rupaa nijaniya. Seetanujuanaajaariuhuj, pueyari cua monu paniquiaa pueyaracaanuni, maja socua cua pohuatanura Jesujiniji. Naajaa, janiyari tama cua cuaqueyajaaja panitiaquiaa puetunu juucajanaani, cua niishishacari janiyari samiitianishaanutaniuhuani. ³² Pa Jiyaniijia jaara macu quiya taa nia sequequiaacuajani, janiyaqui najuhuana Jesucristo rupaacuaji tacuriquiaani nio sesaaca pueya tajinia cua quishacari niya Éfeso tiacajiniani. Nojoriiri juhua puereeta sayoru quiriquiaa cucuaji. Janiyaqui najuhuana Jesucristo shuquiritiriquiaa juucuanu, nojuaja jaara samiitianiyaquishaanucuaariuhua. Paa jaara samiitianiyaquishaanutaniyani, pa miiriqui taa Pueyaso tojiyashijiaca sequequiaacuajani: “Pa shuquiriri saminio pa quishacarijia. Pa queranacunuure. Pa mashaasequenuurejuhuaj. Naajaa, pa shaajesacari, pocua puetunu shaajequeejanaani”. Naa sesa miiquioquiaari noo pojori, canapuate jiyaniyani macunucuaari maja na samiitianishaanu quiniutianiya.

³³ Pueyanaa, tama nia cuaqueyajaaja nia cojuare, niaa mariqui sapojosaareeri naa sesa nia niishiriojonurajuhuj. Tamonu pueyanoori naa sequequiaari seetanujuanaatej: “Maninia miiijaari sesa miiijara jatanishaaree na cojinuu-cua sesa miiijaca”. Naaratej, majaari nia cojinu sesoriquia

pueya, niaa mariqui seserejaariuhua. ³⁴ Niishiriojojuara nia quiri. Sesa nia miiniu nia cartere. Noojiaqueya nia-janiyajinijiniori Pueyaso niishiyashijiaca quiyajaa. Naa nia sequereenijia pueyanaa, quenaaja nia caririquniuria.

Taamueca pa quiniutianiuhua ni pa samiitiasacariuhua

³⁵ Tamonu niajaniyajinijinio naasucuaari niishiriojiya: “¿Taa macunucua samiitianijiosaanutaniuhuajaarani? ¿Taamuecate na cuaqueya quiniutianiyani?” ³⁶ Maninia nia niishiriojore pueyanaa. Maja niishiyashijia nia quiniu. ¿Majateeri nia jamosano naana jajau co moquenu, neyona moritianura? Naacuaaquinatejaj. Saa na co moquesacarijia na naata moritanu. ³⁷ Naajuhua, niaa jaara saaco natare, tamaatia jajaujuhua, nia natasano jajauri maja juhua ney-onarano niquishano. Nia natasanoori saaja shiitianiyojua jajau quiya. Na moritiasacari, jiyanohua tamaatia niquishiyari. ³⁸ Pueyasoori na maashitiya puetunu na jaamasucuata-janaa, taa na paniyacuajani. Pueyasoori puetunu jajaujanaa moritianijia tamaatia niquishano na quiniuria. Naa quiniutianiyajaariuhua macunucua samiitiacosacariuhua. Majaari pa cuaqueya quiniutianiya taa na quiya quiarijiacuajani. ¡Pa cuaqueyari jiyanohua maninia quiniutianiuhua!

³⁹ Majaari puetunu cuaqueyaraca casaajanaa mariyata na quiniu. Naacuajitij, pueyano cuaqueyari tamaatia quiya casaa cuaqueyajiniji. Shuhua cuaqueyari tamaatia quiyajuhaaj, moojinia na quiniuria. ⁴⁰ Jiyocuacaanu quijiacaari tamaatia cuaqueyaraca, maja juhua mijiria quiniaa cuaqueya. Pueyaso seya cuaqueyari shanohua niquishano. Nojori cuaqueyari tamaatia niquishano mijiria quiniaa cuaqueyajiniji. ⁴¹ Naajuhua, pananuuri jiyanohua shacantuuca quijia. Raca shacantuucaari tamaatia niquishano pananu shacantuucajiniji. Riya shacantuucaari socua tamaatia niquishano. Naajuhua, puetunu riyajanaari tamaatia niquishano narta riyajiniji. Puetunu Pueyaso shipinishanojuanaari naa tamaatia quiya.

⁴² Naajuhua, Pueyaso muerasuuri samiitianishaanutaniya tamaatia cuaqueyata. Moquejacaari jamojosaanutaniya. Moqueyashijiacaari saniniuujia samiitianishaanutaniuhua, pueyaracaanu na quiniuria. ⁴³ Jamosano pa quete sequeeri samiitianishaanutaniuhua, jiyanohua shanohua niquishano na quiniuria. Cumaacaaju jamosanoori samiitianishaanutaniuhua jiyanohua cumaacaraca na quiniuria. ⁴⁴ Pa cuaqueya jamosanoori saaja jiyacua rucuanajaca quiquiaari. Paari samiitianishaanutaniuhua tamaatia cuaqueyata,

jiyocuacaanu quijiaca pa quiniuria. Naaratej, Pueyaso jaara maninia cuaqueya shipiniquiaari pajaniyara, mijiria pa rucuanefonura, ¿majateeri Pueyaso niishiniu tamaatia cuaqueya shipininiu na muerasura, na shuriucua pa quiniuria? Taaquiririnij.

⁴⁵ Pueyasoori coteenu pa supuetana shipiniquiaari marajiniji. Na nuhuaji, na samiitianiquiaariiri. Moisés Naajioneejiniaari naa naajiotasaaquiaaritij:

“Adánri saminiora quiquiaari Pueyaso nooshacari na jiquioco”.

Jesucristoori saniniuujia jiyatesaaquiaari juhua pa supuetanara na quiniuria pa supuetana Adán niti. ¡Jesucristoori jiyanojua socua cutara Adánjiniji!

Adánri samiitianishaaquiaari saminio na quiniuria. Jesucristo cutaraari pa samiitianijajanaa na Sohuanuta.

⁴⁶ Coteenujanaa pa supuetanani, majaari na shipinishaanu quiquiaari jiyocuacaanu quijiarano. Cunora, coteenu pa cuaqueyari saaja mijiria quijiara. Na nuhuaji, pa cuaqueyari jiyocuacaanu quijiara jatanishaanutaniya mariyata juhua Jesucristo cuaqueyara.

⁴⁷ Adánri saaja mijiria quiriquiano quiquiaari. Marajiniji shipinishaaquiaariiri. Jesucristoori saniniuujia jiyocuacaanujinio.

⁴⁸ Puetunu Adáncaajinio supuenojuanaari saaja mijiria quijiaca. Naaratej, puetunu pajaniyajanaari saaja cusunuujuacani, juhua pa supuetana Adánjuhuaj.

Jesucristo muerasuuri saniniuujia juhua pa Jiyaniijia Jesucristo quiniutianiya, jiyocuacaanu quijiaca pa quiniuria.

⁴⁹ Mijiria pa quishacari, pa cuaqueyari juhua pa supuetana Adán cuaqueya quiya, marajiniji shipinishano. Majaari pa cuaqueya quiarjia socua maninia Adán cuaqueyajiniji.

Pa samiitiasacariuhua, pa cuaqueya cutaraari quiniutianiya mariyata juhua cuno jiyocuacaanu Quijia cuaqueya. Nojuacuajaari pa samiitianinia Jesucristo.

⁵⁰ Cuarta Pueyaso muerasunaa, maja pa naata Pueyaso rupeenu nio pa cuaqueyataja. Pa rishiyashijia cuaqueyari maja na naata cuno pueyaracaanu Quijia rupeenu.

⁵¹ Naajaa, cua tojitiare. Nia pohuatareera pueya niishishoo. Majaari puetunu pajaniyajanaa cusunuuriquianoni. Puetunu pa cuaqueyajanaa cutaraari jatanishaanutaniyani, maninia cuaqueya pa jitianura, juhua Jesucristo cuaqueyajuhuj.

⁵² Jiyocuacaanuji trompeta jonesacari, pa cuaqueyari ritia jatanishaanutaniya, naatej, taa pa nimishiniuquiya ritia acuaani. Pa Jiyaniijia naacuneetoonu panishacari pajaniyata, Pueyaso trompetaari tojishaanutaniya joneshiyano, na muerasu na jiiquioonura. Canapuate macu quiyani, quiarinio cuaqueyata ritia samiitianutaniuhuari. Pajaniya-

juhuaj, canapuate saminio quiyajaani, pa cuaqueyari ritia jatanishaanutaniyajuhuj, quiarinio cuaqueya pa jiitiana-
nurajuhuj, shaajeyashijiaca pa quiniuria. ⁵³ Cusonuuja
cuaqueya cuaara jatanishaaria, rishijia cuaqueya pa jiitia-
nura saniniuujia. Nio moqueja pa cuaqueyani, jataniniu
panishiyari, maninia cuaqueya pa jiitianura, pueyaracaanu
pa quiniuria Pueyasota.

⁵⁴ Moqueja pa cuaqueya jaara maninia cuaqueyara
jatanishaarohua; pa rishiyashijia cuaqueya jaara rishijia
cuaqueyara jatanishaarohua; jiyacaritij pocua niishirini
tariucuacaanu sequesanoori tari tohuateeree. Naa
naajiotasaaquiaari tariucuacaanu Pueyaso Rupaajiniatej:

“¡Jejee! ¡Pa Jiyaniijaari na muerasu mashiquirii macunucua
quiquiojiniji! ⁵⁵ Cusojuananaa, ¡quiaaqui tari shoco-
tasaaree! ¡Quiaari shocotasaaree! Sesaacanaa, quia
cusajuatajaari juhua mohuacara quiquii cumaacaju.
¡Shaajeconoori samiitiacoree!”

⁵⁶ Pueyanaa, puetunu pajaniyajanaari csonuuquiaa sesa
miijia pa quiniuucua mijiriani. Paari sesa quiquiaani
pa tojiyaquishacari tariucuacaanu Moisés Rootasano Pueya-
sojiniji. Naaratej, puetunu pueyajanaari csonu niishiya.

⁵⁷ Naajaa, pa Jiyaniija Jesucristo miishanota pocuara, Pueya-
soori pa mashiquiquiaa pa cusoyaquiniuucujia. Naaratej,
paari Pueyaso sequequiaani: “¡Paacarasho canaa Pueya-
sonaa! Quiaacuajaari canaa shocotaniniutianiya csonu,
quia Nyanu csonuucua canaacuara, pueyaracaanu canaa
quiniuria quia shuriucua. ¡Jiyanohua paacarasho!” Paari naa
maniuhuaqueetaa pa Que Pueyasoni.

⁵⁸ Naaratej cua panishano pueyanaa, nia numaama nia
racatare cua niishitiojosano nijaniya. Saa Pueyaso rupaaja
nia tojitiare, maja tamaatia niishitiojosano. Pa Jiyaniijaara
nia poonijiore socua jiyanohua, na panishano nia miiniuria
saaja. Pa Jiyaniijaara pa poonijosanoori maja najuhuaana na
quiniu.

16

*Casamijiuniucua Pueyaso pueyara cumaneeca
reratesacari*

¹ Quiarijiani, nia riucuaereera taa nia miiniutianiya,
cumaneeca nia reratenura casamijiuniucua. Cuno cumanee-
cani, paari na jiyaronutaniya parta Pueyaso muerasura
Jerusalén tiacajiniani. Naa cuaara maninia miiria, mariya-
ata taa cua rootacanucuja Pueyaso pueya maapue Galacia
jiyajiniani. ² Naa nia miiritij. Puetunu domingo juucajanaa,

puetunu pueyajanaa cuaara racataara tama na niquticoso-coriquiano cumaneeca, teyano nia niqutionutaniya niarta Pueyaso muerasuracuajani. Naa nia racatare juhuataja nia niquticosoriquiano cumaneeca puetunu semaanajanaa, maja na reratesaanura shusha cua tiuquishacari niaacua. ³ Niocua maninia pueya saquiriojore, nia niqutiojosano cumaneeca nojori patanura Jerusalén tiacajinia. Naacuajitij, cua tiuquishacari niaacua, janiyari cua naajioneeca jiyarotanutaniya nojorini. Naajioreera parta Jesuucua tiuuniaa pueyacuara Jerusalén tiacajinia, nojori cuaara shuquiriaatia maseera cumaneecata nia jiyarotasano pueya. ⁴ Janiya jaara Jerusalén tiacajinia quianu panirini, cumaneeca jiyatanaari na naata cuata quianujuhuaj.

Pablo naquerejosacari

⁵ Cua quiasacari niaacua, janiyari Macedonia jiya tajiniu paniyani. Na nuhuaji, janiyari niaacua tiuquiniutianiyani. ⁶⁻⁷ Janiyari maja ritia cua tajiniu paniniu niajaniya. Niaata camueenujunu paniya pueyaracaanunijia, pa Jiyaniijia jaara naa paniyajuhuj. Janiyari shuniya shocotenu paniya ni-aatani. Na nuhuaji, nia naata cua naacunu cua jitianura cua panishano, cua pasocoriquiano tee Pueyaso jiyaronu paniya janiyacujani. ⁸⁻⁹ Janiyari niya Éfeso tiacajinia camueenujiyajaarani, Pentecostés juuca cua sashishacari. Queraatia pueyari Jesucristo rupaa tojitianu paniya niya. Naajuhuj, queraatia pueyari Jesucristo rupaa ruuretaa saniniuujia. Naaratej, janiyari jiyanohua socua Jesucristo rupaa pohuatanu paniyajaa Éfeso pueya niquiarani. Naajaa, janiyari niaacua quianutaniyani Pentecostés juucara queranacunuunu nuhuaji.

¹⁰ Timoteo jaara niaacua tiuquishii, niocua na cumaquiri Pueyaso rupaa na pohuatanura na puereyaquiniutia. Timoteocujaaari pa Jiyaniijiaara poonijioquiaa mariyata taa cua poonijioquiaacuaani. ¹¹ Naaratej, maja Timoteo nia rerequetenu. Niocua na naacure saniniuujia, cucua na tiuquiniuhuara shuquiriaatia, maninia nia miiniuucua nera. Janiyari niya na sashiya parta Pueyaso muerasutani. ¹² Janiyari Apolota pocoojoriquiaani. Janiyacujaaari na nenecojoriquiaa juucuaní, niaacua na quianura parta Pueyaso muerasuta quiarijiani. Nojuajaari saaja cua sequeree majana na quianu paniniu quiarijiani. Tamacari niaacua quianutaniyaquiniaari, jaara na naata quiri.

Pablo sequesano, naajionu na puecasacari

¹³ Cuarta Jesuucua tiuuniaanaa, niishiriojuaca nia quiri. Jesucristo rupaa nia niishiri maninia, seetanujuanaa na tojitianaara nia quiniuria. Juhua cumueeca mashaja nia quiri Pueyaso Sohuanu cumaacata, pa Jiyaniijia panishano nia miiniuria. ¹⁴ Puetunu nia miishanojuanaa cuaara quiria seetanujuanaa nia paniniutia.

¹⁵ Pueyanaa, niaari niishiya Estéfanasri necohuata coteenu Jesucristo tojitianaara quiquiaari cuniqui Acaya jiyajiniani. Nojoriiri Pueyaso muerasu naacuquiaa pueyaracaanu nojori paniniutia. ¹⁶ Naarate nia sequenu paniyanijia, niajaniya cuaara quiria juhua nojori seya, nia cumaquiniuria nojori, maninia nojori miishacari. Naa nia cumaquiriti puetunu jiyano pueyajanaa, noo pojori canapueete naa maninia miiquiaa Pueyaso muerasucujani.

¹⁷ Jiyanhua shuquiririucuaanijia Estéfanas tiuquishacari niajanijajiniji Fortunatota, Acaicotajuhuj. Nojoriiri cua shuquiriritiriucuaa nia niti, cua jiaatiasacari cua niquiniuria niajaniya juucua. ¹⁸ Nojoriiri coojia cajitiriucuaa puera cua niishiriojiyaquiniuucujani niaacua. Nojori naasucuaari nioojia cajitiquianujuhuj, nojori pohuatasacari niajaniya janiyajiniji. Niajaniya cuaara shuqiritiaara nojori, naa nojori miishacari maniatej.

¹⁹ Pueyaso muerasu maapue niya Asia jiyajiniaari cua sequerucuaa, cua saruhuatanura niajaniya. Aquila, Prisciliano, nojoriiri jiyanhua nia saruhuataajuhuj, narta Jiyaniijia muerasu nia quiniucujuhuj. Pueyaso pueya maanuri nia saruhuataajuhuj, nooj, teyanote Aquila tiajinia rerejoquiaacuajani. ²⁰ Puetunu parta Pueyaso muerasujanaari niya nia saruhuataajuhuj. Nia sarhuatatoosacari, nia sarhuatatoore seetanujuanaa Pueyaso paniniutia.

²¹ Quiarijiani, tama cua juaashiquiatajaaja saaja nioniyojua naajioreeraj, cua saruhuatanura niajaniya. Naacuajitij, niocua niishiri nio naajioneeri seetanujuanaa janiyajiniji.

²² Cante maja pa Jiyaniijia panijia quiyani, Pueyaso cuaara jataara cuno, saniitiosocoriquiano.

¡Jiyaniijianaa, quia nimiohua!

²³ Pa Jiyaniijia Jesu cuaara cumaquiiria niajaniya na Sohuanuta. ²⁴ Janiyari puetunu niajanijajanaa paniyani Jesucristo paniniutia. Tariucujaja, cua panishano pueyanaa.

TANEE PABLO NAAJIONEE CORINTO TIACAJINIA QUINIAA PUEYASO PUEYACUARA

*Pablo saruhuatasacari Pueyaso pueya maanu Corinto tia-
cajinia*

¹ Janiyari Pabloni. Pueyaso panishacari, janiyari Jesu-
cristo jiyaramiquishanora jiyatesaaquiaari na rupaa cua
poojotanurani. Janiyari Timoteota naajiya nio niaacuarani.
Nojuajaari parta Pueyaso pueyano. Canaari Corinto tia-
cajinia quiniaa Pueyaso pueya maanuucuaara naajiyani,
puetunu Acaya jiyajinia Pueyaso tojitiajaca pueyacuara-
janaanio. ² Pa Que Pueyaso, mariyata pa Jiyaniijia Jesucristo
cuaara cumaquiiria niajaniya. Nojori cuaara jiyateera nia-
janiya juhuajaniya quijiaca nia quiniuria.

Pablo miishacari naquiya

³ Pa Jiyaniijia Jesucristo Que pa shuquiritiare. Nojua-
jaari pa Quejuhuaj, pocua taraajeja cutara. Nojuajaari
pa Pueyaso, pueyaracaanu pa cumanijiana. ⁴ Nojuajaari
pueyaracaanu pa cumanijaquiaa naquiya pa miishacari.
Naacuajiti pa naata cumanijianu tamasaajuhuaaj, naquiya
nojori miishacari, taa Pueyaso cumanijaquiaa pajaniy-
acuaani. ⁵ Seetanujuanaa, Cristo rupuejaca pa quishacari,
paari naquiya miishaaquiaajuhuaaj, taa naquiya na mi-
ishaaquiaaricuaani. Naajaa, nojuajaari pa cumanijaquiaa
shuquiriaatia pa quiniuria. ⁶ Naacuajitij, canaa jaara
naquiya miishaaquiaa Cristojiniji canaa pohuatanuucuaani,
Pueyasoori canaa cumaquiquiaa saaja canaa rejeretanura.
Naacuajitij, majaari canaa tarinitianu Pueyaso Rupaa po-
huatanu nia niqiuara, seetanujuanaa Pueyaso pueya nia
quiniuria, nia cumanijiasaanurajuhuaaj. Naajuhuaaj, Pueyaso
jaara canaa cumanijiarecuaa, naacuajitij, canaa naata nia
cumanijanujuhuaaj. Canaari nia cumanijiaani, maninia re-
jeretajaca nia quiniuria naquiya nia miishacari, taa canaa re-
jeretaquiaacuaani naquiya canaa miishacari. ⁷ Canaari see-
tanujuanaa niaacua tiuyani, niaari cumanijiasaanutaniya,
maninia rejeretajaca nia quiniuria. Niaari naquiya miiquiaa
Pueyaso muerasu nia quiniucuaajuhuaaj, taa canaa miiquiaa
naquiyacuaani. Naacuajitij, Pueyasoori nia cumanijianu-
taniyajuhuaaj, taa na cumanijaquiaa canaacuaani.

⁸ Canaa panishano Pueyaso pueyanaa, canaari paniyani
nia niishiniuria taa canaa tacaquianuni, jiyanohua naquiya

canaa miishacari Asia jiyajinia. Canaari puera jiyanoehua taraatia miiquianuni. Jiyacari, majaari tari canaa jiiitanu quiriquiaa cumaaca canaa rejeretanura socua. Canaari jiyaniiriquiaani maja naasucua tari canaa rishiniu quiniutianiya. ⁹ Seetanujuanaa, canaari jiyaniijiani Pueyaso naasucuaari nareja canaa shanacunutaniya canaa cusonuunura. Naajaa, naacujitij, Pueyasoori jiyacari canaa niishitiriquiaa maja canaa tiuuniuria tama canaacuajaaja, saaja nocua canaa tiuuniuria cutara. Nojuacuajaari macunucua samitianiijiojua. ¹⁰ Nojuajaari canaacua taraajecanu. Cocuaatia canaa miishacari, canaa cojuacanuuri maja canaa cusonuunura. Nojuacuajaari socua canaa cojuanutaniya nocua canaa tiuuniucua, niaa jaara canaacuara secorejehuaj. ¹¹ Naacujitij, Pueyaso miishacari maninia canaa, queraatia pueya secjonuucua canaacuarajuhaj, queraatia pueyari Pueyaso sequenutaniya, "paacarasho".

Pablo pahuatasano casaara na quiaaquiquiaari Corinto pueyacuani

¹² Canaari shuquiriaatia quiyani canaa niishishacari canaari maninia quijiaca quiquiaari canaa quishacari niaatani, Pueyaso niishiyashijiaca niquiaranio. Majaari canaa sapojonu quijia nijaniya. Canaari seetanujuanaa niaacua taraajejani Pueyaso jiyatenuucua canaa nia panijiaca canaa quiniuria. Canaari naa maninia quiquiaari niaatani, saaja Pueyaso cumaquishacari canaa, maja tama canaa niishitiajataaja. ¹³ Cunora, janiyari nia nequesotaani, ¿casaara nia cushitiiquianu canaa naajionee nia serojosacarini? Puetunu canaa naajioneecajinijanaa majaari canaa naajionu quiquiaa jiyajeneta casaa, nia cushitiiniuria. Puetunujuanaacuajaari maatia niishishaatia quiquiaa nia serojosocoriquiano. ¹⁴ Niaacuajaari tari secaja niishiya taa canaa paniya jiyanoehua nijaniyani. Pa Jiyaniijia Jesucristo tiuquishacariuhua, niaari jiyacari seetanujuanaa canaa timitianutaniya, maatia nia niishishacari canaari seetanujuanaa nia panijiaca quiquiaarini. Naajuhaj, nijaniyari canaa timitiasano quiniutianiyajuhaj.

¹⁵⁻¹⁶ Cua jiyaniishacari niaa naasucuaari seetanujuanaa cua panijiaca, taa cua paniquiaa nijaniyacuaani, janiyari cunora naquerejocanu niaacua juucuaani. Niiquiji cua quiasacari Macedonia jiyajiniara, janiyari nia niquiniu paniriquiaa juucua nia tiacajiniani. Janiyari Pueyaso rupaata nia cumaquiniu paniriquiaa juucua cunoco cua tajishacarini. Naacujitij, janiyari niishiriojoriquiaani cua naata naasucua nia shuquiritiniu

Pueyaso rupaata, cua quiasacari Macedonia jiyajiniara, naajuhuaaj, cua tacatesacariuhua cunocojiuhua. Janiyari niishiriojoriqiaani nia naata naasucua cua naacunu cua panishanotajuhuaaj, Judea jiyajinia cua quianuhuaa.
¹⁷ ¿Niaateeri jiyaniqianu janiyari nareya nia sequecanuni, naa cua sequesacari coteenujuanaa cua naajiojiniatej? ¿Niaateeri jiyaniya, naa cua naquerejosacaritij, janiyari tama cua panishanojuaja miiniu paniquianuni, maja Pueyaso panishano? Seetanujuanaa, majaari coojia cua niquijiotenu quiquianu naa cua sequesacari niajanijatej. ¹⁸ ¿Janijateeri coojia niquijiotejani? Maja. Canaa pohuatasacari Pueyaso rupaa nia niquiara, ¿canaateeri na jataniquiaani? Pueyasocujaari niishiya, na rupaa canaa pohuatasacari, majaari canaa jataniniu quiquiaa. Pueyaso rupaacujaari seetanujuanaa. ¹⁹ Naajuhuaaj, Neyanu Jesucristoori jataashijia. Silvano, Timoteo, janiyajuhuaaj, canaari nojuajiniji nia niquiara pohuatanaani. Paari nojuajiniji niishiyani puetunu Pueyaso sequesanojuanaari seetanu rupaajanaa cutara. ²⁰ Jesucristocujaari tari tohuateequiaari puetunu tariucuacaanu Pueyaso sequesanojuanaa pajaniyara. Naacujitij, pa tiuushacari Jesucristoocua, paari niishiyani, Pueyaso sequesanoori seetanujuanaa. Naaratej, pa shuquiritiasacari Pueyaso, paari na sequequiaani: “Seetanujuanaari canaa quia sequesano, Pueyasonaa”.
²¹ Jesucristo rupuejaca pa quishacari, Pueyasocujaari pa cumaquiquiaa, socua maninia na tojjijaca canaa quiniuria, niajanijajuhuaaj. Pueyasoori pa niquitioquiaari na Sohuanu, seetanujuanaa na muerasu pa quiniuria. ²² Pueyaso Sohuanu pa jiitiasacari poojiajinia, naacujitij, paari tari Pueyaso sesa jiitiaa juhua naajiotasano poojiajiniani, saa neraja pa quiniuria. Na Sohuanu pa jiitiasacari poojiajinia, paari niishiyani, paari puetunu na sequesanojuanaa maseriquianoni.

²³ Niaari cua jiyaniqianu janiyari najuhuana coojia niquijiotejani, niaacua cua quiaaquiniucua taa cua sequecanu coteenu niajanijacuajani. Pueyasocujaari niishiya, majaari cua quianu quiquianu niaacua Corinto tiacajinia, maja cua tacaatiniuria niajanija, janiya jaara nia nacasusee jyanohuani. ²⁴ Canaari maja nia jiyaniijiani canaa shiniujiuniuria puera niajanija, Jesuucua nia tiuuniuria. Niaacujaari tari maninia Jesuucua tiuujia. Canaari saaja niarta Pueyaso pueyani, canaa cumaquiniuria niajanija, socua pa Jiyaniijia tojjijaca nia quiniuria, seetanujuanaa shuquiriaatia quijia nia quiniuria.

2

¹ Janiyari tama sequecanujuaanijia, maja juhuari niaacua cua quianu quiniutianiya, maja cua taraajetenura niajaniya. ² Janiya jaara nia taraajetere cua nacasusacari niajaniyani, ¿cantucua cua timitiri quenaajani? ¿Cua taraajetesano pueyateeri cua shuquiritiniutianiya? Maja. ³ Naaratej, janiyari niaacuara naajiocanuni, cua nacasunura juhuacarijia niajaniya, cua taraajeyaquiniuria niaacua cua tiuquishacari. Janiya jaara sashiri cua nacasunura niajaniya cua tiuquishacari niaacuani, janiya maara jiyanohua nia taraajetereni, jecatoojua nia quishacari. Saniniuujia, niaa jaara juhuacarijia jecare puetunu sesa nia miishanojuanaa, naacuajitij, cua tiuquishacari niaacua, niaari cua cojiniutianiya maninia, shuquiriaatia pa quiniuria jatiqui. ⁴ Janiya jaara niaacuara naajiocanu coteenu cua naajioneeni, janiyari jiyacari jiyanohua tacaariquiaa niaacuani. Coojiaari jiyanohua taraajeriquiaa. Janiyari jiyacari nujuqueriquiaajaaniuhua. Majaari cua naajionu quiquianu cuno naajionee cua taraajonura niajaniya. Cunoori seetanujuanaa quiquianu cutara cua niishitiniuria niajaniya, taa cua paniya jiyanohua niajaniyani.

Cuno sesa miijia cuaara jiyanooshaaria jaara tari pishirii sesa na miiniuujiniji

⁵ Cuno sesa miijiaari maja na taraajetenu quiquianu saa janiyaja. Quera puetunu niajaniyajanaa naasucuaari taraajecanu cuno pueyano miiniuucua sesa. Seetanujuanaa, majaari puetunu niajaniyajanaa taraajenu quiquianu. Janiya jaara sequereni: “Puetunu niajaniyajanaari taraajecanu”, janiya maara puera na maateyani. ⁶ Puetunu niajaniyajanaa jiyatenuucua nojuaja saniitiosano na quiniuria, nojuajaari tari noojia tacatorohua sesa na miiniuujiniji. Tariucujaja. Majaari socua na saniitionu. ⁷ Quiarijiani nojuaja nia jiyanoori-ohua. Nia cumanijiarohua, nojuaja mariqui puera tacaariiri jiyanohua na taraajesacari. ⁸ Nocuaji janiyari jiyanohua nia rootaani, maninia nia miiriohua cuno pueyano, na niishiniuria niaaqui na paniyajaa. ⁹ Janiyacuajaari cunora niaacuara naajiocanu tarini, taa nia miiniutianiya cuno pueyanoni, cua niishiniuria niaate seetanujuanaa pa Jiyani-ijiajiniji cua rootasano tojtiajaca. ¹⁰ Cua tojitiare, cana nia jiyanooriicuaani, janiyari na jiyanojayuhua. Naacuajitij, pueyano jaara sesa miiriquia, janiyari Cristo niquiara na jiyanooquiaajuhua, jatiqui nia quiniuhua. ¹¹ Naaratej, niarta Pueyaso pueya nia jiyanooriquia, Sesaaca mariqui pocua riuticoreeri, juaajiara na jiyatenura pajaniya, pa

jiyanootioyaquiniuucua. Paacuajaari maninia niishiyani taa Sesaaca niishiriojoquiaa sesa miijiacara na jiyatenura pajiyaniani, paa jaara jiyanyoyashijia quiriquiani.

Pablo tacaashacari Troas tiacajinia na quishacari

¹² Janiya jaara Troas tiacajinia tiuquiquianu Jesujiniji cua pohanuranani, cuno pueyari jiyanohua tojitianu paniriquiaa Jesujiniji cua pohanuranura juucua. Jiyacaritij, seetanujuanaa nojori niqiuara pohanatasaatia quiriquiaari. Pa Jiyaniijia Jesuuri juhua tiotiu riatacanu cucuaji juucua, cua pohanuranura nojuajiniji tii. ¹³ Janiyari saaja nojori tiujiacanuhuanani puera cua tacaashacari, cua riuriatatquiniuucua pa tarajanu Tito. Janiyari juucua paniriquiaani cua pohanatasaanura niajanijajiniji. Janiyari cunora tacaariquiaa jiyanohuani. Naaratej, janiyari Macedonia jiyajinia quiaarohuanani, Tito cua pajenuhuara tii.

Pa Jiyaniijia Cristoori pa paraa pa shocotanjia

¹⁴ Janiyari jiyanohua shuquiritiaa Pueyasoni. Nojuajaari pueyaracaanu pa shocotaniquiaa pa paraca seque, pueyaracaanu pa sacuanuucua pa Jiyaniijia Cristoocua. Pueyasoori na rupaa pohanataniquiaa canaa. Naacujitij, canaa niishishano Jesucristojinijiiri juhua shanohua jaanutaja jaanujuquiaa pueya tajinia puetunu tiquiyocujanaa. ¹⁵ Pueyasora, canaari juhua shanohua jaanutajani, Cristo quishacari canaa jiuujajinia. Nojuajiniji canaa pohanatunuusacari, canaari puetunu pueyarajanaa jaanujuquiaani: Pueyaso muerasurano, saniitiosaariquiano pueyarano. ¹⁶ Saniitiosaariquiano pueyara, Jesucristo rupaari mocuaatia jaanujua saniniujia. Naa nojori soonuucua Jesucristo rupaatej, nojoriiri shaajasaariquiano cutara. Pueyaso jiyanooshocoriguiano pueyara saniniujia, Jesucristo rupaari shanohua jaanujuquiaa. Naa nojori paniniuucua Jesucristo rupaatej, nojori cutaraari pueyaracaanu quijiacara jiyatesaanutaniya. ¿Canapueteeeri seetanujuanaa Pueyaso jiyaramiquishanoni, na rupaa nojori pohanuranura, pueya na tiutiniuria Jesucristoocuanani? ¹⁷ ¿Noo pojoritii, najuhuana Pueyaso rupaa pohanatunuquiaa, pueyajiniji na masejonura cumaneeca na sajonuunutatej? Maja. Majaari canaa pohanatunu quiquiaa Pueyaso rupaani, pueyajiniji canaa masejonura cumaneeca. Canaa cutaraari seetanujuanaa Pueyaso jiyaramiquishano pueyani, na rupaa canaa pohanuranura. Canaari seetanujuanaa pa Jiyaniijia rupaa pohanataniquiaa Pueyaso niqiuarani, Cristo rupuesano canaa quishacari.

3

Quiarinio rupaa Jesucristojiniji

¹ Naa canaa naajosacari niaacuaratej, niaa naasucuaari jiyaniya canaari tama canaa cuaqueyajinijiaaja nia pohuatohuanihuaj, canaacua nia tiuuniuria. ¿Niaateeri pa niishishano pueyanojiniji naajionee paniya, canaajiniji na pohuatanura coteenu nijaniya, canaacua nia tiuuniuria cutara? Tamasaca cutaraari naa miiquiaa. Niaacuajaari canaa niishijiaca cutara. Puetunu tiqiyocuajanaa quiijaca pueyari canaajiniji niishiyacuaja, canaari seetanujuanaa Pueyaso jiyaramiquishano pueyani, na rupaa canaa pohuatanura. Naacuajitij, majaari quenaaja canaa paniniu, cana nia niqutionura nia naajionee, canaa patasocoriquiano, tamasa tiuuniuria canaacua. ² ¿Naajioneetucua casaara panishaareni? Puetunu pueyajanaari na naata niishiniucuaaja canaari seetanujuanaa Pueyaso jiyaramiquishano pueyani, nojori niishishacari taa canaa paniya jiyanohua nijaniyani. ³ Cristocuajaari nioojiajinia naajiotaquiaari na rupaa, nojuajiniji canaa pohuatanuucua nia niquiara. Majaari na rupaa na naajiotanu quiquiaari nioojiajinia minianata. Seetanujuanaa na Sohuanuta na naajiotaquiaariiri. Majaari na naajiotanu quiquiaari saajianeecua. Seetanujuanaa nioojiajiniajanaa naajiotaquiaari na rupaari. Naa jatanishano pueya nia quishacaritij, puetunu pueyajanaari niishiya niaari seetanujuanaa Pueyaso pueya, nojuajiniji canaa pohuatanuucua nijaniya.

⁴ Naacuajitij, canaari seetanujuanaa niishiyani canaari Pueyaso jiyaramiquishanoni. Cristocuajaari naa canaa niishitiqiaa maninia. ⁵ Majaari canaa niishiriojonu canaa miijiosanoori tama canaa cumaacata canaa miishanojuaaja. Maja. Canaari saaja Pueyaso cumaacata poonijioquiaani. ⁶ Na cumaacata, nojuajaari canaa jataniquiaari quiarinio na rupaa pohuatanaa canaa quiniuria. Quiarinio na rupaari seetanujuanaa Pueyaso Sohuanu cumaacaraca cutara, pueya na jataniniuria seetanujuanaa Pueyaso niquiohua nojori quiniuria. Tariucuacaanu, Pueyaso rupaari naajiotasano quiquiaari pueya tojishocoriquiano juucua. Cuno rootasanojiniji, pueyari niishiquiaari nojoriiri shaajeriquiano na numaa shama nojori tojiniuucua saaja. ⁷ Naajaa, cuno rootasano saajianeecaacia quejasanoni, cunoori jiyanohua maninia quiquiaari. Naacuajitij, Moisés jaara cuno rootasano niishitiojosaariquiaa Sinaí tuhuananuucua, Pueyaso shacantuucaari nocua pacuriquiaa. Naacuajitij, na rosesacariuhua Israel pueyacia, na jiquiocoori puera

shacantuuca quiquiaarijia. Naaratej, narta Israel pueyari maja na naata na jiquioco niqiniu quiquiaari. Na nuhuaji, cuno shacantuucaari jacaria maquesaquiariuhua. ⁸ Quiarijiani, Pueyaso Sohuanuuri poonijioquiaa pueya jiuujiajinia saniniuujia, nojori tiuuniuucua canaa pohuatasanoocua. Cunoori socua shanohua shacantuuca cutara Moisés jiquiocojiniji. ⁹ Moisés pohuatasano Pueyaso rootasano nojuajani, cunoori seetanujuanaa jiyanoehua maninia quiquiaari. Naaratej, Moisés jiquiocoori shacantuuca quiquiaari. Naajaa, na pohuatasanojiniji, Israel pueyari saaja niishiquiaari, Pueyasora, nojoriiri sesa miijiaca quiquiaari. Saniniuujia, quiarijiaari socua jiyanoehua maninia. Canaa pohuatanuucua quiarinio Pueyaso rupaa Jesucristojiniji, pueyari nocua tiuquiaa seetanujuanaa sesa miyashijiacara nojori jiyatesaanura Pueyasora. ¹⁰ Pueyaso jiyatenuucua Moisés tariucuacaanu na rupaa pohuatana na quiniuria, Moisésri shacantuucara jataquiaari. Quiari naataja saniniuujia, Pueyasoori canaa niishitiquiaari socua jiyanoehua maninia rupaa canaa pohuatanura Moisés pohuatasanojiniji. ¹¹ Moisés shacantuuca maquesaquiariuhuaani, cunoori maja na jataniniu quiquiaari Israel pueya. Quiarijia saniniuujia, Pueyaso Sohuanu cutaraari pa jataniquiaa seetanujuanaa pueyaracaanu shacantuuca quijiaca pa quiniuria.

¹² Quiarijiani, canaari niishiyani paari pueyaracaanu shacantuuca quijiacarano cutarani. Canaari cunora canaa timiniutia pohuataquiaa Pueyaso rupaa canaa puereyaquiniutiani. ¹³ Majaari canaa miiniu taa Moisés mi-iquiaaricuaani. Nojuajaari quenaarucue toqueta na jiquioco mishiquioquiaari narta Israel pueya niqiyaquiniuria na shacantuuca maquesaano. ¹⁴ Israel pueya jiuujiacaari juhua toqueta mishiquiosano quiquiaarijuhuaj. Cumajiuujiaaca nojori quiniuucua, majaari Israel pueya niishiniu quiijia Moisés caminiujiushano nojoriria. Cuarta Israel pueyari naa quiyajaa. Majaari nojori niishiniu quiquiaa nojori serojosacari tariucuacaanu Pueyaso sequesano nojoriria. Cuno, juhua toque nojori jiuujia mishiquioyajaani, cunoori juhuanujuaja tii quiyajaa. Saaja Jesucristo cutaraari na naata pueya jiuujia riatanu, pueya niishiniuria maninia na rupaa cutara. ¹⁵ Quiarijiaari naajuhuj. Moisés naajioneeca jaara serojosaariquia Israel pueya niqiara, nojori niishitiaari juhua toqueta mishiquiosano quiyajaa, maja nojori niishiniuria nojori tojishano. ¹⁶ Quiarijiani, pueyano jaara pa Jiyaniijiaacua tiuuri, cuno toqueeri juhua na niishitiaajajiniji jaariutiasaquiaa, maninia na niishiniuria Pueyaso Rupaa.

17 Pa Jiyaniijiaari Pueyaso Sohuanujuhuanajaj. Pa Jiyaniijia Sohuanu jaara poojiajinia quiya, paari Sesaacajiniji jaariutiasanoni, maja pa camarnu na quiniuria socua. Naajuhujaj, majaari tari poojia quiniu juhua toqueta mishiquiosano. ¹⁸ Naacuajitij, puetunu pajaniyajanaari juhua niquitiu nenecuaquiaani, pa Jiyaniijia shacantuuca pacusacari pocua. Cunoori pa sohuanu rupetoosacari nata. Naacuajitij, nojuajaari pueyaracaanu pa jataniquiaa jacaria, socua shacantuuca quijiaca pa quiniuria juhua nojuaja, na Sohuanu poonijosacari poojiajinia.

4

¹ Naa pa Jiyaniijia poonijosacari canaa jiuujiajiniatej, majaari canaa pishiniu quiquiaa canaa poonijosacari nera. Pueyaso jiyanooniucua canaa, nojuajaari canaa jiyatequiaari na rupaa pohuatanaa canaa quiniuria.

² Majaari canaa miiniu quiquiaa cararaatia casaa, taa tamasaca miiquiaacuaa jiyasohuani. Majaari canaa pohuatanu quiquiaa Pueyaso rupaa canaa cuaracashiniutia. Naajuhujaj, canaa pohuatasacari, majaari canaa jataniniu quiquiaa Pueyaso rupaa. Canaari seetanujuanaa maatia pohuataquiaa Pueyaso Rupaani, puetunu pueyajanaa niishiniuria nojoriiri na naata canaacua tiuuniu. ³ Teyano pueyate canaa pohuatasano Jesucristojiniji niishiyaquiyani, cuno pojoriiri shaajasaariquiano. Nojoriiri niishiyaquiya, juhua toqueta mishiquiosano nojori jiuujia quishacari.

⁴ Pueyaso rupaacua tiuyashijiaa nojori quishacari, nojori jiyaniijia Sesaacaari nojori jiuujia jiyatequiaa juhua cariojuarura, Pueyaso Rupaa mariqui nojori jiuujia cuhuatareeri. Nojori jaara Pueyaso rupaacua tiuuriquia, nojori maara niishiri, Cristoori seetanujuanaa shacantuuca quijia cutara, juhua na Que Pueyasojuhuaj.

⁵ Canaa pohuatasacari Pueyaso rupaa niajaniya, majaari tama canaajiniijiaaja canaa pohuatanu quiquiaa nia timitianura canaa. Canaari saaja nia pohuataquiaa cutarani, Jesucristoori seetanujuanaa Jiyaniijiajanaa cutara. Canaari tama canaa cuaqueyajaaja jiyatequiaa juhua nia seya canaa quiniuriani, canaa panishacari pa Jiyaniijia Jesu. ⁶ Canaari naa maninia miijiacani, Pueyaso cuhuatanuucua canaa jiuujia. Jiya shipinishacari, nojuajaari sequequiaari: “Cuhuashiqui cuaara coretaara ninishiquiji”.

Quiariijaari naajuhujaj, nojuajaari poojia cuhuataquiaa-juhuaj, pa niishiniuria nojuajaari tojetaarucujanaa maninia quijia. Paari cuno niishiyani, Jesucristojiniji pa niishishacari. Nojuajaari seetanujuanaa shacantuuca quijia cutara, Pueyaso Niyanu na quiniucua.

Paari maninia quijiaca quiniutianiyani saaja Pueyaso rupaacua pa tiuushacari

⁷ Cuno cumaaca canaa na jiitiaani, cunoori Pueyaso cumaaca cutara. Saniniuujia, canaa cuaqueyari cumaacaju, saaja juhua maraujiniji panishano pataco. Naacujiti niishishiyari, cuno cumaaca pueya jatanijiani, cunoori seetanujuanaa Pueyaso cumaaca, maja tama canaa cumaacajaaja. ⁸ Naacujitij, canaa paraa cosejosacari canaa, majaari canaa tarinitianu quiquiaa Pueyaso rupaa pohuatanu, cuno cumaaca canaa jiitiasacari. Jiyanohua canaa tacaashacari, naajaa, majaari canaa tarinitianu quiquiaa Pueyasora poonijionu. ⁹ Canaari naquiya miishaaquiaa jaaniuhuj. Naajaa, majaari Pueyaso cartenu quiquiaa canaa. Naajuhuj, canaari juhua quiaquesano jiyocuara jaqueroosaaquiaa jaaniuhuj. Naajaa, majaari canaa cusojuasaanu quiquiaani. ¹⁰ Puetunu tiquiyocuajanaa canaa quishacari, canaari pueyaracaanu tama canaa cuaqueyajaaja panitiaquiaani, taa pa Jiyaniijia Jesu panitiaquiaari tama na cuaqueyajaaja pocuaracuaani. Naacujitij, canaa na niqutiosano cumaaca poonijosacari canaa rishiyashijiaa cuaqueyajinia, pueyari niishiquiaa, Jesuuri seetanujuanaa saminio. ¹¹ Mijiria canaa quishacarijia, pueyari pueyaracaanu canaa puecoonu paniquiaani, Jesujiniji canaa pohuatanuucua. Naacujitij, saminio na jiitiasacari canaa, Jesu cumaacaari niquishaaquiaa rishiyashijia canaa cuaqueyajinia. ¹² Canaari juhua piriuquiuniuquiaani, canaa pohuatanuucua Pueyaso rupaa nia niquiara. Niaari pueyaracaanu rishijiacara quiriquiano saniniuujia, canaa pohuatasanoocua nia tiuuniuucua.

¹³ Tariucuacaanu Pueyaso Rupaajinia, supuetana David naajiotasanoori naa sequeya:

“Pueyasooocua cua tiuuniuucua, janiyari pocuareeni”.

Canaari naajuhuj. Pueyasooocua canaa tiuuniuucua, canaari na rupaa pohuataquiaani. ¹⁴ Canaa jaara puecoosaariquia na rupaa canaa pohuatanuucua, naajaa. Canaacuajaari niishiyani, pa Jiyaniijia Jesu Samiitianiacuajaari canaa samiitianijionutaniuhujuhuj, Neyanu Jesu rupuesano canaa quiniuucua. Pueyasoori canaa rijionutaniya puetunu niajaninyatajanaa, pueyaracaanu na shuriucua pa quiniuria. ¹⁵ Naacujitij, canaa jaara rejeretaquiaa naquiya canaa miishaanu Pueyaso rupaa canaa pohuatanuucua, puetunu cunojuanaari niaacuara, maninia nia quiniuria Pueyasora. Naa Pueyaso jiyanooniucua niajaninyacuaatej, socua queraatia pueyari na timiniutia na sequenutaniya, “paacarasho”. Pueyasoori

jiyanohua shuquiritiasaanutaniya, queraatia pueya na jiyanooniucua.

¹⁶ Naaratej, majaari canaa pishiniu na rupaa canaa pohuatanura. Canaa cuaqueyari saaquianoshiya. Naajaa, canaa jiuujiaari saniniuujia puetunu juucajanaa socua mashashiyacujua. ¹⁷ Janiyara, puetunu naquiya canaa miishacarijanaa mijiria, cunoori secaja, rupaquijiajuhuaj. Cuno naquiya miiniu canaa rejeretanuucua, ¡Pueyasoori cunora jiyanoohua maninia miiniutianiya canaa! Cunora, canaari shacantuuca quijiacara jatanishaanutaniyani, pueyaracaanu rishijiaca canaa quiniuria. ¹⁸ Naaratej, majaari canaa jiaatianu quiquiaa canaa jitianura mijiria canaa niquishano casaa. Canaa cutaraari Pueyaso jittiasano niquishoo casaacua jiaatiaquiaani. Mijiria niquishano casaari saaja shaajeja casaa. Pueyaso jittiasano pa niquishoo casaa saniniunijia, cuno cutaraari shaajeyashijia.

5

¹ Mijiria pa quishacarijia, nio pa cuaqueyari saaja juhua suhuorotu quiya pa sohuanura, nareja juhua rucoonaa pa quishacari mijiria. Mijiria pa jittiasano pa shoque jaara cusoquee, paacuajaari niishiyani, paari tari jittiaa tamonu cuaqueya jiyocuacaanuni. Cuno cuaqueyari juhua shanohua tia, Pueyaso shipinishano pajaniyara. Cuno cuaqueyari pueyaracaanu rishiniutianiya pa sohuanu quiquiora. Cunoori maja pueyano shipinishano. ² Mijiria canaa quishacarijia nio canaa sohuanu suhuorotujiniani, canaari taraatia miishaaquiaani. Cunora, canaari juhua quiatojoquiaani, canaa jiaatiasacari canaa sohuanu pacusaanura jiyocuacaanu. Tii quiyacuajaari canaa sohuanuucujia tiasano quiquio. ³ Canaari cuno quiarinio cuaqueya cushiyonutaniya juhua toqueni, maja juhuasu canaa sohuanu quiniuria. ⁴ Nio cuaqueyajiniaja canaa quishacari mijiria juhua suhuorotujinia, canaari quiatojoquiaani taraatia canaa miishacari mijiria. Maja cutaraari canaa quiniu paniniu cuaqueyaju, juhua juhuasunucua. Canaa cutaraari canaa quiarinio cuaqueya cushiniu paniyani, Pueyaso shipinishano canaarani. Naacuajitij, nio shaajeja canaa cuaqueyari puetunu maninia jatanishaanutaniyajanaa Pueyaso cumaacata, pueyaracaanu rishijia cuaqueyaraca canaa quiniuria. ⁵ Pueyasojuanaacuajaari na muerasura pa saquiriojoquiaari, naa na jataniniuria pajaniyatej. Naaratej, nojuajaari na muerasu niqutioquiaa na Sohuanu, pa niishiniuria nojuajaari seetanujanaa naa pa miiniutianiya.

⁶ Naa canaa niishishacaritij, majaari canaa tacaaniu quiquiaa. Canaacuajaari niishiyani nio cuaqueyajinia canaa quishacarijia, majaari juhuanajuaja pa quiniu pa Jiyaniijia shuriucua. Naacuajitij, paari tucuacaanu quiyajaani pueyaracaanu pa quijiarano quiquiojiniji. ⁷ Cunora, mijiria canaa quishacarijia, majaari canaa quiniu tama canaa niishitiajataaja. Canaa cutaraari canaa Jiyaniijiaacua canaa tiuuniutia quiquiaani. ⁸ Naacuajitij, canaari shuquiriaatia quiya mijiriani, nocua canaa tiushacari. Naajaa, canaari nio canaa cuaqueya tarinitianuucua jiaatiaani, canaa pacunura pa Jiyaniijia shuriucua, tii canaa quiniuria nata. ⁹ Naacuajitij, canaa jaara nio cuaqueyajinia quiyajaa mijiriani, naajuhuaaj canaa jaara na cartequeni, canaari saaja pa Jiyaniijia shuquiritiniucua jiaatiaani. ¹⁰ Puetunu pajaniyajanaacuajaari Jesucristo tacoji na nequesoreesaqui nujuatejosaariquianoni. Cuniqwi, puetunu mijiria pueya miishanojuanaari maatia niishishaanutaniya, maninia pa miishano, sesa pa miishanonio. Na nuhuaji, pa Jiyaniijiaari maninia miiniutianiya maninia miijiaca. Saniniuujia, sesa miijiacaari taraatia miishaanutaniyacujua.

Pueyasoori pueya jiyanooni panijia cutara

¹¹ Naaratej, canaa niishishacari jyanohua puereeta quiniutianiyaari pa Jiyaniijia saniitiosacari na tojtiaashijiaca, canaari cunora saniniuuiuquiaa pueya tojtiniuria Pueyaso Rupaani. Pueyasocuajaari niishiya canaari seetanujuanaa nera poonijionaani. ¡Seetanujuanaa naa nia niishitiriquiajaaniuhuaaj! ¹² Majaari nia jyaniniu canaari tama canaajiniijiaaja nia pohuatanu coteerohuanuhua, canaacua nia tiuuniuria. Canaari saaja naa nia pahuataani nia niishiniuria casarate nia naata timitianu canaani. Canaa nia timitiare cutara, seetanujuanaa Pueyasora poonijionaa canaa quiniuucua. Naacuajiti nia naata cuno pueya tacunu canaacuaji, cuno pojori canapuate sapuenu juhua maninia quijiaca niquishano pueya najuhuanacuajani. Majaari nojori niishiniu tacaaniu taamueca jiuujiaracateja nojorini. ¹³ Noojiaqueya nijaniyajinijinio naasucuaari jiyaniya canaari juhua paateca pocuaquiaani. Naajaa, canaa jaara seetanujuanaa paateca quirini, canaari paateca quiya Pueyasorani. Saniniuujia, canaa jaara maninia niishiriojojuaca quiriquiani, canaari naa quiya niaarani, maninia canaa niishitiojonura nijaniya. ¹⁴ Cristo paniniuucua canaa, cuno na paniniuuri canaa shiniuuiuquiaa nera canaa poonijionura. Naaratej, canaari pueyaracaanu

nojuajiniji pohuataquiaani. Canaacuajaari niishiyani, nojuajaari puetunu pueyacuarajanaa cusoquiaari. Naa na cusuucua puetunu pueya nitijianaatej, Pueyasora, puetunu pueyajanaari tari cusuucuaquiaari Cristota. Naacuajitij, Pueyasoori na naata jiyanooni puetunu Neyanuucua tiuuniaajanaa. ¹⁵ Cristocuajaari puetunu pueyacuarajanaa cusoquiaari, na samiitianishano pueya quiniuria saa neraja. Pocuara cusoquiaariiri. Nojuajaari pocuara samiitiaquiaarihuajuhuj. Naaratej, paa cuaara miiria saa na panishanojua. Majaari socua pa miiniu tama pa panishanojuaaja. ¹⁶ Tarijia, canaari saaja canaa panishano pueyacia taraqejani. Quiarijia saniniuujia, Pueyaso jatanishano pueya canaa quishacari, majaari rimiajata canaa paniniu pueya. Tarijia, canaari Cristo jiyaniijiani nojuaja naasucuaari nareja pueyano, juhua pajaniyajuhuj. Quiarijia cutara, majaari naa canaa niishiriojonu nojuajiniji. ¹⁷ Naajuhuj, cante Cristo rupuesanoni, nojuajaari quiariniora jatanishano pueyano. Tariucuacaanu sesa na quiniuuri tari jatanocuaja. Saniniuujia, puetunujuanaari quiarinio quia.

¹⁸ Puetunu cunujuanaari Pueyaso miishano. Nojuajaari Neyanu Cristo cusojuaquiaari pocuara, na jiyanooshano pueya pa quiniuria. Na nuhuj, nojuajaari canaa jiyaramiquiquiaari puetunu pueyajanaa canaa pohuatanura, nojori jiyanooshaanurajuhuj. ¹⁹ Naacuajitij, Pueyasoori mijiria quiniaa jiyanoocua saaja Neyanu Cristoocua nojori tiushacari. Naa na jiyanooshacari pueyatej, majaari quenaaja sesa nojori miishano na saneenu quiniutianihua socua. Nojuajaari canaa jiyatequiaari na rupa pohuataanaa canaa quiniuria, pueya canaa tiutiniuria Neyanu Jesucristoocua, jiyanooshano nojori quiniurijuhuj. ²⁰ Naacuajitij, canaari Jesucristo jiyaramiquishanoni, canaa caminiujiuniuria niaara na sequesano canaa. Naa canaa caminiujiushacari Jesucristo rupaatej, Pueyasojuaanaari nia masuya na muerasu nia quiniuria, Neyanuucua nia tiushacari. Naacuajitij, canaari Cristo niti nia secijiani, itama nia cuaqueyajaaja nia jiyanootiri Pueyaso! ²¹ Pa Jiyaniijiarano Jesucristoni, nojuajaari tojetaarucujanaa sesa miyashijiajuhanajaj. Naajaa, na Que Pueyasoori nocua tiutiaquiaari puetunu sesa pa miishanojuanaa, pa niti na saniitiosocoriquiano. Naacuajitij, Neyanuucua pa tiushacari, Pueyasoori pa jiyatequiaa juhua sesa miyashijia pa quiniuria.

6

¹ Naa Pueyasora poonijionaa canaa quiniuucuatej, canaari

jiyanohua nia secojiyani cuarta Pueyaso muerasunaa, saa Pueyatoraja nia quiri, nia jiyanoojia na quiniuucua. Maninia na muerasu nia quiri. ²Tariucuacaanu na sequesano cuajaari naa naajiotasano quiya na rupaajinia:

“Quiaari namitia cua secojocanu, pueya cua naacunu panishacari. Pueya cua jiyanooshacarcuaa, janiyari quia naacucanujuhujaj”.

Cua panishano pueyanaa, quiarijiaari Pueyaso jiyanooshacari pueya. Nojuajaari quiarijia pueya jiyatequiaa na muerasu nojori quiniuria.

³Cunora, canaari tama canaa cuaqueyajaaja cojuaquiaani, maja canaa miiniuria sesa tamasaca niquiara. Canaari naa maninia miiquiaani, nojori mariqui Jesucristoocua tiuyaquiriiri, nojori mariqui Pueyasora canaa poonijosano sesacarejaariuhujaj. ⁴Canaa cutaraari saaja maninia miiquiaa pueya niquiarani, puetunu pueya niishiniurijanaa canaari seetanujanaa Pueyasora poonijionaani. Naaratej, canaari juhuajaniya rejeretaquiaa naquiya canaa miiniuni, canaa panishano canaa jiiitaaquishacarijuhuaj. Naajuhujaj, canaari rejeretaquiaani puera canaa tacaashacari, canaa niishiyaquishacari taa canaa miiniutianiya socuani. ⁵Naajuhujaj, canaari juhuajaniya rejeretaquiaa canaa jaara majacujusaaquiaani, canaa jaara nujuatejojuajinia nujuatejosaaquiaaaniuhujaj. Nasojosano pueya jaara miitianu paniquiaa canaani, canaari na rejeretaquiaajuhujaj, pueya tiuuniuria canaa pohuatasanoocua. Naa Pueyaso jiyaramiquishano pueya canaa quishacaritij, canaari jiyanoohua poonijioquiaa nerani. Canaari sequeyarucua sutequiaani. Canaari miaajequiaajuhujaj. ⁶Naajuhujaj, pueyari na naata niishiniu canaari seetanujanaa Pueyaso seyani, sesa miyashijiaca canaa quiniuucua, maninia canaa niishiniuucua Pueyaso rupaajuhujaj. Niishishaatiacujaari, canaari Pueyaso seyani, jacaria pocuajaca canaa quishacari juaajiaca pueyata, naajuhujaj, maninia canaa miishacari puetunu pueyajanaanio. Naa niishishaatiajaariuhua canaari Pueyaso seyani Pueyaso Sohuanu cumaquishacari canaa, seetanujanaa canaa panishacari pueyajuhujaj. ⁷Niishishaatiajaariuhua canaari Pueyaso seyani seetanu rupaajanaa canaa pohuatanuucua pueya, naajuhujaj, casaa canaa miiniuucua Pueyaso cumaacata. Canaari Sesaaca nujuataquiaa cumaatiani, Pueyaso jiyanooshano pueya canaa quiniuucua. Pueyaso rupaata, canaa cutaraari saaja Sesaaca jiyatequiaa canaacuajini. ⁸Naa Pueyasora canaa poonijosacaritij, noojiaqueya pueyari canaa shuquiritiaquiaani. Tamasacaari

canaa rerequetequiaa saniniuujia. Naajuhua, noojiaqueya pueyari maninia pohuatanuuquiaa tamasaca niquiara canaajiniji. Tamasacaari canaa sesacaquiaa saniniuujia. Noojiaqueya pueyari canaa sequequiaa sapojonuujacatani. Tamasacaari saniniuujia maninia tojitiaquiaa canaa, seetanu rupaajanaa canaa pohuatasacari. ⁹ Noojiaqueya pueyari canaa niquiquiaa juhua najuhua quijiaca pueyani. Tamasacara saniniuujia, canaari tojishano pueya cutarani. Canaari sequeyarucua quera puecoosaquiaani. Naajaa, canaari saminio quiyajaani. Canaari jiyanohua miitiasaquiaani. Naajaa, majaari canaa puecoosaanu quiquiaani. ¹⁰ Taraatia canaa quishacari, naajaa, canaari pueyaracaanu shuquiriaatia quiquiaani, Pueyaso pueya canaa quiniuucua. Canaari seetanujuanaa casamiijiuniucujuhua. Naajaa, canaari queraatia pueya jiyatequiaa queraatia casamiriaca nojori quiniuria Pueyaso casaatani. Canaari juhua casamiijiuniucua niquishanoni. Naajaa, canaari puetunu canaa panishanojuanaa jiiiaacuajani.

¹¹ Corinto tiacajinia quiniaa cuarta Pueyaso pueyanaa, canaa nia tojitiare. Canaa jiaatiasacari niaacua, canaari seetanujuanaa puetunu canaa jiuujiajinia canaa niishiriojosanojuanaa nia sequereeni. ¹² Majaari canaa tarinitianu canaa paniniu jiyanohua niajaniya. Niajaniya sajaraj, majaari nia paniniu canaa, taa canaa paniya niajaniyacuaani. ¹³ Janiyari nia nenecojiyani, naatej, taa pueyano nenecojoquiaa necohuacuaani, ¡majaari canaacuaji nia taacanuunu! Seetanujuanaa canaa nia paniri, taa canaa paniquiaa niajaniyacuaani, seetanujuanaa panitiojuaca pa quiniuria.

Paari Pueyaso quiquioni

¹⁴ Saniniuujia, maja Pueyaso tojiyashijiaca pueya nia paniniu, nojori nia cojiniuria. Naajuhua, maja cutaraari nia caminiu Pueyaso tojiyashijiata, niaa mariqui rimiajata quijiaca quiriiri. ¿Maninia miijiatucua shuquiriaatia quijia quiriquia, sesa miijata na quishacari? Maja. Cua riu-cuareto pueyanaa. ¿Cuhuashiqui quijiateeri na naata juhua-janiya jatiqui quiniu ninishiqui quijata? Maja na naata. ¹⁵ Seetanujuanaa pueyanaa, Cristoori maja Sesaaca rupuena. Naajuhua, Pueyasoocua tiuujia pueyanoori maja na naata maninia rupuetoonu Pueyasoocua tiuyashijia pueyanota. ¹⁶ Paa jaara Pueyaso quiquio quirini, ¿paateeri Pueyaso quiquiojinia shanacunutaniya samaruhua tiuquitianura tini? ¡Maja! Paacuajaari pueyaracaanu Quijia Pueyaso quiquioni. Na pueyara na sequesanoacuajaari naa naajio-tasano quiya:

“Janiyari nojorijinia quiriquianoni. Janiyari nojori tajinia rucuanenonutaniyani. Janiyari nojori Jiyaniijiajanaa quiniutianiyani. Nojoriiri cua pueya quiniutianiyacujua”.

¹⁷ Cunora, pa Jiyaniijaari na pueya sequeya:

“¡Cua tojitiaashijiaca pueya tajiniji nia pacure! Nia shiriquiri tamocora nojoriicujaji. Majaari sesa casaa nia saniniu paniniu. Naa jaara cua tojijiaca quiri, janiyari nia jiyatenutaniya quirianoni. ¹⁸ Janiyari nia Que quiniutianiyani. Naacuajitij, niaari cua niqiuohua quiniutianiya. Naa sequeyanijia, puetunu cumaacaracajanaa cua quiniucua”.

7

¹ Naacuajiti canaa panishano pueyanaa, paacujajari naa seetanujanaa pa Jiyaniija sequesano pajaniyarano jiti-aani. Naaratej, pueyaracaanu tama pa cuaqueyajaaja juhua jeequesano pa jitiariquia, poojiajuhuj. Majaari pa shanacunu juhua curuushojosano pa quiniuria sesa pa miishanota. Pueyaso puerejaca pa quiriquia, tojetaarucujanaa sesa miyashijiaca pa quiniuria, saa neraja pa quiniurijuhuj.

Corinto pueya tacatosacari nojori jiuujia, maninia nojori quiniuhuara

² Pueyanaa, ¿taa nia miiquianuni? ¡Canaa panijiaca nia quiriohua! Majaari canaa miiniu quiquianu sesa niajaniya. Majaari quenaaja niquiriyatu niajaniyajinijinio canaa sesonu quiquianu canaa niishitiojosanota. Majaari canaa sapojonu quijia niajaniya. ³ Naa cua sequesacari niajaniyatej, majaari cua sequenu cua cararonura niajaniya. Janiyacujajari tari nia sequereeni, canaari jiyanohua nia paniyani. Naacuajitij, canaari shuquiriaatia quiniutianiyani canaa jaara puecoosaare canaa cumaquiniucua niajaniyani, seetanujanaa Pueyaso muerasu nia quiniuria. Naacuajitij, naa jaara shaajerejuhuj, paari pueyaracaanu jatiqui quijia quiniutianiya Pueyasotani. ⁴ Janiyari seetanujanaa naa nia sequeyani cua panishacari niajaniya. Quiarijiani, janiyari jiyanohua nia timitiaani, maninia cua tojiniucua niajaniyajiniji. Canaari seetanujanaa naquiya miiquiaani. Naajaa, maninia canaa tojiniushacari niajaniyajiniji, cunoori cua cumanijiacan. Cunora, janiyari jiyanohua nia shuquiritiaani.

⁵ Canaa jaara tiuquiquianu niya Macedonia jiyajiniani, majaari quenaaja rupaquijia canaa quiniu quiquianu juhujaniya. Canaari puetunu taraatia miishaacanujuanaani. Pueyasocua tiuyashijiacaari canaa juaariquiaa. Canaa

jiuujaari niaacua tacaariquiaa saniniuujia. ⁶ Jiyacaritij, Pueyasoori canaa cumanijiacanu Tito tiuquishacariuhua canaacua. ¡Pa Pueyasocujaari tacaajiaca cumanijiana! ⁷ Canaa jiuujia canaa cajitishacarini, cunoori maja saaja canaa niquishacari Tito canaacua tiuquiuhua. Canaa cutaraari canaa jiuujia cajitiquianuni, nojuaja jaara canaa pohuatacanu niajanijajiniji jiyanoehua na timiniutia. Nojuajaari canaa pohuatacanu, niaanaari canaa niquniuucua jiaatiaa. Niaanaari cucua taraajeya, jiyanoehua nia taraajetenuucua janiya. Niaanaari cucua tacaya jiyanoehua, cua rootasano tojjijaca nia quiniuria quiarijia cutara. Naa cua tojjishacari niaacuajitij, janiyari jiyanoehua shuquiriquianuni.

⁸ Niaacuara cua naajioneeri nia taraajetecanu. Janiyari taraajecanujuhua, naa cua taraajetenuucua niajanijatej. Quiarijia cutaraari maja cua taraajenu. Cua naajioneecujaari saaja rupaquijia nia taraajocanu. ⁹ Quiarijiani, ¡shuquiriaatia quiyanijia! Majaari nia jiyaniniu janiyari shuquiriaatia quiyani naa cua taraajonuucua niajanijatej. Shuquiriaatia quiya cutaranijia, cua niishishacari, naa cua taraajonuucua niajanijatej, niaari nioojia tacatorohuacuaa Pueyasocua, Pueyaso tojjitajaca nia quiniuhua. Naacuajitij, janiyari quiarijia niishiyani, majaquiri cua sesonu quiquianu niajanijatej, naa cua taraajonuucua niajanijatej. Pueyasocujaquiri maninia poonijioriquiaa nioojiacajinia, naa nia taraajesacaritij. ¹⁰ Pueyasojuanaa jaara pa taraajetere, cunoori maninia, poojia pa tacatonuhua nocua, na jiyanooniuria pajaniya. Na nuhuaji, paari shuquiriaatia quiya cutarani. Saniniuujia, tama pa taraajesacarijiaaja, cunoori tama poojia pa shaajanurajaaja. ¹¹ Nia taraajesacari cua nacasusacari niajanijatej, naa nia taraajetecanu. Naa nia taraajenuucuatej, nia niquishuriirij, majaari nia tarishiniu quiquianu maninia nia miiniuria. Niaari ritia cua niishitiniu paniriquiaa juucua, maja niaacua na tiutiasaanura cuno pueyano miishano sesa. Niaacuajaari maninia miiquianu nia juaashacari cuno sesa miijia. Niaari na naaqui puerecanujuhua, niaa mariqui nata cojiritiasaare saniitionuuri. Niaari cua jaqueroojocanu. Niaari ritia miiquianu cua naajiojinia cua sequesano niajanijatej. Naacuajitij, niaari ritia cuno sesa miijia taanuucanu nia tajiniji, maja socua nia rupuesano na quiniuria. Naa nia miiniuucua puetunu maninijanaatej, janiyari quiarijia niishiyani, majaquiri nia maniniucuanu quiquianu naa sacuaraatia cuno pueyano miishanotej. ¹² Pueyanaa, niaari maninia canaa tojjijaca. Seetanujuanaa, cua naajiosacari niaacuara, ma-

jaari cua naajionu quiquianu saaja cuno sesa miiija pueyanojiniji, sesa miishano pueyanojinijinio. Janiya cutaraari ni-aacuara naajiocanuni tamajaaja nio nia niishiniuria Pueyaso niquiara: niaacuajaari seetanujuanaa canaa panijiaca quiyaja, nia tojishacari canaa. ¹³ Naaratej, canaari canaa jiuujia cajitiquianuni, canaa tojishacari Tito pohuatasano niajanijianiji.

Majaari saaja Tito pohuatasano cumanijianu quiquianu canaa. Canaari Tito timitiacanujuhuj, canaa niquishacari nojuajaari shuquiriaatia tiuquiriohua canaacua. Puetunu niajanijajanaari na naacucanu, noojia na cajitiniuhua, najuhua na tacaaniuucua niaacuajuhuj. ¹⁴ Tito quiaaquishacarijia niaacua, janiyacujaari juhuacarijia na pohuatacanu niajanijajinijini, maja puera na taacanuunura niaacuaji. Naa maninia nia quishacari Tito tiuquishacari niaacuatej, majaari cua caririqiniu quiquianu niajanijajiniji. Puetunu cua pohuatasanojuanaa Tito niajanijajinijiiri seetanujuanaa quiquianu Titora. Naajuhuj, puetunu cua pohuatasano niajanijajanaari pueyaracaanu seetanu rupaajanaa quijia. ¹⁵ Quiarijia Tito niishiriojosacari niajanija, nojuajaari socua jiyanohua nia panijia quiya, nia tojiniuucua maninia nojuaja. Niaacuajaari tetecatucanu nia puerenuta na tiuquishacari niaacua. Majaari nia rerequetenu quiquianu nojuaja. ¹⁶ Janiyajuhuj, jiyanohua shuquiriaatia quiyanijia, cua niishishacari quiarijia cutara cua naata niaacua tiuuniu seetanujuanaa.

8

Capora pa quiriqiaj

¹ Quiarijiani pueyanaa, canaari nia pohuatanu paniyani, taa Pueyaso cumaquiya jiyanohua na muerasu maapue niya Macedonia jiyajiniani. ² Nojoriiri jiyanohua taraatia mi-iquioquiaa. Naajaa, nojoriiri saaja jiyanohua shuquiriaatia quiya. Naajuhuj, casamijiuniucua nojori quishacari, naajaa, nojoriiri caporatujuri. Nojoriiri na cumaneecajiniji nareja niqutiojoquiaa queraatia, Judea jiyajinia casamijiuniucua Pueyaso pueyara. Nojori niqutiojosanoori juhua casamiriaca pueya niqutiojosano. ³ Seetanujuanaa narta Pueyaso pueyacua nojori taraajenuta, nojoriiri naa na cumaneecajiniji niqutiojocanu queraatia. Nojoriiri puetunu na jiiitasano cumaneecajanaa niqutiojonuucanu. Naacuajitij, janiyari jiyaniquianuni, maja naasucuaari nojori naata niqutiojonu quiniutianiya socua. Naajaa, na nuhuaji, nojoriiri socua niqutiojocanu! Seetanujuanaari cua sequesano niajanija. Janiyacuajaari nojori miishano niqiniani.

⁴ Niya Macedonia jiyajinia quiniaa parta Pueyaso pueyani, nojoriiri niajanijajiniji tojiqianu. Niaanaari cumaneeca reratenu paniriqiaacuaa, nia jiyarosocoriquiano Judea jiyajinia quiniaa casamijiuniucua parta Pueyaso pueyara. Naaratej, nojoriiri jiyanoehua canaa nenecojocanu canaa masenura nojori niqutionu panishano cumaneecajuhuaaj, parta Pueyaso muerasura. ⁵ Seetanujuanaa Pueyaso tojjijica nojori quiniucua, nojoriiri maja saaja na cumaneeca na niqutiojonu quiqianu. Nojoriiri coteenu tama nojori cuaqueyajaaja jiyatecanu seetanujuanaa nojori quiniuria saaja pa Jiyaniijiaara, taa Pueyaso paniya pa miiniuriacua-jani. Naajuhuaaj, nojoriiri tama na cuaqueyajaaja jiyatecanu canaa tojjijica nojori quiniuriajuhuaaj. Cunora, canaari nojoriicuaaji jiuujiatecanuni. ⁶ Naa capora niqutiojonaa nojori quiniucuatej, canaari Tito sequerucuaani, niaacua na quianuhuara quiarjia. Nojuacuajaari tarijia naacucanu niajaniya, nia reratenura nia niqutionu panishano cumaneeca. Niaacuajaari maninia niqutiojocanu juhua capora pueya. Naaratej, nojuaja cuara nia naacuura, nia tucuatanura reratenu puetunu nia niqutionu panishano cumaneecajanaa. ⁷ Niajaniya, Corinto tiacajinia quiniaanaa, niaacuajaari jiyanoehua maninia Pueyaso muerasu. Niaari Pueyasooocua tiuujica jiyanoehua. Naajuhuaaj, niaari jiyanoehua maninia Pueyaso rupaa niishitiojonuujuaca. Niaari Pueyaso niishitiaja jiiitiaajuhuaaj. Niaari mariyata shitimia poonijionuujuaca, tamasa nia naacunura. Naajuhuaaj, niaari canaa panijica jiyanoehua. Naatej, taa maninia miijiacatucuaaja niajanijani, capora nia quirijihuaaj, nia cumaneeca nia niqutiojonura nareja parta Pueyaso pueyara.

⁸ Majaari juhua nia jiyaniijia cua sequenu niajaniya, nia cumaneeca cua niqutiojotenura niajaniya. Janiyari nareja nia pohuatariquiaa capora Macedonia pueyajinijini, tama nia niishiniuriajaaja, niaate seetanujuanaa canaa panijiacajuhuaaj, taa Macedonia jiyajinijinio pueya paniya canaacuaani. ⁹ Niaacuajaari pa Jiyaniijia Jesucristojiniji niishiya; na Que Pueyaso shuriucua na quishacarijia, nojuajaari puetunu maninia casaajanaa jiiitiaja quiquiaari. Naajaa, nojuajaari juhua casamijiuria quiquiaari, mijiria na rosesacari pocua. Nojuajaari naa taraatia quijia quiquiaari, saniniujia jiyanoehua shuquiriaatia quijica na jiyatenura pajaniya, juhua jiyanoehua queraatia casamiriaca pueya pa quiniuria. Naa jaara seetanujuanaa panijica quiriquia, naa nia miirijihuaaj, taa pa Jiyaniijia miiquiaaricuaani.

¹⁰ Janiyari niishiriojoriquiaani, taate socua maninia nia naata miiniu parta casamijiuniucua Pueyaso pueyarani,

shuquiriaatia nia quiniurijahuaj. Cua tojiri. Niaacua-jaari niishiya, noo marijara pa shococanutej, niaacua-jaari juhuacatecara cumaneeca reratejonu coteecanu. Niaari naa maninia miiquianu tama nia tacaashacarijiaaja niarta Pueyaso pueyacu. ¹¹ Niaari shitimia juhuacatecara nia cumaneeca niqutiojonu coteecanucuaaja. Naaratej, quiarijia nia sequeyanijia, niaa cuaara naa shitimia niqutiojonu tucataara puetunu nia niqutionu panishano cumaneecajanaa. Nia jiiitasano cumaneecajiniji nia niqutiojore, taa cumaneeca nia niqutionu paniyacuajani. ¹² Nia tojiri. Paa jaara seetanujuanaa nareja niqutionu paniriquia pa cumaneecajinijini, Pueyasoori pa niqutiosano shuquiritiaja, paa jaara juhua capora niqutiore pa jiiitasanojinijini. Maja cutaraari Pueyaso paniniu pa niqutionura, pa jaara na jiiitiaaquiyani.

¹³ Majaari Pueyaso paniniu cutara puera nia niqutiononura nia cumaneeca, tamasaca quiniuria casamiriaca, saniniuujia nia jiiitiaaquiniuria nia panishano. ¹⁴ Maninia cutaraari puetunu Pueyaso muerasujuanaa jiiitanura na panishano. Naaratej, quiarijiani, niaa cuaara niqutiojooora nia jiiitasanojiniji, nojori jiiitanura na panishanojuhuaj. Tamacari saniniuujia, nojoriiri saniniuujia nia jiiitiaaquishoo casaa nia niqutionutaniyacujua, niaa jaara na jiiitiaaquiri. Naacuajitij, puetunu Pueyaso muerasujua-naari na panishano jiiitanutaniya mariyata, maja rimiajata. ¹⁵ Naajuhuj, tariucuacaanu Pueyaso Rupaajiniani, jiyocua-caanuji Pueyaso tinishano Israel pueya miaquesocoriquiano panjinijiiri naa naajiotasano quiya:

“Cante queraatia reratequiaarini, majaari quenaaja na cureenu quiquiaari. Naajuhuj, cante secaja reratequiaarini, majaari nojoriria na puetanu quiquiaari”.

Naaratej, Pueyasocua tiuujia nia quiri. Nia jiiitasanojiniji nia niqutiojore nareja, nia jamueyaquiniutia.

Pablo pahuatasano Titojiniji, Tito cojiniaajinijinio

¹⁶ Titoori jiyanohua niaacua jiaatiaja, taa cua jiaatiaa ni-aacuacuaani. Pueyasocuaajaari na jiyatequiaari nia panijia na quiniuria. Janiyari cunora Pueyaso sequequiaani: “¡Paacarasho Pueyasonaa!” ¹⁷ Naacuajitij, janiya jaara Tito se-querucuaani nia niquiniucua na quianura, nojuajaari cua timitiriucuaa. Tama nojuajaarijia nia niquiniucua jiaatiaa. Naacuajitij, nojuajaari quiarijia quianutaniya niaacua.

¹⁸ Canaari tamonu parta Pueyaso pueyano jiyaroya Titotani, na tarajariquiano. Cuno pueyanoori puetunu Pueyaso muerasu maapuejanaa shuquiritasano pueyano, maninia na pahuatanuucua pa Jiyaniijia Jesucristojiniji.

19 Macedonia jiyajinia quiniaa Pueyaso muerasu maapueeri tari na saquiriojocanu na tarajanura canaa, pa niqutiojosano cumaneeca canaa jiyatanura nata, Judea jiyajiniara. Naa pa niqutiojonuucua pa cumaneeca parta Pueyaso muerasuratej, queraatia pueyari pa Jiyaniijia timitianutaniya socua. Naajuhuj, parta Pueyaso pueya Judiocuacaari niishiniutianiya, narta Pueyaso pueya taucuacaquiiri nojoriicua taraajecajuhuj. 20 Maniniacuajaari parta Pueyaso pueya maapue saquiriojosano pueyano quianura canaata. Naacuajitij, majaari pueya jiyaniniu quiniutianiya canaari nio queraatia canaa reratesocoriquiano cumaneecajiniji nohuasenutaniyani. 21 Canaari pueyaracaanu maninia miiniu paniquiaani puetunu pueya niquliarajanaa, maja saaja Pueyaso niquiara.

22 Quiarijiani, niaacua canaa jiyarosocoriquiano pueyata, canaari niquijinio tamonu parta Pueyaso pueyano jiyaronutaniyani. Pueyaracaanu na poonijosacari pa Jiyaniijia, janiyajanaari na niqiuqianuni. Nojuajaari seetanujuanaa pueya panijia, Pueyaso panijia na quiniuucua. Quiarijia cutara, seetanujuanaa niaacua na tiuushacari, janiyari niishiyani, nojuajaari jiyanohua maninia Pueyaso pueyano. 23 Tamonu jaara nia nequesotare cante Titoni, niocua na riucua: “Nojuacuajaari Pablota poonijiona, na cumaquiniuria pajaniya”. Naajuhuj, Tito cojiniaari niquiji Pueyaso muerasu maapue jiyarosano niaacuajuhuj. Pa Jiyaniijia Jesucristoori socua maniniuhuaqueetasano, maninia na tojitiajaca nojori quiniuucua. 24 Naaratej, nio pojori jaara niaacua tiuquijiosee, niocua puetunujuanaa maninia miiri nojoriria, nia paniniutia nojori. Naacuajitij, puetunu Pueyaso muerasu maapuejanaari niishiniutianiya niaaqui seetanujuanaa panijia. Naajuhuj, puetunu Pueyaso pueyajanaari niishiniutianiya, majaari cua sapojonu quiquianu, maninia cua pohuatasacari nojori niajaniyajiniji.

9

Pablo shiniujiushacari pueya, cumaneeca nojori reratenura narta Pueyaso pueyara

1 Janiyaruhua najuhuaana niaacuara naajiyani, cua sequenura niajaniya, nia cumaneecata nia naacunura Judea jiyajinia quiniaa parta Pueyaso pueya. 2 Janiyacuajaari niishiyani, niaari tarijia na naacunu paniquianucua. Cua shuquiritasacari cunora niajaniya, janiyari pueyaracaanu niya Macedonia jiyajinia quiniaa parta Pueyaso pueya niquiara pohuataquiaa niajaniyajinijini. Janiyacuajaari

nojori pahuataquiaani, niajaniya Acaya jiyajinia quiniaa pueyani, niaari nia cumaneeca niqutionu paniquianu noo marijiara pa shococanutej. Naaratej, queraatia niya Macedonia jiyajinia quiniaa Pueyaso pueyari cunora jaarajaaja na cumaneeca niqutionu panijajuhuj, naa nojori cua pahuatanuucua niajanijajinijitij. ³ Janiyari niaacua tiuya seetanujuanaani, niaacuajaari canaacuaji tariucua reratesano jitianutaniya nia cumaneeca, taa cua pahuataquiaa niya niajanijajinijicuaajani. Naajaa, janiyari nio parta Pueyaso pueya jiyaronutaniya niaacuani, seetanujuanaa juhuacarijia nia reratenura nia niqutiojosocoriquiano cumaneeca. Majaari cua paniniu cutara cua pahuatasano niajanijajiniji cuarachitishaanura. ⁴ Macedonia jiyajinijinio parta Pueyaso pueya naasucuaari cuata tiuquiniutianiya niaacua. Nojori jaara cuata tiuquishii niaacua, canaa jaara nia riuriatasee nia cumaneeca rerateyojuani, canaari caririquiniutianiyani. Niaari caririquiniutianiyajuhuj. ⁵ Naaratej, janiyari Tito sequereeni, parta Pueyaso muerasuta na quianura coteenu niaacua cucuaji, nia niqutiojonu panishano cumaneeca cuara tari reratesano quiiria canaacuaji. Naacuajitij, nia niqutiojosano cumaneecaari seetanujuanaa nareja nia niqutionu panishano quiniutianiya, maja canaa niqutiojotesano niajaniya.

⁶ Pueyanaa, nio sequesano nia niishiriquia. Naa sequeyari: “Cante secaja natajani, secaja senoonutaniyajaariuhuj. Saniniuujia, cante queraatia natajani, queraatia senoonutaniyajaariuhuj”. Naajuhuj, paa jaara capora quiriquiani, Pueyasoori saniniuujia socua queraatia pa niqutionutaniya pa niqutiosanojiniji. ⁷ Naaratej, puetunu niajanijajanaa cuara niqutioora taa nioojiajinia nia niishiriojoree nia niqutiojonuracuajani. Majaari nia cumaneeca nia niqutiojonu nia jamuenuta, nocua nia taraajenutanio. Naajuhuj, majaari nia niqutionu nia cumaneeca saaja tamasaca shiniujiushacari niajaniya. Pueyaso cutaraari shuquiriaatia niqutiojuaca timitiaja. ⁸ Pueyasocuaajaari cumaacaraca na niqutionura niajaniya puetunu nia panishanojuanaa nia jittiasocoriquiano pueyaracaanu. Naacuajitij, niaari pueyaracaanu socua queraatia jittiajaca quiniutianiya, tamasaca nia niqutiojonurajuhuj, nojori jaara jittiaquiriquia nojori panishano. ⁹ Naa jaara naa capora quiriquiatej, niaari nio tariucuaacaanu Pueyaso Rupaa naajiotasano tohuateenutaniya. Naa sequeyari:

“Maninia pueyanoori juhua capora nareja niqutiojojua na casamijiniji casamijiuniucua pueya. Na miishanoori pueyaracaanu maninia quiniutianiya Pueyasora. Ma-

jaari Pueyaso niyajetanu quiniutianiya”.

¹⁰ Pueyano natasacari casaa jajau na cuhuariquiajinia, Pueyasoori na canijiaquiaa. Naacujitij, na camaruuri socua jiiitianutaniya tamacari na natasocoriquianohua, na miaquesocoriquianonio. Naajuhuaaj, juhua capora nia niqutiojosacari nia jiiitiasanojiniji, niaari juhua nia cuhuariquiajinia nataa. Naacujitij, Pueyasoori nia jiyatenutaniya socua queraatia jiiitajaca nia quiniuria, pueyaracaanu maninia nia miiniuria tamasacarajuhuaaj.

¹¹ Naa capora nia quiniuucua nia casaatatej, Pueyasoori juhua capora nia niqutiojonutaniya puetunu na jiiitiasanojinijijianaa, queraatia nia jiiitianura, tamasaca nia niqutiojonura pueyaracaanu. Naacujitij, canaa jaara nia niqutiojosano cumaneeca tiuquitiasee Judea jiyajiniani, parta Pueyaso pueyari Pueyaso timitianutaniya. Capora nia quiniuucua, nojoriiri Pueyaso sequenutaniya, “paacarasho”. ¹² Naacujitij, nojori jaara masere nojoririano nia jiyarosano cumaneeca, majaari saaja nojori jiiitanu quiniutianiya nojori panishano. Cunoori saniya nojori shiniujiuniutianiya nojori shuquiritiniuria Pueyaso, queraatia nojori sequesacari: “Paacarasho Pueyasonaa”.

¹³ Nojori jiiitiasacari puetunu nojori panishanojuanaa, nojoriiri Pueyaso maniniuhuaqueetanutaniya jiyanoehua. Nojoriiri naa maniniuhuaqueetanutaniya Pueyaso, nojori niishishacari niaaqui seetanujuanaa Jesucristo Rupaa tojitiajacajuhuaaj, naajaa, taucuaca nia quishacari nojoriria. Nojoriiri Pueyaso maniniuhuaqueetanutaniyajuhuaaj jiyanoehua capora nia quiniuucua nojoriria, tamasacaranio.

¹⁴ Nojoriiri Pueyaso secojonutaniya niaacuarajuhuaaj, jiyanoehua nojori paniniutia niajaniya, Pueyaso jiyatenuucua niajaniya nojori panijia nia quiniuria. ¹⁵ Naajuhuaaj, janiyari jiyanoehua Pueyaso sequeyani, “paacarasho”, jiyanoehua maninia na miiniuucua niajaniya, Neyanu Jesucristo jataniniuucua nioojia.

10

Pablo cuaara tojishaaria, Jesucristo jiyatenuucua nojuaja na rupaa pohuatanara

¹ Janiyacuajaari Pabloni. Quenaaja cua tojitiare. Cua Jiyaniijia Cristoori jiyanoojia quiquiaaricuaa, jacaria pocuajajuhuaaj. Janiyari naa quiniu panijajuhuaaj. Naaratej, janiyari quiarijia nia nenecojiyani, cua tojitiare quenaaja. Tamasacanaari cua pocuquiaa, janiyanaari jacaria pocuaja quiquiaa juhua puerejani, nia tajiya cua quishacari. Saniniujia, tucuacaanu cua quishacari, janiyanaari jiyanoehua

nia nacasuquiaa cua naajioneejiniani, juhua nia pueresano jiyaniijia. ² ¿Seetanutejanaa, janiyate naani? Janiya jaara naa quiya niaarani, naajaa. Quiarijia tucuacaanu cua quishacarijia, janiyari nio cua naajiojinia nia nenecojiyani, nia tojiniuria janiya. Saniniuujia, niaacua cua tiuquishacari, janiyari noo pojori nacasunutaniya jiyano huani, sacuaraatia cucuara rimiaaquenuquiaani. Janiyari naa miiniutianiya nojorini, nojori jaara tarinitiaaquiyajaa naa sacuaraatia na pocoojonutej. Cuno pojoriiri jiyaniya canaari saaja juhua mijiria quiniaa pueya miiquiaani, maninia canaa quiniuria nia niquiara. ³ Seetanujuanaacuaaquinatejaj, canaari nareja pueyani. Naajaa, majaari canaa miaquejonu quiquiaa canaa paraa, taa pueya miaquetoojoquiaacuaani. ⁴ Mijiria quiniaa pueyari miaquetoojoquiaa cutara tama nojori shipinishano casaatajaaja. Canaa miaquetoojotaja saniniuujia, cunoori Pueyaso cumaacajanaa cutara. Naacuaajitij, canaa naata Sesaaca niishishano shocotanu. ⁵ Pueyaso cumaacata, canaari mijiria niishijiaca niishishano shocotaquiaani. Cuno niishishanoori Pueyasojiniji niishishano jataniquiaa juucua, maja pueya niishiniuria Pueyaso. Naajaa, Pueyaso cumaacata, canaari puetunujuanaa najuhuana pueya niishiriojosano jataniquiaani, Cristo tojijiaca nojori quiniurijuhua. ⁶ Canaacuaajaari Pueyaso jeenucuasano pueyani, canaa nacasunura puetunu tojiyashijiacajanaa. Naacuaajitij, niaa jaara puetunu Pueyasojiniji canaa niishitiojosanojuanaa tojitiajacara quiriohua, na nuhuaji cutara canaa naata puetunu cureeno tojiyashijiacajanaa saniitonu.

⁷ Niaari tama cushitiquiaajaacujua nia tiuushacari cuno sapojonuujuaa pohuatasanoocua. Nojoriiri sapuenu juhua Jesucristo jiyaramiquishano niquishiya najuhuanaj. Maninia nia niishiriojore pueyanaa, niajaniya cante sapojosaacanucuaajani. Niaa jaara niishiri niaari seetanujuanaa Cristo saquiriojosano pueya, naacuaajitij, niajaniya cuara niishiiria canaari Cristo saquiriojosano pueyajaniuhua. ⁸ Niaa jaara jiyaniya janiyari juhua pueya shocotaja nia sequeyani: “Canaari nia jiitianaani”, naajaa, majaari cua caririquiniu naa cua sequesacari niajaniyatej. Pa Jiyaniijia Cristojunaacuaajaari canaa jiyatequiaari nia jiitianaa canaa quiniuria. Canaari naa jiyatesaaquiaarini, canaa cumaquiniuria niajaniya na rupaata, seetanujuanaa Cristo pueya nia quiniuria. Majaari canaa jiitianu najuhuana na cumaaca, canaa sesonura niajaniya. ⁹ Naa cua naajiosacari niaacuaratej, majaari nia jiyaniyu janiyari nia piriyojiyani nia puerenura janiya. ¹⁰ Tamasaca niajaniyajininio

pueyanaari cua sequequiaajuhua: “Pabloori puera jiyanoehua pa nacasuquiaa na naajioneejinia. Naajaa, pa tajinia na quishacari, nojuajaari juhua tojishoo pueyano niquishano quiquiaa. Naajuhua, na pohuatasacari pa niqiuara, na pohuatasanoori maja shanohua tojishano”.¹¹ ¿Seetanutejanaa? Cante naa pocuaquiaani, nojuaja cuara niishiiria quiaritia, taa canaa naajiocanu niaacuaracuaja tucuacaanu canaa quishacarijiani, canaari naa miiniutianiyani niaacua canaa tiuquishacari.

¹² Cuniqiu niaata quiyajaariuhua tamasa pueya, canapuate nia sequequiaacuajani, nojoriniaari socua maninia Pueyaso rupaa pohuataanaa tamasaajini, canaajiniijiuhua. ¿Nojoritiiri seetanujuanaa socua maninia Pueyaso rupaa pohuataanaa canaajini? Johua. Naajaa. Majaari canaa tacaaniu quiquiaa juhua nojori canaa quiniuria. Cuno pojoriiri tama na cuaqueya timitiacoquiaajaacujua, nojori soosacari narta Pueyaso rupaa pohuataanaa. Nojoriiri naa quijacatej, nojori jiyanihacari nojori cutaraari socua tojishano pueya tamasaajini. Naa nojori miishacaritij, nojori cutaraari seetanujuanaa mosanucua.¹³ Canaa cutara, majaari tamasa poonijiosano canaa jiyatenu quiquiaa juhua canaa poonijiosano Pueyasa. Canaa cutaraari saaja canaa miishano shuqiritiaquiaani, tee Pueyaso jiyaroquiaari canaacuajani. Nojuacuajaari canaa jiyaramiquiquiaari niaacua Corinto tiacajinia, nia niqiuara canaa pohuatanura na rupaa. Naacuajitij, niaari na muerasura quiquiaari.¹⁴ Majaari najuhua canaa timitianu niajaniya, Pueyaso muerasu nia quiniucua. Niaacuajaari Pueyaso muerasura quiquiaari canaa pohuatanucua nia niqiuara seetanu rupaajanaa Jesucristojini. Canaa cutaraari seetanujuanaa Pueyaso rupaa pohuatanu coteetanaa nia niqiuarani.¹⁵ Majaari canaa shuqiritianu najuhua niajaniya. Canaa cutaraari nia tiutiquiaari Jesucristoocuan, niaacua Pueyaso jiyaronucua canaa. Naajaa, canaari socua nia pohuatanu paniya Pueyaso rupaani, seetanujuanaa Jesucristo rupaacua tiuujia nia quiniuria. Naacuajitij, niaa jaara seetanujuanaa Pueyaso rupaa tojijia qui, niaari saniniujia na naata canaa cumaquiniu.¹⁶ Niocua canaa cumaqui canaa quianura tamaqui, tee Jesucristojini pohuatasoojua quiyacuajani, tii canaa pohuatanura nojuajiniijiuhua. Majaari canaa quiniu paniniu pootia tamasa poonijiosaqui, taa cuno rimiaacoori quiquioya shuqiritiaa canaa poonijiosaquicuaani. ¿Nojori shuqiritiasanoteeri tama nojori poonijiosanojuaaja? Maja.

Niaacuajaari Pueyaso muerasura quiquiaari canaa nia tojitianuucua.

17 Pueyanaa, nio tariucuacaanu naajiotasanoori niaara, nia niishishocoriquiano. Naa sequeyari: “Cante shuquiriaatia quijia quiniu paniyani, nojuaja cuaara pa Jiyaniijia shuquiritiaara cutara”. 18 ¿Taa nia sequeyani pueyanaa? ¿Cana Pueyaso sequenutaniya socuaarini: “Quiaa cutara maninia cua pueyanoniyojua”? ¿Cunotee, tama na cuaqueyajaaja sequejani: “Janiya cutaraari maninia Pueyaso pueyanoni”? Maja. Pueyaso shuquiritiasano cutaraari noo pueyano, cana pa Jiyaniijiajanaa sequenutaniyacujani: “Quiaa cutaraari maninia cua pueyanoniyojua”.

11

Pablo pahuatasano na paraajiniji

1 Pueyanaa, cua tojitiuri nareja. Juhua paateca tama cua cuaqueyajiniijiaaja nia pahuatanu paniyanijia. Naajaa, que-naaja nia rejeretare janiya. 2 Janiyari jiyanoehua nia tacaati-aquiaani, saaja Jesucristora nia quiniuria. Niaacuajaari ni-ishiya, naatej, taa pueyano cojuaacuaa neyatuniyojua canuu-cujini, saaja na camiriquiano pueyanora na quiniuria, na-juhuaj, janiyari nia cojuanu paniyani sesosoo nia quiniuria nia Jiyaniijiaara. Cristocuajaari juhua nia niyacarano. Nia jiiitiana cua quishacari, janiyari juhua nia queni. 3 Tariija, niaacuajaari saaja Cristo tojitiajaca quiquiaari, na panijia-aca nia quishacari. Quiarijia saniniuujia, janiyari Sesaaca nia pueretaani, nojuaja mariqui nia sapojoreeri Cristoocujii nia rupatenura, taa cuno Susanacu sapojoquiaari Eva tari-ucuaacaanucuaani. 4 Cuno sapojonuujuaa tiuquiiijosacari niaacua, tamaatia nojori pahuatanura Jesujiniji niajaniya, niaari jaarajaaja ritia na tojiquiaa. Nojori niishitiojosanoori tojetaarucujanaa tamaatia canaa niishitiojosanojiniji nia-janiya. Nojori nia tojishacari, niaari juhuajaniya samaruhua niishishano tojitiaquiaajuhuaaj. Niaacuajaari tari tiuquiaari Jesucristoocua, Pueyaso jiyanooniuria niajaniya. Saniniu-ujia, cuno pojori pahuatasacari tamaatia, taa nia miiniu-tianiya Pueyaso pueya nia quiniuriani, niaari jaarajaaja ritia nojori tojiquiaajuhuaaj. 5 ¿Cuno sapojonuujucateeri socua tojishocoriquiano janiyajiniji, niaa na jiyatecanu juhua seetanujuanaa Pueyaso jiyaramiquishano pueyarani? ¡Jani-yara maja! 6 Seetanujuanaa, majaari cua niishiniu manini-uhuaqueenu cua pahuatasacari Pueyaso rupaa, taa cuno po-joricuaani. Naajaa, Pueyasojiniji cua niishishano cutaraari seetanu rupaaajanaa, tojishocoriquiano cutara. Maja na-juhuanaj. Niaacuajaari cuno niishiya, pueyaracaanu saaja

maninia cua miishacari nia niquiara, cua pohuatasanojininjio.

⁷ ¿Casaara nia tojitiaa cuno pojori quiarijianijia, majaari saniniuujia nia tojitianu janiya? ¿Janiyateeri sesa miiquianu nijaniyani, cua masejoyaquiniuucua nia cumaneeca cua pohuatanuucua Pueyaso rupaa, Pueyaso pueyara nia jatanishaanura? Janiyacuajaara tama cua cuaqueyajaaja mueyashitiquiaarini cua cumaquiniuria nijaniya. Naa cua miiniuucuatej, ¿cunoteeri sesa niaara? ⁸ Janiyari tamonu jiyacajinia Pueyaso pueya maapuejiniji masejoquiaari cumaneecani, cuno cumaneecata cua quianura niaacua, nia niquiara cua pohuatanura Pueyaso Rupaa. ⁹ Saniniuujia, nia tajinia cua quishacari, cua jiiitaaquishacari cua panishano, naajaa, maja cutaraari cua mashiniquijionu quijia nia cumaneeca. Naa cua jiiitaaquishacari cua panishanotej, Macedonia jiyajinijinio parta Pueyaso pueyari namitia tiuquijioquiaari. Nojori cutaraari cumaneeca cua niquitioquiaari, cua panishano cua masetajara. Janiyari naa pueyaracaanu tama cua cuaqueyajaaja cojuaquiaani, maja cua taajetenura nijaniya cua panishano cua jiiitaaquishacari. Janiyari naa miiniutianiya pueyaracaanuni. ¹⁰ Cua Jiyaniijia Cristocuajaari niishiya, majaari quenaaja cumaneeca cua masejonu quiquiaari Acaya jiyajinia quiniaa parta Pueyaso pueyajiniji. Naacuajitij, majaari quenaaja niquiriyatu pueyano Acaya jiyajinijinio naata sequenu janiya: “Pablocuajaari cumaneeca mashiniquijiojua canaajiniji”. ¹¹ Pueyanaa, ¿niaate niishiya casaara pueyaracaanu cua sequequiaani, maja cumaneeca cua masejonu quiquiaa Acaya jiyajinia quiniaa Pueyaso pueyajiniji? Naa cua sequesacaritij, ¿janiyateeri nia paniyaquiyani? ¡Maja! Pueyasocuajaari niishiya, janiyari jiyanohua nia panijiani.

¹² Nia sequereera casaara cua mashiniquijiaquiquiaa nia cumaneecani, cua pohuatasacari Pueyaso rupaa nia niquiara. Cuno pojori, nia jiyanishano Pueyaso jiyaramiquishano pueyani, nojoriiri nia jiyajenetenu paniquiaa. Nojoriniaari seetanujuanaa Cristo jiyaramiquishanojuhuaj, taa canaacuaani. Saniniuujia, nojori mashiniquijiosacari nia cumaneeca, nojori nia niquitiojonura nareja, naacuajiti maatia niishishiyari, ¡nojoriiri jiyanohua tamaatia canaajiniji! Naaratej, majaari quenaaja canaa mashiniquiniu quiniutianiya nia cumaneeca, canaa pohuatanuucua Pueyaso rupaa nijaniya. ¹³ Seetanujuanaari, ¡nojoriiri maja Cristo jiyaramiquishano pueya! Nojoriiri tama nojori cuaqueyajaaja jiyatecanu sapuenu juhua Cristo jiyaramiquishano pueya

nojori quiniuria. Naacuajitij, nojoriiri nia sapojiya. Nojoriiri sapuenu juhua Cristo jiyaramiquishano pueya niquishano najuhuanaj. ¹⁴ Cunoori maja jiyajeneta naa nojori miiniuriatej. Satanás cuajaari tama na cuaqueyajaaja jatanijia shacantuucara, juhua Pueyaso seru na niquishaanura, pueya na sapojonura. ¹⁵ Naaratej, majaari cua jiuujiatenu cuno pojori jaara tama na cuaqueyajaaja jiyatecanu juhua seetanujuaanaa maninia miijiaca pueya nojori quiniuria. Nojoriiri naa miiquiaa, Satanás seya nojori quiniuucua. Naajaa, ¡nojoriiri saniitiosaanutaniya sesa nojori miiniuucua!

Pablo pohuatasacari naquiya na miiniujiniji, Cristo jiyaramiquishano na quiniuucua

¹⁶ Socua nia sequenu pacuteyanijia, majaari nia jiyaniinu janiyari paatecani cua pohuatasacari tama janiyajinijijiaaja. Niaa jaara jiyaniya janiyari seetanujuaanaa paatecani, naajaa, rupaquijia cua tojitiare quenaaja. Janiyari juhua paateca tama janiyajinijijiaaja niaara pohuatanu panijajaaniuhuaaj, taa nia tojishano pueya miiquiaacuaani. ¹⁷ Naa cua pohuatasacari tama janiyajinijijiaajatej, cunoori maja cua Jiyaniijia Cristo pohuatesano janiya. Cunoori tama cua pohuatasanojuaaja, juhua paateca cua quishacari. ¹⁸ Naatej, taa queraatia Pueyaso rupaa pohuatananaa tama nojorijinijijiaaja pohuatanuuquiaacuaani, janiyari quiarijia naa tama janiyajinijijiaaja pohuatanu panijajuhuaaj. ¹⁹ Jiyanohua niishijia nia quishacari, niaari cuno paatecoori tojitiaquiaa juhuajaniya. Naatej, taa nia tojitiaquiaa cuno pojoricuaani, quiarijia cua tojitiarejuhuaaj. ²⁰ Naajuhuaaj, niaanaari juhua-janiya rejeretaquiaa cuno pojori, nojori jaara nia poonijitequiaa juhua nojori seya. Niaanaari nojori rejeretaquiaa nojori jaara nia jiiitasano casami riutiocojoquiaa niaacuaji. Juhua nia jiyaniijia nojori quishacari, niaanaari nojoricua shiiniuquiuquiaa saaja, naajaa, nojori soosacari niajaniya. Niaanaari juhuajaniya nojori rejeretaquiaajuhuaaj, nojori jaara nia jiquioco maseteriquia. ²¹ ¡Nojoriquiiri jiyanijianucuajanaa cutara! Saniniuujia, janiyari nojori naaqui caririquiyani juhua nojori cua quiaquiniuucua, maja naa canaa miiniuucua niajaniya, taa nojori miiquiaa sesa niajaniyacuaani.

Naajaa, quiarijia cutara, janiyari tama janiyajinijijiaaja pohuatanutaniyani, taa nojori pohuataquiaa juhua paateca tama nojorijinijijiaajacuaani. ²² ¿Taa nojori sequequiaani? ¿Nojoritiniaari Hebreo pueya, Hebreo rupaa pocuajacajuhuaaj? Janiyajuhuaaj. Janiyari Hebreo pueyanohuaaj, Hebreo rupaa pocuajanio. ¿Nojoritiniaari Pueyaso saquiriojosano Israel pueyajinijinio? Janiyacuajaari

Israel pueyacuaajinio supuenojuhuaaj. ¿Abrahamtenaari nojori supuetana? Abrahamcuaajaari cua supuetanajuhuaaj.²³ ¿Nojoritiniaari Cristo jiyaramiquishano pueya? Janiya cutaraari seetanujuanaa Cristo seruni. Janiyari jiyanoahua soyani, juhua paateca naa cua pohuatasacari tama janiyajiniijiaajatej. Naajaa, janiyari seetanujuanaa nia sequeyani. Janiya cutaraari socua jiyanoahua nojorijiniji poonijioquiaari Cristorani. Janiya cutaraari pueyaracaanu caminiujiushaaquiaari nujuatejojuajinia nujuatejonuni, Jesucristojiniji cua pohuatanuucua. Naajuhuaaj, janiyari pueyaracaanu caminiujiushaaquiaari majacununi. Naajuhuaaj, janiyari pueyaracaanu cocuaatia miiquiaarini, pueya monu panishacari janiya.²⁴ Cuarta Judiocuacaari cua caminiujiuquiaari majacunu puetunu niquiriyatu pa juaashiquiajanaa. Cuarta Judiocuaca majacusacari, nojoriiri na majanu serojoua. Nojori majasano jaara treinta y nueve quiri, nojoriiri jiyacari cartaja na majacusano pueyano.²⁵ Naajuhuaaj, janiyari jiuujianaraca caminiujiushaaquiaari macata piquiniuni. Tamacari, janiyari saitia jacusaaquiaarini. Shoniniacu caminiajinia cua jaaretasacari buquejia, jiuujianaraca buqueeri tiuquitiaquiaari. Naa tamacari buque tiuquitiasacarijuhuaaj, janiyari na raucua cuataquiaarini puetunu niucuajanaa, niquiriyatu juucanio. Cunoori quiquiaari puereeta shoniniacu caminia jiuujiajinia.²⁶ Janiyari pueyaracaanu tiquiyocua rucuanesojoua quiquiaarini. Naacuajitij, moocua cua niuuniujiushacari, janiyari cocuaatia miiquiaarini. Naa cua rucuanesacari, janiyari pueyaracaanu puereeta nohuasenuujuaca quishaqui shocoquiaarini. Naajuhuaaj, tama cuarta Judiocuacajaarijia pueyaracaanu cua miitianu panijia, taucuacanio. Puereetaari quiquiaarijuhua cua rucuanesacari tiacajinia, tiquiyocua pueya quiyaquishaqui, shoniniacu caminiajiniano. Naajuhuaaj, puereetaari quiquiaari janiyara, cua jiyanihacari janiyari cuarta Pueyaso muerasu tajinia quiyani, saaja cua paraa nojori quishacari.²⁷ Jiyanoahua cua poonijosacari cua Jiyaniijiaara cua samareenuta, janiyari pueyaracaanu sutequiaarini. Janiyari miaajequiaarini. Janiyari jiyamuequiaarijuhuaaj. Janiyari noojiaqueya miaqueyaquiquiaarijuhuaaj, jeya cua quiyaquishacari. Janiyari naquiya miiquiaari cua rucuanesacari shiniquiajiniajuhuaaj, toqueeju cua quishacarijuhuaaj.

²⁸ Janiyari naa naquiya miishaaquiaarini, mariyata tamaatia naquiya miiniujiuhuaaj. Naajuhuaaj, janiyari puetunu juucajanaa niishiriojoquiaani, taariquitijia Pueyaso

muerasu maapue quiya puetunu jiyacajiniajanaatej. Janiyari jiyanoehua nojoriicua tacaquiaani. ²⁹ Naacuaajitij, tamonu cuarta Pueyaso pueyano jaara rejeretaaquiriquia Sesaaca saniniujiushacari nojuaja, janiyari jiyanoehua taraajeja nocuani. Tamonu jaara sesa miitishaare, janiyari na naaqui caririquiyajuhuj. ³⁰ Niaa jaara paniya socua cua pohuatanura nijaniya tama janiyajiniijiaaja, nia pohuatareeraqui pueyaracaanu taraatia cua miishaanujiniji. Tama janiyajaaja, janiyari maja cumueecani. ³¹ Pa Jiyaniijia Que Pueyasocuajaari niishiya janiyari seetanujuanaa sequeyani. Nojuajanaa cuara pueyaracaanu maniniuhoaquetasaaria cutara, maja nojuajiniji pohuataana. ³² Tariija, Damasco tiacajinia cua quishacari, tamonu pueyanoori Damasco tiaca jiyaniijia quiriqiaa. Nojuajaari cuno jiya jiyaniijia Aretas jiyatesano quiquiaari, Damasco tiaca jiyaniijia na quiniuria. Cuno jiyaniijiaari na soldadoehua nujuatejoquiaari tiaca shocua sohuaca tohuateyaji, nojori quianura juucua janiya. Nojoriiri cua quiatunu paniriquiaa Jesucristojiniji cua pohuatanuucua. ³³ Naajaa, cuarta Pueyaso pueyari namitia cua roshinitiaquiaari shuquiriaatia, puereetuuca canaasatujinia, cuno tiaca sohuaca tacuhua shuucujaji. Janiyari naa mashiquishaaquiaari cua paraacuajini.

12

Pablo pohuatasano Pueyaso niquitishanojiniji nojuaja

¹ Paa jaara tama pajaniyajiniji pohuatariquia juhua paatecani, cunoori najuhuanaj. Naajaa, socua nia pohuatareeraj. Nia pohuatareera taa cua niquitishaaquiaari pa Jiyaniijia casaa jiyocuacaanuni. ² Tariucua Jesucristoocua tiuujia cua quishacari, janiyari jiya cajiniocua cacojiria tacanishaaquiaari Pueyaso quiquiojinianani. Naa cua tacanishaanujinijitij, tari shocojorucuaari catorce mariija. Majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Johuj. Saaja Pueyasocuajaari na niishiya. ³ Cua tojitiare, seetanujuanaa majaari cua niishiniu taariquitijia cua tacanishaaquiaaritij, puetunu cua cuaqueyatajanaa, saaja cua sohuanu soj. Pueyasocuajaari na niishiya. ⁴ Janiyari saaja niishiya cutarani, janiyari shuquiriaatia quishaqui Pueyaso shuriucua tiuquinishaaquiaarini. Janiyari tii casaa tojiquiaarini. Cunoori maja quenaaja na naata pohuataanaa mijiria quiniaa rupaajinia. Pueyasoori cua tenujuquiaari maja cua caminiujiuniuria jiyocuacaanu cua tojishano mijiria quiniaa pueyara. ⁵ Naa Pueyaso niqui-

tiniuucua janiyatej, janiya maara tama janiyajiniijiaaja poojotariquia cua timiniutiani, juhua tamasaca shocotaja cua quishacari. Naajaa, majaari cua timitianu tama cua cuaqueyajaaja. Saaja shuquiriaatia quiya cutaranijia, cua niishishacari majaari cua naata tama cua cumaacatajaaja rejeretanu taraatia cua miiniu. ⁶ Naajuhuj, janiya jaara tama janiyajiniijiaaja pohuatanu paniriquiani, cuno maara seetanujuanaa pohuatasano quiriquia, maja juhua paateca pohuatasano. Seetanujuanaa majaari naa cua pohuatanu paniniu, pueya mariqui cua pohuatasanojiniji cua jiyaniriri janiya jiyanoehua maninia pueyanoni. Pueya cuaara niishiiria cutara taamueca pueyanote janiyani, saaja nojori namijiata nojori niquishacari cua miishano, tama nojori numaatajaaja nojori tojishacari cua niishitiojosanojuhuaj. ⁷ Pueyaso niquitishano janiyani, na niishitishano janiyajuhuj, cunoori puera jiyanoehua maninia quiquiaari. ¡Cunoori jiyanoehua cua timitiquiaari! Naaratej, janiyari cua cuaqueyajinia nootusaaquiaari juhua jiohuacatani, janiya mariqui pueya shocotajara quiriiri. Cuno taajeta noonuri Satanás miishano quiquiaari, na tacaatiniuria janiya. ⁸ Janiyari jiyanoehua secojoquiaari pa Jiyaniijiani, nojuaja cuaara shaataara cua nootunenu. Janiyari jiuujianaraca pacutejoquiaari secojonuni. ⁹ Cua Jiyaniijiaari saaja cua sequequiaari: “Janiyacuaajaari quia cumaquiniutianiyani, cua panishano pueyano quia quiniuucua. Saaja cunocuaajaari quiara. Cua naatacuaajaari socua jiyanoehua poonijiotenu cua cumaaca sasaca cua pueyajinia, tamasaca niishiniuria cunoori seetanujuanaa cua cumaaca, maja pueyano cumaaca”. Naa cua Jiyaniijia riucuasacari janiyatej, janiyari shuquiriaatia quiyani cumaacaaju pueyano cua quiniuucua pueyaracaanu. Naacujitij, Cristo cumaacaari socua janiyajinia niquishaaquiaa poonijiyano. ¹⁰ Naacujitij, janiyari shuquiriquiaani cumaacaaju pueyano cua quiniuucua, Pueyaso cumaquiniuria janiya. Naacujitij, tamasaca jaara sacuaraatia casaa sequeriquia janiya na juaashacari, janiyari Pueyaso cumaacata juhuajaniya na rejeretaquiaani. Naajuhuj, janiya jaara cua panishano jiitiaaquiriquiani, naajaa. Pueyaso cumaquishacari janiya, janiyari juhujaniya rejeretaquiaani. Naajuhuj, janiya jaara naquiya miitiasaaquiaani, taraatia cua miishacarijihuhua Cristora cua poonijionuucua, naajaa. Pueyaso cumaacata, janiyari juhuajaniya rejeretaquiaa saajani. Naacujitij, janiya jaara tojetaarucujanaa cumaacaaju quiquiaani, janiyari jiyacari socua jiyanoehua cumaacaraca quiquiaani, Pueyaso cumaquiniuucua janiya.

Pablo tacaashacari Corinto tiacajinia quiniaa Pueyaso muerasu maanuucua

¹¹ Janiyari seetanujuanaa juhua paateca tama janiyajiniijiaaja pohuatareeni, juhua pueya shocotaja. Niaacuajaari naa cua pohuateree, niaacuaja naara cucuaji tacuyaquiquianu cua sesacaja pueyatej. Janiyanaari najuhuana quijia pueyanoni. Naajaa, niaacuajaari niishiya, janiyari maja socua najuhuana quijia cuno pojorijinijini. Cuno pojori nia tojishano pueyani, nojoriiri tama na cuaqueyajaaja jiyatecanu juhua seetanujuanaa Jesucristo jiyaramiquishano pueyara cutara. ¹² Juhujaniya cua rejeretasacari naquiya cua miiniu nia tajinia cua quishacari, naajaa, janiyari pueyaracaanu jiyajeneta casaa miijioquiaari Pueyaso cumaacata nia niquiarani. Niaari nocuaji jiuujiatecoquiaari. Naacuajitij, niaa cutaraari niishiquiaari janiyari seetanujuanaa Cristo jiyaramiquishano pueyano cutarani. ¹³ ¿Janiyateeri sesa nia jiitiaquiaarini, Pueyaso rupaa cua niishitiojosacari niajaniya? ¡Maja! Janiyari nia miiquiaari maniniani, naajuhua, taa cua miiquiaari tamasaca jiyacajinia quiniaa Pueyaso pueya maapuecuaani. Majaari rimiajata cua miiniu quiquiaari niajaniya, niaata cua quishacari. Maja cutaraari cua mashiniquijionu quiquiaari cumaneeca niajaniyajiniji. ¡Cua jiyanoori cunora, jaara sesa quiquiaari niajaniyara!

¹⁴ Quiarijiani, janiyacuajaari quera quiaa niaacuani. Janiya jaara niaacua quiaareni, cunota quiniutianiyari jiuujianaraca cua pacutenu niaacua cua quianu. Majaari nia jiyaniniu janiyari nia cumaneeca mashiniquijionuucua quianutaniyani. Janiya cutaraari maja cua jiaatianu nia jiitiasano casamiicua. ¡Janiyari saaja niaacua jiaatiaa cutarani! Niaacuajaari juhua cua muerasuniyojua. Niaacuajaari maninia niishiya, muerasuuri maja na reratenu cumaneeca na quera. Na que cutaraari saniya cumaneeca rerateja necohuara. Naacuajitij, cua mashiniquijiyaquishacari cumaneeca niajaniyajiniji, janiyari seetanujuanaa juhua nia queni. ¹⁵ Janiyari shuquiriaatia tama cua cumaneecajaaja puecanutaniyani cua quishacari niaata, socua cua niishitiojonura niajaniya. Naacuajitij, janiyari tama cua cumaacajaaja puecanutaniyajuhua, nioojia cua cumaquiniuria. Janiyara, nioori taraatia: janiya jaara socua nia paniquiaani, niaari socua jiyacatequiaa secaja nia paniniuria janiya.

¹⁶ Niaacuajaari niishiya, majaari quenaaja nia niqutionu quijia nia cumaneeca janiya. Naajaa, tamasaca niajaniyajinijionaaari soquecoya, janiya naasucuaanaari jiyasohuaja nia cumaneeca nohuasejoquiaani, cua sapojonuta niajaniya.

17 ¿Seetanutejanaa pueyanaa? ¿Janiyateeri nia sapojoquiaari niaacua cua jiyaramiquishano pueyatani? ¿Nojoritiiri nia cumaneeca masequiaari? ¡Maja! 18 Janiyacuajaari Tito jiyaroquiaari niaacua na quianurani, na cumaquiniuria niajaniya. Janiyari nata jiyaroquiaari tamonu Pueyaso pueyanojuhuaj. ¿Titoteeri jiyacari nia cumaneeca mashiniquiquiaari? ¡Majaruhua! Niaacuajaari niishiya, Titocuajaari cumaneecaacua jiaatiaashijia, juhua janiyajuhua. Janiya Titota, canaacuaaari jiyanohua nia paniquiaani.

19 Sacuaraatia canaacuara nia rimiaaquenuucua pueyanaa, naajaa, majaari nia jiyaniniu canaa tama canaacuajijiaaja tacuyani, juhua canaa nequesoreenaa nia quishacari. Saniniuujia, canaari niya Pueyaso niquiara nio naajiya niaacuarani, Cristo pueya canaa quiniuucua. Naajuhua, puetunu cua sequesanojuanaa niajaniya nio cua naajiojiniani, cunoori cua cumaquiniuria niajaniya cua panishano pueyanaa. Janiyari naa nia nacasuyani, seetanujuanaa Jesucristo tojjiaa nia quiniuria. 20 Janiyari puereyani, niaacua cua tiuquishacari, janiyari niaacua taraajenutaniyani cua riuriasacari niajaniya sesa quiyanojua, maja maninia taa cua paniriquiaacuajani. Janiya jaara nia riuriasasee naa sesa quiyanojuani, jecatoojua, niaari saniniuujia taraajenutaniya nia niishishacari taa cua miiniutianiya niajaniyani. Janiyari puereyani niaa naasucuaari juayonuujutaajaa. Niaa naasucuaari niarta pueyano jiiitasanoocua jiaatiajaca quiyajaa. Niaa naasucuaari juaaniu porocua quiyajaa. Niaa naasucuaari tama nia panishanojuaaja miijiaca quiyajaa. Niaa naasucuaari niarta pueyacuara coriaacojuuaca quiyajuhua. Naajuhua, niaa naasucuaari niarta pueyacuara rimiaaquenuujuaca quiyajaa. Naajuhua, niaa naasucuaari tama nia cuaqueyajaaja jiyaniya niaa socua maninia pueya tamasaca pueyajiniji. Niaa naasucuaari jatiqui quiyashijiacajuhua, pueyaracaanu nia juayonuujutanuucua. 21 Naacuajitij, janiyari puereyani janiya naasucuaari Pueyaso niquiara caririquiniutianiya nia naaquini, niaa jaara naa sesa miijiaca quiyajaa. Janiyari puereyajaaniuhua, janiya naasucuaari nujuquenutaniya cua taraajenuta noo sesa miijiaca pueyacuani, cuno pojori jaara sesa na miishano tarinitiaaquiuanujua. Noojiaqueya niajaniyajinijinioori sacuaraatia miijiaca quiqianujua: cararaatia miijiaca sacuaraatia, na camishoo maaji numuetucunu porocujuhua, naajuhua, majaari tama nojori cuaqueya panishanojuaaja nojori rejetenu quiquiaa.

13

Socua Pablo nacasusacari Pueyaso pueya

¹ Nioori quiniutianiya jiuujanaraca cua pacutesacari quianu niaacua. Tariucuacaanu Pueyaso rupaaajinia, paari nio niishitiojosaaquiaarini: querajaa pueya jaara mariyata pohuatate nojori niquishanojiniji, pa naata seetanujuanaa na pohuatasanoocua tiuuniu cutara. Naajuhuj, niaacua cua tiuquishacari, janiyari naa miiniutianiyanani cua nequesoreesacari cuno sesa miijiaca. ² Pueyanaa, janiya jaara pacutequiaariuhua niaacua quianutej, janiyacuaajaari puetunu niajanijajinijinio cuno sesa miijiacajanaa piriyojoquiaarini. Quiarijiani, tucuacaanu cua quishacarijia, janiyari puetunu cuno sesa miijiacajanaa socua piriyojijiani. Naacuajitij, janiya jaara niaacua tiuquishiini, cuno pojori jaara noojia tacatoyaquiyajaa, majaari nojori cua jiuujiaaniu quiniutianiya, narta sesa miijiacanio. ³ Cua nequesoreesacari cuno sesa miijiaca, niaari jiyacari niishiniutianiya janiyari seetanujuanaa Cristo sequesano caminiujiuniani, taa nia niishiniu paniriquiaacuajani. Niaacuajaari tari niishiya, pa Jiyaniijia Cristoori maja na jitianu niajaniya juhua cumaacaaju pueyano. Niaacuajaari na cumaaca niqiquiaa tama niajanijajiniaaja na saniitiosacari niajanija. ⁴ Seetanujuanaa, Cristoori juhua cumaacaaju quiquiaari jaara niyacutesanojinia teetesaaquiaari. Saniniuuja, Pueyaso samiitianishacari nojuaja, nojuajaari quiarijia puetunu Pueyaso cumaacajanaa jiiitaa. Naajuhuj, canaa, na rupaa pohuatanaani, canaari naquiya miishaaquiaajaaniuhua saaja mijiria quiniaa canaa quiniucua, taa nojuaja quiquiaaricuaani. Saniniuuja, Cristo rupuesano canaa quishacari quiarijiani, canaa cutaraari Pueyaso cumaacaracani, maninia canaa jitianura niajanija.

⁵ Naarate pueyanaa, jacaria nia niishiriojore, ¿niaate seetanujuanaa Jesucristoocua tiuujiaa, maja soj? ¿Niaate maninia miijiaca taa Pueyaso muerasu miiquiaacuaani? ¿Majateeri nia niishiniu, niaa jaara seetanujuanaa Jesucristoocua tiuujiaa quiri, nojuajaari nioojiajinia quiya? ⁶ Naajuhuj, jacaria nia niishiriojore canaajiniji. Nia niishitiriqiuani, canaari seetanujuanaa Jesucristo jiyaramiquishano pueyani, maja sapojonuujuaa. ⁷ Canaari Pueyaso secujoquiaa niaacuarani, tojetaarucuajanaa sesa miyashijiaa nia quiniuria, maninia Pueyaso muerasu nia quiniuria. Majaari naa canaa secojonu quiquiaa saaja pueya niishiniuria canaa seetanujuanaa Jesucristo jiyaramiquishano pueyani.

Canaari saaja nia panitiaa cutarani, maninia miijiaca nia quiniuria Pueyasora. Naa jaara naa maninia miijiacara quiriohua, majaari canaa saniitionu quiniutianiya niajaniya Pueyaso cumaacata. Naacuajitij, majaari pueya niquniu quiniutianiya Pueyaso cumaaca canaa jiiiasano. Naajaa, pueya jaara jiyaniya canaa najuhuana quijiaca pueyani, naajaa. ⁸ Canaa jiiiasano cumaacaari maja canaa saniitotajara seetanujuanaa Pueyaso rupaa tojitiajaca. Canaa cumaaca cutaraari canaa cumaquiniuria niajaniya, socua maninia Pueyaso Rupaa tojitiajaca nia quiniuria. ⁹ Naacuajitij, canaari shuquiriquiaani niaacua canaa paaretaaquishacari canaa cumaaca, canaa saniitionura niajaniya niaa jaara Pueyaso tojitiaashijiaca quiriquia. Naacuajitij, canaari juhua cumaacaaju pueya niquishano quiniutianiyani, cumueeca Pueyaso muerasu nia quishacari saniniuujia. Canaari cunora Pueyaso secojoquiaani, tojetaarucujanaa maninia miijiaca Pueyaso muerasu nia quiniuria seetanujuanaa. ¹⁰ Janiyari nio cua naajioneejinia jiyanoehua nia nacasuyani tucuaaanu cua quishacarija, maja jiyanoehua cua nacasunura niajaniya, niaacua cua tiuquishacari. Pa Jiyaniijiacuajaari cua jiyatequiaari juhua nia jiyaniijia cua quiniuria, na cumaacata cua canashitijionura niajaniya, seetanujuanaa cumueeca na muerasu nia quiniuria. Pueyaso niqutiosano na cumaaca janiyari maja cua sesonura niajaniya.

¹¹ Cua tucuatana nio cua naajioni cua panishano pueyanaa, janiyari nia panitiaani shuquiriaatia nia quiniuria pueyaracaanu. Saaja maninia quiniucua jiaatiajaca nia quiri. Nioojia nia cumaquiri, maninia cua rootasanota. Naajuhuaaj, nia jiyanoootooriquia maninia rupuetootesano nia quiniuria. Naa nia quishacaritij, Pueyasoori nia rupueja quiniutianiya. Nojuajaari pa panijia, pa jiyanoojiajuhuaaj. ¹² Pueyanaa, Pueyaso tojijiaca nia quiniucua, nia saruhuaajotooriquia nujuunuta, seetanujuanaa nia paniniutia niarta Pueyaso pueya. ¹³ Puetunu niquijinio parta Pueyaso muerasujuaanaari cua sequeya cua saruhuatana niajaniya.

¹⁴ Pa Jiyaniijia Jesucristo cuara cumaquiiria niajaniya pueyaracaanu. Niajaniya cuara quiiria pa Que Pueyaso panishano pueyaracaanujuhuaaj. Naajuhuaaj, niaa cuara quiiria Pueyaso Sohanu rupuesano pueyaracaanu. Puetunu niajaniyajanaa cuara naa quiiria.

PABLO NAAJIONEE GÁLATA JIJAJINIA QUINIAA PUEYASO PUEYACUARA

Gálata pueyacuara naajionee

¹ ¿Niaate quiyajaa pueyanaa? Janiyari Pablóni, pa Que Pueyaso jiyaramiquishano. Janiyari maja nareja pueyano jiyaramiquishanóni. Mijiria quiníaa pueyari maja na jiyatenu quiquiaari janiya Pueyaso jiyaramiquishano cua quiniuria. Jesucristojuanaacuajaari cua jiyatequiaari na jiyaramiquishano cua quiniuria. Nojuacuajaari na Que samiitianishanohua macujiniji. ² Niya cuata quiníaa parta Pueyaso pueyatani, janiyari nio naajiyani. Nio cua naajioneeri puetunu Galacia jiyajinia quiníaa Pueyaso pueya maapuerajanaa. ³ Pa Que Pueyaso, mariyata pa Jiyaniijia Jesucristóni, nojori cuara cumaquiiria niajaniya, nioojia cajitishano nia quiniuriajuhuaj. ⁴ Jesucristoori tama na cuaqueyajaaja panitiaquiaari pocuara na mosaanura. Naacuajitij, nojuajaari pa jeequequiaari puetunu sesa pa miishanojinijijianaa. Nojuajaari naa miiquiaari sesa miiniuucua jiaatianu pa cartenura. Nojuajaari naa cusoquiaari pocuaratej, taa pa Que Pueyaso paniquiaaricuajani, na muerasu pa quiniuria. ⁵ Naaratej, pa Que Pueyaso cuara maniniuhuaqueetasano quiiria. Cuara naa quiiria pueyaracaanutej.

Maja tamonu maninia rupaa quiniu socua Jesucristo rupajiniji

⁶ ¿Taa nia miiquianuni pueyanaa? Quiarijiani, janiyari jiyanoehua tacaya niaacuani. ¿Niaateeri ritia cartecanu Jesucristo rupaa, tamaatia niishitiojosano tojitiajaca nia quiniuria? Pueyasocujaari Neyanutaja nia cojiritiaquiaari paniniu, Jesucristo miiniuucua maninia niaara, na panishano pueya nia quiniuria. ⁷ Seetanujuanaa, maajaari socua tamonu rupaa quiniu Pueyaso pueyara pa jatanishaanura. Noo juhuari nia cushitiojoquiaa saajatejaj, najuhuana tamaatia nia niishitiojonuuquiaatej. Nojoriiri Jesucristo rupaa cushitiojoquiaa niaara, nojori tacarojosacari najuhuanaj, mariyateyacato nojori quiniuucua. ⁸ Cua tojiri pueyanaa, tamonu pueyano jaara pocuaji Tacuna rupaa niishitiojoriquia niajaniya tamaatia canaa niishitiojosanojiniji niajaniya, Pueyasoori na saniitionutaniya. Naajuhuj, janiya jaara tamaatia pohuatare Jesucristojiniji niajaniyani, jiyocuacaanuji roseno Pueyaso serujuhuj, Pueyasajuanaari

canaa saniitionutaniya. ⁹ Janiyacuajaari naa sequeja nia-janiyani. Quiarijia socua pacuterohuacuara sequenu nia ni-shishocoriquiano. Cua tojiri pueyanaa. Niaa jaara tamaatia pohuataasaariquia Jesucristojiniji, maja naate taa tari cua pohuataquiaari niajaniyacujani, Pueyaso cuaara saniitioora-noj.

¹⁰ ¿Niaateeri jiyaniya janiya pueya timitiasano quiniu paniyani? Maja. Janiya cutaraari Pueyaso timitiasano quiniu paniyani. Janiya jaara saaja pueya timitiasano quiniu paniriquiani, janiya maara pa Jiyaniijia Jesucristo seru quiyaquirini.

Taa Pablo jatanishaaquiaari Jesucristo jiyaramiquishano na quiniuriani

¹¹ Cuarta Pueyaso pueyanaa, nia pohuatareera cante cua niishitiojoquiaari Jesucristo rupaani, cua pohuatasano nia-janiyani. Pueyanaa, nio rupaa janiya na pohuataa nia-janiyani, nioori maja mijiria quiniaa pueya niishitiojosano janiya. ¹² Taa cua sequeya niajaniyacujani, majaari nio rupaa cua niishiniu quiquiaari tamasaca pueyajiniji. Jesucristojuanaacuajaari na rupaa cua niishitiquiaari.

¹³ Niaa naasucuaari janiyajiniji tojinijujiacuaja tarijia. Seetanujuanaa cuarta Judiocuaca miishano miijia cua quishacarijia, janiyari Pueyaso saquiriojosano pueya puecoonu panijia puetunujuanaani. Janiyari jiyanohua paracaajia nojorini. ¹⁴ Janiyari seetanujuanaa canaa supuetanaa niishitiojosano tojjia quijia cutarani, socua cuarta Judiocuaca mashiquiorijiniji. ¹⁵ Naajaa, jiyanohua panijia Pueyaso quiniuucua, cua supueyaquishacarijia, jnojuajaquiri tari cua saquiriojoquiaari na pueyano cua quiniuria! ¹⁶ Naacuajitij, tama na panishacarijiaaja, nojuajanaari Neyanu cua niishitiquiaari, Neyanujiniji cua pohuatanura taucuaca. Neyanu na niishitiniu nuhuaji janiya, majaari quenaaja tamasaca nequesotanuuca cua quianu quiquiaari, cua niishiniuria seetanutejanaa na niishitishano janiya. Pueyasocuaajaari maninia cua niishitiquiaari puetunujuanaa Neyanujiniji. ¹⁷ Naajuhuj, majaari cua quianu quiquiaari Jerusalén tiacajinia, tii cua niquiniuria cuarta Jesu jiyaramiquishano pueya. Nojoriiri coteenujuanaa Jesu jiyaramiquishano pueya quijia. Jiyacaritij, majaari quenaaja cua tarishiniu quiquiaari Damasco tiacajinia. Janiyari ritia quiaquiaari pueya quiyaquishaqui Arabia jiyajiniani. Na nuhuaji, janiyari tacatequiaariuhua Damasco tiacajiniohuani.

¹⁸ Jiuujianaraca marijia cua shocotejonu nuhuaji Damasco tiacajinia, janiyari shusha jiyacari quiaquiaari Jerusalén

tiacajiniani, Pedro cua niishiniuria shushajanaa. Nata cua quishacari, quince juucaari cua shocojoquiaari tiini. ¹⁹ Jiyacaritij, majaari socua Jesu saquiriojosano pueya cua niquniu quiquiaari. Janiyari saaja Santiago niqiquiaari cutarani. Nojuacuajaari pa Jiyaniijia Jesu tarajanu. ²⁰ Pueyanaa, Pueyasocuajaari niishiya, janiyari nio cua naajiojina seetanujuanaa nia pohuataani.

²¹ Na nuhuaji, janiyari quiaquiaari Siria jiyajiniani, Cilia jiyajinianio. ²² Saniniuujia, Judea jiyajinia Jesu tojiti-jaca maapeeri juhuanajuaja maja na niishitiuniu quijia janiya. ²³ Nojoriiri saaja naa poojotasaaquiaari janiyajini-jitij: “Noo pueyano tarijia pa miitiaja naquiya Jesujiniji pa pohuatasacaritij, nojuajanaari quiarijia pa Jiyaniijiajiniji pohuataa pueya niquiarajuhua”. ²⁴ Naa nojori tojiniuushacari janiyajinijitij, nojoriiri Pueyaso maniniuuhaqueetaquiaari nojori paraca na jataniniuucua Jesu rupaa pohuatana na quiniuria.

2

Jesu jiyaramiquishano pueya niishishacari, Pablo seetanujuanaa Jesu jiyaramiquishano pueyanojuhua

¹ Catorce marijia jaara shocojoquiaari, janiyari Bernabeeta Jerusalén tiacajinia pacutequiaariuhua quianuni. Janiyari jiyacari Tito rupoquiaari cucuajuhua. ² Pueyasocuajaari cua toquiaari cua quianura Jerusalén tiacajinia. Janiyari cunora quiaquiaarini. Tii cua quishacari, janiyari Jesu tojitiajaca jitianaa pueyata rerejoquiaarini. Maja seetanu puetunu nojoritijanaa, saaja nio pojoritia: Santiago, Pedro, Juannio. Janiyari saaja cuno pojori niqiara pohuataquiaarini taa cua pohuataquiaa Jesujiniji puetunu taucacajanaacuajani. Na nuhuaji, janiyari nojori nequesotareeni: “¿Taa nia sequeyani pueyanaa? ¿Janiyate najuhuaana sesa niishitiojiya taucacani?” Cua sequetureeri: “Maja. Quiaacuaja seetanu rupaajanaa niishitiojiya taucaca, naa Jesucristojiniji quia pohuatasacari nojori”. ³ Naajuhuaaj, parta Pueyaso pueyano Titoni, cuata quiquiaari tiini, nojuajaari Grecia jiyajinijinio tahue. Naajaa, majaari na sequesaanu quiquiaari na cararaatiuuquia co miatesaanura, seetanujuanaa Pueyaso pueyano na quiniuria. Nojuajaari maja naa na sequesaanu quiquiaari. Canaa rerejosacari Pueyaso pueya jitianata, nojoriiri Tito niqiquiaari nareja, nojori na rupuenurajuhuaaj. Nojoriiri niishiquiaari nojuajaari seetanujuanaa Pueyaso pueyanojuhuaaj, saaja Jesucristoocua na tiuuniucua. ⁴ Saniniuujia, noojiaqueya canaa Judiocuacajinijinoori

tama nojori cuaqueyajaaja jiyatequiaari juhua Jesu tojjia-aca pueyara, nojori cojiniuria canaa. Nojoriiri naa canaa rupuequiaari na sapojonuta. Canaata nojori quishacari, nojoriiri canaa shanacutaja nojori niishiniuria canaate seetanujuanaa Pueyaso muerasuni, saaja Jesuucua canaa tiushacari. Nojoriiri juucua canaa jiyatenu paniquiaari tariucuacaanu Moisés Rootasano tojjiaaca canaa quiniuhua. ⁵ Canaari nojori niishitiojosano pataquiaari saajani. Majaari quenaaja shiitianiyojua nojori rootasano canaa tojiniu quiquiaari. Canaari naa miiquiaarini seetanu Jesucristo rupaajanaa canaa cojuanura niaara, seetanujuanaa Pueyaso muerasu nia quiniuria saaja Jesucristoocua nia tiuuniuucua. Majaari canaa cojitiniu paniniu quiquiaari Jesucristo rupaa, tariucuacaanu niishitiojosanota.

⁶ Cuno pojori Pueyaso pueya maapue jiitianaa Jerusalén tiacajiniani, nojoriiri jiyanohua tojjishano pueya quijia. Janiyara naajaa. Pueyasocujaari najuhuaa quijiaaca jiyanooquiaajuhuj, taa na jiyanooquiaa tojjishano pueyacuaani. Naajaa, cuno tojjishano pueya jaara tojjiquiaari taa cua pahuataquiaa Jesucristo rupaani, majaari quenaaja niquiriyatu rupaa nojori sequenu quiquiaari, nojori niishitiojonura janiya socua. ⁷ Nojori cutaraari niishiquiaari Pueyasocujaari seetanujuanaa cua jiyatequiaari na rupaa pahuatana cua quiniuria taucuacara, taa Pedro na jiyatequiaari Judiocuaca niquiara pahuatana na quiniuriacuani. ⁸ Pedro Jiyatena Judiocuaca niquiara Jesucristojiniji pahuatariquianoni, cuno Pueyasojuanaacujaari cua jiyatequiaarijuhua taucuaca niquiara pahuatana cua quiniuria. Naacuajitij, canaari mariyata Pueyaso jiyaramiquishano pueyani.

⁹ Santiago, Pedro, Juannio, nojoriiri socua tojjishano quijia puetunu Jesuucua tiuuniaa cuarta Judiocuacajinijiniojuanaa. Nojoriiri seetanujuanaa puetunu Pueyaso muerasu jiyaniijianucujanaa quijia. Naajaa, nojoriiri seetanujua-naa niishiquiaari Pueyasoori maninia cua jiyanooquiaari, na jiyatenura janiya Neyanujiniji pahuatana cua quiniuria taucuaca niquiara. Naaratej, nojoriiri na juaashiquia niqutiojoquiaari canaani, janiya, Bernabeenio. Nojoriiri cunota juhua canaa sequeturiquiaa canaari seetanujuanaa nojori cojiniaani. Naa canaa sequetuquiaarijiaariuhuj: “Maniacuja. Nia quiojiyare taucuacaacua tii nia pahuatanura Jesujiniji nojorijuhuj. Canaari saniniuujia parta Judiocuaca tajinia poonijionutaniyanijia, nojori niquiara canaa pahuatanura Jesujinijijuhuj”. ¹⁰ Nojoriiri canaa sequequiaarijuhua: “Canaa panishano pueyanaa, majaari nia niyajetanu

casamiijiuniucua pueya naacunu”. Naaratej cuarta Pueyaso pueyanaa, puetunu tiqiyocujanaa cua rucuanesacari, janiyari naa miiquiaa seetanujuaanaani.

Antioquiya tiacajinia Pedro nacasusaanujiniji pahuatasano

¹¹ Tamacari, canaa quishacari Antioquiya tiacajinia, Pedroori canaacua niquiaarijuhuaj, canaata na quiniuria tii. Tii na quishacari canaata, Pedroori sesa miiquiaari cua niquiara. Cunora, janiyari jiyanoohua na nacasuquiaarini. Cuno na miishanoni, cunoori seetanujuaanaa sesa quiquiaari Pueyasora. Naa na miishacaritij, tamajaaja miiriquiaa cocuaatiaari. ¹² Pedroori naa miiquiaaritij. Coteenu canaa cojiqiaari maniniaari tariucua Jesuucua tiuujiaa taucucata, canaata na miaquejonura jatiqii. Jiyacaritij, canaacua tiuquiiqiaariiri socua cuarta Judiocuaca Jerusalén tiacajiniji. Nojoriiri Santiago jiyarosano pueya quiquiaari. Cuno Judiocuaca quishacari tii canaata, Pedroori canaacuaji rupatequiaari. Majaari tari na miaquenu paniniu quijia canaata, tariucua Jesuucua tiuujiaa taucucata. Narta Judiocuaca puerequiaariiri maja na sequesaaanura: “Cunoqui sacuaraatia miaquejojua taucucata”. ¹³ Tii quiniaa Jesuucua tiuujiaa Judiocuaca jaara niquiquiaari naa Pedro miishanocuaatej, nojoriiri jaarajaaja canaacuaji rupatequiaarijuhuaj, Pedro na cojitiuniuria. Naajuhuj, ¡Bernabeeri jaarajaaja canaacuaji rupatequiaarijuhuaj cuno mosanucua na cojiniuria! ¹⁴ Naaratej, janiya jaara naa nojori niquiquiaari tariucua Jesuucua tiuunio taucucata tamacatiuyanoni, janiyari niishiQuiini, cuno pojoriiri maja maninia na miitiuniu quiriquiaa. Cunoori maja na quiniu quiriquiaa taa nojori rootasaaquiaari Pueyaso rupaacuajani. Cunora, janiyari puetunu Pueyaso pueya maanu niquiarajanaa naa sequesaaiaari Pedroni: “Quiaari Judio pueyano. Naajaa, majaari seetanujuaanaa juhua Judio pueyano quia quiniu quiquiaa. Quiarijia saniniuuja, quiaari Jesuucua tiuunio taucucata shiniujiya nojori quiniuria seetanujuaanaa juhua Judiocuaca, nojori rupuenura pajaniya. ¿Casaara naa quia shiniujiya nojoriirini? ¹⁵ Paacuajaari Moisés Rootasano tojjiaca cutarani, Judiocuaca pa quiniuucua. Paari maja tahuani, Pueyaso tojiyashijiaca. ¹⁶ Naajaa, paacuajaari niishiyani, majaari Pueyaso jiyanooni pajaniya Moisés Rootasano tojjiaca pa quiniuucua. Maja. Pueyaso cutaraari pa jiyanoojia, Neyanu Jesucristoocua pa tiushacari. Paari cunora Jesucristoocua tiuquiaani, nojuaja jiyanooniuria pajaniya puetunu sesa pa miishanojinijianaa. Sesa pa miishanoori

maja na jiyanooshaanu quiquiaa Moisés Rootasano pa tojishacari. Maja. Naajuhuj, majaari quenaaja niquiriyatu pueyano jiyanooshaanu quiniutianiya Moisés Rootasano tojijia na quiniuucua. Maja.

17 Paacuajaari Jesucristoocua tiuquiarini, jiyanooshano pa quiniuria, maja socua Moisés Rootasano tojijia pa quiniuria. Na nuhuaji, paa jaara jiyaniyani paa sesa miijia quiriohuani Moisés Rootasano pa tojiyaquishacari tarini, saaja Jesucristoocua pa tiushacari, paari jiyanoohua jiyajeneyani. Naa pa jiyanihacari, paari juhua sequeyani Cristoori pa jiyaterohua sesa miijia pa quiniuhuara nocua pa tiuuniuucua. ¿Quiaateeri naa sequenu paniya Pedronaa? ¡Maja! 18 Paacuajaari maninia miiquiarini pa tarinitiasacari tojiniu Moisés Rootasano, jiyanooshano pa quiniuria saaja Jesucristo rupaacua pa tiushacari. ¿Paateeri socua maninia miijia quiniutianiya Pueyaso niquiarani, paa jaara Moisés Rootasano tojijia quiriohuani? ¡Maja! Paa jaara naa niishiriojiyani, paari jiyanoohua jiyajeneyani. Paacuajaari seetanujuanaa pohuatanuuquiaa puetunu pueya niquiarajanaani, nojoriiri jiyanooshaanutaniya saaja Jesuucua nojori tiushacari. Naa pa pohuatanuusano jaara sapejosano quiriquia, paa maara jiyanoohua sesa miijia quiriquiani. Saniniuujia, Pueyaso cutaraari seetanujuanaa pa jiyanooquiaa saaja Neyanuucua pa tiushacari”.

Janiyari naa nacasuquiaari Pedroni puetunu tii quiniaa Pueyaso pueya niquiarajanaa. 19 Pueyanaa, cua niishishacari maja cua naata Moisés Rootasano tojiniu maninia puetunujuanaa, janiyari niishiquiaarini Pueyasoori cua shaajanutaniya na shuriucujia. Naaratej, janiyari tama cua cuaqueyajaaja jiyatequiaari juhua tariucua macuni, maja Moisés Rootasano tojijia cua quiniuria socua. Naacuajitij, janiyari quiarijia saaja Pueyasora quiya cutarani. Janiyara, janiyari tari cojiritiasaaquiaari monu Cristota niyacutesanojiniani. 20 Naacuajitij, quiarijiani, majaari nio janiya quiyani. Jesucristocujaari nio, coojiajinia quiyani. Majaari tamajaaja saminio cua quiniu. Jesucristo cua rupuesacari, naacuajiti janiyari saminio quiyani. Naa saminio cua quishacari puetunu cua cuaqueyatajanaatej, janiyari rishiyani Pueyaso Niyanuucua tiujia cua quishacari. Nojuajaari cua paniquiaari. Naaratej, tama na cuaqueyajaaja tarinitiaquiaariiri cucuara na mosaanura. 21 Majaari cua ruuretanu Pueyaso jiyanooniu panishacari janiya. Jaara pa naata quiriquia tama pa cuaqueyajaaja jiyanootiniu Pueyaso, Moisés Rootasano tojijia pa quiniuucua, Jesucristo maara najuhua

cusoquiaari pocuara.

3

¿Teyano tojjia pa quishacari pa jiyanooshaaquiaani, Moisés Rootasano, Jesucristoocua tiuuniu soj?

¹ Mosanucua Gálata pueyanaa, ¿cante nia shimiojocanuni, naa pa Jiyaniijia Jesuucua tiuuniu nia tarinitianuratej? Canaa jaara shushajanaa nia niquiara pohuataquiaari Jesucristojinijitij, canaacuajaari maatia nia niishitiquiaarini, nojuajaari pocuara mosaaquiaari pa jiyanooshaanura. ¿Quiarijiaariuhuj, cante tari nia sapojocanuni, Jesucristoocua tiuuniujiniji nia pishiniuriani? Naa nia miishacaritij, ¿niaateeri jiyaniya niaa tama nia cuaqueyajaaja jiyanootiniutianiya Pueyaso? Maja nia naata pueyanaa. ² Quiarijiani pueyanaa, janiya saaja nio nia nequesotanu paniyani. Cua riucature. ¿Niaateeri Pueyaso Sohuanu tiuquiniquiaari nioojiajinia Moisés Rootasano nia tojiniuucua, Jesucristo rupaacua nia tiuuniuucua soj? ¿Taa nia sequeyani? Niaacuajaari niishiya, niaari Pueyaso Sohuanu tiuquiniquiaari nioojiajinia Jesucristoocua nia tiushacari, niaa jaara na rupaa tojiquiaari. ³ ¡Niaaquiiri tojetaarucujanaa mosanucujuhuanajaj! Nia niquishuriiraj, niaacuajaari Pueyaso muerasura quiquiaari Pueyaso Sohuanu nia shanacunuucua nioojiajinia na tiuqiniuria, Jesucristoocua nia tiushacari. Quiarijia saniniuujia, ¿niaateeri jiyaniya nia naata Pueyaso jiyanootiniu tama nia cuaqueyajaaja Moisés Rootasano nia tojishacariuhua juucua, tama nia cumaacatajaaja? ¡Maja! ⁴ Pueyasocuajaari jyanohua maninia miiriquiaa nijaniya, saaja Neyanuucua nia tiushacari. Naa Pueyaso miishano niaarani, ¿cunoteeri najuhuaana quiquiaarijuhuaj? ⁵ Pueyanaa, Pueyaso jaara na Sohuanu niquitioquiaa nijaniya, na nuhuaji na cumaacata miiquiaa nia niishishoo casaari, nia sequeretoj, ¿casaara naa na miiquiaarini? ¿Pueyasoteeri naa maninia miiquiaa nijaniyatej, Moisés Rootasano tojjijaca nia quiniuucua? Maja. Nojuajaari naa maninia miiquiaa nijaniyatej, saaja na rupaacua tiujiaca nia quiniuucua, canaa pohuatasano nijaniyani.

⁶ ¿Niaate niishiya, casaara Pueyaso jiyanooquiaari canaa supuetana Abrahamni? Abrahamcuajaari Pueyaso sequesanoocua tiuquiaari. Naaratej, Pueyasoori na jiyatequiaari juhua tojetaarucujanaa sesa miyashijia pueyanora. Naa na jiyatequiaariiri saaja nocua na tiuuniuucua. ⁷ Naacuajitij pueyanaa, quiarijia nia niishiri cutara, cante Pueyasooocua

tiuujiani taa supuetana Abraham tiuquiaaricuaani, nojoriiri seetanujuanaa canaa supuetana Abraham niquiohuajanaa cutara. ⁸ Pueyaso jaara na sequenu panishano naajiotaniquiaari tariucuacaanu, nojuajaari tari niishiquiaari taa taucuaca na jiyanooniutianiyajaanihuaj, nojori jaara nocua tiuuri. Naaratej, nojuajaari naa sequiquiaari supuetana Abrahamtej: “Quiaacuajaari cua sequesanoocua tiurii, Abrahamnaa. Naaratej, quia jinianuucujainio supueno pueyanoori jiyanoohua maninia miiniutianiya puetunu pueyapuerajanaa. Noo pojori shuquiritiniutianiyari, puetunu jiyacajinijiniojuanaa nocua tiuuriquiano pueyatej”. ⁹ Naaratej, cante Jesucristoocua tiuujiani, Pueyasoori na jiyanooniutianiyajuhuaaj, taa supuetana Abraham na jiyanooquiaaricuaani, na sequesanoocua Abraham tiushacari. Cunora, Pueyasoori maninia miiquiaa Jesucristoocua tiuujiaa, taa na miiquiaari Abrahamcuaani.

¹⁰ Saniniuujia, cante jiyaniyani Pueyasoori na jiyanooniutianiya Moisés Rootasano tojjia na quiniuucua, nojuajaari pueyaracaanu saniitiosaanutaniya. Naa naajiotasano quiyacuajaari tariucuacaanu Pueyaso Rupaajinia:

“Moisés Rootasano tojjia cuara tojiiria puetunu Pueyaso naajiotanishanojuanaa. Cante niquiriyatu na sequesano tojiaquijiani, nojuajaari pueyaracaanu sanitiosocoriquiano”.

¹¹ Naacujitij, niaari niishiyacuaja, majaari quenaaja niquiriyatu pueyano jiyanooshaanu quiniutianiya, Moisés Rootasano na tojiniuucua. Saniniuujia, naa naajiotasano quiyacuajaari Pueyaso Rupaajinia:

“Pueyaso jiyanooshano pueyanoori pueyaracaanu rishiriquiano cutara, Pueyasoocua na tiuuniuucua”.

¹² Saniniuujia, Moisés Rootasanoni, cunoori maja na niishitiojonu Pueyasoocua pa tiuuniuria, jiyanooshano pa quiniuria. Maja. Saaja naa sequeyari:

“Cante puetunu nio naajioneejinia rootasanojuanaa tojjiani, nojuajaari cuno na tojiniuucua rishiniutianiya”.

¹³ Maja maninia pa tojiaquiniuucua Moisés Rootasano, paari Pueyaso puecosocoriquiano quiquiaarini. Naajaa, Pueyasoori pa Jiyaniijia Jesucristo jiyatequiaari na sesacasano pueyanora pa niti, pocuara na cusonura. Naa sequeyajaarihua tariucuacaanu Pueyaso Rupaa:

“Pueyaso sesacasanoori cuno, niyacutesanojinia teetesanoni”.

¹⁴ Naa Jesucristo cusonucua pocuaratej, saaja nocua nia tiushacari, Pueyasoori na naata shuquiritiniu nijaniya taucacajuhuaaj, puetunu na sequesano tajanaa canaa supuetana Abraham. Naajuhuaaj, saaja pa tiuuniuucua Jesuucua,

puetunu pajaniyajanaari Pueyaso Sohuanu masequiaani, taa seetanujuanaa Pueyaso sequequiaari tariucuacaanucujani.

Moisés Rootasanoori maja na naata Pueyaso sequesano Abraham jataniniu

¹⁵ Cuarta Pueyaso pueyanaa, maatia nia pohuatারেera maninia nia niishiniuria cua pohuatasano. Cua tojiri. Pueyano jaara maninia miiniu paniri narta pueyanora, naa miijjaari: na sesa naajiotajaari naajioneejinia, tee cuniqui na miishocoriquiano naajiotasano quiyacuajani. Jaara naa miiritij, majaari quenaaja tamonu na naata cuno naajioneejinia naajiotasano jataniniu, socua na maatenunio. ¹⁶ Tariucuacaanu, Pueyasoori naa sequequiaari Abrahamtej: “Janiyari seetanujuanaa maninia quia miiniutianiyani, quia jinianuucujinio supueriquiano pueyanonio”.

Nia niishiri pueyanaa, tariucuacaanu Pueyaso Rupaajinia naajiotasanoori maja na sequenu: “Abraham jinianuucujinio supueno pueyara”. Maatia sequeyacuajaari: “Abraham jinianuucujinio supueno pueyanora”. Niquiriyatu pueyano sequeyari, maja queraatia. Nojuajaari pa Jiyaniijia Cristocujaja. ¹⁷ Cunora pueyanaa, janiyari seetanujuanaa nia sequeyacuajani, Pueyasoori seetanujuanaa sequequiaari Abraham taa nera na miiniutianiyani. Seetanujuanaa Pueyaso sequesanoori maja na naata jatanishaanu. Naacua-jitij, Moisés Rootasanoori maja na naata Pueyaso sequesano Abraham jataniniuujihuaaj. Seetanujuanaa Pueyaso sequenu nuhuaji Abraham, taa nera na miiniutianiyani, cuno nuhuaji, shocojoquiaariijaaraari cuatrociento treinta marijia. Cuatrociento treinta marijia shocojonu nuhuaji, Pueyasoori jiyacari shusha Moisés niquitioquiaari na rootasano, saajianeeacaacia na quejasano. Moisésri saniniuujia pueya na niishitiojoquiaari. Naacua-jitij, Moisés Rootasanoori maja na naata Pueyaso sequesano Abraham jataniniu, najuhuaana na quiniuria pajaniyara. ¹⁸ Pueyaso niquitionu panishano pajaniya jaara pa niquitiosariquia saaja pa tojiniuucua Moisés Rootasano, na niquitiosocoriquiano pajaniya maara nareja niquitiosoo quiri. Saniniuujia, Pueyasocujajaari seetanujuanaa naa Abraham sequequiaari: “Janiyari nareja quia niquitionutaniya cua sequesano”.

¹⁹ Niaa naasucuaari sequeya: “Jaara naa quiritij, ¿casaarano socuateeri Moisés Rootasano?” Nia sequereera pueyanaa. Jiyano-hua Abraham nuhuaji, Pueyasoori Moisés caminiuujitiquiaari na rootasano, pueya niishiniuria nojoriiri seetanujuanaa Pueyaso tojiyashijiaca. Cunora quiquiaariiri Moisés Rootasano. Cuno Rootasanoori quiquiaari Abraham jinianuucujinio supueno pueyano

cuaara tiuquiquiaariijaatijia, taa Pueyaso sequequiaari Abrahamcujani. Nojuajaari pa Jiyaniijia Jesucristocujaja. Naacujitij, Jesucristocujajaari Pueyaso jiyaniquishano quiquiaari, na sequesacari Abraham, “quia jinianuucujainio supueriquiano pueyano”. Cristocujajaari puetunu Pueyaso sequesano Abrahamjanaa masequiaari pajaniyarajuhaaj, taa Pueyasojuanaa sequequiaari Abrahamcujani. Saniniuujia, Moisésri saaja pueya niishitiojoquiaari Pueyaso seya caminiujiushano nojuaja. ²⁰ Abrahamra saniniuujia, majaari quenaaja tamonu pueyano quiniu quiquiaari nera na caminiujiuriquiano. Pueyasojuanaacujajaari nocua muetaquiaari, na sequenura seetanujuanaa taa Neyanuucua tiuujia na miiniutianiya maniniani. Cunora, Pueyaso rupaa Jesucristojiniji pa tojishanoni, cuno cutaraari socua pa tojishocoriquiano Moisés Rootasanoiniji.

Casaaranote Moisés Rootasanoni

²¹ Naa cua sequesacaritij, ¿niaateeri jiyaniya, Moisés Rootasano naasucuaari pajaniyarano Pueyaso sequesano paraca? Majaari naa cua sequenutej. Janiyari saaja sequeyani, Moisés Rootasano jaara na naata quiriquia Pueyaso jiyanootiniu pajaniya, paa maara Moisés Rootasano tojitiajaca quiriquiani, Pueyaso jiyanooniuria pajaniya. ²² Saniniuujia, tariucuacaanu Pueyaso Rupaajinijini, paari niishiyani puetunu pueyapuejanaari Sesaaca pueya. Naaratej, majaari pa naata tarinitianu quiquiaari sesa miiniu. Naacujitij, paari maatia niishiyani, puetunu pueyajanaa cuaara tiuuria Jesucristoocua, Pueyaso sequesano Abraham nojori masenura.

²³ Pa niishiyaquishacarijia Jesucristoocua pa tiuuniuria, paari juhua Moisés Rootasano jiitiasano pueya quijiani. Paari naa quijia taraatia pueyacuaani, paa jaara tojiquiaari Jesucristojinijiaatijia, nocua pa tiuuniuria. ²⁴ Naacujitij, Moisés Rootasanoori juhua pa jiitiana quiquiaari. Juhua naatujooriniyosua pa pueratejosua Jesuucuaari. Naa na miishacari pajaniyatej, juhuacarijia Jesujiniji pa niishitiojuaari. Naacujitij, paa jaara Jesuucua tiuquiaarini, paari puetunu sesa pa miishanojinijijianaa jiyanooshaaquiaarini. ²⁵ Naa Jesuucua tiuujia pueya pa quishacari quiarijiatej, majaari socua pa tojiniu tariucuacaanu pa canashitijiona. Moisés Rootasanoori juhua pataaco seru quiquiaari, Pueyasora na canashitijionura pajaniya, juhua naatujoori pa quishacarijia. ²⁶ Quiarijia cutara, puetunu nijaniyajanaari Pueyaso pueya, Jesuucua nia tiuuniuucua. ²⁷ Naacujiti

pueyanaa, niaa jaara moojinia tiuquinishaacanu, seetanujuanaa nioojiata nia tiuushacari Jesuucua, niaari na coquete-saaquiaa. Naa nia quishacari natatej, na Que niquiara, niaari juhua nojuaja niquishano, na panishano muerasuniojua nia quiniuucujuhuj. ²⁸ Naa Pueyaso muerasu pa quiniuucuatej, majaari Pueyaso niquiniu rimiajata pajaniya. Tamonu jaara Judio pueyano quirri, naajaa. Tamonu jaara tahue quirrijuhuj, naajaa. Poonijotesano pueyano maaraja, camarnuju pueyanonio, cunoori maja rimiajata Pueyasora. Naajuhuj, caya, maaji, cunoori maja rimiajata Pueyasora. Jesucristoocua tiuujiaa pa quishacari, Pueyasora, puetunu pajaniyajanaari juhua niquiriyatu pueyanoni. ²⁹ Naajuhuj, niaa jaara seetanujuanaa Jesucristo pueya quirri, niaari seetanujuanaa canaa supuetana Abraham jihuacuajinio supueno pueya cutara. Naacuajitij, niaari Pueyaso sequesano Abrahamrano maseriquianojuhuj.

4

¹ Nia sequenu paniya socuanijia pueyanaa. Cua tojiri. Mijiria, pueyano jaara jiyaniijia quirri, na shaajesacari, neyanuuri camarnura jiyatesano na que niti. Shaajeno pueyano niyanu jaara naatujua quirijia, neyanuuri juhuanujoaja maja na naata na que casami jitianu. Nojuajaari saaja juhua pataaco seru, naatujua na quishacarijia. ² Naacuajitij, tamasaari cuno mueya canashitijia, cuaara mashajara quirijiaatijia, jiyaniijara jiyatesocoriquiano, taa na shipininio sequequiaaricujani. Jhuacarijia niishitiojoshiyajaarijuhuj, maninia na jitianura nerano na que riuriotaca. ³ Paari naajuhuj. Pueyaso pueya pa quiyaquishacarijia, paari juhua naatujoori quiquiaarini. Paari mijiria niishishano tojitishaaquiari, pa supuetanaa niishishanonio. Paari naa taraatia jittiasaaquiari. ⁴ Na nuhuaji, Pueyaso jaara tari na sequesano tohuateenu paniquiaari, nojuajaari Neyanu jiyaroquiaari pocua, mijiria na rasaanura maninia maajijiniijianaa, pueyano na quiniuria. Mijiria na quishacari, nojuajaari puetunu Moisés Rootasanojuanaa tojiquiaari pa niti. ⁵ Naacuajitij, nojuajaari na naata Moisés Rootasano tojijiaa jiyanooni, maja socua pa tojitishaanura Moisés Rootasano. Naaratej, Pueyasoori na naata pa jiyatenu na muerasu pa quiniuria cutara. ⁶ Seetanujuanaa na niishitiniuria pajaniya paari necohuani, nojuajaari Neyanu Sohuanu jiyaroquiaari pocua, poojiajinia na quiniuria. Naa poojiajinia na quishacaritij, nojuajaari Pueyaso pa sequetequiaa, "cua Quenaa". ⁷ Naacuajitij pueyanaa, majaari tari nia quiniu Moisés Rootasano tojijiaa, juhua pataaco seru. Niacuajaari seetanujuanaa Pueyaso niquiohua cutara. Naa na

muerasu nia quishacaritij, niaari tariucuacaanu Pueyaso sequesano Abrahamrano maseriquianojuhuj, taa na muerasurano niqutionu na sequequiaaricujani.

Pablo tacaashacari Galacia jiyajinia quiniaa Pueyaso puey-acua

⁸ Pueyaso nia niishiyaquishacarijia pueyanaa, niaari juaashiquiata shipinijosano nia pueyasohua tojjiaca quiquiaari taraatia. Cuno casaari maja seetanujuanaa Pueyaso. ⁹ Quiarijia saniniuujia, niaari Pueyasojuanaa niishiya. Pueyasojuanaa cutaraari saniya nia niishiya. Naa Pueyaso panishano muerasu nia quishacaritij, ¿casaara najuhuana supuetanaa pueya niishishano miiniuria nia paniuhua socuani? Cuno, canaa supuetanaa Judiocuaca rootasanoni, cunoori maja na naata cumaquiniu niajaniya. Niaari najuhuana na tojjiaca quiniutianiya. ¹⁰ Niaanaari puetunu juucajanaa niishijiaca quiya, juhua canaa supuetanaa Judiocuaca. Niaanaari sequetuquiaa: “Cuno juuca, majaari pa miaquenu quiniutianiya. Cunoori pueresano juuca, Pueyaso jiyanooniuria pajaniya”. Niaanaari naa miiquiaa puetunu shuniyarajanaa, puetunu marijjarajanaanio. ¿Casaara naa miijiacara nia quiriohuacuaarini cuarta Pueyaso pueyanaa? ¹¹ Naa nia miiniuucuatej, janiyari jyanohua tacaya quiarijia niaacuani. Janiyari tama sequequiaajaacujua: “Cuno pueya tajinia Pueyaso rupaa cua pohuatasanoquiiri najuhuana quiquiaari”.

¹² Cuarta Pueyaso pueyanaa, janiyari seetanujuanaa nia sequenu paniyani. Nia miiriohuarohua taa cua miiquiaaricuaani, shusha cua tiuquishacari niaacua. Moisés Rootasano niishiyashijiaca nia quishacari, janiyari na tarinitiaquiaari tojiniuni, juhua niajaniya cua quiniuriajuhuj. Saaja Jesucristo rupaa nia tojiriohua cutara taa cua miiquiaaricuaani. Cua panishano pueyanaa, niaari maninia cua jiitiaquiaari niaata cua quishacari. ¹³ Niaacuajaari niishiya, cusosu cua quiniucua, janiyari shushajanaa Jesucristojiniji pohuataquiaari nia niquiarani. ¹⁴ Naa cusosu cua quishacari niaatatej, naajaa, majaari nia ruuretanu quiquiaari janiya, naa sacuaraatia cusosu cua quishacaritij. Majaari que-naaja nia soonu quiquiaari janiya. Saniniuujia, niaari cua tojtiaquiaari juhua Pueyaso serujuanaa, nia niquiara cua pohuatasacari Jesucristojiniji. Naa cutaraari seetanujuanaa cua tojiquiaari juhua Jesucristojuanaa. Niaari naa timitiaquiaari janiyatej, Jesujiniji cua pohuatanuucua niajaniya. ¹⁵ Quiarijiaariuhua pueyanaa, ¿casaa nia tojetacanuni? ¿Casaara nia tarinitiarohuacuaa shuquiriaatia nia

quiniuurini, taa nia quiquiaari coteenucujani? Janiyacuajaari niishiquiaarini, jiyano hua nia paniniuucua janiya, jaara nia naata quiquiaari, niaa maara nia namijia samiriootaquiaari nia niqutiosocoriquiano janiya, cucua nia taraa jesacari. ¹⁶ Quiarijia naa cua sequesacari seetanujuanaa nijaniyatej, ¿niaateeri cunora cua niquniutianiya juhua nia paraca? ¹⁷ Cuno pueya, najuhuana tamaatia nia niishitiojoquiaa Pueyaso rupaani, quiarijia nojoriiri maninia miqiaa nijaniya na sapojonuta. Nojoriiri nia shuquiritiya, nojoriicua nia tiuuniuria. Nojoriiri naa miya, canaa nia cartenura, saniniuujia nojori tojjijaca nia quiniuria. Naacujitij, majaari tari cua rootasano tojtiajaca nia quiniu quiniutianiya. Niaari cua cartenutaniyajuhua. ¹⁸ Quiarijiani, cuno pojoriiri nia shuquiritiyacua. Majaari nia jiyaniniu janiya nia sequeyani, maja maninia parta pueya pa shuquiritiniuria. Taaquiriirinij, maniacuajaari parta pueya pa shuquiritiniuria, seetanujuanaa pa naacunura nojori. Niacuajaari niishiya pueyanaa, janiyari jiyano hua nia tojihano pueyano quiquiaarini, Jesucristojiniji cua pahuatanucua nia niqiuara. ¡Naa seetanujuanaa pueyaracaanu cua panijiacara nia jiyateriquiani, maja saaja nia shuriucua cua quishacari! ¹⁹ Quiquihuaniyojuanaa, jiyano hua cua tacaashacari niaacua, coojiaari jiyano hua noonu pacuterohuacu huaaj, naatej, taa maaji nooquiaacuaa na manajani, quera na ranu panishacari. Naajuhuaaj, janiyari naa pueyaracaanu miijionutaniya naquiya niaacuani, niaa cuara jatanishaarejaatijia, quiarinio pueya nia quiniuria. Niaari naa quiniutianiyaquij, seetanujuanaa Jesucristo quishacari nioojiacajinia, juhua nojuaja nia quiniuria. ²⁰ ¡Seetanujuanaa nia shuriucua cua jatariquiani, maninia cua niishitiojonura nijaniya! Naa cua quishacari tucuaaanu nijaniyajinijitij, majaari cua niishiniu taa nia quiya seetanujuanaani. Niaanaari Moisés Rootasano tojjijiacara quiriohuacuaa. ¿Niaateeri seetanujuanaa Jesucristo rupaa cartecanu, maja soj?

Miriqui pahuatasano Agarjiniji, Saarajinijinio

²¹ Moisés Rootasano tojtiajacanaa, cua tojiri. ¿Majateeri tarucuaaanu Pueyaso Rupaajinia nia serojonu quiquiaacuaaja, taa Abrahamjiniji na pahuataani? ²² Moisés Rootasanocuaajaari Abrahamjiniji sequeya, nojuajaari caapiqui niyanuraca quiquiaari, caapiqui nucuaacujinijuhuaaj. Abrahamri neco seru muetutequiaari. Na sesojoquiaariiri Ismael. Na nuhuaji, saniya necojuanaari nera muetuquiaarijiuhuaaj. Na sesojoquiaariiri Isaac. ²³ Pueyanaa, Agar jaara Abrahamra muetuquiaari, cunoori tama Abraham miishanojuaja quiquiaari, mueya na panishacari. Maja cu-

taraari Pueyaso panishano. Saniniuujia, saniya necocua-janaa jaara nera muetuquiaari na nuhuaji, cunoori Pueyaso panishano quiquiaari cutara, na camishano maajijianaa muetusacari nera. Naacuajitij, Pueyasoori tarijia na sequesano Abraham tohuateequiaari. Naa na sequequiaari-iri: “Abrahamnaa, quiaari niyanuraca quiniutianiya”. Naa Pueyaso sequenuucuatej, necocua Saaraari muetuquiaari, motaja na quishacari. Cunoori maja tama nojori cumaacatajaaja. Cunora, Isaacri Pueyaso sequesanojuanaa mueya cutara, maja juhua Ismael, seru mueya. ²⁴ Nio caapiqui maajipohuani, Agar, Saaranio, nojoriiri juhua caapiqui seetanujuanaa Pueyaso sequesano na pueyara. Naacuajitij, Agarr miriqui juhua Moisés Rootasano, Sinaí tuhuanujinia Pueyaso niishitiojosano Moisés. Naaratej, Moisés Rootasano tojitiajacaari juhua seya quiquiaa, taa Agar quiquiaari serucuaani. ²⁵ Seetanujuanaari, Agarr miriqui juhua Sinaí tuhuananu Arabia jiyajinia. Saniniuujia, nio pa quishacarini, Jerusalén tiacaari juhua Sinaí tuhuananu, cuno tiacajinia quiniaa pueya quiniuucua Moisés Rootasano tojijiaca. Cunora, Moisés Rootasanoori juhua nojori jitiania quiya, juhua poonijotesano seya nojori quiniuria. ²⁶ Saniniuujia, quiarinio Jerusalén tiacani, jiyocuacaanu Pueyaso racatasano pa quiquioranoni, cunoori seetanujuanaa Pueyaso muerasurano cutara. Cunoori maja Moisés Rootasano tojijiacara. Cuno tiacaari miriqui juhua Saara. Paacuajaari juhua Saara niquiohua cutarani. Majaari tari pa quiniu seru niquiohua. ²⁷ Tariucuacaanu Pueyaso sequesano cuajaari naa naajiotasano quiyajuhuj:

“Niyajaru maajiniaa, shuquiriaatia quia quiri. Quiaacua-jaari mueya noonu saniyashijia. Naajaa, majaari quia taraajenu. Quia shuquiriniutia quia jaaquequejore cutara. Quiaacuajaari cartesaaquiaari niyajaru quia quiniuucua. Naajaa, quiaacuajaari socua queraatia niquiohwaraca quiriquiano cuno niyacaraca maajijiniji”.

²⁸ Cuarta Pueyaso pueyanaa, paacuajaari juhua Isaacni. Na nucuarano Saara tiuuniucua Pueyaso sequesanoocua, taa na muetunutaniyani, naacuajiti nojuajaari neyanu Isaac raquiaari. Quiarijiani, paari naajuhuj. Jesucristo rupaacua pa tiuushacari, Pueyasoori na cumaacata pa jataniquiaari seetanujuanaa na muerasu pa quiniuria. ²⁹ Maninia nia niishiri nio pohuatasano, pueyanaa. Abraham jaara mueya paniquiaari, nojuajaari neco seru manajoquiaari tamajaaja. Saniniuujia, saniya necocujanaa jaara nera muetuquiaari, cunoori Pueyaso Sohuanu cumaacata rasaaquiaari cutara.

Na nuhuaji, seru niyanuuri Pueyaso Sohuanu cumaacata rasano miitiaja quiquiaari. Quiarijiaari naajuhuj, Pueyaso ruuretajaca pueyari Pueyaso Sohuanu jatanishano pueya miitiaquiaa. ³⁰ Quiarijia nia niishiri cutara, naa naajiotasaaquiaaricuaajaari tariucuacaanu Pueyaso sequesano Abraham:

“Quia niqiuocua seru quia taanuure neyanuta puetunujuaanaa. Cuno, janiya seetanujuaanaa quia sequequiaari niqutionuni, cunoori maja Agar niyanurano. Cunoori seetanujuaanaa quia niqiuocua muetusanorano, cua Sohuanu cumaacata rasano mueyaranotuhuj”.

³¹ Paari naajuhuj, cuarta Pueyaso pueyanaa. Paari maja seru niqiuohuani. Paari Jiyaniijia niqiuohujanaa cutarani.

5

Saaja Jesucristoocua tiuujiaa pa quiri

¹ Jesucristo cusunucua pocuara, nojuajaari Pueyaso niqiuohuara pa jiyatequiaari, maja socua Moisés Rootasano tojjijiaa pa quiniuria. Naarate pueyanaa, jiyanohua nia cojuare tama nia cuaqueyajaaja saaja Jesucristoocua nia tiuuniuria, Pueyaso jiyanooshano pueya nia quishacari tari. Majaari supuetanaa rootasano tojjijiacara nia quiniuhua. ¿Moisés Rootasano tojjijiacateeri jiyanooshaanutaniya? ¡Maja! Maja pa naata tama pa cuaqueyajaaja jiyanootiniu Pueyaso, Moisés Rootasano pa tojjiniucua. ² Cua tojjitiare pueyanaa. Janiyari Pablóni. Janiyajanaari seetanujuaanaa nia sequeyani, niaacuajaari Jesucristoocua tiuujiaa, Gálata jiyajinia quiniaa pueyanaa. Cunora, Pueyasoori nia jiyatequiaari na muerasu nia quiniuria. ¿Niaateeri jiyaniya niaa seetanujuaanaa Pueyaso pueyara quiniutianiya cutara, nia cararaatiuuquia co miatejosaanuucua? ¡Maja! Niaa jaara naa niishiriojiya, niaari Jesucristo cusunu jiyatenutaniya najuhuana na quiniuria nijaniyara. ¡Pueyanaa, majaari nia tojjiniu cuno Judiocuaca, canapute nia shiniujiuquiaa nia cararaatiuuquia co miatejosaanuracuajani, seetanujuaanaa Pueyaso pueya nia quiniuria! ³ Janiyari socua sequenu paniya noo pojoririani, cararaatiuuquia co miatejonuujuacatej, nojori jiyaniniucua naa nojori miishacaritij, nojori cutaraari seetanujuaanaa Pueyaso muerasu. Cante naa miijiani, nojuaja cuara tojjiria puetunu Moisés Rootasanojuanaa. ¿Niaateeri jiyaniya nia naata puetunu Moisés Rootasanojuanaa tojjiniu, Pueyaso jiyanooniuria nijaniya? ¡Maja! ⁴ Naa tama nia cuaqueyajaaja nia jiyanootiniu panishacari Pueyasotej, Moisés Rootasano nia tojjiniucua, niaari Jesucristojiniji

carejerucuaa. Majaari Pueyaso naata maninia miiniu niajaniya socua, taa maninia na miiquiaacuaa na panishano muerasuni. ⁵ Pajaniya saniniuujia, paari Pueyaso Sohuanuraca cutarani, Jesucristoocua pa tiuuniuucua. Naacuajitij, paari niishiyani paari tojetaarucujanaa sesa miyashijiacara jiyatesaanutaniyani. ⁶ Quiarijiani, Jesucristo rupuesano pa quishacari nocua pa tiuuniuucua, paa jaara pa cararaatiuuquia co miatesano quirini, maja soj, naajaa. Cunoori najuhuanaj. Socua maninia cutaraari Jesuucua tiuuniu, Pueyaso panijiaca pa quiniuria, parta pueya pa paniniuriajuhuaj.

⁷ Cuarta Pueyaso pueyanaa, niaacuajaruhua Jesuucua tiuujia quiija seetanujuanaa. ¿Quiarijiaariuhuj, cante nia tarinitiriohuacuaa seetanu rupaacujanaa nia tiuyaquiniuriani? ⁸ Cuno pojori niishitiojosano Jesuucua tiuuniu nia tarinitianurani, cunoori maja Pueyaso niishitishano nojori. ⁹ Cunora, seetanujuanaari nio sequesano: “Shiitianiyojua jereeca mashaca jaara shoqueeca mashacajinia shushaare, cuno shiitianiyojuaari puetunu cuno mashacajanaa jereteja”. Naajaariuhuj, shiitianiyojua sesa niishitiojosanoori puetunujuanaa pa sesojuajuhuj. ¹⁰ Naajaa, janiyacuaajaari pa Jiyaniijiaacua tiuya seetanujuanaani, majaari nia tojiniu quiniutianiya tamaatia cuno pojori niishitiojosano. Saniniuujia, Pueyasoori noo pojori sanitiioriquiano, tamaatia na niishitiojonuusanota nia cushitiojoquiaani. Cante nia niishitiojiya sesani, jaara quiri cuarta Jesucristo jiyaramiquishano pueyano, tama janiyajaaja soj, naajaa, nojoriiri saniitiosaariquiano.

¹¹ Cuarta Pueyaso pueyanaa, majaari cua niishitiojonu quiquiaa taucuacajinijinio Jesucristoocua tiuujia, nojori miatejonura na cararaatiuuquia co, seetanujuanaa Pueyaso muerasu nojori quiniuria. Janiya jaara naa seetanujuanaa niishitiojoriquiaani, cuarta Judiocuaca maara naquiya cua miitiaaquiriquiani. Saniniuujia, Jesucristo cusonuucua niyacutesanojinia pocuara, paari saaja naacua jiyanooshaaquiaani. Naa cua niishitiojonuucuatej, Judiocuacaari jyanohua cua juaaquiaani. ¹² Majaari nojori nia tojiniu, nojori niishitiojosacari nia cararaatiuuquia co miatejosaanura. Maninia juhuari cuno miatejonuunu porocua jayosaanura nia tajiniji, maja socua nojori cushitiojonura niajaniya.

¹³ Cuarta Pueyaso pueyanaa, Pueyasocuaajaari nia sequesuaari na muerasuniyojua nia quiniuria, Neyanu Jesucristoocua nia tiuuniuucua. Naacuajitij, majaari tari nia quiniu juhua poonijjotesano pueya, taa nia quiquiaaricuaani

Moisés Rootasano nia tojishacari pueyaracaanu. Naa Moisés Rootasano tojjiaca nia quiyaquishacari taritij, naajaa, majaari nia jiyaniinu nia naata miiniu puetunu nia cuaqueya miiniu panishanojuanaa. Maja. Maninia cutaraari niarta Pueyaso pueyata nia cumaquitiojonura, seetanujuanaa nia panitioonuta. ¹⁴ Naa jaara naa miijiaca quiriquiatej, ni-aari puetunu Moisés Rootasanojuanaa tojiyacuaaja, taa na rootasanojinia naajiotasano quiyacuajani. Naa sequeyari: “Panijia quia quiriquia, taa quia paniyacuaa tama quia cuaqueyajaajani”.

¹⁵ Naarate pueyanaa, tama nia cuaqueyajaaja nia cojuare. Majaari pueyaracaanu nia juayonuujutanu, naatej, taa sareya sayonuujutaquiaacuaani. Naa jaara naa quiriquiatej, ni-aari socua puecootonutaniyaquij.

Taa quijiate tama na panishanojuaja miijia pueyanoni, Pueyaso Sohuanu tojijia pueyanonio

¹⁶ Janiya nia sequeya cutarani pueyanaa. Cua tojiri. Pueyaso Sohuanu tojjiaca nia quiri pueyaracaanu. Naacuajitij, majaari sacuaraatia tama nia panishanojuaja nia miiniu quiniutianiya. ¹⁷ Nio nia niishiri cutara. Cuno, poojiajinia sesa casaa pa panishanoni, cunoori Pueyaso Sohuanu paraca. Naajuhuj, Pueyaso Sohuanuuri poojiajinia sesa casaa pa panishano paracajuhuj. Naacuajitij, cuno pojori miaquetoosacari poojiajinia, cunora, majaari pa naata miiniu taa pa miiniu paniyacujani. ¹⁸ Saniniuujia, Pueyaso Sohuanu jaara nia cumaquiquiaacuaja saaja Pueyaso nia tojiniuria maninia, cunora, Moisés Rootasanoori tojiniu paniyaquishaanutaniya tari. Naacuajitij, niaacuajaari maninia miiniutianiya saa Pueyaso Sohuanutaja.

¹⁹ Maatia niquishanocuajaari taa pueya miiquiaani, noo pojori, canapuate tama na panishanojuaja miijiacani. Nojoriiri juhuajaniya na camishoo maajipohua numuetucunujuaca, sacuaraatia miitioojua narta canuutajaariuhuj. Maajipohuari naa sacuaraatia miitioojua narta maajipohuatajuhuaj. Pueyari saaja naa miiniuucua jiaatiajaca sacuaraatiatej. ²⁰ Naajuhuj, nojoriiri tama nojori pueyasorajaaja nojori shipinishano casaa secojonujuaca. Nojoriiri shimiicurijiuhuj, narta pueyano shimiojonujuaca. Narta pueyano niqiniu paniyashijiacaariuhuj. Nojoriiri juaatioojucajuhuj. Nojoriiri narta pueyano jii-tiasanoocua jiaatiajacajuhuj. Cunora, nojori niqiniu paniyaquijiaari. Nojoriiri maja na niishiniu rejetenu na juaaquiaca. Ritia juaajiacaari. Pueya nasojoua narta pueyanoocuarajaariuhuj. Naacuajitij,

nojoriiri narta pueya raquiriojotaquiaa narta pueyajiniji. Nojoriiri saaja tama nojori panishano pueyajaaja panijiaca, canapuete maninia miiquiaa nojoricuajani. ²¹ Cuno pojori, naa sacuaraatia miijiaca pueyaracaanu Pueyaso niquiarani, nojoriiri maja na niquniu paniniu quijia narta pueyano, cante taquiya maninia miishaaree nocuajicuaani. Nojoriiri sacuaraatia mashaasequenuujuacajuhuj. Nojori mashaasequenuusacari, puetunu sacuaraatia casaa miijioquiaajanaari. Jiyanohua miaquenu porocua. Nojori queranacusacari, nojoriiri socua tamaatia sesa casaa miiniu niishijiacajuhuj. Niajaniya saniniuujia cuarta Pueyaso pueyanaa, cua tojiri. Cante naa sacuaraatia casaa miijiojuani, nojuajaari maja Pueyaso jiitiasano na quiniu quiniutianiya, pueyaracaanu rishijia na quiniuria shuquiriaatia.

²² Saniniuujia, paa jaara Pueyaso Sohuanu shanacure poojiajinia na poonijionurani, nojuajaari parta pueya panijara pa jiyateja. Poojia jiyateya shuquiriaatia quijiaari. Poojia cajitijiaariuhuj. Jacaria pocuajara pa jiyateyajaariuhuj, juhuajaniya sashijiano. Pueyaso Sohuanuuri maninia pueyanora pa jiyatequiaa, jiyanoojiano. Pa sequesano miijia pa jiyatejajaariuhuj, pueya tiuuniuria pocua. ²³ Pueyaso Sohuanuuri pa jiyateja pueya shocoteyashijiarajuhuj. Pa niishitiquiaajaariuhua tama sesa casaa pa cuaqueya panishanojuaaja pa rejetenura. Paa jaara naa miijiaca quiriquia Pueyaso Sohuanu cumaacatani, majaari quenaaja niquiriyatu Moisés Rootasanojinijinio sesacanu quiniutianiya pajaniya. ²⁴ Seetanujuanaari, paa jaara Jesucristo pueyanora quiquiaarini, pa rupuesacari nojuaja, paari tari poojia sesoriquia seque cusojuaquiaari Cristotani, puetunu sesa pa jiaatianujuanaanio. ²⁵ Pueyaso Sohuanu jaara nia samiitianijioquiaari Pueyaso muerasu nia quiniuria, quiarjia seetanujuanaa pueyaracaanu na tojijia nia quiri cutara. ²⁶ Majaari tama pa cuaqueyajaaja pa jiyaniniu, paa socua maninia pueyano parta pueyajinijini. Paa jaara pueya shocotejaca quiriquiani, paari parta Pueyaso pueya juaatiniutianiyani. Maja maninia, paa jaara juaatishaareni tamonu jaara socua tojishano pueyano quiri pajaniyajiniji, naajuhuj, tamonu jaara socua maninia miishaare pajaniyajiniji. Majaari naa miijiaca nia quiniu Pueyaso pueyanaa. Saaja maninia quijia pa quiri cutara.

6

Niarta Pueyaso pueyata nia cumaquitioojoriquia

¹ Cuarta Pueyaso pueyanaa, niaa jaara parta Pueyaso pueyano niquiriquia sesa miyano, jacaria nia nacasure. Cuno nijaniyajinijinio canapuate Pueyaso Sohuanu niishitiajaraca cutarani, nojori cuaara jacaria na nacasuuranon, sesa miiniu na tarinitianuhuara. Cante cuno sesa miihia nacasuyani, nojuaja cuaara na nacasuura seetanujuanaa na paniniutia narta pueyano. Naajuhuj, jiyanohua nia cojuare tama nia cuaqueyajaaja Sesaaca mariqui nia saniniujiurijiaariuhuj, sesa nia miiniurijuhuj. ² Maninia cutaraari nia cumaquitiojonura niarta Pueyaso pueyata, niaa jaara taraatia miishaare. Naa pa cumaquishacari parta Pueyaso pueyatej, paari naa pa Jiyanihia Cristo rootasano pajaniyarano tohuateenutaniyani.

³ Najuhuana quijia jaara jiyaniya nojuaja cutara niishijia pueyano, pueya tojishano pueyanotuhuj, naa niishiriojoojaaari tama na cuaqueya sapojijajaacujua. ⁴ Puetunu nijaniyajanaa cumaati tama niishiriojoquiaajaacujua, taamueca pueyanote nijaniyani, maninia miihia, sesa miihia soj. Niaa jaara seetanujuanaa maninia miihiaca quiriquia, tama maninia nia miishanojuaja nia timitiare. Niarta Pueyaso pueyano jaara socua maninia miihia quiri nijaniyajiniji, socua sesa miihia soj, niaara, naajaa. Maja cunora taraajenu, maja cunora shuquiriaatia quiniujiuhuj. Saaja shuquiriaatia nia quiri, niaa jaara maninia miiquiaa taate nia naata miiniucujani. ⁵ Puetunu pajaniyajanaari tamaatia poonijosano jitiaani. Tama nijaniyajaaja cumaati na miiquiaa maninia, Pueyaso shuquiritianura nijaniya, seetanujuanaa shuquiriaatia nia quiniuria.

⁶ Canapuate Pueyaso rupaa niishitiojosaaquiaani, cuno pojori cuaara na niishitiojonaa niquitiojooara nojori casamijiniji saniniuujia, nojori niishitiojonaa jitianura nojori panishanojuhaj.

⁷ Pueyanaa, maja tama nia cuaqueyajaaja nia sapojonu nia jyanishacari niaari saniitioyaquishaanutaniya sesa nia miiniuucua. Majaari quenaaja tamonu pueyano na naata Pueyaso rerequetenu. Pueyasoori saniitiojua cutara. Naaratej, nio miriqui sequesano nia niishiri: "Casaa jajau pa natareeni, paari juhua cuno jajau senoonutaniyajaaniuhuj". Nio miriqui sequesanoori nio niishitiojija: cante maninia miihiani, nojuajaari maninia miishaanutaniyajaacuhuj. Naajuhuj, cante sesa miihiani, nojuajaari sesa miishaanutaniyajaacuhuj sesa na miiniuucua. Cunoori maja rimiajata. ⁸ Naacuajitij, canapuate tama na cuaqueyajaaja shuquiritijiaa sacuaraatia casaa na miishacari mijiriani, Pueyasoori

cuno pojori quejoonutaniya cutara, pueyaracaanu na saniitosocoriquiano. Saniniuujia, cante Pueyaso Sohuanu tojjiani, Pueyaso panishano na miiniuria puetunujuanaa, nojuajaari pueyaracaanu rishijiara jiyatesaanutaniya cutara. Nojuajaari shuquiriaatia quiniutianiya pueyaracaanu. ⁹ Cunora pueyanaa, niaa jaara maninia miijiaca quiri, majaari maninia miiniuria nia taajenu. Pueyaracaanu maninia miijiaca nia quiri. Niaacujaari niishiya, pueyano jaara na cuhuariquia natare, nojuajaari na sashijia. Majaari ritia na senoonu. Nio miriqui sequesanoori pa niishitiya, paa jaara Pueyaso Sohuanu tojjiniu tarinitiaaquirini, paa cuaara sashiirajuhuj. Na nuhuaji cutara paari jiyanohua shuquiriaatia quijiacara jiyatesaanutaniyani, maninia pa miiniuucua. ¹⁰ Naacujitij, jaara pa naata quiriquia, maninia pa miiriquia puetunu pueyajanaa. Saniya maninia cutaraari puetunu parta Pueyaso pueyajanaa pa miiniuria maninia.

Pablo nacasusacari pueya, quera na tucuatascari na naajio

¹¹ Nia niquiri cua naajio pueyanaa. Naa quera namijiaaca cua naajosacari niaacuaratej, nia niishiri janiyajanaari nio naajiya tama cua juaashiquiatajaajani. ¹² Socua cua tojiri pueyanaa. Cuno pojori, nia shiniujuquiaa nia cararaatiuuquia co nia miatejonurani, nojoriiri naa nia miitiniu paniya saaja narta Judiocuaca timitianura nojori. Nojoriiri narta Judiocuaca puerequiaa. Nojoriiri niishiya narta Judiocua-caari nojori miiniutianiya naquiya, miatesoo nia cararaatiuuquia co quiniuucua. Majaari nojori tiuuniu quiquiaa saaja Jesucristoocua, Pueyaso pueya nojori quiniuria. Cunora, nojoriiri jiyanohua paniya nia cararaatiuuquia co miate-sano pueya nia quiniurajuhuj, taa puetunu Judiocuacajanaacuaani. ¹³ Cuno pojori, canapute na cararaatiuuquia co miate-sanocuaani, nojorijianaari maja nojori tojjiniu quiquiaa puetunu Moisés Rootasanojuanaa. Naajaa, nojoriiri nia panitiaa nia cararaatiuuquia co miate-sano nia quiniurajuhuj. Niaa jaara miatejosaare, nojoriiri tama timiquionutaniyajaaja, nojori tojtiajaca nia quiniuucua. ¹⁴ Janiya saniniuujia, Pueyaso cuaara cojuaara janiya maja cua shuqiritianura tama cua miishanojuaja. Janiyari saaja pa Jiyaniijia Jesucristo shuqiritianu paniquiaani, pocuara na csonuucua niyacutesanojinia. Naacujitij, janiyari mijiria niishishanoocua jiaatiaashijiara jatanishaaquiarini. Mijiria casaari maja na naata shiniuuniu janiya, nocua cua jiaatianura socua. ¹⁵ Pueyanaa, pa cararaatiuuquia co

jaara miatesano quiri, naajaa. Naajuhuj, pa cararaatiu-uquia co jaara miatesoo quiri, naajaa. Majaari rimiajata pa quiniu Pueyaso niquiara cunora. Saaja panishano cutaraari, quiarinio pueyanora pa jatanishaanura Pueyaso Sohuanu cumaacata. ¹⁶ Puetunu nio sequesanoocua tiuujiacajanaani, Pueyasoori nojori jiuujia cajitiquiaa, na jiyanooshacari nojori. Cuno pojoriiri seetanujuanaa Pueyaso saquiriojosano pueya.

¹⁷ Tariucujaari cua rootasano nio naajioneejinia. Quiar-ijiani, tamonu cuaara socua cua taajeteyaquiiria sesa na niishitiojosanota nijaniya. Janiya cutaraari pa Jiyaniijia Jesucristojiniji niishitiojonani. Cua cuaqueyajinia nio majacuyashiquiajinijini, cunojiniji maatia niishishiyari, janiya seetanujuanaa Jesu seruni.

¹⁸ Cua panishano cuarta Pueyaso pueyanaa, nioojia cuaara jiiitaara pa Jiyaniijia Jesucristo cumaaca, na niishitiajanio. Cuaara naa quiiriatej.

PABLO NAAJIONEE ÉFESO TIACAJINIA QUINIAA PUEYASO PUEYACUARA

Pablo saruhuatasacari Jesucristo tojtiajaca

¹ ¿Niaate quiyajaa cuarta Pueyaso pueyanaa? Janiyari Pablóni, Jesucristo jiyaramiquishano na rupaa cua pohnuata-nura, taa na Que Pueyaso paniquiaaricuajani. Niaacuara naajiyaniija, canapue Pueyaso saquiriojoquiaari tama neracuajani, canapue te Jesucristo tojtianaacuajani. ² Pa Que Pueyaso, mariyata pa Jiyaniija Jesucristo cuara taraajeera niaacua, maninia na miiniuria nijaniya. Nojori cuara cajitiiria nioojia pueyaracaanujuhuj.

Taa Pueyaso miiquiaa pajaniyani Cristo rupuesano pa quishacari

³ Pa Jiyaniija Jesucristo Queeri Pueyaso. Nojuaja pa shuquiritiare. Neyanu Jesucristo pa rupuenuucua, Pueyasoori capora pajaniyara. Nojuajaari jiyanojua maninia miiquiaa pajaniya, puetunu jiyocuacaanu na jütiasano cumacatajanaa. ⁴ Pueyaso niishishacari taa Neyanu miiniutianiya pocuarani, jiya shipiniyaquishacariija, nojuajaari tari pa saquiriojoquiaari na shuriucua quijiaca pa quiniuria. Pa saquiriojoquiaarijiaariuhua na tojijiaca pa quiniuria, tojetaarucuajanaa sesa miyashijia pa quiniuriajuhuaj. ⁵ Panijia na quiniuucua, nojuajaari pa saquiriojoquiaari na muerasura na jiyatenura pajaniya, Jesucristo jaara maninia miiri pajaniyara. Pueyasoori naa miiquiaa pajaniyatej, taa tariucuacaanu na niishiriojoquiaari na miiniuria pajaniyacuajani. ⁶ Jiyanojua maninia na panishano Niyannuniojua miiniuucua pocuara, nojuajaari pueyaracaanu jiyanooquiaa pajaniya. Nojuajaari jiyanojua capora. Naa maninia na miiniuucua pajaniyatej, paari cunora pueyaracaanu na maniniuhuaqueetaquiaani. ⁷ Niyacutesanojinia Neyanu shootenuucua na nanaca pocuara, Pueyasoori pa jiyanooquiaari na muerasu pa quiniuria. Naaratej, majaari Pueyaso saniitionu quiniutianiya pajaniya. Puetunu sesa pa miishanojinijijianaa pa jiyanooquiaariiri. ⁸ Pueyasoori na paniniu niishitiquiaari pajaniya, na niqütiosacari na niishitijaja pajaniya, puetunu casaa niishijijianaa pa quiniuria. ⁹ Nojuajaari jiyanojua tariucuacaanu niishiriojoquiaari taa na miiniutianiya puetunu na shipinishanoocuarajanaani. Quiari naataja saniniuuja, nojuajaari jiyasohua na miiniu

panishano niishitiquiaari pajaniya. ¹⁰ Pueyanaa, nia niishiri casaa Pueyaso miiniutianiyani. Nojuajaari Cristo jiyatenu-taniya Jiyaniijijanaa na quiniuria. Naacujitij, puetunu jiyocuaaanu quijiacajanaa, mariyata puetunu mijiria quiji-acajanaari na tojijiacara quiniutianiya. Nojuajaari naa tohu-ateenutaniya tamacari, taa tamajaaja na niishiriojoquiaar-icujani.

¹¹ Pueyasoori tariucuacaanu pa saquiriojoquiaari Neyanutaja na cojiritianura pajaniya, maninia na miiniuria pajaniya. Pueyasajuanaari tariucuacaanu naa niishiriojoquiaari maninia na miiniuria pajaniya. Nojuajaari pueyaracaanu tohuateequiaa taa na miiniu paniquiaaricujani, niishijia na quiniucua. ¹² Nojuajaari pa saquiriojoquiaari maninia quijiacara na jataniniuria pajaniya. Cuarta Judiocuacajinijinio pueyani, canaari coteenujanaa Jesucristoocua tiuqujaarini. Naa jiyanohua maninia Pueyaso miiniucua canaa, nojuaja cuara maninihuaqueetasaaria jiyanohua. ¹³ Quiari naataja nia tojishacari Jesucristo rupaa, niaari cuno seetanu rupaacujanaa tiuqujaarijihuhaj, Pueyaso muerasura jatanishano nia quiniuria. Naa nocua nia tiuuniucuatej, Pueyasoori Neyanu nia rupuetequiaari. Na Sohuanu niqutioquiaari nijaniyajaariuhuj taa na sequequiaaricujani. Naacujaji niishishaaquiaari, niaari seetanujanaa Pueyaso muerasu. ¹⁴ Pueyaso Sohuanuraca pa quishacari, paacujajari niishiyani, paari puetunu Pueyaso sequesano Neyanuranोजनाa masenutaniya Neyanutajuhuj. Pueyaso Sohuanu pa jiiitasacari, paari niishiyani, Pueyasoori pa rijionutaniya puetunu na saquiriojosano pueyatajanaa, na muerasu pa quiniuria na shuriucua. Jiyacaritij, paari tojetaarucujanaa jatanishaanutaniya juhua Neyanu pa niquishaanurajuhuj. Cunora, Pueyasoori jiyanohua maninihuaqueetasano quiniutianiya, jiyanohua maninia na miiniucua pajaniya.

Taa Pablo secojoquiaari Pueyaso pueyacularani

¹⁵ Janiyari nijaniyajiniji tojiriucuaani, taa pa Jiyaniijia Jesuucua tiuujica nia quiyani, taa parta Pueyaso pueya panijica nia quiyajaaniuhuj. ¹⁶ Cunora, pueyaracaanu cua secojosacari niaacuara, majaari cua tarinitianu quiquiaa Pueyaso cua sequenura “paacarasho”, maninia na muerasu nia quiniucua. ¹⁷ Pa Jiyaniijia Jesucristo Queeri shacantushiqui quijia na cumaacajinia. Janiyari niaacuara na secojoquiaani, nojuaja niqutionura nijaniya jiyocua-caanuji niishitaja. Naacujaji nia naata niishiniu na niishitiniu panishano nijaniya, maninia nia niishiniuria no-

juajuhua. ¹⁸ Janiyari niaacuara secojoquiaajaaniuhua, Pueyaso cuaara cuhuataara nioojia, maninia nia niishiniuria casaara Pueyaso saquiriojoquiaari niajanianiyani, casaa na miiniutianiya niaarajaniuhua. Janiyari niaacuara secojoquiaajuhua, maninia nia niishiniuria taa Pueyaso muerasu jiyatesaanutaniya shacantuuca quijiaca nojori quiniuriani. ¹⁹ Janiyari secojoquiaajuhua, Pueyaso cuaara niishitiiria na cumaaca niajaniana, cuno, nioojiajinia poonijiyani. Na cumaacaari jiyanoehua, puequeyashijia. ²⁰ Pueyasocuaajaari cuno na cumaaca poonitijioquiaari Cristo quetejinia, nojuaja jaara na samiitiani quiaariuhua macujiniji. Jaara na samiitiani quiaari, cuno na cumaacata na cajitiquiaariiri Jiyaniijiajanaa cajitiujinia na miaquetajara jiyocuacaanu. ²¹ Tii na cajitiquiaariiri puetunu tamasa cumaacaraca quijiaca Jiyaniijiajanaa na quiniuria. Majaari tamonu socua cumaacaraca quijia quiniu pa Jiyaniijiajiniji. Nojuajaari puetunu tamasa jiyaniijianucujanaa Jiyaniijia. Puetunu mijiria quijiaca jiiiasanojuanaari na casaa. Nojuajaari puetunu casaajanaa camaru. Pueyaso jaara quiarinio jiya shipiniriohua, Jesucristoori jiyacari Jiyaniijiajanaa quiniutianiyajuhua, taa quiaritia na quiyacuajani. ²² Naacuajitij, Pueyasoori puetunu na shipinishanojuanaa jiyatequiaari Jesucristo jiiiasocoriquiano. Naajuhua, Pueyasoori Jesucristo jiyatequiaari na saquiriojosano pueya jiiitariquiano, canapuete nocua tiujujacacuajani. ²³ Pueyaso saquiriojosano pueyari juhua Jesucristo cuaqueya. Nojuajaari juhua poojia saniniuujia, pa jiiitiana na quishacari. Puetunu Pueyaso saquiriojosano pueyajanaa jaara Cristo cuaqueyainia rupuetesaare, Cristo cuaqueyari tucuateenutaniya seetanujanaa maninia jeeccanamitishano na quiniuria. Na cuaqueya pa quishacari, nojuajaari puetunu poojiajiniajanaa quiya. Naajuhua, nojuajaari puetunu tiquiyocuajanaa quijiajuhuanajaj.

2

Panijia Pueyaso quiniuucua, nojuajaari pa jiyanoquiaari

¹ Sesa miijiaca nia quiniuucua tarijia, Pueyaso tojiyashijiacajuhua, niaari macunucua quijia Pueyasora. ² Njaa jaara naa sesa miijiaca quiquiaaritij, niaari juhua puetunu mijiria quiniaa Pueyaso tojiyashijiacajanaa quiquiaari. Njaari samaruhua jiyaniijia tojiijaca quiquiaari, cuno, paratu piyarojosaqui quijiani. Nojuajaari Pueyaso tojiyashijiacashiniuujia, nojori miiniuria sesa, taa Sesaaca seque paniacuajani. ³ Tarijia, puetunu pajaniyajanaari Pueyaso tojiyashijiacaquiquiaarini. Paari tama pa miiniu panishano-

juaaja miijiaca quiquiaarini. Naacuajitij, paari puetunu pa cuaqueya miiniu panishanojuanaa miijiaca quiquiaarini, puetunu sacuaraatia pa niishiriojosanojuhuaj. Naa sesa miijiaca pa quiniuucatej, paari tojetaarucujanaa jiyanoehua Pueyaso saniitiosocoriquiano quiquiaari juucuaní, juhua tamasaajuhua. ⁴ Saniniuujia, Pueyasoori pocua tarajaaja cutara. Jiyanoehua pa paniquiaariiri. ⁵ Cunora, macunucua pa quishacarijia nera, sesa miijiaca pa quiniuucua, nojuajaari Jesucristota pa cojiritiaquiaari samiitianijionu. Jiyanoetio Pueyaso quiniuucua, nojuajaari nia jiyanooquiaari. ⁶ Naa na samiitianijionuucua pajaniya Cristoocua pa tiuuniuucatej, Pueyasoori tari pa tacanijioquiaari Cristota jiyocuacaanu, tii Cristo cajitianura pajaniya. ⁷ Naa Cristota na cojiritianuucua maninia miiniu pajaniyatej, cunoori jiyanoehua maninia! Nojuajaari naa pa miiquiaaritij, puetunu quiijiacajanaa nio pa quishacari nuhuaji niishinuria maatia, Pueyasoori jiyanoehua pa panijia. Maatia niishishaanutaniyari Pueyasoori tojetaarucujanaa jiyanoetio cutara, na jiyanooniuucua pajaniya, Neyanuucua pa tiuuniuucua. ⁸ Naa Pueyaso quiniuucua jiyanoetiotej, nojuajaari nia jiyanooquiaari saaja Jesuucua nia tiuushacari. Majaari tama nia miishanotajaaja Pueyaso nia jiyanoetini quiquiaari tama niajaniyajaaja. Pueyasोजनाacuajaari nia jiyanooquiaari niaacua na taraajenuucua. Naajuhua, nojuacuajaari nia tiutiquiaari Neyanuucua. ⁹ Majaari Pueyaso jiyanooniu quiquiaari pajaniya, maninia miijiaca pa quiniuucua. Paa jaara maninia pa miiniuucua Pueyaso jiyanoetiquiaari tama pa cuaqueyajaajani, paa maara tama pa cuaqueyajaaja timitiarení juhua najuhuaana pocuaaja. ¹⁰ Shushajanaa Jesucristoocua pa tiuushacari, Pueyasoori jiyacari pa jataniquiaari quiarinio pueyano pa quiniuria, maninia miijiaca pa quiniuria. Nojuacuajaari tari naa niishiriojoquiaari, maninia miijiacara na jataniniuria pajaniya.

Jesucristoori pa jiyateja jiyanoetioojuacara

¹¹ Éfeso tiacajinia quiniaa pueyanaa, quiarijia nia niishiriohua taa nia quiquiaari tariucuacaanuni, Pueyaso muerasu nia quiyaquishacarijia. Niaari cuarta Judiocuaca soosano taucuaca quiquiaari, nia cararaatiuuquia co miatesoo quiyaquiniuucua. Canaa cutaraari canaa cararaatiuuquia co miatesanoni. ¹² Nia niishirijiuhua, naa nia quishacaritij, niaari Cristoaju quiquiaari. Majaari nia naata rupeenu quiijia Pueyaso saquiriojosano Israel pueya. Puetunu Pueyaso sequesanojuanaa Israel pueyaranoni, cunoori maja niaarano quiquiaari. Majaari nia

niishiniu quiquiaari Pueyasoori pueyacuaaji Tacuriquiano jiyaronutaniya mijiria. Majaari quenaaja tamonu quiniu quiquiaari nocua nia tiuuniuria, Pueyaso na jiyanootiniuria niajaniya. Niaari saaja taraatia shaajeriquiano quiquiaari. ¿Cantucua niaacua taraajereni? Niaari seetanujuanaa tojetaarucujanaa Pueyasooju quiquiaari mijiria. ¹³ Tarijia, niaari seetanujuanaa tucuaaanu quijiaca quiquiaari Pueyasojiniji. Quiarijia saniniuujia, Jesucristo shootenuucua na nanaca niyacutesanojinia, niaari nata rupuetootesaaquiaari, nocua nia tiuushacari. Naacuajitij, niaari canaa rupuejacajuhuj. ¹⁴ Cristocuaajaari pa jiyanootiootequiaari. Moisés Rootasanoni, cunoori juhua jiyaconaja sohuaca quiquiaari pa tajinia, maja nia cojiniuria canaa, maja nia rupuenura canaajuhuj, taucuaca nia quiniuucua. Jesucristocuaajaari cunora tama na cuaqueyajaaja tarinitiaquiaari na mosaanura pa niti, cuno jiyaconaja sohuaca niyartasaanura, pa juaaquiaca tajiyatenura. Naacuajitij, nojuajaari pa jiyatequiaari juhua niquiriyatu queecuajinio supueno pueya, Judiocuaca, niajaniya taucuacanio. ¹⁵ Naa pa niti Jesucristo cusuucuatej, nojuajaari puetunu Moisés Rootasanojuanaa sanaajaquiaari, maja socua na sesacanura pajaniya. Tarijia, paari juhua caapiqui tiaca quiquiaarini. Paari pueyaracaanu paracaatioojua quiijani. Quiarijia saniniuujia, Jesucristo cusuucua, nojuajaari pa jiyanootiootequiaari jatiqui pa quiniuria juhua niquiriyatu tiaca, mariyata na rupuejaca pa quishacari. ¹⁶ Naaratej, janiyari socua camiya nia sequenuni. Cristo cusuucua niyacutesanojinia, nojuajaari Pueyaso jiyanootiquiaari pajaniya, na panishano muerasu pa quiniuria puetunujuanaa, niajaniya taucuaca, canaajuhuj. Naacuajitij, Jesucristoocua pa tiuushacari, paari juhua niquiriyatu tiaca nerani.

¹⁷ Niajaniya taucuacanaa, niaari juhua tucuaaanu quijiaca quiquiaari Pueyasojiniji. Canaa cutaraari juhua cateca quiijia nojuajinijini. Jesucristoori mijiria niquiaari, na niishitiniuria puetunu pajaniyajanaa taa Pueyaso jiyanooniu paniya pajaniyani. ¹⁸ Cristo jiyanootiniucua na Que Pueyaso pajaniya, naacuajitij, pa naata pa Que Pueyaso rupueno pa secojosacari nojuaja, mariyata na Sohuanuraca pa quishacari, niajaniya, canaajuhuj. ¹⁹ Jesuucua tiuujia nia quishacari quiarijia cua panishano pueyanaa, majaari tari nia quiniu tahue canaara. Majaari nia quiniu juhua tamonu tiacajinijinio ruconaa. Quiarijiani, niaari seetanujuanaa Pueyaso pueya cutara. Pueyasoori maninia nia jiitiaajuhuj, taa na jiitiaquiaa puetunu na saquirio-

josano pueyacuaani. ²⁰ Pueyaso pueya nia quiniuucua, ni-aari rupuetesano puetunu Pueyaso muerasutajanaa, juhua shanohua tia pa quiniuria Pueyaso quiquiora. Jesucristo jiyaramiquishano pueya na rupaa pohuatariquianoni, mariyata na sequenu panishano caminiujiunias pueyani, nojori-iri juhua cuno tia pacaariana. Saniniuujia, Jesucristoori juhua cuno tia morijuijanaa cutara, cuno tia nujuatana. ²¹ Pueyasoori naa saquiriojoquiaa Neyanuucua tiuuriquiano pueya, na quiquiorano na tucuatana. Cuno tia tucua-teesacari, tojetaarucuaajanaa maninia jeenucuasano quiniutianiya pa Jiyaniijaraari. ²² Niaari naajuhuj, Cristo nia rupuesacari, niarta Pueyaso pueya nia rupuesacarijuhuaj, Pueyasora, niaari juhua riana, tucurunio. Nojuajaari nia morojotaquiaa na tia na tucuatana, na Sohuanu quiquiorano.

3

Pabloori Pueyaso jiyaramiquishano taucuacaacia

¹ Jesucristojiniji cua pohuatanuucua niarta taucuaca, janiyari cunora nujuatesano quiya nujuatejojuajiniani. ² Nias naasucuaari niishiyacuaaja Pueyasoori cua jiyaramiquiquiaari Jesucristojiniji cua pohuatanura taucuaca, jiyanooshano nojori quiniuriajuhuaj. ³ Tariucuacaanu, majaari pueya niishiniu quijia, Pueyasoori taucuaca jiyanooniutianiyajuhuj, taa na jiyanooquiaacuaa Judiocuacani. Pueyasojuaanaacuaajaari naa jiyasohuaja na miiniu panishano cua niishitiquiaariti, taa shusha nio cua naajio coteejajinia cua pohuataa nijaniyacuaajani. ⁴ Nias jaara cua naajionee serojore, niaari jiyacari seetanujanaa niishiniutianiya, janiya cutaraari Jesucristo rupaa niishijiani. Naacuajiti, janiyari niishiyani taa jiyanohua maninia nia miishaanutaniyani nocua nia tiuushacari. ⁵ Tariucuacaanu, majaari quenaaja tamonu pueyano niishiniu quijia nio jiyasohuaja Pueyaso miiniu panishano. Quiari naataja saniniuujia, Pueyasoori na jiyaramiquishano pueya niishitiquiaari cuno, jiyasohuaja na miiniu panishano taucuacani. Na sequenu panishano caminiujiunia pueya na niishitiquiaarijuhuaj. Pueyaso Sohuanucuaajaari cuno canaa niishitiquiaari. ⁶ Nijaniya taucuacanaa, niocuajaari Pueyaso miiniu panishano jiyasohuaja nijaniya: Jesucristoocua nia tiuuniuucua, Pueyasoori puetunu Judiocuacarano na sequesanojuanaa jiyatenutaniya niaarajuhuj. Canaari Judiocuacani. Naajaa, Jesucristoocua nia tiuuniuucua, Pueyasoori canaa rupuetequiaa nijaniya, juhua niquiriyatu pueyano pa quiniuria nera. Naajuhuj, cunora, Pueyasoori nia

niqutioquiaa na Sohuanujuhuaj, taa na sequequiaari Neyanu Jesucristoocua tiujujacacuajani.

⁷ Janiyari Jesucristo ruuretaja quiquiaarini. Naajaa, jiyanohua cumaacaraca Pueyaso quiniuucua, nojuajaari cua jataniquiaari Neyanu Jesucristojiniji pohuatana cua quiniuria. ⁸ Jesucristo paraca cua quiniuucua tarijia, janiyara, janiya cuaara socua rerequetesano pueyano quiiria puetunu cuarta Pueyaso pueyajinijijianaa. Saniniuujia, jiyanohua jiyanootio Pueyaso quiniuucua, nojuajaari cua jiyanooquiaari. Cua jiyatequiaariiri seetanu rupaajanaa Neyanu Jesucristojiniji pohuatana cua quiniuria taucucara. Janiyari cunora Pueyaso shuquiritiaa jiyanohuani. Cristo jütiasano pajaniyaranoni, puetunu cuno casaajanaari pa niishishoojua. ⁹ Tariucuaaanu, Pueyasoori puetunu casaajanaa shipiniquiaari. Na shipiniyaquishacarijia, Pueyasoori tari niishiriojoquiaari casaa na miiniutianiya puetunu pajaniyarajanaani. Naajaa, tariucuaaanu, majaari na niishitini quiquiaari pueya. Nio pa quishacari saniniuujia, nojuajaari cua seerataquiaari puetunu pueyajanaa cua niishitiniuria jiyasohuaja na miiniu panishano. ¹⁰ Pueyasoori tariucuaaanu pajaniyara na niishiriojosano racataquiaari pueyaracaanu tama na niishitiajajiniajaaja. Saniniuujia, nio pa quishacarini, nojuajaari na niishitiquiaari. Quiarijiani, jiyanohua maninia Pueyaso miishacari puetunu na saquiriojosano pueyajanaa, puetunu jiyocuaaanu cumaacaraca quijiacajanaari niishiya, Pueyasoori seetanujuanaa jiyanohua niishijia cutara. Naacujitij, Pueyaso seya, Satanás, samarhuanio, nojoriiri tacuriitia shootiaquiaa pajaniya, Pueyaso miiniuucua maninia pajaniya, niishijia na quiniuucua. ¹¹ Quiari naataja, Pueyasoori tariucuaaanu na miishocoriquiano na niishiriojosano tohuateequiaari pa Jiyaniijia Jesucristo cusosacari niyacutesanojinia. ¹² Naacujitij, Jesucristoocua pa tiuuniuucua, pa naata juhuajaniya rupeenu na Que Pueyaso pa puereyaquiniutia. ¹³ Naa Pueyaso miiniuucua pajaniyaratej, majaari nioojia nia niquijotenu Pueyasoocuaijia nia puerenuta naquiya cua miishacari. Naa naquiya cua miishacari Jesucristojiniji cua pohuatanuucua nijaniyatej, shuquiriaatia nia quiri juhuari. Naa naquiya cua miishacaritij, cuno cuaara shiniujuuria nijaniya, socua pa Jiyaniijia tojijiacua nia quiniuria.

Pablo secojosano Éfeso tiacajinia quiniaa Pueyaso pueyacuara

¹⁴ Naa Pueyaso muerasu nia quiniuucujuhuaaj, janiyari mojuquetaquiaani pa Que Pueyaso cua secojonura ni-

aacuara. ¹⁵ Nojuacuajaari Que cutara. Puetunu queyajaanaari na sesaatiaacuaja. Nojuajaari puetunu parta Pueyaso muerasujanaa Que, mijiria quiniaa, tariucua jiyocuacaanu quiniaa Pueyaso muerasunio. ¹⁶ Naa nia Que na quiniuucujuhuaaj, janiyari niaacuara secojoquiaani, nojuaja cuara cumaquiiria jiyanoehua niajaniya na Sohuanuta nioojiajinia. Na Sohuanuuri puetunu pa panishanojuanaa jiiitiana. ¹⁷ Naajuhuaaj, niaacuara secojoquiaanijia, seetanujuanaa nia niishiniuria Jesucristojuanaacuajaari nioojiajinia quijia. Nojuajaari nioojiajinia quiya quiarinio pueyara na jataniniuria niajaniya, nocua tiuujia nia quishacari. Naacuajitij, niocua niishiri taa Jesucristo paniya jiyanoehua niajaniyani. Naacuajitij, majaari nioojia nia niquijiotenu quiniutianiya socua. ¹⁸ Naa Jesucristo paniniu nia niishishacari taritij, niaari puetunu Pueyaso pueyatajanaa niishiniutianiya taamuecate Cristo paniniuni. Naajuhuaaj, niaari seetanujuanaa niishiniutianiya tee na paniniu pueetaani. Jesucristo paniniu jaara shanacujusaatia quiri shanacujutajata, paa maara nocua puequeetejore najuhuanani. Seetanujuanaa, majaari pa naata shanacujununoj. Paa jaara na jamatu, na tucuanee, na queroni, na jiyaconaja shanacujunu paniriquiani, majaari na puequeeja pa riuriatanu quiniutianiya. ¹⁹ Seetanujuanaa, majaari pa naata niishiniu taa jiyanoehua na paniya pajaniyani. Naajaa, janiyari niaacuara secojoquiaa Pueyasoni, seetanujuanaa nioojiata nia niishiniuria cuno, na paniniuni. Naa jaara na paniniu niishiri, Pueyasojuanaari nioojiajinia quiniutianiya. Naacuajitij, niaari tojetaarucujanaa panijia quiniutianiya taa Pueyasocuaani.

²⁰ Naa Pueyaso miiniuucua maninatej, nojuaja cuara shuquiritiasaaria. Naa jiyanoehua na cumaacata na poonijiosacari poojiajinatej, nojuajaari na naata miiniu socua jiyanoehua queraatia pa masesanojiniji nojuaja, pa niishiriojosanojinijinio. ²¹ Puetunu quijiacajanaa cuara niishiiria Pueyasoori jiyanoehua maninia. Nojori cuara naa niishiiria nojori niquishacari Pueyaso jatanishano na saquiriojosano pueya, Jesucristo miishanonio. ¡Cuara naa shuquiritiasaaria pueyaracaanutej!

4

Pueyaso Sohuanu pa jiiitiasacari, paari rupuetootesano quijiani

¹ Janiyari niya nujuatesano quiyani pa Jiyaniijiajiniji cua poojotanuucua. Cunora, cua tojitiare. Janiyari nia sequeyani, saaja pa Jiyaniijia tojijia nia quiri, seetanujanaa maninia na muerasu nia quiniuria. Pueyasocujaari

nia saquiriojoquiaari naa maninia na muerasu nia quiniuria. ² Majaari niarta Pueyaso pueya rerequetajaca nia quiniu. Maninia miitiojuaca nia quiriquia. Puetunu casajaanaa rejeretajaca nia quirijihuaaj. Naa jiuujiaatiojuaca nia quiri nia panitioosacari. ³ Naa Pueyaso jiyanoootiootesacari nijaniyatej, pueyaracaanu nia jiyanoootioore, juhuaniania nioojia quiniuria juhua rupuetootesano. Pueyaracaanu naa nia miiri Pueyaso Sohuanu cumaquishacari nijaniya. ⁴ Naa quijiaca nia quiri pueyanaa, niquiriyatu cuaqueyaraca pa quishacari pa Jiyaniijara, mariyata niquiriyatu Sohuanuraca pa quishacarijihuaaj. Naa Jesucristoocua tiuujia pa quishacaritij, Pueyasoori puetunu pajaniyajanaa rijionutaniya, pueyaracaanu na shuriucua pa quiniuria. ⁵ Puetunu pajaniyajanaari niquiriyatu Jiyaniijaracani. Nojuajaari Jesucristo. Naajuhuaaj, puetunu pajaniyajanaari saaja Jesucristo rupaacua tiuujiacani, maja tamonu rupaacua. Naajuhuaaj, puetunu pajaniyajanaari moojinia tiuquinijosaaquiaarini, Jesucristo pa jiyatesacari pa Jiyaniijara. ⁶ Naajuhuaaj, saa niquiriyatujua Pueyasoori quiya. Nojuajaari puetunu Neyanuucua tiuujiacajaanaa Que. Nojuajaari puetunu na tojijiacajaanaa Jiyaniijia. Nojuajaari puetunu na pueyajanaa poonijioteya na panishano nojori miiniuria. Puetunu na muerasu jiuujiaajanaari na quiquio.

⁷ Saniniuujia pueyanaa, puetunu pajaniyacuaajaari tari jitiaa tamaatia poonijosano pa miiniuriani, teyano Cristo niqutionu paniquiaari pajaniyacujani. Naacujitij, puetunu pajaniyajanaari maja pa niishiniu miiniu saa niquiriyatu casaaja. ⁸ Tariucuacaanu Pueyaso Rupaa naajiotasanojiniji, paari niishiyani Pueyasoori na Sohuanu niqutionu paniquiaari na pueya. Cunora naa sequeya Jesucristojinijiiri:

“Na quioosano pueya tacataquiaariuhua jiyocuacaanuuri. Nareja na niqutionu panishano casaa serotaquiaari na pueyari”.

⁹ Jaara sequeya “tacaquiaariuhua”, cunojiniji paari niishiyani nojuaja jiyocuacaanuji rosequiaari coteenu, taraatia mijiria na mosaanura pocuara. ¹⁰ Nojuajani, jiyocuacaanuji rosequiaarini, nojuajaari tojetaarucujanaan jiyocuacaanu tacaquiaariuhua, Jiyaniijiajanaa na quiniuria na Que shuriucua. Tacaquiaariiri puetunu jiya cajiniocujanaan na mishininiuria na cumaacata, puetunu jiyajanaanio. Naacujitij, nojuajaari puetunu tiqiyocujanaan quijia. ¹¹ Nojuacuajaari noojiaqueya na saquiriojosano pueyajinijinio jiyatequiaari na jiyaramiquishano pueya nojori quiniuria. Saniniuujia, tamasaca jiyatequiaariiri Pueyaso sequenu panishano

caminiujiunias nojori quiniuria. Saniniuujia, tamasaca jiyatequiaariiri Jesucristo niishiyashijiaca niquiara poojotanaa nojori quiniuria, Pueyaso jiyanooniuria nojorijihuahaj, Jesucristo nojori tiuushacari. Tamasaca jiyatequiaariiri na tojtiajaca pueya jitianaa nojori quiniuria. Tamasaca jiyatequiaariiri na rupaa niishitiojonaa nojori quiniuria narta Pueyaso pueyara. ¹² Naacuajitij, Jesucristoori na Sohuanuta cumaquiquiaa cana na paniyani, puetunu tamaatia na miiniu panishanojuanaa nojori miiniuria. Naa na pueya cumaquiquiaa na Sohuanutaari na saquiriojosano pueya tiuuniuria nocua, nojori cumaquishaanurajuhaj. Naa Jesucristoocua tiuujia pueya canesacari socuatej, Jesucristo cuaqueyari canequiaa. ¹³ Jesucristora poonijionaa pueyari naa poonijioquiaatej, paa cuara tojetaarucujanaa pa Jiyaniijia tojijia quirijiaatijia, juhua rupuetootesano pa quiniuria. Cristo pueyari naa poonijioquiaa Pueyaso Sohuanu cumaacata, paa cuara seetanujuanaa Pueyaso Niyanu niishijiaca quirijiaatijia. Naacuajitij, paari tojetaarucujanaa jeenucuasano quiniutianiyani, seetanujuanaa juhua Jesucristo pa quiniuria. ¹⁴ Naacuajitij, majaari tari pa quiniu quiniutianiya juhua naatujua. Niaacuajaari niishiya naatujooriiri na niishiriojosano jatanijia ritia. Noojia niquijotejajaariuhaj. Naa juhua tariucua cumueeca mashaja pa quishacaritij, majaari quenaaja tamasaca naata sapojonu quiniutianiya pajaniya, tamaatia nojori niishitiojosanota. Cuno pojori naa tamaatia niishitiojonuujuaca tariucua pa niishishanojinijini, nojoriiri jiyanoohua sapojonu niishijiaca, nojori tojtiajaca na tashuquiootenura Pueyasojiniji. ¹⁵ Nocuaji pueyanaa, Pueyaso Rupaata pa cumaquitioojore seetanujuanaa pa panitioonuta, Cristo rupuejaca pa quiniuria socua. Nojuacuajaari juhua poojia. ¹⁶ Pueyanaa, niaacuajaari niishiya, puetunu pa cuaqueyajiniacuma casaa pa jitiisananojuanaari maninia rupuetootesano. Puetunu cunojuanaa jaara maninia poonijioquiaa jatiqui, paari maninia quiyani. Pueyaso muerasuuri juhua pa cuaqueya jitiisanano casaa. Naacuajitij, puetunu Pueyaso muerasujuanaa jaara tama na poonijosanojuaja miiquiaa maninia taa pa Jiyaniijia paniyacujani, pa Jiyaniijia cuaqueyari maninia canenutaniya, jatiqui rupuetesano pa quishacari, seetanujuanaa panitiojuaca pa quiniuria.

Cristoocua tiuujiaari quiarinio pueya

¹⁷ Jesucristo jiyaramiquishano pueyano cua quiniuucua, cua tojiri pueyanaa. Pueyaso saquiriojosano pueya nia

quishacari, maja socua nia quiniu taa Pueyaso niishiyashijiaca pueya quiyacuaani. Nojoriiri najuhuana quijiaca, najuhuana nojori niishiriojonuucua. Naajuhuj, nojoriiri tama na panishanojuaaja miijiaca, najuhuana casaacua nojori jiaatianuucua. ¹⁸ Nojoriiri naa quijiacatej, juhua ninishiqui nojori niishitiaja quiniuucua. Nojoriiri seetanujuanaa niishiyashijiaca, nojori tojiyaquiniuucua Pueyaso, juhua cumueeca jiuujiaraca nojori quishacari. Majaari nojori jiyatesaanu quiniutianiya Pueyaso muerasura, pueyaracaanu shuquiriaatia quijiaca nojori quiniuria. ¹⁹ Naa pueyaraacaanu sesa nojori miijionuucuatej, nojoriiri maja tari na niishiniu caririquiniu, sesa nojori miishacari. Nojoriiri puetunu tama na miiniu panishanojuaaja miijiaca. Nojoriiri puetunu sacuaraatia casaajanaa miiniuucua jiyartuucuno. ²⁰ Niajaniya saniniuujia, majaari naa nia niishitiojosaanu quiquiaari Cristojiniji, naa sacuaraatia miijiaca nia quiniuria. ²¹ Naa jaara Jesujiniji tojiquiaari, niaacuaajaari niishiquiaari na rupaari seetanu rupaajanaa cutara. Niaacuaajaari na rupaajiniji niishitiojosaaquiaari maninia miijiaca nia quiniuria, sesa nia miiniu nia tarinitianurajuhuj. ²² Pueyanaa, pa toque mocua jaara mocuaatia jaa-nure, paari ritia na jocuajani. Naa nia jatarejuhua sacuaraatia miiniu nia niishishano. Sesa nia miiniu panishanoori tama nia sapojoquiaarijaaja naa sesa miijiaca nia quiniuriatej. ²³ Quiarjia saniniuujia, sesa nia niishitiaja nia jatare, maninia niishitijaraca nia quiniuria, maninia jiuujiaracanio. ²⁴ Seetanujuanaa juhua quiarinio pueyano nia quiri, quiarinio jiuujiaraca, Pueyaso niquitiosano niajaniya. Naa quiarinio jiuujiaraca nia quishacaritij, seetanujuanaa juhua Pueyaso pueya nia quiriquia, maninia miijiaca, tojetaarucujanaa sesa miyashijiaca. Naa maninia nia quiniuni, cunoori seetanujuanaa Pueyaso Rupaa nia tojiniuucua.

²⁵ Naacuajitij pueyanaa, majaari socua cuaracashijionujuaca nia quiniu. Pueyaso pueya pa quishacari, puetunu pajaniyajanaari juhua pa Jiyaniijia cuaqueyani. Cunora, puetunu nia sequesanojuanaa niarta Pueyaso pueyano cuaara quiiria seetanujuanaa.

²⁶ Naa jaara juaatishaare, tama nia cuaqueyajaaja nia cojuare maja nia juaaniutia sesa nia miiniuria niarta pueyano. Naajuhuj, nia jaara juaari, majaari nia juaaquiaca nia ninitianu. ²⁷ Ritia nia jecatoore, Sesaaca mariqui sesa nia miitiriri nia jiyanoyaquishacari.

²⁸ Nio nia tojirijuhuj. Cante nohuasejojua quiyajaani, cuaara tarinitiaara nohuasejonu. Saniniuujia cuaara poonijoori tama na numatucuatajaaja cutara. Naacuajitij, nojuaja

na naata na jiitiasanojiniji nareja niqutionu tamasa, cante na panishano jiitiaaquiyani.

²⁹ Naajuhuj pueyanaa, majaari sacuaraatia casaa nia pocuanu quenaaja. Majaari cararaatia nia puenujutoonu-juhuj. Saaja maninia pocuajaca nia quiri cutara. Naacua-jitij, nia naata niarta Pueyaso pueya niishitiojonu. Nia naata nojori cumaquiniu. Nia naata nojori nacasunujuhuj. Naacua-jitij, nia naata nojori shiniujiuniu saaja Pueyaso tojjijaca nojori quiniuria. ³⁰ Majaari sesa miijiaca nia quiniu, niaa mariqui nioojiajinia quijia Pueyaso Sohuanu taraajoreeri. Pueyasocuaajaari juhua na sesa naajiotaquiaari poojiajinia na Sohuanuta. Naacua-jitij, na rijionu juuca pajaniya, nojuajaari niishiniutianiya paari na saquiriojosano pueyani.

³¹ Pueyanaa, majaari jiyano-yashijia nia quiniu. Seetanujanaa jiyanoojiaca nia quiri cutara. Majaari tamasa shanacunu niaacua, na nasojonura nijaniya. Majaari nia juayonuujutanu. Majaari nia juaaniutia nia nacajonu. Majaari niarta pueyano paracaajia nia quiniu, nia juaaniutia nia sesacanura nojuaja. Naacua-jitij, puetunu juaaniujianaa nia tarinitiare, puetunu sesa nia miiniujianaanio. ³² Saniniujia, maninia miitioojuaca nia quiri. Taraajetoojuaca nia quirijihuj. Naajuhuj, jiyanoootioojuaca nia quirijihuj, taa Pueyaso jiyanooquiaari pajaniyacuaani, Neyanuucua pa tiushacari.

5

Seetanujanaa juhua Pueyaso pueya nia quiri

¹ Pueyanaa, niaacuaajaari Pueyaso panishano muerasuniy-
oju. Cunora, pueyaracaanu juhua nojuaja nia quini-
uria nia saniniujiuri. ² Puetunu nia miishanojuanaa nia
miiri nia paniniutia, taa Jesucristo paniquiaari pajaniy-
acuaani. Jiyano-hua na paniniucua pajaniya, nojuajaari
tama na cuaqueyajaaja tarinitiaquiaari pa niti na mosaa-
nura. Naa na miiniucuatej, nojuajaari Pueyaso shuquiri-
tiquiaari jiyano-hua. Na miishanoori juhua shano-hua jaanu-
taja quiquiaari Pueyasora.

³ Pueyaso pueya maanujinijinio nia quiniucua, ma-
jaari nia camishoo maaji nia numuetucunu, maajishuriu,
casaanio. Cunoori jiyano-hua sacuaraatia Pueyasora. Ma-
jaari quenaaja jiyano sacuaraatia casaajiniji nia pocoo-
jonu. Naajuhuj, majaari tamasa jiitiasanoocua jiaatia-
jaca nia quiniu. ⁴ Majaari najuhuaana sacuaraatia pocua-
jaca nia quiniujiuhuj. Majaari najuhuaana nia niti nia
taquiriocuatenu juhua maninia pocuaja. Naajuhuj, ma-
jaari sacuaraatia puenujunuujuaca nia quiniu. Puetunu

cuno sesa pocuanujuanaari sesa Pueyaso pueyara. Saniya nia pocoojore cutara Pueyaso miishanojiniji, socua pueya maniniuhuaqueetanura Pueyaso. ⁵ Niaacuajaari tari niishiya, cante juhuajaniya na camishoo maajipohua numuetucujuani, maajishurihuanio, nojoriiri jiyanohua taraatia quiniutianiya. Pueyaso jiitiasano na tojjijaca pueyaroni, majaari na quiniu quiniutianiya naa miijijaca pueyara. Naa taraatia miishaanutaniyajaariuhua puetunu tamasaca jiitiasanoocua jiaatiajacajanaa. Pueyasora, jiyano pueyari jiyanohua sesa, juhua juaashiquiata shipinijosano pueyasohua seconuujuaca. ⁶ Naacuajitij pueyanaa, majaari nia shanacunu tamasaca sapojonura niajaniya na sequesacari naa sacuaraatia miishanoori maja sesa, sacuaraatia pocuanunio. Naa pueya miiniuucua sesatej, Pueyasocujaari juaatishaare. Tari saniitioya na tojiyashijiacaca pueyari. ⁷ Cunora pueyanaa, majaari quenaaja naa sacuaraatia miijiacaca nia cojinuu.

⁸ Pueyaso niishiyashijiacaca nia quishacarijia tarijia pueyanaa, niaari ninishiqui quijiacaca quiquiaari. Quiarjia saniniuujia, pa Jiyaniijia rupuejaca nia quishacari, Pueyasoori nia jiyatequiaari cuhuashiqui quijiacaca nia quiniuria. Cunora, seetanujuanaa maninia miijiacaca nia quiri, juhua cuhuashiqui quijiacaca. ⁹ Paa jaara seetanujuanaa cuhuashiqui quijiacaca quirini, paari maninia miijiacaca quiniutianiyanii. Naajuhuaaj, paari tojetaarucujanaa sesa miyashijiacaca quiniutianiyanii. Paari seetanujuanaa Pueyaso Rupaa tojjijiacaca quiniutianiyajuhuaaj. ¹⁰ Naajuhuaaj pueyanaa, niaa cumaati niishiya, ¿puetunu nia miishanojuanaate pa Jiyaniijia maniniucuasano, maja soj? ¹¹ Majaari ninishiqui quijiacaca nia cojinuu, nojori jaara sesa miya. Saniya nojori nia nacasure juhuari. Maninia nia miishanojiniji, nojoriiri niishiniutianiya nojori miishanoori tojetaarucujanaa sesa. ¹² Jiyasohua nojori miijosano sacuaraatiaari tojetaarucujanaa jiyanohua cararaatia. Puhuataaquishoo. ¹³ Saniniuujia, pa nacasusacari nojori Pueyaso Rupaata, paari nojori jiuujia cuhuataquiaani, nojori niishiniuria nojori miishanoori seetanujuanaa sesa. ¹⁴ Pueyaso Rupaacujaari nojori jiuujia cuhuataquiaa na cumaacata, cuhuashiqui quijiacaca nojori na jataniniuria. Cunora, naa naajiotasano quiyari tariucuaaanu Pueyaso Rupaajinia:

“¡Maqueyanonaa, quia niucuaare! ¡Macunucua tajiniji quia sanere, Pueyaso Jiyarosano cuhuatanura quiajaniya!”

¹⁵ Naacuajitij cua panishano pueyanaa, tama nia cuaqueyajaaja nia cojuare jiyanohua, seetanujuanaa maninia miijiacaca nia quiniuria. Majaari juhua niishiyashijiacaca nia quiniu

juhuajaniya. Seetanujuanaa niishijiaca nia quiri, maninia miijiaca nia quiniuria. ¹⁶ Nio pa quishacarini, sesa miiniuuri socua caneya puetunu juucajanaa. Majaari pa niishiniu taate tariqui quiniutianiyani. Naaratej, jaara pa naata quiriquia maninia pa miiniuria, maninia pa miiri puetunu juucajanaa. ¹⁷ Majaari moseeca nia quiniu. Maninia nia niishiri casaa pa Jiyaniijia paniya nia miiniuriani. ¹⁸ Naajuhuj, majaari nia mashaasequejonuunu. Niaa jaara mashaaseca quiriquia, majaari nia rejetenu quiniutianiya sesa nia miiniu panishacari. Saniya Pueyaso Sohuanu nia shanacure niaacua cutara, nioojia na mishininiuria na cumaacata, seetanujuanaa cumaacaraca nia quiniuria, shuquiriaatia quijiaca nia quiniuriajuhuaj. ¹⁹ Naa Pueyaso Sohuanuraca nia quishacaritij, tariucuacaanu Pueyaso Rupaajinia naajiotasanojiniji jaaquequejonu nia naminiujiutioore. Naajuhuj, quiari naataja Pueyaso Sohuanu niishitiojosano nia jaaquequejotoore. Nia jaaquequejosacari, pa Jiyaniijia nia shuquiritiare puetunu nioojitajanaa. ²⁰ Pueyaracaanu puetunu casaarajanaa pa Que Pueyaso nia sequere “paacarasho” pa Jiyaniijia Jesucristoocua tiuujia nia quiniuucua.

Taa quijia pa quiyani Pueyaso tojjia pa quishacari

²¹ Pueyanaa, maninia tojitiojuaca nia quiri, taa pa Jiyaniijia Cristo paniyacuajani. Nojuajaari pa Jiyaniijia cutara.

²² Maajipohuanaa, nia niyaca tojjia nia quiri, taa pa tojiquiaa pa Jiyaniijiacuaani. ²³ Nia niyacaari juhua nioojia quiya niaara, taa Jesucristo quiya na saquiriojosano pueya jiuujiacuaani. Nojuajaari pocuaji Tacuna, juhua na cuaqueya pa quiniuucua nera. ²⁴ Naacuajitij, taa Jesucristo saquiriojosano pueya na tojtiajaca quiyacuani, maajipohua cuaara naa pueyaracaanu neyaca tojtiajaca quiirijuhuj.

²⁵ Canuunaa, nia niquiocohua nia paniri taa Jesucristo na saquiriojosano pueyarano paniquiaaricuaa jiyano huani. Nojuajaari cunora tama na cuaqueyajaaja tarinitiaquiaari na mosaanura. ²⁶ Nojuajaari naa miiquiaariti seetanujuanaa nerano pa quiniuria. Tojetaarucujanaa maninia pa quiniuria, nojuajaari poojia jeequequiaa na rupaata, naatej, taa pa jeequequiaacuaa pa cuaqueyani. ²⁷ Paa jaara tojetaarucujanaa tari jeequejosano quirini, pa Jiyaniijiajanaari pa tiuquinitianutaniya tama nocuajaaja, tariucua jatanishano shacantuucara. Jiyacaritij, paari tojetaarucujanaa sesa miyashijia quiniutianiyani. Paari seetanujuanaa shanohua niquishano quiniutianiyani, juhua camishocoriquiano maniniushitishano niyacoo, tojetaarucujanaa jiyano hua cohuajaque toqueraca. ²⁸ Pueyanaa, taa nia paniyacuaa tama nia cuaqueyajaajani, naa nia paniri nia

niquiocuajuhua. Cante necocua panijiani, nojuajaari juhua tama na cuaqueyajaaja paniya. ²⁹ Majaari quenaaja tamonu pueyano quiniu tama na cuaqueya soojeajaaja. Paacuajaari maninia cojuaja pa cuaqueyani. Paari maninia na mianuutequiaani, naatej, taa Jesucristo cojuaquiaa na saquiriojosano pueyacuaani. ³⁰ Puetunu na saquiriojosano pueyajanaari juhua na cuaqueya nera. Paacuajaari na cuaqueyajinijioni. Naaratej, nojuajaari maninia pa cojuaquiaa. ³¹ Cunora naa naajiotasano quiyari tariucuacaanu Pueyaso Rupaaajinia. Naa sequeyari:

“Pueyano jaara camiri, nojuaja cuaara shiriquiiria na que, na nucua shuriucuaji, necocuata na quiniuria. Jaara camiri, nojoriiri juhua niquiriyatu cuaqueyaraca quiniutianiya”.

³² Pueyasajuanaacuajaari pa niishitiojoquiaari, pueyanoori juhua niquiriyatu cuaqueyaraca quijia jaara camiri necocuara. Cunoori miriqui pa niishitiojiya, puetunu Pueyaso saquiriojosano pueya maanujanaari juhua pa Jiyaniijia niquiorano quiya, juhua niquiriyatu cuaqueyaraca pa quiniuria nata. ³³ Pueyanaa, cunojuanaari cua pohuatasano pa Jiyaniijia cuaqueyajiniji. Saniniuujia, puetunu cuarta Pueyaso pueyanaa, nia niquiocua panijiaa nia quiri juhua tama nia cuaqueyajaaja. Naajuhua, puetunu maajipohuajanaa cuaara neyaca tojijiaa quiriia.

6

¹ Muerasunaa, pa Jiyaniijia tojijiaa nia quishacari, nia queya tojijiaa nia quirijihua. Naa jaara naa miiritij, cunoori jyanohua maninia Pueyasora. ² Tariucuacaanu Pueyaso Rootasanojiniji Moisésni, naa sequeyajaariuhua tamonu rootasano:

“Nia que tojijiaa nia quiri, nia nucuanio. ³ Naa nia miiritij, pueyaracaanu shuquiriaatia nia quiniuria, pueyaracaanu nia rishiniuria mijiria, niaa cuaara saaquianoshirijiaatija”.

Nio rootasanoori coteenujanaa rootasano tee Pueyaso sequeyacuaajani taa na tojitiajaca na miiniutianiya maniniani.

⁴ Niajaniya saniniuujia pueyanaa, majaari nia niquiohua nia juaatijionu najuhuanaj. Nojori nia canashitijiore maninia. Nia niishitiojore maniniajuhua. Nojori nia nacasurejuhua. Jaara nia tojitiaaquiri, na pishiniuria, nia majacuriquianoj nojori nia paniniutia, maja nia juaaniutia. Naa nia miiritij taa pa Jiyaniijia paniyacuajani.

⁵ Niajaniya poonitijosano pueyanaa, mijiria nia camaruhua tojitiajaca nia quiri. Majaari nojori nia rerequetenu. Puetunu nojori sequesanojuanaa niajaniya

nia miiri nia puerenuta, niaa mariqui saniitiosaareeri nojori sequesano nia miyaquiniuucua maninia. Nojori sequesano nia miiriquia maninia, juhua pa Jiyaniijia Jesucristora. ⁶ Majaari maninia nia poonijionu saaja nojori niqushacari niajaniya, nojori shuqiritianura niajaniya. Maninia nia poonijiore pueyaracaanu puetunu nioojiatajanaa, seetanujuanaa juhua Cristora. Niaa jaara naa maninia poonijionuujuaca quiriquiatej, niaari Pueyaso panishano miyajuhuj. ⁷ Puetunu nia poonijosanojuanaa nia poonijiore shitimia, juhua Pueyasora. Majaari nia miishano nia poonijionu nia taajenuta, juhua niarta pueyanora. ⁸ Niaacuaajaari tari niishiya, pa Jiyaniijia Jesucristoori puetunu pajaniyajanaa niqutionutaniya maninia pa miiniuucua mijiria, poonijiotetano pueya, camarnuju pueyano.

⁹ Niajanijajuhuj seya jiiitajacanaa, nio sequesano nia tojiri. Maninia nia jiiitiare nia poonitijosano pueya. Majaari na miananajonu. Nia niishirijihuj, niaari mariyata niquiriyatu Jiyaniijiaraca, niajaniya, nojorijihuj. Nojuajaari jiyocuaaanu quijia. Naaratej, tamonu pueyanoori maja rimiata nera, narta pueyanojiniji.

Taate pa naata Sesaaca nujuatanuni

¹⁰ Quiarjia cua panishano cuarta Pueyaso pueyanaa, seetanujuanaa pa Jiyaniijia rupuejaca nia quiri, jiyanojia cumueca nioojia quiniuria jiyanojia na cumaacata. ¹¹ Puetunu Pueyaso niqutiosano casaajanaa nia cushiyore juhua toqueya, Sesaaca sapojiaquiniuucuj niajaniya. ¹² Pueyaso pueya pa quishacari mijiria, majaari pa quiaquetoojonu quiquiaa pueyanota. Pa coopueeri maja pueya. Nojoriiri cumaacaraca quijia nia cajiniocua. Sesaacaari cuno na samaruhua jiyatequiaari jiyaniijianucua nojori quiniuria mijiria. Naacuajitij, nojoriiri cumaacaraca, ninishiqui quijia pueya nojori jiiitanura. Nojoriiri Pueyaso paraajuhuj. ¹³ Naaratej Pueyaso pueyanaa, puetunu Pueyaso niqutiojosanojuanaa nia paracata nia miaquetojojataqueya nia cushiyore. Naacuajitij, sesashiquiari niocua na nujuatare, Sesaaca saniniujiushacari niajaniya. Niaa jaara naa nioojia jeenucuare juhuacari nia puetunu Pueyaso casaatajanaatej, niaari nia paraa nujuatajaca quiniutianiya.

¹⁴ Pueyanaa, niaacuaajaari niishiya taa miaquetojojuate pueyani. Na miaquetoonu panishacari, nojoriiri shoquejiniji casaa na cajiniocua morotaja. Na turtuconee cushiyonuujaari, puetunu na jiriquiajanaa na mishiquiojonura cashicuaji. Naajuhuj, na sapatuhua cushiyonuujaariuhuj.

Na nareenee pootujuaari, nocuaji na nujutajara cashi. Naajuhuj, na naca na cojuatajara, cumoco casaa cushiyonuujaari. Na nijiniaquetucujaja mueruu pootujuaajaariuhuj.

Pueyaso pueya pa quishacari saniniuujia, tama nia cuaqueyajaaja nia jeenucuare Pueyaso casaata. Naacujitij, seetanujuanaa Pueyaso Rupaa niishijaca nia quiri maja nia sapojosaanura. Cunoori juhua pa cajiniocua camarucujua casaa saniniuujia. Pueyaracaanu maninia miijiacua nia quiri, nioojia nia cojuanura Sesaacaacuaji, nojuaja mariqui nia cararoreeri niaa jaara sesa miiri. Cunoori juhua nia turtuconee nia cushishano. ¹⁵ Pueyaracaanu jeenucuasano nia quiriquia juhua tariucua sapatu cushinio. Naa tariucua pueca nia quiriquia nia quianura, pueya nia pohuatanura Jesujiniji. Naa nia pohuataretej nojori niishiniuria Pueyasoori nojori jiyanooniu panijuhuj. ¹⁶ Naajuhuj, pueyaracaanu nia tiuuri Jesucristoocua. Naa Jesucristoocua nia tiuuniuni, cunoori juhua nia nareenee Sesaaca cashi nishitiumiacaca nia nujutajara niaacuaji. ¹⁷ Naa niishishacari niaacuajaari Pueyaso jiyanooshano pueya, cunoori seetanujuanaa juhua cumoco nia cushishano nacaque, maja nioojia nia niquijiotenura Pueyasooacuaji. Naajuhuj, Pueyaso Rupaa nia niishiri maninia. Cunocujajaari Pueyaso Sohuanu nijiniaquetucujaja mueruu, pueya jiuujiajinia na poonijionura. ¹⁸ Naajuhuj Pueyaso pueyanaa, majaari nia tarinitianu Pueyaso secojonuunu. Na Sohuanu cumaacata Pueyaso nia secojonuuriquia pueyaracaanu, naajuhuj, na Sohuanu niishitishacari nijaniya casaacuara nia secojonutaniyani. Majaari secojonu nia tarinitianu nia taajenuta. Juhua sutejaca pueyaracaanu nia secojonuuriquia puetunu niarta Pueyaso pueyacuaraanaa. ¹⁹ Naajuhuj, cucuara nia secojonuure, Pueyaso niquitionura janiya na niishitija, maninia cua pohuatanura Jesujiniji cua puereyaquiniutia. Cucuara nia secorejuhuj, maatia cua niishitiniuria pueya, Pueyasoori puetunu pueyanaa jiyanooniu panija saaja Jesucristoocua nojori tiushacari. ²⁰ Pueyasojuaanaari cua jiyatequiaari na jiyaramiquishano cua quiniuria, na niti cua pohuatanura na rupaa pueya niquiara. Janiyari cunora niya nujuatejojuajinia morotasano quiyani. Naaratej, cucuara nia secjore seetanujuanaa, Jesucristojiniji cua pohuatanura cua puereyaquiniutia.

Pablo pohuatasano Tíquicojiniji

²¹ Pa panishano Tíquicoacuajaari niaacua quianutaniya, puetunujuanaa na pohuatanura janiyajiniji, naajuhuj, casaa cua miyani. Nojuacuajaari shamaatia poonijiojua pa jiyaniijia. ²² Janiyacuajaari cunora niaacua na jiyaroyani,

nioojia nia cumanijianura canaajiniji nia tojishacari, taa canaa quiya niyani.

²³ Pa Que Pueyaso, mariyata pa Jiyaniijia Jesucristota, nojori cuaara cuniqui quiniaa parta Pueyaso pueya jiuujia cajitiiria, juhuajaniya nia quiniuria. Nojori cuaara nia jiyateera panitioojuacarajuhuj, seetanjuuanaa Jesucristoocua tiuujia nia quiniuriajuhuaj. ²⁴ Naajuhuj, Pueyaso cuaara puetunu pa Jiyaniijia panijiacajanaa cumaquiria na Sohuanuta, shuquiriaatia nojori quiniuria, cuno pojori, canapete seetanjuuanaa Jesucristo panijiacacuajani.

PABLO NAAJIONEE FILIPO TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pablóni. Janiyari Timoteota nia saruhuataani, Filipo tiacajinia quiniaa Pueyaso pueyanaa. Canaari Jesucristo poonitijosano pueyajuhuaaj. Canaari nio naajiyani puetunu Pueyaso jatanishano pueyacuarajanaa, nojori tiuuniucua Neyanu Jesucua. Canaari cuniqui nia jítianaa pueyacuara naajiyajuhuaaj, nia cumaquiniaa pueyacuaranio. ¿Niaate maninia quiyajaa pueyanaa? ² Pa Que Pueyaso, pa Jiyaniijia Jesucristonio, nojori cuara cumaquiiria niajaniya na Sohuanuta. Nojori cuara cajitiiria nioojiajuhuaaj.

Pablo secojosano, Filipo tiacajinia quiniaa Pueyaso pueyacuara

³ Pueyaracaanu cua niishiriojosacari niajaniya, janiyari pa Pueyaso sequequiaani “paacarasho”, maninia na muerasu nia quiniucua. ⁴ Cua secojosacari, janiyari pueyaracaanu puetunu niaacuarajanaa cua shuquiriniutia masequiaa Pueyasoni. ⁵ Niaa jaara shushajanaa Jesucristoocua tiuquiaari, niaari jiyacari coteequiaari cua naacunura, Jesucristojiniji cua poojotanura tamaquiicua. Quiarijiani, niaari naa cua naacuyajaaquij. Janiyari cunora nia timitiaani. ⁶ Majaari cua taacanuunu niaacuaji. Naatej, taa Pueyaso coteequiaari maninia na miiniuria nioojiajiniaacuaani, nojuajaari naa nia jeenucuanu tucuatanutaniya, Jesucristota pa naacuneetosacariuhua. ⁷ Majaari cua jiyajenenu naa cua taacanuyaquishacari niaacuaji. Janiyacuajaari tari naa niishiyani, jiyanohua cua paniniucua niajaniya. Naajuhuaaj, niaari cua cojiritiasaaquiaa cumaaca niquitiosaanujuhuaaj. Naacuajiti cua naata Jesucristojiniji pohuatanu niya nio nujuatejojuajinia, naajuhuaaj, janiya jaara jiyaniijianucua tacoji nequesoreesaareni. Naa Pueyaso cumaquishacari janiyatej, cua naata Pueyaso Rupaacuaji tacunu na cuaracashitijia. Pueyaso Rupaacuajiiri naa tacusano maatia, nojori niishiniuria, Jesucristoocua nojori tiushacari, Pueyasoori na naata nojori jiyanooniujuhuaaj. Naa nioojia rupuesacari cojiatej, cunoori jiyanohua cua shiniujiuquiaa Jesucristojiniji cua pohuatanura. ⁸ Pueyasocuajaari niishiya taa cua

paniya jiyano hua nia janiyani, Jesucristo paniniu cua jiiti-asacari coojiajinia. ⁹ Janiyari niaacuara secojoquiaa Pueyasoni, socua niishijiaca nia quiniuria, socua Pueyaso niishitiaja nia jiitianurajuhuaaj, seetanujuanaa maninia panitiojuaca nia quiniuria. ¹⁰ Naacuajitij, niaari niishiniutianiya teyano casaate seetanujuanaa maninia niaarani, saniniuujia, teyano casaate sesani. Naacuajitij, pa Jiyaniijia Cristo jaara tiuquiriohua, niaari seetanujuanaa maninia miijiaca quiniutianiya, tojetaarucujanaa sesa miyashijiaca. ¹¹ Naacuajitij, puetunu maninia nia miishanojuanaa Jesucristo cumaquishacari nia janiyani, cunoori juhua queraatia nia senoosano quiniutianiya, Pueyaso shuquiritiasaanura. Naacuajitij, maninia nia miiniuucua, pueyari Pueyaso timitianutianiya.

Pabloori saaja Jesucristora quiniu panijia

¹² Cuarta Pueyaso pueyanaa, majaari cucua nia taraanenu nujuatejojuajinia taraatia cua miishacari. Nio nia niishiri cutara: nujuatejojuajinia nujuatesocoriqiano cua quiasaanuucua, naquiya cua miishacarijuhuaaj, cunoori seetanujuanaa pueya naacuya Jesucristojiniji tojishaanura socua. ¹³ Naacuajitij, puetunu jiyaniijia César tiajinia quiniaa soldadohuajanaari niishiya, janiyari cumayocua casaata morotasano quiya niyani, Jesucristojiniji cua pahuatanuucua. Majaari saaja soldadohua niishiniu cuno, mariyata puetunu pueyajanaari na niishiyajuhuaaj. ¹⁴ Parta Pueyaso pueyari namitia niishiyajuhuaaj, janiyari cumayocua casaata morotasaarucuaani. Naacuajitij, cunoori quera puetunu nojorijianaa shiniujiuriucuaa Jesucristojiniji nojori pahuatanura na puereyaquiniutia, pa Jiyaniijiaacua nojori tiushacari socua.

¹⁵ Seetanujuanaa, noojiaqueya nojorijinijinioori Cristojiniji pahuatanuuquiaa socua tojishano pueya nojori quiniuria janiyajiniji, nojori shocotanura janiya. Janiyara, naajaa. Tamasaca saniniuujia, nojori cutaraari seetanujuanaa Cristojiniji pahuatanuuquiaa nojori shuquiritiniuria Pueyaso. ¹⁶ Nojoriiri naa pahuatanuuquiaaqui, Jesucristo panijiaacua nojori quiniuucua. Nojoricuajaaari niishiya, Pueyasojuanaacuajaaari niya cua niacanu, cua tacunura Jesucristo rupaacuaji. ¹⁷ Tamasacaari saniniuujia Jesucristojiniji pahuatanuuquiaacujua nojori shocotanu paniniutia janiya. Naa nojori miishacariitij, nojoriiri socua cua tacaatiniu paniya juucua. Majaari nojori pahuatanuunu quiquiaa seetanujuanaa nojori paniniutia pa Jiyaniijia Jesucristo. ¹⁸ Naa nojori pahuatanuusacari seetanujuanaa nojori paniyaquiniutia pa

Jiyaniijiatej, naajaa. Nojoricuajaari Jesucristojiniji pohu-
atanuuquiaa. Janiyari cunora shuquiriaatia quiyani.

¹⁹ Socua shuquiriniutianianijia cua niishishacari Pueyasoori puetunu cuno pojori miishanojuanaa jataniniutianiya quiria saa maniniaraja. Naa miiniutianiyari nia secojonuunuucua cucuara, naajuhuj, Jesucristo Sohuanu cumaquiniuucua janiya. ²⁰ Naacuajitij, janiyacujaari Pueyasocua tiuyani, nojuajaari cua cojuanutaniya maja cua cararoyaquishaanura janiya jaara nequesoreesaareni. Janiyari Pueyasocua tiuyajaaniuhua na cumaquiniuria janiya, cua puereyaquiniutia cua pohuatanura Jesucristojiniji puetunu pueya niquiarajanaa, taa cua miiquiaacuajani. Janiya jaara rishiriquiani, janiya jaara mosaariquiajuhuaj, naajaa, janiyari jiyanohua paniyani cua Jiyaniijia Jesucristo timitiasaanura. ²¹ Mijiria cua quishacarijia, janiyari saaja Jesucristora quiyani. Saniniuujia, janiya jaara mosaareni, cunoori socua maninia janiyara, na shuriucua cua quianura, nata cua quiniuria shuquiriaatia. ²² Naajaa, janiya jaara mijiria rishiriquiajani, cua naata socua poonijionu cua Jiyaniijia. Naacuajitij, quiarjia, majaari cua naata saquiriojonu; rishiniu, shaajenu soj. ²³ Naaratej, janiyari coojia niquijoteyajaani. Majaari cua niishiniu teyano cua saquiriojonutaniyani. Janiyara maara socua maninia quiri janiya jaara cusoqueeni, Cristo shuriucua cua quianura nata cua quiniuria. ²⁴ Saniniuujia, socua maniniaruhua mijiria cua rishiniuriaja, pa Jiyaniijiaacua cua shiniujiuniuria socua niajaniya. ²⁵ Naa cua niishiriojosacaritij, janiyacujaari tari seetanujuanaa niishiyani, janiyari juhuanojuaja mijiria niaata rishiniutianiyani. Naacuajitij, cua naata socua nia naacunu, socua pa Jiyaniijiaacua nia tiuuniuria. Cua naata nia naacunujuhuaj, socua shuquiriaatia quijiaca nia quiniuria nocua nia tiushacari. ²⁶ Naa cua rishishacari mijiriatej, janiyari niaacua quianutaniyani cua niquiniuria niajaniya. Naa cua quishacariuhua niaatatej, niaari Jesucristo timitianutaniya maninia na miiniuucua janiya.

²⁷ Pueyaso pueyanaa, nio nia sequenu panianijia, seetanujuanaa maninia miijiaca nia quiri taa Jesucristo rootaacuajani. Janiya jaara niaacua quiaareni, janiya jaara quiaaquiyarejuhuaj, naajaa. Saaja niajanijajiniji pohuataaariquiani, taa jiyanohua Jesucristo tojijiaca nia quiyajaani, jiyanohua panitiojuacajuahuaj. Naajuhuj, jatiqui Jesucristora nia poonijioteriquiani, na rupaa nia pohuatanuucua. ²⁸ Naajuhuj, Jesucristo Rupaa paraa puereyashijiacara nia jiyateriquiani. Nojori

piriyosacari niajaniya, majaari nojori puerenu quenaaja. Niaa jaara naa nojori puereyashijiaca quiriritij, nojoriiri cunojiniji niishiniutianiya, nojoriiri seetanujuanaa saniitiosocoriquiano taa nia pohanuquuaa nojori niqiaracuajani. Saniniuujia, Pueyaso cajitishacari nioojia, nojori miananajosacari puecoonu niajaniya, niaari cunojiniji niishiniutianiya, niaaqui Pueyaso rijiosocoriquiano cutara. Pueyasocuaajaari naa cumaquijia na pueyatej, puereyashijianucua nojori quiniuria. ²⁹ Pueyasocuaajaari nia tiutiquiaari Neyanuucua, na muerasu nia quiniuria. Naajuhuj, Neyanu rupuejaca nia quishacari quiarijia, Pueyasoori nia jiyatequiaari Neyanuucua nia naquiya nia miitishaanurajuhuj, taa Neyanu miiquiaari naquiya pocuaracuaani. ³⁰ Nia niishiri, janiya, niajanijuhuj, paari mariyata naquiya miiniu rejeretaquiaani, pa Jiyaniijara pa poonijosacari. Niaacuajaari tari niqiquiaari naquiya cua miiniu. Majaari cua tarinitianu quiquiaari Jesucristojiniji pohanu. Quiarijiani, niaari janiyajiniji tojiniutianijuhuj, taa cua tarinitiaaquiya Jesucristojiniji pohanuni, naajaa naquiya cua miishacari.

2

Juhua Cristo pa quirij, taa na quiquiaaricuaani

¹ Naacuajitij pueyanaa, naquiya nia miishacari, nia niishiri taa Cristo shiniujuquiaa pueyaracaanu niajanijani, maja nia tacaaniuria. Nia niishirijuhuj taa na paniniu cumanijiaquiaa niajanijani, naajuhuj, taa Pueyaso Sohuanu jiuujiaatiootequiaa niajanijani. Nia niishirijuhuj taa Cristo taraajequiaa jyanohua niaacuani. Naa panitioojuaca nia quirijuhuj. ² Jiuujiaatioojuaca nia quirijuhuj, seetanujuanaa panitioojuaca nia quishacari. Naajuhuj, nareja nia shanacure Pueyaso Sohuanu niaacua, nojuaja cuara puetunu niajanijanaa rupueeteera, jatiqiu nia poonijonura pa Jiyaniijara. Niaa jaara naa puetunu nio cua sequesanojuanaa miijia quiriritij, niaari tojetaarucujanaa shuquiriaatia quiijara cua jiyatenutianiya. ³ Maninia nia miishacari, majaari na miiniu juhua tamasa nia shocotanura, nia jyanishacari niaa naasucuaari socua maninia miijia tamasajiniji. Puetunu maninia nia miishanojuanaa nia miiri tamasa nia rerequeteyaquiniutia. Puetunu niarta Pueyaso pueyajanaa nia jiyatere juhua socua maninia miijia niajanijiniji. ⁴ Niaa jaara maninia miijia quiriqiuacuaa, majaari tama maninia miijiacajaaja nia quiniu. Niarta Pueyaso

pueyacua nia taraajerejuhuaj, maninia quijiaca nojori quiniuriajuhuaj.

⁵ Tama nia cuaqueyajaaja nia tarinitiare niarta pueyacua nia taraajesacari, taa Jesucristo tarinitiaquiaari tama na cuaqueyajaaja pocuaracuaani. ⁶ Nojuajaari naa miiquiaariti: tariucuacaanu, nojuacuajaari Pueyaso quijiajuhuanajaj, juhua na Que. Naajaa, nojuajaari maja na cuaqueya na jiyatenu quiquiaari seetanujuanaa juhua na Que Pueyaso na quiniuria. ⁷ Nojuajaari jiyanohua cumaacaraca Jiyaniijia na quiniu tarinitiaquiaari, juhua nareja poonijjotesano pueyano na quiniuria. Naaratej, mijiria rasaquiaariiri seetanujuanaa pueyano na quiniuria. ⁸ Naa pueyano na quishacari mijiriatej, nojuajaari juhua nareja pueyanora tama na cuaqueyajaaja jiyatequiaari. Pueyaracaanu na Que tojjia na quishacari, nojuajaari tama na cuaqueyajaaja tarinitiaquiaari na mosaanura. Seetanujuanaa cararaatia cusoquiaariiri niyacutesanojinia teetesano, juhua sesa miihia pueyano. ⁹ Naaratej, Pueyasoori seetanujuanaa Jiyaniijiarajanaa na jiyatequiaari puetunu jiyaniijianucujinijijianaa. Na sesojoquiaariijaariuhuj “Jesu”. Nioori sequeya “pocujaji Tacuna”. Majaari socua tamonu pocujaji tacuna quiniu mijiria, jiyocuacaanunio. ¹⁰ Puetunu pueyajanaari niishiniutianiya Jesuuri Jiyaniijiajanaa. Maja tamonu. Cunora, nocuara mojuquetaconutaniyari puetunu jiyocuacaanu quijiacajanaa, puetunu mijiria quijiacajanaajuhuj, puetunu jiya cariquimia quijiacajanaanio. ¹¹ Puetunu tamaatia rupaaca pocujacajanaari niishiniutianiya Jesucristoori Jiyaniijiajanaa cutara. Naa Pueyaso miiniuucua Neyanutej, puetunu nojorijianaari niishiniutianiya, Pueyasoori tojetaarucujanaa maninia miihia.

Pueyaso pueyari juhua ninishiqui cuhuataja mijiria

¹² Quiarijiani cua panishano cuarta Pueyaso pueyanaa, cua rootasano tojtiajaca nia quiri. Naatej, taa pueyaracaanu cua tojtiajaca nia quiquiaaricujani niaata cua quishacari, quiarijia socua cua tojtiajaca nia quiri, tucuacaanu cua quishacari niajanijajiniji. Naacuajitij, seetanujuanaa pa Jiyaniijia tojtiajaca nia quiri nia niishiniuria niaari seetanujuanaa Pueyaso pueya. Majaari na rupaa ruuretanu. Jiyanohua puereeta quiniutaniyari na tojiyashijianucuaru. ¹³ Pueyasojunaacuajaari nioojiajinia poonijioquiaa maninia nia miiniu paniniuria. Na cumaaca nia niqutioquiaaariuhuj maninia nia miiniuria nera nia panishano, taa na paniyacuajani.

14 Cunora, puetunu nera nia miishanojuanaa nia miiri shitimia, maja nia ririjotanuta. Majaari nocua juayonuujutanujuhuj. 15 Niaa jaara naa maninia miijiaca quiriritij, majaari Pueyaso niishiyashijiaca pueya naata quiniutianiya sesa na saquiriojotanura niaacuara. Naaratej, tojetaarucujanaa sesa miyashijiaca Pueyaso niquiohua nia quiri, mijiria sesa miijiaca pueya niquiara. Nojoriiri seetanujuanaa sacuaraatia, Pueyaso tojiyashijiaca. Cuno juhua ninishiqui quijiaca pueya tajinia nia quishacari, niaari juhua riya nojoriria, naatej, taa riya cuhuataquiaa ninishiquicuaani. 16 Pa samiitianijia rupaa Jesucristojiniji nia jiiťiasanoni, niaari cunota cuhuataquiaa mijiria quiniaa. Naa maninia Pueyaso pueya nia quiniuucuatej, Cristo jaara tiuquiriohua na rijionuhuaa pajaniya, janiyari jiyanhua nia timitianutaniyani. Janiyari naa nia timitianutaniya cua niishishacari puetunu cua poonijosanojuanaari maja najuhuana na quiniu quiquiaari. Naajuhuj, majaari najuhuana naquiya cua miiniu quiquiaarijuhuaj. 17 Niaacuajaari maninia miijiaca Pueyasocua tiuujia nia quiniuucua, Jesucristojiniji cua pohuatanuucua nijaniya. Cuno maninia nia miishanoni, cunoori juhua shanhua jaanutaja Pueyasora. Janiya jaara nacatasaare Jesucristojiniji cua pohuatanuucua nijaniyani, cua nanacaari shoonutaniya juhua Pueyasora niquitiosocoriquiano. Janiya jaara naa miishaareni, janiyari cua nanacata tucuatantaniya puetunu cua miishanojuanaa Pueyasorani. Janiya jaara naa miishaareni, janiyari seetanujuanaa shuquiriaatia quiniutaniyani. Janiyari puetunu nijaniyatajanaa jiyanhua timiniutaniyani. 18 Shuquiriaatia nia quirijuhuj, janiya jaara mosaareni, cua Jiyaniijia tojjia cua quiniuucua. Cua cojitiuri shuquiriniujuhuaj.

Pablo pohuatasano Timoteojiniji, Epafroditojinijinio

19 Janiyari niaacuaji tojinu paniyani taa nia quiyani, shuquiriaatia cua quiniuriahuj janiya jaara niaacuaji tojirini. Janiyari cunora Timoteo jiyaronutaniya niaacuani. Naacuajitij, cuniquiji na tacatesacariuhua, nojuajacua cua pohuatasuhua nijaniyajiniji saniniuujia. Janiyari cua Jiyaniijia Jesuucua tiyani na rishitiniuria janiya, nijaniyajiniji cua tojinuria. 20 Janiyari Timoteo jiyaronutaniya niaacuani. Saa nojuaja cutaraari seetanujuanaa niaacua tacaajia juhua janiyahuj, na naacunura nijaniya, maninia nia quiniuria. 21 Tamasacaari saniniuujia saaja tama nojori panishano casaacuajaaja tacaajia, maja Jesucristo casaacua.

²² Niaacuajaari tari na niishiya, taamuecate Timoteoni. Nojuajaari pueyaracaanu cuata poonijioquiaa juhua quiyanu, Jesucristojiniji mariyata canaa pohuatanura. ²³ Janiya jaara niishirini taa cua miishaanutaniyani, janiyari Timoteo jiyaronutaniya ritia niaacuani. ²⁴ Naajaa, janiyacujaari cua Jiyaniijaacua tiuyani cua cartesaanura niiquiji, niaacua cua quianura ritiajuhuaj.

²⁵ Cua sashishacari Timoteo cua jiyaronura niaacua, maniniacuajaruhua ritia cua jiyaronura niaacua Epafrodito, parta Pueyaso pueyano. Niaacuajaari nojuaja jiyarotaquiaari cumaneeca quiriano, nojuaja cumaquiniuria janiyajuhuj. Nojuajaari maninia cua naacuquiaa. Cuata miiquiaa naquiya jaarajaarijia Jesucristojiniji cua pohuatanura. ²⁶ Nojuajaari puetunu niajanijajanaa niquniuucua jiaatiaa. Na niishishacari niaari jiyanohua nocua tacaquioya nia niishiniuucua nojuaja cusosu quiquianu, cunora, nojuajaari ritia nia niquniuria tacaya. ²⁷ Seetanujuanaa nojuajaari cusosu quiquianu. Quera cusocanujuanaari. Pueyaso cutaraari nocua taraajecanu. Cucua taraajecanujaariuhuj, maja cua taraajenu jiyacatenura socua. ²⁸ Janiyari cunora ritia niaacua na jiyaroyani, nia shuquiriniuria nia niquishacari nojuaja niaacua tiuquiuhuano. Naa shuquiriaatia nia quishacariuhuatej, janiyari coojia cajitiniutianiyajaacuhuj. ²⁹ Niarta Pueyaso pueyano na quiniuucua, seetanujuanaa juhua nia tarajanu nia timitiarenoj, niaacua na tiuquishacariuhua. Puetunu jiyano pueyajanaa panijiaca nia quiri, noo pojori pa Jiyaniijara poonijionuujuacatej taa Epafroditocuaani. ³⁰ Nojuacuajaari quera shaajeyarucuaa Cristora na poonijosacari. Cocuaatia miijiocanujaariuhuj. Nojuajaari tama na cuaqueyajaaja tarinitiacanu, na naacunura janiya nia niti. Tucuacaanu nia quiniuucua janiyajiniji, majaari nia naata naacunu janiya.

3

Nio rootasano tojjiaca pa quiri cutara

¹ Quiarijia saniniuuja, cuarta Pueyaso pueyanaa, pa Jiyaniijia nia shuquiritiare, pocuaji Tacuna na quiniuucua. Janiyara, maja taajeta cua pacutenuhuara socua cua sequenura niajaninya tari cua sequesano niajaninya. Cunoori seetanujuanaa maninia niaara. ² Tama nia cuaqueyajaaja nia cojuare cuno sacuaatia niishitiojonuujuaca pueyacuaji, cuno pojoriicuaji, sesa miijiacani. Nojoriiri pueya cararaatiuuquia co miatejonuujuaca najuhuanaj, nojori jiyanishacari nojori

miatesano pueyari seetanujuanaa Pueyaso pueya. ³ Paa cutaraari seetanujuanaa Pueyaso pueyani, Pueyaso Sohuanu jiyatenuucua pajaniya Pueyaso tojijiaca pa quiniuria. Paari timiquiaajaaniuhuj Jesucristo rupuesano pa quishacari. Taa pa cararaatiuuquia casaa quiyani, naajaa. Jesucristoocua pa tiuushacari, paari seetanujuanaa Pueyaso pueyani. ⁴ Tamasaca jaara tama na cuaqueyajaaja jiyaniya nojuaja seetanujuanaa Pueyaso pueyano, maninia Judio pueyano na quiniuucua, janiya cutaraari nojori shocotaani. Janiyari tari naa jiyaniquiaarijiuhuj. ⁵ Naatej, janiya jaara rasaaquiaarini, ocho juuca jaara cua shocoquiaarini, cua cararaatiuuquia coori miatesaaquiaari. Janiyari naa miishaaquiaarini taa canaa rootasaaquiaari Moisés Rootasanojinijicujani, seetanujuanaa Judio pueyano cua quiniuria. Naajuhuj, janiyari Israel pueyanoni, cua supuetana Benjamín jinianuucujainio supueno pueyano. Na queeri quiquiaari Jacobo, Pueyaso saquiriojosano pueyano. Naa cua supuetanaa quiniuucua Pueyaso saquiriojosano pueyatej, janiyari naajuhuj, nojoriicujainio cua supuenucua. Naajuhuj, janiyari Hebreo rupaa pocujani taa cua supuetanaacuaani. Cua que, cua nucuaari mariyata Hebreo rupaa pocujaca quiquiaarijiuhuj. Mashaja cua quishacari, janiyari Fariseo pueyanora quiquiaarini. Cuarta Fariseocuacaari socua jiyanohua supuetana Moisés Rootasano tojijiaca puetunu cuarta Judiocuacajinijinojuanaa. ⁶ Jiyacaritij, janiyari cua niishitiojonaa tojijia quiquiaari jiyanohuani. Majaari cua taajenu quiquiaari nojori sequesano cua miiniuria. Naaratej, janiyari Jesucristo tojitiajaca miijia naquiyani, cua jyanishacari nojori naasucuaari Pueyaso paraa. Naajuhuj, maninia cua tojinuuucua Moisés Rootasano, janiyari sesacaso quiquiaarini Moisés Rootasano niishitiojonaara. ⁷ Puetunu nio cua sequesanojuanaani, janiyari jyanohua na timitiaquiaarini cua jyanishacari janiya naasucuaari naa seetanujuanaa Pueyaso pueyanoni. Quiarjia saniniuuja, Jesucristoocua cua tiuushacari, tarijia cua jyanishano maninia casaani, puetunu cuno casaajanaari quiarjia najuhuana janiyara. ⁸ Quiarjiani, janiyari socua cua Jyanijia Jesucristo niishiniuria jiaatiaa jyanohuani. Naaratej, puetunu tariucuaaanu cua timitiasano casaajanaari najuhuana janiyara quiarjia. Cristo pueyano cua quiniuucua, janiyari juhua taanusaaquiaari puetunu cuarta Judiocuacajinijianaani. Naa Cristo tojijiaara cua quiniuucuatej, cua shipinijiniiji cua casaarano maseyaquiquiaarinijia. Naajaa, puetunu cuno

casaajanaari juhua rucucua quiya janiyara. Janiyari seetanujuanaa saaja cua Jiyaniijia Jesucristo niishiniu paniya socuani, nata rupuetootesano cua quiniuria seetanujuanaa. ⁹ Majaari cua jiyaniniu janiya sesa miyashijiani, Moisés Rootasano cua tojiniuucua. Saniniuujia, Jesucristoocua cua tiushacari, Pueyasoori puetunu sesa cua miishanojuanaa tuujuquiaa. Cua niishishacari Jesucristoori mosaaquiaari cua niti, Pueyasoori cua jiyanooquiaari, maja na sesacanura janiya, Neyanuucua cua tiuuniuucua. ¹⁰ Janiyari Jesucristo niishiniu paniya jiyanohua socuani, seetanujuanaa nata rupuetootesano cua quiniuria. Janiyari na samiitianitija cumaaca paniyajaanihuaj, coojiajinia na poonijionura, seetanujuanaa quiarinio pueyanora cua jatanishaanura juhua Cristora. Nojuajaari jiyanohua taraatia miishaaquiaari mijiria na quishacari, na Que tojijia na quiniuucua. Janiya cuaara naa miishaariajuhuaj cua tojiniuucua nojuaja, juhua nojuaja cua quiniuria. Tama nojuajaarijia na cuaqueya tarinitiaquiaari na mosaanura. Naajuhuj, tama janiyajaarijia cua cuaqueya tarinitiaja quiniu paniyani, cua miiniuria puetunu cua Jiyaniijia sequesanojuanaa janiya. ¹¹ Janiyari tojetaarucuajanaa maninia miijia quiniuucua jiaatiaquiaani, juhua quiarinio pueyano cua quiniuria, juhua tariucua macujinijinio samiitianishano pueyano.

Maninia pueya pa quirij, Pueyaso muerasu pa quishacari

¹² Juhuanajuaja majaari cua quiniu tojetaarucuajanaa maninia miijia. Sesa miiniu niishiyajaanijia. Jeecasoojuaanijia. Naajaa, majaari cua tacaani. Jesucristocua-jaari cua jiyatequiaari na pueyano cua quiniuria. Naaratej, janiyari jiyanohua saniniuujuuquiaani maninia na pueyano cua quiniuria. ¹³ Cua panishano cuarta Pueyaso muerasunaa, janiyari niishiyacuajani, juhuanajuaja maja maninia cua quiniu taa cua Jiyaniijia quiyacuaani. Naajaa, majaari cua tarininiu. Janiyari juhua ritia netena miiquiaani na shocotanura narta netecuatunaa pueya. Maninia netenaari na nijiniara niqiyashijia. Naajuhuj, majaari cua niishiriojonu maninia cua miishano tariucucuaa. Janiyari saaja cua tacoji niquiquiaani, socua maninia miijia cua quiniuria tari cua quiniujiniji. ¹⁴ Pueya tacuarishijosacari, netena jaara narta netecuatunaa shocotare, nojuajaari shanohua casaa niquitiosaaquiaa. Majaari najuhuana na netenu jiyanohua. Janiyaraari naajuhuj. Majaari najuhuana jiyanohua cua saniniuujuniu quiquiaa, maninia cua quiniuria juhua Cristojuhuj. Mijiria cua quiniu cua tucuatascari, Pueyasoori

cua jataniniutianiya juhua Cristo cua quiniuria, Cristoocua tiuujia cua quiniuucua.

¹⁵ Pueyanaa, niajaniya, cante seetanujuanaa Pueyaso tojjijaca quiyani, mariyata naa nia niishiriojore taa cua niishiriojiyacuaani. Naatej, jiyanojua nia saniniujiuri juhua Cristo nia quiniurijuhua. Cante tama na cuaqueyajaaja jiyaniya nojuaja tariucua tojetaarucujanaa sesa miyashijiani, Pueyaso cuaara na niishitiiria maninia. ¹⁶ Paa jaara maninia miiniu niishijiac quirini, majaari pa jiya-catenu saaja sesa miiniuucua. Saniya maninia miijiacara pa quiri socua.

¹⁷ Cuarta Pueyaso pueyanaa, maninia miijiacara nia quiri taa canaa nia niquiquiaari maninia miyanocuaani. Naajuhua, maninia miijiacara nia niquiri, cante maninia miiquiaani taa canaa niishitiquiaari niajanijacuaani, maninia canaa miishacari. Nojorijini nia niishiriquia, maninia nia miinuriujuhua. ¹⁸ Jesucristocuaaari pocuara cusoquiaari niyacutesanojinia teetesano, maninia miijiacara pa jatanishaanura. Saniniuujia, queraatia pueyari juhuajaniya miiquiaa sesa. Janiyacuajaari nojorijini pohuatanu pacutejoquiaari niajanijani, maja juhua nojori nia quiniuria. Quiarijia cua nujuquenuta, janiyari nia pohuatarohuanuhua jiyano sesa miijiacajini. Nojoriiri pa Jiyaniijia cusonu soojeaca. Nojoriiri maja na paniniu naquiya na miishaanura Cristo tojjijaca nojori quiniuucua. ¹⁹ Nojoriiri puetunu quejoosaanutaniyanaa mani quiquiojinia. Nojoriiri tama nojori panishanojuaaja jiyatecanu juhua nojori pueyasora. Naa sesa miijiacara nojori quishacaritij, majaari nojori niishiniu caririquiniu. Saaja sesa na miitiushano timitiatuuyari. Nojoriiri saaja mijiria casaacua jiaatijaca. ²⁰ Pajaniya saniniuujia, paa cutaraari tari jiyatesaaquiaari jiyocuacaanu quijiacaranoni. Paari cuniquiji pocuaji Tacuna niniuria sashiyani. Nojuacuajaari pa Jiyaniijia Jesucristo. ²¹ Jiyanojua nia cumaacata, nojuajaari pa cuaqueya seque jataniniutianiya, shacantuca quijia pa quiniuria juhua na cuaqueyajuhua. Nojuajaari cumaacaraca puetunu casaajanaa na tojitiniuria nojuaja. Naacujitij, nojuajaari na naata moqueja pa cuaqueya jataniniu, pueyaracaanu rishijiacara pa quiniuria.

4

Pueyaracaanu pa Jiyaniijia pa shuquiritiare

¹ Cunora, cua panishano cuarta Pueyaso pueyanaa, pueyaracaanu pa Jiyaniijia tojjijaca nia quiri. Janiyari jiyanojua nia niquiniuucua jiaatiaani. Nia niquiara cua pohuatanuucua Pueyaso rupaa, niaaquiiri seetanujuanaa

na tojjiaca quiquiaari. Naa jiyanoehua maninia Pueyaso muerasu nia quiniuucatej, cunoori jiyanoehua cua timitiquiaa.

² Janiyari Evodia sequeya cutarani, narta maaji Síntiquenio, nojori cuaara jiyanoetioora juhua seetanujuanaa Pueyasooeua tiuujiaca maajipohua. ³ Quiajaniya saniniuujia Sicigona, quiaacuajaari cuata poonijiojua jaarajaaja. Cunora, janiyari quia sequenu paniyani, cuno maajipohua quia jiyanoetiooterohua, nojori rupuetoonuhua. Cuno maajipohuacuajaari jaarajaaja cuata poonijionuuquiaari, Clementejuhuaj, pa Jiyaniijiajiniji cua pohuatasacari. Naa cuata poonijionuuquiaarijaariuhua tamasa, canapuee cuata quiquiaaricuajani. Nojori sesacacuajaari tari naajiotasano quia Pueyaso nequesoreetuneejinia, tee cuniqui pueyaraanu rishijiacarano sesaca naajiotasano quiyacuajani.

⁴ Cua panishano pueyanaa, pueyaracaanu pa Jiyaniijia nia timitiare. Nia sequerohuacuaraj, pueyaracaanu nia timiri. ⁵ Puetunu pueyajanaa cuaara niishiiria niaari seetanujuanaa maninia pueya, maja juaajiaca. Pa Jiyaniijiacuajaari quera tiuquihua.

⁶ Majaari quenaaja nia tacaaniu. Saniniuujia, nia tacaashacari, Pueyaso nia pohuatare puetunujuanaa, nia secojosacari nojuaja. Nia secojosacari, nojuaja nia masere nia panishano. Jiyacaritij, nojuaja nia sequerejuhuaj “paacarasho”. ⁷ Naa nia miishacaritij, Pueyaso nioojia cajitiniutianiya. Naa Pueyaso cajitiniuucua nioojiatej, majaari socua nioojiaca tacaaniu quiniutianiya, nia niishitiajanio. Naacuajitij, niocua juhuajaniya panaatia quiri Jesucristo cojishano nia quiniuucua. Naa Pueyaso miishano pajaniyani, cunoori jiyanoehua jiyajeneta. Nocuaji jiuujiatesano.

Saaja maninia casaacua niishiriojojuaca nia quiriquia

⁸ Naajuhua cuarta Pueyaso pueyanaa, nio tojjiaca nia quiriijuhua. Pueyaracaanu saaja seetanujuanaa rupaacua niishiriojojuaca nia quiriquia. Naajuhua, saaja rerequeteyaquishoo casaacua nia niishiriojore. Saaja maninia casaacua niishiriojonuujuaca nia quiri, maja cararaatia casaacua. Naajuhua, saaja Pueyaso shuquiritasano casaacua nia niishiriojore, maja Pueyaso sesacasano casaacua. Naacuajitij, puetunu maninia casaacuajanaa nia niishiriojore, casaajinijiti pueya naata Pueyaso shuquiritianuni.

⁹ Maninia nia miiriquia pueyaracaanu, taa cua niishitiojoquiaari niajanuacuajani. Niaacuajaari cua rootasano tojjiaciaari. Naajuhua, niaacuajaari cua niquijia taa miijia cua

quiquiaarini. Niaa jaara naa miijiaca quirijjuhuaj, poojia cajitinia Pueyasoori niaata quiniutianiyajuhuaaj.

Pablo pohuatasano, Filipino tiacajinia quiniaa Pueyaso pueya jiyaronuucua cumaneeca nera

¹⁰ Janiyari jiyanoehua cua Jiyaniijia timitiaani juhua shusha nia niishiniuquiohua janiya, cucua nia jiyaronuucua nia reratesano cumaneeca. Naa cua sequesacari niajanijatej, majaari nia jyaniniu janiya nia sequeyani niaari cua niyajetacanu. Maja. Janiyacuajaari niishiyani, majaari tarijia nia naata cua naacunu quijia nia cumaneecata, nia juuretasacari niaatucua canta cucua na jiyaroriquiani. ¹¹ Majaari naa cua sequenu niajanijatej cua panishano cua jiiitaaquiniuucua. Maja. Janiyacuajaari tari jiyartuunoni, juhuajaniya cua quiniuria cua jiiitiasanoniyojuata. ¹² Naajuhuaaj, janiyari niishiyani juhuajaniya cua quiniuria cua panishano cua jiiitaaquishacari. Naajuhuaaj, janiyari niishiyani taa quishanote puetunu cua panishanojuanaa cua jiiitiasacari. Janiyari tariucua saniniujiushanoni puetunu casaajanaa cua rejeretanura. Juhuaajaniya quiniu niishyanijia miaajaaraca cua quishacari, miaajeeju cua quishacarijuhuaj. Cua naata juhuajaniya quiniu casamiiju cua quishacarijuhuaj, maja saaja casamiriaca cua quishacari. ¹³ Cua naata rejeretanu puetunujuanaa, Cristo cumaquishacari janiya. ¹⁴ Naajaa, niaari maninia miiriucuaa nia cumaneeca nia jiyarosacari cucua, naquiya cua miishacari niya. Niaari niarta pueyanooocua taraajeja cutara.

¹⁵ Naajuhuaaj, Macedonia jiyajiniji cua quiasacari nia shuriucuaaji Filipino tiacajiniji, tamonu jiyacajinia cua pohuatanura Pueyaso rupaa, saaja niajaniya cutaraari cucua jiyanooquiaari. Cunoori quiquiaari shushajanaa Jesucristoocua tiuujia nia quishacari. Jiyacaritij, niaari nia reratesano cumaneeca jiyaroquiaari cucua, shuquiriaatia nia quishacari cua pohuatanuucua nia niquiara Jesucristojiniji. ¹⁶ Juhuanajuaja nia Macedonia jiyajinia cua quishacarijia, Tesalónica tiacajinia, niaari cucua pacutejoquiaari jiyaronu nia cumaneeca, cua panishano cua masetajara. ¹⁷ Majaari saaja cua paniniu pueyaracaanu nia niqutiojonura nia cumaneecajiniji janiya. Janiya cutaraari nia panitiaani capora pueya nia quiniuria. Naacuajitij, Pueyasoori saniniuujia socua queraatia nia niqutionutaniyacujua. ¹⁸ Epafroditocuaajaari puetunu nia jiyarosano cumaneecajanaa cucua tiuquitiaseecuaa. Janiyari cunota puetunu cua panishanojuanaa maserucuaa tarini. Cureyajaari nia jiyarosano cumaneecajiniji. Cuno cumaneeca cucua nia jiyarosani, cunoori juhua Pueyasora niquticosano casaa.

Nera, cunoori juhua shanohua jaanutaja catijiasano nocuara. Na shuquiritiriiri. ¹⁹ Naaratej, cua Jiyaniijia Pueyasoori puetunu nia jiiitaaquishoo casaajanaa nia niqutionutaniya. ¿Pueyasoteeri casamiijiu? ¡Maja! Nia rupuesacari Neyanu Jesucristo, puetunu na jiiitiasanojuanaari niaaranojuhuaj. ²⁰ ¡Pa Que Pueyasoori jiyanohua maninia! Saaja nojuaja pa shuquiritiare pueyaracaanu. Cuaara naa quiiriatej.

Nata quiniaata Pablo saruhuatasacari narta Pueyaso pueya

²¹ Quiria nia saruhuatare puetunu Jesucristo jiyanooshano pueyajanaa. Niya cuata quiniaa Pueyaso pueyari nia saruhuataajuhuj. ²² Naajuhuj, Jesucristoocua tiuujiaca jiyaniijia Césarra poonijionaa pueyari nia saruhuataajaacuhuj, puetunu niya Jesucristoocua tiuujiacajanaanio.

²³ Pa Jiyaniijia Jesucristo cuaara cumaquiiria puetunu nioojiajanaa. Tariucuaja pueyanaa.

PABLO NAAJIONEE COLOSA TIACAJINIA QUINIAA PUEYASO PUEYACUARA

Pablo Colosa tiacajinia Pueyaso pueya maanuucuaara naajioquiaari

¹ ¿Niaate quiyajaa, Colosa tiacajinia quiniaa cuarta Pueyaso pueyanaa? Janiyari Pabloni, Jesucristo jiyaramiquishano na rupaa pohuatariquiano taa na Que Pueyaso paniquiaaricuaajani. Pa tarajanu Timoteota naajiya nionijia. ² Niaacuara naajiyanijia, canapue Pueyaso saquiriojoquiaaricuaajani tama nerajaaja nia quiniuria. Niajaniyacuajaari maninia tiuuquiaa Pueyasooqua, Cristo rupuesano nia quishacari. Pa Que Pueyaso cuaara cumaquiiria niajaninya, shuquiriaatia nia quiniuria, juhuajaniya nioojia quiniuriajuhuaj.

Pablo secojosano Jesuucuaa tiuuniaa pueyacuara

³⁻⁴ Canaari pohuatasaaanuni taa nia tiuuquiaa Jesucristoocuaani, naajuhuaaj, taa nia paniya puetunu niarta Pueyaso muerasujuanaani. Naaratej, pueyaracaanu canaa secojosacari Pueyaso niaacuara, canaari na sequequiaani: “Paacarasho canaa Quenaa”. ⁵ Niaari naa maninia quiyatej, nia niishishacari Pueyasoori jiyanoehua maninia pa miiniutianiya na niqitiosacari pajaniya jiyocuacaanu na jiiti-asanojiniji. Niaacuajaari naa pohuatasaaquiaari tarijiatej, shushajanaa nia tojishacari seetanu Pueyaso rupaajanaa. ⁶ Cuno maninia rupaari puetunu jiyacajinijanaa paaqueyaree, mariyata taa na paaquecanucuaa na pohuatasacari nia tiacajiniacuaani. Pueyaso Rupaari maninia caneyaree queraatia pueya jiuujiajinia, mariyata taa na caneya nioojiacajiniacuaani. Naa caneyari nia niishishacari Pueyasoori seetanujanaa pa paniya, taa nia pohuatasaaquiaaricuaajani. ⁷ Pa panishano Epafrasri naa pohuataquiaari niajaniyatej. Nojuajaari Pueyasora poonijiona, juhua canaa. Nojuajaari canaa niti poonijioriquiaa niaara. ⁸ Nojuajaari canaa pohuatarucuaa niajanijini, naajuhuaaj taa Pueyaso Sohanu panitiooteya niajaniyani.

⁹ Naaratej, canaa jaara tojiquianu niajanijini, maajaari canaa tarinitianu quiriquiaa Pueyaso secojonu niaacuara. Canaari Pueyaso secojoquiaani, nojuaja cuara nia jataniiria niishijia nia quiniuria na Sohanu cumaacata. Canaari naa secojoquiaani, maninia nia niishiniuria taa Pueyaso paniya maninia nia quiniuriani, maninia nia

miiniuriajuhuaj. ¹⁰ Niaa jaara Pueyaso panishano niishijiaca quiri, naacujitij, niaari maninia quiniutianiya taa pa Jiyaniijia paniya na pueya quiniuriacuajani, nojuaja shuquiritia-nura niajaniya, pueyaracaanu maninia nia quishacari. Naaari puetunu maninia casaajanaa miiniutianiya. Naajuhuj, niaari socua maninia niishiniutianiya Pueyaso. ¹¹ Canaari Pueyaso secojoquiaa niaacuarajuhuj, Pueyaso cumaquiniuria niajaniya puetunu na cumaacatajanaa. Jiyanohua maniniaari na cumaaca, shuquiriaatia nia rejeretanura juhuajaniya puetunu casaajanaa. ¹² Canaari Pueyaso secojoquiaajuhuj niaa cuara pueyaracaanu sequeera nia shuquiriniutia “paacarasho”, pa Que Pueyaso miishanojiniji. Nojuacuajaari pa jataniquiaari maninia na muerasu pa quiniuria, puetunu na muerasutajanaa pa masenura na jiiitasanojiniji pajaniyara, cuhuashiqui quiquiojinia pa quishacari. ¹³ Pueyasoori ninishiquiji pa jayoquiaari, maja Sesaaca jiiitianura socua pajaniya. Pa jiyatereeri cuhuashiqui quijiaca pa quiniuria, Neyanuniyojua jiiitasano pa quiniuria maninia cutara. ¹⁴ Tama Neyanu cusonutajaaja pa jiyanoori-iri sesa pa miishanojiniji. Naacujitij, paari na pueyara jatanishaareeni.

Paari maninia quiya Pueyasotani, Cristo cusonuucua pa niti

¹⁵ Pueyasoori maja niquishano quijia. Cristo cutaraari niquishano. Nojuajaari mariyata juhua na Que Pueyaso. Nojuaja cutaraari coteenujanaa quiquiaari Pueyaso shipiniyaquishacarijia puetunu casaajanaa. ¹⁶ Na Que Pueyasoori na shipiniquiaari puetunu casaajanaa jiya cajiniocua, mijirianio; niquishano casaa, niquiyaquishoo casaanio. Naacujitij, Cristoori puetunu tamonu cumaacaraca quijiacajanaa shipiniquiaari tama nerajaaja. Nojori shipiniquiaariiri nojori jiiitianura nera jiyocuacaanu casaa, jiyocuacaanu quijiacanio, mariyata mijiria casaa, mijiria quijiacanio. Nojuajaari puetunujuanaa shipiniquiaari. Tama nerajaaja na shipiniquiaariiri. ¹⁷ Puetunu shipinishano casaajanaa jaara shipinishoojua quiquiaari, Cristo cutaraari tari quiquiaari. Nojuajaari puetunu na shipinishanojuanaa cojuuaa, maninia na quiniuria. ¹⁸ Cristoori Pueyaso muerasu Jiyaniijiajuhuaj, taa poojia quiya pa cuaqueya jiyaniijiacuaani. Puetunu Pueyaso muerasujanaari juhua Cristo cuaqueya quiya, pa miiniuria na panishano mijiria. Nojuajaari juhua poojia. Nojuajaari pa samiitianijia, juhua na cuaqueya pa quishacari. Nojuajaari coteenu samiitiaquiaariuhua macujiniji, juhua Pueyaso jiyapueranu na quiniuria. Naacujitij, Cristoori coteenu

quijia. Nojuajaari Jiyaniijajuhuanajaj. ¹⁹ Pueyasoori paniquiaari Neyanu Cristo jiitianura puetunu tama na cumaacajanaa, juhua nojuaja na quiniurijuhua. Naacuajitij, Cristoori maja rimiajata quenaaja na quiniu na Quejiniji. ²⁰ Naajuhua, Pueyasoori paniquiaari Cristo rupuetenuhuara nocua puetunu casaajanaa, maja socua tari juhua na paraa na quiniuria. Naaratej, Cristoori na Que Pueyaso jyanootiquiaari puetunu casaajanaa tama na cusonutajaaja niyacutesanojinia. Na Que rupuetequiaariuhua puetunu casaajanaari, jiyocuacaanu casaa, mijiria casaanio.

²¹ Tariija, niaari Pueyaso paraa quiquiaari, juhua taanusuano pueya Pueyasojiniji, sesa miijiaca nia quiniuucua. ²² Saniniuujia quiarijiani, Pueyasoori nia rupuetequiaariuhua nocua, Cristo cusonuucua pocuara, cuaqueyaraca na quishacari mijiria. Naacuajitij, Pueyasoori na naata nia tiuquininiu nocua, tojetaarucujanaa jeequesano nia quishacari sesa nia miishanojiniji. Majaari niaacuara tonujusaanu quiniutianiya quenaaja sesa nia miishanojiniji. Majaari quenaaja shiitianiyojua sesa nia quiniu quiniutianiya na niquiara. ²³ Niaari naa quiniutianiya maninia, niaa jaara cumaatia rupaquiaa Cristoocua, nocua nia tiushacari, nioojia nia niquijioteyaquiniutia. Majaari nia niishirionu Pueyaso naasucuaari maja na miiniu quiniutianiya puetunu na sequesanojuanaa niaara, taa nia tojiquiaaricujani. Nia tojishano Pueyaso rupaacuajaari tari pohuatasaacanu puetunu jiyacajiniajanaa. Janiya, Pabloni, janiyari na pohuatanu naacutaajaaniuhua.

Pablo Pueyaso pueya maanu cumaquiniara jiyate-saaquiaari

²⁴ Cristoori naquiya miishaquiaari pocuaji na tacunura. Juhua na cuaqueya pa quishacari, naquiya pa miiniu pa rejeretarejuhua na rupaa pa pohuatasacari, puetunu na saquiriojosano pueyajanaa tiuuniuria nocuajuhua. Naaratej, janiyari shuquiriaatia quiya niyani, naquiya cua miishacari niaacuara. Naa naquiya cua miishacari Cristojiniji cua pohuatanuucua tiquiyocuatej, janiyari Cristo naquiya miiniu tucuataa tama cua cuaqueyajiniajaajani. ²⁵ Pueyasocujaari cua jiyatequiaari na saquiriojosano pueya cua jiitianura, cua cumaquiniuria niajaniya puetunu na rupaatajanaa. ²⁶ Cuno rupaari saaja Pueyaso jiyasohua niishishano quiquiaari tariija. Majaari na pohuatanu quiquiaari supuetana pueya, tariucuacaanu quijiaca. Quiari naataja cutara, Pueyasoori jiyasohua na rupaa niishitiquiaari tama na saquiriojosano pueyarajaaja.

27 Pueyasoori pa niishitiniu paniquiaari taa jiyanoehua shacantuuca na cumaaca quiya niajaniiyarani, canapueete maja na saquiriojosano Judiocuaca quiquiaaricuajani. Niocuajaari jiyasohua Pueyaso miiniu panishano tarijia: ¡Cristoori nioojiajinia quiya! Nia jiiitiasacari Cristo, niaari niishiya niaari shacantuuca quijiara jatanishaanutaniyajuhaaj.

28 Naaratej, Cristocuajaari canaa pohuatasano. Canaari puetunu pueyajanaa nacasuquiaani. Canaari nojori niishitiojoquiaani puetunu canaa niishishanotajanaa, maninia Pueyaso muerasu nojori quiniuria, juhua tojetaarucuajanaa maninia canashitishano pueya, Cristo rupuesano nojori quishacari. 29 Naaratej, puetunu Cristo niquitiosano cumaacatajanaa jiyanoehua poonijioquiaanijia, na cumaquishacari janiya.

2

1 Pueyanaa, janiyari paniiyani nia niishiniuria taa jiyanoehua cua poonijioquiaa Pueyaso cua secojonuta niaacuarani, Pueyaso muerasuucua Laodicea tiacajiniajuhaaj, puetunu juhuanujuaja cua niquiyaquiniaa pueyacuarajanaano. 2 Jiyanoehua secojoquiaa niaacuaranijia, nioojiaca cumaquishaanura, nioojiaca rupuetoonura jatiqiijuhaaj, jiyanoehua nia panitioosacari. Naajuhaaj, secojoquiaanijia maninia niishijiacara nia quiniuria, maninia nia niishiniuria tariucuacaanu Pueyaso niishishano tamajaaja, taa Neyanu seera maninia na miiniutianiya pajaniyani. 3 Neyanu Cristocuajaari puetunu niishijiajanaa. Majaari tamonu niishijia quiniu juhua nojuaja. Jiyanoehua maninia miijia puetunu na niishishanotajanaari. 4 Janiyari nio sequeya niajaniiyani, tamonu mariqui nia sapojoreeri najuhuaana tamaatia na pohuatasanota. 5 Majaari cua quiniu quiquiaa niaata. Naajaa, cua sohuanuuri niaata quiquiaa. Nia shuquiritiaanijia, maninia jatiqui nia quishacari, mariyata seetanujuanaa maninia nia tiuushacari Cristoocua, maja jatasano nia quiniuria.

6 Niaacuajaari pa Jiyaniiija Jesucristo masequiaari, nia jiyaniiija na quiniuria. Naaratej, pueyaracaanu maninia nia rupuerenoj, maninia nia quiniuria mijiria na cumaacata. 7 Maninia nia rupuetooe Cristota, naatej, taa naana cumaatia nujuaacuaani, jaara tucamaaca nujuacaraca quiri. Naacuajitij, majaari nia naata jatasano quiniu, maninia nia tiuushacari nocua, taa nia niishitiojosaaquiaaricuajani. Cunora, pueyaracaanu nia sequeriquia Pueyaso: "Paacarasho canaa Quena".

Niaari quiarinio pueya, Cristo quishacari nioojiajinia

⁸ Tama nia cuaqueyajaaja nia cojuare, tamasaca mariqui nia sapojoreeri tamaatia nojori niishishanota najuhuanaj. Niaa jaara nojori niishitiojosano tojitiariquia, niaari juhua nojori quioosano pueya quiniutianiya. Nojori niishishanoori maja Cristojiniji. Nojori niishishanoori saaja mijiria niishishano, supuetanaa pohuatasano najuhuanajuhuj.

⁹ Nocujaji saaja Cristo nia tojiri. Tama Cristo cutarajaarjia puetunu Pueyaso cumaacajanaa jiitiaja, puetunu na niishitiajajanaanio. ¹⁰ Naajuhuj, niaari Pueyaso cumaaca jiitaa, na niishitiajanio, nia rupuesacari Cristo. Naacujitij, niaari puetunu nia panishanojuanaa jiitaa tari, maninia quijiaca nia quiniuria. Cristojuanaari Jiyaniijajanaa. Cristo jaara na jiyarore, puetunu tamonu cumaacaraca quijiacajanaari na tojitaa; jiyocuacaanu camarnu, mijiria camarnunio. ¹¹ Cristo nia rupuesacari, niaari seetanujuanaa jatanishaaree maja sesa nia quiniuria socua. Majaari nareja nia cararaatiuuquia co miatesaanu quiquiaari, taa Judiocuaca miiquiaacuaani. Nojoriiri miatesaaquiaa nojori niishiniuria nojori cuara quiria saa Pueyasoraja, maja sesa miijia nojori quiniuria socua. Cuno, miatenuni, majaari pueyano na jataniniu sesa na miiniujiniji. Cristo cutaraari sesa nioojia jataquiaari, seetanujuanaa sesa nia quiniu jatasaanura puetunujuanaa. ¹² Puetunu sesa nia quiniujianaari juhua jamosaaquiaari Cristota, niaa jaara moojinia tiuquinijiosaare. Nia tohuatasacariuhua, niaari juhua samiitianishaarohua Cristota, Pueyaso cumaacaacia nia tiushacari. Niaari samiitianishaarohua taa Pueyaso samiitianiquiaariuhua Cristocuaani. ¹³ Niaari juhua macu quiquiaari tarijia, sesa miijiaca nia quishacarijia, sesa jiuujiaraca nia quishacarijanio. Jiyacaritij, Pueyasoori nia samiitianiquiaari Cristota, na jiyanooshacari njajaniya puetunu sesa nia miishanojinijijianaa. ¹⁴ Pa tojiyaquishacari tariucuacaanu Pueyaso rootasano, paari puecoosocoriquiano quiquiaari juucuani. Sesa pa miishanoori juhua naajiotasano quiquiaari Pueyasora. Pueyaso cutaraari sesa pa miishano naajiotasano tuujuquiaari puetunujuanaa. Pueyasoori puetunu sesa pa miishanojuanaa tiutiaquiaari Cristoocua. Cristo teetesacari niyacutesanojinia, puetunu sesa pa miishanojuanaari cuniqui puequequiaari. Naa Cristo miishacari pocuaratej, majaari sesa pa miishano tiutiasaanu pocua. ¹⁵ Na cusosacari niyacutesanojinia, Cristoori puetunu tamasaca sesa cumaacaraca quijiacajanaa shocotaquiaari. Nojori cumaaca jaariutiareeri. Nojori rerequeterreeri, naatej,

taa quioosano pueya jaatucunuusaaquiaacuaani, pueya niqiuara macaatishocoriquiano.

Saaja Pueyaso casaacua nia jiaatiariquia

¹⁶ Naaratej, majaari nia tojiniu noo pojori, canapueete nia tojitiniu saniniujiya supuetana niishitiojosanocujani. Nojoriiri najuhuana niishitiojoquiaa casaa sumatuute puereshiyani, rusanonio. Nojoriiri niishitiojoquiaajuhua jeyano juucate poonijyaquishiyani, naajuhua j, Pueyaso niqiuara pa queranacunuunura raca macura. Nojoriiri naa niishitiojonuquiaa nojori jiyanihacari paa jaara naa miyaquirini, Pueyaso mariqui pa saniitioreeri. ¹⁷ Puetunu cuno supuetanaa niishitiojosanojuanaari tariucuacaanu quiquiaari, miriqui na niishitiojonura pueya taate seetanujuanaa quiniutianiyani Niriquiano jaara tiuquiri. Cuno Niriquianocujaaari Cristo. Tari tiuquiquiaariiri. Nojuajaari pocuaji Tacuna. Naaratej, majaari socua pa tojiniu cuno miriqui niishitiojosano. Quiarijia saaja Cristo pa tojiri cutara. ¹⁸ Tama nia cuaqueyajaaja nia cojuare, tamonu niishitiojonaa mariqui nia sapojoreeri, niaa mariqui Pueyaso niqutionu panishano nijaniya maseyaquiriiri. Nojoriiri tama na cuaqueyajaaja shuquiritiaquiaa na jiyanihacari nojori maja Pueyaso shocotaja na quiniu nojori secojosacari Pueyaso seya, maja Pueyasojuanaa. Nojoriiri tama na maquenujina na niquishanoocujaja tiuujiaa, maja Pueyaso rupaacua. Naacuajitij, nojori tiuushacari tama na niishiriojosanoocujaja, nojoriiri seetanujuanaa pueya shocotajaca quiya. ¹⁹ Nojoriiri maja na rupuenu Cristo, juhua poojia Cristo quishacari, na cuaqueya pa quishacarijuhuaj. Paa jaara maninia rupuetesano quiri poojiatani, poojiaari maninia maashitiya puetunu pa cuaqueyajanaa, paa jaara maninia rupuetoonu quiya puetunu pa nucuhuatajanaani, pa cusorohuatanio. Pueyasoori naa pa maashitiniu panijuhua j Cristota rupuetootesano pa quishacari.

²⁰ Niaari juhua tari cusoquiaari Cristota, maja socua juhua mijiria quijiaca nia quiniuria. ¿Macutucua taa supuetana rootasano tojirini? Maja na naata. ¿Niajanियariuhua j? ¿Casaara nia tojitiaajaa cuno tariucuacaanu rootasano ni? Niaari juhua nareja mijiria quiniaa quiyajaa, nia tojishacarijia cuno rootasano. ²¹ Supuetanaari naa piriyojoquiaaritij: “Maja pa quianu cuno. Maja pa miaquenu cunojuhuaj. Maja cuno pa cooniu”. Pa supuetanaari naa sequejatej. ²² Naajaa, puetunu cuno pueresano casaajanaari saaja shaajeja pa seecojinia. Majaari poojia na miiniu sesa. Cuno tariucuacaanu rootasanoori saaja tama pueya niishishanojuaja quiquiaari. ²³ Paa naasucuaari jiyaniyani cuno rootasanoori

maninia quiya Pueyaso shuquiritianura pajaniya socua. ¿Paatucua socua maninia pueya quirini paa jaara casaa sumatuu puerereni, naajuhuj, paa jaara naquiya miiri tama pa cuaqueyajaajani casaa pa puerenutani? Maja. Pa puere-sacari casaa, cunoori najuhuana Pueyasora. Cunoori maja na naacunu pajaniya sesa casaacua pa jiaatiaquiniuria.

3

¹ Niaa jaara samiitianishaaquiiaari Cristota, jiyocuacaanu Pueyaso jiitiasanoocua nia jiaatiare, tee Cristo cajiya na Que Pueyaso miaquetajaracuajani. ² Pueyaso casaacua nia niishiriojore saaja, maja mijiria casaacua. ³ Puetunu tarijia sesa nia quiniujianaari tari juhua jamosaaquiiaari, niaa jaara Cristo cusonu jiyatere tama nia nitijiaaja. Quiarijiani, niaari saminio quiya nia rupuesacari Pueyaso, Neyanu Cristota. Nojuacuajaari pa samiitianijia. Saniniuujia, juhuanajuaja maja niishishano taamueca quijiaca pa cuaqueya quiniutianiyani. ⁴ Cristo jaara muetarohua pocua mijiria, shacantuca cumaacaraca quijia na quishacari, jiyacaritij, paari jatanishaanutaniyani shacantuca cumaacaraca quijiaca pa quiniuria nata, juhua nojuajuhuj.

Maninia rootasano Pueyaso muerasura

⁵ Naaratej, nia cuaqueya cuaara quiiria juhua macu tama nia niquiarajaaja, nia cuaqueya nia ruuretanura na jiaati-asacari sesa miiniuucua. Naaratej, maja nia numuetucunu nia camishoo maaji. Maja sesa nia miiniu niarta canuuta, niarta maajitianio. Nia cartere puetunu sesa miiniuucua nia jiaatiasanojuanaa. Maja sesa casaacua nia jiaatianu. Maja puera casamiicua nia jiaatianu. Casaacua jiaatijaari juhua Pueyaso ruuretaja quiya, tama na jiitiasano casaacuajaaja na tiuushacari juhua Pueyasooacuaaja. ⁶ Pueyasoori jiyanoehua saniitionutaniya na tojiyashijiaca, canapuate naa sesa quiji-acacuajani. ⁷ Pueyaso tojiyashijiaca nia quishacari tarijia, niaari naa sesa miijiaca quiquiaari. ⁸ Quiarijiani, nia tarinitiare puetunu naa sesa nia quiniujianaa. Maja juaajia nia quiniu. Maja naseeca pueyano nia quiniu. Maja jiyanoehashijia nia quiniu. Maja sesa miijia nia quiniu. Maja pueya sesacaja nia quiniu. Maja sacuaraatia najuhuana nia niti taquiriocateja nia quiniu. ⁹ Maja nia cuaracashijiootonu. Niaari tari jatanishaaquiiaari tarijia sesa nia quiniujiniji, sesa jiuujiaraca nia quishacarijia, sesa miiniuucua jiiitnio nia quishacarijuhuaj. ¹⁰ Niaari quiarinio jiuujiaraca quijiaca tari. Quiarijiani, tama nia cuaqueyajaarijia tari jataa juhua nia Shipinia Pueyaso nia quiniuria, seetanujuanaa Pueyaso niishijia nia quiniuria.

¹¹ Pueyaso jatanishano pueya pa quishacari quiarijiani, majaanari tari rimiajata pa quiniu, paa jaara Judiocuaca quiyani, tamasaca pueyano; na cararaatiuuquia co miatesano pueya, miatesoo pueyano. Paa jaara tahue quiyani, juhua moco-cori, poonijotesano pueya, camarnuuju pueyano, naajaa. Cristo pa rupuesacari, puetunu pajaniyajanaari mariyata na muerasu quiyani. Nojuajaari puetunu poojiajinia quiyajuhaaj.

¹² Pueyasoori nia saquiriojoquiaari saa maniniaja nia quiniuria nera. Niajanijari na panishano muerasu. Naaratej, pueyacua taraajeja nia quiri. Maninia miijia nia quiri. Majaari nia jiyaniniu tama nia cuaqueyajaarijia socua maninia tamonujiniji. Maja juaajia nia quiniu. Jacaria pocuaja nia quiri. ¹³ Jacaria nacasutoojua nia quiri. Maninia nia jiyanoori cante sesa miirii niajanijani. Taa pa Jiyaniijia jiyanooquiaari pajaniyacuaani, naa nia jiyanoootioorejuhuaj.

¹⁴ Seetanujuanaa pueya panijaca nia quiri juhuaj. Cunoori socua jyanohua panishano. Panitioojuaca nia quishacari, puetunu nia miishanojuanaari jyanohua maninia quiniutianiya, jatiqui nia quiniurijahuaj.

¹⁵ Naajuhuaaj, Pueyaso nia shanacure nioojia na cajitiniuria pueyaracaanu. Nojuacuajaari nia saquiriojoquiaari juhuajaniya quijia nia quiniuria, maninia rupuetootesano. Pueyaso muerasu cuara jatiqui poonijionuujuaca quiri, naatej, taa pa cuaqueyajiniacuma casaa puetunujuanaa jatiqui quiyacuaani. Majaari nia juaatiojonu. Naajuhuaaj, Pueyaso nia shuquiritiare pueyaracaanu, puetunu maninia na miishanojinijianaa niaara.

¹⁶ Nioojia cuara quiri mishaja Cristo rupaata, jyanohua na tojijia nia quiniuria. Pueyaso Rupaa nia niishitiojotoore nia jaaquequejosanota. Naa nia cumaquitioojore puetunu Cristo niishishanotajanaa. Nia jaaquequejonu-ure Pueyaso Rupaa naajiosanojiniji, pueya naajiosanojiniji juhuaj, Pueyaso Sohuanu niishitiojosano niajanijano. Naa nia jaaquequejore Pueyasora, nia shuquiritianuta nojuaja.

¹⁷ Jesucristocuajaari nia Jiyaniijia quiya. Naacuaajitij, niaari na sesaanucua. Naaratej, nia sequesano, nia miishanojuhuaj, puetunu cunojuanaa cuara quiri maninia nera. Naa nia miiriquia pa Que Pueyaso nia sequenuta "paacarasho", Neyanu cumaquiniucua niajanija.

Maninia miijia pa quiri Pueyaso muerasu pa quishacari

¹⁸ Maajipohuanaa, nia niyaca tojitiajata nia quiri. Pa Jiyaniijiaacua tiuujia cumaati naa miiquiaaquij. ¹⁹ Pueyanaa, nia niquiocua nia paniri. Majaari na juaaniu. ²⁰ Mueraasapuenaa, nia queya tojijia nia

quiri, nia shuquiritiniuria pa Jiyaniijia. ²¹ Pueyanaa, maja nia juaatiniu nia niquiohua, nojori mariqui maninia miiniuucujaji pishiriiri, puera nia juaashacari nojori. ²² Poonitijosano pueyanaa, puetunu nia camarnu sequesanojuanaa nia tojiri. Maja na tojijia nia quiniu saaja na shootiasacari niajaniya, na shuquiritianura niajaniya. Majaari saaja na niquishacari nia poonijionu nia sapojonura nojuaja. Seetanujuanaa maninia nia poonijiore pueyaracaanu nia puerenuta saniya nia camarnujuanaa Pueyaso. ²³ Puetunu nia miishanojuanaa nia miiri shitimia, juhua pa Jiyaniijia Cristora. Naa nia miiritij, maja juhua nareja pueyara. ²⁴ Maja nia niyajetanu, pa Jiyaniijaari nia niqutionutaniya jiyocuacaanu niaara na jiitiasanojiniji. Mijiria camarnura nia poonijosacari, niaa cutaraari Cristora poonijiya. Nojuacuajaari nia camarnujuanaa. ²⁵ Pueyasoori sesa miijia saniitionutaniya cutara, sesa nojori miishanojiniji. Pueyasoori maja rimiajata saniniuujujia. Mijiria camarucua, poonitijosano pueyano, naajaa, nojoriiri maja rimiajata Pueyasora.

4

¹ Camarucuaana, pueyaracaanu maninia nia miiriquia nia poonitijosano pueya. Majaari nojori nia miiniu sesa. Maja nia niyajetanu, niaari jiyocuacaanu Camarnuracajuhuj.

² Pueyanaa, Pueyaso secojojua nia quiri pueyaracaanu. Nia secojoriquia maninia nia niishiniutia. Pueyaracaanu Pueyaso nia secojosacari, nia sequerenoj, “paacarasho”.

³ Naajuhuj, canaacuara nia secojore Pueyaso, nojuaja cuara canaa pohuataniiria pueya niquiara na rupaa Cristojiniji. Majaari pueya niishiniu quiquiaari tarijia Pueyaso miiniu panishano pajaniyara Cristo seera. Cua pohuatanuucua Cristojiniji, cunora nujuatesano niya quiyanijia nio nujuatejojuajinia. ⁴ Pueyaso nia secojore cucuara, maninia cua pohuatanura Cristojiniji, pueya niishiniuria maninia cua pohuatasano, taa Pueyaso paniya cua pohuatanuracujani.

⁵ Maninia nia niishiriojore taa nia miiniutianiya noo porjini, canapuetucujaja maja Pueyaso muerasuni. Maninia nia miiri nojori, mijiria nia quishacarijia. ⁶ Nia pocojosacari nojoritia, maja najuhua nia pocuanu. Pueya nia cumaquiri nia sequesano. Nia niishiriojore taa nia riucuanutaniya tamasaca pueyani, nojori jaara nequeso-tariquia niajaniya Pueyasoo nia tiuuniujiniji.

Nata quiniaata Pablo saruhuatasacari pueya, naajionu na puecanura

⁷ Pa panishano pa tarajanu Tíquicoori nia pohuatanutaniya janiyajiniji. Nojuacuajaari cua cumaquinia maninia. Nojuacuajaari cuarta Pueyaso seru, pa Jiyaniijara canaa poonijonura. ⁸ Niaacua na jiyaroyanjia na pohuatanura niajaniya taa canaa quiyani, naajuhuj, na cumanijianura niajaniya. ⁹ Pa panishano Onésimoori nata quianutaniyajuhuj. Nojuacuajaari niajaniyajinijinio pueyano. Maninia poonijiojua Pueyasora. Nojoricuajaari nia pohuatanutaniya puetunu niqijijianaa.

¹⁰ Aristarco, cuata nujuatesano pueyanoni, nojuajaari cua sequeya cua saruhuatanura niajaniya nera. Marcoori nia saruhuataajuhuj. Nojuajaari Bernabé cuna. Niaacuaajaari tari rootasaacanu Marcojiniji. Nojuaja jaara niaacua quiaare, niocua maninia na tiuquiniri nia tiajinia. ¹¹ Jesu sesaanucua pueyanoori nia saruhuataajuhuj. Na sesaari Justojuhuj. Saa nio pojorijia Judiocuacajinijinoori cuata poonijioquiaa Pueyasora, canaa niishitiojonura Cristojiniji pueya niqiuara. Nojoriiri cua cumanijianaa quiquiaa. ¹² Epafrasri nia saruhuataajuhuj. Nojuajaari Cristo seru niajaniyajinijiojuhuj. Nojuajaari pueyaracaanu niaacuara secojoquiaa queraatia, jiyanohua cumaatia Pueyasocua tiuujia nia quiniuria. Secojoquiaajaariuhua ritia Pueyaso tojjia nia quiniuria, puetunu Pueyaso panishanojuanaa nia miiniuria maninia. ¹³ Seetanujuanaa, Epafrasri jiyanohua tacaquiaa niaacua, Laodicea tiacajinia quiniaa Pueyaso muerasuucujuhuj, Hierápolis tiacajinia Pueyaso muerasuucuanio. ¹⁴ Pa panishano naarajona Lucasri nia saruhuataa. Demas nia saruhuataajuhuj.

¹⁵ Canaara nia sarhuatatare Laodicea tiacajinia quiniaa parta Pueyaso muerasu. Ninfas nia sarhuatatarejuhuj, na tiajinia rerejonaa Pueyaso pueya maanujuhuj. ¹⁶ Niaa jaara nio naajionee serojorecuaa nia rerejosacari, Laodicea tiacajinia nia jiyarotatarejuhuj, cuaara serojosaaria Pueyaso pueya maanu niqiuara tiijuhuj. Naajuhuj, cua naajionee Laodicea pueyacuara nia serojore, niaacua nojori jiyarotasacari Laodicea tiacajiniji. ¹⁷ Naa Arquipo nia sequere quiria: “Tama quia cuaqueyajaaja quia cojuare quia tucatanura quia poonijosano pa Jiyaniijara. Nojuajaari quia jiyatequiaari nera poonijioriquiano”.

¹⁸ Janiyari Pabloni. Quiarijiani, tama cua juaashiquiatajaaja naajiyanjia saaja cua saruhuatanura niajaniya. Nia niishiriquia, janiyari moronucua nujuatesano quiyani. Pueyaso cuaara cumaquiiria niajaniya na cumaacata jiyanohua. Tariucujaa.

COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Pueyaso pueya

¹ Janiyari Pablóni. Janiyari nio naajiya Tesalónica tiacajinia quiniaa Pueyaso pueya maanuucuarani. Niaacuajaari pa Que Pueyaso rupuejaca, pa Jiyaniijia Jesucristo rupuejacio. Canaari mariyata nia saruhuataani, Silvano, Timoteonio. Pueyaso cuara maninia jiitiaara na cumaacata niajaniya, maninia nia quiniuria. Cuara nioojia cajitiirijuhuj, juhuajaniya nia quiniuria.

Tesalónica pueyanaari Jesuucua tiuujiaa quiquiaari seetanujuaanaa

² Maninia nia quiniuucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuquiaani. ³ Pa Que Pueyaso canaa secojosacari, canaari pueyaracaanu niishiquiaa niajaniyani, taa pueyaracaanu nia poonijioquiaa Pueyasarani, Neyanuucua nia tiuuniuucua. Canaari niishiquiaajuhuj taa nia paniniutia nia naacuquiaa niarta pueyani. Naajuhuj, niaari maninia rejeretaquiaa taraatia nia miiniu, nia niishiniuucua pa Jiyaniijia Jesucristoori pocua niniutianihua. ⁴ Pueyaso panishano pueyanaa, canaacuajaari niishiyani, nojuajaari nia saquiriojoquiaari na panishano muerasu nia quiniuria. ⁵ Canaa jaara nia niquiara pohuataquiaari Pueyaso rupaa Jesucristojinijini, cunoori maja najuhua pohuatasano quiquiaari. Canaa pohuatasanoori jiyano hua Pueyaso cumaacaraca quiquiaari. Pueyaso Sohuanuuri jiyano hua poonijioriquiaa nioojiacajinia. Naacuajitij, niaari niishiquiaari canaa pohuatasanoori seetanu rupaajanaa. Niaacuajaari niishiya taa quijiaa canaa quiquiaari canaa quishacari niaatani, maninia Pueyaso muerasu nia quiniuria.

⁶ Naaari canaacua jiaatiaquiaari, juhua canaa nia quiniurijuhuj, juhua pa Jiyaniijia Jesu nia quiniurijuhuj. Naaari seetanujuaana naa miijiacara quiquiaari, Pueyaso tojjijia nia quiniurijuhuj taa canaacuaani. Pueyaso rupaa nia tojjishacari, niaari jiyano hua na timitiaquiaari. Cunora, niaari jiyano hua naquiya miishaaquiaari. Naajaa, Pueyaso Sohuanuuri nia cumaquiquiaari saaja, shuquiriaatia nia quiniuria. ⁷ Naa shuquiriaatia Pueyaso tojjijia nia quiniuucuatej,

niaari niarta Pueyaso pueya shiniujuquiaari, seetanujuanaa Pueyaso tojjiaca nojori quiniuriajuhuaj. Niaari naa shiniujuquiaari puetunu niarta Pueyaso pueyajanaa Macedonia jiyajinia quiniaatej, Acaya jiyajinia quiniaanio. ⁸ Pa Jiyani-ijia rupaari niajanijajiniji tucuacaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiquiyocujanaa poojotasaquiaari. Naacuaajitij, puetunu tiquiyocua quijiaca pueyajanaari tari niishiya taa Pueyasocua tiuujiaa nia quiya seetanujuanaani. Naacuaajitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinijicujani? ⁹ Tee cuniqui canaa tiuquiquiaani, pueyari canaajiniji poojotanuya tari, taa Jesujiniji canaa pohuataquiaaricujaja niajanijani. Nojori-iri niishiyajuhuj taa canaa nia tiuquinitiaquiaari maninia nia tiacajiniaqueyani, canaa pohuatasano nia tojiniuria. Naajuhuj, niaanaari pueya shipinijosano nia jiyatesano nia pueyasora cartequiaari, pueyaracaanu rishijia seetanu Pueyasojuanaa tojitiajaca nia quiniuria. ¹⁰ Naajuhuj, niaanaari Neyanu sashiya, jiyocuaaanuji na tiuquiniuhua, teyano Pueyaso samiitianiquiaariuhua macujinijicujani. Pueyari niajanijajiniji niishiyajaacuhuj, Jesuuri pocuaji Tacuna, maja mani quiquiojinia pa quejoosaanura, Pueyaso saniitiosacari na tojitiaashijiaa.

2

*Pablo niishitiosacariuhua pueya, taa na quiquiaari nojoriti-
tiani*

¹ Cuarta Pueyaso pueyanaa, niaacuajaari niishiya, majaari najuhuaana canaa quiniu quiquiaari, niaata canaa quishacari. ² Niaacuajaari niishiya, Filipino tiacajinia canaa quishacari, niaacua canaa tiuquiyaquishacarijia, canaari cuno tiacajinia sesacasaquiaarini. Canaari jiyanohua taraatia miishaaquiarijuhuaj. Naajuhuj, nia tiacajinia canaa tiuquiiijosacari, pueyari canaa pohuatasano ruuretaquiaari saaja. Naajaa, Pueyasoori canaa cumaquiquiaari juhua jiuujiaaju canaa pohuatanura Jesucristojiniji nia niquiarajuhuj. ³ Canaacuajaari niishiquiaarini canaa pohuatasanoori seetanu rupajanaa. Majaari canaa pohuatanu quiquiaari canaa miiniuria sesa niajanijani, canaa sapojonura niajanijajuhuj. ⁴ Pueyasojuanaari canaacua tiuquiquiaari. Cunora, canaa jiyatequiaariiri Neyanujiniji pohuatanaa canaa quiniuria. Naacuajaari taa canaa poojotaquiaa pueya tiuuniuria nocuacujani, Pueyaso jiyanooniuria nojori. Canaari seetanujuanaa Pueyaso timitiniu paniyani, maja saaja pueya.

Pueyasocujaari canaa jiuujia niishijia. ⁵ Niaacuajaari niishiyajuhuaaj, majaari canaa sapojonu quiquiaari niajaniya shanohua canaa sequesano, canaa nia maniniucuanura. Naajuhuaaj, majaari canaa cuaracashijionu quiquiaari niajaniya, canaa nia niqutiojonura nia cumaneecajiniji. Pueyasoori na niishiyacuaja. ⁶ Majaari quenaaja canaa niishiriojonu quijia pueya timitiasano canaa quiniuria, nia timitiasano pueya canaa quiniuriajuhuaaj. Maja. ⁷ Canacuajaari seetanujuanaa nia jiyaniijianucuanu, Jesucristo jiyaramiquishano pueya canaa quiniucua. Naajaa, niaata canaa quishacari, majaari naa canaa miiniu quiquiaari niajaniya, juhua canaa seya nia quiniuria. Saniniuujia, canaari tojetaarucujanaa juhua naatujoori quiquiaarini, niaata canaa quishacari. Naatej, taa maaji jiiitaa maninia necohuacuaani, canaari naa nia jiiitaaquiarinijuhuaaj. ⁸ Jiyanoahua canaa paniniucua niajaniya, majaari saaja Pueyaso rupaa canaa pohuatanu quiquiaari niajaniya. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuara puecoosaariaqui. Canaari naa jiiitaaquiarini niajanijani, jiyanoahua canaa paniniucua niajaniya. ⁹ Cuarta Pueyaso pueyanaa, niaacuajaari niishiya taa canaa poonijioquiaari jiyanoahuani, tama canaa panishanojuaaja canaa masetajara. Canaari naa poonijionuuquiaarini juuca, niucuanio, canaa pohuatanura Pueyaso rupaa niajaniya. Canaari naa miiquiaarini maja canaa taajetenura niajaniya canaa mashiniquijionuta nia cumaneeca.

¹⁰ Naacuajitij cuarta Pueyaso pueyanaa, niajaniya, Pueyasojuhuaaj, niaacuajaari niishiya canaari saaja maninia miiquiaarini, niaata canaa quishacari. Majaari quenaaja canaa miiniu quiquiaari sesa. Naacuajitij, tamasaari maja na naata canacuara saquiriojotanu, canaa jaara tojetaarucujanaa sesa miyaquiquiaarini. ¹¹ Niaari niishiyajuhuaaj taa canaa shiniujuquiaari niajanijani Pueyaso nia tojiniuria. Niaari niishiyajuhuaaj taa canaa cumaniijiaquiaari puetunu niajanijanaani taraatia nia quishacari, naatej, taa pueyano miiquiaa na panishano niqiuohuacuaani. ¹² Naajuhuaaj, canacuajaari jiyanoahua nia nacasuquiaarini maninia miijica nia quiniuria juhua seetanujuanaa Pueyaso pueya. Pueyasocujaari nia saquiriojoquiaari pueyaracaanu nata nia quiniuria, jiyaniijianucua nia quiniuriajuhuaaj, juhua nojuajuhuaaj. Nojuacuajaari na shacantuuca cumaacajinia quijia.

¹³ Canaa jaara Pueyaso rupaa pohuataquiaari nia niquiarani, majaari nia jiyaniniu quiquiaari cunoori saaja

pueyajiniji canaa tojiniuushano. Maja. Niaari seetanujuanaa na tojtiajacara quiquiaari, nia niishishacari cunoori seetanujuanaa Pueyaso rupaa cutara. Canaari cunora canaa timiniutia sequequiaa Pueyasoni, “paacarasho”. Canaa pohuatasanoori seetanujuanaa Pueyaso rupaa. Naacuajitij, na rupaari nioojiajinia poonijioquiaa, maninia miijiacara na jataniniuria niajaniya, Jesuucua tiuujia nia quiniuucua. ¹⁴ Naa Jesucristoocua tiuujia nia quiniuucuatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuacajaari nioojia miiquiaari naquiya, Jesucristo tojijia nioojia quiniuucua. ¹⁵ Nio cuarta Judiocuacani, nioojia supuetanaajuhua, nioojia Judiocuacajaari pa Jiyaniijia Jesucristo motuquiaari. Nioojia supuetanaari nioojia tariucuacaanu puecooquiaarijuhua Pueyaso sequesano caminiujiunaa pueyatej. Naajuhua, Jesuucua tiuyashijia cuarta Judiocuacajaari canaa taanuquiaari canaa Judea jiyajiniji. ¿Cuno pojoritiiri Pueyaso timitiasano? ¡Maja! Cuno pojoricuajaari juhua puetunu mijiria quiniaa paraajanaa. ¹⁶ Naacuajitij, canaa jaara taucuaca pohuatanu paniriquia Jesucristojinijini, Pueyaso pueyara nioojia jiyatesaanurajuhua, Judiocuacajaari canaa tenujuquiaa juucuani. Naacuajitij, Pueyasora, sesa Judiocuaca miijiosanoori tari tojetaarucujanaa puera. Cunora, Pueyasoori nioojia saniitioquiaa jiyanoohua.

Pablo naquerejosacari juucua Tesalónica tiacajinia quiniaa Pueyaso pueyacu

¹⁷ Cua panishano pueyanaa, canaacuajaari rupaquijia nia shuriucuaji quiaquiaarihuani. Jiyacari canaa niquiyaquishacari niajaniya, naajaa, canaacuajaari juhua niaata quiquiaajaani, pueyaracaanu canaa niishiriojosacari niajaniya, niaacuara canaa secojosacari. Canaari juucua jiyanoohua nia niquiniu paniriquiaani. ¹⁸ Cunora, canaari niaacua naquerejoquiaari juucuani. Janiyari niaacua naquerejonu pacutejoquiaarini. Satanásri canaa cushitioquiaari saajani. ¹⁹ ¿Janiyatucua casaara nia niquiniu paniyaquiririni? Niacuajaari jiyanoohua cua timitiasano pueya. Pa Jiyaniijia Jesucristo tiuquishacarijuhua, janiyari niishiyani, nojuajaari canaa shuqiritianutaniya maninia na tojijia nia quishacari canaa niishitiojonuucua na rupaa niajaniya. Pa Jiyaniijia pa quishacari, jiyacaritij, canaari jiyanoohua nia timitianutaniya, maninia na tojtiajaca nia quiniuucua mijiria. ²⁰ Taaquiririni, canaacuajaari tari shuquiriaatia quiyani, maninia na tojtiajaca nia quiniuucua. Niacuajaari seetanujuanaa canaa timitiasano pueya.

3

1 Naa jiyanoehua canaa niishiniu panishacari juucua niajanijajiniitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniniacuajaari canaa jateenura tamajaaja Atenas tiacajinia. 2 Naacuajitij, canaari saaja parta Pueyaso pueyano Timoteo jiyaroquiaari niaacuani. Nojuacuajaari jaarajaaja cuata poonijiona Pueyasora, Jesucristojiniji canaa pohuatanura. Janiyari niaacua na jiyaroquiaarini na cumaquiniuria niajaniya, mariyata socua na shiniujiuniuria niajaniya Jesuucua nia tiuuniuria saaja. 3 Na jiyaroquiaarinijia na cumaquiniuria niajaniya maja quenaaja niquiriyatu niajanijajiniitij pishiniuria Pueyasooquaji, naquiya nia miishacari. Niaacuajaari tari niishiquiaari, paari naquiya miishiyani Jesucristoocua pa tiuuniuucua. 4 Canaa quishacari niaataja, canaacuajaari tari nia numootequiaarini, puetunu pajaniyajanaari naquiya miishaanutaniyani Jesucristo tojtiajaca pa quiniuucua. Niaacuajaari niishiya, seetanujuanaa naa tohuatecanuuri cua sequesano. 5 Cua niishishacari niajanijajiniiji, niaanaari naquiya miishaaquiaa, janiyari puereriquiaani Sesaaca naasucua nia miitiriucuaa sesa. Jaara naa quiritij, puetunu canaa miishanojuanaa niaara maara najuhuana quiquianu. Naa cua tacaashacaritij, majaari socua cua tarishiniu paniniu quiquianu, niajanijajiniiji cua niishiniuria. Cunora, janiyari ritia jiyarocanu niaacua Timoteoni, saniniuujia nojuaja pohuatanuhuaa janiya, niaate Jesuucua tiuyajaa.

6 Timoteocuajaari tari niajanijajiniiji tiuquiriohuacuaa. Nojuajaari canaa pohuatasuhuacuaa, niaanaari Jesuucua tiuyajaa. Naaanaari panitioojuaca quiyajaa. Canaa pohuatasuhuacuaajaariuhuaaj, niaanaari canaa niishiriojoquiaa jiyanoehua nia paniniutia canaa. Naaanaari canaa niquiniuucua jiaatiaa, naatej, taa canaa jiaatiaa canaa niquiniuria niajanijajiniitij. 7 Cuarta Pueyaso pueyanaa, seetanujuanaa canaari taraatia miishiya niyani. Canaari tacayajuhuaaj. Naa-jaa, canaa niishishacari niaanaari seetanujuanaa Jesuucua tiuyajaa, canaari canaa jiuujia cajitiriucuaani. 8 Naa canaa tojishacari niaacuajitij, canaari juhua samiitiacorohuani, pa Jiyaniijia tojtiajaca nia quiniuucuaaja. 9 Cunora, canaari jiyanoehua nia shuquiritiaa Pueyaso niquiarani. Naacuajitij, majaari canaa niishiniu taate canaa naata sequenu nojuajani "paacarasho". Naa maninia nia quiniuucuatej, canaari jiyanoehua shuquiriaatia quiyani. 10 Naajuhuaaj, canaari juuca, niucua secojoquiaa Pueyasoni, nojuaja cuara canaa tiuquitiuhuaa niaacua. Canaari maninia nia niishitiojonu

tucuatanu paniyani, seetanujuanaa maninia jeenucuasano Pueyaso pueya nia quiniuria.

¹¹ Canaari paniyani pa Que Pueyasojuanaa, pa Jiyaniijia Jesucristonio, nojori cuaara canaa naacuura niaacua canaa tiuquiniuria. ¹² Pa Jiyaniijia cuaara nia jiyateera socua jiyanohua panitioojuaca nia quiniuria, tamasaca panijiaca nia quiniuriajuhuaj, taa canaa paniya niajanियacuani. ¹³ Naa panijiaca na jiyatesacari niajanियatej, niaari nioojia niquijioteyashijiaca quiniutianiya cutara. Naajuhuj, niaari tojetaarucujanaa sesa miyashijiaca quiniutianiya, pa Jiyaniijia Jesucristo tiuquishacariuhua puetunu na jiyanooshano pueyatajanaa.

4

Taate pa naata Pueyaso shuqiritiniuni

¹ Quiarijiani cuarta Pueyaso pueyanaa, pa Jiyaniijia Jesu jiyaramiquishano pueya canaa quiniucua, canaa sequesano nia tojiri. Quiarijiani, canaari nia shiniujiyani socua maninia miijiaca nia quiniuria. Canaari nia niishitiojoquiaari maninia miijiaca nia quiniuriani, Pueyaso nia shuqiritiniuria. Niaacuajaari naa maninia miya.

² Niaacuajaari canaa rootasano pa Jiyaniijia Jesujiniji niishiya tari. ³ Canaacuajaari nia rootaquiaarini, Pueyasoori nia panitiaa saaja nera nia quiniuria, tojetaarucujanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji. ⁴ Puetunu mashiquiorijianaa cuaara niishiiria maninia na cojuanura necocuarano, maja ritia na numuetucunura, nata na camiyaquishacarijia. Cuaara na cuaqueya panishano rejetenu niishiiria. ⁵ Majaari sacuaraatia nia miiniu taa Pueyaso niishiyashijiaca pueya miiquiaacuani, jiyanohua nojori jiaatiasacari maajiicua. ⁶ Naajuhuj, majaari quenaaja jiyasohuaja niarta pueyano niquiucua nia numuetucunu, neyaca nia sapojonuta. Cuno maajicuajaari saa neyacaraja, maja tamonura socua. Pueyasocujajaari naa miijiaca sanitionutaniya jiyanohua, taa canaa numootequiaari tari niajanियacuajani. ⁷ Pueyasoori maja na saquiriojonu quiquiaari pajaniya sacuaraatia miijiaca pa quiniuria. Pa saquiriojoquiaariiri tojetaarucujanaa sesa miyashijiaca pa quiniuria, saa neraja. ⁸ Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji pohuatana. Nojuajaari Pueyasojuanaa rerequeteya cutara, cante na Sohuanu niquitioquiaari niajanियacuajani.

⁹ Quiarijiani cuarta Pueyaso pueyanaa, janiyara, najuhuanaruhua niaacuara cua naajionura cua

niishitiniuria niajaniya, panitioojuaca nia quiniuria. Pueyasocuaajaari tari nioojiajinia nia niishitiquiaari panitioojuaca nia quiniuria. ¹⁰ Niaacuajaari seetanujuanaa puetunu Macedonia jiyajinia niarta Pueyaso pueya panijiaca quiyacuaja. Naajaa, cuarta Pueyaso pueyanaa, canaa nia tojiri. ¡Socua panijiaca nia quiri! ¹¹ Tama nia cuaqueyajaaja nia cumaquiriquia juhuajaniya quijiaca nia quiniuria. Tama nia poonijosanojiniajaaja nia cojeriquia, tama nia juaashiquiatajaaja nia poonijosacari, taa canaa rootaquiaari niajanियacuajani. ¹² Naacuajitij, Pueyaso niishiyashijiaca pueyari nia rerequeteyaquiniutianiya. Naajuhuaaj, niaari puetunu nia panishanojuanaa jitianutaniya.

Taa pa Jiyaniijia tiuquishacariuhua quiniutianiya

¹³ Cuarta Pueyaso pueyanaa, canaari juhuacarijia nia tonu paniyani taa Jesuucua tiuujiaaca shaajecono pueya miishaanutaniyani. Canaari nia niishitiniu paniyani maja nia taraajenura juhua Jesuucua tiuyashijiaca pueya. Nojoriiri maja na jitianu nojori Jiyano, nojori na samiitiani-jionuhua. ¹⁴ Paacuajaari niishiyani Jesuuri cusoquiaari. Na nuhuaji samiitiaquiaariuhuari. Naajuhuaaj, paari niishiyani, Pueyasoori Jesuucua tiuujiaaca shaajecono pueya samiitiani-jionutaniuhua, nojori na rijionura Jesuta, Jesu tiuquishacariuhua.

¹⁵ Canaajanaacuajaari nia sequeyani, niocuajaari pa Jiyaniijia niishitishano canaa: pajaniya, canapuate pa Jiyaniijia tiuquishacariuhua saminiucua quiniutianiyaajani, majaari macunucua pa puetanu quiniutianiya pa Jiyaniijiaata pa naacuneetonura jiya cajiniocua. ¹⁶ Naa quiniutianiyaari. Pa Jiyaniijia nacanuuuri tojishaanutaniya, Pueyaso seya jiyaniijia nacanujuhuaaj, Pueyaso trompeta jonenenunio. Jiyacaritij, pa Jiyaniijiajanaari jiyocuacaanuji rosenutaniya cohuaja najacajiniara. Jiyacarijuhuaaj, puetunujuanaa Jesuucua tiuujiaaca shaajecono pueyari samiitiaconutaniuhua coteenu. ¹⁷ Na nuhuaji pajaniya, canapuate saminiucua quiyajaani, paari nojoritia ritia rijiosaanutaniya cohuaja najacajiniarani. Paari tii coquetonutaniya pa Jiyaniijiaata paratujiniani. Jiyacaritij, paari tari pueyaracaanu nata quijiacarano quiniutianiyani. ¹⁸ Cua panishano pueyanaa, nio cua pohuatasanota nia cumanijiatooriquia.

5

¹ Majaruhua maninia cua naajionura niaacuara cua niishitiniuria niajaniya socua, taacari pa Jiyaniijia tiuquiniutianihuani. Niaacuajaari tari na niishiya, naajuhuaaj,

taate mijiria quiniutianiyani na tiuquiyaquishacarijia. ² Niaacuaajaari maninia niishiya, pueya jiyaniishacari juhuanojuaja maja pa Jiyaniijia tiuquiniu quiniutianihua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tiajiniaacocuaani, juhuajaniya tia camaru maquesacari. ³ Naajuhuaaj, quera pa Jiyaniijia tiuquishacariuhua, mijiria quiniaa pueyari naa sequejaca quiniutianiya: “Paacuaaja maninia quiyani. Shaaquicuaja miaquetojonu”. Canashiyaquiji jiyacari, Pueyaso saniitiosacari na tojiyashijiacaari quiniutianiya. Naa quiniutianiyari taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitiosoo. ⁴ Niajaniya saniniuujia cuarta Pueyaso pueyanaa, niaari maja juhua ninishiqui quijiaca, pa Jiyaniijia cariyatunura niajaniya. ⁵ Puetunu niajanijajanaacuaajaari cuhuashiqui quijiaca. Pueyasojuanaacuaajaari nioojiaca cuhuataquiaari. Majaari tari juhua ninishiqui quijiaca pueya pa quiniu. ⁶ Cunora, pa Jiyaniijia sashijiaca pa quirij. Maja juhua tamasacaja, juhuajaniya quiquioyari. Nojoriiri juhua maquetiuya. Pajaniya saniniuujia cuarta Pueyaso pueyanaa, juhua sutejaca pa quirij, maninia niishiriojojuacajuhuaaj. ⁷ Maquetujuacaari niucua maquetuquiaa. Naajuhuaaj, mashaasequenujuacaari niucua mashaasequenuquiaa. Naa miijiacaari Pueyaso tojiyashijiaca. Majaari na maniniucuanu cuhuashiqui. ⁸ Pajaniya saniniuujia, paari cuhuashiqui quijiaca cutarani. Naaratej, pueyaracaanu maninia niishiriojojuaca pa quirij. Romano pueya miaquetoosacari, nojoriiri turtuco cushiyonuujua, nocuaji na nujutajara cashi. Cumueeca casaa cushiyonuujuaajaariuhuaaj, na naca na cojuatajara. Naajuhuaaj, naa poojia pa cojuare, saaja Jesucua pa tiuuniutia, seetanujuanaa panijiaca pa quishacarijuhuaaj. Seetanujuanaa pa niishiri, Pueyasoori pa saquiriojoquiaari na muerasu pa quiniuria pueyaracaanura. Naacuajitij, pocua pa niishitijaja cojuareni, maja poojia pa niquijiotenura najuhanaj. Naacuajitij, Sesaacaari maja na naata shocotanu quiniutianiya pajaniya. ⁹ Pueyasoori maja na saquiriojonu quiquiaari pajaniya na saniitiosocoriquiano. Pa saquiriojoquiaari cutaraari na jiyanooniuria pajaniya, na muerasu pa quiniuria, Neyanu Jesucristoocua tiuujia pa quishacari. ¹⁰ Neyanucuaajaari pocuara cusoquiaari, nata rishijiaca pa quiniuria pueyaracaanu. Naacuajitij, naajaa, paa jaara cusoyareni, paa jaara saminio

quiyajuhuaaj, pa Jiyaniijia tiuquishacariuhua, puetunu nocua tiuujiacajanaari pueyaracaanu saminio quiniutianiya nata. ¹¹ Naaratej, pueyaracaanu nia cumaquitioooriquia Pueyaso rupaata. Nia shiniujiutioooriquiajuhuaaj, seetanujuanaa pa Jiyaniijia tojjiaca nia quiniuria, taa nia miiquiaacuaja tarini.

Socua Pablo rootasacari Pueyaso pueya

¹² Cuarta Pueyaso pueyanaa, canaa nia tojiri. Cuniqni nia jiitianaa tojjiaca nia quiri. Majaari nojori rerequetenu. Nojoriiri jiyanhuaa poonijioquiaa pa Jiyaniijia nojori niishitiojonura niajaniya, na nacasunura niajanijuhuaaj. ¹³ Cunora, jiyanhuaa nojori nia paniri. Majaari na rerequetenu. Nojoriiri pa Jiyaniijia poonijioquiaa na cumaquiniuria niajaniya. Maninia nia quiri pueyanaa. Majaari juayonuujutanu.

¹⁴ Nio nia tojirijuhuaaj cuarta Pueyaso pueyanaa. Taa-jecori nia nacasure. Noojia niquijotejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriquiajuhuaaj, Satanás saniniujiushacari na cuaqueya miiniu panishano rejeretaashijiatej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamasacata.

¹⁵ Naajuhuaaj, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miriquia niajaniya. Saniniuujia, pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhuaaj.

¹⁶ Pueyaracaanu nia shuquiririquia, Pueyaso pueya nia quiniuucua. ¹⁷ Naajuhuaaj, pueyaracaanu nia secojoriquia Pueyaso. ¹⁸ Naa jaara maninia miishaare, naa jaara sesa miishaarejuhuaaj, naajaa, puetunu naa nia miishaanuucua-janaa Pueyaso nia sequeriquia, “paacarasho”. Pueyasojuanaacuajaari naa paniya pa miiniuria, Jesucristo Sohuanu pa jiitianuucua poojiajinia. ¹⁹ Majaari Pueyaso Sohuanu nia ruuretanu, nojuaja jaara nioojiajinia nia shiniujiya maninia nia miiniuria. ²⁰ Naajuhuaaj, majaari nia soonu Pueyaso sequesano caminiujiunaa pohuatasano. ²¹ Coteenu nia saniniujiuri cutara, nia niishiniuria seetanutejanaa nojori pohuatasano. Teyano nojori pohuatasanojinijiniote maniniani, cuno tojjiaca nia quiri. ²² Puetunu sesa niishishano casaa-janaa soojeaca nia quiri.

²³ Poojia cajitinia Pueyasojuanaa cuaara nia jeenucuaara juhuacarijia, tojetaarucujanaa sesa miyashijia nia quiniuria pa Jiyaniijiaacuaji. Nojuaja cuaara naa cojuaara nia sohuanu, nioojia, nia cuaqueyano, tojetaarucujanaa soosoo

nia quiniuria pa Jiyaniijia Jesucristo cuaara tiuquiriohua-
jaatijia. ²⁴ Cante nia saquiriojoquiaaricuaaja na pueya nia
quiniuriani, nojuajaari puetunu shusha cua sequesanojua-
naa niajaniya miiniutianiya niaara. Nojuajaari maja na
niishiniu na rupaa jatanu. Nojuaja cutaraari na sequesano
mijia pueyaracaanu.

Pablo sequesano na naajionee na tucuatascari

²⁵ Cuarta Pueyaso pueyanaa, Pueyaso nia secojonuuriquia
canaacuarajuhuj.

²⁶ Canaara nia saruhuatate cuniqui quiniaa parta Pueyaso
pueyajuhua nojori nia nujuunuta, seetanujuanaa Pueyaso
paniniutia.

²⁷ Pa Jiyaniijia jiyaramiquishano cua quiniucua, cua to-
jitiare pueyanaa. Nio cua naajionee nia serojore puetunu
Pueyaso pueyarajanaa.

²⁸ Pa Jiyaniijia Jesucristo cuaara cumaquiria nioojia.
Cuaara naa quiiriatej.

TANEE PABLO NAAJIONEE TESALÓNICA TIACAJINIA QUINIAA PUEYASO PUEYACUARA

Pablo saruhuatasacari Jesucristoocua tiuujiaa

¹ Janiyari Pablóni. Silvano, Timoteonio, canaari nio naajiyi niaacuarani, puetunu Tesalónica tiacajinia quiniaa parta Pueyaso pueyarajanaa. Nio naajioneeri niaara, canapuate pa Que Pueyaso rupuejacacuajani, pa Jiyaniijia Jesucristo rupuejacio. ² Pa Que Pueyaso, pa Jiyaniijia Jesucristojuhuaj, nojori cuaara nioojia cumaquiiria. Cuaara nia jiya-teera juhuajaniya quijiacarajuhuj.

Pueyasoori na tojitianu paniyashijiaca saniitioriquiano Jesucristo tiuquishacariuhua

³ Cuarta Pueyaso pueyanaa, canaari jiyanojua nia timitiaani jiyanojua Pueyasooocua tiuujiaa nia quiniuucua socua, panitioojua nia quiniuucua socuajuhuj. Cunora, canaa secojosacari Pueyaso, canaari pueyaracaanu na sequequiaani, “paacarasho”. ⁴ Naa maninia nia quiniuucuatej, canaari shuquiriaatia poojotaquiaa niajanijiniijia Pueyaso pueya maapue niquiara tamaquiicua canaa rucuanesacari. Canaari nojori poojotaquiaani taa nia rejeretaquiaa juhuajaniya naquiya nia miiniuni, taraatia nia miiniujiuhuj, Pueyasooocua tiuujiaa nia quiniuucua. ⁵ Pueyaso saquiriojonuucua niajanijia pueyaracaanu shuquiriaatia quijiaa nia quiniuria na shuriucua, cunoori maja najuhuaa quiquiaari. Niaacuajaari seetanujanaa na pueya. Cunoori maatia niishishiyacuaja juhuajaniya nia rejeretasacari naquiya nia miiniu, Pueyasooocua nia tiuuniuucua. Pueyaso niishiyashijiaca pueyari naa naquiya miiquiaa niajanijiatej, Jesucristoocua tiuujiaa nia quiniuucua.

⁶ Naajaa, Pueyasocuaajaari tojetaarucujanaa sesa miyashijia. Nojuajaari niaacua naminiutianiya noo pojori, naquiya miitajaca niajanijiatej. ⁷ Niajanijia saniniujia, naquiya miijosaaquiaarini, niaari canaata samaraatasaanutaniyajuhuj, Jesucristo tiuquishacariuhua pocua. Jiyacariitij, nojuajaari niquishaanutaniya mani rimianuqueyano tiuquitiohuano, jiyanojua cumaacaraca na seyata jiyocuaaanuji. ⁸ Tiuquiniutianihuari na saniitionura noo pojori, canapuate Pueyaso niishiniu paniyaquiquiaani, noo pojorijuhuj, pa Jiyaniijia Jesu rupaa

ruuretajacatej. ⁹ Puetunu cuno pojorijianaari pueyaracaanu saniitiosocoriquiano jiyatesaanutaniya. Nojoriiri tucuacaanura quejoosaanutaniya pa Jiyaniijia shuriucuaji. Naacuajitij, majaari nojori niquniu quiniutianiya na jiquioco, shacantuuca na cumaacanio, nojuaja jaara mijiria tiuquiriohua pa shuquiritianura nojuaja. ¹⁰ Jiyacaritij, puetunu na jeenucuasano pueyajanaari jiyanohua na timitianutaniya. Puetunu nocua tiuujia pueyajanaari jiyanohua jiuujiateconutaniya, pa Jiyaniijia na shootiatusacari. Niaari na niquniutianiyajuhua, nojuajiniji canaa pohuatasanoocua nia tiuuniucua.

¹¹ Canaari cunora pueyaracaanu niaacuara secojoquiaa Pueyasoni, maninia na pueya nia quiniuria, maja nojuaja caririquiniuria na saquiriojonuucua niajaniya. Canaari niaacuara secojoquiaaaniuhua, Pueyaso cuaara nia tucuataniiria na cumaacata puetunu maninia casaa nia miiniu panishanojuanaa. Cuaara nia tucuataniirijuhua puetunu nia miishanojuanaa, cuno, Pueyasoocua nia tiuuniutia nia poonijiosanoni. ¹² Naacuajitij, pa Jiyaniijia Jesuuri socua timitiasaanutaniya naa nia miiniuucua maniatej. Naajuhua, nojuajaari nia timitianutaniyajuhua. Naa maninia quiniutianiyari pa Pueyaso pa Jiyaniijia Jesucristota na cumaquishacari niajaniya.

2

Maatia pohuatasano, taate mijiria quiniutianiyani, pa Jiyaniijia tiuquishacariuhua

¹ Quiarijiani cuarta Pueyaso pueyanaa, socua nia pohuatarohuacuara pa Jiyaniijia tiuquiniujiniji, taa pa coque-tonutaniya natajaniuhua. ² Canaa sequesano niajaniya nia tojiri, pueyanaa. Majaari nia niyajetanu tariucuacaanu canaa niishitijosano niajaniya, nia jiyajeneyaquiniuucuaaji tamasa sapojosacari niajaniya. Majaari nia shiriiquiniu tamasa jaara sequere niajaniya: “Pueyaso Sohuanuuri cua niishitirii, pa Jiyaniijia tiuquishacariiri quiarijia”. Tamasaca jaara naa nia pohuatare, majaari na sequesano tojiniu. Naajuhua, tamasa jaara naajionuure tamajaaja, niaara na jiyatesocoriquiano juhua canaa naajionee, majaari nojori tojiniu. Nojoricuajaari nia sapojija. ³ Pueyanaa, majaari niaacua nojori nia shanacunu nojori sapojonura niajaniya. Nia niishiri, pa Jiyaniijia tiuquiyaquishacariuhua, queraatia pueyari Pueyasoocuaaji pishiniutianiya. Jiyacarijihua, Pueyaso rootasano Ruuretajajanaari supenuutaniya. Nojuacuajaari tariucua Pueyaso saniitiosocoriquiano na riuricata. ⁴ Nojuacuajaari Pueyaso paraca. Nojuajaari puetunu

pueyajanaa tenujunutaniya maja nojori tojiniuria Pueyaso, pueya shipinijosano nojori pueyasohuara nojori tarinitianu-
rajuhuaj. Nojuaja cutaraari tama na cuaqueyajaaja jiyatenu-
taniya juhua Pueyasora. Pueyaso Secojojuaja tiajinia cajiniu-
taniyari, Jiyaniijajanaa cajituijinia. Jiyacari sequenutani-
yari: “Janiyacuaajaari Pueyasoni”.

⁵ Pueyanaa, ¿majateeri nio nia niishiniucuaaja? Janiy-
acuajaari nojuajiniji nia poojotajani niaata cua quishacari.
⁶ Niaa naasucuaari niishiyacuaja canteeri juhua na quiaa-
jaani, maja juhuanajuaja mijiria na miiniuria tama na panis-
hanojuaja, Pueyaso paniyaquishacarijia. ⁷ Seetanujuanaa,
Sesaaca cumaacaari tari mijiria poonijiya jiyasohuaja. Naa-
jaa, Pueyaso paracaari juhuanajuaja maja na naata muel-
tanu, pueya niishiniuria nojuaja, na tenujuna cuara ni-
iquiji rishaarejaatijiaj. ⁸ Na tenujuna jaara rishaare niiquiji,
jiyacaritij cuno sesaaca sequeeri muetanutaniya, jiyano-
hua sesa na miiniuria. Naajaa, pa Jiyaniijia tiuquishacari-
uhua na shacantuuca cumaacajinia, nojuajaari cuno sesaaca
seque monutaniya saaja na rupaata na noonutia, na sha-
janura puetunujuanaa. ⁹ Cuno sesa miijia sequeeri muel-
tanutaniya Satanás cumaquishacari nojuaja. Naacuaji-
tij, nojuajaari jiyano-
hua cumaaca jii-
tianutaniya jiyajeneta
casaa na miiniuria, pueya
jiuujiatenura nocuaji. Quera-
tia niishishoo casaa miini-
utaniyajaariuhua, pueya
na sapo-
jonura. ¹⁰ Nojuajaari
puetunu tamaatia sesa
miiniu niishis-
hanojuanaa miiniutaniya
na sapojonura noo pojori,
cana-
puete saniitiosocoriquiano
pueyacuaajani. Nojoriiri
sapo-
josaanutaniya, Pueyaso
Rupaa ruuretajaca nojori
quiniu-
cua. Nojoriiri maja na
tojiniu paniniu quiquiaari
seetanu ru-
paajanaa, Pueyaso jiyano-
niuria nojori. ¹¹ Naaratej,
Pueya-
soori nojori tarinitianu-
taniya nojori sapojosaanura,
nojori
tiuuniuria seetanujuanaa
sapojonuunuucua. ¹² Naacuajitij,
puetunu noo pojorijianaari
saniitiosaanutaniya,
canapuete seetanu
rupaacuaajanaa tiuuniu
paniyaquijiani, sesa miiniu
maniniucujaca nojori
quiniuucua.

*Pueyaso muerasuranoori tariucuaanujiniji saquirio-
josano*

¹³ Niajaniya saniniuujia, niaari pa Jiyaniijia panishano
pueyacuaaja. Jiya shipiniyaquishacarijia, niaacuajaari
tariucua Pueyaso saquiriojosano pueya quiquiaari.
Niaari Pueyaso pueyara quiquiaaricuaja, na Sohanu
jataniniuucua niajaniya quiarinio pueya nia quiniuria,
seetanu rupaacuajanaa nia tiuuniuucua. Cunora,
canaari pueyaracaanu Pueyaso sequequiaa niaacuarani,
“paacarasho”. ¹⁴ Canaa pohuatasacari Pueyaso rupaa nia

niquiara, niaari Jesucristoocua tiuuquiaari. Naacuaajitij, Pueyasoori nia jiyatequiaari na pueya nia quiniuria, shacantuuca quijiacara nia jatanishaanura, taa pa Jiyaniijia Jesucristo quiyacuaani.

¹⁵ Naaratej cuarta Pueyaso pueyanaa, majaari nioojia nia niqijiotenu Pueyasooquaji. Naajuhuj, nia numaama nia racatare canaa niishitiojosano niajaniya niaata canaa quishacari, canaa naajioneecajinia canaa rootasano nia-janiyajuhuj. ¹⁶ Jiyanoojia pa Jiyaniijia Jesucristo quiniucua, pa Que Pueyasojuhuj, nojoriiri pa paniquiaa. Naajuhuj, poojia cajitiquiaa pueyaracaanuraari. Na rupaacua pa tiuutiquiaariiri, pa niishiniuria paari jiyanohua maninia miishaanutaniya pueyaracaanuni. ¹⁷ Naajuhuj, nojori cuara nioojia shiniujiiria, maninia nojori tojitiajaca nia quiniuria pueyaracaanu. Nojori cuara cumaquiiria niajaniya, tojetaarucujanaa maninia nia sequesano quiniuria, nia miishanonio.

3

Pueyaso rupaa pohuatanaacuara pa secojore

¹ Pueyanaa, socua nia sequerohuacuaraj. Canaacuara nia secojore, pa Jiyaniijia rupaa paaquetesaanura puetunu tiqiyocuajanaa. Nia secojorejuhuj, cuno rupaa pueya tojishacari, nojori jatanishaanura, naatej, taa na jataniquiaari niajanijacuaani. ² Canaacuara nia secojorejuhuj, Pueyaso cojuanura canaa na tojiyashijiaca pueyacuaji, maja nojori miiniuria sesa canaa. Niaacuajaari niishiya, puetunu pueyanaari maja na tiuuniu Pueyasooocua. Cuno pojoricuajaari canaa paracaajiaca. ³ Naajaa, paacuajaari niishiyani pa Jiyaniijiacuajaari na sequesano miiquiaa. Nojuacuajaari nia cumaquiniutianiya, maja nioojia nia niqijiotenura nocuaji. Sesaacaacuaji nia cojuanutaniyajaariuhuj. ⁴ Pa Jiyaniijiaacua canaa tiuushacari, majaari canaa taacanunu niaa naasucuaari canaa rootasano tojtiaaquiniutianiya. Maja. Niaa naasucuaari na tojtiaacuaja. ⁵ Pa Jiyaniijia cuara niishitiiria nioojiajinia, panijiacara nia quiniuria taa Pueyaso panijacuaani. Naajuhuj, cuara nia niishitiiria naquiya miiniu rejeretajaca nia quiniuria, Jesucristo cumaquishacari niajaniya.

Poonijiojuaca pa quiri

⁶ Cuarta Pueyaso pueyanaa, pa Jiyaniijia Jesucristo jiyaramiquishano pueya canaa quiniucua, canaa nia tojitiare. Majaari noo pojori nia rupeenu: taajecoritij, noo pojorijuhuj, canaa rootasano tojiyashijiacatej. ⁷ Niaacuajaari niishiya taa quijiacara canaa quiquiaari niaata

canaa quishacarini. Naa quijiaca nia quirijihuaj. Majaari canaa taajeyaca canaa matanu quijiani. ⁸ Majaari najuhuana canaa miaquenu quijia nia miaguesano. Canaa cutaraari pueyaracaanu canaa samareenuta poonijionuujuaca juucani, niucuanio. Canaari naa poonijionuuquiaarini canaa panishano canaa jitianura, maja quenaaja canaa taajetenura niajaniya, maja nia tacaatianura canaajuhuaj. ⁹ Pueyaso jiyaramiquishano pueya canaa quiniuucua, canaa naata quiquiaaricuaajaari canaa panishano canaa mashiniquiniuria niajaniyajiniji. Naajaa, majaari naa canaa miiniu quiquiaari. Canaari tama canaa juaashiquiacatajaaja poonijioquiaarini, canaa niishitiojonura niajaniya, poonijionuujuaca nia quiniuria juhua canaajuhuaj. ¹⁰ Canaa quishacari niaata jiyacarijihuaj, canaari nio nia niishitiojoquiaarini: “Cante poonijionu paniyaquiyani, cuara miaqueteshiyaquiiirajuhuaj”. ¹¹ Canaari pohuatasaarucuaajaaniuhuaj, noojiaqueya niajaniyajinijionaaari juhuajaniya quiquiaa. Majanaari na poonijionuunu quiquiaa. Nojoriniaari noo pojori cushitiojoquiaa, poonijionuujuaca cutaratej. ¹² Pa Jiyaniijia Jesucristo jiyaramiquishano pueya canaa quiniuucua, canaari cuno taajecori sequeyani, nojori cuara poonijionuura, nojori panishano nojori jitianura.

¹³ Cuarta Pueyaso pueyanaa, teyano niajaniyajinijiniote maninia miijiacacuaani, majaari maninia miiniu nia tarinitianu. ¹⁴ Saniniuujia, cante nio naajioneejinia canaa sequesano tojiniu paniyaquiyani, nojuaja nia niishiri cantenajoni. Majaari na rupuenunoj, na caririquiniuria quenaaja. ¹⁵ Maja cutaraari nojuaja nia jiyatenu juhua nia paracara. Saaja nia nacasure cutara nojuaja, niarta Pueyaso pueyano na quiniuucua.

Pablo sequesano na naajio na tucuatasaari

¹⁶ Poojia cajitijia pa Jiyaniijiani, nojuajanaa cuara nioojia cajitiiria pueyaracaanu, naajaa, niaa jaara taa miishaariquia. Pa Jiyaniijia cuara pueyaracaanu jitiaara puetunu niajaniyajanaa.

¹⁷ Janiyari Pabloni. Cua saruhuanura niajaniya, janiyari tama cua juaashiquiatajaaja nio naajiyani. Nia niquiri cua naajiosano, taamuecatenajoni. Janiyari naa puetunu cua naajionecajanaa tucuatatquiaani, cua sesa cua naajionuta. ¹⁸ Pa Jiyaniijia Jesucristo cuara cumaquiiiria puetunu niajaniyajanaa. Cuara naa quiiriatej.

COTEENU PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pabloni, Jesucristo jiyaramiquishano. Pa Jiyanoojia Pueyaso, pa Jiyaniijia Jesucristonio, nojoriiri nera poonijionara cua jiyatequiaari. Paari Jesucristoocua tiuujiacani, nojuaja jataniniuria pajaniya juhua nojuaja pa quiniuriajuhuaj. ²Timoteonaa, janiyari nio naajiya quiarani. Quiaari juhua quiyanura quiquiaari, Pueyaso pueyanora quia jatanuucua, quia niqiara cua pohuatasacari Pueyaso rupaa. Pa Que Pueyaso, pa Jiyaniijia Jesucristojuhuj, nojori cuara cumaquiiria quiajaniya. Nojori cuara quiocua taraajeerajuhuj. Nojori cuara pueyaracaanu quiiojia cajitiiriajuhuaj.

Pablo sequesacari sesa niishitiojonuujuaca cuara sanaa-jasaaria

³ Janiya jaara Macedonia jiyajiniara quiaquiaarini, janiyacuaaari quia sequequiaarini Éfeso tiacajiniaja quia jiyojenura. Janiyari naa quia sequequiaarini, quia tenujunura cuno pojori, najuhuana tamaatia niishitiojonuya pueyani. ⁴ Janiyari quia sequequiaarijuhuaj, nojori quia sequenura, maja nojori niishiriojonura najuhuana nojori supuetanaa pohuatanuusanojinia. Janiyari quia sequequiaarijuhuaj, maja nojori niishiriojonura nojori supuetanaa sesacajinia, cuno, najuhuana tucuayocuara naajionuutasanoni. Pueya niishiriojonuusacari pueyaracaanu cuno najuhuana casaa-jinia, nojoriiri cunoocua juayonuujutaquiaa saaja. Saniniuujia, nojori cuara Pueyaso rupaacua niishiriojoora cutara. Nocua pa tiuushacari, paari cumaquishaanutaniyani Pueyasora pa poonijionura maninia.

⁵ Naa cua sequesacari Éfeso tiacajiniaja quia jiyojenuratej, janiyari quia sequenu paniriquiaani, pueya quia niishitiojonura panitiojuaca nojori quiniuria. Nojori cuara shitimia panitiojuaca quiiria, juhua jeequesano nojori jiuujia quishacari. Seetanujuanaa Pueyasocua nojori tiuushacari, nojori cuara panitioora maja noojia macuhua-jenuta sesa nojori miishanojiniji. ⁶ Noojiaqueya cuno pojorijinijiniori tari tarinitiacanu tojinu nio maninia niishitiojosano. Nojoriiri cushitiquianu na pocojonuucua, na nacoojonuucua najuhuana tama nojori niishishanojinijiaaja. ⁷ Nojoriiri Moisés Rootasanojiniji niishitiojonaara quiniu

paniya juucua. Majaari quenaaja nojori niishiniu tama nojori sequesanojuaaja, nojori shiniujiushacari pueya, pueya tojiniuria najuhuana capa nojori niishitiojosano.

⁸ Paacuajaari niishiyani, Pueyaso rootasano Moisésni, cunoori maniniacuaja, paa jaara niishirini casaara naa Pueyaso rootaquiaari pa supuetanaani. ⁹ Paacuajaari niishiyani, Moisés Rootasanoori maja na pueretenu maninia miijiaca pueya cutara. Pueyasoori maja na rootasano na niishitiniu quiquiaari maninia miijiacara. Na niishitiquiaari cutaraari na tojtiaashijiacara, tama na panishanojuaaja miijiacara, Pueyaso soojeacarajuhuaaj, sesa miijiacarano. Moisés Rootasanoori Pueyaso rerequetejacara, Pueyaso casaa rerequetejacarajuhuaaj, noo pojorirajuhuaaj, tama na que tacartaja monutej, na nucuanio, pueya puecojuacarajuhuaaj. ¹⁰ Moisés Rootasanoori na camishoo maajipohua numuetucunuujucara, maajishurihuara, na numuetucunuujucarano. Moisés Rootasanoori pueya nohuasenuujucara juhua casami na niqitiojosocoriquiano tamasaca seyara; sapojonuujucarajuhuaaj; na sapojonuta na sequesano maatejucarano, nocua na tiuushaanura; puetunu noo pojorirajanaano, maninia niishitiojosano tojiyashijiacatej. ¹¹ Cuno maninia niishitiojosanoni, cunocuajaari cua pohuatasano Jesucristo rupaajiniji, pueya jatanura Pueyaso pueyara. Pueyasoori jiyanohua maninia, cuno rupaa pohuatanara na jiyatenuucua janiya.

Pablo shuquiritasacari Pueyaso, na rupaa pohuatanara na jiyatenuucua nojuaja

¹² Pa Jiyaniijia Jesucristoori cucua tiuquiaari nera cua poonijionura maninia. Cunora, na rupaa pohuatanara cua jiyatequiaariiri. Nojuajaari cua cumaquiquiaa. Cunora, janiyari na sequequiaani, “paacarasho”. ¹³ Tariucuaaanu, janiyari nocuara rimiaaqueja quiquiaari sacuaraatiani. Janiyari naquiya na miiquiaarijihuaaj, nocua tiuujica cua miiti-asacari. Janiyari jiyanohua na paracaajia quiquiaarijihuaaj. Naajaa, Jesucristoori saaja cucua taraajequiaarini cua niishiyaquiniuucua casaa cua miiriquiaani, nocua tiuyashijia cua quishacarijia. ¹⁴ Naa cucua na taraajenuucuatej, nojuajaari seetanujuanaa cua jiyanooquiaari. Na jiyanooshacari janiya, nojuajaari cua jataniquiaari nocua tiuujia cua quiniuria, panijia cua quiniurajuhuaaj.

¹⁵ Timoteonaa, nioori seetanujuanaa. Puetunu pueyajanaa cuuara niishiiria nio. Cua tojiri. Jesucristoori mijiria niquiaari na Que Pueyaso na jiyanootiniuria sesa miijiaca. Janiyacuajaari tojetaarucujanaa cuno sesa miijiaca pueyajinijinio na jiyanooshanoni. ¹⁶ Janiyari naa

jiyanooshaaquiaarini puetunu pueyajanaa niishiniuria taa jiyanoohua jiyanootiote Jesucristoni, pueyaracaanu na rejeretanuucua cua juaaniu. Naa Jesucristo jiyanooniucuaacuaa janiya, sesa miijia cua quishacarijiatej, Jesucristoocua tiuujiacarano cuara niishiiria, nojoriiri na naata jiyanooshaanujuhuj Jesucristoocua nojori tiuushacari. Naacuajitij, nojoricua pueyaracaanu quijiacara jiyatesaarejuhuaj. ¹⁷ Naa jiyanootio pa Jiyaniijia quiniuucuatej, nojuaja pa timitiare pueyaracaanu. Nojuajaari Jiyaniijiajuhanajaj. Nojuajaari Pueyasocuaja, shaajeyashijia, namijiata niquiyaquishoo. ¡Jiyanoohua maniniaari pa Jiyaniijia! ¡Naa seetanujuanaari!

¹⁸ Timoteonaa, quiaacuajaari niishiya taa Pueyaso cumaquiquiaari quiajanuyacuajani, nera quia poonijionura. Cunoori quiquiaari Pueyaso pueya jiiitanaa jaara caminiujuquiquiaari Pueyaso sequenu panishano quiara, nera poonijiona quia quiniuria. Naacuajitij quiyanunaa, cua tojiri. Pueyaso cumaaca quia jiiitiasacari, quioojia quia cumaquiri maninia quia poonijionura Pueyasora. Seetanujuanaa juhua quiaquejojua pueyano quia quiri, senota samareyashijia. ¹⁹ Naa quia quiri Pueyaso rupaa quia pohuatasacari, seetanujuanaa na rupaacua tiuujia quia quishacari, seetanujuanaa na rupaa tojjia quia quishacarijuhuaj. Naa quijia quia quiriritij, quioojia mariqui quia macuhujareeri quiaa jaara sesa miiriquia. Noojiaqueya pueyari tari Pueyasooocua tiuuniu tarinitiacanu nojori ruuretanuucua Pueyaso Sohuanu numootesacari nojori jiuujiajania, sesa nojori miishacari. ²⁰ Naa miituuquianuuri Himeneo, Alejandronio. Janiyari cunora Pueyaso secojorucuaani, Pueyaso cuara nojori tarinitiaara Satanásra, Satanás miiniuria naquiya nojori. Naacuajitij, nojori cuara niishiiria maja socua sacuaraatia nojori rimiaaquenura Pueyasooocua.

2

Secojonuunura niishitiojosano

¹ Cua tojiri Timoteonaa, niaa jaara Pueyaso secojonu-uriquia, nia secojonuure puetunu pueyacuarajanaa. Nia panishano casaacuara nia secojoriquiajuhuaj. Naajuhuj, Pueyaso nia sequeriquia “paacarasho”, pueyaracaanu maninia na miiniuucua. ² Jiya jiyaniijianucuaacuara nia secojonuuriquijuhuj, puetunu pueya camarucuaacuara-juhuaj. Nojoriicuaara nia secojonuuriquia, juhuajaniya pa quiniuria panaatia, juhuajaniya pa tojiniuria Pueyaso, maninia pa quiniuria parta pueyatajuhuaj. ³ Pa Jiyanoojia

Pueyasoori naa paniquiaa pa secojonuratej. Naa pa secojosano maniniucuaquiaari. ⁴Nojuajaari paniya puetunu pueyajanaa tiuuniuria Neyanuucua, na pueyara nojori jatanishaanura, puetunu seetanu rupaajanaa niishijiaa nojori quiniuriajuhuaj. ⁵Pa Que Pueyasoori niquiriyatujua. Majaari tamonu Pueyaso quiniu socua. Naajuhuj, niquiriyatujua pueyanoori quiya Pueyaso Jiyanootijia pueya. Nojuajaari Jesucristocuaaja. ⁶Puetunu pueyajanaa quishacari saniitiosocoriquiano, Jesucristoori tama na cuaqueyajaaja tarinitiaquiaari na mosaanura narta pueya niti. Naacujitij, na Que Pueyasoori na naata jiyanooni pajaniya saniniujia. Quiarijiacuajaari Pueyaso panishacari Neyanujiniji pahuatasaanura pueya niquiara, nojori jiyanooshaanura. ⁷Nio rupaa cua pahuatanurajuhuj, Pueyasojuaanaari cua jiyatequiaari Jesucristojiniji pahuatana cua quiniuria. Cua jiyaramiquiquiaariiri taucuaca cua niishitiniuria Jesuucua nojori tiuuniuria, seetanu rupaajanaa nojori niishiniuriajuhuaj. Nio cua sequesanoori seetanujuanaa. Majaari cua sapojonu.

⁸Cunora, cua tojiri. Janiyari paniyani puetunu tiqiyocua-janaa pueya secojunuunura Pueyaso. Jiyocuaaanu nojori shiitiosacari nojori juaashiquia nojori secojonura, nojori jiuujia cuaara quiiria jeequesano sesa nojori miishanojiniji. Naajuhuj, cuaara quiyaquiiria najiquitishano, maja sesa niishiriojonutajuhuj. ⁹Naajuhuj, janiyari paniyani maajipohua cuaara cushiyaquiiria puera maniniuquiya toqueya, narta maajipohua na shocotanura. Cuaara cushiyaquiiria cararaatia niquishano toqueyajuhuj. Maniniacuajaari nojori maniniushiniuria. Sesa cutaraari nojori maniniushiniuria puera, pueya shootianura nojori. Nojori cuaara jiyaniyaquiiria nojoriiri seetanujuanaa shanohua niquishano, nojori mucaca jeeecasano quishacari puera, nojori cushishacari orojiniji shipinishano casaanio. ¿Maajitiiri seetanujuanaa shanohua niquishano maaji, na cushitianuucua queraatia cumaneecata masesano noturu shipinijosano sai tiujiau, queraatia cumaneecata masesano maniniuquiya toqueyano? Maja. ¹⁰Nojori cuaara maniniucuaasaariquia cutara, maninia miijiaca maajipohua nojori quiniuucua. Nojori cuaara quiiria juhua noo maajipohuj, canapuetucuaaja tama nojori cuaqueyajaaja jiyatecanu Pueyasora na quiniuria seetanujuanaani. ¹¹Pueyaso rupaa niishitiojosacari, maajipohua cuaara tojitiariquia sanaa, maja Pueyaso rupaa pahuatanaa na rejetenuta. ¹²Maja cutaraari cua shanacunu maajipohua niishitiojonura Pueyaso rupaa pueya niquiara. Naajuhuj, majaari cua shanacunu maajipohua jiyatesaa-

nura narta Pueyaso pueya jiitiana na quiniuria. Nojori cuaara sanaa tojitiariquia cutara, narta Pueyaso pueya reresosacari. ¹³ Quia niishiri Timoteonaa, casaara naa cua sequeyani. Pueyasocuajaari coteenu Adán shipiniquiaari. Na nuhuaji Adán niqiorano Eva shipiniquiaariiri. ¹⁴ Quia niishirijuhuaaj, Soconurano jaara sapojoquiaari Evatej, maajari na sapojonu quiquiaari neyaca Adán. Eva cutaraari sapojosaaquiaari. Naacuajitij, na sapojosaanuucua, Evaari Pueyaso tojiyashijiara quiquiaari. ¹⁵ Naaratej, maajipohua cuaara maninia canashitijioora necohua. Cuaara panijiaa quiirijuhuaaj. Cuaara maninia miijiaca quiirijuhuaaj, maninia niishiriojojuaca nojori quishacari. Naa maajipohua miishacaritij, Pueyasoori nojori jiitianutaniya maninia, Jesucristoocua tiujujiaa nojori quishacari.

3

Pueyaso pueya jiitianatucua taamueca pueyano quiriqiani

¹ Nio sequesanoori seetanujuanaa: cante Pueyaso pueya jiitianara quiniu paniyani, nojuajaari maninia poonijiosano miiniuucua jiaatiaa. ² Naaratej, cante Pueyaso pueya jiitianani, nojuaja cuaara quiiria sesacasoo pueyano. Nojuaja cuaara quiiria saaja niquiriyatu maaji niyaca. Cuaara quiiria noojia niqijioteyashijia, maninia niishiriojojuajuhuaaj, pueya rerequeteyaquishoonio. Cuaara quiiria maninia pueyano, rucoojuaca pueya tiuquinitiaja na tiajinia. Cuaara quiiria Pueyaso rupaa niishitiojojuua maninia. ³ Naajuhuaaj, nojuaja cuaara quiyaquiiria mashaasequejoru. Cuaara quiyaquiiria ritia juaajia, pueya na piniuria. Cuaara quiiria pueya riuhaneyashijia, pueya juaashacari nojuaja. Cuaara quiiria shiniquijuhuaaj. Cuaara cumaneecaacua jiaatiaashijia quiirijuhuaaj. ⁴ Naajuhuaaj, nojuaja cuaara na tiajinia quiniaa jiitiaja quiiria maninia. Cuaara necohua niishitiojojuua quiiria maniniajuhuaaj, tojtiajaca nojori quiniuria, pueya rerequeteyashijiacanio. ⁵ Naacuajitij, pueyano jaara maninia casaa necohua niishitiojiyashijia quiriquia, ¿maatucua taa maninia jiitiariquia Pueyaso pueya maanuni? ⁶ Naajuhuaaj, Pueyaso pueya maanu jiitiariquiano cuaara quiiria seetanujuanaa Pueyaso tojijia pueyano cutara. Cuaara quiyaquiiria shusha Pueyasooocua tiuunio pueyano, nojuaja mariqui jiyaniiriiri nojuaja tojishano pueyano cutara. Nojuaja jaara jiyaniiri nojuaja socua maninia pueyano narta Pueyaso pueyajiniji, nojuajaari cocuaatia miya taa Satanás miiquiaaricuaani. Pueyaso panishano

seru Satanás quishacarijia, nojuacuajaari taanuusaquiaari Pueyaso shuriucuaji, na jiyanihacari nojuaja na naata na Jiyaniijia Pueyaso shocotanu. ⁷ Naajuhuj, Pueyaso pueya maanu jitiariquiano cuaara quiiria maninia miijia pueyano, Jesuucua tiuyashijia pueya mariqui na sesacareeri maninia miyashijia na quishacari. Nojuaja jaara naa rerequetesano quiritij, nojuajaari juhua Sesaaca norijosano quiniutianiya. Naacuajitij, pueya tojiyaquishano quiniutianiyari.

Narta Pueyaso pueya naacunaatucua taamueca pueya quiriquiani

⁸ Naajuhuj, parta Pueyaso pueya naacunaa cuaara quiiria tojishano pueya, rerequetesoo. Cuaara quiiria na sequesano miijia. Cuaara quiyaquiiria puera mashaca jereeca ratunuucua jitiinio. Cuaara quiiria cumaneecaacua jiaati-aashijia, jiyasohuaja na nohuasejonura, na sapojonuta na masenuranio. ⁹ Naajuhuj, nojori cuaara seetanujuanaa Pueyaso rupaa tojiijia quiiria, teyanocua tiuujia pa quiyacuajani. Naacuajitij, nojori jaara naa miijia quir-itij, ¿nojoritiucua casaacua cararosaariquiani? ¹⁰ Cunora, pueya cuaara senota jiyateyaquishaaria Pueyaso pueya naacunaa nojori quiniuria. Cuaara coteenu maninia niishishiria nojoriiri seetanujuanaa Pueyaso tojtiajaca. Nojori jaara maninia miijia pueya quiri, na nuhuaji cutara, nojori cuaara jiyatesaaria narta Pueyaso pueya naacunaa nojori quiniuria. ¹¹ Naajuhuj, Pueyaso pueya naacunaa niquio-cohua cuaara quiiria tojishano maajipohua, maja rimiaacatujuri. Cuaara quiiria niishiriojuaca, na sequesano miijia pueyaracaanunio. ¹² Cante Pueyaso pueya naacunaani, nojori cuaara jitiiaara saa niquiriyatu niquiocuaja. Cuaara quiiria necohua niishitiojua maninia casaa, na tojtiajaca necohua quiniuria. Naajuhuj, cuaara quiiria maninia jitiiaja na tiajia quinia pueya. ¹³ Naacuajitij, Pueyaso pueya naacunaa jaara maninia poonijioquia na naacusacari narta Pueyaso pueya, nojoriiri seetanujuanaa pueya tojishano pueya quiniutianiya. Naajuhuj, nojoriiri socua jiyanohua Jesucristoocua tiuujicara jatanutianiya, na puereyaquiniutia nojori poonijionura pa Jiyaniijia.

Jesucristojiniji Pueyaso niishitishano pueyani, paari nocua tiuujiacani

¹⁴⁻¹⁵ Timoteonaa, janiyari quiocua naquerejiyani. Naajaa, janiyari quiara naajiya nioni. Naacuajitij, janiya jaara tarishirini, janiyari paniani juhuacarijia quia niishiniuria taa quijia quia quiniutianiyani, Pueyaso pueya maanujinia quia quishacari. Pueyaso pueya maanucujaari pueyaracaanu

rishijia Pueyaso quiquiuo. Na saquiriojosano pueya nojori quiniuucua, nojoriiri na rupaa jiiitianaacuaja, nocuaji tacunaajaariuhuj. ¹⁶ Seetanujuanaa nocuaji jiuujiatesanoori Pueyaso niishitishano Jesucristojiniji pajaniya. Paari nio sequesanoocua tiuujiacani:

Pueyaso Niyanuuri pueyanora jataquiaari, na rupuenura pajaniya. Pueyaso Sohuanuuri pa niishitiquiaari, nojuajaari tojetaarucujanaa sesa miyashijia. Naajuhuj, Pueyaso seyacuajaari Jesu niquiquiaari na samiitiasacariuhua. Nojuajiniijiiri pohuatasaaquiaari Judiocuaca niquiara, taucuaca niquiarajuhuj. Pueyapueeri nocua tiuquuaari. Na Queeri na tacaniquiaariuhua Jiyaniijiajanaa na quiniuria.

4

Pueyaso Rupaa carteriquiano pueyajiniji pohuatasano

¹ Pueyaso Sohuanuuri maatia pa niishitiquiaa, nio pa quishacari nuhuaji noojiaqueya pueyari Pueyaso rupaa tarinitianutaniya tojinuu, tamaatia niishitiojosano nojori tojinuuucua. Nojoriiri seetanujuanaa sapojosaanutaniya naa nojori tojinuuucua samaruhua niishishano. ² Nojoriiri saponuujuaca pueya tojitiajacara quiniutianiya, noo pojori, sapuenu juhua maninia niquishano pueyatej. Cuno saponuujuacaari tariucua sesa miiniuucua jiiitiquiono. Majaari tari na niishitiuniu caririquiniu. ³ Cuno pojoriiri pueya niishitiojojua maja na caminiuria. Niishitiojonuuquiaajaariuhuj maja pueya miaquenura noojiaqueya miaquesanojuhuj, teyano Pueyaso shipiniquiaari Jesuucua tiuujiacaracuajani, cante seetanu rupaajanaa niishijiacacuajani. Cuno miaquesanocuajaari pa timitiasocoriquiano, Pueyaso pa sequenura, “paacarasho”. ⁴ Puetunu Pueyaso shipinishano casaajanaari maninia. Puetunu miaquesano casaajanaa cuaara puereyaquishaaria miaquenu, paa jaara co-teenu nocuara Pueyaso sequereni, “paacarasho”. ⁵ Pueyaso rupaacua tiuujiaca pa quishacari, naacuajitij, nocuara pa secojosacari, Pueyasoori na jiyatequiaa maninia na quiniuria pajaniyara.

Jesucristora poonijiona pueyanotucua taamueca pueyano quiriquiani

⁶ Pueyaracaanu parta Pueyaso pueya quia niishitiojoriquia nio cua rootasano quiajaniya. Naajuhuj, pueyaracaanu tama quia cuaqueyajaaja quia cumaquiriquia Jesucristojiniji pa niishishano rupaata, tama Jesucristojuaaja rootasano-tanio, taa quia tojiquiaacuajanoj. Quiaa jaara naa miijia quir-itij, quiaari maninia poonijiona quiniutianiya Jesucristora.

⁷ Majaari najuhuana tariucuacaanu supuetanaa pohu-
atanuusano tojjia quia quiniu, najuhuana tama pueya ni-
ishishanojuaajanio. Majaari cuno tojiniuucua quia co-
jenu najuhanaj. Jiyanohua quia jiaatiare cutara, saaja
Pueyaso tojjia quia quiniuria. Naa miiniu quia saniniuji-
uri jiyanohua, seetanujuanaa Pueyaso panijia quia quini-
uria. ⁸ Pueyari queraatia casaa miiniu niishiya, cumueeca
pueya nojori quiniuria. Supuetanaari pueyaracaanu nanoo-
joquiaari na cuaqueya na jiyartuutenura, cumueeca na
quiniuria. Cunoori maniniacuaja pa cuaqueyara, mijiria
pa quishacari. Saniniuujia, socua jiyanohua maninia cu-
taraari Pueyaso panijia pa quiniuria seetanujuanaa. Cunoori
jiyanohua maninia, mijiria pa quishacariria, Pueyaso shuriu-
cua pa quishacaririjahuaj. ⁹ Nio cua sequesanoori seetanu-
juanaa. Puetunu pueyajanaa cuara na tojiiria. ¹⁰ Cunora,
pueya jaara pa miitariquia, naajaa, paari jiyanohua pooni-
jioquiaa pueya pa tojitiniuria Pueyaso rupaani. Majaari
naa miiniu pa tarinitianu. Paacuaajaari niishiyani, paari
pueyaracaanu rishijia Pueyasocua tiuyani. Nojuacuajaari
puetunu pueyacuaji Tacunajanaa, canapue cutarate nocua
tiuujiacacuajani.

¹¹ Nio cua sequesano quiajaniya quia niishitiojore
pueya. Nojori quia nacasuriquia jiyanohua, na tojtianura
quiajaniya. ¹² Majaari pueya shanacunu quiocua, nojori
rerequetenura quiajaniya, mashaja quia quiniuucua. Saniya
maninia quijia quia quiriquia cutara, pueya jiaatianura
quiocua, juhua quiajaniya nojori quiniu paniniurijahuaj.
Naaratej, tama quia cuaqueyajaaja quia cojuare, taa quia
pocuaani, taa quia quiyani. Naajuhuj, seetanujuanaa
panijia quia quiri, Pueyaso rupaacua tiuujijahuaj. Majaari
rucuajeejojua quia quiniu. Naa maninia mijia quia
quiri, pueya jiaatianura quiocua. ¹³ Naacujitij, cua
tiuquiyaquishacarijia quiocua, pueya niquiara maatia
quia serojoriquia Pueyaso Rupaa. Parta Pueyaso pueya
quia nacasuriquia jiyanohua, Pueyaso tojtiajaca nojori
quiniuhara seetanujuanaa. Seetanujuanaa nojori quia
niishitiojoriquia maninia. ¹⁴ Pueyasocuaajaari na cumaaca
niquitioquiaari quiajaniya. Pueyaso Sohuanucuaajaari naa
pohuatequiaari Pueyaso pueya maanu jitianaa pueyatej,
nojori jaara niojoquiaari na juaashiquia quiocua, quia
jiyatesaanura Pueyasora poonijiona quia quiniuria. Cuno
cumaaca quiaa na jitiaani, quia poonijiotere pueyaracaanu.
Majaari najuhuana na jitianu.

¹⁵ Puetunu niya cua rootasanojuanaa quiajaniyani, cuno
tojijia quia quiriquia. Naa quia quiritij, puetunu pueyajanaa

niquiniuria taa seetanujuanaa socua maninia Pueyaso toji-
jiara quia quiyareeni. ¹⁶ Naacujitij, tama quioojiajaaja quia
cojuare. Naajuhuj, tama quia cuaqueyajaaja quia cojuare
seetanu rupaajanaa quia niishitiojonura pueya. Majaari
quia tarinitianu miiniu cua sequesano quiajaniya. Naacua-
jitij, quiaa jaara naa maninia miijia quiri, quiaari tama quia
cuaqueyajaaja jiyateya maninia Pueyaso pueyanora. Quia
tojitiajaca pueyari Pueyaso pueyara quiniutianiyajuhuj.

5

Paatucua taa jiitariquia parta Pueyaso pueyani

¹ Majaari quia saaquiapue quia nacasunu quia juaaniutia,
Pueyaso rupaa nojori tojiyaquiniucua. Nojori quia naca-
sure jacaria, juhua quia que. Mashiquiori quia nacasure
jacariajuhuj, juhua quia tapueyocuaca. ² Naajuhuj, mo-
tajoori quia nacasure juhua quia nucua. Niyacoojori quia
nacasure juhua quia rimiatuhujuhuj, maja nojoriicua quia
jiaatianuta.

³ Mashiquiopue jaara tojetaarucujanaa niquiohuaju
quiri, jinianuhujunio, Pueyaso pueya cuaara nojori
naacuura. ⁴ Saniniuujia, mashiquio jaara niquiohuaraca
quiriquia, jinianuhuaraca soj, cuno pojori cuaara coteenu
tama na nucuaajaaja cojuatunu niishiiria, na jijiuhuj.
Naacujitij, necohua cuaara na queya cojuaara, taa na queya
cojuaquiaari nojoricuaani, naatujoori nojori quishacari.
Pueyasoori naa na queyacuara taraajecata timitiaja. ⁵ Noo
mashiquio, cante seetanujuanaa jiyopueejuni, nojuajaari
saaja Pueyasocua tiuuquiaa. Majaari na tarinitianu
secojonu juuca, niucuanio. ⁶ Noo mashiquio saniniuujia,
tama na cuaqueyajaaja shuquiritijiatej, nojuajaari tariucua
juhua macu Pueyasora, saminio na quishacarijia. ⁷ Parta
Pueyaso pueya quia niishitiojore nio cua rootasanojuhuj,
sesacaso nojori quiniuria. ⁸ Canapueeta na queecua, na
nucuaacua taraajeyaquijiani, tama na tiajinia quijiaca
pueyacuajuhuj, naa miijiacatej, nojoriiri Pueyaso Rupaa
tojiyashijiacara jiyaterohua tari tama nojori cuaqueyajaaja.
Naacujitij, nojoriiri socua tojetaarucujanaa sesa,
Pueyasocua tiuyaquijia pueyajiniji.

⁹ Mashiquio jaara Pueyaso pueya jiitianaa naacunara jiy-
atenu panishaare, cuno mashiquiopue cuaara quiiria tar-
iucua sesenta marijia shocotejono. Cuaara quiiria noo
mashiquio, cante saaja na camishano pueyanota quiquiaari
maninia pueyaracaanuni. ¹⁰ Cuno mashiquio cuaara niishis-
hano maaji quiiria, maninia miijia na quiniucua. Cuaara
quiiriajuhuj, cante maninia canashitijioquiaari necohuani.

Cuaara rucojuacaacua taraajeja quiiriajuhuaj, na tiajinia na maquiojoja. Cuaara maninia miijia quiiriajuhuaj, narta Pueyaso pueya niohuaca jeequejoja. Cuaara taraatia miishano pueyacuara taraajeja quiiriajuhuaj, nojori cumanijianajuhuj. Cuaara puetunu maninia na miiniujianganaa tarinitiaquijia quiiriajuhuaj.

¹¹ Saniniuujia, noo mashiquio, teyanote juhuanajuaja maja na shocotejonu sesenta marijiani, nojori cuaara jiyateyaquishaaria Pueyaso pueya jiiitianaa naacunaara. Nojori na naata Cristo samiritianu, niyacaaniuucua nojori jiaati-asacari. ¹² Naacuajitij, nojori camishacarihua, nojoriiri tari sesa miirii, nojori jatanuucua nojori sequesano saaja Jesucristora na poonijionura. ¹³ Naajuhuj, niyacoo naata mashiquio nojori quishacarijia, nojoriiri saaja rucuanefonu maniniucua, na tiuquiiionura puetunu tiacojuanaa. Naa tama na poonijosanojuaja na jiiitiaaquishacarijij, nojoriiri taajecatujuriria quijia. Majaari saaja taajecara na quiniu, juura tojiyajaa pueya sequesanoori, tariucua na caminiujiuniu tamasacarij. Naajuhuj, sacuaraatia neteyocoyari juhua paateca, na taajetenura pueya, na caminiujiushacari jiyasohuaja niishishano casaa. ¹⁴ Naaratej, janiyari cunora paniyani niyacoojori naata mashiquiopue cuaara camiyora neyacaara. Cuaara muetuuraajuahuaj. Cuaara na tia camarucua quiquioora. Nojori jaara naa maninia miiritij, nojori miishanoori maja quenaaja na quiniu quiniutianiya pa paraa rimiaaquenura Pueyaso pueyacuara. ¹⁵ Noojiaqueya niyacoojori naata mashiquiopueeri Pueyaso tojiniu tarinitiacanu tari, Satanás tojijiaca nojori quiniuria saniniuujia.

¹⁶ Pa Jiyaniiijaacua tiuujiaa maajipohuajinijinio jaara tama na pueyajinijiniojuaja jiiitiare mashiquiopue, nojori cuaara na naacuura tamajaaja. Naacuajitij, majaari Pueyaso pueya cojetanu quiniutianiya nojori, jiyopueraca nojori quishacari. Naacuajitij, Pueyaso pueyari na naata naacunu cutara noo mashiquiopue, canapuete tojetaarucujanaa jiyopueejuni.

¹⁷ Pueyaso pueya jiiitianaa, noo pojori canapuete maninia jiiitianaa narta Pueyaso pueyani, nojori cuaara narta Pueyaso pueya tojishano quiiria. Naajuhuj, nojori cuaara nareja niqutiosaaria, na panishano nojori jiiitanura. Pueyaso pueya maanu jiiitianaajinijinio, canapuete Pueyaso rupaa pohuatanaacuajani, Pueyaso rupaa niishitiojonaanio, nojori cutara cuaara socua queraatia niqutiosaaria, maninia poonijosano nojori miiniuucua. ¹⁸ Tariucuaaanu Pueyaso Rupaajinia naajiotasanoori naa niishitiojiyajuahuaj, naa na sequesacari miriqui:

“Majaari quia juunu rupaa mishi quionu na miaqueyaquini-
uria quia casaa, quia rapijotesacari quia natau, na
jocuanura na sucujiniji”.

Naa sequeyajaarihuaj:

“Poonijotesano pueyano cuaara niquitiosaaria na pooni-
jionu sami”.

¹⁹ Pueyano jaara saquiriojotariquia Pueyaso pueya maanu jiitianaacuara, majaari na tojinu, jaara nocuara cojitiaaquiri saquiriojotanu. Querajaa pueya jaara nocuara cojitiare saquiriojotanu, cuno pojori sequesano cutaraari seetanujuanaa.

²⁰ Naacuajitij, Pueyaso pueya maanu jiitianaajininio jaara sesa miiriquia, Pueyaso pueya maanu niquiara quia nacasurenoj, puetunu narta Pueyaso pueyjanaa puerenura, maja sesa nojori miiniurijuhuj.

²¹ Timoteonaa, janiyari nio quia sequeya Pueyaso niquiarani, Jesucristo niquiarajuhuj, na saquiriojosano seya niquiaranio. Nio cua rootasano quia tojiri. Majaari maninia, paa jaara ritia nacasure parta Pueyaso pueyani, seetanujuanaa maninia pa niishiyaquishacari na miishano.

Naajuhuj, majaari pa naata jiuujiaaniu pa panishano pueyano, nojuaja jaara sesa miiri. Naacuajitij, majaari rimiajata miijionu sacuaraatia.

²² Naajuhuj, majaari senota quia juaashiquia quia nianu quia niishishoo pueyanocua, nojuaja quia jiyatenura Pueyaso pueya jiitianara.

Maninia cutaraari coteenu quia niishiniuria taamueca pueyanotenojoni, maja sesa miijia pueyano quia jiyatenura Pueyaso pueya jiitianara. Quiaa jaara naa Pueyaso pueya jiitianara jiyatere quia niishiyaquishoo pueyanotej,

Pueyasoori quiocua tiutianutaniya cuno pueyano miishano sesa. Cunora quia sequeyanijia, tama quia cuaqueyajaaja quia cojuare, tojetaarucujanaa sesa miyaquijia quia quiniuria.

²³ Timoteonaa, naa quia seeco noojonuucuatej, majaari saaja mohuaca ratunu. Sequeyarucua cusosu quia quiniucua, secaja vino quia raturiquiajuhuaj quia jiniacuma na jeecanura.

²⁴ Noojiaqueya pueya, sesa nojori miishanoori maatia niishishanocujaja, Pueyaso saniitionu juuca quiyaquishacar-
ijia. Tamasacara saniniuujia, sesa nojori miishanoori maja na niishishaanu quiniutianiya juhuanujuaja, Pueyaso cuaara nojori nujuatejore na tacojijiaatijia, na nequesoreeso-
coriquiano.

²⁵ Naajaarihuaj, maninia pa miishanoori maatia niishishano mijiria. Jiyasohuaja maninia pa miishanojuhuaj, cunoori na nuhuaji niishishaanutaniya maatia-
juhuaj.

6

¹ Parta Pueyaso pueyajinijinio, canapuate poonijotesano pueyani, nojori cuaara na camarucua tojtiajaca quiiria. Nojori cuaara rerequeteyaquiiria na camarucua, na camarucua mariqui Pueyaso sesacareeri, pa niishitiojosanonio, na tojiyashijia na seru quiniuucua. ² Poonijotesano pueyano camarnu jaara Pueyaso pueyano quiriquia, juhua na seru-juhuaj, na seru cuaara na tojjia quiiria. Cuaara na rerequeteja quiyaquiiria, narta Pueyaso pueyano na camarnu quiniuucua. Nojuaja cuaara seetanujuanaa maninia poonijioora nera, na niishishacari na camarnucujaari narta panishano Pueyaso pueyano.

Cante seetanujuanaa shuquiriaatia quijiacani

Timoteonaa, nio cua sequesano quia niishitiojore pueya. Nojori quia shiniujiuri na tojtianurajuhuaaj. ³ Tamonu jaara tamaatia niishitiojoriquia cua niishitiojosanojiniji, nojuajaari tojetaarucujanaa moseeca. Pa Jiyaniijia Jesucristo rupaari jyanohua maninia. Na niishitiojosano pa tojishacari, cunoori pa naacuquiaa juhua Pueyaso pa quiniuria socua. ⁴ Cante cuno niishitiojosano ruuretaja tama na niishishanojuaaja na niishitiojonurani, nojuajaari tama na cuaqueyajaaja jyaniya nojuaja niishijia cutara. Nojuajaari juatitioonu porocujuhuaaj, Pueyaso rootasanojiniji na taacanusacari. Naa quijiaca pueya quishacaritij, nojoriiri juajiacara jataquiaa, nojoritia juayonuujutajaca shocotanuucua nojori. Nojoriiri juhuacatecara ruutaquetoquiaa na juayonuutanura. Sesacatoquiaajaariuhuaaj. Naajuhuaaj, nojoriiri najuhuaana soquequiaa, narta Pueyaso pueya naasucua sesa miiquiaa. ⁵ Nojoriiri juayonuujutanu tarinitiaaquiijica. Nojoriiri maja na naata maninia niishiriojonu socua. Nojoriiri maja na niishiniu seetanu rupaajanaa Pueyasojiniji. Nojoriiri Pueyaso pueya jiiitajacara quiniu paniya, nojori jyanishacari nojoriiri naacuaaji jyanohua casamiriacara quiniutianiya. ⁶ Taaquiririnij, Pueyasocua tiuujica pa quishacari, paacuaaquiniatejaj seetanujuanaa juhua queraatia casamiriaca quijiacani. Paacujaari shuquiriaatia quijiaca Pueyaso rupaacua tiuujica pa quishacarini, juhujaniya quijiaca pa quishacarijuhuaj pa jiiitiasano casaaniy-
 ojuata. ⁷ Paacujaari juhuasunucua roosaaquiaari mijiriani. Naajuhuaaj, paari juhuasunucua tacateriquianohuani. ⁸ Naaratej, paa jaara pa miaquesocoriquiano jiiitariquiani, paa jaara pa cushishocoriquiano jiiitariquijuhuaaj, saa cunotaja shuquiriaatia pa quirij. ⁹ Saniniuujia, noo pojori, jyanohua casamiriaca quiniuucua jiaatijacatej, nojoriiri

maja na niishiniu rejetenu, na panishano na miyaquini-
 uria. Naacuajitij, nojoriiri cocuaatia miiquiaa. Nojori-
 iri juhua norijosaaquiaa, najuhuana casamiicua nojori ji-
 aatiasacari, sesa casaacuanio. Puetunu cuno sesa casaa-
 janaari pueya sesoquiaa, nojori saniitiosaanura taraatia.
¹⁰ Cumanecaacua jiaatianu jiyano huani, cuniquiji supue-
 jaari puetunu sesa casaa pa miiniurijanaa. Naacuajitij, noo-
 jiaqueya parta Pueyaso pueyajiniijinioori Pueyaso rupaa to-
 jiniu tarinitiacanu tari. Nojoriiri tama nojori cuaqueyajaaja
 miitiquiaa naquiya, naa cumanecaacua jiaatiajaca nojori
 quishacaritij. Naaratej Timoteonaa, majaari cumanecaacua
 jiaatiaja quia quiniu.

*Pablo shiniujiushacari Timoteo, Pueyaso tojjia na quini-
 uria pueyaracaanu*

¹¹ Quiajaniya Timoteonaa, quiaacuajaari Pueyaso
 saquiriojosano pueyano. Naaratej, puetunu sesa casaajanaa
 miyashijia quia quiri. Tojetaarucuajanaa saaja maninia
 miijia quia quiri, juhua pa Jiyaniijiaja. Pueyasocua
 tiuujia quia quiri socua. Socua panijia quia quirijiuhuj.
 Puetunu casaajanaa rejeretaja quia quirijiuhuj. Jacaria
 pocuaja quia quirijiuhuj, maja pueya rerequeteja. ¹² Pa
 paraca nujuataja quia quiriquia, jiyano huana quia tiuuniutia
 Pueyaso rupaacua. Pueyasocuajaari quia saquiriojoquiaari
 na pueyano quia quiniuria. Cunora, quiaari queraatia
 pueya niquiara pohuataquiaari Jesucristoocua quia
 tiuuniujiniji. Naa pueyaracaanu rishijiarano quia
 quishacaritij, cunora, majaari Pueyaso niqutiojonu
 panishano quiajaniya jaaretenu. ¹³ Quiaacuajaari niishiya
 taa Jesucristo seetanujuanaa pohuataquiaari Poncio
 Pilato niquiaracuajani, nojuajaari seetanujuanaa Pueyaso
 Niyanu. Naajaa, nojuajaari niishiquiaari nojuajaari
 cunora mosaanutaniya. Na Que Pueyasocuajaari na
 samiitiani quiaariuhua. Pueyasocuajaari saminiora jiyateja
 puetunu saminio casaajanaa. Naa quia niishishacaritij
 Timoteonaa, janiyari nio quia sequeya Pueyaso niquiarani,
 pa Jiyaniijia niquiarajuhuj. Cua tojjiri. ¹⁴ Puetunu cua
 rootasano quiajaniyajanaa quia tojjiri. Majaari na jataniniu
 quenaaja, pa Jiyaniijia mariqui quia niishitiojosano
 tamacareeri. Taa cua rootaa quiajaniyacujani,
 na tojjia quia quiri pueyaracaanu, pa Jiyaniijia
 Jesucristo cuara tiuquiriohuajaatijia, Jiyaniijiajanaa na
 quiniuria. ¹⁵ Na Que Pueyasoori na tiuquitiniutianiya na
 panishacari, taa na sequequiaaricujani. Pueyasocuajaari
 jiyano huana pa timitiasano, saaja maninia na quiniuucua.
 Nojuajanaari Jiyaniijia. Nojuajaari puetunu tamasaca

jiyaniijianucujanaa Jiyaniijia. Nojuajaari camarucujiniji Camarnujuanaa cutara. ¹⁶ Saaja nojuajaari pueyaracaanu quijiajuhanajaj. Majaari na supueni quiquiaari. Majaari na shaajenu quiniutianiyajuhuj. Nojuajaari jiyanohua na shacantuuca cumaacajinia quijiajuhanajaj. Cunora, majaari quenaaja tamonu pueyano na naata nocua catecanonu. ¿Canteeri na niquiquiaari quenaajani? Shaaqui. Pueyanoori maja na naata na niquiniu. ¡Nojuaja cuara pueyaracaanu timitiasaaria! ¡Nojuajaari namitia na cumaaca jiitianajuhuanajaj! Cuaara naa quiiria pueyaracaanutej.

¹⁷ Timoteonaa, parta Pueyaso pueya quia tojtiri nio, noo pojori, queraatia casamiriacatej. Nojori cuara niishiiria maja pueya shocotejaca nojori quiniuria, casamiriaca nojori quiniucua. Nojori cuara niishiiriajuhuaj, maja na casamicua nojori tiuuniuria, nojori jyanishacari nojoriiri pueyaracaanu shuquiriaatia quijiaa quiniutianiya casamiriaca nojori quiniucua. Pa jiitiasano casamiiri shaajeriquiano. Nojori cuara Pueyasoocua tiuuria cutara. Nojuajaari capora cutara, na niqutionura puetunu pa panishano casaajanaa, shuquiriaatia pa quiniuria. ¹⁸ Cunora, nojori quia niishitiojore, pueyaracaanu maninia miijiaa nojori quiniuria. Naatej, taa queraatia casamiriacatucuaa nojorini, maninia nojori miishano cuara naa queraatia quiiriajuhuaj. Nojori cuara ritia niqutiojuaca quiiria nojori jiitiasanojiniji, narta Pueyaso pueyano jiitiaaquishacari na panishano. ¹⁹ Naa capora nojori quishacaritij, nojoriiri juhua tari jiyocuacaanu racataa nojori casaa. Naacujitij, nojoriiri seetanujuanaa shuquiriaatia quijiaa quiniutianiya pueyaracaanu, mijiria, jiyocuacaanunio.

Pablo rootasano Timoteo, naajionu na tucuatasaari

²⁰ Timoteonaa, Pueyasocujajaari quia jiyatequiaari na rupajiniji pohuatana quia quiniuria. Maninia quia cojuare seetanu Pueyaso rupaaajanaa. Majaari najuhuaana tama pueya niishitiojosanojuaja tojijia quia quiniu. Noo niishishanojuhuaj, pueya sequesano: “Seetanu niishijajanaa niishishano cutaratej”, majaari cuno tojiniu. Cuno niishishanoori seetanu niishishanojuanaa paraca, najuhuaanaari. ²¹ Noojiaqueya parta Pueyaso pueyari Pueyaso rupaa tojiniu tarinitiacanu tari, cuno najuhuaana niishishanoocua nojori tiuuniucua. Niojuanaa Timoteonaa.

Pa Jiyaniijia cuara quia cumaquiiria.

TANEE PABLO NAAJIONEE TIMOTEOCUARA

Pablo saruhuatasacari Timoteo

¹ Janiyari Pabloni, Jesucristo jiyaramiquishano, taa Pueyaso paniquiaaricujani. Naacuajitij, janiyari Jesucristojiniji pohuatanara jiyatesaaquiaarini, pueya niishiniuria seetanujuanaa, nojoriiri pueyaracaanu rishijiacara jiyatesaanutaniya Jesucristoocua nojori tiuushacari. ² Naaratej quiyanu Timoteonaa, janiyari nio naajiya quiarani. Janiyari quia panitiaani pa Que Pueyaso, pa Jiyaniijia Jesucristojuhuaaj, nojori cuaara cumaquiiria quiajaniya. Naajuhuaaj, nojori cuaara taraajeera quiocua, nojori cuaara pueyaracaanu quioojia cajitiirijuhuaaj shuquiriaatia quia quiniuria.

Jesucristojiniji quia pohuatariquia tamasaca

³ Pueyaso cua secojosacari pueyaracaanu, juuca, niucuanio, janiyari quiocuara secojoquiaani. Cua niishiriojosacari quiajaniya, maninia Pueyaso tojijia quia quiniucua, janiyari Pueyaso sequequiaani, "paacarasho". Janiyari nera shitimia poonijioquiaa coojia najiquitishooni, taa pa supuetanaa tojitiaquiaari Pueyasocuaani. ⁴ Majaari cua niyajetanu quiquiaa quia nujuquenu cucua, janiya jaara quia shuriucujaji quiaquiaarini. Janiyari cunora jiyanojua jiaatiaa cua niquniuria quiajaniyani, shuquiriaatia cua quiniuria quia shuriucua. ⁵ Janiyacuajaari niishiyani quiaari seetanujuanaa pa Jiyaniijiaacua tiuujiacuaja. Quia ji Loida, quia nucua Eunicenio, nojoriiri coteenujuanaa quiocuaji Pueyasocua tiuujiaa quiquiaari. Majaari cua taacanunu quiaari seetanujuanaa Jesucristoocua tiuujia quiquiaajuhuaaj, taa nojori quiquiaaricuaani.

⁶ Pueyasocuaajaari na cumaaca niqutioquiaari quiajaniya, cua secojosacari quiocuara, cua juaashiquia cua niasacari quiocua. Naacuajitij, quiaacuajaari Pueyaso Sohuanu cumaacaraca quioojiajinia. Naaratej, Pueyaso Sohuanu quia shanacure quiocua, na cumaaca na poonijiotenura socua quioojiajinia. ⁷ Pueyasoori maja na niqutionu quiquiaari na Sohuanu, puereja pa quiniuria. Na Sohuanu niqutioquiaari pajaniya cutaraari, cumaacaraca pa quiniuria, panijiaa pa quiniuriajuhuaaj, maninia niishiriojojuacarano. ⁸ Naacuajitij, majaari quia caririquiniu pa Jiyaniijia Jesucristojiniji quia poojotanura. Naajuhuaaj, majaari cua naaqui quia caririquiniu, nujuatejojuajinia cua

nujuatesaanuucua Jesucristojiniji cua pohuatanuucua. Pueyaso cumaquishacari quiajaniya, juhuajaniya quia rejeretare, quiaa jaara naquiya miishaariquiajuhuaj, Jesucristojiniji quia pohuatasacari. ⁹ Pueyasocuajaari pa jiyatequiaari na pueyara. Nojuajaari pa saquiriojoquiaari saa neraja pa quiniuria. Na jiyanooni pajaniani, majaari na quiniu quiquiaari maninia miijiaca pa quiniuucua juucua. Maja. Nojuacuajaari naa pa jiyanooquiaari saaja naa na miiniu paniniuucua, jiyanoojia na quiniuucua juhuaj. Jiya shipiniyaquishacarijia, Pueyasoori jiyacari niishiriojoquiaari taa na jiyanooniutianiya pajaniani, Jesucristo cusosacari pa niti. ¹⁰ Quiari naataja pocuaji Tacuna Jesucristo niniuucua, Pueyasoori pa niishitiquiaari taate na naata jiyanooni pajaniani. Cunora, Jesucristoori pa niti cusoquiaari. Na samiitiasacariuhua, nojuajaari cusonu shocotaquiaari. Naacuajitij, nocua pa tiushacari, paari pueyaracaanu rishijara jiyatesaanutaniyani.

¹¹ Pueya niishiniuria nio rupaa, Pueyasoori cunora na jiyaramiquishano pueyanora cua jiyatequiaari, pueya cua niishitiojonura Jesucristojiniji. ¹² Naacuajitij, janiyari niya naquiya miya nujuatejojuajiniani. Naajaa, majaari cua caririqiniu. Janiyacuajaari niishiyani canaacua cua tiuquiaarini. Nojuacuajaari pocuaji Tacuna Jesucristo. Cunora, janiyari seetanujuanaa niishiyani, nojuajaari cumaacaraca na cojuanura janiya, nojuaja cuara tiuquiriohuajaatijia. Naajuhua, nojuacuajaari cumaacaraca na jataniniuria pajaniani, tojetaarucujanaa quiarinio pueya pa quiniuria na tiuquishacariuhua pocua.

¹³ Timoteonaa, maninia niishitiojosano tojjia quia quiriquia taa cua niishitiojoquiaari quiajanuacujani. Naa quia miiriquia Pueyaso rupaacua tiuujia quia quishacari, pueya panijia quia quiniuucua juhuaj, Jesucristo rupesano pa quiniuucua. ¹⁴ Pueyasocuajaari quia niishitiquiaari seetanu rupaajanaa. Pueyaso Sohuanu quiniuucua poojiajinia na cumaquiniuria pajaniani, cuno niishitiojosano quia jiitiare maninia, maja tamaatiara na jatanishaanura.

¹⁵ Quiaacuajaari tari niishiya, puetunu Asia jiyajinijinio parta Pueyaso pueyari cua tiujiatuquiaari tamajaaja. Majaari na naacutunu paniniu quiquianu janiya. Nojorijinijiniori quiquianujuhua Figelo, Hermógenesnio. ¹⁶⁻¹⁷ Saniniuujia, Onesiforo cutaraari cucua tiuquitasucanu. Cunora, pa Jiyaniijia cuara nocua taraajeera, puetunu na tiajinia quijiacaacuajuhua. Nojuaja jaara Roma tiacajinia tiuquiquianu, nojuajaari ritia cotecanu na pajenura janiya, cuara cua riuriatarejaatijia. Jaara cua

riuriatacanu, nojuajaari coojia cajitiquianu. Nojuajaari pueyaracaanu cucua tiuquiijiocanu niya nujuatejojuajinia, na naacunura janiya. Majaari cucuaji na caririquiniu quiquianu nujuatesano cua quishacari. ¹⁸ Quiaacuajaari niishiyajuhuaaj taa nojuaja naacuquiaari pajaniyacujani, Éfeso tiacajinia pa quishacari. Naa maninia na miiniuucua pajaniyacuaatej, pa Jiyaniijia tiuquishacariuhua pocua, nojuaja cuaara maninia miiria Onesíforo saniniuujia.

2

Jesucristora poonijiojua quia quiri quia puereyaquiniutia

¹ Quiajaniya saniniuujia quianunaa, quioojia quia cumaquiriquia Jesucristo niqutiosano cumaacata. ² Nocua tiuushano pueya quiarta Pueyaso pueyajinijinio quia niishitiojore Pueyaso rupaa, nojori niishitiojonura tamasaca saniniuujia. Cuno maninia pueya quia niishitiojore puetunu Pueyaso rupaaajanaa, taa quia tojiquiaari queraatia pueya niquiara cua pohuatasacaricujani.

³ Juhuaaniya naquiya miiniu rejeretaja quia quiriquia juhua pa Jiyaniijia Jesucristo soldado, puereyashijia.

⁴ Pueyano jaara soldadora saquiriojosaare, cuno pueyanoori maja na naata tama na panishanojuaja miiniu socua. Nojuajaari pueyaracaanu na camarnu tojjia, na camarnu timitianura nojuaja. Naa pa Jiyaniijia tojjia quia quiriquiajuhuaj Timoteonaa.

⁵ Naajuhuaaj, pueya tacuarishijosacari, nojori cuaara quiiria tacuarishijionu camarnu tojjia. Tamonu jaara shocotare na tojiaquiniutia camarnu, cuno na shocotanuuri najuhuanaj. Naacuajitij, majaari na niqutiosaanu casaa, sesa na miiniutia na shocotasacari.

⁶ Nio quia niishirijihuaj: cante cuhuariquia cuhuatajani, nojuaja cuaara coteenu na senoosanojiniji racataara na panishano. Na nuhuaji cutara, nojuaja na naata tamasaca niqutiojonu na senoosanojiniji.

⁷ Nio miriqui cua sequesanoocua quia niishiriojore. Pa Jiyaniijiacuajaari quia niishitiniutianiya puetunujuanaa.

⁸ Majaari nio niyjetanu: Jesucristoori macujiniji samiitianishaaquiaariuhua, Pueyaso Niyanu na quiniuucua. Pueyano quiquiaariijaariuhuaaj. Nojuacuajaari pa supuetanaa jiyaniijia David niquihuacuajinio supueno pueyano quiquiaari. Naacuajitij, nojuajaari Pueyaso Jiyarosano quiquiaari mijiria quinia pueya niti na mosaanura. Cunocuajaari cua pohuatasano Pueyaso Rupaa.

⁹ Naa cua poojotanuucuatej, janiyari naquiya miyani. Janiyari cumayocuata moronucua quiyajaaniuhuaaj, juhua sesa miijia. Naajaa, Pueyaso rupaa cutaraari maja na

naata sanaajasaanu. ¹⁰ Cunora, janiyari puetunu naquiya miiniujuanaa rejeretaquiaani, Pueyaso saquiriojosano pueya tojiniuria Jesucristojiniji. Naacuajitij, nojoriiri na naata nocua tiuuniu, Pueyaso pueyara nojori jiyatesaanurajuhua, taa na jatanishano pueya pa quiyacuaani. Naacuajitij, paari mariyata shacantuuca quijiacara jatanishaanutaniyani, Jesucristota pa quiniuria pueyaracaanu.

¹¹ Nio sequesanoori seetanujuaanaa:

Jesucristoocua pa tiushacari, Pueyasoori Neyanu mosaanu jiyateya pa niti na quiniuria sesa pa miishanojiniji. Naacuajitij, Jesucristo mosaanu jaara pocuara quiquiaari, na samiitianuhuari pajaniyara quiyajuhua, pueyaracaanu rishiriquiano pa quiniuria. ¹² Naajuhua, paa jaara naquiya miitiasariquia nocua pa tiuuniuucua, nojuajaari camarucua pa jiyatenutaniya narta jiyaniijianucua pa quiniuria. Saniniuujia, pa jaara pa Jiyaniijia tamacariquia Pueyaso niishiyashijiaca pueya niquiarani, nojuajaari pa tamacanutaniyajuhua. ¹³ Paa jaara na sequesano tojiyashijiaca quiriqiuani, naajaa, nojuajaari pueyaracaanu na sequesano miijia. Pueyasoori na sequesano jataniyashijia cutara.

Taamueca quiijiate Pueyaso shuquiritiasano nera poonijionani

¹⁴ Parta Pueyaso pueya quia niishitiojorohuarohua maja najuhua nojori juayonuujutanura tamaatia niishitiojosanoocua. Jiyanohua quia nacasure nojori Pueyaso niquiara, maja naa nojori nacojonura najuhua supuetanaa niishitiojosanoocua. Naa tamaatia niishitiojosanoocua juayonuujutanuni, cunoori maja na cumaquiniu na tojiniaa. Socua nojori sesoya cutaraari. ¹⁵ Tama quia cuaqueyajaaja quia cojuare, saa maninijia quia niishitiojonura Pueyasojiniji cuno seetanu rupaaanaa. Naacuajitij, Pueyasoori quia timitianutaniya nera poonijiona maniniu quia quiniuucua. Majaari capa quia niishitiojonu, quiaa mariqui tamajaaja caririquiriiri. ¹⁶ Naaratej, majaari najuhua tama mijiria pueya niishishanojuaaja quia tojinu. Pueya tojishacari cuno, nojoriiri socua jiyacatenutaniya Pueyaso tojiyashijiaca nojori quiniuria. ¹⁷ Cuno najuhua niishitiojosanoori jiyanohua puereeta. Cunoori Pueyaso pueya tajinia paaqueja, na sesonura puetunu Pueyaso pueya maanujuaanaa. Naa nojori tajinia paaqueyari taa pueyano cusojuaja sapueja pueyano cuaqueya moquijiaquiaacuaani, na camaru na cusojuanura. Himeneo, Filetonio, nojoriiri naa miiquioya quiarijia.

¹⁸ Nojoriiri seetanu rupaajanaa jataniquianu tamaatiara. Nojoriiri pueya niishitiojiya, paanaari tari tojetaarucuajanaa samiitianishanocujani. Naacujitij, majanaari pa cuaqueya jatanishaanu quiniutianiya, shacantuuca cuaqueyaraca pa quiniuria taa pa Jiyaniijiacuaani. Naa nojori niishitiojosacari najuhuanatej, nojoriiri noojiaqueya Pueyaso pueya cushitiojiya, nojori tiuyaquiniuria pa Jiyaniijia sequesanoocua. ¹⁹ Naajaa, Pueyasojuanaacujajaari pa niishitiquiaari na rupaari seetanujuanaa. Majaari na naata jatanishaanu. Naa naajiotasano quiyacuajaari:

“Pa Jiyaniijiaari na saquiriojosano pueya niishiyacuaja”.

Naa naajiotasanoori quiyajuhuj:

“Canapuate pa Jiyaniijia Jesucristoocua tiuujiacani, nojori cuara sesa na miijionu tarinitiaara”.

²⁰ Sanajanaa, cua tojiri. Jiyanohua queraatia casamiriaca pueyano tiajina, cuno tiajiniaari maja saaja orojiniji shipinijosano coshiquia quiniu, miacojuaanio, platajiniji casaanio. Puetunu tamaatia casaajiniji shipinijosano casamijianaari quijia. Quijiajaariuhua mati, suruhuatuu numajiniji quejasano. Quijiajaariuhua maraujiniji panishano patacocua, conaanio. Puetunu cuno casamijinijiniojuanaani, noojiaqueyari racatasano saaja masu miaquetejarano quiya, na raatojotajaranonio. Quiyajaariuhua rucucuaacujaji casaa, rucucua cajitija. ²¹ Paari naajuhuj. Paa jaara tama pa cuaqueyajaaja cojuariquia tojetaarucuajanaa sesa pa miiniuucujini, saaja pa Jiyaniijiaari pa quiniuriajuhuaj, naacujitij, pa naata juhua pa Jiyaniijia timitiasano tohuatashinijojua quiniu. Naacujitij, pa Jiyaniijia na naata poonijiotenu pajaniya puetunu maninia casaajanaa pa miiniuria.

²² Sanajanaa, quiaacuajaari niishiya, casaa miiniuucua jiaatiajacate mashiquiorini. Puetunu cuno sesa niishiriojosanojuanaa quia tarinitiariquia. Saniniuujia, saaja maninia miijia quia quiriquia. Saaja Pueyaso rupaacua tiuujia quia quiriquia, pueya panijiajuhuaj. Jiyanoojia quia quiriquiajuhuaj. Naa quia quiriquia, taa puetunu Pueyaso jiyatesano sesa miyashijiaca pueyajanaa miiquiaacuaani, pa Jiyaniijiaacua nojori tiuuniuucua. ²³ Pueya jaara nacojoriquia nojori niishiyaquishoo casaajiniji najuhuanaj, nojori quia ruuretare saaja, nojori jaara quia nequesoretare cuno casaajiniji. Quiaacuajaari niishiya, pueyari jiyano casaacua paracaatiojua. ²⁴ Pueyasora poonijiojua pueyano cuara quiaquiria pueya paracaaja. Saniya cuara quiiria cutara puetunu pueya panijiajanaa. Cuara quiiriajuhua maninia niishitiojojua. Cuara juhuajaniya rejeretaja quiiria, tamasaca jaara na taajetere. ²⁵ Cuara

Pueyaso rupaa tojiyashijiaca nacasuura jacaria, nojori na paniniutia, maja nojori na juaaniutia. Naa quia miishacari, Pueyaso naasucuaari nojori jiuujia tacatonutaniya seetanu rupaajanaa niishijiaca nojori quiniuria. ²⁶ Naacujitij, nojoriiri maninia niishiriojojuaca quiniutianiya, nojori jaareteenura Sesaacaacuaji, maja Sesaaca miitiniuria nojori taa na paniyacujani.

3

Taa quijiaca mijiria quiniaa quiniutianiya quera jiya puequesacarini

¹ Quia niishirijihua Timoteonaa, jiya puequenu panishacari, pueyari socua jiyacatenutaniya sesa miijiacara. ² Pueyari saa tama nerajaaja niishiriojojuaca quiniutianiya. Majaari tamonura na niishiriojonu quiniutianiya. Pueyari queraatia cumaneeca jitianuucua jiaatiajaca quiniutianiya-juhuj. Naajuhuj, pueyari najuhuana narta pueya niquiara pocuajaca quiniutianiya, na jyanishacari nojori cutara socua niishijiaca narta pueyajiniji, socua shanohua niquis-hano tamasacajinijinio. Pueyari Pueyaso sesacajaca quiniutianiya, narta pueya sesacajacajuhuj. Pueyari na queya tojiyashijiaca quiniutianiya. Majaari quenaaja pueya timitianu quiniutianiya maninia na miijiacara. Pueyari maninia miyashijiaca quiniutianiya, Pueyasojiniji maninia casaa rerequetejaca nojori quiniuucua. ³ Naajuhuj, majaari quenaaja na queya panijiaca pueya quiniu quiniutianiya, tapueyocuaca, tama necohuajaajanio. Pueyari tojetaarucujanaa jyanoyashijiaca quiniutianiya. Sacuaraatia rimiaacatuji quiniutianiyajaariuhuj. Naajuhuj, majaari quenaaja tama nojori cuaqueya panishanojuaaja rejetejaca pueya quiniu quiniutianiya. Pueyari naquiya narta pueya miijiacara quiniutianiya, nojoriicua na taraajeyaquiniutia. Pueyari puetunu maninia miijiacajanaa soojeaca quiniutianiyajuhuj. ⁴ Pueyari tama na cojiniaajaaja tacartajaca quiniutianiya. Pueyari cocuaatia casaa miijiacara quiniutianiya, mosanucua nojori quiniuucua. Pueyari juhujaniya quijiaca quiniutianiya, tama nojori cuaqueyajaaja shuquiritiajaca nojori quishacari. Shuquiriaatia pueya miishacari tama na panishanojuaaja pueyaracaanu, majaari jeya nojori quiniu quiniutianiya nojori shuquiritianura Pueyaso. ⁵ Pueyari sapuenu juhua Pueyaso pueya niquishaanutaniya. Naajaa, nojori miishanojiniji, maatia niishishaanutaniyari, nojoriiri Pueyaso cumaaca maseyaquiquiaari seetanujanaa jatanishano pueya nojori quiniuria. Cunora cua tojiri Timoteonaa. Majaari jiyano pueya quia rupenutej.

⁶ Tamasaca cuno pueyajinijini, nojoriiri tiaco tiuquiti-ajaca, noo maajipohua na sapojonura, najuhuana pueya pohuatasanoocua ritia tiuujiacatej. Cuno maajipohuari tama na cuaqueya miiniu panishanojuaaja rejeteyashijiaca. Naa sesa miijiaca nojori quiniuucatej, nojoriiri najuhuana tacaquioquiaa. Cunora, nojoriiri cuno sapojonuujuaaca tojitiaquiaa. ⁷ Cuno maajipohuari najuhuana pueyaracaanu tojitiaquiaa cuno sapojonuujuaaca niishitiojosano. Saniniuujia, majaari Jesucristojiniji seetanu rupaajanaa niishiji-acara nojori quiniu quiquiaa, Pueyaso jiyanooniuria nojori. ⁸ Cuno sapuenu juhua Pueyaso rupaa niishitiojonaari seetanu rupaajanaa ruuretaquiaa, taa nio shimiacuri, Janes, Jambres ruuretaquiaari supuetana Moiséscauani. Naacuajitij, nojori niishitiajaari juhua ninishiqui, sesa nojori miishano timitiajaca nojori quiniuucua. Seetanu rupaajanaa nojori tojiyaquiniuucua, pueya cuaara tojiyaquiiria nojori saniniu-ujia. Nojoricuajaari Jesucristoocua tiuyashijiaca. ⁹ Naajaa, majaari queraatia pueya tiuuniu quiniutianiya nojoriicua. Ritia niishishaanutaniyacujaari, nojoriiri seetanujuanaa niishiyashijiaca, taa pa supuetanaa niishiquiaaricuaani cuno shimiacuriiri sapojonuujuaaca.

Pablo tucuatascari naajionu, socua rootaa Timoteori

¹⁰ Timoteonaa, quiaacuajaari pueyaracaanu cua cojiquiaari maninia quia niishiniuria puetunu cua niishitiojosanojuanaa. Quiaacuajaari niishiya taa miijia cua quiquiaarini, pa Jiyaniijia cua shuquiritiniuria. Quiaari niishiyajuhuaaj taa seetanujuanaa pa Jiyaniijiaacua tiuujia cua quiquiaarini, jacaria pocuajajuhuaaj, pueya panijiano. Quiaari niishiyajuhuaaj, majaari coojia cua najiquitiniu quijiani, pueya miishacari naquiya janiya. ¹¹ Quiaari niishiyajuhuaaj taa cua miiiasaaquiaari Antioquiya tiacajiniani, Iconio tiacajiniajuhuaaj, Litra tiacajiniano. Seetanujuanaa, janiyari naquiya miishaaquiaarini. Naajaa, pa Jiyaniijiaari cucua taraajequiaari maninia na rishitiniuria janiya. ¹² Seetanujuanaa naquiya miishaanutaniyari puetunu noo pueyajanaa, tama na cuaqueyajaaja jiyatejaca saaja Jesucristo tojijiaca nojori quiniuriatej. ¹³ Saniniuujia, sesa miijiaca pueya, sapojonuujuaacanio, nojoriiri socua sesa miiniuria jiyacatenutaniya. Nojori sapojonuusacari tamasaca, nojoriiri naa tama na cuaqueyajaaja sapojonutaniyajaacujua.

¹⁴ Quiajaniya saniniuujia Timoteonaa, majaari quia cartenu puetunu maninia niishitiojosanojuanaa, taa quia niishitiojosaaquiaaricujani. Quiaacuajaari niishiya, cuno niishitiojosanoori seetanu rupaajanaa. Quiaari

niishiyajaacuhua j canapuate quia niishitiojoquiaarini.
¹⁵ Quiaacuaajaari quia naatujuajiniji tariucuacaanu Pueyaso
 Rupaa niishijia. Cunoori quia niishitiquiaari Jesucristoocua
 quia tiuuniuria, Pueyaso jiyanooshano pueyano quia
 quiniuria. ¹⁶ Puetunu Pueyaso Rupaaajanaacuaajaari
 Pueyaso naajiotanishano na pueya. Cunora, puetunu
 cuno rupaajanaari maninia pajaniyara. Cuno rupaari
 cumaacaraca na niishitiojonura pajaniya, na niishitiniuria
 pajaniyajuhua j pa miishanoori sesa, na nacasunura pajaniya
 maninia miijiaca pa quiniuhua. Pa rootaajaariuhua j
 tojetaarucuajanaa maninia miijiaca pa quiniuria.
¹⁷ Naacuaajitij, Pueyaso Rupaari Pueyasora poonijionaa
 pueya jeenucuaaja tojetaarucuajanaa, puetunu maninia
 casaa miijiacajanaa nojori quiniuria.

4

¹ Quiaacuaajaari niishiya, Jesucristo tiuquishacariuhua mi-
 jiria, Jiyaniijiajanaa na quiniuria, nojuajaari puetunu na
 tojtiajacajanaa nequesoreenutaniya mijiria pa miishano-
 jiniji, saminiucua, macunucuanio. Cunora, janiyari na
 niquiara, pa Que Pueyaso niquiara quia sequeya seetanu-
 juanaani. Cua tojiri. ² Majaari pueya niquiara Pueyaso
 rupaa pohuatanu quia tarinitianu. Pueyaracaanu quia po-
 huatariquia, naajaa, quia jyanishacari jiyacari naasucuaari
 maja maninia quia pohuatanura. Pueyaso rupaata quia
 niishitiri sesa miijiaca nojori miishanoori sesa Pueyasora.
 Pueyaso rupaa tojiyashijiaca quia nacasuriquia. Pueya quia
 shiniujiuriquia Pueyaso rupaacua nojori tiuuniuria seetanu-
 juanaa. Puetunu cunojuanaa quia miiriquia jacaria quia
 pocuanuta, maja juaaniutia. ³ Naa quia poojotariquia pueya
 niquiara, nojori tojinu panishacarijia Pueyaso rupaa. Na
 nuhuaji, pueyari seetanu rupaajiniji niishitiojosano tojinu
 paniyaquiniutianiya. Saaja na ruuretanutaniyajaariuhua j.
 Naa Pueyaso rupaa nojori tojinu paniyaquishacarijij, nojori-
 iri queraatia tamaatia niishitiojonuujuaca rerejotenutaniya,
 cuno pojori shuquiritiniuria nojori najuhuana pohuatasano-
 ta. ⁴ Nojoriiri seetanu Pueyaso rupaajanaa tarinitianu-
 taniya, najuhuana sapojonuusano tojtiajaca nojori quini-
 uria saniniuujia. ⁵ Quiajaniya saniniuujia, maninia ni-
 ishiritiojua quia quiriquia, maja quia sapojosaanurajuhua j.
 Naquiya miiniu rejeretaja quia quiriquia. Pueyaso rupaa
 Jesucristojiniji pohuatanuucua cojeja quia quiriquia, pueya
 tiuuniuria Jesucristoocua. Puetunu quia poonijiosanojuanaa
 Pueyasora quia tucuatere maninia, taa pa Jiyaniijia seque-
 quiaari quiajanuacujani.

⁶ Janiya saniniuujia, janiyari quera quianutaniya jiyocuacaanu cua quiniuria pa Jiyaniijiatani. Cua nanaca jaara shootesaare, janiyara, cunoori juhua Pueyasora cua niquticosano quiniutianiya. ⁷ Majaari cua taajenu quijia, pueyaracaanu cua poonijiosacari cua Jiyaniijiaara. Janiyari tari tucuatacanu miiniu puetunu na sequesanojuanaani. Pueyaracaanu cua poojotasacari Pueyaso rupaa, majaari cua jataniniu quiquiaari quenaaja. ⁸ Naacuajitij, shanohua tuhuajaari quiriano jiyocuacaanu racatasano quiya tari, maninia miijia cua quiniucua. Cua Jiyaniijiaari cuno tuhuaja cua niqutionutaniya na samiitianishacariuhua janiya. Pa Jiyaniijiaari jiyanoohua maninia. Na jiyanooshano pueya pa quiniucua, majaari socua na saneenu quiniutianiya sesa pa miishano. Majaari saaja janiya na niqitionu quiniutianiya cuno tuhuaja. Puetunu noo pojorijianaa niqutionutaniyajaariuhuj, canapute nojuaja na paniniutia sashiyajaani, cuaara tiuquiuhuara shacantuuca na cumaacatajaatijia.

Pablo sequesano Timoteo miishocoriquiano

⁹ Majaari puera tarishiniu. Quia secoore, cucua quia tiuquiniuria ritia. ¹⁰ Demasri cua tiujiaarucuaani. Tesalónica tiacajinia quiaarucuaari. Nojuacuajaari tama na panishanojuaja miiniu panijiaara jatarohuacuaa. Crecenteeri saniniuujia Galacia jiyajinia quiaarucuaa. Titoori Dalmacia jiyajinia quiaarucuaajaacuhuj. ¹¹ Saaja Lucasri niya cuata quiya. Quiaa jaara cumaji niyare, quiocua Marco rupoyare quiocua. Nojuajaari na naata cua naacunu niya, pa Jiyaniijiaara cua poonijiosacari. ¹² Janiyari saniniuujia Tíquico jiyarorucuaa Éfeso tiacajiniani. ¹³ Taa cua sequeya quiajaniyacujani, quiaa jaara cumaji niyare, quiocua cua tucuaque toque paare quiria, Carpo tiajinia cua tiujiasano, Troas tiacajinia. Quiocua quiria patootaare cua nequesoretunecajuhuj. Janiyari socua noo paniya quia patootanurani, shoqueecua naajionuutasano Pueyaso Rupaatej.

¹⁴ Noo Alejandro, cumueeca casaajiniji shipinijiojua casamitij, nojuajaari jiyanoohua cua paracaajiaara quiquianu. Naajaa, pa Jiyaniijiacuajaari saniniuujia cucua na naminiutianiyacujua, naa na miiniucua janiyatej. ¹⁵ Tama quia cuaqueyajaaja quia cojuare maja na miiniuria sesa quiajaniyajuhuj. Nojuajaari pa pohuatasano cuaracashitiya saaja, Pueyaso rupaa ruuretaja na quiniucua.

¹⁶ Janiya jaara shushajanaa nujuatesaacanu jiyaniijianucua tacojitij, nojori nequesoreenura janiya, majaari que-naaja tamonu Pueyaso pueyajinijinio quiniu quiriquiaa tii,

cucuaji na tacunura quenaaja. Puetunu cua cojiniaajanaari cua cartecanu tamajaaja. Naa nojori tarinitianuucua tamaajaaja janiyatej, Pueyaso cuaara jiyanooria nojori. ¹⁷ Naajaa, pa Jiyaniijiaari cua cojiqianuni. Cua cumaquiquianu-jaariuhuj, nojuajiniji cua pohuatanura puetunu cuniqui quiniaa Pueyaso niishiyashijiaca pueyajanaa. Pa Jiyaniijiaari cocuaatia cua miiniujiniji juhua nojori juaashiquiajiniji cua jaaquianu, maja nojori monura janiya. ¹⁸ Janiyari nocua tiuyani, nojuajaari cua mashiquiniutianiya puetunu sesa casaacuajijianaa. Cua cojuanutaniyajaariuhuj, pueyara-caanu rishijia cua quiniuria na shuriucua jiyocuacaanu, Jiyaniijiajanaa na quishacari. ¡Jiyanohua maniniaari pa Jiyaniijia! ¡Nojuaja cuaara shuquiritiasaaria pueyaracaanu! Cuaara naa quiiriatej.

Pablo sequesano na naajione na tucuatasaari

¹⁹ Quiria quia saruhuatate Prisca, neyaca Aquilano, puetunu Onesíforo pueyajanaajuhuj, na tiajinia quiniaani.

²⁰ Erastoori Corinto tiacajinia jateecanu. Janiyari saniniu-ujia Trófimo tiujiacanu Mileto tiacajiniani, cusosu na quini-uucua.

²¹ Cucua quia niniuria quia secoore, shuniya coteyaquishacarijia quia tiuquiniuria cucua. Niya cuata quiniaa parta Pueyaso pueyari cua sequereeni, nojoriria cua saruhuatanura quiajaniya. Nojoriiri Eubulo, Pudente, Lino, Claudiano, puetunu parta Pueyaso pueya maanujuanaanio.

²² Pa Jiyaniijia cuaara quioojiajinia quijia quiiria pueyara-caanu. Pueyaso cuaara cumaquiiria puetunu niajaniyanaa.

PABLO NAAJIONEE TITOOCUARA

Pablo naajiosacari Titoocuara

¹ Janiyari Pabloni, Pueyaso seru. Jesucristoori cua jiyaroquiaari na Que Pueyaso saquiriojosano pueya cua tiuutiniuria Jesuucua, Pueyaso pueya nojori quiniuria. Cua jiyaroquiaarijaariuhua Jesuucua tiuuniaa cua niishitiniuria seetanu rupaajanaa Pueyasojiniji, nojori jatanishaanura maninia quijiacara. ² Nojori tojishacari cuno rupaa, nojori-iri niishiquiaa nojori cutaraari samiitianishaanutaniuhua Pueyaso muerasu nojori quiniucua, pueyaracaanu quijiaca nojori quiniuria Pueyasota. Cunocujaari tariucuacaanu Pueyaso sequesano, jiyanohua tarijiatej, jiya shipinishaacar-ijiyojua. Nojuajaari maja na naata sapojonu. ³ Quiari naataja, Pueyasoori na rupaa niishitiniu paniquiaari pueya, taa na paniquiaari jiyasohuaja tariucuacaanucujani. Naaratej, pa Jiyanoojia Pueyasoori cua jiyatequiaari na rupaa pohuatanarani, pueya cua tiuutiniuria nocua. ⁴ Quiarijiani, quiocuara naajiyanjia Titonaa, juhua cua nyanuniyojua quia quishacari. Quiaari Pueyaso pueyanora quiquiaari quia tiuushacari Cristojiniji cua pohuatasanoocua, taa cua tiuquiaaricuaani. Naacujitij, paari mariyata nocua tiuujacani. Pa Que Pueyaso, pocuaji Tacuna Jesucristonio, nojori cuara cumaquiiria quiajaniya. Nojori cuara jiitiaara quioojia maninia, shuquiriaatia quia quiniuria pueyara-caanu.

Titora Pablo sequesano, Creta jiya tucuaatiajajinia na miishocoriquiano

⁵ Janiyari quia tiujiaquiaari Creta jiya tucuaatiajajiniani, quia tucuatnura cua poonijosano cureeno. Naaratej, quia sequecanunjia quia jiyatenura jiyaniijianucua, Pueyaso muerasu maapue jitianaa quiniuria puetunu cuno jiya tiacajiniajanaa, taa cua sequequiaari quiajaniyacujani. ⁶ Pueyaso pueya jitiariquiano cuara quiiria maninia pueyano, sesa miyashijia, maja pueya pocuanura sesa nojuajiniji. Cuara jiitiaara niquiriyatujua niquiocua. Necohua cuara quiiria Pueyaso muerasujuhuj, maja sesa miijiaca, maja tojiyashijiacajuhuj. ⁷ Cante Pueyaso muerasu jitianani, nojuajaari Pueyasora poonijiojua. Naaratej, nojuaja cuara quiiria maninia quijia, sesacasoo, maja tojiyashijia. Cuara quiyaquiiria ritia juaajia, mashaasequejojua, piyojotaja. Cuara quiyaquiiria cumaneeca panijia sesa na miishanota na masenura.

⁸ Naajuhuj, Pueyaso pueya jiiiana cuaara quiiria rucoonaacua taraajeja. Cuaara quiiria maninia miiija, maninia niishiriojojua. Cuaara quiiriajuhua seetanujuanaa Pueyaso rootasano tojjia, maja rimiajata maninia miiija. Cuaara quiiriajuhua Pueyaso panijia cutara, tama na cuaqueyajaaja jiiitaja maninia, maja sacuaraatia casaa porocua. ⁹ Cuaara quiiria Pueyaso rupaa tojjia cutara, taa na niishitiojosaaquiaaricujani. Naacuajitij, nojuaja na naata pueya cumaquiniu, maninia na niishitiojosanota Pueyaso Rupaajiniji. Naacuajijiuhuaj, nojuaja na naata pueya tacatonuhua Pueyasocua sesa nojori niishishanojiniji, noo pojori canapuate Pueyaso Rupaa ruuretajaca quiyacujani.

¹⁰ Naa quia sequereenijia, queraatia tojiyashijiaca pueya quiniuucua, canapuate juhua niishiyashijia niishitiojoquiaa najuhuana niishitiojosanocujani. Nojoriiri Pueyaso muerasu sapojiya. Queraatia cuno pojoriiri cuarta Judiocuaca. Nojoriiri pueya niishitiojiya pueya cararaatiuquia co miatesaanura, taa Moisés niishitiojoquiaari tarijiacuajani, seetanujuanaa Pueyaso muerasu nojori quiniuria juucua. ¹¹ Nojoriiri queraatia niqiuohuaraca pueya jiyajeneteya sesa na niishitiojosanota, puetunu tapueyocucatajanaa nojori juayonuujutanura. Cuno niishitiojonaa cuaara sanaajasaaria. Nojoriiri niishitiojoquiaa saaja cumaneeca nojori masenura sesa na niishitiojonuunujiniji.

¹² Creta jiya tucuaatiaja pueyajinijinio tamonu shimiacu-
uri tama na pueyajinijijiaaja naa sequequiaaritij: “Creta pueyari pueyaracaanu saaja sapojonuujua. Nojoriiri jiyanohua juaajiaca juhua sayoru. Nojoriiri puera miaque-
nuujuaca. Nojoriiri taajecorijiuhuaj”. ¹³ Seetanujuanaari cuno shimiacu sequesano. Nocuaji, jiyanohua quia nacasure nojori, nojori cuaara Pueyaso tojjia quiiria, maninia qui-
jiaca nojori quiniuria. ¹⁴ Quia rootare nojori maja na tojtia-
nura Judiocuaca nareja najuhuana pohuatasano, naajuhuj, maja nojori tojiniuria pueya rootasano, canapuate Pueyaso seetanu rupaajanaa tojiyashijiaca quiyacujani.

¹⁵ Pueyano jaara maninia jiuujiaraca quiri, puetunu casaajanaari maninia quiya nera. Saniniuujia, pueyano jaara sesa jiuujiaraca quiri Pueyaso rupaacua tiuyashijia na quiniuucua, majaari quenaaja niquiriyatu casaa maninia quiniu nera. Na niishitiajaari juhua curuutuuca, noojiano. ¹⁶ Nojoriiri tama na cuaqueyajaaja sequeya: “Pueyaso niishiyanjia”. Naa nojori sequesacaritij, najuhuana sequeyari. Nojori miishanojiniji, paari niishiyani nojori maja seetanujuanaa Pueyaso muerasu. Nojoriiri jiyanohua

soosano pueya, puera sesa na quiniuucua. Nojoriiri jiyanoehua sesa, tojiyashijiaca juhuaj. Majaari na naata quenaaja maninia miiniu.

2

Maninia niishitiojosano cutara

¹ Nocuaji, pueya quia niishitiojore maninia nojori quiniuria taa pa niishitiojosaarquiaaricuajani. ² Naaratej, socua saaquiapue quia niishitiojore nojori cuaara quiyaquiiiria mi- aquejoru, mashaasequejorunio. Nojori cuaara quiiiria tojishano pueya cutara, maja rerequetesano. Nojori cuaara quiiiria maninia niishiriojojuaca. Cuaara quiiiria maninia quijiacajuahuaj, na tojishacari puetunu Pueyaso niishitiojosanojuanaa, na panishacari pueyano. Nojori cuaara quiiiriahuhua maninia rejeretajaca taraatia na miishacari, juhuajaniya nojori sashishacari pa Jiyaniiija. ³ Naajuhuaaj, socua motaja maajipohua quia niishitiojore nojori quiniuria maninia Pueyaso niqiiara pueyaracaanu, maja rimiaacatururi, maja mashaasequenuujuaca. Nojori cuaara pueyaracaanu miiria maninia tamasaca niqiiara, tamasaca miiniuria juhua nojori miishanojuhuaj. ⁴ Nojori cuaara niishitiojoora niyacaraca maajipohua, maninia na paniniuria neyaca, necohuanio. ⁵ Cuno jiyaniyacuaca cuaara niishitiojoora narta maajipohua, maninia niishiriojojuaca nojori quiniuria, saaja neyaca panijiaca nojori quiniuria, maja tamonu caya panijiacara. Nojori cuaara niishitiojosaariajuhuaj, maninia poonijiojuaca na tiajiniya nojori quiniuria, caporatururi nojori quiniuria, neyaca tojitiajancano. Nojori cuaara naa miiria, Pueyaso Rupaa mariqui rerequetesaareeri.

⁶ Naajuhuaaj, mashiquiori quia niishitiojore maninia niishiriojojuaca nojori quiniuria. ⁷ Puetunu quia miishanojuanaa cuaara quiiiria maninia nojori niqiiara, nojori jiaatianura quicua, juhua quiajaniya nojori quiniuriajuhuaj. Quia niishitiojosacari nojori, tama quia cuaqueyajaaja quia cojuare, tama quia niishitiojosanojuaja tojijia quia quiniuria. Majaari puenujuua quia quiniu quia niishitiojosacari. ⁸ Maninia quia niishitiojore Pueyaso Rupaa, taa quia niishitiojosaarquiaaricuajani. Naacuajitij, tamasacaari maja na naata ruuretanu quiniutianiya quia niishitiojosano pueya niqiiara. Naa maninia quia niishitiojosacaritij, quia niishitiojosano rerequetejacaari caririquiniutianiya. Naacuajitij, nojoriiri maja tari na naata pocuanu quiniutianiya sesa pajaniyajiniji. Nojoriiri sanaajetanutaniya.

⁹ Poonitijosano pueya quia rootare, puetunu na camarucua sequesanojuanaa nojori tojiniuria, na camarucua

shuquiritianura nojori. Cuaara quiiria na camarucua pani-jiaca, maja riuhuanejaca. ¹⁰ Cuaara nohuaseyaquiiria na camarucua casami. Cuaara quiiria seetanujuanaa maninia mi-jiaca, pueya niishiniuria pa Jiyanoojia Pueyaso rootasanoori jiyanohua maninia cutara. Poonitijosano pueya jaara maninia quiriquia, Pueyaso Rupaari juhua maniniushitis-hano quiya tamasa niquiara.

¹¹ Paacuajaari niishiyani Pueyasoori jiyanohua jiyanoojia seetanujuanaa, Jesu cusuucua puetunu pueyacuarajanaa, sesa pa miishanojiniji pa jiyanooshaanura. ¹² Pueyaso jiyanooshacari pajaniya, cunoori pa niishitiojiya pa cartenura puetunu sesa pa miishanojuanaa, maja mijiria casaacua pa jiaatianura sacuaraatiajuhuaj. Naajuhuaaj, Pueyaso jiyanooniucua pajaniya, cunoori pa shiniujiya maninia niishiriojojuaca pa quiniuria mijiria pa quishacarijia, maninia miijiacajuhuaaj, Pueyaso tojijianio pa paniniutia nojuaja. ¹³ Naa Pueyaso jiyanooshacari pajaniya na muerasu pa quiniuriatej, cunora paari na sequesanoocua tiuquiaajuhuaaj. Nojuacuajaari pa sequequiaari pa Pueyaso Cristoori pocua muetanutaniuhua, shacantuuca na cumaacajinia. Naacuajitij, paari shuquiriaatia sashiya pa Jiyanoni. ¹⁴ Nojuajaari tama na cuaqueyajaaja panitiaquiaari pocuara, sesa pa jiiitishano casaacua na tarinitiniuria pajaniya. Pocuara cusoquiaariiri poojia sequejeequesano quiniuria puetunu sesa pa quiniujinijijianaa. Naa miiquiaariiri saaja tama na pueyarajaaja pa quiniuria, jiyanohua maninia miiniucua jiaatiajaca pa quiniuriajuhuaj.

¹⁵ Naa quia niishitiojore pueya Titonaa. Pueyaso pueya quia niishitiojore, quia shiniujiuri, quia nacasure. Naa quia cumaquiniuria nojoritij, quia cumaaca quia paaretare juhua cutara jiyaniijia, tojishano pueyano quia quiniuria. Saaja maninia quia miiriquia pueyaracaanu, tamonu mariqui quia rerequetereeri.

3

Maninia rootasano Pueyaso pueyara

¹ Quia pueya quia niishitiojorohua jiya jiyaniijia tojijiaca nojori quiniuria, jiyaniijianucuara na jiyatesano pueya nojori tojiniuriajuhuaj. Nojori cuaara cuno pojori naacutaara jaara sequesaaare maninia casaa nojori miiniuria. ² Pueya quia niishitiojore nojori cuaara pueya sesacaashijiaca quiri-irajuhuaaj. Nojori cuaara quiiria juhuajaniya quijiaca, maja juaajiaca. Cuaara quiiria jiyanoojiaca. Cuaara maninia

niqiiiria puetunu pueyajanaa, juhua socua maninia pueya nojorijiniji, maja rimiajata na miiniuria tamasaca.

³ Tariija, paari mariyata mosanucua quiquiaarini, Pueyaso tojiyashijiicano. Paari juhua tashucuaano quiquiaarini, sapojosano pa quishacari. Paari sesa miiniuucua jiiquiaarini. Majaari pa naata sesa pa miiniu tarinitianu quiquiaari. Paari pueyaracaanu shuquiriaatia quiniuucua jiaatiajaca quiquiaarini sesa pa niishishanota. Paari sesa miijiacaca quiquiaarini. Paari tamasaca jiiitiasanoocua jiaatiajaca quiquiaarini, juhua nojori pa quiniuriajuhuaj. Paari pueya soosano quijiaca quiquiaarini. Paari niqutioojuaca quiyaquiquiaarini. ⁴Naajaa, pa Jiyanoojia Pueyaso cutaraari maninia miiquiaari pajaniya. Naacuajitij, paari niishitishaaquiaarini taa Pueyaso paniya puetunu pueyajanaani, na jiyaronuucua Neyanuniyojua pocuara na cusonura. ⁵ Na muerasura pa jiyatequiaariiri saaja pocua na taraajesacari, maninia miyashijia pa quishacarijia. Sesa miyashijiacara na Sohuanuta pa jataniquiaariiri, na Sohuanu jeequesacari poojia, maninia jiuujjaraca pa quiniuria. Pueyaso Sohuanuuri pa jataniquiaa juhua quiarinio pueya pa quiniuria. ⁶ Pocuaji Tacuna Jesucristo miiniuucua maninia, Pueyasoori jiyanohua queraatia na Sohuanu niqutioquiaari pajaniya. Juhua pocua totasaareeri na Sohuanu. Maja shiitianiyojua quenaaja. ⁷Naacuajitij, pa jiyatereeri maninia quijiaca pa quiniuria na jiyanoooshacari pajaniya. Naa pa jiyatequiaariiri na muerasu pa quiniuria, pa masenura puetunu na jiiitiasanojuanaa puera, jiyocuacaanu na racatasano. Naaratej, paari juhuajaniya sashiquiaani, pa niishishacari paari pueyaracaanu quijiaca quiniutianiya natani.

⁸ Nio cua sequesanoori seetanu rupaajanaa. Nio rupaata quia nacasure Pueyaso tojitiajaca puetunu quioojiatajanaa, nojori cuara niishiriojoora, maninia nojori miiniuria pueyaracaanu. Nio rootasanoori jiyanohua maninia. Maninia cutaraari puetunu pueya cumaquitiajarajanaa. ⁹ Maja cutaraari quia rupuenu cuno pueya, noo pojori canapuate najuhuana nacojoquiaani, naajuhuj, noo pojori canapuate pueyaracaanu na supuetanaa sesaca serojoquiaa najuhuanani, juhua pueya shocotajaca nojori quiniuria. Naajuhuj, maja quia rupuenu noo pojori canapuate juaatiooquiaani, canapuate tariucuacaanu Moisés Rootasanoocua juayonuutaquiaacuajani. Puetunu cuno nojori niishishanojuanaari najuhuanaj. Majaari na naacunu nojori.

¹⁰ Quia piriyojore cuno, cante Pueyaso muerasu maanu raquirijitiaani, capa na niishitiojosanota najuhuanaj. Nojuaja jaara quia tojiyaquiri coteenu quia sequesacari nojuaja, quiocua socua na camiriohua piriyojonu. Jaara tojiyaquiri quiajaniya jiyacaritij, nojuaja cuaara quiiriaqui juhua taanususano. ¹¹ Naa na tojiyaquishacari quiajaniyatej, quiocua niishiri cuno pueyano tari seseree. Tama sesa na miishanojuuarijia juhua nocuara saquiriojotaa.

Pablo sequesano Titora

¹² Janiya jaara Artemas jiyarore quiocuani, jiyanohua quia saniniujiuri cucua quia niniuria Nicópolis tiacajinia. Janiyari quiniqui shuniya tajitiniu paniyani. Janiya jaara Artemas jiyaroyaquiri quiocuani, janiyari Tíquico jiyaronutaniya quiocuani. ¹³ Zenas, Apoloori quiocua tiuquiniutaniya. Nojori quia naacutare quia jiiitiasanota, nojori jiiitianura puetunu na panishanojuanaa nojori quianu panishacari quia quiijajiniji. Zenasri pueyacuai tacuna pueya nequesoreenaä.

¹⁴ Parta Pueyaso muerasu cuaara niishiiria maninia miijiaca nojori quiniuriajuhuaj, maja najuhua quiijiaca na quiniuria. Maninia cutaraari nojori naacutanura na panishano jiiitiaashijiaca.

Naajionee puequesacari saruhuatasano

¹⁵ Puetunu cuata quiniaajanaari cua sequeya cua saruhuatanura quiajaniya. Canaara quia saruhuatate parta Pueyaso muerasujuhuaj, canapueete canaa panijiacacuajani. Pueyaso cuaara cumaquiiria puetunu niajaniyajanaa. Cuaara naa quiiratej. Tariucuaja Titonaa.

PABLO NAAJIONEE FILEMÓN CUARA

Pablo saruhuatasacari Filemón

¹ ¿Quiaate quiyajaa canaa panishano Filemónnaa? Janiyari Pablóni. Quiasano pueyanonijia, Jesucristojiniji cua pohuatanuucua. Janiyari parta Pueyaso pueyano Timoteota nio naajiya quiarani, jaarajaaja pa Jiyaniijiaara poonijiona quia quiniuucua. ² Canaara quia saruhuatare pa rimiatu-cua Apia, Arquiponio, jaarajaaja pa Jiyaniijiajiniji pohu-atanani. Canaara quia saruhuatarejuhua parta Pueyaso pueya maanu, noo pojori, quia tiajinia rerejoquiaa Pueyaso secojonuunuratej. ³ Pa Que Pueyaso, pa Jiyaniijia Jesucristo-nio, nojori cuara cumaquiiria niajaniya, jiyanoojiaca nojori quiniuucua. Nojori cuara cajitiiria nioojiajuhuj, juhua-janiya nia quiniuria.

Filemón paniniujiniji pohuatasano, Pueyasoo-cua na tiuuni-ujinijinio

⁴ Pueyaso cua secojosacari, janiyari quia seera pueyara-caanu Pueyaso sequequiaani, “paacarasho”. ⁵ Janiyari naa sequequiaa Pueyasoni, quiajanijajiniji cua tojinuucua taa quia paniquiaa pa Jiyaniijia Jesuni, puetunu na pueya-janaanio. Quiaanaari seetanujuanaa pa Jiyaniijiaacua tiuu-jia. Janiyari cunora quia timitiaani. ⁶ Janiyari quiocuara sec-joquiaani, seetanujuanaa quiarta Pueyaso pueya jiyanoojia quia quiniuria, nojoriicua quia taraajenura. Naacuajitij, nojori quia cumaquishacari, quiaari maatia niishiniutianiya puetunu quioojiajinia quia jiitiasanojuanaa Jesucristojiniji, Jesucristoo-cua tiuujia quia quiniuucua. ⁷ Parta Pueyaso pueya panijia quia quiniuucua, quiaanaari nojori cumaniji-acanu, nojoriicua quia taraajesacari. Naa cua niishishacari quia miishanojinijitij, janiyari coojia cumanijiacanujuhuj. Cunora, shuquiriaatia quiyaniija.

Pablo sequesacari Filemón, nojuaja jiyanooniuhuara tama na seru Onésimojuaja

⁸ Jesucristo jiyaramiquishano pueyano cua quiniuucua, cua naata sequenu quiajaniya quia miiniuria cua sequesano. ⁹ Naajaa, majaari cua sequenu paniniu quiajaniya juhua quia jiyaniijia. Saniniuujia, panijia quia quiniuucua, jani-yari quia sequenu paniani quia miiniuria nio cua sequesano quiarijia. Jesucristojiniji cua pohuatanuucua, janiyari quiarijia moronucua quiyani tariucua saaquiano. Naajaa, quia rupuenta Pablo cua quiniuucua, cua tojiri Filemónnaa.

¹⁰ Cucua quia taraajere quenaaja. Quia nenecojiyanijia cua niyanuniyojua Onésimoo cuara. Nojuajaari seetanujuanaa juhua quiyanura quiriucuaa Jesucristoocua na tiuuniuucua, na tojishacari cua pohuatasano Jesucristojiniji, moronucua cua quishacari.

¹¹ Tarijia, Onésimoori sesa seru quiquiaari quiara. Quiarijia saniniuujia, nojuajaari na naata maninia quiniu quiara, taa quiria na quiyacuaani. ¹² Janiyari quiarijia quiocua jiyaroya quiyanuni. Quiocua na maserohua quia timiniutia, taa quia masequiaa janiyacuaani. ¹³ Moronucua cua quishacari Jesucristo rupaa cua pohuatanuucua, janiyari niyaja na jiy- ojetenu paniriquiaa juucuaani, na naacunura janiya quia niti. ¹⁴ Naajaa, majaari naa cua miiniu paniniu quiriquiaa jiyasohuaja, coteenu cua nequesotaaquishacari quiajaniya. Janiya jaara quia sequereni janiya niya na jitianutaniya na naacunura janiyani, quiaa maara cua ruuretaaquiri. Naajaa, janiyari seetanujuanaa saaja quia panishano miiniu paniyani. Cunora, janiyari na jiyaroya quiocuani. ¹⁵ Onésimo jiyoteeri quiocuaji rupatecanu rupaquiriaja, quiarijia quiara na quiniuhua pueyaracaanu cutara. ¹⁶ Quiarijiani, nojuaja naasucuaari socua quia panishano pueyano quiniutianiya serujiniji, seetanujuanaa quia tarajanu na quiniuucua quiar- ijiani, Jesuucua tiuujia na quishacarijuhuaj. Nojuajaari jiyanojua cua panishano parta Pueyaso pueyano. Naajaa, quiaa cuara jiyanojua na panijia quiiria socua janiyajiniji, maja juhua nareja quia panishano seru. Seetanujuanaa nojuaja quia paniri cutara, quiarta Pueyaso pueyano na quiniuucua.

¹⁷ Naacuaajitij, janiya jaara seetanujuanaa quiarta Pueyaso pueyano quiri quiarani, Onésimo tiuquishacari quiocua, no- juaja quia miiri maninia, taa quia miiquiaacuaa janiyani. ¹⁸ Onésimo jaara sesa miiquiaari quiajaniya, jaara quia casaa nohuasequiaarijuhuaj, nojuaja quia jiyanoori. Saniniu- uja cucua quia tiuutiare puetunu sesa na miishanojuanaa quiajaniya. ¹⁹ Janiyacua saniniuujia cua cumaneecajiniji quia niqutioreni puetunu sesa na miishanojinijijianaa quia- janiya. Janiyari Pabloni. Janiyari tama cua juaashiquiata- jaaja nio naajiyani, cua sequesanoocua quia tiuuniuria. Jani- yari quia niishitiniu paniyajuhua, Jesucristojiniji cua pohu- atasanooocua quia tiuushacari, quiaacuajaari pueyaracaanu quiijara jatanishaaquiaari. Naacuaajitij, cua naata sequenu quiajaniya, cua serura quia quiniuriajuhuaj. Naajaa, janiyari saaja quia sequeyani Onésimooocua quia taraajenura. ²⁰ Naa quiria quia miiri quenaaja, mariyata Jesuucua tiuujaca pa quiniuucua, cua panishano Filemónnaa. Quiaa jaara Onésimo

jiyanoori, Cristo panijia quia quiniucua, quiaari seetanujuanaa coojia cumanijanutaniya.

²¹ Janiyari naa quiocuara naajiyani, cua niishishacari quiaacuajaari cua sequesano miiniutianiya. Janiyari niishiyajaaniuhuj, quiaari socua maninia na miiniutianiya cua sequesanojiniji. ²² Naajuhuj, janiyari juhuacarijia quia sequeyani, cua maquejara quia jeenucuare cucuaji quia tiajinia. Naa pueyaracaanu cucuara nia secojosacari Pueyaso niiquiji cua cartesaanuratej, nojuajaruhua niaacua cua tiuquitiniutianiya, niaata cua quiniuria.

Pablo sequesano na naajio na tucuatascari

²³ Epafasri cua sequeree cua saruhuatanura niajaniya. Nojuajaari cuarta moronucujuhuj, Jesucristojiniji canaa pohuatanuucua. ²⁴ Jaarajaaja cuata Jesucristojiniji pohuataanaa pueyari nia saruhuataajuhuj. Nojoriiri Marco, Aristarco, Demas, Lucasnio.

²⁵ Pa Jiyaniijia Jesucristo cuara cumaquiiria niajaniya.

HEBREO PUEYACUARA NAAJIONEE

Pueyasoori pajaniyara na rupaa pohuataniquiaari Neyanujiniji

¹ Tariucuacaanu, Pueyasoori pueyaracaanu na sequenu panishano caminiujiuniaa pueya poojotaniquiaari pa supuetanaara. Nojuajaari nojuajiniji caminiujiuniaa miijiotequiaari queraatia tamaatia casaa, nojori na niishitiniuria casaa nojuaja sequenu paniriquiaa nojorini.

² Quiari naataja saniniuujia, Pueyasoori tama Neyanujuaaja pohuataniquiaari na sequenu panishano pajaniyara. Nio Neyanu shipinitiquiaari puetunu casaajanaacuajaari; nio jiya, jiya cajiniocuajuhuaaj, puetunu pa niquiyaquishoo casaajanaanio. Naajuhuaaj, Pueyasoori Neyanu jiyatequiaari puetunu tama na shipinishanojuanaa jiiitiana quiriquiano.

³ Neyanuuri tojetaarucujanaa maninia, juhua na Quejuhuaaj, juhua na Que niquishanojuhuaaj. Naacuajitij, nojuajaari jiyanohua shacantuuca cumaacaracajuhuaaj. Naacuajitij, nojuajaari puetunu na shipinijosano casaajanaa rucuanetequiaa maninia, saa na rupaa cumaacataja. Nojuaja jaara cusoquiaari puetunu sesa pa miishanojuanaa na tuujunura, na nuhuaaji, jiyocuacaanu tacaquiaariuhuari, na Que Pueyaso miaquetajara na cajiniuria Jiyaniijiajanaa quiqiojinia.

Pueyaso Niyanuuri Jiyaniijiajanaa cutara Pueyaso seyajiniji

⁴ Naacuajitij, Pueyaso Niyanuuri Jiyaniijiarajanaa quiquiaari Pueyaso seyajiniji. Nojuajaari na Que sesaanucua. ⁵ ¿Pueyasoteeri quenaaja tamonu na seyajinijinio sequequiaari: “Nioori cua Niyanu”? ¡Maja! Neyanu sequequiaari cutaraari:

“Quiaari quiyanu. Janiyari pueyanora quia muerateree jiyacuani, cua saquiriojosano pueya Jiyaniijia quia quiniuria”.

Neyanujiniji sequequiaarijiaariuhuaaj:

“Nera, janiyari na Queni. Quiria saniniuujia, nojuajaari quiyanu”.

Pueyasoori maja quenaaja niquiriyatu na seyajinijinio naa na sequenu quiquiaari. ⁶ Tariucuacaanu Pueyaso Rupaa-jinia, naa naajiotasaaquiaariiri casaa Pueyaso sequenutaniyani, Neyanu na tiuquitishacariuhua mijiria, Jiyaniijiajanaa na quiniuria:

“Puetunu cua seyajanaa cuara Quiyanu tojtiaara, Jiyaniijiajanaa na quiniuucua”.

⁷ Pueyaso seyajiniji saniniuujia, naa naajiotasano quiyari tariucuacaanu Pueyaso Rupaajinia:

“Pueyasoori na seya jataniquiaa juhua paratura, juhua manirianio, na panishano nojori miiniuria”.

⁸ Neyanu sequeya saniniuurija:

“Quiyanunaa, quiaacuajaari Pueyasojuhuanajaj. Quiaari Jiyaniijia. Quiaari naa quiniutianiya pueyaracaanutej. Quiaari cumaacaracajuhuaaj, maninia quia jitianura puetunu pueyajanaa. ⁹ Quiaari maninia miiniu porocua. Quiaari sesa miiniu soojea saniniuujia. Cunora, Pueyasonaa, janiyari quia jiyatequiaari Jiyaniijiajanaa quia quiniuriani, quia Jiyaniijia cua quiniuucua. Janiyari quia jiyatequiaarijuhua socua shuquiriaatia quiija quia quiniuria puetunu quia cojiniaajinijianaa”.

¹⁰ Pueyasoori naa sequequiaari Neyanujuhuaaj:

“Jiyaniijianaa, quiaacuajaari coteenujuanaa casaa shipinijia. Quiaari jiya shipiniquiaari, puetunu jiya cajiniocua niquishano casaajanaanio. ¹¹ Puetunu quia shipinishanojuanaari shaajeriquianohua. Quiajaniya saniniuujia, quiaari pueyaracaanu quiriquiano cutara. Puetunu quia shipinishano casaajanaari tariucushiriquiano juhua toqueja. ¹² Naa na tariucushishacarij, quiaari juhua toque mocua na juniocoriquiano, quia jatasocoriquiano. Quiaari naa miiniutianiyaquij taa pueyano jocuaquiaacuaa na toque mocuacuaani, quiariqui toque na cushiniuria saniniuujia. Quiajaniya saniniuujia, majaari quia jatanu quiniutianiya tamaatiara. Quia quiniuuri maja puequeriquiano”.

¹³ Pueyasoori Neyanu sequequiaarijuhuaaj:

“Miji, cua miaquetajara quia cajishii, janiya jaara quia paraa shocojotare puetunujuanaajaatijia, maja que-naaja niquiriyatu cureenura na miananajonura quiajaniya”.

Majaari naa Pueyaso sequenu quiquiaari quenaaja niquiriyatu na seyajinijinio. ¹⁴ Puetunu nojorijianaacuajaari Pueyasora poonijionaa. Pueyasoori nojori jiyaramiquiquiaa Jesuucua tiuuriquiano pueya nojori cojuanura.

2

Maja cumaati Jesucristo tojiyashijiacara pa quiniu

1 Naaratej, Jesucristojiniji pa tojishano tojijiaca pa quiriquia socua, paa mariqui Pueyasooquaji rupatereeri. 2 Tariucuacaanu, Pueyaso seya caminiujiushano Pueyaso rootasano pueyarani, cuno rootasanoori seetanujuanaa pueya tojishocoriquiano cutara. Cuno rootasano ruuretajaca, na miyashijiacajuhuj, nojoriiri saniitiosaaquiaari. 3 Pueyaso seya caminiujiushano tojiyashijiaa jaara saniitiosaaquiaaricuaa, ¿paateeri jiyaniyani Pueyaso pa jiyanooniutianiya juhuajaniya Neyanu rupaa tojiyashijiaa pa quishacari? ¡Maja! Cuno rupaa nocua pa tiuushano pa jiyanooshaanurani, cunoori pa Jiyaniijiajanaa pohuatasano. Pa Jiyaniijia nuhuaji, cuno pojori, canapuate pa Jiyaniijiajanaa tojiquiaari pueyaracaanuni, nojoriiri saniniuujia cuno rupaa caminiujiuquiaari pajaniyara. Canaa sequetuquiaariiri nojori tojishanoori seetanu rupaaajanaa. 4 Naajuhuj, nojori pohuatasacari Jesucristojiniji, Pueyasoori nojori miitiquiaari jiyajeneta casaa jyanohua na cumaacata, maatia pueya niishiniuria nojori pohuatasanoori seetanujuanaa. Pueyari cunora jyanohua shiriiquitiuquiaari queraatia Pueyaso cumaacata miishano nojori niquishacari. Naajuhuj, Pueyasoori Jesuucua tiuujiaa niqutioquiaa na Sohuanu, tamaatia pa miiniuria na cumaacata, taa na paniyacujani. Cunora, paa cumaati seetanujuanaa Pueyaso rupaa Jesucristojiniji tojtiajaca quiyani.

Jesucristo mijiria rasaaquiaari pa puerana na quiniuria

5 Cuno quiarinio jiyaranojiniji teyano pa sequeriquiaacujani, Pueyasoori maja na seya na jiyatenu quiquiaari cuno quiarinio jiya jiyaniijianucuarano nojori quiniuria. 6 Naajaa, tariucuacaanu Pueyaso Rupaaajinia naa naajiotasaaquiaari-iri pueyano nequesotasano Pueyaso:

“Pueyasonaa, ¿casaateeri pueyanoni, nocua quia niishiriojonurani? ¿Casaara quia taraajeya pueyacuani? 7 Quiaacuajaari na shipiniquiaari rupaquijiara socua cumaacaju na quiniuria quia seyajiniji. Naajaa, quiaari na jiyatequiaari jiyaniijia na quiniuria, cumaacaraca quijia na quiniuriajuhuaj. 8 Quiaari na sequequiaari puetunu quia shipinishano casaajanaa jiyaniijia na quiniuria”.

Naa Pueyaso sequesacari pueyanotej, puetunu na shipinishano casaajanaa jiyaniijia na quiniuriatej, naacuajitij, majaari quenaaja niquiriyatu casaa cureenu quiniutianiya na jiiiasoo. Saniniuujia, paacuajaari niishiyani, pueyanoori juhuanojuaja maja seetanujuanaa cumaacaraca

na quiniu puetunu casaajanaa na tojtiniuria tama nojuajaaja. ⁹ ¿Jesuurijiataj? Pueyano na quiniuria, na Que Pueyasoori rupaquijjara na miiquiaari socua cumaacaju na quiniuria na seyajiniji. Naacuajitij, pueyano na quishacari, Pueyaso taraajenuucua puetunu pueyacuajanaa, Neyanuuri mosaaquiaari pocuara. Naa na csonuucua pocuaratej, Pueyasoori na jiyatequiaari Jiyaniijiajanaa na quiniuria, jiyanohua cumaacaraca na quiniuriajuhuaj.

¹⁰ Jamueyashijia Pueyaso quiniuucua, nojuajaari puetunu na muerasuranोजनाa panitiaquiaari na cojiniaa nojori quiniuria. Paniquiaariiri jatiqwi nata shuquiriaatia pa quiniuria, puetunu tama nerajaaja na shipinishano casaatajanaajuhuj. Jeenucuasano pa quiniuria pa cojiniuria Pueyaso, nojuajaari jiyanohua maninia miiquiaari pocuara, Neyanuuri miitishacari naquiya pa niti. Naacuajitij, Neyanuuri tojetaarucuajanaa maninia quiquiaari Pueyaso muerasuranooquaji Tacuna na quiniuria. ¹¹ Jesucristo jeequenuucua pajaniya sesa pa miishanojiniji, jatanishano pueya pa quiniuria, paari cunora seetanujanaa Pueyaso muerasuni. Naacuajitij, Pueyasoori pa Que, taa pocuaji Tacuna Que na quiyacuaani. Cunora, Jesucristoori maja na caririquiniu na Que na sequenura pajaniyajiniji, “cua tapueyocuacata”. ¹² Tariucuacaanu Pueyaso Rupaajinia naa naajiotasano quiyacuajaari na sequesano na Que:

“Cua Quenaa, janiyari cua tapueyocuaca pohuatanutaniyani taamuecate quiajaniyani. Janiyari quia saquiriojosano pueya niquiara quia jaaquequejotanutaniyani cua shuquiritiasacari quiajaniya”.

¹³ Tamaqui, Jesu sequesanoori naa naajiotasano quiyajuhuj:

“Janiyari cua Queecua tiuujia quiniutianiyani”.

Naacuajitij, mijiria na quishacari, Jesuuri na Que Pueyasooqua tiuquuaaricuaa taa pa tiuquuaa nocuanijia. Socua naa naajiotasano quiyari tamaqui taa Jesu sequenutaniyani, jiyocuacaanu na tiuquitiasacari pajaniya na shuquiriniutia:

“Nio pojoriiri cua Que jiyatesano cua tapueyocuacara, nojori tojtianuucua janiya”.

¹⁴ Cuaqueyaraca pa quiniuucua, Sesaacaari cumaacaraca quiquiaari na shaajanura pajaniya, Pueyaso tojtiaashijia pa quiniuucua. Naaratej, Jesuuri cuaqueyaraca na quiniuria jataquiaarijuhuaj, taa pajaniyacuaani. Naacuajitij, nojuajaari na naata mosaanu quiquiaari pa niti. Naacuajitij, nojuajaari Sesaaca jaariuutiaquiaari pajaniya. ¹⁵ Naacuajitij, nojuajaari juhuajaniya quijiacara jiyatequiaari pajaniya, nocua pa tiuuniucua. Paari niishiyacuajani, pa

cusosacari, paari pa Jiyaniijiata quiniuria quianutaniyani. Cunora, majaari tari pa puerenu pa cusonura. Nocua tiuyashijiaca pueyari seetanujuanaa cusonu puerejaca cutara. ¹⁶Seetanujuanaa, majaari Jesucristo niniu quiquiaari Pueyaso seya na naacunura. Niquiaari cutaraari pueyacuaji na tacunura, noo pojoriicua, nocua tiuujiacate taa supuetana Abraham quiquiaari Pueyasoocua tiuujiacuaani. ¹⁷Maninia pa naacuna na quiniuria, Jesucristoori puetunu naquiya miiniujuanaa rejeretaquiaari mariyata taa narta pueya miishaaquiaacuaani. Naacuajitij, nojuajaari pocua taraajeja, pocuaji na tacunura Pueyaso. Taraatia pa miiniu niishijia na quiniuucua, pa naata nocua tiuuniu pueyaracaanu na Que Pueyaso na jiyanootiniuria pajaniya, sesa pa miishanojiniji. Na casonuucua, naacuajiti Pueyasoori na naata pa jiyanooniu puetunu sesa pa miishanojinijijianaa. ¹⁸Mijiria na quishacari, nojuajaari pueyaracaanu taraatia miishaaquiaari. Nojuajaari jiyanohua saniniujiushaaquiaari sesa na miiniuria juucujuhuj. Naacuajitij, nojuacuajaari jiyanohua niishijia na cumaquiniuria pajaniya, paa jaara sesa miiniuria saniniujiushaariquiani, paa jaara taraatia miishaariquijuhuj.

3

Jesucristo cutaraari Jiyaniijijanaa Moisésjiniji

¹Cuarta Pueyaso pueyanaa, niaacuajaari Pueyaso saquiriojosano tama na pueyajaaja nia quiniuria. Nojuajaari Neyanu Jesu jiyaroquiaari na rupaa na niishitiniuria pajaniya, Pueyaso pueyara pa jatanishaanura. Neyanuuri na jiyanootijia pajaniya, nocua pa tiuushacari. Cunora, jacaria pa niishiriojore socua Jesucristojiniji. ²Mijiria na quishacari, Jesuuri na Jiyarona tojijia quiquiaari pueyaracaanu, taa Moisés quiquiaari Pueyaso tojjijiacuaani, Israel pueya jiiitiana na quishacari. ³Naajaa, Jesucristo cutaraari Jiyaniijijanaa Moisésjiniji. Moisésri saaja narta Pueyaso pueyajini-jinio pueyano quiquiaari. Saniniuujia, Jesucristoori puetunu Pueyaso pueyajanaa shipinia cutara. Naaratej, Jesucristo cuaara tojishaaria socua cutara. ⁴Puetunu pueyapuejanaari supuetanaaraca. Naajaa, Pueyasojuanaari nojori shipinina seetanujuanaa. ⁵Naacuajitij, Moisésri pueyaracaanu Pueyaso sequesano caminiujuquiaari Pueyaso saquiriojosano narta Pueyaso pueyara, maninia Pueyaso seru na quiniuucua. ⁶Saniniuujia, Jesucristoori Pueyaso Niyanjuanaa cutara. Nojuajaari Pueyaso saquiriojosano pueya Jiyaniijijanaa. Nojuajaari nojori jiiitaa saa maninijia, taa na

Que paniyacuajani. Naaratej, majaari pa cartenu Jesucristo rupaa. Paa jaara Jesucristoocua tiuuquiaani, naajuhuj, paa jaara shuquiriaatia na sashiquiaa na rijionura pajaniyani, naacuajitij, paari niishiyani paari seetanujuanaa Pueyaso muerasuni.

Pueyasoori na pueya samaraataja

⁷ Pueyaso pueya pa quishacari, Pueyaso Sohuanu sequesano pa tojiri, maja pa rupatenura Pueyaso Rupaacuaji. Na sequesanoori naa naajiotasano quiya tariucuacaanu Pueyaso Rupaajinia pajaniyarajuhuj:

“Pueyanaa, niaa jaara quiarijia tojiriquia Pueyaso sequesano nijaniya, majaari na sequesano ruuretajaca nia quiniu. ⁸ Majaari naa nia quiniu taa nia supuetanaa quiquiaaricuaani, cariiquia jiyajinia nojori camarucuneejotasacari pueyaracaanu. Nojoriiri Pueyaso juaatijiojuaca quiquiaari, pueyaracaanu na tojiyashijiaca nojori quishacari. ⁹ Nojoricuajaari pueyaracaanu cua cumaacata cua miijosano niqitiuquiaari. Cuarenta marijaari shocojoquiaari, pueyaracaanu jiyajeneta casaa cua miijosacari cua cumaacata, maninia cua jiiitasacari nojori. Naajaa, nia supuetanaari cua juaatijioquiaari, pueyaracaanu nojori taacanuusacari cucuaji. ¹⁰ Janiyari cunora seetanujuanaa juaaquiaari puetunu cuno pojoritijanaani. Naaratej, janiyari sequequiaarini: ‘Nojoriiri juhua cucuaji tashuquioono rucoojiya tamajaaja. Nojoriiri cua niishitiojosano ruuretaquiaa saaja’. ¹¹ Janiyari cunora jiyanohua cua juaaniutia naa sequequiaarini: ‘Majaari nojori rpuenu quiniutianiya janiya, shuquiriaatia cua quishaqui, cua samaraatanura nojori, pueyaracaanu shuquiriaatia quijiaca nojori quiniuria cuata’ ”.

¹² Naarate cuarta Pueyaso pueyanaa, tama nia cuaqueyajaaja nia cojuare jiyanohua, niaa mariqui Pueyaso Rupaacua tiuyashijiacara quiriohuari, Pueyasoocuaji nia rupatenura puetunujuanaa. Pa Pueyasocuajaari quijiajuhanajaj. Nojuajaari na tojiyashijiaca saniitiojua. ¹³ Cunora, seetanujuanaa Pueyaso Rupaa tojtiajaca nia quiniuria, puetunu juucajanaa nia shiniujiutiooriquia pueyaracaanu. Naa nia miiriquia nio pa quishacari Pueyaso jiyanoonu puequeyaquishacarijaa taa na Rupaa sequeyacuajani. Naa nia shiniujiutiooriquiatej nia jiiitiyaquiniucujaji sesa miiniuria. Saniniuujia, niaa jaara sesa miijiaca quiriquia, tama sesa nia miiniujaarijaa nia sapojonutaniya Pueyaso tojiyashijiacara nia jatanuhuara.

¹⁴ Jesucristoocua pa tiuuniucua, paari na cojiniara jiyatesanoni. Naacuajitij, puetunu na jiiitasanojuanaari puera quiriqianojuhuaj, paa jaara nocua tiuquiaa pueyaracaanuni, taa shushajanaa seetanujuanaa nocua tiuujiaa pa quiriqiaacuajani.

¹⁵ Cunora, naa naajiotasano quiyari tariucuaaanu Pueyaso Rupaajinia:

“Pueyanaa, niaa jaara quiarjia tojiriquia Pueyaso sequesano niajaniya, majaari na sequesano rejetejaca nia quiniu, taa nia supuetanaa quiquiaaricuaani. Nojoriiri Pueyaso juaatijiojuaca quiquiaari, pueyaracaanu na tojtiaashijiaca nojori quishacari”.

¹⁶ ¿Canapueeteri cuno pojorini, Pueyaso tojtiaashijiacani? ¿Secaja pueyatee? Maja. Puetunu noo pojoricuajaari Egipto jiyajiniji Moisés mashiquishano pueyatej. Nojorijianaacuaajaari Pueyaso tojiquiaari pocuaano. Naajaa, nojoriiri saaja na ruuretajaca quiquiaari. ¹⁷ Nia niishiritioj, ¿canapueete cuno pojorini, Pueyaso juaatijioquiaarini, pueyaracaanu nojori camarucuneejotasacari cariiquia jiyajiniani? Noo pojoricuajani sesa miijacatej. Nojoriiri cunora cusonuquiaari nojori quiojosacari nucuaco cariiquia jiyaco. Na cusonuusaquijia jamojosaaquiaariiri. ¹⁸ Nia niishirijihuaj, ¿canapue naa Pueyaso sequequiaari seetanujuanaa na juaaniutiani: “Majaari nia tiuquitianu quiniutianiya niaarano cua niquitionu panishano jiyajinia, tii juhuajaniya shuquiriaatia nia quiniuria cuata”? Puetunu Pueyaso tojtiaashijiacajanaacuaajaari naa sequesaaquiaaritij. ¹⁹ Naacuajitij, paacuajaari quiarjia maatia niishiyani, Pueyasocua tiuyashijiaca nojori quiniuucua, majaari nojori tiuquitianu quiquiaari Pueyaso niquitionu panishano jiyajinia.

4

¹ Pueyasocuaajaari pa masuyajaa panaatia pa quiniuria nata. Cunora, jiyanohua pa cojuare tama pa cuaqueyajaaja Pueyaso sequesanoocua pa tiuuniuria, tamonu pajaniyajinijinio mariqui jiyanoyaquishaareeri. Na sequesanoocua tiuyashijiacaari maja na rupuenu quiniutianiya Pueyaso, shuquiriaatia na quiniuria Pueyasota. ² Pueyaso rupaacuajaari tari pa niquiara pohuatasaaquiaarijuhuaj, nocua pa tiuuniuria, taa pa supuetanaa niquiara na pohuatasaaquiaaricuaani. Nojoriiri Pueyaso rupaa tojiquiaari najuhanaj. Majaari nocua na tiuutiuniu quiquiaari. ³ Cunora, Pueyasoori pa supuetanaajiniji naa sequequiaari:

“Cua sequesanoocua nojori tiuyaquiniuucua, janiyari cunora seetanujuanaa naa sequequiaari cua juaaniutiani: ‘Majaari nojori tiuquitianu

quiniutianiya cua niqutionu panishano jiyajinia, cuata nojori quiniuria shuquiriaatia' ”.

Pajaniya saniniuujia, Jesuucua tiuujia pa quiniuucua, paa cutaraari panaatia quijiacara jatanishanoni, pueyaracaanu Pueyaso rupuejaca pa quiniuria. Pueyasoori naajuhua: jiya shipininiu na tucuatano nuhuaji, nojuajaari panaatia quiya.

⁴ Cunora, tamaqui tariucuacaanu Pueyaso Rupaajinia, naa naajiotasaaquiaariiri:

“Seis juucajinia Pueyaso tucuatascari puetunu na poonijiosanojuanaa, na nuhuaji nojuajaari séptimo juucajinia samaatequiaari”.

⁵ Pueyaso sequesanoori tariucuacaanu na Rupaajinia naa pacutejosaaquiaari naajiotanu:

“Majaari cua tojtiaashijiaca rupuenu quiniutianiya janiya, panaatia nojori quiniuria cuata”.

⁶ Naa sequesanojinijitij, maatia niishishiyari Pueyasoori pueya masuyajaa, nojori rupuenura nojuaja, panaatia nojori quiniuria nata. Noo pojori, coteenujuanaa Pueyaso Rupaa pohuatasaaquiaaritij, nojoriiri maja panaatia quijiacara na jatanishaanu quiquiaari, Pueyaso tojtiaashijiaca nojori quiniuucua. ⁷ Naa Pueyaso panitianuucua pueya, shuquiriaatia nojori quiniuria natajuhuaj, nojuajaari quiarjia masuyajaa pueya. Cunora, jiyanohua Moisés nuhuaji, Pueyasoori supuetana David naajiotaniquiaari pajaniyara saniniuujia. Naa sequeyari:

“Niaa jaara quiarjia tojiri Pueyaso rupaa, Pueyaso sequesano niaarano, majaari na ruuretano”.

⁸ Supuetana Moisés shaajenu nuhuaji, supuetana Josué cutaraari Israel pueya tiuquitianiquiaari nojoririano Pueyaso niqutionu panishano jiyajinia. Naajaa, nojori tiuquitasacari cuno jiyajinia, majaari seetanujuanaa panaatia quijiacara nojori jatanishaanu quiquiaari. Cunoori quiquiaari Pueyasoocua tiuyashijiaca nojori quiniuucujuhua, taa nojori supuetanaa quiquiaaricuaani. Naacuajitij, cuno jiyajinia Josué tiuquitasacari nojori, majaari panaatia quijiacara nojori jatanishaanu quiquiaari. Nojori jaara panaatia quijiacara tari jatanishano quiriquia, ¿Pueyasotucua casaara quiarjia pa masuuriquiaja Jesuucua pa tiuuniuriani, seetanujuanaa panaatia quijiaca pa quiniuria natani? ⁹ Naacuajitij, paacuajaari niishiyani, Pueyaso pueyaranoori panaatia quijiacara jatanishaanutaniya, shuquiriaatia pa quiniuria Pueyasota pueyaracaanu. ¹⁰ Naacuajitij, cante Jesucristoocua tiuujiani, nojuajaari panaatia quijiara jatanishaanutaniya. Majaari socua na tacaaniu quiniutianiya taa tama na cuaqueyajaaja na

jiyanootiniutianiya Pueyasoni. Naacuajitij, nojuajaari juhuajaniya quijia quiniutianiya, tarijia najuhuana na poonijosanojiniji, naatej, taa Pueyasोजना samaatequiaari na poonijionu nuhuajicuaani. ¹¹ Naaratej, panaatia pa quiniuria Pueyasota, seetanujuanaa na Rupaa tojjiacara pa quiriquia quiarijia. Naa na rupaa tojjiaca pa quiri paa mariqui saniitiosaareeri taa pa supuetanaa Israel pueya saniitiosaaquiaaricuaani, Pueyaso sequesano tojiyashijiaca nojori quiniuucua.

¹² Pueyaso Rupaari samiitianijia, cumaacaracajaariuhua pueya jiuujiajinia na poonijionura. Pueyaso Rupaari jiyanojua socua shamaticuaja nijiniaquetucuaaja mueruujiniji. Nijiniaquetucuaaja mueruuri saaja na naata pa cuaqueya jiyatanu. Pueyaso Rupaa cutaraari pa sohanu tohuariquijia, pa niishitijia tohuariquijianio. Na naata cuhatanu poojiajinia jiyasohuaja pa niishiriojosano casaa, poojiajinia pa niishishoo casaanio. Naacuajitij, Pueyaso Rupaari poojiajinia sesa casaa pa niishiriojosano nequesoreeja, jiyasohuaja pa miiniu panishano poojiajinia pa niishiriojosanonio. ¹³ Puetunu Pueyaso shipinishano casaajanaani, majaari na cureenu quiniutianiya na nequesoreyaquishoo. Majaari quenaaja niquiriyatu jamaaniu quiniutianiya nocuaji, nequesoreesoo na cureenura. Nojuacuajaari maatia niishiya puetunu pa miishanojuanaa, puetunu pa niishiriojosanojuanaanio.

Jesujuanaari Pueyaso jiyanootijia pueya

¹⁴ Pueyaso Niyanu Jesuni, nojuajaari na Que jiyanootijia pajaniya. Nojuajaari jiya cajiniocua tohuariquijiaari na Queecua na tiuquiniuria. Nojuajaari quiarijia tii pocuara secojiya na Que. Naacuajitij, Jesucristoocua tiuujia pa quiniuucua, maja cumaati pa pishiniu nocuaji. Paacuajaari na muerasuniyojuani. ¹⁵ Jesu, Pueyaso pa jiyanootijiani, nojuacuajaari pocua taraajenu niishijia paa jaara saniniujiushaariquia sesa pa miiniuriani. Nojuacuajaari naa saniniujiushaaquiaarijuhua sesa na miiniuria juucua, naate taa pa saniniujiushaaquiaacuaani. Maja cutaraari sesa na miiniu quiquiaari quenaaja. ¹⁶ Cunora, pa jiyanoojia Pueyaso pa rupერიquia pa puereyaquiniutia. Nojuacuajaari pa tojiquiaa pa secosacari nojuaja, na jiyanooniuria pajaniya sesa pa miishanojiniji. Ritia pa cumaquiquiaajaariuhua, pa rejeretanura paa jaara sesa miiniuria saniniujiushaariquiani.

5

¹ Puetunu pueyacuara secojonaa jiyaniijiajanaari

pueyaracaanu narta pueyajinijinio saquiriojosano pueyano quiquiaa, taa Pueyaso niishitiquiaari supuetana Moisés cuajani. Nojuajaari jiyatesaaquiaa pueyacuaji na tacunura Pueyaso. Naacuajitij, nojuajaari nareja pueya niqutiojosano Pueyasorano masejua. Naajuhuj, pueya jaara sesa miiri, pueyacuara secojonaari pueya seya nanaca shootequiaa, Pueyaso jiyanooniuria nojori, sesa nojori miishanojiniji. ² Pueyacuara secojona quiniuucua pueyanohuj, nojuajaari sesa miiijajuhuj. Naacuajitij, nojuajaari na naata narta pueyacuara taraajenu, sesa nojori miishacari, nojori niishiyaquishacari maninia miiniujuhuj. ³ Naacuajitij, nojuajaari tama nocuarajaaja seya nanaca shootequiaa sesa na miiniuucua, taa na miiquiaacuaa narta pueyacuarani, sesa nojori miishacari. ⁴ Niaacuajaari niishiya, majaari quenaaja tamonu pueyano na naata tama na cuaqueyajaaja jiyatenu pueyacuara secojona na quiniuria. Pueyasojuaacuajaari tamajaaja saquiriojua na panishano pueyano, cuno pueyano quiniuria pueyacuara secojona. Pueyasocuajaari naa saquiriojoquiaaricuaa Moisés tarajanu Aarón, pueyacuara secojonaa jiyaniijia na quiniuria. ⁵ Naajuhuj, Jesucristoori maja tama na cuaqueyajaaja na jiyatenu quiquiaari pueyacuara secojona na quiniuria, Pueyaso na jiyanootiniuria pajaniya. Tama Pueyasojuaarijia na jiyatequiaari pueyacuara secojona na quiniuria. Nojuajanaacuajaari naa sequequiaari Jesu:

“Quiaari quiyanu. Janiyari pueyanora quia muerateree jiyacuani cua saquiriojosano pueya jiyaniijia quia quiniuria”.

⁶ Pueyaso sequesanoori tamaqui tariucuaaanu na Rupajinia naa naajiotasano quiyajuhuj:

“Pueyaracaanu rishijia quia quiniuucua, quiaari pueyaracaanu pueyacuara secojoriquiano cutara, taa Melquisedecuaani”.

⁷ Naa pueyano na quishacari mijiriatej, Jesucristoori jiyanohua saniniujushaaquiaari. Naquiya na miyaquishaanuucuaaji juucua, nojuajaari na Que Pueyaso secojoquiaari jiyanohua na nujuquenuta. Jiyanohua martequiaariiri na Que na secojosacari, maja na mosaanura. Nojuajaari niishiquiaari na Que na naata nocua taraajenu, maja na mosaanura. Naajaa, na Que tojijia na quiniuucua, na Que sequequiaariiri: “Naajaa, quia miiri quia panishano cua Quena, taa quia panitiaquiaari miiniu janiyacujani”. Na Queeri na tojiquiaari. ⁸ Jesucristoori seetanujuaanaa Pueyaso Nyanu quiquiaari mijiria na quishacarijuhuj. Naajaa, na niishishacari nojuajaari

jiyanohua naquiya miishaanutaniya nojuaja jaara na Que tojiri, naajaa, nojuajaari saaja na tojiquiaari. ⁹ Naacuaajitij, tojetaarucujanaa maninia miijia na quiniuucua, nojuajaari pueyacuaji Tacunara quiquiaari, puetunu na tojitiajacajanaa na jiyatenura pueyaracaanu rishijiacara. ¹⁰ Cunora, na Que Pueyasoori na jiyatequiaari pueyacuara secojona na quiniuria pueyaracaanu, juhua Melquisedec.

Jiyanohua puereetaari Jesu tojiniu tarinitianu

¹¹ Janiyari queraatia socua nia niishitiojonu paniya Jesucristojinijini, nia niishiniuria nojuajaari seetanujuanaa juhua Melquisedec. Cunoori puera jiyajeneta, maatia cua niishitiojonura niajaniya, juhua niishiyashijiacara nia quiniuucuhua. Niaacuajaari tari niyajetarucuaa tariucuaacaanu nia tojishano. ¹² Tariucuaacaanujiniji Pueyaso rupaa tojijiaca nia quiniuucua, ¿taateni? Niaa mariqui na niishitiojonuujuaca quiriquia tari. Saniniuujia, niaari quiarijia paniya socua nia niishitiojosaanuhuara maatia niishishaatia casaa Pueyasojiniji. Niaari juhua naatujooriria quiriohuacuaa, juhua shipiyataaquishoojua. Naacuaajitij, majaari nia naata jiyajeneta niishitiojosano casaa niishiniu. ¹³ Naa maatia niishitiojosano niishijia nia quishacari saajatej, niaari juhua conaaja quiyajaa, saaja quitiaacaacua naataja. Majaari Jesucristo niishitiojosano tojitiajaca nia quiniu, maninia miijia nia quiniuria. ¹⁴ Juhua tariucua mashiquioriria nia jiyateriquiani. Mashiquiori cutaraari puetunu casaajanaa miaquenuujuaca. Naajuhua, puetunu Jesucristo niishitiojosanojuanaa niishijia nia quiriquia. Niaa jaara na niishitiojosano tojijiaca quiriquia, saaja maninia miijia nia quiniuria, niaari maninia niishiniutianiya teyano casaate maniniani, teyano casaate sesa saniniunijia.

6

¹ Naacuaajitij, majaari juhua naatujoori nia quiniu pueyacaanu. Seetanujuanaa socua Pueyaso rupaa tojitiajaca nia quiriquia, juhua tariucua cumantumaca mashaja nia quiniuria, cumueeca. Niaacuajaari tari coteenujuanaa Jesucristojiniji niishitiojosano niishijia. ¿Niaatucua casaara socua niishitiojosaarohua nioojia nia tacatonurani, maja nia tiuuniuria maninia nia miishanoocua najuhuananij? Niaacuajaari tari niishiya, majaari nia naata maninia nia miishanota tama nia cuaqueyajaaja jiyanootiniu Pueyaso. Cunora, niaari Jesucristoocua tiuujiacara quiquiaari tari, Pueyaso jiyanooniuria niajaniya. ² Naajuhua, niaacuajaari tari niishitiojosaaquiaari moojinia nia tiuquinishaanura Pueyaso pueya nia quiniuucua. Niaari niishitiojosaaquiaarijuhua Pueyaso

pueyacua nia nianura nia juaashiquia nojoriicuara nia sec-
 ojosacari, Pueyaso cumaquiniuria nojori. Niaari niishiya-
 juhuaj, macunucuaari samiitiaconutaniuhua. Nojorijinijinio
 saniniuujia, Pueyaso tojiyashijiacaari pueyaracaanu sani-
 itiosocoriquiano jiyatesaanutaniya. ³ Quiarijiani, majaari
 socua cua niishitiojonu quiniutianiya niajaniya nio shusha
 cua sequesanojiniji niajaniyani. Pueyaso cumaquishacari
 janiya, janiyari socua jiyajeneta casaa Jesucristojiniji niishi-
 tiojonutaniya niajaniyani.

⁴⁻⁵ Pueyano jaara Pueyaso Rupaa tojiyashijara quiriohua,
 najuhuaanaari na niishitiojonu pacutenuhua, nojuaja
 jaara tari Pueyaso Sohuanu cuhuatasano jiuujiaraca
 quiquiaari. Najuhuaanaari nojuaja jaara tari jiyanooshano
 quiquiaari, nojuaja jaara tari Pueyaso Sohuanu cumaaca
 niishijia quiquiaari. Najuhuanajaariuhua nojuaja jaara
 tari Pueyaso Rupaa shuquiritiaja quiquiaari, nojuaja
 jaara tari Pueyaso cumaacaraca quijia quiquiaarijihuaj.
⁶ Jiyano pueyanotej, majaari tari na naata sesa miijia
 na quiniucua taraajetesaanuhua, Jesucristoocua na
 tiuuniuhuara seetanujuanaa. Nojuajaari juhua Pueyaso
 Niyanu teetenu pacuteya niyacutesanojinia, naa na
 ruuretajaca na quiniucua. Naa Jesucristo tacartaja na
 quiniucuatej, tamasacaari Jesu rerequetequiaajuhuaj.
⁷⁻⁸ Naacuajitij, cuno pueyanoori juhua noo cuhuariquia
 tee cuniqui sesa jiyasocua maniniucuaa moritianucujani,
 riyocuacanio. Pueyasoori najuhuaana maru niyojotequiaa.
 Majaari cuno cuhuariquiajinia nataacuaca muetunu.
 Jiyano cuhuariquiatej, na camaru cuara catijiataaranoj.
 Pueyasoori naa saniitionutaniya nocuaji ruparequeno
 pueyajuhuaj. Saniniuujia, Jesucristo rupaa tojijiacani,
 nojoriiri juhua maninia cuhuariquia. Pueyasoori maru
 niyojotequiaa nocua, maninia na muetutenura tii natoosano
 casaa. Naacuajitij, na camaruuri queraatia miajajauraca
 quiniutianiya. Naajuhuaj, Pueyasoori na tojitianu
 tarinitiaashijiaca shuquiritiniutianiya pueyaracaanura.

*Pa niishishacari Pueyasoori maninia pa miiniutianiya,
 paari cunora na tojinuu tarinitiaaquiquiaani*

⁹ Miriqui cua pohuatasano sesa cuhuariquiajinijini,
 cunoori maja niajaniya cua panishano pueyanaa.
 Majaari cua taacanuunu niajaniyajiniji. Niaacuajaari
 pa Jiyaniijia tojitiajaca quiquiaa. ¹⁰ Pueyasocujaari
 jiyanohua maninia. Nojuajaari maja nia miishano niarta Pueyaso
 pueya, Pueyaso panijia nia quiniucua, taa quiarijia nia
 miyajaacuajani. ¹¹ Naatej, taa shitimia niarta Pueyaso pueya

naacujuacatucuaaja niajaniyani, naajuhuaaj, janiyari nia panitiaani pa Jiyaniijia nia sashiniuria nia timiniutiajuhuaj, nojuaja jaara pa rijionuucua tiuquiriohuajaatijia. Nia niishitiriquiajaaniuhuaaj, Pueyasoori jiyanohua maninia miiniutianiya pajaniya. ¹² Majaari nia macuhuajeconu juhua taajecori nia quiniuria pa Jiyaniijia. Saniya nia quiriquia cutara juhua tariucuaaanu parta Pueyaso pueya. Nojoriiri shamaatia Pueyasocua tiuujica quiquiaari pueyaracaanu. Naquiya miiniu rejeretajacaari quiquiaarijuhuaj. Naaratej, Pueyasocuaajaari tari maninia miiquiaa nojori, taa seetanujuanaa na sequequiaari na pueyarano na miiniuriacuajani.

¹³ Pueyasoori seetanujuanaa saaquiiano Abraham sequequiaari taa na miiniutianiya maninia nojuajani. Majaari na naata sequenu, tamonu cuaara na saniitiooranoj, nojuaja jaara miyaquiri na sequesano saaquiiano Abraham. ¿Cantucuaa cumaacaraca Pueyaso na saniitionurani? Shaaqui. Nojuajanaacuajaari Jiyaniijiajanaa. ¹⁴ Naaratej, Pueyasoori naa sequequiaari saaquiiano Abraham:

“Janiyari seetanujuanaa maninia miiniutianiya quiajaniyani. Janiyari quia jiuhua muetutenutaniya jiyanohua queraatiarani”.

¹⁵ Naa Pueyaso sequenu nuhuaji saaquiiano Abrahamtej, Abrahamri juhuajaniya sashiquiaari Pueyaso cuaara na sequesano miiquiaarijaatijia. ¹⁶ Pueyanaa, niaacuajaari niishiya taa pa miiquiaani, parta pueyano niishiniuria paari nojuaja pa sequesano miiniutianiya seetanujuanaani. Paari naa sequequiaani: “Seetanujuanaa quia sequeyanijia. Majaari cua sapojonu. Pueyaso cuaara saniitioora janiya, janiya jaara cua sequesano miyaquirini”. Naa pa sequesacaritij, parta pueyanoori juhuajaniya pocua tiuujia. Majaari tari na taacanuunu pocuaji. ¹⁷ Naajuhuaaj, Pueyaso sequesacari taa seetanujuanaa na miiniutianiya na pueyaranoni, nojuajaari jiyanohua panitiaquiaari pajaniya, na sequesanoocua pa tiuniuria seetanujuanaa. Majaari na paniniu quiquiaari pa taacanuunura quenaaja na sequesanojiniji. Cunora, nojuajaari naa sequequiaari: “Janiyacuaajaari Pueyasoni. Majaari cua niishiniu sapojonu. Cua sequesanoori seetanujuanaa”. ¹⁸ Naacuajitij, Pueyasoori maatia sequequiaari taa na miiniutianiya nocua tiuujiacarano pueyarani. Majaari saaja cuno na sequenu quiquiaari. Nojuajaari sequequiaarijuhuaj: “Cua sequesanoori seetanujuanaa”. Pueyaso sequesanoori maja na naata jatanishaanu. Naacuajitij, pajaniya, nocua tiuujica pueyani, paari poojia cajitiquiaani maatia pa niishishacari, pocuaji Tacunaari puetunu na seque-

sanojuanaa miiniutianiya pajaniyara. Naacuajitij, majaari pa taacanuunu quenaaja. ¹⁹ Naa Pueyaso sequesanoocua tiuujia pa quishacaritij, paari juhuajaniya naquiya miiniu rejeretajaca quiquiaani. Sesaacaari maja na naata Pueyaso jaariutianu pajaniya. Naacuajitij, paari juhua buqueni, pootioyaquishoo, niiquia casaacuaji na jaasutanuucua. Cuno niiquia casaari niquishoo, moo cariquimia pojiyari. Naajuhuaaj, nocua pa tiuushanoni, nojuajaari jiyocuaaanu quiya, niquishoojaariuhua na Que Pueyaso shuriucua na quiniuucua. ²⁰ Nojuajaari na Queecua quianu pa puetaquiaari. Nojuajaari tii pueyaracaanu secojoquiaa na Que pocuara, na Que jiyanooniuria pajaniya. Naacuajitij, Pueyasoori na jiyatequiaari pueyaracaanu secojona na quiniuria pueyacuara, taa Melquisedec quiquiaaricuaani.

7

Jesuuri pueyacuara secojona, taa Melquisedec quiquiaaricuaani

¹ Cuno Melquisedecni, nojuajaari Salem tiaca jiyaniijia quijia. Nojuajaari Pueyasोजनाa secojona pueyacuara. Pa supuetana Abraham tacatesacariuhua na naminiu nuhuaji na paraa, tamasa tiacajinijinio jiyaniijianucuaani, Melquisedecri nocua tohuataquiaari Salem tiacajiniji. Naa na sequequiaariiri: “Abrahamnaa, quiaari Pueyaso timitiasano. Pueyasoori quia miiniutianiya jyanohua maninia”. ² Jiyacaritij, Abrahamri na paraa casami nitiariquihua na quiquiojinihuara. Naacuajitij, nojuajaari puetunu cuno casamijinijiniojuanaa Pueyasora na riuriosano niquitioquiaari Melquisedec. Abrahamri naa miiquiaari na niishishacari Melquisedecri Pueyaso secojona pueyacuara quiquiaari. Pueyanaa, nio Melquisedecjiniji nia niishiri. Pueyano rupaajinia, na sesaari sequeya, “Saaja maninia miijia jiyaniijia”. Naajuhuaaj, na tiaca sesa Salemni, cunoori pueyano rupaajinia sequeya, “Juhuaajaniya quijia pueya tiaca”. Na sesaari naa quiquiaari na pueya jiuujia cajitijia na quiniuucua. ³ Majaari tojetaarucujanaa na niishishaanu, ¿queraca quiquiaaritii, nucuaracajuhuaaj, supuetanaaracanio? Majaari quenaaja na pohuataasaanujuhua na rasaanujiniji, na shaajenujinijinio. Naacuajitij, pajaniyara, Melquisedecri juhua pueyaracaanu quijiajuhuanajaj. Majaari na niishishaanujuhuaaj, tamonute na niti jiyatesaaquiaari pueyacuara secojona na quiniuria. Maja. Naacuajitij, nojuajaari juhua Pueyaso Nyanu, pueyacuara secojona na quiniuria pueyaracaanura.

⁴ Pueyanaa nia niishiri, Melquisedecquiiri seetanujuanaa tojishano pueyano quiquiaari socua pa supuetana Abrahamjiniji. Naaratej, pa supuetana Abrahamri nareja na niquitioquiaari na paraa na shocotasano casamijinijinio. Secaja niquitioquiaariiri taa Pueyaso rootaquiaari pa supuetanaacuajani, nojori niquitiojonura nera. Tariucuacaanu, Pueyasoori pa supuetanaa niishitiojoquiaari nojori niquitiojonura secaja, puetunu nojori jiiitasano casaajinijijanaa. Naacuajitij, pueyano jaara diez casaa jiiitare, cuara Pueyasora niquitioora niquiriyatujua.

⁵ Pueyasocuaajaari supuetana Leví niquiohuacuajinio supueno pueya jiyatequiaari narta Israel pueyacuara secojonaa nojori quiniuria. Nojoriiri jiyatesaaquiaari Pueyasorano pueya niquitiojosano masejojua nojori quiniuriajuhuaj. Naa Pueyaso sequesano cuajaari Moisés Rootasanojinia naajiotasaaquiaari. Abrahamcuajaari puetunu Israel niquiohuajanaa supuetana quiquiaari, maja saaja Leví supuetana. Naajaa, Leví niquiohuacuajinio supueno pueyari Pueyasora narta Israel pueya niquitiojosano masejojua.

⁶ Melquisedecri pueyacuara secojona quiquiaarijuhuaj. Maja cutaraari Leví niquiohuacuajinio na supueno quiquiaari. Naajaa, seetanujuanaa pueyacuara secojona na quiniuucua, Abrahamri Pueyasorano na riuriotaca na niquitioquiaari. Abrahamri seetanujuanaa Pueyaso timitiasano pueyano quiquiaari. Naaratej, Pueyasojunaacuajaari tari Abraham sequequiaari, nojuajaari maninia na miiniutianiya. Naajuhuj, Melquisedecri pa supuetana Abraham sequequiaari Pueyasoori jiyano hua maninia miiniutianiya nojuaja.

⁷ Paacuajaari niishiyani, Pueyaso jaara maninia miiniutianiya tamonu pueyano, na sequesano caminiujiunia pueyanoori socua tojishano pueyano maninia na miishocoriquiano pueyanojiniji. Naacuajitij, paari niishiyani Melquisedecri socua tojishano pueyano quiquiaari Abrahamjiniji.

⁸ Quiarijiani, Pueyasorano pueya niquitiojosano masejojuacani, puetunu nojorijianaari shaajejaca pueya. Saniniuujia, tariucuacaanu Pueyaso Rupaajinia pa serojosacari Melquisedecjiniji, juhua saminioginiji pohuatashiyari.

⁹⁻¹⁰ Nia niishirijiuhuj, Leví niquiohuacuajinio pueyacuajaari Pueyasorano pueya niquitiojosano masejojuaca, pueyacuara secojonaa nojori quiniuucua. Cua tojiri pueyanaa, Melquisedec naacuneetosacari Abrahamta, Abrahamri jiyacari tari na cuaqueyajinia jiiitariquiaa puetunu nocuajinio supueriquiano pueyajanaa. Naacuajitij, Abraham

niquitiosacari Pueyasarano na riuriotaca Melquisedec, pa naata sequenu Leví quiriquianojuanaari jiyacari Melquisedec niquitioquiaari, Abraham quiniuucua na jiyasarano tari.

¹¹ Leviicuajinio supueno pueyari pueyacuara secojonaa quiquiaari, nojori miiniuria taa Moisés Rootasanojinia sequequiaaricuajani. Naacuajitij, narta Israel pueya jaara sesa miiquiaari, nojoriiri sesa miijiaca seya puecooquiaari pueyaracaanu tama na camaruhuacuarajaaja, nojori na jiyanootiniuria Pueyaso. Naa nojori miishano jaara pueya jiyateriquia tojetaarucuajanaa sesa miyashijiacara, paa maara tamonu pocuara secojoriquiano paniyaquiriquiani. ¡Tamonu pocuara secojoriquiano cutaraari panishaaquiaari! Juhua pueyaracaanu rishijia Melquisedec panishaaquiaari cutaraari, maja juhua Aarón saniniuujia, nocuajinio supueno pueyano. Nojoriiri shaajejaca cutara. ¹² Aarón cuajaari narta pueyacuara secojonaa jiyaniijia jiyatesano quiquiaari, taa Moisés Rootasanojinia sequeyacuajani. Naacuajitij, tamonu pueyano jaara jiyatesaarecuua pueyacuara secojona na quiniuria, tamonu rootasanoori panishiyajuhuj, Moisés Rootasano niti na quiniuria. ¹³ Tariucuacaanu Pueyaso Rupaajinia, maatia sequeyacuajaari, Pueyasoori tamonu pueyano jiyatenutaniya pocuara secojoriquiano. Nojuacuajaari pa Jiyaniijia Jesu. Nojuajaari maja Leví niquiohuacuajinio supueno. Nojuajaari supuetana Israel niyanuucuaajiniocuaja, saniniuujia tamonu neyanuucuaajiniojaarohuj, teyanocuajinio quenaaja niquiriyatu pueyacuara secojona supueyaquiquiaaricuajani. ¹⁴ Maatia niishishiyacuajaari, pa Jiyaniijiaari Judá niquiohuacuajinio supueno quiquiaari. Judaari Leví tarajanucuaja. Moisés pohuatasacari pueyacuara secojonaajinijini, majaari quenaaja Judá na jiyaniquiniu quiquiaari.

¹⁵ Quiarijiani, quiarinio pocuara Secojona quishacari juhua Melquisedec, paari maatia niishiyani Leví niquiohuacuajinio supueno pueyacuara secojonaari sanitishaaquiaari. ¹⁶ Nojoriiri pueyacuara secojonaa quiquiaari saaja Leví niquiohuacuajinio supueno pueya nojori quiniuucua. Jesucristo cutaraari pocuara secojonara jiyatesaaquiaari pueyaracaanu rishijia na quiniuucua. ¹⁷ Cunora, Pueyasoori naa sequequiaari nojuajiniji:

“Quiaari pueyacuara secojona quiniutianiya pueyaracaanura, juhua Melquisedec”.

¹⁸ Naacuajitij, puetunu Moisés rootasanojuanaa pueyacuara secojonaa pueya miishocoriquianoori tari jatasaquiaari, najuhuaana na quiniuucua. Cuno miishanoori cumaacaju

quiquiaari pueya na jataniniuria. ¹⁹ Seetanujuanaari, Moisés Rootasanoori maja na naata quiquiaari saaja maninia miijiacara na jataniniuria na tojtiajaca. Quiarijia saniniuujia, paari Pueyaso rupaa Jesucristojiniji jiitiaani. Nocua pa tiushacari, Jesucristoori pueyaracaanu pa jiyanootiquiaa na Que, juhuajaniya pa rupuenura nojuaja.

²⁰ Na Que sequesacari Neyanu quiniuria pocuara secोजना pueyaracaanura, nojuajaari naa sequequiaari seetanujuanaa. Naacuajitij, paari panaatia quiquiaani pa niishishacari Jesucristoori na Que shuriucua quiya, pueyaracaanu pocuara na secojonura na Que. Saniniuujia, majaari naa Pueyaso sequenu quiquiaari Leví niquiohuacuajinio supueno pueya, seetanujuanaa pueyaracaanu pueyacuara secojonaa nojori quiniuria. ²¹ Saniniuujia, Neyanujiniji na sequesanooni, cunoori seetanujuanaa. Majaari na sequesano jatanishaanu quiniutianiya. Naacuajitij, naa naajiotasano quiyari tariucuacaanu Pueyaso Rupaajinia:

“Jiyaniijia Pueyasoori seetanujuanaa sequeree na miishocoriquiano. Majaari na sequesano na jataniniu quiniutianiya. Neyanu sequereecuajaari: ‘Quiaari pueyacuara secojoriquiano pueyaracaanu’ ”.

²² Naacuajitij, pueyaracaanu na Que shuriucua Jesu quiniucua pocuara na secojonura, paari seetanujuanaa niishiyani paari Pueyaso pueyani, Neyanuucua pa tiuuniucua. Naacuajitij, Pueyaso rupaa Jesujinijiiri socua jiyanohua maninia Moisés Rootasanojiniji. Cunoori pueyaracaanu rishijia Jesu quiniucua. ²³ Saniniuujia, Leví niquiohuacuajinio supuenoni, queraatia pueyacuara secojonaari quiquiaari pueyaracaanu rishiyashijia nojori quiniucua. ²⁴ Jesu cutaraari shaajeyashijia. Naa pocuara secojona na quishacaritij, majaari quenaaja tamonu sanitiniu quiniutianiya nojuaja. ²⁵ Naacuajitij, nocua pa tiushacari, nojuajaari pueyaracaanu pocuara secojoquiaa, tojetaarucuajanaa maninia miijiacara pa jatanishaanura, Pueyaso pa rupuenura. Majaari pocuara na Que na secojonu na tarinitianu quiniutianiya, shaajeyashijia na quiniucua.

²⁶ Jesuuri namitia pocuara secojona na Que. Majaari tamonu quiniu juhua nojuaja. Nojuajaari tojetaarucuajanaa maninia miijiajuhuanajaj, juhua na Que Pueyaso. Majaari quenaaja sesa miiniu na niishiniu. Sesa miijiaa tajinia na quishacari mijiria, naajaa, majaari sesa na miiniu quiquiaari quenaaja. Saaja maninia miijia na quiniucua, nojuajaari tojetaarucuajanaa tamaatia quijia mijiria quiniaa pueyajiniji. Naaratej, Pueyasoori jiyocuacaanu quijiara na jiyatequiaari, Jiyaniijiajanaa na quiniuria na shuriucua, tii na secojonura

na Que pocuara. ²⁷ Leví niquiohuacuajinio supueno pueyacuara secojonaa jiyaniijianucuaari pueyaracaanu tama sesa nojori miishanoocuarajaaja seya puecootujua coteenu, Pueyaso jiyanooniuria nojori. Naa nojori miiniu nuhuajitij, nojoriiri jiyacari narta Israel pueya seya puecooquiaari sesa cuno pojori miishanoocuara saniniuujia. Maja cutaraari naa Jesu miiniu quiquiaari. Nojuaja jaara tama na cuaqueyajaaja tarinitiaquiaari pocuara na mosaanura juhua borregoniyojua sesa pa miishanoocuara, cunojuanaari na cusonu quiquiaari. Majaari socua na caminiu quiniutianihua cusonu. Naa na cusonuucua pocuaratej, puetunu sesa miijiacajanaari na naata jiyanooshaanu puetunu sesa na miishanojinijijianaa. ²⁸ Moisés Rootasanojinia, Pueyasoori tii sequeyacuaja canapuate pueyacuara secojonaa jiyaniijiaari jiyateshiyani. Puetunu cuno pueyacuara secojonaa jiyaniijianucujanaari sesa miijiac quiquiaari, juhua puetunu pueyajuhaaj. Jiyanohua Moisés nuhuaji, Pueyasoori saniniuujia tama Neyanujuaaja jiyatequiaari pocuara secojonajanaa na quiniuria pueyaracaanu. Na Que tojjia na quiniucua pueyaracaanu, naquiya miiniu rejeretaja na quiniucua juhuaj, naacuajitij, nojuajaari tojetaarucujanaa maninia, pocuara secojonara na jiyatesaanura.

8

Quiarinio Pueyaso Rupaacua pa tiuushacari, Jesuuri pa jiyanootiquiaa na Que

¹ Nio, janiya na pacutenutaniuhua sequenuni, cunoori socua panishano nia niishiniuria. Cua tojiri. Pueyaso Nyanu quiniucua pocuara secojona, nojuajaari na Que miaquetajara cajiquiaari jiyocuaaanu. ² Nojuajaari tii na Que secojonia pocuara Pueyaso Quishaquijianaa. Cunoori Pueyasojanaa shipinishano quiquio, maja pueyano tiasano.

³ Puetunu pueyacuara secojonaajanaari jiyatesaaquiaari nojori masejonura narta pueya poosano casaa, Pueyasora nojori niquitiojosano. Naajuhuaaj, nojoriiri seya puecojuaca, Pueyaso nojori jiyanootiniuria. Naacuajitij, Jesucristo quiniucua pueyacuara secojonajuhuaaj, nojuaja cuara casaa jiitiaara, Pueyaso na niquitiosocoriquianojuhuaj. Cuno casaacuaajaari tama na cuaqueyajaaja quiquiaari, pocuara na mosaanura, Pueyaso jiyanooniuria pajaniya. ⁴ Leví niquiohuacuajinio supueno pueyacuara secojonaacuaajaari pueya nitiasano nojoriicua masejoquiaajaa, Pueyasora nojori niquitiojosocoriquiano taa Moisés Rootasanojinia sequeyacuajani. Naacuajitij, Jesucristo jaara mijiria quiriquiaja, nojuaja maara

pueyacuara secojona quiyaquiriquiaj. Pueyacuara secojonaacuajaari queraatia quiya. ⁵ Pueyacuara secojonaa jecajosano casaa Pueyaso Secojojuua tiajinia nojori jütiasanoni, nojori miishanonio, puetunu cunujuanaari saaja juhua jiyocuacaanu casaa naaqui. Cunora, Moisés jaara tari shipiniriquiaa Pueyaso Secojojuara suhuorotu, puetunu na casamitiajanaanio, jiyacaritij, Pueyasoori naa Moisés sequenu pacutequiaari:

“Moisésnaa, cua tojiri. Maninia quia miiri jacaria puetunujuaanaa, naatej, taa cua niquitiqianucujaja quiajanianiyani, Sinái tuhananuucua quia quishacari”.

⁶ Pocuara Secojonajanaa miishanoori jiyanoehua maninia socua pueyacuara secojonaa Leví niquiohuacuajinio supueno miijiosanojiniji. Pocuara Secojona cutaraari tama na cusonutajaaja pa jiyanootiquiaari Pueyaso. Naacuajitij, Pueyaso rupaa Jesucristojinijiiri jiyanoehua socua maninia Moisés Rootasanojiniji.

⁷ Pueya jiuujia jaara na naata quiriquia seetanujuanaa sesa miyashijacara jatanishano Moisés Rootasano tojijica nojori quiniuucua, Pueyaso maara quiarinio rupaa niishitiyaquiquiaari pajaniya. ⁸ Saniniuujia, Pueyasoori niishiquiaari Israel pueyari maja na naata quiquiaari puetunu Moisés Rootasanojuanaa tojiniu. Cunora, tariucuaaanu pueyara Pueyaso sequesano caminiujiunia sequesanoori naa naajiotasano quiya:

“Jiyaniijia Pueyasoori sequeya: ‘Tamacari, janiyari quiarinio rupaa niishitiniutianiya Israel jiyajinijinio pueyani, Judá jiyajinijinio pueyano. Teyano pojoriti nocua tiuyani, nojoriiri seetanujuanaa cua pueya quiniutianiya. ⁹ Quiarinio cua rupaari tamaatia quiniutianiya Moisés cua niishitiojosano rupaajiniji puetunu Israel pueyarajanaa. Jiyacaritij, janiyari nojori mashiquiquiaari Egipto jiyajinijini. Juhua nojori que, janiyari nojori jaatucunuuriquiaa juucuani nojori cua niquitiosocoriquiano jiyajiniara. Saniniuujia, nojoriiri Moisés cua rootasano nojoriria tojiniu paniyaquiquiaari saaja. Janiyari cunora nojori cartequiaarini’. Jiyaniijia Pueyasoori naa sequeree. ¹⁰ Socua sequeyari: ‘Nio pa quishacari nuhuaji, janiyari naa miiniutianiya

cua saquiriojosano pueyarani: janiyari coojia nianutianiya nojori jiuujiajiniani. Naacuajitij, cua rootasanoori juhua naajiotasano quiniutianiya nojori niishitiajajinia, seetanujuanaa cua tojitiajaca nojori quiniuria. Naacuajitij, janiyari nojori Jiyaniijiajanaa

quiniutianiyani. Nojoriiri saniniuujia cua pueya quiniutianiyacujua. ¹¹ Jiyacaritij, pueyano jaara janiyajiniji pohuatanu paniri narta pueyano, na cojiniajuhuaj, tapueyocuacanio, cunoori najuhuana quiniutianiya. Puetunu pueyapuejanaacuajaari tariucua cua niishijiaca quiniutianiya; jiyaniijianucua, poonijjotesano pueyano. ¹² Janiyari nojoriicua taraajeja quiniutianiyani. Majaari cua saniitionu quiniutianiya nojori, sesa nojori miishanojiniji. Naa cua jiyanooshacari nojoritij, majaari socua cua saneejonu quiniutianiya sesa nojori miishano. Janiyari puetunujuanaa na niyajetanutaniyani' ”.

¹³ Naa Pueyaso sequesacaritij, taa nojuaja quiarinio na rupaa niishitiniutianiya pajaniyani, nojuajaari tariucuacaanu Moisés na rootasano jiyatequiaari tariucuanera. Naacuajitij, Moisés Rootasanoori quera shaajasaanutaniya puetunujuanaa.

9

Tariucuacaanu Moisés suhuorotesano Pueyaso quiquioranoni, cunoori juhua jiyocuacaanu Pueyaso quiquiojuhuaj

¹ Tariucuacaanu, Pueyasoori Moisés sequequiaari mijiria na quiquiorano na suhuorotenura. Na niishitiojoquiaarijiaariuhua taa pueyacuara secojonaa poonijjonutaniya cuno na quiquiojiniani. ² Pueyaso Secojoua suhuorotuuri caapiqui sohuacaraca quiquiaari. Samari nujuatacojuaari coteenu sohuacajinia quiquiaari, miaquejano, tee Pueyaso tacoji pan niojosaaquiaari pueyaracaanucujani. Cuno sohuaca sesa quiquiaari “Pueyaso Shuriucua Quiquio”. ³ Cuno coteenu sohuaca puequeetujiniani, tii tunusano quiquiaariiri shiquiaruque toque. Cuno toque tamajiria quiquiaariiri Pueyaso quiquiojuanaa cutara. Naaratej, na sesa quiquiaari “Pueyaso Quishaquijianaa”. ⁴ Pueyaso Quishaqui tacoji nujuatajaari juhucutu, orojiniji shipinishano. Cuniqui catejaari shanohua jaanutaja Pueyasora. Pueyaso Quishaquijianaa cutarani, tii nujuatajaari puereetuca casaa, juhua caaja niqishano. Naananeecajiniji shipinishaaquiaariiri. Puetunu na cuaqueyajanaari orota mishiquiosano quiquiaari. Na jiniacuma, casamiiri mii racatasano quiquiaari. Pataconiyojua orojiniji shipinishanoori tii cajitiaquiaari “maná”. Manaari quiquiaari Pueyaso tinishano casaa, Israel pueya mi-aquesocoriquiano carriquia jiyajinia nojori camarucuneejotasacari. Mii matariquiaajaariuhua Aarón nataca catuutianohua, puetunu na jajautajanaa. Mii maturiquiaajaar-

ihua sai neeca quejasano, nocua Pueyaso naajiotasano na rootasano, Moisés na niqutiojosano. ⁵ Cuno caaja tiotiu caco nujuatejosano quiqiaariiri caapiqui shipinishano casaa, nesuhuaraca, juhua Pueyaso seya niquishano. Nojori nesuhuari coqueetesano quiqiaari. Teecojuuari, teje Pueyaso shacantuuca mueranacujuqiaari Moisésacuajani. Cuno caaja tiotiuuri seya nanaca majiriuutiasaquiijuhuj, Pueyaso jiyanooniuria puetunu Israel pueyajanaa. Tariucuaaja puetunu cuno casaajiniijianaa cua pohuatasano niajaniya.

⁶ Pueyaso Secojoua tia jaara tari naa maninia tiasano quiqiaari puetunu na casamitijanaa, na nuhuaji, pueyacuara secojonaari pueyaracaanu tiuquiiioqiaari Pueyaso Shuriucua quiqiojina. Nojoriiri tii tiuquiiioqiaari nojori miiniuria taa Moisés Rootasanojina sequeyacuajani. Maja cutaraari nojori tiuquitianu quiqiaari Pueyaso Quishaquijianaa sohuacamara. ⁷ Saaja nojori jiyaniijia cutaraari tii tiuquiquiaari saaja rupaquijia puetunu marijiajanaa. Na tiuquishacari Pueyaso Quishaqui, seya nanaca pataquiaariiri Pueyaso jiyanooniuria nojuaja, narta Israel pueyano, sesa nojori miishanojiniji. ⁸ Naa Pueyaso Quishaqui quiniucua mishiquionucua pueyacuajitij, Pueyaso Sohuanuuri pa niishitiya, pueyari juhuanouaja maja na naata rupuenu quiqiaari Pueyaso. ⁹ Naacuajitij, puetunu cunojuanaari quiqiaari juhua miriqui miishano, saniniuujia nio pa quishacari pa niishiniuria pocuara Secojonajanaa miishano pocuara. Puetunu pueyacuara secojonaa catijiasano casaa-janaari miriqui miishano quiqiaari saaja. Naajuhuj, pa supuetanaa niqutiojosano casaa Pueyaso jiyanooniuria nojorini, puetunu naa miishanojuanaari miriqui miishano quiqiaari. Naacuajitij, cunoori maja na naata cuno pueya jiuujia jeechanu seetanujanaa, juhujaniya nojori rupuenura Pueyaso. ¹⁰ Naaratej, cuno tariucuaaanu rootasanoori saaja panishaaquiaari Pueyaso cuaara na sanitiquiaarijiaatijia quiarinio rupaata. Cuno tariucuaaanu rootasanoori pueya niishitiquiaari teyano sumatuuteja miaqueshiyani, teyano mashacateja ratushiyani. Naajuhuj, nojoriiri niishitishaaquiaari taacari pueya jeequeya na cuaqueyani, nojori casaanio, juhua maninia jeequejosano nojori quiniuria Pueyaso niqiuara. Puetunu naa pueya miishanojuanaari maja na naata pueya jiuujia jeechanu sesa nojori miishanojiniji.

¹¹ Quiari naataja saniniuujia, Jesucristoori pocuara Secojonajanaara jiyatesaaquiaari, Pueyasojiniji na masenura Pueyaso jiiatasano pajaniyarano. Cuno quiqiuo, tee na

secojoquiaa na Que pocuaracuajani, cunoori seetanujua-naa Pueyaso quiquio jiyocuacaanu, maja pueyano tiasano. ¹² Naa Cristo tiuquishacari na Que quiquiojinia Pueyaso na jiyanootiniuria pajaniyatej, nojuajaari maja na tiuquitianu quiquiaari cabra nanaca, juunu niquiohua nanacanio. Nojuaja cutaraari tama na nanacatajaaja Pueyaso jiyanootiquiaari pajaniya. Nojuajaari maja pueyaracaanu na tiuquijionu na Queecua, taa mijiria pueyacuara secojonaa jiyaniijianucua miiquiaaricuaani. Maja. Nojuajaari na Queecua tiuquiquiaari puetunujuanaa. Naa pocuara na cusonuucuatej, na Queeri Neyanuucua tiuujiaa jiyanooquiaa puetunujuanaa. Naacuajitij, majaari Pueyaso shuriucujaji pa taanusaanu quiniutianiya. ¹³ Pueyasoori Moisés niishitiquiaari, pueyano jaara macu masaqui tiuquimia, jaara na quiarejuhuaj, jiyacaritij, nojuajaari juhua curuutuuca Pueyasora. Naacuajitij, cuno pueyanoori maja na naata narta pueya rpuenu. Majaari na naata Pueyaso Secojojuatiajinia tiuquiniujiuhuj. Naajaa, nojuajaari na naata jeequesano quiniuhua, seru nanaca jaara nocua majiriuutiasaaquiaari. Cabra nanaca, juunu nanaca, niyacoo juunu catijiasano juacani, puetunu cunujuanaari maninia quiquiaari pueyara, juhua jeequesano nojori quiniuhuara Pueyasora. ¹⁴ Naa pueya cuaqueya quiniucua juhua jeequesano saaja seya nanacatacuaatej, Cristo nanaca cutaraari seetanujuanaa cumaacaraca pueya jiuujia na jeequenura seetanujuanaa, puetunu sesa casaajinijijianaa. Naatej, taa pueyacuara secojonaa jiyaniijianucua tiuquitiaquiaari seru nanaca Pueyaso Quishaquicuaani, pueya jiyanooshaanura, Jesucristoori naa miiquiaarijuhuaj. Pueyaracaanu quijia na quiniucua, Jesucristojuanaari tama na nanacajaaja tiuquitiaquiaari Pueyasocua, pa jiyanooshaanura puetunu sesa pa miishanojinijijianaa. Nojuajaari tojetaarucuajanaa sesa miyashijia quiquiaari. Naacuajitij, na nanacaari poojia cajitiquiaa, nocua pa tiuushacari. Majaari socua pa jiyaniniu pa naata tama pa cuaqueyajaaja jiyanootiniu Pueyaso tama pa miishanotajaaja. Naacuajitij, quiarijia cutaraari pa naata pa Pueyasora poonijionu shitimia, seetanujuanaa jiyanooshano pa quishacari.

¹⁵ Jesucristo cusonuucua pocuara, nocua pa tiuushacari, nojuajaari pa jiyanootiniara quiquiaari taa quiarinio Pueyaso rupaa sequeyacuajani. Naajuhuj, noo pojori, Pueyasocua tiuujiaa mijiria Jesu niyacarijiani, sesa nojori miishanoori jiyanooshaaquiaari Jesu cusonuta quiari naatajajuhuj. Naacuajitij, puetunu Pueyaso saquiriojosano pueyapuejanaari na naata puetunu Pueyaso niqutiojonu

panishanojuanaa masenu, taa na sequequiaari niqutionu seetanujuanaacuajani, pueyaracaanu shuquiriaatia jatiqui pa quiniuria nata. ¹⁶ Pueyanaa, pa shaajeyaquishacarijia, paari pa miiniu panishano naajiotanu niishijiani. Paari naa miijiani pa casami serotasaanura maninia, tevano pueya pa panitiaa nojori jiitianura pa casamicuajani pa shaajenu nuhuaji. Naacuajitij, paa jaara tari jamosaareni, pueyari maninia miiquiaa taa pa naajiotaquiaaricuajani, saminio pa quishacarijia. ¹⁷ Naacuajitij, saminio pa quishacarijia, najuhuaari pa naajiotasano. Pa shaajesacari, jiyacari cutara pa casamiiri niqutiojosano. ¹⁸ Tariucuacaanu naajuhuaaj, seya nanacaari shootesaaquiaari, Israel pueya niishiniuria Moisés Rootasanoori seetanujuanaa, nojori tojishocoriquiano. ¹⁹ Naa quiquiaariiri: Moisésri puetunu Pueyaso rootasanojuanaa nojuaja caminiujuquiaari puetunu Israel pueya niquiarajanaa. Na nuhuaji, Moisésri juunu niquiouhua nanaca, cabra nanaca cojitiquiaari mohuacata. Cunojinia shitiaquiaari borrego cajaca naatusu hisopo cashacucuataari. Cunota, mohuacanacu majiriuutiaquiaari Pueyaso Rupaa na naajiotasanoocuaari, puetunu Israel pueyacuajanaanio. ²⁰ Jiyacaritij, nojori sequequiaariiri: “Nio nanacaari pa niishitiya Pueyasoori seetanujuanaa pajaniyara miiniutianiya puetunu na sequesanojuanaa, paa jaara na rootasano tojijiaca quirini”. ²¹ Moisésri Pueyaso Secojoua tiaacua majiriuutiaquiaari nanacajuhuaaj, puetunu Pueyasora poonijiotajara shipinijosano casamiicuajanaanio. ²² Moisés Rootasanojiniji niishishiyacuajaari, quera puetunu casaajanaari saaja nanacata juhua jeequesano quiya Pueyasora. Pueya miishano sesani, cuno cutaraari maja na naata jiyanooshaanu nanaca jaara shooteyaquishaare.

Sesa pa miiniuuri jiyanooshaaquiaa Cristo cusonuucua pocuara

²³ Mijiria Pueyaso Secojoua tia, puetunu na casaatajanaa quiniuucua juhua jiyocuacaanu casaa naaqui, seya nanacaari maninia quiquiaaricuaja cuno mijiria casami quiniuria jeequesano. Saniniuujia, jiyocuacaanu casaa quiniuria jeequesano, socua maninia nanacaari panishaaquiaari seya nanacajiniji. ²⁴ Majaari Cristo tiuquitianu quiquiaari seya nanaca mijiria pueyano tiasano Pueyaso Quishaquijianaa. Cuno quiquioori saaja juhua jiyocuacaanu Pueyaso quiquio naaqui. Cristo cutaraari seetanujuanaa Pueyaso Quishaquijianaa tiuquiquiaari. Nojuajaari tii na Que Pueyaso secojoquiaa pocuara. ²⁵ Mijiria pueyacuara secojonaa jiyaniijianucuaari puetunu

marijarajanaa pueyaracaanu tiuquiiioquiaari Pueyaso Quishaqui saaja seya nanacata, pueya na jiyanootiniuria Pueyaso. Jesucristo cutaraari maja naa na miiniu quiquiaari. ²⁶ Jesu jaara Pueyaso pa jiyanootiriquia puetunu marijarajanaa taa pueyacuara secojonaa jiyaniijianucua miiquiaaricuaani, nojuaja maara jiya shipinishaanujiniji mosaariquia puetunu marijarajanaa. Quiari naataja saniniuuja, Jesucristoori mijiria rasaanquiaari tama na cuaqueyajaaja na tarinitianura pocuara na mosaanura, pueya jiyanooshaanura puetunu sesa nojori miishanojinijianaa. Majaari socua na pacutesaanu quiniutianihua monu. Naa na mosaanuucuatej, cunoori tariucuaja puetunu nocua tiuujiaa pueyajanaa jiyanooshaanura. ²⁷ Naatej, taatucuaa pueyani, nojoriiri shaajecoriquiano. Majaari nojori samiitiaconuhua mijiria nojori quiniuhuara, socua na cusonuhuara juhua coteenu na csonu. Nojori shaajenu nuhuaji, nojoriiri saaja sashiya Pueyaso nequesoreenura nojori. ²⁸ Naajuhuj, naa Jesucristo mosaanuucua jiyacaritij, saaja cunujuanaari na mosaanu quiquiaari, queraatia pueya jiyanooshaanura sesa nojori miishanojiniji. Naacujitij, pocua na muetasacariuhua, majaari jiyacari socua na mosaanu quiniutianihua pueya jiyanooshaanura sesa nojori miishanojiniji. Jiyacaritij, nojuajaari saaja nocua tiuujiaa rijionuucua tiuquiniutianihua, noo pojoriria canapuete na sashiyacuajani.

10

¹ Moisés Rootasano pueya miishocoriquianoni, pueyacuara secojonaa miishocoriquianojuhuaj, puetunu cunujuanaari juhua seetanujuanaa Pueyaso jiyocuacaanu casaa naaqui, Pueyaso racatasano Jesucristoocua tiuujiaa pueyarano. Moisés Rootasano tojitiajaca pueya cutaraari puetunu marijarajanaa na seya puecootequiaari, Pueyaso jiyanooniuria nojori juucua. Naajaa, majaari na naata seetanujuanaa maninia miijiaa pueyara na jatanishaanu seya nanacata. ² Naajuhuj, pueya miishacari puetunu Moisés Rootasanojuanaa, naajaa, nojoriiri maja seetanujuanaa tama nojori jiuujiaaja na cajitiniu quiquiaari. Cunora, majaari nojori tarinitianu quiquiaari nojori seya puecootenu tama sesa nojori miishanoocuarajaaja. Seya nanacaari maja na naata tuujunu quiquiaari sesa nojori miishano, seetanujuanaa juhuajaniya nojori quiniuria. ³ Naa seya puecoosacari puetunu marijarajanaa Pueyaso jiyanooniuria pueyatej, cunoori saaja nojori niishitiqiaariuhua tarijia nojori

miishano sesa. ⁴ Paari seetanujuanaa niishiyacuajani, juunu nanaca, cabra nanacanio, cunoori maja sesa pa miishano tuujujua seetanujuanaa.

⁵ Cunora, tariucuacaanu Pueyaso Rupaajinia, mijiria Jesucristo nishacari na sequesocoriguianoori juhuacarijia naajiotasano quiquiaari. Naa sequeyari:

“Cua Pueyasonaa, janiyacujaaari niishiyani, majaari quioojia quia cajitiniu quiquiaa seya puecoosacari quiocuara, puetunu nataacuacajiniji pueya niqutiojosacari quiarajuhuj. Saniniuujia, quiaari cuaqueyaraca cua quiniuria cua jiyateree, quiocuara cua mosaanura. ⁶ Majaari quia timiniu quiquiaa seya catijasacari quiocuara, naajuhuj pueya shootesacari na seya nanaca, quia jiyanooniuria nojori sesa nojori miishanojiniji. ⁷ Naaratej, janiyari quia sequeyani: ‘Niya quiyacuajanijia cua miiniuria quia panishano cua Que Pueyasonaa, taa janiyajiniji tariucuacaanu naajiotasaaquiaricujani’ ”.

⁸ Moisés Rootasanojiniji pueyari maatia niishitiojosaaquiaari nojori puecootenura tama na seyajaaja Pueyasooocuara, na nataacuacajinijinio nojori niqutiojonura nerajuhuj. Nojoriiri niishitiojosaaquiarijuhuj nojori catijianura na seya Pueyasooocuara, tama nojori seya nanacajaaja shootesaanurajuhuj, sesa nojori miiniuucua. Naajaa, Jesucristo sequesanojiniji, paari quiarijia niishiyani, puetunu naa pueya miishanojuanaari maja na timitiniu quiquiaari Pueyaso.

⁹ Nocuaji, Jesucristoori naa sequequiaari na Que: “Niya quiyacuajanijia, cua miiniuria quia panishano”. Naacuajitij, Jesucristojuanaari mijiria niqiquaari pocuara na mosaanura, seetanujuanaa jiyanooshano pa quiniuria cutara, maja najuhuaana seya puecoosaanura socua. ¹⁰ Pueyaso tojijia na quiniuucua, Jesucristoori tama na cuaqueyajaaja tarinitiaquiaari pocuara na mosaanura, tojetaarucujanaa jiyanooshano pa quiniuria pueyaracaanu. Naacuajitij, na Que Pueyasoori juhua tojetaarucujanaa sesa miyashijiacara pa jiyatequiaari, seetanujuanaa na pueya pa quiniuria tama nerajaaja.

¹¹ Israel pueyacuara secojonaa pueya poonijosacari Pueyaso Secojoua tiajinia, nojoriiri pueyaracaanu seya puecooquiaa narta pueya miishanoocuara sesa. Naajaa, naa nojori miishanoori maja seetanujuanaa na tuujunu pueya miishano sesa. ¹² Saniniuujia, Jesucristoori tama na cuaqueyajaaja tarinitiaquiaari pocuara na mosaanura niyacutesanojinia. Cunojuanaari na mosaanu quiquiaari. Majaari socua na pacutesaanu quiniutianihua monu. Na

cusonuucua pa niti, puetunu nocua tiuujiaa pueya sesa miishanojuanaari tojetaarucujanaa jiyanooshaaquiaa. Naa na tucuatano nuhuaji Pueyaso miiniu panishano pueratej, nojuajaari na Que miaquetajara cajiquiaari. ¹³ Quiarijia tii sashiyari, Pueyaso cuara na paraa shocotare puetunujuanaajaatijiaj. ¹⁴ Naa niquiriyatu pueyano mosaanuucuatej, puetunu nocua tiuujiaa pueyajanaari maninia miijiacara jatanishaaquiaa, tojetaarucujanaa maninia pa quiniuria, Pueyaso rupuejaca pa quiniuria pueyaracaanu. ¹⁵ Pueyaso Sohuanucujajaari naa pa niishitiyajuhuj naa Pueyaso sequesacari tariucuaaanu na rupaajinia:

¹⁶ “Pa Jiyaniijia Pueyasoori naa sequeya: ‘Nio pa quishacari nuhuaji, janiyari tamaatia miiniutianiya cua saquiri-ijosano pueyani, quiarinio cua rupaacua nojori tiushacari. Janiyari quiarinio cua rupaa nianutaniya nojori jiuujiajiniani, na tojijiaa nojori quiniuria. Naa-juhuj, janiyari juhua na naajiotanutaniya nojori niishitiajiniani. ¹⁷ Janiyari puetunu sesa nojori miishanojuanaa niyjetanutaniya seetanujuanaani’ ”.

¹⁸ Naacuajitij, sesa pa miishano jaara tari seetanujuanaa jiyanooshano quiya, cunora, majaari tari na panishaanu seya puecoosaanura, sesa pa miishanojiniji pa jiyanooshaanura.

Pueyaso pa rupuere jeequesano poojiata

¹⁹ Naacuajiti cua panishano cuarta Pueyaso pueyanaa, quiarijia cutara pa naata pa puereyaquiniutia tiuquijionu Pueyaso Quishaquijianaa, Jesucristo shootenuucua na nanaca pocuara. ²⁰ Nojuajaari quiarinio nucuaco pa jaatiaquiaa na Queecua. Nojuajaari juhua pocuaji nuunuquiaari Pueyasocua. Mijiria Pueyaso Secojojua tiajiniani, Pueyaso Quishaquiiri shiquiaruque toqueta mishiquionucua quiquiaari, pueya tiuquitiaaquiniuria Pueyasocua. Cuno shiquiaruque toque cutaraari sutequiaari Jesu cusosacari. Cunocujajaari pa niishitiya, pocuajiiri juhua nuunusano quiya Pueyasocua. Neyanu Jesucristocujajaari cuno quiarinio nuu. Nocua pa tiushacari, paari pueyaracaanu rishijiacara jatanishaaquiaani juhua nojuajuhuj. ²¹ Nojuacuajaari pocuara Secojonajanaa cutara. Na Que Pueyaso secojoquiaari puetunu Pueyaso muerasuucuarajanaa. ²² Cunora, Pueyasocua pa catecanoriquia seetanujuanaa pa paniniutia nojuaja. Nojuaja pa secojoriquia, seetanujuanaa nocua pa tiuuniutia, maja quenaaja nocuaji pa taacanuunuta. Naa pa rupueriquia nojuaja, jatanishano jiuujiata, juhua poojiacua Jesu nanaca majiriuutiasano quishacari. Naajuhuj, puetunu sesa

pa miishanojuanaa cuaara jiyanooshano quiiria, naatej, taa pa cuaqueyacuaani, pa nanasacari maniniuniacu mohuacata. ²³ Niaa jaara moojinia tiuquinijosaaquiaari, niaari maninia pohuataquiaari pueya niquiara Jesuucua nia tiuuniujiniji. Nocua nia tiuushacari, niaacuajaari niishiya puetunu Pueyaso sequesanojuanaari pajaniyara tohuateenutaniya, pueyaracaanu shuquiriaatia pa quiniuria nata. Majaari nia taacanuunu nocuaji. ²⁴ Parta Pueyaso pueyacia tacaajiaca pa quiriquia. Panijiaca pa quiniuria pa shiniujiutiooriquia, maninia miijiaca pa quiniuriajuhuaj. ²⁵ Noojiaqueya parta Pueyaso pueyari tari jiiitiquiocanu maja na rerejonura narta Pueyaso pueyata. Majaari naa nia miiniujiuhuj. Maninia cutaraari pueyaracaanu pa rerejonura parta Pueyaso pueyata, pa shiniujiutioonura. Naa pa miiriquia pueyaracaanu cutara, pa niishishacari pa Jiyaniijia tiuquiniuuri tari catecanoya.

²⁶ Nia niishiri pueyanaa, maatia pa niishiniu nuhuaji seetanu Pueyaso rupaajanaa, paa jaara saaja sesa miijioquiaa tama pa panishacarijiaajani, ¿cantucua socua pocuara cusonu pacuterohua saajaniuhuj? Shaaqui. ²⁷ Naa sacuaraatia miijiacani, nojori cuaara niishiiria, nojoriiri cocuaatia miya. Nojori jaara nojori jiuujia tacatoyaquiri sesa nojori miiniujiniji, nojoriiri jiyanoohua saniitiosaanutaniya. Narta Pueyaso paraata cojiritiasaanutaniya quejoonu mani quiquiojiniaari pueyaracaanura. ²⁸ Pueyano jaara Moisés Rootasano tojiyaquiquiaari, querajaa pueya jaara nocuara saquiriojotaquiaari, nojori sequesanoori seetanujuanaa quiquiaari. Naacuajitij, majaari nocua na taraajenu quishaaquiaari na mosaanura. ²⁹ Moisés Rootasano tojiyashijiaca jaara naa miishaaquiaaricuaa, ¿paateeri jiyaniyanijia Pueyaso Niyanu soojeaca jiyanooshaanutaniya, na nanaca shootesaanu jiyatejaca juhua najuhuanaratej? ¿Noo pojoritiiri jiyanooshaanutaniyajuhuj, Pueyaso Sohuanuucua rimiaaquejaca sacuaraatiatej? ¡Maja! Pueyaso Sohuanuuri nojori cumaquiniu paniriquiaa juucua. Jesu nanacacuajaari Pueyaso jiyanootiquiaari nojori, Pueyaso pueya nojori quiniuria juucua. Naacuajitij, Pueyaso Niyanu soojeaca pueyari socua jiyanoohua saniitiosaanutaniya Moisés Rootasano tojiyashijiaca pueyajiniji. ³⁰ Paacuajaari tari tojiquiaari naa Pueyaso sequesaroni: “Janiyacujaari naminiani. Janiyari sesa miijiaca saniitionutaniyani”. Naa naajiotasaaquiaarijiaariuhuj: “Pa Jiyaniijia Pueyasoori na pueya nequesoreenutaniya”. ³¹ ¡Jiyanoohua puereeta quiniutianiya cutaraari Pueyaso jiyanooniu ruuretajaca pueyara, Pueyaso nequesoreesacari nojori!

³² Pueyanaa, tariucuacaanu naquiya nia miishaanu nia niishiriquia, niaa jaara shushajanaa Jesuucua tiuquiaari. Naa pueya miitiasacari naquiya nijaniyatej, niaari juhuajaniya rejeretaquiaari saaja. ³³ Noojiaqueya nijaniyajinijinioori cararaatia macaatishaaquiaari. Niaari pueya niquiara naquiya miishaaquiarijuhuaj. Niarta Pueyaso pueya niquishacari naa nia miishaanutej, nojoriiri na puereyaquiniutia nia cojiquiaari saaja, niaacua nojori taraajesacari. ³⁴ Naajuhuj, niarta Pueyaso pueyajinijinio jaara nujuatejosano quiquiaari nujuatejojuajinia, Jesu tojtiajaca nojori quiniuucua, niaari nojoriicua tiuquijioquiaari, nojori nia cumanijanura nocua nia taraajenuucua. Naajuhuj, nia paraa jaara nia jiiitasano casami riutiocojoquiaari tama nojoririajaaja, nojori soosano Jesu pueya nia quiniuucua, niaari juhuajaniya nojoriria tarinitiaquiaari saaja. Niaari saaja shuquiriaatia quiquiaari nia niishishacari niaari jiyocuacaanu jiiitaa socua maninia casaa cuno casamijiniji, pueya jaariuutiasano nijaniyajinijini. Cuno, Pueyaso jiiitasano niaaranoni, cunoori shaajeyashijia casami cutara. ³⁵ Naatej, taa juhuajaniya naquiya miiniu rejeretajaca nia quiquiaaricuajani, Pueyaso sequesanoocua tiuujia nia quiniuucua, naa Pueyaso sequesanoocua tiuujia nia quiriquia pueyaracaanu. Pueyasocujaari jiyanohua maninia miiniutianiya nocua tiuuniu tarinitiaashijia. ³⁶ Naquiya nia miishacari pueyaracaanu, juhuajaniya nia rejeretariquia saaja, maninia nia tucuatnura puetunu Pueyaso panishano nia miiniurijanaa. Naacuajitij, niaari puetunu Pueyaso sequesanojuanaa masenutaniya, pueyaracaanu shuquiriaatia nia quiniuria. ³⁷ Tariucuacaanu Pueyaso sequesanoocujaari naa naajiotasano quiya:

“¡Niaaj! ¡Quera tiuquiya pueyacia Niriqiano! Maja na tarishiniu. ³⁸ Cua jiyanooshano pueyari pueyacaanu rishijiacara jatanishaanutaniya saaja Quiyanuucua nojori tiuushacari. Saniniuujia, tamonu pueyano jaara nocua tiuuniu tarinitiare, nojuajaari cua soosano pueyano quiniutianiya”.

³⁹ Cuno pojoriiri saniitiosocoriquiano seetanujuanaa. Pajaniya saniniuujia, paa cutaraari maja jiyano pueyajinijinioni. Paacujaari pa Jiyaniijiaacua tiuujiacani, pueyaracaanu nata pa quiniuria shuquiriaatia.

11

¹ Pueyaso sequesanoocua pa tiuushacari, paari niishiyani paari puetunu Pueyaso sequesanojuanaa masenutaniyani. Nocua pa tiuushacari, paari maatia niishiyani puetunu na sequesanojuanaa pajaniyarano pa niquishoo casaani, cunoori seetanujuanaa quiya. ² Noojiaqueya pa supuetanaajiniinööri seetanujuanaa Pueyaso sequesanoocua tiuujiaa quiquiaari. Naaratej, Pueyasoori nojoriinijini naa sequequiaari: “Cuno pojorini, nojoriiri maninia cua pueya, cua sequesanoocua nojori tiuuniuucua seetanujuanaa”.

³ Pajaniyara naajuhuj. Tariucuacaanu Pueyaso Rupaacua pa tiuushacari, paari niishiyani Pueyasoori jiya shipiniquiaari saaja na pocuanuta. Naacujitij, puetunu pa niquishano casaajanaari shipinishaaquiaari niquishoo casaajiniji.

⁴ Supuetana Abel tiuuniuucua Pueyasooocua, Pueyasooocua na catijiasanoori socua maninia quiquiaari Pueyasora tarajanu Caín catijiasanojiniji. Naa Abel tiuuniuucua Pueyasooocuatej, Pueyasoori na jiyatequiaari maninia na pueyano na quiniuria. Pueyasoori Abel catijiasano timitiaquiaari, nocua Abel tiuuniuucua. Cunora, tarajanu Caínri Abel moquiaari. Naajaa, naa macu na quishacariitij, nojuajaari pa niishitiojiyajaa Pueyasooocua pa tiuuniuria taa nojuaja tiuquijaaricuaani.

⁵ Supuetana Enoc quiniuucua Pueyasooocua tiuujia, Pueyasoori puetunujuanaa na riquiaari jiyocuacaanu, mijiria na shaajyaquiniuucujia. Narta pueya pajesacari nojuaja, majaari tari na quiniu quiquiaari. Pueyasoori tari na riquiaari. Tariucuacaanu Pueyaso Rupaajinia, nojuajinijiri pohuatashiyacuaja, Enocnaari Pueyaso timitijia pueyano quiquiaari mijiria na quishacarijia. ⁶ Seetanujuanaari, paa jaara Pueyasooocua tiuyashijia quirini, majaari pa naata timitiniu Pueyaso. Naacujitij, cante Pueyaso niishiniuucua jiaatiaani, nojuaja cuara tiuuria Pueyasoori seetanujuanaa quijia. Nojuaja cuara tiuuriajuhuaj, Pueyasoori na seconuujuaca tojiquiaa. Nojori panishano miiquiaa nojoririajaarihuaj.

⁷ Pueyasoori supuetana Noé numootequiaari nojuajaari nio jiya pajaashitianiniutianiya, puetunu mijiria sesa miijiacajanaa na shaajanura. Pueyasoori na sequequiaarijuhuaj puereetuua buque na shipininiuria tii na tacatajara pajaacuaji. Jiyacaritij, Noeeri maja na niishiniu quijia pajaa. Naajaa, Pueyaso sequesanoocua na tiuuniuucua, nojuajaari Pueyaso tojiquiaari. Naacujitij, nojuajaari necocuata, puetunu necohuatajanaa cureequiaari, necohua

niquiocohuatajuhuaj. Puetunu narta mijiria quijiaca pueyajaanaari cusunuuquiaari pajaajinia, nojori tiuyaquiniucua Noé pohuatasanoocua Pueyasojiniji. Noé cutaraari juhua sesa miyashijara jiyatesaaquiaari pueyaracaanu Pueyasota rishijara na quiniuria, Pueyasooocua tiuujia na quiniucua.

⁸ Abrahamri Pueyasooocua tiuquiaarijuhuaj. Pueyaso sequesacari nojuaja tamonu jiyajiniara na pacunura, Abrahamri na tojiquiaari. Tama na jiyajinijijiaaja na quiasacari, majaari na niishiniu quiquiaari tee cuniquiria na quiaani. Nojuajaari saaja niishiquiaari Pueyasoori na quijiara na niqutionutaniya tama na jiyaranojuaja. ⁹ Pueyaso niquticosocoriquiano jiyajinia na tiuquishacari, Abrahamri cuno jiyajinia quiquiaari juhua rucuanejoua pueyano. Abrahamri juhuanouaja maja cuno jiya camaru na quiniu quiquiaari. Naajaa, Pueyaso sequesanoocua tiuujia quiquiaari pueyaracaanuuri. Nojuajaari saaja seya cajacajiniji shitiasano suhuorotujinia quiija quiquiaari pueyaracaanu. Abraham niyanu Isaacri naa quiija quiquiaarijuhuaj, Isaac niyanu Jacobonio. Pueyasoori cuno pojori sequenu pacutequiaarijuhua coteenujuanaa na sequesano Abraham. Naacuaajitij, nojoriiri Pueyaso sequesanoocua tiuujia quiquiaari pueyaracaanujuhuaj. ¹⁰ Pueyaso jaara Abraham sequesacari, nojuajaari pueyaracaanu na quijarano quiquio na niqutionutaniya, Abrahamri niishiquiaari Pueyasoori miriqui sequeriquiaa tama na shipinishano tiacajinijijiaaja. Cuno pueyaracaanu rishijia tiacaari Pueyaso niishiriojosano tiaca na saquiriojosano pueyarano. Abrahamri cuno tiacara sashijia quiquiaari pueyaracaanu, Pueyaso sequesanoocua na tiuuniucua.

¹¹ Naajuhuj, seetanujuanaa Pueyaso sequesacari Abraham, nojuaja na muetutenutaniya, Abrahamri jiyacari tariucua saaquiano quiquiaari. Neco Saaraari puera motaja quiquiaarijuhua na manajenura. Naajaa, Abrahamri niishiquiaari Pueyasoori cumaacaraca quiija na sequesano na tohuateenura. Naa Pueyasooocua na tiuuniucuatej, Pueyasoori na cumaquiaari neco na manajonura.

¹² Naacuaajitij, mueya shipiniyashijia saaquianoori mueya mueratequiaari. Cuno neyanuucujainio supueno pueyari queraatiara canequiaari, queraatiate juhua riya, serojiyaquishoo, juhua shoniacu caminia shuriuquico paajia jaaquia.

¹³ Puetunu cuno pa supuetanaajanaari Pueyasooocua tiuujia shaajecoquiaari. Nojoriiri juhuanouaja maja na jitianu quiquiaari seetanujuanaa Pueyaso sequesano nojori na niquticosocoriquiano. Naajaa, seetanujuanaa nojori tiuushacari Pueyasooocua, nojoriria, Pueyaso sequesanoori

juhua tariucua tucuacaanuji nojori niquishano quiquiaari. Nojoriiri na timitiaquiaari juhua tariucua nojori jiitiasano. Naacuajitij, nojoriiri juhuajaniya quiquiaari juhua rucoojuaca nojori quishacari mijiria. Nojoriiri niishiquiaari, mijiria nio jiyani, majaari seetanujuanaa nojori quiquiorano. ¹⁴ Naacuajitij, paari niishiyani nojoriiri tamonu jiya jiitianuucua jaatiariquiaa, pueyaracaanu nojori quiquiorano cutara. ¹⁵ Nojori jaara saaja mijiria jiya camaruhua quiniuria panijaca quiquiaari, nojori maara na supuetujua jiyajiniara riujuuquiaariuhua. ¹⁶ Saniniuujia, nojori cutaraari socua maninia jiya jiitianuucua jaatiaquiaari, pueyaracaanu nojori quiquiorano cutara. Cunoori jiyocuacaanu quiquio, Pueyaso jeenucuasano nojoriria. Naaratej, majaari Pueyaso caririquiniu quiquiaari nojori sequesacari: “Pueyasoori canaa Jiyaniijia”. Nojuacuajaari tari jeenucuasano tiaca jitiaa nojoririano jiyocuacaanu.

¹⁷⁻¹⁸ Pueyaso sequesano Abraham na mueratesano mueya jaara tari mashajaniyujua quiquiaari, Pueyasoori Abraham saniquiaari, na niishiniuria nojuajate seetanujuanaa na tojjia. Naacuajitij, na sequequiaariiri cuaara na panishano niyanu moora, nocuara na catijiasocoriquiano. Cuno neyanu Isaacuajaari Pueyaso sequesano quiquiaari, nojuajiniji canenutaniyari queraatia pueya. Naajaa, Pueyaso sequesacari Abraham, neyanu na monura, nojuajaari maja na ruuretanu quiquiaari Pueyaso. Nojuajaari tari Pueyaso sequesanoocua tiuuriquiaa saaja. ¹⁹ Seetanujuanaa Abraham tiuuniuucua Pueyasooocua, nojuajaari niishiquiaari Pueyaso na naata neyanu Isaac samiitianiniuhua, nojuaja jaara na more. Naacuajitij, quera Abraham mosacari neyanu Isaac, Pueyasoori nocuaji na tenujuquiaari, tari maatia na niishishacari Abrahamri seetanujuanaa na tojjia. Naacuajitij, Abrahamri neyanuniyujua jaatucuquiaariuhua shuquiriaatia na quiquiojiniohuara, juhua macu samiitianishanohua. Naa Abraham miishanoni, cunoori miriqui quiya pajaniyara taa Pueyaso miiquiaari Neyanu quiari naatajacuaani.

²⁰ Isaac tiuuniuucua Pueyasooocujuhujaj, nojuaja jaara saaquiano quiquiaarijiuhujaj, nojuajaari necohua sequequiaari, Jacobo, Esaúnio: “Pueyasoori jiyanoehua maninia miiniutianiya niaara, niaacuajinio supueno pueyanio, taa na sequequiaari janiyacujani”.

²¹ Jacoboori Pueyaso sequesanoocua tiuujia quiquiaarijiuhujaj. Naacuajitij, quera na cusonu panishacari, nojuajaari neyanu José niquioehua sequequiaari: “Pueyasoori jiyanoehua maninia miiniutianiya niaara, niaacuajinio supueno pueyanio”. Naa na sequenu nuhuaji na jiuhuatej, nojuajaari

na natacaacua tanishiquiaari. Pueyaso secojoquiaari na timiniutiaari, na niishishacari Pueyasoori pueyaracaanu miiquiaa puetunu na sequesanojuanaa.

²² Jacobo niyanu Joseeri Pueyaso sequesanoocua tiuujia quiquiaarijuhuaj. Naacuajitij, quera na cusosacari, nojuajaari niishiquiaari Pueyasoori tamacari Israel pueya mashiquiniutianihua Egipto jiyajiniji. Naacuajitij, nojuajaari narta Israel pueya sequequiaari nocua nojori taraajenura. Nojuajaari nojori sequequiaari maja nojori tiujianura na nucuhua Egipto jiyajinia, nojori jaara quiojorohua Pueyaso niqutiosocoriquiano jiyajiniara.

²³ Moisés queya quiniuucua Pueyasooocua tiuujia, nojori-iri Moisés jamoquiaari jaara shusha rasaquiaari, mueya maniniuniyosua na quiniuucua. Naa na shocojoquiaariiri jiuujianaraca raca, pueyaracaanu jamosano na quishacari. Egipto jiyaniijia Faraónri tarijia sequequiaari, puetunu Israel pueya niquiocohua shusha roosano canujuanaa cuara moojinia quejoosaria. Naajaa, nojoriiri cuno sequesano tojiyaquiquiaari nojori puereyaquiniutia saaja, Pueyasooocua tiuujia nojori quiniuucua.

²⁴ Naajujuaj, Moisés quishacari tariucua cumantumaca, Pueyasooocua tiuujia na quiniuucua, nojuajaari na canashitinia Faraón niyatu tamacaquiaari. Nojuajaari tama sequequiaarijaaja: “Majaari Faraón jinianu cua quiniu paniniu. Janiyacuajaari Israel pueyanoni”.

²⁵ Egipto jiyaniijia jinianu na quiniuucua, Moisésri na naata juhuajaniya miiniu quiquiaari puetunu na miiniu panishanojuanaa, shuquiriaatia na quiniuria. Naajaa, nojuajaari niishiquiaari cuno shuquiriaatia quiniuuri saaja rupaquijia mijiria. Nocuaji, majaari na tamacanu quiquiaari narta Israel pueya, shuquiriaatia na quiniuria tamajaaja. Nojuaja cutaraari narta Israel pueyacua taraajequiaari, Egipto jiya jiyaniijia poonijiotenuucua nojori puera. Cunora, nojuajaari niishiriojoquiaari nojuaja cuara cojiritiasaria naquiya miishaanu narta Israel pueyatajuhuaj. ²⁶ Pueyaso sequesanoocua tiuujia na quiniuucua, nojuajaari niishiquiaari Pueyasoori na tojitiajaca miiniutianiya maninia pueyaracaanu cutara. Nocuaji nojuajaari saquiriojoquiaari narta Israel pueyata soosano na quiniuria mijiria, maja puetunu Egipto casami jiiitaja na quiniuria mijiria, Faraón jinianu na quiniuucua.

²⁷ Pueyaso sequesanoocua tiuujia Moisés quiniuucua, na nuhuaji, nojuajaari Israel pueya jaatiaquiaari Egipto jiyajiniji. Majaari na puerenu quiquiaari Egipto jiya jiyaniijia juaashacari jiyanoehua. Seetanujuanaa Moisés

tiuushacari na niquiyaquishoo Pueyasooocua, nojuajaari Pueyaso niquiquiaari noojiata, juhua na shuriucua quiyano pueyaracaanu. Naacujitij, Moisésri tama na cuaqueyajaaja cumaquiquiaari maja na tarinitianura miiniu Pueyaso sequesano nojuaja. ²⁸ Quera Israel pueya mashishacari Egipto jiyajiniji, Pueyasoori Moisés sequequiaari: “Janiyari niucua cua seru jiyaronutaniyani, cua tojiyashijiaca jiyapueranuhua na puecoonura puetunujuanaa. Nocuaji Israel pueya quia numootere, borrego nanaca nojori shuquiujutianura na tia tohuateyaji, maja nia jiyapueranuhua cusojuasaanurajuhua”. Moisésri Pueyaso sequesanoocua tiuquiciaari. Naacujitij, puetunu Israel pueya jiyapueranuhujinijiniojuanaani, majaari quenaaja niquiriyatu niyanu mosaanu quiquiaari cutara.

²⁹ Israel pueya mashishacari Egipto pueyacuaji juucua, Naatunacu jiyaniushano caminiaari nojori ritiaquiaari saaja. Nocuaji, Pueyasoori caminia raqutiaquiaari nojori nuura. Na nuhuaji, Pueyasoori Moisés sequequiaari puetunu nojorijianaa cuara niuutiaara caminia taquijiria. Israel pueya tiuuniucua Pueyaso sequesanoocua, nojoriiri joojuashiquio niuutiaquiaari juhua puereetunu nucuaco. Egipto jiya jiyani-ijia soldadohua jaara juhua nojori niuutianu paniquiaarijihuaj, nojoriiri saaja shushiniuquiaari.

³⁰ Israel pueya tiuquishacari Pueyaso niqutiosocoriquiano jiyajinia, nojoriiri na paraa Jericó tiaca shocua camarucuneetaquiaari siete juuca, naatej, taa Pueyaso rootaquiaari nojori miiniuriacuajani. Naa nojori tiuuniucua Pueyaso sequesanoocuatej, Jericó tiaca shocua sohuacaari puetunu pojotaquiaarijianaa. ³¹ Puetunu Pueyaso tojtiaashijiacajanaari puecoosaaquiaari. Rahab cutaraari jiyanooshaaquiaari. Rahabri naa jiyanooshaaquiaari Israel pueyajinijinio namuenujunaa na jamojonuucua tarijia narta pueyacuaji. Rahabri naa maninia miiquiaari Pueyasooocua tiuujia na quiniuucua. Naaratej, Israel pueyari cuno paanatu jiyanooquiaari.

³² ¿Teyano pa supuetanaajiniji cua pohuatanutaniya nijaniya socuani? Socua queraatia pa supuetanaari Pueyasooocua tiuujia quiquiaari. Tariucuaja cua pohuatasano, maninia nia niishiniuria Pueyasooocua tiuujia pueyari Pueyaso jiyanooshano. Naajuhua, majaari jeya cua quiniu cua pohuatanura maninia nio pojorijiniji: Gedeón, Barac, Sansón, Jefte, David, Samueljinijinio, socua narta Pueyaso sequesano caminiujiunaa pueyajinijinio. ³³ Pueyasooocua tiuujia nojori quiniuucua, nojoriiri tamasa jiyaniijianucua miaquejoquiaari na jiyajiniji.

Pueyasocua tiuujica nojori quiniuucua, nojoriiri maninia jiyaniijianucua quiquiaari, maninia na jitianura narta Israel pueya. Pueyaso sequesanoocua tiuujica nojori quiniuucua, nojoriiri Pueyaso sequesano nojori na niquticosocoriquiano masequiaari. Pueyasocua tiuujica nojori quiniuucua, juurunu sareya rupaari juhua seecujutasaquiaari saaja, maja na soonura nojori. ³⁴ Pueyasocua nojori tiuuniucua, nojori jaara maninia quejoosaaquiaari, nojoriiri maja na catenu quiquiaari. Pueyasocua tiuujica nojori quiniuucua, nojoriiri na paraacuaji mashiquiaari saaja, maja na puecoosanura nijiniaquetucujaja mueruuta. Pueyasocua tiuujica nojori quiniuucua, sasaca pueyari jiyanoehua cumaacaraca quijiacara quiquiaari. Pueyasocua tiuujica nojori quiniuucua, nojoriiri jiyanoehua cumaquishaaquiaari na paraa nojori miaquejonura, na paraa nojori mashiquiniuria nojori jiyajinijijihuhaj. ³⁵ Naajuhuj, Pueyasocua tiuujica maajipohua quiniuucua, nojori macuuri samiiticoquiaariuhua nojoriria.

Tamasacaari jiyanoehua taraatia miishaaquiaari Pueyasocua tiuujica nojori quiniuucua. Cunora, nojori paraa jaara nojori quiooquiaari, nojoriiri puecoonura miananajosaaquiaari nojori jaara Pueyaso tojiniu tarinitiaaquiri. Nojori jaara na paraa sequesano tojiquiaari, nojori maara cartesaaquiaariuhua. Pueyasocua tiuujica nojori quiniuucua, nojoriiri saaja paniquiaari nojori cuara puecoosaariaqui, naajaa, jiyanoehua naquiya na miiniutia. Nojoricujajaari niishiquiaari, Pueyasoori nojori samiitianijionutaniuhua, jiyanoehua shuquiriaatia nojori quiniuria pueyaracaanura cutara. ³⁶ Tamasaca quiniuucua Pueyasocua tiuujicajuhuj, nojoriiri cararaatia macaatishaaquiaari, jiyanoehua majacusaquiaarijiaariuhuj. Naajuhuj, tamasaari cumayocua shipinishano casaata morojosaaquiaari. Nujuatejojuajinia nujuatejosaaquiaariiri. ³⁷ Tamasacaari saitia jacusaquiaari na puecoosanura. Tamasacaari na cajiniocua rashiquiojosaaquiaari jacaria jiyaratajata juhua juhuana, socua jiyanoehua naquiya na miishaanura. Naajuhuj, tamasaari nijiniaquetucujaja mueruuta puetujusaaquiaarijianaa piyonu. Naajuhuj, tamasa quiniuucua Pueyasocua tiuujicajuhuj, nojoriiri juhua taanusano rucojoquiaari puetunu tiquiyocujajanaa. Casamiijiuniucua nojori quiniuucua, nojoriiri saaja borrego shoque, cabra shoque cusupuequiaari nojori cushishocoriquiano. Nojoriiri taraatia miitiasano quiquiaari, naquiya miishanojuhuj. ³⁸ Juhua taanusano

nojori quiniuucua, nojoriiri juhua tashuquioono rucoojoquiaari cariiquia jiyajinia, tuhananuhujiniano. Tiaajunucua nojori quiniuucua, nojoriiri saaja raaco maquiyonuujuaa quiquiaari. Mijiria quijiaca pueyari nojori jiyatequiaari juhua najuhuana quijiaca pueyara. Naajaa, nojori cutaraari seetanujuanaa Pueyaso timitiasano pueya quiquiaari, nocua tiuujiaa nojori quiniuucua.

³⁹ Pueyasocuaajaari nojori jiyanooquiaari, seetanujuanaa nojori tiuuniuucua nocua. Naajaa, nojoriiri juhuanojuaja maja nojori masenu quiquiaari seetanujuanaa Pueyaso sequesano nojori na niqutiosocoriquiano. ⁴⁰ Pueyasoori nio pa quishacari nojori sashitijajaara, jiyanohua maninia na miishacari pajaniya na Sohuanuta, Neyanu Jesucristoocua pa tiuuniuucua. Na nuhuaji, Pueyasoori puetunu nojoritijanaa pa cojiritianutaniya jataniniu tojetaarucujanaa maninia miijiaca pa quiniuria, na shuriucua na rijiosacari puetunu pajaniyajanaa.

12

Jesu miishano pa niishiriojoriquia, naquiya rejeretajaca pa quiniuriajuhuaj

¹ Naa pa niishishacari taa queraatia pueya maninia miiquiaari Pueyasoocua tiuujiaa nojori quiniuucuaacuaani, cunora, tama pa cojetasano najuhuana casaa pa tarinitiariquia. Tarinitiashiyari puetunu najuhuana casaajanaa, teyanooocua pa cojequiaa Pueyaso panishano pa miyaquiniuriacuajani. Naajuhuaaj, puetunu sesa miiniuujanaa pa tarinitiare, puetunu pa cumaacajanaa pa jiitianura, juhuajaniya rejeretajaca pa quiniuria. Naacuajiti pa naata maninia tucuatunu puetunu Pueyaso panishanojuanaa pa miiniuria. ² Jesu miishano pa niishiriojoriquia pueyaracaanu. Nojuajaari tojetaarucujanaa na Que Pueyasoocua tiuujia quiquiaari. Nojuajaari niishiquiaari, naquiya na miiniu nuhuaji, na Queeri jiyanohua shuquiriaatia quijiara na jiyatenutaniya. Naaratej, nojuajaari juhuajaniya rejere-taquiaari naquiya na miiniu niyacutesanojinia, cararaatia na miishaanujuhuaaj. Cunora, nojuajaari na Que miaquetajara cajiya, Jiyaniijiajanaa na quishacari.

³ Majaari nia niyajetanu taa Jesu rejeretaquiaari juhuajaniyacuaani, pueyaracaanu sesa miijiaca paracaashacari nojuaja. Nocua nia niishiriojoriquia, niaa mariqui Pueyaso tojiniu tarinitianu paniriiri nia taraajenuta naquiya nia miishacari. ⁴ Niaacuajaari naquiya miishaaquiaa, Jesucristoocua tiuujiaa nia quiniuucua. Naajaa, majaari pa Jiyaniijia nia tacartanu, naquiya nia

miyaquishaanuucuaaji. Nia rejeretariquia saaja. Majaari juhuanajuaja nia puecoosaanu quiqianu na tojitiajaca nia quiniuucua. ⁵ ¿Niaateeri Pueyaso rootasano niyajetarucuaa tari, na rootasano pajaniya juhua necohuaja? Naa sequeyari: “Quiyanunaa, majaari cua rootasano quia soonu, janiya jaara quia niishitiojiya naquiya cua miitishacari quiajaniyani. Janiya jaara quia nacasure socua maninia miijia quia quiniuriani, majaari cucuaji pishiniu. ⁶ Quia Jiyaniiija cua quiniuucua, janiyacuaajaari cua panishano pueyano jiuujiayashijiani sesa na miishacari. Naajuhuaaj, janiyari cua niyanura cua jiyatesano pueyano saniitiojuani jaara sesa miiriquia”.

⁷ Naaratej, juhuajaniya na rejeretajaca nia quiriquia. Pueyasoori juhua necohua nia niishitiojiya, maninia na canashitiniuria niajaniya, seetanujuanaa necohua nia quiniuucua. ¿Pueyanoteeri nareja niquijia neyanu, neyanu jaara na tojiyashijia quiriquia? ¡Maja! ⁸ Naajuhuaaj, Pueyasoori puetunu necohuarajanaa na jiyatesano pueya saniitioquiaa sesa nojori miishacari. Naacujitij, Pueyaso jaara nareja niquiriquia niajaniya sesa nia miishacari, cuno maara quiri maja seetanujuanaa necohua nia quiniuucua, juhua tamonu queecuajinio nia quishacari. ⁹ Naajuhuaaj, naatujoori pa quishacari, pa queyari pa majacujua, nojori pa tojiyaquishacari. Majaari cunora nojori rerequetejaca pa quiniu quiquiaari. Naacujitij, pa Que Pueyaso jaara pa saniitioriquia, ¿paateeri na rerequetenutaniyani? ¡Maja! Nojuacuajaari seetanujuanaa pa sohanu Que, pueyaracaanu rishijia pa quiniuria. ¹⁰ Pa queyari pa canashitioquiaari taa nojori paniquiaaricujani. Nojori rootasacari pajaniya, nojori saniitiosacari pajaniya, cunoori quiquiaari saaja mijiria pa quiniuria maninia. Pa Que Pueyaso saniniuujia, nojuajaari pa saniitioquiaa seetanujuanaa maninia miijia pa quiniuria, juhua nojuaja pa quiniuriajuhuaaj. ¹¹ Seetanujuanaa, puetunu saniitionujuanaari taraatia pajaniyara. Majaari pa timiniu paa jaara majacusaareni. Naajaa, na nuhuaji, paa jaara na ruuretaaquirini, paari socua maninia miijia jatanishaaquiaani, socua Pueyaso tojiijara pa quiniuria juhuajaniyajuhuaaj.

Jiyanohua cocuaatiaari Pueyaso pa tojiyaquishacari

¹² Naacujitij, majaari nia pishiniu pueyanaa, Pueyaso saniitiosacari niajaniya. Nocua nia tiuuri saaja. Nioojia nia cumaquiriohua. ¹³ Saaja Jesucristo rupaa tojiijia nia quiri, jatarinitiaja Pueyasocua tiuujia mariqui nojia

niquijiotereeri. Nojori cuaara saniya cumaquishano quiiria cufara.

¹⁴ Tama nia cuaqueyajaaja nia cumaquiriquia, juhua-janiya quijiaca nia quiniuria puetunu pueyatajanaa. Ma-jaari juayonuujutanu. Nia saniriquia seetanujuanaa sesa miyashijiaca nia quiniuria. Saaja noo pojori cutaraari pa Jiyaniijia niquniutianiya, seetanujuanaa maninia miiji-acara jatanishano pueyatej. ¹⁵ Pueyasocuaajaari pa jiyanooja. Tama nia cuaqueyajaaja nia cojuare niaa mariqui Pueyaso ruuretareeri na naacunu panishacari niajaniya. Nojuajaari cumaacaracacuaaja na cumaquiniuria niajaniya nia panishacari. Naacuaajitij, niarta Pueyaso pueyano jaara juaatishaare tamonu miiniuucua sesa nojuaja, nojuaja nia naacure na jiyanooniuria sesa na miinia. Jaara naa miyaquiritij, cuno pueyano juaaquiacaari narta pueyacia paaquenutaniya na sesonura queraatia pueya. ¹⁶ Naajuhua, tama nia cojuatooriqiaajaaja. Naa nia miitiooriqiaa tamonu niajaniyajinijinio mariqui Pueyaso sequesano na niq-uitiosocoriquiano pajaniya soojeara quiiri, saniya tama na cuaqueyajaaja na shuquiritiniuria mijiria. Supuetana Jacobo puerana Esauucuaajaari naa miiquiaaritij. Tamacari na miaajesacari, nojuajaari Jacobo sequequiaari: “Cua tarajanunaa, pa que niqutiosocoriquiano janiya, na jiyapueranu cua quiniuucuaani, cuno cuaara quiiria quiara, quiaa jaara quia sumatuujiniji rupore quiria. Jiyanohua miaajeyaniijia”. ¹⁷ Niaacuajaari niishiya, na nuhuaji, Esauuri paniquiaari na que secojonura nocuara, jiyanohua maninia Pueyaso miini-uria nojuaja, na que jiyapueranu na quiniuucua. Na queeri na ruuretaquiaari saaja. Esauuri jiyanohua na que neneco-joquiaari na nujuquenuta. Naajaa, na queeri maja na naata jataniniu quiquiaari tariucua neyanu Jacobo na sequesano Pueyaso niqiuara.

¹⁸ Nio pa quishacari, pajaniyara, Pueyasoori maja juhua tariucuacaanu na quishacari pa supuetanaa Israel pueyata. Jiyacaritij, Pueyaso jaara Moisés tacaniquiaari Sinaí tuhuananuucua, Moisés na niishitiojonura na rootasano na pueyara, tuhuananuuri jiyanohua puereeta niquishano quiquiaari. Tuhuananuuri puereeta noshiriquiaa. Na najacaari tacariquiaa mueruucatej. Jiyanohua ninishiquiiri quiriqiaaajuhua. Paratuuri jiyanohua piyarojoriquiaa puereetajuhuaj. ¹⁹ Trompeta jonenenuunuuri jiyanohua tojishaariquiaa. Pueyaso pocuanuuri jiyanohua tojishaariquiaaajuhua. Israel pueya tojishacari Pueyaso pocuaano, nojoriiri jiyanohua puereetiquiaari. Naaratej, nojoriiri Moisés sequetuquiaari maja socua Pueyasojuaanaa pocuanura nojoriicuaa. ²⁰ Nojoriiri maja socua na

rejeretanu quiquiaari puera puereeta Pueyaso sequesacari nojori. Pueyasoori jiyacari naa sequeriquiaa nojoritij, cuno tuhuananuucua nojuajanaa quiniuucua:

“Cante nio tuhuananu rupueyani, cuno pueyano cuaara mosaaria saitia jacusano, cashanata soj. Naa miiija seru cuaara naa puecoosaariajuhuaj”.

²¹ Puetunu Israel pueya niquishanojuanaari jiyanoehua puereeta quiquiaari seetanujuanaa. Moisésjanaari na puerequiaarijuhuaj. Nojuajaari na puerenuta sequequiaari: “Cua puerenuta tetecanijia”.

²² Nio pa quishacari saniniuujia, majaari pa catecanonu quiquiaa cuno tariucuacaanu pueya pueresano tuhuananuucua. Jesucristo cusuucua pocuara, paari Pueyaso quiquiojiniajanaa tiuquitiaquiaani. Cuno na quiquio sesaari miriqui sequeshiya “Sión tuhuananu”. Na pueya pa quiniuucua, nojuajaari jiyocuacaanu pueyaracaanu pa quijiarano tiaca jiitiaa. Cunoori seetanujuanaa jiyocuacaanujinio Jerusalén tiaca. Naacuajitij, paari jiyanoehua queraatia Pueyaso seya rupuequiaani, Pueyaso pa maniniuhaqueetanura nojoritiajuhuaj. ²³ Paari tii rerejonutaniya puetunu parta Pueyaso pueyatajanaani. Pueyaso saquiriojosano pueya pa quiniuucua, pa sesacaari jiyocuacaanu Pueyaso nequesoretuneejinia naajiotasano quiya. Paari Pueyasocua catecanoquiaani. Nojuajaari puetunu pueya nequesoreenajanaa. Jesucristo niyacarijia Pueyasocua tiuujiaa sohuanuhuari tii quiyajuhuj, canapue Pueyaso jiyatequiaari tojetaarucuajanaa sesa miyashijiacaracuajani. ²⁴ Jesucristoori tii quiyajuhuj. Nojuajaari tama na cusonutajaaja Pueyaso jyanootiquiaari nocua tiuujiaa. Tama na nanacajaaja na shootenuucua pocuarajuhuj, paari cunota jeequejosaaquiaari tojetaarucuajanaani. Naacuajitij, Jesu nanacaari jyanohua socua maninia Abel nanacajiniji. Caín monuucua tarajanu Abel, Abel nanacaari Pueyaso shiniuujia na mona cuaara mosaariajuhuaj. Jesucristo nanaca saniniuujia, cunoori Pueyaso pa jyanootiquiaacujua.

²⁵ Cunora pueyanaa, tama nia cuaqueyajaaja nia cojuare maja nia ruuretanura Jesucristo Rupaa. Tariucuacaanu, pueyari jyanoyaquishaaquiaari nojori ruuretasacari Pueyaso sequesano, nojuaja jaara nojori piriyojoquiaari Sinaí tuhuananujiniji. Nojoriiri jyanoyaquishaaquiaari nojori tojiyaquiniuucua mijiria Pueyaso quishacari na sequesano. Nojori jaara naa jyanoyaquishaaquiaaricuaa, nio pa quishacari saniniuujia, ¿paatucua taa jyanooshaariquia pa ruuretasacari Pueyaso quiarijiani, jiyocuacaanuji na piriyo-

ojosacari pajaniyani? ²⁶ Pueyaso pocuasacari Sinaí tuhuanujiniji, jiyari na pocuasacari tetecaquiaari. Quiarijia saniniuujia, Pueyasoori seetanujuanaa sequeya: “Janiyari socua caminiutianihua jiya jiuuquiutianuni. Maja saa jiyaja. Jiya cajiniocuanio. Jiyacunojuanaari quiniutianiya naa cua miiniu”. ²⁷ Naa na sequesacari taa socua na caminiutianihua jiya jiuuquiutianuni, naacuajiti paari niishiyani, puetunu na shipinishano casaajanaari shaajeyaquisshaquiji shaajenutaniya. Saaja noo casaari cureenutaniya, maja na naata pootiosano casaatej. ²⁸ Quiarinio quiquio, Pueyaso shipinishano na niquitiosocoriquiano pajaniyani, cunoori maja na naata shaajasaanu quiniutianiya cutara. Paari jiyaniijianucua quiniutianiya tii pueyaracaanuni. Pa Pueyasoori jiyanohua maninia miiniutianiya pajaniya. Cunora pa shuquiritiare nojuaja. Paari na shuquiritiyani pa timiti-asacari nojuaja. Naacuajitij, nojuaja pa timitiare jiyanohua pa paniniutia nojuaja, pa puerenutatio. ²⁹ Nojuajaari puereeta mani, Neyanu ruuretajaca shaajaja, sesa pa miishano catijajajuhuj.

13

Taa pa miyani Pueyaso pa timitiniuria

¹ Majaari panitioonu nia tarinitianu. Naa Pueyaso pueya nia quiniuucuatej, pueyaracaanu panitioojuaca nia quiriquia. ² Naajuhuj, majaari rucojuaca ruuretanu, niaacua nojori tiuquishacari. Nojori panijiaca nia quiriquia. Noojiaqueya pa supuetanaajinijiniocuajaari Pueyaso seya masuuquiaari na tiacora, nojori jiyanishacari nareja pueyano naasucua.

³ Nujuatejosano pueyacua taraajejaca nia quiriquia. Tama nia cuaqueyajaaja nia jiyatere juhua nojoritia nujuatejosanojuhuj, nojoriicua nia taraajenura seetanujuanaa. Naquiya miitiasano pueyacua taraajeja nia quiriquiajuhuj. Nia niishiriquia, niaari na naata naa miitiasaanujuhuj.

⁴ Pueyasोजनाacuajaari pa niishitioquiaari pa camitioonura. Cunora, camitioonu pueya cuara saaja neyacata, necocuata quijia quiiria. Cante camiyajuani, nojuaja cuara tama na cuaqueyajaaja cojuara maja narta pueyano niquiocua na numuetucunura, na camishoo maajinio. Nia niishiri, Pueyasocuajaari naa sacuaraatia miijiaca saniitionutaniya.

⁵ Majaari cumaneeca porocua nia quiniu tama niaarajaaja nia jitianura. Juhujaniya quijiaca nia quiriquia nia jiitiasanota. Nia niishiri, Pueyasocuajaari sequequiaari: “Majaari cua cartenu quiniutianiya niajaniya juhua japueyo-

jua nia quiniuria. Majaari quenaaja cua tiujianu quiniutianiya nijaniya”. Cunora pueyanaa, maja nia tacaaniu. ⁶ Naa seetanjuanaa na sequesanoocua pa tiuushacaritij, pa naata sequenu taa supuetana David naajiotaquiaari na sequesanoocujani. Naa sequequiaariiri:

“Jiyaniijia Pueyasocujajani cua naacuna. Naacuajitij, majajani cua puerenu quiniutianiya. Majaari pueyano na naata taa miiniu janiya”.

⁷ Coteenujanaa nia jitianaa pueya nia niishiriojoriquia, noo pojori canapuate shushajanaa nia tojtioquiaari Pueyaso rupaacuajani. Nojoriiri seetanjuanaa Pueyaso tojijiaa quiquiaari, Jesucristoocua tiuujiaa nojori quiniucua. Juhua nojori quiniucua jiaatiajaca nia quiriqiajuhuaj, taa nojori quiquiaaricuaani.

⁸ Taa quijia Jesucristo quiquiaari tariucuacaanuni, nojuajani naa quiyajaa. Naa quiniutianiya pueyaraacaanuri. Majaari na jatanu. ⁹ Naaratej, majaari tamaatia niishitiojosano nia tojiniu. Miaquenu pueresanojiniji niishitiojosano cutaraari najuhuanaj. Cunoori maja quenaaja na cumaquiniu quiquiaari na tojtiajaca. Naajuhuaaj, majaari pueyacuara secojonaa jiuujia cumaquishaanu quiquiaari nojori miaquesacari Pueyasarano puecoosano seya shujiniji. Pueyaso Sohuanu cutaraari poojia cumaquiquiaa, panijiaa pa quiniuria. ¹⁰⁻¹¹ Saniniuujia, pueyacuara secojonaa jiyaniijiaari maja noo shu na miaquenu quiquiaari cutara, Israel pueya jiyanooshaanura puecoosaaquiaaritij. Pueyacuara secojonaa jiyaniijiaari cuno seya nanaca tiuquitiaquiaari Pueyaso Quishaquijianaa puetunu marijarajanaa, cuno nanaca na majiriutianura tii. Na nanaca shootesano seruuri saniniuujia tiacajiniji jiyatasaaquiaari mij, tii na catijasaanura puetunujuanaa. Pueyacuara secojonaa jiyaniijiaari tojetaarucujanaa tenujusaaquiaari maja na miaquenura cuno shu. Nio pa quishacari saniniuujia, paari jiyanoohua cumaquishaquiaani Jesucristo cusonuucua pocuara. Cunojiniji, paari seetanjuanaa Pueyaso rupuesano quiyacuajani. ¹² Naajuhuaaj, Jesucristo mosaanura pocuara, nojuajani Jerusalén tiacajiniji jiyatasaaquiaarijuhuaj, naatej, taa na nanaca shootesano seya jiyatasaaquiaari tamaquiriacuaani. Nojuajani naa tama na cuaqueyajaaja tarinitiaquiaari na mosaanura, tojetaarucujanaa jeequesano pa quiniuria puetunu sesa pa miishanojinijijianaa. ¹³ Nojuajani jiyanoohua cararaatia teetesaaquiaari niyacutesanojinia pa niti. Naa Jesu miiniuucua pocuaracuaatej, Pueyaso niishiyashijiaa jaara

cararaatia miiriquia pajaniya Jesuucua pa tiuuniuucua ni, juhuajaniya na rejeretajaca pa quiriquiajuhuaj. ¹⁴ Pajaniyara, Jesuucua tiuujiacani, nio jiyari maja pa quiquio. Mijiria, shaaquiiri pueyaracaanu rishijia quiquio pajaniyarano. Cunora, paari jiyocuacaanu pajaniyarano Pueyaso shipinishano tiacaacua jiaatiaani. ¹⁵ Naa Pueyaso jiiitanuucua pueyaracaanu rishijia quiquio pajaniyarantej, nojuaja pa timitiariquia pueyaracaanu. Neyanu Jesucristo quiniuucua pocuara Secojona, nojuajaari pa tiuquitiaquiaa na Queecua. Nio pa quishacari quiarijiani, majaari Pueyaso paniniu pa seya nanaca. Nojuacuajaari paniquiaa pa shuquiritianura nojuaja cutara. Naacuajitij, pa rupaa pa jiyatere Pueyasora na quiniuria saaja, pueyaracaanu nata pa maniniuhuaqueetanura nojuaja. Cunocuajaari na panishano. ¹⁶ Naajuhuj, majaari nia niyajetanu maninia nia miiniuria niarta Pueyaso pueya. Nojori jiiitaaquishacari nojori panishano, nia jiiitiasano casaajiniji nia niqutiojoriquia nareja nojori. Paa jaara naa miijiaca quirini, paari juhua Pueyasora pa casaa niqutioyani. Cuno cutaraari na timitiquiaa.

¹⁷ Cuarta Pueyaso pueyanaa, nia jiiitanaa tojitiajaca nia quiriquia. Majaari nojori niishitiojosano nia ruuretanu. Nojoricuajaari nioojiaca cojuaquiaa pueyaracaanu, nojori niishishacari Pueyasoori nojori nequesoreenutaniya nia jiiitajaca nojori quiniuucua. Naaratej, shamaatia nojori tojitiajaca nia quiriquia maninia, Pueyaso nojori pohuatanura shitimia niajanijajiniji. Naa jaara nojori tojitiaashijiaca quiri, nojoriiri Pueyaso pohuatanutaniya na taraajenuta niajanijajiniji. Jaara naa quiritij, niaa cutaraari taraatia quiniutianijajuhuj.

¹⁸ Canaacuara nia secojonuuriquia. Canaacuajaari saaja maninia miiniuria saniniujuquiaa pueyaracaanuni. Naacuajitij, canaa jiuujiaari panaatia quiya Pueyaso niqiuara. ¹⁹ Janiyari jiyanohua paniyani cucuara nia secojonura, Pueyaso tiuquitiniuhuaa ritia janiya niaacua.

Nio naajiona panishacari maninia Pueyaso miiniuria pueya, na saruhuatasacari pueyajuhuj

²⁰ Jesucristo shootenuucua na nanaca pocuara, paari niishiyani puetunu Pueyaso sequesanojuanaari seetanujanaa pajaniyarano quiniutianiya pueyaracaanu. Naa Jesucristo miishanoocua pa tiuushacaritij, na Que Pueyasoori pa jiyanoocquiaa, juhuajaniya pa rupuenura nojuaja. Pueyasojuanaacuajaari pa Jiyaniijia Jesucristo samiitiani quiaariuhua macujiniji. Nojuacuajaari pa cojuana, na panishano pueya pa quiniuucua. jiyanohua maninia pa

Pueyaso! ²¹ Neyanu Jesucristoocua nia tiuuniuucua, nojuaja cuaara jataniiria niajaniya tojetaarucujanaa jeenucuasano nia quiniuria, taa na paniyacujani. Nojuaja cuaara naa miiria niajaniyatej, maninia nia tucuatanura puetunu na panishanojuanaa. ¡Pa Jiyaniijia Pueyaso cuaara pueyara-caanu shuquiritiasaaria jiyanoehua maninia na quiniuucua! Cuaara naa quiiriatej.

²² Cuarta Pueyaso pueyanaa, jiyanoehua nia secojiyanijia maja nia ruuretanura secaya rupaata cua shiniujiushacari niajaniya nio cua naajiojinia. ²³ Nia niishiri pueyanaa, parta Pueyaso pueyano Timoteori nujuatejojuajiniji tari tohuatesaarohuacuaa. Nojuaja jaara tarishiyacuri cucua na tiuquiniuria, janiyari cucua na ruponutaniyani nia niquiniuucua cua quiasacari.

²⁴ Naajuhuj, quiria nia saruhuatate puetunu nia jitianaa pueyajanaa, puetunu cuniqui quiniaa parta Pueyaso pueyajanaano. Italia jiyajinijinio parta Pueyaso pueyari nia saruhuataajuhuj.

²⁵ Pueyaso cuaara na Sohanuta cumaquiiria puetunu nia-janiyajanaa.

SANTIAGO NAAJIONEE

Santiago naajiosano niaquejeno pueyacuara

¹ Janiyari Santiagoni, Pueyaso seru, Neyanu Jesucristo serujuhuaj. Nia saruhuataanjia puetunu tiquiyocua jiya-cajiniajanaa niaquejeno Israel doce niquiohuacuajinio cakeno pueyanaa.

Niishitiaja Pueyasojiniji masesano

² Cuarta Pueyaso pueyanaa, shuquiriaatia nia quiriquia niaa jaara taraatia miishaare, niaa jaara naquiya miishaarejuhuaj. ³ Niaacuajaari niishiya, niaa jaara Pueyasocua nia tiuuniucua saniniujiushaare, niaari socua juhuajaniya sashijacara quiniutianiya. Niaaraari naa miishaanutaniyaqui nia sashishacari Pueyaso cuara puetunu maniniajanaa miiria niaarajaatijia. ⁴ Nia rejeretare seetanujanaa maninia sashijaca nia quiniuria, majaari quenaaja nia taacanuunu. Niaa jaara naa miijia quiritij, niaari maninia jeenucuasano quiniutianiya, pueyaracaanu maninia miijia nia quiniuria.

⁵ Tamonu nijaniyajinijinio jaara niishiyaquiri taa na miniutianiya, nojuaja cuara Pueyaso maseera, Pueyaso na secojosacari. Pueyasoori na niishitiaja niqutionutaniya. Nojuajaari puetunu pueyajanaa niqutioquiaa, capora na quiniucua. Majaari na juaaniu niaa jaara na masere.

⁶ Nia masesacari, seetanujanaa nia tiuuri Pueyasocua, majaari quenaaja nia taacanuunu. Cante na masesacari taacanuujani, nojuajaari juhua paratu piyarojosano mohuaca, naatej, taa paratu tacarotijia mohuaca na piyarojosacaricuaani. ⁷ Jiyano pueyanotej, Pueyasoori maja na masesano na niqutionu quiniutianiya, noojia niqijijoteja na quiniucua. ⁸ Noojia niqijijoteja pueyanoori quiarijia maseya na panishano. Tariqui na secojosacari saniniuujia, tamonu casaa maseyari, na paniyaquishacari coteenu na masesanocuaa. Jiyano pueyanoori noojia niqijijoteja pueyaracaanu. Majaari quenaaja na miiniu panishano na tucuatanu quiniutianiya.

⁹ Cua panishano Pueyaso muerasunaa, niaa jaara casamijiu quiri, naajaa, shuquiriaatia nia quiriquia. Pueyasocua-jaari nia jiyatequiaari na muerasura, na jitiananojiniji nia jitianurajuhua. ¹⁰ Saniniuujia, niaa jaara casamirica pueyano quiri, shuquiriaatia nia quiriquia Pueyaso jiyanooshano nia quishacari. Niaacuajaari niishiya niaari tojetaarucujanaa saniitiosocoriquiano quiquiaari juucua sesa

miihia nia quiniuucua tarijia. Casamiriaca pueyanoori seetanujuanaa juhua naana shuu, majaari na rishiniu. Saaja rupaquijia niqushiya shanohuari. ¹¹ Pananu jaara nasaatia jama, neyonaari sorequee. Na shuuri tiqiii. Shanohua niqushanoori shaajequeejuhuaj. Casamiriaca pueyanoori naajuhuj. Na casami na niqutiojosacarijia na canijianura juucua, canashiyaquiji shaajenutaniyajaariuhuj.

Naquiya pa miishacari

¹² Shuquiriaatia quijia cutaraari Pueyasocua tiuujia, cante taraatia na miishacari rejeretaja saajani. Naa taraatia na saniniujiushaanuucuatej, nojuajaari juhua cutara jiyaniijia tuhuaja niquticosaanutaniya, pueyaracaanu rishijia na quiniuria. Cunoori Pueyaso niqutionu panishano na panijiaa, taa na sequequiaaricujani. ¹³ Niaa jaara sesa miiniuucua jiaatkaa, majaari sequenu: "Pueyasocua sesa cua miitiniu paniya". Pueyasocua maja sesa miihia. ¿Pa Jiyaniijiatucua casaara sesa miitiri pajaniyani? ¹⁴ Saniniuujia, tama poojia sequejaarijia pa shiniuuiuquiaa sesa pa miiniuria. Naajuhuj, tama pa niishitiajajaarijia pa sapojoquiaa sesa pa panishano pa miiniuria. ¹⁵ Naa sesa miiniuucua pa jiaatiasacaritij, cunora paari sesa miiquiaani. Naa sesa miihia pa quishacaritij, paari cunora shaajasaanutaniyani.

¹⁶ Cuarta Pueyaso pueyanaa, maja tama nia cuaqueyajaaja nia sapojonu. ¹⁷ Puetunu maninia casaajanaa pa masesanoni, cunoori Pueyaso niquticosano jiyocuacaanuji. Nojuajaari puetunu jiyocuacaanu pa niqushano casaajanaa shipinijioquiaari, mijiria pa cuhuatariquiano. Pueyasocua pueyaracaanu maninia quijia. Majaari na jatanu tamaatia na quiniuria, na cojuaaquiniuria pajaniya. ¹⁸ Pueyasocua pa sohuanu samiitianijioquiaariuhua na rupaacua pa tiushacari. Nojuajaari pa jiyatequiaari quiarinio na muerasu pa quiniuria. Naacuajitij, taa pueyano tutaacuaa na shuquiriniutia na saaco rishishacaricuaani, Pueyasocua naa juhua pa tutaquiaari na shuquiriniutiajuhuaj, coteenujanaa na jiyapueranuhua pa quiniuucua. Nojuajaari tariucuacaanujiniji naa pa riurioquiaaritij.

Seetanujuanaa Pueyaso tojitiajaca

¹⁹ Naacuajiti cua panishano cuarta Pueyaso pueyanaa, cua tojitiare. Puetunu nijaniyajanaa cuara quiiria ritia tojijia, jacaria pocuaja. Cuara quiiria shiniquiajuhuaj, maja ritia juajia. ²⁰ Pueyanoori maja na naata Pueyaso panishano miiniu na juaaniutia. ²¹ Naaratej, nia cartere puetunu

sacuaraatia nia miiniujanaa, puetunu sesa nia niishiriojosoanojuanaanio. Nio pa quishacarini, puera sesa miiniuuri quiquiaa. Naajuhuj pueyanaa, juhua maninia naatujua nia tojiri Pueyaso rupaa, taa nia niishitiojosaacquiaaricujani. Majaari na ruuretano. Pueyaso rupaacuajaari cumaacaraca tojetaarucujanaa sesa miyashijiacara na jiyatenura pajaniya.

²² Pueyaso rupaa tojijiaca nia quiri seetanujuanaa. Majaari nia numaa shama nia tojitianunoj. Niaa jaara Pueyaso rupaa tojiyaquiri, niaari tama nia cuaqueyajaaja sapojiya. ²³ Pueyano jaara Pueyaso rupaa tojiquiaa saaja na numaa shama, nojuajaari juhua noo pueyanojua, na jiquioco niquirii niqutiujinia narejaari. ²⁴ Jaara tacateyarohua, na jiquioco niyajetaseequiohuari taamuecate na jiquioco quiriquiaani. ²⁵ Pueyaso rootasanoori jiyanojua maninia, maja quenaaja sesa. Sesa miiniuucua jiiitino pueyano jaara na tojijia quiri, nojuajaari na naata sesa na miini tarinitianu. Cante na numaama na racatajani, nojuajaari shuquiriaatia quijia quiniutianiya cutara. Puetunu na miishanojuanaari maninia quiniutianiya pueyaracaanujuhuj.

²⁶ Cante na niti rejeteyashijiani, nojuaja jaara tama na cuaqueyajaaja jiyaniya: “Janiya cutaraari Pueyaso tojijiani”, cunoori tama na cuaqueya sapojiyajaacujua. Saaja sacuaraatia pocujua quia pueyaracaanuuri. Nojuajaari najuhua Pueyaso rupaa tojijia. ²⁷ Cante seetanujuanaa pa Que Pueyaso rupaa tojijiani, nojuaja cuara japueyojuaca niqiniuucua rucaneera, nojori na naacunura. Cuara na miiria mashiquiopuerajuhuj, nojori taraajenucujusacari nojori na cumanijanura. Naajuhuj, cuara tama na cuaqueyajaaja cojuara, narta pueya na miyaquiniuucujua sesa. Naa miiija pueyanotej, nojuajaari Pueyaso pueyano cutara.

2

Maja cumaati rimiajata pa paniniu pueya

¹ Cuarta Pueyaso pueyanaa, pa Jiyaniijia Jesucristoori shacantuuca cumaacajinia quijia. Nojuacuajaari tojetaarucujanaa maninia quijia. Nocua tiuujia nia quishacari, majaari rimiajata nia niqiniuui tamasa. ¿Pa Jiyaniijia-teeri pa sooquiaaricuaa, ninishiqui quijia pa quishacarijiani? Maja. ² Cunora cua sequesanojia nia niishiriojore: casamiriaca pueyano jaara nia secojonuujua tiajia tiuquimia, maniniuqui toqueraca, jaaniishoracajuhuj, ¿taa nia miiniutianiya? ³ Niaari naa sequeja: “Niya quia cajishii pueyanonaa, cajituu maniniujiniani”. Saniniujia, toqueeju pueyano jaara jiyacari tiuquimiajuhuj, jiyareta

curuutuquenaniyoyua, niaari na sequereecujua: “Cuniquijia quia nujuare”. Casaa maaraja: “Cuniquijia quia cajiri quiaa tii nujuaani”. ⁴ Niaa jaara naa miiritij, niaari tama nia cuaqueyajaaja jiyateree juhua niarta pueya nequesoreenara. Niaari casamiriaca pueyano jiyaniya nojuaja naasucua socua maninia pueyano casamiiju pueyanoiniji. Naaratej, niaari casamiriaca pueyano shuquiritiniu panijia.

⁵ Cua tojitiare cuarta Pueyaso pueyanaa, ¿majateeri nia niishiniu, Pueyasocujajaari casamiijiuniucua pueya saquiriojoquiaari nocua tiuujiaa nojori quiniuria? Nocua tiuujiaa nojori quishacari, nojoriiri juhua jiyanohua casamiriaca Pueyasora. Naajuhuj, Pueyasoori nojori jiyatenutaniya jiyaniijianucua nojori quiniuria, puetunu Pueyaso jiiitiasanojuanaa nojori jiiitanura. Naa miiniutianiya na panijiaaari taa na sequequiaari seetanujuanaacuajani. ⁶ Niajaniyarijiaataj, niaari nojori cararojoquiaacujua. ¿Majateeri nia niishinujuhuaj, cuno casamiriaca pueyacuajaari nia nohuasejoquiaa na sapojonuta? Nojoriiri nia jaamitiquiaa nequesoreenaacua, niaacuara na saquiriojotanura. Nojoriiri naa miitiuquiaaqui nia jiiitiasano casaaniyoyua na jaariutianura puetunujuanaa. ⁷ ¿Majateeri nia niishiniu, nojoricujajaari pa shuquiritiasano Jiyaniijia sesacaquiaajuhuj? Pa Jiyaniijia sesa jiyaniquitiuquiaa na soonutaari.

⁸ Puetunu Pueyaso rootasanojinijijianaani, nioori socua tojishocoriquiano. Naa naajiotasano quiyari:

“Pueya nia paniri taa nia paniya tama nia cuaqueyacuaani”. Pueyanaa, niaa jaara cuno rootasano miiijia quiriquia, niaacuajaari maninia miiijia. ⁹ Saniniuujia, niaa jaara rimiajata paniri pueya, niaari sesa miya. Niaari saniitiosocoriquiano, Pueyaso niishitiojosano tojiyashijia nia quiniucua. ¹⁰ Pueyano jaara puetunu Pueyaso rootasanojuanaa tojiquiaa maninia, saniniuujia, jaara niquiriyatu cuno rootasanojiniji tojiyashijia quiri, cuno pueyanocujajaari Pueyaso tojiyashijia. ¹¹ Pueyasojunaacuajaari sequequiaari: “Maja nia camishoo maaji nia numuetucunu”. Sequequiaarijiaariuhuj: “Maja monu”. Naacuajitij, pueyano jaara na camishoo maaji numuetuqueyaquijia quiri, saniniuujia narta pueyano moyari, cuno pueyanoori Pueyaso rootasano tojiyashijiajuhuaj. ¹² Niaa cumaati niishiya, Pueyasoori na muerasu nequesoreenutaniya taa nojori tojtiaquiaari na rootasanocujani. Nocuaji tama pa cuaqueyajaaja pa cojuare taa pa miiquiaani, taa pa pocuquiaani. Nia niishiri, paari nequesoreesaanutaniya pa miishanojinijini, taa pa miiquiaari parta pueyani. Cante pueya panijia quiyani taa

Pueyaso rootaquiaaricujani, nojoriiri jiyanooshaanutaniya taa nojori jiyanooquiaaricuaa tamasacani. ¹³ Saniniuujia, canapuate narta pueyano jiyanooyashijiaca quiquiaarini, Pueyaso nequesoreenu juuca puetunu pueyajanaa, nojoriiri jiyanoyaquishaanutaniyajuhuj. Canapuate jiyanoojia cutarani, nojoriiri jiyanooshaanutaniya cutara, taa tamasaca nojori jiyanooquiaacuaani. Nojoriiri shuquiriaatia quiriquiano cuno juuca, Pueyaso nequesoresacari nojori.

Pueyasocua tiuujiaaari maninia miijiaca

¹⁴ Cuarta Pueyaso pueyanaa, ¿maninate pueyano jaara sequere: “Janiyacujaari Pueyasocua tiuujiani”, nojuaja jaara maninia miyashijia quiyajaa? Nojuaja jaara maninia miijia jatanishoo quiyajaa, najuhuaana sequeyari: “Pueyasocua tiuujianijia”. ¹⁵ Naacuajitij, tamonu parta Pueyaso pueyano jaara pa sequesee: “Maja cua jitianu toque. Maja quenaaja cua miaquesocoriquiano cua jitianujuhuj”, ¿taa pa miyani? ¹⁶ ¿Maninateeri paa jaara na sequereni: “Juhua-janiya quia quiaarohua. Quia miaquesuhua. Toque quia cushishuhujuhuj”? Maja. Paa jaara quenaaja na niq-uitioyaquiri na panishanoni, pa sequesanoori najuhuanaj. ¹⁷ Naajuhuj, pueyano jaara sequere: “Jesucristoocua tiuujianijia”, jaara seetanujuanaa Pueyaso rootasano tojiyaquiri, na sequesanoori najuhuanajuhuj. Jiyano pueyanoori maja seetanujuanaa Jesuucua tiuujia. Paa jaara seetanujuanaa Jesuucua tiuujia quirini, pocua maninia miijiaca quirijuhuj. Maninia miyashijiaari maja seetanujuanaa Pueyasocua tiuujia.

¹⁸ Pueyano jaara tamonu sequeriquia: “Quiaari sequeya quiaa Jesuucua tiuujia cutara. Janiyari saniniuujia maninia miijiani. ¿Taa cua niishiniutianiyani quiaari seetanujuanaa Jesuucua tiuujia, quiaa jaara maninia miyaquiri? Maja cua naata na niishiniu. Janiya cutaraari quia niishitiniutianiyani janiyari seetanujuanaa Jesuucua tiuujia cutarani, maninia cua miishacari”. ¹⁹ Pueyaso Rupaacua quia tiuuniucua, quiaari niishiyacuja Pueyasoori Jiyaniijiajanaa. Cuno quia tiuuniuuri maniacuaja. Naajaa, nia niishiri, samaruhuari cuno niishiyajuhuj. Na puerenuta nocuaji tetecatiuyari. ²⁰ Mosanucuaanaa, ¿majateeri nia niishiniu? Jesuucua tiuujia nia quishacari, niaa jaara maninia miyashijiaca quiyajaa, Jesuucua nia tiuuniuuri najuhuanaj, nia tojiyaquishacari Pueyaso. ²¹ Niaacuajaari niishiya taa Pueyaso saniquiaari pa supuetana Abrahamni, na niishiniuria seetanujuanaa nocua tiuujiatee. Pueyasoori naa na saniquiaari: na sequequiaari-iri: “Abrahamnaa, quia niyanuniyoyua quia more cucuara quia catijasocoriquiano”. Majaari Abraham ruuretanu

quiquiaari Pueyaso sequesano nojuaja. Naaratej, Pueyasoori naa sequequiaari: “Jiyanohua maninia Abraham, cua tojijia cutara”.²² Naacujiti cuarta Pueyaso pueyanaa, naa Abraham tojiniucua Pueyasotej, paari maatia niishiyani nojuajaari seetanujuanaa Pueyasocua tiuujia quiquiaari. Naajuhuj, Pueyaso sequesano na miishacari, nojuajaari Pueyasocua tiuujia quiquiaari tojetaarucujanaa.²³ Naa Abraham miiniucuatej, nojuajaari tariucuaaanu Pueyaso rupaajinia nojuajiniji naajiotasano tohuateequiaari. Naa sequeyari:

“Abrahamri Pueyasocua tiuququiaari. Naa na tiuuniucua Pueyasocuatej, Pueyasoori na jiyatequiaari juhua tojetaarucujanaa sesa miyashijia na quiniuria”.

Naa Abraham quiniucua Pueyaso tojijiatej, nojuajaari sequesaaquiaari Pueyaso rupuenata.

²⁴ Naacujiti pueyanaa, Pueyasocujajaari na sequesano mijia jiyanooquiaa. Maja cutaraari na jiyanooniu noo pojori, nocua tiuuniu sequeja najuhuanatej.²⁵ ¿Niaate niishiyajuhuj taa Pueyaso jiyanooquiaari Jericó tiacajinijinio paanatucuaani, nooj, Rahab jiyanishanotej? Pueyasoori na jiyanooquiaari neyatu na quiniurijuhuj. Na jiyanooquiaariiri maninia na miiniucua caapiqui pueyano Israel pueyajinijinio. Rahabri cuno pueya jamojoquiaari na tiaco. Na nuhuaji, nojori mashiquiquiaariuhua tamocoori, narta Jericó tiacajinijinio pueya puecoyaquiniucujaji cuno pojori. Rahabri naa maninia miiquiaariti Pueyasojiniji na tojishanoocua na tiuushacari. Niishiquiaariiri Pueyasoori Israel pueya cumaquinia quiquiaari.²⁶ Nio pohuatasanoori pa niishitiojiya, naatej, taa pa cuaqueya macu quiya sohuanuucuaani, naajuhuj, paa jaara Pueyaso sequesano miyashijia quirini, paari najuhuaana sequeyani: “Jesuucua tiuujianijia”.

3

Pa niti juhua mani

¹ Cuarta Pueyaso pueyanaa, maja cumaati puera nianianijinijinio jiaatianu Pueyaso rupaa niishitiojona nia quiniuria. Niaacujajaari niishiya, Pueyaso rupaa niishitiojonaari socua jiyanohua saniitiosaanutaniya tamacajiniji, nojori tojitiaaquiniucua tama nojori niishitiojosanojuaja.

² Puetunu pajaniyajanaari sequeyarucua miiquiaa sesani. ¿Teyano pueyanote tojetaarucujanaa narta pueyano najiquitijaquijia na pocuasacarini? Shaaqui. Pueyano sequesano jaara puetunu maniajanaa quiri pueyaracaanu, cuno

pueyano maara seetanujuanaa maninia pueyano quiri cutara. Cuno pueyano maara na naata puetunu tama na cuaqueyajaaja jiitianu niishiriquiajuhua sesa na miyaquini-uucuaaji. ³ Niaacuaajaari nishiya, caballo rupaama jaara niasaare na niquitijiotaja, na camaru na tojiniuria, na netesacari, na camaruuri puetunu na caballo cuaqueyajanaa niq-uitijiotaa na panishaco. ⁴ Puereetuca buqueeri naajuhuaaj. Shiitaniyoyua na niquitijiotaja jiitiaajaariuhuaaj. Jiyanohua paratu piyarojosacari, naajaa, na camaruuri saa cunotaja na niquitijiotaa na panishaco. ⁵ Pa nitiiri naajuhuaaj, shiitaniyoyua casaaniyoyuaari pa cuaqueyajinia shipinishano. Naajaa, jiyanohua pocuanu niishijiaari. Sesa pa miitiyari. Nojuajaari juhua maniyashi. Maniyashi jaara jaare puereetuca cuhuariquiajia, cuno maniyashiiri puereetuca maniria pacusee. Cuhuariquiaari puetunu catemajaananaa. Pa nitiiri naajuhuaaj. ⁶ Pa nitiiri seetanujuanaa juhua mani quiya pa cuaqueyajinia. Paa jaara sesa pocuareni, paari puetunu pa cuaqueyajanaa sesoyani. Pa nitiiri puetunu sesa niishijiajanaa. Paa jaara sesa pocuare pueya niquiarani, puetunu pueyajanaari pa sequesano caminiujuquiaa tamasaca niquiara. Pa nitiiri Sesaaca poonijiotasano. Naacuajitij, sesa pa pocuasacari, paari puetunu mijiria pa quiniujianaa sesoquiaani. ⁷ Pueyanoori na naata jiyartuutenu puetunu casaajanaa: jaacuatujuaca, roshiyocuatujuacajuhuaaj, moojinijinio casaanio. Seetanujuanaari, pueyari tari naa na jiyartuutejoquiaa. ⁸ Maja cutaraari pa naata jiyartuutenu pa niti seque, saa maninia pa pocuanuraja. Pueyaracaanu sesa taquiriocuaa saajaari. Nocua quiyari juhua soconu noonacu, puetunu pueyajanaa na sesonura. ⁹ Paari jiyano pa nititaja pa Que Pueyaso maninuhuaqueetaquiaani. Naajuhuaaj, paari Pueyaso shipinishano parta pueya sesacaquiaa natajuhuaaj. ¹⁰ Naacuajitij, pa ru-paamaji tohuataari maninia sequesano, sacuaraatia sequesanojuhuaaj. Cuarta Pueyaso pueyanaa, ¿maja cumaati naa pa quiniutij! Maja maninia naatej. ¹¹ Samo nacajiniji pueyaracaanu pacaretajaari shocuanacu mohuaca. ¿Jataquiaate soj? ¿Pianacate saniniuuja pacaretaquiaacujua? Maja. Samo nacaari pueyaracaanu maniniuniacu quijia. ¹² Cuarta Pueyaso pueyanaa, ¿mariyajate na naata muetunu shucuenajara? ¿Nateecate sacamanajara muetujuajuhuaaj? Maja. Naajuhuaaj, maja pa naata pianacu mohuaca taquitianu cuari maniniujiniji. ¿Mohuacatucua casaara jatara tamaatiuniacurani? Naajuhuaaj, paa cuara pueyaracaanu maninia pocuara saaja. Maja cumaati pa pocuasano pa cojitiniu sesa pocuasanota.

Niishijia pueyano

¹³ Tamonu nijaniyajinijinio jaara niishijia quiri, nojuaja cuaara juhuajaniya maninia miijia quiiria nareja, maja pueya shocoteja. Jaara naa maninia quiijia quiri, pueyari niishiniutianiya nojuaja seetanujuanaa niishijia. ¹⁴ Saniniuujia, nioojia jaara najiquitishano quiri, niishijia nia quiyaquiniuucua juhua niarta Pueyaso pueyano, niaari seetanujuanaa mosanucua. Naajuhuj, nia miishano jaara quiri nia shocotanura niarta Pueyaso pueya saaja shuquiriaatia nia quiniuria tamajaaja, majaari nia jiyaniniu niaari niishijia. Naa miijia nia quishacaritij, niaa jaara tama nia niishitiajaaja shuquiritiare, niaari mosanucua saaja. Nia sequesacari: “Niishijia cutaranijia”, niaari sapojiya. ¹⁵ Cuno nia niishitiajaari maja jiyocuacaanuji Pueyaso niishitiaja. Cuno niishitiajaari tama nia niishishanojuaja, mijiria niishishanojuuj, Sesaacajanaa niishishanonio. ¹⁶ Pueyanaa, tee Pueyaso pueya juaatishano quiya tamasaca jaara na shocotare, naajuhuj, pueya miishacari saaja tama na panishanojuaja, tii quiyari juayonuujutanu, puetunu sesa miiniuujianaano. ¹⁷ Saniniuujia, cante Pueyaso niishitiaja jitiaa cutarani, nojuajaari maninia miijia pueyano cutara. Jiyano pueyanoori maninia quiijia puetunu pueya niquiarajanaa, jiyanoorio, jacaria pocuaja. Majaari na niishiniu ritia juaaniu. Pueyacuara taraajejaari. Majaari na niishiniu cuaracashijionu pueyacuara. Pueyaracaanu seetanujuanaa sequeyari. ¹⁸ Naajuhuj, cante juaatioyano jiyanooriootejani, nojuajaari jiyanoohua shuquiriaatia quiniutianiya Pueyaso shuquiritishacari nojuaja maninia na miiniuucua.

4

Mijiria casaacua jiaatiajacajiniji pohuatasano

¹ ¿Niaate niishiya casaara nia juayonuujutaquiaa tamaaja pueyaracaanuni? Niaari naa quiyaquij sesa miiniuucua nia jiaatiasacari. Nioojaari najiquitishano quiquiaa nia panishanoocua nia jiaatiasacari sacuaraatia. ² Naaratej, nia panishano nia maseyaquishacari, niaari na casamiicuaji pueyano moquiaa. Niaari naa miiquiaa puera nia jiaatiasacari nia panishanoocuatej. Nia panishanoocua nia jiaatiasacari jiyanoohua, niaari cunora miriyojotaquiaa. ¡Niaari socua piyotaariquiaaqui! Niaari naa quiyaqui Pueyaso nia secojiyaquiniuucua nojuaja niqutionura nijaniya nia panishano. ³ Naajuhuj, niaa jaara na secojore, majaari nia masenu quiquiaa nia masesano. ¿Casaara nia maseyaquiquiaanoj? Nia sequesereeraj. Niaari sesa nia jiaatianuta na masequiaajuhuanajaj. Niaari nia jiaatiasanoocua

masequiaa juucua, tama nia cuaqueyajaaja nia shuquiritiniuria. ⁴ ¡Pueyanaa, niaaqui Pueeyaso rootasano ruuretajacajuhuanajaj! ¿Majateeri nia niishiniu? Cante mijiria sesa miijiaca miishano timitiajacani, nojuajaari Pueeyaso paracara quirii. Niaa jaara naa miijiaca quiniu paniyajuhuj, niaari tari Pueeyaso paracara quirii. ⁵ Tariucuacaanu Pueeyaso Rupaajinia naa naajiotasanoori quiyajuij:

“Pueyasoori na Sohuanu niaquiaari poojiajinia, nera na cojuanura pajaniya. Jiyanohua na paniniutia pajaniya, Pueeyaso Sohuanuuri pa jamuequiaa juucua saaja Pueyasora pa quiniuria”.

⁶ Naajuhuj, Pueeyasojuanaari jiyanohua maninia naacuquiaa pajaniya, jiyanootio na quiniuucua. Na Rupaajiniaari naa naajiotasano quiyajuhuj:

“Pueyasoori noo pueya paracaajia, narta pueyajiniji juhua socua cutara pueyano quiniu panijiatej. Saniniuujia noo pojori maniniucuaarijia, naa sequejacatej: ‘Maja cua naata miiniu maninia tamajaaja. Pueeyaso cuaara cua naacuura’ ”.

⁷ Naarate pueyanaa, seetanujuanaa Pueeyaso tojitiajacara nia quiriquia. Cumaatia nia nujuatare Sesaaca, maja na shocotanura niajaniya. Niaa jaara naa miiritij, niaacuaji mashiniutianiyari. ⁸ Niaa jaara Pueeyaso rupuere, Pueyasoori nia rupenuutaniyajuhuj. Sesa miijiacanaa, cua tojitiare. Taa curuutucojuanucua shuquirioyacuaani, naa tama nia cuaqueyajaaja nia jeequejorejuhua sesa nia miishanojiniji. Noojiaqueya Pueeyaso panijiaaari mijiria sesa miishano paniquiaajuhuj. Cuno pueya cuaara noojia jeequejora maja socua noojia na niquijiotenura najuhuanaj. Cuaara saaja Pueeyaso panijiacara quiria cutara. ⁹ Sesa nia miiniuucua nia nujuquette, nia taraajerejuhuj. Nia sapiyonuure. Sesa miishano nia saroojotanu nia jataniri namijiaacatenuucua. Sesa miiniuujiniji nia shuquiriniu nia jataniri taraajenuucujuhuj. ¹⁰ Niaa jaara nioojiajinia sequeriquia Pueeyaso niquiara: “Maja cua naata tamajaaja maninia miiniu”, Pueyasoori nia naacutaa maninia nia quiniuria mijiria. Nojuajaari nia jiyatenutaniya jiyaniijianucua nia quiniuria.

Parta Pueeyaso pueyacuara rimiaaqueyashijiaca pa quiriquiaj

¹¹ Pueyanaa, maja sacuaraatia nia rimiaaquenu niarta Pueeyaso pueyacuara. Maja maninia naatej. Cante narta Pueeyaso pueya sesacaani, Pueeyaso Rupaajinia naajiotasano tojiyashijaari jiyanotej. Niaa jaara naa miiritij, niaari Pueeyaso Rupaajinia naajiotasano sesaca. Naajuhuj, niaari tama nia cuaqueyajaaja jiyateya juhua jiyaniijia,

niarta pueya nequesoreenaa nia quiniuria. Naa nia mi-shacaritij, niaari Pueyaso rupaa tojiyashijiacara quiqiii.¹² Pueyasojuanaari tamajaaja Jiyaniijiajanaa. Nojuacuajaari na rootasano niishitijia pajaniya. Nojuajaari niquiriyatujua pa nequesoreena, pa saniniujiuriquianojuhuaj. Nojuajaari cumaacaraca pocuaji na tacunura, na shaajanura pajaniyajuhuj. ¿Canteeri quiajaniyanijia, quia saniniujiuniuria tamasaca, juhua nojori jiyaniijiani?

Majaari pa niishiniu tariquiria

¹³ Pueyari naa sequejaca: “Canaari tariqui quianutaniya tamonu tiacajiniani. Canaari cuniqui shocotenutaniya niquiriyatu marijiani canaa niqutiojosacari tii canaa casami. Canaari queraatia cumaneeca masenutaniya canaa casami samini”. Cua tojitiare naa sequejacanaa.¹⁴ Majaari nia niishiniu taa nia juhuaquenutaniyani. ¿Niaatucua taa sequereni niaa jaara macu juhuaquema saaja? Nocuaji majaari naa sequenute pueyanaa. Pa quiniuuri juhua shushiquiani. Naatej, taa shushiquiacuaani rupaquijia niqishiyari, na nuhuaji tajimiohuari, paari naajuhuj.¹⁵ Naaratej, naa nia sequere cutara: “Pueyaso jaara paniri, canaari tariqui quianutaniya poonijionuucuan”. Naa cutarate maninia sequenu.¹⁶ Niaari saniniuujia sequequiaacujua: “Janiyari tariqui quianutaniyani cua miiniu panishano cua miiniuria”. Naa nia sequesacaritij, niaari jiyaniya nia naata tamajaaja miiniu puetunu nia panishanojuanaa. Naa nia sequesacari juhua nia miishocoriquianotej, niaari najuhuana nia rupaa riutioconeetequiaa puera, juhua niishijia pueyano. Niaa jaara tama nia cuaqueyajaaja naa jiyateya juhua tariqui miishocoriquiano niishijiatej, cunoori jiyanohua sesa.¹⁷ Naajuhua pueyanaa, niaa jaara maninia miyaquiri, maninia miiniu niishijiacaa nia quishacari, niaari tari sesa miijiacaa.

5

Casamiriaca pueya nacasusaanu

¹ Nia tojitiare, casamiriaca pueyanaa. ¡Juhuaracijia nia sapuere! ¡Nia sariyocuaature! ¡Niaari naquiya miiniutianiya taraatia!² Niaari jiyanohua casamiriaca. Cuno nia jiiitasano casamini, najuhuana moqueyari. Surequeyari nia maniniuquiya toqueya miaqueyajuhuj. Naacuajitij, puetunu nia jiiitasanojuanaari moquenutaniya.³ Nia paatijosano oroni, nia cumaneecanio, najuhuana tiyarashiyari. Naacuajitij, pa Nequesoreenaari maatia niishiniutianiya niaari sacuaratia jamuejaca quiquiaari.

Naa miijiaca nia quiniuucuatej, niaari saniitiosaanutaniya. Niaari socua shaajasaanutaniyaquij. Niaari najuhuana queraatia casami paatijiya shuquiriaatia nia quiniuria tamajaaja mijiria. Saniniuujia, nio pa quishacariiri quera pa Jiyaniijia tiuquishacariuhua na saniniujiuniuria pajaniya. ⁴ Jiyaniijiajanaari nia poonijjotesano pueya tojiquiaa! Nojoriiri sariyocuatiuya nia cumaneecajiniji nia niqutioyaquiniuucua nojori poonijionuunujiniji, niaara na senoonuucua nataacuaca nia cuhuariquiajiniji. ⁵ Mijiria nia quishacariija, niaari shuquiriaatia quiquiaa puetunu nia panishanojuanaa nia jitiiasacari. Naa shuquiriaatia nia quishacaritij, niaari juhuajaniya shiyoshiya juhua puecoosocoriquiano cushiya. Niaari naa miishaanutaniyajuhuj. ⁶ Niaari maninia miijiaca puecooquiaa. Majaari nojori nujuatanu quiquiaa nijaniya, nocuara nia tonujusacari nia cuaracashiniutia najuhanaj. Naacuajiti casamiriaca pueyanaa, niaa cumaati puetunu nio niaara sequesanojuanaa tojitiaa.

Juhuajaniya pa sashiri pa Jiyaniijia

⁷ Naacuajiti cuarta Pueyaso pueyanaa, juhuajaniya nia sashiri pa Jiyaniijia cuaara tiuquiuhuara. Cuhuariquia camaruuri na natanu nuhuaji naa sashiquiaa marujuhuj, maninia na natau moritianura. Maru sashiyajaariuhua cuaara niiria, na natau jajau na querajaacaatiniuria. ⁸ Naa nia sashirijihuhuj. Majaari pa Jiyaniijiaacuaji nia pishiniu. Nojuacuajaari quera tiuquiniutianihua. ⁹ Cuarta Pueyaso pueyanaa, majaari niarta pueyacua nia rimiaaquenu nojori nia soonuta, niaa mariqui saniitiosaaereeri. Nia niishiri, pa saniniujiunia Pueyasoori pocua catecanoya. Tari juhua pa tohuateyaji nujuaari. Nojuajaari seetanujuanaa pa saniniujiunia cutara. Nocuaji maninia pa quirij. ¹⁰ Pueyanaa, juhuajaniya pa rejeretarejuhuj, paa jaara naquiya miishaareni. Naatej, taa tariucuacaanu Pueyaso sequesano caminiujiunia rejeretacoquiaari taraatia nojori miishacaricaani, naa nia rejeretarejuhuj. ¹¹ Paari niishiyacuajani, Pueyasoori naquiya miiniu rejeretajaca pueya shuquiritiaja. Maninia na miiniutianiyari. Niaacuajaari tari pohuatasaaquiaarijihuhuj taa supuetana Job rejeretaquiaari naquiya na miishacaricaani. Na nuhuaji cutara, Pueyasoori jiyanohua maninia na miiquiaariuhua, jiyanohua pueyacua taraajeja na quiniuucua, jiyanojiajaariuhuj.

¹² Cuarta Pueyaso pueyanaa, nia tojitiare. Nia pocoojosacari, tamonu jaara quia sequesanoocua tiuyaquiri, naajaa, majaari najuhuana sesa pocuanu. Maja cutaraari sequenu: "Cua sequesanoori seetanujuanaa juhua jiya cajin-

iocujaja. Majaari na shaajenu quiniutianiya”. Majaari sequenujuhuaj: “Cua sequesanoori juhua nio jiya. Majaari na shaajenu quiniutianiya”. Majaari naa pocuanu sacuaraati-atej. Nia sequesano jaara seetanujuanaa quiri, nareja nia sequere: “Taaquiriirinij”. Naajuhuj, nia sequesano jaara quiri “maja”, cuaara naa quiiria seetanujuanaa. Majaari nia sequesano nia maatenu socua, Pueyaso mariqui nia sani-tioreeri.

¹³ Tamonu niajanijajinijinio jaara naquiya miishiya, nojuaja cuaara Pueyaso secojoora. Shuquiriaatia nia quishacari saniniuujia, Pueyasora nia jaaquequejore. ¹⁴ Cusosu nia quishacari, Pueyaso pueya jiiitanaa nia sequere nojori cuaara secojoora niaacuara. Nojori cuaara shiyocua cojuata cusosu quiaara, pa Jiyaniijia sesajinia nojori secojosacari. ¹⁵ Nia secojosacari Pueyaso seetanujuanaa nocua nia tiuuniutia, cusosuuri naatanutaniuhua. Nojuaja jaara sesa miiquianu, Pueyasoori na jiyanooniutianiya sesa na miishanojiniji. ¹⁶ Cunora, sesa nia miiniu nia sequetoore nia jiyanooshaanura. Majaari sesa nia miishano nia seetanu. Na nuhuaji Pueyaso nia secojore tama niaacuarajaaja. Pueyasocua nia naatanijiorohua. Maninia pueyano secojosacari jiyanoohua, cunoori jiyanoohua cumaacaraca. Pueyasoori na secojosano tojjia. ¹⁷ Tariucuacaanu pueyara Pueyaso sequesano caminiujiunia Elíasni, nojuajaari nareja pueyano quiquiaarijuhuaj taa pajaniyacuaani. Naajaa, nojuaja jaara Pueyaso secojoquiaari maja maru niniuria, majaari maru niniu quiquiaari jiuujianaraca marijia cuaara shocojoquiaarijiaatijia, socua seis racanio. Majaari maru niniu quiquiaari tojetaarucujanaa. ¹⁸ Elías jaara pacutequiaariuhua secojonu maru na panishacari, maruuri shusha niqiaariuhua. Pueya nataacuacaari jiyacari shusha moritiaquiaariuhua.

¹⁹ Cuarta Pueyaso pueyanaa, tamonu niajanijajinijinio jaara Pueyaso rootasano tojiyashijiara quiriohua, tamasaca jaara na niquiri, cuaara na rootaaranonj, maninia miijia na quiniuhuara. ²⁰ Nia niishiri, cante sesa miijia tacatorohua Pueyasocua sesa na miiniuujinijini, nojuajaari cuno sesa mi-ijiaacuaji tacuya maja senota na shaajasaanura. Pueyaso na jiyanootiyaariuhua puetunu sesa na miishanojinijijianaa. Tariucujaja cua panishano pueyanaa.

COTEENU PEDRO NAAJIONEE

Pedro saruhuatasacari narta Pueyaso pueya

¹ ¿Niaate quiyajaa cuarta Pueyaso pueyanaa? Janiyari Pedroni, Jesucristo jiyaramiquishano na rupaa pohuatana cua quiniuria. Janiyari nio naajiya niaacuarani, noo porjiicuaara canapueete tiquiyocua niyaquecojoquiaaricujani: Ponto jiyajinia, Galacia jiyajinia, Capadocia jiyajinia, Asia jiyajinia, Bitinia jiyajinianio. ² Tariucuacaanu, pa Que Pueyasocuajaari nia saquiriojoquiaari na pueyarano nia quiniuria. Naaratej, nojuajaari na Sohuanu jiyaroquiaari nioojiajinia na poonijionura, Jesucristoocua nia tiuuniuria. Naacujitij, Jesucristo shootenuucua na nanaca, Pueyasoori nia jiyanoocua, juhua tojetaarucujanaa jeequesano nioojia quiniuria. Na Sohuanuuri nia jataniquiaa tojetaarucujanaa maninia miijiaca nia quiniuria, seetanujuanaa Jesucristo tojijiaca nia quiniuriajuhuaj. Naa Pueyaso panishano pueya nia quiniuucua, nojuaja cuara cumaquiiria jiyanohua niajaniya. Cuara nioojia cajitiiria pueyaracaanujuhuaj.

Pa niishiri, paari jiyanohua maninia miishaariquianoni

³ Pa Jiyaniijia Jesucristo Que Pueyaso pa manihuuaqueetare, jiyanohua maninia na miiniuucua pajaniya. Jiyanohua na taraajenuucua pocua, na pueya pa quiniuucujahuaj, nojuajaari pa niishitiquiaari paari juhua quiariniora samiitianijiosaanutaniuhuani. Paari naa samiitianijiosaanutaniuhuani, naatej, taa Jesucristo samiitiaquiaariuhuacuaani. Naa pa niishishacari taa pa miishaanutaniyani, paari shitimia sashiquiaani pa miishaanura taa Pueyaso miiniu paniya pajaniyacujani. ⁴ Naacujitij, niaari niishiya niaari seetanujuanaa masenutaniya puetunujuanaa niaarano Pueyaso jiiitasano jiyocuacaanu. Cuno, Pueyaso racatasano niaaranoni, cunoori maja na naata shaajasaanu. Majaari na naata sesasaanu. Maja na naata tariucuashiniujiuhuaj. ⁵ Pueyasocua nia tiuuniuucua, nojuajaari na cumaacata nia cojuaquiaa. Pueyaracaanu nia cojuanutaniyari nojuaja cuara nia rijiorejaatijia mijiria taraatia nia quiniujiniji, tojetaarucujanaa jatanishano quijiaca nia quiniuria. Jiyanohua maninia Pueyaso miiniu panishano na pueyararoni, shusha jiyacari niquishaanutaniyari.

⁶ Cunora niaari shuquiriaatia quiya. Saniniuujia, niaa naa-sucuaari taraajeya rupaquijia nia miijosacari naquiya mijiria. Naajaa, niaa jaara naquiya miishaare, cunoori maja najuhanaj. ⁷ Naquiya pa miiniuni, cunoori pa saniniujiushaanura paate seetanujuanaa Pueyasocua tiuujiacani. Niacuajaari niishiya, pueyari jiyanoehua oro panijiaca. Saniniuujia, Pueyasocua pa tiuniuni, cunoori jiyanoehua socua panishano orojiniji. Niacuajaari niishiya, pueyari oro catijaja, na sanishaanura maninia oro seetanutejanaa. Naajaa, seetanujuanaa maninia oroori shaajejajuhuaaj. Saniniuujia, paa jaara mijiria naquiya pa miiniu rejeretajaca quirini, Pueyasocua tiuujia pa quiniuucua, cunoori socua jiyanoehua maninia cuno shaajaja orojiniji. Pueyasocua nia tiuniu jaara saniniujiushaare juhua orojuhuaaj, jaara seetanujuanaa maninia quiri, Pueyasoori nia timitianutaniya. Naacuajitij, Jesucristo muetasacari pocua, Pueyasoori jiyanoehua maninia miiniutaniya nijaniya. Jiyanijianucuara nia jiyatenutaniyari.

⁸ Majaari juhuanouaja Jesucristo nia niquniu. Naajaa, niacuajaari na panijiaca. Nia niquishoo na quishacarijia, naajaa, niaari nocua tiuquuaa. Niaari na timitiaquuaa jiyanoehua. Tojetaarucujanaa jiyanoehua nia timiniu quiniuucua nioojiajania, majaari nia naata na pohuatanu nia ru-paata. ⁹ Niaari naa timiquuaa, tariucua jatanishano nioojia quiniuucua, Jesucristoocua nia tiushacari.

¹⁰ Tariucuacaanu, pueyara Pueyaso sequesano caminiujiuniaa pueyari poojotaquiaari taa Pueyaso jiyanooniutaniya nio pa quishacari pueyani, na pueya nojori quiniuria. Nojoriiri tama nojori naajiotasanojuaaja suraatia serojojuaca quiquiaari, Pueyaso Sohuanu niishitishano nojori naajiotasani. Nojoriiri jiyanoehua niishiniu paniquiaari taa Pueyaso jiyanooniutaniya pueyani.

¹¹ Jesucristo Sohuanucuajaari juhuacarijia nojori niishitiquiaari taa Pueyaso jiyarosocoriquiano Pueyano miishaanutaniya naquiya coteenuni. Nojori niishitiquiaarijiaariuhuaaj, naquiya na miiniu nuhuaji saniniuujia, nojuajaari Jiyaniijiarajanaa jiyatesaanutaniya, shacantuuca quijia na quiniuria. Naaratej, nojoriiri maninia na niishiniuria saniniujiuquiaari juucua, cantejaara cuno quiniutaniyani, Pueyaso Jiyarosocoriquiani, najuhuaaj, taacari na muetanutaniyani. ¹² Pueyasoori saaja nojori niishitiquiaari, na Sohuanu poojotanishano nojorini, cunoori maja tama nojoririjajaaja na quiniu quiquiaari. Cuarta Pueyaso pueyanaa, ¡cunoori niaarano quiquiaari seetanujuanaa! ¡Tariucuacaanu

poojotasano Pueyaso Jiyarosocoriquianojinijiiri tari tohuateequiaari! Jiyocuacaanuji jiyarosano Pueyaso Sohuanuuri Pueyaso rupaa pohuatanaa cumaquiquiaa, taa na cumaquiquiaari Pueyaso Jiyarosocoriquianojiniji pohuatanaacuaani. Naacuajitij, quiari naataja nia tojishano Jesucristojinijini, cunoori supuetanaa pohuatasano quiquiaaricuaaja. Pueyaso seyajanaacuaajaari pueyarano Pueyaso miishocoriquianoocua maatia niishiniuucua jiaatiaajuhuj.

Pueyasoori paniya saaja maninia miijiaca pa quiniuria

¹³ Cunora, cuarta Pueyaso pueyanaa, jeenucuasano nia quiriquia. Jesucristo muetasacari pocua, Pueyasoori jiyanohua maninia miiniutianiya pajaniya. Cunora, saaja naa nia miiniu panishaanuucua jiaatiajaca nia quiri. Majaari nioojia niqijijotejaca nia quiniu. Maninia niishiriojojuaca nia quiriquia. ¹⁴ Tarijia, niaari tama nia cuaqueya panishanojuaaja miijiaca quiquiaari, Pueyaso niishiyashijiaca nia quishacarijia. Quiarijia saniniuujia, niaari na tojijiaca cutara. Naaratej, na muerasu nia quiniuucua, majaari naa quijiaca nia quiniu socua. ¹⁵ Saniniuujia, saa maninia miijiacaja nia quiriquia. Pueyasocuaajaari nia saquiriojoquiaari naa tojetaarucujanaa maninia miijiaca nia quiniuria, juhua nojuajuhuj. ¹⁶ Tariucuaaanu Pueyaso sequesanoori naa naajiotasano quiyajuhuj:

“Tojetaarucujanaa sesa miyashijiaca nia quiri, taa janiy-acuaani”.

¹⁷ Nia secojosacari, niaari Pueyaso sequequiaa, “cua Quena”. Cunoori maniniacuaaja. Naajaa, majaari nia niyajetanu cutara, nojuajaari puetunu pueyajanaa nequesoreenutaniya sesa pa miishanojiniji, maninia pa miishanojinijinio. Majaari rimiajata na saniitionu quiniutianiya. Cunora, mijiria nia quishacarijia, nia puerenuta tama nia cuaqueyajaaja nia cojuare, niaa mariqui na tojiyashijiacara quiriohuari. ¹⁸ Pa supuetanaa quiniuucua sesa miijiaca, paari naa miijiacara quiquiaarijuhuaj. Pueyaso cutaraari naa sesa pa quiniujiniji pa jataniquiaari maninia na muerasu pa quiniuria. Niaacuaajaari niishiya, majaari Pueyaso masenu quiquiaari pajaniya orota, platatanio, shaajeja casaata. ¹⁹ Nojuajaari pa masequiaari tama Neyanuniyojua nanacatajaaja. Jesucristoori tama na cuaqueyajaaja tarinitiaquiaari pocuara na mosaanura, na nanaca shoonuucua pa jiyanooshaanura. Tariucuaaanu, borrego jaara Pueyaso niqiara mosaaquiaari na camaru niti, cuno borregoori tojetaarucujanaa borrego

maniniu quiquiaari. Naajuhuj, Jesucristoori tojetaarucua-janaa maninia miijia quiquiaari. Naacuajitij, nojuajaari tojetaarucujanaa maninia pueyano quiquiaari pa niti na mosaanura. ²⁰ Jiya shipiniyaquishacarijia, Jesucristoori tariucua pueya niti mosocoriquiano sequesaaquiaari, sesa miijia jiyanooshaanura. Saniniuujia quiari naataja, nojuajaari shusha mijiria muetaquiaari pocuara na mosaanura, taa Pueyaso miiniu paniquiaari pajaniyaracuajani. ²¹ Naa Jesucristo miiniuucua pocuaratej, niaari Pueyasocua tiu-uquiaa. Pueyasocujaari Neyanu samiitianiquiaariuhua. Na jiyatequiaariiri Jiyaniijijanaa na quiniuria, shacantuuca cumaacaraca quijia na quiniuria. Naacuajitij, niaari quiar-iijia Pueyasocua tiuya, na samiitianiniuria nijaniyajuhuj. Naaratej, niaari juhuajaniya sashiya, shacantuuca quijiacara nia jatanishaanurajuhuj.

²² Seetanu rupaajanaa tojitiajaca nia quiniuucua, nioojiaari tari jeequejosaaquiaari, niarta Pueyaso pueya panijia nia quiniuria seetanujuanaa. Naaratej, seetanujuanaa panitiojuaca nia quiriquia puetunu nioojitajanaa, maja sesa nia niishiriojonuta quenaaja. ²³ Naa panijia nia quiri, jatanishano pueya nia quiniuucua. Pueyaso rupaacua nia tiuushacari, niaari juhua roosaaquiaariuhua, pueyaracaanu quiijaca nia quiniuria seetanujuanaa. Pueyaso Rupaacujaari pueyano samiitianijia, saminio na quiniuucua. Naacuajitij, niaari shaajeyashijacara jatanishaaquiaari pueyaracaanu Quijia rupaacua nia tiuuniucua. ²⁴ Tariucuaanu Pueyaso Rupaajinia naajiotasanocujaari naa sequeya:

“Puetunu pueyajanaari rishiyashijaca juhua jiyasocua. Na cumaaca, puetunu na jiišanasojuanaajuhuj, cunoori soreja, juhua naana shuu. Jiyasocuaari soreja. Naana shuuri tijia. ²⁵ Saniniuujia, Pueyaso Rupaa cutaraari pueyaracaanu quijia”.

Cuno rupaacujaari nia niqiara pohuatasaaquiaari pueyaracaanu quijiacara na jataniniuria nijaniya.

2

¹ Naaratej, nia tarinitiare puetunu sesa nia miiniuujanaa. Seetanujuanaa nia tarinitiare cuaracashijionu. Naajuhuj, majaari sapuenu juhua maninia pueyano niquishano nia quiniu najuhuanaj. Majaari tamasa jiišanasoocua jiaatiajaca nia quiniuujuhuj. Majaari coriaacojuaca nia quiniu socua. ²⁻³ Naa jaara tari niishiyacuaja pa Jiyaniijiaari seetanujuanaa maninia, na rupaacua jiaatiajaca nia quiricuara-jaj. Naatej, taa shusha rasano conaaja jiaatiaa supuenuucuaani, naa Pueyaso Rupaacua jiaatiajaca nia quiriquia-

juhuaj, cumueeca Pueyaso muerasu nia quiniuria seetanujuanaa. Naacuajitij, niocua tojetaarucujanaa jatanishano pueya quiri.

Cristoori juhua saminio saajia, Pueyaso quiquiorano tiataja

⁴ Saijiniji shipinishano tiaari pueyaracaanu rishijia. Naaratej, pa Jiyaniijiaari miriqui sequeshiya juhua saminio saajiata Pueyaso quiquiora. Mijiria Pueyasora tiajonaari jiyaniquiaari cuno saajiaari sesarujajau. Naaratej, nojori jiyajenetasacari cuno saajia, nojoriiri na jataquiaari na ruuretasacari. Nojuaja cutaraari Pueyaso saajia maniniu, tama na saquiriojosanojuaja. Naaratej, nocua pa tiuuri. ⁵ Naajuhuj, puetunu Jesuucua tiuujiaa pueyaranojuanaari pueyaracaanu rishijia quiquiorano Pueyasora. Naacuajitij, Jesuucua pa tiuushacari, paari juhua maniniuujiaaca sai Pueyasorani, na quiquiora na tiatajara. Naajuhuj, Pueyaso quiquio pa quishacari Neyanuucua pa tiuuniuucua, Pueyasoori pa jiyateya pueyacuara secojonaa pa quiniuria na tacoji. Majaari seya pa niqutiojonu quiquiaa Pueyasoni, taa tariucuacaanu pueyacuara secojonaa pueya miiquiaaricuaani. Paa cutaraari tama pa cuaqueyajaaja jiyatequiaa Pueyasora pa quiniuriani, puetunu pa miishanojuanaanio. Puetunu naa pa miishanojuanaa Jesucristoocua pa tiuuniuucuaani, cunoori Pueyaso timitiquiaa. ⁶ Cunora, tariucuacaanu Pueyaso Rupaajinia, miriqui Pueyaso sequesano Jesucristojiniijiiri naa naajiotasano quiya:

“Janiyari Si6n tuhuananuucua jiyanojuaa cua panishano saajia nianutaniyani. Cuno saajiaari tama cua saquiriojosanojuaja. Maniniuujajau saajia seetanujuanaari. Cante nocua tiuyani, nojuajaari maja na cararosaanu quiniutianiya”.

⁷ Cua panishano pueyanaa, cuno saajiaacua tiuujiaa nia quiniuucua, cuno saajiaari jiyanojuaa nia timitiasano. Nocua tiuyashijiaa cutaraari cararosaanutaniya. Nio tariucuacaanu Pueyaso Rupaajinia naajiotasanoori tari tohua-tecanu nojoriria. Naa miriqui sequeyari:

“Tiajonaa jatasano saajia, nojori jiyanihacari cuno saajia naasucua sesarujajau, cuno saajiacuajaari socua jiyanojuaa panishano saajiara jiyatesaaquiaariuhua”.

⁸ Tamaqui, nojuajiniijiiri naa miriqui naajiotasano quiyajuhuj:

“Pueyari cuno saajiaacua tiuriiniutianiya. Nocua jiriatanutanijiaariuhua na tiuriiniuria”.

Nojoriiri nocua tiuriiquiaa, nojori tojiyaquiniuucua Pueyaso rupaa Jesucristojiniji. Pueyasocuaajaari tariucuacaanu sequequiaari Neyanuucua tiuyashijiacaari tiuriiniutianiya puetunurajanaa.

⁹ Niajaniya saniniuujia, niaari tama Pueyaso saquiriojosano pueyajaaja. Nojuajaari puetunu niajanijajanaa jiyatequiaari nojuaja secojonaa nia quiniuria pueyacuara, pueyaracaanu na panishano miijiaca nia quiniuriajuhuaj. Puetunu niajanijajanaari tamasaca pueyapuejinijinio saquiriojosaaquiaari saaja Pueyaso pueya nia quiniuria. Neyanu cusonuta, Pueyasoori naa pa masequiaari tama nerajaaja, maninia Pueyaso miishano pa pohuatanura tamasaca niquiara. Tarijia, niaacuajaari juhua ninishiqui quijiaca quiquiaari. Pueyaso cutaraari nioojia cuhuataquiaari, seetanujuanaa shacantuuca cumaacajinia quijiaca nia quiniuria nata. ¹⁰ Tariucuacaanu, Jesucristoocua tiuyashijiaca nia quishacarijia, niaari juhua soosano taucuaca quiquiaari Pueyasora. Quiarijia saniniuujia, niaari Pueyaso panishano pueya. Tariucuacaanu, majaari Pueyaso taraajenu quijia niaacua. Quiarijia cutara, niaacua taraajeyari. Cunora, nia jiyanooquiaari.

Pueyaso panishano miijiaca pa quiriqiaaj

¹¹ Cua panishano cuarta Pueyaso pueyanaa, nia tojiri cua sequesano. Niaari juhua ruconaa mijiria. Nio jiyari maja pueyaracaanu pa quijiara. Naaratej, majaari tama nia cuaqueya miiniu panishanojuaja miijiaca nia quiniu, saaja shuquiriaatia nia quiniuria mijiria. Sesa casaacua pa cuaqueya jiaatianuni, cunoori poojia sesojua. ¹² Saaja maninia miijiaca nia quiriqia Pueyaso niishiyashijiaca niquiara. Naacuajitij, nojori jaara niaacuara rimiaaque-riquia juhua sesa miijiacara nojori jiyatesacari niajaniya, naajaa. Jiya puequesacari, Pueyasoori puetunu pueyajanaa nequesoreenutaniya. Jiyacari, niaacuara rimiaaquejacaari niishiniutianiya, Pueyasoori tojetaarucujajanaa maninia mi-ijia na saniitiosacari nojori, maninia na miishacari niajaniya saniniuujia.

¹³ Pa Jiyaniijia tojjiaca nia quiniuucua, puetunu mijiria pa jiiatanaa jiyaniijianucua tojitiajaca nia quiriqiajuhuaj. Naacuajitij, nia jiya jiyaniijajanaa tojjiaca nia quiri. No-juacuajaari jiyaniijajanaa cutara. ¹⁴ Cunora, na jiyatesano jiyaniijianucua tojjiaca nia quiriqiajuhuaj. Nojoricua-jaari na jiyaramiquishano, sesa miijiaca saniitiosaanura, maninia miijiaca maniniuhuaqueetasaanura saniniuujia. ¹⁵ Naacuajitij, saaja maninia miijiaca nia quishacari, niaari niishiyashijiaca sesa miijiaca sanaajanutaniya, najuhwana

nojori sesacasacari niajaniya. Cunora, Pueyasoori paniya maninia miijiacca nia quiniuria.

¹⁶ Tariucuacaanu, Moisés Rootasanoori juhua nia jiyaniijia quijia puetunu niaarajanaa nia tojishocoriquiano. Quiarijia saniniuujia, Jesu cusuucua nia niti, nojuajaari Moisés Rootasano tohuateequiaari. Naacuajitij, nojuajaari Moisés Rootasano sanaajaquiaari niaara. Naacuajitij, Moisés Rootasano tonujiyaquishacari niaacuara tari, naajaa, majaari nia jiyaniiniu naacuajiti nia naata tama nia panishanojuaaja miiniu. Pueyasojuaanaacuajaari nia Jiyaniijiajanaa cutara. Naaratej, seetanujanaa na tojtiajaca seya nia quiriquia cutara. ¹⁷ Majaari quenaaja niquiriyatu pueyano rerequeteja nia quiniu. Niarta Pueyaso pueya panijiacca nia quiriquia cutara. Seetanujanaa Pueyaso tojijiacca nia quiriquia. Majaari jiya jiyaniijiajanaa rerequetejaca nia quiniu.

Naquiya pa miishacari, sanaa pa rejeretariquia juhua Cristo

¹⁸ Poonijotesano pueyanaa, seetanujanaa maninia nia camarnu tojijiacca nia quiriquia. Nia camarnu jaara juaajiacca quiriquia, naajaa, saaja na tojijiacca nia quiriquia. Majaari saaja maninia nia jiiitajaca tojijiacca nia quiniu, nia jiyanoojiacanio. ¹⁹ Naa jaara juhujaniya rejeretariquia najuhua nia camarnu saniitiosacari niajaniya, cunoori jyanohua maninia Pueyasora. ²⁰ Pueyaso cutaraari maja na timiniu niaa jaara juhujaniya rejeretare nia camarnu saniitiosacari niajaniya seetanujanaa sesa nia miiniuucua. Saniniuujia, nia camarnu jaara saniitiore niajaniya maninia nia miiniuucua, niaa jaara na rejeretare juhujaniya, Pueyasoori cunoo timitiaja cutara. ²¹ Pueyasocuaajaari nia saquiriojoquiaari naquiya rejeretajaca nia quiniuria maninia nia miiniuucua. Cristojuanaacuajaari naquiya miishaaquiaari maninia na miiniuria pajaniya. Nojuajaari naa miiquiaaritij, pa niishiniuria juhua nojuaja pa miiniuriajuhuaj. ²² Cristoori maja quenaaja sesa na miiniu quiquiaari mijiria na quishacari. Majaari na cuaracashijionu quiquiaari quenaajajuhuj. ²³ Jaara sesacasaquiaari, nojuajaari maja quenaaja nojori na rucuanu quijia na juaaniutia. Jaara miitiasaaquiaari, majaari quenaaja nojori na miananajonu quiquiaari. Nojuajaari saaja na Que Pueyasocua tiuquuaari, na niishishacari nojuajaari seetanujanaa maninia nequesoreena cutara. ²⁴ Cristo jaara niyacutesanojinia cusojusaaquiaari, nojuajaari tari puetunu sesa pa miiniuujianaa cusotaquiaari. Naa pa niti Cristo cusuucuatej, cunoori quiquiaari maninia miijiacca pa quiniuria saniniuujia, maja socua sesa miijiacca

pa quiniuria. Naajuhuaaj, nojuajaari pa niti nootusaquiaari, pa naatanijiosaanura saniniuujia. ²⁵ Tariija, niaari juhua tashuquioonoo borregohua rucoojuaca quiquiaari. Quiariija saniniuujia, niaari nia cojuana Cristoocua tiuquijioquiaari. Nojuacuajaari nioojia jiiitiana maniniu.

3

Camiyono pueyara rootasano

¹ Camishano maajipohuanaa, nia niyaca tojtiajaca nia quiriquia maninia. Naacujitij, nia niyaca jaara Pueyaso rupaacua tiuyashijia quiriquia, naajaa, nojori tojtiajaca nia quiniucua nojoriiri niishiniutianiya Pueyaso Rupaari seetanujuanaa. Nojoriiri naa niishiniutianiya saa maninia miijiacaja nia quishacari, nojori nia pohuataaquishacariija Pueyaso Rupaa. ² Nojori niquishacari tojetaarucujanaa maninia miijiacaja nia quishacari, nojori tojjiacajuhuaaj, saa cunotaja nojoriiri maatia niishiniutianiya Pueyaso Rupaari seetanujuanaa. ³ Maajipohuanaa, majaari nia tacaaniu saaja nia maniniushiniuria, maninia nia niquishaanura. ¿Maajitiiri maniniucuasano, saaja na muezaca na canuusacari maninia, na cushitiasacari orojiniji shipinishano tuhujashiquia, na cushishacari shanohua toquejuhuaaj? ¿Jiyano maajitiiri maniniucuasano jaara juaaniu maniniu quiriquiajuhuaaj? Maja. ⁴ Naaratej, maninia cutaraari nia tacaaniuria nioojia nia maniniushitiniuria. Cunora, saaja maninia maaji quiniucua jiaatiajaca nia quiriquia cutara, jacaria pocuajajuhuaaj, maja juaajia. Jiyano maajitij, cunoori seetanujuanaa maninia niquishano Pueyasora cutara. Niaa jaara nioojia maniniushitiri cutara, cunoori seetanujuanaa shaajeyaquiriquiano. ⁵ Naajuhuaaj, Pueyasocua tiuujiacaja tariucuaaanu maajipohuari neyaca tojjiacaja quiquiaari. Naa nojori miiniucuatej, nojori jiuujiaari seetanujuanaa shanohua maniniushitishano quiquiaari Pueyasora cutara. ⁶ Supuetana Abraham niquiocua Saaraari naa neyaca tojjiacaja quiquiaari. Seetanujuanaa neyaca tojjiacaja na quishacari, nojuajaari na jiyaniquijia na jiyaniijiaata. Naacujitij, niaa jaara maninia miijiacaja quiriquia, niaa jaara nia puereyaquiniutia nia niyaca tojjiacaja quiriquiajuhuaaj, Pueyasora, niaari Saara niquiojori.

⁷ Niajanijarijata canuunaa, nia niquiocua nia jiiitariquia maninia, nia niishishacari maajiiri maja cumueeca juhua cayaja. Majaari na rerequetenu. Maajipohuacuajaari Pueyaso jiyanooshanojuhuaaj, taa na jiyanooquiaari nijaniyacuaani. Pueyasoori niaata nojori cojiritianutianiya samitianijionu, pueyaracaanu rishijiacaja nojori quiniuriajuhuaaj.

Naacuažitij, maninia nia jitiariquia nia niquiocua, Pueyaso mariqui nojuaja nia secojosano tojiyaquiriiri.

Paatucua taa miiriquia parta pueyani

⁸ Pueyanaa, cua sequesano quiarijiani, nioori puetunu Pueyaso pueyarajanaa. Pueyaracaanu jiuujiaatiojuaca nia quiri. Majaari juayonuujutanu. Niarta Pueyaso pueya nia cojiriquia taraatia nojori quishacari, shuquiriaatia nojori quishacarijuhuaj. Seetanujuanaa panitioojuaca nia quiri juhua nia tapueyocucata. Taraajetoojuaca nia quiri-juhuaj. Naajuhuaaj, majaari tama nia cuaqueyajaaja nia jiy-atenu juhua socua tojishano pueyano nia quiniuria tamonu pueyanojiniji. ⁹ Naa jaara sesa miishaariquia, majaari na naminiu. Naajuhuaaj, niaa jaara sesacasaariquia, majaari nojori nia riucuanu nojori nia sesacanurajuhuaaj. Saaja maninia nia riuhanere nojori. Tariucuaaanu, Pueyaso paraca nia quishacarijia, nojuacuajaari nia saquiriojoquiaari maninia na miiniuria niajaniya. Naaratej, saaja maninia nia miiriquia nia paracajuhuaaj. ¹⁰ Tariucuaaanu Pueyaso Rupaa-jiniacuajaari naa naajiotasano quiyajuhuaaj:

“Cante pueyaracaanu mijiria rishiniuucua jiaatiaani, shuquiriaatia na quiniuriajuhuaj, nojuaja cuaara na niti cojuara maja sesa na pocuanura. Cuaara na rupaa cojuarajuhua maja na cuaracashijionura. ¹¹ Naajuhuaaj, cuaara sesa na miijionu tarinitiaara saaja maninia na miiniuria. Nojuaja cuaara pueya jiyanoootiooteja quiiria. Cuaara naa maninia na miiniu tarinitiaaquiiria. ¹² Cante naa maninia miijiani, Pueyasoori na cojuaja, na secojosano tojjijajaariuhuaaj. Saniniuujia, Pueyasoori sesa miijiaca samiritiaja saaja”.

¹³ ¿Cantucua sesa nia miiriquiani niaa jaara saaja maninia miijiaca quiriquia? ¹⁴ Naajaa, niaa jaara saaja maninia nia miiniuucua miitiasaare, nia timiquiore. Pueyasocujaari jiyanoohua maninia miiniutianiya niajaniya saniniuujia. Mijiria quiniaa miananajosacari niajaniya, majaari puerenu, majaari nioojia nia niquijiotenu. ¹⁵ Saniniuujia, nioojiajinia Cristo nia jiyatere nia Jiyaniijiajanaara, seetanujuanaa na tojjijaca nia quiniuria. Juhucarijia nia niishiriojoriquia, jeenucuasano nia quiniuria, maninia nia pohuatanura Jesucristojiniji. Naacuažitij, niaari jeenucuasano quiniutianiya, maninia nia riucuanura tamasa jaara nequesotare niajaniya, casaara juhuajaniya naquiya miiniu rejeretajacate niajaniyani. ¹⁶ Jacaria nia pohuatare nia paniniutia nojori,

maja nia rerequetenuta nojori. Pueyaracaanu maninia miijiacaca nia quiriquia, sesa nia miiniu mariqui nioojia macuhujareeri. Naacujitij, pueyaracaanu shitimia maninia miijiacaca nia quishacari Jesucristoocua tiuujiacaca nia quiniuucua, niaacuara rimiaaquejacaari tama sesa na pocuanuucujaja caririquniutianiya.

¹⁷ Nio nia niishiri pueyanaa. Pueyaso jaara paniri naquiya nia miishaanura, socua maninia cutaraari naquiya nia miishaanura maninia nia miiniuucua, maja sesa nia miiniuucua. ¹⁸ Cristojuanaacuajaari mosaquiaari sesa miijiacaca pa quiniuucua. Majaari socua na pacutenu quiniutianiya csonu. Nojuajaari tojetaarucujanaa maninia mijia quiquiaari. Naacujitij, nojuajaari sesa miijiacacuara cusoquiaari, Pueyasocua na jiyatanura niajaniya. Pueyano cuaqueyaraca na quishacari, mosaquiaariiri. Pueyaracaanu rishijia sohuanuraca na quiniuucua, nojuajaari samitiaquiaariuhua. ¹⁹ Naa sohuanu na quiniuucuatej, nojuajaari macunucua quiquiojinia rosequiaari tii tama nojuajinijijaaja na pohuatanura macunucua sohuanu. Cuno pojoriiri nujuatejojuajinia mishiquionucua quiya. ²⁰ Cuno pojoriiri, noo pojoricuaja tariucuaanu supuetana Noé tojiyashijiacaca quiquiaaritij, pueyaracaanu Noé poojotasacari Pueyaso rupaa nojori niquiara juucua. Pueyaracaanu Noé tarishishacari na puereetuuca buque na shipinishacari, pajaacuaji na tacajara, Pueyasoori jiyacari cuno sesa miijiacaca sashiquiaari juucua. Pueyaracaanu sashiquiaariiri nojori tacatonuhwara noojiaca nocua juucua. Puetunu mijiria quijiaca pueyajinijinojuanaani, saaja ocho pueyari cureequiaari, buquejiniacuma nojori tiuquitianuucua. Puetunu pueya shushiniuushacari pajaajinia, cuno pajaari saniniuujia Pueyasocua tiuujiacaca cuataniquiaari na buquejinia. ²¹ Quiarijia pajaniyara saniniuujia, cuno pajaari miriqui pa niishitiojiya taa Pueyaso miiquiaa pajaniyani, paa jaara moojinia tiuquinishaareni Jesuucua pa tiuushacari. Naatej, taa Noé juhuajaniya cuataquiaari pajaajiniacuaani, Pueyasocua tiuujia na quiniuucua, pueraari naajuhuj. Naacujitij, paa jaara moojinia tiuquinishaareni, paari pa timiniutia moojiniji tohuataquiuhuani, poojia cajitishano seetanjuanaa pa niishishacari paari tari jiyanooshanoni, pocuaji Tacuna Jesucristo samiitianuucua macujiniji. Majaari pa tiuquinishaanu quiquiaa pa seca pa jatanura. ²² Jesucristo samiitiasacariuhua, nojuajaari jiyocuacaanu tacaquiaariuhua. Quiarijia cajiya Pueyaso miaquetajaraari. Jiyaniijiajanaa na quiniuucua, nojuajaari cumaacaraca, tama nojuajaaja na tojitiniuria Pueyaso seya, puetunu cumaacaraca

quijiacajanaa, samaruhuanio.

4

Maninia miijiaca pa quiriquia, Pueyaso cumaaca pa jitianuucua

¹ Naacuajiti pueyanaa, naatej, taa Cristo rejeretaquiaari naquiya miiniu mijiria na quishacaricaaani, naa rejeretajaca nia quiriquiajuhuaj, niaa jaara naquiya miishaariquia. Naquiya pa miishacari, cunoori sesa pa miiniu pa tarinitijia.

² Naacuajitij, paa jaara naa naquiya miishaariquiani, na nuhuaji paari saaja Pueyasora quiniu paniyani. Paari saaja na panishano miiniu paniyani, maja tama pa cuaqueya panishanojuaaja pa miiniuria socua. ³ Tarijia, Pueyaso tojiyashijiaca nia quishacarijia pueyanaa, niaari jiyanohua sesa miijiaca quiquiaari, taa Pueyaso niishiyashijiaca miiquiaacuaani. Niaari saaja nia cuaqueya miiniu panishanoocua shiiniuquijia quiquiaari. Niaari queraatia tamaatia sesa miiniuucua jiaatiajaca quiquiaari. Niaari saaja mashaasequenujuaca quiquiaari. Nia queranacunuusaqui, niaari tojetaarucujanaa sacuaraatia miijiaca quiquiaari. Niaari rerejojuajuhua puera nia ratunura, jiyanohua nia mashaasequenuunurajuhuj. Naajuhuj, niaari juaashiquiata shipinishano nia pueyasora nia jiyatesano shuquiritiajaca quiquiaari. Niaari na tacoji sacuaraatia pueresano casaa miiquiaarijuhuaj.

⁴ Quiarijia saniniuujia, Pueyaso niishiyashijiaca nia cojiyaquishacari naa sacuaraatia nia miijionuratej, nojoriiri jiuujiatequiaa nojori shaacasacari nijaniya. Nojoriiri cunora nia sesacaquiaa. ⁵ Cuno pojori cuara niishiiria nio, Pueyasoori nojori nequesoreenutaniya na nequesoreesacari puetunu pueyajanaa, saminiucua, macunucuanio. Jiyacaritij, nojori cuara tama nojoriicujaji riucuaarajaaja. ⁶ Cunora, pa Jiyaniijia Jesucristoori macunucua niqiuara pohuataquiaari Pueyaso rupaa tama nojuajiniijiaaja, nocua tiuujiacara na jiyatesocoriquiano. Nocua tiuujiaacari pueyaracaanu rishijiacara quiriquiano, taa Pueyasocuaani. Sesa miijiaca mijiria nojori quiniuucua, nojoriiri pajaajinia cusonuquiaari taa puetunu pueyajanaa shaajecoquiaacuaani. Naajaa, Jesuucua tiuujiaa cutaraari samiitianiijosaanutaniuhua.

⁷ Nio pa quishacarini, paari socua quenaacoya jiya puequesacariicuarani. Naaratej, niishiriojuuca nia quiriquia. Maninia nia jitiariquia tama nia cuaqueyajaaja, saaja Pueyaso secojuuca nia quiniuria pueyaracaanu.

⁸ Jiyanohua panitiojuuca nia quiriquiajuhuaj. Cunoori

socua panishano cutara. Paa jaara panijiaca quiriquiani, paari queraatia sesa miishano jiyanoojia quiniutianiyani. Naaratej, seetanujuanaa panijiaca nia quiriquia. ⁹ Niarta Pueyaso pueya jiitiaaquishacari na maquejara, na miaquesocoriquianojuhuaj, nojoriicua taraajeja nia quiriquia. Nojori nia tiuquinitiariquia nia tiajinia nia timiniutia. Majaari nojori nia ririjiotanu nia taajenuta. ¹⁰ Pueyasocuaajaari na Sohuanu niqutioquiaa puetunu na pueyajanaa, tamaatia maninia casaa miiniu niishijiaca pa quiniuria. Naaratej, puetunu niajanijajanaa cuaara maninia miiria niarta Pueyaso pueya pueyaracaanu, taa Pueyaso cumaquiquiaa niajaniya maninia nia miiniuriacuajani. Maninia nia poonijioteriquia Pueyaso cumaaca, nojuaja niqutiojosano niajanianiyani. ¹¹ Naacuajitij, nia pocuasacari, Pueyasocua nia tiuuri nojuaja cumaquiniuria niajanijanaa na panishano nia sequenura. Naajuhuj, niaa jaara casaa miiriquia niarta Pueyaso pueya nia naacunura, nojori nia miiriquia maninia Pueyaso niqutiosano cumaacata. Naa nia miiriquiatej, Pueyaso timitiasaanura socua, Jesucristoocua tiuujiaca nia quiniuucua. Nojuaja cuaara maniniuhaqueetasaaria pueyaracaanu, tojetaarucujanaa maninia miijia na quiniuucua, puetunu cumaacaracajanaa na quiniuucujuhuj. Cuaara naa quiiriatej.

Juhujaniya pa rejeretare naquiya miiniu, Pueyaso pueya pa quiniuucua

¹² Cua panishano cuarta Pueyaso pueyanaa, majaari nia shiriiquiniu niaa jaara jiyanojua naquiya miishaariquia. Majaari nia jiyaniujuhuaj saa niajanijaja naa miishiya. ¹³ Naa jaara naa naquiya miishaariquiatej, nia timiri. Jesucristoocua tiuujiaca nia quiniuucua, niaacuajaari naa miishiya taa Jesucristo miishaaquiiaari naquiyacuaani. Naa naquiya miiniu nia rejeretasacaritij, niaari jiyanojua timitianutaniya Jesucristo, shacantuuca na cumaacata na tiuquishacariuhua, na jataniniuria niajanijanaa juhua nojuaja nia quiniurijuhuj. ¹⁴ Naajuhuj, niaa jaara sesacasaariquia Jesucristo tojjiaca nia quiniuucua, shuquiriaatia nia quiriquia. Pueyari naa nia sesacaquiaa, shitimia maninia miijia nia quishacari, Pueyaso Sohuanuraca nia quiniuucua. ¹⁵ Naa jaara naquiya miishaariquia pueyanaa, cuno cuaara quiiria maninia miijia nia quiniuucua, maja sesa miijia nia quiniuucua. Naa cuaara caririquiria cutara niaa jaara mojua quiri, nohuasejojua, sesa miijia, timia niishiniu panijia tamasa casa. ¹⁶ Saniniuujia, maja cutaraari nia caririquiniu

niaa jaara naquiya miishaariquia Jesuucua tiuujiaa nia quiniucua. Saaja Pueyaso nia shuquiritariquia cunora.

¹⁷ Quiarijiani, Pueyasoori tama na pueyajaaja saniitioquia na tojitiaaquishacari na rupaa. Paa jaara naa saniitiosaaquiaacuaani, ¿taariquitijia noo pojori miishaanutaniya socuatejaj, Jesucristojiniji pohuatasano ruuretajacatej? ¹⁸ Naacujitij, Pueyaso jiyanooshano pueya jaara queraatia naquiya miiquiaacuaa, ¿taariquitijia Pueyaso tojiyashijiaa miishaanutaniyatej? ¡Juhuej! Puereeta miishaanutaniyari Pueyaso ruuretajaca, sesa miijiacanio. Nojoriiri jiyanohua socua naquiya miishaanutaniya, Pueyaso saniitiosacari nojori. ¹⁹ Naacujitij, Pueyaso jaara naa naquiya nia miishaanura paniya, juhuajaniya nia rejeretariquia naquiya nia miiniu. Majaari nia tarinitianu maninia nia miiniu, naquiya nia miishacari. Saaja Pueyasocua nia tiuuriquia nioojia na cojuanura maninia. Nojuacuajaari na Shipinina. Nojuacuajaari saa maniniaja. Naquiya pa miitiquiaacuajaari socua na jeenucuanura pajaniya.

5

Socua rootasano Pueyaso pueyara

¹ Quiarijia saniniuujia cuarta Pueyaso pueyanaa, janiyari nia jitianaa nacasuyani. Niajaniya, Pueyaso pueya maapue jitiananaa, cua tojitiare. Janiyacuajaari Pueyaso pueya maanu jitianajuhuaaj, juhua niajanijajuhuaaj. Janiyacuajaari pa Jiyaniijajanaa niquiniani, nojuaja jaara naquiya miijioquiaari mijiria na quishacarijia canaata. Naajuhuaaj, nojuajiniji cua pohuatanuucua, janiyari naquiya miishaaquiiaa jaaniuhuaaj. Naacujitij, pa Jiyaniijia muetasacariuhua na shacantuuca cumaacajinia, janiyari jaarajaaja niaata cojiritiasaanutaniya jatanishaanuni, juhua nojuaja pa quiniuria mariyata. ² Cunora Pueyaso pueya jitiananaa, shamaatia nia cojuare Pueyaso pueyaniyojua, teyano jitianara Pueyaso jiyatequiaari niajanijacuajani. Maninia nia cojuariquia nojori, seetanujuanaa nojori nia paniniutia, taa Pueyaso paniya nojori nia cojuanuracuajani. Majaari nojori nia jitianu nia taajenuta saaja nojori jitianaa nia quiniucua. Naajuhuaaj, majaari nojori jitianaa nia quiniu saaja cumaneecaacua nia jiaatianuta. Saniniuujia, seetanujuanaa nojori nia paniniutia nia jiitariquia niarta Pueyaso pueya. ³ Majaari niarta Pueyaso pueya nia jitianu juhua tama nia seyajaaja. Niajaniya saniya cuara maninia miijiaa quiiria nojori niquiara, nojori niishiniuria naa quiijacate Pueyaso pueya, naa nojori miiniurajuhuaaj. ⁴ Naacujitij, pa Jitianajanaa tiuquishacariuhua jiyocuaanuuj, niaari shacantuuca

quijiacara jatanishaanutaniya, pueyaracaanu rishijiaca nia quiniuriajuhuaj.

⁵ Niajaniya mashiquioriniaa, Pueyaso pueya jitianaa tojjiaca nia quiriquiajuhuaj. Puetunu niajanijajanaa Pueyaso pueyanaa, tama nia cuaqueyajaaja nia jiyatere niarta Pueyaso pueyano cumaquiniaa nia quiniuria jaarajaaja. Tariucuacaanu Pueyaso Rupaajiniacuajaari naa naajiotasano quiya:

“Pueyasoori na juaaniutia niqijia niarta pueya shocoteja. Saniniuujia, niarta pueyano shocoteyashijia naacujua cutaraari”.

⁶ Naarate pueyanaa, puetunu niarta Pueyaso pueyajanaa nia jiyateriquia tojishano pueya nojori quiniuria niaara. Majaari quenaaja nojori nia rerequetenu. Naa juhuajaniya niarta Pueyaso pueya tojijiaca nia quishacaritij, pa Jiyaniijia Jesucristo jaara tiuquiriohua, Pueyasoori na cumacata nia jiyatenutaniya jiyaniijianucua nia quiniuriajuhuaj.

⁷ Pueyanaa, puetunu nia tacaaniuujianaa nia niquitiore Pueyaso. Nojuacuajaari niaacua taraajequiaa.

⁸ Pueyanaa, nia Paraca sequeeri nia shanacujuquiaa, juhua sare, taa sare shanacujiya na sanura casaacuaani. Cunora, soquejaca nia quiriquia pueyaracaanu. Juhua sutejaca nia quiriquia, pueyaracaanu nia secojonura, Sesaaca mariqui juhua sare nia sareeri. ⁹ Cumaatia nia nujuatariquia nojuaja, seetanujuanaa Pueyasooocua tiuujia nia quishacari. Majaari Pueyaso Rupaacuaji nia taacanuunu. Naa nia miriquiatej, nia niishishacari niarta Pueyaso pueyari puetunu tiqiyocuajanaa naa naquiya miiquioyajuahuaj. ¹⁰ Naa jaara rupaquijia naquiya miishaariquia mijiria, Pueyasoori na nuhuaji nia jataniniutianiya tojetaarucuajanaa maninia pueya nia quiniuria. Tojetaarucuajanaa pa jiyanoojia na quiniucua, nojuacuajaari nia saquiriojoquiaari nata nia quiniuria shacantuuca na cumaacajinia, Neyanu Jesuucua nia tiuuniucua. Naaratej, nojuacuajaari nia jiyatenutaniya seetanujuanaa nioojia niqijioteyashijiaca nia quiniuria, socua jiyanohua na cumaaca jitiijaca nia quiniuria, maja quenaaja Sesaaca pootionura nijaniya. ¹¹ ¡Jiyanohua maninaari pa Que Pueyaso! Nojuacuajaari puetunu cumaacaracajanaa pueyaracaanura. ¡Cuaara naa quiriitej!

Pedro sequesano quera na naajio na tucuatascari

¹² Cuarta Pueyaso pueyanaa, janiyari parta Pueyaso pueyano Silvano naajioteree nio posunee naajioneeni. Nojuajaari shamaatia poonijiojua pa Jiyaniijia. Janiyari niaacuara naajiotereeni, cua nacasunura niajaniya, cua shiniujiuniuria niajanijajuahuaj maja nia pishiniuria

Pueyasoo cuaji. Seetanujuanaa jiyanoojia na quiniuucua, naarate nojuajaari nia jiiitaa maninia, naquiya na miitishacari niajanijahuaj. Cunora, nocua nia tiuuriquia, pueyaracaanu na cumaquiniuria niajaninya.

¹³ Babilonia tiacajinia quiniaa parta Pueyaso pueyari nia saruhuataa. Nojoriiri Pueyaso saquiriojosano na pueyaranojuhuaj, taa na saquiriojosanotucuaa niajaniyani. Marcoori nia saruhuataajuhuaaj. Nojuajaari juhua quiyanu. ¹⁴ Nia saruhuatasacari niarta Pueyaso pueya, seetanujuanaa nia paniniutia nia nujuutoore.

Pueyaso cuaara nioojia cajitiiria, canapuate Jesucristoocua tiuujiacacuajani.

TANEE PEDRO NAAJIONEE

Pedro saruhuatasacari narta Pueyaso pueya

¹ Janiyari Simón Pedroni, Jesucristo seru, na jiyaramiquishanojuhuaj. Janiyari cunora niaacuara naajiyani. Pa Que Pueyasoori nia tiutuquiaari pocuaji Tacuna Jesucristoocua, taa nocua canaa tiuquiaaricuaani. Nocua nia tiuuniuni, cunoori jiyanohua panishano. Naacujitij, Pueyasoori nia jiyanoquiaa juhua sesa miyashijiaca nia quiniuria na niqiuara, taa canaa quiyacuaani. ² Seetanujuanaa maatia nia niishitiriquia Pueyasoni, pa Jiyaniijia Jesunio. Naacujitij, niaari socua jiyanohua cumaquishaanutaniya. Nioojiaari cajitishaanutaniyajuhua, juhujaniya quijiaca nia quiniuria.

Pueyaso pueya cuaara nio niishitiojosano miijiaca quiiria

³ Jesucristojuanaacuajaari pa sequequiaari na pueya pa quiniuria. Paari na masuunu tojiquiaarini, pa niishishacari nojuajaari seetanujuanaa Pueyaso Niyanu, tojetaarucujanaa maninia miijia. Seetanujuanaa maatia pa niishiniuucua nojuaja, paari Pueyaso cumaacaraca sesa miyashijiaca pa quiniuriani, seetanujuanaa na tojijiaca pa quiniuriajuhuaj. ⁴ Naa jiyanohua maninia miijia Jesucristo quiniuucuatej, nojuajaari pa niishitiquiaari casaa na miiniu paniya pajaniyarani. Pajaniyarano na sequesanoori seetanujuanaa maninia, tojishocoriquiano. Paa jaara na sequesano tojtiajaca quiri seetanujuanaani, paari jatanishaanutaniyani juhua nojuaja pa quiniuriajuhuaj. Naacujitij, paari quiariniora jatanishaaquiaari na cumaacatani maja pa sesenura. Paa jaara Pueyaso tojiyashijiaca quiriquiani, paa maara tojetaarucujanaa seseriquiani, taa mijiria quiniaa pueya sesequiaacuaani tama nojori panishano miijiacajaaja nojori quiniuucua. ⁵ Cunora, tamajaaja nia saniniujiuriquia tojetaarucujanaa maninia quijiaca nia quiniuria, juhua Pueyaso. Niaacuajaari tari nocua tiuuijaca. Naa nocua tiuuijaca nia quiniuucuatej, jiyanohua nia saniniujiuri maninia miijiacua nia quiniuria pueyaracaanu. Naa maninia miijiacua nia quishacaritij, jiyanohua nia saniniujiuri socua niishijiaca nia quiniuria, sesa miiniu nia ruuretanura. ⁶ Naa niishijiaca nia quishacaritij, jiyanohua nia saniniujiuriquia tama nia cuaqueya miiniu panishanojuajaaja rejetejaca nia quiniuria, maja nia miiniuria sacuaraatia casaa nia panishano. Naa tama nia cuaqueyajaaja rejetejaca nia quishacaritij, jiyanohua nia saniniujiuriquia juhujaniya sashijiaca nia

quiniuriajuhuaj. Naa juhuajaniya sashijiaca nia quishacaritij, jiyanoehua nia saniniujiuriquia seetanujuanaa Pueyaso panijiaca nia quiniuria. ⁷ Naa Pueyaso panijiaca nia quishacaritij, jiyanoehua nia saniniujiuriquia niarta Pueyaso pueya panijiaca nia quiniuria socua. Naa niarta Pueyaso pueya panijiaca nia quishacaritij, jiyanoehua nia saniniujiuriquia tojetaarucujanaa panijiaca nia quiniuria.

⁸ Naa jaara puetunu nio niishitiojosanojuanaa tojijiaca quiriquia seetanujuanaa, majaari najuhuana pa Jiyaniijia Jesucristo niishijiaca nia quiniu quiniutianiya. Naajuhua, majaari najuhuana quijiaca nia quiniu quiniutianiya. ⁹ Nio rootasano tojiyashijiaca saniniuujia, nojoriiri juhua cariy-ojuaru, niishiyashijiaca. Naa nojori quiniuucuatej, nojori-iri niyajetaquiaa nojoricuajaari juhua jeequejosaaquiaari sesa nojori miishanojiniji. ¹⁰ Cuarta Pueyaso pueyanaa, Pueyasocujajaari nia sequequiaari na pueya nia quiniuria. Nojuajaari nia saquiriojoquiaari. Cunora, puetunu nio cua rootasanojuanaa tojijiaca nia quiriquia seetanujuanaa. Naacujitij, niocua niishiri niaari seetanujuanaa Pueyaso pueya. Majaari quenaaja nocuaji nia rupertenu quiniu-tianiya. ¹¹ Naa maninia quijiaca nia quiniuucuatej, niaari shuquiriaatia tiuquinitiasaanutaniya jiyocuaaanu pocuaji Tacuna Jesucristoocua, pueyaracaanu nata nia quiniuria, pueyaracaanu Jiyaniijiajanaa na quiniuucua.

¹² Niaacujajaari maatia niishitiojosaaquiaari Pueyaso rupaa Jesucristojiniji. Niaari cuno seetanujuanaa rupaacua tiuujia. Naajaa, janiyari pueyaracaanu nia niishitiniutianiyani, maninia nia racatanura nia numaama. ¹³ Mijiria cua rishishacarijia, Jesucristo jiyaramiquishano cua quiniuucua, maniniacujajaari pueyaracaanu cua shiniujiuniuria niajaniya, maja tariucua nia niishishano Jesucristo rupaa-jiniji nia niyajetanura. ¹⁴ Pa Jiyaniijia Jesucristoori tari cua niishitiriucuaa janiyari quera mosaanutaniyani. ¹⁵ Cunora, janiyari nio naajiyani niaarani. Naacujitij, janiya jaara mosaareni, niaari nio cua naajionee jitianutaniya cua nuhuaji nia serojosocoriquiano. Maniniacujajaari nia jitianura cua naajionee maja nia niyajetanura puetunujuanaa cua niishitiojosano niajaniya.

Shacantuuca Jesucristo cumaaca niquiniaajiniji pohuatasano

¹⁶ Canaa niishitiojosano niajaniya pa Jiyaniijiajinijini, cunoori maja canaa tojishano tamonujiniji. Naajuhua, cunoori maja tama niishijiacajaaja pohuatasano na sapojonura pueya. Jesucristo cumaacajiniji canaa pohuatasani, naajuhua, taa na tiuquiniutianiuhuani,

puetunu cunojuanaari maja tama canaa niishishanojuaaja. Canaajanaacuaajaari canaa namijiatajanaa na niqiquiaarini nojuaja jaara shacantuucara jataquiaari canaa niquiara. ¹⁷ Jiyacaritij, na Que Pueyasoori jiyanojuaa na timitiariquiaa canaa niquiara. Canaari na tojiquiaarini naa na sequesacari Neyanujiniitij: “Nojuajaari Quiyanuniyojua. Jiyanojuaa cua timitiasano”. ¹⁸ Canaa quishacari pa Jiyaniijata shacantuucara na jatasqui tuhuananuucua, canaajanaari naa Pueyaso tojiquiaari jiyocuacaanuji pocuaanoni.

¹⁹ Canaa tojiniuucua Pueyaso sequesanojuanaa Neyanujiniji, canaari cunora seetanujuanaa niishiyani, tariucuacaanu nojuajiniji pueyara Pueyaso sequesano caminiujiuniaa sequesanoori seetanujuanaajuhuj. Naaratej, maniacuaajaari nia tojiniuria nojori naajiotasano Pueyaso Jiyarosocoriquiano Pueyanojiniji. Nojori naajiotasanoni, cunoori poojiajina cuhuataquiaa, naatej, taa samaritiu cuhuataa ninishiquicuaani, cuuara juhuaquemajaatijia. Pananuuri saniniuujia muetanutaniyacujua, seetanujuanaa na cuhuatanura pajaniya. Naa quiniutianiyajaariuhua pa Jiyaniijia muetasacariuhua pocua. ²⁰ Maninia nia niishiri nio, pueyanaa. Puetunu tariucuacaanu Pueyaso sequesano caminiujiuniaa naajiotasanojuanaari maja na naata niishishaanu maatia tama pa niishitiajataaja. ²¹ Tariucuacaanu Pueyaso sequesano caminiujiuniaa naajionuutasanoni, cunoori maja tama nojori niishishanojuaaja. Pueyaso Sohuanujuanaacuaajaari nojori niishitiquiaari nojori pohuatanura Pueyaso sequenu panishano pueyara.

2

Sacuaraatia miijica niishitiojonaajiniji pohuatasano

¹ Tariucuacaanu, noojiaqueya Israel pueyajinijinioori tama na cuaqueyajaaja jiyatequiaari juhua Pueyaso sequenu panishano caminiujiuniaa nojori quiniuria. Naacuajitij, nojoriiri narta Israel pueya sapojonuquiaari. Naajuhua cua panishano pueyanaa, sapojonujuacaari nia tajinia supuenutaniyajuhuj. Nojori niishitiojosacari sacuaraatia tama nojori niishishanojuaaja, nojoriiri nia sapojonutaniya. Nojori niishitiojosanoori Pueyaso pueya sesojua cutara. Naacuajitij, nojoriiri tama nojori Camarnujuaaja tamacanutaniya, cante nojoriicuaara mosaaquiaaricuaajani, na pueya nojori quiniuria juucua. Cunora, nojoriiri canashiyaquiji niiquiji puetunu shaajasaanutaniyajanaa saniitiosocoriquiano. ² Queraatia pueyari sacuaraatia miijica quiniutianiyajuhuj, sacuaraatia cuno pojori

niishitiojosano tojijiaa nojori quiniuucua. Naa nojori miiniuucuatej, Pueyaso niishiyashijiaaari seetanu rupaaajanaa sesacanutaniya. ³ Cuno sacuaraatia niishitiojonuujuaaari jyanohua casamiriaca quiniuucua jiaatiajaca quiniutianiya. Naaratej, nojoriiri najuhuana shanohua nojori niishitiojosanota nia sapojonutaniya, nareja nia niquitiojonura nojori nia cumaneeca, nia casaminio. Naajaa, naa sacuaraatia miijiaa nojori quiniuucuatej, nojoriiri tariucuacaanujiniji Pueyaso riuriosanocuaaja na saniitiosocoriquiano. Majaari Pueyaso jyanooniu quiniutianiya nojori.

⁴ Naajuhuaaj, Pueyaso seya jaara sesa miiquiaari, majaari Pueyaso jyanooniu quiquiaari nojori. Pueyasoori puereeta nojori quejooquiaari ninishiqui. Tii nujuatejosano quiyari, nojori saniitiosaanu juuca cuaara quirijiaatijia. ⁵ Naajuhuaaj, Pueyasoori Noé quishacari sesa miijiaa pueya jyanoyaquiquiaarijuhuaj. Cuno sesa miijiaa pajaashitiani quiaariiri nojori cusuunura puetunujuaanaa. Saaja Noé curoquiaariiri Pueyaso tojijia na quiniuucua, socua siete pueyano. Noeri pueyaracaanu cuno sesa miijiaa pueya numootequiaari juucua, nojori tacatonura noojia Pueyasocua, sesa nojori miiniujiniji. ⁶ Naajuhuaaj, Sodoma tiacajinia quiniaa pueya quiniuucua jyanohua sesa miijiaa, Pueyasoori cuno tiaca catijiatquiaari tojetaarucuaajanaa juacara. Naa catijiatquiaari Gomorra tiaca jaariuhuaaj. Cuno caapiqui tiaca naa catijiatasaaquiaarini, cunoori quiquiaari cuno nuhuaji quiriquiano pueya na numootenura maja naa sesa miijiaa nojori quiniuriajuhuaj, nojori mariqui saniitiosaarejaariuhuaaj. ⁷ Sodoma tiaca Pueyaso catijiatasacari, saaja Lot curoquiaariiri maninia pueyano na quiniuucua. Sodoma tiacajinia quijia Lot quiniuucua, nojuajaari jyanohua taajequiaari tari, cuno pueya miijionuucua sacuaraatia casaa, tariucua nojori jiiitishano casaacua.

⁸ Puetunu juucajanaa, Lotri narta Sodoma tiacajinia quiniaa niquiquiaari cararaatia miitioojiyano. Sacuaraatia nojori pocoojonu tojiquiaarijaariuhuaaj. Maninia pueyano Lot quiniuucua, nojuajaari jyanohua naquiya miiquiaari noojiajinia. Cunora, quera Pueyaso saniitiosacari cuno pojori, Pueyasoori Lot mashiquiquiaari cuno pueya tajiniji. ⁹ Naacuajiti pueyanaa, paari niishiyani, Pueyasoori na tojtiajaca pueya cojuaja, maja nojori miitishaanura sesa. Saniniuujia, Pueyasoori sesa miijiaa racatajajaara nujuatejosano, nojori saniitiojosaanu juucara. ¹⁰ Pueyasoori socua jyanohua nio pojori saniitioriquiano: na camishoo maajipohua numuetucunuucua jiaatiajacani, maajishuriu

numuetucunuujuacajuhua, noo pojoriijuhua, pa Jiyaniijia rootasano ruuretajaca saajatej. Naa sacuaraatia miijiacani, nojoriiri tojetaarucujanaa tojiyashijiaca. Majaari na pueretunu quiquiaa sacuaraatia tama nojori panishanojuaaja nojori miiniuria. Naajuhua, nojoriiri maja na pueretunu quiquiaa jiyocuacaanu cumaacaraca quijiaca na sesacanura. ¹¹ Saniniuujia, Pueyaso seya cutaraari jiyanojua socua cumaacaraca cuno sesa miijiaca pueyajiniji. Naajaa, majaari nojori riutioconu quiquiaa Pueyaso, cuno jiyocuacaanu cumaacaraca quijiaca nojori sesacanura.

¹² Cuno pojori, saaja sacuaraatia miiniuria niishitiojon-aani, nojoriiri niishiyashijiaca. Nojoriiri juhua nacujini-aaco quijiaca casami, teyanote saaja puecoosocoriquiano roosaaquiaacuajani. Tojetaarucujanaa niishiyashijiaca nojori quiniucua, nojoriiri maninia quijiaca pa quiniuria pa Jiyaniijia rootasano sesacquiaa. Cunora, nojoriiri juhua puecoosocoriquiano nacujiniaacoji casaa. ¹³ Naacuajitij, nojoriiri naquiya miishocoriquianojuhua, naquiya nojori mitianuucua narta pueya. Nojoriiri jiyanojuaa timiquiaa nojori jaara naata quiriquia sesa miiniu juucajuhua taa nojori miiquiaa niucuacuaani. Cuno pojoriiri sacuaraatia miijiacaa. Majaari na niishiniu caririquiniu. Nojori sapojonucua nijaniya, nojoriiri jaarajaaja nia cojiquiaa nia queranacunuusaqui. Naa nojori quishacari nia tajiniatej, nojoriiri jiyanojuaa timiquiaa tariucua nojori jiiitishano sesa casaacua nojori niishiriojosacari. ¹⁴ Naacuajitij, nojoriiri maja nareja na niquniu quiquiaa maajipohua. Puetunu maajipohujanaa niqutiucua nocua na jiaatianutaari. Nojoriiri maja na taajenu sesa na miiniuria pueyaracaanu. Canapute jatarinitiaja pa Jiyaniijia tojijiani, cuno pojoriiri nojori shiniujuquiaa na sapojonuta, sesa nojori miiniurijuhua. Naajuhua, cuno pojoriiri tariucua jiiitinio puetunu nojori panishanojuaanaa nojori jiiitianura, jaara na naata quiriquia. Nojoriiri tariucua Pueyaso jiyatesano na saniitiosocoriquiano. ¹⁵ Pueyaso rootasano tojiyashijiaca nojori quiniucua, nojoriiri juhua tashuquioono Pueyasocua neteja nuujiniji. Nojoriiri casamiriaca quiniucua jiaatiajaca juhua supuetana Beor niyanu Balaam. Jiyacaritij, Moab jiya jiyaniijiaari Israel pueya paraca quiquiaari. Naaratej, nojuajaari Balaam sequequiaari, nojuajaari jiyanojuaa queraatia casami na niqutionutaniya, nojuaja jaara nocua quiaare, Israel pueya na shimiojonura nera. ¹⁶ Casamiicua jiaatiaja na quiniucua, Balaamri na seru nijinia cajiquiaari. Quiaareeri. Nucuaco na quiasacari, Pueyasoori Balaam seru pocuatequiaari pueyano rupaa, Balaam na nacasunura. Naacuajitij, pocuaashijia

seruuri Balaam tarinitiquiaariuhua, juhua moseeca sesa na miiniu panishacari juucua.

¹⁷ Cuno pojori, pueya sapojoua na niishitiojosanotani, nojoriiri juhua cuari joojequetano. Naajuhuaaj, nojoriiri juhua niqutioocua paratu piyarojosano, tamoco quia-maa saajaari. Nojori niishitiojosanoori naajuhuaaj. Majaari na tojitiajaca na naacunu. Pueyasoori jiyanoehua ninishiqui quiquio tari jitiaa nojoriicuaaji, pueyaracaanu nojori quiquiorano. ¹⁸ Nojori pohuatasanoori najuhuaana shanohua tojishano. Saaja sapojonuuri. Naacuajitij, nojoriiri shusha Jesuucua tiuujiaa shiniujuquiaa nojori miiniuuhara tama nojori cuaqueya panishanojuaaja. Cuno Jesuucua tiuujia-cacuajaari shusha naataja sesa miijiaca pueyajinijinio jatanishaariquiaa juucua, Pueyaso tojjiaca nojori quiniuria juucua. ¹⁹ Sapojonuujuaa cuno niishitiojonuujuaa quiniucua, nojoriiri pueya niishitiojoquiaa sacuaraatia. Pueya niishitiojoquiaari, nojoriniaari seetanujuanaa juhuajaniya quijiaca quiniutianiya shuquiriaatia, nojori jaara nojori niishitiojosano tojjiaca quiriquia. ¿Nojori niishitiojosano pueyatucua taa juhuajaniya quijiaca quiriquiani, tama nojorijiaaja jaara sesa miiniuucua jiiitnio quiyajaa? Seetanujua-naari, pueyano jaara maja na naata quiriquia sesa casaa na miiijionu tarinitianu, cuno pueyanoori seetanujuanaa juhua tama sesa na miiijosano serujuaaja. Majaari na naata na tarinitianu. ²⁰ Pueyanaa, niaacuajaari niishiya, pueyano jaara pocuaji Tacunaacua tiuujiaa quiri, pa Jiyaniijia Jesucristoori na cumaquijia na tarinitianura sesa miiniuria na jiiitishano. Saniniuujia, cuno pueyano jaara sesa miijiaa quiriohua, nojuaja jaara sesa miiijionura jiiitiriohua socua, neraari socua puereeta quiniutianiya Pueyaso niishiyashijia pueyajiniji. ²¹ Naacuajiti pueyanaa, pueyano jaara seetanu rupaajanaa niishijia quiriquia, nojuajaari cocuaatia miya jaara na samiritiarohua sesa miijia na quiniuhara. Cuno pueyanora maara socua maninia quiquiaari maja na niishiniuria Jesucristo rupaa, teyanote na niqiuara pohuatasaaquiaaricuaajani, jatanishano pueyano na quiniuria. ²² Naa pa Jiyaniijia samiritiajaca pueya quiniuucuatej, sesa miijiaca nojori quiniuhara, nojoriiri nio tariucuaaanu Pueyaso Rupaaajinia naajiotasano tohuateequiaa. Naa miriqui sequeyari: “Sareeri coteenu macayoree. Na miaquerohuari”. Naajuhuaaj: “Cushiiri nanatosaaree juucua. Saaja na cooquiojina neeneecuasuuhariuhuaaj”.

3

Pa Jiyaniijia tiuquiniuhua cuaracashitishacari

¹ Cua panishano cuarta Pueyaso pueyanaa, nioori tanee cua naajionee niaacuara. Coteenu cua naajiojina, janiyari nia nacasuquiaarini socua cua shiniujiuniuria nijaniya maja nioojia niqijijotejaca nia quiniuria Pueyaso rootasanojiniji. Janiyari naa miya quiarjia nio cua naajiojinajuhuaj. ² Maninia nia numaama nia racatariquia tariucuacaanu pueyara Pueyaso sequesano caminiujiuniaa pohuatasano, pa Jiyaniijia jiyaramiquishano pueya pohuatasanonio. Cunocuaajaari pocuaji Tacuna rootasano pajaniyara.

³ Nio nia niishiriquia cutara pueyanaa. Quera nio jiya puequesacari, pa Jiyaniijia sojeacaari supuenutaniya. Nojoriiri tama na cuaqueya miiniu panishano miijiacajaaja. Na macatiniuria nijaniya, nojoriiri nia nequesotanutaniya: ⁴ “¿Taa nia Jiyaniijia miiquiaarini? Nojuacuajaari nia sequesquiaari: ‘Tacatenutaniuhanijia’. Majaari na tiuquiniu. Tariucuacaanu na niquiniaa pa supuetanaacuajaari tari puequecanu. Nio jiyajinia, puetunu casaajanaari quiyajaa, juhua shusha na shipinishaanujiniji. Majaari que-naaja tamonu casaa jatanu quiquiaa tamaatiara”. ⁵ Majaari naate pueyanaa. Cuno pojoriiri tariucuacaanu Pueyaso miishanojiniji niishiniu paniyashijica. Jiyanojia tariucuacaanu, Pueyasoori jiya cajiniocua shipiniquiaari saaja na pocuanuta. Na sequesacarijuhuaj, jiyari mohuacajiniji muetaquiaari, mohuaca jiuujajinia na quiniuria. ⁶ Na nuhuaji, Pueyasoori cuno mohuacaja pajaashitiquiaari puetunu mijiria quijiacajanaa na cusojuanura. ⁷ Quiarjia saniniuujia, jiya cajiniocua, nio jiyanio, Pueyasoori na cumaacata nojori jiiitajaara. Na nuhuaji cutara, puetunujuanaari catenutaniya, Pueyaso saniitiosacari puetunu na ruuretajaca pueyajanaa.

⁸ Naajuhuj cua panishano cuarta Pueyaso pueyanaa, pueyaracaanu nio nia niishiriquia. Pa Jiyaniijia, niquiriyatu juucaari juhua mil marijia. Naajuhuj, mil marijiaari juhua niquiriyatu juuca nera. ⁹ Majaari nia jiyaniniu maja pa Jiyaniijia tacatenu quiniutianiuhua. Majaari na tarishiniu najuhuanaj, taa tamasaca jiyaniyacujani. Maja. Maja cutaraari na paniniu pueya quejoosaanura mani quiquiojina. Naacuajitij, nojuacuajaari pueya sashiyajaara nojori tacatonura nojori jiuujia sesa nojori miiniuujiniji, Pueyaso pueya nojori quiniuria.

¹⁰ Naajaa, nojuacuajaari tiuquiniutianiuhua. Pueya jiyanishacari Jesucristo maja na tiuquiniu quiniutianiuhua, jiyacaritij, canashiyaquiji tiuquiniutianiuhuari. Juhua nohuasejojua tiuquiniutianiuhuari, sesa miijica na

saniitionura. Na nuhuaji, jiya cajiniocuaari shaajenutaniya. Jiyanoehua cojuatunenutaniyari na shaajesacari. Casaajiniji jiya shipinishaaquiaarini, cunoori puetunu catenutaniyajanaa. Naacuaajitij, jiyari puetunu mijiria na jiiitasano casaatajanaa shaajasaanutaniya jiyanoehua naseeca manijinia.

¹¹ Quiarijia pa niishishacari taa pa jiya shaajasaanutaniyani, cunora, seetanujuanaa Pueyaso panijiaca nia quiriquia saa maninia miijiaca nia quiniuria. ¹² Naa maninia miijiaca nia quiriquia, Pueyaso cu meta pa Jiyaniijia mueraterohua pocuajaatijia. Pa Jiyaniijia sequesano tojijiaca nia quiriquia, na tiuquiniu juuca nia secootenura. Jiyacaritij, Pueyasoori jiya cajiniocua setanutaniya. Naacuaajitij, casaata na shipiniquiaari puetunu casaajanaani, cunoori manijinia mohuaquenutaniya. ¹³ Naajaa, Pueyaso cutaraari seetanujuanaa sequequiaari pajaniya, nojuajaari quiarinio jiya cajiniocua shipininiutianiya pajaniyara, quiarinio jiyanio. Cunora, paari shuquiriaatia na sashiyani. Jiyacaritij, majaari quenaaja sesa miiniu niishishaanu quiniutianiya socua. Puetunu casaajanaari tojetaarucujanaa maninia quiniutianiya.

¹⁴ Naa nia niishishacari casaa pa sashiya nio pa quishacarini, cunora, jiyanoehua nia saniniujiuriquia saaja maninia miijiaca nia quiniuria. Tojetaarucujanaa jiyanooshano nia quiriquiajuhuaj, juhuajaniya nia quiniuria pa Jiyaniijia tacoji, na nequesoreesacari pajaniya. ¹⁵ Naacuaajiti pueyanaa, nio nia niishiriquia: pa Jiyaniijiaari tarishiyajaara pueyacia na taraajenuucua, nocua nojori tiuuniuria, Pueyaso jiyanooniuria nojori. Tarishiyajaarihuaj tojetaarucujanaa jeenucuasano pa quiniuria nera. Pa panishano parta Pueyaso pueyano Pabloori naa naajioquiaari niaacuarajuahuaj, Pueyaso niishitiaja na jiiitanuucua. ¹⁶ Nojuacuajaari puetunu na naajioneecajiniajanaa mariyata nio cua pohuatasano pohuataa. Noojiaqueya na pohuatasanoori seetanujuanaa jiyajeneta pueyara. Naacuaajitij, mosanucua, noojia niquijitejacionio, nojoriiri Pablo niishitiojosano jataniquiaa tamaatiara, nojori niishiyaquishacari cuno rootasano. Nojoriiri naa jataniquiaa puetunu Pueyaso Rupaajanaa. Naacuaajitij, nojoriiri tama na cuaqueyajaaja jiyatequiaa Pueyaso saniitiosocoriquiano nojori quiniuria.

¹⁷ Cunora cua panishano Pueyaso pueyanaa, niaacuajaari tari niishiya cuno Pueyaso rootasano tojiyashijiacajiniji. Nocuaji jiyanoehua nia cojuariquia tama nia cuaqueyajaaja maja nia sapojosaanura sesa miijiaca nia quiniuhua. Saaja

Pueyaso rupaacua tiuujia nia quiriquia cutara, taa nocua tiuujia nia quiyacujani, cuno pojori mariqui nioojia niqijiotereeri. ¹⁸ Naajuhuj, socua pocuaji Tacuna niishiniucua jiaatijaca nia quiriquia. Naa maninia nia niishiri pa Jiyaniijia Jesucristo, socua na panijia nia quiniuria, socua na cumaaca nia jitianurajuhuj. ¡Pa Jiyaniijaari jiyanojia maninia! ¡Nojuaja cuaara shuquiritiasaaria quiarjia, pueyaracaanujuhuj! Cuaara naa quiiriatej.

COTEENUJUANAAN JUAN NAAJIONEE

Pueya samiitianijia rupaa

¹ Jiya shipinishaacarijiyojua, Jesucristoori quijiajuhuanaajaj. Canaari niaara naajiyani, canaa niishitiniuria niajaniya nojuajiniji canaa tojishano, canaa niquishanojuhuaj. Pueyanaa, canaari seetanujuanaa na niquiquiaari canaa namijiatani, pueyaracaanu nata canaa quishacari mijiria. Canaari na cooquiaarijuhuaj canaa rupuesacari nojuaja.

Nojuajaari pueyaracaanu quijia cutara, pa Samiitianijiajaarihuaj, pueyaracaanu quijia pa quiniuriajuhuaj, na sequesanoocua pa tiuushacari.

² Cuno pueyaracaanu Quijiani, nojuajaari pueyanora jataquiaari. Canaari na niquiquiaarini. Naaratej, canaari pueya pohuataquiaarini, nojuajaari seetanujuanaa pa Samiitianijia. Canaari quiarijia cuno pueyaracaanu Rishijiajiniji nia pohuatajaanihuaj. Coteenu na Queta quijia jiyocuacaanuuri. Na nuhuaji, canacua muetaquiaariiri.

³ Canaari seetanujuanaa nia pohuataa canaa niquishanoni, canaa tojishanojuhuaj. Canaa pohuatasanoocua nia tiuushacari, pocua rupuetooreni, taa canaa quiya pa Que Pueyaso rupuesanocuaani, Neyanu Jesucristo rupuesanonio.

⁴ Niaa jaara nio naajiojinia canaa sequesano tojiri, niaari seetanujuanaa shuquiriaatia quijiaa quiniutianiya. Canaa jaara niaacuaji tojiriQuiani, canaari shuquiriniutianiyajaacuhaj.

Pueyaso pa cuhuatana

⁵ Jesucristocuaajaari nio rupaa canaa niishitioquiaari, canaa nia pohuataani. Nojuajaari naa canaa sequequiaari: "Pueyasoori Cuhuatana cutara. Nojuajaari maja ninishiqui quijia quenaaja".

⁶ Naacuajitij, paa jaara sequereni: "Pueyaso rupueja cutaranijia", na rupaa pa tojiyaquishacari, paari saaja najuhuaana sapojiyani. Paari juhua ninishiqui quijia quiyajaani.

⁷ Paa jaara seetanujuanaa cuhuashiqui quiyani, taa Pueyaso quiya cuhuashiquicuaani, paari juhua rupuetootesano quiya parta Pueyaso muerasuta cutarani. Naa juhua rupuetootesano pa quishacaritij, Neyanu Jesucristo nanacaari puetunu sesa pa miishanojuanaa tuujuquiaa poojiajiniji.

⁸ Paa jaara sequereni: "Janiya sesa miyashijiani", paari tama pa cuaqueyajaaja sapojiyani naa pa sequesacaritij. Majaari Pueyaso rupaa tojjia pa quiniu. ⁹ Paa jaara sesa pa miishano pohuatare saniniunijia, Pueyasoori jiyanoottio

cutara, na jiyanooniuria pajaniya, taa na sequequiaaricua-jani. Poojiajiniji jeequenutaniya puetunu sesa casaajanaari. ¹⁰ Paa jaara saniniuujia sequereni: “Maja sesa cua miiniu”, paari Pueyaso jiyateya juhua sapojojuarani. Paa jaara naa quirini, majaari seetanujuanaa na rupaa quiniu poojiajinia.

2

Jesucristo pocuaji tacuna

¹ Quiquiohuaniyojuanaa cua tojitiare. Nio naajiya ni-aaranijia, maja juhujaniya nia miiniuria sesa. Paa jaara sesa miirini, paacuajaari pa Que Pueyaso shuriucua jiitiaa pocuaji Tacunani, na Que Pueyaso na jiyanootiniuria pajaniya. Nojuajaari Jesucristo, pueyaracaanu maninia miijia cutarani. ² Sesa pa miishanoori jiyanooshaaquiaa Jesucristo cusonuucua pocuara. Majaari saaja jiyareta pa sesa miishano jiyanooshaanu quiquiaa, mariyata puetunu mijiria quiniaa sesa miishanojuanaari jiyanooshaaquiaajuhuaaj.

³ Paa jaara pa Jiyaniijia rootasano tojirini, paari niishiyani paa tari Pueyaso niishirii cutarani. ⁴ Jesu rootasano tojiyashijia jaara sequeriquia: “Pueyaso niishiyaniijia”, jiyano pueyanoori sapojojuua. Majaari na jitianu Pueyaso rupaa noojiajinia. ⁵ Cante saniniuujia pa Jiyaniijia sequesano tojijia cutarani, nojuajaari seetanujuanaa pa Que Pueyaso panijia cutara. Naacuajitij, paari niishiyani paari jatiqui quiya natani. ⁶ Cante sequejani: “Janiyari Pueyaso rupuejani”, nojuaja cuara quiiria juhua Jesucristo, taa na quiquiaari maniniacuaani, mijiria na quishacari.

Quiarinio Pueyaso rootasano pajaniyara

⁷ Cuarta Pueyaso muerasunaa, majaari quiarinio nio rootasano, janiya niaara na naajiyaani. Niocuajaari tariucua-caanu nia tojishano, majaari quiarinio. Niaacuajaari tari na tojiquiaari, Pueyaso rupaa jaara shushajanaa nia niquiara pohuatasaaquiaari. ⁸ Naajaa, nio rootasano quiarijia cua naajiosanoni, nioori seetanujuanaa juhua quiarinio niaara. Niaari tari na tojiquiaa, pueya panijiaca nia quishacari, taa Jesucristo quiquiaari pueya panijiacaani mijiria na quishacari. Na rootasano nia tojishacari, niniquiaari tari quiamacuaa nioojiajiniji. Pueyasoori nioojiajinia cuhuataa nia panitioosacari quiarijia.

⁹ Niaa jaara sequeriquia: “Pueyasoori coojia cuhuatarucuaani na rupaa cua niishishacari”, na nuhuaji majaari nia niquiniu paniniu niarta Pueyaso pueyano, niaari ninishiqui quiyajaa. ¹⁰ Cante narta Pueyaso pueya panijia cutarani, nojuajaari cuhuashiqui quijia cutara. Tamasacaari maja na naata sesa na miitiniu, naajuhuaaj, tama nojuajaarijia maja

sesa na miiniu quiniutianiya, pueya panijia na quishacari. ¹¹ Cante narta Pueyaso pueya niquniu paniyashijiani, cuno pueyanoori ninishiqui quiyajaa, juhua ninishiqui canujuucuaajaariuhuj. Majaari na niishiniu tee na quiaani. Naa na quiniuucua juhua ninishiquitij, nojuajaari juhua cariyujuaru quiya. Majaari na niishiniu Pueyaso casaa.

¹² Quiquihuaniyojuanaa, niaara naajiya nionijia, Pueyaso jiyanooshano muerasu nia quiniuucua, Neyanu Jesucristo mosaanuucua pocuara. ¹³ Queyanaa, niaara naajiyanjia nia niishiniuucua pueyaracaanu Quijia, cante tari pocuaji quiquiaari jiya coteyaquishacarijiacuajani. Mashiquioriniaa, janiya niaara naajiyajaaniuhua cua timishacari nia shocotanuucua Sesaaca.

Janiyari niaara naajiocanuni quiquihuanaa, nia niishiniuucua pa Que Pueyaso, Neyanu Jesucristoocua nia tiuushacari. ¹⁴ Janiyari niaara naajiocanujuhua queyanaa, nia tiuuniuucua tariucua pocuaji Quijiaacua, nio jiya coteyaquishacarijia. Janiyari niaara naajiocanujuhuj mashiquioriniaa, seetanujuanaa maninia nia tojiniuucua Pueyaso rupaa, niaa jaara na masequiaari nioojiajinia, Sesaaca nia shocotanuucuaajuhuj.

¹⁵ Majaari mijiria sesa miiniuucua nia jiaatianu, mijiria casamiicuanio. Cante mijiria casaacua jiaatiajani, cunoori maja pa Que Pueyaso panijia. ¹⁶ Mijiria niishijiaa coretanijosano tama nojori niishishanojinijiaajani, puetunu cunujuanaari maja pa Que Pueyaso niishitishano. Cunoori sacuaraatia tama mijiria pueya niishishanojuaja. Naacuajitij, pueyano pa quishacari, paari sesa pa jiaatianuta pueyaracaanu casaa paniquiaani tama pa cuaqueya pa shuquiritiniuriajaaja. Paari pa niquishano pa maniniucasano casaa paniquiaa pueyaracaanuni. Naajuhuj, paari pueyaracaanu timiquiaani tamasaca timitiasacari pajaniya. Puetunu naa sacuaraatia pa niishishanojuanaani, cunoori mijiria niishishano. Majaari Pueyaso niishitiojonu naa pajaniyatej. ¹⁷ Nio jiyari tari tariucuashiyaree. Socua shaajasaanutaniya puetunujuanaari. Puetunu sesa pa jiaatianujuanaari cojiritiasaanutaniya shaajanu puetunu nio jiyatajanaa. Cante Pueyaso panishano miiquiaa saniniunijia, nojuaja cutaraari pueyaracaanu rishiniutianiya Pueyasota.

Jesucristo paraa

¹⁸ Quiquihuanaa, quiarijiaari quera jiya puequesacari tari. Niaacuajaari tari pohuatasaaquiaari Cristo Paracaari niniutianiya. Quiarijiani, queraatia na paraari tari supueee.

Naacuajitij, paari niishiyani nio pa quishacariiri jiya puequesacari quera. ¹⁹ Cuno Cristo paraani, nojoriiri pajaniyajini-jinio pueya quiqianucuaaja. Pocuaji rupertetucanuuri maja seetanujuanaa Pueyaso muerasu nojori quishacari. Jaara seetanujuanaa Pueyaso muerasu quiqianu, mariqui pata quiyacuaateni. Naa nojori miiniuucuatej, paari niishiyani majaari puetunu pata rerejonaajanaa seetanujuanaa parta Pueyaso muerasu.

²⁰ Saniniuujia niajaniya Pueyaso muerasunaa, Jesucristoori nia niqutioquiaari na Sohuanu. Naaratej puetunu niajanijajanaari Pueyaso niishitijaraca. ²¹ Majaari niaacuara cua naajionuni nia niishiyaquishacari Pueyaso rupaa. Niaacuajaari na niishiya cutara. Niaari niishiyajuhuj, sapojoua sequesanoori maja Pueyasojiniji.

²² Pueyano jaara sequere: “Jesuuri maja Pueyaso Jiyarosano”, cunoori sapojoua. Cante sequejani: “Pueyasoori maja Jesu Que”, cunocujaari Cristo paraca. Jaara sequerejuhuj: “Jesuuri maja Pueyaso Niyanu”, cunoori Cristo paracajuhuj. ²³ Cante Pueyaso Niyanu Cristo tamacajani, majaari Pueyaso na jitianu na Querajuhuj. Cante Pueyaso Niyanu Cristo jittiaa cutarani, pa Que Pueyaso jittiaa na Querajaariuhuj.

²⁴ Naaratej, Pueyaso rupaa nia racatare nia numaama taa nia tojiqiaari tariucuaaanucujani jaara shushajanaa pohuataaquiari nia niqiuara. Naa jaara naa racatariquia na rupaa nioojiajiniate, seetanujuanaa nocua nia tiuushacari, niaari jatiqiu quiya pa Que Pueyasota, Neyanu Jesucristotanio. ²⁵ Jesucristocujaari na Sohuanu niqutioquiaari pajaniya, pueyaracaanu pa rishiniuria. Nojuajanaari naa pa sequequiaari.

²⁶ Nio naajioree niaaranijia cua niishitiniuria niajaniya, nia niishiniuria taa Jesu paraa niishitiojonuquiaa sesa najuhuaana na cuaracashiniuuniutiani. ²⁷ ¿Casaara nojori nia tojiqiaani? Niaacuajaruhua tari Pueyaso Sohuanu jittiaa, Jesucristo niquticosano niajanijani. Naacuajitij, majaari tari panishaanu tamasaca niishitiojonura socua niajanijaniya. Pueyaso Sohuanucujaari nia niishitiojoquiaa puetunu casaajanaa. Puetunu na niishitiojosanojuanaari seetanujuanaa cutara, maja sapojonu. Naaratej, pueyaracaanu jatiqiu nia quiriqia Jesucristota, taa Pueyaso Sohuanu niishitiojoquiaa nia quiniuriacuajani.

²⁸ Quiarijiani quiqiuohuanijoyuanaa, jatiqiu nia quiri Cristota, seetanujuanaa juhuajaniya nia quiniuria pa Jijaniijia jaara tiuquiriohua pocua. Naa nia quiritij maja nia

caririquiniuria nojuaja jaara pa jiitiasuhua. Na rupaa tojiyashijiacaari caririquiniutianiya cutara. ²⁹ Niaacuajaari seetanujuanaa niishiya, Jesucristoori tojetaarucujanaa sesa miyashijia cutara. Niaa cumaati niishiyajuhua, puetunu maninia miijiacajanaari Pueyaso muerasu.

3

Pueyaso muerasu

¹ Pueyanaa, pa Que Pueyasoori jiyanoehua pa panijia. Pa sequeyari, “cua niquiohua”. Seetanujuanaa, paari neco-huani. Naaratej, majaari mijiria quiniaa pueya niishiniu pajaniya. Pa niishitiuyaquiyari nojori niishiyaquiniuucua pa Que Pueyaso. ² Cua panishano Pueyaso muerasunaa, paari tari Pueyaso muerasucujani. Maja cutaraari pa niishiniu taamuecaquitijia pa quiniutianiya na nuhuajitijaj. Paari saaja niishiya cutarani, Jesucristo jaara nimiohua, paari juhua nojuaja quiniutianiya. Na tiuquishacariuhua, paari na niquiniutianiya taa na quiyacujani. ³ Puetunu na sashijiacajanaari tama na cuaqueyajaaja jeequequiaa sesa nojori miishanojiniji saaja maninia nojori quiniuria, taa Jesucristocuaani sesa miyashijia tojetaarucujanaa.

⁴ Cante sesa miijiani, cunoori Pueyaso rootasano na ru-paajinia tojiyaquijia. Puetunu sesa miiniuujianaari Pueyaso rootasano tojiyaquiniu. ⁵ Niaari niishiyajuhua, Jesuuri mijiria pocua niquiaari poojia seque na jataniniuria. Nojuajaari tojetaarucujanaa sesa miyashijia cutara. ⁶ Naacuajitij, cante jatiqúi quiya pa Jiyaniijatani, nojuajaari maja sesa na miiniu quiquiaa cutara. Cante saniniuujia sesa miijiani, majaari na niishiniu Jesu. Majaari nojuaja na niquiniu quiquiaarijuhua. ⁷ Quiquiohuaniyojuanaa, tama nia cuaqueyajaaja nia cojuare niaa mariquí sapojosaareeri. Cante maninia miijiani, nojuajaari maninia pueyano cutara, taa pa Jiyaniijia Jesucuaani, pueyaracaanu maninia quijia cutara. ⁸ Saniniuujia, cante sesa miijiani, nojuajaari Sesaaca pueyano. Shusha jiya coteenujiniji, Sesaacacujajari tari sesa miijia quiquiaari. Pueyaso Niyanuuri cunora niquiaari puetunu sesa na miijosanojuanaa na shaajanura.

⁹ Puetunu Pueyaso pueyajanaari maja sesa miiniuucua na shiiniuquiuniu, quiarinio pueyara Pueyaso rootesano nojori quiniuucua. Nojoriiri quiarinio pueyara jatanishano quiya Pueyaso Sohuanu nojori jiitiasacari. Naacuajitij, seetanujuanaa Pueyaso muerasu nojori quishacari, majaari na naata sesa miijia nojori quiniu pueyaracaanu. ¹⁰ Naacuajitij, maatia niishishanocujajari cante Pueyaso

muerasuni. Saniniuujia, cante maninia miyashijiani, nojuajaari maja Pueyaso pueyano. Naajuhuj, cante narta pueya paniyaquijiani, nojoriiri Sesaaca pueya. Naa niishishanoori cante Pueyaso muerasuni, cante Sesaaca muerasujaniuhuj.

Panitiojuaca pa quirij

¹¹ Pueyanaa, shushajanaa Pueyaso rupaa nia tojishacari, niaacuajaari naa niishitiojosaaquiaaritij: “Panitiojuaca nia quirij”. ¹² ¡Maja cutaraari pa quiniu juhua Caín! Nojuajaari tama tarajanujuaaja moquiaari, Sesaaca tojijia na quiniuucua. Nia niishiritio casaara Caín moquiaari tarajanuni. Nojuajaari tama tarajanujuaaja tacartaquiaari monu, tarajanu miishano quiniuucua maninia. Saniniuujia, tama na miishanojuaarijia sesa quiquiaari. Cunora tarajanu moquiaari-iri.

¹³ Cuarta Pueyaso muerasunaa, majaari nia jiyajenenu Pueyaso ruuretajaca jaara niquiniu paniyaquiriquia nianianiya. ¹⁴ Paacuajaari juhua macu samiitianijosaaquiaari-ihuani, seetanujuanaa saminiucua pa quiniuria. Paari seetanujuanaa na niishiyani panitiojuaca pa quishacari parta Pueyaso pueyata. Cante tapueyocuaca paniyaquijiani, nojuajaari juhua macu quiyajaa. ¹⁵ Naajuhuj, narta pueyano niquiniu paniyashijiacani, nojuajaari juhua pueya mojuua Pueyasora. Niaacuajaari niishiya, pueyano mojuuari Pueyaso samiitianiyaquishoojua pueyaracaanu na rishiniuria. ¹⁶ Paacuajaari niishiyani, Cristoori jiyanojua pa panijia na cusonuucua pocuara. Naacujiti paari niishiyani taamuecate seetanujuanaa paniniuni. Paa cuaara naa panijia quiirijuhuj, tama pa cuaqueyajaaja pa tarinitianura parta Pueyaso pueyacuara, jiyanojua pa paniniutia nojori. ¹⁷ Niaa jaara nareja niqiyia niarta Pueyaso pueya casamijiuniucua, puetunu nia panishanojuanaa nia jiti-asacariucua, niaari najuhuana sequeya: “Pueyaso panijianijia”. ¿Pueyaso panijia pueyanoteeri jiyano pueyano, narta Pueyaso muerasu niqitioyaquijia na jiti-asanojiniji? ¡Maja! ¹⁸ Quiquiohuaniojuanaa, majaari najuhuana pa sequenu: “Cuarta Pueyaso pueya panijianijia”. Paa jaara seetanujuanaa nojori panirini, nojoriicua pa taraajere, taraatia nojori miishacari. Pueyaracaanu maninia pa miiri, seetanujuanaa pa paniniutia pueya. Majaari najuhuana pa sequenu: “Nojori panianijia”.

Pueyaso tojijiaari juhujaniya quijia Pueyaso niqiyara

¹⁹ Naacujitij, paa jaara pueya panijia quirini, paari niishiyani paa seetanujuanaa Pueyaso tojijiani. Paari niishiyani paa pueyaracaanu rishiriquiano Pueyasotani. Majaari pa shaajenu quiniutianiya. ²⁰ Pueyaso muerasu pa

quishacari, poojia jaara pa taacanuutere saaja nocuaji, naajaa, Pueyaso cutaraari jiyanoehua maninia niishijia socua poojia niishishanojiniji. Nojuacuajaari pa niishiya cutara. ²¹ Cua panishano Pueyaso muerasunaa, poojia jaara pa macuhuaajaquiri, paari shuquiriaatia quiya Pueyaso niqiarani. ²² Nojuajaari puetunu pa masesano niqutionutaniya pajaniya, na rupaa pa tojishacari, puetunu na panishanojuanaa pa miishacarijiuhuj. ²³ Pueyaso sequesano pueraari nio: Neyanu Jesucristoocua pa tiuuniuria, pa panitioonurajuhuj taa na sequequiaaricuajani. ²⁴ Canapuate Pueyaso rootasano tojijiacani, nojoriiri Pueyasota rupuetootesano quijiaca. Naajuhuj, Pueyasoori nojorijinia quiyacujua. Nojuacuajaari na Sohuanu niqutioquiaari pajaniya. Naa na Sohuanu pa jiitiasacarij, paari maatia niishiyani Pueyasoori poojiajinia quiya.

4

Pueyaso Sohuanujiniji pohuatasano, Cristo Paraca sohuanujinijinio

¹ Cuarta Pueyaso pueyanaa, quiarijiani, queraatia Pueyaso sequenu panishano caminiujiuniaa pueyari supueya. Maajari ritia nia tiuuniu puetunu nojoriicujanaa. Coteenu nojori nia saniniujiuri, nia niishiniuria nojori caminiujiushanote seetanujuanaa Pueyaso Sohuanujiniji, tamonujiniji soj. Mijiria, queraatia sapojonuujuaari caneya. Nojoriiri najuhuaana cuaracashiniuya na sequesacari: “Janiyacujaari Pueyaso sequenu panishano caminiujiuniani: Pueyaso Sohuanu niishitishano janiya”. ² Niaari naa niishiniutianiya cante seetanujuanaa Pueyaso Sohuanu niishitishano caminiujiuniani: Pueyaso Sohuanu jiitiajaari naa sequeja: “Pueyaso jiyarosano Jesucristoori pueyanora quiquiaari, mijiria pocuara cusoriquiano”. ³ Cante saniniuujia jiyaniyani Jesu maja pueyanora na quiniu quiquiaari, cunoori maja Pueyaso Sohuanu na jiitianu. Saaja Sesaaca sohuanu jiitiaa noojiajinia cutaraari. Nojuacuajaari Jesucristo Paraca. Niacujaari tari pohuatasaaquiaari, Cristo Paraca sohuanuuri niniutianiya. Nojuacuajaari tari mijiria quiya.

⁴ Quiquiohuaniyojuanaa, niaacujaari Pueyaso muerasu. Naacujitij, niaari cuno sapojonuujuaa shocotacanu Pueyaso cumaacata. Nioojiajinia Quijaari socua cumaacaraca nojori jiitiasano Sesaaca cumaacajiniji. ⁵ Cuno sapojonuujuaari saaja Pueyaso niishiyashijiaca, maja Pueyaso muerasu. Naacujitij, nojoriiri saaja mijiria casaajiniji pohuatanuquiaa. Naarate narta Pueyaso ruuretajacaari nojori tojitiaquiaa. ⁶ Paa cutaraari Pueyaso

pueyani. Naacujitij, cante Pueyaso tojtiajacani, nojoriiri pa tojtiaquiaa. Canapuate saniniuujia maja Pueyaso pueyani, nojoriiri maja na tojtianu quiquiaa pajaniya. Naacujitij, pa naata niishiniu cante seetanujuanaa Pueyaso Sohuanu jiiitiaa cutarani, cante saniniuujia sapojoua sohuanu jiiitiaanjia.

Pueyaso pa panijia cutara

⁷ Cua panishano Pueyaso pueyanaa, jyanohua panitioojuaca pa quirij. Pueyasocuajaari pa panijia. Nojuajaari pa panitijia na Sohuanuta, jyanohua panijia pa quiniurijuhuj. Canapuate puetunu pueya panijiacajanaani, nojoriiri Pueyaso muerasu cutara, seetanujuanaa Pueyaso niishijiacajaariuhuj. ⁸ Canapuate pueya paniyashijiacani, nojoriiri maja na niishiniu Pueyaso. Pueyasocuajaari panijia cutara. ⁹ Nojuajaari pa niishitiquiaari taa na paniquiaa jyanohua pajaniyani, Neyanuniyujua na jyarosacari mijiria pa samitianiijioriquiano, pocuara na cusosacari. ¹⁰ Naa cutarate seetanujuanaa paniniu sequesano: Pueyasoori pa panijia. Paari maja pa coteetanu quiquiaari Pueyaso paniniuni. Nojuajaari saniya coteetaquiaari na paniniuria pajaniya. Neyanu jyaroquiaariiri pocuara mosocoriquiano, sesa pa miishano jyanooshaanura. Naa cutarate seetanujuanaa paniniu.

¹¹ Cua panishano Pueyaso muerasanaa, Pueyaso jaara naa pa paniquiaaricuaa, ¿casaara pa panitioyaquiyaariniija? Naa panitiojuacara pa quirijihuj. ¹² Majaari quenaaja pa niqiniu quiquiaari Pueyaso, taamuecatejanojoni. Naa-jaa, paa jaara tamascata panitiojuaca quirini, Pueyasoori poojiajinia quiyacuaja. Naacujitij, paari tojetaarucujanaa panijiacara quiniutianiyan, na paniniu quishacari poojiajinia. ¹³ Nojuajaari na Sohuanu pa niqutioquiaari poojiajinia na quiniuria. Naacujitij, paari niishiyani paacuajaari natapuetoojua quiyani. ¹⁴ Canaajanaari seetanujuanaa cana niqishano pohuataani: Pueyasoori Neyanu jyaroquiaari mijiria, mijiria quinia niti mosocoriquiano, nocua tiuujiaa jiyatesaanura Pueyaso pueyara. ¹⁵ Cante pueya niquiara sequejani: “Jesuuri seetanujuanaa Pueyaso Niyanu”, Pueyasoori noojiajinia quiya. Nojuajaari Pueyasota rupuetoojua quiyajuhuj.

¹⁶ Naacujitij, paari niishiyani Pueyasoori jyanohua pa panijia. Paari na niishiyajaaniuhua na rupaacua pa tiushacari. Pueyaso cutaraari panijia. Paa jaara pueyaracaanu panijia quirini, paari seetanujuanaa Pueyaso rupuejani. Naajuhuj, Pueyasoori poojiajinia quiya. ¹⁷ Naa Pueyaso quishacari poojiajiniatej, paari pueya panijara jiyacatequiaa socuani. Naa seetanujuanaa panijia pa quishacaritij, paari juhujaniya quiniutianiya Pueyaso nequesoreesacari

puetunu pueyapuejanaani. Majaari pa puerenu quiniutianiya panijia pa quishacari taa panijia nojuaja quiyacuaani. ¹⁸ Cante seetanujuanaa Pueyaso panijiani, majaari na niishiniu puerenu. Naa pa paniniuuri puetunu pa puerenu jataajanaa. Cante puereja quiya saniniunijia, majaari juhuanajuaja na paniniu Pueyaso puetunu noojiatajanaa. Puerejaari niishiriojiya: “Saniitiosaanutaniyanijia”.

¹⁹ Niaacuajaari niishiya, Pueyasoori coteenujuanaa pa paniquiaari, naarate paari saniniuujia na paniyani. ²⁰ Saniniuujia, cante sequejani: “Janiyari Pueyaso panijiani”, narta pueya niqiniu paniyaquiya saajaaraariuhuj, jiyano pueyanoori sapojoua. Naa na paniyaquishacari tarajanu na niquishano na namijiata cutaratej, ¿maatucua taa Pueyaso panirini, na niquishoo socuani? ²¹ Pueyasocuaajaari naa pa rootaquiaari: “Cante cua panijiani, cuara paniiria narta pueyajuhuj”.

5

Taa pa shocotanutaniya mijiria niishishanoni

¹ Niaa jaara Jesuucua tiuuri nojuaja seetanujuanaa Pueyaso Jiyarosano quiquiaari, niaari Pueyaso muerasu. Mijiria, cante muerasu que panijiani, necohua paniyajaariuhuj. ² Naacuajitij, pa panishacari Pueyaso, pa tojishacari na rootasanojuhuaj, jiyacariti paari niishiyani paari parta Pueyaso muerasu paniyajaacuhuj. ³ Paa jaara Pueyaso panijia quiri seetanujuanaani, paari na sequesano tojijiaca quiyajaaniuhuj. Na rootasano pajaniyani, majaari jiyajeneta na quiniu pajaniyara. ⁴ Cante seetanujuanaa Pueyaso muerasuni, nojuajaari mijiria sesa niishishano shocotaa. Paari na shocotajani Pueyasocua pa tiuushacari. ⁵ Cante Jesu jiyateya seetanujuanaa Pueyaso Niyaturani, saaja jiyano pueyano na naata mijiria niishishano shocotanu cutara.

Pueyaso Niyaturaniniji pohuatasano

⁶ Pueyasoori canaa niishitiquiaari Jesuuri seetanujuanaa Neyanujuhanajaj, Jesu jaara moojinia tiuquinishaaquiaari. Canaa niishitiquiaariijaariuhuj Neyanu jaara niyacutesanojinia naatequiaari. Jesuuri maja saaja moojinia na tiuquinishaanu quiquiaari canaa niishiniuria nojuaja. Maja. Naajuhuj, janiyajanaari na niquiquiaari na nanaca shooteyano na shuucujini. Naajuhuj, poojiajinia quijia Pueyaso Sohuanuuri pa niishitiquiaa cunoori seetanujuanaa Pueyaso Niyanu quijiajuhanajaj. Pueyaso Sohuanu cutaraari maja na niishiniu sapojonu. ⁷ Jiuujianaraca jiyocuaaanu quijiaaari pa niishitiya

Jesucristoori mijiria niquiaari pueyano na quiniuria seetanujuanaa. Cuno pojoriiri nio: Pueyasojuaanaa, na Rupaa, na Sohuanunio. Nio jiuujianaraca quijiacani, nojoriiri Pueyasojuhuanajaj. ⁸ Paari mijiria jiitiaa Jesujiniji pa niishitijiacajuhuj. Cunoori jiuujianaraca quiyajuhuj. Cuno pojoriiri nio: poojiajinia quijia Pueyaso Sohuanu, jiyocuacaanuji tojishano rupaa Jesu tiuquinishacari moojinia, naajuhuj, na nanaca, pueya niquishano na shuucuaji shoyano. Puetunu cunujuanaari mariyata pa niishitiya Jesuuri seetanujuanaa Pueyaso Nyanu. ⁹ Paa jaara tojiriquia pueya pohuatanuusanoni, ¿casaara saniya Pueyaso sequesano pa tojiyaquiyarini? Pueyaso sequesano Neyanujinijiiri socua seetanu rupaajanaa cutara pueya pohuatanuusanoiniji. ¹⁰ Cante Pueyaso Nyanuucua tiuujiani, Pueyaso Sohuanuuri noojiajinia na niishitiya Jesuuri seetanujuanaa Pueyaso Nyanu. Saniniuujia, cante Pueyaso sequesano Neyanujiniji ruuretaja saniniunijia, nojuajaari Pueyaso jiyateya sapojuara, na tiyaquishacari tama Pueyaso sequesanoocuaajaaja Neyanujiniji. ¹¹ Pueyasocuaajaari sequequiaari, Neyanuucua tiuujiaacari pueyaracaanu rishijiaca quiniutianiya. ¹² Cante Pueyaso Nyanu jiitiaa noojiajiniani, nojuajaari tari samiitianishaarohua pueyaracaanu rishijia na quiniuria. Pueyaso Nyanu jiitiaashijaari saniniuujia maja na rishiniu quiniutianiya.

Nio naajio puequenu panishacari rootasano

¹³ Nio naajiya niaaranijia nia niishiniuria, Pueyaso Nyanuucua nia tiuushacari niaari tari samiitianijiosaarohua pueyaracaanu nia rishiniuria.

¹⁴ Paari Pueyasocua tiuquiaani, pa niishishacari nojuajaari pa tojiquiaa pa secojosacari nojuaja, pa masesano jaara quiri taa na paniyacuajani. ¹⁵ Naatej, taa pa niishiyacuaani Pueyasoori pa secojosano tojiquiaa, paari naa niishiyajuhuj paari nojuaja pa masesano maseree tarini.

¹⁶ Cante narta Pueyaso pueyano niquiya sesa miyanoni, cuara Pueyaso secojora nocuara, sesa na miishano jaara na cusojuashijia quiri. Naacuajitij, Pueyasoori cuno sesa miiijia naataniniutianihua, sesa na miishano jaara cusojuashijia quiri. Quiyajaariuhua tamonu sesa casaa miiniu. Paa jaara cuno sesa casaa miirini, paari cusoqueeni. Naa cua sequesacari niajaniatej, majaari cua sequenu niajaninya nia seconjura jiyano sesa miishanoocuaratej. ¹⁷ Seetanujuanaa, puetunu sesa miishanojuanaari sesa Pueyasora. Naajaa, majaari puetunu sesa miishanojuanaa cusojuanu quiniutianiya pajaniya.

¹⁸ Paacuaajaari niishiyani pueyanaa, cante Pueyaso jii-
itiaa juhua na Que cutarani, nojuajaari sesa miyaquiquiaa,
Pueyaso Niyanu cojuasacari nojuaja. Naacuaajitij, Sesaacaari
maja na naata sesa na miitiniu. Majaari na naata sesa na
miiniuujihuj.

¹⁹ Paari niishiyani paa cutaraari Pueyaso muerasuni.
Sesaacaari saniniuujia puetunu mijiria quiniaa Pueyaso
niishiyashijiacajanaa jiiitaacujua. Nojuajaari nio jiya ca-
marnu.

²⁰ Paari niishiyajuhuj Pueyaso Niyanuuri mijiria
pocua niquiaari. Nojuajaari na niishitiaja niqutioquiaari
pajaniya, maninia pa niishiniuria na Que, na Que
quiniuria pa Quejuhuj. Nojuajaari Pueyasojuanaa
cutara. Paari nata quiya jatiquni, Neyanu Jesucristota
pa rupuetoosacari. Nojuajaari Pueyasojuhuanajaj, pa
Samiitianijajaariuhuj, pueyaracaanu rishijiaca pa
quiniuria. ²¹ Quiquiohuaniyojuanaa, saaja Pueyaso pa
paniri. Tama pa cuaqueyajaaja pa cojuare, maja tamonu
casaacua pa jiaatianura socua Pueyasojiniji. Paa jaara
tamonu casaacua jiaatiareni, paari Pueyaso shocoteya
nocuarani. Niojuanaa pueyanaa. Tariucujaja.

TANEE JUAN NAAJIONEE

Pueyaso Rupaa seetanujuanaa panijiara pa jiyateja

¹ ¿Quiaate quiyajaa cua panishano cua rimiatucuanaa? Quiaacuajaari Pueyaso saquiriojosano, neyatu quia quiniuria. Quiocuara naajiyanjia, quia panishano muerasuu-cuaranio.

Janiyari saaquiano Juanni, Pueyaso muerasu jiitiana. Seetanujuanaa nia panianijia, taa puetunu Pueyaso rupaa tojiniaa pueya paniya niajanियacuaani. ² Pueyasojiniji seetanu rupaajanaari poojiajinia quiya. Naaratej, canaari nia paniani. Cuno rupaari poojiajinia quiniutianiya pueyara-caanu. ³ Nia tojishacari seetanu Pueyaso rupaajanaa, nia panitioosacarijiuhuaaj, naacuajitij, pa Que Pueyasoori Neyanu Jesucristota nia cumaquiniutianiya. Niaacua taraajenu-taniyajaariuhuaaj. Nioojia jiyatenutaniya juhuajaniya quiji-acarajaariuhuaaj.

⁴ Noojiaqueya quia niquiohuajinijinio niquiquianunijia. Nojori timitiacanunijia nojori tojitianuucua maninia seetanu rupaajanaa, taa pa rootasaaquiaari pa Que Pueyasojinijicuaajani. ⁵ Quiocuara naajiya quiarjianijia cua panishano cua rimiatucuanaa, cua sequenura quiajaniya: “Jiyano-hua pa panitioore”. Majaari quiarinio rootasano nio, cua naajiosano quiocuarani. Nio rootasanocuaajaari pa jiitiasano pueyaracaanu Jesucristojiniji. ⁶ ¿Taate pa naata paniniuni? Paari pueya panijaca quiyani Pueyaso rootasano pa tojishacari. Niocuajaari na rootasano: puetunu pa miishano-juanaa cuaara quiiria Pueyaso pa paniniutia poojiajinia.

Cristo paraari sapojonuujuaca

⁷ Quiarjiani, queraatia sapuenu juhua Pueyaso sequenu panishano caminiujiuniaari mijiria quiya. Nojoriiri pueya niishitiojoquiaa: “Majaari Jesucristo rosenu quiquiaari jiyocuaaanuji, cuaqueyaraca na quiniuria, seetanujuanaa pueyano na quiniuria”. Canapuate naa sequejacani, nojoriiri sapojonuujuaca. Nojoricuaajaari Cristo paraa. ⁸ Tama nia cuaqueyajaaja nia cojuare cuno pueyacuaaji, maja nia tojiniuria nojori, niaa mariqui Pueyaso niqutionu panishano pajaniya maseyaquiriiri, pa Jiyaniijiara nia poonijionujiniji na niqutionu panishano. Suraatiaja nia tojiriohuarohua

seetanu rupaajanaa, nia masenura puetunu Pueyaso jiiti-asanojuanaa niaara. ⁹ Cante tama na cuaqueyajaaja jiy-ateja Pueyaso casaa niishijiara socua Jesucristo jiyaramiquis-hano pueya niishitiojosanojinijini, cuno shocotajaari Pueya-soojura quiquii, na shocotanuucua Cristo rupaa. Cante saniniuujia seetanu rupaajanaa tojitiaquiaa maniniani, taa pa rootasaaquiaari Cristo rupaacuajani, Pueyasocuaajaari na Que, Neyanuuri nocuaji Tacunajuhuj. ¹⁰ Seetanu rupaajanaa jiitiaashijia jaara niaacua tiuquiniu paniya tamaatia na niishitiojonura niajaniya, majaari niaacua na shanacununoj. Majaari quenaaja na saruhuatanujuhuj nia cumaquiniuria nojuaja. ¹¹ Cante na sequeyani: “Pueyaso cuaara cumaqu-iria quiajaniya”, naa sequejaari cuno sapojoua cojiritiasaa-ree tari sesa na miishanotaja.

Juan puecasacari naajionu

¹² Socua queraatia sequenu paniya niajanianijia. Naa-jaa, majaari cua naajionu paniniu. Janiyacuajaari niaacua naquerejiyani, maninia pa pocoojonura, shuquiriaatia pa quiniuria seetanujuanaa. ¹³ Quia tarajanu niquiohuari cua sequeree nojoriria cua saruhuatanura quiajaniya. Nojuacua-jaari Pueyaso saquiriojosano maajijihuj. Tariucujaja.

SOCUA TANEE JUAN NAAJIONEE

Juan maninia pohuatasaaquiaari Gayojiniji

¹ ¿Quiaate quiyajaa cua panishano Gayonaa? Janiyari saaquiano Juanni, Pueyaso muerasu jiitiana. Seetanujuaanaa quia paniyanijia, Pueyaso rupaa quiniuucua coojiajinia.

² Quiocuara secojoquiaanijia, puetunu quia miishanojuanaa cuaara quiiria maninia. Janiyari quiocuara secojoquiaaaniuhuaaj, maninia quia cuaqueya quiniuria, maja cusosu, taa quiioojia quiya maniniacuaani, Pueyaso tojjia quia quishacari maninia.

³ Parta Pueyaso muerasujinijinio pueyari cucua tiuquiquianu quia quijia tiacajiniji. Janiyari jiyanohua shuquiriaatia quiquianuni nojori pohuatasacari quiajanijajiniji. Quiaanaari seetanujuanaa maninia miiijia quiquiaa taa pa rootasaaquiaari Jesucristo rupaacuajani. Quiaacuajaari maninia tojiquiaa seetanu rupaajanaa, sanajanaa. ⁴ Jiyanohua timiquiaanijia cua tojishacari cua muerasuuri maninia miya, taa cua rootaquiaari Jesucristo rupaa nojoricuajani. Naa cua tojishacaritij, cunoori jiyanohua cua timitiquiaa socua tamonu casaajiniji.

⁵ Sanajanaa, quiaacuajaari maninia miiijia, maninia quia miishacari parta Pueyaso muerasu. Quiaa cutaraari maninia miiiquiaa, quia tiuquitishacari quia tiajinia quia niishishoo tamaquiicujajinio Pueyaso muerasu. ⁶ Pueyaso muerasu rerejosacari niya, Pueyaso rupaa pohuatanura rucoojuacaari canaa niquiara pohuatacanu maninia quia miishanojiniji nojoriria, quia paniniutia nojori. Quiarijiani, nojori quia niqutiore nareja nojori panishano na jiyatajara, socua nojori quianu panishacari cuniquiji. Naa quia miiri quenaaja, Pueyaso quia shuquiritiniuria. ⁷ Nojoriiri Jesucristojiniji pohuatanura rucoojia. Majaari nojori panishano na masetunu paniniu quiquianu Pueyaso niishiyashijiacajiniji. ⁸ Naaratej, pajaniya cuaara naacuura jiyano pueya, noo pojori canapete pa Jijaniijia rupaa pohuatanura rucoojiyacuajani. Naa pa miiriti Pueyaso rupaa pohuatanu naacunaa pa quiniuriajuhuaj.

Sesa Diótfrefes miishanojiniji pohuatasano

⁹ Janiyari quia quijia tiacajinia Pueyaso pueya maanuucuaara naa naajioquiaarijuhuaj. Janiyari nojori sequequiaarini nojori cuaara Pueyaso Rupaa pohuatanura rucoojuaca naacuura, cuno pojori jiitianura na panishano. Diótfrefesri saaja tama na cuaqueyajaaja shuquiritiaja,

Pueyaso pueya maanu jiitiana na quishacari. Nocuaji cua sequesano ruuretacanuuri. Cua rerequetequiaajaariuhuj.
¹⁰ Naajaa, janiya jaara niaacua quiaareni, janiyari naa sacuaraatia na miiniuucua na nacasunutaniyani. Nojuajaari tamasaca niqiuara canaa sesacquiaa na sapojonuta. Naa socua sesa miiquiaajaariuhuj: majaari na tiuquinitianu quiquiaa Pueyaso Rupaa pohuatanaa na tiajinia. Canapuate saniniuujia nojori tiuquitiniu paniquiaa nojori tiajiniani, Diótfesri nojori tenujuquiaa saaja. Canapuate Pueyaso rupaa pohuatanura rucoojuaca tiuquinitianu paniquiaajaa na tiajiniani, Diótfesri puetunu nojori tenujuquiaajanaa, maja socua nojori rerejonura narta Pueyaso muerasuta.

¹¹ Sanajanaa, majaari quia jiaatianu cuno sesa miiijaacua, quiaa mariqui juhua nojuaja quirijiaariuhuj. Saaja quia jiaatiare cutara maninia miiijaacua, juhua nojuaja quia quiniuria. Cante maninia miiquiaani, cunocujaari Pueyaso pueyano. Sesa miiija saniniuujia, nojuajaari Pueyaso ni- ishiyashijia.

Maninia Demetrio miishanojiniji pohuatasano

¹² Puetunu pueyajanaari saniniuujia maninia pohuatanu- uquiaa Demetriojiniji. Tama Demetrio miiijosanojinijiaaja, pueyari niishiya Demetrioori maninia pueyano. Seetanu- juanaa, nojuajaari maninia pueyano, taa tamasaca seque- quiaacuajani. Niaacuajaari niishiya canaari seetanujuanaa sequequiaani, naa canaa sequesacari Demetriojiniji.

Naajio puequesacari

¹³ Janiyari queraatia sequenu panijajaa quiajaniyani. Naajaa, majaari cua sequenu paniniu saaja cua naajiojinia.
¹⁴ Janiyacuaja quiocua naquerejiyani. Jiyacaritij, pocua maninia pocoojore cutarani.

¹⁵ Pueyaso cuara quioojia jiitiaara maninia, juhuajaniya quia quiniuria. Niya pa rupuenaari cua sequeturee cua saruhuatanura quiajaniya. Puetunu cuniqui pa rupuena- janaa quia saruhuatare canaarajuhuj. Tariucujaja.

JUDAS NAAJIONEE

Judas naajiosano Pueyaso saquiriojosano pueyacuara

¹ Janiyari Judasni, Jesucristo seru, Jacobo tarajanu. Ni-aacuara naajiyaniija canapuate pa Que Pueyaso panishano muerasucujani. Nojuajanaari nia saquiriojoquiaari nera nia quiniuria. Niajaniyari Neyanu Jesucristo cojuasano, nia rupuesacari nojuaja. ² Pueyaso cuaara nia jiuujiaaria. Cuaara nioojia cajitiiriajuhuaj. Cuaara paniiria niajaniyajujuaj. Pueyaso cuaara naa miiria jiyanojua niajaniyatej.

Sapojonuujucajiniji pohuatasano

³ Cua panishano pueyanaa, janiyari niaacuara naajionu paniriquiaa jiyanojua, cua pohuatanura niajaniya taa maninia pa miishaanutaniyani, Pueyaso saquiriojosano pueya pa quiniuucua: niajaniya, canaajuhuj. Saniniuujia, quiarijiani, socua maninia cutaraari cua naajionura niaacuara, cua nacasunura niajaniya seetanujuaanaa Pueyaso tojijiaca nia quiniuria. Jiyanojua nia tiuuri pueyaracaanu Pueyaso rupaacua, cumueeca Pueyaso pueya nia quiniuria. Pueyasocujajaari na rupaa pohuataniquiaari maninia pa niquiara. Maja cumaati na jatanishaanu. Cuaara pueyaracaanu maninia pohuatasaaaria, taa pa pohuatasaaquiaaricuaani. ⁴ Naa nia sequeyanijia Pueyaso rerequetajaca supuesacari jiyasohua nia tajinia. Tariucuacaanu Pueyaso Rupaajiniacuajaari cuno sesoriquia pueyajiniji naajiotasaaquiaaricujaja. Nojoriniaari quejoosaanutaniya pueyaracaanu saniitiosocoriquiano. Nojoriiri sequequiaa: “Shuquiriaatia juhuajaniya pa miiri tama pa cuaqueya miiniu panishanojuaaja, pa jiyanojua Pueyaso quishacari. Paa jaara sesa miirini, naajaa, majaari Pueyaso saniitionu quiniutianiya pajaniya”. Nojoriiri naa sequetuquiaa sesatej. Nojoriiri pa Jiitianajanaa jiyatequiaa juhua saniitioyashijia, pa Jiyaniijiajanaa Jesucristoni.

⁵ Niaari niishiyacuaja, Pueyasoori Israel pueya supuetanaa mashiquiquiaari Egipto jiyajiniji, Egipto pueya seya nojori quishacari. Socua nia niishitiorohuaraj. Na nuhuaji, Pueyasoori na pueyajinijinio nocua tiuyashijiaacua puecooquiaari. ⁶ Naajuhuj, Pueyasoori tama na seyajaaja nujuatejoquiaari na nujuatejojuajinia, noo pojori canapuate na shuriucua quijiaca quiquiaari jiyocuacaanucujani. Nojoriiri Pueyasora na poonijosano tiujiaquiaari. Nojori poonijosaquei tiujiatuquiaarijuhuaj. Cunora, cumayocuata morojosaaquiaariiri, pueyaracaanu ninishiqui

nojori quiniuria, cuaara quirijiaatijia Pueyaso saniitiojonu juuca cutara. Cuno juuca, Pueyasoori puetunu na tojiyashijiacajanaa saniitiojonutaniya. ⁷ Nia niishirijihua Sodoma tiacajinia quijia pueya, Gomorra tiacajinia quijia pueyano, nojori tiaca shocua quiniaa pueyajuhuj. Puetunu nojorijianaari maninia miiniu ruuretaquiaari tama nojori cuaqueya panishanojuaaja nojori miiniuria, jiyanohua sacuaraatia. Nojoriiri maajishuriu numuetucujuaca quiquiaari. Cayashuriuuri narta maaji numuetucujuaca quiquiaarijuhuaj. Pueyasoori maja na shipiniu quiquiaari naa pueya quiniuriatej. Naa Pueyaso tojiyashijiaa nojori quishacaritij, mariyata taa tama Pueyaso seyajaaja na tojiyashijiaa quiquiaaricuaani, Pueyasoori nojori quejooquiaari mani quiquiojina, tii naquiya nojori miishaanura pueyaracaanu. Naa nojori saniitiosaanuucuaatej, cunoori quiquiaari puetunu pueyajanaa niishiniuria maja Pueyaso tojiyashijiaa pa quiniuria taa nojori quiquiaaricuaani.

⁸ Cuno pojori, sacuaraatia niishitiojonaa nia tajinia quiyani, nojoricuajaari Pueyaso saniitionujiniji niishiya. Naajaa, nojoriiri juhuajaniya miiquiaa puetunu sesajanaa taa noojiajina nojori niishiyacuajani. Nojoriiri tama nojori jiuujiacajaaja curuushojoquiaa nojori miishacari tama nojori niquishanojuaaja na maquenujina. Pa Jiyaniijia sootiyajaariuhuj. Nojoriiri jiyanohua cumaacaraca quijiaa sesacaquiaajuhuj, jiyocuaaanu quijiacani. ⁹ Supuetana Moisés shaajesacari, Pueyasoori na seya jiyaniijia Miguel jiyaroquiaari Moisés quiete na jamonura. Sesaacaari Moisés quiete paniquiaari juucua. Nocua Miguelta juayonuutaquiaariiri. Miguel cutaraari seetanujanaa cumaacaraca quijia. Naajaa, majaari na saarijonu quiquiaari Sesaaca. Na sequeree saajaari: “Pueyasojuanaa cuaara juaaria cutara quiajaniya”. ¹⁰ Saniniuujia cuno sesa niishitiojonaa nia tajinia quiyani, nojoriiri na niishishoo cumaacaraca casaa sesacaquiaa. Naajuhuj, nojoriiri tama nojori cuaqueyajaaja sesoquiaa sesa na miishanota, taa nacujiniaacoji casaa miiquiaa sesa juhuajaniyacuaani, maja na niishiniutia. Naaratej, nojoriiri saniitiosocoriquiano puetunurajanaa.

¹¹ Nojoriiri jiyanohua cocuaatia miiquioquiaa. Nojoriiri narta pueya niquiniu paniyaquiquiaa, taa supuetana Caín niquiniu paniyaquiquiaari tarajanucuaani. Nojoriiri sesa pueya timitiquiaa casamiriaca nojori quiniuriajuhuaj, naatej, taa supuetana Balaam miiniu paniquiaari juucuaaani. Nojoriiri mariyata puetunu quejoosaanu-

taniyajanaa nojori ruuretanuucua Pueyaso, taa supuetana Coré cusoquiaaricuaani na ruuretasacari Moisés. ¹² Nia queranacusacari Pueyaso niquiara nia panitioonuta, cuno sacuaraatia niishitiojonuujuacaari jiyanohua cararaatia nojori miaquesacari niaata. Majaari nojori paniniu tamasaca. Nojoriiri saaja tama na cuaqueyajaaja shuquiritiniu niishi-jiaca. Puera miaquenuujuaca nojori quishacari, cunoori cararaatia. Jiyano pueyari maja na cumaquiniu niajaniya. Nojoriiri najuhuana quijiaca, juhua niqutioocuaari tajimi-aquiaa paratu piyarojosacari. Majaari maru niniu. Nojoriiri najuhuana quiya, juhua muetuhuo naana. Nojoriiri tariucua macu Pueyasora, naatej taa naana sorenocuaani, juhua puetunu na nujuacatajanaa majaratasano. ¹³ Nojori nuhuaji, pueyari saaja taraatia quiquiaa, cararaatia nojori miishanojiniji. Sesa nojori miishanoori juhua jiyanohua shoniniacu caminia queyocuasacari cushau, curuutuucua. Nojoriiri shanohua niquishiya rupaquijia, juhua rijia tiyano. Na nuhuaji, nojoriiri ninishiqui quiniutianiya pueyaracaanu Pueyasooju. ¹⁴ Pa supuetana Adánri coteenujanaa shipinishano pueyano quiquiaari mijiria. Enocri séptimo jiyani-ijia quiquiaari Adán nuhuaji. Enocri Pueyaso niqutishano nojuaja pohuataquiaari taa nio sesa miijiaca pueya miishaanutaniyani. Nojuajaari naa sequequiaaritij: “Janiyari Jiyaniijia niqurii cunocoji niyano jiyanohua queraatia na pueyatani. ¹⁵ Nijioriquiaari sesa miijiaca na saniitionura. Rerequetejacaacua tiutianutaniya puetunu sesa nojori miishanojuanaari. Puetunu na soojeacajanaari saniitiosaanutaniya puetunu nojori sesacanuucujanaa pa Jiyaniijia”. ¹⁶ Cuno sesa niishitiojonuujuacaari naa miiquioquiaa nia tajinia. Nojoriiri saa juayonuutaquiaajaa. Majaari shuquiri-aatia nojori quiniu quiquiaa na jiitiasanota. Nojoriiri tama na cuaqueya panishanojuaja miiquiaa. Puera pocuajaca quiyajaariuhuj. Nojoriiri na sapojonuta maniniuhuaqueetaquiaa narta pueya, maninia nojori miishaanura. Majaari naa nia quiniu pueyanaa.

Pueyaso pueyara rootasano

¹⁷ Cua panishano pueyanaa, nia niishiriohua pa Jiyaniijia Jesucristo jiyaramiquishano pueya sequesano niajaniya. ¹⁸ Nojoricuajaari nia pohuataquiaari taate quera jiya puequesacari quiniutianiyani. Nojoriiri naa sequetuquiaaritij: “Quera jiya puequesacari, Pueyaso sesacajaca pueyari Pueyaso casaa sojeaca quiniutianiya, na rupaa sojeacajuhuj. Nojoriiri sesa miiniutianiya tama nojori cuaqueyajaaja nojori shuquiritiniuria”. ¹⁹ Naa cuno pueya miiniuucuatej, nojoriiri Pueyaso muerasu

jiuujia niyaquejotequiaa maja rupuetoosano nojori quiniuria. Nojoriiri saaja tama sesa nojori niishishano miiquiaajaacujua, Pueyaso Sohuanuuju nojori quishacari.

²⁰ Cua panishano Pueyaso muerasunaa, Jesucristo ru-paacua nia tiuuri jiyanoehua socua, seetanujuanaa na pueya nia quiniuria maninia. Pueyaso nia secojore Pueyaso So-huanu cumaacata. ²¹ Naacuaajitij, niocua Pueyaso panis-hano pueya quiri pueyaracaanu. Juhuaajaniya nia sashiri pa Jiyaniijia Jesucristo, nojuaja cuara pueyaracaanu quijiacara pa jiyaterejaatijia, shuquiriaatia pa quiniuria na shuriucua pueyaracaanu. Naa pa miiniutianiyari maninia jiyanoojia na quiniuucua.

²² Canapuate pa Jiyaniijiaacuaji taacanuyajaani, nojori nia niishitiojore jacaria, seetanujuanaa nojori tiuuniuria maninia pa Jiyaniijiaacua. ²³ Tamasaca nia piriyojorejuhuj Pueyaso pueya nojori quiniuria, nojori mariqui manijinia puetunu quejoosaarejanaari. Tamasacaari jiyanoehua sesa miijiaa. Naajaa, nojori nia naacure, Jesucristo nojori niishiniuriajuhuj. Saniniuujia, tama nia cuaqueyajaaja jiyanoehua nia cojuare niaa mariqui sesa miitishaarejaari-uhuj nia cojishacari nojori. Jiyano pueyacua nia taraajere. Saniniuujia, puetunu sesa nojori miishanojuanaa nia soore cutara.

Naajio puequesacari Pueyaso maniniuhuaqueetasaanu

²⁴ Pa Que Pueyasoori pa cojuaquiaa maja pa catenura nocuaji. Nojuacuajaari cumaacaraca na tiuquinitianura pajaniya nocua, puetunu tari maniniushitishanojuanaa pa quishacari, shanoehua na cumaaca pa shootianura pueyara-caanu. Pa niquishacari nojuaja, paari jiyanoehua na timi-tianutaniyani.

²⁵ ¡Jiyanoehua maniniaari pa Que Pueyaso! Nojuajaari ni-ishijiajanaa. Pa jiyatequiaari na muerasuraari pa Jiyani-ijia Jesucristo cusuucua pocuara. ¡Jiyanoehua shanoehua na cumaaca! ¡Nojuajaari Jiyaniijiajanaa! ¡Jiyanoehua maninia pa Jiitiana! ¡Nojuajaari puetunu cumaacaracajanaa cutara! ¡No-juacuajaari pa Que Pueyaso! Jiya shipinishaacarijijyojua, no-juajaari quijiajuhuanajaj. Naa quiyajaari. Naa quiniutianiya pueyaracaanuuri. Taaquiririnij, naacuaaquiniatejaj.

JESUCRISTO NIQUITISHANO JUAN

Jesucristo niquitishano pajaniyara

¹ Janiyari Pueyaso seru Juanni. Niya naajiotaa Pueyaso niquitishano Jesucristonijia, saniniuujia nojuaja niishitiniuria na tojtiajaca, taa quiari naataja Pueyaso miiniutianiya mijiria quijiacani. Jesucristoori jiyocuacaanuji na seru jiyaroquiaari cucua, na niishitiojonura janiya taa mijiria quijiaca miishaanutaniyani. ² Janiyari puetunu na niquitishanojuanaa caminiujiya niajaniya seetanujuanaani. Niocuajaari seetanujuanaa Pueyaso rupaa, Jesucristojiniji cua caminiujiushano niaara.

³ Shuquiriaatia quijiaca cutaraari noo pojori, canapuetenio cua caminiujiushano Pueyasojinijini serojonutaniya Pueyaso pueya maapue niquiarani. Na tojtiajacaari shuquiriaatia quijiaca quiniutianiyajuhuj, nojori tiuuniucua nio naajiojinia cua pohuatasanoocua. Nio pohuatasano tohuateenuraari tari catecanoya.

Juan naajiosano siete Pueyaso pueya maapuecuara

⁴ Janiyari Juanni. Asia jiyajinia quiniaa siete Pueyaso pueya maapuecuara naajianijia. Pueyaso cuara cumaquiiria niajaniya, cuara nioojia cajitiirijuhuj. Pocua niriqiano pa Que Pueyasoori jiyanojia maninia. Nojuajaari pueyaracaanu quijiacuaja. Quiaritia quiyajaariuhuj. Na Sohuanuuri juhua siete saminio casaa niquishano, puetunu tiqiyocuajanaa quijia na quiniucua. Nojoriiri Pueyaso cajishaqui tacoji quituuya.

⁵ Pueyaso Niyanu Jesucristoori seetanujuanaa puera caminiujiunia puetunu na Que Pueyaso Rupaajanaa. Nojuajaari quiarinio na cuaqueyata pa coteetaquiaari samiitianuhua macujiniji. Nojuacuajaari puetunu mijiria jiyaniijianucujanaa Jiyaniijia. Nojuacuajaari pa panijia. Tama na nanacajaaja shootequiaariiri sesa pa miiniujiniji na jayonura pajaniya, tojetaarucujanaa sesa miyashijiacara na jataniniuria pajaniya. ⁶ Nojuajaari pa jiyatequiaari jiyaniijianucua pa quiniuria, na Que Pueyaso secojonaa pa quiniuria pueyacuara, nojuaja pa shuqiritianurajuhuj. ¡Pa Jiyaniijiaari jiyanojia maninia! ¡Pa Jiyaniijia cuara shuqiritiasaaria pueyaracaanu! ¡Nojuacuajaari puetunu cumaacaracajanaa pueyaracaanura! Cuaara naa quiiriatej.

⁷ ¡Nia maure! ¡Pa Jiyaniijia Cristoori cohujajinia tari cunocojiuhua! Puetunu pueyajanaari na niqiniutianiya, noo pojorijuhuj, na motenaatej. Puetunu mijiria

quijiaca pueyapuejanaari nocuaji nujuquenutaniya nojori martenuta. Taaquiriirinij. Naa quiniutianiyacuaaquiniateja na tiuquishacariuhua.

⁸ Pa Jiyaniijia Pueyasoori tama nojuajiniijiaaja sequeya:

“Janiyacuaajaari puetunu casaajanaa coteetanani, na shaajariquianojuhuaj. Puetunu cumaacaracajanaanijia. Janiyacuajaari pueyaracaanu quijiani. Majaari cua supueni quiquiaari. Janiyari niaacua tiuquiriquianohuani”.

Juan niquishacari Cristo puereeta na shacantuuca cumacajinia quiyano

⁹ Janiyari niarta Pueyaso pueyano Juanni. Pa Jiyaniijia Jesuucua tiuujia cua quiniuucujahuaj, janiyari jaaraaja niaata cojiritiashiya naquiya miiniuni. Naaratej, paari mariyata jiyaniijianucuaa jiyatesocoriquianoni. Cunora, paari juhuajaniya naquiya miiniu rejeretaquiaani Jesucristo cumaquishacari pajaniya. Pueyaso rupaa Jesucristojiniji cua poojotanuucua, janiyari shoniniacu caminia jiuujiajinia jatasano quiyani jiya tucuaatiajaacua. Nio jiya tucuaatiaja sesaari Patmos. ¹⁰ Tamonu juuca, pa Jiyaniijia samiitianuhua pa niishiniu juucani, Pueyaso Sohuanuuri cucua niqianu jiyano hua na cumaacata. Janiyari jiyacari rupaa tojirii nacaano cua nijiniarani, juhua trompeta jonenenu. ¹¹ Cua sequeriquiaari:

—Casaa cua niqitiniutianiya quiajaniyani, cuno quia naajiotare nequesoretuneerano. Quiocua na nuhuaji na jiyarore Asia jiyajinia nio siete cua saquiriojosano pueya maapueecua. Nojoriiri Éfeso tiacajinia quiniaa, Esmirna tiacajinia, Pérgamo tiacajinia, Tiyatira tiacajinia, Sardis tiacajinia, Filadelfia tiacajinia, Laodicea tiacajinianio.

¹² Janiyari cua nijiniara tacatequeeni cua niqiniuria cante cucua pocuariquiaani. Cua tacatesacari, janiyari siete samari nujuatacojua niquiriini, orojiniji shipinijosano. ¹³ Cuno samari nujuatacojua tajiniani, janiyari pueyano niquiriini, juhua Pueyaso Niyanu niquishano. Tucuaque toque cushiriquiaari. Na niohuacaacuma puecariquiaari. Na jiriquiajinia camarucuteriquiaa orojiniji shipinishano casaari. ¹⁴ Pueyaracaanu quijia na quiniuucua, na muecaacari tojetaarucujanaa jiyano hua cohuaja quiri quiaa juhua sohuanatuu. Maatia pueya jiuujia niqijia na quiniuucua, na namijaari juhua mani rimianacuri quiaa. ¹⁵ Na niohuacaari nenecuari quiaa juhua jiyano hua naseeca casaajinia mohuaquishano bronca. Naa shacantuuca niquishano quiri quiaari puetunu sesa casaajanaa paracaajia na quiniuucua. Cumaacaraca Jiyaniijia na quiniuucua, na pocuasacari, jiyano hua tojishaari quiaari juhua sararojua,

jiyocuacaanuji mohuaca tija. ¹⁶ Na miaquetajata siete riya muetujuriquiaari. Naajuhuj, nijiniaquetucuaaja mueruuri na rupaamaji mueranacuriquiaa, na rupaa ruuretajaca na puecoonura. Na jiquiocoori jiyanojua shacantuuca quiriquiaa juhua jiyanojua pananu jasacari panacari.

¹⁷ Cua niquishacari nojuaja, janiyari cua puerenuta na pajama pojiyaree juhua macuni. Nojuajaari saaja na miaquetaja niaree cucua. Cua sequereeri:

—Maja puerenu. Janiyacuaja Jesuni. Janiyari puetunu casaajanaa coteetejani, na shaajariquianojuhuj. ¹⁸ Janiyari pueyaracaanu quijiani. Macu quiquiaarinijia. Naajaa, janiyari samiitiaquiaariuhuaani pueyaracaanu saminio cua quiniuria. Janiyari macunucua quiquio riatataja camaruni. Naacuajitij, janiyari cumaacaracani cua tojiyashijiaca cua quejoonura macunucua quiquiojinia. ¹⁹ Pueya niishishocoriquiano, quia niquishano quia naajiotare Juannaa, taa na quiyacuajani, naajuhuj taa mijiria quijiaca miishaanutaniya na nuhujani. ²⁰ Quiarijia quia pohuatareera maatia quia niishiniuria cua niqutishano quiajaniya. Cuno siete riya quia niquishano cua miaquetajata cua muetujusanoni, cunoori siete cua seya. Nojoriiri siete cua saquiriojosano pueya maapue jitianaa. Cuno siete samari nujuatacojua orojiniji shipinijosano quia niquishanojaniuhuj, cunoori siete cua saquiriojosano pueya maapue.

2

Éfeso tiacajinia quiniaa Pueyaso pueya maanuucuaara naajione

¹ Juhucatecara naa cua sequereeri:

—Éfeso tiacajinia quijia cua seruucua quia naajiore, Pueyaso pueya maanu jitianani. Naa quia sequere nojuaja: “Nojuaja, cante siete riya caca na miaquetajatacua-jani, cante siete samaritiu nujuatacojua tajinia rucuanajojuacuajani, nojuajaari naa quia sequeya: ² Janiyari puetunu quia miishanojuanaa niishiyani. Quiaari jiyanojua poonijioquiaa quiria. Naajuhuj, quiaari puetunu casaajanaa rejeretaquiaa juhujaniya. Janiyari niishiyajuhuj, majaari quia shanacunu quiquiaa sesa miijiaca nia tajinia. Naajuhuj, quiaari cuno sapojonuujuaca nequesoreecanu, noo pojori canapuate tama sequeriquiaajaajani: “Canaari Jesu jiyaramiquishanoni”. Naa quia nequesoreesacari nojoritij,

quiaari niishiquianu nojoriiri sapojonuujua ca seetanujua-naa. ³ Quiaari puetunujuanaa taraatia quia miiniu rejere-taquiaa, cucua tiuujia quia quiniucua. Quiaari pueyara-caanu quiria poonijiojua maninia. Quia samaresacari, naa-jaa, majaari quia tarinitianu quiquiaa. ⁴ Puetunu naa quia miishanojuanaani, cunoori maninia. Saniniuujia, cua seque-sano quia tojiri. Majaari panijia quia quiniu tari, juhua co-teenujua. Majaari cuno cua maniniucuanu cutara. ⁵ Cunora, quia niishiri taa jiyanojua cua panijia quia quiquiaarini. Quioojia quia tacatorohua cucua, maninia miiijia quia quini-uhua, taa quia quiquiaari coteenucujani. Quiaa jaara quioojia tacatoyaquiri, janiyari quiocua niniutianiyani, Éfeso tiacajiniji cua patanura quia samaritiu nujuataja. ⁶ Quiaari maniniajuhuaj, sacuaraatia casaa Nicolás niishitiojosano to-jjiaca miishano soojea quia quiniucua. Janiyari cuno po-jori miishano soyajuhua. Nio cua sequesano quiajaniani, cunoori puetunu cua pueyarajanaa. ⁷ Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Pueyaso quishaqui, samiitianijia naanaari nujuataa. Cante puetunu sesa casaajanaa nujuataja cumaa-tiani, janiyari nojori jiyatenutaniya cuno naanajiniji mioo-juarani, pueyaracaanu rishijia nojori quiniuria’ ”.

*Esmirna tiacajinia quiniaa Pueyaso pueya maanuucua
naajione*

⁸ Jiyaniijia Jesucristoori naa cua sequereejuhua:

—Esmirna tiacajinia quijia cua seruucua quia naajiore, Pueyaso pueya maanu jitianani. Naa quia sequere no-juaja: “Naa sequeryari cante puetunu casaajanaa coteete-nacuajani, na tucuatajanio. Nojuacuajaari cusoquiaari, na nuhuaji samiitiaquiaariuhuari. Janiyacuajaari nojua-jani. ⁹ Janiyacuajaari niishiyani, quiaari naquiya mi-ishaquiaa. Quiaari casamiijiujuhua. Naajaa, quiaari jiyanojua casamiriacaaja niya cua shuriucuanu. Janiyari niishiyajuhua, cuno Judiocuacaari quia sesacquiaa. No-joriiri tama sequequiaajaacujua nojoriniaari Pueyaso pueya cutara, Judiocuaca nojori quiniucua. Maja naatej. Nojori cutaraari Satanás pueya maanu. Satanáscaajaari samaruhua jiyaniijia. ¹⁰ Quiaari naquiya miishaanutaniya. Naajaa, majaari puerenu. Satanásri noojiaqueya niajanijini nujuatejotenutaniya nujuatejojuajinia nia sanishaanura, ni-aate cucua tiuujia ca seetanujua. Naajaa, niaari saaja rupaquijia miishaanutaniya naquiya. Quia rejeretariquia saaja. Cua tojijia quia quiriquia pueyaracaanu, quiaa cuaara shaajeyarejaatijia. Quiaa jaara naa miiritij, janiyari quia jiyatenutaniya jiyanojua shuquiriaatia quijia quia quiniuria

pueyaracaanuni. Nio cua sequesano quiajaniyani, cunoori puetunu cua pueyarajanaa. ¹¹ Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Cante cucua na tiuuniucua naquiya na miishaanu rejeretaja pueyaracaanuni, nojuaja cutaraari maja quenaaja naquiya na miishaanu quiniutianiya Pueyaso sanitiosacari na ruuretajaca. Na ruuretajaca cutaraari quejoosanutaniya mani noshijia caminiajinia' ”.

Pérgamo tiacajinia quiniaa Pueyaso pueya maanuucuaara naajione

¹² Jiyaniijia Jesucristoori socua cua sequeree:

—Pérgamo tiacajinia quijia cua seruucuaara quia naajiorejuhuaj, Pueyaso pueya maanu jitianani. Naa quia sequere nojuaja: “Nijiniaquetucuaja mueruu jitianaaari naa sequeya: ¹³ ‘Janiyari niishiyani, cuno tiaca quiaa tii quiyani, cunoori Satanás quiquiojuhuaj. Naajaa, quiaari cua tojijia quiquiaa. Majaari cucua quia tiuuniujiniji quia seetanu quiquiaa. Cua seru Antipas cutaraari mosaaquiaari janiyajiniji pohuatanu na tarinitiaaquiniucua, cuniqui nia tajinia Satanás quishaquini. Naajaa, majaari quenaaja jiyacari quia seetanu quiquiaari cucuaji. Puetunu naa quia miishanojuanaari jyanohua maninia. ¹⁴ Saniniuujia, maja cutaraari nio cua maniniucuanu: tamasaca niajaniyajinijinioori maja na tarinitianu paniniu sesa na miiijionu. Nojoriiri supuetana Balaam niishitiojosano tojijiaca quiyajaa. Balaamcuajaari Israel pueya paraca Balac niishitiojoquiaari na pueya cuaara shiniujiuuria Israel pueya, jaarajaaja Israel pueya miiniuria sesa nojoritia. Naaratej, Balac pueyari Israel pueya mianuutequiaari noo shu, teyanote juaashiquiata shipinijosano casaacuara puecoosano quiquiaaricujani juhua Pueyasooacuara. Naa sacuaaratia nojori queranacujusacari nojori paraatatej, Israel pueyari cuniquijia cuno taatujuri numuetucujuquiaarijiuhuaj. ¹⁵ Naajuhuj, majaari nio cua maniniucuanu: noojiaqueya niajaniyajinijinioori maja na tarinitianu paniniu jyanohua sacuaaratia casaa Nicolás niishitiojosano. ¹⁶ Quiaari nareja niquiquiaa sacuaaratia nojori miiijionu. Cunora, quioojia quia tacatorohua cucua, janiya mariqui quiocua quiaareeri cuno sacuaaratia miijiaca cua miaquejonura cua rupaamaji mueranacujua mueruuta. ¹⁷ Cante numaaracani, nojori cuaara tojiiria Pueyaso Sohuanu sequesano Pueyaso pueya maapuera. Cante tama na cuaqueya miiniu panishanojuaja rejetejani, janiyari na mianuutenutaniya jiyocuacaanu cua racatasano cua pueyarano cua riuriotacajinijini. Janiyari na niquitionutaniya cohuajajau saajiajuhuaj, teyanooqua quiarinio

sesa naajiotasano quiniutianiyacuajani. Majaari tamonu niishiniu quiniutianiya cuno sesa. Saaja na camaruuri na niishiniutianiya, cana cua niqutionutianiya cuno saajiacuajani' ”.

Tiyatira tiacajinia quiniaa Pueyaso pueya maanuucuaara naajione

¹⁸ Jiyaniijia Jesucristoori socua cua pacuterohua sequenuhuaj:

—Tiyatira tiacajinia quijia cua seruucuaara quia naajiore, Pueyaso pueya maanu jitianani. Naa quia sequere nojuaja: “Pueyaso Nyanu, juhua mani rimianacuyano namijiaaracani, juhua bronce mohuaquishano shacantuuca niohuacaracajuhuaaj, nojuajaari naa quia sequeya: ¹⁹ Janiyari puetunu quia miishanojuanaa niishiyani. Janiyacuajaari niishiyani, quiaari Pueyaso panijia, pueya panijiano. Quiaacuajaari Pueyasocua tiuujia. Quiaari maninia poonijiona Pueyasora, pueya quia naacunura. Naajuhuaaj, quiaari juhuajaniya rejeretaquiaa quiaa jaara taraatia miishaariquia. Janiyari niishiyajuhuaaj, puetunujuanaa quia miishano quiria quiarijiani, cunoori socua queraatia coteenu quia miishanojiniji. ²⁰ Saniniuujia, nio cutaraari cua maniniucuaaquishano: cuno Jesabel niaata quiyani, tama na cuaqueyajaaja sequequiaani, nojuajanaari Pueyaso sequesano caminiujiunia pueyara. Quiaari juhuajaniya na shanacuquiaa saaja, sacuaraatia na niishitiojosanota na sapojonura cua pueya. Naa sacuaraatia na niishitiojosanotatej, cuno maajiiri cua pueya shiniujiuquiaa juhuajaniya nojori numuetucujunura na camishoo maajipohua. Cua pueya shiniujiuquiaaariuhuaaj nojori miaquenuunura noo shu, teyanote juaashiquiacata shipinijosano taucuaca pueyasohuacuara puecoosano quiquiaacuajani. ²¹ Janiyacuajaari tari cuno maaji sashiquianu juucuanu, noojia na tacatonura cucua. Majaari na tarinitianu paniniu paanatu na quiniu. ²² Cunora, cua tojiri. Cua saniitionura nojuaja, janiyari na cusotenutaniyani na maquetujinia na matanura. Naajuhuaaj, na numuetucunujuaca jaara noojia tacatoyaquiri sesa nojori miiniuininiji, janiyari jiyanohua naquiya miiniutianiya nojorini. ²³ Noo maajipohuaajuhuaaj, paanatuririria quinioni, cuno paanatujuanaa niishitiojonuucua nojori juhua necojorini, janiyari puetunu nojorijianaa puecoonutaniyani. Naacuajitij, puetunu Pueyaso pueya maapuejanaari niishiniutianiya, janiyari puetunu nojori jiuujiajiniajanaa nojori niishiriojosano niishijiani, nojori panishanoocua nojori jiaatianunio. Naacuajitij, janiyari maninia

miijiaca niajanijajinijinio maninia miiniutianiyani. Niajanijajinijinio sesa miijiaca saniniuujia, nojoriiri saniitiosaanutaniyacujua. ²⁴ Tiyatira tiacajinia quiniaa noojiaqueya niajanijajinijinio saniniuujia, niaari sacuaraatia cuno maaji niishitiojosano ruuretaquiaa saaja. Naajuhuj, majaari nia niishiniu paniniu quijia cuno sacuaraatia casaa jiyasohuaja niishishano, sacuaraatia miijiaca jiyaniquishanoni “jijajeneta casaa, Satanásjiniji niishishano”. Naa nia ruuretenuucua puetunu cuno sesa niishitiojosanojuanaani, cunoori maniniacuaja. Cunora, majaari socua cua nacasunu quiarijia niajanija. ²⁵ Saaja tama nia cuaqueyajaaja nia cojuare jiyanohua, maja nia tarinitianura maninia nia miiniu taa nia miiquiaacuajani. Naa nia miiriquia pueyaracaanu, janiya jaara niaacua tiuquiriohuajaatijia. ²⁶ Cante cua panishano miiquiaa pueyaracaanuni cuara shaajeyarejaatijia, janiyari cuno pueyano jiyatenutaniya tamasaca pueyapue jiyaniijia na quiniuriani, taa cua Que jiyatequiaari janiya jiyaniijia cua quiniuriacuani. ²⁷ Jiyaniijianucua cua jiyatesano pueyani, nojoriiri cumaacaraca quiniutianiya na jiiitasano pueya na tojitiniuria nojuaja. Na tojtiaashijia na saniitiosacari saniniuujia, nojori piyonutaniya jacanauraari, juhua cumamacata pishano conatu. ²⁸ Naajuhuj, janiyari joojea na niqitionutaniyani, juhuaquetaja rijiani, shacantuuca quijia na quiniuria juhua janiyajuhuj. ²⁹ Cante numaacani, nojuaja cuara tojiiria Pueyaso Sohuanu sequesano puetunu Pueyaso pueya maapuerajanaa’ ”.

3

Sardis tiacajinia quiniaa Pueyaso pueya maanuucuaara naajione

¹ Jiyaniijia Jesucristoori socua cua sequere:

—Sardis tiacajinia quijia cua seruucua quia naajiorejuhuj, Pueyaso pueya maanu jiiitanani. Naa quia sequere nojuaja: “Naa sequerari cante Pueyaso Sohuanu jiyaramiquiquiaa cuno siete Pueyaso pueya maapueecuacuajani, nojori jiuujajinia na poonijionura. Nojuacuajaari cuno siete Pueyaso pueya maapue jiiitanaa Jiiitanajanaa. Janiyacuajaari cunoni. ‘Janiyari puetunu quia miishanojuanaa niishiyani. Pueyari quia jiyaniya quiaari saminio. Janiya cutaraari niishiyani quiaari juhua macu. ² ¡Quia maquenu quia jatara! ¡Suteja quia quiri! Quia cumaquiri noo porori canapuee jatarinitiaja rishiyajanaani. Quera cusonuyari. Janiyari Pueyasora quia miishano niqiquiaani. Majaari maninia na quiniu cua Pueyasora. ³ Quiaacuajaari maninia

niishitiojosaaquiaari Pueyaso rupaa. Taa quia niishitiojosaaquiaaricujani, cuno quia niishiriohua. Quioojia quia tacatorohua Pueyasooqua, seetanujuanaa na rupaa tojjia quia quiniuria. Quiaa jaara suteja quiniu paniyaquiri, janiyari canashiyaquiji quiocua niniutianiya juhua nohuasejojuani, quia jiyanihacari maja naasucua juhuanajuaja cua tiuquiniu quiniutianihua. ⁴ Quia jiiitianano pueyajiniinio cuniqui Sardis tiacajiniani, secaja nojoriiniiniioori sesa miiniu ruuretajaca saaja. Naa sesa miiniuria nojori na cojiyaquiniuucuatej, nojoriiri juhua curuushojiyaquishano janiyara. Naaratej, janiyari nojori cushiyotenutaniya cohuaaqueya toqueni, cuata nojori rucuanenonura, cua rupuenaa nojori quiniuucua. Cunoori seetanujuanaa sesa miiniu ruuretajaca nojori quiniuucua, cucua tiuujaca nojori quishacari. ⁵ Canapuate naa sesa miiniu ruuretajacani cua tojtiajaca nojori quiniuucua, nojoriiri naa cohuaaqueya toqueya cushiyotesocoriquianojuhuj. Cunoori quiniutianiya tojetaarucujanaa sesa miyashijiacara cua jiyatesacari nojori. Naajuhuj, majaari cua tuujunu quiniutianiya nojori sesaca cua naajioneejiniji, tee cuniqui pueyaracaanu rishijiacarano cua saquiriojosano pueya sesaca naajiotasano quiyacuajani. Naajuhuj, janiyari nojori jaatianutaniya cua Queecuani, na seya tacojirianio, cua sequenura nojoriiri cua timitiasano pueyaniojua. ⁶ Cunora, cante numaacarani, nojuaja cuaara tojjiria Pueyaso Sohanu sequesano Pueyaso pueya maapuera' ”.

Filadelfia tiacajinia quiniaa Pueyaso pueya maanuucuaa naajionee

⁷ Jiyaniijia Jesucristoori socua cua sequeree:

—Filadelfia tiacajinia quijia cua seruucuaa quia naajiorejuhuj, Pueyaso pueya maanu jiiitianani. Naa quia sequere nojuaja: “Cua tojiri. Janiyacuajaari tojetaarucujanaa maninia miijiani, cua Que tojjia cua quiniuucua. Puetunu cua sequesanojuanaari seetanujuanaa. Jiyaniijiajanaa cua quiniuucua cua supuetana David niti, janiyari cua Que tiotiu riatataja jiiitianani, cua saquiriojosano pueya cua tiuquinitianura cua Queecua. Janiya jaara cuno tiotiu riatareni, tamonuuri maja na naata na tionuhua. Janiya jaara na tioreni, majaari quenaaja tamonu na naata na riatanuhua. ⁸ Janiyari puetunu quia miishanojuanaa niishiyani. Naajuhuj, janiyacujaaari juhua tiotiu riatarucuaa quiocujini, cua rupaa quia poojotanura. Naacuajitij, tamasaari maja na naata tenujunu quiajaniya. Quiaacuajaari saaja secaja cumaacaraca. Naajaa, quiaari cua rootasano

tojjiacuaja. Naajuhuj, majaari cua soojeaca pueya niqiuara quia tamacanu quiqiuani janiya. ⁹ Naa maninia quia miiniucua janiyaracuaatej, janiyari naa maninia miiniutianiya quiarajuhuj. Janiyari noojiaqueya Satanás pueya maanujinijinio mojoquetanijionutaniya quiocuarani. Cuno pojoriiri tama na cuaqueyajaaja sequeja, nojoriniaari seetanujanaa Pueyaso pueya, Judiocuaca nojori quiniucua. Naa nojori sequesacaritij, nojoriiri sapojonuya. Nojoriiri maja Pueyaso pueya. Nojori cutaraari niishiniutianiya janiyari quia panijia cutarani. Quiaacuajaari Pueyaso pueyano, cucua tiuujia quia quiniucua. ¹⁰ Janiyari quia sequequiaarini maja quia tarinitianura quiria poonijionu, quiaa jaara naquiya miishaariquia. Quiaari seetanujanaa naa miiquianu. Naaratej, Pueyaso saniniujiushacari puetunu mijiria quiniaajanaa puereeta naquiya na miiniutia nojori, janiyacuaajaari jiyacari nia cojuanutaniyani. ¹¹ Quia niishiri: janiyari quera tiuquihuani. Majaari quia tarinitianu cua rupaa tojiniu, quiaa mariqui sapojosaareeri cucuaji quia rupatenura. Naacujitij, quiaa jaara cucuaji catere, majaari Pueyaso niqutionu quiniutianiya quiarano na racatasano. ¹² Cante sesa miiniu samiritiaja saajani, cua rupaa tojjia na quiniucua, janiyari jiyocuacaanu Pueyaso Secojoua tiajinia na nujuatenutaniya juhua morijiuni Pueyaso quishaquijianaa, tii cua Que Pueyaso na shuquiritianura pueyaracaanu. Majaari socua cuniquiji na pootiosaanu quiniutianiya. Naajuhuj, janiyari cuno pueyanocua naajiotanutaniya cua Que Pueyaso sesani, quiarinio cua sesajuhuj, cua Que Pueyaso tiaca sesanio. Cuno tiacacuajaari quiarinio Jerusalén tiaca, jiyocuacaanuji roshinitiasaariquiano. ¹³ Cante numaacani, nojuaja cuara tojjiria Pueyaso Sohuanu sequesano Pueyaso pueya maapuera”.

Laodicea tiacajinia quiniaa Pueyaso pueya maanuucuaara naajione

¹⁴ Jiyaniijia Jesucristoori socua naa cua sequeree:

—Laodicea tiacajinia quijia cua seruucuaara quia naajiorejuhuaj, Pueyaso pueya maanu jitianani. Naa quia sequere nojuaja: “Cua tojiri. Naa sequeyari noo pueyano cana sequesante seetanu rupaaajanaacujani. Puetunu na caminiujiushanojuanaa Pueyasojiniji quiarani, cunoori seetanujanaa. Pueyasoori na shipinitiquiaari puetunu na shipinshano casaajanaa. Cunocuaajaari janiya. Cunora, cua tojiri. ¹⁵ Janiyari puetunu quia miishanojuanaa niishiyani. Quiaari

najuhuaana quijia, quia miyaquiniuucua cua sequesano. Seetanujuanaa cua tojiyaquiniu panijia quia quishacari, maara socua maninia quiquiaari cutara maja quia niishiniuria janiya. ¹⁶ Quiaa jaara cua niishiyashijia quiriquia, janiya maara quiocua taraajereni. Saniniuujia, quiaa jaara seetanujuanaa cua tojijia quiriquia, janiya maara quia timitiaren. Saniniuujia, najuhuaana cua pueyano quia quiniuucua, janiyari quia soyani. Naa quia quiniuucuatej, janiyari quera quia saniitioyani. ¹⁷ Quiaari tama sequequiaajaacujua: 'Janiyari casamiriacani. Janiyari puetunu cua panishanojuanaa jiitiaani maninia miiijia cua quiniuucua'. Maja cutaraari quia niishiniu quioojaari cusosu. Janiyara, quiaari tojetaarucujanaa casamiiiju, cariyajuaru, juhuasunio. Quiaa jaara na niishiriquia, quiaa maara tama quia cuaqueyajaaja taraajetaja quiriquia. ¹⁸ Cunora, janiyari quia numooteyani moseeca pueyanonaa, cua rupaa tojijia quia quiri, seetanujuanaa casamiriaca quia quiniuria. Naajuhuj, maninia miiijia quia quiriquia cua cushitiniuria quiajaniya cohuajaque toque, maja cararaatia quia quiniuria juhuasu. Naajuhuj, cua niishitiaja quia masere cutara, quioojia namijia riatenura, seetanujuanaa maninia niquijia quia quiniuria. ¹⁹ Janiyari puetunu cua panishano pueyajanaa nacasujuani, nojori saniitiojuajuhuj. Cunora, quioojia quia tacatore cucua. Tama quioojiaaja quia shiniujiurijuhuj shamaatia cua tojijia quia quiniuria. ²⁰ Cua tojiri. Janiyari quioojia tiotiujiiniji jiiquionuujiani. Cante cua tojiyani, nojuaja cuara na tiotiu riataara cucuaji. Janiyacua nocua tiuquiumiani, nata cua miaquenura, shuquiriaatia cua pocoojonura nata. ²¹ Janiyari cua Paraca shocotaquiaarini cua Que tojijia cua quiniuucua. Naaratej, cua Queeri cua cajitiquiaari na shuriucua, Jiyaniijiajanaa cajitiujinia. Naajuhuj, janiyari Sesaaca shocotajaca cajitijionutaniya cua shuriucua, jiyaniijianucua nojori quiniuriajuhuaj. ²² Cante numaacani, nojuaja cuara tojiiria Pueyaso Sohuanu sequesano Pueyaso pueya maapuera' ”.

4

*Juan niquishacari Jiyocuacaanu Quijiaari maniniuhuaque-
etasaariquiaa*

¹ Na nuhuaji, janiyari mauquiaarini. Janiyari saaja jiya cajiniocua tiotiu niquiquiaari riatasanoni. Shushajanaa cua tojishano rupaa juhua trompeta jonenenuni, cuno rupaa-jaari cua pacutequiaariuhua sequenu. Naa cua sequereeri:

—Miji quia tacama. Janiyari quia niquitiniutianiyani taa nio pa quishacari nuhuaji mijiria quiniaa miishaanutanianiyani.

² Jiyacaritij, Pueyaso Sohuanuuri cucua niquiaari. Cua sohuanu tacaniquiaari jiyocuacaanuuri. Janiyari jiyacari Jiyaniijiajanaa cajitiu niquiriini. Pueyanoori tii cajiriquiaa. ³ Nojuajaari shanohua niquishano quiriquiaa, jyanohua shacantuuca juhua jasp saajia, jyanohua naatuucajuhua, juhua cornalina saajia. Naashiiri na cajitiu caco nujuariquiaa. Jyanohua shacantuuca quiriquiaari neeruuca, pocojuanaque juhua esmeralda saajia. ⁴ Janiyari socua veinticuatro cajitiucua niquirii Jiyaniijiajanaa cajitiu shocuani. Tii cajitiuriquiaari veinticuatro niishijiaca jiyaniijianucua. Cohuajaque toqueya cushiyonuuriquiaari, orojiniji shipinijosano nacaqueyano. ⁵ Jiyaniijiajanaa cajitiujiniji, miacanaari nunujuriquiaa. Jyanohua majacuriquiaajaariuhua. Jiyaniijiajanaa cajitiu tacoji, tii noshiquioriquiaari siete samari. Cunocuaajaari siete Pueyaso Sohuanu, puetunu tiqiyocujanaa quijia na quiniuucua. ⁶ Jiyaniijiajanaa cajitiu tacoji, juhua jyanohua puereetuuca caminiaari quiriquiaajuhua, juhua cohuaja motiiquio maatia niquishiyari na tamajiria.

Jiyaniijiajanaa cajishaqui, cuatro saminio casaari quiriquiaajuhua, puetunu na shocujanaa. Nojoriiri jyanohua queraatia namijiaraca quiriquiaa, na jiriquiaacumaji, na nijiniaacumajinio. ⁷ Cuno cuatro saminiucua casaari maatia niquishano quiriquiaa tamonujiniji. Niquiriyatuuri juhua juuru sare niquishano quiriquiaa. Tamonuuri juhua seru juunu caya niquishano quiriquiaa. Tamonu casaa jiquiocoori juhua pueyano jiquioco niquishano quiriquiaa. Tamonuuri juhua surohua miooru jaano niquishaariquiaacujua. ⁸ Puetunu cuno cuatro saminio casaajanaari seis nesuhuaraca quiriquiaa. Puetunu nojori cuaqueyacumajanaa quiriquiaari na namijiaa, nocuaji na niquitiaja, na nijiniara na niquitiajano. Nojoriiri pueyaracaanu Pueyaso maniniuhuaqueetariquiaa, juuca, niucuanio. Majaari nojori tarinitianu quiriquiaa naa na sequetunu:

—Jiyaniijiajanaanaa, quiaari saa maninija, jyanohua maninia, tojetaarucujanaa maninia miiija! Quiaacuajaari Pueyaso, puetunu cumaacaracajanaa. Quiaari quijiajuhanajaj. Majaari quia supueni quiquiaari. Quiaari quia pueyacia tacateriquianohua.

⁹ Cuno cuatro saminio casaari naa pueyaracaanu maniniuhuaqueetariquiaa Jiyaniijiajanaa, na cajitiujinia cajiyano, pueyaracaanu Jiyaniijiajanaa quiriquiano na quiniuucua.

10 Naa pueyaracaanu cuno cuatro saminio casaa timiti-asacari Jiyaniijajanaacuaatej, cuno veinticuatro niishijiaca jiyaniijianucuaari jaarajaaja mojoquetacoqueequiaa Jiyaniijajanaacuara. Nojoriiri na tuhuajaa jartaqueequiaa Jiyaniijajanaa cajitiu pajama, naa na sequenuta:

11 —Nioori quiara, Jiyaniijianaa. Quiaa cutaraari Jiyaniijajanaa, maja canaa. Quiaacuajaari canaa Pueyaso. Quiaa cuaara timitiasaaria pueyaracaanu, jiyanohua maninia sha-cantuuca quijia quia quiniuucua, puetunu cumaacaracajanaa quia quiniuucujuhua. Quiaacuajaari puetunu casaa-janaa shipiniquiaari. Tama quia paniniuucujaja, quiaari na shipiniquiaari.

5

Rupanacujusano naajioneejiniji pohuatasano, Borrego Niquiojuajinijinio

1 Na nuhuaji, janiyari Jiyaniijajanaa cajitiujinia cajinia juaashiquiajinia niquirii naajioneeni. Na miaquetajara na cacariquiaari. Cuno tucanee naajioneeru jiuucosano quiriquiaa. Naajioori nocua quiriquiaa, na nijinia, na jini-acumano. Cuno naajioneejinia, siete naajioori tii naajio-tasano quiriquiaa. Cuno siete naajio coteejajiniani, juhua roshitia rupanacujutasanoori quiriquiaa. ² Jiyacaritij, janiyari jiyanohua cumaacaraca Pueyaso seru niquiriini. Naa nequesoreeriquiaari jiyanohua na nacanuta:

—¿Cante seetanujuanaa maninia miijia cutarani? Cuno cuaara rupartaara rupanacutasano, na riatanura cuno naajionee.

³ Jiyacaritij, majaari quenaaja maninia miijia quiniu quiquiaari jiyocuacaanu, jiyajinia, jiya cariquimiano na riatanura cuno jiuucosano naajionee. Tojetaarucujanaa shaaqui quiquiaariiri cuno naajionee serojoriquiano.

⁴ Naaratej, janiyari jiyanohua nujuqueriquiaani, tojetaarucujanaa shaaqui maninia miijia quiyaquiniuucua cuno naajio na riatanura, na serojonurano. ⁵ Cua nujuquesacari, tamonu cuno veinticuatro niishijiaca jiyaniijianucujajinijinioori cua sequeree:

—Maja nujuquenu. Quia cumantare. Quia niquiri. Pa Jiyaniijajanaacuajaari jiyanohua cumaacaraca. Tariucuacaanu Pueyaso Rupaajinia, nojuacuajaari miriqui sequeshiya Juurunu saretá, Judá niquiohuacuajinio supueriquiano, Jiyaniijajanaa na quiniuria na supuetana David niti. Nojuacuajaari pa paraca Satanás shocotana, tojetaarucujanaa Jiyaniijia Pueyaso tojjia na quiniuucua.

Naaratej, nojuaja na naata cuno siete naajio coteeja rupanacujutasano rupareetanu na serojosocoriquiano.

⁶ Jiyacaritij, janiyari Borrego Niquiojua niquiriini Jiyaniijiajanaa cajitiu tacoji nujuaano, cuno cuatro saminio casaa tajiniano. Cuno veinticuatro niishijiaca jiyaniijianucuaari na shocua quiriquiaajuhuaaj. Borrego Niquiojuaari seetanujuanaa juhua mosano samiitianohua niquishaariquiaa. Nojuajaari siete jiyaniijia tuhuajaaraca quiriquiaa, puetunu cumaacaracajanaa na quiniuucua. Naajuhuaaj, siete namijiaaraca quiriquiaari. Cuno na siete namijiaani, cunocuajaari Pueyaso Sohuanu, Pueyaso jiyaramiquishano puetunu mijiriajanaa. ⁷ Cua niquishacari, Borrego Niquiojuaari Jiyaniijiajanaa cajitiujinia cajiyano juaashiquiajiniji jiunio-cosano naajionee masetaree. ⁸ Nojuaja jaara cuno naajionee cacariquiaa tari, cuno cuatro saminio casaari nocuara mojoquetacoquiaari, cuno veinticuatro niishijiaca jiyaniijianucuanio. Puetunu nojorijianaari taquiniojosano casaa jitiariquiaa. Naajuhuaaj, orojiniji shipinijosano suhuococua mueetacoriqiaari, mishaja shanohua jaanutajata. Nojori mueetacosano shanohua jaanutajani, cunoori nio jiyajiniji Pueyaso muerasu secojonuusano Pueyaso. ⁹ Nojoriiri Borrego Niquiojua jaaquequetariqiaa nio quiarinio jaaquequejosano:

—Saaja quiajaniyari seetanujuanaa maninia miijia. Naaratej, quia naata cuno naajionee patanu quia rupareetanura na rupanacujusano. Quiaari jiyano-hua maninia. Naaratej, quiaari jiyajinia quiniaacuara mosaaquiaari. Quiaari quia nanacata pueya masequiaari Pueyasora puetunu tamaatiuucua pueyapuejinijiniojuanaa, puetunu tamaatia rupaa pocuajacajinijiniojuanaa, puetunu tiacajinijiniojuanaajuhuaaj, puetunu jiyacajinijiniojuanaanio. ¹⁰ Quiaari nojori jiyatequiaari tama quia pueyarajaaja, puetunu nojorijianaa quiniuria jiyaniijianucua, pueyacuara secojona, pueyaracaanu nojori maniniuhaqueetanura pa Pueyaso. Nojoriiri jiyacua jiyaniijianucua quiriquianojuhuaaj.

¹¹ Na nuhuaaji janiyari tojetaarucujanaa jiyano-hua jiyano-hua queraatia Pueyaso seya niquiriini. Jiyaniijiajanaa cajitiu shocua mariquiaari, cuno cuatro saminio casaa shocuaajuhuaaj, niishijiaca jiyaniijianucua shocuanio. Nojoriiri jiyano-hua queraatia quiquiaari, juhua jaaquia, serojiyaquishoo. Janiyari nojori tojirii pa Jiyaniijia Jesu maniniuhaqueetaanoni. ¹² Nojoriiri naa na sequeturiquiaa na nacanuta:

—¡Pa Jiyaniijaari jiyano hua maninia! Pueyacuara mosaaquiaariiri juhua borrego niquiojua. Naaratej, saaja nojuaja cuaara quiiria Jiyaniijaajanaa pueyara-caanura. Saaja nojuaja cuaara jiitiaara puetunu casamijianaa. Saaja nojuajaari tojetaarucujanaa niishijia. Nojuajaari puetunu cumaacaracajanaa. Cuaara naa quiiria pueyaracaanutej. Puetunu quijiaca casaajanaa cuaara tojitiaara pa Jiyaniija. Saaja nojuaja cuaara quiiria jiyano hua timitiasano. Puetunu quijiacajanaa cuaara na maniniu hua queetaara.

¹³ Naajuhuj, janiyari puetunu Pueyaso shipinishano samini casaajanaa tojiriini, jiyocuacaanu quijiaca, jiyajinia quijiaca, jiya cariquimia quijiacajuhuj, shoniniacu caminiajina quijiacanío. Puetunu nojorijianaari jiyano hua na timiniutia sequeturiquiaa:

—¡Cuno, na shacantuuca cumaacajinia cajiiani, Borrego Niquiojuanio, nojori cuaara maniniu hua queetasaaria pueyaracaanu! ¡Puetunu casaajanaa cuaara tojitiaara nojori pueyaracaanu! ¡Nojori cuaara timitiasaaria-juhuj! ¡Saa nojorijia cuaara na cumaaca jiitiaara pueyaracaanura!

¹⁴ Jiyacaritij, cuno cuatro samini casaari nojori riuhaneriquiaa saniniuuja:

—¡Taaquiririnij! ¡Cuaara naa quiiriatej!

Cuno veinticuatro niishijia jiyaniijanucuaari saniniuuja mojuquetacoqueecujua cuno pueyaracaanu Quijiaca cuara, nojori na shuquiritianura.

6

Jiuniocosano naajioneecua seis rupanacujutasano rupa-reetasacari

¹ Na nuhuaji, cua shootiasacari, Borrego Niquiojuaari co-teenujuanaa cuno naajioneejinia rupanacutasano ruparta-ree. Naa miiriiri cua niquitishaanura taa mijiria quiniaa miishaanutaniya jiyano hua naquiyani, quera nio jiya pueque-sacari. Jiyacaritij, janiyari tamonu cuno cuatro samini casaajinijinio tojirii sequeyanoni: “¡Miji!”. Na pocuanuuri juhua miacana majanu tojishano quiri quiaa. ² Naa na sequesacari, janiyari cohujohuana caballo niquirii nocua canujianoni. Na nijinia cajiniaari balista cacari quiaa. Jiyacaritij, jiyaniijaara shipinishano nacaque cushitishaareeri. Na nuhuaji, na caballoori na netetaaree jiyocua na quianura, tii na miaquejonura Pueyaso paraa. Majaari quenaaja na nujuatasaanu quiniutianiya.

³ Na nuhuaji, Borrego Niquiojuaari segundo rupanacutasano rupartaree. Janiyari jiyacari segundo saminió casaa-jiniñinio tojirii sequeyanoni: “¡Miji!” ⁴ Naa na sequesacaritij, naatuhuana caballoo nocua canujumaa. Na nijinia cajiniaaari cumaaca niqutiosaare. Naacuajitij, nojuajaari mijiria quijiaca tojetenutaniya tama nojori miaquetoójonurajaaja. Cunora, nojuajaari puereetunee nijiniaquetucuaaja mueruu niqutiosaaree.

⁵ Na nuhuaji, Borrego Niquiojuaari tercero rupanacutasano rupartaree. Janiyari jiyacari tercero cuno saminió casaajiniñinio tojirii sequeyanoni: “¡Miji!” Jiyacaritij, janiyari mueruhuana caballo niquirii nocua canujiyanoni. Na nijinia cajiniaaari niiquia shanacujutaja jaasutetariquiaa, mijiria quiniaara mijajau shanacujusaanura nojori serotasaa-nura. ⁶ Jiyacaritij, janiyari cuno cuatro saminió casaa tajiniji rupaa tojirii naa sequeyanoni:

—Niquiriyatu juuca poonijionu sami, cuara niqutiosaaria saaja niquiriyatu kilo trigo jajau. Jaara trigo jajau paniaquiri, cuara niqutiosaaria tres kilo cebada jajau. Saniniuujia, majaari shiyocua shanacujunu cutara, vinonio. Cunocuaajaari queraatia quiniutianiya cutara.

⁷ Na nuhuaji, Borrego Niquiojuaari cuarto rupanacutasano rupartaree. Jiyacaritij, janiyari cuarto saminió casaa tojirii naa sequeyanoni: “¡Miji!” ⁸ Janiyari jiyacari tiirihuana caballo niquirii nocua canujiyanoni. Na nijinia cajinia sesaari quiriquiaa “Cusojuana”. Macunucua Quiquioori na neteyotariquiaa, Cusojuana puecoosano na rijionura na miitiasocoriquiano. Nojoriiri cumaaca niqutiosaaree jiyanhua queraatia pueya na cusojuanura. Naacuajitij, jiyanhua queraatia pueyari puecoosaanutaniya miaquetoójosacari. Tamasacaari cusonuunutaniya jiyanhua miaajesacari. Tamasacaari paaqueja cusonu cusonuutanutaniya. Naajuhuj, tamasaari sareya sootesaanutaniya. Sacocua satejosaanutaniyajaariuhuj. Naacuajitij, jiyanhua jiyanhua queraatia pueyari cusojuasaanutaniya. Na nuhuaji, puetunu macunucujanaa jaara serojosaare, puetunu nojorijianaari na cajiniocua quiniutianiya puetunu mijiria quijiaca pueya cajiniocujiniñiniojuanaa.

⁹ Na nuhuaji, Borrego Niquiojuaari quinto rupanacutasano rupartaree. Jiyacaritij, janiyari Pueyasoocuaara catijiasaqui juhuacutu cariquiaco niquirii Pueyaso pueya sohuanuhuani, noo pojori canapuate puecoosaaquiaaricujani Pueyaso Rupaa tojijiaca nojori quiniuucua, Jesucristojiniji nojori pohuatanuucujuhuj. ¹⁰ Jiyacaritij, nojoriiri naa jiyanhua nacaree:

—¡Jiyaniijianaa! ¡Quiaari saa maniniaja! Quiaari quia sequesano miiija seetanujuanaa. ¿Taa quia tarishiniutianiya-jaara canaa puecoonaa quia nequesoreenurani, nojori quia naminiuria canaacua saniniuuja?

¹¹ Jiyacaritij, puetunu nojorijianaari cohuajaque toqueya niquitiojosaaree. Nojoriiri naa sequesaaaree:

—Socua rupaquijia nia samaaterejaara, Pueyaso saquiri-ajosano niarta Pueyaso pueyajinijinio cuaara puecoosaaria nia shiriajaatijia, taa nia puecoosaaquiaaricuaani.

¹² Na nuhuaji, Borrego Niquiojuaari sexto rupanacutasano rupartaree. Jiyacaritij, rijiaari jiya jiuuquiuijutiaree jyanohua. Janiyari na niquiriquiaani. Pananuri mueruucara quiqiii juhua mueruque toque. Racaari naatuucara quiqiii juhua nanaca. ¹³ Riyari jiya cajiniocuaiji toteree jiyocua, taa satuna totequiaa jyanohua paratucaricuaani. ¹⁴ Jiya cajiniocuaari shaajequeejuhuj, juhua tucuanee naajioneeri jiuniocosaaree. Shoniniacu caminiajina, puetunu jiya tucuaatiajajanaa, puetunu tuhuanuhujuhuj, puetunu cunojuanaari jiyajeetaquee na nujuatusaquiji. ¹⁵ Nojori puerenuta, mijiria jiyaniijianucuaari raacajinia jamaatiushii, sai tajinia tuhuananuhujiniajuhuj. Naa jamaatiushiiijaariuhua noo pojori: puey-acia paaretajaca na cumaacatej, soldadohua jiyaniijianucua, jyanohua casamiriaca pueya, pueya tojishano pueya, poonitijosano pueyajuhuj, puetunu narta pueyajanaanio. Puetunu pueyajanaari naa mashiriquiaa juucua. ¹⁶ Nojoriiri tuhuananuhua sequeriquiaa, sainio:

—¡Canaacua nia tiyare canaa nia jamonura cunoocuaiji, na cajitiujinia cajiya na shacantuuca cumaacajiniani! ¡Canaa nia jamojore maja na niquiara canaa quiniuria, naajuhuj, maja Borrego Niquiojua saniitionura canaa, jyanohua na juaashacari! ¹⁷ Quiarijiacuajaari Pueyaso saniitionu juuca. Jyanohua puereeta. ¿Cante na naata na nujuatanuni? Shaaqui.

7

Pueyaso saquiriojosano pueyajiniji pohuatasano, Israel niquiohuacuajinio supueno pueyajinijinio

¹ Naa cua niquiniu nuhuajitij, janiyari socua cuatro Pueyaso seya niquirii nio jiya shocua nujuatiuyano tuhuaquini, pananu muetasamaji, na tiuquishocora, na muetasamaji na muenecara, na miaquetajaranio. Nojoriiri na nujuatusaquiji paratu tenujuriquiaa maja na piyaronura jiya, shoniniacu caminia, nacuhuanio.

² Jiyacarijuhuj, janiyari socua tamonu Pueyaso seru

niquirii jiya pajamaji niyanoni. Pueyaso naajio jiriataja casaa cacariquiaari. Nojuajaari narta cuatro Pueyaso seyacua nacaree jiyanoehua, noo pojoriicua canapueete cumaacaraca quiriquiaacuajani nojori sesonura jiya, shoniniacu caminiano. Naa nojori sequereeri:

³—¡Cuaara! ¡Maja juhuanojuaja jiya nia sesonu, shoniniacu caminia, nacuhuanio, canaa niojiyaquishacarijia Pueyaso sesa, na pueya jiniji, na niishishaanura nojoriiri Pueyaso pueya!

⁴ Janiyari jiyacari tojiriini taa pueyate na jiniji jirioosaareeni. Puetunu supuetana Israel doce niquiohuacuajinio supueno pueyapuejinijinioori ciento cuarenta y cuatro mil pueya jirioosaaree. ⁵ Naacuajitij, supuetana Judá niquiohuacuajinio supueno pueyajinijinioni, doce mil pueyari jirioosaaree. Supuetana Rubén niquiohuacuajinio supueno pueyajinijinio, doce miljuhuaj. Supuetana Gad niquiohuacuajinio supueno pueyajinijinio, doce miljuhuaj. ⁶ Supuetana Aser niquiohuacuajinio supueno pueyajinijinio, doce miljuhuaj. Supuetana Neftalí niquiohuacuajinio supueno pueyajinijinio, doce miljuhuaj. Supuetana Manasés niquiohuacuajinio supueno pueyajinijinio, doce miljuhuaj. ⁷ Supuetana Simeón niquiohuacuajinio supueno pueyajinijinio, doce miljuhuaj. Supuetana Leví niquiohuacuajinio supueno pueyajinijinio, doce miljuhuaj. Supuetana Isacar niquiohuacuajinio supueno pueyajinijinio, doce miljuhuaj. ⁸ Supuetana Zabulón niquiohuacuajinio supueno pueyajinijinio, doce miljuhuaj. Supuetana José niquiohuacuajinio supueno pueyajinijinio, doce miljuhuaj. Supuetana Benjamín niquiohuacuajinio supueno pueyajinijinio, doce miljuhuaj. Puetunu nio pojorijianaari na jiniji jirioosaaree.

Cohuajaque toqueya cushitishano pueya maanu

⁹ Naa cua niquitishaanu nuhuajitij, janiyari jiyanoehua queraatia pueya niquirii maanoni juhua tereya. Nojoriiri puetunu nio tiqiyocua jiyacajinijiniojuanaa pueya quiriquiaa, puetunu tamaatiuucua pueyapuejinijiniojuanaano. Quiriquiaajaariuhua puetunu tamaatia rupaaca pocuajacajinijiniojuanaa, puetunu tiqiyocua tiacajinijiniojuanaano. Naa tojetaarucujanaa jiyanoehua queraatia nojori quiniuucuatej, majaari na naata serojosaanu quiriquiaa. Nojoriiri Pueyaso shacantuuca cajitiu tacoji nujuaturiquiaa, Borrego Niquiojua tacojinio. Puetunu nojorijianaari tucuaqueya cohuajaque toqueyaraca quiriquiaa. Shuquiriaatia nojori quiniuucua, nojoriiri juhua

teruhanajaquera niquishano mueetacoriquiaa. ¹⁰ Puetunu nojorijianaari naa mariyata sequeriquiaa na nacanuta:

—¡Jiyanohua maniniaari pa Que Pueyaso, na shacantuuca cajitujinia cajiyani, Borrego Niquiojuajuhuj. Nojoricuajaari pa jiyanooquiaari, tojetaarucujanaa quiariniora jatanishano pa quiniuria!

¹¹ Naajuhuj, puetunu Pueyaso seyajanaa, canapuate shacantuuca cajitiu shocua nujuaturiquiaacuajani, niishijiaca jiyaniijianucua shocujuhuj, cuno cuatro saminio casaa shocuanio, nojoriiri Pueyasoocuaa jacamaturee nojori timitianura nojuaja. ¹² Pueyaso na timitiatuacari, naa seque-
tureeri:

—¡Taaquiriirinij, seetanujuanaacuaj! ¡Canaari pueyaracaanu quia maniniuhaqueetanutaniyani! ¡Quiaacuajaari canaa timitiasano! ¡Saaja quiajaniyari seetanujuanaa niishijia cutara! ¡Paacarasho, canaa Pueyasonaa! ¡Quiaa cuara tojishaaria pueyaracaanu! ¡Quiaari canaa Jiyaniijiajanaa pueyaracaanura! ¡Quiaari puetunu cumaacaracajanaa maninia quia jitianura quia shipinishano! ¡Cuara naa quiiria pueyaracaanu, pueyaracaanutej!

¹³ Jiyacaritij, tamonu cuno veinticuatro niishijiaca jiyani-
ijianucujinijinioori cua nequesotaree:

—¿Canapuate cuno pojorini, cohuajaque toqueyaracani?
¿Tejenote nojorini?

¹⁴ Janiyari na riucuaaree saajani:

—Quiaa cutara na niishiya, jiyaniijianaa.

Cua sequereeri:

—Nojoricuajaari jiyajinijinio pueya. Jiyajinia nojori quishacarijia, nojoriiri cuno jiyanohua naquiya miishacari rejeretajaca quiquiaari. Nojori tiuuniucua Borrego Niquiojuaacua, nojoriiri puetunu sesa nojori miishanojiniji juhua nojori toqueya jeequejoquiaari Borrego Niquiojua nanacajinia. Naacuajitij, nojoriiri cohuajaqueya toqueya cushiyonuya. ¹⁵ Naa Pueyaso jiyanooshano pueya nojori quiniuucuatej, nojoriiri Pueyaso cajishaqui tajoji quiijia. Nojoriiri pueyaracaanu tii Pueyaso Secojoua tiajinia miiquiaa Pueyaso panishano, juuca, niucuanio, nojori timitiasacari nojuaja. Na shacantuuca cumaacajinia cajijiani, nojuajaari na cumaaca teetenutaniya nojori caco, jatiqui na quiniuria nojoritia pueyaracaanu. ¹⁶ Naacuajitij, majaari socua nojori miaajenu quiniutianiya, jiyamuenunio. Pananuuri maja socua nojori na catijianu quiniutianiya. Naajuhuj, majaari socua nasaatia pananu jartanu nojori niishiniu quiniutianiya. ¹⁷ Borrego Niquiojuacuajani, Jiyaniijiajanaa cajitiu jiuujiajinia cajijiani, nojuajanaari

nojori jiitianutaniya juhua tama na borregohuajaaja. Nojuajaari nojori rucuanejotanutaniya, nojori na raatenura pueya samiitianijia mohuaca pacartajajiniji, pueyaracaanu shuquiriaatia quijiaca nojori quiniuria. Pueyasajuanaacujaari nojori namijiaaca tujuunutaniya nojori namijajiniji.

8

Séptimo rupanacutasanojiniji pohuatasano, shanhua jaanutaja patajajinijinio

¹ Borrego Niquiojua jaara séptimo rupanacutasano ruparta-ree, cuno naajionee saacatanura puetunujuanaa, tojetaarucujanaa sanaacara quiquiiri jiyocuacaanu pueyaracaanura. Maja cua niishiniu, media horaruhua. ² Na nuhuaji, Pueyaso tacoji, janiyari siete Pueyaso seya niquirii nujuatiuyanoni. Nojoriiri jiyacari siete trompeta niquitiojosaaree. ³ Na nuhuaji, socua tamonu Pueyaso seruuri shanhua jaanutaja pataja pamaa, orojiniji shipinishano. Orojiniji shipinishano Pueyasooacara catijiaja casaa tacoji nujuaseeri, Jiyaniijajanaa cajitiu tacoji. Queraatia shanhua jaanutaja niquitiosaareeri Pueyasooacara na catijianura. Jaanutajaari catijiasaariquiano puetunu Pueyaso pueya secojonuusanotajanaa, Pueyasooacara na jaanujunura cuno catijiaja casaa-jiniji. ⁴ Naacuajitij, Pueyaso seruuri Pueyaso pueya secijosano tacanirii Pueyasooacara, shanhua jaanujua najacata. ⁵ Na nuhuaji, cuno Pueyaso seruuri catijiaja casaa-jiniji na shanhua jaanutaja pataja mishinirii nishiyata. Jiyanhua na majiriataree nio jiyacuaari. Miacanaari ritia nunujuquee. Jiyanhua majacureeri. Jiyanhua cojutunereeri. Rijiaari jiuquiujutiareejuhuj.

Trompetaa jonenejosacari

⁶ Cuno siete Pueyaso seya, trompetaa cacariquiaani, nojoriiri jeeceanecoree na trompetaa na jonenenura. ⁷ Jiyacaritij, niquiriyatu cuno Pueyaso serujinijinioori na trompeta jonenenu coteeree. Jiyacaritij, miacanajaa shiniitijuaacaari, mariyata mani cojitishano nanacata jiyocua jartasaaree. Jiyari quera na cajiniocua cateree, puetunu na nacuhuatajanaa, na jiyasocuatanio.

⁸ Segundo Pueyaso seruuri na trompeta joneneere. Jiyacaritij, casaa juhua puereetuuca tuhuananu noshiyanoori shoniniacu caminiajinia jatsaaree. Quera shoniniacu caminia cajiniocuaari nanacara quiquii. ⁹ Puetunu shoniniacu

caminiajinia quijiaca casaajanaari, quera na cajiniocua cusonuuree. Naajuhuj, shoniniacu caminiajinia ruhuane-tasano puereetuuca buqueyajinijinoori, quera puetunu na cajiniocujanaa sesosaaree.

¹⁰ Tercero Pueyaso seruuri na trompeta jonenerree. Jiyacaritij, puereetuuca rijiaari jiyocuacaanuji tiqiii, jiyano-hua nishitiuucua juhua shucuenaja jaamasu noshitishano. Tiya-reeri quera na cajiniocua nio jiyacua moocuajinia, mijiria cuariyajiniajuhuj. ¹¹ Cuno rijia sesaari quiriquiaa “Piiquia”. Cunora, tee cuno rijia tiyareeni, puetunu cuno mohuacajanaari piiquiaa quiquii. Pueya ratusacari cuno mohuaca, queraatia pueyari saaja cusonuuree.

¹² Cuarto Pueyaso seruuri na trompeta jonenerree. Jiyacaritij, casaari pananuucua pitiaree, racaacua, quera na cajiniocua riyacuanio. Cunora, puetunu mijiria cuhuatajaca casaajanaari quera na cajiniocua sesosano quiquii. Quera na cajiniocuaari ninishiqui quiriquiaa. Cunora, pananuuri maja na cuhuatanu quiriquiaa quera juuca cajiniocua. Naajuhuj, riya, racanio, majaari na cuhuatanu quiriquiaa quera niucua cajiniocujuhuj.

¹³ Na nuhuaji, janiyari juhua puereetuuca surohua miooru niquirii jiya cajiniocuani. Na jaasacari naa nacariquiaa jiyanohuari:

—¡Puereeta, puereeta, puereeta! Seetanujuanaa jiyano-hua puereeta quiniutianiyari jiyacua quijiaca pueyara, jiuujia-naraca cureecono Pueyaso seya jaara jonenerree, canapue-te joneneyaquiyajaa juhuanujuajacuajani.

9

Quinto trompeta jonesacari

¹ Na nuhuaji, quinto Pueyaso seruuri na trompeta jonenerree. Jiyacaritij, janiyari jiyocuacaanuji jiyocua tinio rijia niquiriini. Cuno rijiaari tiotiu riatataja niqutiosaaree, puequeetuuju raa na riatanura. ² Na riatasacari, najacaari nojomaa juhua puereetuuca cuhuariquia sesacari. Pananu namijia tiomaari. Jiya cajiniocuaari mueruucara quiquiijuhuj. ³ Sequeruuri cuno najacajiniji mueratumaa. Puetunu nio jiyacuajanaa paaquemaari. Sequeruuri cumaaca niqutiosaaree nojuaraca na quiniuria juhua turucuaniniu. ⁴ Sequeruuri rootasaaree maja nojori miaquenura jiyasocua, nacuhua jaamasujuhuj, puetunu moritajaca jaamasunio. Sequeru cutaraari jiyaramiquishaare puetunu pueyapuejanaa na sojonura, canapue-te na jiniji jirioyaquishoo quiriquiaa Pueyaso sesatacuajani. ⁵ Sequeruuri rootasaareejuhuj, maja nojori

cusojuanura pueya. Cinco raca cuaara nojori shocojoora cutara, pueyaracaanu sequeru saashi noosacari. Cuno sequeru saashiiri juhua turucuaniiinu saashi noonutaniya.

⁶ Naa pueya miishacari naquiya na noonutatej, pueyari cusonu paniniutianiya juucua. Saaja cusoyaquiniutianiyari. Jiyanoehua na shaajenu panishacari juucua, nojoriiri saaja rishiniutianiya, jiyanoehua naquiya nojori miishacari.

⁷ Sequeruuri puereeta niquishano quiriquiaa juhua miaquetoojonura jeenucuasano caballohua. Sequeruuri casaa jiiitariquiaa na nacajinia juhua jiyaniijianucua oraajini shipinijosano nacaqueya. Nojori jiquiocoori juhua pueyano jiquioco niquishano quiriquiaa. ⁸ Nojoriiri juhua maaji muecacaraca quiriquiaa, tucamuejarujuri. Juhua juuruu sare quiacaraca quiriquiaajaariuhaj. ⁹ Nojori jiriquiaqueeri cumueca quiriquiaa juhua turtuco. Nojori jaacuatusacari, na nesuhuari jiyanoehua cojuatuneriquiaa juhua caballohua jayotasacari queraatia rucanejotaruhua, miaquetoojonuucua na netecuatusacari. ¹⁰ Cuno sequeruuri juhua turucuaniiinu nojuacaraca quiriquiaa. Jiyanoehua noonacuracajuhaj. Jaara nojori saare, cunoori quiquiaari nojori na noonura cinco raca. ¹¹ Cuno sequeruuri jiyaniijiaraca quiriquiaa. Nojuajaari Sesaaca seru. Cuno puereeta puequeetuuju raa camarujaariuhaj. Hebreo rupaaajinia, na sesaari “Abadón”. Griego rupaaajinia saniniuuja “Apolión”. Pueyano rupaaajinia saniniuuja, nioori sequeya “Pueya Puecoona”.

¹² Janiyari naa niquitishaareni taa coteenujuanaa naquiya miishaanu quiniutianiyani, cuno jiuujianaraca naquiya miishocoriquianojiniji. Socua caapiquiiri cureyaja na nuhaajiria.

Sexto trompeta jonesacari

¹³ Sexto Pueyaso seruuri na trompeta jonere. Janiyari jiyacari rupaa tojirii pocuaanoni, shanoehua jaanutaja catijiaa juhuacutu cuatro tuhuajaa tajiniji, Pueyaso taccoji nujuatajani, orojiniji shipinishanoni. ¹⁴ Cua tojishano rupaani, noo sexto Pueyaso seru sequereeri, na trompeta cacariquiaani:

—Cuno cuatro Sesaaca seya quia saacarojore, puereetuuca Eufrates moo shuriucua morojosano quiyani.

¹⁵ Jiyacaritij, cuno cuatro Sesaaca seyari samaacarojosaree jiyanoehua queraatia pueya nojori puecoonura, quera na cajiniocua puetunu mijiria quijiaca pueyajinijiniojuanaa. Cuno Sesaaca seyari tariucuaaanu naa morojosano quiquiaari, jeenucuasano nojori quiniuria namitia jiyacari nojori cartesaanura, cuno hora, cuno juuca, cuno racara, cuno marijara. ¹⁶ Janiyari tojiriini cuno cuatro Sesaaca

seya soldadohuari, dosciento millones pueya quiriquiaa saa caballohuaracaja.

¹⁷ Janiyari cuno caballohua niqutishaaree juhua cua maquenujiniani, na nijinia cajitiuniaanio. Jiyanhua tamaatia niquishano quiriquiaari. Puetunu nojori jiriquiacajanaari turtucojiniji shipinijosano casaata mishiquiojosano quiriquiaa. Cuno, nojori naatiyaquishaanuucujaji nojori cushiyosano turtuconi, cunoori puereeta niquishano quiriquiaa; naatuuca juhua mani, nentuuca juhua jacinto saajia, pocojuanaque juhua azufrejuhuaj. Puetunu cuno caballohua nacacajanaari juhua juurunu sare nacaca niquishaariquiaa. Maniiri nojori rupaamaji rimianacuriquiaa. Najacaari nojonuucuariquiaajuhuj, azufrenio. ¹⁸ Cuno jiuujianaraca puereeta casaata quera na cajiniocua puetunu pueyajinijiniojuanaari cusojuasaaree. ¹⁹ Naacuajitij, caballohuari cumaaca jiitariquiaa na rupaama, na pituujiniajuhuaj, nojori puecoonura pueya. Na pituucuaari juhua sacocua niquishano quiriquiaa. Juhua sacocua nacacaraca quiriquiaajaariuhuj pueya na sajitiajara.

²⁰ Cureeno pueya, canapuate maja na puecoosaanu quirii cuno jiuujianaraca puereeta casaatani, nojoriiri sesa miniu tarinitiaaquiriquiaa saaja. Nojoriiri samaruhua secjonu tarinitiaaquiriquiaa. Naajuhuj, nojoriiri orojiniji shipinijosano casaa shuquiritariquiaa Pueyaso niti, platajiniji shipinishano, broncejiniji, saajiajinijijiuhuaj, macajinijinio. Puetunu cunojuanaa, nojori jiyatesano tama na pueyashuarajaajani, cunoori maja na niquniu. Majaari na tojiniu. Majaari na rucuanenujuhuaj. ²¹ Naajuhuj, majaari pueya tarinitianu quiriquiaa narta pueya monu, shimiojonujuhuaj. Naajuhuj, majaari nojori tarinitianu quiriquiaa na camishoo maajipohua numuetucujunu, maajishuriu numuetucujunujuhuaj. Nohuasejonu tarinitiatiyuquiriquiaajaariuhuj.

10

Pueyaso seru mueetasano tucuanee naajioneeniyojuajiniji pahuatasano

¹ Na nuhuaji, janiyari socua tamonu jiyanhua cumaacaraca Pueyaso seru niquirii jiyocuacaanuji roseyanoni. Cohuaja najacajinia cuhuajaatariquiaari. Na nacaacua camarucuteriquiaa naashiiri. Na jiquicoori jiyanhua shacantuuca quiriquiaa juhua pananu. Na cashacucuaari juhua mani niquishano quiriquiaa, naatej, taa mani nujuaa na noshishacaritij. ² Na miaquetajara

mueetariquiaa shiitianiyojua naajioneeri, tariucua riatasano. Nio jiyacua nujuaseeri. Na miaquetajara na niohuaca niaree shoniniacu caminiaacuaari. Tacujua niaree nio jiyacua saniniuurijia. ³ Nocua na nujuasacari, jiyanojua nacareeri juhua juurunu sare sariyocuanu. Na nacasacari, siete miacanaari jiyacari majacuree, juhua pueyano pocuanu. ⁴ Cuno siete miacana pocuanu nuhuaji, janiyari na sequesano naajiotanu paniriquiaa tari juucuanu. Jiyacaritij, janiyari tamonu rupaa tojirii jiyocuacaanuji naa cua sequeyano saajani:

—¡Maja pueya niishitiniu cuno siete miacana sequesano!
¡Maja na naajiotanu! Tama quioojiajiniajaaja quia racatare.

⁵ Jiyacaritij, Pueyaso seru cua niquishano shoniniacu caminiaacua nujuaanoni, nio jiyacuajuhuj, nojuajaari na miaquetajara na juaashiquia shiitioree jiyocuacaanu, seetanujuanaa na sequenura. ⁶ Naa sequereeri:

—Cuno, pueyaracaanu Quijiani, nojuajaari jiya cajiniocua shipinia, jiya shipinia, shoniniacu caminia shipinijuhuj, puetunu tii quijiaca casaajanaa shipiniano. Nojuajaari seetanujuanaa naa cua pohuataniya: “Majaari tari na tarishiniu quiniutianiya. ⁷ Séptimo Pueyaso seru co-teesacari jonenenu na trompeta, cuno juucaja, puetunu jiyasohujaja Pueyaso miiniu panishanojuanaari tari tohuatesano quiniutianiya. Naa quiniutianiyari taa na pohuataquiari na sequenu panishano caminiujunaa pueyacua-jani”.

⁸ Cua tojishano rupaa jiyocuacaanuji pocuaanoni, socua cua pacuterohua naa sequenuuri:

—Pueyaso seruucua quia quiaare, cuno, shoniniacu caminiaacua nujuaanoni, jiyacuanio. Nojuaja quia masetasee cuno riatasano naajioneeniyojua, na mueetaani.

⁹ Janiyari Pueyaso seruucua quiaareeni. Janiyari na sequeseni na naajioneeniyojua na niquitionura janiya. Cua riucuaareeri:

—Jajaa, quia patare. Quia miaquerenoj. Shoqueeca quiniutianiya quia rupaamaari juhua samiyatu. Quia seecojinia jatanutaniya piiquiara saniniuurijia. Cunoori, pueya na saniitiotaja rupaa na quiniuucua.

¹⁰ Janiyari jiyacari cuno naajioneeniyojua pataree Pueyaso seru juaashiquiajinijini. Janiyari na miaquereeni. Seetanujuanaa shoqueeca quiriquiari juhua samiyatu. Cua miasacari, cua seecojinia jatasee piiquiaraari. ¹¹ Jiyacaritij, janiyari naa sequesareeni:

—Quiocua Pueyaso sequesano caminiujiuriohua pohu-
atanu queraatia pueyapue niquiara, queraatia tamaatia jiya-
cajinia quiniaa niquiara, queraatia tamaatia rupaaca pocua-
jaca niquiarajuhuj, queraatia jiyaniijianucua niquiaranio.

11

*Caapiqui Pueyaso sequesano caminiujiuniaa miishanojiniji
pohuatasano*

¹ Na nuhuaji, janiyari tia shanacujutaja naajua niquitiosaa-
reeni, juhua nataca niquishano. Janiyari naa sequesaareeni:

—Quiarijia cutara quia quiaare Jerusalén tiacajinia. Tii
nujuataja Pueyaso Secojoua tia quia shanacujusee quia
shanacujutajata, orojiniji shipinishano shanohua jaanutaja
catijiajanio. Quia serojorejuhuaj puetunu Pueyaso secojonu-
ujuacajanaa tii. ² Maja cutaraari quia shanacujunu Secojoua
tia carijiniacuma. Cunocujajaari taucuaca niquitiosaarucuaa
tari. Pueyaso soojeaca taucuacaari Pueyaso saquiriojosano
na tiacarano jitianutaniya pueyaracaanu, cuarenta y dos
raca cuara na shocojorejaatijia. ³ Janiyari caapiqui cua
saquiriojosano pueya jiyaronutaniyani, janiyajiniji nojori
pohuatanura pueya niquiara. Nojoriiri janiyajiniji pohu-
atanutaniya cuara shocojorejaatijia mil dosciento sesenta
juuca. Nojoriiri cocuaque toqueya cushiniutianiya taa pueya
cushiyoqueiaacuajani nojori taraajesacari.

⁴ Cuno caapiqui janiyajiniji pohuataanaani, nojoriiri cuno
caapiqui olivo naana, tariucuaaanu Pueyaso Rupaajinia
pohuatashiyacuajani. Naajuhuj, nojoriiri cuno caapiqui
samari nujuatacojua, Jiyaniijiajanaa tacoji nujuatacojuani.
Cuno, nojori Jiyaniijiani, nojuajaari jiya Jiyaniijiajuhuaj.

⁵ Tamonu jaara sesa miiniu paniri cuno caapiqui pueya,
nojoriiri na paraa catijianutaniya nojori rupaamaji muer-
anacujua manitia, nojori na puecoonura. Nojoriiri saaja
naa cusojuanutaniya noo pojori, canapuate nojori miiniu
paniya sesa juucuacuajani. ⁶ Nojori, janiyajiniji pohu-
atanaani, nojoriiri cumaaca jitianutaniya maja na nitiniuria
maru pueyaracaanu mijiria nojori pohuatasacari Pueyaso
rupaa. Naajuhuj, nojoriiri cumaaca jitianutaniya mo-
huaca na jataniniuria nanacara. Nojoriiri cumaaca ji-
itianutaniyajuhuj nojori sesonura jiya puetunu puereeta
tamaatia casaatajanaa. Nojoriiri pueyaracaanu naa mi-
ijionutaniya nojori panishacari. ⁷ Nojori jaara janiyajiniji
pohuatanu tucuatate, jiyacaritij, puequeetuuju raamaji to-
huatariquiano pueresano sacuaraatia Casaani, cunoori no-
jori paracaaniutianiya. Nojori shocotanutaniyari. Naacua-
jitij, nojori puecoonutaniya socuaari. ⁸ Nojori queteeri

cuno puereetuuca niishishano tiaca nuucujinia pojoconu-
taniya, tee nojori Jiyaniijia mosaaquiaari niyacutesanojnia
teetasanocujani. Cuno tiacaari miriqui jiyaniquishiya
Sodomata, Egiptotanio. ⁹ Naacujitij, jiuujianaraca juuca,
socua niquiriyatu juuca cajiniocuanio, queraatia tamaatiu-
ucua pueyari nojori quete shootianutaniya. Naa nojori
queteya shootianutaniyari queraatia tiqiyocua tiacajini-
jiniio pueya, tamaatiuucua rupaaca pocujaca pueyajuhaj,
queraatia tamonu jiyacajinijiniio pueyanio. Nojori paraari
maja na shanacunu quiniutianiya nojori jamojosaanura.
¹⁰ Puetunu mijiria quiniaajanaari shuquiritiuniutianiya, ma-
cunucua cuno caapiqui Pueyaso sequesano caminiujiuniaa
quishacari. Pueyari jiyanhua timiquionutaniya, naquiya
nojori miitiajaca puecoosaanuucua. Naaratej, mijiria qui-
jiacaari tama na casamijiniijiaaja nareja niqutiojotoonu-
taniya nojori shuquiriniutia.

¹¹ Naajaa, jiuujianaraca juuca, socua tamonu juuca cajin-
iocua nuhuaji, Pueyasoori nojori samiitianijiorohua. ¡Nojori-
iri na matusaqui saneecuaturohua! Puetunu nojori niqini-
aajanaari jiyanhua shiriiquitiurii. ¹² Jiyacaritij, cuno
caapiqui Jesucristojiniji pohuatanaari puereetuuca rupaa to-
jitiurii jiyocuacaanuji pocuaano. Naa nojori sequeriquiaari:

—¡Miji nia tacatama!

¡Jiyacaritij, nojoriiri na paraa niqiara tacataquee cohua-
jajinia jiyocuacaanura! ¹³ Na paraa shootiasacari nojori,
jiyacaritij, rijiaari jiyanhua jiuuquiujutiaree. Naa ri-
jia jiuuquiutiasacaritij, Jerusalén tiacajinia queraatia tia-
caari niyarequetaquee. Siete mil pueyari tii cusonuuree.
Cureeno pueyari jiyanhua jiuujiateree Pueyasoocujaji. No-
joriiri jiyacari niishirii Jiyocuacaanu Quijiaari seetanujua-
naa Pueyaso cutara.

¹⁴ Janiyari naa segundo naquiya miiniu niqutishaareejaa-
niuhuj, taa na nuhuaji na miishaanutaniyacujani. Tercero
naquiya miishacariiri quera ritia cuno nuhuajijia quiniu-
tianiya.

Séptimo trompeta jonesacari

¹⁵ Séptimo Pueyaso seruuri na trompeta jonenee. Jiyacar-
itij, puereetuuca rupaacaari jiyocuacaanu tojishaaree. Naa
sequeturiquiaari:

—¡Quiarijiani, pa Jiyaniijia Pueyasoori tari jitianutaniya
puetunu jiyacua jiyaniijianucua jittiasanojuanaa!
¡Nojuajaari pa Jiyaniijia Cristota Jiyaniijianucujanaa
quiniutianiya! ¡Nojoricujiaari pueyaracaanu
Jiyaniijiajanaa quiriquiano!

¹⁶ Jiyacaritij, cuno veinticuatro niishijiaca jiyaniijianucua, shanohua cajitiujinia cajituriquiaa Pueyaso tacojini, nojoriiri Pueyasooacara jacamaturee jiyanoehua na shuquiri-tianuta nojuaja. ¹⁷ Naa sequeturee Pueyasoori:

—¡Paacarasho canaa Jiyaniijianaa! ¡Quiaari puetunu
cumaacaracajanaa! ¡Quiaari quijiajuhuanajaj!
¡Quiaari pueyaracaanu quijia! ¡Quiaari tari
juhuacatecara quia cumaaca poonijioteree,
Jiyaniijiajanaa quia quiniuria pueyaracaanu!

¹⁸ Cunora, puetunu jiyacua jiyaniijianucujanaari juaaquioya. Naajaa, quiarijiaari quia juaashacari cutara. Quiarijiaari macunucua quia nequesoreenu juucajuhuaj. Saniniuujia, quiaari pueyara quia sequesano caminiujiuniaa pueya niquitiojonutaniya nojoririano quia riuriotaca, puetunu quia saquiriojosano pueyajanaajuhuj, puetunu quia timitiajaca pueyajanaanio, jiyaniijianucua, narejaca pueyano. Naajuhuj, quiaari jiya sesojuaca pueya shaajanutaniya.

¹⁹ Jiyacarijuhuaj, jiyocuacaanu Pueyaso Secojoua tiaari riataaaree. Janiyari Pueyaso Quishaquijianaa niquiriini. Tii matariquiaari Pueyaso caaja, seetanujanaa na Rupaajanaa na racataja. Cuno na Rupaari na pueya na jiyanoetiaja, na tojiyashijiaca na saniitotajajuhuj. Jiyacaritij, miacanaari nunujuree. ¡Jiyanoehua majacureeri! ¡Puereetatej, jiyanoehua cojuata! ¡Rijiaari jiyacari jiuuquiutiaree! ¡Jiyanoehua queraa-tia miacanajaa shiniitijiaacaari juhua maru totereejuhuaj! ¡Jiyanoehua puereetaari quiriquiaa!

12

Miriqui pohuatasano maajijini, puereetuuca Naaqueru-jinijijuhuj, juhua cohuaniquia niquishano

¹ Na nuhuaji, pueya jiuujiatenura, casaari jiya cajiniocua niquishaaree. Maajiiri quiriquiaa cuno, cua niquishanoni. Juhua toqueta pananujinia cuhuajaatiariquiaari. Racaacua nujuariquiaari. Doce riyari na nacaque quiriquiaa.

² Cuno maajiiri manajaraca quiriquiaa. Nooriquiaari. Cunora na sariyojotariquiaari quera na ranu panishacari.

³ Jiyacaritij, janiyari socua tamonu casaa niquitishaaree jiya cajiniocuani. ¡Puereetuuca Naaqueruuri quiriquiaa, naatuhuana! Juhua cohuaniquia niquishano quiriquiaari. Siete nacacaracaari quiriquiaa, diez tuhuajaaracanio. Jiyaniijianucuaara shipinijosano nacaqueya niquitiacoriquiaari na siete nacacaacua.

⁴ Cuno naatuhuana Naaqueruuri quera na cajiniocua

riyajinijinio nocuara rerecoree jiyocuacaanuji na pitiutia. Nio jiyocua na jacutareeri. Naaqueruuri rariquiano maaji tacoji shanacuriquiaa. ¡Na sashiriquiaari cuaara raara, mueya na mianura jaara rasaare! ⁵ Maajiiri cayaniyojua raree. Nojuajaari puetunu mijiria quijiaca pueyapuejanaa Jiyaniijiajanaa quiriquiano. Nojuajaari pueyaracaanu na maca mueturiquiano, na tojiyashijiaca na piyotajara. Mueyari na nucua jaariutiasaaree Naaqueruucuaaji. Pueyasoori na shuriucuaara na ririi, tii na cajitiniuria, Jiyaniijia quiriquianoni. ⁶ Maajiiri saniniuujia cariiquia jiyajinia mashirii, tee Pueyaso jeenucuaquiaari tari nocuaji na quijiaracuajani, tii na mianuutesaanurajuhuj, cuaara shocojorejaatijia mil dosciento sesenta juuca.

⁷ Na nuhuaji, janiyari Pueyaso seya jiyaniijia Miguel niquirii narta Pueyaso seyatani, cuno naatuhuana Naaquerujuhuj puetunu na seyatajanaa. Puetunu nojorijianaari puereeta quiaquetooriguiaa jiyocuacaanu. Cuno Naaqueruuri na seyata jiyanohua quiaqueriquiaa Pueyaso seya juucua. ⁸ Naajaa, majaari nojori naata quiriquiaa Pueyaso seya shocotanu. Pueyaso seya paracaaniuucua jiyanohua nojori, majaari quiquio quiniu quiriquiaa socua nojoriria jiyocuacaanu. ⁹ Naacujitij, cuno Naaqueruuri jiyocuacaanuji taanuusaaree. Nojuacuajaari cuno tariucuaacaanu Soconu, Eva sapojoquiaarini. Cuno Sesaaca seque sesaari “Satanás”. Nojuajaari puetunu mijiria quiniaajanaa sapojoquiaa. Pueyaso seya shocotanuucua nojuaja, nojuajaari puetunu na seyatajanaa nio jiyacua quejoosaaree.

¹⁰ Jiyacaritij, janiyari jiyocuacaanu quijiaca queraatia pueya rupaa tojiriini. Juhua niquiriyatu rupaari tojishaariquiaa jatiqui nojori paaretasacari na rupaa. Naa sequeturiquiaari:

—¡Pueyasoori parta Pueyaso pueyacuara Saquiriojotana jataree tari! Nojuajaari pueyaracaanu Pueyaso saquiriojotaja Pueyaso pueyacuara, juuca, niucuanio. Naa pa Paraca jatasaanuucuatej, Pueyasoori quiarijia tohuateenutaniya puetunu na sequesanojuanaa na jiyanooshano pueyara. ¡Nojuajaari maninia jitianutaniya pajaniya, jiyanohua na cumaacata! ¡Pa Jiyaniijia Cristoori tari jiyatesaaree Jiyaniijiajanaa na quiniuria! Naa na miishaanuni, cunoori na Que saquiriojosano na quiniuucua. ¹¹ ¡Pueyaso Borrego na quiniuucua, nojuajaari na nanaca shootequiaari, tojetaarucujanaa jiyanooshano pa quiniuria sesa pa miishanojiniji! Naacujitij, Satanás saquiriojotasacari parta Pueyaso pueyacuara, nojoriiri na sanaajaquiaari

nojori tiuuniuucua Jesucristoocua. Nojoriiri na shocotaquiaarijianaa, nojori pohuatanuucua Jesucristoocua nojori tiuuniujiniji. Nojoriiri maja na puerenu quijia na mosaanura. Nojoriiri seetanujuanaa juhuajaniya tama na cuaqueyajaaja panitiaquiaari nojori mosaanura. ¹² ¡Naaratej, jiyocuacaanunaa, shuquiriaatia quia quiri! ¡Naa Sesaaca jataसानुucuatej, nia timiquiore jiyocuacaanu quijiacanaa! ¡Niajaniya saniniuuja, jiyacua quijiacanaa, shoniniacu caminiajinia quijiacanio, jiyanojua nia taraajere! ¡Sesaaca niishishacari maja puera Pueyaso tarishiniu quiniutianiya na saniitionura nojuaja, nojuajaari niaacua roseyarucuaa jiyanojua na juaniutia!

¹³ Cuno puereeta niquishano Naaqueru niishishacari nojuaja tari jataサaree jiyocua, nojuajaari cuno mueya nucua neteyojotanu coteeree na mianura juucua. ¹⁴ Cuno maaji-iri querajaa puereetuca nesu niquitiosaaree saaja, juhua jiyanojua puereetuca surohua miooru nesu. Cuno nesuta, maajiiri na quiquiojiniara jaaree cariiquia jiyajinia, tucuacaanu cuno Naaqueruucujaji. Tii mianuutesaanutaniya pueyaracaanuuri cuaara na shocojorejaatijia jiuujianaraca marijia, socua seis racanio. ¹⁵ Jiyacaritij, Naaqueruuri mohuaca quecaree juhua moo, maaji nuhuaji na saquitiniuria, maaji na jaatinitianura juucua. ¹⁶ Jiyari maaji naacutaree. Jiyari juhua na rupaa riataree. Naaqueru rupaamaji pojuaretaano moo raturee saajaari. ¹⁷ Naaqueruuri jiyamitia maajiicua macaarii jiyanojua. Quiaareeri maajiicuaajinio supueno pueyata miaquetojonura. Cuno pojoricuajaari Pueyaso rootasano tojitiajaca, canapuate Jesucristoocua nojori tiuuniu seetaashijiacacuajani.

¹⁸ Naaqueruuri shoniniacu caminia casaqueyaji nujuasee.

13

Caapiqui puereeta niquishano Casaajiniji pohuatasano

¹ Na nuhuaji, janiyari puereeta niquishano Casaa niquiriiri shoniniacu caminiajiniji tacaanoni. Siete nacacaraca quiriquiaari, diez nacajaaracanio. Puetunu na diez nacajaacua jütiariquiaa jiyaniijianucuaara shipinijosano nacaqueyari. Puetunu na nacacaacuajanaa, sesacaari nocua naajiotasano quiriquiaa. Na nacacaacua naajiotasano sesacani, cunoori Pueyaso rerequeteriquiaa, juhua Pueyaso shocotaja na quiniuucua. ² Janiyara, cuno cua niquishano puereeta niquishano Casaani, cunoori juhua marucatuque sare niquishano quiriquiaa. Na niohuacaari

juhua oso niohuaca niquishano quiriquiaa, tucuacocua juaashococuaraca. Na rupaari juhua juurunu sare rupaa quiriquiaajuhuj. Cuno tari cua pohuatasano naatuhuana juhua cohuaniquia niquishano Naaqueruuri na cumaaca na niquitioree. Tama na cajitujiniajaa na cajitiriiri jiyaniijajanaa na quiniuria jiyacua. ³ Cuno puereeta niquishano Casaa siete nacacaracani, niquiriyatu na nacacajinijiniori pishano quiriquiaa na mosaanura juucua. ¡Cuno puereetuca piyashi na nacaacua quiriquiaani, saaja cushiriiquiiri! Puetunu mijiria quiniaa pueyajanaari jiuujateree na cushiriishacariuhua. Cunora, puetunu nojorijianaari cuno puereeta Casaa tojjiacara quirii. ⁴ Jiyacaritij, mijiria quiniaa pueyari cuno naatuhuana Naaqueruucua jacamaturee juhua Pueyasooacara, cuno puereeta niquishano Casaa na jiyatenuucua nojori jiyaniijajanaa na quiniuria. Pueyari cuno siete nacacaraca puereeta niquishano Casaacua jacamatureejuhuj. Nojoriiri naa sequetooree tamajaaja:

—Maja socua tamonu jiyaniijia quiniu juhua nio pa jiyaniijia. ¿Tamonu jiyaniijiateeri cumaacaraca, nata na miaquetoojonura? Shaaqui.

⁵ Jiyacaritij, cuno naatuhuana Naaqueruuri cuno siete nacacaraca puereeta niquishano Casaa niishitiojoree sacuaraatia na rimiaaquenura Pueyasooacara, Pueyaso na rerequetenurajuhuj. Naa miiriiri na jyanishacari nojuajaari socua maninia quijia Pueyasojiniji. Naajaa, nojuajaari jiyaniijiaara jiyatesaaree saaja cuarenta y dos racara. ⁶ Naacuajitij, cuno puereeta niquishano Casaari Pueyaso rerequetenu coteeree. Pueyasooacara rimiaaquereeri. Jesuucua tiuujia pueya sesacareejaariuhuj, jiyocuacaanu Pueyaso quiquionio. ⁷ Mijiria quijia pueyaso saquiriojosano pueya paracaatishaareejaariuhuj. Cumaquishaareejaariuhuj Pueyaso pueya na shocotanura. Cumaaca niquitiosaareejaariuhuj jiyaniijajanaa na quiniuria, puetunu tamaatiuucua pueyapuejanaa na jitianura, puetunu tiquiyocua tiacajinijinio pueyajanaa, puetunu tamaatia rupaaca pocuajaca pueyajuhuj, puetunu tamonu jiyacajiniajanaa quijiacanio. ⁸ Naacuajitij, puetunu mijiria quijia pueyajanaari cuno puereeta niquishano Casaacua jacamaturee na shuquiritianura nojuaja, nojori pueyaso na quiniuucua. Cuno pojoriiri maja Pueyaso saquiriojosano pueya. Naaratej, jiya shipinishaanujiniji, nojori sesacaari maja na naajiotasaanu quiquiaari Borrego Niquiojua jitianasano naajioneejinia, cante pocuara mosaaquiaricujani. Pueyaso muerasu

sesaca cutaraari cuno naajioneejinia naajiotasaaquiaari jiya shipinishaacarijijyowa, pueyaracaanu rishijiaca pa quiniuria.

⁹ Cante numaaracani, nojuaja cuaara tojiiria nio: ¹⁰ “Cante Pueyaso jiyatesano quiasocoriquianoni, nojuajaari seetanujanaa quiasano pueyano quiniutianiya. Naajuhuaaj, cante nijiniaquetucujaja mueruuta mosocoriquianoni, seetanujanaa naa mosaanutaniyari”. Naaratej, Pueyaso pueya cuaara puetunu casaajanaa rejeretajaca quiiria, seetanujanaa nojori tiuushacari Pueyasocua.

¹¹ Na nuhuaji, janiyari tamonu puereeta niquishano Casaa niquirii jiyajiniji muetaanoni. Caapiqui nacajaraca quiriquiaari, juhua borrego niquiojua nacajaa niquishano. Juhua cumaacaraca jiyaniijia na rupaa paaretariquiaari.

¹² Jiyanhua cumaacaraca quiriquiaari, juhua narta puereeta niquishano Casaa, teyano naca pishanotucujaja cushiriiriohuani. Nojuajaari na naca cushiriinohua narta puereeta niquishano Casaa naacuriquiaa. Naacuajitij, nojuajaari puetunu mijiria quiniaa pueyajanaa mojoquetanijioree juhua Pueyasocua, nojori timitianura na naca pishano cushiriinohua puereeta niquishano Casaa.

¹³ Naajuhuaaj, nojuajaari na cumaacata miiri jiyajeneta casaa pueya jiuujiatenura nocuaji. Jiyanhua cumaacaraca na quiniucua, pueya niquiara, nojuajaari mani tinirii jiyocuacaanuji jiyocua. ¹⁴ Naa na cumaacata na miiniucua cuno na naca cushiriinohua puereeta niquishano Casaa tacojitij, puetunu mijiria quiniaa pueyajanaa sapojoreeri. Naacuajitij, nojuajaari pueya shipinitirii casaa. Juhua cuno siete nacacaraca puereeta niquishano Casaari quiriquiaa, teyanote na nacajinia mueruuta pishano na quishacari samiitiarohua saajacuajani.

¹⁵ Jiyacaritij, nojuajaari cumaaca niquitiosaaree pueya shipinishano Casaa na jiyatenura saminiora, pocujara na quiniuria, nocuara jacamatiuyashijiaca na puecootenurajuhuaaj.

¹⁶ Naajuhuaaj, cuno caapiqui nacajaraca puereeta niquishano Casaari na pueya sequeree nojori naajiotanura puetunu pueyacuajanaa narta puereeta niquishano Casaa sesa. Naajiotasaareeri nojori miaquetaja juaashiquiaacua. Jaara nojori juaashiquiaacua naajiotaaquishaare, nojori jiniji naajiotasaareeri. Naacuajitij, puetunu mijiria quiniaa pueyacuajanaa naa naajiotasaareeri, tojiyaquishoo pueyacu, tojishano pueyacu, casamiriaca pueyacu, casamiijuniucua pueyacu, tama nojoriria poonijionuujuacajaaja pueyacuajuhuaaj, poonijiotasano pueyacuano. ¹⁷ Jiyacaritij, canapueete cuno puereeta

niquishano Casaa sesa naajiotasano jiitiaaquiriquiaa na cuaqueyacua, nojoriiri maja na naata na panishano masenu quiriquiaa na cumaneecata. Naajuhuj, majaari nojori naata na casami niqutiojonu quiriquiaa na cumaneecara. Pueya jaara cuno puereeta niquishano Casaa sesa jiitiaaquiri naajiotasano na cuaqueyacua, na naata na sesa número jiitianu nocua naajiotasano.

¹⁸ Nio niishishaanura maninia, jiyano hua niishitiajaari panishiya cutara. Niishijiaca pueya cuaara serojoora puereeta niquishano Casaa sesa número. Na númeroori pueyano sesa número. Cuno númeroori seisciento sesenta y seis. ¡Cunora pueyanaa, tama nia cuaqueyajaaja nia cojuare maja cuno puereeta niquishano Casaa sesa naajiotasaanura niaacujuhuj!

14

Borrego Niquiojua cojiniaajiniji pohuatasano

¹ Na nuhuaji, janiyari Borrego Niquiojua niquiriini, Sión tuhananuucua nujuaano. Ciento cuarenta y cuatro mil pueyari na cojiriquiaa. Borrego Niquiojua sesaari naajiotasano quiriquiaa puetunu nojori jinijijianaa, na Que Pueyaso sesajuhuj. ² Na nuhuaji, janiyari casaa tojirii juhua sararojua cojuatuneyano jiyocuacaanujini, juhua miacana majacuyano, juhua queraatia pueya arpa taquin-ionuyanojuhuj. ³ Cua tojishanoori quiarinio jaaquequejosano quiriquiaa. Jaaquequenuunaari Pueyaso cajitiu tajoji jaaquequenuuriquiaa, cuno cuatro saminio casaa tajojijihuj, cuno veinticuatro niishijiaca jiyaniijianucua tajojinio. Majaari quenaaja tamonu naata quiriquiaa cuno jaaquequejosano niishiniu nojori jaaquequejonurajuhuj. Saaja cuno ciento cuarenta y cuatro mil pueya cutaraari cuno jaaquequejosano niishiriquiaa. Cuno pojoricuajaari mijiria quiniaajinijinio saquiriojosaaquiaari Pueyaso pueya nojori quiniuria. ⁴ Nojoriiri tojetaarucujanaa maaji numetuqueyashijiaca quiquiaari, saaja pocuaji Tacunaacua jiaatajaca nojori quiniuucua. Naaratej, tiquiyocua Borrego Niquiojua rucuanajosacari, nojoriiri pueyaracaanu na cojiquiaa. Nojoriiri saquiriojosaaquiaari mijiria quiniaa pueyajinijinio, saaja Pueyasora nojori quiniuria, Borrego Niquiojuara nojori quiniuriajuhuj. Nojoriiri socua Pueyaso timitiasano pueya puetunu Pueyaso saquiriojosano pueyajinijiniojuanaa, taa pa shuquiritiaa shushajanaa pa carojosano pa nataujinijicuaani. ⁵ Nojoriiri tojetaarucujanaa sapojonu niishiyashijiaca quiquiaari, tojetaarucujanaa sesa miyashijiaca nojori quiniuucua.

Jiuujianaraca Pueyaso seya pohuatasano

⁶ Na nuhuaji, janiyari tamonu Pueyaso seru niquirii jiya cajiniocua jaanoni. Jaariquiaari mijiria quijiaca pueya niquiara na pohuatanura Pueyaso Rupaa, puetunu jiyacajinia quiniaa pueyarajanaa, puetunu tamaatiuucua pueyapuerajanaa, puetunu tamaatia rupaaca pocuajaca pueyarajanaajuhuj, puetunu tiquiyocua tiacajinia quijiaca pueyarajanaanio. Na pohuatasanoori seetanu rupaaajanaa pueyaraaanura. ⁷ Pueyaso seruuri mijiria quiniaa pueyacua nacariquiaa naatej:

—¡Pueyaso puerejaca nia quiriquia! ¡Nojuaja nia manihuuaqueetare! ¡Quiarijiaari na nequesoreesacari pueya! ¡Nocuara nia mojuquetacore nia shuquiritianura nojuaja! ¡Nojuacuajaari jiyocuacaanu shipinina, nio jiya, puereetuuca shoniniacu caminiajuhuaj, puetunu samocua nacaca pacartacojuacajanaanio!

⁸ Jiyacaritij, tamonu Pueyaso seruuri narta Pueyaso seru nuhajimiaajuhuj. Naa miriqui sequeriquiaa Roma tiacajiniiri:

—¡Babilonia tiaca tari saniitioshiya! ¡Cuno puereetuuca tiaca tari saniitioshiya! Babilonia tiacaari puetunu jiyacajinia pueyajanaa niishitiojua, sacuaraatia nojori miiniuria juhua nojuajuhuj. Babilonia tiacani, nojuajaari puetunu sesa casaa na miijiosanotajanaa juhua mashaasequetejoquiaari puetunu mijiria quijiacajanaa. Naacuajitij, puetunu pueyajanaari tama na cuaqueya miiniu panishanojuaaja miijiacara quiquiaari, jiyanhua nojori jiaatianuta sacuaraatia casaa na miiniuria, taa Babilonia tiacajinia quiniaa miijioquiaacuaani.

⁹ Na nuhuaji, socua tamonu Pueyaso seruuri narta caapiqui na puetanaa Pueyaso seya nuhajimiaajuhuj. Mijiria quiniaa pueyacua nacaree naari:

—¡Jiyanhua puereeta quiniutianiyari noo pojoriria, canapuate cuno puereeta niquishano na naca pishano cushiriinohua Casaacuara mojuquetacojua juhua Pueyasooaruani! ¡Jiyanhua puereeta quiniutianiyari noo pojoririjuhuj, canapuate juhua na naca cushiriinohua niquishano shipinishano Casaacuara jacamatujuacani! ¡Naajuhuj, puereeta quiniutianiyari noo pojoriria, canapuate na cuaqueya tarinitiajacani, cuno puereeta niquishano Casaa sesa naajiotasaanura nojori jinijini, nojori juaashiquiaacua soj! ¹⁰ ¡Pueyasoori puetunu cuno pueyajanaa saniitionutaniya jiyanhua na juaaniutia! ¡Majaari quenaaja Pueyaso jiuujiaaniu quiniutianiya nojori! ¡Pueyaso seya niquiara, Borrego Niquiojua niquiarajuhuj,

nojoriiri pueyaracaanu naquiya miishaanutaniya manitia, azufretanio! ¹¹ ¡Naa Pueyaso miitiasacari nojoritij, najacaari pueyaracaanu nojonutaniya! ¡Majaari quenaaja nojori samaraatasaanu quiniutianiya juuca, niucuanio! ¡Naquiya miiniuuri naa nojori miitianutaniya pueyaracaanu! ¡Naa miishaanutaniyari cuno pojori, canapuete na naca pishano cushiriiniohua puereeta niquishano Casaacuara jacamatujuaca juhua Pueyasooocarani, juhua nojuaja niquishano shipinishano Casaacuarajuhuj! ¡Naa miishaanutaniyajaariuhuj noo pojori, canapuete cuno puereeta niquishano Casaa sesa naajiotaniniutianiya tama nocuajaajani!

¹² Cunora, Pueyaso saquiriojosano pueyani, canapuete na rootasano tojitiajacani, Jesuucua tiuuniu tarinitiaashijiaca-juhuj, nojori cuaara juhuajaniya rejeretaara naquiya nojori miishacari.

¹³ Jiyacaritij, janiyari rupaa tojirii jiyocuacaanuji naa cua sequeyanoni:

—Nio quia naajiotare: “¡Quiarijiani, jiyanoehua shuquiri-aatia quijiaca cutaraari cuno macunucua, canapuete tariucua Jiyaniijia Jesucristoocua tiujujiaca cusonuunutaniyani!” Pueyaso Sohuanuuri naa sequeyajuhuj: “¡Taaquiriirinij! Nojoriiri samaateya, pueyaracaanu na Jiyaniijiaara na poonijionuunu nuhuaji. Maninia nojori miishanocuaajari niyajetaaquishaanutaniya. Cunora, nojoriiri maninia miishaanutaniya”.

Pueyaso seya senoosacari pueya juhua nataacuaca nio jiyajiniji

¹⁴ Na nuhuaji, janiyari cohuaja najaca niquiriini. Cuno cohuaja najaca caco cajiniaari juhua Pueyaso Niyanu niquishano quiriquiaa. Jiyaniijiaara shipinishano nacaque cushitariquiaari, orojiniji shipinishano. Nataacuaca na senotajara shamatucujaja jacatunee mueruu mueturiquiaari. ¹⁵ Jiyacaritij, tamonu Pueyaso seruuri Pueyaso Quishaquiji tohuatamaa. Cohuaja najaca caco cajiyanoocua nacaree jiyanohuari. Naa na sequereeri:

—¡Quia mueruuta quia canuujure, nataacuaca quia senoonura! ¡Jiyajinia nataacuacacujajaari tari noshuriujua! ¡Cuaara quiarjia senoosaaria!

¹⁶ Jiyacaritij, cohuaja najaca caco cajiyanoori na jacatunee mueruuta canuujuree jiya caco. Nataacuaca senooreeri. Cuno nataacuacaari Pueyaso pueyacuaja. Nojoriiri naa rijiosaanutaniya jiyocuacaanu.

¹⁷ Jiyacaritij, socua tamonu Pueyaso seruuri tohuatamaa jiyocuacaanu Pueyaso Quishaquiji. Nojuajaari shamatu-cuaja jacatunee mueruu mueturiquiaajuhuj. ¹⁸ Na nuhuaji, socua tamonu Pueyaso seruuri tohuatamaa Pueyasoocudara catijiaja casaajiniji. Nojuajaari mani camaru. Nojuajaari narta Pueyaso seruucua nacaree, shamatucuaja mueruu muetuyanoocua. Na sequereeri:

—¡Quia shamatucuaja mueruuta uva quia carojotare, jiyajinia moritiaconuni! ¡Tari noshuriujuacuaja!

¹⁹ Jiyacaritij, Pueyaso seruuri uva carojotaree na mueruuta, puetunu nio jiyajinia cuhuariquiacajinijijianaa. Uva jaapuejoree saajiajinia quejasano puereetuca surocohua-maari. Pueyasoori tii na rapijiotenutaniya jiyanohua na juaaniutia. Cuno uvani, nojoriiri Pueyaso ruuretajaca pueyacuaja. ²⁰ Cuno uvaari rapijiosaaree tucuacaanu naata tiacajiniji. Uva rapijiosaquiji, nanacaari tojetaarucujanaa jaateriquiaa juhua mohuaca. Jiyanohua nanaca quiniuucua, cabollohua rupaacuma puecariquiaari. Pueyaso tojiyashijica pueya nanacaari jiyanohua tucuacaanu jaateree juhua moo. Tresciento kilómetro jaatereeri.

15

Siete Pueyaso seya, siete naquiya miitiaja na mueeta-cosacari

¹ Na nuhuaji, janiyari jiya cajiniocua socua niquitishaa-reeni, cua niishiniuria taa mijiria quiniaa saniitiosaanu tucuatasaanutaniyani. Cua niquishanoori jiyanohua puereeta quiriquiaa. Janiyari nocuaji jiuujatereeni. Janiyari siete Pueyaso seya niquiriini. Siete Pueyaso naquiya miitiaja mueetacoriquiaari. Pueyaso jaara cuno siete casaata naquiya miitiri pueya, nojuajaari cunota na juaaniu tucatanutaniya puetunujuanaa.

² Janiyari casaa niquiriijaaniuhuj juhua puereetuca caminia motiiquiojiniji shipinishano. Manitia cojitishanoori quiriquiaa. Pueyari cuno caminia shocua nujuaturiquiaa. Nojoriiri noo pojori quiriquiaacuaja, canapuate na naca pishano cushiriinohua Casaa shocotaquiaaricujani, juhua nojuaja niquishano shipinishano Casaajuhuj. Naajuhuj, nojoriiri maja na shanacunu quiquiaari cuno Casaa sesa naajiotasaanura nojoriicua. Puetunu nojorijianaari Pueyaso niquitiojosano arpaa taquinionuuriquiaa. ³ Nojoriiri Pueyaso seru Moisés jaaquequejosano jaaquequenuuriquiaa, Borrego Niquiojua jaaquequejosanonio. Nojoriiri naa jaaquequenuuriquiaa:

—Jiyaniijianaa, puetunu quia miishanojuanaari jiyanohua maninia, nocuaji jiuujiatesano. ¡Quiaari seetanujuanaa puetunu cumaacaracajanaa! Casaa quia miishacari, quiaari maninia na miiquiaa. Majaari quenaaja quia jiyajenenu. Quiaacuajaari puetunu jiyacajinia quijiaca pueya Jiyaniijianaa. ⁴ ¡Quiaari pueresano, Jiyaniijianaa! ¡Quiaari tojetaarucujanaa maniniuhuaqueetasano seetanujuanaa! ¡Saaja quiajaniya cutaraari tojetaarucujanaa maninia miijia pueyaracaanu! Naaratej, puetunu jiyacajinijinio pueyajanaari quiocua nijionutaniya nojori shuquiritianura quiajaniya, maninia quia saniitiojonuucua quia paraajuhauj.

⁵ Naa cua tojiniu nuhuajitij, janiyari jiyocuacaanu Pueyaso Quishaquijianaa niquirii riateyanoni, tee cuniqui seetanu Pueyaso rupajanaa racatasano quiyacuajani. ⁶ Cua niquishacari, cuno siete Pueyaso seyari Pueyaso Quishaquijianaa tohuareetariquiaa, canaputee cuno siete naquiya miitiaja patootariquiaacuajani. Nojoriiri tojetaarucujanaa cohuaja linojiniji toqueyaraca quiriquiaa, shacantuqueya. Nojoriiri orojiniji shipinijosano casaa na jiriqiacajinia camarucuteriquiaa. ⁷ Jiyacaritij, niquiriyatu cuno cuatro saminio casaajinijinioori miacojua niqutiojoree puetunu cuno siete Pueyaso seyajanaa. Cuno miacojuaari orojiniji shipinijosano quiriquiaa. Pueyaracaanu rishijia Pueyaso juaaquiatacata mishinijosano quiriquiaari. ⁸ Jiyacaritij, Pueyaso Quishaquijianaari maatia najacata mishiquimaa. Cunora, majaari tamonu na naata Pueyaso Quishaqui tiuquiniu quiriquiaa, cuno siete Pueyaso seya cuara puecaarajaatijia naquiya nojori miitajaca pueya. Cuno najacaari Pueyaso shacantuca cumaacajiniji quiriquiaa, naa na saniitiojosacari na paraa.

16

Saniitionujiniji pohuatasano

¹ Jiyacaritij, janiyari tamonu rupaa tojirii Pueyaso Quishaquiji nacaanoni. Naa cuno siete Pueyaso seya sequereeri:

—¡Nia siete miacojuajiniji Pueyaso juaaquiaca nia taroosee jiyocua!

² Niquiriyatu Pueyaso seruuri juhuacatecara coteeree. Quiaareeri. Na miacojuajiniji jaapuesee jiyocuaari. Jiyacaritij, jiyanohua nootuca sapueyari pueyacia supuee. Noo pueyacia supueeeri, canaputee nocua naajiotasano jiitariquiaa na naca pishano cushiriinohua puereeta niquishano Casaa sesacuajani. Sapueyaraca pueyari cuno puereeta niquishano shipinishano Casaacuara

jacamatujuaca quiriquiaajuhuj. Jiyanoehua nootujuaaca sapueyari quiriquiaa.

³ Segundo Pueyaso seruuri na miacojuajiniji Pueyaso juaaquiaca jaapuesee puereetuca shoniniacu caminiajinia. Mohuacaari puetunu nanacara quiquiiijanaa, juhua shusha mosano pueyano nanaca. Cunora, puetunu shoniniacu caminiajinia quijia casaajanaari cusonuuree.

⁴ Tercero Pueyaso seruuri miacojuajiniji Pueyaso juaaquiaca jaapuesee puetunu moocujiniajanaa, puetunu samocua nacaca pacartacojuacajiniajanaano. Jiyacaritij, nanacara jataquee puetunujuanaari. ⁵ Cuno nuhuaji, janiyari mohuaca camaru Pueyaso seru tojirii naa Pueyaso sequeyanoni:

—Pueyasonaa, quiaari quijiajuhanajaj. Majaari quia supuenu quiquiaari. Quiaari tojetaarucujanaa maninia. Naa quia miitiasacari quia tojtiaashijiatej, quiaari seetanujuanaa maninia namirii nojori. ⁶ Nojoricuajaari quia saquiriojosano pueyajinijinio nanaca shootejoquiaari pueyaracaanu, quia sequesano caminiujuniana nanacanio. Quiarijia saniniuujia, naa miijiaa nojori quiniuucuatej, quiaari nojori raatejoree nanaca. ¡Maniniacuaja Jiyaniijiana!

⁷ Jiyacaritij, janiyari Pueyasooacara catijiaja casaa tojirii juhua pueyano pocuaanoni. Naa sequeriquiaa Pueyasoori:

—Taaquiriirini Jiyaniijianaa, puetunu cumaacaracajanaa Pueyasonaa. Quiaacuajaari maninia saniitioree quia tojiyashijiaa, taa quia sequequiaari tariucuacaanu nojoricuajani, quiaari quia tojiyashijiaa saniitionutaniya. Quiaari seetanujuanaa sequequiaari quia miishocoriquiano. Quiaari puetunu sesa nojori miishanojuanaa niishijia.

⁸ Na nuhuaji, cuarto Pueyaso seruuri miacojuajiniji Pueyaso juaaquiaca jaapuesee pananuucua. Naacuajitij, pananuuri socua jiyanoehua naseecara quiquii, pueya na catijianura juhua mani. ⁹ Naa pananu januucua jiyanoehua nasaatiatej, pueyari jiyanoehua cateree. Nojoriiri Pueyaso sesacaree saaja, cumaacaraca na quiniuucua, naa nojori na saniitionuucuatej. Majaari quenaaja nojori pishiniu quirii sesa nojori miiniujiniji, nojori tacatonuhuara noojia Pueyasooacara, nojori jiyaniijiaara nojori jiyatenura Pueyaso. Pueyaso rerequeteturee saajaari.

¹⁰ Na nuhuaji, quinto Pueyaso seruuri miacojuajiniji Pueyaso juaaquiaca jaapuesee. Na naca pishano cushiriiniohua puereeta niquishano Casaa cajishaqui na jaapueseeri, tee cuniqui juhua jiyaniijiajanaa na cajiriquiaacuajani. ¡Jiyacaritij, puetunu na jiitiasano

jiyacajanaari ninishiquiria quiquii! Cunora, na pueyari na niti saaquioriquiaa jiyanoehua nooeta naquiya na miiquiosacari. ¹¹ Naa Pueyaso saniitiosacari nojoritij, naajaa, majaari nojori pishiniu quiriquiaa sesa nojori miiniujiniji. Nojori nootunenuucua, nojoriiri jiyocuacaanu quijia Pueyaso sesacaree saaja, nootujaaca sapueyaraca nojori quiniucujuhuaaj.

¹² Cuno nuhuaji, sexto Pueyaso seruuri miacojuajiniji Pueyaso juaaquiaca jaapuesee cuno puereetuca Eufrates moojinia. Moori joojequetaquee jiya pajamaji niriquiano jiyaniijianucua niutiajara.

¹³ Jiyacarijiuhuaaj, janiyari jiuujianaraca samaruhua niquiriini, juhua sacarohua niquishano. Cuno samaruhuari tohareetariquiaa juhua cohuaniquia niquishano naatuhuaana Naaqueru rupaamaji. Tohareetariquiaa-jaariuhua na naca pishano cushiriiniehua puereeta niquishano Casaa rupaamaji, narta puereeta niquishano Casaa rupaamajinio. Cuno puereeta niquishano Casaari mijiria quiniaa pueya sapojoriquiaacuaja, nojori tojiniuria na naca pishano cushiriiniehua puereeta niquishano Casaa. ¹⁴ Cuno jiuujianaraca samaruhuari cumaacaraca quiriquiaa, na cumaacata nojori miiniuria nocuaji jiuujiatesano casaa, pueya tiuuniuria nojori sequesanoocua. Nojoriiri naa miiriquiaatej, puetunu mijiria jiyaniijianucujanaa nojori rerejotenura. Jiyaniijianucuaari naa rerejotesaaree nojori miaquetoojonura puetunu cumaacaracajanaa quijia Pueyasota. Pueyasocuajaari tariucuacaanu niishiriojoquiaari naa cuno juuca na miaquetoojonura nojoritia. Naa paniquiaaricujaaari na paraa na puecoonura.

¹⁵ Jiyacaritij, janiyari pa Jiyaniijajanaa tojirii naa sequeyanoni:

—Cua tojitiare cua pueyanaa. Janiyari canashiyaquiji tiuquiniutianihuani nia niishiyaquishacari. Janiyari naa niaacua tiuquiniutianihuani taa nohuasejojua tiuquiquiaa casami nohuasenuucuaacuaani, juhuajaniya casami camaru quishacari. Shuquiriaatia quijia cutaraari noo pueyano, cante juhua suteja quiquiaani, pueyaracaanu na secojosacari, na sashishacari janiya. Tojetaarucujanaa sesa miyaquijia nia quiri, niaa mariqui cua tiuquishacariuhua cararaatia juhua juhuasunucua quiri cua niquiaraari.

¹⁶ Cua Jiyaniijia sequesano cua tojiniu nuhuaji, janiyari cuno samaruhua niquirii mijiria jiyaniijianucua rerejoteyanoni. Hebreo rupaaajinia, nojori rerejosaqui sesaari, “Armagedón”.

17 Séptimo Pueyaso seruuri miacojuajiniji Pueyaso juaaquiaca jaapuesee paratujinia. Jiyacaritij, jiyocuacaanu Pueyaso Quishaquijianaa Jiyaniijia cajitiujiniji, janiyari rupaa tojirii naa nacaanoni:

—¡Tari miishaaree puetunujuanaacuja!

18 Jiyacaritij, miacanaari nunujuree. ¡Jiyanhua majacureeri! Cojuataari quiriquiaa puereeta. Rijaari tojetaarucujanaa jiyanhua jiuuquiujutiaree. Pueyano shipinishaanujiniji, majaari naa rijia jiuuquiujutianu quijia juhua nio rijia. 19 ¡Naa rijia jiuuquiujutianuucua jiyanhuatej, cuno puereetuca tiacaari neequeresetaquee! Jiuujianaracara raqutiijiquiiri. Puetunu jiyacajinia tiacajanaari niyarequetaree. Jiyacaritij, Pueyasoori cuno puereetuca Babilonia tiaca saniitioree, taa tariucuacaanu na niishiriojoquiaari cuno juuca na saniitionuracuajani. ¡Jiyanhua na juaaniutia na saniitioreeri! Niya sequeshiya Babilonia tiacatani, cunoori Roma tiacacuja. 20 Jiyacarijuhuaj, puetunu shoniniacu caminiajinia jiya tucuaatijacajanaari shaajequee, puetunu tuhuananuhujanaano. 21 Naajuhuj, jiyocuacaanuji jiyanhua puereetujuaaca miacanajaa shiniitiujiaacaari totere pueyacia. ¡Noojiaqueyari jiyanhua niiquia quiriquiaa; cuarenta kilo! Mijiria quiniaa pueyari Pueyaso sesacaree, naa nojoriicua na totinijianuucua shiniitiujiaaca miacanajaatej.

17

Miriqui pohuatasano Roma tiacajiniji, juhua paanatu

1 Na nuhuaji, cucua nimiaari niquiriyatu cuno siete Pueyaso seyajinijinio, canapuete siete miacojua patootariquiaacuajani. Cua sequeseeeri:

—Miji quia nimia. Janiya quia niquitiniutianiyani taa Pueyaso saniitionutaniya cuno Paanatuni, puetunu jiyajinia mohuacaacuajanaa cajiyani. 2 Mijiria jiyaniijianucuaari cuno Maaji numuetucujujuaca. Sacuaraatia cuno Paanatu niishitiojosanota, nojuajaari juhua mashaasequetejojua puetunu jiyacua quiniaa pueyajanaa. Naacuajitij, nojoriiri sacuaraatia miijiacara quiquiaari, juhua nojuajuhuj.

3 Pueyaso seru niquitiniuria janiya na niquitiniu panishano, nojuajaari cua sohanu jiyataare cariiquia jiyajinia. Janiyari tii niquishii Maajini, naatuhuana puereeta niquishano Casaa nijinia cajiyano. Queraatia sesacaari cuno naatuhuana Casaa cuaqueyacia quiriquiaa, Pueyaso rerequeteja sesaca, juhua Pueyasora na jiyatesacari tama na

cuaqueyajaaja. Siete nacacaracaari quiriquiaa, diez tuhua-jaaracanio. ⁴ Cuno Maajiiri shanohua toqueya cushiriquiaa, naatuque, shaaruquejuhuaj, juhua jiyaniijianucua cushishano. Queraatia shanohua maniniushitiaja casaa cushitiriquiaari: orojiniji shipinijosano casaa, shanohua sai-jiniji shipinijosano tiujiaujuhuaj, noturu shipinijosano sai-jiniji tiujiaunio. Orojiniji shipinishano miacojua mueetariquiaari. Mishaja quiriquiaari puetunu sacuaraatia na mijiosano casaatajanaa, numuetucujusaanu porocua na quini-uucua. ⁵ Na sesaari miriqui naajiotasano quiriquiaa na jiniji. Naa naajiotasano quiriquiaari: “Janiyari puereetuca Babilonia tiacani. Janiyari paanatujuuri nucuani, puetunu mijiria sacuaraatia miishanojuanaa coretanijiojua nucuanio”. ⁶ Maninia cua niquishacari, cuno Paanatu-urijuhua mashaaseca quiriquiaa na puecootesano Pueyaso pueya nanacata. Nojuajaari jiyanojuaa timijia, Jesujiniji pohuatanaa puecoonu porocua na quiniuucua.

Naa cua niquishacari nojuajatej, janiyari jiyanojuaa jiuuji-atereni. ⁷ Pueyaso seruuri jiyacari cua sequeree:

—¿Casaara quia jiuujiateya nocuajini? Quiarijia quia pohuatareera quia niquishanojiniji. Cuno puereeta niquishano Casaa, siete nacacaracani, diez nacajaaracanio, Maaji cajitiya na nijiniani, puetunu cunojuanaari miriqui. ⁸ Cuno puereeta Casaa quia niquishanoni, cunoori tariucuacaanujiniji quijia quiquiaari. Quiarijia saniniuujia, majaari tari na quiniu. Naajaa, quera tacanutaniuhua cuno puequeetuujua raamajiiri, seetanujuanaa puetunujuanaa na shaajasaanuhua cutara. Pueyaso ruuretajaca pueyari jiyanojuaa shiriiquitiuniutianiya nojori jaara cuno puereeta niquishano Casaa niquiri tacatehuano, teyanote tariucuacaanu quijia quiquiaaricuajani, quiarijia saniniuujia majaari na quiniu. Jiya shipiniyaquishacarijia, cuno pueya sesacacuajaari Pueyaso saquiriojosano pueya sesaca naajiotasaqui naajiotasoo quiquiaari.

⁹ ‘Cante niishijiani, nojuaja cuara niishiiria cua pohu-atasano. Cuno puereeta niquishano Casaa, na siete nacacani, cunoori siete jiyaca jiyaniijianucua, mariyata siete tuhua-nanuhua, teyanoojuaa cuno Paanatu cajiyacuajani. ¹⁰ Cuno siete jiyaniijianucujinijinioni, cinco nojorijinijinioori tari shaajasaquiaari. Cuno caapiqui cureenojinijini, niquiriy-atuuri jiyaniijia quia quiarijia. Tamonuuri supueyojua. Nojuaja jaara supuere, saaja rupaquijia rishiniutianiyari jiyaniijia na quishacari. ¹¹ Cuno puereeta niquishano Casaa, teyanote tariucuacaanu quijia quiquiaaricuajani, nojuajaari cuno cinco shaajasano jiyaniijianucujinijinio quiquiaar-

icujaja. Majaari quiarijia na quiniu. Na nuhuaji supuenutani-
 uhuari octavo jiyaniijia na quiniuria rupaquijia. Na nuhuaji
 shaajasaanutaniya cutaraari.

¹² Cuno diez nacajaa quia niquishanojaniuhuj, cunoori
 diez jiyaniijianucuaranocujaja. Nojoriiri cumaaca niqui-
 tiosaanutaniya saaja niquiriyatu hora jiyaniijianucua no-
 jori quiniuria cuno puereeta niquishano Casaata. ¹³ Cuno
 diez jiyaniijianucuaari mariyata niishiriojonutaniya nojori
 cumaquiniuria cuno puereeta niquishano Casaa puetunu
 nojori cumaacatajanaa, jiyaniijiajanaa cuno puereeta niquis-
 hano Casaa quiniuria. ¹⁴ Nojoriiri Borrego Niquiojuata mi-
 aquetoojonutaniya. Borrego Niquiojuaari nojori shocotanu-
 taniya saaja, seetanujanaa Jiyaniijiajanaa na quiniuucua.
 ¡Nojuajaari puetunu jiyaniijianucujanaa Jiyaniijia! Nata
 quiniaa pueyari Pueyaso saquiriojosano pueya, Neyanu toji-
 tijacatuhuj.

¹⁵ Pueyaso seruuri socua cua sequeree:

—Quiaacuajaari cuno Paanatu niquirii puetunu mohua-
 caacuajanaa cajiyano. Cuno mohuacacuajaari queraatia
 tiaca, tamaatiucua pueyapue, tamaatia rupaaca pocujaja-
 cajuhuj, tamaatia jiyacajinia quiijaca pueyano. ¹⁶ Cuno
 puereeta niquishano Casaa quia niquishanoni, na diez naca-
 jaanio, nojoriiri cuno Paanatu niquiniu paniyaquiniutaniya
 tojetaarucujanaa. Na cartetunutaniyari. Tojetaarucua-
 janaa juhuasu na tiujiatunutaniyari. Nojoriiri cuno Paanatu
 miaquenutaniya. Na nuhuaji, na nucuhua catijiatunutani-
 yari. ¹⁷ Pueyasojuanaacuajaari cuno Paanatu paraa ni-
 ishitiutaniya naa nojori miiniuria cuno Paanatutej, taa
 Pueyaso paniya na miishaanuracuajani. Naajuhuj, Pueya-
 soori cuno diez jiyaniijianucua niishiriojotenutaniya jatiqui.
 Naacuajitij, cuno jiyaniijianucuaari roojotoonutaniya no-
 jori cuara cumaquiiria cuno puereeta niquishano Casaa
 puetunu nojori cumaacatajanaa. Naacuajitij, Pueyaso pan-
 ishanoori tohuateesaanutaniya taa na sequequiaaricujani.
¹⁸ Naajuhuj, cuno Paanatu quia niquishanoni, nojuajaari
 cuno puereetuca Roma tiacacuaja, miriqui sequeshiya Ba-
 biloniatani. Nojuajaari puetunu mijiria jiyaniijianucujanaa
 tojitiquiaa nojuaja.

18

Babilonia tiaca catetanujiniji pohuatasano

¹ Naa Pueyaso seru niquitiniu nuhuaji janiyatej, janiyari
 socua tamonu Pueyaso seru niquirii jiyocuaanuji
 roseyanoni. Jiyanohua cumaacaracaari quiriquiaa.
 Na shacantuuca cumaacaari jiya cuhuatariquiaa.

² Jiyocuacaanuji na rupaa paaretaree jiyanohuari. Seetanujuanaa miishocoriquiano na sequesano quiniuucua, nojuajaari juhua tariucua miishano na nacatariquiaa:

—¡Tari saniitiosaaree Babilonia tiaca! ¡Juhua niyareque-tasaareeri cuno puereetuca tiaca! Samaruhua quiquiora jatanishaaree quiarijia saniniuuriija. Naaquiya quiquiora quiniutianiyajaariuhuj, puetunu pueya soosano pueresano jaacuatujuaca casaajanaa quiquioranio. ³ Puetunu jiyacajinijiniojuanaa pueyari sapojonuusaquiaari Babilonia tiacajinijinio niishitiojosanota, juhuajaniya sacuaraatia miijiacajinijio nojori quiniuriajuhuaj, juhua mashaaseca. Naajuhuj, jiyaca jiyaniijianucuaari Babilonia tiacajinia sacuaraatia miijiosano miijioquiaajuhuj, cuno paanatu shiniujiuniuucua nojori. Babilonia tiacajinia quiniaa pueyari puetunu na panishano casamijianaa masejoquiaa puetunu jiyacajinijianaa, saaja tama nojori cuaqueyajaaja nojori shuquiritiniuria. Naacuajitij, cumaneecara na casami niquitiojonuujuaca pueyari jiyanohua cumaneecaraca pueya.

⁴ Na nuhuaji, janiyari tamonu rupaa tojirii jiyocuacaanujini. Babilonia tiacajinia quiniaa Pueyaso pueya sequereeri:

—¡Cua muerasunaa, cuno tiacajiniji nia quiojore, niaa mariqui sesa miijiacara quiriohuari, cuno sesa miijiacana cojiniuucua! Nojoriijiniji nia carajere, niaa mariqui puetunu nojoritijanaa cojiritiasaare naquiya miiniuuri. Nojoricuajaari quera saniitioshiya. ⁵ Cuno tiacajinia sacuaraatia miishanoori puera jiyanohua caneyaree. Juhua tuhuanuuri maashiyaree jiyocuacaanura. Pueyasocuajaari sacuaraatia nojori miijiosano niishiya. Majaari socua tari na naata rejeretanu. ⁶ Babilonia cuaara namishaaria taa naquiya na miijioquiaa tamasacacuaani. ¡Nojuaja cuaara saniitionu caminiujiushaaria saniniuujia, sesa na miiniuucua tamasaca! Babiloniaari juhua pueya raatejoquiaari sacuaraatia na niishishano, sesa miijiacana nojori quiniuria juhua nojuajuhuj. Cunora, nojuaja cuaara puetunu Pueyaso juaaquiacaanaa raatesaaria, tama na suhuocojiniaajaaja mishinishanoni. ⁷ Naatej, taa tama na cuaqueyajaaja na shuqiritiquiaa sacuaraatia na miishacaricuaani, saniniuujia cuaara naa jiyanohua miitiasaariajuhuaj. ¡Jiyanohua tama na cuaqueyajaaja timitiaja na quiniuucujuhuj, cuaara saniitiosaaria! Nojuajaari tama sequequiaajaacujua: “Janiyari niya cajiya shuquiriaatiani, cumaacaraca maaji, pueya tojishano jiyaniijia. Janiyari maja mashiquioni. Majaari quenaaja cua taraajenu quiniutianiya”. ⁸ Cunora, niquiriyatu juucajiniaja, cuno Paanatuuri jiyanohua taraatia miitiasaanutaniya. Jiyacaritij, cusonuunuuri quiniutianiya, naquiya

miiniu, miaajenujuhuaj. Jiyacari catijiatasaanutaniyajaari-uhuj. Jiyanohua cumaacaraca Jiyaniijia Pueyaso quiniuu-cua, nojuajaari naa saniitionutaniya cuno Paanatu.

9 Mijiria jiyaniijianucuaari sacuaraatia miiniuria cojiquiaa cuno Paanatucuaaja, tama nojori cuaqueyajaaja nojori shuquiritiniuria. Cunora, nojoriiri jiyanohua nujuquetunutaniya cuno Paanatu jaara saniitiosaare. Nojori niquishacari najaca tacaano jiya cajiniocua, Babilonia tiaca catesacari, nojoriiri nocua sapiyonuunutaniya. ¹⁰ Nojoriiri na puerenuta na shootianutaniya tucuaaanuji, nojori mariqui saniitiosaarejaariuhuj. Nojoriiri jiyacari naa sequenutaniya Babilonia tiaca:

—¡Juhuej! ¡Quiaa taraatia miishiya tiaca maniniuniaa! ¡Quiaari jiyanohua cumaacaraca quijia juucua Babilonianaa! ¡Quiaari canashiyaquiji saniitiosaaree!

11 Puetunu jiyacajiniajanaa, cumaneecara na casami niqutiojonaa pueyari Babilonia tiacaacua nujuquetunutaniya. Nojoriiri jiyanohua taraatia quiniutianiya nojori niishishacari, nojoritiucua tee na casami niqutiojore na cumaneecarani. ¹² Tucuaaanuji Babilonia tiacajiniara nojori nitiasano casami quijiaari nio: oro, plata, jiyanohua panishano saijiuhuj, noturu shipinijosano sainio. Nitiasaaquiaajaariuhua maniniuqui toqueya linojiniji, sedajiniji toqueya, shaaruque toqueyajuhuj, juhua jiyaniijia cushishano, naatuque toqueyano. Nitiasaaquiaajaariuhua puetunu tamaatia shanohua jaanujua juhuana raquiquia, elefante quiaajiniji shipinijosano casamijuhuj, shanohua naanajiniji shipinijosano casaminio. Nitiasaaquiaajaariuhua bronzejiniji shipinijosano casami, cumueeca casaajiniji shipinijosano casamijuhuj, shanohua mármol saajajiniji shipinijosano casaminio. ¹³ Naajuhuj, nio shanohua jaanujua casami: canela, muesu nunacuhua, catijasocoriquiano shanohua jaanujua casaa, mirrajuhuj, cuaqueyacua shuquiujutiasano shanohua jaanutajano. Nitiasaaquiaajaariuhua jereeca uva caaca, shiyocua, maninia cashojuajuhuj, trigo jajaunio. Nitiasaaquiaajaariuhua casami niyotesano seya, borregohua, caballohua, caballohua jayotasocoriquiano shipinijosano casaanio, cumaneecara niqutiojosocoriquiano pueyajuhuj seya nojori quiniuria. ¹⁴ Jiyacaritij, Babilonia tiacaari naa sequesaanutaniya:

—¡Majaari socua quia mioonu quiniutianiya jiyanohua quia maniniucuasano naana jajau, jiyanohua quioojia jiaatiasano nocuani! ¡Puetunu quia timitiasano casaajanaari maja tari na

quiniu quiniutianiya quiara, shanohua niquishano casami, jiyanhua cumaneecata quia masesano casaminio!

¹⁵ Puetunu cuno casami niquitiojona pueyajanaari jiyanhua casamiriaca quiya Babilonia tiacajinia quinia masejonuucua nojori casami. Maja nojori saniitiosaanurajuhuj, cuno pojoriiri tucuacaanuji na puerenuta nocua nujuquetunutaniya. Nojoriiri na sapuenuta naa na sohuarejotanutaniya:

¹⁶ —¡Juhuej! ¡Babiloniaari tiaca maniniu quijia juucua! Jiyanhua shanohua niquishano quijiaari, taa casamiriaca maajicuaani, na cushishacari na maniniushitiaja casaa. Naa shanohua niquishiyari juhua maaji linojiniji cohuajaque toqueya cushitishano, shaaruque toqueya, naatuque toqueyano juhua jiyaniijia cushishano, orojiniji shipinishano casaata na maniniushishacarijihuhuj, noturu shipinijosano saitiajuhuj, shanohua niquishano saitanio. ¹⁷ ¡Jiyanhua queraatia puetunu na jiiatasano casamijianaari canashiyaquiji catijiasaaree juhua sohuanatuu!

Puetunu pueyajanaa, canapute shoniniacu caminiajina poonijionaa na cumaneecaracuajani, nojoriiri tucuacaanuji shootiariquiaa Babilonia tiaca catetasacari. Naa shootiaturiquiaajaariuhua casami jaqueroojuaca tamaquiicua tiaca tacatajajiniaqueya, ruconaa pueya, buquejina poonijionaa pueyajuhuj, nojori camarucuanio. Puetunu cuno pojorijianaari tucuacaanuji shootiariquiaa Babilonia tiaca cate-tasacari. ¹⁸ Nojori niquishacari najaca nujuuaano jiya cajin-iocuara, nojoriiri na sariyocaturee:

—¿Socua tamonu tiacateeri quiya juhua cuno Babilonia tiacajuhuj? ¡Shaaqui!

¹⁹ Jiyanhua nojori taraajenuta, nojoriiri jiyojua nanooree na nacaacua. Nojori nujuquenuta, nojoriiri na sariyocaturee:

—¡Juhuej! ¡Babiloniaari tiaca maniniu quijia juucua! ¡Puetunu shoniniacu caminiajina buque jiiitanaajanaari jiyanhua casamiriaca quiya, jiyanhua casamiriaca Babilonia quini-ucua! ¡Quiarijia saniniuujia, canashiyaquiji puetunujuanaari shaajasaaree!

²⁰ Jiyacaritij, Pueyaso seruuri naa nacaree:

—¡Nia shuquiriri, jiyocuacaanu quijiacanaa! ¡Babilonia saniitiosaanuucua nia timiquiore, Pueyaso saquiriojosano pueyanaa, Jiyaniijia Jesu jiyaramiquishano pueyajuhuj, Pueyaso sequesano caminiujiuniaanio! ¡Pueyasocuaajaari niaacua namirii Babilonia!

²¹ Jiyacaritij, cumueeca Pueyaso seruuri jiyanhua puereetuuca saajia paree, juhua trigo jajau jacanojotaja saajia. Shoniniacu caminiajina na jatasacari, naa sequereeri:

—¡Taa cua jatasano saajia shaajemaa shoniniacu caminia queronijiniacuaani, quiaari naa shaajasaanutaniya canashiyaquijijihuhaj, Babilonia tiacanaa! ¡Majaari socua quia niquishaanu quiniutianiya! ²² ¡Quia nuucuaari tojetaarucuajanaa sanaaca quiniutianiya! ¡Majaari arpa taquiniojonu tojishaanu quiniutianiya socua, turequenaco jonenenuunujuhaj, trompeta jonenenuununio! ¡Puetunu tamaatia poonijiosano niishijiaca juaashiquiaraca pueyajanaari shaajasaanutaniyajuhaj! ¡Majaari quenaaja niquiriyatu cureenu quiniutianiya quia quishaqui! ¡Naajuhuj, majaari socua riiquiniuuniu tojishaanu quiniutianiya! ²³ ¡Majaari quenaaja niquiriyatu samaritiu niquishaanu quiniutianiya noshiyano quia quishaqui! ¡Naajuhuj, majaari camishacari queranacunuunu cojuatunenu tojishaanu quiniutianiya socua! ¡Quiaari naa saniitiosaareequij, jiyanoehua cumaacaraca quia casami niquitiojonaa pueya quiniuucua puetunu jiyacajiniajanaa! ¡Naajuhuj, quiaari puetunu jiyacajinia quijiaca pueyajanaa shimiojona, sapojosano nojori quiniuria puetunu sacuaraatia casaa quia miiijosanotajanaa! ²⁴ ¡Quiarjia saniniuujia, quiocua tiutiashiyari pueyara Pueyaso sequesano caminiujiuniaa puecoosaanu, Pueyaso saquiriojosano pueya puecoosaanujuhaj, puetunu jiyacajiniajanaa pueya puecoosaanunio!

19

¹ Naa cua tojiniu nuhuajitij, janiyari jiyocuacaanu tojirii queraatia rupaacani. Naa sequeturiquiaa jiyanohuari:

—¡Jiyanoehua maninia pa Pueyaso! ¡Nojuaja pa shuquiritiare!
 ¡Nojuacuajaari pa Jiyanoojia! ¡Nojuajaari jiyanoehua sha-
 cantuuca, tojetaarucuajanaa maninia miiija na quini-
 uucua! ¡Puetunu cumaacaracajaariuhuj! ² ¡Maninia
 na niishiniuucua puetunu cuno Paanatu miishano
 sacuaraatiajanaa, nojuajaari maninia na saniitioree!
 ¡Cuno Paanatuuri jiyacua quijiaca pueya sesoquiaari
 tojetaarucuajanaa, sacuaraatia na miiijosano na ni-
 ishiojosanota! ¡Pueyasoori cunora na saniitioree! ¡Naa-
 juhuj, Babilonia pueconuucua Pueyaso tojtiajaca
 pueya, Pueyasoori na namiriijihuhaj!

³ Jiyocuacaanuji rupaaca cua tojishanoni, nojoriiri naa sequerohuacuhuj:

—¡Jiyanoehua maninia pa Pueyaso! ¡Nojuaja pa timitariquia
 pueyaracaanu! ¡Pueyaracaanu cuno Paanatu sani-
 itiosacari, majaari na najaca turetano quiniutianiya
 quenaaja!

⁴ Cuno veinticuatro niishijiaca jiyaniijianucua, cuno cuatro saminio casaajuhuj, nojoriiri jiyacari jiyocuara jacamaturee Pueyasooacara. Nojoriiri naa timitiaree Pueyaso, cante na shacantuuca cumaacajinia cajiriqiaacuajani. Nojoriiri naa na sequeturiquiaa:

—¡Cuaara naa quiiriatej! ¡Pa Jiyaniijia cuaara timitiasaaria pueyaracaanu!

⁵ Jiyacaritij, tamonu rupaari tojishaaree Pueyaso cajishaquijijianaa. Naa sequeriquiaari:

—¡Pa Pueyaso nia timitiariquia, puetunu na tojtiajaca pueyanaa! ¡Nojuaja nia shuquiritiare, tojishano pueyanaa, niajanijajuhuj, tojishoo pueyanaa!

Borrego Niquiojua camishocoriquiano maaji maniniushishacari

⁶ Jiyacaritij, janiyari queraatia pueya tojirii jiyanohua nacaanoni, juhua puereetuuca sararojua, juhua miacana majacunujuhuj. Puetunu nojoriijianaari naa sequeriquiaa:

—¡Jiyanohua maninia pa Jiyaniijia Pueyaso! ¡Nojuaja pa timitiariquia pueyaracaanu! ¡Nojuacuajaari Jiyaniijianaa! ¡Puetunu cumaacaracajanaajuhuj! ⁷ ¡Pa shuquiriri! ¡Pa timiri! ¡Quiarijiacuajaari Borrego Niquiojua caminiu juuca, pueyaracaanu na saquiriojosano pueya rupuenura nojuaja! ¡Cunora, nojuaja pa timitiare jiyanohua! Necoranoori tari maniniushirii na caminiuria. ⁸ Maniniuqui lino toque cushitishaareeri, cohuajaque shacantuque. Necoranooni, nojoricuajaari puetunu nocua tiuujica pueyajanaa. Naajuhuj, cuno cohuajaque na toqueni, cunocujaari puetunu maninia nojori miijosanojuanaa.

⁹ Pueyaso seruuri jiyacari cua sequeree:

—Quia naajiotare nio: “Shuquiriaatia quiijica cutaraari noo pojori, canapuate Borrego Niquiojua camishacari queranacujuajiniara masuasanoni”.

Naa cua sequeree socuaari:

—Cua sequesanooni, cunoori seetanu Pueyaso rupaajanaa.

¹⁰ Jiyacaritij, janiyari Pueyaso seruucuara mojuquetareeni, juhua Pueyasooacara, nojuaja cua timitianura juucua. Cua sequequee saajaari:

—¡Maja pueyanonaa! ¡Maja naa quia miiniu! Janiyari nareja Pueyaso seruni taa quiajanijacuaani, juhua quia tapueyocuaajuhuj, noo pojori canapuate pa Jiyaniijia Jesujiniji pohuatanu tarinitiaashijiacani. ¡Pueyasooacara quia mojuquetare cutara, quia timitianura nojuaja! Puetunu Jesujiniji pohuatasanojuanaani, cunoori Pueyaso Sohuanu niishitishano na pohuataanaa, janiya, niajanijajuhuj.

Cohuajohuana caballo nijinia cajiniajiniji pohuatasano

¹¹ Na nuhuaji, janiyari jiyocuacaanu Pueyaso quiquio niquirii tariucua riatasanoni. Janiyari tii niquirii cohuajohuana caballoni. Na nijinia cajiniaari caapiqui sesacaraca quiriquiaa. Nioori na sesaca: “Na sequesano miijia”, “Seetanu sequejajanaa”. Naari na sesaca. Tojetaarucujanaa maninia miijia na quiniuucua, puetunu niishijajanaajuhua, nojuajaari seetanujuanaa maninia saniitiojua sesa miijiaca. Naajuhua, majaari najuhuana na miaquetojonu na paraata. ¹² Puetunu casaajanaa niquijia na quiniuucua, na namijiaari juhua mani rimianacuyano niquishaariquiaa. Jiyaniijianucuarano shipinijosano nacaqueya pasacoriqiaa na nacaacuaari. Cunoori seetanujuanaa Jiyaniijajanaa na quiniuucua. Tamonu na sesaari naajiotasano quiriquiaajuhua. Cuno sesaari tama na niishishanojuaaja cutara. ¹³ Na toqueeri nanacatuque quiriquiaa. Nojuajaari tariucuacaanu nio sesaraca quijiacuaja, “Pueyaso Rupaa”. ¹⁴ Jiyocuacaanu nata quiniaa na soldadohuari na nuhuaji sacuariquiaa. Puetunu nojorijianaari cohuajohuanaca caballohua nijinia cajitiuriquiaa. Naajuhua, nojoriiri linojiniji cohuajaquijasano toqueyaraca quiriquiaa, jiyanohua cohuajaqueya tojetaarucujanaa. ¹⁵ Nojori Jiyaniijajanaa rupaamaji, nijiniaquetucua mueruuri puereeta mueranacuriquiaa. Cunoori puetunu mijiria jiyacajiniajanaa na tojitiaashijiaca na puetujutajara. Nojuajaari jiyacari nojori Jiyaniijajanaa quiniutianiya, nojori na jitianura jiyanohua na cumaacata. Puetunu cumaacaracajanaa Pueyaso juaaquiacata nojori saniitionutaniyari, naatej, taa uva rapijioishiya na caaca shoonuracuaani. ¹⁶ Na tucuaque toqueecua, na ruhuajacuucujuhua, naa naajiotasanoori quiriquiaa: “Jiyaniijianucua Jiyaniijajanaa”, “Camarucua Camarnujuanaa”.

¹⁷ Na nuhuaji, janiyari tamonu Pueyaso seru niquirii pananuucua nujuaanoni. Nojuajaari puetunu jiya cajiniocua jaacuatujuaca casaajanaa jiiquioonuuriqiaa jiyanohua, teyano jaacuatujuacate shu miojonuujuacacujani. Naa cuno jaacuatujuaca casa sequeriquiaari:

—¡Miji, nia nia rerejosee! ¡Pueyasoori nia queranacutenu-taniya! ¹⁸ ¡Nojuajaari queraatia shu nia mianuutenutaniya! ¡Cuno shuuri jiyaca jiyaniijianucua shu, soldadohua camarucua shu, jiyanohua cumueeca puereyaquijiaca shu, caballohua shu, na nijinia cajitiuniaa pueya shujiuhua! ¡Camarucuaaju pueya shuuri quiniutianiyajuhua, poonijotesano

pueya shu, tojishoo pueya shujiuhuaaj, tojishano pueya shu-nio!

¹⁹ Jiyacaritij, janiyari cuno puereeta niquishano Casaa niquiriini, mijiria jiyaca jiyaniijianucuanio, puetunu nojori soldadohuatajanaa. Puetunu nojorijianaari tariucua rerejonu quiriquiaa na miaquetojonura cohujohuana caballo nijinia cajiyanta, nata quiniaa na soldadohuatano.

²⁰ Cuno na naca pishano cushiriinohua puereeta niquishano Casaari jiyacari quiasaaree, narta puereeta niquishano Casaanio. Nojuajaari cumaacaraca quiriquiaacuaja mijiria quijiaca pueya na sapojonura na cumaacata na miishanota, nojori na tiutiniuria na naca pishano cushiriinohua Casaacua. Naa na sapojonuucua mijiria quijiaca pueyatej, nojoriiri nojori cuaqueya tarinitiaquiaari na naca pishano cushiriinohua Casaa sesa naajiotasaanura nojoriicua. Naa-juhuaaj, nojoriiri juhua cuno puereeta niquishano shipinishano Casaacuara mojuquetacojua quiquiaari juhua Pueyasooacuara. Jiyacaritij, cuno caapiqui puereeta niquishano Casaari azufreta noshiyano mani quiquiojinia quejoosaree saminiucujaja. Nojoriiri tii pueyaracaanu naquiya mishaanutaniya. ²¹ Puetunu nojoritia quiniaajanaari saniniujia puecoosaree nijiniaquetucujaja mueruuta, teyanote cohujohuana caballo nijinia cajiyano rupaamaji mueranacuriquiaacuajani. Puetunu jiya cajiniocua jaacuatujuaca casaajanaari nojori shu tooquioree jiyanohua.

20

Mil marijara Satanás morosaanujiniji pohuatasano

¹ Na nuhuaji, janiyari tamonu Pueyaso seru niquirii jiyocuacaanuji roseyanoni. Puequeetuuju raa riatataja patariquiaari, puereetiuyocua cumayocua shipinishano casaanio, Pueyaso Paraca na morotajara. ² Pueyaso seruuri cuno naatuhuana Naaqueru juhua cohuaniquia niquishano quiasee. Na morojoreeri mil marijara. Nojuacuajaari cuno tariucuaanu Soconu, samaruhua jiyaniijiajanaatuhuaaj. Na sesaari "Satanás". ³ Maninia na morojonu nuhuaji, Pueyaso seruuri puequeetuuju raama na jartaree. Raa tiotiu mishiquiorohuari. Tiotiu rupanacureeri, maja na riatasaanura. Sesaacaari naa mishiquiosaareequij mijiria quijiaca pueya na sapojiyaquiniuucujaja cuara na shocojorejaatijia mil marijia. Cuno mil marijia jaara na shocojore, rupaquijia cartesaanutaniuhuari na saniitiosaanuharajanaa cutara.

⁴ Janiyari jiyacari queraatia pueya niquirii jiyaniijia cajitiucujania cajitiuyanoni. Nojoriiri nequesoreenaara

Pueyaso jiyatesano pueya quiriquiaa, mijiria quijiaca nojori jiitianura. Janiyari noo pojori sohuanuhua niquirijiaaniuhuj, canapue te nacareesaquiaaricujani nojori poojotanuucua pa Jiyaniijia Jesujiniji, Pueyaso rupaa tojtiajaca nojori quiniuucujuhuj. Nojori cutaraari cuno na naca pishano cushiriiniohua Casaacuara jacamatiuyaquiriquiaari tojetaarucujanaa, juhua nojuaja niquishano shipinishano Casaacuarajuhuj. Naajuhuj, majaari nojori shanacunu quiquiaari cuno puereeta niquishano Casaa sesa naajiotasaanura nojoriicua. ¡Cua niquishacari, nojoriiri cua niquiara samiiticoquee, jiyaniijianucua nojori jiyatesaanura! Mil marijiaari nojori shocojoree, jiyaniijianucua nojori quishacari pa Jiyaniijiaata. ⁵ Saniniuujia, narta macunucuaari maja na samiitianijiosaanu quiriquiaa cuno mil marijia cuaara shocojorejaatijia. Nio macunucua samiitianijiosacari cua niquishanoni, cunoori coteenujanaa Pueyaso samiitianijiosacari pueya. ⁶ Shuquiriaatia quijiaca cutaraari noo pojori, canapue Pueyaso samiitianijionutaniya coteenujanaacuajani. Nojoriiri jiyacari tojetaarucujanaa maninia quijiacara jatanishaanutaniya pueyaracaanu rishijia nojori quiniuria. Naacujitij, Pueyaso ruuretajaca pueya jaara puetunu shaajasaarejanaa, jiyacari majaari Pueyaso pueya pacutenu quiniutianihua cusonu. Saniniuujia, nojoriiri pueyaracaanu shamaatia timitianutaniya Pueyaso, Cristonio. Naajuhuj, nojoriiri jiyaniijianucua quiniutianiya Cristota, mijiria quijiaca nojori jiiitasacari cuno mil marijiaara.

Sesaaca saniitiosacarijanaa cutara

⁷ Cuno mil marijia shocojonu nuhuaji, Satanásri tohuatesaanutaniuhua na nujuatesaquiji. ⁸ Nojuaja jaara tohuatesaare, quianutaniyari puetunu jiyacajinia quijiaca pueyajanaa na sapojonura, Gog pueya, Magog pueyano. Nojori na sapojonuta, nojuajaari puetunu jiyaca jiyaniijianucujanaa rerejotenutaniya, puetunu nojori soldadohuatajanaa, nojori miaquetojonura pa Jiyaniijiaata, puetunu na pueyatajanaano. Nojori soldadohuari jiyanohua queraatia pueya quiniutianiya, juhua shoniniacu caminia shuriuquioco paa-
jia jaaquia. Majaari na naata serojosaanu.

⁹ Cua niquishacari, tojetaarucujanaa jiyanohua queraatia pueyari nijioriquiaa. Jiya pueturiquiaa puetunujanaari, juhua tereya nojori quiniuucua. Nojoriiri Pueyaso panishano tiaca cosejoree, cuno tiaca shocua quijiaca Pueyaso

pueyano. Jiyacaritij, maniiri jiyocuacaanuji tinishaare nojoriicua. Puetunu cuno pueyajanaari catijiasaaree tojetaarucujanaa. ¹⁰ Satanás, cante puetunu cuno pueyajanaa sapojoreecuajani, nojuajaari caminiajinia jataasaaree tee cuniqui mani noshiya azufretacuajani. Tariucuacaanu tii jaqueroosaaquiaaricuaajaari na naca pishano cushiriinohua Casaa, narta puereeta niquishano Casaanio. Cunocuajaari mijiria quijiaca pueya sapojoquiaaricuaaja, na naca cushiriinohua Casaacuara jacamatujuaca nojori quiniuria. Nojoriiri tii miitiasaanutaniya tojetaarucujanaa pueyaracaanura, juuca, niucuanio.

Macunucua nequesoreesacari cohuaja cajitiu tacoji

¹¹ Na nuhuaji, janiyari Jiyaniijijanaa cohuaja puereetuca cajitiu niquiriini, tii cajinianio. Na niquiara, jiyari puetunu shaajequeejanaa, jiya cajiniocuanio. Majaari socua na niquishaanu quiriohua. ¹² Jiyacaritij, janiyari puetunu macunucujanaa niquirii nujuatiuyano cuno cohuaja cajitiu tacojini; jiyaniijianucua, tojishoo quijiaca pueyano. Jiyacaritij, na cohuaja cajitiujinia cajiniaari na nequesoreetuneeca riataqueree, socua tamonu nequesoreetuneenio. Cuno nequesoreetuneejinia naajiotasano quiyacuajaari Pueyaso saquiriojosano pueya sesaca, pueyaracaanu rishijiaca nojori quiniuria. Puetunu cuno tariucuaacaanu macunucujanaari nequesoreesaaree puetunu nojori miishanojinijijanaa, taa cuno nequesoreetuneecejinia na naajiotasaaquiaaricujani. ¹³ Cua niquiara, macunucua quiquiojinia racatasano puetunu cusonuuno sohuanuhujanaari na cuaqueya rupuetesaarohua, shoniniacu caminiajinia moquecono, jiyacua moquecononio. Puetunu nojorijianaari nequesoreesaaree taa miijiaca nojori quiquiaaricujani. ¹⁴ Na nuhuaji, Cusojuana, macunucua Quiquiojuhuaj, nojoriiri mani noshiyano caminiajinia jaqueroosaaaree. Canapuate cuno mani noshiyano caminiajinia quejoosocoriquiano pueyacuajani, nojoriiri cusonuunu pacuteriquianocuaaja. ¹⁵ Naacuajitij, canapuate Pueyaso samitianijosocoriquianohua nequesoreetuneejinia naajiotasoo quiriquiaani, nojoriiri mani noshiyano caminiajinia quejoosaaree pueyaracaanura.

21

Quiarinio jiya cajiniocuajiniji pohuatasano, quiarinio jiya jinijinio

¹ Na nuhuaji, janiyari quiarinio jiya cajiniocua niquiriini, quiarinio jiyano. Coteenujanaa jiya cajiniocuaari tari shaa-jasano quiriquiaa, jiyano. Naajuhuj, majaari shoniniacu

caminia quiniu quiriquiaa tari. ² Janiyari jiyacari quiarinio Jerusalén tiaca niquirii Pueyaso Quishaquiji roseyanoni. Tojetaarucujanaa shanohua maniniushitishano quiriquiaari, juhua neyacarano camishocoriquiano niyacoo. ³ Naajuhuj, janiyari Jiyaniijajanaa cajitujiniji tojirii jyanohua nacanuni. Naa sequeriquiaari:

—¡Pueyaso Quiquioori pueya tajinia quiya tari! ¡Nojuajanaari nojoritia quiniutianiya! ¡Nojoriiri na pueya quiniutianiyajuhuj! ¡Nojuajaari nojori cojiniutianiya, nojori Jiyaniijajanaa na quiniuria, maninia na jiitianura nojori! ⁴ ¡Nojuajaari puetunu nojori namijiaacajanaa tuujunutianiya! ¡Jiyacaritij, majaari pueya niishiniu quiniutianiya shaajenu, sapuenu, taraajenu, nootunenunio! ¡Puetunu cuno taraatia miiniucujajaari tari shaajasano quiriquiaa!

⁵ Na nuhuaji, Jiyaniijajanaa cajitujinia cajiniaari naa sequeree:

—¡Cua tojiri! ¡Janiyari quiariniora miijia puetunu casaajanaani!

Cua sequerejaariuhuj:

—Cua sequesano quia naajiotare. Seetanujanaari cua sequesano. Janiyacujajaari cua sequesano tohuateequiaa pueyaracaanuni.

⁶ Cua sequerohuariuhuj:

—Cua sequesano cua miishocoriquianoni, janiyari tari na tucuatarae miiniuni. Janiyari quijijuhuanani. Janiyari pueyaracaanu quiriquianojuhuj. Janiyari puetunu casaajanaa coretanijiani, na shaajajajuhuj. Cante jiyamueyani, janiyari pueyaracaanu pacartaja samo nacajiniji na raatenutaniyani, na naatanuhuara. Cuno samiitianijia mohuacani, cunoori cua Sohuanucujaja. Janiyari nareja na niquitioquiaani. Majaari na sami cua masenu quiquiaa na ratuna. ⁷ Cante puetunu casaajanaa rejeretaja quijiani, cua tojijia na quiniuucua, nojuajaari puetunu cua jiitiasanojuanaa jiitiana quiniutianiya. Nera, janiyari na Pueyaso quiniutianiyani. Nojuajaari quiyanu quiniutianiyacujua. ⁸ Sesa pueya saniniuujia, nojoriiri puetunu quejoosaariquianojuanaa azufreta noshiyano mani caminiajania. Naa quejoosaanutaniyari nio pojori: Pueyaso tojitiaashijiaca pueya, puerejaca nojori quiniuucua, Pueyaso Rupaacua tiuyashijiaca, soosano pueya tama sesa nojori miiniuucujaja seseno, pueya moojuaca, na camishoo maajipohua numuetucunuujaca, shimiacuri, shipinijosano casaacuara jacamatujuaca juhua Pueyasooacuara, puetunu cuaracashijionujuaca pueyajanaanio. Puetunu cuno pojorijianaa jaara nequesoreesaare, nojoriiri

puetunu taanuusaanutaniyajanaa Pueyaso shuriucuaji. Nojoriiri mani noshiyano caminiajinia quejoosaanutaniya, pueyaracaanu naquiya nojori miishaanura tii. Cunocujaaari sequeshiya, “pueya pacutesacariuhua cusonu”.

Quiarinio Jerusalén tiacajiniji pohuatasano

⁹ Janyacuajaari tari nia pohuataree cuno siete Pueyaso seyajinijini, canapuate siete miacojua patootanaa quiquiaaricujani, mishaja Pueyaso saniitotajata. Niquiriyatu nojorinjiniioori cucua nimiaa. Nojuajaari cua sequesee:

—Miji. Quia niquitiriiria Borrego Niquiojua niquiorano. Nojuacuajaari pa Jiyaniijia pueya, na quiquiojaariuhuj.

¹⁰ Jiyacaritij, nojuajaari cua sohuanu jiyataaree jiyanhua puereetuca jiyaconaja tuhananuucua. Tiji cua niquitirii cuno puereetuca quiarinio Jerusalén tiacaari, Pueyaso shuriucuaji roseyano. Tojetaarucujanaa shanhua maniniushitishano quiriquiaari.

¹¹ Nenecuariquiaari Pueyaso shacantuuca cumaacata. Na nenecuanuuri juhua jiyanhua panishano saajia nenecuanu quiriquiaa, juhua jaspe saajia. Maatia niquishiyari na tamajiria, juhua cohuaja motiiquio. ¹² Cuno tiaca shocua matacaari jiyanhua puereetuca quiriquiaa, jiyaconajajuhuj. Tiaca shocua matacaari doce tiotihuvaraca quiriquiaa. Niquiriyatu Pueyaso seruuri puetunu cuno tiotiuujinijijianaa nujuaturiquiaa. Naajuhuj, supuetana Israel doce niquiohuacuajinio supueno doce pueyapue sesacaari puetunu cuno tiotihuacuajanaa naajiotasano quiriquiaa.

¹³ Jiuujianaraca tiotihuvari pananu muetasamajiria quiriquiaa, cuno tiaca matacaacua. Socua jiuujianaraca tiotihuvari quiriquiaa pananu muetasamaji miaquetajara. Naajuhuj, socua jiuujianaraca tiotihuvari pananu muetasamaji muenecara quiriquiaa. Socua jiuujianaraca tiotihuvari quiriquiaa pananu tiuquishocora. ¹⁴ Cuno tiaca matacaari doce puereetujuaaca saicua nujuaturiquiaa. Borrego Niquiojua doce jiyaramiquishano pueya sesacaari cuno doce saicua naajiotasano quiriquiaa.

¹⁵ Cuno Pueyaso seru cuata pocoojoriquiaani, nojuajaari orojiniji shipinishano shanacujutaja maca mueturiquiaa. Na mueturiquiaari nata na shanacujunura cuno tiaca, na tiotihuua, tiaca shocua matacanio. ¹⁶ Cuno tiacaari jiyanhua tucuhuaa quiriquiaa. Na cajiniocuaari mariyata juhua na tucuhuaa quiriquiaajuhuj. Maninia tiasano quiriquiaari, maja rimiajata. Pueyaso seru shanacujunu nuhuaji puetunu cuno tiacajanaa, mariyata dos mil dosciento kilómetro quiriquiaari na tucuhuaa, na jiyaconaja, na cajiniocuanio. ¹⁷ Na nuhuaji, tiaca

mataca shanacujureejaariuhuaj. Setenta y cinco metro jitiariquiaari. Pueyaso seru shanacujutaja tucuaneeeri mariyata juhua mijiria pueyano shanacujutaja quiriquiaa. ¹⁸ Cuno tiaca matacaari puetunu jaspe saijinijijianaa shipinishano quiriquiaa. Tiacaari saniniuujia saaja orojiniji shipinishano quiriquiaa, maja quenaaja tamonu casaata cojitishano. Naacujitij, cuno oroori juhua cohuaja motiiquio quiriquiaa. Maatia niquishiyari na tamajiria. ¹⁹ Cuno mataca nujuataja doce sairi queraatia tamaatiujiaaca shanohua niquishano saitia maniniushitishano quiriquiaa. Cuno mataca nujuataja doce saijinijnioni, coteenu saajaari jaspe saitia maniniushitishano quiriquiaa. Jaspe sairi neeruca cojitishano pocojuanaqueta. Segundo saajaari zafiro saitia maniniushitishano quiriquiaa. Zafiro sairi nentujuaaca naata. Tercero saajaari ágata saitia maniniushitishano quiriquiaa. Ágata sairi tejatujuaaca neeruca. Cuarto saajaari neeruca esmeralda saitia maniniushitishano quiriquiaa. ²⁰ Quinto saajaari ónice saitia maniniushitishano quiriquiaa. Ónice sairi pocojuanaque naatuuca cojitishano. Sexto saajaari naatuuca cornalina saitia maniniushitishano quiriquiaa. Séptimo saajaari crisólito saitia maniniushitishano quiriquiaa. Crisólito sairi tiijaaca. Octavo saajaari berilo saitia maniniushitishano quiriquiaa. Berilo sairi neerujuaaca juhua naashi. Noveno saajaari topacio saitia maniniushitishano quiriquiaa. Topacio sairi jiyanhua pocojuanaque. Décimo saajaari crisoprasa saitia maniniushitishano quiriquiaa. Crisoprasa sairi jiyanhua neerujuaaca. Undécimo saajaari jacinto saitia maniniushitishano quiriquiaa. Jacinto sairi jariya naata naatuuca. Duodécimo saajaari jiyanhua nentuuca amatista saitia maniniushitishano quiriquiaa. Puetunu cuno saijianaari jiyanhua shanohua sai, shacantujuaaca. ²¹ Tiaca shocua mataca doce tiotihuari noturu shipinijosano saijiniji shipinijosano quiriquiaa. Niquiriyatu tiotiuuri niquiriyatu noturu saajiajiniji shipinishano quiriquiaa. Naa shipinijosano quiriquiaari puetunu cuno doce tiotihuajanaa. Tiaca nuucuacaari tojetaarucujanaa orojiniji shipinishano quiriquiaa. Jiyanhua maninia cuno oro quiniuucua, Pueyaso shacantuucaari na tohuariquiriquiaa, juhua motiiquio cohuajaco na quiniuucua.

²² Cuno tiacajinia, majaari cua niquiniu quirii Pueyaso Quishaqui, tii pa rupuenura nojuaja. Cuniqui, majaari socua Pueyaso Secojoua tia panishaanu. Puetunu cumaacaracajanaa Pueyasojuanaari tii quiyacuaja,

Borrego Niquiojuajuhuaaj. Puetunu cuno tiacajanaari nojori quishaquicuaja, pueyaracaanu nojori rupuesano pa quiniuria. ²³ Cuno tiacaari maja na paniniu pananu na cuhuatariquiano, racajuhuaaj. Pueyaso shacantuuca cumaacacuajaari na cuhuataa. Borrego Niquiojuacuajaari na cuhuatana. ²⁴ Puetunu jiyacajinia quijiaca pueyajanaari cuno tiaca caaniuji quijiaca quiniutianiya. Puetunu jiyaca jiyaniijianucujanaari socua nojori panishano casami patootanutaniya nojori cuhuatana tiacajiniara, Jiyaniijajanaa nojori niquitiosocoriquiano. ²⁵ Cuno tiaca tiootiuhuari pueyaracaanu riataquesano quiniutianiya, juuca na quiniuucua pueyaracaanu. Cuniqiu, majaari quenaaja niucua niishishaanu quiniutianiya. ²⁶ Jiyajinia quijiaca pueyari socua na panishano casami patootanutaniya cuno tiacajiniara. Cuno tiacaari jiyanohua nojori timitiasano quiniutianiya. ²⁷ Saniniuujia, maja cutaraari sesa casaa tiuquinishaanu quiniutianiya cuno tiacajinia. Naajuhuaaj, majaari sesa miijiaca tiuquiniu quiniutianiya tii, sapojonuujucanio. Saaja noo pojori cutaraari tii tiuquitianutaniya canapue sesacate pueyaracaanu rishijiacarano Borrego Niquiojua naajioneejinia naajiotasano quiyacuajani.

22

¹ Na nuhuaji, Pueyaso seruuri cua niquitirii pueya samiitianijiotaja moo, cohujanacu tojetaarucujanaa. Nenecuariquiaari. Cuno mohuacaari Jiyaniijia Pueyaso cajitiujiniji pacartariquiaa, tee Borrego Niquiojua cajiyajaaniuhuaaj. ² Samiitianijia naanaari tiaca nuu jiuujiaaco nujuaturiquiaa, cuno moo shuriuquiocojuhuaaj, niiquijiria, na taquijirianio. Cuno naanaari puetunu racarajanaa muetujuaca. Naacuajitij, puetunu marijarajanaa, doce caminiujiya muetunuuri. Na muezacaari maninia, puetunu jiyacajinia quijiaca pueyajanaa naarajotajara. ³ Cuniqiu, majaari socua Pueyaso sesacasano casaa quiniu quiniutianiya. Naacuajitij, Pueyasojuanaa, Borrego Niquiojuajuhuaaj, nojoricujajaari cuno tiacajinia quijiaca quiniutianiya, Jiyaniijajanaa cajitiu quiniuucua tii. Nojori tojtiajacaari nojori timitianutaniya pueyaracaanu tii. ⁴ Nojoriiri Pueyaso jiquioco shootiajaca quiniutianiya. Na sesaari nojori jiniji naajiotasano quiniutianiya. ⁵ Cuniqiu, majaari niucua niishishaanu quiniutianiya. Tii quijiaca pueyari maja na paniniu quiniutianiya samaritiu, pananunio. Jiyaniijia Pueyasojuanaacuajaari nojori cuhuatanutaniya. Nojoriiri

jiyaniijianucua quiniutianiyajuhua, puetunu Pueyaso shipinishanojuanaa nojori jiitianura pueyaracaanura.

Jesucristo quera tiuquiuhua

⁶ Na nuhuaji, Pueyaso seruuri cua sequeree:

—Cua niqutishano quiajanianiyani, cua sequesanojuhuaj, puetunu cunajuanaari seetanujuanaa. Puetunujuanaari tohuateeriquiano. Pueyasoori na Sohuanuta niishitiquiaa na sequesano caminiujiuniana pueya, nojori pohuatanura pueya niquiara na niishitini panishano. Naajuhua, nojuacuajaari quiarijia na seru jiyaroree, na tojtiajaca na niishitiniuria taa quiari naataja nojuaja tucuatantaniya puetunu na sequesanojuanaani. ⁷ Pa Jiyaniijiacuajaari naa sequeya: “Janiya quera tiuquiuhua niaacuani”. Shuquiriaatia quijiaca cutaraari noo pojori, canapute nio naajioneejinia Pueyaso-jiniji niishitishano tojjiacani.

⁸ Janiyajanaacuajaari nio cua naajiotasano niquiniani, na tojiniajuhuaj. Janiya Juanni. Naa cua niquiniu nuhuajitij, cua tojinu nuhuajijihuhua, janiyari Pueyaso seru pajama mojuquetareeni. Janiyari naa mojuquetaree nojuaja cua timitianura juucuanu, juhua Pueyaso. ⁹ Nojuajaari cua sequequee saaja:

—¡Maja naa miiniu pueyanonaa! Janiyari Pueyaso seru juhuaj, juhua quiajanianiyajuhua, juhua puetunu quiarta Pueyaso sequesano caminiujiuniana pueyajuhua. Naajuhua, nio naajioneejinia naajiotasano tojjiaca pueyani, nojoriiri cuarta Pueyaso seyajuhua. ¡Pueyasojuanaa quia timitiare cutara!

¹⁰ Cua sequereejaariuhua:

—Pueyaso niishitishano nio naajioneejinia quia naajiotasanoni, cunoori maja saa quiaraja. Puetunu pueyajanaa cuaara na niishiirianoj. Puetunu niya naajiotasanocua-jaari quera tohuateya. ¹¹ Naacuajitij, canapute sesa na miiniu tarinitianu paniyaquiyani, sacuaraatia miijiojuacajuhua, cuaara na tarinitiaaquiiriaqui. Saniniuujia, canapute maninia miijiojuaca cutarani, saaja Pueyasora poonijionuujacajuhua, nojori cuaara tarinitiaaquiiria maninia nojori miiniujiuhua.

¹² Pa Jiyaniijiacuajaari naa pa sequeya:

—¡Taaquiriririni! ¡Quera tiuquiuhuanijia! Janiyari cua tojtiajaca cua niqutijosocoriquiano casaa tiuquitianutaniuhuanu. Janiyari puetunu nojorijianaa nareja niqutiojonutaniyani, maninia nojori miiniuucua quiria, nojori miishano jaara maninia quiri. ¹³ Pueyaso Rupaa cua quiniuucua, janiyari puetunu Pueyaso sequenu panishanojuanaa caminiujiuniani. Janiyari quijiajuhanani. Majaari cua supueno

quiquiaari. Janiyari puetunu casaajanaa coretanijiani, na shaajariquianojuhuaj.

¹⁴ Shuquiriaatia quijiaca cutaraari noo pojori, canapuate juhuacarijia nojori jiuujia jeequecanu Borrego Niquiojua nanacatani. Nojoriiri juhua cohuajaque toqueyaraca quiniutianiya cua niquiara. Naacujitij, nojoriiri tiuquitianishaanutaniya Pueyaso quijia tiacajinia, nojori mioonura pueyaracaanu pueya rishitijia naanajiniji. ¹⁵ Saniniuujia, nio pojoriiri Pueyaso tiaca mataca tamajiria jateenutaniya: sacuaraatia casaa miijiaca, shimiacuri, na camishoo maajipohua numuetucunujuaca, narta pueya puecojuaca, shipinijosano casaacuara jacamatujuaca juhua Pueyasooacuara, cuaracashijionu porocua pueyano.

¹⁶ Janiyacuajaari cua seru jiyarorucuaa quiocuani, na nishitiniuria quiajaniya puetunu niya quia naajiotasanojuanaa, saniniuujia Pueyaso pueya maapue niquiara na caminiujiushaanura. Janiyacuajaari Jesuni, supuetana David niquiohuacuajinio caneno pueyajinijinio supueno, Jiyaniijijanaa cua quiniuria David niti. Naajuhuj, Pueyaso Niyanu cua quiniucua, janiyari noo rijiani, joojeatej, taa janiyajiniji naajiotasano quiya tariucuacaanu Pueyaso Rupaajiniacujani.

¹⁷ Pueyaso Sohuanuuri Borrego Niquiojua niquioranota naa sequetiuya: “¡Miji Jiyaniijiana!” Canapuate naa nio naajioneejinia naajiotasano tojiyani, nojori cuaara naa sequeerajuhuj: “¡Miji!” Cante jiyamueyani, nojori cuaara niriya, Pueyaso samiitianijiotaja mohuacajiniji nojori ratunura. Na ratunaa pueyari, maja na ratunu sami na cumaneeca mashiniquishaanu.

¹⁸ Cante nio naajioneejinia juhuacarijia Pueyaso niishitishano tojiriini, taa Pueyaso miiniutianiyan, janiyajanaaria numooteyani, majaari quenaaja na pohuatasano nia jataniniu. Cante niya pohuatasano maateya socuani, Pueyasoori na saniitionutaniya nio naajioneejinia na pohuatasano naquiya na miitiaja casaata. ¹⁹ Naajuhuj, cante nio naajioneejinia pohuatasano cuaracashitijiani, Pueyasoori cuno pueyano taanuunutaniya, maja na quijia tiacajinia na tiuquiniuria. Naacujitij, majaari nojori mioonu quiniutianiya cuno tiacajinia naana jajau, pueyaracaanu rishijiaca nojori quiniuria, taa nio naajioneejinia na pohuatashiyacujani.

²⁰ Cante nio sequeyacujani, nojuajaari naa sequeya: “Taaquiririnij, quera tiuquihuanijia”.

Jaa, Jiyaniijia Jesunaa. ¡Naacuaaquinatejaj! ¡Ritia quia nimiohua canaacua!

21 Pa Jiyaniijia Jesu cuaara puetunu niajaniyajanaa
cumaquiiria na Sohuanuta.